







SANCTI
THOMAE AQUINATIS
OPERA OMNIA
TOMUS XXII.

Digitized by the Internet Archive
in 2011 with funding from
University of Toronto


<http://www.archive.org/details/sanctithomaeaqi22thom>

SANCTI
THOMAE
AQUINATIS
DOCTORIS ANGELICI
ORDINIS PRAEDICATORUM
OPERA OMNIA

AD FIDEM OPTIMARUM EDITIONUM

ACCURATE RECOGNITA

TOMUS XXII.



PARMAE
TYPIS PETRI FIACCADORI

MDCCCLXVIII

THE NORTH

DOCTOR'S REPORT

OPPORTUNITIES


1771

SANCTI THOMAE

AQUINATIS

OPUSCULA ALIA DUBIA

VOLUMEN PRIMUM



DEC 2 1975

SANCTI
THOMAE AQUINATIS

DOCTORIS ANGELICI

ORDINIS PRAEDICATORUM

OPUSCULA ALIA DUBIA

ADJECTIS BREVIBUS ADNOTATIONIBUS

VOLUMEN PRIMUM

COMPLECTENS

SCRIPTUM IN IV. LIBROS MAGISTRI SENTENTIARUM ET OPUSCULUM DE PRAESCIENTIA ET PRAEDESTINATIONE



PARMAE

TYPIS PETRI FIACCADORI

MDCCCLXVIII

1917

1917
Tribute
to
the
p
ex
pos
p
t
p
h

1917

PRAEMONITIO TYPOGRAPHI

Inter ceteros libros S. Thomae Aquinatis ingenio tributos numeratur etiam *Scriptum aliud in IV. Libros Sententiarum, ad Annibaldum Cardinalem*. Tantum vero abest ut merito, quin potius nec uni eidemque auctori (quisquis ille fuerit) referendum est integrum opus; ut manifeste deprehenditur, si quis duorum priorum librorum stylum, sententiam, exponendique rationem expendens, hosce cum duobus postremis contulerit. Nihilominus fidem nostram liberare cupientes initio datam Opera omnia quaecumque fuerint etiam dubiae notae S. Doctori a veteribus adscripta, recudendi, hoc volumine qui xxii. prodit, memoratum opus ad accuratiores editiones digessimus. Consequitur volumenque claudit Opusculum *De Praescientia et Praedestinatione ad Fratrem Reginaldum*; de quo, sive intrinseca argumenta, sive testimonia spectes, omnino aliud Critices iudicium esse oportet. Nam et mira illa Thomisticae sententiae simplicitas et sobrietas in eo relucet, ut eos qui sint in Angelicis hujus mentis lucubrationibus familiariter versati, minime fallere queat: et a pluribus Perill. Ord. Praedicatorum doctissimis viris tamquam

germanus S. Thomae fetus habitus probatusque fuit, ut patet ex Annotatione Parisiensi Editioni praefixa sub anno 1656, quam hic subnectimus.

Hoc Opusculum reperitur additum Commentariis Cardinalis Cajetani in Summam S. Thomae Doctoris Angelici, in quibusdam post primam partem, in aliis post tertiam partem Summae S. Doctoris et ante ejusdem Cajetani Opuscula; hocque sub nomine S. Thomae de Aquino, et cum sequenti observatione: Insignis Angelici Doctoris Divi Thomae Aquinatis de divina Praescientia et Praedestinatione Tractatus, per Joannem Danielem sacrae Paginae Bacchalarium Lovaniensem studiosissime revisus et correctus. Doctissimusque P. Magister Thomas Campanella in Centone Thomistico de Praedest. et Reprob. et Auxil. d. grat. art. 2 et 3, pro certo affirmat factum esse germanum S. Thomae; additque in fine art. 2 praedicti, illustr. D. Alvarez lib. de Auxil. bis citasse praefatum opus tamquam a S. Thomae editum. Ut rem gratam nostris Bibliopolis facerem, huic loco, post Opusculum de Sortibus et judiciis Astrorum, addixi hunc tractatum de divina Praedestinatione, quam pluries Apostolus Paulus sortem divinam nuncupat: unde a sortibus ad sortem electionis nostrae animus assurget humanus, ad cognitionem astrorum conditoris.

Parmae, Idibus Junii MDCCCLXVIII.

S. THOMAE AQUINATIS

SCRIPTUM

SUPER LIBRIS MAGISTRI SENTENTIARUM

Ad Hannibaldum Hannibaldensem Romanum, Episcopum Cardinalem.

PROLOGUS

Transite ad me omnes, qui concupiscitis me, et a generationibus meis implemini. Eccli. 24.

Inter ceteras doctrinas christianae religionis, sapientia principalior invenitur quantum ad quatuor: videlicet, altitudine, pretiositate, communitate et fructuositate. Altitudine quidem ceteras antecellit, quia omnes aliae scientiae et doctrinae versantur circa ea quae subsunt iudicio rationis: in divina vero doctrina illa nobis traduntur, quae vim humanae rationis excedunt. Unde dicitur Job 28: « Abseondita est ab oculis viventium omnium: » scilicet quia ejus mysteria naturalis intuitum cognitionis excellent. Et ideo de ejus altitudine dicitur Eccl. 24: « Ego in altissimis habito. » Habitant quidem in infimis omnes mechanicae artes quae circa particularia, in quibus consistit operatio, versantur. In altis vero habitat scientia naturalis, quae de sensibilibus universalem speculationem habet. In altioribus vero commorantur aliae philosophiae scientiae, quae sua consideratione sensibilia transcendunt, intuitum tamen rationis sequentes: sed in altissimis habitat christianae sapientiae doctrina, quae intuitum superat rationis.

Pretiositate vero alias doctrinas excedit, propter ejus veritatis puritatem in qua non invenitur alia permixtio falsi, nec alicujus iniqui, nec etiam alicujus vani, quae plerumque aliarum scientiarum considerationibus permiscetur. Unde ex ore sapientiae dicitur Prov. 8: « Veritatem meditabitur guttur meum. » Et postea subdit: « Justi sunt omnes sermones mei, non est in eis pravam quid neque perversum. » Et ideo de ejus pretiositate dicitur Prov. 5: « Pretiosior est cunctis opibus, et omnia quae desiderantur huic non valent comparari. » Communitate vero ceteris praepositur, quia, cum aliarum scientiarum singulae circa sin-

gula rerum genera occupentur, haec doctrina circa omnia nos illustrat. In ipsa enim revelantur divina, docentur caelestia et terrestria judicantur, et honestae vitae documenta traduntur, ut sic impleri videatur quod dicitur 1 Cor. 2: « Spiritualis homo judicat omnia. » Et ideo de ejus communitate dicitur Sap. 7: « Attingit autem ubique propter suam munditiam. » Unde Augustinus in epistola ad Volusianum: « Hic, idest in sacra Scriptura, Physica, quoniam omnes omnium naturarum causae in Deo creatore sunt. Hic Ethica, quoniam vita bona et honesta non aliunde formatur quam cum ea quae diligenda sunt diliguntur. Hic est Deus et proximus. Hic Logica, quoniam veritas lumenque animae rationalis non nisi Deus est. »

Fructuositate vero aliis antefertur, quia aliae scientiae fructuum habere videntur in sola intellectus illustratione: haec vero doctrina et intellectum sublimer illuminat et affectum dulciter accendit. Unde dicitur Eccl. 24: « Spiritus meus super mel dulcis. » Et ideo dicitur Eccl. 6: « Sapientia doctrinae secundum nomen est ejus: quia videlicet spiritualem saporem habet quo affectui dulciter sapit. » Unde dicit Augustinus lib. 7 Confess. c. 21: « Non habent illae paginae, scilicet scientiae saeculares, multum pietatis hujus, lacrymas confessionis, sacrificium tuum, spiritum contribulatum, cor contritum et humiliatum. » Ratione igitur altitudinis excellentissimum habet doctorem. Unde dicitur Bar. 5: « Hic est Deus noster et non aestimabitur alius ad eum. Hic adinvenit omnem viam disciplinae, et tradidit illam Jacob puero suo et Israel dilecto suo. » Et ideo dicitur Sap. 7: « Omnium artifex docuit me sapientiam. » Et ideo sapientia loquitur di-

cens: • *Transite ad me omnes etc.* • videlicet relictis errorum doctoribus a me doceamini veritatem. Isa. 54: • *Ponam universos filios tuos doctos a Domino.* • Ratione vero tam pretiosae pulchritudinis requirit desideratissimum auditorem. Unde subdit, • *qui concupiscitis me.* • Sap. 6. Praeoccupat qui se concupiscunt, ut prior se illis ostendat. Et ideo dicitur Sap. 8: • *Ilanc amavi et exquisivi a juventute mea et quaesivi eam sponsam mihi assumere et amator factus sum formae illius.* • Ratione vero suae communitatis habet materiam multiformem. Unde dicit a generationibus meis, id est, a me doctis. Omnium namque generationum genera, divina sapientia docet. Est enim quadruplex generatio. Prima quidem generatio divinae personae qua Filius a Patre ab aeterno genitus est, de qua in Psal. 2 dicitur: • *Dominus dixit ad me, Filius meus es tu etc.* • Ex qua quidem generatione datur intelligi etiam processio divini amoris, qui est Spiritus sanctus, quia Pater diligit Filium, ut dicitur Joan. 5. • *Secunda est generatio creaturae qua temporaliter a Deo procredit.* • Gen. 2: • *Istae sunt generationes caeli et terrae, quando creatae sunt etc.* • Specialiter quantum ad hominem dicitur Dent. 52: • *Deum qui te genuit dereliquisti.* • Cui generationi etiam peccati corruptio per serpentis astutiam est superinducta. 2 Cor. 11: • *Timeo ne sicut serpens Evam seduxit astutia sua, ita corrumpantur sensus vestri.* • Tertio est generatio naturae assumptae qua Filius Dei temporaliter de Virgine natus est; de quo Matth. 1: • *Christi autem generatio sic erat.* • Luc. 1: • *Quod enim ex te nascetur sanctum vocabitur Filius Dei.* • Quarta est generatio novae creaturae per quam in filios Dei regeneramur ecclesiasticis sacramentis. Joan. 5: • *Nisi quis renatus fuerit ex aqua etc.* • Quae quidem regeneratio valet ad haereditatem gloriae capessendam, 1 Pet. 1: • *Regeneravit nos in spem vivam et haereditatem incorruptibilem.* • Scientiae vero secundum materiam distinguuntur: et ideo Magister hoc opus in quo sub quodam compendio divinae sapientiae mysteria studuit compilare in quatuor libros distinxit: in quorum primo agit de generatione aeterna, et his quae ei cointelligantur. In secundo de generatione creaturae et corruptione peccati. In tertio de generatione naturae assumptae, et his quae eam consequuntur. In quarto de regeneratione per sacramenta et gloria aeternae haereditatis. Ratione vero fructuositatis suum replet auditorem, quem aliae scientiae vacuum derelinquunt. Sap. 15: • *Vani sunt omnes homines in quibus non subest scientia Dei.* • Haec autem scientia replet suum auditorem omnibus spiritualibus bonis. Sap. 7: • *Venerunt mihi omnia bona pariter cum illa.* • Et Eccl. 15: • *Replevit eum Dominus spiritu sapientiae et intellectus.* • Et ideo dicit • *implemini,* id est plenum fructum capiat. *Transite ergo ad tanti doctoris, divinae scilicet sapientiae, auditorium, concupiscite tam pretiosae pulchritudinis aspectum; diligenter inspicite generationum numerum: ut possitis acquirere plenitudinis fructum, de quo in Psal. 64: • Replebitur in bonis domus tuae.* •

QVAESTIO I.

Hic quaeruntur quinque: 1.^o utrum theologia

sit scientia; 2.^o quid sit ejus subjectum; 3.^o utrum sit sapientia; 4.^o de comparatione ejus ad alias scientias; 5.^o quomodo doceri debeat.

ARTICULUS I.

Ad primum sic proceditur. Et 1. videtur quod theologia non sit scientia. Omnis enim scientia est de apparentibus. Sed theologia de credibilibus, quae non sunt apparentia. Heb. 11: • *Fides est substantia rerum separandarum, argumentum non apparentium;* • ergo theologia non est scientia.

2. Praeterea, cujuslibet scientiae principium est intellectus: theologiae autem intellectus non est principium, sed finis, secundum illud Isa. 7: • *Nisi credideritis non intelligetis;* • ergo theologia non est scientia.

3. Praeterea, prima principia in scientiis sunt omnibus nota, et de quibus dubitari non potest: sed articuli fidei, qui sunt quasi principia theologiae, non sunt omnibus noti et dubium recipiunt; ergo theologia non est scientia.

4. Praeterea, scientia, secundum Augustinum 12 de Trin., principaliter est de rebus humanis; unde scientia ponitur perfectio inferioris rationis, quae temporalia disponit: theologia autem principaliter ordinatur ad divina; ergo non est scientia.

Sed contra est quod Apostolus dicit, 1 Cor. 8: • *De his autem quae idolis sacrificantur, scimus quod omnem scientiam habemus.* • Sed hoc ad nullam aliam scientiam pertinet, nisi ad theologiam; ergo theologia est scientia.

Praeterea, Augustinus, 12 de Trin., dicit: • *Illud tantum huic scientiae attribuitur quo fides saluberrima, quae ad veram beatitudinem ducit, gignitur, nutritur, defenditur, roboratur.* • Sed hoc non nisi ad theologiam pertinet: ergo theologia est scientia.

Respondeo. Dicendum, quod ad rationem scientiae duo requiruntur: unum ex parte conclusionum, scilicet quod ex aliquibus principiis necessario deducantur: aliud ex parte principiorum, scilicet quod sint certa. Sed hoc dupliciter contingit in diversis scientiis. Quarundam enim scientiarum principia sunt simpliciter per se nota in illa scientia: sicut est de primis scientiis, quae ex primis principiis immediate procedunt, sicut patet de Arithmetica et Geometria. Quarundam vero scientiarum principia sunt certa quasi in alia scientia superiori certificata, sicut principia Perspectivae in Geometria. Unde perspectivus certus est de suis principiis per viam credulitatis, credens et supponens ea a Geometria. Haec autem duo in theologia inveniuntur. Nam et conclusiones aliquae ex principiis deducuntur: sicut 1 Cor. 15, Apostolus probat resurrectionem futuram, per hoc, quod Christus resurrexit. Sunt etiam et ipsius principia certa; non quia simpliciter per se nota ipsi theologo; sed per viam credulitatis, in quantum supponit ea a Deo qui habet ea per superiorem scientiam: et ad haec per viam credulitatis cognoscenda infunditur mentibus fidelium lumen fidei, sicut ad cognoscenda principia naturaliter nota datur lumen naturae.

Ad primum ergo dicendum, quod quamvis credibilia de quibus est theologia, non sunt apparentia secundum lumen naturae, sunt tamen apparentia secundum lumen fidei.

Ad secundum dicendum, quod scientiarum primarum proximum principium est intellectus: earum

vero scientiarum, quae sua principia ab aliis supponunt, proximum principium est credulitas principiorum ab aliis suppositorum: primum vero earum principium est intellectus. Perficitur tamen certitudo istarum scientiarum cum per viam resolutionis in ipsum intellectum primorum principiorum perveniunt. Et similiter hujus scientiae proximum principium est fides eorum, quae divinitus revelantur: primum vero principium est intellectus quo Deus ista intelligit: qui est etiam hujus scientiae finis, in quantum per hanc scientiam homo praeparatur ad hoc quod deiformiter credibilia intelligat, vel perfecte in patria, vel semiplene in via.

Ad tertium dicendum, quod in primis scientiis principia sunt omnibus per se nota et indubitabilia: In secundis vero scientiis proxima principia nec omnibus nota sunt nec indubitabilia, nisi quando per resolutionem deventum fuerit ad intellectum primorum principiorum, et sic hujusmodi scientiae principia possunt habere dubitationem, quousque perventum fuerit ad statum gloriae, in quo de eis plenus intellectus habetur.

Ad quartum dicendum, quod scientia dupliciter accipitur. Uno modo secundum quod dividitur contra sapientiam, et sic loquitur Augustinus. Alio modo secundum quod includitur in ratione sapientiae: quia secundum Philosophum in sexto Ethicorum, sapientia scientia quaedam est: et sic scientia non solum est de humanis, sed de divinis. Et sic theologia est scientia.

ARTICULUS II.

Ad secundum sic proceditur. 1. Videtur quod Deus non sit subjectum hujus scientiae. De subjecto enim scientiae tota scientia tractat. Sed non tota theologia tractat de Deo. Unde in his libris Sententiarum tractatur de Deo solum in primo libro: ergo Deus non est scientiae hujus subjectum.

2. Praeterea, scientia est illius sicut subjecti, cujus partes et passiones considerat, ut patet in principio Posteriorum: sed Deus non habet partes et passiones de quibus possit haec scientia considerare; ergo non est subjectum hujus scientiae.

3. Praeterea, illud est subjectum scientiae circa quod tractatus scientiae versatur: sed tota sacra doctrina versatur circa res et signa; ergo sunt subjectum hujus scientiae.

4. Praeterea, 1 Cor. 1, dicitur: « Neque existimavi me aliquid scire inter vos, nisi Jesum Christum, et hunc crucifixum. » Illud autem quod scitur per scientiam maxime est subjectum; ergo Jesus Christus est subjectum hujus scientiae, per quod non solum divina, sed humana natura signatur.

Sed contra est quod theologia dicitur quasi sermo de Deo. Illud autem est subjectum scientiae, de quo fit sermo in illa scientia; ergo subjectum theologiae est Deus.

Praeterea, Boetius dicit in lib. de Trin., quod theologia est de his quae sunt sine motu et materia: sed hoc proprie soli Deo convenit, in quo solo est naturae immutabilitas; ergo subjectum theologiae est Deus.

Respondeo. Dicendum, quod sicut in scientiis quae sunt de rebus operabilibus ab homine subjectum est illud cujus operatio inquiritur in scientia; ita in scientiis quae sunt de rebus non operabili-

bus ab homine, subjectum est illud cujus cognitio inquiritur. Nam finis operativae scientiae est operatio, speculativae vero cognitio veritatis. Tota autem theologia ordinatur ad habendam notitiam de Deo. Quod patet ex hoc, quod tota scientia theologiae ordinatur ad fidem nutriendam et defendendam, ut patet per auctoritatem Augustini supra dictam. Fidei autem proprium et per se objectum est veritas prima, quae Deus est. Et ideo proprium subjectum theologiae est Deus, ut est a nobis cognoscibilis per viam fidei. Et satis in idem redit quod credibile est hujus scientiae subjectum.

Ad primum ergo dicendum, quod omnia quae tractantur in scientia sunt partes subjectivae vel integrales, aut ordinantur qualitercumque ad cognitionem subjecti. Omnia autem quae traduntur in hac scientia ordinantur ad cognitionem Dei, in quantum sunt a Deo vel ad Deum, quamvis non sint partes ejus subjectivae vel integrales, sicut multa etiam in aliis scientiis tractantur solummodo in quantum sunt via ad cognitionem subjecti. Quidam vero non attendentes quaesiverunt aliquid ad quod possent traduci omnia quae sunt in ista scientia, tamquam partes integrales; et sic dixerunt totum Christum caput et membra esse subjectum hujus scientiae: vel sicut partes subjectivae; et sic dixerunt res et signa esse hujus scientiae subjectum. Sed hoc non est necessarium ad rationem subjecti.

Ad secundum dicendum, quod si subjectum scientiae habeat partes et passiones a scientia consideratas, non tamen oportet quod omne illud quod est subjectum scientiae habeat partes et passiones: et sic Deus, quamvis non habeat partes et passiones, potest tamen esse scientiae subjectum. Sciendum quod quamvis Deus non habeat proprie loquendo passiones, habet tamen aliquid loco passionum, scilicet attributa, quae secundum modum intelligendi consequuntur substantiam, ut Damascenus dicit; et habitudines et operationes ejus respectu creaturae, quae traduntur de Deo in theologia.

Ad tertium dicendum, quod de ratione subjecti est quod propter se tractatur in scientia et non qualitercumque. Res autem et signa non propter se in theologia tractantur (aliter de omnibus rebus et signis theologia tractaret); sed tractantur signa et res aliae propter unam rem quae Deus est.

Ad quartum dicendum, quod per humanitatem Christi manuducimur in Deitatem cognoscendam. Unde quasi haec primo proponebatur incipientibus: quibus tamen postmodum perfectis cognitionem Deitatis quasi solidum cibum proponebat, ad quem manuducendi erant.

QUAESTIO II.

Hic quaeruntur quinque: 1.^o utrum sacra doctrina dicatur sapientia; 2.^o qualiter ad alias doctrinas se habeat; 3.^o quis sit idoneus auditor ejus; 4.^o quis possit esse ejus doctor; 5.^o quomodo doceri debeat.

ARTICULUS I.

Ad primum sic proceditur. 1. Et videtur quod sacra doctrina sapientia dicenda non sit. Nihil enim quod multiplicatur in mentibus diversorum est sapientia: quia secundum Augustinum in 2 de lib.

arbit., omnes unam habent sapientiam: sed haec scientia multiplicatur in mentibus diversorum: ergo non est sapientia, cum sit scientia quaedam.

2. Praeterea, sapientia inter dona Spiritus sancti computatur, ut patet Isa. 11: sed theologia habetur per studium et acquisitionem; ergo non est sapientia.

3. Praeterea, secundum Philosophum in 6 Eth., sapientia et prudentia differunt, quia sapientia est speculativa, prudentia vero practica: sed haec doctrina non est speculativa, sed practica; ordinatur enim ad operationem. Unde Jac. 1 dicitur. « Estote factores verbi et non auditores tantum. » Ergo haec doctrina non est sapientia.

4. Praeterea, secundum Philosophum in principio Metaphysicae, sapientia maxime circa universalia versatur, sicut circa ens et ea quae sunt entis inquantum huiusmodi. Sed circa haec theologia non versatur; ergo theologia non est sapientia.

Contra. Deut. 4, dicitur: « Haec est vestra sapientia et intellectus coram populis. »

Praeterea, 1 Cor. 2: « Sapientiam loquimur inter perfectos. » Et infra: « Loquimur Dei sapientiam in mysterio absconditam. »

Praeterea, Augustinus dicit, 12 de Trin.: « Sapientia est proprie divinarum rerum scientia: » sed haec doctrina est scientia divinarum rerum; ergo etc.

Respondeo. Dicendum, quod sacra doctrina est praecipue dicenda sapientia. Sapientis enim est, secundum Philosophum, ordinare: unde eum per finem ea quae sunt ad finem ordinantur, illa doctrina dicitur sapientia quae circa ultimum finem versatur. Quae quidem potest accipi tripliciter: et secundum hoc aliquis dicitur tripliciter sapiens. Primo est finis ultimus in aliquo speciali artificio: et sic sapiens dicitur alicujus artificii ad quem pertinet ultimus finis illius artificii, qui etiam doctor, dicitur architector, et sic accipitur 1 Cor. 5: « Ut sapiens architector fundamentum posui. » Secundo accipitur finis ultimus in tota humana vita: et sic dicitur sapientia in rebus humanis, quae circa finem ultimum humanae vitae bene disponit: et sic sapientia idem esse videtur quod prudentia quodammodo. Unde Prov. 5: « Sapientia est viro prudentia. » Tertio est finis ultimus simpliciter, scilicet Deus, qui etiam est primum principium simpliciter, scilicet respectu omnium rerum; et sic simpliciter dicitur aliquis sapiens, quia habet cognitionem de altissima causa, scilicet, primo principio et ultimo fine omnium rerum: et hoc modo accipit Philosophus sapientiam: et sic etiam Augustinus, 12 de Trin. dicit, quod sapientia est divinarum rerum scientia. Et his duobus modis ultimis sacra doctrina dicitur sapientia: quia considerat Deum ut est finis et principium omnium rerum, in quo convenit eum metaphysica; et ut est finis et beatitudo hominum, in quo convenit eum morali.

Ad primum ergo de verbo Augustini dicendum, quod sapientia dicitur dupliciter. Uno modo habitus quo cognoscimus: et sic est diversa in diversis. Alio modo objectum cognitionis, sicut prima veritas: et sic omnium sapientum una est sapientia: et sic loquitur Augustinus. Primo autem modo dicitur theologia sapientia.

Ad secundum dicendum, quod sapientia quae dicitur donum Spiritus sancti, est quaedam cognitio de Deo habita, non tam secundum considera-

tionem scientiae in intellectu quam per experientiam divinae dulcedinis in affectu, ut Dionysius dicit de quodam quod patiens divina didicit divina.

Ad tertium dicendum, quod Philosophus accipit sapientiam tertio modo; et sic est speculativa tantum. Theologia autem est sapientia, non solum tertio modo, sed etiam secundo: et ideo non solum est speculativa, sed etiam practica.

Ad quartum dicendum, quod metaphysica quam Philosophus sapientiam dicit, ducit in cognitionem Dei ductu naturalis rationis ex rebus creatis: et ideo oportet quod consideret ens universale ut ducat ad cognoscendam omnium entium causam. Haec autem doctrina notificat Deum per lumen fidei: unde non oportet quod circa universalia versetur, sed circa ipsum Deum qui est principale subjectum hujus doctrinae; et circa alia prout sunt a Deo, vel ad Deum.

ARTICULUS II.

Ad secundum sic proceditur. 1. Videtur quod haec doctrina non sit aliis doctrinis excellentior. Quanto enim aliqua cognitio est certior, tanto est nobilior. Sed haec doctrina est incertior aliis, quia patitur dubitationem etiam circa sua principia, scilicet articulos fidei: quod non est de aliis scientiis; ergo est aliis ignobilior.

2. Praeterea, scientia supponens aliquid ab alia scientia, ea est ignobilior sicut subalternata subalternante. Sed haec scientia supponit veritates omnium aliarum scientiarum, et utitur eis, ut dicit Augustinus de Doctrina christiana; aliae vero nihil ab ista supponunt; ergo est aliis ignobilior.

3. Praeterea, quanto aliqua scientia magis circa particularia negotiatur, tanto est ignobilior: quia particularia non cadunt sub arte. Sed haec doctrina multum circa particularia versatur; ergo haec doctrina est aliis ignobilior.

4. Praeterea, quanto aliquid est uniformius, tanto nobilior, utpote Deo similior: sed ista scientia est aliis multiformior, cum sit speculativa et practica; ergo etc.

Contra. Aliae doctrinae dicuntur esse hujus ancillae. Prov. 9: « Misit ancillas suas ut vocaret ad arcem: » ergo est aliis nobilior.

Praeterea, Augustinus in 2 de Doctrina christiana dicit: « Quanto minor est argenti et auri vestisque copia, quam de Aegypto secum ille populus abstulit in comparatione divitiarum quas postea Hierosolymae consecutus est: tanta fit eumeta scientia collecta de libris gentilium, si divinarum Scripturarum scientiae comparetur. »

Respondeo. Dicendum, quod scientia potest dupliciter considerari. Primo secundum seipsam: et haec consideratio attenditur quantum ad materiam et modum cognoscendi, et finem scientiae, et alia huiusmodi. Et secundum hoc ista scientia nobilior est aliis. Habet enim materiam altissimam, scilicet, Deum: cetera enim non sunt ejus materia nisi secundum quod ad Deum ordinantur. Habet etiam altissimum cognoscendi modum, quia de omnibus judicat ex lumine divinitus infuso. Habet etiam finem altissimum, scilicet, fruitionem summi boni ad quam sola inter alias nos ordinat. Alio modo consideratur scientia in respectu ad intellectum scientis. Unde, cum haec non sit ita captibilis ab intellectu sicut et aliae scientiae, propter ejus altitudinem;

ideo imperfectior est ex parte scientis imperfectius capientis.

Ad primum dicendum, quod haec doctrina secundum se est certissima: sed dubitatio ei admisceri potest ex defectu intellectus: ideo secundum se est perfectior aliis, quamvis ex parte scientis sit imperfectior.

Ad secundum dicendum, quod dupliciter potest una scientia supponere aliquid ab alia. Uno modo ut principium quo de aliis iudicet; et sic inferior scientia accipit a superiori. Alio modo sicut illud de quo iudicetur; et sic scientia superior accipit ab inferiori. Hoc autem modo accipit haec doctrina ab aliis, et non primo. Ipsa enim iudicat de his quae sunt in aliis scientiis per propria principia, et non e converso. Quod enim aliae ab ipsa nihil supponant, est propter ejus altitudinem, qua excedit rationem cui innituntur aliae.

Ad tertium dicendum, de particularibus, quod particularia possunt dupliciter considerari. Vel prout sunt exemplaria aliorum; et sic habent rationem universalitatis, et sic cadunt sub scientia practica. Alio modo in se prout sunt corruptibilia, et sic non cadunt sub arte. Primo modo et non secundo haec scientia, cum non sit tantum speculativa, sed practica, agit de particularibus.

Ad quartum dicendum, quod quanto aliquid est nobilius, tanto est uniformius in natura, sed multiformius in virtute: et sic ista doctrina est nobilissima; quia per unum simplicissimum medium, quod est veritas prima, cui innititur, extendit se non solum ad speculabilia, sed ad operabilia.

ARTICULUS III.

Ad tertium sic proceditur. 1. Videtur quod non omnis homo sit idoneus auditor hujus doctrinae. Matth. 7: « Nolite sanctum dare canibus, neque mitis margaritas ante porcos. » Margarita autem, et sanctum, secundum Glossam, dicitur evangelium, canes autem ad vomitum reversi, porci autem nondum conversi; ergo infidelis et peccator non potest esse auditor hujus doctrinae.

2. Praeterea, docens communicat discenti: sed excommunicato communicare non licet; ergo excommunicatus non potest esse auditor hujus doctrinae.

5. Praeterea, haec doctrina est altior quam scientia civilis: sed illius puer non est conveniens auditor secundum Philosophum; ergo nec hujus.

Contra. Dominus dicit Matth. 28: « Euntes docete omnes gentes. »

Praeterea, ad Ephes. 5, dicit Apostolus: « Mibi autem omnium sanctorum minimo data est gratia haec, illuminare omnes quae sit dispensatio sacramenti absconditi in Deo: » et ita omnes possunt esse auditores hujus doctrinae.

Respondeo. Dicendum, quod haec doctrina est docens et utens. Utens quidem est secundum duplicem usum quem Apostolus docet ad Tit. 1: « Ut sit exhortari in doctrina sana, et contradicentes arguere: » et sic quilibet homo potest esse auditor ejus, quia exhortandi sunt infideles ad fidem, peccatores ad poenitentiam, justi ad profectum, et omnis contradictor est convincendus. Docens autem est in quantum revelata divinitus manat. Et sic duo genera hominum ab ejus auditu excluduntur. Quidam propter infidelitatem: quia non supponunt

principium hujus scientiae, ut infidelis: alii propter intellectus imbecillitatem: quia eis utile non esset audire, sicut imperfecti et idiotae, quia non possent capere. Unde 1 Cor. 5: « Sapientiam loquimur inter perfectos. »

Ad primum ergo dicendum, quod contemptoribus sacrae Scripturae, qui significantur per canes et porcos, non sunt ejus secreta pandenda: sed ad fidem et bonos mores per praedicationem adducendi.

Ad secundum dicendum, quod licet in his quae pertinent ad salutem etiam excommunicato communicare. Quia ergo omnia quae in sacra doctrina traduntur, ad salutem animae ordinantur: ideo excommunicati possunt esse auditores ejus.

Ad tertium dicendum, quod principia scientiae civilis accipiuntur per experimentum, quod deest puero; principia vero hujus, articuli scilicet fidei per simplicem auditum: quia fides ex auditu, Rom. 10. Unde non est simile. Auctoritates vero quae sunt in contrarium loquuntur de hac doctrina quantum ad ejus usum.

ARTICULUS IV.

Ad quartum sic proceditur. 1. Videtur quod hominis non sit docere istam scientiam. Quia dicitur Matth. 23: « Ne vocemini magistri, quia magister vester unus est Christus. » Et Glossa: « ne dum alios magistros vocatis, divinum honorem hominibus deferatis. » Ergo solius Dei est hanc doctrinam docere.

2. Praeterea, doctor est causa scientiae in discipulo: sed solus Deus est hujus scientiae causa; ergo et doctor.

5. Praeterea, videtur quod soli praelati. Eph. 4, dicitur: « Aliquos autem pastores et doctores: » quae duo, ut dicit Augustinus in Epistola ad Paulinum, ideo conjungit, quia pastorum officium est docere. Pastores autem praelati sunt; ergo non nisi eorum qui sunt praelati est sacram doctrinam docere.

4. Praeterea, Apostolus mulieribus ratione subjectionis docendi officium interdicit, 1 Timoth. 2: « Mulier in silentio discat eum omni subjectione. » « Docere autem mulieri non permitto. » Ergo non est suum officium docere, sed praelatorum tantum.

Contra, 1 Pet. 4, dicitur: « Unusquisque sicut accepit gratiam in alterutrum, illam administrantes sicut boni dispensatores multiformis gratiae Dei. » Ergo si aliquis accepit gratiam docendi, potest eam aliis administrare.

Praeterea, 1 Cor. 14, dicitur: « Potestis omnes per singulos prophetizare, ut omnes discant, et omnes exhortentur; » ergo aliis quam praelatis docere competit.

Respondeo. Dicendum, quod principaliter et interius docere est solius Dei, quia seminaria omnium scientiarum, id est prima principia in lumine naturali nobis indidit; hujus autem scientiae principia, id est fidei articulos, per lumen gratiae revelavit. Exterius autem ut adminiculantis, est hominis deducentis principia communia in conclusiones. Et praelati quidem solius, quantum ad publicam exhortationem, quae fit in ecclesia, et nulli licet praedicare, nisi praelato, vel de licentia praelati: cujuslibet autem eruditi, etiam subditi, quantum ad expositionem Scripturae, et destructionem erroris, et fraternam correctionem.

Ad primum dicit Glossa Matth. 21: « Dicendum

• quod divinus honor hominibus exhiberetur, si
• eis principalitas doctrinae ascriberetur. •

Ad secundum dicendum, quod homo non causat scientiam in mente alterius, sed coadjuvat ad hoc quod causetur per educationem de potentia in actum. Quod enim prius seiebatur in universali et in potentia, postmodum in particulari cognoscitur per explicationem doctoris.

Ad tertium dicendum, quod doctor in verbis Apostoli dicitur a doctrina, quae est per publicam exhortationem.

Ad quartum dicendum, quod doctrina publica interdicitur mulieri tam in Ecclesia quam in scholis, tum ratione personae olim seductae, et post virum formatae, ut Apostolus dicit: tum propter debilitatem rationis quae minus viget naturaliter in mulieribus quam in viris. Privata autem exhortatio ei non interdicitur.

ARTICULUS V.

Ad quintum sic proceditur. 1. Videtur quod sacra doctrina non debeat tradi verbis habentibus multiplicem sensum. Multiplicitas enim sensuum Scripturae obnubilat intellectum. Sed per sacram doctrinam debet intellectus illuminari. Prov. 6: • Mandatum lucerna est et lex lux; • ergo in verbis sacrae scripturae non debet multiplicitas sensuum esse.

2. Praeterea, per sacram doctrinam omnis error excluditur, ut dicit Augustinus, in 2 de Doctrina christiana. Sed multiplicitas sensuum potest esse occasio erroris: ergo sacra Scriptura non debet habere nisi unum sensum.

Contra. Hieronymus dicit in prol. Bibliae loquens de Apocalypsi: • In verbis singulis multiplices • latent intelligentiae. •

Praeterea, Gregorius dicit 15 Moral.: • Sacra Scriptura, omnes scientias ipso locutionis suae more • transcendit: • quia uno eodemque sermone, dum narrat gestum, prodit mysterium.

Respondeo. Dicendum, quod ad dignitatem sacrae Scripturae pertinet, ut ex auctoritate inducta Gregorii apparet, quod ipsa sola praeceteris in uno sermone plures sensus contineat: et huius ratio est, quia auctor sacrae Scripturae, scilicet Spiritus sanctus, non solum est auctor verborum, sed etiam rerum. Unde non solum verba potest accommodare ad aliquid significandum, sed est res. Et secundum hoc in sacra Scriptura manifestatur veritas dupliciter. Uno modo secundum quod res significantur per verba: et in hoc consistit sensus literalis. Alio modo secundum quod res quaedam per alias figurantur: et in hoc consistit sensus spiritualis: qui est triplex: scilicet Allegoricus, Moralis et Anagogicus. Et hoc ideo, quia res ipsae per verba sacrae Scripturae significatae ex divina dispositione erudiunt nos, et quantum ad recte operandum, et sic est sensus moralis: ad recte credendum tam de his quae ad praesentem statum Ecclesiae pertinent, et sic est sensus allegoricus: quam de his quae pertinent ad statum gloriae, et sic est sensus anagogicus.

Ad primum de obnubilatione intellectus, dicendum, quod multiplicitas sensuum alicujus, tunc obnubilat intellectum, quando non sunt ad invicem ordinati, nec simul stare possunt. Sed hoc in proposito non contingit: quia spiritualis sensus super literalem fundatur, et unus istorum sensuum alium non excludit.

Ad secundum de occasione erroris, dicendum, quod ex multiplicitate sensuum nulla datur errandi occasio: quia ut Augustinus dicit in libro de Doctrina christiana: • Nihil secundum spirituales sensus est • in Scriptura exponendum, quod alibi secundum • sensum literalem manifeste non exprimitur. • Unde et sensus spiritualis non est idoneus ad aliquid confirmandum nisi sensu literali fulciatur.

Ad tertium, quod in qualibet parte Scripturae debent plures sensus inveniri, dicendum, quod non omnes res significatae verbis sacrae Scripturae sunt alterius figura. Nam ea quae ad caelestem Ecclesiam pertinent, sunt ultimum significatum et nullius signum: ideo quae literaliter de beatitudine caelesti dicuntur, non sunt alio sensu exponenda. Praesens autem Ecclesia est figura caelestis, et synagoga praesentis Ecclesiae, et semper priora posteriorum. Unde quae de prioribus literaliter dicuntur, de posterioribus mystice possunt exponi.

QUAESTIO III.

Cupientes aliquid etc. (V. edit. nostrae tom. VI, pag. 2).

Hic quaeruntur quinque: 1.º utrum aliquis veritati insistere debeat, quae excedit facultatem sui intellectus; 2.º utrum veritas fidei sit rationibus munienda; 3.º utrum veritas animum hominis offendere possit; 4.º utrum sit vituperabile quod ratio voluntati subijciatur; 5.º utrum dissimilitudo voluntatum pariat diversitatem opinionum.

ARTICULUS I.

Ad primum sic proceditur. 1. Videtur quod homo non debeat insistere veritati excedenti ejus intellectum. Quia Ecl. 5 dicitur: • Altiora te ne quaesieris, et fortiora te ne scrutatus fueris. •

2. Praeterea, elationis vitium est fugiendum. Sed ad elationem pertinet insistere veritati quae est supra seipsum, ut patet per illud Psal. 150: • Domine, non est exaltatum cor meum; • ergo etc.

3. Praeterea, illis tantum debet homo insistere studio, de quibus potest judicare, ut patet per Philosophum primo Ethicorum. Sed homo non potest judicare de his quae sunt supra seipsum, ut dicit Augustinus in lib. de Vera relig.; ergo his studio non debet insistere.

4. Praeterea, Rom. 12, docet Apostolus sapere ad sobrietatem. Sed contra sobrietatem est, ut aliquis praesumat supra facultatem; ergo etc.

Contra. Veritati fidei quilibet fidelis praecipue insistere debet: sed veritas fidei est supra facultatem humani intellectus: ergo homo debet insistere his quae excedunt facultatem sui intellectus.

Praeterea, Philosophus dicit in 10 Ethicorum, quod homo debet, quantum possibile est, ad divina et immortalia tendere: sed divina et immortalia sunt supra facultatem hominis; ergo homo debet studio insistere his quae facultatem sui intellectus excedunt.

Respondeo. Dicendum: facultas intellectus consideranda est non tantum secundum se, sed secundum auxilium gratiae divinae. Potest autem aliquid excedere facultatem intellectus quantum ad comprehensionem et apprehensionem, sicut aliqua subtilis consideratio et alta excedit intellectum simplicis idiotae, et huic supra facultatem existenti non est insistendum. Aliquid autem est quod excedit facultatem

tatem intellectus quantum ad comprehensionem, sed non quantum ad apprehensionem, ut sunt res divinae: et talibus est studio insistendum, ut cognoscantur quantum possibile est: quia modicum quid de eis cognoscere, est magis amabile quam quicquid de aliis rebus cognosci potest, ut dicit Philosophus. Non tamen ad hoc est intendendum quod comprehendantur, ut dicit Hilarius: « Non te inferas in illud secretum divinae nativitatis, summam intelligentiae comprehendere praesumens. »

Ad primum dicendum, quod aliqua quae simpliciter sunt altiora humano intellectu, quodammodo sunt non altiora, in quantum homo ad ea capienda aequaliter, auxilio divino juvatur.

Ad secundum dicendum, quod elatio est, ut homo se extendat ad ea quae omnibus modis suam facultatem excedunt: non autem si se in ea extendat secundum quod sibi efficiuntur possibiliter divino auxilio mediante.

Ad tertium dicendum, quod judicare de his quae supra se sunt qualia esse debeant, non potest homo, et sic loquitur Augustinus: judicare tamen de eis qualia sint, potest homo quilibet de talibus judicare, iudicio discretionis, non moderationis.

Ad quartum dicendum, quod in divinis spiritualis sobrietas servatur, dum homo in eis cognoscendis suum modum excedere non tentat.

ARTICULUS II.

Ad secundum sic proceditur. 1. Videtur quod veritas fidei non sit rationibus munienda. Dicit enim Gregorius: « Fides non habet meritum cui humana ratio praebet experimentum. » Sed meritum fidei non est diminuendum; ergo nec fides rationibus adjuvanda.

2. Praeterea, argumentum est actus rationis: sed ea quae sunt fidei, sunt supra rationem; ergo de eis argumentari non convenit.

3. Praeterea, dicit Ambrosius: « Tolle argumenta ubi quaeritur fides, » et sic idem quod prius.

Praeterea, bonitas prima est solum propter se diligenda, ergo prima veritas est solum propter se credenda: ergo non propter aliam rationem; ergo non habet uti ratione ad veritatem fidei.

Contra. 1 Pet. 3, dicitur: « Parati semper ad satisfactionem omni poscenti vos rationem reddere de ea quae in vobis est fide et spe. » Sed poscenti rationem non satisficit nisi ratiocinando; ergo de his quae sunt fidei, ratiocinari convenit.

Praeterea, Paulus magister argumentatus est ad resurrectionem communem asserendam, ut patet 1 Cor. 15. Hoc idem patet de aliis doctoribus; ergo et nobis de his quae sunt fidei, ratiocinari licet.

Respondeo. De his quae sunt fidei argumentari potest quadrupliciter. Scilicet propter eorum comprehensionem per demonstrationem. Propter eorum manifestationem. Propter repugnantium fidei reprobationem. Propter eorum quae sunt fidei approbationem.

Tribus modis ultimis licet argumentari de his quae sunt fidei: sed primo modo non: quia per demonstrationem comprehendi non potest.

Ad primum ergo de verbo Gregorii, dicendum quod intelligendum est si humana ratio sufficiens experimentum fidei praebet.

Ad secundum dicendum, quod verum est quantum ad comprehensionem per demonstrationem,

sed non quantum ad qualemcumque eorum cognitionem; et sic de eis ratiocinari potest.

Ad tertium de verbo Ambrosii, dicendum quod intelligendum est de argumentis quae ad fidei comprehensionem induci tentantur.

Ad quartum dicendum, quod non est ratiocinandum de his quae sunt fidei, ut eis propter rationem assentiatur: sed ut ab impugnantibus et erroribus defendatur.

ARTICULUS III.

Ad tertium sic proceditur. 1. Videtur quod veritas hominem offendere non possit. Quia 3 Esdr. 4, dicitur: « Omnis terra veritatem invocat, caelum etiam ipsam benedicit, et ita omnes benignantur in operibus ejus; » ergo veritas nullum offendit.

Praeterea, ut dicit Augustinus 10 Confess.: « Nihil est qui velit falli: » sed falsitatem homo non potest evadere nisi per veritatem; ergo quilibet vult et amat veritatem.

5. Praeterea, secundum Philosophum in 1 Met.: « Omnes homines natura desiderant scire: » sed scientia est veritatis cognitio; ergo omnes appetunt et volunt veritatem.

4. Praeterea, omnes homines natura appetunt vitam beatam: sed vita beata est gaudium de veritate, ut Augustinus dicit, 10 Confess.; ergo nullus veritatem odit, ut in littera dicitur.

Contra. Galat. 4, dicit Apostolus: « Ergo inimicus factus sum vobis verum dicens. » Glossa: « Per hoc Judaeorum inimicus, quia verum dico; sed si fallerem, putare amicus; » ergo veritas offendere amicum potest.

Praeterea, Tullius dicit in lib. de Amic. inducens versum Terentii: « Obsequium amicos, veritas odium parit: » molesta est veritas si quidem ex ea nascitur odium, quod est venenum amicitiae.

Respondeo. Veritas potest dupliciter considerari. Uno modo secundum seipsam; et sic quilibet eam amat; quilibet enim cognitionem veritatis desiderat, quae est ipsius Dei participatio. Alio modo secundum effectum suum qui est manifestare: et quantum ad hoc aliquis odit veritatem, in quantum scilicet veritas manifestat ejus iniquitatem, quam latere volebat. Et sic veritas diligitur ut est manifestata, habetur autem odio ut est manifestans. Et hoc est quod Augustinus dicit in 10 Confess.: « Quia falli nolunt et fallere volunt, amant eam cum seipsam indicat, et odiunt eam cum eos ipsa indicat. » Et per hoc patet solutio ad omnia objecta.

ARTICULUS IV.

Ad quartum sic proceditur. 1. Videtur quod non sit reprehensibile voluntatem praeponere rationi. Superius enim inferiori praeponendum est: sed voluntas est superior ratione, quia est fini propinquior, quia est causa altissima cum sit causa causarum; ergo voluntas rationi est praeponenda.

2. Praeterea, movens semper praeponitur mobili: sed voluntas movet rationem sicut et ceteras vires, secundum Anselmum; ergo voluntas rationi praeferenda est.

3. Praeterea, nullus ex hoc quod credit Deo est vituperandus: sed quilibet ex hoc quod credit rationem voluntati supponit; nullus enim credit nisi volens, secundum Augustinum; ergo non est reprehensibile rationem subicere voluntati.

Contra. Regulatum suae regulae subijci debet. Sed ratio est regula voluntatis, cum rationis sit dirigere; ergo voluntas rationi subijcienda est.

Praeterea, voluntas semper debet subijci bono: sed bonum movet voluntatem secundum quod est ratione apprehensum; ergo voluntas debet subijci rationi.

Respondeo. Dicendum quod voluntas et ratio possunt considerari, vel circa idem, vel circa diversum. Si circa idem, sic voluntas, ad hoc quod sit justa sequitur rationem, quia non quodlibet bonum est conveniens iudicio rationis. Si respectu diversorum, potest esse convenienter quandoque quod ratio sequatur voluntatem: utpote cum finis, qui est in voluntate, accipitur quasi principium in ratiocinando de his, quae sunt ad finem. Voluntas autem sequitur rationem dupliciter. Uno modo explicite, quando per se ratio iudicat hoc esse fugiendum. Aliquando vero implicite, quando scilicet ratio iudicat aliquid esse eligendum vel fugiendum, quia superior hoc dicitur, utpote Deus, quamvis etiam ei non videatur: et sic voluntas sequitur rationem in his, quae sunt fidei, implicite.

Ad primum. Voluntas est superior ratione: dicendum quod verum est, quantum est ad completionem: sed ratio est superior quantum ad originem. Motus autem humanus a ratione incipit, et in voluntate consummatur: et ideo voluntas rationem quasi priorem imitari debet.

Ad secundum. Voluntas movet rationem: dicendum, quod verum est per modum causae efficientis, eo quod importat quandoque actum rationis: sed e converso, ratio movet voluntatem per modum causae finalis, in quantum ostendit sibi bonum quod est ejus finis. Motus autem quo efficiens movet sequitur motum quo movet finis; quia finis movet efficientem: et ideo voluntas sequi debet rationem.

Ad tertium de credente, dicendum, quod voluntas ejus qui credit Deo, aliquo modo sequitur rationem: quia implicite, ut dictum est.

ARTICULUS V.

Ad quintum sic proceditur. Et 1. videtur quod dissensio voluntatum non possit esse causa diversitatis opinionum. Prius enim non dependet a posteriori. Sed ratio prior est voluntate. Ergo sicut concordia in opinione quae est rationis, non dependet a concordia voluntatis, sic nec discordia a discordia.

2. Praeterea, dissensio opinionum, quae non contrariatur amicitiae, secundum Philosophum, nec charitati contrariatur, cum justos contingat opiniones diversas habere. Dissensio autem voluntatum

amicitiae et charitati repugnat; ergo dissensio opinionum non sequitur ex dissensione voluntatum.

3. Praeterea, voluntas est impossibile, secundum Philosophum, 5 Eth. cap. 3. Sed opinio non potest esse eorum, quae impossibilia aestimantur: ergo opinio non sequitur voluntatem: et ita nec discordia opinionum discordiam voluntatum.

Sed contra est quod intellectus deducitur ad aliquid opinandum per voluntatem, ut patet Col. 2: « Nemo vos seducat, volens in humilitate et religione angelorum, quae non vidit; » ergo ex diversitate voluntatum potest sequi diversitas opinionum.

Praeterea, Sap. 2, dicitur: « Excceavit eos malitia eorum. » Malitia autem est in voluntate: ergo ex affectu voluntatis disponitur aliquantulum ratio circa perceptionem veri: et sic dissensio voluntatis potest causare opinionum discordiam.

Respondeo dicendum, quod hoc modo dissensio opinionum potest sequi ex discordia voluntatis quod ratio sequitur voluntatem: quod quidem contingit indirecte: et hoc tripliciter. Uno modo in operabilibus. Ex hoc enim ipso quod voluntas tendit in aliquid, illud habet quamdam apparentiam boni, et sic a ratione bonum esse determinatur. Nam satisfacere voluntati est quoddam apparens bonum. Et ideo secundum quod diversa homines volunt, diversas sententias habent de bono. Alio modo in speculabilibus, ex parte illa qua voluntas imperat rationi, ut in credendo contingit. Nam nemo credit nisi volens. Unde secundum diversas voluntates diversa homines credunt, et hoc praecipue in illis in quibus non patent rationes cogentes. Tertio modo ex parte eorum quae movent rationem per modum objecti. Nam quando homini complacet una opinio, diligenter inquit illa quae sunt pro illa opinione, et negligit ea quae sunt contra. Ex quo contingit quod diversi secundum diversas voluntates in diversas opiniones incidant.

Ad primum ergo dicendum, quod ratio quodam modo est prior voluntate, in quantum proponit ei suum objectum: sed voluntas alio modo est prior ratione, in quantum applicat eam ad actum. Et ideo utriusque discordia interdum est causa discordiae alterius, quandoque scilicet ratio voluntatis, et quandoque e converso.

Ad secundum dicendum, quod diversitas opinionum, etsi aliquando, non tamen semper causatur ex repugnantia voluntatum. In quantum autem causatur, contraria est amicitiae, non autem aliter.

Ad tertium dicendum, quod quamvis opinio non possit esse eorum quae aestimantur impossibilia, potest tamen voluntas hoc facere, ut possibile iudicetur, quod alias impossibile iudicaretur.

DE MYSTERIO TRINITATIS

LIBER PRIMUS

DISTINCTIO PRIMA

Veteris ac novae legis etc. (V. edit. nostrae tom. VI, pag. 9.)

QUAESTIO UNICA

Hic quaeruntur quatuor: 1.^o ejus sit frui; 2.^o ejus sit uti; 5.^o quo sit fruendum; 4.^o quo sit intendum.

ARTICULUS I.

Ad primum sic proceditur. 1. Videtur quod frui non sit actus voluntatis. Voluntas enim non invenitur in insensibilibus et brutis, quae tamen fruuntur, ut videtur. Insensibilia enim quietantur in fine, bruta etiam sine habito delectantur, quod nomen fruitionis importare videtur; ergo frui non est actus voluntatis.

2. Praeterea, peccator secundum voluntatem intendit in finem ultimum. Appetit enim beatitudinem; et propter eam vult quicquid vult, ut dicit Augustinus, 10 Confess.: « Si ergo fruitio est actus voluntatis, peccator in peccando Deo fruitur, » ejus contrarium in litera dicitur; ergo non est actus voluntatis.

3. Praeterea, fruitio consequationem finis importat, ut dicitur in litera, quod est cum gaudio uti, non jam spei sed rei. Sed consequutio finis non est per hoc quod voluntas finem, quia sic a principio finem consequuti essemus; ergo fruitio non est actus voluntatis.

4. Praeterea, fide in Deum tendimus: non autem utendo, quia sic ad aliud Deum referremus; ergo per fidem fruimur. Fides autem est in intellectu; ergo frui non est tantum actus voluntatis, sed intellectus.

5. Praeterea, quaelibet potentia delectatur naturaliter in objecti convenientis consequatione: hoc autem nomen fruitionis importat; ergo fruitio non est magis actus voluntatis, quam ceterarum virium.

Contra. Augustinus dicit: « Frui est amore inhaerere alicui rei propter seipsam. » Sed amor est actus voluntatis; ergo et frui.

Praeterea, in alia definitione dicitur quod fruimur cognitio, in quibus voluntas delectata conquiescit. Ex quo apparet, quod fruitio est quaedam voluntatis quietatio. Sed quies voluntatis ad solam voluntatem pertinet; ergo et fruitio.

Respondeo. Frui in spiritualibus est aliquid pro fine habere, et in illo fine delectari, quia fructus in corporalibus (unde nomen fruitionis transmittitur ad spiritualia), est ultimum quod ex arbore expectatur, et quaedam dulcedinem habet. Delectari autem in fine contingit dupliciter. Uno modo ex spe finis consequendi, et haec est delectatio imperfecta. Delectari autem in fine est solum cognoscentis finem. Alio modo ex ipsa finis consequatione,

S. Th. Opera omnia. V. 22.

et haec est delectatio perfecta. Delectari autem in fine est solum cognoscentis finem; sed habere aliquid pro fine est cognoscentis finem et rationem ejus. Et ideo insensibilia, quia penitus earent cognitione, nullo modo dicuntur frui. Bruta vero quae cognoscunt finem, sed non rationem finis, dicuntur frui, sed improprie. Peccatores vero aliquid habent pro fine in quo delectantur, sed indebitum, et ideo fruuntur sed perverse. Justi vero viatores habent pro fine id quod est debitus finis, et in eo delectantur, sed solum in spe: et ideo fruuntur, sed imperfecte. Beati autem delectantur in consequatione illius debiti finis: et ideo perfecte fruuntur. Delectari autem in fine est voluntatis, ejus objectum est bonum, quod habet rationem finis. Et ideo frui est actus voluntatis.

Ad primum dicendum, quod insensibilia quamvis quietentur in fine, non tamen finem cognoscunt, et sic nec in fine delectantur, unde nec fruuntur. Bruta vero si delectentur, non tamen sic ut rationem finis cognoscant. Unde non possunt habere aliquid pro fine ultimo; et sic non dicuntur frui, nisi improprie.

Ad secundum, de peccatore, dicendum, quod quamvis desideret beatitudinem, quae ultimum finem nominat, non tamen quaerit eam ubi est, sed ubi non est. Et ideo fruitur, sed perverse.

Ad tertium dicendum, quod quamvis alia potentia consequatur finem quam voluntas, tamen voluntatis est in fine consequuto delectari, sicut etiam ejus est finem appetere consequendum; et hoc nomen fruitionis importat.

Ad quartum de fide, dicendum, quod fide non tendimus in Deum, ut habet rationem boni consequendi, sed ut habet rationem veri cognoscendi: et ideo cum frui, bonum consequutum vel consequendum respiciat, proprie fide non fruimur, sed charitate, ejus objectum est bonum.

Ad quintum dicendum, quod delectantur delectatione naturali in consequatione objectorum suorum, non delectatione animali. Secunda autem ad fruitionem exigitur, non prima. Et ideo fruuntur.

ARTICULUS II.

Ad secundum sic proceditur. 1. Videtur quod uti non sit actus voluntatis. Uti enim est referre aliquid ad obtinendum: hoc quod fruendum est. Referre autem in illud, est rationis, ejus est ordinare; ergo uti magis est rationis quam voluntatis.

2. Praeterea, usus frequentiam quaedam importat. Unde dicit Victorinus, quod usus est actus frequenter de potentia elicitus. Sed frequentia potest esse circa actus cujuslibet potentiae; ergo usus non est magis actus voluntatis quam cujuslibet potentiae.

3. Praeterea, bruta cibis utuntur sicut et homines. Sed bruta non habent voluntatem; ergo uti non est actus voluntatis.

Contra. Augustinus dicit. Uti est assumere ali-

quid in facultatem voluntatis: et ideo uti est actus voluntatis.

Praeterea, Per se et Per aliud potentias non distinguunt, ut patet in visibili per se et per accidens: sed frui et uti distinguuntur sicut propter se et propter aliud; ergo cum frui sit actus voluntatis, et uti.

Respondeo. Bonum est objectum voluntatis. Unde omnis actus qui est in bono, secundum quod bonum est, est actus voluntatis. Est autem duplex bonum: scilicet finis, et quod est ad finem. Et sicut finis habet rationem utilis et fructus, ita bonum, quod est ad finem, communiter habet rationem utilis, et sic utile importat rationem boni. Unde cum proprium objectum uti sit utile: patet quod uti est actus voluntatis. Sed actus aliquis potest attribui voluntati tripliciter. Uno modo sicut elicitus a voluntate per seipsum absolute, ut velle, vel diligere. Alio modo sicut elicitus a voluntate, sed in ordine ad rationem dirigentem, quod contingit in omnibus actibus voluntatis, in quibus invenitur id quod est proprium rationis, scilicet ordinare: et sic eligere vel intendere est actus voluntatis. Tertio modo sicut eductus a voluntate mediante aliqua inferiori potentia, quam voluntas movet ad actum, sicut ambulare vel loqui qui sunt actus a voluntate imperati. Uti autem est actus voluntatis his duobus ultimis modis. Uti enim, ordinationem quandam importat; et sic est actus voluntatis in ordine ad rationem. Item, voluntas quibusdam utitur per seipsam ea amando vel odiendo, quibusdam vero per subjectas potentias, sicut cibus per gustum. Et sic patet quomodo uti differat a caeteris actibus voluntatis. Nam velle et diligere sunt actus voluntatis, sed absolute respectu ejusdemque voliti: sed frui respectu finis ultimi. Intendere vero, et uti, et eligere sunt actus voluntatis in ordine ad rationem: sed intentio respectu finis ultimi: electio est cum aliquid primo accipitur a voluntate, ut ordinabile in finem: sed usus consistit in applicatione ejus, quod jam electum est, ad finem consequendum: quod quandoque facit voluntas immediate, quandoque mediante alia potentia, sed ambulare et loqui sunt actus voluntatis mediante inferiori potentia.

Ad primum « ordinare est rationis » dicendum, quod verum est: tamen voluntatis est sequi ordinem rationis. Cum enim ratio proponit aliquod bonum sub aliquo ordine, voluntas tendit in illud ut est sibi a ratione propositum, et relinquatur quidam ordo in actu voluntatis.

Ad secundum dicendum, de Victorino, quod secundum quod usus ab eo describitur, alio modo sumitur quam hic, quia pro consuetudine: tamen haec significatio potest reduci ad eam, de qua nunc loquimur, ut scilicet utendi frequentia, usus nominetur.

Ad tertium de brutis dicendum, quod in eis aliquid est de ratione usas: quia cognoscunt finem, et propter finem aliqua agunt: sed quia non cognoscunt ordinem ejus quod est ad finem ipsum, pro tanto in eis non proprie rationis usus invenitur.

ARTICULUS III.

Ad tertium sic proceditur. 1. Videtur falsum esse quod in litera dicitur, quod res quibus fruendum est, sunt tantum tres: scilicet Pater, et Filius,

et Spiritus sanctus. Cum enim beatitudo hominis in fruitione ultimi finis consistat, unius hominis non potest esse nisi una fruitio, sicut nec nisi una beatitudo. Sed tribus rebus non potest quis una fruitione frui, cum actus per objecta distinguantur, ergo non est fruendum tribus praedictis.

2. Praeterea, illis rebus fruendum est, quae nos bonos faciunt. Sed beatitudo creata nos bonos facit; ergo ea fruendum est; et ita non solum tribus rebus praedictis.

3. Praeterea, fructu fruendum est. Sed ipsae virtutes vel actus earum sunt fructus quidam, ut patet Gal. 5: « Fructus autem spiritus charitas, etc. »; ergo eis fruendum est, et sic non tantum tribus rebus praedictis.

Contra. Fruitio non est nisi ultimi finis: sed ultimus finis nostrae voluntatis esse non debet nisi Deus, qui est Trinitas, cum ipse solum sit summum bonum; ergo solum tribus rebus praedictis fruendum est. Praeterea. In recta fruitione consistit beatitudo, sed ex sola conjunctione ad Deum anima beatificatur; ergo Deo solo fruendum est.

Respondeo. Sicut jam dictum est, frui est aliquid pro fine ultimo habere cum delectatione. Ultimum autem dupliciter dicitur: vel in aliquo genere seu ordine, vel simpliciter. Fruimur ergo simpliciter cum delectamur in aliquo sicut in ultimo fine simpliciter: et sic sic non est nisi summo bono fruendum, quod est Pater et Filius et Spiritus sanctus. Dicimur autem frui aliquo secundum quid, cum delectamur in eo non simpliciter, sed respectu alienius ordinis vel generis: et sic dicimur aliis rebus frui, quam Deo, sed minus proprie accipiendo frui. Quia vero id quod est ultimus finis simpliciter largitur omnibus aliis finibus appetibilitatem, in quantum in eis aliqua similitudo ejus reuert; ideo etiam dum aliis qualitercumque fruimur, non eis absolute fruimur, sed eis in eo qui est ultimus finis. Unde Apostolus ad Phil. 1: « Frater, ego te fruar in Domino. »

Ad primum « actus distinguuntur per objecta » dicendum, quod Pater, et Filius, et Spiritus sanctus, cum non sint objectum fruitionis, nisi ratione bonitatis, quae una est in eis, non sunt nisi unum objectum fruitionis.

Ad secundum de beatitudine creata, dicendum, quod nos facit beatos formaliter, et non effective, sicut loquitur Augustinus. Unde ea non est fruendum, nisi large fruitione accepta: quia non est simpliciter ultimus, quamvis sit ultimus in ordine eorum quae possunt hujusmodi inesse.

Ad tertium, de actibus, dicendum, quod dicuntur fructus, non quia sunt ultimus finis simpliciter, sed quasi ultimus finis in rebus humanis, quae sunt ad actus virtutum referendae; et praecipue eum habeant in seipsis unde virtuosos delectent. Unde eis non est fruendum, nisi large accepta fruitione: sed actibus virtutum promoveamur ad summi boni fruitionem.

ARTICULUS IV.

Ad quartum sic proceditur. 1. Videtur quod non omnibus aliis praeter Deum sit utendum. Illis enim rebus utendum est, ut dicit Augustinus, quibus tendentes ab beatitudine adjuvamur: sed creaturis tendentes ad beatitudinem impediuntur, quia dicitur Sapient. 14: « Creaturae Dei in odium fa-

« etae sunt, et in temperationem animae hominum, « et in museipulam pedibus insipientium; » ergo creaturis non est utendum.

2. Praeterea, illis rebus uti possumus, quae nostrae subjacent voluntati: sed angeli et corpora caelestia nostrae non subjacent voluntati; ergo eis non est utendum.

3. Praeterea, quicumque non facit id ad quod tenetur, peccat mortaliter; si ergo tenemur uti omnibus praeter Deum, quicumque eis non utitur referendo in Deum peccat mortaliter. Sed referendo in Deum meretur quis, vel saltem virtutis actum exerceat; ergo omnis actus, vel erit meritorius, sive actus virtutis, vel peccatum mortale. Et ita non erit aliquod peccatum veniale: quod est inconveniens.

4. Praeterea, sicut virtus se habet ad bonum, ita vitium vel peccatum ad malum: sed virtute nullus male utitur, secundum Augustinum; ergo nec peccato potest aliquis bene uti; et ita non omnibus praeter Deum est utendum.

6. Praeterea, si omnibus rebus praeter Deum est utendum; ergo Deus et angeli qui operantur aliquid circa res ipsas, utuntur ipsis. Sed hoc est falsum, quia uti dicit indigentiam in utente. Uti enim est referre aliquid in id quod obtinendum est, ut Augustinus dicit; ergo falsum est quod omnibus praeter Deum sit utendum.

Contra. Unusquisque debet eo uti quod sibi in bonum cooperatur. Sed diligentibus Deum omnia cooperantur in bonum, Rom. 8; ergo omnibus debet uti.

Praeterea, unusquisque re sua debet uti: sed omnia sunt electorum Dei: 1 Cor. 5: « Omnia vestra sunt, vos autem Christi, Christus autem Dei; » ergo omnibus sancti debent uti.

Respondeo. Uti aliquo dupliciter dicitur. Uno modo sicut objecto usus, sicut dicimur uti vestimento. Alio modo sicut principio formali usus, sicut dicimur uti per voluntatem, vel per aliquem habitum. Hoc secundo modo non est haec quaestio, utrum omnibus sit utendum praeter Deum, quia constat quod non; sed quaeritur de primo modo. Cum autem uti sit actus voluntatis, ut jam dictum est, quandoque quidem sicut ipsum elicientis immediate, quandoque autem sicut imperantis inferioribus viribus: omni eo quod poterit esse objectum cujuscumque operationis, quam voluntas potest imperare, possumus uti. Voluntas autem imperat intellectui, et omnibus viribus sensitivis et motivis: unde quicquid possumus intelligere, vel sentire, vel appetere, vel tractare, totum hoc potest in usum nostrum venire. Nihil autem debite venit in usum, nisi in finem debitum referatur. Quod autem in finem proximum reducit, et in finem ultimum reduci videtur vel actu vel habitu. Unde omnibus praeter Deum uti possumus: neque eis recte utimur, nisi referendo in Deum actu vel habitu.

Ad primum « creaturae factae sunt etc. » dicendum, quod hoc non est ex eis, sed ex parte nostri abusus: et propter hoc signanter dicitur insipientium.

Ad secundum dicendum, quod non subsunt voluntati nostrae, ut circa ea aliquid facere possimus, sed ut circa eos, vel circa ea cognoscere possimus: et hanc cognitionem in Dei cognitionem ordinare possumus.

Ad tertium dicendum, quod omnibus tenemur uti: non quod semper eis utamur, sed cum utimur

in Deum referamus. Nec referre tenemur semper actualiter in Deum, sed habitualiter; quia praeccepta affirmativa obligant semper, sed non ad semper. Unde non oportet quod peccemus semper mortaliter; sed solum quando finis in quem aliquid referimus, non est ordinabilis in Deum. Si autem ordinabilis sit, et non ordinetur actu, potest esse peccatum veniale, dum eis nimis insistimus.

Ad quartum, de peccato, dicendum, quod eo nullus bene utitur, quasi formali principio usus. Sic enim peccati usus est peccare; et sic etiam nec virtute aliquis male utitur. Potest tamen sicut objecto usus aliquis virtute male uti, dum ea superbit; et peccato bene, dum ipsum abominatur.

Ad quintum dicendum, quod Deus utitur creaturis, non ut ab eis aliquid sibi accrescat: sed ut quod suum est eis communicet, scilicet bonitatem suam; unde non propter suam indigentiam eis utitur. Beati etiam utuntur rebus, non ut aliquid acquirant, sed ut id quod jam acquisierunt in actum exequantur ad majorem cumulum gloriae.

DISTINCTIO II.

Hoc itaque etc. (V. edit. nostrae tom. VI, pag. 18.)

Hic quaeruntur duo: Primo de unitate essentiae. Secundo de pluralitate personarum.

QUAESTIO I.

Circa primum quaeruntur duo: 1.^o an Deus per essentiam sit unus, vel plures; 2.^o an in ipso sit aliqua pluralitas attributorum.

ARTICULUS I.

Ad primum sic proceditur. 1. Videtur quod non sit tantum unus Deus. Plura enim bona paucioribus sunt meliora, ut dicit Philosophus: sed plures dii sunt plura bona; ergo melius est esse ut sint duo quam unus. Sed secundum Anselmum, omne quod melius est, Deo est attribuendum; ergo ponendum est plures deos.

2. Praeterea, quanto aliquid magis elongatum est a materia prima, quae est una per essentiam, tanto magis est multiplicatum, ut patet in formis elementorum et mixtorum: sed Deus maxime elongatus est a prima materia, cum sit actus purus sine omni potentialitate, vel materialitate; ergo Deus est maxime multiplicatus; ergo sunt plures dii.

3. Praeterea, sicut dicit Philosophus in 4 Meteororum, perfectum est unumquodque, cum potest sibi simile generare. Sed divina essentia perfectissimum quid est; ergo potest sibi simile generare: sed in divinis non differt posse et agere; ergo et generare: et ita sunt plures dii per essentiam.

Contra. Omnis natura, quae multiplicatur in diversis, est aliud quam suum esse: quia si multiplicatur, oportet, quod sit multiplex ejus esse, et tamen maneat una ratio naturae, sicut natura humana multiplicatur in Petro et Paulo. Sed natura divina non est aliud quam suum esse, cum sit summe simplex; ergo non multiplicatur; et sic est unus tantum Deus.

Praeterea, omnis natura quae invenitur in pluribus secundum prius et posterius, oportet quod descendat ab uno primo principio in quo perfecte

habeat (1). Unitas enim effectus attestatur unitatem causae. Sicut omnis calor reducitur ad suum primum principium calidissimum, scilicet ignem. Natura autem entis in omnibus secundum prius et posterius invenitur; ergo oportet esse unum ens primum perfectissimum, a quo omnia alia habeant esse.

Respondeo. Dicendum, quod Deum esse unum per essentiam est necessarium. Si enim essent plures dii, aliqua differentia differrent. Aut ergo ista differentia pertinet ad bonitatem, aut malitiam. Si ad bonitatem, oportet quod sit in uno et non in altero, aliter non faceret differre; ergo ille cui deest summa bonitas, deficit, et sic non erit summe bonus, et ita nec Deus. Si pertinet ad malitiam; ergo ille in quo erit, non erit simpliciter bonus, et sic nec Deus. Si dicatur quod illa differentia pertinet ad bonitatem, et est eadem in utroque secundum speciem, differens tamen secundum numerum; tunc cum approprietur cuilibet, hoc erit per aliquam differentiam superadditam, cum commune non approprietur vel specificetur, nisi per additionem: et sic, cum superadditio faciat compositum, non erit ibi summa simplicitas; ergo nec deitas, sive Deus.

Ad primum « Plura bona paucioribus etc. » dicendum, quod intelligendum est de bonis finitis, quibus potest fieri additio, et per additionem augmentantur; non autem de bono infinito; quia nec additionem recipit nec augmentum recipere potest, cum sit infinitum.

Ad secundum dicendum, quod propositio habet veritatem de formis inhaerentibus materiae, et ab ea dependentibus, sicut patet de forma elementi et misti; non autem de forma per se existente, et non dependente a materia: huiusmodi autem forma est Deus, cum sit actus purus nulli inhaerens.

Ad tertium dicendum de perfecto, quod propositio illa non intelligitur de universalibus: sed solum in generabilibus et corruptibilibus: alioquin sol et angelus non essent quid perfectum in suo genere.

ARTICULUS II.

Ad secundum sic proceditur. 1. Videtur quod in divina essentia non sit pluralitas attributorum. Simplicius enim est illud in quo non est multitudo nec rei nec rationis, quam in quo est. Deus vero simplicissimus est simplicium omnium; ergo in Deo non est multitudo, nec rei, nec rationis.

2. Praeterea, quaecumque uni et eidem sunt eadem, inter se sunt eadem. Sed attributa uni et eidem numero, scilicet Deo, sunt eadem; ergo inter se sunt eadem; ergo non est ponenda attributorum pluralitas in Deo.

3. Praeterea, unius simplicitatis unica est actio: ergo unica forma, per quam agit. Si ergo per attributa potentiae, sapientiae, et bonitatis, et huiusmodi agit; ergo non sunt nisi unica forma.

Contra. Secundum Anselmum. Omne quod melius est esse quam non esse, Deo attribuendum est. Sed simpliciter melius est esse sapientem, bonum, et sic de aliis, quam non esse; ergo ista Deo attribuenda sunt.

Praeterea, omne quod per participationem dicitur, reducitur ad aliquid quod dicitur per essentiam. Sed illa attributa, scilicet sapientia, et sic de aliis, sunt in creaturis per participationem; ergo erunt in aliquo per essentiam, a quo participantur a crea-

tura: et hoc non potest esse, nisi in Deo; ergo etc.

Respondeo. Dicendum, quod quicquid perfectionis est in creatura, est in creatore tanquam in causa, sed excellentiori modo; quia nobiliori modo est aliquid in causa quam in effectum. Unde cum perfectiones attributorum sint in creatura a creatore, erunt in creatore, sed nobiliori modo. In creatura autem differant realiter; ergo in creatore erunt idem realiter. Sed quia alia est ratio sapientiae et bonitatis: ideo haec attributa differunt ratione, quia ratio nihil aliud est quam intentio in intellectu perceptibilis, quae per nomen rei alienius, vel per eius definitionem significatur. Haec autem differentia, sive pluralitas, contingit tum propter defectum intellectus nostri, tum propter eminentiam divinae naturae. Propter perfectionem enim essentiae divinae et imperfectionem intellectus creati, quod in Deo est per modum simplicitatis et unitatis, concipitur ab intellectu per modum diversitatis et multiplicitatis: ideo perfectiones attributorum quae in Deo sunt idem, diversis conceptionibus apprehenduntur ab intellectu. Quia enim intellectus humanus accipit a creaturis, in quibus sunt huiusmodi perfectiones diversae: ideo has perfectiones in Deo existentes, in quas devenit per perfectiones creaturarum, diversimode apprehendit.

Ad primum ergo dicendum, quod de multitudine rei verum est, sed non multitudine rationis; imo quanto simplicius tanto virtuosius, et tanto habens rationem plurium perfectionum; ut patet in puncto, qui potest esse principium et terminus plurium linearum.

Ad secundum « Quae uni et eidem etc. » dicendum, quod huiusmodi perfectiones inter se sunt eadem in Deo, sicut et eadem sunt essentiae divinae; sed tamen ab essentia et inter se differunt ratione.

Ad tertium de unica actione dicendum, quod actio Dei unica est unitate rei; sed multiplicatur ratione, sicut et de essentia dictum est.

QUAESTIO II.

Circa secundum quaeruntur duo: 1.º an in Deo sit personarum pluralitas; 2.º an sit illa pluralitas rei, vel rationis.

ARTICULUS I.

Ad primum sic proceditur. 1. Videtur quod in Deo non sit pluralitas personarum. Ad multiplicationem suppositorum sequitur essentiae multiplicatio; si ergo essentia divina multiplicari non potest, nec eius supposita poterunt.

2. Praeterea, eorum quae sunt idem, si unum multiplicatur, et reliquum. Sed in Deo est idem essentia et suppositum: si ergo essentia non multiplicatur, nec suppositum; ergo etc.

3. Praeterea, divina essentia plene et perfecte est in una persona. Sed ultra perfectionem plenam additio est superflua; ergo ponere pluralitatem personarum est ponere superfluum, quod esse non potest in divinis.

Contra. Perfectio boni consistit in sua communicatione: sed communicatio non est ejusdem ad se, sed alterius ad alterum; ergo ubi est summa et perfecta bonitas, ibi erit communicatio unius ad alterum, et ita pluralitas. Cum ergo in Deo sit perfecta bonitas; ergo et pluralitas.

Praeterea, ubi est summa beatitudo ibi est

(1) Edit. Rom. 1570 ad marginem: « Lege, habeatur. »

summa jucunditas. Sed cum nullius boni sine socio jucunda sit possessio, ad summam jucunditatem requiritur societas, et ita pluralitas. In Deo autem est summa beatitudo; ergo societas, et pluralitas. Hoc idem potest argui ex perfectione divinae charitatis, quae est amor gratuitus summe tendens in alium.

Respondeo. Ponere distinctionem personarum in Deo non est necessarium propter efficaciam rationum, sed propter fidei veritatem, et sacrae Scripturae auctoritatem, quae superior est omni ratione. Ideo dicendum est in Deo esse trinitatem personarum.

Ad primum, de multiplicatione, dicendum, quod essentia creata in pluribus suppositis manet una secundum rationem naturae: unde si esset idem quod suum esse, maneret una secundum esse sicut est de divina. Sed quia habet esse aliud a natura, multiplicatur esse, et manet una ratio naturae in creaturis.

Ad secundum, de his quae sunt idem, dicendum, quod ea quae sunt idem secundum rem et rationem, si unum multiplicatur, multiplicatur et reliquum: persona autem et essentia, quamvis sint idem re, differunt tamen ratione. De ratione enim personae est incommunicabilitas, non de ratione essentiae; et ideo, quamvis essentia sit communicabilis, non tamen persona.

Ad tertium dicendum, quod essentia divina perfecte est in una persona per unum modum essendi per quem non est alia, sed per alium modum essendi per relationes originis distinctum, sicut esse ab alio, et non esse ab alio.

ARTICULUS II.

Ad secundum sic proceditur. 1. Videtur quod pluralitas suppositorum in divinis non sit realis. Dicit Damascenus. Tres personae re idem sunt, ratione autem et cogitatione distinguuntur; ergo videtur quod non sit ibi pluralitas realis.

2. Praeterea, personae distinguuntur per proprietates: proprietates autem illae non adduntur supra essentiam secundum rem, sed tantum secundum rationem; ergo videtur quod distinctio personarum, quam faciunt, sit distinctio rationis.

3. Praeterea, Augustinus dicit. Tres personae in nullo absoluto distinguuntur, sed tantum in his quae sunt ad aliquid: res autem non est ad aliquid sed est absolutum; ergo videtur quod tres personae non sint tres res, et ita non est realis distinctio.

Contra. Res quibus fruendum est, sunt Pater, et Filius, et Spiritus sanctus, ut dicit Augustinus; ergo tres personae sunt plures res; ergo differunt re.

Praeterea, si ratio distingueret personas; ergo cum attributa differant ratione, distinguerent personas, quod falsum est.

Respondeo. Dicendum, quod sicut Deus dicitur realiter bonus, quamvis bonitas non differt in Deo ab essentia nisi ratione, ita dicitur realiter relatus, quamvis relatio non differt ab essentia nisi ratione: unde et realiter de Deo dicitur quicquid per se consequitur ad esse relatum. Relatum autem, in quantum hujusmodi, distinguitur ab eo ad quod refertur, cum opponantur adinvicem relative; et ideo realiter distinguitur Deus Pater a Deo Filio; et sic distinctio personarum est realis.

Ad primum, de auctoritate Damasceni, dicen-

dum est, quod sic intelligenda est: ratione, idest relatione.

Ad secundum dicendum, quod verum est, cum a suo correlativo differt realiter; et sic personae distinguuntur.

Ad tertium « res non est ad aliquid » dicendum, quod res est de transcendentibus; et ideo se habet convenienter ad absoluta et relativa; et ideo est res essentialis secundum quam personae non differunt, et est res relativa sive personalis, secundum quam personae distinguuntur.

DISTINCTIO III.

Apostolus namque etc. (V. edit. nostrae tom. VI, pag. 28.)

Hic quaeruntur tria: Primo Deus possit cognosci a creatura. Secundo an possit cognosci per creaturam. Tertio de vestigio Dei in creatura.

QUAESTIO I.

Circa primum quaeruntur duo: 1.º an Deus sit cognoscibilis a creatura; 2.º an Deum esse sit per se notum.

ARTICULUS I.

Ad primum sic proceditur. 1. Videtur quod Deus non possit cognosci a creatura. Dicit enim Dionysius de Div. nom., quod Deum, nec dicere, nec intelligere possumus: quod sic probat. Cognitio est tantum existentium: sed Deus est supra omnia existentia; ergo est supra cognitionem.

2. Praeterea, plus distat Deus a quolibet intelligibili, quam intelligibile distat a sensibili. Sed sensus non potest intelligere cognoscendo sensibile; ergo nec Deus potest cognosci ab intellectu nostro, creato intelligere, cognoscendo quodlibet intelligibile.

3. Praeterea, ut dicit Philosophus, Omne infinitum est ignotum. Cujus ratio est, quia de ratione infiniti est, ut sit extra accipientem secundum aliquid sui; et tale est ignotum. Sed Deus est infinitus; ergo est ignotus.

Contra. Rom. 1: « Quod enim notum est Dei » Glossa: « Per rationem cognoscibile de Deo; » ergo Deus est cognoscibilis ab intellectu creato.

Praeterea, finis ultimus humanae vitae est cognitio Dei. Jo. 17: « Haec est vita aeterna ut cognoscant te etc. » Si ergo homo non posset cognoscere Deum, esset invanum constitutus, quod est inconveniens secundum illud Psal. 88: « Numquid vane constituisti filios hominum? »

Respondeo. Dicendum, quod differt cognitio apprehensionis et comprehensionis: quia apprehenditur quod aliquo modo ab intellectu percipitur: comprehenditur id cuius nihil latet intelligentem. Deus autem ab intellectu creato cognoscibilis est cognitione apprehensionis, non comprehensionis, quia secundum Boetium: « Omnis cognoscens habet cognitionem de re cognita, secundum modum cognoscens, non secundum modum rei cognitae. » Modus autem finitae virtutis non attingit ad modum objecti infiniti; et ideo ab intellectu creato, qui est finitus, Deus comprehendi non potest.

Ad primum, de Deo, dicendum, quod Deus non est omnino expers entitatis; ideo non est omnino expers cognoscibilitatis: sed quia est super alia

entia; ideo non eo modo quo alia entia cognoscuntur, cognoscitur, scilicet per modum comprehensionis.

Ad secundum, de distantia intelligibilis, dicendum, quod major est distantia intelligibilis creaturae a Deo, quam intelligibilis a sensibili secundum naturae proprietatem, non autem secundum rationem cognoscibilitatis; quia utrumque est separatum a materia, et ita cognoscibile ab intellectu, non autem sensibile.

Ad tertium « infinitum est ignotum » dicendum, quod Philosophus loquitur de infinito privative, non autem negative. Dicitur enim infinitum secundum Damascenum, quia non finitur loco, nec tempore, neque comprehensione intellectus.

ARTICULUS II.

Ad secundum sic proceditur. 1. Videtur quod Deum esse, per se sit notum. Illa dicuntur per se nota, quorum cognitio naturaliter est nobis insita, ut, omne totum est majus sua parte: sed cognitio existendi Deum, secundum Damascenum, naturaliter est nobis insita; ergo Deum esse est per se notum.

2. Praeterea, omnis cognitio est per unionem rei cognitae ad cognoscentem. Sed Deus est unitus animae per seipsum; ergo per seipsum cognosci potest.

3. Praeterea, illud est per se notum, quod non potest cogitari non esse. Sed Deum non esse non potest cogitari; ergo ipsum esse per se notum est. Probatio mediae patet per Anselmum. Deus est quo majus excogitari non potest; sed illud quod non potest cogitari non esse, est majus eo quod potest cogitari non esse; ergo Deus non potest cogitari non esse.

Contra. Ea quae per se sunt nota, ut dicit Philosophus, etsi exterius negentur ore, nunquam interius non possunt negari corde. Sed in Psal. 15 et 32 dicitur: « Dixit insipiens in corde suo, non est Deus: » ergo Deum esse non est per se notum.

Praeterea, quicquid est conclusio demonstrationis non est per se notum: sed Deum esse demonstratur a Philosophis; ergo Deum esse non est per se notum.

Respondeo. Deum esse potest dupliciter considerari. Uno modo secundum se; et sic est per se notum, quia summi esse est sua essentia; et sic cum dicitur, Deus est, praedicatum includitur in ratione subjecti: tales autem propositiones sunt per se notae quantum in se est. Alio modo per comparisonem ad nos: et hoc dupliciter. Aut secundum suam similitudinem et participationem, et hoc modo ipsum esse est per se notum: nihil enim cognoscitur nisi per veritatem suam quae est a Deo exemplata. Veritatem autem esse per se est notum. Alio modo secundum suam naturam: et hoc modo non est per se notum, imo est conclusio demonstrationis. Non enim visis sensibilibus statim cognoscitur, sicut alia principia cognoscuntur quae sunt per se nota; et sic oportet ratiocinando in ipsum devenire.

Ad primum, de auctoritate Damasceni, dicendum, quod divina cognitio nobis inserta est secundum ipsius participationem, in quantum in omni veritate cognita ipse cognoscitur, et non secundum quod est in natura sua.

Ad secundum « Deus est etc. » dicendum, quod

verum est per essentiam et praesentiam et per potentiam; non tamen ut objectum intellectus; et hoc requiritur ad cognitionem.

Ad tertium « Deus est quo majus etc. » dicendum, quod verum est, si supponatur Deum esse: unde ratio ista non cogit, quia supponit id quod probare debet.

QUAESTIO II.

Circa secundum quaeruntur duo: 1.^o an Deus per creaturam sit cognoscibilis et a quo; 2.^o utrum Trinitas per creaturam sit cognoscibilis.

ARTICULUS I.

Ad primum sic proceditur. 1. Videtur quod Deus possit cognosci per creaturas ab homine. Rom. 1: « Invisibilia Dei a creatura mundi per ea quae facta sunt intellecta conspiciuntur. » Creatura quaedam mundi dicitur homo, secundum expositionem Magistri; ergo per creaturam ab homine potest cognosci.

2. Praeterea, videtur quod ab angelo possit cognosci. Cognitio enim Dei per creaturas fit per hoc quod videtur divina bonitas relucens in creatura. Sed angelus cognoscit divinam bonitatem relucere in creaturis; ergo cognoscit creatorem ex creaturis.

3. Praeterea, videtur quod et bruta. Nulli enim fit praeceptum nisi ei qui cognoscit praeceptum. Sed Jonae 4 dicitur quod Deus praecepit vermi quod perenteret hederam; ergo potest cognoscere divinum praeceptum vermis; ergo et praecipientem Deum.

4. Praeterea, omnis effectus ducens in cognitionem causae suae est aliquo modo proportionatus sibi: sed creaturae non sunt proportionatae Deo; ergo ex eis non potest homo in Dei cognitionem venire.

5. Praeterea, videtur quod nec homo peccator. Ambrosius enim dicit inducens illud Math. 5: « Beati mundo corde » « Si qui mundo corde sunt, Deum videbunt; ergo alii non videbunt: neque enim indigni Deum videbunt; » ergo neque hic qui Deum videre voluerit, poterit Deum videre.

Respondeo. Creatura est effectus creatoris: et quia causa habet cognosci per effectum; ideo Deus habet cognosci per creaturam. Sed ad cognitionem Dei per creaturas duo exiguntur: scilicet quod cognoscens possit aliquo modo capere Deum, et quod per creaturas in ejus cognitionem deveniat. Propter primi defectum bruta non possunt cognoscere Deum ex creaturis, quia non sunt capacia divinae cognitionis. Propter defectum secundi (!) beati non cognoscunt Deum ex creaturis, quia vident Deum per essentiam: cognoscunt tamen eum in creatura, sicut et Deus seipsum videt in creaturis repraesentatum; et ideo cognitio per creaturas est tantum hominum viatorum, et est communis bonorum et malorum.

Primum ergo concedendum est.

Ad secundum, de angelo, dicendum, quod quamvis cognoscat divinam bonitatem relucere in creatura, non tamen ex creatura venit in creatorem, sed e converso.

Ad tertium, de verme, dicendum, quod praeceptum Dei non venit ad vermem, ut apprehenderet rationem praecepti; sed divina virtute mota est ejus

(!) *Al.* propter defectum, sed beati.

aestimativa ad complendum illud quod Deus disponebat.

Ad quartum « omnis effectus etc. » dicendum, quod ideo non ducit in cognitionem perfectam ipsius, sed imperfectam.

Ad quintum, dicendum quod Ambrosius loquitur de cognitione Dei per essentiam quae erit in patria.

ARTICULUS II.

Ad secundum sic proceditur. 1. Videtur quod per creaturas in cognitionem Trinitatis Philosophi devenerunt. Dicit enim Aristoteles in principio de Caelo et mundo: « Et per hunc quidem numerum, » scilicet ternarium « adhibuimus nos ipsos magnificare « Deum unum, eminentem, proprietatibus eorum « quae creata sunt. »

2. Praeterea, Mercurius Trimegistus dicit. Unus genuit unum propter suipsius amorem, Monas Monadem genuit propriumque in se reflexit ardorem; ergo Trinitatem cognovit: sed non nisi per creaturam; ergo etc.

3. Praeterea, Augustinus dicit, lib. Conf., quod ipse legit in quodam libro Platonis totum illud, « In principio erat verbum etc. » usque ad locum illum, « Verbum caro factum: » in quibus verbis distinctio personarum exprimitur; ergo ut prius.

4. Praeterea, ipse recitat in lib. contra quinque haereses de Hermeyde, qui fecit librum qui dicitur Verbum perfectum, in quo ait: « Ille est filius « Dei benedicti et bonae voluntatis qui humano « ore enarrari non potest. »

5. Praeterea, Sybilla, ut ait Augustinus lib. de Civit. Dei, dicit: « Ipsam vero cognoscite dominum « Dei filium esse; » ergo habent Philosophi cognitionem distinctionis personarum: sed non nisi per creaturas; ergo etc.

6. Praeterea, in anima rationali est imago Dei per quam distincte repraesentatur unitas essentiae et Trinitas personarum; ergo per ipsam Trinitas potest cognosci.

7. Praeterea, Exod. 8, dicitur quod magi Pharaonis defecerunt in tertio signo: et exponit Glossa, quia defecerunt Philosophi in cognitione tertiae personae, scilicet Spiritus sancti; ergo duas personas saltem cognoverunt.

Contra. Heb. 11: « Fides est substantia rerum « sperandarum, argumentum non apparentium. » Sed Deum esse trinum scilicet et unum est articulus fidei; ergo non est apparens rationi.

Respondeo. Philosophi non potuerunt devenire per creaturas ad cognitionem personarum, quantum ad propria, devenerunt tamen quantum ad appropriata. Cognoverunt enim in Deo potentiam, sapientiam et bonitatem: non tamen Patrem et Filium et Spiritum sanctum. Et ratio hujus est, quia Deus non habet respectum causae ad creaturas ratione propriorum, sed ratione appropriatorum; et ideo in cognitionem Dei quantum ad appropriata devenerunt Philosophi per creaturas, sicut ex effectibus in causam, non autem quantum ad propria. Ratio hujus est, quia tantum cognoscitur de unaquaque re quantum ad (1) se extendit medium per quod cognoscitur. Creaturae autem fuerunt medium per quod Philosophi in cognitionem creatoris devenerunt. Hoc autem medium deficiens est, et imper-

(1) *Lege* ad quantum.

fecte Deum repraesentans. Potuerant tamen devenire per revelationem a Deo sive a daemone factam, sive per doctrinam alterius, sicut dicitur Plato legisse libros legis et prophetarum, per quos aliqualem cognitionem Trinitatis habere potuit.

Ad primum de verbo Philosophi, dicendum, quod non intendit Philosophus trinitatem personarum in Deo ponere; sed quia in omnibus creaturis apparet perfectio in ternario, scilicet in principio, medio et fine; et ideo secundum Commentatorem, antiqui honorabant eum sacrificiis et orationibus triplicatis.

Ad ea quae objiciebantur de verbis Philosophorum, dicendum, quod per doctrinam vel revelationem ad hoc venerunt, non per rationis inquisitionem.

Ad sextum dicendum, quod imago animae potest considerari, vel ut res, vel ut imago. Primo modo potest cognosci a Philosophis. Secundo modo praesupponit cognitionem Trinitatis, cujus est imago. Neutro tamen modo, propter imperfectionem sui, sufficienter ducit in cognitionem Trinitatis.

Ad septimum dicendum, quod magi Pharaonis dicuntur defecisse in cognitione appropriati Spiritui sancto, id est bonitatis, quia bonitatem non cognoverunt quantum ad potissimum ejus effectum, id est incarnationem et redemptionem: vel quia non tantum intenderunt venerationi bonitatis divinae, quam etiam imitati non sunt, sicut venerationi potentiae et sapientiae.

QUAESTIO III.

ARTICULUS UNICUS

Ad tertium sic proceditur. 1. Videtur quod non in omni creatura sit vestigium Trinitatis et creatoris. Similitudo enim vestigii dividitur contra similitudinem imaginis. Sed quaedam creaturae sunt in quibus est similitudo imaginis, sicut in homine; ergo in illis non est vestigium.

2. Praeterea, quaelibet pars vestigii est creatura: si ergo in qualibet creatura est vestigium; ergo in qualibet parte vestigii est vestigium, et sic est abire in infinitum.

3. Praeterea, dicit Bernardus: « Modus charitatis « est non habere modum; » ergo charitas, cum sit creatura, non habebit modum, speciem et ordinem; et sic idem quod prius.

4. Praeterea, dicit Ambrosius in Examer.: « Lucis « natura est, ut non in numero neque in pondere et « mensura sit, sicut alia creatura. » In his autem tribus attenditur vestigium, secundum Augustinum; ergo non in qualibet creatura est vestigium Dei.

Contra. Sap. 11: « Omnia in numero, pondere « et mensura disposuisti. »

Praeterea, Augustinus in lib. de Natura boni, loquens de modo, specie, et ordine, ait: « Ubi enim « haec tria magna sunt, magnum bonum est: ubi « parva, parvum; ubi nulla, nullum. » Sed omnis creatura est aliquod bonum; ergo omnis creatura habet haec tria.

Respondeo. Dicendum, quod vestigium est imperfecta similitudo, imperfecte ducens in cognitionem ejus cujus est similitudo; ut patet in vestigio animalis a quo metaphorice accipitur hoc vestigium. Quia ergo creatura est imperfecta similitudo creatoris, imperfecte ducens in notitiam ipsius, et praecipue quantum ad cognitionem Trinitatis; ideo creatura est vestigium creatoris, et maxime respectu

Trinitatis. Et quia creatura nullo modo imitatur creatorem, nisi in quantum habet aliquid perfectionis; perfectio autem creaturae, secundum Pythagoram, consistit in principio, medio et fine; ideo sub triplici generali ratione partium vestigii, scilicet principii, medii et finis, diversimode possunt considerari in creatura, propter multa quae in ipsa inveniuntur secundum ordinem se consequentia; ut principia naturae, natura ipsa, virtus et operatio, et alia huiusmodi quae secundum diversas combinationes diversimode pertinent ad principium, medium et finem. Et inde est quod partes vestigii diversimode inveniuntur a Sanctis assignatae.

Ad primum « Vestigium dividitur etc. » dicendum, quod divisio illa non est per operationem rei, sed rationis: unde non sequitur quod eadem res non possit esse vestigium et imago; sed tantum quod secundum idem non sit vestigium et imago; et hoc verum est. Nam secundum naturam est anima rationalis vestigium, secundum partem intellectivam imago.

Ad secundum dicendum, quod aliquid dicitur modificari aliquo dupliciter. Vel formaliter, et sic dicitur res modificari suo modo qui in ipsa est: vel effective, et sic omnia modificantur a Deo qui modum rebus imponit: et hinc est quod Deus dicitur effective modus omnium rerum. Sic ergo dicendum est, quod modus creaturae non habet modum quo formaliter modificatur, sed modum effective modificantem; et ita est in omnibus aliis partibus vestigii, quod non habent aliquas partes formales vestigii.

Ad tertium de charitate, dicendum, quod dupliciter potest considerari: aut ut creatura quaedam, et sic habet modum et tres partes vestigii: aut per relationem ad suum objectum quod est infinitum, et sic non habet modum; quia non tantum diligitur Deus a nobis, quin semper posset plus diligi.

Ad quartum de luce, dicendum, quod dupliciter potest considerari: aut ut est quaedam natura in se creata, et sic est aliquid finitum, et sic in ipsa est vestigium; vel per compositionem (1) ad corpora quae sunt receptiva secundum essentiam vel virtutem in infinitum, quia de natura lucis est ut in infinitum se diffundat, si inveniat receptivum: et pro eo dicitur non esse in numero, pondere et mensura creata, ab Ambrosio.

Nunc vero ad eam etc. (V. edit. nostrae tom. VI, pag. 29.)

Circa partem istam quaeruntur tria: 1.^o in quo sit in anima imago Dei; 2.^o de prima assignatione imaginis; 3.^o de secunda.

QUAESTIO I.

ARTICULUS UNICUS.

Ad quem sic proceditur. 1. Videtur quod imago non sit in aliqua potentia animae. Diversa enim genera potentiarum non uniantur nisi in essentia animae. Sed appetitivum et intellectivum sunt diversa genera potentiarum animae, ut dicitur in fine primi de Anima. Sed mens comprehendit ista: quia ab Augustino in mente ponitur intelligentia et voluntas; ergo mens, prout in ea est Dei imago, est animae essentia.

2. Praeterea, Augustinus 10 de Trin. dicit « Me-

(1) *Lege* comparisonem.

« memoria, intelligentia et voluntas sunt una mens, « una vita; » ergo sicut vita pertinet ad essentiam; ita et mens; ergo cum imago Dei sit in mente, erit in animae essentia.

3. Praeterea, una potentia non est subjectum alterius potentiae. Sed mens est imaginis subjectum. Imago enim, ut dicitur, secundum potentias attenditur; ergo et mens non est aliqua potentia; ergo erit animae essentia.

Contra. Anima non habet alias partes, nisi suas potentias. Sed mens est quaedam superior pars animae, ut Augustinus dicit in lib. de Trin.; ergo mens est potentia, non animae essentia.

Praeterea, essentia communis est omnibus potentiis animae: sed mens non est communis omnibus potentiis, quia dividitur contra sensus; ergo mens non est essentia animae.

Respondeo. Secundum Augustinum: Illud in anima est excellentius in quo est imago Dei. Sed secundum essentiam anima, aliquo quod est in seipsa non est excellentior, sed secundum potentiam. Mens autem est id in quo est imago Dei in anima, secundum Augustinum; ergo mens, prout est in ea imago Dei, animae est potentia non essentia animae. Mens autem dicitur a metiri, metiris: intellectus autem est metiri res ad sua principia; ergo mens est ipsa pars intellectiva animae, comprehendens in se cognitivam et affectivam, quae dividitur contra partem sensitivam et vegetativam.

Ad primum dicendum, quod voluntas et intellectus quodammodo pertinent ad diversa genera potentiarum; prout scilicet genera potentiarum animae distinguuntur per objecta. Nam bonum et verum sunt objecta diversi generis. Alio modo pertinent ad idem genus potentiarum, prout scilicet genera potentiarum animae distinguuntur quantum ad modum agendi; et sic unum genus potentiarum animae est pars rationalis, quae hic mens dicitur, comprehendens voluntatem et intellectum; quae quidem pars animae operatur absque organo corporali. Aliud genus est pars sensitiva, cuius operatio sit per organum corporale. Tertium genus est pars nutritiva, quae operatur etiam mediantibus qualitatibus elementaribus.

Ad secundum « vita pertinet ad essentiam animae » dicendum, quod uno modo est vita esse viventis, et sic vita pertinet ad essentiam animae. Alio modo vita est operatio viventis; et sic vita pertinet ad potentiam animae, et diversa vita ad diversam potentiam; et sic dicuntur partes imaginis esse una vita, in quantum ad unum genus vitae pertinent.

Ad tertium dicendum, quod mens non comparatur ad intellectum et voluntatem sicut subjectum, sed magis, sicut totum ad partes, prout mens potentiam ipsam nominat, et sic sumitur hic.

QUAESTIO II.

Circa secundum quaeruntur tria: 1.^o in quibus potentiis animae attendatur imago; 2.^o de his potentiis in comparatione ad suum subjectum, scilicet animam; 3.^o in comparatione ad objectum.

ARTICULUS I.

Ad primum sic proceditur. 1. Videtur quod imago Dei in anima non sit in memoria, intelligentia, et voluntate. Memoria enim non pertinet ad

imaginem: quia illud quod commune habemus cum brutis, non pertinet ad imaginem: sed memoriam habemus communem cum brutis; ergo etc.

2. Praeterea, potentia quae concernit aliquam differentiam temporis, non pertinet ad imaginem, cum imago sit in parte intellectiva, quae non concernit tempus determinatum, sicut nec alias singulares circumstantias. Sed memoria proprie est praetitorum; ergo etc.

3. Praeterea, videtur quod intelligentia ad imaginem non pertineat. Potentiae enim distinguuntur per actus: sed idem est actus memoriae et intelligentiae, scilicet noscere, sicut ex verbis Magistri in litera patet; videtur ergo quod eadem sunt potentia. Sed memoria non pertinet ad imaginem, sicut probatum est; ergo nec intelligentia.

4. Praeterea, videtur quod voluntas ad imaginem non pertineat. Quia super illud: « Faciamus hominem ad imaginem et similitudinem nostram, » dicit Glossa, quod « imago est in potentia cognoscendi, similitudo in potentia diligendi. » Sed voluntas non est potentia cognitiva, sed affectiva; ergo voluntas non pertinet ad imaginem: et ita male assignatur imago, quantum ad has potentias.

Respondeo. In his tribus imago attenditur. Anima enim primo species recipit et tenet, et sic habetur memoria; retentas cognoscit, et sic intelligentia; retenta autem et intellecta acceptat tamquam sibi placenta, et sic habetur voluntas: unde intelligentia procedit ex memoria. Si enim anima non reciperet species; neque etiam retineret, nec intelligeret. Et ita a memoria ex intelligentia procedit voluntas. Si enim retentas non intelligeret, nec diligeret. Et sic ista tria sunt unius animae; et secundum procedit a primo, tertium vero ab utroque procedit; sicut tres personae in una essentia, et una ab altera procedit, tertia autem ab utroque.

Ad primum ergo « memoria communis est nobis et brutis » dicendum, quod verum est de memoria quae est retentiva specierum sensibilium in organo corporali; non autem de memoria quae est retentiva specierum intelligibilium in seipsa.

Ad secundum « memoria concernit aliquam differentiam » dicendum, quod verum est de memoria quae est pars sensibilis, non quae intelligibilis, et haec pertinet ad imaginem.

Ad tertium « intelligentia et memoria » dicendum, quod nosse in habitu pertinet ad memoriam, nosse in actu ad intelligentiam, prout pars ponitur imaginis, ut per Augustinum, 14 de Trin., patet.

Ad quartum dicendum, quod potentia cognoscendi in praedicta auctoritate large accipitur, sive quae ordinatur ad cognitionem, sicut memoria, sive qua cognoscitur, sicut intelligentia, sive quae cognitionem consequitur, sicut voluntas: et sic voluntas est in potentia cognoscendi, et sic pertinet ad imaginem. Vel potest dici, quod illa assignatio imaginis est alia ab ea de qua hic agitur. Inveniuntur enim diversae imaginis assignationes.

ARTICULUS II.

Ad secundum sic proceditur. 1. Videtur quod potentia animae sit ipsa anima essentialiter. Quia dicit hic Augustinus quod haec tria, scilicet memoria, intelligentia et voluntas, eo sunt unum quo una vita, una mens, una essentia.

2. Praeterea, idem est principium operandi et *S. Th. Opera omnia. V. 22.*

essendi. Sed forma substantialis est principium essendi, potentia autem principium operandi; ergo in homine forma substantialis, quae est anima, et potentia, idem sunt in substantia.

3. Praeterea, forma substantialis nobilior est quam accidentalis: sed forma accidentalis seipsa agit, ut caliditas seipsa calefacit; ergo et forma substantialis, scilicet anima, est sua potentia substantialiter.

Contra. Sicut se habet posse ad esse, ita potentia ad essentiam. Sed in quolibet creato differt esse et posse; ergo essentia et potentia; ergo et in anima.

Juxta hoc quaeritur, Utrum una oriatur ex altera: et videtur quod non. Quia quae simul esse incipiunt, unum non oritur ex alio.

Praeterea, accidens causatur a suo subjecto. Sed una potentia non est subjectum alterius, cum potentia sit accidens; ergo una potentia non causatur ab alia; ergo non oritur.

Contra. Potentiae determinantur per actus unius potentiae, sed actus unius potentiae oritur ab actu alterius; ergo et una potentia ab alia.

Respondeo. Anima dupliciter potest considerari. Uno modo, ut est substantia quaedam: et sic potentiae non sunt essentielles, velut partes essentiae ejus: sed sunt ei quasi proprietates naturales: et hoc ideo, quia operatio est ejus accidens. Et ideo potentia, quae est immediatum operationis principium, est de genere accidentis: solius enim Dei potentia et operatio est sua substantia. Alio modo ut totum potentiale: et sic potentiae sunt ei essentielles; quia ita totalitas animae consistit in potentiis sicut in partibus. Partes autem sunt essentielles toti.

Ad primum dicendum, quod totum potentiale est medium inter universale, et totum integrale: nam totum universale perfecte inest cuilibet parti secundum essentiam et virtutem, et ideo proprie praedicatur de qualibet parte. Totum vero integrale non est perfecte in aliqua suarum partium, neque secundum essentiam, neque secundum virtutem, et ideo nullo modo praedicatur de una parte; sed de omnibus simul praedicatur improprie. Totum vero potentiale est in qualibet parte perfecte secundum essentiam, sed non secundum virtutem; et ideo potest praedicari de qualibet parte, et de omnibus simul, quamvis non ita proprie sicut totum universale: et hoc modo loquitur Augustinus.

Ad secundum, idem est principium operandi etc., dicendum quod intelligendum est de principio primo, scilicet forma: potentia autem non est primum principium, sed proximum principium operandi.

Ad tertium, de forma accidentali, dicendum, quod non est simile de forma substantiali et accidentali: quia forma accidentalis proportionata est actioni suae, cum tam ipsa quam sua actio sit in genere accidentis: forma autem substantialis non, cum ipsa sit in genere substantiae per reductionem, sive ut principium substantiae; actio autem sua est in genere accidentis.

Ad secundam quaestionem dicendum, quod quaecumque aliqua numerositas ab aliquo uno procedit naturaliter, oportet quod ordinate procedat; quia ab uno non producit naturaliter nisi unum: unde cum pluralitas potentiarum animae fluat ab essentia animae, oportet quod ordinate fluant, et ita una mediante altera.

Ad primum, simul sunt in anima. Dicendum quod simul insunt duratione sive tempore: sed non propter hoc ordine naturae.

Ad secundum dicendum, quod una non fluit ab alia tamquam a subjecto, sed omnes fluunt ab essentia animae; sed una immediate, alia mediante altera.

ARTICULUS III.

Ad tertium sic proceditur. 1. Videtur quod imago attendatur in istis potentiis respectu quorumlibet objectorum. Augustinus enim in lib. de Trin. ait: « Cum in natura mentis humanae Trinitatem quaerimus, in tota quaerimus, non separantes actionem temporalium a contemplatione aeternorum. » Omnia autem objecta vel sunt temporalia vel aeterna; ergo respectu quorumlibet objectorum attenditur imago.

2. Praeterea, potentia et natura potentiae se habet similiter ad omnia sua objecta, sed per habitus diversos restringitur ad haec vel illa. Cum ergo assignatio primae imaginis sit secundum potentias, ut dicitur, et non secundum habitus, videtur quod sit respectu quorumlibet objectorum.

3. Praeterea, secundum Augustinum, 10 de Trin.: « Anima semper novit et intelligit quod amat se: » sed hoc esse non potest nisi in quantum semper se novit, intelligit, et amat in omni intelligibili et diligibili; ergo respectu omnium intelligibilium et diligibilium attenditur imago Dei in anima.

Contra. Augustinus dicit, 13 de Trin., quod Trinitas, quae in inferiori ratione invenitur, licet ad interiorem hominem jam pertineat, non tamen imago Dei appellanda est vel putanda. Sed temporalia pertinent ad inferiorem rationem; ergo respectu eorum non est imago.

Praeterea, secundum istam assignationem imaginis, intelligentia sequitur memoriam: sed in his quae per acquisitionem cognoscimus, ex intelligentia sequitur memoria; ergo videtur quod ista assignatio imaginis non attendatur respectu quorumlibet objectorum.

Respondeo. Dicendum, quod imago in tribus praedictis attenditur. Primo et principaliter in respectu ad Deum, secundario autem respectu sui ipsius, respectu vero aliorum non nisi improprie. Cujus ratio est, quia imitatio Dei, quae est de ratione imaginis, potest hic accipi dupliciter. Uno modo secundum conformitatem animae ad suum objectum: et sic anima imitatur Deum in quantum ipsum novit, intelligit et amat, et ex consequenti in quantum novit, intelligit et amat seipsam, ut est similis a Deo ducens in ipsum. Alio modo, secundum habitudinem eorum quae sunt in anima ad invicem: ut scilicet, ea quae sunt in anima hoc modo se habeant ad invicem, sicut divinae personae: et haec similitudo habitudinis servatur inter Deum et animam respectu Dei et sui ipsius. Primo quantum ad ordinem originis: quia sicut Filius est a Patre, et Spiritus sanctus ab utroque, ita ex ipsa memoria qua mens novit Deum et se, oritur intellectus a, et ex utroque voluntas. Secundo quantum ad aequalitatem: quia quantum anima novit seipsam et Deum, tantum intelligit et amat, sicut tres personae sunt aequales. Sed respectu aliorum objectorum non conformatur anima Deo sicut objecto, cum magis distent a Deo quam ipsa; nec etiam

servatur aequalitas; quia non tantum diliguntur, quantum cognoscuntur: et ideo non proprie est imago respectu ipsorum, sed aliqua similitudo quasi vestigii.

Ad primum dicendum, quod quamvis in actione temporalium sit quaedam Trinitas, non tamen quae sit imago Dei, ut ibidem Augustinus dicit.

Ad secundum dicendum, quod etsi imago attendatur secundum potentias, non tamen nisi secundum quod comparantur ad actus; quia secundum aliquos, anima perfecte imitatur Deum.

Ad tertium dicendum, quod verbum Augustini intelligendum est de noticia intellectiva, et amore habituali. Unde in 15 de Trin. dicit, quod memoria intellectiva et voluntas, quae semper simul sunt et simul fuerunt, sive cogitentur sive non cogitentur, ad solam memoriam pertinent, per quam importatur quasi habitualis cognitio.

QUAESTIO III.

ARTICULUS UNICUS

Circa secundam assignationem imaginis sic proceditur. 1. Videtur quod illa non differat a praedicta, sicut dicitur, quod ista assignatur secundum habitus, illa secundum potentias. Imago enim attenditur in anima praecipue respectu hujus objecti quod est Deus: sed anima non cognoscit seipsam nec Deum tali modo cognitionis de quo hic loquimur, scilicet mediante habitu, sed per essentiam; ergo non videtur quod secundum aliquos habitus assignetur imago.

2. Praeterea, nullus habitus est consubstantialis, cum omnis habitus sit accidens; sed noticia et amor sunt consubstantiales ipsi menti, ut hic dicitur; ergo non sunt habitus.

Contra. Cuilibet potentiae respondet suus habitus; si ergo mens non sit habitus, sed essentia animae, secundum quod hic sumitur, erunt quatuor partes imaginis: scilicet mens, et tres habitus potentiarum trium; et ita non repraesentabunt trinitatem.

Respondeo. Quidam dicunt quod haec assignatio imaginis est eadem cum praedicta. Nam mens sumitur hic pro memoria a reminiscendo dicta; unde dicunt quod mens hic sumitur pro habitu memoriae, noticia pro habitu intelligentiae, et amor pro habitu voluntatis. Sed quia illa opinio non procedit secundum opinionem Augustini, et nimis extorta videtur, ideo aliter dicunt quidam quod haec duae assignationes imaginis differunt per hunc modum: nam mens sumitur sicut supra pro superiori parte animae, in qua est imago, et noticia pro habitu memoriae, et amor pro habitu voluntatis: et ita haec assignatio sumitur secundum essentiam supremae partis animae, id est intellectivae, et habitus consubstantiales: praedicta autem secundum potentias. Sed quia non facile est videre qualiter memoria et intelligentia in parte intellectiva distinguantur ut diversae potentiae: ideo videtur melius dicendum secundum intentionem Augustini, quod haec secunda assignatio imaginis, quam ipse primo ponit, 9 de Trin., attenditur secundum partem superiorem animae et duos habitus ejus, ut dictum est. Sed haec repraesentatio Trinitatis in nobis est imperfecta. Nam per habitualementiam non fit in nobis verbum repraesentans verbum increatum quod est persona Filii. Et ideo postmodum investigat aliam assignationem imaginis; scilicet memoriam,

intelligentiam et voluntatem: ut memoria pertineat ad omne id quod habitualiter se habet in anima; intelligentia vero ad actualem considerationem, voluntas autem ad actualem amorem. Unde dicit in 14 de Trin., quod verbum esse sine cognitione non potest in tribus personis: et positus istis, imago ista cognoscitur, scilicet memoria, intelligentia et voluntate. Hanc autem non dico intelligentiam qua intelligimus cogitantes. Et sic assignatio attenditur secundum habitum et duos actus. Quamvis etiam possit dici quod attenditur secundum potentias: non quod memoria et intelligentia sint diversae potentiae: sed dicuntur diversos ordines unius potentiae ad diversa: memoria scilicet ad habitum, et intelligentia ad actum, sicut etiam ratio superior et inferior distinguitur secundum ordinem ad diversa.

Ad primum « anima non cognoscit » dicendum, quod sicut species illustrata lumine intellectus agentis, et per quam anima cognoscit, dicitur esse habitus in ea, ita essentia sua per quam seipsam cognoscit, praedicto modo cognoscit (1), cum habeat lumen intellectuale admistum, dicitur esse in ea habitus; unde cognoscendo se per essentiam, cognoscit se per habitum.

Ad secundum dicendum, quod hic sumuntur materialiter pro re amata et pro re cognita, quae est ipsa substantia animae: et ideo sunt habitus consubstantiales, cum modo jam dicto ipsa essentia animae, pro qua hic sumuntur amor et notitia, sit habitus.

Ad tertium dicendum, quod eodem habitu, scilicet notitia, memoria et intelligentia reducuntur ad suam operationem. Habitus enim est principium operationis: ideo memoriae, cum non habet per se actum aliquem qui sit simpliciter operatio, non respondet aliquis habitus distinctus. Vel dicendum, quod memoria, intelligentia et voluntas, non sunt tres potentiae, ut dictum est.

DISTINCTIO IV.

Hic oritur quaestio satis necessaria etc. (V. edit. nostrae tom. VI, pag. 44.)

QUAESTIO UNICA

Hic quaeruntur duo principaliter: Primo de generatione in divinis. Secundo de praedicatione. (Circa secundum quaeruntur tria:)

1.^o an in divinis sit generatio; 2.^o supposito quod sit, an haec sit vera: Deus genuit Deum; 3.^o de aliis loquutionibus quae ex litera ista concluduntur; 4.^o utrum praedicatio affirmativa possit praedicari de Deo.

ARTICULUS I.

Ad primum sic proceditur. 1. Videtur quod generatio non sit in divinis. Generatio enim est species mutationis: sed in divinis non est mutatio. Jac. 1: « Apud quem non est transmutatio; » ergo nec generatio.

2. Praeterea, ubicumque est generatio, oportet quod sit aliquid in genito communicatum a generante; ergo oportet esse ibi aliquid aliud per quod ab ipso distinguatur, cum omne generatum a generante distinctum sit; ergo omne quod generatur est compositum, cum sit ibi aliquid ad aliquid: sed in Deo non est compositio; ergo nec generatio.

(1) *Lege cognoscendi.*

3. Praeterea, omne illud sine quo divinum esse intelligitur suae perfectum, non est de perfectione esse divini: sed generatio est huiusmodi, quia in Spiritu sancto est esse divinum perfectissimum sine generatione; ergo etc.

Contra. Quicquid est perfectionis, attribuendum est Deo, sed generare sibi simile est perfectionis; ergo est Deo attribuendum.

Praeterea, Isaiae ult. dicitur: « Si ergo qui ceteris generationem tribuo, sterilis ero, dicit Dominus; » ergo etc.

Respondeo. Quicquid perfectionis in creatura est, attribuendum est creatori. In generatione vero creaturae est aliquid perfectionis, et aliquid imperfectionis. Perfectionis est communicare essentiam suam alii, et accipere ab alio essentiam: sed imperfectionis est, quia hoc fit per mutationem, et decisionem sui (1). Est ergo generatio in divinis, quantum ad illud quod perfectionis est, scilicet communicare essentiam suam alii, et accipere essentiam ab alio; non quantum ad alia quae sunt imperfectionis.

Ad primum « generatio est species etc. » dicendum, quod verum est secundum quod habet imperfectionem admistam; et sic non est in divinis, sed alio modo, sicut dictum est.

Ad secundum, quod in divinis est distinctio generantis et geniti, non per aliquid essenziale, sed solum relationibus; sicut dare essentiam, et accipere eam. Pluralitas autem istarum relationum in divinis non repugnat simplicitati, quia relationes praedictae non differunt re a substantia, sed ratione tantum, ut dictum est supra: unde non faciunt compositionem cum substantia.

Ad tertium dicendum, quod generatio est de perfectione divini esse simpliciter, quia sine hoc non est summa in Deo perfectio; quamvis non sit de perfectione esse divini in persona Spiritus sancti. Vel dicendum quod prima propositio est falsa; quia quae ponit fides in Deo perfectionis sunt, et tamen creatura naturali cognitione ad ea intelligenda in Deo devenire non potest.

ARTICULUS II.

Ad secundum sic proceditur. 1. Videtur quod haec non sit vera: Deus genuit Deum: Deus enim, cum sit res substantialis, significat essentiam; ergo, si Deus genuit Deum, essentia genuit essentiam; quod falsum est.

2. Praeterea, generare et generari important distinctionem: sed haec est falsa: Deus distinguitur a Deo; ergo et haec: Deus genitus est a Deo; ergo et prima.

3. Praeterea, sicut Pater est Deus, ita et Filius; si ergo haec est vera: Deus generat, quia Pater, pari ratione et haec: Deus non generat, quia Filius non generat: et sic duae contradictoriae simul sunt verae, quod est impossibile.

Contra. In Symbolo dicitur: Deum de Deo genitum: sed non generatur de Deo nisi sicut de generante; ergo Deus generat Deum.

Praeterea, tam genitus quam generans est Deus: ergo vere potest dici Deus generat Deum.

Respondeo. Sciendum est quod hoc nomen Deus quandoque supponit pro essentia, quandoque pro persona, quandoque pro una, quandoque pro pluribus. Quod supponere possit pro essentia, hinc est, quia in divinis res naturae et natura non differunt,

(1) *Lege seminis.*

ut deitas et Deus. Quod pro una persona, hoc est ex vi nominis, quia imponitur ad significandum essentiam in supposito, cum sit nomen substantiale coneretur, ut homo. Quod pro pluribus personis, hoc est quia forma a qua imponitur Deus, est una non multiplicata, scilicet ipsa essentia in tribus personis; sed hoc nomen, et significat et supponit semper essentiam. Et ideo, quia persona generat personam, bene dicitur, Deus generat Deum. Requiritur enim actus notionalis quod hoc nomen, Deus, supponat pro persona distincta tam a parte suppositi quam appositi.

Ad primum dicendum, quod quamvis haec sit vera, Deus generat Deum, non tamen haec est vera. Essentia generat essentiam, quia nunquam trahitur ad supponendum pro persona essentia.

Ad secundum « generare importat etc. » dicendum, quod verum est, sed tamen per modum actus: actus autem sunt suppositorum; ideo generare dicit distinctionem suppositorum. Distinguere autem importat in generali distinctionem. Et ideo sua significatio determinaretur ad distinctionem essentiae, si termino essentiali conjungeretur: determinator enim sua significatio secundum exigentiam termini cui adjungitur.

Ad tertium, de contradictione, dicendum, quod hoc nomen Deus habet naturam termini communis in hoc quod potest multis communicare, scilicet tribus personis. Et ideo potest reddere locutionem veram pro uno. Et ideo haec est vera, Deus generat Deum: quia pro Patre habet veritatem. Habet etiam naturam termini singularis: quia imponitur a forma non multiplicabili. Et ideo quicquid negatur de ipso, pro tota Trinitate negatur: unde hoc falsum est: Deus non generat.

ARTICULUS III.

Ad tertium sic proceditur. 1. Videtur quod haec sit vera, Deus genuit se Deum vel alium: idem enim et diversum sufficienter dividunt ens: si ergo Deus genuit Deum, vel genuit eundem vel alium.

2. Praeterea, bene sequitur, Homo generat hominem, ergo vel se vel alium; ergo similiter sequitur, Deus generat Deum; ergo generat se Deum vel alium.

3. Praeterea, ex hac quae falsa est, Deus generans est genitus, sequitur quod idem est generans et genitus: ergo ab oppositis: ex hac quae est vera, Deus generans non est Deus genitus, sequitur quod alius est Deus generans, alius genitus; ergo haec est vera, Deus genuit se Deum vel alium Deum.

4. Praeterea, unum in substantia facit idem, in quantitate aequale, in qualitate facit simile. Sed in divinis idem est substantia, quantitas et qualitas: cum ergo haec sit vera, Deus genuit Deum similem, id est aequalem sibi; ergo et haec, Deus genuit Deum eundem sibi; et ita Deus genuit se Deum.

Juxta hoc quaeritur, utrum haec sit vera: Deus genuit Deum qui est Pater. Et videtur quod sic: quia si non: ergo genuit Deum qui non est Pater; et est Deus qui non est Pater; ergo sunt duo dii. Sed hoc est falsum; ergo et hoc ex quo sequitur, scilicet Deus genuit Deum, qui non est Pater; ergo haec est vera: Deus genuit Deum qui est Pater.

Contra. Hoc nomen Qui est relativum identi-

tatis; ergo refert idem in supposito: sed refert hoc quod est Deus, quia supponit pro Filio; ergo sensus est: Deus genuit Deum Filium, qui scilicet Deus Filius est Pater: sed haec est falsa; ergo et prima.

Respondeo ad primum. Dicendum, quod haec est falsa, Deus genuit se Deum vel alium, pro utraque parte: quia, nec se genuit, nec alium Deum. Et hujus ratio est, quia cum hoc relativum, se, sit relativum identitatis et reciprocum, refert idem in supposito: unde cum ly Deus ex parte suppositi stet pro persona Patris, refert personam Patris; et sic est sensus, Deus genuit se Deum, genuit se Patrem: haec autem est falsa. Alius vero cum dicit alietatem generaliter specificatur secundum terminum cui adjungitur: unde cum dicitur, alius Deus, dicit alietatem in essentia; et sic reddit locutionem falsam: et ita cum idem dicit identitatem circa personam; alius diversitatem circa essentiam, pro utraque parte est falsa.

Ad primum « idem et diversum » dicendum, quod verum est, quando referuntur ad idem; sed in proposito referuntur ad diversa, sicut dictum est: et ideo non valet objectio.

Ad secundum dicendum, quod non est simile de Deo et homine: quia homo significat substantiam, quae multiplicatur in diversis suppositis; et ideo cum homo generet hominem, oportet quod generet alium a se, et in supposito et in natura: sed Deus significat substantiam quae non est multiplicata, sed una manet in distinctis et diversis personis. Et ideo cum Deus generat Deum, generat eundem in substantia, sed diversum in persona: et ita nec eundem in persona, nec diversum etiam in essentia.

Ad tertium dicendum, quod cum dicitur, idem vel alius est Deus generans et genitus, duplex potest esse propositio. Si enim utrumque accipiatur substantive, sic prima vera, secunda falsa, nec sequitur ex praemissis. Si vero adjective, sic prima falsa, secunda vera; et sic utraque sequitur ex praemissis. Nec sequitur: alius est Deus generans; ergo est alius Deus: quia mutatur suppositio personalis in simplicem.

Ad quartum dicendum, quod non est simile de hoc quod est se et aequale et simile: quia hoc pronomen se, cum sit relativum identitatis et non reciprocum, refert eundem in supposito, et sic locutio est falsa: simile vero et aequale non sunt relativa eodem modo; immo simile dicit identitatem in qualitate, aequale dicit in quantitate: qualitas autem et quantitas in divinis idem sunt quod substantia, et ita dicunt identitatem in substantia non in supposito; et ideo non est simile.

Ad secundam quaestionem dicendum, quod haec, Deus genuit Deum, qui est Pater; distinguenda est; quia haec dictio Qui potest facere relationem personalem, ut scilicet referat idem in persona, et sic est falsa; et est sensus, Deus genuit Deum, qui Deus genitus, est Pater. Vel potest facere simplicem relationem, ut scilicet referat Deum simpliciter, non pro persona aliqua; et sic est vera; et est sensus, Deus genuit Deum, qui Deus, non dico genitus, sed simpliciter Deus, est Pater. Et secundum hoc procedunt rationes ad utramque partem.

ARTICULUS IV.

Ad quartum sic proceditur. 1. Videtur quod

nulla praedicatio affirmativa possit praedicari de Deo. Dicit enim Dionysius in lib. de Div. nomin.: « Negationes sunt verae, affirmationes incompactae. »

2. Praeterea, veritas est in signo ex conformitate ejus cum signato: et sic compositio est in signo et in signato. Sed ubi est praedicatio, ibi est compositio praedicati ad subjectum. Est enim dicit quendam compositionem, quam sine compositis non est intelligere: in divinis autem non est compositio; ergo nec praedicatio.

Contra. Boetius dicit: « Nulla propositio est « verior illa in qua idem de se praedicatur: » sed in divinis praedicatur idem de se; quia quicquid est in divinis, est idem essentialiter; ergo est ibi vera praedicatio.

Juxta hoc quaeritur, utrum in divinis, persona verè praedicetur de essentia, et videtur quod non. Quia praedicatum significatur ut inhaerens subjecto; sed persona non inhaeret naturae; ergo non praedicatur de ipsa. Juxta haec quaeritur utrum haec sit vera, Deus est Pater et Filius et Spiritus sanctus: et videtur quod non. Haec enim, homo est Socrates et Plato, quia pro nullo supposito habet veritatem, judicatur falsa simpliciter; ergo cum haec, Deus est Pater et Filius et Spiritus sanctus, pro nulla persona habeat veritatem, falsa est simpliciter.

Respondeo ad primum. Dicendum, quod praedicatio affirmativa et negativa est in divinis. De negativa patet de se: sed de affirmativa ex hoc ostenditur: quia cum identitas summa sit in divinis: hoc autem verbum Est, importat identitatem rei significatae per subjectum ad rem significatam per praedicatum; ergo in divinis potest esse praedicatio affirmativa: hoc enim verbum Est, etsi dicat compositionem, tamen non semper, hoc est, vocum tantum, identitatem vero dicit rerum; ut cum dicitur, color est color. Et si quaeratur cur modo composito, scilicet compositione vocum significemus res simplices: Dicendum quod oportet nos significare secundum quod intelligimus. Sicut enim Deus intelligit composita simplici modo, ita et nos simplicia et composita intelligimus modo composito; et ideo modo composito utraque significamus.

Ad primum dicendum, quod affirmationes incompactae in divinis dicuntur, non quod sint omnes falsae, sed quia ibi res affirmatur et modus negatur; et ita est incompactio ratione modi et non rei. Unde dicit Dionysius hanc esse veram et falsam, Deus est sapiens: quia quo ad affirmationem rei vera est, quia Deus est sua sapientia; sed quo ad modum falsa, quia non est sapiens sapientia inhaerente eo modo quo nos, quod significatur in praedicta oratione.

Ad secundum, jam patet solutio; quia hoc verbum Est, non significat compositionem in re significata, sed identitatem.

Ad secundum quaesitum dicendum, quod in divinis idem est re et natura et res naturae. Et ideo res naturae de ipsa natura praedicari ideo (1) potest: sed tamen quantum ad modum significandi plus habet de proprietate propositio in qua praedicatur essentia quam persona, cum praedicatum se habeat loco formae.

Ad primum « praedicatum significatur ut inhaerens subjecto » dicendum, quod hoc non est necessarium: immo sufficit quod praedicatum sit idem subjecto, ut cum dicitur Socrates est Socrates; quae est vera secundum Boetium.

(1) *Lege in Deo.*

Ad tertium quaesitum dicendum, quod propter omnimodam indifferentiam essentiae ad totam Trinitatem, convenienter potest praedicari Trinitas de essentia et e converso.

Ad primum, de supposito hominis, dicendum, quod non est simile; quia Deus imponitur a forma non multiplicata, sed eadem existente in multis suppositis. Et ideo manens una, potest praedicari et subjici suis suppositis. Homo vero imponitur a forma quae multiplicatur secundum multiplicationem suppositorum. Et ideo manens una non multiplicata non potest vere subjici multis suppositis. Et ideo licet sit falsa haec: Homo est Socrates et Plato, non tamen haec, Deus est Trinitas, sive Pater et Filius et Spiritus sanctus.

DISTINCTIO V.

Post hoc quaeritur etc. (V. edit. nostrae tom. VI, pag. 49.)

QUAESTIO UNICA.

Hic quaeruntur quatuor: 1.º utrum essentia generet; 2.º utrum essentia generetur; 3.º utrum Filius generetur de substantia Patris; 4.º utrum Filius sit ex nihilo.

ARTICULUS I.

Ad primum sic proceditur. 1. Videtur quod essentia generet. Quicquid enim praedicatur de aliquo potest supponere illud: sed essentia praedicatur de Patre; ergo potest supponere pro Patre, et ita potest recipere praedicationem Patris; ergo potest concedi quod essentia generet.

2. Praeterea, essentia est Pater: ergo est Pater Filii, sed relativa dicuntur ad convertentiam; ergo et Filius erit Filius essentiae; sed non nisi per generationem; ergo essentia generat.

3. Praeterea, sicut se habet essentia ad personam, ita persona ad essentiam. Sed de persona praedicantur attributa essentiae, sicut potentia, bonitas etc.; ergo de essentia proprietas personae: ergo potest dici quod essentia generet.

4. Praeterea, major est oppositio affirmationis et negationis quam relationis. Sed oppositio relationis facit in divinis, ut una persona non sit alia; ergo multo fortius facit hoc contradictio. Sed persona Patris est generans; si ergo essentia non generet, Pater non erit essentia: quod est impossibile.

5. Praeterea, Deus et divina essentia idem sunt; quia in Deo non differunt quod est, et quo est. Sed haec est vera, Deus generat, ut supra dictum est; ergo et haec, Divina essentia generat.

6. Praeterea, sicut essentia significat in abstracto, ita et sapientia et lumen. Sed relationes originis attribuuntur sapientiae et lumini. Dicimus enim Filium lumen de lumine, sapientiam de sapientia; ergo et essentiae divinae attribui potest, ut dicatur essentia generare. In contrarium sunt rationes quas Magister ponit in litera.

Respondeo. Dicendum, quod duplex est modus praedicandi: unus per identitatem, ut tunica est vestis. Alius per informationem, ut, homo est albus. Primo modo relationes in divinis praedicantur de essentia, quia relatio et essentia sunt idem secundum rem in Deo. Hoc autem non potest fieri, nisi quando relativa significantur per nomina substan-

tiva, sive in abstracto, sive in concreto: unde hæc est vera; essentia est paternitas et essentia est Pater, si *ly* Pater substantive teneatur. Secundo modo relationes de essentia in abstracto prædicari non possunt, eo quod essentia in divinis est indistincta; relationes vero distinguunt id quod informant. Et ideo omnia relativa significata adjacenter, sive per verba, sive per participia, sive per nomina adjectiva, sive etiam per præpositiones, non possunt vere prædicari de essentia in abstracto. Unde hæc omnes sunt falsæ. Essentia generat, Essentia est generans, Essentia est Pater adjective, Essentia est de essentia.

Ad primum ergo dicendum: quamvis essentia prædicetur de Patre, non tamen supponere potest pro Patre, quia prædicatur ratione identitatis rei, et non ratione modi significandi, et ut unum sit abstractum et aliud concretum.

Ad secundum: dum dicitur, quod essentia est Pater, dicendum quod locutio est duplex: ex eo quod *ly* Pater potest teneri quasi adjective, ut ponat formam suam circa essentiam: et sic est falsa, quia proprietates non determinant essentiam. Vel potest sumi subjective (1): et tunc supponit Pater in prædicamento (2) pro persona Patris, et sic vera est: et secundum hunc sensum facienda est conversio, et non secundum primum. Unde non sequitur: ergo Filius est Filius essentiae, sed Filius est Patris qui est essentia.

Ad tertium dicendum, quod persona in divinis secundum modum significandi informatur per naturam, sed non e converso. Unde attributa essentialia possunt prædicari etiam de persona adjective, sed non e converso.

Ad quartum dicendum, quod hoc non opponitur contradictorie, Pater est generans, Essentia non est generans: quia generare et non generare non referuntur ad idem secundum idem; immo ad essentiam et personam secundum quod differunt quantum ad modum significandi. Contradictio vero est unius et ejusdem secundum idem.

Ad quintum dicendum, quod Deus significat divinam naturam in supposito. Et ideo habet in suo intellectu aliquid circa quod potest poni distinctio, quam facit relatio in divinis: quod non habet hoc nomen essentia. Et ideo non est simile. Et hoc non intellectu deceptus fuit abbas Joachim, Magistro in hoc contraria dicens.

Ad sextum dicendum, quod omnes illæ loquutiones sunt improprie et exponendæ, sicut exponit Magister, ut ponatur abstractum pro concreto: quia magis convenienter potest fieri in talibus nominibus quæ habent ordinem ad actus, quam in hoc nomine essentia. Actus enim suppositorum sunt; et ideo ex hoc ipso habent quamdam vicinitatem ad personas.

ARTICULUS II.

Ad secundum sic proceditur. 1. Videtur quod essentia generetur. Hilarius enim dicit: « Nihil enim nisi natum habet Filius; » ergo essentia Filii est nata.

2. Præterea, secundum Philosophum, in ad aliquid non est motus; ergo nec generatio; ergo divina generatio non est in ad aliquid, sed in substantia, quia non sunt ibi nisi hæc duo prædicamenta.

(1) *Lege* substantive.

(2) *Lege* prædicamento.

3. Præterea, secundum Philosophum, motus nobis moventur ea quæ in nobis sunt, et corruptis corrumpuntur; ergo generato Filio generatur omne quod in ipso est: ergo essentia.

Contra. Omne quod generatur habet principium de quo fit. Sed essentia non habet principium de quo sit; ergo non generatur.

Præterea, si essentia generatur, cum generans per essentiam habeat esse, ergo habet esse per rem a se genitam, quod est impossibile.

Respondeo. Omne quod generatur, sive per se, sive per accidens, oportet quod sit diversum in generante et genito, quia nihil generat se: et quia divina substantia sive essentia eadem est in Patre generante et Filio genito; ideo nec per se, nec per accidens generatur.

Ad primum, de Hilario, dicendum, quod improprie loquitur, et exponendum est: nihil nisi natum, idest nascendo acceptum.

Ad secundum « in ad aliquid » dicendum, quod generatio divina non terminatur ad relationem, sed ad hypostasim, quæ est substantia per relationem constituta.

Ad tertiam « motus nobis » dicendum, quod non est simile: quia in nobis quicquid est, est nobis proprium secundum rem, quamvis possit esse commune secundum rationem: in Filio autem est aliquid quod est sibi et Patri commune secundum rem, scilicet essentia.

ARTICULUS III.

Ad tertiam sic proceditur. 1. Videtur quod Filius genitus non sit de substantia Patris. Præpositiones enim transitivæ sunt, et ideo important aliquam diversitatem: nulla vero est diversitas inter Filium et substantiam Patris; ergo etc.

2. Præterea, aut « de » accipitur ibi materialiter, ut eultellus de ferro; aut originaliter, ut radius de sole; aut ordinaliter, ut de mane sit meridies. Sed nullo horum modorum Filius est de substantia Patris; ergo non debet concedi quod sit de substantia Patris.

3. Præterea, Anselmus in Monologion ait: « Nec intellectus capit, nec natura permittit illum qui de aliquo est. » Sed si Filius est substantia Patris; ergo non est de substantia Patris.

Contra. Dicit Damascenus quod generare est de sua substantia sibi simile in natura producere: sed Filius vere a Patre generatur; ergo vere de substantia ejus producitur.

Præterea, omne quod producitur ab aliquo sibi substantiali, producitur de substantia ejus: sed Filius sic procedit a Patre; ergo Filius producitur de substantia Patris.

Respondeo. Hæc præpositio, de, materialiter accipitur in creaturis: aliquando autem pure materialiter, ut eultellus de ferro; aliquando pure originaliter, ut lumen de sole; aliquando pure ordinaliter, ut de mane fit meridies; aliquando mistim materialiter simul et originaliter, ut Filius de substantia Patris. In divinis vero non est materia, sed substantia quæ est purus actus. Unde proportionaliter loquendo in divinis, aliquando accipitur « de » substantialiter, ut Filius de substantia divina; aliquando originaliter, ut Filius de persona Patris; aliquando ordinaliter, ut de æterno temporales; aliquando mistim substantialiter et originaliter, ut Filius de substantia Patris. Nam si tantum substan-

tialiter acciperetur: sicut dicitur Filius de substantia Patris, ita Pater diceretur de substantia Filii.

Ad primum de transitione praepositionum dicendum, quod praepositio notat transitionem, vel rei, vel rationis, vel utriusque: non tamen semper importat transitionem respectu casus illius cui immediate adiungitur: sed respectu, vel illius, vel alterius, qui cum illo constituitur (1): et sic haec praepositio, de, transitionem nominat respectu personae Patris, non respectu substantiae, nisi secundum rationem.

Ad secundum « aut, de, accipitur materialiter » dicendum, quod insufficiens est divisio: accipitur enim altero modo, videlicet substantialiter et originaliter simul.

Ad tertium, de Anselmo, dicendum, quod accipitur, de, originaliter solum in praedicta auctoritate.

ARTICULUS IV.

Ad quartum sic proceditur. 1. Videtur quod Filius sit ex nihilo. Illud enim est ex nihilo quod non est ex praesenti materia: sed Filius est huiusmodi: quia non est de aliquo sicut de materia: ergo etc.

2. Praeterea, omne quod habet esse ab aliquo, de se est non ens: sed Filius habet esse ab alio; ergo habet esse de nihilo.

3. Praeterea, omne ex quo aliquid est, naturaliter est prius illo: sed nihil est prius Filio; ergo ipse non est de aliquo; ergo de nihilo.

Contra. Omne quod est factum de nihilo, est creatum: sed Filius est increatus; ergo etc.

Praeterea, secundum Damascenum, omne quod est ex nihilo, vertibile est in nihil: sed Filius non est huiusmodi; ergo etc.

Respondeo. Dicendum quod cum dicitur aliquid esse ex nihilo, hoc potest intelligi dupliciter. Uno modo, ut negatio includat praepositionem; et sic ordo importatus per praepositionem negatur: ut sit sensus: est ex nihilo, quasi non ex aliquo: sic autem non potest verificari de Filio, qui est substantia Patris. Alio modo ut praepositio includat negationem; et sic remanet ordo praedictus affirmatus; et ita non potest verificari de Filio: quia nihilum, neque est prius Filio duratione, cum sit aeternus, neque natura, cum sua natura sit suam esse: et sic omnibus modis haec est falsa: Filius est ex nihilo.

Ad primum « non est ex praesenti materia » dicendum, quod verum est. Sed tamen ex substantia Patris: et ideo non sequitur quod non sit de aliquo. Hoc etiam remoto non sequeretur, quod esset ex nihilo; quia Pater non dicitur de aliquo, et tamen non est de nihilo: idem autem est esse Patris et filii.

Ad secundum « omne quod habet esse » dicendum, quod verum est: nihilominus esse, quod a Patre recipit Filius, est idem eam naturam, quam etiam recipit a Patre: et sic naturae Filii in se consideratae non debetur non esse, sicut naturae creatae, ratione cuius est ei naturaliter prius non esse quod habet ex se, quam esse quod habet ex alio.

Ad ultimum « omne de quo aliquid » dicendum, quod in divinis personis non est ordo prioris et posterioris, sed naturae; quo una est ab alia, non una prior alia. Et ideo prima propositio est falsa,

(1) *Lege* construitur.

quae dicit, quod omne quod est ab altero, sit eo posterius naturaliter.

DISTINCTIO VI.

QUAESTIO UNICA

Praeterea solet quaeri etc. (*V. edit. nostrae tom. VI, pag. 56.*)

Hic quaeruntur tria: 1.^o utrum Pater genuit Filium necessitate; 2.^o utrum voluntate; 3.^o utrum natura sit divina essentia; 4.^o utrum Pater natura genuerit Filium.

ARTICULUS I.

Ad primum sic proceditur. 1. Videtur quod Pater genuit Filium necessitate. Necessarium enim et contingens sufficienter dividunt ens: sed generatio Filii non est contingens; ergo est necessaria.

2. Praeterea, omne quod impossibile est non esse, necesse est esse: sed omne quod est ab aeterno, impossibile est non esse; ergo necesse est esse; sed generatio est aeterna; ergo necessaria.

3. Praeterea, magis est diffusiva sui lux aeterna, quam temporalis: si ergo lux temporalis necessario diffundit se, multo magis lux aeterna: sed generatio Filii est quaedam diffusio, sive candor lucis aeternae, Sap. 7; ergo etc.

Contra. Anselmus dividit necessitatem et coactionem et prohibitionem: sed neutra Deo contingit; ergo etc.

Praeterea, ubi est necessitas, non est perfecta libertas: sed in Deo est perfecta libertas; ergo nulla necessitas.

Respondeo. Dicendum, quod necessitas invenitur in aliquo dupliciter. Uno modo ex alio, alio modo ex se. Primo modo in Deo nulla est necessitas: quia talis necessitas, vel est ex alio sicut ex fine, et sic est naturae indigentis: sicut homo habet necessitatem cibi ad hoc quod possit vivere: vel est ex alio vim inferente, et sic est naturae impotentis quae eogi potest, vel prohiberi. Vel ex alio naturam creante, et sic est naturae creatae: quae omnia longe sunt a Deo. Secundo autem modo necessitas est in Deo respectu omnium quae in natura sua sunt: haec autem necessitas nihil est aliud quam naturae ipsius immutabilitas: et quia Filius est in natura Dei existens, non autem creaturae: ideo Filium genuit necessitate, sicut etiam est Deus necessitate: creaturas autem nulla necessitate condidit. Et per hoc patet solutio ad objecta.

ARTICULUS II.

Ad secundum sic proceditur. 1. Videtur quod Pater voluntarie genuit Filium. Omne enim bonum est volitum a Deo, sicut, omne verum est scitum: sed generatio Filii est optima; ergo est a Deo voluta; et ita Pater genuit Filium voluntate.

2. Praeterea, ubi simul sunt natura et voluntas, natura bene ordinata semper conformatur voluntati: sed in Patre simul sunt natura et voluntas, et natura est ordinatissima; ergo natura semper conformatur voluntati: sed Pater genuit Filium naturaliter, ut post dicitur; ergo et voluntate.

3. Praeterea, si genuit Filium: aut ergo voluntate, aut contra voluntatem, aut praeter voluntatem. Si contra voluntatem; ergo coactus: si praeter vo-

luntatem; ergo vel ignorans, vel invitus: si voluntate, habetur propositum.

4. Praeterea, Filius procedit per modum intellectus ut verbum; sed omne verbum procedit ad esse per voluntatem; ergo etc.

Contra. Voluntas est principium libere se habens ad opposita. Si ergo Pater voluntarie genuit, oppositum et velle, et facere potuit; ergo potuit non generare.

Praeterea, Augustinus negat in litera, quod Pater non volens nec nolens genuit Filium.

Respondeo. Voluntas ad aliquid dupliciter comparatur: vel ut principium, vel ut potentia ad objectum, quod est hominum; unde cum generatio Filii sit optima, hoc secundo modo Pater genuit Filium voluntate. Comparatur autem ad aliquid ut principium dupliciter: vel sicut ad illud quod est ratio praedicandi (1); et sic comparatur ad processiones Spiritus sancti, qui procedit per modum amoris, qui est ratio voluntariae productionis creaturarum; vel sicut ad id quod est principium, et sic comparatur ad creaturas: et his duobus modis Pater non genuit Filium voluntate. Et hoc est quod alii dicunt quod voluntate concomitante, non accedente vel antecedente Pater genuit Filium. Et sic patet solutio ad primum et ad reliqua duo quae procedunt de voluntate concomitante, sive comparata ad objectum.

Ad ultimum dicendum, quod etiam in conceptionibus intellectualibus fit reductio ad principia quae naturaliter intelliguntur, alia autem a principis per imperium voluntatis. Deus autem naturaliter intelligit seipsum; et propter hoc conceptio divini verbi est naturalis, creaturas autem concepit et intelligit voluntate. Argumenta autem in contrarium concludunt de voluntate antecedente, vel accedente.

ARTICULUS III.

Ad tertium sic proceditur. 1. Videtur quod natura Dei non sit divina essentia: quia secundum Philosophum in 2 Physic., natura est principium motus et quietis in eo in quo est. Sed in Deo nullus est motus; ergo ejus essentia natura Dei non dicitur.

2. Praeterea, Boetius in lib. de Duabus naturis, penens aliam naturae significationem, dicit, quod natura est unumquodque informans specifica differentia: in Deo autem non est neque genus neque differentia, ut Avicenna probat; ergo etc.

3. Praeterea, secundum aliam assignationem Boetii, natura est substantia quae agere vel pati potest: sed agere vel pati est hypostasis; ergo secundum haec divina natura essentia dici non debet, sed magis persona.

4. Praeterea, naturae nomen a nascendo est sumptum; sed nasci in divinis personae competit non essentiae; ergo etc.

Contra. Essentia Dei magis est intima Deo, quam essentia hominis ipsi homini, quia Deus est sua essentia, non autem homo: sed essentia hominis dicitur ejus natura; ergo multo magis etc.

Respondeo. Dicendum quod naturae nomen sumptum est a substantiis viventibus: quarum generatio nativitas dicitur. Cum autem omnis motus a termino denominetur, a quo etiam speciem trahit, illud dicitur in praedictis substantiis natura quod

(1) *Lege* principiandi.

per nativitatem accipitur ab uno et ab altero communicatur. Hoc autem est essentia speciei; quia generans generat sibi simile in specie. Et inde est quod praedictarum rerum essentiae naturae dicuntur; et ex hoc translatum est nomen naturae ad significandum essentias omnium aliarum rerum; sive in eis sit nativitas, sive non. In divinis ergo ipsa essentia Dei, natura dicitur ratione ejus ad quod significandum nomen translatum est, et ratione impositionis nominis, quia divina essentia naturam communicat.

Ad primum dicendum, quod secundum Philosophum, 3 Metaphysicorum, illae natura acceptio sumitur per quamdam similitudinem a nativitate, quae quidem in Deo est, quamvis non sit ibi motus: unde nihil prohibet naturam in Deo dici.

Ad secundum dicendum, quod differentia dicitur natura, inquantum completa est in tota essentia speciei, et non inquantum differentia est: unde nihil prohibet essentiam divinam dici naturam quamvis differentia in eo non sit.

Ad tertium dicendum, quod quamvis agere et pati sit hypostasis, tamen principium actionis et passionis est essentia.

Ad quartum dicendum, quod licet divina essentia non nascatur, tamen per nativitatem communicatur: et hoc sufficit ad rationem naturae.

ARTICULUS IV.

Ad quartum sic proceditur. 1. Videtur quod Pater non naturaliter genuit filium. Hilarius enim in lib. de Synod. dicit: « Non naturali necessitate ductus Pater genuit Filium. »

2. Praeterea, in Deo voluntas et natura idem sunt: si ergo generatio non fuit opus voluntatis; ergo nec naturae.

3. Praeterea, per naturales rationes devenerunt philosophi in cognitionem naturae divinae. Sed cognita natura cognoscitur operatio naturae; ergo potuerunt devenire in cognitionem generationis Filii. Sed hoc est falsum; ergo illud ex quo sequitur, scilicet quod generatio Filii sit a natura.

Contra. Damascenus dicit, quod generatio est opus divinae naturae existens.

Praeterea, si non est opus naturae; ergo non est Filius naturalis; ergo est Filius adoptivus.

Respondeo. Essentia divina est principium omnium actuum divinarum secundum diversam rationem attributorum; sicut volendi inquantum est voluntas; intelligendi, inquantum est intellectus, et sic de aliis. Et quia de ratione generationis est, ut genitum producat in similitudinem generantis cujus productionis principium est natura, quae, ut dicit Boetius, est vis insita rebus ex similibus similia procreans, ideo essentia sub ratione naturae est principium in Patre generationis Filii; ideo dicitur, quod Pater natura generat Filium.

Ad primum de Hilario, dicendum, quod necessitatem naturalem vocat defectum contingentem ex natura contra voluntatem; et sic de tali loquendo natura, sive naturali necessitate, non intelligitur eum dicitur, Pater genuit Filium natura.

Ad secundum « voluntas et natura sunt idem » dicendum, quod quamvis sunt idem re, differunt tamen ratione, sicut scientia et voluntas: unde multa scit Deus quae non vult. Utrumque enim verissime in Deo est et actus utriusque.

Ad tertium de philosophis dicendum, quod devenerunt in cognitionem naturae divinae per creaturas: in creaturis autem imperfecte relucet natura divina et operatio ejus quae est generatio. Et ideo in cognitionem naturae quantum ad operationem generationis, non clare devenire potuerunt.

DISTINCTIO VII.

Hic solet quaeri etc. (V. edit. nostrae tom. VI, pag. 59.)

Hic quaeruntur duo: Primo de potentia generandi in Deo. Secundo de communitate ipsius.

QUAESTIO I.

Circa primum quaeruntur duo: 1.^o utrum in Deo sit potentia ad generandum; 2.^o an illa potentia sit aliquid absolutum vel aliquid aliud.

ARTICULUS I.

Ad primum sic proceditur. 1. Videtur quod in Deo non sit potentia ad generandum. Quicquid enim exit ab aliqua potentia, naturaliter prius est in potentia, quam in actu: si ergo Filius exit a potentia generandi quae sit in Patre, naturaliter fuit prius in potentia quam in actu. Sed hoc de Deo est falsum: quia aeternum non est prius in potentia quam in actu; ergo primum.

2. Praeterea, omnis potentia aut est activa aut passiva: potentia activa est, secundum Philosophum, principium transmutationis in aliud secundum quod aliud; et potentia passiva est principium transmutationis ab alio: sed tale principium ad generandum nullum est in Patre; ergo nulla potentia.

3. Item illud quod est per opus naturae non exit ab ea mediante aliqua potentia, sicut esse immediate dat anima corpori. Sed generatio est per se opus naturae, ut dicit Damascenus; ergo non est opus potentiae.

Contra. Augustinus arguit: Si Pater non potuit generare aequalem Filium sibi, impotens fuit; ergo potentia generandi est in Patre.

Praeterea, cujus est actus, ejus est potentia: sed Pater Filium genuit; ergo potentia generandi in eo fuit.

Respondeo. Dicendum, quod duplex est potentia: scilicet passiva et activa: passiva potentia est secundum quod aliquid est receptivum alienius, quod Deo non competit propter hoc quod est omnino perfectus. Potentia vero activa est vis quaedam per quam aliquid alteri se communicat, quod perfectionis est. Et ideo attribuitur Deo. Communicat autem se Deus dupliciter. Uno modo secundum similitudinem imperfectam, sicut creaturae; et sic ponitur in Deo potentia respectu creaturarum. Alio modo secundum similitudinem perfectam; et sic communicat se Deus Pater, Filio et Spiritui sancto: et respectu hujus communicationis ponitur in Deo potentia generativa et spirativa.

Ad primum de prioritatem naturaliter, dicendum, quod hoc locum habet ubi potentia realiter differt ab actu et objecto suo, quod hic non contingit.

Ad secundum dicendum, quod Philosophus loquitur de potentia activa naturali, quae et materiam praesupponit, et per motum suum effectum suum causat: quod non contingit potentiae divinae.

S. Th. Opera omnia. V. 22.

Ad tertium dicendum, quod duplex est actus naturae sive essentiae: primus, qui est esse: secundus, qui est operatio. Primus immediate egreditur ab essentia; secundum mediante potentia; et talis actus est generare.

ARTICULUS II.

Ad secundum sic proceditur. 1. Videtur quod potentia generandi sit ad aliquid. Potentiae enim distinguuntur per actus, et actus per objecta. Sed generare, quod est actus potentiae generandi, dicit ad aliquid; ergo et potentia generandi.

2. Praeterea, omnis actio propria egreditur a propria forma agentis: generare est actus proprius Patris, et egreditur a potentia generandi; ergo potentia est forma propria generantis quae est paternitas; ergo est ad aliquid, non quid.

3. Praeterea, in divinis idem est substantia, virtus et operatio; ergo est in divinis idem potentia generandi et generatio. Sed generatio sive generare dicit ad aliquid; ergo et potentia generandi.

Contra. In divinis non differt esse et posse; ergo nec essentia et potentia. Sed essentia dicit quid; ergo et potentia.

Praeterea, omnis scientia et voluntas in divinis, essentialis est, non relativa; ergo et omnis potentia.

Respondeo. Cum dico potentiam generandi, duo dico: scilicet potentiam et generare: potentia pertinet ad naturam; et dicit quid: generare ad personam; et dicit ad aliquid. Dicendum ergo quod hoc compositum, potentia generandi, dicit essentialem tractum ad personam: sicut cum dicitur, Deus gignens, hoc quod est Deus, significat essentialiam, hoc quod est gignens, personam.

Ad primum « potentiae distinguuntur » dicendum quod hoc non est dictum, quod in eodem praedicamento sint potentiae et actus; quia actus sunt in praedicamento actionis, potentia in praedicamento qualitatis. Et ideo non sequitur, si generare est ad aliquid, quod potentia generandi sit ad aliquid; sed est dictum quod diversis potentiis diversi actus debentur.

Ad secundum dicendum, quod quamvis potentia secundum se sit communis, tamen potentia generandi active proprie est Patris; non ratione potentiae secundum se, sed ordinis ad actum notionalem: quia potentia generandi, prout dicit ordinem ad actum, non tantum dicit potentiam, sed potentiam sub ratione proprietatis, quae est paternitas; et sub tali ratione, id est paternitatis, non reperitur nisi in Patre; sicut sub ratione filiationis non reperitur nisi in Filio; sicut essentia in Patre est paternitas in Filio est filiatio.

Ad tertium dicendum, quod quamvis sint idem re, tamen differunt ratione; et propter differentiam rationis reducuntur ad diversa praedicamenta.

QUAESTIO II.

Circa secundum quaeruntur tria: 1.^o utrum potentia generandi sit in Filio: 2.^o utrum Filius possit alium filium generare; 3.^o utrum Pater possit generare alium Filium.

ARTICULUS I.

Ad primum sic proceditur. 1. Videtur quod

potentia generandi sit in Filio. Nulla enim scientia est in Patre, quae non sit in Filio: ergo similiter nec potentia. Sed potentia generandi est in Patre; ergo in Filio.

2. Praeterea, Pater generat filium aequalem sibi non aequalitate molis, sed virtutis; ergo omnis virtus quae est in Patre, est in Filio; ergo virtus generandi.

5. Praeterea, perfectior est generatio caelestis, carnali: si ergo carnalis generatio communicat genito potentiam generandi, multo magis caelestis.

Contra. Genitum non est principium generationis: sed Filius est genitus: potentia autem generandi est principium generationis; ergo in Filio non est potentia generandi.

Praeterea, in potentia generandi includitur paternitas: sed paternitas non est in Filio; ergo etc.

Respondeo. Dicendum: cum dicitur potentia generandi, hoc gerendum generandi potest esse gerendum in verbi activi vel verbi impersonalis vel verbi passivi: primo modo, potentia generandi dicitur potentia per quam generet: secundo modo, potentia per quam sit generatio: tertio modo potentia per quam ipse generetur. Primo modo, potentia generandi est in solo Patre: quia solus Pater potest generare: tertio modo in Filio, quia solus Filius potest generari: secundo modo in Patre et Filio et Spiritu sancto: omnes enim habent potentiam, scilicet essentiam qua aliquid generatur.

Ad primum, de scientia, dicendum, quod non est simile de scientia sive de voluntate: quia non sic ordinantur ad actum notionalem, sicut potentia generandi quae est ad gerendum. Non enim generationis est principium voluntas vel scientia: sed natura.

Ad secundum de aequalitate virtutis, dicendum, quod quavis omnis potentia sit in Filio quae est in Patre, non tamen ad eundem actum: potentia vero generandi non tantum nominat essentiam potentiae: sed ordinem ad ejus actum; unde in argumentando est fallacia accidentis.

Ad tertium, de patre carnali, dicendum, quod tota ratio communicationis potentiae generativae carnalis, non est perfectio ipsius generationis et generantis vel geniti: sed imperfectio admista; quia non communicatur totum uni genito quod est generantis, nec sufficienter salvatur in uno genito natura communis: hoc vero in Deo non contingit.

ARTICULUS II.

Ad secundum sic proceditur. 1. Videtur quod Filius possit generare alium Filium. Potentia enim non impedita, potest exire in actum; sed in Filio est potentia generandi non impedita; ergo potest exire in actum generationis.

2. Praeterea, Filius est imago Patris expressiva; ergo in omnibus est similis; ergo in posse generare.

5. Praeterea, posse generare est aliqua dignitas in Patre: sed quicquid est dignitatis in Patre, est in Filio; ergo etc.

Contra. Secundum Anselmum, minimum inconveniens est Deo impossibile; sed si Filius generaret Filium, sequeretur in Deo inconveniens: quia ille Filius generaret alterum, et sic in infinitum; ergo Filius non potest generare.

Praeterea, qui non potest esse Pater, non potest generare: sed Filius non potest esse Pater;

quia sequeretur confusio personarum; ergo etc. Juxta hoc quaeritur: utrum Pater possit generare alium Filium: et videtur quod sic. Quia per generationem in nullo diminuitur ejus potentia; ergo qua ratione potest generare unum, potest generare plures.

Respondeo. Dicendum, quod Filius non potest Filium generare. Et ratio est, quia ille Filius in nullo distingueretur ab alio: quia personae distinguuntur per relationes originis: impossibile est autem quod una relatio originis, ut filiatio, multiplicetur secundum numerum; quia talis multiplicatio esset materialis; Deus autem caret materia; ergo in Deo non potest esse nisi una filiatio, et ex una filiatione non constituitur nisi unus Filius; et ita in divinis non possunt esse plures Filii nec plures Patres: et hoc pertinet ad perfectionem utriusque: quia nihil de filiatione est extra Filium, nec de paternitate extra Patrem.

Ad primum, de potentia impedita, dicendum, quod verum est de potentia ordinata ad actum illum: sed potentia Filii non est ordinata ad actum generationis.

Ad secundum, de imagine, dicendum, quod si esset idem, jam non esset similis; quia similitudo, secundum Boetium, est rerum differentium: sed si esset Pater, esset idem.

Ad tertium, de dignitate, dicendum, quod eadem dignitas quae est in Patre ex eo quod potest generare, est in Filio ex hoc quod generatur, quia dignitas est de essentialibus et absolutis: unde sicut paternitas in Patre est essentia, ita et eadem essentia in Filio non est paternitas, sed filiatio; ita eadem dignitas numero, quae est in Patre paternitas per quam generat, est in Filio filiatio secundum quam generatur.

Ad illud quod ulterius quaeritur, patet solutio; quia impossibile est in divinis plures esse filios; nec hoc est ex defectu potentiae Patris, sed ex distinctione personarum quae tolleretur.

DISTINCTIO VIII.

Nunc de veritate, etc. (V. edit. nostrae tom. VI, pag. 64.)

Hic quaeruntur duo in generali: Primo de veritate et proprietate divinae naturae. Secundo de incommutabilitate.

QUAESTIO I.

Circa primum quaeruntur duo: 1.º utrum esse, Deo proprie conveniat; et de ordine hujus nominis Quod est, ad alia divina nomina; 2.º an esse divinum per diversas differentias temporis habeat significari.

ARTICULUS I.

Ad primum sic proceditur. 1. Videtur quod esse non proprie Deo conveniat. Illud enim est proprium alicui, quod sibi soli convenit: sed esse non tantum convenit Deo, imo etiam creaturis; ergo videtur quod esse non proprie Deo conveniat.

2. Praeterea, non possumus nominare Deum, nisi secundum quod ipsum cognoscimus: unde Damascenus dicit: verbum est angelus, id est nuncius intellectus: sed nos non possumus cognoscere

Deum in statu viae nisi ex creaturis; ergo nec nominare; cum ergo Qui est non dicat respectum aliquem ad creaturas, ergo videtur quod non nominetur Deus hoc nomine a nobis.

5. Praeterea, propter hoc, nomen sapientiae dicitur deficere a perfecta significatione divinae sapientiae, quia est impositum a nobis secundum apprehensionem creatae sapientiae; ergo a simili hoc nomen Qui est deficiet a repraesentatione divinae essentiae: quia impositum est a nobis secundum apprehensionem esse creati: et sic non est magis nomen proprium Dei, quam alia nomina.

4. Praeterea, Damascenus dicit, « quod Qui est, non significat quid est Deus; sed quoddam pelagus substantiae infinitum: » sed infinitum esse esse est ignotum; et per consequens innominabile; ergo hoc nomen, Qui est, non videtur esse divinum nomen,

Contra. Exod. 5, Dominus dixit ad Moysen: « Si quaesierint nomen meum, dicis, etc.; » ergo proprie Deo convenit.

Praeterea, Hilarius dicit: « Esse non est accidens Deo: sed subsistens, veritas et manens causa et naturalis generis proprietates; » ergo esse est proprium Dei.

Respondeo. Dicendum, quod aliquid attribui dicitur proprie alicui dupliciter. Uno modo, quia soli ei convenit: et sic Qui est non proprie praedicatur de Deo, cum de aliis etiam praedicatur: sed tamen est proprie nomen Dei: potest enim esse nomen Dei, et nullius alterius: omnis enim res nominatur ex sua forma vel natura: esse autem est ipsa natura Dei, quod nulli alii convenit. Alio modo ratione indeficientiae: quia scilicet nihil eorum, quae includuntur in significatione nominis, deficit ei cui nomen attribuitur: et sic proprie, Qui est, de Deo praedicatur: quia nihil de esse sibi deest: habet enim esse suum simul, quod de creatura, in quantum est mutabilis, dici non potest. Et ideo in littera dicitur quod solus Deus est cujus esse non novit praeteritum et futurum.

Ad primum dicendum, quod quamvis Qui est possit de alio praedicari, quam de Deo, non potest tamen esse alterius nomen, ut dictum est.

Ad secundum dicendum, quod ex creaturis tripliciter Deus nominatur. Uno modo quando ipsum nomen actualiter connotat effectum in creatura, propter relationem ad creaturam in nomine importatum; sicut creator et Deus. Alio modo quando ipsum nomen nominat principium alicujus actus divini in creaturis; sicut sapientia, potentia et voluntas. Tertio modo quando ipsum nomen nominat aliquid creatoris repraesentatum in creaturis, sicut vivens: omnis enim vita exemplata est a divina vita: et sic hoc nomen, Qui est, nominat Deum per esse creaturarum, exemplariter deductum ab esse divino.

Ad tertium dicendum, quod cum dicimus Deum sapientem, intellectus noster deficit a repraesentatione divina quantum ad duo: scilicet quantum ad id quod ei attribuitur, et quantum ad modum attribuendi: attribuitur enim ei forma sapientiae quam concepit, quae deficit a Deo; et attribuit ei per modum concrectionis qui in Deo non est: sed cum dicimus Deum esse, non est ibi nisi unus defectus; scilicet quia esse significatur per modum concrectionis. Tamen per hoc non dicimus Deum esse aliquid: et ita hoc nomen minus improprie de Deo dicitur quam alia.

Ad quartum, « hoc nomen Qui est » dicendum, quod hoc pro tanto dicitur, quia alia nomina significant esse secundum rationem determinatam, sicut sapientia dicit esse aliquid: sed hoc nomen qui est, dicit esse absolutum, et non determinatum per aliquid additum.

ARTICULUS II.

Ad secundum sic proceditur. 1. Videtur quod esse divinum non possit per diversas differentias temporis significari. Hieronymus enim in littera dicit, quod Deus est tantum qui non novit fuisse nec futurum esse.

2. Praeterea, Deus non subiacet alicui mutabilitati. Sed per differentiam temporis notatur mutabilitas; ergo non possunt de Deo vere enunciari verba diversorum temporum.

5. Praeterea, Augustinus dicit in lib. 85 qq.: « In aeterno tantum praesens dicitur; neque quidquam praeteritum est, quasi jam non sit. » Sed Deus est aeternus; ergo etc.

Contra. Dicit hic Augustinus: « Quod bene dicitur de Deo, est fuit et erit. »

Praeterea, sicut est in omni loco Deus, ita in omni tempore; ergo per omnem differentiam temporis potest significari.

Respondeo. Dicendum, quod differentia temporis datur intelligi per aliam dictionem. Uno modo per modum significationis; sicut significatur per adverbium temporalia et per alia nomina: et ita significatur tempus ut dispositio illius rei, cui hujusmodi dictiones adjunguntur. Alio modo per modum consignificationis, ut patet in verbis et participiis: et sic non designatur tempus ut dispositio rei, sed solum quantum ad modum significandi et intelligendi: quia intellectus noster, propter hoc quod accipit a sensu, ut patet per Philosophum in tertio de Anima (et sensibilia sunt in tempore), ideo in qualibet compositione quam format cointelligit tempus. Primo ergo modo differentia temporis non potest attribui Deo per modum mensurae, sicut attribuitur rebus mutabilibus; sed sic attribuitur ei per modum concomitantiae. Dicimus enim quod Deus fuit heri, et erit eras, quia ipse nulli tempori deest, quamvis nullo tempore mensuretur. Unde dicitur in littera: « fuit, quia nunquam defuit: erit, quia nunquam de-erit. » Alio modo differentia temporis Deo attribui potest, quia temporalitas significata non refertur ad ipsum Deum, sed ad modum intelligendi nostrum; sicut etiam masculinitas significata hoc nomine Deus non ponitur circa Deum. Et per hoc, patet solutio ad objecta.

QUAESTIO II.

Circa secundum quaeruntur duo: 1.^o an Deus sit immutabilis omnino; 2.^o an omnis creatura sit immutabilis.

ARTICULUS I.

Ad primum sic proceditur. 1. Videtur quod non sit in Deo immutabilitas. Omne enim quod habet se nunc aliter quam prius, mutatum est. Sed Deus post creationem habet se aliter quam prius, quia ut creator et Deus (1); ergo mutatus est.

2. Praeterea, non tantum est mutatio exitus a (1) *Legis* et Dominus.

potentia in actum, sed etiam exitus ab otio in actum, ut cum quis de sciente, sed non actu considerante fit actu considerans. Sed cum Deus de non operante fit operans, exit ab otio in actum; ergo mutatur.

5. Praeterea, illud mutatur, cuiuscumque advenit nova forma accidentalis; ergo multo magis eui advenit nova forma substantialis; ergo cum humanitas Deo advenerit, ipse mutatus est.

Sed contra est, quod probat Philosophus in octavo Physicorum, primum motorem esse immobilem: Deus autem est primus motor; ergo est immobilis.

Item Jacobi 4: « Apud quem non est transmutatio. »

Respondeo. Omnis mutatio contingit vel in sola abiectione alicujus formae, ut cum de sciente fit quis ignorans; vel in sola receptione, ut cum de ignorante fit sciens; vel etiam in utroque simul, ut cum de albo fit nigrum. Ubi cumque est abjectio sive receptio, ibi est passio: ubi cumque est passio ibi est potentia passiva. Sed in eo qui est pure actus, scilicet in Deo, nulla est potentia passiva; ergo nulla potest esse in eo mutatio.

Ad primum « omne quod se habet aliter » dicendum, quod Deus non se habet aliter quam prius, nisi secundum dici; sed res aliter se habent ad Deum, sicut cum quis alterius mutatione fit illi similis.

Ad secundum, de exitu ab otio in actum, dicendum, quod actus dupliciter dicitur. Vel ipsa actio quae est in agente, vel effectus qui est in patiente. Exitus ab otio in actum primo modo dictus importat mutationem in agente; secundo modo non, sed in rem suscipiente, sicut fieri de non lucente lucentem ponit mutationem in sole; sed fieri de non illuminante illuminantem, non. Talis vero exitus est cum Deus de non operante fit operans; et non primo modo, quia operatio Dei est sua essentia.

Ad tertium, de nova forma, dicendum, quod adventio novae formae per compositionem et formarum successionem mutat; sed non per unionem; quia unio duorum vel associatio, potest fieri altero extremo solum, et non utroque mutato. Forma vero accidentalis non potest advenire nisi primo modo: unde semper mutat; sed forma substantialis potuit advenire Deo per associationem in uno supposito, unde non mutavit ipsum.

ARTICULUS II.

Ad secundum sic proceditur. Et 1. videtur quod non omnis creatura sit mutabilis. In aevo enim, secundum quosdam, non est prius et posterius; ergo in eis quae mensurantur aevo, nulla est successio; ergo nec mutatio.

2. Praeterea, omnis mutatio vel est secundum substantiam, vel secundum quantitatem, vel secundum qualitatem, vel secundum ubi; sed caelum empyreum, nullo horum modorum est mutabile; ergo etc.

5. Praeterea, auctor sex Principiorum dicit, quod forma est compositioni contingens, simplici et invariabili essentia consistens; ergo etc.

Contra. Damascenus dicit: « Omne creabile est vertibile, vel secundum substantiam, vel secundum electionem; » ergo omnis creatura mutabilis.

Praeterea, omnis creatura potest aliquid amittere vel recipere; ergo pati vel mutari.

Respondeo. Mutatio sequitur possibilitatem: quia secundum Philosophum, motus est actus existentis in potentia secundum quod hujusmodi. Cum igitur omnis creatura habeat possibilitatem admistam, quia solus Deus est actus purus; ideo omnis creatura aliquo modo est mutabilis. Id autem quod est in potentia, potest comparari ad duo: scilicet ad agentem et ad actum. Per respectum igitur ad Deum agentem, omnis creatura est in potentia quasi receptiva; quia quicquid habet creatura, a Deo recipit. Est etiam in potentia obedientiae, ut adhuc recipiat: et sic omnis creatura est mutabilis, in quantum Deus potest subtrahere quod dedit ei, vel dare quod nondum dedit. Sed per respectum ad actum qui est forma, non omnis creatura est in potentia; quia sic cuilibet formae esset ponere formam. Sic autem in potentia est quaelibet creatura subsistens; quia advenit ei aliquid formaliter, vel substantialiter, vel accidentaliter. Formae igitur non possunt esse mutabiles, sicut mutationis subjectum, cum non sint in potentia ad aliquid formale: sed hoc tantum est rerum subsistentium. Nec tamen omnium; sed illorum, quorum potentia non est determinata ad hunc vel illum actum: et horum formae dicuntur mutabiles, in quantum sunt mutationum termini. Sic igitur omnis creatura est mutabilis, considerando obedientiam creaturae ad Deum. Considerando vero habitudinem materiae ad formam vel potentiae ad actum, res subsistentes, quarum potentiae indifferenter se habent ad actus contrarios, sunt mutabiles ut subjectum motus, et earum formae ut termini motus. Alia vero, nec ut subjecti causa, nec ut termini motus.

Ad primum, de aevo, dicendum, quod mensuratio respicit esse actuale, non potentiale: unde non sequitur quod non sint hujusmodi mutabilia a possibilitate mutandi; sed quod non mutantur actu, in quantum mensurantur aevo; est tamen et in aevi terminis alia mutatio, ad minus secundum successionem operationum, secundum quam mensurantur tempore.

Ad secundum dicendum, de caelo empyreo, quod quamvis non sit mutabile mutatione variabilitatis, de una forma contraria in aliam, est tamen mutabile mutatione receptionis.

Ad tertium, de forma, patet solutio ex dictis: quia forma non est mutabilis, ut subjectum motus; aliqua tamen forma est mutabilis, ut terminus motus.

Eadem quoque sola proprie ac vere etc. (V. edit. nostrae tom. VI, pag. 63.)

Illic quaeruntur duo principaliter: Primo de divina simplicitate. Secundo de simplicitate creaturae.

QUAESTIO I.

Circa primum quaeruntur tria: 1.^o an in Deo sit omnimoda simplicitas; 2.^o an contineatur in praedicamento substantiae; 3.^o si alia praedicamenta de ipso dicantur.

ARTICULUS I.

Ad primum sic proceditur. Et 1. videtur quod

divina essentia non sit omnino simplex. Ens enim cui nulla fit additio, praedicatur de omnibus, ut hoc quod dico ens, nulla facta additione praedicatur de omnibus, sed non sic ens rationale: sed divina essentia non praedicatur de omnibus; ergo fit ei aliqua additio ultra hoc quod est ens: sed quod recipit additionem non est omnino simplex; ergo etc.

2. Praeterea, major est simplicitas ubi est identitas sine distinctione, quam cum distinctione: sed in Deo est identitas cum distinctione personarum; ergo in Deo non est summa simplicitas.

5. Praeterea, Boetius dicit: « Omne quod est, esse participat ut sit, alio autem participat ut aliquid sit: » Deus est, et est aliquid, scilicet bonus; ergo habet esse quo est, et alter quid aliud, quo aliquid est; ergo non est simplex.

Contra. Omne compositum naturaliter est posterius suis componentibus; sed primo nihil est prius, ergo cum Deus sit universaliter primum, non est compositus.

Praeterea, omne compositum dependet a componentibus: esse autem illius qui dat omnibus esse a nullo dependet; ergo tale non est compositum.

Respondeo. Quod ubicumque est compositio, ibi est invenire potentiam et actum; quia, aut una pars est in potentia respectu alterius, sicut patet in compositis ex materia et forma, vel ex quo est et quod est, vel ex genere et differentia, vel ex substantia et accidente; aut omnes partes sunt in potentia respectu ejus quod ex compositione partium resultat ad minus, ut mistibilia sunt in potentia ad formam misti, et partes quantitativae ad totam quantitatem. In Deo autem non est aliquid de possibilitate: sed est pure activus; alias indigeret aliquo principio priori per quod reduceretur in actum. Unde necesse est ipsum esse perfecte simplex absque omni compositione.

Ad primum « ens cui nulla fit additio » dicendum, quod tale ens potest esse dupliciter: aut quia de natura sua non recipit additionem, et sic solus Deus est ens, cui nulla fit additio, et de tali ente non est verum quod praedicatur de omnibus: aut quia ei non fit additio, potest tamen fieri, et sic est ens commune, et de hoc sequitur quod objicitur.

Ad secundum dicendum, quod duplex est distinctio. Una quae causatur ex additione alienius, et talis non est in Deo, et haec impedit simplicitatem: alia quae causatur ex origine, ut sic dicantur aliqua distincta, quia unum est ab altero; et haec bene compatitur simplicitatem, et talis est in personis divinis.

Ad tertium, de Boetio, dicendum, quod loquitur de his quae sunt per participationem, non quae per essentiam, ut Deus.

ARTICULUS II.

Ad secundum sic proceditur. Et 1. videtur quod Deus sit in praedicamento substantiae. Quia omne quod est, aut est substantia, aut accidens: Deus autem non est accidens; ergo substantia: et sic substantia praedicatur de ipso. Non autem accidentaliter; ergo essentialiter: non ut convertibile; ergo ut genus.

2. Praeterea, dicit Philosophus in 9 Metaph., quod unumquodque mensuratur minimo sui generis: et dicit ibi Commentator, quod minimum quo mesurantur omnes substantiae, est primus motor:

sed ipse est Deus; ergo Deus est in genere substantiae.

5. Praeterea, substantia est, quod non est in subjecto, sed ens per se. Cum igitur hoc maxime Deo conveniat, videtur quod ipse sit in genere substantiae.

Contra. Quod est in genere substantiae, aut est sicut genus generalissimum quod praedicatur de omnibus, aut sicut contentum sub illo per aliquam determinatam additionem. Sed Deus neutro modo est in genere substantiae; quia nec praedicatur de aliis substantiis, nec recipit additionem; ergo etc.

Praeterea, quicquid est in genere aliquo, habet esse suum determinatum ad aliquod genus; sed Deus non habet esse determinatum, sed infinitum; ergo etc.

Respondeo. Ratio substantiae duo continet: scilicet quod ipse est ens per se subsistens, non dependens ab esse aliorum: et quod substat aliis quae sibi insunt. Quo ad primum habet Deus modum et rationem substantiae, maxime et per prius: quo ad secundum non habet. Nec tamen est in genere substantiae, triplici ratione. Prima est, quia omne quod est in genere addit aliquid supra genus, et est compositum. Secunda, quia in omni tali differt sua quidditas, et suum esse. Nam genus secundum esse dividitur, secundum rationem vero quidditatis est commune. Tertia ratio est, quia esse divinum colligit in se nobilitates omnium generum; unde ad nullum genus determinatur.

Ad primum « omne quod est etc. » dicendum, quod definitio est entis creati tantum.

Ad secundum dicendum, quod hoc intelligitur de propria mensura illius generis, ut unitas in materiis, punctus in magnitudine, quae tamen non sunt in genere ut contenta, sed principia illius generis: non autem intelligitur de mensura universalis. Deus autem est mensura universalis omnium rerum cujuscumque generis; unde non potest esse in aliquo genere.

Ad tertium, « non est in subjecto etc. » dicendum, quod secundum hanc rationem Deus dicitur substantia. Substantia autem quae est genus, dicitur a sustinendo, non autem a subsistendo tantum: ideo Deus non est in genere substantiae. Vel dicendum, secundum Avicennam, quod ens per se non est definitio substantiae, cum non declarat quidditatem ejus, sed esse; definitio vero ejus est res habens quidditatem, cui debetur esse non in alio.

ARTICULUS III.

Ad tertium sic proceditur. Et 1. videtur, quod alia praedicamenta dicantur de Deo. De quocumque enim praedicatur species, et genus; sed scientia, quae est species qualitatis, praedicatur de Deo; ergo et genus qualitatis.

2. Item, Philosophus in 5 Metaph. dicit, quod unum in substantia facit idem, in quantitate aequale, in qualitate simile: sed in Deo vere dicitur aequalitas et similitudo; ergo oportet aliquid dici de Deo per modum quantitatis et qualitatis.

5. Praeterea, quanto aliquid genus entis habet esse debilius, tanto minus convenit enti perfecto: sed relatio habet esse debilissimum; quod patet, quia fundatur super alia entia; ergo minime convenit Deo; si ergo ipsa praedicatur de Deo, multo magis alia.

Contra. Dicit Boetius lib. de Trin., quod in Deo non sunt nisi duo praedicamenta, scilicet substantia, et ad aliquid; ergo alia non praedicantur de Deo.

Respondeo. Dicendum, quicquid inventum quod (1) in creaturis praedicatur de Deo, praedicatur eminenter, tamquam de causa: unde removendum est quod est ibi imperfectionis, et retinendum solum quod est perfectionis. In unoquoque vero novem praedicamentorum tria est reperire: rationem communem accidentis, et rationem propriam sui generis, et rationem propriam suarum specierum. Quantum ad primum, omnia genera accidentis important imperfectionem: quia dicunt dependentiam ad subjectum: accidentis enim esse, est inesse. Quantum vero ad secundum, similiter omnia dicunt dependentiam ad subjectum, et ita imperfectionem, praeter relationem. Nam quantitas dicit mensuram substantiae, qualitas ejus dispositionem, et sic de omnibus aliis: ratio vero secundum propriam sui generis rationem dicit respectum non ad subjectum, sed ad suum correlativum: ideo secundum propriam rationem sui generis, substantia, prout dicitur a per se stando, et ratio, reperiuntur in Deo. Quantum ad tertium, scilicet propriam rationem suarum specierum, contingit aliquando aliqua praedicamenta dicere perfectionem: et tunc species secundum differentiam speciei, et non secundum rationem generis, praedicabitur de Deo: sicut scientia, prout dicit certam cognitionem, praedicatur de Deo, et non secundum rationem sui generis, scilicet qua est qualitas. Hoc etiam apparet in pluribus aliis.

Ad primum « de quocumque praedicatur species » dicendum, quod scientia, prout praedicatur de Deo, non est species qualitatis, ut dictum est.

Ad secundum « in Deo dicitur aequalitas » dicendum, quod aequalitas et similitudo dicitur in Deo, non ratione quantitatis vel qualitatis secundum genus, sed secundum speciem, ut dictum est.

Ad tertium, de debilitate relationis, dicendum, quod attenditur debilitas ejus, quia non ponit aliquid absolutum in subjecto, sed tantum per respectum ad aliud: et ex hoc habet magis, quod veniat in divinam praedicationem; quia quanto minus addit, minus repugnat simplicitati divinae.

QUAESTIO II.

Circa secundum quaeruntur tria: 1.^o an aliqua creatura sit simplex; 2.^o an anima sit simplex; 3.^o an sit tota in qualibet parte corporis.

ARTICULUS I.

Ad primum sic proceditur. 1. Videtur quod aliqua creatura sit simplex. Illud enim quod non habet compositionem partium, vel accidentium, vel formarum, vere simplex est: sed prima materia et plures formae sunt hujusmodi; ergo etc.

2. Praeterea, ubi stat resolutio intellectus, illud est simplex: stat autem in ente, vel in esse generali, quia prima creaturarum est esse; ergo ipsum est simplex.

3. Praeterea, principia componentia creaturam sunt creaturae; sed in principis hujusmodi non est ire in infinitum; ergo sunt aliquae creaturae non compositae.

Contra. Boetius dicit quod in omni quod est

(1) *Lege* quod inventum.

circa primum, differt quod est et esse; ergo est compositum.

Praeterea, ubi est limitatio, et compositio: quia limitatio non fit nisi per additionem: sed omnis creatura habet esse limitatum; ergo et compositum; et ita nulla creatura simplex.

Respondeo. Dicendum quod duplex est creatura: scilicet perfecta, quae subsistit, et imperfecta, quae non subsistit, sed est in alio, vel ut accidens, vel ut principium. Primo modo loquendo de creatura, omnis creatura est composita, saltem ex substantia et accidente, et esse et quod est. Secundo vero modo loquendo de creatura, omnis talis creatura est composita, id est, cum alio componibilis, vel veniens in compositionem cum alio. Neutro autem modo Deus est compositus; quia neque primo modo, ratione simplicitatis; neque secundo, ratione perfectionis. Et ideo esse immunem a compositione, est solius Dei proprium.

Ad primum, de prima materia, dicendum, quod quamvis in se non sit composita, tamen est componibilis alteri.

Ad secundum, de esse, dicendum, quod resolutio intellectus non exigit ut terminus sit simplex omnimoda simplicitate; sed illa quae opponitur compositioni ex pluribus.

Ad tertium, de principis, dicendum, quod principia composita sunt compositione hujusmodi cum hoc, non hujusmodi ex his (1).

ARTICULUS II.

Ad secundum sic proceditur. Et 1. videtur, quod anima sit simplex. Anima enim est forma corporis; forma enim, neque est materia neque compositum, ut dicit Philosophus in 1 de Anima; ergo anima non est composita.

2. Praeterea, anima secundum totam sui essentiam, est forma corporis; sed materia non potest esse forma alienius; ergo nulla pars animae est materia, sed tota est forma, et ita est simplex.

3. Praeterea, omne quod habet in se esse completum, non unitur alteri nisi accidentaliter; si ergo anima haberet esse completum, quale est esse compositi, non uniretur corpori nisi accidentaliter; ergo non faceret unum nisi per accidens.

Contra. Nulla forma simplex potest esse subjectum; sed anima est subjectum scientiarum et virtutum; ergo non est forma simplex.

Praeterea, forma simplex non habet esse per se, nec potest esse motor. Sed anima habet esse per se, scilicet cum separatur a corpore, et est motor corporis; ergo non est forma simplex.

Praeterea, nulla forma simplex habet in se unde individuatur, cum omnis forma, quantum est de se, sit communis: sed anima de se non ex corpore individuatur, alioquin remota causa individuationis tolleretur individuatio; ergo etc.

Respondeo. Dicendum, quod circa compositionem animae est triplex opinio. Quidam enim dicunt, quod anima quid compositum est ex materia et forma. Sed hoc non potest esse; quia sic in anima reciperentur formae rerum materialiter, cum unamquodque recipiatur in alio secundum modum recipientis; et ita non reciperentur secundum esse intelligibile et universale, unde anima non esset intellectiva. Et ideo alii dicunt, quod componitur ex quo est et quod est, intelligentes per quo est,

(1) *Lege* hujus cum hoc, non hujus ex his.

naturam, per quod est vero suppositum, ut humanitas est quo est Socrates. Sed hoc iterum non potest stare: quia suppositum a quidditate vel natura non differt, nisi secundum quod concernit materiam significatam. Unde secundum Avicennam, quidditas simplicitatis est ipsum simplex: et sic haec opinio aliquo modo redit in primam. Et ideo secundum alios dicendum est, quod componitur ex esse, et quod est: cum enim anima rationalis sit res subsistens, habet proprium esse, quod non est ipsa anima; quia solus Deus est suum esse. Ipsum vero esse animae potest dici quo est ejus, sicut actus currendi dicitur quo aliquis currit: et hoc esse se habet ad subjectum animae, sicut actus ad potentiam; cum anima non habeat esse a se, sed a Deo. Et ita etiam in anima invenitur compositio actus et potentiae. Haec autem compositio in anima negari non potest, nisi vel ab eis qui negant animam per se sine corpore posse subsistere, vel ab aliis qui dicunt animam esse de natura divina.

Ad primum « anima non est compositum » dicendum, quod verum est ex materia et forma, sed solum compositione praedicta.

Ad secundum dicendum, quod ipsa substantia animae, nec est materia, nec habet materiam partem sui, quamvis sit quasi materialis respectu esse supervenientis; et hoc non prohibet quin sit forma corporis.

Ad tertium « omne quod in se habet esse completum » dicendum, quod tale unitur alteri accidentaliter si secundum aliquid esse accidentale unitur alteri; anima autem non secundum aliquid esse accidentale, sed secundum suum esse essentiale corpori unitur. Sed quia aliae rationes videntur probare quod secundum suam essentiam sit composita; ideo respondendum est ad eas.

Ad illud ergo quod primo objicitur de forma simplici, dicendum, quod si sit simplex, ut sit suum esse, tunc est vera propositio, quia non potest talis forma esse subjectum alicujus accidentis, ut patet in Deo. Si autem non sit suum esse, sic non potest esse subjectum actuum individuantium, quia sequuntur materiam; potest tamen esse subjectum proprietatum, quae sequuntur principia speciei, et intentionum; et hujusmodi accidentium anima est subjectum.

Ad secundum, quod anima est motor, et habet esse per se, dicendum, quod nihilominus est simplex quantum ad suam essentiam: sed praedicta conveniunt sibi, non in quantum est forma simplex, sed in quantum est talis forma simplicissima primae formae quae est Deus: et ideo participat maxime nobilitates divinas; scilicet quod intelligit, et potest movere, et quod habet esse per se. Non sic est de aliis formis materialibus, quia non tantum accedunt ad Dei similitudinem, sicut anima intellectiva.

Ad tertium, « forma simplex, etc. » dicendum, quod sicut esse animae dependet a corpore quantum ad sui principium, quia non fit nisi in corpore; sed non quantum ad finem, quia remanet corrupto corpore: similiter autem et individuum ejusdem dependet a corpore, quantum ad principium, sed non quantum ad finem.

ARTICULUS III.

Ad tertium sic proceditur. Et 1. videtur, quod anima non sit tota in qualibet parte corporis. Omne

enim compositum ex anima et corpore, est animal; si ergo esset tota in qualibet parte corporis, quaelibet pars corporis esset animal.

2. Praeterea, aut intelligitur hoc de totalitate ex parte essentiae; aut potentiarum. Si essentiae; ergo essentia habet partes et non est simplex. Si potentiarum, secundum quamlibet potentiam est in quamlibet parte corporis, quod falsum est; ergo falsum est quod sit in quaelibet parte tota.

3. Praeterea, cum corpus vivat ab anima immediate informante; si anima est in qualibet parte; ergo quaelibet pars vivit per animam immediate; ergo non dependet vita unius partis corporis ab altera. Sed hoc falsum est, quia vita omnium membrorum dependet a corde.

4. Praeterea, corpus habet diversas partes distinctas; si ergo anima esset in qualibet parte corporis tota, ergo totum esset in pleribus locis simul: quod falsum est.

Contra. Forma substantialis adest cuilibet parti materiae. Sed anima est forma substantialis corporis animati; ergo adest cuilibet parti tota.

Praeterea, anima aequae cito sentit laesionem in qualibet parte: hoc autem non esset nisi aequae praesens esset cuilibet parti; ergo etc.

Respondeo. Dicendum, quod totalitas alicujus formae potest accipi tripliciter. Uno modo secundum perfectionem suae rationis. Alio modo secundum integritatem virtutis. Et tertio modo secundum extensionem: sed hic tertius modus non est nisi materialium formarum, quae scilicet sunt obligatae ad materiam, et recipiunt quantitatem per accidens ex dimensione, quae est conditio materiae; sicut color extenditur per extensionem superficiei, et color secundum extensionem corporis. Et sic, sicut totum corpus non est in qualibet parte, ita nec forma tota secundum istam totalitatem. Talis autem forma non est anima: unde non potest ei attribui totalitas, nisi vel ratione perfectionis suae naturae, vel ratione virtutis. Primo modo constat, quod est tota in qualibet parte, sicut et qualibet alia forma: nam tota ratio caloris invenitur in qualibet parte corporis calida. Secundo autem modo non tota est in qualibet parte corporis: quia secundum diversas potentias, diversa organa perficit.

Ad primum « compositum ex anima et corpore » est animal » dicendum, quod hoc non est verum de quolibet corpore, sed de corpore organico completo, potentia vitam habente.

Ad secundum, de totalitate, dicendum, quod accipitur hoc totum pro perfectione naturae suae: quia, secundum Philosophum, totum et perfectum idem est.

Ad tertium « quaelibet pars vivit immediate » dicendum: prout ly vivit dicit actum primum vitae, qui est esse, quaelibet pars vivit immediate aequaliter ab anima; sed prout dicit operationem consequentem vitam, qua vita conservatur, non aequaliter; sed sic primo et principaliter operatur in corde; ubi deficiente operatione animae, deficit etiam in aliis membris; et sic deficit vita quae habet conservari per hujusmodi operationem.

Ad quartum dicendum, quod anima non est in corpore vel in partibus corporis sicut in loco, sed sicut forma in materia: et ideo non sequitur quod sit in pluribus locis; imo totum corpus respondet animae loco unius materiae.

DISTINCTIO IX.

Nunc ad distinctionem etc. (V. edit. nostrae tom. VI, pag. 82.)

Hic quaeruntur duo: Primo de distinctione Filii a Patre. Secundo de coaeternitate.

QUAESTIO I.

Circa primum quaeruntur duo: 1.^o utrum propter distinctionem possit dici Filius alius a Patre; 2.^o utrum Pater et Filius propter eandem distinctionem possint dici plures aeterni.

ARTICULUS I.

Ad primum sic proceditur. Et 1. videtur quod Filius non sit alius a Patre: quia secundum Priscianum alius est relativum diversitatis substantiae: sed Pater et Filius sunt unius substantiae; ergo unus non est alius ab alio.

2. Praeterea, alius et aliud non diversificant rem secundum modum significandi: sed Pater non dicitur aliud a Filio; ergo nec alius.

3. Praeterea, proprietas non facit alium, sed alterum. Sed Pater et Filius sola proprietate differunt; ergo unus non est alius ab altero, sed tantum alter.

Contra. Quaecumque realiter differunt, unus est alius ab altero. Sed Pater et Filius realiter differunt, quia sunt tres res, secundum Augustinum; ergo Pater est alius a Filio.

Respondeo. Pater est alius a Filio, sed non aliud. Et ratio est, quia adjectivum in neutro substantivatur. Et ideo aliud significat diversitatem simpliciter, quae est diversitas substantiae: et quia una est substantia sive essentia Patris et Filii; ideo non potest dici, Pater est aliud a Filio, nec e converso. Sed in masculino et feminino genere, semper adjectivum adjectivum tenetur. Et ideo significat hoc quod est alius, et aliam diversitatem secundum exigentiam termini cui adjunguntur. Unde si sit terminus personalis, significat distinctionem personarum: si autem sit terminus substantialis, significat diversitatem substantiae. Ideo haec est vera, Pater est alius a Filio, et e converso: haec tamen est falsa, Pater est aliud a Filio. Sed si hoc quod dico aliud neutri generis adjectivum teneretur et non substantivaretur, tunc significaret diversitatem secundum exigentiam termini cui adjungeretur. Unde haec est vera, Pater est aliud suppositum a Filio: quia per *ly* aliud denotatur distinctio suppositorum: sed haec est falsa: Pater est aliud in essentia a Filio; quia per *ly* aliud denotatur distinctio essentiae.

Ad primum « aliud est relativum etc. » dicendum, quod verum est: sed substantia est duplex: prima et secunda. Dicendum ergo quod in divinis cum dicitur, Pater est alius a Filio, *ly* alius est relativum diversitatis personae et substantiae quae est hypostasis, non secundae.

Ad secundum, quod diversus modus significandi masculinae vel neutraliter, facit ad diversum intellectum diversitatis, ut dictum est.

Ad tertium « proprietas non facit alium, sed al-

« terum » dicendum, quod verum est in humanis, non autem in divinis; quia proprietas in divinis distinguit personas, non autem in humanis; et ideo in divinis facit alium in persona, etsi non in humanis.

ARTICULUS II.

Ad secundum sic proceditur. Et 1. videtur quod Pater et Filius non possint dici plures aeterni. In symbolo dicitur: « Et tamen non tres aeterni; » ergo non sunt plures aeterni.

2. Praeterea, quicquid in divinis a se dicitur, singulariter de tribus et non pluraliter praedicatur. Sed aeternus a se dicitur; non enim relativum est; ergo singulariter de tribus dicitur, et non pluraliter.

3. Praeterea, sicut una est deitas trium personarum, ita et est una aeternitas. Sed non potest dici, Pater et Filius sunt duo dii, propter unitatem divinitatis; ergo etiam propter unitatem aeternitatis non potest dici, Pater et Filius sunt aeterni.

Contra. In symbolo Athanasii dicitur, quod tres personae sunt sibi coeternae.

Praeterea, adjectivum recipit numerum a substantivo: sed aeternus est adjectivum: cum ergo adjungitur duobus vel pluribus, debet praedicari in plurali: et sic idem quod prius.

Respondeo. Quaedam nomina significant in divinis substantiam substantive. Et quia subjectum non praedicatur in plurali numero, nisi forma a qua imponitur multiplicetur; substantia autem sive divina essentia non multiplicatur; ideo talia nomina non praedicantur in divinis in plurali. Quaedam autem sunt quae significant subjectum adjectivum: et quia adjectiva dicunt adjacentiam et inhaerentiam respectu subsistentis sive suppositi, in divinis autem est pluralitas suppositorum; ideo talia nomina quae significant subjectum adjectivum solum, ut verba et participia, plurali in numero praedicantur de pluribus personis. Quaedam vero aliquando substantive, aliquando adjectivum accipiuntur, ut nomina significantia proprietates consequentes essentiam secundum modum intelligendi, ut aeternitas vel bonitas: et hujusmodi secundum quod substantive accipiuntur, non debent dici de tribus in plurali sed in singulari: secundum quod adjectivum accipiuntur, sic dicuntur in plurali.

Ad primum ergo patet solutio: quod si aeternus sumatur substantive, tunc praedicatur in singulari de tribus; et sic accipitur in symbolo Athanasii: sed si adjectivum, tunc praedicatur pluraliter.

Ad secundum « aeternus a se dicitur » dicendum, quod quia adjectivum est, quamvis de se non sit relativum, recipit tamen numerum a supposito. Et ideo quandoque de pluribus suppositis praedicatur et in plurali numero.

Ad tertium dicendum, quod Deus non est adjectivum ut recipiat numerum ab alio, sicut aeternus: unde non posset pluraliter praedicari, nisi propter pluralitatem suae formae; quam pluralitatem non est ponere in Deo.

Ad quartum « tres personae sunt coeternae » dicendum, quod coaeternus, propter habitudinem personae ad personam quam importat propter praepositionem per compositionem additam, semper debet in plurali numero praedicari, non in singulari.

Ad quintum patet solutio ex jam dictis.

QUAESTIO II.

Circa secundum quaeruntur duo: 1.^o utrum Pater sit aliquo modo prior Filio; 2.^o si generatio Filii est aeterna, quibus verbis significari debeat.

ARTICULUS I.

Ad primum sic proceditur. Et 1. videtur quod Pater prior sit Filio. Sicut enim se habet corruptio ad desitionem, ita se habet generatio ad inceptionem: sed omne quod corrumpitur desinit esse; ergo omne quod generatur incipit esse: et ita Filius cum generatur est posterior Patre.

2. Praeterea, nihil accipit aliquid nisi quod non habet: sed omne quod generatur accipit esse a generante; ergo omne quod generatur, ante generationem non habet esse; et sic idem quod prius.

3. Praeterea, principium naturaliter prius est eo cuius est principium: sed Pater est principium Filii; ergo Pater natura est prior Filio.

4. Praeterea, dare esse prius est dignitate, quam suscipere; ergo Pater, cum det esse Filio, dignitate prior est eo.

Contra. Quo aliquid est prius non est primum simpliciter nec universaliter, ergo non est Deus: sed Filius est Deus; ergo nihil est prius ipso.

Respondeo. In Patre et Filio duo sunt: scilicet essentia communis et relatio distinguens. Quo ad primum non potest esse prioritas, quia idem est in utroque: quo ad secundum vero non potest, quia correlativa simul sunt natura, tempore et intellectu. Dicendum ergo quod Pater nullo modo prior est Filio: nec natura, nec duratione, nec dignitate, nec intellectu.

Ad primum « quod generatur incipit esse » dicendum, quod verum est de generatione quae est cum mutatione quae opponitur corruptioni; sed generatio qua Filius generatur non dicit mutationem, sed solum emanationem.

Ad secundum « nihil accipit nisi quod non habet » dicendum, quod aliquis accipit esse ab alio non tantum quia non habet esse, sed quia habet non a se, sed ab alio: et sic Filius accipit esse a Patre, non quia non habet esse, sed quia habet esse ab alio non a se, et hoc habet ab aeterno.

Ad tertium « principium naturaliter etc. » dicendum, quod principium potest dupliciter considerari. Vel id quod est principium: et hoc est prius naturaliter eo cuius est principium: vel secundum rationem principii; et sic sunt simul natura, sicut et quaelibet relatio. In Deo autem ipsa relatio principii constituit personam, cui contingit relatio principii; et ideo nullo modo Pater est Filio prior cuius est principium.

Ad quartum, de dignitate, dicendum, quod ubi differt esse dantis et accipientis, dignius est dare quam accipere; sed hic non differt.

ARTICULUS II.

Ad secundum sic proceditur. Et 1. videtur quod generatio Filii significari debeat per praesens tempus. Praesens enim maxime aeternitati competit, eo quod non habet successionem. Sed generatio divina est aeterna; ergo debet significari per praesens tempus.

S. Th. Opera omnia. V. 22.

2. Praeterea, perfectior est potentia semper aetui conjuncta, quam non conjuncta: sed potentia Patris est perfectissima; ergo semper aetui generationis est conjuncta: sed per praesens significatur aetui conjuncta, per praeteritum non; ergo generatio divina perfectius significatur per praesens, quam per praeteritum.

Contra. Quod semper est in fieri non est perfectum; ergo quod semper est perfectum male significatur ut in fieri: sed generatio Filii semper est perfecta, praesens autem tempus significat eam ut in fieri; ergo etc.

Praeterea, Augustinus dicit: melior est qui semper natus est, quam qui semper nascitur.

Respondeo. Successivorum non simul est esse et perfectio: quia cum completa sunt, non sunt. Quamvis autem generatio creaturae sit successiva, generatio tamen Filii Dei, non est: quia non est in tempore hoc, sed in momento aeternitatis. Et ideo, quamvis generatio creaturae non sit cum perfecta est generatio, tamen creatoris simul est et perfecta est. Et ideo tam verbo praeteriti temporis significante perfectionem quam verbo praesentis temporis significante actualitatem significari potest. Unde bene dicimus Filium generari et Filium natum: sed quia simul est et perfecta est; ideo perfectius significatur per utrumque verbum simul, sive per adverbium praesentis temporis et adverbium praeteriti temporis, ut cum dicitur Filius semper est natus.

Ad primum « praesens maxime etc. » dicendum, quod verum est, quia ponit esse in actu: tamen in his quae per modum fieri significat importat imperfectionem; quia talia dum habeant esse imperfecta sunt; et ideo in talibus congruentius utimur praeterito tempore et adverbio praesentis temporis, quam verbo tantum praesentis temporis.

Ad secundum dicendum, quod quamvis sit aetui conjuncta semper generatio divina, tamen quia significatur ut in fieri, sive per modum successionis, quorum esse cum est, non est perfectum; ideo ad significandum perfectionem divinae generationis, non tantum verbis praesentis, sed praeteriti temporis debemus uti.

Ad ea quae in contrarium opponuntur patet responsio ex dictis.

DISTINCTIO X.

Nunc post Filii aeternitatem etc. (*V. edit. nostrae tom. VI, pag. 89.*)

QUAESTIO UNICA.

Hic quaeruntur quinque: 1.^o utrum Spiritus sanctus procedat ut amor; 2.^o utrum sit amor quem habet Pater in Filium et e converso; 3.^o utrum sit nexus vel unio Patris et Filii; 4.^o utrum ex processione sua possit dici proprie Spiritus sanctus; 5.^o de numero personarum.

ARTICULUS I.

Ad primum sic proceditur. Et 1. videtur quod Spiritus sanctus non procedat ut amor. Nunquam enim natura communicatur nisi per actum naturae: sed amor non significat actum naturae, sed magis voluntatis; ergo cum per processionem Spiritus

sancti communicetur tota natura, videtur quod Spiritus sanctus non procedat ut amor.

2. Praeterea, non est idem modus processionis creaturae et personae divinae: sed creaturae procedunt a Deo per actum voluntatis, ut Hilarius dicit: ergo nulla persona procedit per actum voluntatis. Ergo nec per modum amoris.

5. Praeterea, modus processionis personae est proprius personae procedenti: sed amor communis est tribus personis: ergo nulla persona procedit ut amor.

Contra. Non est perfecta summi boni cognitio sine adjunctione amoris; ergo ubi est processus aliquis per modum perfectae cognitionis oportet quod sit alius per modum perfecti amoris; ergo cum Filius procedat per modum intellectus a Patre sive ut verbum; ergo Spiritus sanctus procedit per modum voluntatis, sive ut amor.

Praeterea, Spiritus sanctus procedit ut donum, ut Augustinus dicit: sed prima ratio doni est amor; ergo procedit per modum amoris.

Respondeo. Processus personarum est ratio processionis creatorarum, secundum illud Apostoli ad Ephes. 5: « Ex quo omnis paternitas in caelo et in terra nominatur. » In creatoris autem duplex est processio: scilicet per modum naturae et per modum voluntatis. Ergo in creatore duplex est processio: una per modum naturae, altera per modum voluntatis: ut haec duplex processio sit ratio duplicis processionis in creaturis. Et ideo, sicut Filius procedit per modum processionis naturae, ita Spiritus sanctus per modum processionis voluntatis, quae quidem processio est amoris.

Ad primum « natura non communicatur » dicendum, quod sicut per primum processum naturae communicatur tota natura: ita per primum processum voluntatis communicatur tota voluntas: sed quia voluntas in Deo idem est cum natura; ideo etiam communicatur tota natura per processum voluntatis. Quamvis enim in natura inferiori non nisi per actum naturae communicetur natura; tamen in divinis potest communicari per actum voluntatis, quia voluntas est ipsa natura.

Ad secundam dicendum, quod quamvis sit processus creaturae per modum amoris, non tamen est idem modus; quia creatura procedit ut amatum solum vel volitum; sed Spiritus sanctus, ut ratio amandi et volendi, quia ut amor. Sic creatura procedit a Deo ut exemplatum, sed Filius ut exemplum, quia ut ars et imago Patris.

Ad tertiam dicendum, quod charitas et amor potest tripliciter accipi: essentialiter, notionaliter, personaliter. Essentialiter, quando in nomine amoris intelligitur processio secundum modum intelligendi tantum, sicut et in nomine operationis, quae tamen est divina essentia; et sic est communis tribus. Personaliter autem, quando in nomine amoris importatur processio realis; et sic solus Spiritus sanctus amor est. Notionaliter vero, in quantum significat ipsam relationem, quae est principium amoris personalis; et sic amor significatur, non per nomen, sed per verbum; ut cum dicitur, Pater et Filius diligunt se. Diligere enim est amorem emittere; et sic est commune Patri et Filio, sicut et communis spiratio.

ARTICULUS II.

Ad secundum sic proceditur. 1. Videtur quod Spiritus sanctus non sit amor quem habet Pater in Filium et e converso; quia qui procedit ut in alium tendens non procedit ut in se subsistens; sed Spiritus sanctus procedit ut in se subsistens; ergo non ut in alium tendens; et ita non est amor tendens a Patre in Filium et e converso.

2. Praeterea, si Spiritus sanctus est amor mutuus a Patre in Filium et e converso; ergo sicut Filius recipit amorem a Patre, ita Pater a Filio; et ita Pater recipit aliquid a Filio; quod falsum est.

5. Praeterea, nullus amor motuus est unitus (1), quia duorum duo sunt amores: sed Spiritus sanctus est amor unitus; ergo non est amor mutuus; et ita non est Patris in Filium et Filii in Patrem.

Contra. Hieronymus super Psalm.: « Domine quis habitabit in tabernaculo tuo? » dicit, quod sicut Spiritus sanctus est amor Patris in Filium, ita et Filii in Patrem.

Praeterea, perfectior est dilectio mutua quam non mutua; sed Spiritus sanctus est dilectio perfectissima; ergo et mutua.

Respondeo. Circa processionem Spiritus sancti duo possunt considerari: scilicet processio et modus procedendi. Ex processione, in quantum huiusmodi, non habet quod sit a Patre in Filium vel e converso: sed quod sit persona per se subsistens et distincta. Ex modo autem procedendi, in quantum scilicet procedit ut amor, habet quod sit ab uno in alium: et sic est motuus. Non tamen est ab uno in alium ut in recipientem amorem, sed ut in terminum et objectum amoris: sicut cum dicitur, Diligo Deum, Deus nihil recipit a me, sed tantum est objectum amoris mei.

Ad primum « qui procedit etc. » dicendum, quod eo quod est procedens in se subsistit; sed ratione modi procedendi, sic est ab uno in alium tendens.

Ad secundum dicendum, quod non sequitur, si Spiritus sanctus est amor Filii in Patrem, quod Pater recipiat a Filio: sed quod objectum amoris Filii est tantum, sicut visum est.

Ad tertium dicendum, quod amor mutuus qui est talium qui habent diversas voluntates, non est unitus; sed Pater et Filius unam penitus voluntatem habent; et ideo unitum amorem.

ARTICULUS III.

Ad tertium sic proceditur. Et 1. videtur quod Spiritus sanctus non sit nexus Patris et Filii. Nexus enim non est nisi separatorum, sed Pater et Filius non sunt separati, quia Pater est in Filio et e converso; ergo eorum non est aliquis nexus.

2. Praeterea, in nexu conveniunt qui connectuntur: sed Pater et Filius non conveniunt in una persona; ergo nec nectuntur in una persona; et ita Spiritus sanctus non est nexus illorum.

5. Praeterea, quod ab aliquibus discretum est et distinctum, non est unitivum illorum: sed Spiritus sanctus a Patre et Filio est distinctus; ergo non est unitivus illorum.

Contra. Augustinus dicit, quod amor est copula amantis et amati: sed Spiritus sanctus est amor Patris et Filii; ergo est copula utriusque.

Praeterea, secundum Augustinum, Spiritus san-

(1) Forte legendum unicus, ut et infra statim, et in resp. ad 3.^m

etus est amoris suavitas, quo genitus genitori conjungitur.

Respondeo. Dicendum, quod aliquid potest dici nexus duorum dupliciter. Uno modo sicut in quo duo uniuntur, ut si dicamus prolem esse nexum patris et matris; et sic Spiritus sanctus ex ipsa processione dicitur nexus Patris et Filii, in quantum procedit communiter ab utroque. Alio modo sicut quo duo uniuntur ut vinculum conjungens aliqua duo, et sic etiam Spiritus sanctus habet quod sit nexus Patris et Filii, in quantum procedit ut amor Patris in Filium et e converso, sicut dictum est.

Ad primum « nexus non est etc. » dicendum, quod Pater et Filius dupliciter possunt considerari. Vel in quantum conveniunt in essentia et uniuntur in amore essentiali: vel in quantum distinguuntur in personis: et sic uniuntur per consonantiam amoris personalis, qui est Spiritus sanctus.

Ad secundum « Pater et Filius etc. » dicendum, quod verum est formaliter, conveniunt tamen originaliter: quia unius personae sunt origo, scilicet Spiritus sancti, et sic est nexus eorum.

Ad tertium dicendum, quod non est verum universaliter. Nam a duobus corporibus glutinosis intelligitur aliquid ab eis discretum procedere, quo nihilominus illa nectuntur et uniuntur.

ARTICULUS IV.

Ad quartum sic proceditur. Et 1. videtur quod persona quae procedit ut amor non proprie dicatur Spiritus sanctus. Quod enim est commune tribus personis, non efficitur proprium, nisi adjuncto aliquo proprio: sed Spiritus nomen, commune est tribus; sanctus similiter; ergo haec duo per se non faciunt nomen alicujus personae proprium.

2. Praeterea, a quo habet res cognosci, ab eo debet proprie nominari. Sed a notione personarum habet persona cognosci; ergo debet ab ea denominari. Sed hoc nomen Spiritus sanctus, non nominat aliquam notionem tertiae personae in Trinitate; ergo non est proprium nomen ejus.

3. Praeterea, sicut processio quae est per modum amoris est sancta, ita illa quae est per modum naturae: sed per istam non dicitur Filius sanctus; ergo nec per istam dicitur Spiritus sanctus.

Contra. Dicit Augustinus, quod quia persona est communis; ideo recte habet nomen commune, scilicet Spiritus sanctus.

Praeterea, communi usu tractatorum Scripturae appellatur Spiritus sanctus.

Respondeo. Hoc quod dico Spiritus sanctus, potest dupliciter accipi. Vel ut oratio, et sic est commune toti Trinitati; vel ut dictio, et sic est ex usu Ecclesiae appropriatum nomen personae Spiritus sanctus. Cujus ratio est ex modo procedendi. Nam nobis processus generationis corporalis est, sed processus amoris est spiritualis. Alia est ratio ab effectu; quia amor, qui est donum ejus, facit nos spirituales.

Ad primum, quod opponitur de nomine communi etc., dicendum, quod Spiritus sanctus prout accipitur ut oratio, est nomen commune; sed prout dictio, est nomen personae appropriatum ex usu Ecclesiae.

Ad secundum dicendum, quod hoc verum est, quando invenitur nomen conveniens ad hoc. Sed a parte hae non inveniebatur: quia in creaturis in-

venietur aliqua res subsistens procedere per viam generationis, non autem per viam amoris; et ideo ex nominibus quae a nobis sunt creatae imposita potuit aliquid transferri ad significandum proprie personam Filii, non autem ad designandum proprie personam Spiritus sancti.

Ad tertium, quod Filius non dicitur sanctus, dicendum, quod ratio est, quia sanctitas est conditio voluntatis potius quam naturae: ideo potius additur nominationi personae procedentis per modum voluntatis quam per modum naturae.

ARTICULUS V.

Ad quintum sic proceditur. Et 1. videtur quod non sint tantum tres personae in divinis. Non enim plus distat voluntas a natura quam intellectus; sed alia est persona procedens per modum voluntatis ab illa quae procedit per modum naturae; ergo oportet esse aliam quae procedit per modum intellectus; et sic alia persona debet esse verbum et alia Filius.

2. Praeterea, sicut est perfectio naturae et liberalitatis in Patre et Filio, sic in Spiritu sancto. Si ergo propter perfectionem naturae et liberalitatis convenit Patri et Filio ut spirant tertiam personam, similiter spirare quartam convenit Spiritui sancto.

3. Praeterea, in Deo non est solum natura et voluntas; sed multa alia attributa; ergo qua ratione penes haec duo accipiuntur aliqui modi processionum personalium, ita penes alia debent accipi.

E contra videtur quod sint tantum duae personae. Personae enim non distinguuntur nisi per relationem originis; sed relatio originis est secundum quam aliquis est ab alio; ergo videtur quod sit una tantum persona quae sit ens ab alia, et reliqua a qua alius; ergo sunt tantum duae personae.

Respondeo. In Deo sunt tres personae tantum, et hoc secundum fidem et rationem: quia personae non distinguuntur nisi per relationem originis. Duplex autem est modus originis sive processionis: scilicet per modum naturae et per modum voluntatis; sicut duplex est agens, scilicet a natura et a proposito. Iste autem duplex modus processionis non distinguit personam a qua est processio, sed personas procedentes: quia quamvis ab eodem possent aliqua procedere diversis modis, non tamen idem diversis modis poterit procedere. Et ideo sunt duae personae procedentes: una per modum naturae, scilicet Filius; reliqua per modum voluntatis, scilicet Spiritus sanctus; et una a qua est una utraque processio, scilicet Pater. Et ideo tres sunt personae in divinis. Plures autem esse non possunt, quia processionem personarum non possunt multiplicari secundum numerum: quia in Deo nulla est materia: multiplicatio autem secundum naturam in eadem specie est secundum materiam.

Ad primum, de intellectu, dicendum, quod processio naturae est per expressionem speciei unius in altero. Necesse est enim ut genitus habeat speciem generantis. Species autem in natura immateriali (cujusmodi est divina) ratio est intelligendi in quantum hujusmodi, non autem ratio amandi, nisi secundum quod adjungitur ratio boni: et ideo in divinis ipsa processio per modum naturae est per modum intellectus, non autem per modum amoris.

Ad secundum dicendum, quod sicut natura in

Patre est principium generationis in quantum est idem re quod paternitas quae in Filio non est, quamvis sit in eo eadem natura, et propter hoc non generat: ita liberalitas in Patre et Filio est principium Spiritus sancti, ratione communis spirationis: quae quia in Spiritu sancto non est, quamvis in eo sit liberalitas, non producit ex se aliam personam.

Ad tertium dicendum, quod alia attributa vel non habent rationem principii activi in communi, sicut bonitas, vel habent rationem principii activi in communi, sicut potentia: habent tamen omnia rationem principii exemplaris. Et ideo secundum alia attributa processionis in divinis non sumuntur nisi secundum naturam et intellectum et voluntatem.

Ad ultimum dicendum, quod relatio constituens personam debet esse indivisibilis propter hoc quod persona est incommunicabilis: sed quia ab alio, dividitur secundum diversos modos ab alio existendi. Et ideo secundum hoc non accipitur una tantum persona, sed duae.

DISTINCTIO XI.

Hic dicendum est etc. (V. edit. nostrae tom. VI, pag. 95.)

QUAESTIO UNICA.

Hic quaeruntur quatuor: 1.^o utrum a Patre et Filio procedat Spiritus sanctus; 2.^o an procedat ab eis in quantum sunt unum; 3.^o an in quantum sunt unum in essentia; 4.^o an Pater et Filius sint unus spirator Spiritus sancti.

ARTICULUS I.

Ad primum sic proceditur. Et 1. videtur quod Spiritus sanctus non procedat a Filio. Dicit enim Damascenus: « Spiritum a Patre dicimus, et Spiritum Patris nominamus (1). »

2. Praeterea, nullum simplex potest esse a duobus; sed Spiritus sanctus est simplex; ergo non est a duobus.

3. Praeterea, Spiritus sanctus non minus convenit cum Patre quam Filius. Si ergo Filius communiceat cum Patre in spiratione Spiritus sancti, videtur quod Spiritus sanctus communiceat cum Patre in generatione Filii: sed hoc est falsum; ergo primum.

4. Praeterea, aut perfecte spirat Pater Spiritum sanctum, aut non; si non, ergo est aliqua imperfectio in Patre, quod est impossibile: si perfecte, ergo superfluit Filius.

Contra, Joan. 16 dicitur: « Ille me clarificabit quia de meo accipiet; » ergo aliquid accipiet a Filio. Sed quicquid est in illo est totus ipse: ergo se totum accipit a Filio; ergo procedit ab illo.

Praeterea, Joan. 13 dicitur: « Cum venerit Pater, et carletus quem ego mittam, etc. » Sed si non procederet ab eo, non mitteret eum; ergo procedit ab ipso.

Respondeo. Dicendum, quod necesse est ponere Spiritum sanctum a Patre et Filio procedere. Aliter enim sequitur ad minus triplex inconveniens. Quorum primum est, quod Pater et Filius non sunt perfecte unum, quod est haeresis Arit. Ex hoc enim quod perfecte Pater et Filius sunt unum, sequitur quod Pater et Filius in omnibus communicant, nisi in paternitate et filiatione. Esse autem

(1) *Supple:* Spiritum autem Filii non dicimus.

principium Spiritus sancti, neque ad rationem Paternitatis pertinet, neque ad rationem filiationis: unde oportet quod in hoc Pater et Filius communicent. Secundum est quod Filius et Spiritus sanctus non essent personae distinctae. Quod est error Sabellii. Nam cum tres personae sint unius essentiae, non potest esse personarum distinctio nisi secundum relationes originis, prout una persona est ab alia. Spiritus autem sanctus a Filio non distinguitur per hoc quod est a Patre. Si ergo non distinguitur ab eo per hoc quod unus eorum est ab alio, nulla erit distinctio inter eos. Non autem Filius est a Spiritu sancto: quia ex hoc quod Filius est, solum a Patre est: restat ergo ut Spiritus sanctus sit a Filio. Tertium est quod Spiritus sanctus, sit a creatura, quod est error Macedonii. In his enim in quibus processus necessarius est unius ab altero, necesse est quod unum sit ab uno: sed in his quae producantur ut voluta, possibile est ab uno procedere plura. Si ergo praeter processionem Filii qui nature ordine a solo Patre procedit, procedat ut est a solo Patre Spiritus sanctus, sequitur quod Spiritus non procedat a Patre naturae ordine, sed solum quia Pater sic voluit: hic autem modus est quo a Deo creaturae procedunt; sequitur ergo Spiritum sanctum esse creaturam, quod est haeticum: ideo oportet dicere quod Spiritus sanctus sit a Patre et Filio.

Ad primum, de Damasceno, dicendum, quod Damascenus non negat ita esse, tamen non affirmat: quia dicitur fuisse tempore quo incepit controversia super hac quaestione inter Graecos et Latinos: unde in persona graecorum loquens dicit, Non dicimus: non tamen negat ita esse.

Ad secundum dicendum, quod verum est a duobus diversis per essentiam; quia quae differunt per essentiam, differunt etiam per virtutem et operationem.

Ad tertium dicendum, quod quia Spiritus sanctus procedit a Filio, ideo Filius non potest procedere a Spiritu sancto: quia impossibile est, quod respectu ejusdem, idem se habeat in ratione principii et ejus quod est a principio.

Ad quartum dicendum, quod perfecte spirat Pater: non tamen Filius superfluit: quia sunt unum in spirando: et hoc non est ex imperfectione Patris, quia indigeat Filii adjutorio; sed ex perfectione Filii, quia in omnibus assimilatur Patri, quae non repugnant proprietati ejusdem.

ARTICULUS II.

Ad secundum sic proceditur. 1. Videtur quod Spiritus sanctus non procedat a Patre et Filio, in quantum sunt unum. Spiritus sanctus procedit a Patre et a Filio, ut nexus amborum: nexus autem non est unius, sed plurium; ergo procedit ab eis ut sunt plures, non ut sunt unum.

2. Praeterea, Spiritus sanctus est amor mutus Patris et Filii, ut dictum est supra: sed amor mutus est a duobus; ergo et Spiritus sanctus.

3. Praeterea, actus sunt suppositorum; si ergo spirare est actus Patris et Filii, oportet quod sit actus eorum, in quantum sunt supposita quaedam: sed suppositum Patris distinguitur a supposito Filii; ergo procedit ab eis Spiritus sanctus in quantum sunt distincti.

Contra. Plures sunt Pater et Filius suis proprietatibus; ergo si ab eis Spiritus sanctus procedit

¶ sunt plures; ergo procedit a Patre ut Pater est, et a Filio ut Filius est; ergo Pater paternitate, Filius filiatione refertur ad Spiritum sanctum: quod falsum est.

Praeterea, Pater et Filius in quantum sunt plures distinguuntur, non autem ununtur; sed Spiritus sanctus est unio Patris et Filii; ergo non procedit ab eis in quantum sunt plures.

Respondeo. Actus est alicujus ut agentis et alicujus ut principii actionis; si ergo ly in quantum, replicet conditionem agentis, sic Pater et Filius, in quantum sunt plures, spirant Spiritum sanctum. Si autem replicet conditionem principii actionis, sic in quantum sunt unum in virtute spirativa, spirant Spiritum sanctum.

Ad primum, de nexu, dicendum, quod nexus non est unius, sed plurium: non tamen solum ut plures sunt, sed ut conjunguntur in aliquo uno.

Ad secundum dicendum, quod amor mutuus est plurium, sed tamen unitorum in aliquo uno.

Ad tertium dicendum, quod spirare est plurium suppositorum, convenientium tamen in una virtute spirativa.

Ad quartum dicendum, quod quamvis procedat ab eis ut plures sunt secundum rationem agentium, non tamen secundum formam eos plurificantem, scilicet paternitatem et filiationem, in quantum sunt spirationis principium; sed secundum formam unam in qua conveniunt.

Ad quintum dicendum, quod in quantum plures sunt solum, non conveniunt spirando Spiritum sanctum; sed in quantum sunt plures agentes per unam virtutem spirativam in utroque.

ARTICULUS III.

Ad tertium sic proceditur. 1. Videtur quod Spiritus sanctus procedat a Patre et Filio, in quantum sunt unum natura. Natura non communicatur nisi per actum naturae; ergo cum per spirationem natura communicetur, spirationis erit natura ipsa principium; ergo Pater et Filius, in quantum sunt unum in natura, spirant Spiritum sanctum.

2. Praeterea, non potest esse in duobus suppositis, distinctis una proprietas, quia proprietates numerantur secundum supposita; ergo non spirant ut sunt unum in notione aliqua, sed in essentia.

3. Praeterea, Anselmus dicit, quod ridiculum est dicere quod propter relationem tota essentia Patris et Filii sit in Spiritu sancto, et non potius propter essentiam.

Contra. In unitate essentiae conveniunt tres personae; ergo si spirare convenit duobus secundum quod sunt unum in essentia, convenit etiam tertiae personae.

Praeterea. Omnis actus proprius aliquorum egreditur a forma aliqua quae est propria ipsorum: unitas autem essentiae non est forma propria illorum duorum; ergo non est essentia in eis spirandi principium, quod est actus proprius illorum.

Respondeo. Essentia tantum in Patre et Filio non potest esse spirationis principium, nec solum proprietas relativa: quia si essentia secundum rationem essentiae esset principium actus notionalis, essentia distingueretur. Proprietas autem relativa esse non potest principium concreandi divinam naturam, ut dicit Anselmus. Dicendum est ergo quod essentia quae est in Patre et Filio ratione

alicujus notionis, quae communis est Patri et Filio, quae est idem re quod essentia, et dicitur communis spiratio, est principium spirationis Spiritus sancti. Et hoc est quod communius dicitur quod spirant Spiritum sanctum in quantum sunt unum in potentia spirativa; ut potentia referatur ad essentiam, hoc autem quod dico spirativa, ad notionem. Potentia enim spirandi, sicut et potentia generandi, dicit essentiam, eum modo tamen existendi hoc vel illo: et dicit essentiam principaliter in recto, relationem autem in obliquo, ut habetur supra distinctione septima.

Ad primum « natura non communicatur nisi per actum naturae » dicendum, quod verum est. sed determinata communicatio naturae debet esse per actum naturae acceptae sub aliqua propria ratione. Et ideo communicatio, per quam procedit Spiritus sanctus, est actus naturae, in quantum est idem re quod communis spiratio.

Ad secundum, de suppositis distinctis, dicendum, quod duobus distinctis per essentiam non potest inesse proprietas una; sed duobus, quae quidem sunt in essentia unum.

Ad tertium, de Anselmo, dicendum, quod non intendit dicere quod relatione Pater et Filius non spirent Spiritum sanctum; sed quod non solum, sed essentia sub ratione relationis.

Ad ea quae in contrarium opponuntur, dicendum, quod ipsa unitas essentiae non est tota causa spirationis, nisi in quantum ipsa est conjuncta cum notione communis spirationis. Hoc vero non est in tertia persona; et ideo non convenit ei actus spirationis.

ARTICULUS IV.

Ad quartam sic proceditur. 1. Videtur quod Pater et Filius debeant dici unus spirator. Spirator enim dicitur ab actu spirandi; ergo ab uno actu spirandi debet dici unus spirator. Sed unus est actus spirandi in Patre et Filio; ergo sunt unus spirator.

2. Praeterea, tres personae ab uno actu creandi dicuntur unus creator; ergo duae personae ab uno actu spirandi debent dici unus spirator.

3. Praeterea. Pater et Filius dicuntur unum principium Spiritus sancti; sed non nisi spirando; ergo debent dici unus spirator.

Contra. Quicumque spirant sunt spiratores: sed Pater et Filius spirant; ergo etc.

Praeterea, Hilarius dicit: « Spiritum sanctum » procedere a Patre et Filio auctoribus: » sed non sunt auctores, nisi prout sunt spiratores; ergo Pater et Filius non sunt unus spirator Spiritus sancti, sed plures.

Respondeo. Dicendum, quod circa hoc est duplex opinio. Quidam enim dicunt quod Pater et Filius sicut dicuntur unum principium Spiritus sancti, ita debent dici unus spirator; non tamen unus spirans, si spirans adjective teneatur: quia adjectiva recipiunt numerum a suppositis, substantia autem a forma significata. Unde, cum spirator sit substantivum, spirans adjectivum, Pater et Filius debent dici duo spirantes propter pluralitatem suppositorum: unus autem spirator, propter unitatem virtutis spirativae. Et ad auctoritatem Hilarii respondent quod posuit ly auctoribus, pro spirantibus; et hoc dicit Alanus in Regulis theologiae. Alii dicunt, quod quia spirandi actus est Patris et Filii

aliquo modo ut sunt plures; ideo pluraliter debet praedicari, ut dicatur: Pater et Filius sunt spiratores. Secus autem est de actu ereandi, qui est trium solum secundum quod sunt in essentia unum. Et ideo Pater et Filius dicuntur unus creator, sed duo spiratores: et secundum utramque opinionem de facili patet responsio ad objecta.

Ad primum « actus unus est » dicendum, quod quamvis sit unus, tamen significatur ut egrediens a pluribus suppositis.

Ad secundum, de creatore, dicendum, quod non est simile: quia actus ille egreditur ab eis: ut sunt unum omnino: sed actus spirandi egreditur ab eis, ut sunt aliquo modo distincti.

Ad tertium de principio, dicendum, quod non est simile; quia principium respicit ad rationem spirandi, sive relationem quae est una: spirator vero respicit supposita, sive personas, quae sunt multae.

DISTINCTIO XII.

Item quaeritur etc. (V. edit. nostrae tom. VI, pag. 99.)

QUAESTIO UNICA.

Hic quaeruntur quatuor: 1.^o an Spiritus sanctus procedat prius a Patre, quam a Filio; 2.^o an magis vel plenius ab uno, quam ab alio; 3.^o an aequae immediate ab utroque; 4.^o an Patri sit attribuenda auctoritas in spiratione Spiritus sancti.

ARTICULUS I.

Ad primum sic proceditur. 1. Videtur, quod Spiritus sanctus prius procedat a Patre, quam a Filio. Spiritus enim sanctus procedit a Patre; aut ergo jam nato Filio, et ita Filius est prior Spiritu sancto: aut nondum nato: et ita Spiritus sanctus prius procedit a Patre quam a Filio; quia non potest procedere a Filio nisi jam nato.

2. Praeterea, prius est commune quam proprium; ergo quod inest alieni secundum commune, prius est quam quod inest secundum proprium: spirare autem Spiritum sanctum inest Patri secundum communem rationem cum Filio: generare autem Filium, secundum proprium; ergo prius inest actus spirandi, quam generandi; ergo spiratio Spiritus sancti a Patre prior est, quam generatio Filii; ergo prius procedit a Patre, quam a Filio.

3. Praeterea, Pater est principium de non principio, Filius principium de principio. Sed naturaliter prius agit et producit principium sine principio, quam principium de principio; ergo quicquid a Patre et Filio procedit, prius procedit a Patre quam a Filio.

Contra. Athanasius dicit, quod in Trinitate nihil est prius aut posterius.

Praeterea, in uno non est prius aut posterius, Spiritus sanctus procedit a Patre et Filio secundum quod sunt unum; ergo non secundum prius et posterius.

Respondeo. In divinis, secundum Augustinum, est solus ordo naturae, scilicet secundum Griginem, qua unus ex alio, non ordo secundum prius et posterius, quo unus sit prior altero. Unde Pater, Filius aut Spiritu sancto nullo modo prior est, nec e converso: quia secundum naturam unum sunt, secundum proprietates personales correlative

se habent; relativa autem sunt simul natura duratione et intellectu; et sic una persona nullo modo est prior altera; et eadem ratione, Spiritus sanctus non prius procedit a Patre, quam a Filio.

Ad primum « aut jam nato » dicendum, quod non est divisio sufficiens; quia, quamvis natum et non natum opponantur contradictorie, non tamen procedere jam nato filio, aut non nato: sicut quamvis homo et non homo opponantur contradictorie, non tamen esse album hominem, aut album non hominem. Neutrum ergo dicendum: et est simile si dicatur, splendor procedit ab igne, aut ergo jam orto calore, aut nondum orto: utrumque enim falsum est; sed simul dum oritur.

Ad secundum « prius commune » dicendum, quod hoc intelligitur ubi commune includitur in ratione propria; sicut prius est animal quam homo, non tamen album quam homo, quamvis album sit prius et communius. Spiratio vero non includitur in ratione generationis, unde non oportet, quod sit prior quamvis communior.

Ad tertium, prius naturaliter agit principium sine principio, dicendum quod verum est, ubi diversa virtus est utriusque principium; non tamen ubi una est et eadem.

ARTICULUS II.

Ad secundum sic proceditur. 1. Videtur, quod Spiritus sanctus magis procedat a Patre quam a Filio. Omnis causa primaria plus influit in suum causatum, quam causa secundaria: sed Filius est quasi causa secundaria, Pater autem quasi causa primaria; ergo et Spiritus sanctus magis procedit a Patre quam a Filio.

2. Praeterea, propter quod unumquodque et illud magis; si ergo propter Patrem spirat Filius, quia Filius habet a Patre, quod spiret; magis spirat Pater quam Filius.

3. Praeterea, Spiritus sanctus habet a Patre, quod procedat a Filio, et non e converso; ergo plus habet a Patre quam a Filio; ergo plus procedit ab ipso.

Contra. Ubi est unitas, ibi non est magis et minus: Pater et Filius sunt unum in spirando; ergo unus non spirat magis altero.

Praeterea, in Trinitate est summa aequalitas; ergo non est ibi neque majus neque minus.

Respondeo. Quamvis virtutem spirativam Filius habeat a Patre; quia tamen illa una et eadem est in Patre et Filio tota, non magis procedit Spiritus sanctus a Patre, quam a Filio, nec plenius: sicut filius non est minus Deus, quam Pater a quo accipit deitatem: quia unam et aequalem accipit.

Ad primum, de causa primaria, dicendum, quod nec Pater nec Filius proprie est causa Spiritus sancti, sed principium: quia tantum (1) est, ad cuius esse sequitur aliud, id est, diversum in essentia, eum etiam eadem sit virtus spirandi in utroque: non tamen unus eorum est principium primum, alter secundarium.

Ad secundum « propter quod unumquodque tale » dicendum, quod veritatem propositio habet, ubi est ratio causalitatis; hoc autem non est in proposito.

Ad tertium « Spiritus sanctus a Patre » dicendum, quod hoc non facit quod plus habeat a Patre quam a Filio, cum totum aequae habeat ab utroque; sed ipsa spiratio aliquo modo comparetur ad Pa-

(1) *Lege causa.*

tem, quo non ad Filium: quia in Filio est a Patre, et non e converso.

ARTICULUS III.

Ad tertium sic proceditur. 1. Videtur quod Spiritus sanctus procedat a Patre mediante Filio. Illud enim per quod aliquid procedit, videtur esse medium in processione. Sed Spiritus sanctus procedit a Patre per Filium; ergo procedit a Patre mediante Filio.

2. Praeterea, Spiritus sanctus est tertia in Trinitate persona; tertium vero non exit a primo nisi per medium; ergo Spiritus sanctus non exit a Patre nisi mediante Filio.

3. Praeterea, duorum ab eodem principio aequae et immediate procedentium, unum non est principium alterius; si ergo Filius et Spiritus sanctus aequae immediate a Patre procedunt, Filius non esset principium Spiritus sancti.

Contra. Aequae immediate procedit creatura a tribus personis, propter unam virtutem creandi; ergo similiter Spiritus sanctus a duobus, propter unam virtutem spirandi.

Praeterea, si non esset aequae immediata processio, non esset aequalis germanitas; ergo nec aequalis dilectio.

Respondeo. Dicendum, quod Pater et Filius sunt spiratores Spiritus sancti per virtutem spirativam, quae una est in utroque. Cum ergo processio Spiritus sancti comparetur ad virtutem spirativam, immediate ab utroque procedit. Si autem comparetur ad Patrem et Filium ut sunt spirantes, sic a Patre procedit Spiritus sanctus quodammodo mediate et quodammodo immediate. Mediate quidem quantum ad hoc, quod Spiritus sanctus procedit a Filio: hoc enim Filius habet a Patre: immediate autem inquantum Pater et Filius simul spirant Spiritum sanctum. Sicut Seth fuit ab Adam et mediate et immediate. Mediate quidem, inquantum Seth fuit ab Eva, quae fuit ab Adam; immediate vero, inquantum Eva et Adam simul genuerunt Seth.

Ad primum « id per quod aliquid procedit, etc. » dicendum, quod verum est. Nam haec propositio, per, notat habitudinem causalitatis, vel instrumenti; sed hic notat solam habitudinem auctoritatis. Nihilominus tamen verum est, quia Filius est medium uno modo, inquantum a Patre habet quod spiret.

Ad secundum, de tertia persona, dicendum, quod verum est, ubi primum et secundum omnimodo sunt diversa in nullo unita; sed hic Pater et Filius sunt unum in spirando.

Ad tertium dicendum, quod verum est, quando procedunt ab eodem principio eodem modo; aliter non. Nam Eva et Abel processerunt immediate ab Adam: tamen Abel procedit ab Eva. Vel dicendum, quod falsum est. Nam creaturae immediate procedunt a Deo, et tamen inter eos est ordo causalitatis.

ARTICULUS IV.

Ad quartum sic proceditur. 1. Videtur quod respectu processionis Spiritus sancti non sit assignanda Patri vel attribuenda auctoritas. Pater enim non se habet ad processionem Spiritus sancti nisi per aliquam relationem originis, quae est communis spiratio; si ergo in spirando Spiritum sanctum at-

tribuitur Patri auctoritas, videtur quod auctoritas sit idem quod communis spiratio; et sic non tantum erit Patris sed et Filii.

2. Praeterea, Pater et Filius in spirando Spiritum sanctum conveniunt; si ergo Patri attribuitur auctoritas, Filio attribuitur subauctoritas; et ita quantum ad aliquid, Filius esset sub Patre, et inferior eo: quod est haereticum.

3. Praeterea, eadem potentia est, qua Pater Spiritum sanctum spirat, et Filius; si ergo potentia spirandi in Patre dicitur auctoritas, pari ratione in Filio auctoritas dicitur, quod non conceditur.

Contra est quod dicitur in Glossa Rom. 5, super illud: « Charitas Dei diffusa est etc. » In Patre, inquantum manet auctoritas; in Filio nativitas, in Spiritu sancto communitas.

Respondeo. Dicendum, quod nomen auctoritatis apud nos designat primam originem. Ille enim dicitur auctor alicujus sermonis, qui primo illum invenit. De ratione autem originis duo sunt: quorum unum est, ut ab ea sit aliquid. Aliud est, ut non sit ab aliquo. Quamvis ergo in divinis personis non sint prius et posterius, tamen secundum praedicta duo, nomen auctoritatis ibi conceditur. A Patre namque, Filius et Spiritus sanctus habent quicquid sunt, vel possunt, vel operantur: ipse vero Pater a nullo aliquid habet. Sic ergo in spirando Spiritum sanctum Patri attribuitur auctoritas; quia Filius habet a Patre quod spiret: Pater autem a nullo.

Ad primum ergo dicendum, quod in nomine auctoritatis includuntur tres proprietates. Dicitur enim Pater auctor in spiratione Spiritus sancti, secundum quod Spiritus sanctus est a Patre, quod ad communem spirationem pertinet; et iterum secundum quod Filius a Patre habet hoc quod spiret per generationem, et sic includit paternitatem; et iterum quod Pater non habet hoc ab alio, quod pertinet ad innascibilitatem. Quamvis ergo communis spiratio conveniat Patri et Filio: non tamen auctoritas spirandi.

Ad secundum dicendum, quod quidam utuntur nomine subauctoritatis in Filio, sicut nomen auctoritatis in Patre, intelligentes per praepositionem designari ordinem originis et non minorationis. Sed quia hoc nomen in usu sanctorum non invenitur, et quamdam subjectionem importat: videtur ideo aliis esse tacendum. Nec sequitur, quod si in Patre sit auctoritas, quod in Filio sit subauctoritas: quia auctoritas nihil dicit, quod non pertineat ad originem; subauctoritas autem importat subjectionem.

Ad tertium dicendum, quod quamvis eadem potentia spirandi sit in Patre et Filio, non tamen secundum eundem existentiae modum. Nam Filius habet eam a Patre, Pater autem a nullo: et ideo in Patre habet rationem auctoritatis, non autem in Filio.

DISTINCTIO XIII.

Post haec considerandum est etc. (V. edit. nostrae tom. VI, pag. 105.)

QUAESTIO UNICA.

Hic quaeruntur quatuor: 1.º utrum in Deo sit aliqua processio; 2.º utrum sit una, vel plures; 3.º qualiter nominari debeat; 4.º utrum Spiritus sanctus dicatur ingenuus.

ARTICULUS I.

Ad primum sic proceditur. 1. Videtur, quod in Deo nulla sit processio. Processio enim dicit quemdam motum: sed in Deo nullus est motus; ergo nec processio.

2. Praeterea, processio importat separationem procedentis ab eo unde procedit; sed in Deo nulla est separatio; ergo nec processio.

3. Praeterea, omnis processio est progressio ab alio in aliud; sed emanatio rei per se subsistentis non est ut in aliud; ergo non est processio: talis autem est emanatio personae a persona; ergo etc.

Contra. Jo. 16, dicitur: « Spiritus Paraclitus qui a Patre procedit. »

Praeterea, in anima est imago Trinitatis. Sed in anima invenitur notitia procedere a mente, et amor ab utroque; ergo est processio in divinis personis.

Respondeo. Dicendum, quod processio dupliciter accipitur. Uno modo secundum exitum alicujus ab alio; et sic effectus dicuntur procedere a suis causis et principia a suis principiis. Alio modo secundum motum alicujus in aliquid, sicut dicitur id quod movetur secundum locum, procedere in locum. Et quia in Deo non est motus aliquis: ideo processio secundo modo Deo convenire non potest, nisi per quamdam metaphoram, in quantum similitudinem suam in alio producit; et sic incipit esse secundum suam similitudinem, ubi prius hoc modo non erat: et per hunc modum dicitur procedere in creaturas. Est autem in divinis exitus alicujus ab alio, sicut a principio, secundum illud Joan. 16: « Exivi a Patre, et veni in mundum. » Et ideo quantum ad hoc, una persona dicitur procedere ab alia, in quantum est ab ea sicut a principio.

Ad primum, processio dicit motum, dicendum, quod processus rei a re, a qua differt essentialiter, motus est, vel mutatio: sed talis processio non est in Deo.

Ad secundum, de separatione, dicendum, quod hoc habet locum in processione per differentiam essentialem.

Ad tertium dicendum, quod processio localis est in aliquid sicut in terminum motus: sed quod procedit a causa, non oportet quod in alterum procedat; et sic sumitur processio in divinis personis.

ARTICULUS II.

Ad secundum sic proceditur. 1. Videtur, quod tantum in divinis sit una processio. Sicut enim paternitas nominat proprietatem originis, ut a quo est aliquis, ita processio ut qui est ab alio: sed in divinis non potest esse nisi una paternitas; ergo nec nisi una processio.

2. Praeterea, in omnibus habentibus unam naturam specie est unus modus communicationis naturae: sed per processionem personarum communicatur natura divina, quae non tantum una est in specie, sed etiam in numero; ergo non est, nisi unus modus processionis in divinis.

3. Praeterea, operationes distinguuntur ab invicem penes terminos et principia: sed processio in divinis semper est ab eodem principio, quia ex virtute naturae ejus a quo est processio, et ad eundem terminum per processionem acceptam, quia

per divinam processionem semper accipitur natura divina; ergo videtur, quod non sit in divinis nisi una processio.

4. Praeterea, si sint duae processionis, aut differunt ex parte essentiae, aut ex parte relationum. Sed non primo modo, quia essentia non distinguitur in divinis: nec secundo: relationes enim secundum rationem intelligendi consequuntur processionem: eo enim est Filius, quia a Patre procedit; ergo videtur quod non differant.

Contra. Secundum unam processionem est tantum unus procedens. Sed sunt duae personae procedentes; ergo et duae processionis.

Respondeo. Circa hoc sunt tres opiniones. Quidam enim dicunt, quod processionis realiter seipsis distinguuntur, sicut primae differentiae alicujus generis. Sed contra hoc est, quod processionis significantur per modum quorundam actuum, quorum definitionem oportet accipere penes principia, vel penes terminos. Et ideo alii dicunt, quod differunt secundum diversum modum processionis; quia generatio est processio naturae, reliqua est processio voluntatis. Sed contra hoc est, quod haec differentia, est differentia rationis tantum: natura enim et voluntas sunt eadem re in divinis, processionis autem realiter distinguuntur. Et ideo tertii dicunt, quod eam differentia sola secundum relationem originis faciat realem distinctionem in divinis, processionis autem realiter distinguuntur, oportet, quod per relationes originis distinguantur. Procedere autem et non procedere sunt differentiae originis, sive processionis. Et ideo quia Filius procedit a non procedente, id est Patre, Spiritus sanctus autem procedit a procedente, id est Filio, non solum a non procedente, id est Patre, ideo processio Filii realiter distinguitur a processione Spiritus sancti.

Ad primum, non est in divinis nisi una paternitas, dicendum, quod verum est; et ratio hujus est quia determinatum modum dicit originis. Et ideo non potest multiplicari secundum diversam rationem originis in divinis. Sed processio dicit originem in communi. Et ideo potest secundum duos modos originis determinari: scilicet quod sit processio ab uno non procedente, et quod sit processio a procedente et non procedente; et ideo non est simile.

Ad secundum, de communicationis natura, dicendum, quod quamvis in creaturis non possit esse nisi unus modus communicationis unius naturae, potest tamen esse in creatore, in quo idem voluntas est et natura. Et ideo non solum per actum naturae, sed per actum voluntatis natura communicatur.

Ad tertium, operationes distinguuntur penes terminos, dicendum, quod et similiter processionis; quia essentia, non sub ratione essentiae sed sub ratione paternitatis, vel communis spirationis, est principium communicationis naturae. Similiter natura, non secundum se, est terminus processionis, sed Filius, qui est ipsa natura.

Ad quartum « relationes, etc. » dicendum, quod verum est, in quantum sunt relationes; in quantum tamen sunt proprietates constituentes personas, sic praecedant processionis secundum modum intelligendi.

ARTICULUS III.

Ad tertium sic proceditur. Et 1. videtur quod processio amoris generatio debeat dici. Generatio enim est motus ad substantiam: sed processio est actus ad producendum substantiam, scilicet hypostasim Spiritus sancti; ergo et generatio.

2. Praeterea, Damascenus dicit, quod generare est de sua substantia sibi similem in sua natura producere. Sed per processionem Spiritus sancti producitur ex substantia Patris similis ei in natura; ergo processio debet dici generatio.

5. Praeterea, sicut Filius habet specialem modum procedendi, ita et Spiritus sanctus: specialis autem modus originis Filii designatur nomine generationis, non autem nomine processionis; ergo etiam aliquo nomine speciali designatur proprius modus originis Spiritus sancti; ergo origo Spiritus sancti non debet dici processio.

Contra. Quicquid procedit per modum generationis procedit ut genitus: sed Spiritus sanctus non procedit ut genitus; ergo non procedit per modum generationis.

Respondeo. Dicendum quod Spiritus sanctus procedit ut amor. Processio autem amoris, in quantum huiusmodi, non est in conformitate naturae: sic enim ubicumque esset amoris processio, inveniretur naturae conformitas: quod patet in nobis esse falsum. Quod autem Spiritus sancti processio sit in conformitate naturae, hoc est in quantum procedit ut amor divinus; quia in Deo non potest esse aliquid diversum a sua natura. Sic ergo processio Spiritus sancti, ex ratione modi procedendi, non dicit conformitatem naturae, quam importat generatio Filii ex ratione generationis. Et ideo Spiritus sancti processio dici non debet generatio; sicut nec Spiritus sanctus debet dici Filius, quamvis sit ab alio.

Ad primum dicendum, quod processio Spiritus sancti non habet quod sit ad substantiam, in quantum est processio amoris, sed solum in quantum est processio amoris divini. Et similiter dicendum ad secundum.

Ad tertium dicendum, quod quamvis hoc nomen processio sit commune ad generationem Filii et ad processionem Spiritus sancti, tamen Spiritus sancti processio nomen commune sibi appropriat, eo quod differentia quam addit Spiritui sancto processio supra communem processionem, non potest nostro nomine designari, cum nihil in creatoris inveniatur procedere ut amor quod sit persona subsistens habens complete naturam sui principii: nomina enim imponimus secundum quod in rebus creatis invenimus, quae nostrae cognitioni primo occurrunt.

ARTICULUS IV.

Ad quartum sic proceditur. 1. Videtur quod Spiritus sanctus dicatur ingenuus. Dicit enim Damascenus quod ingenuus uno modo idem est quod increatus. Sed tres personae sunt increatae; ergo ingenuitae.

2. Praeterea, Hieronymus dicit in litera: « Spiritus sanctus Pater non est: sed ingenuus atque non factus. »

5. Praeterea, ingenuum relationem non dicit, quia sic essentia non diceretur ingenua; ergo vide-

S. Th. Opera omnia. V. 22.

tur quod sit de absolutis: sed absoluta conveniunt tribus personis; ergo ingenuum convenit Spiritui sancto.

Contra est quod in litera dicitur, quod solus Pater dicitur ingenuus.

Respondeo. Ingenuum potest dupliciter accipi: vel privative, et sic non cadit in divinis, quia privatio defectum importat, cum sit ejus quod natum est haberi, et non habetur. Vel negative; et hoc dupliciter: vel in genere aliquo determinato; vel simpliciter sive extra genus. Primo modo relinquit aliquid, scilicet esse ab alio per generationem solum; et sic convenit Spiritui sancto. Secundo modo nihil relinquit: unde tollit esse ab alio simpliciter. Sed hoc est dupliciter: vel quia est negatio pura: et sic convenit divinae essentiae, quae non est ab alio, nec aliquid ab ipsa: vel negatio fundata super contrario, scilicet super hoc quod est omnia esse ab illo, et sic convenit Patri.

Ad primum, de Damasceno, dicendum, quod aequivoce accipitur ibi ingenuus, sicut aequivoce dicitur generatio de creatione et productione de substantia.

Ad secundum, de Hieronymo, dicendum, quod ingenuum accipit negative negatione in genere existentis ab alio.

Ad tertium « ingenuus non dicit relationem » dicendum, quod secundum quod convenit Patri, sic dicit aliquam relationem, quia notionem Patris, et sic non convenit essentiae: secundum autem quod convenit essentiae et Spiritui sancto, non dicit aliquam notionem, nec est aliquid de absolutis, quia sic conveniret etiam Filio; sed removet notionem quamdam scilicet generationem passivam.

DISTINCTIO XIV.

Praeterea diligenter etc. (*V. edit. nostrae tom. VI, pag. 108.*)

QUAESTIO UNICA.

Hic quaeruntur quinque: 1.^o utrum sit aliqua temporalis processio Spiritus sancti; 2.^o utrum temporalis processio ponat in numerum cum aeterna; 3.^o utrum in processione Spiritus sancti temporali, detur ipse Spiritus sanctus vel tantum ejus dona; 4.^o in quibus donis detur; 5.^o utrum Spiritus sanctus detur a viris sanctis.

ARTICULUS I.

Ad primum sic proceditur. Et 1. videtur quod non sit aliqua processio Spiritus sancti temporalis. Non enim est ponere temporalem generationem Filii, nisi ratione naturae assumptae in identitate personae; sed Spiritus sanctus nullam naturam assumpsit in identitate personae; ergo non debet aliqua ejus processio temporalis dici.

2. Praeterea, processio Spiritus sancti et ejusdem spiratio sunt idem: sed non est spiratio temporalis; ergo nec processio.

5. Praeterea, Spiritus sancti processio, sive active, sive passive intellecta, est operatio Dei: sed secundum Philosophum, substantia Dei et omnis operatio ejus est in momento aeternitatis; non ergo in tempore.

Contra. Spiritus sanctus non habetur nisi ut procedens a Patre et Filio: sed contingit ipsum ha-

beri ex tempore; ergo et ipsum procedere ex tempore.

Praeterea, donum procedit a dante in recipientem: sed Spiritus sanctus datur ex tempore et recipitur; ergo et procedit ex tempore.

Respondeo. Quia Spiritus sanctus procedit per modum amoris, ideo procedit per modum tendentis in aliud. Ergo Spiritus sancti processio duplicem habet comparisonem: et ad id a quo procedit, et ad id in quod procedit. Quantum ad primam comparisonem processio Spiritus sancti semper est aeterna; quia aeternaliter procedit a Patre et Filio. Quantum ad secundam vero distinguendum est. Nam dupliciter dicitur Spiritus sanctus in aliquid procedere. Uno modo in objectum amoris, qui est ipse Spiritus sanctus; et sic ab aeterno procedit a Patre in Filium, in quo etiam omnes sancti amantur, in quantum sunt membra ejus. Alio modo quantum ad effectum amoris per quem Spiritus sanctus in aliquibus esse dicitur: et sic dicitur procedere in sanctos. Unde cum effectus sit temporalis, et processio ex hac parte erit temporalis, absque ulla Spiritus sancti mutatione.

Ad primum, de generatione Filii, dicendum, quod non est simile quia generatio Filii dicit respectum ad illum a quo est: sed processio Spiritus sancti non tantum dicit respectum ad illud a quo est, sed ad illud ad quod est, quod potest esse temporale. Et ideo non est simile.

Ad secundum, de spiratione, dicendum, quod quamvis spiratio et processio sint idem in re, tamen spiratio dicit respectum ad id a quo est tantum; processio vero ad illud a quo est, et ad illud ad quod est. Et ideo potest procedere temporaliter Spiritus sanctus, quamvis non spirari temporaliter.

Ad tertium, de operatione divina, dicendum quod nec propter activam processionem, nec propter passivam dicitur processio temporalis: sed propter effectum temporalem.

ARTICULUS II.

Ad secundum sic proceditur. Et 1. videtur quod processio temporalis ponat in numerum cum aeterna. Temporale enim et aeternum non possunt idem esse in essentia; ergo nec processio temporalis et aeterna; ergo distinguuntur, et una ponit in numerum cum alia.

2. Praeterea, quaecumque habent ordinem et distinctionem, non sunt unum numero: sed processio aeterna et temporalis habent ordinem, quia aeterna prior est; ergo, et distinctionem: et sic idem quod prius.

3. Praeterea, idem non est signum solipsius: sed processio temporalis est signum aeternae; ergo temporalis et aeterna non sunt idem; et ita ponunt in numerum.

Contra. Processio temporalis addit respectum temporalem ad processionem aeternam: sed respectus hujusmodi, cum non sit realis ex parte procedentis, nihil variat in re; ergo eadem est processio aeterna et temporalis.

Praeterea, sicut differt a parte solis, lucere et illuminare, sic a parte Spiritus sancti procedere aeternaliter, et procedere ad sanctificationem creaturae; sed lucere et illuminare non differunt in sole reater; ergo procedere aeternaliter et temporaliter non differunt realiter in Spiritu sancto.

Respondeo. Processio temporalis et aeterna Spiritus sancti comparatae ad id a quo sunt, essentialiter idem sunt; sed per comparisonem ad id ad quod sunt, cum processio temporalis addat supra processionem aeternam quemdam respectum temporalem, qui non est essentialiter sive realiter in Spiritu sancto, sed in creatura temporali: ideo differt a processione aeterna quantum ad illum respectum: sed non realiter ex parte Spiritus sancti: et sic ponit in numero eum aeterna.

Ad primum « temporale differt etc. » dicendum, quod aeterna processio non est idem cum temporali, quantum ad id quod temporale est.

Ad secundum, de ordine, dicendum, quod non habent ordinem nisi ratione effectus connotati, sive novi respectus, et sic differunt.

Ad tertium, de signo, dicendum, quod temporalis dicit signum aeternae ratione effectus connotati: effectus enim ejus est amor gratuitus, qui est similitudo quaedam amoris increati, qui est Spiritus sanctus, et per consequens signum ejus etc.

ARTICULUS III.

Ad tertium sic proceditur. Et 1. videtur, quod Spiritus sanctus non detur secundum sui substantiam. Secundum Philosophum enim Deus eodem modo habet se ad omnia, licet non omnia eodem modo habeant se ad ipsum: sed si secundum substantiam daretur alicui modo cui non prius datus erat, alio modo se haberet ad illum quam prius; ergo secundum substantiam alicui non datur.

2. Praeterea, cum aliquis justificatur per gratiam, nihil est in eo quod prius non fuerit, nisi sola gratia; ergo non datur ei Spiritus sanctus secundum substantiam, imo solum quo ad ejus dona.

3. Praeterea, quod secundum se est ubique, secundum se nunquam potest procedere: sed Spiritus sanctus secundum se in omni creatura est; ergo secundum se in nullam creaturam potest procedere.

Contra. Rom. 5 dicitur: « Charitas Dei diffusa est in cordibus nostris per Spiritum sanctum, qui datus est nobis; » ergo et utrumque.

Praeterea, Spiritus sanctus personaliter est donum: sed donum dicitur ex eo quod datur, ut dicit Augustinus; ergo personaliter datur.

Juxta hoc quaeritur quid detur per prius; Spiritus sanctus, an donum ejus.

Respondeo. Dicendum, quod ad hoc aliquid datur ut habeatur. Habetur autem aliquid per aliquem modum unionis, sicut habetur vestimentum, vel albedo. Homo autem quando justificatur, non solum unitur dono Dei, quod formaliter in anima recipitur: sed ipsi Deo per cognitionem et amorem actualiter vel habitualiter: quia « Qui adhaeret Deo unus Spiritus est » 1 Corin. 6. Ille ergo qui justificatur, non solum habet donum Spiritus sancti sed ipsum Spiritum sanctum: et sic non solum donum Spiritus sancti datur, sed ipse Spiritus sanctus.

Ad primum dicendum, quod in hoc quod Spiritus sanctus datur vel habetur, in Spiritu sancto non est aliqua relatio secundum rem ad creaturam, sed secundum rationem tantum; in creatura autem secundum rem. Et ideo ratio non sequitur.

Ad secundum dicendum, quod licet Spiritus sanctus facit in justificato ante justificationem ali-

quo modo, non tamen fuit in eo ut ab ipso habitus; sicut non dicimus quod lapis habeat Spiritum sanctum, quamvis sit in eo per essentiam, praesentiam et potentiam. Et ideo quando incipit esse in homine ut ab eo habitus, tunc dicitur sibi dari.

Ad tertium dicendum, quod Spiritus sanctus est ubique: sed non ut habitus ab unoquoque.

Ad id quod ultimo quaeritur, quid per prius datur: dicendum, quod simul tempore dantur donum creatum et increatum, non tamen natura: possunt enim haec duo dona considerari, vel ex parte recipientis: et sic, cum donum creatum sit dispositio ad recipiendum donum increatum, per prius datur donum creatum quam increatum. Si autem consideretur ex parte dantis, cum donum increatum, quod est amor qui dicitur Spiritus sanctus, sit ratio quare dans det alicui donum creatum, per prius datur donum increatum quam creatum.

ARTICULUS IV.

Ad quartum sic proceditur. Et 1. videtur, quod in omni dono datur Spiritus sanctus. Dona enim posteriora non dantur sine dono priori, quod est ratio dandi alia dona: sed Spiritus sanctus est donum primum, et ratio dandi non tantum dona gratum facientia, sed gratis data; ergo non dantur sine ipso, et ita datur cum illis.

2. Praeterea, dari temporaliter Spiritum sanctum, nihil aliud est nisi cum novo modo esse in creatura, secundum quem prius non fuerat. Sed per quodlibet donum gratiae, sive gratis datae, sive gratum facientis, novo modo est in creatura; ergo per quodlibet donum, Spiritus sanctus temporaliter datur creaturae.

3. Praeterea, in omni creatura est Spiritus sanctus: sed quodlibet donum ejus est quaedam creatura; ergo in quolibet dono datur Spiritus sanctus.

Contra. Sap. 1: « Spiritus sanctus disciplinae effugiet fictum: » quicumque autem caret gratia gratum faciente, pro ficto habetur; ergo talem fugit; ergo ei non datur.

Praeterea, cui datur Spiritus sanctus, ejus fit; sed non fit nisi bonorum; ergo non datur nisi bonis.

Respondeo. Dicendum, quod Spiritus sanctus dicitur dari alicui, vel procedere in aliquem, secundum quod novo modo incipit esse in eo. Modi autem quibus Deus est in creatura, distinguuntur secundum diversos modos quibus creatura creatori unitur. Quod quidem contingit tripliciter. Uno modo sicut effectus causae efficienti, cujus similitudinem gerit: et sic est modus communis, prout est in omnibus per essentiam, praesentiam et potentiam. Alio modo sicut objectum (1) operationis, in quantum creatura cognoscit et amat creatorem; et sic dicitur esse in sanctis. Tertio modo, quantum ad esse in una persona; et sic dicitur divinitas esse in Christo. Illa ergo dona solum quae faciunt cognoscere et diligere Deum, quae sunt dona gratiae gratum facientis, faciunt Deum novo modo esse in nobis. Et ideo secundum illa tantum dicuntur Filias et Spiritus sanctus in nos procedere, vel mitti ad nos, vel dari nobis; nam secundum omnia alia dona, non alio modo est in nobis quam per essentiam, praesentiam et potentiam.

(1) *Al.* objectio.

Ad primum ergo dicendum, quod dona posteriora dantur per virtutem prioris; possunt tamen dari sine hoc quod primum donum datur. Et sic omnia dona dantur per virtutem Spiritus sancti, non tamen oportet quod in omnibus Spiritus sanctus datur.

Ad secundum dicendum, quod objectio procedit ex falso: non enim per quodlibet donum Spiritus sanctus novo modo est in homine, ut dictum est.

Ad tertium dicendum, quod ratio illa probat, quod Spiritus sanctus sit ubicumque est donum ejus per essentiam, praesentiam et potentiam: quod quidem verum est; sed hoc non sufficit ad hoc quod Spiritus sanctus dicatur homini dari: sic enim daretur etiam lapidi quando fit albus, quia simili modo est in albedine.

ARTICULUS V.

Ad quintum sic proceditur. Et 1. videtur, quod Spiritus sanctus datur a viris sanctis. Quia remissio peccatorum non fit nisi per Spiritum sanctum; sed viri sancti remittunt peccata. Joan. 20: « Quorum remiseritis peccata, etc. »; ergo possunt dare Spiritum sanctum.

2. Praeterea, efficacius est lumen spirituale quam corporale. Sed corpus illuminatum corporali lumine potest aliud illuminare; ergo multo magis homo illuminatus lumine spirituali, potest alium lumine spirituali illuminare; ergo etc.

3. Praeterea, quod est alicui datum suum est: quod suum est, alteri dare potest; ergo sanctus vir Spiritum sanctum sibi datum potest alteri dare.

Contra. Dans superior est quam datum; sed Spiritus sanctus est superior omni creatura; ergo non potest dari a creatura.

Praeterea, donum procedit a dante. Sed Spiritus sanctus non procedit nisi a Patre et Filio; ergo non datur nisi a Patre et Filio.

Respondeo. Dare Spiritum sanctum temporaliter, est dare illud, in quo datur Spiritus sanctus; sed quia Spiritus sanctus non datur nisi in dono gratiae gratum facientis, ideo non potest dari nisi in dono gratiae gratum faciente. Hanc autem gratiam solum Deus dat efficaciter, et per auctoritatem, quamvis ad hujusmodi gratiae dationem homo potest aliquid operari ministrando ministerialiter sacramenta, vel impetrando alii gratiam. Et ideo Spiritus sanctus a solo Deo datur.

Ad primum « viri sancti remittunt peccata » dicendum, quod verum est ministerio, vel vitae merito; solus tamen Deus auctoritate.

Ad secundum, de lumine corporali, dicendum, quod non est simile; quia lumen spirituale est nobilius et potentius quam lumen corporale: ideo ex sua dignitate habet, quod a nullo creato potest produci; praesertim eum ex nihilo producat.

Ad tertium, quod suum est, quilibet dare potest, dicendum, quod suum aliquando dicitur multipliciter; vel ut alicujus possessio, et sic verum est; vel ut ejus perfectio et sic non. Secundo igitur modo, non primo, dicitur Spiritus sanctus alicujus.

DISTINCTIO XV.

Hic considerandum etc. (V. edit nostrae tom. VI. pag. 115.)

QUAESTIO UNICA.

Hic quaeruntur sex: 1.^o utrum missio sit in divinis; 2.^o quid significet missio; 3.^o cui conveniat mitti; 4.^o utrum alicui personae conveniat ut mittat seipsam; 5.^o utrum Spiritus sanctus mittat Filium; 6.^o utrum secundum eadem dona mittantur Filius et Spiritus sanctus.

ARTICULUS I.

Ad primum sic proceditur. 1. Videtur, quod missio non sit in divinis. Quia quod mittitur separatur a mittente: unde super illud Ezech. 16: « Convertens restitui eos, etc. » dicit Hieronymus: « Quod conjunctum est, et in uno corpore copulatum, mitti non potest. » Sed divinae personae conjunctae sunt, et non solum in uno corpore, sed in una essentia copulae; ergo mitti non possunt.

2. Praeterea, quod mittitur, necesse est quod non sit ubique, quia mittitur ubi non erat; sed divinae personae sunt ubique; ergo non mittuntur.

3. Praeterea, secundum Dionysium, Angelis superioribus, ratione suae dignitatis, non convenit ad nos mitti, sed solum Deo assistere; ergo multo minus convenit personis divinis.

Contra. Galat. 4 dicitur: « Ubi venit plenitudo temporis, misit Deus Filium suum; » ergo persona Filii mittitur.

Praeterea, quod datur absenti dicitur mitti; sed peccator est absens a Deo; ergo Spiritus sanctus, qui infunditur, sive datur peccatori, congrue dicitur mitti.

Respondeo. Missio in divinis accipitur non proprie, sed similitudinarie. A creaturis vero ad divina fit translatio similitudinum, quo ad ea quae sunt perfectionis, non quae imperfectionis. In missione quidem proprie dicta creaturae, quatuor reperiuntur. Unum ex parte mittentis, scilicet auctoritas. Alterum ex parte missi, scilicet separatio, sive diversitas ejus a mittente. Tertium ex parte termini a quo, scilicet loci mutatio. Quartum ex parte termini ad quem, scilicet effectus aliquis. Primum et ultimum perfectionis sunt; ideo conveniunt divinae missioni. Secundum et tertium imperfectionis. Et ideo non conveniunt personis divinis. Sed quia auctoritas in mittente respectu missi non est in divinis personis, nisi quatenus una persona est ab alia: ideo missio in divinis significat exitum missi a mittente.

Ad primum, de Hieronymo, dicendum, quod illa auctoritas intelligenda est in inferioribus, ubi propter imperfectionem oportet quod missum sit separatum, et aliud a mittente; sed non in divinis, ubi nihil imperfectionis est.

Ad secundum « ubique est persona divina » dicendum, quod verum est: non tamen omni modo est ubique. Ideo propter novum modum existendi in creatura, quo modo prius in ea non erat, dicitur mitti.

Ad tertium dicendum, quod non est simile; quia Angeli superiores non operantur circa nos, nisi mediantibus angelis inferioribus; sed personae divinae operantur immediate circa nos. Vel dicen-

dam, quod missio Angelorum superiorum ad nos, esset imperfectionis in eis, quia locum mutarent; sed divinae personae, cum ad nos mittuntur, locum non mutant; ideo missio non dicit imperfectionem in eis.

ARTICULUS II.

Ad secundum sic proceditur. Et 1. videtur quod missio significet notionem. Dicit enim Beda, quod missio Spiritus sancti est ejus processio: sed processio est notionalis; ergo et missio.

2. Praeterea, quicquid importat originem in divinis, est notionalis: missio importat originem ab altero; ergo etc.

Contra. Nulla notio communis est Filio et Spiritui sancto: missio vero communis est utrique; ergo non significat aliquam notionem.

Praeterea, secundum Dionysium omne nomen connotans effectum in creatura, essenziale est: sed missio est hujusmodi; ergo etc.

Respondeo. Missio in divinis duo importat, sicut jam dictum est: scilicet exitum missi a mittente, et sic significat quod notionalis est; connotat etiam novum effectum in creatura, et sic significat quod essenziale est: quia omnis causalitas creaturae, est secundum attributa essentialia. Dicendum est ergo, quod missio non tantum essenziale, vel notionalis, sed utrumque significat. Quidam tamen dicunt, quod principaliter significat quod notionalis est: alii autem dicunt quod principaliter significat quod essenziale est. Et hoc videtur verius: quia missio non ponit de se exitum missi a mittente secundum esse, sicut patet de servo misso a domino; sed importat solum quantum ad aliquem effectum auctoritatem mittentis respectu missi. Sed quia in divinis non potest esse auctoritas in mittente, nisi quatenus missus procedit ab eo; ideo ex consequenti significat quod notionalis est. Et per hoc patet solutio ad omnia argumenta, praeterquam ad tertium.

Ad quod dicendum, quod notio potest dupliciter significari in divinis, aut proprie sicut paternitas vel innascibilitas: aut communiter, sicut esse ab alio, vel a quo est alius. Et hoc modo significatur notio in missione, non primo modo: ideo communis est duabus personis ab alio existentibus.

ARTICULUS III.

Ad tertium sic proceditur. Et 1. videtur, quod missio conveniat toti Trinitati. Sicut enim dicit Damascenus, « in divinis omnia unum sunt, praeter « ingenerationem, generationem, et processionem: » sed missio nullum horum est; ergo videtur quod toti Trinitati conveniat.

2. Praeterea, Persona dicitur mitti, quia esse incipit in creatura novo modo: sed hoc convenit cuilibet personae; ergo et missio.

3. Praeterea, missio est manifestatio personae in effectu sibi appropriato: sed hoc convenit cuilibet personae; ergo et missio.

Contra. Augustinus in libro Contra perfidiam Arianorum ait: « Solus Pater legitur non missus: « quia solus non habet auctorem, de quo sit generatus, vel a quo procedat. »

Praeterea, omne mobile reduci oportet ad aliquod primum movens immobile; ergo omne mittens ad aliquod primum mittens non missibile.

Respondeo. Missio duo importat: scilicet emanationem ab alio ratione auctoritatis, quam importat, et manifestationem per effectum sibi appropriatum, qua cognoscitur esse ab alio. Pater autem sive Trinitas, quamvis possit manifestari in effectum aliquo sibi appropriato, non tamen potest cognosci vere esse ab aliquo alio: ideo neutri convenit missio, seu adventus, sive datio, sive inhabitatio; sed missio convenit tantum Filio et Spiritui sancto.

Ad primum « omnia unum sunt » dicendum, quod in missione generaliter dicta intelligitur communiter generatio et processio; distinguitur vero cum additur, cuius personae sit missio.

Ad secundum « persona dicitur mitti etc. » dicendum, quod non tantum propter modum essendi in creatura dicitur persona mitti: sed propter modum talem, quo cognoscitur esse ab alio.

Ad tertium « missio est manifestatio personae » dicendum, quod non solum est manifestatio personae secundum se: sed secundum quod ipsa est ab alio: quod Patri et Trinitati non convenit.

ARTICULUS IV.

Ad quartum sic proceditur. Et 1. videtur, quod nulli personae conveniat mittere seipsam: mittens enim respectu missi semper habet auctoritatem: sed eadem persona non habet auctoritatem respectu sui; ergo non mittit se.

2. Praeterea, ubi est missio, ibi est distinctio mittentis a misso: sed eadem persona non distinguitur a se; ergo nec mittit se.

3. Praeterea, haec propositio, a, eum dicitur quis mitti ab aliquo, importat habitudinem principii: sed nullus habet habitudinem huiusmodi ad seipsum; ergo nec mittitur a seipso.

Contra. Sicut generari est Filium esse a Patre, ita Filium mitti est Filium cognosci esse a Patre, ut dicit Augustinus 4 de Trinitate: sed ista cognitio potest causari a Filio; ergo missio Filii potest esse a Filio.

Praeterea, missio temporalis est; sed omne temporale est a tota Trinitate; ergo et missio.

Respondeo. Circa hoc sunt tres opiniones. Quidam enim dicunt, cum missio includat in se notionem, et nulla persona procedat a seipsa, nulla persona mittit seipsam, et glossant auctoritatem Augustini dicentis, quod Spiritus sanctus mittit se, secundum hunc modum: quia a Spiritu sancto est effectus, ratione cuius dicitur persona mitti. Alii autem dicunt quod missio aliquando proprie sumitur: et sic cum dicat exitum missi a mittente, et cum nulla persona exeat a seipsa, nulla persona mittit seipsam. Aliquando autem missio sumitur large pro datione: et sic cum persona possit dare seipsam: quia in datione non significatur distinctio dati a dante, sed ab eo cui datur, sic persona potest mittere seipsam. Sed quia haec duae opiniones non salvant verba Augustini, ideo moderni dicunt quod persona potest mittere seipsam. Et ratio eorum est: quia cum aliquid dicitur facere conjunctum, sufficit quod pro altera sui parte verificetur: sicut cum dicitur quod pietor facit parietem album: quia sufficit quod faciat parietem album esse: quamvis non faciat eum esse parietem. Missio autem duo importat: scilicet exitum missi a mittente, et novum modum existendi in eo ad quem fit missio; et ratione huius novitatis, nominat aliquam factionem

in misso, quamvis non secundum rem, sed secundum rationem. Et ideo ad hoc quod una persona dicatur mittere alteram, sufficit quod alterum eorum quae requiruntur in missione, faciat; scilicet novum modum existendi in creatura. Unde, cum novus modus existendi in creatura sit a persona misa, quamvis ipsa non exeat a seipsa, missio potest praedicari de ea, ut dicatur quod mittat seipsam.

Ad primum « mittens habet auctoritatem » dicendum, quod non semper oportet quod habeat auctoritatem respectu missi; sed sufficit quod respectu effectus in quo fit missio.

Ad secundum « ubi est missio ibi est distinctio » mittentis a misso, » dicendum, quod falsum est, ut est ostensum. Vel dicendum, quod triplex est distinctio: scilicet secundum essentiam, secundum personam, et secundum rationem, seu modum intelligendi: hoc ultimo modo potest idem distingui a se, et sic mitti.

Ad tertium « haec propositio, a, importat habitudinem principii » dicendum, quod non semper importat respectu totius conjuncti habitudinem: sed aliquando respectu partis; sicut cum dicitur, scutum factum est album a pictore.

ARTICULUS V.

Ad quintum sic proceditur. Et 1. videtur, quod non secundum eadem dona mittatur Filius et Spiritus sanctus. Missio enim idem est quod processio Filii et Spiritus sancti; ergo et alia missio; ergo secundum alia dona mittitur hic et iste.

2. Praeterea, Filius dicitur mitti in effectum sibi appropriato, ut illuminatione intellectus; Spiritus autem sanctus inflammatione affectus: sed alius est effectus hic et ille; ergo, etc.

Contra. Filius praecipue mittitur cum sapientia datur: sed sapientia est primum donum Spiritus sancti; ergo in eodem dono, scilicet sapientia, datur Filius et Spiritus sanctus.

Praeterea, Joan. 16, dicitur de Spiritu sancto, « Docebit vos omnem veritatem: » et ita docere veritatem appropriatur Spiritui sancto et similiter appropriatur Filio; ergo secundum idem donum datur Filius et Spiritus sanctus.

Respondeo. Dicendum, quod de missione Filii et Spiritus sancti dupliciter loqui possumus. Uno modo quantum ad concomitantiam: et sic semper haec duae missiones simul sunt: quia nec Spiritus sanctus nec Filius mittitur nisi in donis gratiae gratum facientis, quae omnia connexionem adinvicem habent. Alio modo quantum ad missionum distinctionem: et hoc attenditur secundum appropriationem donorum ad divinas personas. Quidam enim habent similitudinem cum proprio Filii, in quantum procedit ut Verbum; sicut illa quae pertinent ad cognitionem, ut donum sapientiae et scientiae; et in huiusmodi donis dicitur mitti Filius. Quaedam vero dona habent similitudinem cum proprio Spiritus sancti, qui procedit ut amor; sicut illa quae pertinent ad affectum, ut charitas: et in huiusmodi donis dicitur proprie mitti Spiritus sanctus; quamvis omnia dona, ex hoc ipso quod dona sunt, ad Spiritum sanctum pertineant, qui est primum donum. Et per hoc patet solutio ad objecta.

DISTINCTIO XVI.

Nunc de Spiritu sancto etc. (V. edit. nostrae tom. VI, pag. 127.)

QUAESTIO UNICA.

Hic quaeruntur quatuor: 1.^o De missione visibili secundum se; 2.^o ad quos fieri debeat; 3.^o in quibus speciebus; 4.^o per quos missio visibilis administrata sit.

ARTICULUS I.

Ad primum sic proceditur. Et 1. videtur, quod missio visibilis divinae personae non conveniat. Ex hoc enim dicitur persona mitti visibiliter, quod in creatura in qua persona mittitur, est ut in signo: sed omnes creaturae signum sunt creatoris; ergo in omnibus creaturis persona divina mittitur. Sed hoc est falsum; ergo falsum est quod in aliquibus mittatur.

2. Praeterea, in omni sacramento est Spiritus sanctus sicut in signo visibili; si ergo propter hoc deatur visibiliter mitti, quia in re visibili est sicut in signo, tunc visibiliter mittetur in omnibus sacramentis.

3. Praeterea, Augustinus dicit in litera, quod ex hoc Spiritus sanctus visibiliter mitti dicitur, quia facta est quaedam species creaturae ex tempore, in qua visibiliter ostenderetur: sed in apparitionibus veteris testamenti in visibilibus creaturis ostendebantur tres personae divinae; si ergo ratione creaturae visibiliter mitti dicitur, videtur quod missio visibilis Patri conveniat.

4. Praeterea, per missionem invisibiliter efficitur aliquis dignus Dei amore: sed, « Nemo scit utrum amore vel odio dignus sit. » Eccl. 9; ergo per missionem visibilem non fit manifestatio invisibilis missionis; ergo visibilis missio frustra est.

5. Praeterea, nihil manifestatur per id quod non sufficienter ducit in illud: sed nulla creatura visibilis sufficienter ducit in cognitionem gratiae; ergo in nulla creatura visibili debet fieri missio ad manifestandam gratiam.

Respondeo. Sicut processio temporalis praesupponit aeternam, et addit aliquem effectum in creatura; sic missio visibilis praesupponit invisibilem, et addit aliquid supra illam. Et hoc patet; quia in missione invisibili exiguntur duo: scilicet quod persona sit missa ab alio, et iterum effectus inhabitantis gratiae. Ista duo simul exiguntur in missione visibili, et additur similiter hoc tertium, scilicet quod totum repraesentetur per visibile signum: unde columba visibilis repraesentabat Spiritum sanctum inhabitare per gratiam illum, ad quem dirigebatur.

Ad primum « aliae creaturae sunt signum Dei » dicendum, quod illae creaturae in quibus fiebat missio erant signum Dei, ut inhabitantis per gratiam illum, ad quem mittebatur; et hoc non significat quaelibet creatura.

Ad secundum, de sacramentis, dicendum, quod aliter sunt signa gratiae sacramenta, et illae creaturae in quibus fiebat missio. Nam sacramenta veteris legis fuerunt signa gratiae futurae; sacramenta vero novae legis, etsi sint signa gratiae praesentis, non tamen ut habitae, sed ut habendae; quia non solum sunt signa, sed causa gratiae; sed creaturae

in quibus fiebat missio, sunt signa gratiae ut habitae.

Ad tertium, de apparitione, dicendum, quod missio visibilis est missio apparens; et ideo supra apparitionem addit rationem missionis, quae importat originem unius personae ab alia, et inhabitationem per gratiam, apparitio solum cognitionem. Unde apparitio potest convenire Patri, non autem visibilis missio.

Ad quartum « non potest cognosci invisibilis » missio » dicendum, quod homo per se non potest eam cognoscere; sed per revelationem divinam potest: talis autem revelatio fit in missione visibili.

Ad quintum « nulla creatura etc. » dicendum, quod quamvis non sufficienter ducat in cognitionem gratiae, tamen propter suam novitatem aliquantulum ducit; quia excitat videntes in admirationem et inquisitionem, et tunc inquirentibus per gratiam invisibilem, id est suggestionem Spiritus sancti, et per doctrinae praedicationis exterius, potest missio invisibilis designata edoceri.

ARTICULUS II.

Ad secundum sic proceditur. Et 1. videtur, quod Patribus veteris Testamenti debuerit missio visibilis fieri. Missio enim visibilis signum est invisibilis missionis: sed ad Patres veteris Testamenti facta est missio invisibilis; ergo et invisibilis debuit fieri.

2. Praeterea, Apostolis et aliis de primitiva ecclesia facta est missio visibilis propter plenitudinem gratiae manifestandam: cum ergo modo sit plenitudo gratiae, quia sicut tunc, ita et nunc est tempus plenitudinis gratiae; ergo modernis fidelibus debet fieri missio visibilis.

3. Praeterea, Beata Virgo inter ceteras creaturas puras, plenissimam gratiam habuit; cum ergo missio visibilis sit ad ostendendum plenitudinem gratiae inhabitantis, ei maxime debuit fieri missio visibilis.

Contra. Videtur, quod Christo fieri non debuit; quia visibilis missio est signum invisibilis missionis: sed ad Christum nulla missio invisibilis facta est, cum ab instanti conceptionis suae plenus fuerit gratia et veritate; ergo visibilis missio non debuit ei fieri.

Respondeo. Visibilis missio fit ad designandum redundantiam plenitudinis gratiae in alios. Et ideo ad illos tantum facta est, quorum gratiae plenitudo in alios redundavit. Unde cum plenitudo gratiae Christi et Apostolorum ejus in alios redundaverit: ideo ad eos missio visibilis facta est.

Ad primum, de Patribus veteris Testamenti, dicendum, quod quamvis plenitudinem gratiae haberint, non tamen secundum illum statum in alios redundabat; quia non erat tempus spiritualis propagationis per semen verbi Dei, sed cultus divinus carnali propagatione a patribus in filios procedebat.

Ad secundum, de modernis fidelibus, dicendum, quod non est simile: quia per istos de primitiva Ecclesia erat plantanda: ideo redundantia plenitudinis gratiae erat per signa visibilia aliis manifestanda: sed Ecclesia jam plantata est et in fide Christi confirmata: ideo non sic necessaria est nunc missio visibilis. Vel dicendum, quod in primitiva Ecclesia conversi ad fidem rudes erant et credebant multum signis visibilibus; nunc autem fideles proveci sunt, ideo non sic indigent nunc visibilibus signis.

Ad tertium, de Beata Virgine, dicendum, quod quamvis ei una cum omnibus aliis in die Pentecostes missio visibilis generalis facta fuerit, tamen

specialis fieri non debuit, quia ejus gratia non ordinabatur ad redundandum in alios per sacramentorum administrationem et praedicationem, ut Apostolus dicit 2 ad Tim. 2: « Mulieres in Ecclesia loqui non permitto. »

Ad quartum, de Christo, dicendum, quod non oportet quod visibilis missio significet missionem invisibilem de novo factam; sed sufficit quod de praeterito. Ad Christum autem in sua conceptione invisibilis missio facta est, inquantum homo erat.

ARTICULUS III.

Ad tertium sic proceditur. Et 1. videtur quod missio visibilis non solum fiat in specie corporali. Triplex enim est genus visionis: scilicet corporalis, imaginaria et intellectualis: sed per quamlibet potest fieri divinorum manifestatio; ergo sicut facta est missio invisibilis secundum visionem intellectualem, visibilia autem secundum visionem corporalem, ita etiam aliqua fieri debuit secundum visionem imaginariam, et ita per species imaginarias.

2. Praeterea, spiritum veritatis non deceat aliqua fictio: sed apparere in aliquibus speciebus, quibus non subsit rei veritas, est fictio. Cum ergo columba non fuerit verum animal, nec linguae ignis vere linguae, nec verus ignis, ut quidam dicunt; sequitur quod in his creaturis apparere non debuit Spiritus sanctus, qui est spiritus veritatis.

2. Praeterea, sicut utile erat manifestare invisibilem missionem Spiritus sancti, ita erat utile manifestare invisibilem missionem Filii; ergo sicut in signis visibilibus apparuit Spiritus sanctus ad manifestationem suae invisibilis missionis, ita in signis visibilibus debuit apparere Filius ad manifestandum quod ad aliquem invisibiliter mittatur.

Respondeo. Missio visibilis fit ad manifestationem plenitudinis gratiae in alios redundantis. Hujusmodi autem redundantia duplex est: vel per loquutionem vel per operationem. Et secundum hoc, Christo et aliis duplex facta est apparitio vel missio. In Christo quidem ad significandum redundantiam operationis, facta fuit in baptismo in specie columbae, per quam spiritualis fecunditas intelligitur. Similiter ad significandum redundantiam doctrinae vel instructionis, apparuit nubes lucida et vox Patris in transfiguratione. Matth. 7. Unde addidit: « Ipsum audite. » In Apostolis vero ad significandum redundantiam operationis ad modum ministerii apparuit Spiritus sanctus in flatu. Joan. 20, per quem ostendebatur descensus potestatis illius operationis a capite Christo in eos. Unde ibidem Dominus dixit: « Accipite Spiritum sanctum; quorum remiseritis peccata remittuntur eis. » Sed ad significandum redundantiam doctrinae vel instructionis apparuit in linguis igneis.

Ad primum, de visione imaginaria, dicendum, quod in speciebus imaginariis fieri non debuit missio, sicut in sensibilibus. Et ratio est; quia species quae est in imaginatione, non necessario est rei praesentis, sicut species quae est in sensu: unde per eam non repraesentaretur praesentia gratiae, sicut per speciem sensibilem repraesentatur: missio autem visibilis fit ad repraesentandum missionem invisibilem per gratiam inhabitantem.

Ad secundum, de fictione, dicendum, quod dato quod non fuerit vera columba et verus ignis, tamen ibi non fuit aliqua fictio. Et ratio est: quia ista si-

milisudo columbae et linguae igneae non ordinabatur ad manifestandum veritatem in ipsa columba, sive in lingua ignea; sed ad manifestandam invisibilem missionem, quam perfecte repraesentavit, sicut jam dictum est. Quidam tamen dicunt, quod ista columba fuit verum animal et ille ignis verus ignis. Sed probabilius dicitur contrarium, ut apparet ex ipso textu. Dicitur enim quod descendit in columbae specie, et apparuerunt linguae tanquam ignis.

Ad tertium, de visibili missione Filii, dicendum, quod non est simile: quia post tempus plenitudinis gratiae in quo missio visibilis debuit fieri, Filius habuit semper speciem propriam visibilem, id est humanam naturam sibi unitam: et ideo non decebat quod in aliena specie appareret. Sed Spiritus sanctus non habuit naturam alienius speciei sibi unitam, et ideo poterat in aliena specie apparere.

ARTICULUS IV.

Ad quartum sic proceditur. Et 1. videtur quod istae species visibiles ministerio Angelorum formatae non sint. Augustinus enim in 5 de Trin. dicit quod sermones Dei in novo Testamento, non per Angelos, sed per ipsum Deum facti sunt; ergo similiter apparitiones.

2. Praeterea, si hujusmodi species formatae sunt ministerio Angelorum, Angeli uniebantur eis, sicut motor mobili unitur; ergo potius Angelus quam persona divina in eis apparuit; quod est contra Scripturam.

3. Praeterea, sicut missio visibilis Filii facta est per corpus assumptum, ita missio Spiritus sancti per species visibiles: sed corpus Christi assumptum Angeli non formaverunt; ergo nec species hujusmodi invisibiles.

Contra. Augustinus dicit 4 de Trin.: « Quo modo missio ista sine creatura rationali vel intellectuali fieri potuit, non video; » ergo omnis missio visibilis fit per Angelos.

Praeterea, Dionysius dicit: « Lex divinitatis est, intima per media in suprema reducere; » ergo hominum reductio fit mediantibus Angelis. Cum ergo visibiles missiones fierent ad reductionem hominum; ergo fiebant mediantibus Angelis.

Respondeo. Dicendum est, omnes apparitiones veteris Testamenti factas esse per Angelos. De visibilibus autem missionibus novi Testamenti duplex est opinio. Quidam enim dicunt eas esse factas per Angelos. Alii autem dicunt quod non: concordando autem utrosque, potest dici, quod in visibili missione est species repraesentans exterius, et gratia repraesentata interius. Primum fit ministerio Angelorum; secundum virtute divina tantum; et ideo utraque opinio habet aliquid veritatis.

Ad primum « sermones Dei, etc. » dicendum quod loquitur Augustinus de sermone, quem Filius in corpore assumpto protulit, quem constat immediate a Deo esse prolarum; non de illis sermonibus in quibus fiebant sensibiles apparitiones.

Ad secundum « si Angelus formabat species » dicendum, quod non est inconueniens simul Angelum mitti in specie exteriori et personas divinas in gratia interiori. Vel dicendum, et melius, quod Angelus in persona divina in hujusmodi speciebus apparebat, non vice propriae personae: et ideo non

Angelus, sed persona divina in his creaturis dicitur mitti, etiam ratione exterioris apparitionis.

Ad tertium « sicut corpus assumptum » dicendum, quod non est simile: quia corpus assumptum est unitum Filio in persona: unde propter suam dignitatem non decuit ut ab Angelo, sed a Deo formaretur. Sed species visibiles non uniantur Spiritui sancto in persona: et ideo non oportuit ut immediate formarentur a Deo. Ad dictum Augustini respondendum est, quod dictum ejus est referendum ad illud quod est exterius, non ad interius significatum.

Ad quartum, de Dionysio, dicendum, quod dictum ejus habet veritatem in effectibus qui a creatura fieri possunt: non autem talis effectus est gratia. Et ideo quantum ad interius quod est in missione visibili, Angeli non habent operationem; sed quantum ad id quod exterius est.

DISTINCTIO XVII.

Jam nunc accedamus, etc. (V. edit. nostrae tom. VI, pag. 155.)

QUAESTIO UNICA.

Hic quaeruntur quatuor: 1.^o utrum charitas sit aliquid creatum in anima; 2.^o utrum charitas sit ex charitate diligenda; 3.^o an charitas possit cognosci haberi ab habente ipsam; 4.^o utrum charitas detur secundum capacitatem naturalium.

ARTICULUS I.

Ad primum sic proceditur. Et 1. videtur quod charitas non sit aliquid creatum in anima. Perfectius enim est agens sine medio quam per medium. Deus autem agit in nobis actus meritorios qui sunt actus charitatis; ergo cum sit agens perfectissimum, agit eos non per aliquid creatum medium; ergo charitas est ipse Deus.

2. Praeterea, sicut anima se habet ad corpus, ut vita ipsius, ita Deus ad animam, ut dicit Augustinus. Sed anima non vivificat corpus per aliquam formam mediam; ergo nec Spiritus sanctus animam per habitum medium.

3. Praeterea, propinquiora et similia sunt Deo opera gratiae quam opera naturae. Sed operationem naturae operatur sine medio, scilicet creando; ergo et opera gratiae, scilicet recreando.

4. Praeterea, omne quod non est bonum per essentiam, potest actu vel intellectu carere bonitate: sed charitas non potest carere bonitate actu vel intellectu; ergo est bona per essentiam, et sic est Deus.

Contra. Non fit aliquid simile nisi forma aliqua inhaerente. Per charitatem autem fit nostri ad Deum assimilatio; ergo ipsa est forma inhaerens; non ergo increata.

Praeterea, ex conjunctione charitatis vivit anima; sed non vivit nisi ex eo quod jungitur ei ut forma; non enim corpus motum ab Angelo vivit; ergo jungitur animae ut forma; ergo est forma creata.

Respondeo. Dicendum, quod opinio Magistri fuit quod in nobis non est aliquis habitus charitatis creatus, eliciens actum dilectionis gratuita: attendit enim ipsius actus dignitatem: ratione cujus ponit, quod nulla pura creatura in istum actum

sufficeret, sed ipse Spiritus sanctus hunc actum in cordibus hominum operatur. Sed hoc non videtur convenienter dictum; quia omnis operatio debet esse proportionata suo principio; quia cum res quaelibet sit propter suam operationem, oportet quod secundum convenientiam suae operationis res operans disponatur, sicut secundum convenientiam finis ea quae sunt ad finem. Actus autem gratuita dilectionis est actus liberi arbitrii ut exequentis; quamvis sit Spiritus sancti ut moventis; et ideo oportet, quod sicut in actu dilectionis gratuita est aliquid supra actum dilectionis naturalis, ita in voluntate humana sit aliquid supernaturale, quod est principium actus talis; et hoc dicimus habitum charitatis. Sic ergo in homine est duplex charitas; scilicet charitas creata informans voluntatem, et Spiritus sanctus, qui est charitas increata mentem inhabitans.

Ad primum ergo dicendum, quod medium est duplex: unum quasi media causa agens, et id medium quandoque attestatur impotentiam agentis: sed non semper, quia quandoque exigitur propter congruentiam effectus et non propter impotentiam agentis. Aliud medium est causa formalis quae est principium alicujus esse et operationis; et tale medium nunquam attestatur impotentiam agentis, sed magis virtutem, cum pertineat ad perfectionem effectus quae demonstrat perfectionem agentis.

Ad secundum, de vita corporis et animae, dicendum, quod similitudo est in genere causae, sed non in specie: quia anima est vita corporis formaliter; et ideo non vivificat per formam mediam; Deus est vita animae effective solum.

Ad tertium, de operibus naturae, dicendum, quod Deus sine omni medio efficiente dat esse naturae, non tamen sine medio informante; et tale medium est charitas.

Ad quartum dicendum, quod charitas non dicitur bona, sicut subsistens in bonitate; sed sicut quo aliquid formaliter est bonum, et hoc modo nihil prohibet aliquid creatum dici bonum per essentiam, sicut quaelibet bonitas creata. Vel potest dici quod etiam si charitas nullo modo esset bona per essentiam, tamen non potest non esse bona, ex hoc ipso quod in sui ratione includit conjunctionem ad Deum, qui est bonus per essentiam.

ARTICULUS II.

Ad secundum sic proceditur. Et 1. videtur quod charitas non sit ex charitate diligenda. Quatuor enim sunt diligenda tantum ex charitate, ut in 3 lib. dicitur: scilicet Deus, anima, proximus et corpus; sed charitas nullum horum est; ergo etc.

2. Praeterea, sicut se habet sensus ad sentire, ita affectus ad diligere. Sed sensus proprius non sentit se sentire; ergo nec affectus cognoscit se diligere. Charitas autem est in affectu; ergo charitas, sive charitatis actus, ex charitate non diligitur.

3. Praeterea, omne quod diligitur, aliqua dilectione actuali diligitur; si ergo actus charitatis amatur, oportet quod aliquo alio actu ametur; et iste actus quo diligitur eadem ratione erit alio diligendus; ergo erit abire in infinitum, quod nec natura patitur, nec intellectus capit.

4. Praeterea, fides non est de numero credendorum, nec spes de numero sperandorum; ergo nec charitas de numero diligendorum.

Contra. Augustinus dicit in litera: « Qui proximum diligit, consequens est ut ipsam dilectionem diligit; » sed proximus diligendus est ex charitate; ergo et ipsa charitas.

Praeterea, propter quod unumquodque tale et illud magis; si ergo proximus diligendus est propter charitatem, quia scilicet amicus Dei est vel esse potest, multo magis ipsa charitas diligenda est ex charitate.

Respondeo. Dicendum quod duplex est amor. Unus benevolentiae, quo quis vult bonum amato. Alius concupiscentiae, quo quis vult amatum alicui. Res autem non subsistens non habet aliquod bonum: sed ipsa potest esse bonum alterius: unde non potest benevolentiae amore diligi, sed concupiscentiae tantum. Res vero subsistens, et praecipue rationalis, potest habere aliquod bonum, quod operatur (1) propter benevolentiam et valetudinem vel huiusmodi; et iterum ex tali re potest aliquod alicui bonum provenire; unde huiusmodi res potest amore concupiscentiae diligi. In amore autem benevolentiae, semper includitur amor concupiscentiae: quia benevolentia est respectu ejus cui bonum optatur, concupiscentia autem respectu ejus quod ei optatur. Ex hoc patet, quod charitas, cum non sit res per se subsistens, non potest diligi amore benevolentiae quo ex charitate aliquos diligimus: quia hoc nobis et eis optamus, quod charitatem habeamus.

Ad primum ergo dicendum, quod in dilectione illorum quatuor includitur dilectio charitatis, ut dictum est.

Ad secundum dicendum, quod sensus proprius est potentia alligata organo corporali. Nulla autem talis potentia potest cognoscere suum actum, ut Avicenna probat: hoc enim est solummodo potentiarum immaterialium, ejusmodi est voluntas. Et ideo non est simile.

Ad tertium dicendum, quod cum in amore benevolentiae quo quis se amat, includatur amor concupiscentiae quo charitatem amat, patet quod eodem modo quo se amat et suum actum amat; et sic non est abire in infinitum.

Ad quartum dicendum, quod fides et spes non possunt super se reflecti: quia sunt absentiae: nihil autem est sibi ipsi absens; amor autem potest esse praesentis: et ideo non est simile.

ARTICULUS III.

Ad tertium sic proceditur. Et I. videtur quod charitas certitudinaliter ab habente cognoscatur: ita enim dicitur in litera: « Magis novit quis dilectionem qua diligit, quam fratrem, quem diligit: » sed fratrem suum certitudinaliter cognoscit; ergo multo magis charitatem qua ipsum diligit.

2. Praeterea, dicit Philosophus quod inconveniens est habere nos nobilissimos habitus et quod nos lateant: sed charitas est habitus nobilissimus; ergo videtur, quod ab habente certitudinaliter cognoscatur.

3. Praeterea, quicumque habet fidem scit se habere fidem: sed fides non magis est praesens animae quam charitas; ergo qui habet charitatem, scit se habere illam.

(1) Forte optatur.

4. Praeterea, magis est praesens animae quod est praesens per essentiam, quam quod per similitudinem tantum: sed charitas est praesens animae per essentiam; ergo anima cognoscit magis charitatem, quam ea quorum habet similitudinem in se: sed illa cognoscit; ergo multo magis charitatem.

Contra. Ecclesiast. 7: « Nemo scit utrum odio vel amore dignus sit. »

Praeterea, 1 ad Cor. 4: « Nihil mihi conscius sum, sed non in hoc justificatus sum. » Cum ergo nullum majus signum possit haberi de charitate, quam non habere conscientiam peccati mortalis, et hoc non sufficit; ergo nec per aliquod aliud signum potest cognosci.

Respondeo. Dicendum, quod secundum Philosophum, nono Metaphysicae, unumquodque cognoscitur secundum quod est in actu, et non secundum quod est in potentia. Habitus autem est medium inter potentiam puram et actum: unde nec ipse habitus percipi potest, nisi secundum quod completur per actum: et inde est quod exercendo actus aliquorum habituum percipimus nos illos habitus habere. Hoc autem contingit ex hoc quod percipimus actum pervenire ad id quod est proprius effectus talis habitus; sicut quando aliquis scit per actum suum se contingere ad proprium effectum temperantiae, cognoscit se ipsam habere. Proprium autem effectum charitatis quem addit supra dilectionem naturalem, scire non possumus: quia hic effectus est quaedam ineffabilis unio ad Deum, de qua dicitur Joan. 16: « Ut sint unum, sicut et nos unum sumus: » et ideo nullus secundum certitudinem scire potest se habere charitatem: potest tamen aestimare ex aliquibus conjecturis, vel etiam divinae relationi credere.

Ad primum, de auctoritate Augustini, dicendum, quod intelligitur de cognitione ex parte ipsius cogniti: quia charitas in quantum praesens est, de se cognoscibilis est: et non ex parte cognoscibilitatis. Vel dicendum, quod quamvis possit cognosci dilectio, in quantum dilectio est, non tamen in quantum Deo grata est; et hoc importat charitas.

Ad secundum, de Philosopho, dicendum, quod loquitur de habitibus acquisitis, non infusis. Vel dicendum, quod loquitur de cognitionis habitibus, quorum id quod proprium est in eorum actibus relucet; sicut in actu scientiae est certitudo per causam in qua expresse scientia demonstratur: et multo plus est hoc in intellectu principiorum: non autem de habitibus affectivis; quia quod proprium est eorum, relucet non in eorum actibus; sicut esse causatum a Deo, non relucet in actu charitatis.

Ad tertium, de fide, dicendum, quod non est simile; quia actus fidei per ipsum objectum quod est creditum, distinguitur ab actibus aliorum habituum, scilicet potentiae imperfectae, quae non potest de se in tale objectum. Et ideo habens fidem scit se habere illam; non autem habens charitatem scit se habere eam. Vel dicendum, quod proprius effectus fidei est nobis notus per fidem, scilicet assentire his, quae Ecclesia catholica credit; non autem proprius effectus charitatis: et ideo non est simile.

Ad quartum « charitas est praesens animae » dicendum, quod quamvis sit praesens secundum essentiam, non tamen in ratione objecti: intellectui enim nostro nihil secundum statum viae praesens est ut objectum, nisi per aliquam similitudinem ipsius ab ipso, vel a suo effectu acceptam.

ARTICULUS IV.

Ad quartum sic proceditur. Et 1. videtur quod charitas datur secundum capacitatem naturalium. Matth. 14: « Dedit unicuique secundum propriam virtutem. » Glossa Hieronymi: « non pro largitate vel particularitate alii plus vel minus recipiant, sed secundum virtutem recipientium. » Sed ante adventum charitatis non est in anima virtus, nisi quae est secundum naturalia. Ergo secundum capacitatem naturalium datur charitas.

2. Praeterea, secundum quod materia nobilior est disposita ad formam, dat ei Deus nobiliorem formam. Ergo similiter, ubi sunt nobiliora naturalia, dat Deus nobiliorem gratiam: et ita gratia datur secundum capacitatem naturalium.

3. Praeterea, sicut gloria praesupponit gratiam, ita gratia praesupponit naturam. Sed gloria datur secundum modum gratiae. Ergo gratia datur secundum modum naturae; ut qui meliora naturalia habuerit, major sibi gratia infundatur.

4. Praeterea, angeli consecuti sunt meliora gratuita secundum proportionem naturalium; ergo et homines similiter consequuntur.

Contra. Homines assumuntur ad aequalitatem angelorum per gratiam, habent autem inaequalem naturam. Ergo gratia non datur secundum proportionem naturalium.

Praeterea, possibile est illum, qui meliora naturalia habet, semper carere gratia; et illum, qui inferiora naturalia habet, perseverare in gratia. Ergo gratia non datur secundum capacitatem naturalia.

Respondeo. Dicendum, quod intensio et remissio alicujus formae receptae attenditur secundum ordinem recipientis ad causam influentem. Homo autem ad causam gratiae non ordinatur post statum naturae lapsae secundum ipsam naturam: sed secundum modum liberi arbitrii vel secundum sacramentum; et ideo intensio et remissio gratiae in adultis attenditur secundum intensionem liberi arbitrii in Deum: parvulis vero omnibus datur aequalis gratia propter ejusdem sacramenti susceptionem, quamvis non habeant naturalia aequalia; et simile est de charitate, sicut de gratia.

Ad primum, non est in anima ante adventum charitatis virtus etc., dicendum, quod falsum est: quia non tantum capacitas naturalium ibi est, sed etiam usus hominis per actum liberi arbitrii cum illa capacitate.

Ad secundum, de materia, dicendum, quod simile est, sicut materiae secundum sui dispositionem datur forma, sic capacitati naturae secundum usum suum datur gratia.

Ad tertium, sicut gratia est dispositio ad gloriam, dicendum, quod non est simile; quia gratia est immediata dispositio ad gloriam: sed natura non est immediata dispositio ad gratiam; quia inter naturam et gratiam cadit conatus medius, ut dispositio.

Ad quartum, de angelis, dicendum, quod illis data est gratia secundum conatum: sed conatus in eis fuit proportionatus ipsi naturae, cum non haberent in se motum contrarium sensualitatis impediens, sicut est in nobis; et ideo proportio gratiae consequens est proportionem naturalium. Vel potest dici, quod ex ordinatione divina naturae angelicae gratia debebatur, et ideo illi in quibus natura angelica erat perfectior, plus de gratia reci-

piebant: natura vero hominis per peccatum impedita est a gratiae susceptione: unde non est simile: fuisset autem fortasse simile in statu innocentiae.

Hic quaeritur etc. (V. edit. nostrae tom. VI, pag. 154.)

QUAESTIO UNICA.

Hic quaeruntur quinque: 1.^o utrum charitas secundum essentiam augetur; 2.^o de modo augmenti; 3.^o utrum quolibet actu augetur; 4.^o utrum augetur in infinitum; 5.^o utrum diminuat.

ARTICULUS I.

Ad primum sic proceditur. Et 1. videtur quod charitas non augetur. Non enim augetur secundum quantitatem molis, quia ea caret, nec secundum quantitatem virtutis: ergo non augetur. Probatio minoris. Quantitas virtutis dividitur secundum objecta in quae potest. Sed in omnia objecta charitatis potest parva charitas, sicut et magna. Ergo non augetur secundum quantitatem virtutis.

2. Praeterea, quod movetur est corpus, ut probat Philosophus. Caritas autem non est corpus. Ergo non movetur, sive mutatur. Sed augmentum est species motus, ergo non augetur.

3. Praeterea, quod secundum essentiam augetur, secundum essentiam mutatur: sed quod secundum essentiam mutatur, esse desistit. Ergo si charitas secundum essentiam augetur, esse desistit: et sic non augetur, sed corrumpitur. Ergo si charitas secundum suam essentiam augetur, non augetur, quod est impossibile.

4. Praeterea, cujus causa semper se habet eodem modo, illud neque augetur, neque minuitur, neque variatur. Sed causa immediata charitatis est Deus, qui semper eodem modo se habet: ergo charitas non augetur.

Praeterea, augmentum charitatis non potest reduci proprie nisi ad modum alterationis: sed alteratio, ut probat Philosophus 7^o Physicorum, non est nisi circa formas sensibiles. Ergo non est circa charitatem; ergo ipsa non augetur.

Contra. Augustinus: « Caritas meretur augeri, ut aucta mereatur et perfici. »

Praeterea, secundum essentiam charitatis mensuratur essentia meriti; secundum essentiam meriti, essentia praemii. Cum ergo sit differentia praemiorum, secundum majus et minus, erit differentia meritorum secundum magis et minus; ergo et charitatis; ergo charitas augetur.

Respondeo. Dicendum, quod augmentum et diminutio sunt mutationes circa parvum et magnum: unde secundum quod aliquid se habet ad magnum et parvum, ita se habet ad hoc quod augeri et minui possit. Magnitudo autem et parvitas attribuitur aliquibus dupliciter: aut secundum quod ipsa dicuntur magna vel parva, aut secundum quod magis vel minus insunt. Primo modo augentur vel diminuantur substantiae, quorum est esse magna vel parva secundum quantitatem molis vel virtutis. Secundo autem modo dicuntur augeri vel minui formae, quae possunt inesse secundum majus et minus, sicut albedo et color; et hoc est ea augeri secundum essentiam suam, quia accidentis esse est inesse. Secus autem esset de forma subsistente, sicut anima, quae nec posset minus inesse, nec minor esse. Et sic charitas

cum sit quaedam forma accidentalis, dicitur augeri vel minui, secundum quod magis vel minus inest subjecto; et hoc est ipsam augeri secundum suam essentiam. Sciendum est tamen, quod aliud est formam magis inesse subjecto, et aliud formam firmiter esse in subjecto, vel liberius in subjecto operari: quia ista duo attenduntur secundum dispositiones concomitantes formam; scilicet principium (1), secundum essentiam ipsius formae. Unde dicere charitatem augeri secundum majorem radicationem in subjecto, vel secundum fervorem majorem, non est dicere ipsam augeri per essentiam: sed solummodo eam magis inesse, est eam augeri per essentiam.

Ad primum « minima charitas » dicendum, quod jam patet solutio: quia non augetur charitas, quantum ad numerum objectorum, sed quantum ad intensiorem propriam in subjecto, ut dictum est.

Ad secundum « quod movetur, est corpus » dicendum, quod verum est, si moveatur ut subjectum motus; non tamen si movetur sicut id, circa quod attenditur motus. Et hoc modo, non primo, movetur charitas.

Ad tertium dicendum, quod non oportet, si secundum essentiam mutatur, quod charitas corrumperetur: quia ejus essentia non est per se terminus motus, sed aliquid conjunctum essentiae ejus: sicut diversa terminatio quantitatis virtualis ejus, quae non est ipsa quantitas virtualis; quamvis sua quantitas virtualis sit sua essentia.

Ad quartum, de causa charitatis, dicendum, quod quaedam est causa, quae est sua operatio; et haec operando non movetur nec mutatur, licet producat effectus diversos; et talis causa est Deus. Est autem alia causa, quae non est sua operatio; et talis mutatur agendo aliquo modo, sicut exiens de otio in actum: et de hac verum est, quod obicitur: sed talis non est Deus, qui est causa charitatis.

Ad quintum « alteratio non est etc. » dicendum quod verum est de alteratione quae inducit passionem, quae consistit in abjiciendo aliquid a substantia per actionem formae contrariae; non autem de alteratione quae includit in se passionem, quae consistit in recipiendo solum: sic enim est circa substantias et qualitates spirituales. Et talis qualitas est charitas.

ARTICULUS II.

Ad secundum sic proceditur. Et 1. videtur quod charitas augetur per additionem. Philosophus enim dicit, primo de Generatione. Augmentum est praexistentis quantitatis additamentum. Si ergo charitas augetur, hoc est per additionem.

2. Praeterea, Deus non agit aliquid de novo in anima, nisi per novum influxum: non autem potest intelligi novus influxus, nisi aliquid de novo infundatur. Ergo cum charitas de novo augetur, oportet quod aliqua charitas de novo infusa praexistenti addatur.

3. Praeterea, ex eisdem res generatur et nutritur et augetur: sed per influentiam divinam charitas generatur; ergo et augetur.

4. Praeterea, charitas non augetur per recessum a contrario solum: quia etiam in statu innocentiae augeri posset. Ergo per accessum ad terminum. Sed minores res ad majorem quantitatem non accedunt

nisi per additionem. Ergo charitas augetur per additionem.

Contra. Simplex simpliciter additum nihil auget. Ergo cum charitas sit simplex, per additionem charitatis non augetur.

Praeterea, additionem sequitur compositio, compositionem virtutis diminutio: sed charitas augetur virtute; ergo illud augmentum non est per additionem.

Respondeo. Circa hoc sunt duae opiniones. Quidam enim dicunt, quod augetur per additionem alterius charitatis. Sed contra hoc est: quia charitas, cum sit alteri charitati eadem secundum speciem, non potest esse diversa ab alia charitate, nisi per numerum: accidentia autem ejusdem speciei numerantur secundum diversitatem subjectorum. Cum ergo addita charitas non fuerit in alio subjecto, nisi in eo in quo est charitas augmentata, non potest esse alia ab ea: ergo non potest augmentare eam. Et ideo alii dicunt, quod augetur secundum intensiorem. Et hoc sic patet. Ut enim dicit Boetius in lib. de Hebdomadibus, quod est, potest aliquid aliud participare: sed ipsum esse nullo alio participat. Et simili ratione nulli formae potest aliquid addi, quod non sit de essentia ejus. Quod autem additur alicui formae ut existens de essentia ejus, variat ejus speciem; sicut sensitiva addita vegetativae mutat speciem, et sic rationalis addita sensitivae, ita ut sint eadem essentia in composito, sicut unitas addito numero variat numeri speciem, ut dicitur in 8 Metaphysicorum. Unde per hunc modum una forma invenitur alia melior et major in bonitate, secundum quod est in altiori specie constituta. Relinquitur ergo quod forma in eadem specie manens non potest augeri per hoc quod sibi fiat additio, sed per hoc, quod fit additio subjecto. Quae quidem additio quandoque secundum quantitatem intelligitur, sicut eam corpori albo additur aliud corpus album, et per accidens albedo albedini, et fit majus album, sed non magis album: quod non est in proposito. Quandoque vero secundum formam: non autem secundum quod subjecto additur aliqua forma secundum speciem. Eadem vero secundum speciem non potest addi, nisi secundum quod magis inest; magis autem inest, secundum quod potentia subjecti magis terminatur sub actu formae, et subjicitur ei. Et sic charitas augetur, et quaelibet forma accidentalis, secundum quod intensius est in subjecto.

Ad primum, de Philosopho, dicendum, quod propositio Philosophi intelligitur de augmento secundum quantitatem molis, non virtutis.

Ad secundum dicendum, quod secundum Augustinum, 2 super Genesim ad litteram, Deus continua actione virtutem in anima causat, sicut sol lumen in aere; unde non oportet, quod novo influxu augetur charitatem, sed eodem influxu plenius participato.

Ad tertium, ex eisdem res generatur, dicendum, quod jam patet solutio; quia per influentiam divinam charitas generatur et augetur, non tamen per diversam influentiam.

Ad quartum « minus ad majus etc. » dicendum, quod in accessu minoris ad majus secundum quantitatem dimensionem verum est hoc, sed non secundum virtutem: dico autem charitatem augeri per accessum ad terminum virtutis perfectae. Quod autem charitas aliqua augetur per recessum a contrario, hoc accidit ex conditione subjecti contrarie dispositi.

(1) *Lege sed primum.*

ARTICULUS III.

Ad tertium sic proceditur. Et 1. videtur, quod charitas quolibet actu augeatur. Ubi enim est causa eadem, est idem effectus: sed omnes actus charitatis sunt ejusdem speciei; ergo cum aliquis actus charitatis charitatem augeat, augebit et quilibet actus.

2. Praeterea, potentior et propinquior dispositio est quilibet actus charitatis ad charitatem, quam actus naturalis ad charitatem: sed aliquis actus naturalis est dispositio immediata ad gratiam; ergo multo magis quilibet actus charitatis ad charitatem.

3. Praeterea, qui potest quod majus est, potest et quod minus. Sed quilibet actus charitatis potest mereri vitam aeternam; ergo multo magis augmentum charitatis.

Contra. Ex eisdem principiis generatur aliquid et augetur. Sed ex uno actu non generatur charitas, quia nec etiam virtus moralis, ad cuius generationem plus confert actus noster; ergo non augetur.

Respondeo. Dicendum, quod sicut aliquis habens charitatem, potest ea uti et non uti, ita potest ea intensius et remissius uti. Secus autem est de formis naturalibus, quarum actiones ex necessitate procedunt. Quanto ergo intensio actus charitatis adaequatur intensioni habitus, tunc homo mereatur charitatis augmentum, tunc bene utitur eo quod jam accepit. Quando vero intensio actus non adaequatur intensioni habitus, per talem actum charitas non augetur, quia nondum exercet homo totum quod habet: exercitium autem habitus eum auget.

Ad primum « omnes ejusdem speciei » dicendum, quod quamvis sint ejusdem speciei, non tamen omnes aequae intensi.

Ad secundum, de actu naturali, dicendum, quod non quilibet actus naturalis est immediata dispositio ad gratiam; sed ille qui procedit ex tota virtute. Similiter non quilibet actus charitatis est immediata dispositio ad augmentum charitatis; sed ille qui procedit ex tota virtute naturae et charitatis. Tamen actus charitatis est perfectior dispositio ad augmentum charitatis (cum non se habeat in ratione tantum dispositionis, sed in ratione meriti), quam sit actus naturalis ad charitatem, cum se habeat tantum in ratione dispositionis.

Ad tertium « mereri vitam aeternam est majus » dicendum, quod falsum est; cum mereri augmentum charitatis sit mereri augmentum vitae aeternae. Majus autem est mereri augmentum vitae aeternae, quam mereri tantum vitam aeternam; cum augmentum vitae aeternae se habeat ex additione ad vitam aeternam.

Ad quartum « ex uno actu etc. » dicendum, quod non est simile: quia firmitas, quae requiritur ad virtutem moralem dependet ex actu voluntatis, quae est principium valde mutabile: sed firmitas charitatis est ex Deo, non ex actu nostro. Ideo non ex uno actu voluntatis firmitas habitus generatur, qui ex eo dependet tamquam ex causa efficiente: sed tamen uno actu gratia infunditur, quia potest esse perfecta dispositio ad charitatem: respectu cuius non se habet nisi in ratione dispositionis, non alicujus efficientiae.

ARTICULUS IV.

Ad quartum sic proceditur. Et 1. videtur, quod charitas non possit augeri in infinitum. Perfectio

eniam non augetur ultra capacitatem perfectibilis. Sed charitas est perfectio animae, capacitas vero animae est finita; ergo charitas non augetur in infinitum.

2. Praeterea, nihil ordinate movetur ad id, quod consequi non potest: sed augmentum in infinitum consequi non potest; ergo nihil movetur ad hoc; ergo nec charitas movetur ad augmentum infinitum.

3. Praeterea, charitate et gratia Christi, quae tamen finita est non potest esse major. Sed si charitas posset crescere in infinitum, posset major esse; ergo etc.

Contra. Charitas assimilatur nos Deo: sed nunquam tanta est assimilatio, quin possit esse major; ergo semper potest charitas crescere in infinitum.

Praeterea, quanto magis crescit charitas, tanto est virtuosior ad merendum: sed per meritum augetur; ergo quanto plus crescit, plus potest augeri; ergo in infinitum.

Praeterea, idem patet ex opposito: quia homo in statu viae potest semper demereri; ergo et semper mereri.

Respondeo. Circa hoc est duplex opinio. Quidam enim dicunt, quod charitas non potest augeri in infinitum: quia capacitas animae terminata est, et augmentum non recipit. Sed contra hoc est, quod ipsa charitas auget capacitatem naturae, sicut ipsum intelligere auget capacitatem intellectus, secundum Philosophum, qui dicit quod intellectus quanto magis intelligit difficilia, tanto potest plus intelligere. Et ideo quanto natura spiritualis plus recipit de charitate, plus potest recipere, et magis ejus capacitas augetur. Ideo alii dicunt, quod de augmento charitatis est loqui dupliciter. Aut de augmento quod habet, et illud semper est finitum: aut de augmento quod habere potest, et illud est infinitum; et ideo charitas potest augeri in infinitum. Et hujus est duplex ratio. Una ex parte ejus ad quod movetur anima in augmento: illud enim ad quod movetur anima, est similitudo divinae bonitatis, a qua distat in infinitum: et ideo augmentum charitatis potest crescere in infinitum. Alia ratio est ex parte ejus quod movetur ad augmentum; scilicet ipsius animae; quae quanto plus recipit de bonitate divina, tanto capacior est ad recipiendum; et ideo quanto plus recipit de charitate, tanto plus potest recipere, et ideo in infinitum.

Ad primum, de capacitate animae, dicendum, quod capacitas animae potest considerari, vel in actu, et sic est finita; vel in potentia, et sic potest crescere in infinitum.

Ad secundum dicendum, quod non movetur anima ad infinita simul: sed primo movetur ad augmentum charitatis terminatum; sed post hoc augmentum potest aliud esse augmentum, et ita potest moveri ad illud, et similiter ad aliud, et sic in infinitum. Et hoc modo intelligitur augmentum charitatis interminatum.

Ad tertium dicendum, quod quamvis gratia Christi sit finita, in quantum est quoddam creatum, tamen in quantum attingit ad ipsam unionem, habet quamdam rationem infinitatis: sed hoc magis patebit in tertio.

ARTICULUS V.

Ad quintum sic proceditur. Et 1. videtur, quod charitas minui possit secundum substantiam. Oppo-

sua enim habent fieri circa idem: sed augmentum et diminutio sunt opposita; cum ergo charitas possit auferri secundum essentiam, sicut jam dictum est; ergo et minui secundum essentiam potest.

2. Praeterea, sicut fieri contingit de imperfecto perfectum, ita et e contrario: sed motum contrariorum sunt causae contrariae; ergo cum primum fiat per augmentum charitatis, secundum fiet per eius diminutionem.

3. Praeterea, Augustinus dicit: « Minus te amat, qui aliquid tecum amat. » Et alibi: « Ubi magis cupiditas, ibi parva charitas: » sed cupiditas potest auferri; ergo et charitas minui.

Sed contra. Si charitas diminuitur, non diminuitur nisi per peccatum. Sed peccatum mortale non diminuit charitatem, quia totaliter eam tollit: similiter nec peccatum veniale, quia sic multa peccata venialia charitatem tollent, cum charitas sit finita: ergo charitas nullo modo diminuitur.

4. Praeterea, aut fit diminutio secundum eandem quantitatem semper in diminutione charitatis, aut secundum eandem proportionem. Si secundum eandem quantitatem: cum tota quantitas sit finita; ergo per venialia multiplicata destruitur tota. Si secundum eandem proportionem, ut si semper removeretur dimidium residui, et sic in infinitum, sicut continuum divisibile est in infinitum; ergo cum semper illud quod post auferitur, minus sit eo quod prius auferebatur, minus nocebit semper peccatum posterius quam prius; ergo minus erit malum; quod falsum est.

Respondeo. Charitas potest minui, quantum ad radicationem et fervorem; sed non potest minui quantum ad essentiam. Et hujus ratio est: quia si minuitur: aut hoc est ex parte Dei, aut ex parte nostra. Non ex parte Dei, cum ab ipso nullus sit defectus. Si ex parte nostra: aut hoc est propter cessationem ab actu nostro, aut propter deordinationem actus nostri. Non primo modo: quia cum non habeat essentiam ab actu nostro, nec ab ipso debet diminui. Non secundo modo: quia deordinatio actus nostri, aut est circa finem, ita ut per eam finis tollatur, sicut est per mortale peccatum, quod non diminuit, sed penitus tollit charitatem: aut circa ea quae sunt ad finem; et sic deordinatio peccati venialis, quae non attingit charitatem, quae est secundum adhaesionem finis, nec opponitur essentiae charitatis, et ideo nec diminuit eam. Et ita non est quod minuatur charitatem, quo ad essentiam. Sed opponitur illa inordinatio venialis peccati radicationi et fervori charitatis: ideo diminuit illam quo ad illa duo: scilicet quo ad radicationem, secundum quod fit dispositio ad contrarium, unde minuitur firma inhaesio charitatis; et quo ad fervorem, prout impeditur obedientia inferiorum virium ad superiores, ex qua causatur fervor.

Ad primum « opposita habent fieri circa idem » dicendum, quod verum est, nisi alterum non determinate insit naturaliter. Augmentum vero naturaliter sequitur charitatem, non diminutio: eo quod ex parte influentis et susipientis potest esse causa aliqua augmenti, non diminutionis.

Ad secundum dicendum, quod perfectio attenditur non solum secundum essentiam charitatis, sed etiam secundum statum. Primo modo non contingit fieri de perfecto imperfectum, sed secundo.

Ad tertium dicendum, quod concupiscentia potest referri ad charitatem dupliciter. Prout est in

fieri; et sic impedire potest, ne tanta charitas detur, quanta daretur, si ipsa non adesset; vel prout est jam habita; et sic non minuit, quo ad essentiam, ut dictum est.

DISTINCTIO XVIII.

Praeterea diligenter considerandum etc. (V. edit. nostrae tom. VI, pag. 150.)

QUAESTIO UNICA.

Hic quaeruntur quinque: 1.^o utrum donum sit essenziale, vel personale; 2.^o utrum sit propriam Spiritus sancti; 3.^o utrum per ipsum dentur alia dona; 4.^o utrum Spiritus sanctus eodem sit Deus et donum; 5.^o quibus divinis nominibus debeant addi haec pronomina, Meum et Vestrum.

ARTICULUS I.

Ad primum sic proceditur. Et 1. videtur, quod donum sit nomen essenziale. Omne enim nomen connotans effectum in creatura, significat divinam essentiam: sed hoc nomen, donum, connotat effectum in creatura: importat enim respectum ad creaturam; ergo significat divinam essentiam.

2. Praeterea, omne nomen conveniens essentiae divinae, essenziale est: sed essentiae divinae convenit esse donum. Ad Philip. 5: « Donavit illi nomen etc. »: « hoc nomen, Deus, » secundum Glossam; ergo est essenziale.

3. Praeterea, quicquid intelligitur in divinis, exclusa per intellectum distinctione personarum, est essenziale: sed hujusmodi est donum: exclusa enim distinctione personarum, Deus posset dare seipsum; ergo est essenziale.

Contra. Donum procedit a dante: essentia divina a nullo procedit; ergo non potest dici donum.

Respondeo. Dicendum, quod donum respectu dati potest dicere auctoritatem in dante; et sic, cum in divinis non sit auctoritas nisi ratione originis, donum est personale. Vel tantum libertatem respectu dati, ut scilicet illud quod datur, libere habeatur: et sic cum tota Trinitas libere habeat seipsam, potest dare seipsam: quia sic non requiritur distinctio dati a dante, sed ab eo cui datur; et sic donum est essenziale.

Ad primum « omne nomen connotans etc. » dicendum, quod dupliciter potest nomen connotare effectum in creatura. Vel secundum rationem principii alicujus operationis tantum: et sic, cum operatio sit totius Trinitatis, est essenziale: vel ita quod cum ratione principii respectu creaturae connotat aliquod notionale, ut incarnatio, quae et operationem importat, quae tribus est personis communis, et operationis terminum, in quem terminata est carnis assumptio, quod proprium est personae Filii. Et hujusmodi est hoc nomen, donum: quia praeter respectum quem connotat ad illum cui donabile est, potest importare respectum ad illum a quo est sicut a principio; et ex hac parte est notionale.

Ad secundum « donum convenit essentiae » dicendum, quod si dare importat auctoritatem respectu dati in dante, sic essentia non dicitur dari, sed alio modo, ut dictum est.

Ad tertium dicendum, quod donum, in ejus ratione importatur auctoritas, non remaneret non

intellecta distinctione personarum. Et per hoc patet solutio ad ultimum.

ARTICULUS II.

Ad secundum sic proceditur. Et 1. videtur, quod donum non sit proprium Spiritui sancto. Omne enim, quod datur, donum est. Filius datur, Isaiae 9: « Filius datus est nobis; » ergo ipse est donum.

2. Praeterea, aut Filius fuit donabilis ab aeterno, aut non: si sic; ergo donum: quia donum ab aptitudine dandi dicitur: si non; ergo contra rationem suae proprietatis fuit, quod daretur.

3. Praeterea, Spiritus sanctus non habet nisi unam notionem, quae est ejus processio: sed alio modo innotescit Spiritus sanctus in quantum est donum, et in quantum est procedens; ergo videtur, quod notio, qua donum dicitur, non sit propria Spiritui sancto, et ita nec donum.

Contra. In libro de Trinitate Augustinus dicit: Sicut in Trinitate solus Filius est verbum, ita solus Spiritus sanctus dicitur donum.

Respondeo. Dicendum, quod in hoc differunt donum et datum principaliter: quia datum potest dici aliquid, quocumque modo datur: sed donum dicitur illud, quod de sua ratione habet quod datur, quasi ordinem ad dandum. Spiritus sanctus autem ex ratione suae processionis habet quod datur: quia procedit ut amor, qui est primum donum: Filius autem non habet ex ratione suae processionis, ut datur; et ideo proprie loquendo, Spiritus sanctus solus est donum: sed uterque potest dici datum.

Ad primum « omne quod datur » dicendum, quod non est verum, secundum quod donum proprie accipitur, secundum quod datur ex naturali aptitudine, quam habet ad hoc ut datur.

Ad secundum dicendum, quod Filius ab aeterno fuit habilis ut daretur in tempore; tamen istaabilitas non importatur in ratione suae processionis, sed importatur in processione Spiritus sancti.

Ad tertium dicendum, quod sicut una essentia secundum rem materialiter significatur ut differens ratione, sic una proprietas secundum rem significatur materialiter, et ut differens ratione. Hinc est, quod proprietas Spiritus sancti significatur, et nomine Spiritus quoad actum procedendi, et nomine amoris quoad modum processionis, et nomine doni, quoad rationem donationis superadditam; quamvis sit una proprietas realiter Spiritus sancti.

ARTICULUS III.

Ad tertium sic proceditur. Et 1. videtur, quod per donum, quod est Spiritus sanctus, non dantur alia dona. Dona enim Spiritus sancti appropriata non dicuntur dari per Filium; ergo nec dona appropriata Filio, ut sapientia, debent dici dari per Spiritum sanctum.

2. Praeterea, « Filius datus est nobis, » Isaiae 9. Sed Spiritus sanctus non habet auctoritatem in Filium; ergo non est nobis datus per eum.

3. Praeterea, Pater generando Filium dedit ei totam suam essentiam: hoc autem non fecit per Spiritum sanctum; ergo non omnia dantur per Spiritum sanctum.

4. Praeterea, circumscripto per intellectum Spiritu sancto, nihilominus a Deo fieret distributio gratiae et donorum; ergo videtur, cum cessante

causa non cesset effectus, quod distributio donorum non fiat per Spiritum sanctum.

Contra. Secundum Philosophum, id quod est primum, causa est omnium aliorum: sed Spiritus sanctus in genere donorum primum est, quia amor est primum donum; ergo causa est omnium aliorum donorum.

Respondeo. Dicendum, quod aliquid datur dupliciter. Uno modo, ex virtute naturae, sicut sol dat lumen suum. Alio modo, ex liberalitate voluntatis. Sicut autem natura est principium primae dationis, ita amor est principium secundae. Unde cum Spiritus sanctus sit amor, omnia dona quae dantur nobis ex divina liberalitate, dicuntur dari per Spiritum sanctum; quamvis non in omnibus detur Spiritus sanctus, sed in quibusdam tantum, ut dictum est supra.

Ad primum dicendum, quod sapientia et scientia secundum id quod sunt, appropriantur Filio: sed secundum id, quod dantur, appropriantur Spiritui sancto.

Ad secundum, de Filio dato, dicendum, quod Filius datus est per Spiritum sanctum; non tamen ita, quod Spiritus sanctus habeat potestatem in Filio, sed in effectu connotato per dationem Filii, scilicet in opus incarnationis.

Ad tertium, de essentia divina, dicendum, quod jam patet solutio: quia datio illa qua Pater dat essentiam Filio, est datio ex proprietate naturae.

Ad quartum dicendum, quod si non esset Spiritus sanctus, non esset in Deo nisi amor essentialis; per quem dona darentur. Posito autem Spiritu sancto, est in Deo duplex amor, essentialis et personalis; et per utrumque intelliguntur dona dari.

ARTICULUS IV.

Ad quartum sic proceditur. Et 1. videtur, quod non eodem Spiritus sanctus sit donum et Deus. Non enim est eadem ratio communis et proprii: sed donum est proprium Spiritus sancti, Deus autem commune; ergo non est eodem donum et Deus.

2. Praeterea, ex relatione ad eos, quibus datur, habet Spiritus sanctus, quod sit donum: ex nulla vero relatione habet, quod sit Deus; ergo non est eodem Deus et donum.

3. Praeterea, Augustinus ait: « non eo donum est Spiritus sanctus, quo Deus. »

Contra. Spiritus sanctus procedendo accipit, ut sit essentia; ergo processione est essentia: sed processione est donum; ergo eo est Deus, quo est donum.

Praeterea, Augustinus ait: « Spiritui sancto praestat essentiam de utroque processio; » ergo cum ipsa processio praestet ei omne donum, ergo eo Deus est, quo donum.

Respondeo. Cum quaeritur, an eodem sit Deus, quo donum; si quaeritur de identitate rei, dicendum, quod sic: quia in divinis essentia et proprietas idem sunt in re. Si autem quaeratur de identitate rationis, distinguendum est. Aut enim ablativus constituitur (1) cum hoc verbo, fit, in ratione formae; et sic non eodem est Deus, quo donum: quia divinitate Deus est, proprietate donum. Aut in ratione principii: sic eodem, scilicet eadem processione, Deus est, et donum: quia per processionem istam habet quicquid habet; et sic quod sit Deus, et quod sit donum.

(1) *Lege* construitur.

Ad primum, non est eadem ratio, dicendum, quod formaliter loquendo non eodem secundum rationem est Deus et donum, sed quasi causaliter.

Ad secundum dicendum, quod quamvis ex relatione, ut relatio est, non sit Deus, formaliter loquendo; tamen ex relatione, ut est idem quod actus aeternae emanationis, habet quod sit Deus.

Ad tertium « non eodem est donum » dicendum, quod Augustinus intelligit formaliter loquendo, non causaliter.

ARTICULUS V.

Ad quintum sic proceditur. Et 1. videtur, quod Spiritus sanctus potest dici donum nostrum. Eis enim, quae dicunt respectum ad creaturam, possumus addere hoc pronomen, nostrum, sicut, defensor noster: sed donum dicit respectum ad creaturam; ergo potest dici donum nostrum.

2. Praeterea, sanctus nihil dimittit de ratione Spiritus: sed bene dicitur Spiritus noster, ut Spiritus Eliae; ergo et bene dicitur Spiritus sanctus noster.

3. Praeterea, quisquis est datus nobis, noster est: Filius est datus nobis; ergo Filius noster est.

4. Praeterea, in Deo idem est Deus, et sapientia, et essentia: sed bene dicitur Deus noster; ergo essentia et sapientia nostra.

Respondeo. Illis nominibus quae aliquam causam important respectu nostri, et praedicantur in concreto, possunt addi dicta pronomina. Et ad hoc notandum est, quod cum sint quatuor causae, Deus non est causa materialis nostra: sed se habet ad nos in ratione efficientis, finis, et formae exemplaris, non inhaerentis. Ista ergo nomina, quae important rationem principii per modum efficientis (ut creator) vel finis (ut bonum) recipiant additionem pronominum, ut creator noster, bonum nostrum: illis autem, quae significantur per modum formae inhaerentis, qualia sunt ista nomina, quae significant divinam essentiam in abstracto, ut bonitas et sapientia, et sic de aliis non adduntur dicta pronomina: sed si inveniuntur addita, exponendae sunt illae locutiones magis quam ampliandae.

Ad primum, de dono, dicendum, quod donum non dicit tantum respectum habitualem ad creaturam, sed datum actuale: ideo non dicitur donum nostrum, sed datum nostrum.

Ad secundum « potest dici Spiritus noster » dicendum, quod non est simile: quia Spiritus sanctus est quaedam circumlocutio inventa ad exprimendum personam Spiritus sancti. Ipse autem, in quantum persona subsistens, non dicit actualem respectu ad nos: et ideo non dicitur Spiritus sanctus noster. Sed Spiritus dicit actum spirandi in nos: ideo potest dici noster Spiritus.

Ad tertium « Filius datus est » dicendum, quod verum est: non tamen in Filium datus est, sed in doctorem: et ideo dicitur doctor noster, salvator noster, non Filius noster.

Ad quartum dicendum, quod Deus et deitas, quamvis sint idem re, differunt tamen ratione. Nam Deus significat ut res subsistens, quae est alicujus rei principium, propter operationem, a qua imponitur nomen hoc: hoc autem nomen, divinitas, significat per modum formae inhaerentis: et ideo non est simile.

DISTINCTIO XIX.

Nunc postquam coaeternitatem etc. (V. edit. nostrae tom. VI, pag. 156.)

Hic quaeruntur duo. Primo de aequalitate. Secundo de illis, in quibus attenditur aequalitas.

QUAESTIO I.

Circa primum quaeruntur duo: 1.^o an in divinis sit aequalitas; 2.^o an sit ibi mutua aequalitas.

ARTICULUS I.

Ad primum sic proceditur. Et 1. videtur, quod non sit in divinis aequalitas: proprium enim est quantitatis secundum eam aequale vel inaequale dici, ut dicitur in Praedicamentis. Sed in Deo non est genus quantitatis, quia, ut dicit Augustinus, ipse est sine quantitate magnus; ergo non potest dici aequalis vel inaequalis.

2. Praeterea, aut penes essentialia attenditur in Deo aequalitas, aut penes personalia. Sed non penes essentialia: quia penes unitatem essentiae attenditur identitas, non aequalitas: nec penes personalia: quia in personalibus distinctio est, non convenientia; ergo nullo modo est in Deo aequalitas.

3. Praeterea, in divinis non est quantitas molis, sed virtutis: virtus vero potius est qualitas quam quantitas: secundum qualitatem vero dicitur similitudo, non aequalitas; ergo in Deo non est aequalitas, sed similitudo.

4. Praeterea, aequalitas cum sit species proportionis, dicit proportionem et commensurationem quandam: sed infinitorum non est aliqua commensuratio, nec proportio; cum ergo divinae personae infinitae sint, nulla aequalitas est in eis.

Contra. In symbolo Athanasii dicitur, quod totae tres personae coaeternae sibi sunt, et coaequales.

Respondeo. Dicendum, quod quia magnitudo in rebus nobis notis est species quantitatis: ideo ea quae conveniunt in magnitudine, dicuntur esse aequalia. Nominum vero impositio transmittitur a nobis ad res divinas: et ideo etiam unitas magnitudinis in divinis est ratio intelligendi aequalitatem in Deo, quamvis ipsa non sit species quantitatis in Deo. Et similis (1) ratio est de aliis, secundum quae attenditur aequalitas in divinis. Et per hoc patet responsio ad primum.

Ad secundum autem « penes essentialia » dicendum, quod penes essentialia attenditur aequalitas, non ut significantur per modum essentiae, sed per modum quantitatis, sive speciei ejus.

Ad tertium dicendum, quod quamvis per comparisonem ad subiectum, quod perficit, sit qualitas, tamen per comparisonem ad objecta, in quae potest, penes quae attenditur ejus divisio, per modum quantitatis habet.

Ad quartum dicendum, quod aequalitas in creaturis est quaedam proportio, quae non attenditur secundum unam quantitatem in numero, seu in specie mensurae, ut puta, quia utraque est bicubita: proportio enim attenditur in diversis: sed in divinis dicitur aequalitas secundum unam magnitudinem: et ideo non est ibi ratio commensurationis, vel proportionis.

(1) *Id.* similitudinis.

ARTICULUS II.

Ad secundum sic proceditur. Et 1. videtur, quod in divinis non sit mutua aequalitas. Dicit enim Dionysius, libro de Divinis nomin., quod in causa et causatis non recipimus conversionem similitudinis et aequalitatis. Cum ergo Pater sit principium Filii, Filius est aequalis ei et similis, et non e converso.

2. Praeterea, Hebr. 1 super illud: « Qui cum sit splendor gloriae, » Glossa Chrysostomi dicit, quod Filius est aequalis Patri, et non e converso.

5. Praeterea, Hilarius ait: « Imago, si perfecte implet id cuius est imago, ipsa coaequatur ei, non id imagini suae; » ergo Filius aequatur Patri, non e converso, cum sit imago Patris.

Contra. In relativis equiparantiae, fit reciprocatio: aequale est relativum equiparantiae; ergo in aequali fit reciprocatio; ergo sicut Filius est aequalis Patri, ita e converso.

Praeterea, major est aequalitas mutua et reciproca, quam quae non est sic: sed aequalitas divinarum personarum est maxima; ergo mutua et reciproca.

Respondeo. Differunt aequalitas et adaequatio: aequalitas enim dicit relationem equiparantiae; sed adaequatio dicit motum sive accessum ad hanc relationem. Quamvis autem in divinis non sit aliquis motus, est tamen ibi receptio, secundum quam una persona dicitur ab alia recipere. Sed quia in divinis personis una est essentia, secundum quam relatio equiparantiae in eis attenditur, non tamen Pater recipit a Filio hanc equiparantiam sive essentiam in qua attenditur equiparantia: sed e converso. Et ideo in divinis personis est mutua aequalitas secundum quod Pater dicitur aequalis Filio et e converso: non tamen mutua adaequatio, quia Pater non adaequatur Filio, quamvis sit e converso.

Ad primum « in causa et causato etc. » dicendum, quod hoc intelligitur de causato isto, quod non perfecte recipit similitudinem suae causae, sicut imago Caesaris assimilatur Caesari, sed non e converso. Filius autem perfecte recipit totam perfectionem Patris: ideo similis et aequalis potest ei dici, et e converso.

Ad secundum, de Chrysostomo, dicendum, quod aequalitas sumitur ibi pro adaequatione: unde Pater non dicitur aequalis Filio, quia non adaequatur Filio, sed potius e converso.

Ad tertium dicendum, quod quamvis Pater non coaequetur Filio, tamen aequalis est Filio. Et ratio dicta est: quia coaequatio importat accessum ad aequalitatem: aequalitas autem hunc accessum non importat.

QUAESTIO II.

Circa secundum quaeruntur duo. Primo de aeternitate. Secundo de magnitudine. (De potentia vero quaeritur infra; in his enim tribus attenditur aequalitas.)

I.

Circa primum quaeruntur duo: 1.^o quid sit aeternitas secundum rem; 2.^o quomodo se habeat nunc aeternitatis ad aeternitatem.

ARTICULUS I.

Ad primum sic proceditur. Et 1. videtur quod aeternitas non sit divina substantia. Nihil enim est

causa suiipsius: sed Deus est auctor aeternitatis, ut dicit Augustinus lib. 85 qq.; ergo aeternitas non est ipse Deus.

2. Praeterea, eodem mensuratur principium et id quod est a principio; sicut motus primi mobilis et omnes alii motus inferiores causati ab eo mensurantur tempore. Sed esse divinum est principium omnium aliorum esse; ergo eodem mensurantur. Sed esse aliorum mensuratur aevum et tempore, esse autem divinum aeternitate; ergo aeternitas, aevum et tempus sunt eadem mensura: sed tempus et aevum non sunt substantia divina; ergo etc.

5. Praeterea, in omnibus participationibus divinae bonitatis est communitas in nomine et in ratione analogiae inter principium communicationis et perfectionem participatam; sicut patet de bonitate in Deo et in creaturis. Sed secundum Dionysium, sicut Deus dicitur sapiens, in quantum implet alios sapientia, ita per hoc dicitur aeternus, quod est causa aevi et temporis; ergo aevum et tempus debent dici aeternitas.

4. Praeterea, mensura est proportionata mensurato. Sed omne esse in se consideratum indivisibile est, ut dicit Boetius in lib. de Hebdom. cum esse temporalium mensuretur tempore, esse aeviternorum aevum; ergo tam tempus quam aevum erunt mensura indivisibilis et permanens: sed aeternitas est huiusmodi; ergo tam tempus quam aevum erit aeternitas, et sic idem quod prius.

Sed contra. Nihil est ab aeterno nisi substantia divina: sed aeternitas est ab aeterno; ergo etc.

Praeterea, Deus non mensuratur alio a se, cum sit prima mensura: mensuratur autem aeternitate; ergo etc.

Respondeo. Dicendum, quod sicut tempus est mensura motus rei temporalis, ita etiam aeternitas est mensura esse rei aeternae, et aevum rei aeviternae. Motus autem de sui ratione successionem habet, et per consequens pluralitatem in partibus; et ideo tempus est mensura motus per modum numeri. Esse vero rei in se consideratum simplex est, nec habet successionem, nisi per accidens, in quantum subiacet motui. Unde illud esse, quod nullo modo motui subiacet, est absque successione; sive sit esse subsistens, sive esse divinum, quod mensuratur aeternitate; sive sit esse inhaerens, ut esse incorporationum creaturarum quod dicitur mensurari aevum. Et ideo aeternitas est unitas divini esse, et aevum est unitas esse angelici vel alienius creaturae incorruptibilis. In Deo autem non est aliud unitas et unum: unde aeternitas est ipsum divinum esse, et per consequens divina substantia, quae non est aliud quam suum esse. Quidam vero praedictarum trium mensurarum differentiam assignant per hoc quod tempus habet principium et finem; aevum autem principium, sed non finem; aeternitas neque principium neque finem. Sed hoc est contra Boetium in fin. de Consol.: qui dicit, quod si mundus semper fuisset et semper futurus esse, ut Plato ponit, non tamen esset aeternus, quia totum esse suum non est simul.

Ad primum « Deus est causa aeternitatis » dicendum, quod duplex est aeternitas: scilicet participata, et hoc nihil aliud est quam aevum, et huiusmodi Deus est causa, et sic intelligitur auctoritas; alia non participata, qua Deus aeternus est, et haec non est causata.

Ad secundum dicendum, quod verum est de mensura communi et excedente, non de mensura

propria et coaequata: haec enim sequitur diversam rationem mensurandi ipsorum mensuratorum. Non est autem eadem ratio mensurandi esse successivum et permanens, nec esse permanens receptum et non receptum: quia non est idem modus essendi: ideo nec eorum eadem est mensura propria et coaequata, quamvis sit eadem communis et excedens.

Ad tertium dicendum, quod quando nomen imponitur perfectioni secundum rationem perfectionis, tantum unum est, non autem quando imponitur ei nomen secundum modum quo participatur, sive quo est in principio communicante: sicut hoc nomen sensus non convenit Deo, quamvis hoc nomen cognitio conveniat Deo. Sed aeternitas nominat durationem, secundum istum modum quo est in principio suo: et ideo aliae durationes participatae non dicuntur nomine aeternitatis.

Ad quartum « esse autem etc. » dicendum, quod verum est, prout in se consideratur; sed prout subjacet variationi et mutationi causatae ex motu caeli, sic quodammodo successionem habet: et ideo esse temporalium, in quantum huiusmodi, tempore mensuratur, quo et motus caeli.

ARTICULUS II.

Ad secundum sic proceditur. 1. Videtur, quod nunc aeternitatis non sit ipsa aeternitas. Idem enim est nunc aeternitatis et temporis et aevi. Quod videtur ex hoc, quod dicitur: quando motus est, Angelus est et Deus est. Sed tempus non est aeternitas; ergo nunc aeternitatis, quod est idem quod nunc temporis, non est aeternitas.

2. Praeterea, omne nunc est indivisibile: sed aeternitas est divisibilis, unde significatur in plurali numero, in Psal. 101: « In generatione et generatione anni tui, » idest Dei; ergo nunc aeternitatis non est aeternitas.

3. Praeterea, idem non est causa sui ipsius, secundum Boetium. Sed nunc aeternitatis, quod est nunc aeternitatis, facit aeternitatem; ergo non est ipsa aeternitas.

Contra. Aeternitas est ipse Deus: sed in Deo nulla est diversitas; ergo nec in aeternitate; et sic nunc aeternitatis non differt ab aeternitate.

Respondeo. Sicut secundum Philosophum, tempus est mensura motus, sed nunc temporis est mensura mobilis: ita aevum est mensura esse aeviterni, sed nunc aevi ipsius aeviterni. Similiter aeternitas est mensura esse aeterni: sed nunc aeternitatis est mensura aeterni. Sicut ergo se habet mobile aeviternum et aeternum ad actus suos, ita se habent tempus, aevum, aeternitas ad sua nunc. Mobile autem a motu dupliciter differt: scilicet realiter, quia mobile non est motus: et secundum rationem successionis et permanentiae, cum motus habeat esse successivum, sed substantia mobilis est permanens. Ideo nunc temporis et tempus differunt dupliciter: quia nunc temporis non est tempus, sed terminus temporis: et secundum rationem successionis et permanentiae: quia tempus est de numero successivorum, sed nunc temporis non. Unde secundum Philosophum, idem est nunc quod fertur per essentialiam temporis. Esse autem aeviterni et aeviternum, differt solum realiter: quia unum non est aliud: quia secundum Avicennam, ubicumque est reperire genus et speciem, oportet quidditatem et esse quidditatis differre. Et quia solum realiter differunt a-

S. Th. Opera omnia. V. 22.

viternum et esse aeviterni, ita quod non secundum rationem successionis et permanentiae, sicut differunt mobile et motus; ideo nunc aevi et aevum differunt realiter: esse autem aeterni et aeternum non differunt realiter: ideo nunc aeternitatis et aeternitas non differunt realiter, sed secundum rationem tantum.

Ad primum « idem est nunc » dicendum, quod falsum est. Et quando dicitur, Quando est motus, est Angelus et Deus, potest significare per ly quando triplex nunc: vel aeternitatis, vel aevi, vel temporis. Si significetur nunc temporis, tunc dicitur esse motus in illo, sicut in propria mensura: Angelus autem et Deus dicentur esse in illo, non secundum rationem mensurationis, sed solum secundum concomitantiam. Si autem significetur nunc aeternitatis per ly quando, tunc dicitur Deus esse in illo, sicut in mensura propria et adaequata: Angelus autem et mobile, sicut in mensura excedente. Si autem significetur nunc aevi per ly quando, respondet Angelo, sicut mensura propria et adaequata; et ideo secundum concomitantiam et mobili, sicut mensura excedens.

Ad secundum « aeternitas est » dicendum, quod falsum est: et quod pluraliter aliquando significetur hoc est ratione mensurae inferioris, cui per se accidit divisio, scilicet ratione temporis. Unde sensus est, Anni tui, idest aeternitas, sub qua possibile esset contineri plures annos, sicut in mensura excedente.

Ad tertium dicendum, quod Boetius accipit facere secundum rationem intelligendi tantum: sicut enim esse secundum rationem intelligendi consequitur principia ipsius entis quasi causas, ita etiam mensura entis se habet ad mensuram essendi secundum rationem causae. Unde nunc aeternitatis secundum rationem videtur esse causa aeternitatis: sed ex hoc non ostenditur diversitas in re, sed in ratione tantum; sicut nec inter ipsum divinum esse, et ens, quod est Deus.

II.

Circa secundum quaeruntur duo: 1.^o an magnitudo Deo conveniat; 2.^o de signo aequalitatis in magnitudine divinarum personarum, secundum quod in se invicem esse dicuntur.

ARTICULUS I.

Ad primum sic proceditur. Et 1. videtur quod magnitudo Deo non conveniat. Magnitudo enim est quantitas continua: sed in Deo non est quantitas continua, cum non sit corpus; ergo nec magnitudo.

2. Praeterea, magnitudo est conditio materiae. In Deo nulla est conditio materialis; ergo nec magnitudo.

3. Praeterea, in Deo non est quantitas, nisi virtutis; ergo male dividitur magnitudo contra potentiam, quae nihil aliud est quam virtus.

Contra. In Psal. 146 dicitur: « Magnus Dominus noster, et magna virtus eius; » ergo magnitudo est in Deo.

Respondeo. Dicendum, quod quantitas alicujus rei potest considerari tripliciter. Primo quantum ad substantiam rei; secundo quantum ad actus; tertio quantum ad effectum. Sicut rei corporalis

quantitas, quantum ad substantiam est ipsa dimensio; quantum ad actum primum, qui est esse, et secundum qui est operari, est tempus; quantum vero ad effectum, potentia. In rebus vero spiritualibus quae dimensione carent, quantitas substantiae est secundum perfectionem naturae: quia secundum Augustinum, in rebus quae non mole magna sunt, idem est esse majus quod melius. Sic ergo in Deo aequalitas, quae est relatio super quantitatem fundata, attenditur quantum ad tria: scilicet quantum ad magnitudinem ratione perfectionis naturae; quantum ad aeternitatem ratione durationis actus essendi et operationis divinae; quantum ad potentiam ratione effectuum.

Ad primum et secundum de magnitudine, dicendum, quod non accipitur hic magnitudo molis, quae est conditio materiae, et quantitas continua, sed magnitudo virtutis.

Ad tertium, dicendum, quod potentia dicit respectum solum ad id quod est extra: sed virtus importat perfectionem in proprio subjecto, et ordinem ad effectum: quia secundum Philosophum, virtus est quae bonum facit habentem, et opus ejus bonum reddit. Et ideo sub quantitate virtutis includitur non solum quantitas magnitudinis spiritualis, quae est secundum perfectionem naturae; sed etiam quantitas durationis, quae est secundum permanentiam actus essendi.

ARTICULUS II.

Ad secundum sic proceditur. Et 1. videtur quod Pater non sit in Filio, nec e contrario. Si enim Filius est in Patre, in quocumque est Pater, est Filius; si ergo est in Filio, et Filius erit in Filio, et sic idem in seipso: quod est contra Philosophum in 4. Physicorum.

2. Praeterea, simplicium, quorum unum est in altero, unum non distinguitur ab altero, ut si punctus sit in puncto: sed Pater distinguitur a Filio et e converso; ergo non est in Filio, nec e converso.

3. Praeterea, si essent duae essentiae divinae, impossibile esset quod una esset in alia: esset enim essentiarum confusio, quia una non posset alteri illabi. Cum ergo personae divinae aequae sint simplices, impossibile est quod una sit in alia.

Contra. Joan. 14: • Ego in Patre, et Pater in me est. •

Praeterea, ubicumque est essentia Patris, est Pater: sed tota essentia Patris est in Filio; ergo in Filio est totus Pater.

Respondeo. Pater est in Filio et e converso, et quaelibet persona in alia, et e converso, dupliciter. Primo secundum Augustinum, Hilarium et Ambrosium, propter unitatem essentiae; cum enim essentia Patris sit eadem numero in Filio et e converso, et essentia Patris sit ipse Pater, et similiter essentia Filii sit ipse Filius; ideo dicitur Pater esse in Filio, et e converso. Et secundum hoc, ille modus habet similitudinem cum modo essendi, in quo genus est in specie, sive quo natura communis est in supposito: quia sic Patrem esse in Filio, nihil aliud est quam essentiam communem esse in Filio. Alio modo secundum Damascenum, Pater dicitur esse in Filio, et e converso, propter relationem Patris ad Filium: de natura enim relativorum est, quod unum dat intelligere aliud. Et secundum hoc, ille modus

reducitur ad istum modum, quo aliquid est in alio, sicut in principio movente et efficiente. Quamvis enim Pater non sit principium efficiens Filii, tamen est origo ipsius: unde Pater est in Filio, sicut in eo quod est ab origine: Filius autem in Patre, ut in originante. Et secundum hoc, quod per hanc praepositionem, in diversa intelligitur habitudo, cum dicitur Pater esse in Filio, et e converso, secundum quod diversa est ratio Patris ad Filium, et e converso.

Ad primum • quicquid est in Patre etc. • dicendum, quod est fallacia figurae dictionis, quia mutatur quod in ad aliquid.

Ad secundum, de punctis, dicendum, quod non est simile: nam puncta tantum distinguuntur penes diversitatem situs, quae tollitur, si puncta ponantur esse in invicem. Personae autem divinae distinguuntur per relationes originis, ex quibus sequitur quod sint in invicem.

Ad tertium dicendum, quod non est simile: quia nec in eis esset aliquid unum numero, sicut est in personis divinis; nec una esset materialis respectu alterius: quod exigeretur ad hoc, quod una esset in alia.

Sed jam nunc ad propositum redeamus etc. (V. edit. nostrae tom. VI, pag. 157.)

Hic quaeritur de duobus, secundum duas rationes, quae in locutione habentur.

QUAESTIO I.

Circa primam probationem quaeruntur tria: 1.º an in divinis sit totum integrale; 2.º an ibi sit totum universale; 3.º an ibi sit principium materiale.

ARTICULUS I.

Ad primum sic proceditur. Et 1. videtur quod in divinis sit totum integrale. Ubicumque enim est reperire rationem quantitatis, ibi est reperire rationem totius integralis, quia quantitas divisibilitatem habet in partes suas. Sed in divinis est ratio quantitatis, quia ibi est quantitas virtutis: ergo in eis est totum integrale.

2. Praeterea, numerus omnis est totum integrale ad quamlibet suam unitatem: ergo ternarius trium personarum est totum integrale ad quamlibet suam unitatem personalem.

3. Praeterea, natura totius integralis est praedicari de omnibus suis partibus simul et de nulla per se: sed sic se habet Trinitas ad personas; ergo respectu earum habet rationem totius integralis.

Contra. Omne totum integrale compositum est ex suis partibus: sed in divinis nulla est compositio; ergo etc.

Praeterea, omne totum integrale resolubile est in suas partes: sed Deus non est in aliquid resolubilis, quia sic non esset primum principium; ergo non convenit ei ratio totius integralis.

Respondeo. Ratio totius integralis consistit in compositione; ratio autem partis integralis habet imperfectionem annexam; quibus divina simplicitas et perfectio repugnat: unde non potest esse ibi totum integrale et pars.

Ad primum dicendum, quod quamvis in Deo sit quantitas virtutis, non tamen est in eo totum

integrale: quia divisio prædictæ quantitatis attenditur secundum aliqua extrinseca, non intrinseca: partes autem integrales sunt intra suum totum: ideo ei non convenit ratio totius integralis.

Ad secundum, quod numerus secundum perfectam rationem suam dicit numeratorum divisionem secundum essentiam, quia dicit numeratorum coærvationem. Coærvatio autem esse non potest nisi a rebus distinctis secundum essentiam: ideo numerus sumptus secundum perfectam suam rationem totius integralis, in Deo non est: quia non dicit numeratorum divisionem secundum essentiam, sed tantum distinctionem personarum: ideo non sumitur secundum perfectam suam rationem: et ideo numero in divinis non convenit ratio totius integralis. Vel dicendum, quod numerus dupliciter potest considerari. Uno modo ex parte numeratorum: et sic numerus est totum integrale, sicut et numerata; quæ quidem habent rationem totius integralis, secundum quod sunt per essentiam divisa; quod in Deo non est. Alio modo ex parte numerantis: et sic, secundum quod numerans colligit plures unitates ex rebus distinctis, numerus est quoddam totum integrale: et sic numerus divinarum personarum habet rationem totius secundum rationem, et non secundum rem.

Ad tertium dicendum, quod hoc contingit in toto integrali ratione duplici: scilicet ratione inæqualitatis totius ad partes singulas, et ratione distinctionis partium singularum ab aliis. Quod autem Trinitas non prædicatur de personis singulis, contingit ratione distinctionis tantum: et ideo non habet rationem totius integralis.

ARTICULUS II.

Ad secundum sic proceditur. Et 1. videtur, quod in divinis non sit totum universale. Quicquid enim prædicatur de aliquo substantialiter, et non conversim, prædicatur de ipso ut totum universale de parte subjectiva: sed essentia divina hoc modo prædicatur de Patre: Pater enim est essentia divina: sed non quicumque est essentia divina, est Pater; ergo est ibi totum universale.

2. Præterea, universale et particulare differunt sicut commune et proprium: sed in divinis est commune et proprium: quia essentia est communis, et relatio propria est personæ; ergo est ibi universale et particulare.

5. Præterea, quanto aliqua forma est simplicior, tanto universalior: sed essentia divina est forma simplicissima; ergo maxime universalis.

Contra. Ubi est aliquod particulare, ibi est aliquod ens hic et nunc: sed in divinis nihil tale est; ergo non est ibi particulare; ergo nec universale.

Præterea, omnis natura in qua est universale et particulare, est in genere determinato: sed natura divina non est in genere determinato, quia non est finita; ergo etc.

Respondeo. In divinis non est totum universale, nec pars subjectiva. Et huiusmodi sunt quatuor rationes. Una, secundum Avicennam, quia ubicumque est genus et species, oportet quidditatem et esse quidditatis differre. Alia est, quia natura universalis non est una numero in omnibus suis inferioribus, divina autem essentia est una numero in tribus personis. Tertia ratio est, quia universale est quodammodo in potentia, quæ in Deo esse non potest.

Quarta, quia particulare addit supra universale, et contrahit illud: et ideo nec universale nec particulare, nec genus nec species in Deo invenitur.

Ad primum « quod prædicatur de aliquo etc. » dicendum, quod plus quam hoc exigitur: scilicet quod illud quod prædicatur non conversim, multiplicetur secundum illorum multiplicationem, de quibus prædicatur. Sic autem non multiplicatur divina essentia: et ideo etc.

Ad secundum dicendum, quod verum est: non tamen universale est idem quod commune: differunt enim, quia commune de se non determinat, an id quod communicatur pluribus, sit idem numero, vel non, in illis pluribus: sed universale hoc determinat: quia nunquam idem numero est in pluribus: ideo essentia, quæ est una numero communicata pluribus, communis est, non tamen universalis.

Ad tertium dicendum, quod quoddam est simplex, quod de sua ratione non potest accipere additionem, et sic Deus est simplex: aliud quod potest percipere additionem, ut ens, etc. et de isto propositio habet veritatem, non de primo simplici.

ARTICULUS III.

Circa tertium sic proceditur. Et 1. videtur, quod principium materiale sit in divinis. Sicut enim finis et efficiens sunt causæ correlativæ, ita forma et materia: sed Deus est vere forma; ergo est etiam vere materia.

Præterea, ratio finiti est a forma, ratio infiniti a materia; ergo cum Deus sit maxime infinitus, ergo et materialis.

3. Præterea, omnis differentia sive distinctio, est a forma; ergo circumscripta forma, materia a nullo differt; ergo non differt a Deo: sed quod est indifferens alteri, est idem cum eo; ergo materia est idem cum Deo.

Contra. Materia est principium passionis: Deus autem est impassibilis; ergo etc.

Præterea, materia est ens imperfectum, et in potentia tantum: Deus autem est ens perfectissimum; ergo etc.

Respondeo. In Deo nullo modo est ratio materiæ, nec ipse est principium materiale. Et hoc ideo, quia materia est ens in potentia; mota, non movens: Deus autem est purus actus; movens, et non motus.

Ad primum dicendum, quod duplex est forma: quaedam exemplaris, et hæc Deus est, et hæc non dicitur relative ad materiam: alia est forma quæ est altera pars compositi, et hæc relative dicitur ad materiam, et talis forma non est Deus.

Ad secundum dicendum, quod infinitum dupliciter accipitur: aut privative, scilicet quod natum est finire et non finitur, et sic dicitur conditionem materiæ, nec est in Deo: aut negative solum, et sic est in Deo, nec imperfectionem importat aliquam.

Ad tertium dicendum, quod hoc generaliter non est verum; quia prima principia, scilicet materia et forma, distinguuntur adinvicem, seipsis, et (1) aliqua alia forma; quia materia secundum se considerata caret omni forma.

(1) *Lege et non.*

QUAESTIO II.

Circa secundam probationem de veritate. Et quaeruntur duo: 1.^o quid sit veritas; 2.^o an sint plures veritates aeternae.

ARTICULUS I.

Ad primum sic proceditur. Et 1. videtur, quod verum sit omnino idem quod ens. Augustinus enim in libro Soliloquiorum dicit, quod verum est id quod est: sed illud quod est, nihil est nisi ens; ergo verum nihil est nisi ens.

2. Praeterea, quaecumque differunt re vel ratione, unum potest intelligi sine altero; unde secundum Boetium libro de Hebdomadibus, non potest intelligi Deus non intellecta ejus bonitate: sed essentia rei non potest intelligi sine veritate; ergo essentia rei et veritas non differunt, neque re neque ratione.

3. Praeterea, illa, quorum est una dispositio, sunt eadem; quia idem accidens numero non potest esse in diversis substantiis: sed veri et entis est eadem dispositio: dicitur enim in secundo Metaphysicorum quod dispositio rei in esse est sicut sua dispositio in veritate; ergo verum et ens sunt idem.

Contra. Ea, quorum unum excedit alterum, non sunt idem: sed verum et ens sic se habent, quod secundum Philosophum in quarto Metaphysicorum, verum definiens dicimus, cum dicimus esse quod est, aut non esse quod non est; et sic verum includit ens et non ens; ergo verum non est idem cum ente.

Praeterea, Anselmus dicit, quod veritas est re-ctitudo sola mente perceptibilis: sed illud quod est sola mente perceptibile, est tantum in intelligibilibus, et non in sensibilibus: ens autem est in utrisque; ergo ens et verum non sunt idem.

Praeterea, secundum Philosophum in Praedicationis, singulum in complexorum, neque verum neque falsum est: sed quodlibet horum est ens, ergo non quodlibet ens est verum.

Respondeo. Secundum Isaac, veritas est adaequatio rei et intellectus. Sic ergo in veritate est reperire duo, quae sunt de ejus essentia: scilicet id quod materiale est in ea, ut res extrinseca; et id quod formale est in ea, scilicet adaequatio rei et intellectus. Est etiam reperire tertium, quod consequitur, ut effectus essentiam ejus, scilicet cognitionem, quae consequitur praedictam adaequationem, quae adaequatio nihil aliud est quam veritas. Sed adaequatio rei et intellectus nihil reale addit supra ipsam rem, quia per essentiam suam res intellectui conformatur. Per hanc igitur adaequationem non fit realis mutatio in re ipsa sed in intellectu: ideo veritas, quae nihil aliud addit nisi hanc adaequationem supra rem ipsam, non realiter differt a re, sed in ratione hujus adaequationis ad intellectum. Est autem duplex intellectus: unus causans et mensurans ipsas res, ut intellectus divinus: et ab aequalitate ad hunc intellectum dicitur res vera, in quantum res implet rationem rei in mente divina existentem: et sic accipit veritatem rei Anselmus. Alius est intellectus causatus et mensuratus a rebus, ut humanus, qui a rebus habet, quod verus sit, et non e converso; et sic accipitur veritas a Philosopho, qui dicit veritatem esse in mente, et non in rebus: si enim res adaequantur menti divinae, sicut men-

surae, ex hoc ipsae res sunt verae: intellectus autem noster adaequatur rei, ut mensurae; et ex hoc dicitur ipse verus.

Ad primum ergo dicendum, quod hoc verbum Est, non praedicat ibi esse, sive ens, quod dividitur per decem genera, sicut in conclusione concluditur; sed esse, quod significat veritatem propositionis. Unde sensus est: Verum est id quod est, id est, verum est, quod dicitur esse de eo quod est. Vel dicendum, quod haec definitio datur de vero, non secundum completam sui rationem, sed secundum id quod fundatur in re; et sic est idem, quod res ipsa.

Ad secundum dicendum, quod hoc potest intelligi dupliciter. Aut ita quod unum non possit intelligi nisi ponatur alterum non esse; et sic ens non potest intelligi sine vero, id est sine praedicta adaequatione rei ad intellectum; quia ens non potest intelligi sine hoc, quod concordet vel adaequetur intellectui. Aut ita, quod quodcumque intelligitur unum intelligatur alterum: et sic ens potest intelligi sine vero, et non e converso: quia in ratione veri includitur ratio entis, et non e converso; sicut in ente relato includitur ens absolutum, et non e converso. Hoc autem nomen Ens, nominat esse absolute, verum autem nominat esse in respectu ad intellectum: et ideo potest intelligi ens sine vero et non e converso.

Ad tertium dicendum, quod a Philosopho ibi non accipitur dispositio secundum quod est in genere qualitatis, sed secundum quod importat quemdam ordinem. Cum enim illa quae sunt causa aliorum essendi, sint maxime entia, et illa quae sunt causa veritatis aliorum, sint maxime vera, concludit Philosophus quod idem est ordo alienius rei in esse et veritate. Neque hoc ideo est, quia ens et verum ratione sunt idem: sed quia secundum quod aliquid habet de entitate, secundum hoc adaequatur definitio intellectui: et sic ratio veri sequitur rationem entis.

Ad quartum « ens in plus est etc. » dicendum, quod falsum est: ens enim aliquo modo acceptum dicitur de non ente, secundum quod non ens est apprehensum ab intellectu. Unde in quarto Metaphysicorum dicit Philosophus quod negatio vel privatio entis uno modo dicitur ens; et Avicenna dicit, quod non potest formari enunciatio nisi de ente; quia oportet illud de quo propositio formatur esse apprehensum ab intellectu: ex quo patet, quod omne verum aliquo modo est ens.

Ad quintum « quod est sola mente etc. » dicendum, quod falsum est: quia ens non tantum est in rebus intelligibilibus, sed sensibilibus; et tamen ratio sive intentio entis tantum intellectu apprehenditur, et non sensu. Similiter, quamvis veritas sit in rebus sensibilibus, nihilominus tamen non sensu, sed intellectu ratio veritatis apprehenditur. Vel dicendum, quod quamvis res sensibilis sensu apprehendatur, tamen ejus adaequatio ad intellectum sola mente capitur: et pro tanto dicitur, quod veritas est sola mente perceptibilis.

Ad sextum dicendum, quod quia voces sunt signa intellectuum, veritas vocis ad illum modum pertinet, quo intellectus est verus; non ad istum, quo res est vera. Intellectus autem non est verus nisi secundum quod componit et dividit. Sic enim solum de re judicat, et per hoc rei adaequatur. Et per hunc modum dicit Philosophus quod voces

incomplexae non sunt verae: non autem loquitur de veritate rei, secundum quam verum cum ente convertitur.

ARTICULUS II.

Ad secundum sic proceditur. Et 1. videtur quod sint plures veritates aeternae. Et primo hic ostenditur de veritate intellectus. Augustinus enim, lib. 85 qq., probat animam esse immortalem, per hoc quod est subjectum veritatis, quae est aeterna. Constat autem, quod veritas, quae est in intellectu nostro, sicut in subjecto, non est veritas divina per essentiam; ergo aliqua veritas praeter divinam est aeterna; et sic plures veritates sunt aeternae.

2. Praeterea, quod veritas intellectus sit aeterna, probatur sic. Omne enim illud, ad cuius remotionem sequitur positio ejus, est aeternum: quia sive sit, sive non sit ab aeterno, ponitur esse aeternum: sed si negetur veritas esse, ponitur esse; ergo veritas est aeterna. Probatio mediae. Si veritas non est, veritatem esse est falsum: sed si affirmatio est falsa, negatio erit vera; ergo veritatem non esse erit verum: sed non est verum nisi aliqua veritate; ergo aliqua veritas est.

3. Praeterea, id, quod non potest intelligi non esse, est aeternum: quia quicquid potest non esse, potest intelligi non esse; ergo a destructione consequentis, quod non potest intelligi non esse, non potest non esse: sed veritas non potest intelligi non esse, quia quicquid intelligitur, intelligitur per rationem veritatis, ut ostensum est; ergo veritas quae est in intellectu, non potest non esse; ergo est aeterna.

4. Praeterea, idem videtur de veritate enunciationis. Si enim veritas enunciationis destruat, hoc erit propter destructionem ipsius enunciationis, quae est signum rei, vel per destructionem rei: sed neutro modo destruitur; ergo veritas enunciationis est perpetua et aeterna. Probatio mediae. Non existente signo, rectum est rem significari: sed veritas signi est rectitudo significationis; ergo si non sit enunciatio, vel quodecumque signum veritatis, adhuc remanebit veritas signi. Similiter probatur, quod non destruat ex destructione rei: quia, ut dictum est, secundum Anselmum, unumquodque habet veritatem, quando implet id ad quod ordinatum est in mente divina: sed cessante cursu Socratis, adhuc ista enunciatio, Socrates currit, facit id ad quod ordinata est in mente divina: quia significat Socratem currere; ergo destructa re, non destruitur veritas signi.

5. Praeterea, idem ostenditur de veritate rei. Quia, ut dicit Augustinus pereunte re vera, non perit veritas. Sed veritas rei non potest destrui nisi per mutationem rei; ergo veritas rei nullo modo perit.

6. Praeterea, verum, ens, et res et aliquid convertuntur: sed plures res fuerunt ab aeterno, quia plures personae; ergo plura vera; ergo plures veritates.

Contra. Nullum creatum est aeternum: veritas omnis, praeter primam, est creata; ergo sola prima veritas est aeterna.

Praeterea, ens et verum convertuntur, ut dictum est: sed solum unum est ens increatum aeternum; ergo sola una veritas est aeterna.

Respondeo Dicendum, quod sicut ex dictis patet,

duplex est veritas, rei et intellectus: nam veritas enunciationis ad veritatem intellectus reducitur. Nulla autem res est ab aeterno, nisi Deus; nec aliquis intellectus est aeternus, nisi divinus; qui idem est, quod essentia divina. Unde non est nisi una veritas ab aeterno.

Ad primum dicendum, quod quamvis veritas, cuius anima est subjectum, non sit ipsa divina veritas, est tamen quaedam ejus similitudo immaterialis; et ex hoc anima, quae est ejus subjectum, est immaterialis et incorruptibilis.

Ad secundum dicendum, quod si affirmatio est falsa, negatio erit vera, supposito, quod sit affirmatio et negatio: sed ab aeterno affirmatio et negatio non fuerunt, nisi in intellectu divino; unde sola veritas intellectus divini aeterna est.

Ad tertium dicendum, quod per hunc modum possibile est intelligere veritatem non esse, per quem possibile est intelligere intelligentiam non esse: quod quidem habet impossibilitatem ex parte intelligentis, et non ex parte rei intellectae. Si enim intellectus non esset, nihil posset intelligere. Tamen non esse intellectum, est quoddam de se intelligibile, si esset qui intelligeret.

Ad quartum dicendum, quod illa rectitudo, nihil aliud est quam significabilitas rei: unde hic non ponit veritatem signi in actu, sed tantum in potentia. Similiter cum obicitur « implet illud ad quod ordinata est in mente divina, » dicendum, quod enunciatio dupliciter potest considerari: vel ut res quaedam; et sic est ipsa veritas rei, sicut in qualibet re, quando implet id, ad quod ordinata est in mente divina; et talis veritas manet in ipsa etiam re mutata: vel ut signus talis rei, et sic veritas ejus est per adaequationem ad rem illam: et ideo mutata re, tollitur adaequatio signi ad signatum, sine aliqua mutatione ipsius signi, sicut in relationibus contingit: unde veritas enunciationis non manet.

Ad quintum, de verbo Augustini, dicendum, quod pereunte re, perit veritas quantum ad illud esse, quod habet veritas in re illa: sed tamen potest manere intentio veritatis secundum esse quod habet in re alia, vel in anima. Quae omnia si auferantur ut sint ab aeterno, non remanebit veritas nisi in Deo. Et ideo sola divina veritas est aeterna.

Ad sextum dicendum, quod si res accipiatur communiter ad essentiam et personam, plures res fuerunt ab aeterno, scilicet plures personae; nec tamen erant plura vera, quia verum essentiale.

DISTINCTIO XX.

Nunc ostendere restat etc. (V. edit. nostrae tom. VI, pag. 174.)

QUAESTIO UNICA.

Hic quaeruntur quatuor: 1.º an Filius sit omnipotens; 2.º an sit Patri aequalis in potentia 3.º an in divinis personis sit ordo; 4.º an sit ibi ordo naturae.

ARTICULUS I.

Ad primum sic proceditur. Et 1. videtur, quod Filius non sit omnipotens. Potentia enim dicitur per comparisonem ad opus: sed operatio aliqua est, quam non potest Filius habere, ut generare; ergo Filius non est omnipotens.

2. Praeterea, majus posse est producere personam divinam, quam creaturam creare: sed si creare creaturam detraheretur Filio, non posset dici omnipotens.

3. Praeterea, sub universalitate entium continentur relativa: sed cum dico omnipotens, fit distributio pro universalitate entium; ergo pro relativis. Qui ergo non potest omnes actus relationis, non potest omnia.

Contra. In Symbolo dicitur: « Omnipotens Pater, • omnipotens Filius. »

Praeterea, virtus sequitur naturam: sed Pater et Filius sunt aequales in naturae magnitudine; ergo et in virtute: et sic Filius est omnipotens, sicut et Pater.

Respondeo. Filius dicitur omnipotens, quia potest quicquid est potentiae. In actu autem generandi sicut in potentia generandi, est aliquid absolutum, et aliquid relatum, significatum per modum actus. Primum est commune Patri et Filio, non autem secundum: quia hoc est potentiae in Patre, in Filio tamen esset impotentiae; si enim Filius hoc posset, posset non esse Filius, quia posset esse Pater; cum hoc sit proprietatis, quae est paternitas, quae tantum est in Patre: et sic Filius non posset esse Filius. Et per hoc patet solutio ad primum.

Ad secundum « majus est producere personam etc. » dicendum, quod majus est simpliciter: non tamen majus esset in Filio generare, quam creare; quia primum importat in ipso mutationem personae, secundum non.

Ad tertium « sub universalitate entium etc. » dicendum, cum dico, Omnipotens, non fit distributio universaliter pro omnibus entibus: sed pro his ad quae posse potentiae est in eo qui dicitur omnipotens, scilicet pro omnibus possibilibus: alioquin cum Pater non possit esse Filius, non esset omnipotens.

ARTICULUS II.

Ad secundum sic proceditur. Et 1. videtur quod Filius non sit aequalis Patri in potentia. Id enim, quod agit per aliud, est potentius eo per quod agit: sed Pater agit per Filium, et non e converso; ergo Pater est potentior Filio.

2. Praeterea, potentia appropriatur Patri, et non Filio; ergo videtur, quod magis conveniat Patri quam Filio.

3. Praeterea, inter habere aliquid ab alio personaliter et essentialiter, et non habere aliquid ab alio nec personaliter nec essentialiter, medium est, aliquid habere ab alio personaliter, et non essentialiter. Cum ergo primum, quod convenit creaturae, sit infirmitatis in ea; secundum autem, quod convenit Patri, sit potentiae in eo; ergo tertium, quod convenit Filio, secundum aliquid erit potentiae, scilicet non habere ab alio essentialiter, et secundum aliquid erit infirmitatis, scilicet habere ab alio personaliter; ergo Filius est minus potens quam Pater.

Contra. Nihil est sua virtute potentius: Filius autem est Patris virtus, 1 ad Cor. 1; ergo etc.

Praeterea, in uno et eodem homine virtus est aequalis; ergo multo magis in uno et eodem Deo: sed tres personae sunt unus Deus; ergo etc.

Respondeo. Aequalitas divinae potentiae non attenditur per comparationem ad actum notionalem; alioquin cum Pater non possit esse Filius, Filius autem possit hoc, non esset aequalis in potentia

Pater Filio: sed attenditur in comparatione ad actum essentialem sive interiorem, ut intelligere, sive exterioriorem, ut creare. Quo ad hos vero actus essentielles una et eadem est aequalis Patris et Filii potentia sicut et essentia.

Ad primum « illud quod agit per aliud etc. » dicendum, quod cum dicitur Pater operari per Filium, haec praepositio, per, non importat gradum potentiae: sed tantum auctoritatem in Patre: et ideo Pater non est potentior Filio.

Ad secundum « potentia appropriatur etc. » dicendum, quod hoc non est quia magis sibi conveniat, quam Filio: sed quia majorem similitudinem habet cum proprietate Patris, quam cum proprietate Filii. Potentia enim habet rationem principii, et Pater est principium non de principio.

Ad tertium dicendum, quod hoc ideo est, non quia aliquid ab alio habeat personaliter: sed quia diversam essentiam recipit ab alio: ex hoc enim causatur inaequalitas magnitudinis et potestatis; quia inaequalitatis causa est diversitas, sicut aequalitatis unitas: si enim reciperet eandem essentiam a creatore, quamvis in distinctione personae, non esset in ea impotentiae, imo maxime potentiae et perfectionis; cum ergo Filius recipiat eandem essentiam a Patre, quamvis in distinctione personae, hoc non est in eo impotentiae.

ARTICULUS III.

Ad tertium sic proceditur. Et 1. videtur, quod in tribus personis non sit ordo Augustinus enim dicit, quod ordo est parium: dispariumque cuique sua loca tribuens dispositio. Sed in divinis personis non est aliqua localis dispositio; ergo nec ordo.

2. Praeterea, si ordo est in divinis; aut ergo significat essentiam, aut notionem: sed non essentiam; quia in uno non est ordo: ergo nec notionem; quia nulla notio est in tribus personis; ergo in eis ordo esse non potest.

3. Praeterea, ubi est eadem aeternitas, simplicitas, et dignitas, non est aliquis ordo: quia identitas aeternitatis excludit ordinem durationis, simplicitas ordinem causae et causati, totius, et partis, dignitas ordinem dignitatis: sed in divinis personis est eadem aeternitas, simplicitas et dignitas; ergo nullus est ibi ordo.

Contra. Ubi est pluralitas sine ordine, ibi est confusio: sed in divinis personis est pluralitas et non confusio; ergo est ordo in eis.

Praeterea, Pater dicitur prima persona in Trinitate, Filius secunda, Spiritus sanctus tertia: primum autem et secundum et tertium dicunt ordinem; ergo etc.

Respondeo. Ordo aliquid praesupponit, ut ordinatorum distinctionem, quod imperfectionis nihil in sui intellectu includit. Sed hoc est dupliciter. Vel quantum ad rationem generis, et sic includit imperfectionem, quia rationem prioris et posterioris: vel quantum ad rationem speciei, et sic potest includere perfectionem quantum ad aliquam suam speciem: sicut ordo naturae sive originis, qui est species ordinis, dicit perfectionem. Sed quia cum (1) id quod est creaturae, dicitur de Deo secundum id quod perfectionis est in eo, excluso omni eo quod imperfectionis est; ideo ordo reperitur in divinis personis quantum ad illud quod supponit, scilicet

(1) *Lege totum.*

distinctionem, et quantum ad rationem suae speciei, scilicet ordinis et originis, cum utrumque sit perfectionis in eo; non autem quantum ad rationem generis, cum hoc sit imperfectionis in ordine: et hoc est quod dicit Augustinus quod in divinis personis est ordo naturae, quo aliquis est ex alio, non quo prior est alio. Unde in divinis personis non est simpliciter ordo: sed naturae, quo alius est ex alio.

Ad primum, de Augustino, dicendum, quod illa definitio datur de ordine secundum locum, qui divinis personis non competit.

Ad secundum autem « ordo significat notionem » dicendum, quod notionem significat, non tamen distincte hanc vel illam: sed indistincte omnes, sicut hoc nomen origo.

Ad tertium « ubicumque est eadem etc. » dicendum, quod licet simplicitas excludat ordinem causae et causati, eo quod differunt in essentia, non tamen excludit ordinem principii et illius qui est de principio, quia tales possunt esse idem in essentia, et ita in simplicitate: et sic est in divinis.

Ad quartum et quintum dicendum, quod ordo originis sufficit ut confusio non ponatur, et ad hoc quod Pater dicatur prima persona, et sic de aliis: ita tamen quod primum et secundum non referantur ad ipsas personas: quia in eis non est prius et posterius: sed ad earum numerationem, quae consequitur ordinem naturae.

ARTICULUS IV.

Ad quartum sic proceditur. 1. Videtur, quod in divinis non sit ordo naturae. Omnis enim ordo importat distinctionem: sed in divina natura non est distinctio; ergo nec ordo.

2. Praeterea, in Deo natura et essentia idem sunt: sed in Deo non est ordo essentiae; ergo nec naturae.

3. Praeterea, inter ea quae simul sunt, prout sunt simul, non est aliquis ordo. Cum ergo relativa sint simul natura, inter relativa non est ordo naturae; ergo nec inter Patrem et Filium.

Contra. Ubicumque est naturalis origo unius ab altero, « ibi est ordo naturae: » sed in divinis est naturalis origo unius ab altero; ergo etc.

Praeterea, Augustinus in litera dicit: « Cum dicitur Filius a Patre esse, non ostenditur inaequalitas substantiae, sed ordo naturae. »

Respondeo. Ordo alicujus dupliciter dicitur. Vel ut subjecti quod ordinatur, vel ut rationis secundum quam ordo attenditur. Primo modo, in divinis non est ordo naturae, sed personarum quae ordinantur. Secundo modo est ibi ordo naturae: quia secundum naturalem productionem unius ab altero ordinantur. Primo modo, ly naturae, sumitur formaliter, ut genitus constituitur (1) in habitudine formali, idest, ordo naturalis; secundo modo autem materialiter.

Ad primum « ordo importat distinctionem etc. » dicendum, quod verum est; sed tamen in ordinatis. Natura autem in Deo non ordinatur: sed est ratio ordinandi.

Ad secundum « in Deo natura et essentia idem sunt » dicendum, quod quamvis sunt idem re, differunt tamen ratione: nam essentia nominatur ratione principii essendi: sed natura ratione principii agendi, secundum quod natura dicitur (ut Philosophus dicit in 5 Metaph.), « quo primo pullulat pullulans: »

(1) *Lege ut genitivus construitur*

et ideo bene ordo naturae dicitur, idest naturalis originis: sed non ordo essentiae.

Ad tertium, de relativis, dicendum, quod inter ea quae simul sunt non potest esse ordo simpliciter: sed ordo sine ratione antecessionis potest. Sic autem dicitur ordo naturae.

DISTINCTIO XXI.

Hic oritur quaestio etc. (V. edit. nostrae tom. VI, pag. 178.)

Hic quaeruntur duo. Primo utrum dictio exclusiva possit addi in divinis ex parte subjecti. Secundo utrum ex parte praedicati.

QUAESTIO I.

Circa primum quaeruntur duo: 1.º utrum possit addi termino essentiali, ex parte subjecti, cum praedicato essentiali, vel personali; 2.º utrum possit addi termino personali cum praedicato essentiali.

ARTICULUS I.

Ad primum sic proceditur. Et 1. videtur, quod haec sit falsa « solus Deus est Deus: » quia omne adjectivum ponit rem suam circa suum substantivum; ergo « solus » ponit solitudinem circa Deum: sed ut Hilarius ait, Deus non est confitendus nobis singularis, aut solitarius; ergo etc.

2. Praeterea, nullus est Deus nisi Pater, aut Filius, aut Spiritus sanctus; si ergo solus Deus est Deus, aut solus Deus Pater, aut solus Deus Filius, aut solus Deus Spiritus sanctus: sed hoc totum est falsum; ergo hoc est falsum, solus Deus est Deus.

Contra. Proprium est, quod uni soli convenit: sed esse Deum convenit soli Deo; ergo etc.

Item. Videtur, quod haec sit falsa, solus Deus est Pater: alius enim quam Deus est Pater: quia homo est pater; non ergo solus Deus est Pater.

Contra. De quocumque praedicatur commune cum praecisione, praedicatur cum praecisione proprium, si de ipso praedicetur; cum ergo haec sit vera « solus Deus, est Deus » ut ostensum est, haec est vera « solus Deus est Pater. »

Respondeo. Haec propositio, « solus Deus est Deus, » duplex est: haec enim dictio exclusiva, solus, cum sit idem quod non cum alio, privat associationem a subjecto. Aut ergo simpliciter: et sic ponit solitudinem circa Deum, et est nomen adjectivum: et sic, sive ex parte subjecti vel praedicati adjungatur termino essentiali, sive personali, reddit loquutionem falsam: ideo hunc sensum amodo praetermittimus. Aut respectu alicujus: et tunc iterum duplex est: aut enim excludit alia a participatione formae subjecti, ratione intellectae implicationis in subjecto, et tunc est vera sub hoc sensu: ille solus est Deus praeter quem nullus alius Deus est Deus; et in hoc sensu loquitur Augustinus. Aut a participatione formae praedicati; et tunc est sensus: praeter Deum nullus est Deus: et secundum hos duos sensus propositio est vera.

Ad primum ergo (quod procedit secundum alium sensum) patet solutio.

Ad secundum « solus Deus etc. » dicendum, quod secundum sophistas, dictio exclusiva addita termino communi, immobilizat ipsum ratione negationis inclusae: ideo in processu est fallacia figurae dictionis, cum fiat variatio ab immobili suppositione ad mobilem.

Ad tertium concedendum est, quia procedit secundum tertium sensum.

Ad illud, quod ulterius quaeritur de hac: solus Deus est Pater, dicendum, quod haec propositio est duplex sicut et prima, ex eo quod haec dictio, solus, potest excludere alia a forma subjecti, et sic vera est sub hoc sensu: Deus, praeter quem non est alius, est Pater: vel a praedicatione, et sic iterum est duplex, ex eo quod praedicatum potest teneri formaliter, et sic est falsa sub hoc sensu, paternitas solum est in Deo: vel pro praesupposito Patris aeterni, et sic, solus Deus est Pater, et sic est vera; et hoc modo probatur et improbat.

ARTICULUS II.

Ad secundum sic proceditur. Et I. videtur, quod haec sit vera, solus Pater est Deus: nam de Filio dicitur, Gloria in excelsis Deo: Tu solus altissimus; ergo eadem ratione de Patre potest dici quod ipse solus est Deus; cum hoc nomen, altissimus, sit essentialiter, sicut hoc nomen, Deus.

2. Praeterea, major est identitas Patris ad Filium et Spiritum sanctum, quam totius ad partem: sed dictio exclusiva addita toti, non excludit partem; ergo nec addita uni personae excludit aliam; ergo haec est vera, solus Deus est Pater.

3. Praeterea, dictio exclusiva non excludit illud a subjecto, quod est de intellectu ejus: sed unum relativorum est de intellectu alterius; ergo dictio exclusiva addita uni relativo non excludit aliud: et ita idem quod prius.

Contra. Hujus propositionis: solus Pater est Deus, una expositio est: nullus alius a Patre est Deus: sed haec est falsa; ergo et prima. Hoc etiam in litera dicitur.

Respondeo. Haec est duplex • solus Pater est • Deus: • quia ly solus, aut privat associationem respectu formae subjecti, aut respectu praedicationis. Prius modo est vera: et est sensus: Pater, praeter quem nullus alius est persona patris, est Deus. Si respectu praedicationis, tunc similiter est duplex: quia cum solus sit idem quod non cum alio, si ly alio teneatur neutraliter, sic est vera, quia excludit aliud in essentia: si masculine, falsa: et sic excluditur Filius, qui est alius a Patre, non tamen aliud.

Ad primum • tu solus altissimus • dicendum, quod haec distinguenda est sicut et prima. Vel dicendum, quod non dicitur absolute solus filius altissimus, sed cum Spiritu sancto.

Ad secundum • dictio exclusiva etc. • dicendum, quod non est simile; quia non est aliud suppositum partis et totius, sicut est diversum suppositum correlativorum.

Ad tertium dicendum, quod est verum, si id quod est in intellectu alterius, non differt ab eo in supposito. Vel dicendum, quod ex relatione oppositi dupliciter potest argui. Vel in quantum relativa sunt: et sic, cum unum intelligatur in altero, dictio exclusiva addita uni, non excludit reliquum. Unde sequitur, quod si Pater est, Filius est. Aut in quantum sunt opposita, cum diversa sint supposita utriusque, unum non est de intellectu alterius, immo excludit reliquum: unde sequitur, Plato est pater Socratis; ergo non est filius ejus: et sic dictio exclusiva addita uni, excludit reliquum. Unde, cum diversa sint supposita trium personarum, semper dictio exclusiva addita uni personae excludit reliquam.

QUAESTIO II.

Deinde quaeritur, quomodo possit addi ex parte praedicationis dictio exclusiva. Et circa hoc quaeruntur duo: 1.^o utrum haec sit vera: Trinitas est solus Deus; 2.^o utrum haec sit vera: Pater est solus Deus.

ARTICULUS I.

Ad primum sic proceditur. Et I. videtur, quod haec sit falsa: • Trinitas est solus Deus. • Omne enim praedicatum essentialiter de natura sua, removet aliud praedicatum essentialiter. Sequitur enim: • Socrates est • homo; ergo non est aliud ab homine; • ergo superfluit dictio exclusiva addita.

2. Praeterea, dictio exclusiva importat negationem; sed negatio debet praecedere compositionem quam negat, in hac propositione vero sequitur; ergo propositio est falsa, vel incongrua.

3. Praeterea, formae communicabili non convenit solitudo: sed terminus in praedicatione tenetur formaliter; ergo male additur haec dictio, solus, praedicationi.

Contra. Subjectum hoc, non subest alteri nisi praedicationi; ergo praedicatum hoc cum exclusionem alterius vere praedicatur de ipso.

Respondeo. Circa hoc sunt duae opiniones: quidam enim dicunt hanc esse falsam, quia solus, est dispositio subjecti, ideo non debet addi praedicationi nisi solus sumatur pro solum, quod est adverbium; et sic, cum adverbium sit adjectivum verbi, quod copulat praedicatum cum subjecto, potest esse dispositio praedicationis et subjecti: tamen superflue additur; quia ex natura praedicationis substantialis excluditur omnis extranea natura a praedicatione, nisi adderetur aliquid quod posset inesse vel non inesse praedicationi, cujus oppositum dictio exclusiva excluderet: ut si diceretur: Trinitas est tantum unus verus Deus. Aliorum autem est opinio quod est vera: quia iste terminus, Deus, praedicat naturam per se existentem: ideo in ea potest fieri associatio, et ei fieri associatio: unde habet naturam termini communis et singularis. Ideo potest ei addi in praedicatione haec dictio, solus, quae excludit associationem ab eo cui additur; et sic est vera sub hoc sensu, Trinitas est solus Deus, id est Trinitas est Deus, praeter quem nullus alius est Deus.

Ad primum, de praedicatione essentiali, dicendum, quod cum dicitur, Trinitas est solus Deus, non excluditur aliud praedicatum essentialiter, nisi ly solus acciperetur pro tantum: sed excluditur aliud a participatione formae praedicationis: est enim sensus: Trinitas est solus Deus; id est ille, praeter quem nihil aliud est Deus.

Ad secundum dicendum, quod in hac propositione intelligitur duplex compositio. Una principalis, quae est importata per hoc verbum Est, ut praedicationis et subjecti. Alia non principalis, ut formae praedicationis cum suo supposito, secundum quod Deus exponitur habens deitatem: secundum non primam praecedit haec dictio, solus.

Ad tertium dicendum, quod verum est in quantum communicabilis est, non tamen in quantum per se existens est. Vel dicendum quod argumentum procedit, secundum quod privat associatio a praedicatione absolute, in quantum dictio, solus, est dictio categorica, et adjectivum; non in quantum est dictio sine categorica.

ARTICULUS II.

Ad secundum sic proceditur. Et 1. videtur, quod haec sit vera, Pater est solus Deus: quia Pater est Deus, et non aliud praeter Deum; ergo est solus Deus.

2. Praeterea, omne praedicatum quod dicitur de tribus simul, essenziale est; sed hoc praedicatum, solus Deus, dicitur de Trinitate, ut ait hic Augustinus; ergo est essenziale: sed praedicatum essenziale praedicatur de qualibet persona; ergo etc.

3. Praeterea, ille praeter quem non est alius Deus, est solus Deus: sed Pater est ille, praeter quem non est alius Deus; ergo Pater est solus Deus.

Contra est quod in litera dicitur.

Respondeo. Ille terminus, Deus, non tantum praedicat naturam deitatis, ut formam, sed ut aliquid subsistens. Sic ergo haec dictio, solus, potest excludere omne aliud neutraliter a forma praedicati; et sic est vera sub hoc sensu, Pater est Deus, praeter quem non est aliud, et sic nec Filius, nec Spiritus sanctus excluditur, cum non sint aliud a Patre. Vel potest excludere alium masculine; et tunc est falsa sub hoc sensu, Pater est Deus, praeter quem nullus est alius qui sit Deus: sed in hoc sensu haec est vera, Trinitas est solus Deus: quia praeter Trinitatem non est alius qui sit Deus, cum Trinitas complectatur omnia divina supposita.

Ad primum « Pater non est aliud etc. » dicendum, quod haec non est expositiva hujus, Pater est solus Deus: sed potius haec, praeter Patrem non est alius vel aliud, qui est Deus: quarum una est falsa, altera vera, ut dictum est.

Ad secundum dicendum, quod hoc non est ratione praedicati essentialis, quod praedicetur de Patre: sed ratione negationis excludentis suppositum aliud.

Ad tertium dicendum, quod hoc relativum, quem, potest referre distinctum suppositum Patris, ut sit sensus: praeter Patrem non est alius. Quae tamen duplex est, ex eo quod ly alius, potest intelligi absolute, et sic est vera sub hoc sensu, Pater est ille praeter quem non est alius Deus: vel cum hac implicatione, qui est, et sic est falsa sub hoc sensu: Pater est Deus, praeter quem non est alius qui est Deus. Si autem hoc quod dictio (1) quem, indistincte suppositum referat, secundum hoc quod supponit hoc nomen Deus, ut cum dicitur, Deus est unus: tunc vera est in omni sensu, et sic concessa est.

DISTINCTIO XXII.

Post praedicta nobis disserendum etc. (V. edit. nostrae tom. VI, pag. 184.)

QUAESTIO UNICA.

Illic quaeruntur quatuor: 1.° utrum Deus sit nominabilis; 2.° utrum proprie vel transumptive nominetur; 3.° utrum uno nomine vel pluribus; 4.° utrum sit sufficiens divisio quam ponit Ambrosius in litera.

ARTICULUS I.

Ad primum sic proceditur. Et 1. videtur quod Deus non sit nominabilis. Dionysius de Div. nom.

(1) *Lege hoc quod dico.*

S. Th. Opera omnia. V. 22.

dicit: « Deus est omnino incomprehensibilis; neque sensus ejus est, neque phantasia, neque opinio, neque nomen, neque sermo, neque tactus, neque scientia. »

2. Praeterea, in lib. de Causis dicitur: « Prima causa superior est omni narratione, et deficiunt linguae a narratione ejus; » ergo non est nominabilis.

3. Praeterea, in lib. Perihermenias dicitur quod voces sunt notae earum quae sunt in anima passionum, idest formarum in anima existentium. Sed Deus non habet formam in anima existentem: quia, ut ait Augustinus, Deus qui omnem formam subterfugit, intellectui pervius esse non potest; ergo non potest per vocem significari.

4. Praeterea, omne nomen significat substantiam cum qualitate: sed in Deo nulla est qualitas; ergo ei non competit nomen.

Contra. In Psal. 67 dicitur: « Dominus nomen est illi. »

Praeterea, omne laudabile et nominabile: sed Deus est laudabilis; ergo et nominabilis.

Respondeo. Sicut intelligimus, ita et significamus, cum voces sint signa intellectuum, secundum Philosophum; et quia Deum imperfecte intelligimus, ideo imperfecte cum significamus; sed quia ipse se perfecte intelligit, ideo ipse se perfecte suo verbo exprimit. Quia vero aliquantulum Deum cognoscimus ex creaturis, propter hoc et aliquantulum eum nominare possumus ex nominibus, quae creaturis imponimus, quantum ad id quod in eis perfectionis est. Et per hoc patet solutio ad duas primas auctoritates; non enim negant, quod non possit intelligi vel nominari; sed quod non a nobis perfecte potest intelligi vel nominari.

Ad tertium dicendum, quod forma intellectus nostri non perfecte repraesentat Deum, sed tantum aliquantulum in Dei cognitionem ducit. Sic ergo Deus omnem formam nostri intellectus subterfugit in quantum eam excedit, non quod totaliter ab ejus similitudine recedat.

Ad quartum dicendum, quod substantia et qualitas (1) non accipiuntur ibi secundum quod sunt praedicamenta vel res aliquae, sed secundum modum significandi: quia illud cui imponitur nomen dicitur nomine substantia; illud autem a quo imponitur dicitur ejus qualitas.

ARTICULUS II.

Ad secundum sic proceditur. Et 1. videtur quod nullum nomen possit dici proprie de Deo. Res enim nominatur secundum quod intelligitur; sed non intelligimus Deum nisi secundum proprietatem creaturarum; ergo nec nominamus. Sed quod per alienas proprietates nominatur, semper translative nominatur; ergo Deus semper translative nominatur, et ita nunquam proprie.

2. Praeterea, omnia quae de Deo dicuntur, verius negantur quam affirmantur, secundum Dionysium. Sed hoc non esset, si aliquid proprie de Deo diceretur; ergo etc.

3. Praeterea, magis differt sapientia creata ab increata, quam floritio prati a risu hominis. Sed ratione hujus diversitatis pratum non dicitur ridere, nisi metaphorice; ergo, cum Deus non nominetur sapiens nisi per sapientiam creatam, Deus dicitur sapiens metaphorice.

Contra. Quaedam sunt nomina, quorum res

(1) *Al. quantitas.*

soli Deo conveniunt, ut increatus et immensus. Si ergo proprium est quod soli convenit, illa de Deo proprie dicuntur.

Praeterea, quae per prius sunt in aliquo, ab illo in alia transferuntur et non e converso, et ita proprie de Deo dicuntur.

Respondeo. Dicendum, quod dupliciter divina nomina possunt considerari. Vel quantum ad modum significandi: et sic, cum significant secundum modum creaturarum, secundum quem imponuntur ad significandum, non conveniunt Deo proprie. Vel quantum ad rem significatam: et sic distinguendum est. Quia quaedam significant perfectionem absolute, ut sapientia bonitas, et sic de aliis: et sic cum omnis perfectio sit in Deo, haec proprie et non metaphorice de Deo dicuntur. Quaedam autem significant perfectionem ut contractam ad speciem creaturae, ejus perfectio est imperfecta respectu divinae perfectionis: unde talia nomina Deo non conveniunt nisi metaphorice.

Ad primum ergo dicendum, quod quamvis ex proprietatibus creaturae in Deum devenimus, non tamen semper ei attribuitur nomen significans proprietatem creaturae: imo quandoque nomen per quod a creatura differt; ut cum dicimus eum creatorem vel immensum: quandoque vero nomen significans idem in quo cum creatura aliquo modo convenit, sicut cum dicimus eum bonum vel sapientem: sic enim ex creaturis in Deum cognoscendo devenimus, ut cognoscamus eum esse aliam a creaturis et causam.

Ad secundum dicendum, quod ad veritatem negativae sufficit, quod aliquid eorum, quae in praedicti significatione continentur, subjecto non conveniat: non tamen sufficit ad veritatem affirmativae, quod unum tantum conveniat, nisi omnia conveniant. Quia ergo aliquid eorum quae ad significationem nominum pertinent, scilicet quantum ad modum significandi, Deo non competit, competit vero aliquid solam, scilicet res significata: ideo nomen a nobis impositum verius negatur de Deo ratione modi significandi, quam affirmetur ratione rei significatae: quamvis extra hoc nomen habeat quod proprie de Deo dicatur.

Ad tertium, de sapientia creata, dicendum, quod quamvis magis differat, quantum ad esse, sapientia creata ab increata, quam floritio prati a risu hominis, non tamen magis differt quantum ad rationem sapientiae: quia illa est una secundum analogiam in creatore et creatura; sed secundum aequivocam rationem dicitur pratum et homo ridere.

ARTICULUS III.

Ad tertium sic proceditur. Et 1. videtur quod non sit nisi unum nomen divinum. Dicit enim Hilarius: « Non sermoni res, sed rei sermo subjectus est. » Sed in divinis est omnimoda rei unitas; ergo non debet ibi esse nominum diversitas.

2. Praeterea, non est nisi duplex modus praedicandi in divinis; scilicet vel substantialiter vel relative. Sed nomina non possunt diversificari nisi vel quantum ad id quod significatur vel quantum ad modum significandi; ergo non erit nisi unum nomen divinum, propter unitatem rei, vel duo tantum propter duos modos significandi.

3. Praeterea, omne quod est in Deo, Deus est;

ergo omne nomen significans aliquid divinum, significat idem; ergo vel unicum est Dei nomen, vel omnia sunt synonyma.

Contra. Nullum nomen unum sufficit divinam perfectionem exprimere; ergo necesse est eum non uno tantum, sed pluribus nominibus nominari.

Praeterea, in Scripturis inveniuntur de eo multa nomina, ut ibi: Vocabitur nomen ejus Admirabilis, consiliarius etc.

Respondeo. Dicendum, quod multiplicitas divinorum nominum dupliciter contingit, vel ex parte Dei, vel ex parte creaturae. Primo modo dupliciter: vel propter differentiam rerum, et sic accidit multiplicitas nominum personalium et notionalium, cum personae et notiones re differant: aut propter differentiam rationum, et sic accidit multiplicitas nominum attributorum, quia attributa ratione differunt, ut dictum est superius in 2. d. Ex parte autem creaturae similiter dupliciter accidit: vel quia conditiones creaturae remouentur a creatore, et sic accidit multiplicitas nominum negativorum, ut immensus increatus, et sic de aliis: vel quia oppositae rationes propter diversas relationes realiter repectas in creatura, affirmantur de creatore, et sic accidit multiplicitas nominum designantium habitudinem ad creaturam, ut creator, Dominus etc.

Ad primum, de Hilario, dicendum, quod quamvis sit unitas in re essentiali, est tamen pluralitas in re personali et notionali; et in rationibus quibus diversimode etiam una essentia significari potest in diversa acceptione intellectus; secundum quae omnia divina nomina multiplicantur. Quae quidem rationes ex proprietate divinae naturae aequaliter in intellectu nostro causantur.

Ad secundum « non sunt nisi duo modi etc. » dicendum, quod verum est; sunt tamen ibi plures modi significandi et dicendi. Substantia enim multipliciter potest considerari; vel ut substantia vel ut scientia, et sic de aliis; et ex hoc accidit multiplicitas nominum divinorum.

Ad tertium dicendum, quamvis significet idem identitate rei dictae essentialiter, non tamen dictae personaliter, vel notionaliter, vel identitate rationis: hoc autem sufficit ad hoc quod nomina non sint synonyma.

ARTICULUS IV.

Ad quartam sic proceditur. Et 1. videtur quod divisio quam ponit Ambrosius, sit sufficiens, quae talis est: « Nomina aut significant essentiae unitatem » aut personae proprietatem, aut translative dicuntur. » Quaedam enim nomina dicuntur de Deo ex tempore, ut creator, Dominus etc.: sed illa non pertinent ad substantiam nec personam, cum substantia et persona sint aeternae, ista vero ex tempore: nec translative dicuntur, quia creaturis non conveniunt; ergo non continentur sub dicta divisione, et ita est insufficientis.

2. Praeterea, quaedam sunt nomina negativa quae de Deo dicuntur, ut immensus increatus: et ita cum nihil ponant, videtur quod non pertineant ad substantiam et personam, nec translative dicuntur cum non sint in creaturis; ergo insufficientis est dicta divisio.

3. Praeterea, hoc nomen Trinitas, non pertinet ad unitatem majestatis, nec alicui convenit personae, nec translative de Deo dicitur; ergo etc.

4. Praeterea, si sufficiens est divisio Ambrosii, quaeritur cur apponat Magister tres differentias divinorum nominum ad illam.

Respondeo. Dicendum, quod divisio Ambrosii, quae ponitur in litera, sufficiens est. Nec solum est divisio Ambrosii, sed etiam Augustini et Dionysii qui dividunt divina nomina in symbolicam Theologiam, quantum ad ea quae translative dicuntur; in unicam et discretam Theologiam, quantum ad ea quae proprie dicuntur de essentia et personis. Cujus divisionis sic patet sufficientia: quia Deus, vel nominatur per id quod prius in ipso est, et posterius creaturis, vel per similitudinem a creatoris sumptam. Si primo modo, hoc est dupliciter. Vel id per quod denominatur Deus commune est, et sic pertinet ad essentiam: vel proprium, et sic ad personam. Secundo modo sunt ea quae translative dicuntur.

Ad primum, de nominibus temporalibus, dicendum, quod quamvis respectus quos important realiter et temporaliter sint in creaturis, in Deo autem tantum secundum modum intelligendi, tamen praesupponunt aliquid aeternum et absolutum in Deo, ut Dominus ratione dominii dat intelligere potestatem in Deo, et similiter Creator: et ideo ad illa nomina reducuntur quae pertinent ad unitatem essentiae, ut Creator Dominus: vel ad proprietatem personarum, sicut increatus, missus et hujusmodi.

Ad secundum dicendum, quod ratio negativorum nominum fundatur super aliquam affirmationem, et ita relinquit in intellectu aliquid, sicut incorporeus simplicitatem: unde vel reducitur ad unitatem essentiae, ut immensus, increatus: vel ad distinctionem personarum, ut ingenitus.

Ad tertium dicendum, quod quamvis non dicat explicite propriam alicujus personae, tamen simpliciter et in communi includit omnia propria personarum, in quantum est quasi collectivum trium personarum. Similiter dicendum de his nominibus Persona, hypostasis, suppositus: quia quamvis non imponantur ab aliqua speciali proprietate personae, imponuntur tamen a proprietate in communi; et ita reducuntur ad ea quae significant proprietatem personalem.

Ad ultimum dicendum, quod divisio Magistri quam supra dedit quae talis est, « Nomina quae dicuntur de Deo, aut dicuntur ex tempore et relative, ut Dominus et hujusmodi; vel ex tempore, sed non relative, ut incarnatus: vel colligit omnia nomina propria personarum, ut Trinitas: » reducitur ad divisionem Ambrosii, ut ex praedictis patet.

DISTINCTIO XXIII.

Praedictis adjiciendum est etc. (V. edit. nostrae tom. VI, pag. 190.)

QUAESTIO UNICA.

Hic quaeruntur quatuor: 1.º an nomen personae proprie dicatur de Deo; 2.º quid nomen personae significet in divinis; 3.º an nomen personae pluraliter in divinis possit praedicari; 4.º de differentia horum quatuor nominum, scilicet essentia, subsistentia, substantia, et persona, et differentia nominum eis correspondentium in Graeco, scilicet *usia*, *usiosis*, *hypostasis*, *prosopon*.

ARTICULUS I.

Ad primum sic proceditur. Et 1. videtur quod hoc nomen persona non proprie in divinis dicatur. A quocumque removetur superius, et inferius; ergo a quocumque removetur particulare, et persona: sed a divinis particulare removetur; ergo et persona.

2. Praeterea, inter omnia composita in rebus inferioribus persona maxime est composita: quia ad ejus esse concurrunt quaelibet creaturae: sed in divinis est omnimoda simplicitas; ergo eis non congruit nomen personae.

3. Praeterea, persona dicitur quae subsistit alicui proprietati vel substati: sed Deus non proprie dicitur alicui substare; ergo non proprie de Deo dicitur hoc nomen persona.

Contra. Persona dicitur quasi per se una: sed hoc maxime Deo convenit; ergo et nomen personae.

Praeterea, persona dicit quid completum existens in natura intellectuali: sed hoc Deo competit; ergo et nomen personae.

Respondeo. In hoc nomine persona, duo considerata sunt: scilicet id a quo nomen imponitur, et id cui imponitur. Quantum ad primum, secundum Boetium, hoc nomen persona, impositum est a repraesentatione alicujus per impositionem larvae de quo gesta propria decantabantur, quae repraesentatio non proprie Deo convenit: ideo nomen persona, quantum ad id a quo impositum est, non proprie Deo convenit. Quantum vero ad secundum, cum impositum sit subsistenti, aut distincto in natura intellectuali, de quo talis repraesentatio fiebat, in Deo autem sit quid distinctum existens in natura intellectuali: ideo hoc nomen persona, quantum ad id cui nomen imponitur, proprie Deo convenit.

Ad primum, de particulari, dicendum, quod non est simile de hoc quod est particulare, et persona: quia particulare dicitur a parte, pars autem de suo nomine imperfectionem importat: et ideo non cadit in divinis: persona autem quantum ad id quod significat, non dicit imperfectionem, sed dignitatem: ideo persona in divinis convenit.

Ad secundum dicendum, quod quamvis persona in humanis sit maxime composita, hoc est, quia est in tali natura, non quia personalitas hoc exigit: unde in Angelis est persona simplex. Et ita nihil obstat quin possit dici de divinis.

Ad tertium dicendum, quod quamvis proprie secundum rem non sit substans in divinis, quia secundum rem nihil ponitur ibi sub aliquo, est tamen ibi secundum modum intelligendi, prout intelligitur Deus substans proprietati suae personali vel essentiali, secundum quod dicitur substantia cum suo esse, secundum quod dicitur substantia subsistentia. Et hoc est ideo, quia non est in divinis diversitas secundum rem ejus quod inest et cui inest; quae requirerentur ad hoc quod aliquid realiter sub alio reponeretur: est tamen ibi diversitas quantum ad modum intelligendi.

ARTICULUS II.

Ad secundum sic proceditur. Et 1. videtur, quod persona in divinis significet substantiam, primo per auctoritatem Augustini in litera, qui hoc expresse dicit lib. 7 de Trinitate: « Cum dicimus personam » Patris, non aliud dicimus quam substantiam Patris. »

2. Praeterea, dicit Boetius quod persona est rationalis naturae individua substantia; ergo persona est substantia.

3. Praeterea, quod respondetur ad quaestionem factam per quid, dicit substantiam: sed persona respondetur ad quaestionem factam per quid, ut dicit Magister in litera; ergo persona significat substantiam.

4. Praeterea, omne nomen relativum secundum nomen suum refertur ad aliquid: sed hoc nomen, persona, non refertur ad aliquid secundum nomen; ergo non significat relationem, et ita significat substantiam.

Contra. Secundum Boetium, substantia continet unitatem, relatio multiplicat Trinitatem: sed secundum personam multiplicatur Trinitas; ergo persona dicit relationem, non substantiam.

Praeterea, ad quodcumque genus reducitur inferius, et superius: sed persona est superius ad Patrem; Pater vero dicit relationem; ergo et persona.

Respondeo. Dicendum, quod significatio alicujus nominis potest dupliciter considerari. Uno modo formaliter: scilicet quantum ad id ad quod significandum nomen fuit impositum, secundum communem nominis rationem; sicut homo significat animal rationale mortale. Alio modo quasi materialiter quantum ad id cui nomen attribuitur in aliqua re speciali; sicut si dicatur quod persona in natura divina significat relationem, sicut color in nive significat albedinem. Nomen ergo personae, quia impositum est ad significandum rem subsistentem, distinctam ab aliis rebus subsistentibus in eadem natura, formaliter significat substantiam primam quae est suppositum, non autem substantiam quae est essentia vel quidditas. Quia vero subsistens distinctum in divinis, non potest esse aliquid absolutum, sed solum relativum; ideo quasi materialiter et attributive in divinis persona significat relativum: nam relatio in divinis est subsistens, et sic est ibi distinguens et distinctum. Et inde est, quod quidam dixerunt quod hoc nomen, persona, significat substantiam in divinis, quidam vero quod relationem. Quorum utriusque, aliquo modo, verum est. Sed si utriusque simul amplectamur, possumus dicere quod significat relationem per modum substantiae primae, id est in quantum est distinctum subsistens, et non in quantum est distinguens: sic enim significatur ratione proprietatis.

Ad primum, de Augustino dicendum, quod ly aliud intendit significationem personae quantum ad modum significandi, sed non quantum ad id quod significatur: et ideo quamvis significet relationem; quia tamen significat per modum substantiae, ideo dicit, quod nihil aliud significat, quam substantiam Patris.

Ad secundum, de Boetio, dicendum similiter quod in divinis persona dicitur significare substantiam, quia significat relationem per modum substantiae.

Ad tertium • ad interrogationem factam etc. • dicendum, quod quid quandoque quaerit de essentia, ut cum dicitur, quid est homo? respondetur, animal rationale mortale. Quandoque quaerit ipsum suppositum; ut cum quaeritur, quid natat in mari, respondetur, piscis. Et ita ad interrogationem factam per quid, prout quaerit de supposito, respondetur, tres personae.

Ad quartum dicendum, quod quamvis persona

significet relationem, non tamen per modum relationis; et ideo non refertur secundum nomen ad aliud.

ARTICULUS III.

Ad tertium sic proceditur. Et 1. videtur, quod nomen personae non praedicetur pluraliter in divinis: quia, ut dicit Augustinus in litera • esse tres • personas esse tria quaedam: • sed non conceditur quod Pater et Filius et Spiritus sanctus sint tria; ergo quod nec sint tres personae.

2. Praeterea, quamvis sint tres habentes divinitatem, non tamen possunt dici plures dii, propter unam naturam habitam; ergo a simili, quamvis sint plures subsistentes in natura divina; non tamen possunt dici plures personae, propter unam naturam.

3. Praeterea, persona significat quid per se subsistens substantialiter; ergo dicit esse substantiale: sed esse substantiale non multiplicatur per proprietates consequentes esse: ergo ratione trium proprietatum in Deo, non potest dici tres personae.

4. Praeterea, persona in sui intellectu includit substantiam, ut dictum est: sed nomen substantiae non ponitur pluraliter in divinis; ergo nec nomen personae.

5. Praeterea persona est subsistentia quaedam: sed subsistentia non ponitur pluraliter, secundum Boetium; ergo etc.

Contra. Fides in Deo asserit esse tres personas; ergo convenienter dicitur.

Respondeo. Persona dicit quid subsistens distinctum in natura intellectuali. Unde ubicumque reperiuntur aliqui distincti, habentes naturam intellectualem, ponuntur personae plures. Nec interest ad pluralitatem personarum, utrum habeant eandem naturam necne: definitio enim naturae in pluribus personis creatis accidit ex imperfectione naturae creatae, quae non est suum esse, sed accipit suum esse in supposito, unde in diversis suppositis est secundum diversum esse: haec autem imperfectio in Deo non est, et ideo nihil prohibet esse unam essentiam in personis pluribus.

Ad primum, de Augustino, dicendum, quod accipit tria pro tres. Vel dicendum, quod sunt tria non simpliciter, sed sunt tria quaedam, scilicet tria supposita.

Ad secundum dicendum, quod secus est de hoc nomine, Deus: quia termini substantiales non multiplicantur, non multiplicata forma a qua imponuntur: hic autem terminus, Deus, imponitur ab essentia divina, quae non multiplicatur: sed iste terminus, persona, imponitur a personali proprietate, quae multiplicatur in diversis suppositis.

Ad tertium dicendum, quod secus est de proprietatibus quae sunt in inferioribus, quia non sunt res subsistentes, nec substantiam constituunt, sed consequuntur esse substantiale: sed proprietates in divinis sunt subsistentes, et personas in esse substantiali constituunt, licet ipsum esse substantiale non distinguant, sed suppositum habens illud.

Ad quartum dicendum, quod apud Latinos hoc nomen, substantia, quamvis secundum proprietatem vocabuli respondeat nomini Graeco, quod est hypostasis, tamen secundum communem usum loquendi, accipitur etiam pro essentia: ideo ad vitandum errorem, non dicimus tres substantias, sicut Graeci tres hypostases: sed unam substantiam, sicut unam essentiam, vel usiam.

Ad quintum dicendum, quod secundum proprietatem vocabuli hoc nomen, subsistentia, in divinis pluraliter praedicari non potest, sicut nomen substantia; quia id, quod respicit subsistentiam in divinis, est unum, scilicet esse: proprietas vero, quam respicit substantia, non est una. Sed propter equivocationem praedictam substantiae transponitur apud nos ordo verborum, quantum ad usum loquendi: ut scilicet usiae respondeat essentia, usios substantia, hypostasi subsistentia: et sic nos dicimus unam substantiam, et plures subsistentias: Graeci vero e converso plures hypostases, sed unam usiosim sicut unam usiam.

ARTICULUS IV.

Ad quartum sic proceditur. Et 1. videtur, quod dicta nomina nullam habeant distinctionem. Dicit enim Boetius in Commento super Praedicam., quod usia significat substantiam compositam: sed substantia composita est individuum subsistens in genere substantiae, quod significatur nomine substantiae, vel hypostasis, vel personae; ergo videtur quod hoc nomen essentia vel usia non differat secundum significationem ab aliis.

2. Praeterea, nihil subsistit, nisi illud quod in se habet esse completum: sed esse completum non invenitur nisi in particulari. Cum ergo particulare in genere substantiae dicatur hypostasis vel substantia prima, videtur quod subsistentia sit idem quod substantia.

3. Praeterea, cum utrumque in suo nomine importet positionem alicujus sub aliquo, videtur quod sint idem.

4. Praeterea, Boetius in lib. de Duabus nat. dicit, quod hoc nomine hypostasis non utuntur Graeci nisi pro individuo rationalis naturae; haec autem dicitur persona; ergo hypostasis vel prosopon sunt idem, sive substantia et persona.

Contra. Dicit Boetius in lib. de Duabus nat. cap. 4, quod quatuor sunt nomina in Graeco: scilicet usia, usiosis (1), hypostasis, prosopon, quibus Marcus Tullius adinvenit quatuor correspondentia, scilicet essentiam, subsistentiam, substantiam et personam; ergo differunt haec nomina; alioquin non sufficienter responderent (2) illis quatuor si essent synonyma.

Praeterea, Boetius in Commento super Praedicam. dicit, quod usia dicit compositionem ex materia et forma prima, usiosis primam formam, hypostasis primam materiam; ergo habent differentiam in significato.

Respondeo. Dicendum, quod differentia est horum trium nominum: essentia, subsistentia et substantia prima; ideo oportet accipere secundum differentiam horum trium verborum esse subsistere et substare. Quorum primum, scilicet esse, significat id quod est omnibus generibus commune: subsistere vero specialem modum essendi, qui competit substantiis, scilicet esse per se; substare vero importat respectum substantiae. non ad esse proprium, sed ad accidens quod ei inest: unde proprie individuorum est, quibus accidentia insunt. Sicut ergo aliquod individuum in genere substantiae est, in quantum actu invenitur in rerum natura, subsistit in quantum est per se non indigens alio fundamento in quo sustentetur, substare in quantum est accidentis subjectum ad esse. Aut potest dici essentia dupliciter: vel ut quod est, vel ut quo est. Sicut quod

(1) *Al. usiosis: et infra pluries.*(2) *Al. non re sufficienter responderetur.*

est, sic omne illud quod habet esse potest dici essentia. Si vero ut quo est, sic illud quo aliquid nominatur ens, dicitur essentia: quia quaelibet res denominatur esse secundum suum proprium modum per suam quidditatem, quae in rebus compositis composita est, utpote omnia rei principia comprehendens: ideo secundum Boetium, usia significat compositum. Similiter subsistere dicitur a subsistentia, vel ut quod subsistit, vel ut quo subsistit. Si ut quod subsistit; sic omne quod continetur in genere substantiae dicitur subsistentia: et quia per prius continentur in genere substantiae genera et species quam individua. ideo per prius subsistendo dicuntur, secundum Boetium in lib. de Duabus naturis: quamvis genera et species non subsistant nisi in individuis, tamen individuis non convenit tale esse, nisi in quantum sunt sub generibus et speciebus in praedicamento substantiae comprehensa. Si vero ut quo subsistit, sic forma dicitur subsistentia vel usiosis secundum Boetium in Commento Praedicam., quia per eam aliquid ponitur in genere substantiae. Similiter, a substare dicitur substantia, vel ut quod substare, et sic individua dicuntur proprie substantiae vel hypostases secundum Boetium in lib. de Duabus naturis: vel ut quo substare: et sic dicitur materia hypostasis, vel substantia secundum Boetium in Commento Praedicam., quia ex materia habet individuum quod possit accidentibus substare. Tamen nomen essentiae, magis est in usu ut quo est; nomen vero subsistentiae vel hypostasis sive substantiae, dicitur magis quod subsistit, vel substare. Sic ergo subsistentia includit in suo intellectu essentiam, quia omne quod subsistit, in alia (1) natura subsistit. Similiter hypostasis includit in suo intellectu subsistentiam; quia non potest aliquid accidenti substare, nisi in se subsistens. Persona vero includit hypostasim ad determinatam naturam, scilicet rationalem.

Ad primum • usia significat etc. • dicendum, quod verum est; non tamen ex hac forma et materia demonstrata: ideo non tantum particularis substantia, sed etiam universalis dicitur usia, quia universale significat quid compositum. Vel dicendum, quod secundum communem usum loquendi, usia significat compositum ut quo est, sicut humanitas; non ut quod est, sicut homo.

Ad secundum dicendum, quod subsistere duo dicit: scilicet esse, et determinatum modum essendi. Quamvis autem esse simpliciter non sit nisi individuorum, tamen determinatio essendi est ex natura generis et speciei: ideo genera et species subsistentiae dicuntur per prius; sed particulare dicitur subsistentia per posterius.

Ad tertium • utrumque positionem importat aliquid sub aliquo, • dicendum, quod differenter: quia substantia dicitur aliquid, in quantum subest accidenti: sed subsistentia dicitur aliquid, in quantum est sub esse suo.

Ad quartum dicendum, quod hypostasis apud Graecos aliquid habet ex proprietate significationis, et aliquid ex usu: ex proprietate enim significationis habet, quod significet quamlibet substantiam particularem; sed ex usu accommodatum est nobilioribus substantiis. Et ideo ipsi utuntur eodem modo hoc nomine hypostasis, sicut nos utimur hoc nomine persona: sed talis usus non est apud nos in hoc nomine substantia.

(1) *Lege in aliqua.*

DISTINCTIO XXIV.

Hic diligenter inquiri oportet etc. (V. edit. nostrae tom. VI, pag. 198.)

Hic quaeruntur duo. Primo de nominibus significantibus unitatem et pluralitatem in divinis. Secundo de nominibus significantibus ea quae sunt pluralitati annexa.

QUAESTIO I.

Circa primum quaeruntur tria: 1.^o utrum in divinis sit aliquis numerus; 2.^o utrum nomina numeralia praedicentur de Deo positive vel negative; 3.^o utrum significantur essentiam vel notionem.

ARTICULUS I.

Ad primum sic proceditur. Et 1. videtur, quod non sit numerus in divinis. Boetius enim de Trinitate dicit: « Hoc vere est unum, in quo nullus est numerus, » et loquitur de Deo etc.

2. Praeterea, numerus est multitudo mensurata per unum, secundum Philosophum 3 Metaph. Sed Deo non convenit mensurari; ergo numerus Deo non competit.

3. Praeterea, ubi invenitur numerus, et passiones numeri, ut aggregatio, par et impar. Sed hujusmodi passiones non sunt in Deo; ergo nec numerus.

Contra. Bernardus ad Eugenium: « Si una est, » inquit, essentia, et tres personae, quis numerum negat in divinis? » ergo etc.

Praeterea, nomen Trinitatis numerum importat: sed hoc nomen conceditur in divinis: ergo est ibi numerus.

Respondeo. Sicut ratio unitatis consistit in unionem, ita ratio numeri in divisionem. Sicut ergo aliqua se habent ad divisionem, ita et ad numerum. Quaedam autem sunt quae simpliciter dividuntur, quia secundum materiam et quantitatem, sive secundum essentiam et formam. Et ideo in istis est numerus simpliciter. Quaedam autem sunt, quae secundum quid dividuntur, quia secundum proprietates accidentales: et hoc est dupliciter: quia vel dividuntur secundum proprietates absolutas, sicut Socrates albus dicitur alius a se nigro: vel secundum proprietates relativas, ut Socrates dexter, est alius a se sinistro; et in his est numerus secundum quid, importat tantum distinctionem. Cum ergo in divinis sit personarum distinctio per proprietates relativas, et non separatio secundum essentiam, in divinis est numerus personarum secundum quid, scilicet personarum et proprietatum; non numerus simpliciter, scilicet essentialium, et quidditatum: quamvis in divinis proprietates relativae non sint accidentales.

Ad primum, de Boetio, dicendum, quod loquitur de numero essentialium, et non personarum.

Ad secundum dicendum, quod mensuratio ista numeri, est tantum in acceptione nostra; non quod ipsae res sint mensuratae, scilicet divinae personae.

Ad tertium, ubi invenitur numerus, dicendum, quod hoc verum est de numero simpliciter, cujus numerata faciunt aggregationem aliquam.

ARTICULUS II.

Ad secundum sic proceditur. Et 1. videtur, quod unitas et numerus ponant aliquid in divinis. Si enim dicuntur secundum remotionem, cum per unum non removeatur nisi pluralitas, et per pluralitatem removeatur unitas, utrumque dicit negationem negationis: sed negatio negationis est rationis tantum; ergo in Deo non est unitas et pluralitas realis, quod falsum est.

2. Praeterea, privatio vel negatio definitur per positionem; si ergo unitas privet multitudinem, et e converso, in definitione unitatis cadit multitudo, et in definitione multitudinis unitas; et ita erit circulus in definitione utriusque; quod est contra Philosophum in Posterioribus.

3. Praeterea, hoc nomen Trinitas, numerum importat; si ergo numerus in divinis nihil ponat, non erit ibi Trinitas secundum rem, sed secundum rationem tantum.

4. Praeterea, privatio nunquam constituit habitum, nec e converso: sed multitudo constituitur ex unitatibus; ergo videtur, quod unitas non privet multitudinem, nec e converso.

Contra. Secundum Philosophum, unum et multa opponantur sicut privatio et habitus: sed privatio nihil ponit; ergo nec unum: et ita neque numerus, cum constituatur ex unitatibus.

Praeterea, unum dicitur ex eo quod non dividatur: sed haec est negatio tantum; ergo unum nihil, praecipue positive, praedicat: similiter nec numerus, cum constitutus sit ex unitatibus.

Respondeo. Dicendum, quod numerus, qui est species quantitatis, aliquid ponit, et similiter unitas, quae est ejus pars: aliter enim non esset species alicujus generis. Unde si numerus qui est species quantitatis, et unitas, quae est ejus principium, praedicentur de Deo, oportet dicere, quod aliquid ponant, per modum quo scientia vel sapientia ponunt, ratione differentiae, et non ratione generis. Oportet autem quod de Deo dicantur, si idem sit unum quod convertitur cum ente, et multitudo ei opponitur (1) cum numero et uno quod est principium numeri, ut quibusdam videtur. Sed quia quod determinatur ad aliquod genus non potest esse divisivum entis communis, quod ambit omne genus, non videtur quod unum et multa quae dividunt ens, sint idem cum uno et numero quae pertinent ad genus quantitatis. Et ideo aliis videtur quod numerus qui est species quantitatis, et unitas quae est ejus principium, sint tantum in rebus corporalibus, quia talis numerus ex definitione continui causatur: et haec ratio ad genus quantitatis determinatur uno et multo, quae dividunt ens, omnia circumeuntibus. Et secundum hoc, cum nulla conditio rei corporalis, de Deo dici possit nisi metaphorice, numerus qui est species quantitatis, et unitas quae est ejus principium, de Deo non dicuntur: sed unum quod convertitur cum ente, et multitudo ei correspondens. Hoc autem unum ponit aliquid, quia ipsum ens: sed super hoc non addit aliam naturam: quia quaelibet res est una per suam essentiam, aliter iretur in infinitum: sed addit super ens negationem definitionis (2). Similiter multitudo addit supra res definitionem (3).

(1) *Lege opposita.*

(2) *Lege divisionis.*

(3) *Lege divisionem.*

eius prima origo, et communis est oppositio per affirmationem (1), et secundum hoc addit multitudo negationem, inquantum multae sunt res, quarum una non est alia. Et sic unum et multa, quae ad ens commune pertinent, ponunt quidem aliquid, quia ipsum ens vel res: sed quantum ad id quod superadditur, nihil ponunt: et secundum hoc potest salvari dictum Magistri.

Ad primum « per unum removetur pluralitas » dicendum, quod falsum est: per unum enim removetur definitio (2) quae est per affirmationem et negationem, quia istam claudit in intellectu suo (unum enim est, quod non dividitur per ens et non ens) non tamen pluralitatem: ens enim et non ens non causant rationem multitudinis, nisi quatenus utrique intellectus attribuit rationem unitatis. Et ita unitas praecedit in intellectu multitudinem, et non e converso. Unde unitas secundum rationem suam non excludit pluralitatem, sed tantum definitionem (3).

Ad secundum dicendum, quod jam patet responsio: quia unitas non privat multitudinem, unde non definitur per multitudinem sicut opponitur (4): sed tantum per definitionem (5) secundum affirmationem et negationem, ut dictum est.

Ad tertium dicendum, quod, sicut dictum est, numerus aliquid ponit, quia ipsas res numeratas: sed id quod superaddit numerus in divinis, est negatio affirmationi opposita: unde non sequitur, quod Trinitas non sit secundum rem in divinis.

Ad quartum dicendum, quod unitas non est privatio multitudinis, nisi ex consequenti: scilicet inquantum in multitudine includitur definitio (6) per affirmationem et negationem. Vel dicendum, quod unum non est privatio illius multitudinis quam constituit, sed multitudinis quae negatur esse in ipso quod dicitur unum.

ARTICULUS III.

Ad secundum sic proceditur. Et 1. videtur, quod dictiones numerales significent essentiam. Quicquid enim a se dicitur in divinis, substantialiter dicitur, et essentiam significat: sed huiusmodi dictiones a se dicuntur, et non ad aliud referuntur; ergo etc.

2. Praeterea, secundum Boetium omnia praedicamenta transeunt in substantiam, cum in divinam praedicationem veniunt, praeter Ad aliquid: sed unitas et multitudo significant quantitatem; ergo cum non dicant ad aliquid, in divinis dicunt substantiam.

3. Praeterea, nulla relatio communis est tribus; unitas vero communis est tribus, quia quaelibet persona dicitur una; ergo unitas non significat relationem; ergo nec multitudo, quae constituitur ex unitatibus.

Contra. Duo et tres multiplicant idem, quod significat unum: sed duo et tria non multiplicant substantiam, cum haec sit una; ergo nec unum significat substantiam.

Respondeo. Unitas et multitudo, quae sunt differentiae entis, et veniunt in divinam praedicationem,

ut dictum est, non addunt super ens, nisi rationem indistinctionis et distinctionis. Cum ergo ens communiter se habeat ad absoluta et relativa, similiter distinctio et indistinctio; ideo termini numerales communiter se habent in divinis, ad absoluta et relativa: unde secundum quod diversis adjunguntur, significant relationem, vel essentiam. Unde cum dicitur unus Deus, significat hoc quod dico unus, essentiam. Similiter cum dicitur tres dii, hoc quod dico tres significat diversitatem essentiae. Cum autem dicitur, Pater est unus, hoc quod dico, unus, significat unitatem personalis proprietatis in Patre. Cum autem dicitur, tres personae, hoc quod dico, tres, significant pluralitatem personalium proprietatum. Sed sicut ens per se dictum intelligitur de substantia, quamvis substantiae et accidenti conveniat, similiter unum per se dictum nihil addito significat essentiam.

Ad primum « huiusmodi dictiones non referuntur ad aliud » dicendum, quod hoc verum est, quantum ad suas rationes a quibus sumuntur nomina. Et ideo secundum nomen ad aliud non dicuntur: sed quantum ad illud circa quod ponuntur rationes, possunt importare absolutum et relatum. Vel dicendum, quod cum unitas et multitudo sint differentiae entis, sicut ens, ita unitas et multitudo circumveniunt omne genus: ideo absolutis et relatis convenire possunt.

Ad secundum dicendum, quod unitas et multitudo non veniunt in praedicationem divinam ut species quantitatis. Et ideo ratio non procedit.

Ad tertium dicendum, quod unus non significat notionem vel relationem aliquam determinate: sed quolibet indeterminate.

Ad quartum, duo et tres non multiplicant substantiam, dicendum, quod falsum est si addantur termino essentiali, ut cum dicuntur tres dii.

QUAESTIO II.

Deinde quaeritur de nominibus, quae sunt pluralitati annexa. Et circa hoc quaeruntur duo: 1.º de his quae se habent ad pluralitatem sicut principium, ut diversitas, et huiusmodi; 2.º de nomine Trinitatis, quod consequitur pluralitatem quasi collectivum.

ARTICULUS PRIMUS.

Ad primum sic proceditur. Et 1. videtur, quod in Deo sit diversitas. Hilarius enim dicit: « Pater et Filius et Spiritus sanctus sunt per substantiam » quidem tria, per consonantiam vero unum. Sed multitudo in substantia facit diversitatem; ergo in divinis est diversitas.

2. Praeterea, alienum denominatur ab alio: sed Filius est alius a Patre; ergo potest dici alienus.

3. Praeterea, singulare significat aliquid demonstratum, subsistens in natura communi: sed Pater est aliquid demonstratum; ergo potest dici singularis.

4. Praeterea, videtur quod possit dici unicus, per hoc quod cantat Ecclesia, « trinum Deum unicumque, cum favore praedicat (1). »

Respondeo. Dicendum, quod circa fidem Trinitatis duo fuerunt errores: scilicet Arii, qui induxit pluralitatem essentiae et Sabellii qui abstulit plu-

(1) Adde et negationem.

(2) Lege divisio.

(3) Lege divisionem.

(4) Lege oppositam.

(5) Lege divisionem.

(6) Lege divisio.

(1) In veteri hymno Dedicacionis Ecclesiae: cujus loco hodie legi'ur: « Deumque trinum et unicum jugi canore praedicat. »

ralitatem personarum: quorum neutrum concedit fides catholica. Et ideo ea oportet concedere quae utrique haeresi adversantur, ut ea negare quae utrique sunt consona. Unde contra Arium quatuor confirmat Ecclesia. Primo unitatem essentiae: unde dicit Deum unum, et negat diversitatem. Secundo essentiae simplicitatem. Et ideo confitetur Deum simplicem; et negat divisionem et separationem, quae ponunt compositionem. Tertio similitudinem personarum in essentia, prout significatur ut forma quaedam: unde confitetur Filium similem Patri, et negat alienitatem, quae dicit extraneitatem in natura. Quarto aequalitatem in potentia, magnitudine et aeternitate: unde negat ipsum disparem vel inaequalem. Contra Sabellium autem affirmat (1) quatuor. Primo pluralitatem personarum et distinctionem; et sic confitetur pluralitatem, et negat singularitatem. Secundo, quia pluralitas est ibi non tantum secundum rationem, sed secundum rem: ideo dicit distinctionem veram et excludit unicum. Tertio ponit in rebus personalibus esse, ordine originis: et ideo praedicat discretionem quae importat ordinem et excludit confusionem. Quarto ponit tres personas unitas societate amoris quae est Spiritus sanctus. Et ideo praedicat consonantiam, ut patet ex Hilario et excludit solitudinem.

Ad primum, de Hilario, dicendum, quod utitur nomine substantiae pro supposito, non pro essentia.

Ad secundum • alienum denominatur etc. • dicendum, quod denominatur ab alietate naturae non ab alietate suppositi: ideo Filius, quamvis dicatur alius, non potest dici alienus, quia designatur extraneitas naturae.

Ad tertium dicendum, quod persona divina non potest dici singularis proprie, quia singulare est cuius essentia est incommunicabilis, essentia autem Patris est communicabilis. Hoc autem non dicit persona: ideo potest dici Pater persona.

Ad quartum dicendum, quod unicum proprie sumptum, dicit unitatem tam essentiae quam personae: unde quando Deus dicitur unicus ratione unitatis essentiae, non proprie sumitur hoc quod est unicum: sed sumitur unicus pro uno.

ARTICULUS II.

Ad secundum sic proceditur. Et 1. videtur quod Trinitas non sit nomen essentiale. Quicquid enim praedicatur de unaquaque persona singulariter, et de omnibus simul, dicit substantiam: sed hoc nomen Trinitas est huiusmodi: dicitur enim Trinitas, trium unitas. Pater autem est trium unitas, et sic de aliis personis; et hae tres simul personae sunt una Trinitas; ergo hoc nomen Trinitas dicit substantiam.

2. Praeterea, nulla unitas trium est nisi essentialis: sed Trinitas est trium unitas; ergo Trinitas est essentialis.

3. Praeterea, quod non refertur ad aliud est essentiale: sed hoc nomen Trinitas non refertur ad aliud; ergo dicit substantiam.

Contra. Boetius ait: • Relatio multiplicat Trinitatem, sed essentia continet unitatem; • ergo Trinitas non significat essentiam, sed relationem.

Respondeo. In nomine Trinitatis importatur u-

(1) *Al. versa linea, Contra, Sabellium autem etc.*

nitatis et numerus. Sed unitas in divinis dicitur dupliciter: scilicet unitas essentialis et unitas personalis. Ideo quidam dixerunt, quod hoc nomen Trinitas importat unitatem personarum: et secundum eos sic exponitur Trinitas, quasi ter unitas, quia sunt ibi tres unitates personales; et secundum hoc simpliciter relationem significat. Sed contra hoc est quod a Trinitate nominamus Deum trinum: sic autem hoc nomen trinus non posset exponi ut diceretur Pater vel trinus Deus quasi ter unus. Ideo alii dicunt, quod unitas importata in hoc nomine Trinitas, est unitas essentialis: et isti sic exponunt. Trinitas, id est trium unitas, ut Isidorus in litera dicit. Et secundum hoc Trinitas utramque significat, scilicet unitatem essentiae et distinctionem personarum: sed tamen diversimode: quia secundum etymologiam nominis, unitas essentiae significatur ibi in recto, pluralitas autem personarum in obliquo: sed secundum impositionem nominis, cum hoc nomen sit impositum ad significandum numerum personarum, est e converso. Unde sensus est: Trinitas, id est tres personae unius essentiae, sicut Magister in litera exponit.

Ad primum • quicquid praedicatur de singulari etc. • dicendum, quod quamvis quantum ad etymologiam nominis de omnibus in singulari praedicatur, non tamen quantum ad veram significationem nominis, ad quam significandam nomen imponitur: quia Pater non potest dici tres personae unius essentiae, quamvis possit dici unitas trium personarum.

Ad secundum • nulla unitas trium etc. • dicendum, quod hoc argumentum procedit secundum etymologiam nominis, secundum quam unitas significatur ibi in recto; et sic significat ibi essentiam, ut dictum est; non tamen secundum significationem ad quam significandam nomen imponitur. Trinitas enim est trium unitas, ut supponit argumentum.

Ad tertium • illud quod non refertur etc. • dicendum, quod quamvis quantum ad id ad quod significandum nomen imponitur, non significet relationem secundum numerum, et sic secundum nomen non refertur ad aliud; tamen quantum ad ea circa quae numerus ille ponitur in divinis, significat ipsas relationes, quae solum in divinis numerantur.

DISTINCTIO XXV.

Praeterea considerandum est etc. (*V. edit. nostrae tom. VI, pag. 206.*)

QUAESTIO UNICA.

Hic quaeruntur quatuor: 1.º de definitione personae; 2.º utrum persona de creaturis et de Deo dicatur univoce; 3.º de communitate respectu divinarum personarum; 4.º utrum tres personae sint tres entes vel tres res etc.

ARTICULUS I.

Ad primum sic proceditur. Et 1. videtur quod haec definitio Boetii: • Persona est rationalis naturae individua substantia, • non sit recte assignata. Natura enim rationalis praedicatur in recto de persona; ergo male ponitur in obliquo in definitione personae.

2. Praeterea, multiplicato definito multiplicatur illud quod in definitione ponitur in recto; ergo cum substantia ponatur in recto in definitione personae; cum sint tres personae in divinis, erunt tres substantiae: sed hoc est falsum; ergo dicta definitio non convenit divinis personis.

3. Praeterea, cum dicitur « persona est individua substantia, » aut substantia stat ibi pro essentia, aut pro hypostasi. Non pro essentia: essentia enim non est individua, cum sit communicabilis. Non pro hypostasi, quia secundum Boetium hypostasis est substantia individua; ergo negatio est, apponere huic quod est substantia, hoc quod est individua.

4. Praeterea, dicta definitio personae convenit animae rationali, quae tamen non est persona; ergo inconvenienter assignata est illa definitio.

5. Praeterea, Magister in libro tertio, 10 distinctione, dicit, quod dicta definitio non convenit personis divinis; ergo insufficiens est.

Respondeo. Dicendum, quod nomina quaedam sunt primae impositionis tantum, quae significant ipsas res absolute, ut homo, animal: quaedam sunt secundae impositionis tantum quae significant solas intentiones, ut universale et particulare, genus et species: quaedam vero includunt utrumque, quae significant rem simul et intentionem, in quantum convenit sive accidit ipsi rei. Et hujusmodi est hoc nomen hypostasis apud Graecos, quod significat substantiam primam, et hoc nomen persona apud nos. Et ideo Boetius in definitione personae ponit genus ipsius rei, quam persona significat, scilicet substantiam; et addit duas differentias; unam per quam notificatur persona ratione intentionis secundae, scilicet individuum; aliam per quam notificatur ratione rei, in hoc quod dicit, rationalis naturae.

Ad primum ergo dicendum, quod natura, ut Boetius dicit, quandoque sumitur pro substantia quae agere et pati potest, et sic praedicatur in recto de persona: quandoque autem sumitur pro forma partis vel totius, sive pro specifica differentia secundum Boetium, et sic non praedicatur in recto, sed in obliquo; et hoc modo sumitur in definitione personae.

Ad secundum dicendum, quod substantia aequivocatur ad standum pro hypostasi vel pro essentia. Primo modo accipitur in proposito, et sic multiplicatur, sicut et persona: sed modo non utimur substantia pro essentia, quamvis antiqui aliqui usi sint pro hypostasi.

Ad tertium dicendum, quod hoc nomen substantia de se habet quod potest stare pro prima vel secunda substantia; sed per additum quod est individua stat pro hypostasi, quae est substantia prima; et ita non superfluit.

Ad quartum « convenit animae etc. » dicendum, quod falsum est: quia in hac definitione individuum ponitur pro communicabili. Incommunicabile vero privat ibi triplicem communicabilitatem: scilicet universalis, partis, et unionis cum digniori. Propter primum non est persona aliquid commune: propter secundum anima quae est pars hominis; propter tertium humana natura quae est Dei verbo unita.

Ad quintum, de dicto Magistri, dicendum, quod si proprie acciperentur nomina posita in dicta definitione, ut substantia, secundum quod dicitur a substando accidenti, individuum, id est distinctum accidentibus, et rationale a discursu inquisitionis,

S. Th. Opera omnia. V. 22.

sic non conveniret illa definitio divinae personae, et sic Magister intelligit. Tamen large accipiendo dicta nomina, bene competunt ei, prout substantia significat ens non in alio, individuum incommunicabile, rationale intellectuale. Unde Richardus ipsam ad proprietatem reducens dicit, quod divina persona est divinae naturae incommunicabilis existentia.

ARTICULUS II.

Ad secundum sic proceditur. Et 1. videtur quod persona univoce praedicatur de Deo et creatura. Quantumcumque enim aliqua differant, univoce convenire possunt in negatione aliqua; sicut hoc, non esse lapidem univoce convenit Deo et homini, sed tamen ratio personae in negatione: est enim individua substantia; ergo univoce Deo et creaturis convenit.

2. Praeterea, quicquid praedicatur de aliquibus secundum unum nomen et secundum unam rationem, univoce eis convenit. Sed nomen personae et definitio assignata convenit Deo et creaturis, ut dictum est; ergo videtur quod univoce dicatur.

Contra. Quaecumque non conveniunt in uno genere generalissimo, non potest de eis aliquid dici univoce: sed Deus et creatura sunt hujusmodi; ergo de eis non dicitur aliquid univoce.

Praeterea, persona significat distinctum in natura aliqua: sed non est eadem ratio distinctionis personae in divinis et Angelis et in hominibus: quia in divinis est distinctio per solas rationes originis, in Angelis per proprietates absolutas, in hominibus utroque modo, ut dicit Richardus; ergo persona aequivocatur de eis.

Respondeo. Persona analogice dicitur de Deo et creaturis: et quantum ad rem significatam per prius est in Deo quam in creaturis: sed quantum ad modum significandi, sive impositionem nominis, est e converso, qui est secundum modum intellectus nostri: et simile est de aliis nominibus quae Deo et creaturis conveniunt analogice.

Ad primum « ratio personae consistit in negatione, » dicendum, quod quamvis individuum secundum rationem hominis importet negationem, tamen talis negatio fundatur super aliquam rem, scilicet super rationem alicujus principii distinguentis in quo non univoceatur Deus a natura creata. Vel dicendum, quod in definitione personae non tantum ponitur hoc nomen, individuum; sed etiam quaedam alia quae Deo et creaturis non possunt univoce convenire.

Ad secundum dicendum, quod ratio non est una univoce unionis, sed analogice.

Ad tertium concedimus.

Ad quartum dicendum, quod quamvis non sit una ratio specialis, tamen est una ratio communis, prout distinctio abstrahit ab omni speciali distinctione; et hanc communem rationem distinctionis importat persona.

ARTICULUS III.

Ad tertium sic proceditur. Et 1. videtur quod persona non sit commune in Trinitate. Quicquid enim communiter convenit tribus personis, significat essentiam et singulariter personam. Sed persona pluraliter praedicatur in Trinitate. Pater enim et Filius et Spiritus sanctus sunt tres personae; ergo persona non est commune in Trinitate.

2. Praeterea, omne commune, quod est de ratione alicujus specialis, respectu ejus se habet ut universale; ergo persona est communis Patri et Filio, cum non sit extra rationem utriusque, quia alias esset accidens et per consequens universalis; sed totum universale non est in divinis; ergo persona non est communis.

3. Praeterea, id quod de se habet rationem incommunicabilis non potest dici commune, quia haec sunt opposita: sed persona habet rationem incommunicabilis; ergo non potest esse communis.

Contra. Omne nomen, quod recipit signum distributivum commune est: sed hoc nomen persona tale est; ergo etc.

Praeterea, omne nomen quod praedicatur de pluribus suppositis alicujus naturae est commune, sed in huiusmodi est persona; ergo etc.

Respondeo. Dicendum, quod duplex est commune in divinis: quoddam secundum rem, ut essentia: aliud secundum rationem, ut persona. Sed de communitate rationis ejus est triplex opinio. Quidam enim dicunt, quod est commune secundum unam rationem proportionis: quia sicut Pater se habet ut subsistens ad naturam divinam, ita et Filios. Alii dicunt quod est commune secundum rationem intentionis, sicut hoc nomen genus est commune ad omnia genera. Sed haec duo dicta in idem referuntur, quia intentio non dicit nisi proportionem et habitudinem communis ad proprium vel e converso.

Sed contra hoc est, quia persona non est nomen secundae impositionis solummodo, quasi significet intentionem vel habitudinem alicujus subsistentis ad naturam communem, sicut hoc nomen, suppositum, sed magis est nomen primae impositionis significans illam rem cui accidit talis intentio: unde communitas personae in divinis non potest esse secundum communitatem talis habitudinis vel intentionis, sicut est commune hoc nomen suppositum tribus personis. Ideo dicendum est aliter, quod haec communitas est per unam rationem rei, sicut ratio animalis est communis homini et asino. Ratio autem rei est duplex: quaedam est communis, sicut ratio animalis; et quaedam specialis, sicut ratio hominis. Nihil autem in divinis est commune secundum unam rationem rei specialem, quia nihil unum secundum specialem rationem potest numero multiplicari in divinis, quia talis multiplicatio est secundum materiam. Est tamen ibi commune secundum unam generalem sive communem rationem rei, sicut relatio communis est ad paternitatem et filiationem: unde secundum hoc persona secundum communem rationem rei quam significat est commune quid in divinis; significat enim communem rationem distincti subsistentis in tali natura: Pater autem significat specialem rationem distincti speciali ratione subsistentis in natura communi, et similiter Filios.

Ad primum « quicquid communiter etc. » dicendum, quod verum est de illo communi, quod est commune secundum rem unam; non tamen de eo, quod est commune secundum rationem unam; quia (1) idem est persona Patris et Filii, quia solum unum esse est in divinis.

Ad secundum « omne commune quod est de ratione, » dicendum, quod plus exigitur ad rationem universalis secundum quod commune in diversis speciebus sive suppositis sit secundum diversum

(1) Ad quia.

esse; quod non est in proposito, quia persona non dicit specialem rerum distinctionem, sed generalem.

Ad tertium dicendum, quod quamvis id quod est persona, sit incommunicabile: nihil tamen prohibet rationem personae esse communem pluribus personis: sicut patet de hoc nomine individuum quod de pluribus praedicatur.

ARTICULUS IV.

Ad quartum sic proceditur. Et 1. videtur quod tres personae non possint dici tres entes vel tres res. Quicquid enim absolute praedicatur in divinis, hoc singulariter de tribus praedicatur: sed res et ens absolute dicuntur, ergo etc.

2. Praeterea, sicut est una divinitas Patris et Filii a qua sumitur nomen Dei, ita unum esse et una quidditas. Sed propter unitatem deitatis non dicitur nisi unus Deus; ergo eadem ratione, nec dicuntur tres personae, tres entes vel tres res, cum nomen entis imponatur ab esse et nomen rei a quidditate, ut dicit Avicenna.

3. Praeterea, Pater et Filius non distinguuntur nisi relationibus: sed relatio, quantum ad respectum quo distinguit, non ponit aliquid, sed ad aliquid; ergo ex hoc quod relationibus distinguuntur, non dicuntur tres entes vel tres res.

Contra. Nihil idem potest esse realiter Pater et Filius respectu ejusdem: sed Pater realiter est Pater Filii; ergo non potest esse realiter idem.

Praeterea, Augustinus dicit: « Res quibus fruendum est, est Pater et Filius et Spiritus sanctus; » ergo hoc nomen res in plurali numero ponitur.

Respondeo. Ens, secundum Avicennam, ab esse imponitur, sicut res a quidditate. In divinis autem unicum est esse. Et ideo quantum ad id a quo nomen enti imponitur, non praedicatur in divinis pluraliter. Sed quia diversimode impositum est ad esse significandum, scilicet adjectivum et substantive, adjectivum vero numerum recipit a suppositis, substantive autem a forma, a qua imponitur: ideo hoc nomen ens, si substantive sumatur, non praedicatur nisi singulariter in divinis: si autem sumatur adjectivum, potest pluraliter praedicari. Substantiva enim plurificantur ratione formae significatae adjectiva ratione suppositorum. Quamvis etiam quidditas sive essentia divina sit una secundum rem, tamen ratione est multa, in quantum est aliqua ratio substantiae et relationum realiter distinctarum; quia licet relationes idem sint quod essentia divina secundum rem, ratione tamen differant, quia aliquid est de ratione unius, quod non est de ratione alterius. Et ideo hoc nomen res, secundum quod sumitur a ratione essentiae, singulariter praedicatur: secundum vero quod sumitur a ratione relationis, praedicatur pluraliter. Et sic potest dici quod Pater et Filius et Spiritus sanctus sunt una res, et sunt tres res.

Ad primum « quicquid absolute praedicatur in divinis etc. » dicendum, quod quamvis res de suo nomine dicatur absolute; tamen ratione formae, a qua sumitur, scilicet formae personalis, dicitur relative. Similiter quamvis hoc nomen ens de suo nomine absolute dicatur; tamen quia adjectivum est, quod recipit numerum a suo substantivo, potest in plurali numero praedicari. Et simile est in aliis nominibus adjectivis divinis.

Ad secundum « sicut est una Deitas etc. » di-

cendum, quod non est simile. Quia Deus imponitur a forma absoluta, et ideo tantum est substantivum: ens autem potest esse adjectivum: sed res imponitur a forma, quae non est tantum absoluta, sed etiam relata. Et ideo Deus non potest in plurali praedicari in divinis, possunt tamen res et ens.

Ad tertium dicendum, quod quamvis relatio non ponat ex illo respectu aliquid absolutum, ponit tamen aliquid relatum. Et ideo relatio est quaedam res. Si enim secundum rationem relationis, sive respectus, non poneret aliquid: cum secundum suum esse, ratione cuius ponit aliquid inherens, non cadat in genere relationis, non esset aliquod genus entis.

DISTINCTIO XXVI.

Nunc de proprietatibus, etc. (V. edit. nostrae tom. VI, pag. 214.)

Hic est duplex quaestio. Primo de hypostasi. Secundo de proprietatibus.

QUAESTIO I.

Circa primum quaeruntur duae: 1.^o utrum hypostasis sit in divinis; 2.^o utrum significet relationem.

ARTICULUS I.

Ad primum sic proceditur. Et 1. videtur quod nomen hypostasis recipi non debeat in divinis. In assumptione enim fidei non debet recipi aliquod nomen, quod praestet occasionem erroris. Sed hoc nomen hypostasis est huiusmodi; quia, ut dicit Hieronymus, in hoc nomine venenum sub melle latet: ergo hoc nomen non est etc.

2. Praeterea, hypostasis apud Graecos significat substantiam primam, quae substantia est particularis: sed in Deo neque universale neque particulare est; ergo sicut in divinis non dicitur quod sit genus vel species substantiae quae est substantia secunda, ita non debet dici quod sit ibi hypostasis quae est substantia prima.

3. Praeterea, Boetius dicit in lib. de Duabus naturis: « Individuas substantias ideo Graeci hypostases vocaverunt, quia accidentibus suppositae et subjectae sunt. » Sed in Deo non est aliquod accidens; ergo etc.

Contra. Omne quod est perfectum, Deo est attribuendum: sed hoc nomen hypostasis significat perfectum in genere substantiae; ergo etc.

Praeterea, Augustinus dicit lib. de Trin., quod eadem ratione Graeci dicunt tres hypostases, quos tres personae: sed secundum nos nomen personae communiter ponitur in divinis; ergo et secundum Graecos hoc nomen hypostasis.

Respondeo. Dicendum, quod quamvis hoc nomen substantia, in Latino respondere videatur huic nomini hypostasis in Graeco, non tamen omnino idem significat, secundum usum utriusque linguae; nam hoc nomen hypostasis apud Graecos significat tantum substantiam particularem, quae est substantia prima, ut per Boetium patet. Sed Latini utuntur nomine substantiae, tam pro prima, quam pro secunda. Substantia autem particularis nihil aliud esse videtur, quam quid distinctum subsistens. Cum ergo in divinis invenitur aliquid distinctum subsistens, ut ex praedictis patet, recte ibi nomen hy-

postasis dici potest secundum quod divina verbis humanis significari contingit.

Ad primum ergo dicendum, quod Hieronymus dicit, in hoc nomine venenum sub melle latere, propter abusum huius nominis. Nam haeretici apud Latinos veram huius vocabuli significationem ignorantes, introducebant hoc nomen, ac si idem significaret omnino quod hoc nomen substantia; ut sic ex pluralitate hypostasis, pluralitatem introducerent essentialium: nam hoc nomen substantia apud Latinos essentialium significat. Sic ergo nomen hypostasis dicitur venenosum, non propter veram significationem nominis, sed propter eius abusum.

Ad secundum dicendum, quod quamvis in divinis non sit universale et particulare, est tamen ibi communicabile et incommunicabile: communicabile autem non sufficit ad rationem generis vel speciei, sicut incommunicabile subsistens ad rationem hypostasis. Et ideo, licet in divinis non sit genus vel species substantiae, est tamen hypostasis.

Ad tertium dicendum, quod quamvis in divinis non sit accidens, sunt tamen ibi proprietates quae significentur ibi quodammodo per modum accidentium. Et ideo in quantum divinae personae eis subsunt, hypostases sunt.

ARTICULUS II.

Juxta hoc quaeritur utrum in divinis hypostasis dicat solummodo absolutum.

Dicendum, quod hoc nomen persona non differt ab hoc nomine hypostasis, nisi quod addit determinatam naturam. Quod patet ex hoc, quod hypostasis secundum Boetium est individua substantia, persona vero individua substantia rationalis naturae. Hypostasis ergo in rationali in natura accepta, nihil aliud est quam persona; sicut animal, cum rationali actu, nihil aliud est quam homo. Unde, cum divina natura sit rationalis, largo modo accipiendo rationem pro quolibet intellectuali: oportet quod hypostasis divina sit idem quod persona divina; quia hoc quod superadditur in intellectu personae suppletur per additionem. Sicut ergo hoc nomen persona in divinis significat relationem per modum rei subsistentis, sic et hoc nomen hypostasis.

QUAESTIO II.

Deinde quaeritur de proprietatibus. Et circa hoc quaeruntur tria: 1.^o utrum relationes sunt in divinis; 2.^o utrum per eas tantum personae divinae distinguantur; 3.^o utrum solis relationibus originis.

ARTICULUS I.

Ad primum sic proceditur. Et 1. videtur quod relationes non sint in divinis. Quicquid enim est in Deo, praedicatur de ipso: sed ad aliquid omnino non praedicatur, ut dicit Boetius in lib. de Trin.; ergo etc.

2. Praeterea, ubicumque est relatio secundum rem, ibi est aliqua dependentia; relativa enim a se invicem dependent: sed in Deo nulla est dependentia: si enim ab aliquo dependeret, non esset necesse esse per seipsum; ergo in Deo nulla est relatio.

3. Praeterea, quod advenit alicui et recedit absque sui mutatione, nihil ponit in re: sed relatio est huiusmodi, nam absque omni mutatione possum

alicui fieri dexter et sinister; ergo relatio, nec in Deo, nec in aliqua re ponit aliquid.

Contra. In Deo vera paternitas invenitur, ex qua etiam omnis paternitas in caelo et in terra nominatur, ut dicitur Eph. 5: sed paternitas quaedam relatio est; ergo etc.

Praeterea, fides catholica in Deo plures personas confitetur; ergo et personarum distinctionem, quia ubi non est distinctio non est numerus. Sed nihil absolutum est ibi distinctum; ergo necesse est ibi ponere relationes.

Respondeo. Dicendum, quod secundum omnes catholicos necesse est in divinis relationes ponere, aliter necesse est incidere in haeresim Arii vel Sabellii. Nam cum tres personas confiteamur in Deo, si eas secundum aliquid absolutum distinguamus et ibi omnino relationes non recipiamus, in haeresim Arii labimur qui essentiam dividebat. Si vero relationes ibi nihil secundum rem ponere accipiamus, sequitur haeresis Sabellii, qui personas non realiter, sed solum nominaliter distinguebat. Necesse est ergo relationes realiter ponere in divinis. Sciendum tamen quod relatio dupliciter potest considerari. Uno modo quantum ad id ad quod dicitur, ex quo rationem relationis habet: et quantum ad hoc non habet quod ponat aliquid. Quamvis etiam ex hoc non habeat quod nihil sit. Sunt enim quidam respectus qui sunt aliquid secundum rem, quidam vero, qui nihil: quod in aliis generibus non invenitur. Alio modo quantum ad id in quo est: et sic quando habet causam in subjecto, realiter inest, et ipse respectus est realis. Quando vero non habet causam in subjecto, sed in re alia vel in sola ratione, tunc non est respectus realis, sed rationis tantum. Sic ergo relationes in Deo respectus reales sunt, quia respiciunt ipsam essentiam communicatam. Ex consideratione autem hac duplici relationis, diversae processerunt opiniones; quibusdam dicentibus relationes aliquid esse, quibusdam vero quod nihil. Quod si esset usquequaque verum, relatio genus entis non esset, nec personae divinae realiter distinguerentur.

Ad primum ergo dicendum, quod Boetius loquitur de relatione secundum primam considerationem, ex qua non habet quod aliquid praedicet.

Ad secundum dicendum, quod ratio illa sequeretur, si diceretur Deus dependere ad aliquid secundum essentiam diversam.

Ad tertium dicendum, quod cum aliquid refertur per respectum realem, quamvis altero mutato ei adveniat vel abscedat actualis respectus sine sui mutatione, non tamen radicaliter, sive causaliter: quia etsi destruat ille cui sum aequalis, ut sic actu aequalis sibi esse non possim, tamen adhuc in me manet quantitas ratione ejus adhuc aequalis essem, si alter a pristina dispositione non recessisset.

ARTICULUS II.

Ad secundum sic proceditur. Et 1. videtur quod relationibus personae divinae non distinguantur. Persona enim significat substantiam individuum rationalis naturae: sed substantialis distinctio non fit per relationes, sive per quascumque proprietates; ergo relationes oppositae non sufficienter distinguunt personas.

2. Praeterea, simplicissima seipsis definiuntur et distinguuntur; sed divinae personae sunt simplicissi-

mae; ergo non relationibus, sed seipsis distinguuntur.

Contra. Boetius dicit, quod in divinis sola relatio multiplicat Trinitatem: sed ab eodem est multiplicatio et distinctio; ergo sola relatio est principium distinctionis in divinis.

Respondeo. Dicendum, quod circa hoc est duplex opinio. Quidam enim dicunt, quod relationes non distinguunt hypostases divinas, sed notificant distinctiones earum, quae seipsis distinguuntur. Sed hoc non videtur verum: nam hypostasis, aut significat aliquid absolutum tantum, et sic nullo modo distingui potest: aut significat relationem tantum, et sic hypostases a seipsis distingui, nihil aliud est quam relationibus distingui personas divinas. Aut significat utrumque: et sic patet quod cum non distinguitur quantum ad aliquid absolutum, remanet quod distinguitur quantum ad relationes tantum: et ideo remanet quod sola relatio sit in divinis distinguens, ut alii dicunt. Et hujus ratio est, quia omnis alia distinctio imperfectionem importat in altero distinctorum, aut in utroque. Nam alia est distinctio secundum materiam et quantitatem, et sic in utroque ponit partialitatem. Vel est secundum oppositionem formalem: quae quidem si attendatur secundum affirmationem et negationem vel privationem et habitum, constat quod in altero ponit defectum. Similiter si attendatur secundum contrarietatem, nam alterum horum contrariorum semper est imperfectum secundum Philosophum, et quasi privatio respectu alterius, sicut nigrum respectu albi. Sola autem oppositio relationis potest esse sine imperfectione ex utraque parte. Nam (1) cum in Deo nulla sit imperfectio, per solam relationem potest esse in divinis distinctio.

Ad primum dicendum, quod ratio illa procedit in creaturis, in quibus relationes sunt accidentia; non autem in divinis, in quibus habent esse substantiale, ut dictum est.

Ad secundum dicendum, quod hypostases vel personae seipsis distinguuntur, et tamen distinguuntur relationibus, quia ipsae relationes subsistentes sunt hypostases vel personae.

Juxta hoc quaeritur utrum solum relationibus originis distinguantur personae divinae.

Respondeo. Dicendum, quod personae divinae non possunt distingui per alias relationes quam per relationes originis. Cujus ratio est, quia omnis relatio vel est identitatis, vel aequalitatis et similitudinis, vel est diversitatis, ut inaequalitas, et dissimilitudo. Nulla autem ratio identitatis potest esse distinctionis principium: sed talis relatio distinctionem praesupponit. Aequalitas enim (2) non distinguit aequali: sed magis unit, licet non possit esse nisi distinctorum. Relatio vero diversitatis est uno modo secundum aliud habere, sicut cum dissimilia dicuntur in quantum diversas habent qualitates, dextrum sinistram, in quantum habent diversos situs. Hoc autem non potest esse in divinis; quia sic distinctio relationis importaret distinctionem absolutorum, quae ad essentiam pertinent. Alio modo est relatio diversitatis, secundum quod alio ordine habetur idem; et hoc invenitur in relationibus originis. Nam generans et generatum habent aliquantulum unam naturam. Generans enim generat sibi simile, non autem eodem ordine, quia genitum habet eam a generante. In sola ergo distinctione, quae est per

(1) *Lege* ualde.

(2) *Lege* etiam.

relationes originis, potest inveniri unitas absolutorum, et distinctio secundum relationes. Et ideo per solas relationes originis divinae personae distinguuntur.

DISTINCTIO XXVII.

Hic quaeri solet etc. (V. edit. nostrae tom. VI, pag. 225.)

Hic est duplex quaestio. Prima de proprietatibus. Secunda de verbo.

QUAESTIO I.

Circa primum quaeruntur tria: 1.^o quomodo se habeant proprietates ad personas; 2.^o quomodo se habeant ad hypostases; 3.^o quomodo se habeant ad actus personales.

ARTICULUS I.

Ad primum sic proceditur. Et 1. videtur, quod proprietates non constituent personas. Illud enim quod secundum intellectum sequitur ad aliquid, non constituit ipsum: sed proprietas secundum intellectum sequitur ad personam sicut accidens ad substantiam individuum; ergo proprietas personam non constituit.

2. Praeterea, nihil constituitur per seipsum: sed persona est ipsa proprietas subsistens, ut dictum est; et in littera etiam dicitur quod proprietas Patris est esse Patrem; ergo proprietas non constituit personam.

3. Praeterea, si proprietas personam constituit, habet quandam similitudinem cum differentia constitutiva quae speciem constituit. Sed quot sunt differentiae constitutivae, tot sunt species per eas constitutae, si accipiantur finales differentiae. Cum ergo praedictae notiones sint finales, quia ulterius dividi non possunt, ut dictum est, videtur quod sint tot personae quot notiones; et ita dicitur Deus non solum trinus, sed etiam quinquus.

4. Praeterea, differentiae constitutivae adinvicem non distinguuntur si sint in eodem, nisi secundum magis commune et minus commune: sed notiones in eodem existentes, scilicet in Patre, adinvicem distinguuntur non secundum magis commune et minus commune, ut patet de innascibilitate et paternitate; ergo huiusmodi proprietates non tenent in divinis personis locum differentiae constitutivae, ut personas constituent.

Sed contra. Unaquaeque species denominatur a forma per quam constituitur, vel ab aliquo quod accipitur loco ejus: sed nomina personarum sumuntur a proprietatibus; ergo proprietates personas constituent.

Praeterea, in aliis rebus eadem sunt differentiae constitutivae et divisivae: sed per proprietates personae distinguuntur abinvicem, ut in littera dicitur; ergo proprietates personas constituent.

Respondeo. Dicendum, quod sicut in divinis non differt quo est et quod est quantum ad esse simpliciter, ita nec quantum ad esse hoc vel illud: quia quicquid de Deo dicitur, est ejus esse; sicut idem est bonitas in Deo et bonum, sapientia et sapiens: et similiter oportet dicere quod in Deo sit idem paternitas et Pater. Ex hac ratione quidam dicere voluerunt, quod proprietates sunt ipsae personae, non autem personis insunt, nec eas constituent; non attendentes quod ea quae in Deo secun-

dum rem sunt idem, ratione distinguuntur; ex quo contingit quod quamvis deitas sit ipse Deus, tamen Deus significatur ut constitutus per divinitatem, sicut homo constitutus per humanitatem; et ita etiam Pater significatur ut constitutus per paternitatem; et sic intelligendum est, quod proprietates personas constituent.

Ad primum ergo dicendum, quod in Patre est duo considerare: scilicet modum substantiae et rationem relationis. Quantum ad primum relatio intelligitur ut adveniens, et sic habet rationem proprietatis. Quantum autem ad secundum, intelligitur ut constituens. Quod quidem in creaturis accidere non potest, quia distinguuntur et constituuntur in esse personali per aliquid absolutum et substantiale; unde proprietates creaturarum sunt tantum proprietates.

Ad secundum dicendum, quod quamvis Pater et paternitas sint idem re, differunt tamen ratione, vel modo significandi, ut dictum est.

Ad tertium dicendum, quod non omnes proprietates seu notiones constituent personas: sed illae tantum quibus personae abinvicem distinguuntur; sicut paternitas distinguit Patrem ab aliis personis, et filiatio Filium, et processio Spiritum sanctum. Innascibilitas vero cum sit negatio, et sic super affirmationem fundetur, non potest esse principium distinguens personam, sed sequitur proprietatem personae distinctae. Et sic sunt tres tantum proprietates personales, id est, constituentes personas. Innascibilitas autem est proprietas personae, sed non personalis: communis vero spiratio nec est proprietas personae nec personalis, quia non distinguit aliquam personam ab omnibus aliis. Et sic patet quare Deus non debet dici quinquus propter quinque notiones, quia per eas non constituuntur nisi tres subsistentes.

Ad quartum dicendum, quod plures proprietates vel notiones uni personae inherentes non differunt re, sed ratione tantum, in quantum per eas diversimode innotescit persona, sicut patet de attributis essentialibus; nec aliqua earum habet rationem differentiae constitutivae nisi una. Proprietates vero personales realiter distinguuntur sicut et personae, ratione oppositionis relativae.

ARTICULUS II.

Ad secundum sic proceditur. Et 1. videtur quod remotis relationibus per intellectum, hypostases remaneant. Remoto enim quod additur alicui, remanet secundum intellectum id cui superadditur. Sed proprietates ad dignitatem pertinentes in definitione personae superadduntur ad hypostasim. Est enim persona hypostasis proprietate distincta ad dignitatem pertinente; ergo abstracta proprietate a persona, remanet secundum intellectum hypostasis.

2. Praeterea, sicut se habent attributa essentialia ad essentiam, ita proprietates ad hypostasim; sed secundum Boetium in lib. de Hebdomadibus, remota per intellectum bonitate a Deo, adhuc in intellectu ejus essentia manet; ergo remotis proprietatibus adhuc remanet hypostasis.

3. Praeterea, proprietas constituit personam per modum differentiae constitutivae; sed remotis differentis constitutivis secundum intellectum, adhuc remanet illud cui differentiae superadduntur; ergo remotis proprietatibus adhuc remanet hypostasis cui proprietates superadduntur.

Sed contra. Hypostasis nominat aliquid incommunicabile in divinis; sed remotis proprietatibus nihil est ibi incommunicabile, quia praeter intellectum relationum in divinis nihil est nisi essentia quae communis est; ergo abstractis proprietatibus, hypostasis non manet secundum intellectum.

Praeterea, Damascenus dicit quod Pater et Filius et Spiritus sanctus in omnibus conveniunt praeter ingenerationem, et generationem, et processionem; remotis ergo proprietatibus non manet aliquid in quo tres personae non conveniant, sed conveniunt (1) in hypostasi; ergo hypostasis non remanet.

Respondeo. Dicendum, quod hic est duplex opinio. Quidam enim dicunt quod abstracta per intellectum proprietate personali remanet in divinis hypostasis distincta. Sed hoc non est verum: quia in divinis nihil potest esse distinctum, nisi relative dictum; et hoc non remanet relatione per intellectum abstracta. Et ideo alii dicunt, quod abstracta proprietate personali, neque persona neque hypostasis remanet. Ad eius evidentiam sciendum, quod aliter se habet circa abstractionem formae naturalis, et formae rationalis, quae est differentia. Nam abstracta secundum rem vel per intellectum forma naturali, remanet subjectum idem secundum rem, sicut abstracta albedine idem corpus, et abstracta forma ignis eadem numero materia prima. Abstracta vero forma rationali, scilicet differentia, non remanet idem animal secundum rem, sed secundum rationem generis. Proprietas autem relativa in divinis, se habet per modum differentiae, et non per modum formae naturalis. Nam nihil absolutum potest intelligi subjectum relationi per modum suppositi; quia sic absolutum distingueretur; unde suppositum relationis in divinis non est nisi relatam. Propter quod dicitur, quod relatio affirmat se cum suo supposito: quia idem est in Deo relatio et relatam. Relatio autem ad id quod refertur, in quantum huiusmodi, se habet per modum constituentis differentiae, sicut albedo ad album; et ideo remota paternitate vel filiatione, non potest remanere idem suppositum relationis, quod est hypostasis divina; quamvis secundum intellectum remaneat intellectus hypostasis in generali.

Ad primum ergo dicendum, quod licet proprietas ad dignitatem pertinens, superaddatur ad intellectum hypostasis absolutae, includitur tamen in intellectu hypostasis in divinis; sicut rationale includitur in intellectu animalis quod est homo, quamvis non animalis simpliciter.

Ad secundum dicendum, quod quantum ad modum intelligendi qui est ex parte nostra, bonitas, sapientia et huiusmodi, superadduntur essentiae divinae per modum formae naturalis, quia significantur ut assequentia substantiam secundum Damascenum; sed relatio superadditur ad hypostasim in divinis per modum differentiae. Et ideo non est simile.

Ad tertium patet solutio ex dictis: nam remota differentia remanet genus; non quasi unum quid secundum rem, sed solum ratione.

ARTICULUS III.

Ad tertium sic proceditur. Et 1. videtur quod actus personalis secundum intellectum praecedat

(1) *Lege sed non conveniunt.*

proprietates personales. Omnis enim relatio secundum intellectum sequitur id supra quod fundatur, sicut aequalitas quantitatem: sed relationes originis fundantur supra actiones originis, ut patet per Philosophum in 3 Metaphysicorum; ergo personales actus, secundum intellectum praecedunt relationes, quae sunt proprietates personales.

2. Praeterea, ad actum aliquem nihil praesupponitur secundum intellectum, nisi quod est principium actus: sed non intellecta relatione potest intelligi persona, quae est principium actus personalis. Separata enim paternitate, remanet Pater, quamvis, ut ingenuus; ergo relatio in divinis non praecedit intellectum personalis operationis.

3. Praeterea, sicut se habet generatio passiva ad Filium, ita generatio activa ad Patrem: sed generatio passiva secundum intellectum praecedit filiationem Filii; ergo similiter praecedit generatio activa paternitatem Patris.

4. Praeterea, idem videtur ex hoc, quod in littera dicitur, quod ideo est Pater, quia genuit.

Sed contra. Prius est intelligere personam, quam actum personae; sed proprietas relativa constituit personam; ergo secundum intellectum praecedit actum personae.

Praeterea, propria forma cujuslibet est principium proprii actus eius; sed propria forma Patris, in quantum huiusmodi, est ipsa paternitas; ergo secundum intellectum est principium generationis, quae est propria operatio Patris.

Respondeo. Dicendum, quod quidam dixerunt simpliciter relationes secundum intellectum sequi actus personales. Sed illud non potest intelligi, supposito quod persona et hypostasis in divinis relationibus distinguantur et constituantur, ut supra ostensum est. Et ideo aliter dicendum est, quod nihil prohibet relationi aliquid convenire ut relatio est, et aliquid ut subsistens est. Secundum enim quod relatio est, sic secundum intellectum sequitur actum, a quo relatio intelligitur innasci: secundum autem quod subsistens est, praecedit intellectum operationis, sicut et substantia praecedit actionem. Et ideo hypostasis Patris praecedit secundum intellectum actum generationis. Et quia id quod constituit et distinguit hypostasim, est secundum intellectum prius hypostasi, inde est quod relatio significata per modum formae constituentis, praecedit actum personalem: ut in intelligendo talis ordo servetur, ut primo intelligatur paternitas, secundo pater, tertio generatio activa, quamvis secundum rem omnino sint idem in Deo, sicut intellectus, intelligens, intelligere.

Ad primum dicendum, quod objectio illa procedit de relatione secundum quod relatio est; prout vero est constitutiva personae, sic e converso se habet.

Ad secundum dicendum, quod remota paternitate, non remanet hypostasis Patris ut distincta in divinis. Per hoc enim quod Pater est ingenuus, non potest distingui nisi a genito, qui esse non potest paternitate remota. Unde in divinis intellectus ingenui sequitur intellectum paternitatis. Et ideo remota paternitate, non remanet incaseibilitas quae est proprietas personae, quamvis posset remanere ut attributum essentiae.

Ad tertium dicendum, quod aliter est de generatione activa et passiva. Nam generatio activa est a forma generantis. Et ideo secundum intellectum

sequitur paternitatem, prout est forma Patris. Sed generatio passiva non est a forma geniti. Et ideo quolibet modo praecedit filiationem.

Ad quartum dicendum, quod Magister accipit generare loco proprietatis personalis, quae est paternitas: ut potest patere considerando verba ejus in hac distinctione et in praecedenti. Vel potest dici, quod Magister non intendit ponere ordinem causae, sed ejusdam concomitantiae; quia esse Patrem et generare, se consequuntur, sicut esse Filium, et esse genitum.

QUAESTIO II.

Deinde quaeritur de verbo. Circa quod quaeruntur duo: 1.^o utrum verbum in divinis dicatur personaliter vel essentialiter; 2.^o utrum dicatur de Spiritu sancto, vel tantum de Filio.

ARTICULUS I.

Ad primum sic proceditur. Et 1. videtur, quod verbum in divinis essentialiter dicatur. Augustinus enim dicit, 9 de Trinitate: « Verbum quod insinuare intendimus cum amore notitia est: » sed tam amor quam notitia sunt essentialia; ergo verbum essentialiter dicitur in divinis.

2. Praeterea, quicquid dicitur, est verbum; sed secundum Anselmum in Monologion, tam Pater quam Filius, quam Spiritus sanctus dicitur; ergo quodlibet eorum est verbum; et sic verbum essentialiter dicitur.

3. Praeterea, quilibet dicens, habet aliquod verbum; sed secundum Anselmum, Pater et Filius et Spiritus sanctus sunt unus dicens; ergo eis est commune unum verbum; et ita verbum essentialiter dicitur.

4. Praeterea, omne illud quod dicit respectum ad creaturam, est essentialiter: sed verbum est hujusmodi. Verbum Augustinus exponit, dixit et facti sunt, id est verbum genuit, in quo erat ut fierent; ergo etc.

Sed contra est, quod Augustinus dicit in 6 de Trinitate quod solus Filius dicitur verbum.

Praeterea, ad hoc est auctoritas Richardi de sancto Victore qui dicit in litera (scilicet de Trinitate) solum Filium verbum dici.

Respondeo. Dicendum, quod verbum in divinis proprie loquendo non potest dici nisi personaliter. Et hoc patet si inspiciamus quid sit verbum in mente nostra; quod nihil aliud esse invenitur quam aliquid actualiter intellectum sive conceptum in intellectu, quod est vocis verbo pronuntiabile. Omne autem actualiter intellectum, sive conceptum, vel excogitatum a nobis, est expressum ab aliquo sive exortum, saltem sicut actualiter consideratum oritur ex habituali cognitione. Et ideo, si in divinis omnino proprietates verbi servetur, verbum significabit quod est realiter ab alio exortum. Omne autem tale est personale in divinis. Et ideo verbum, loquendo proprie, non dicitur nisi personaliter: et huic etiam attestatur communis usus Scripturae.

Ad primum ergo dicendum, quod Augustinus loquitur de notitia actuali, quae sola est verbum, ut idem Augustinus dicit, 14 de Trinitate; ita ut per notitiam intelligamus id, quod intellectu concipitur. Hoc autem in se implicat ortum ex alio, ut dictum est.

Ad secundum dicendum, quod non solum di-

citur verbum, sed etiam res per verbum, quae scilicet verbo manifestatur. Et quia verbum quod Pater profert, est manifestativum Patris et Spiritus sancti: ideo Pater non dicit solum Filium, sed etiam se et Spiritum sanctum.

Ad tertium dicendum, quod secundum Augustinum, 5 de Trinitate, solus Pater est dicens, quia ipse solus emittit verbum. Anselmus autem accipit large dicere pro intelligere.

Ad quartum dicendum, quod in verbo non importatur respectus ad creaturas principaliter; sed quasi ex consequenti. Verbum enim habet respectum, et ad dicentem, qui in divinis est Pater, et ad id quod manifestatur per verbum, quod iterum principaliter est Pater. Sed quantum in dispositione Patris est creaturas producere secundum aliqualem sui similitudinem, sic etiam ex consequenti in verbo intelligitur respectus quidam ad creaturam.

ARTICULUS II.

Ad secundum sic proceditur. Et 1. videtur, quod nomen verbi Spiritui sancto conveniat. Basilius enim dicit in tertio sermone de Spiritu sancto: « Sicut Filius se habet ad Patrem, eodem modo se habet Spiritus sanctus ad Filium. Et propter hoc dicitur Patris quidem verbum Filius, Filii autem verbum Spiritus sanctus. »

2. Praeterea, Heb. 1 dicitur de Filio: « Cum sit splendor gloriae et figura substantiae ejus portans omnia verbo virtutis suae: » et ita Filius habet verbum a se procedens, quo omnia portantur. Spiritus ergo sanctus, qui procedit a Filio, verbum dicitur.

3. Praeterea, verbum de sui ratione manifestationem importat; sed sicut Filius manifestat Patrem, et Spiritus sanctus manifestat Patrem et Filium, sicut dicitur Joan. 16, quod Spiritus sanctus docet omnem veritatem; ergo Spiritus sanctus dicitur verbum.

Sed contra est, quod Augustinus dicit in lib. de Trinitate: quod sicut in Trinitate solus Filius dicitur verbum, ita solus Spiritus sanctus dicitur donum.

Praeterea, verbum in sui intellectu includit nativitatem. Est enim verbum sapientia genita, secundum Augustinum: sed nativitas non convenit Spiritui sancto; ergo nec nomen verbi.

Respondeo. Quod verbum dicitur dupliciter. Uno modo proprie: scilicet illud quod est per se alicujus manifestativum. Hoc autem est id, quod intellectu concipitur. Per hoc enim aliquid fit immediate intellectui notum. Alio modo dicitur verbum communiter: et ita improprie omne illud, unde potest sumi alicujus rei manifestatio, verbum dici potest; ut si dicamus fumum esse verbum ignis. Primo ergo modo in divinis solus Filius dicitur verbum, quia ipse solus procedit processione intellectus. Secundo autem modo potest dici verbum et Spiritus sanctus, in quantum per ipsum manifestantur Pater et Filius: et sic intelligit Basilius. Unde patet responsio ad primum.

Ad secundum dicendum, secundum Glossam, quod verbum accipitur ibi pro imperio Filii, quod metaphorice dicitur verbum, quia verbo consuevimus imperare. Vel secundum Basilium intelligitur de Spiritu sancto ratione jam dicta.

Ad tertium patet solutio ex dictis.

DISTINCTIO XXVIII.

Praeterea considerari oportet etc. (V. edit. nostrae tom. VI, pag. 252.)

Hic est duplex quaestio. Prima de innascibilitate. Secunda de imagine.

QUAESTIO I.

Circa primum quaeruntur duo: 1.^o utrum innascibilitas sit notio Patris; 2.^o utrum innascibilitas, sit ejus proprietas personalis.

ARTICULUS I.

Ad primum sic proceditur. Et 1. videtur, quod innascibilitas non sit notio Patris. Notiones enim divinarum personarum sunt relationes. Sed ingenitus non significat relationem, quia secundum nomen ad aliud non refertur; ergo innascibilitas non est notio Patris.

2. Praeterea, nihil potest poni notio Patris, per quod essentiae divisio detur intelligi: sed si dicatur Pater ingenitus, datur intelligi divisio essentiae: quia si Pater est ingenitus, haec est vera, Deus est ingenitus. Hanc etiam constat esse veram, Deus est genitus. Et sic videtur sequi quod non sit unus Deus, per hoc quod affirmatio et negatio non verificantur de eodem; ergo innascibilitas non est notio Patris.

3. Praeterea, innascibilitas est negatio nascibilitatis, quae est proprietas Filii: sed negationes aliarum proprietatum, scilicet paternitatis, communis spirationis et processiois, non sunt notiones alienius personae; ergo innascibilitas non debet esse notio personae Patris.

Sed contra, illud per quod differt Pater a Filio debet esse notio; sed per innascibilitatem differt Pater a Filio; ergo innascibilitas est notio Patris.

Praeterea, sicut Filius se habet ad nativitatem, ita Pater ad innascibilitatis notionem: sed nativitas est notio Filii; ergo innascibilitas, quae est nativitatis negatio, est notio Patris.

Respondeo. Dicendum, quod in divinis Pater est principium non de principio. Unde oportet, quod quantum ad utrumque innotescat: scilicet quantum ad hoc quod est principium, et quantum ad hoc quod est non de principio. Et ideo, sicut quantum ad hoc quod est principium ponitur notio ejus paternitas, vel communis spiratio; ita quantum ad hoc quod est non de principio ponitur notio ejus innascibilitas.

Ad primum ergo dicendum, quod ingenitus, quamvis directe non contineatur in genere relationis, reducitur tamen ad relationem dupliciter. Primo quidem per modum cognitionis; quia negationes per affirmationes, sicut privationes per habitus cognoscuntur, ideo ad genus affirmationis reducuntur. Secundo ratione causalitatis; quia affirmatio unius oppositi est causa remotionis reliqui oppositi; et sic positio paternitatis in persona Patris, est causa remotionis oppositae relationis, scilicet nativitatis.

Ad secundum dicendum, quod relationes non determinant essentiam, sed personam. Essentia enim nec generatur nec nascitur, sed persona. Et ideo positio et negatio relationis in divinis non demonstrant divisionem essentiae, sed distinctionem personae.

Ad tertium dicendum, quod notiones affirmati-

vae in divinis, vel pertinent ad rationem principii, vel ad rationem ejus quod est de principio. Remotio autem principii non est dignitatis. Et ideo non ponitur notio personae, neque negatio paternitatis, neque communis spirationis. Negatio vero ejus quod est a principio non est dignitatis, nisi sit universalis, ut supra dictum est. Et ideo innascibilitas, prout ponitur notio Patris, excludit omnino esse ab alio, et non solum esse ab alio per nativitatem; propter quod Spiritui sancto non convenit. Ideo tamen a negatione nativitatis nomen sortitur, quia processio Spiritus sancti speciale nomen non habet; et iterum sequitur Filii generationem, ex qua (1) etiam persona Patris nominatur, per relationem quam habet ad Filium.

ARTICULUS II.

Ad secundum sic proceditur. Et 1. videtur quod innascibilitas sit proprietas personalis Patris. Damascenus enim dicit quod in divinis omnia unum sunt, praeter ingenerationem, generationem, et processionem. Sed filiatio, quae per generationem intelligitur, est proprietas personalis Filii, et processio Spiritus sancti; ergo innascibilitas, quae intelligitur per ingenerationem, est proprietas personalis Patris.

2. Praeterea, notio personae ad dignitatem pertinere debet; sed magis ostendit dignitatem innascibilitas quam paternitas, quia per innascibilitatem oritur auctoritas in Patre; ergo innascibilitas est magis proprietas personalis Patris quam paternitas.

3. Praeterea, remota proprietate personali, persona intelligi non potest, sicut nec species, remota differentia; sed remota paternitate intelligitur ingenitus, ut in litera dicitur; ergo paternitas non est proprietas personalis Patris, sed magis innascibilitas.

Sed contra. Unumquodque denominatur a forma ipsum constituyente; sed persona Patris denominatur a paternitate non ab innascibilitate; ergo innascibilitas non est proprietas Patris personalis, sed paternitas.

Praeterea, nullius rei positivae ratio constituitur per negationem; sed persona Patris est res quaedam; ergo non constituitur per innascibilitatem, quae est negatio.

Respondeo. Dicendum, quod illud, per quod primo intelligitur aliquid distinctum in divinis, est constitutum personae. Quicquid autem ad hoc sequitur, non potest esse personae constitutum, quamvis possit esse proprietas personae jam constitutae. Primum autem distinguens in divinis personis non potest esse innascibilitas. Non enim distingueretur nisi a nato. Unde oportet, quod distinctio quam facit innascibilitas, praestelligatur distinctioni inter generantem et nascentem. Et sic proprietas constituens personam Patris est paternitas, non autem innascibilitas; unde innascibilitas non est proprietas personalis, id est constituens personam.

Ad primum ergo dicendum, quod intentio Damasceni non fuit numerare proprietates personales, sed ostendere modum distinctionis in divinis. Eadem autem distinctio designatur per filiationem et paternitatem, et similiter per communem spirationem et processionem: sed innascibilitas ponit specialem modum distinctionis. Et ideo Damascenus omisit communem spirationem et paternitatem, et posuit ingenerationem, generationem et processionem.

(1) *Al.* et quia.

Ad secundum dicendum, quod dignitas pertinet ad perfectionem rei, sed constitutio ad primum esse ipsius. Et ideo illud quod primo in persona intelligitur erit constitutum personae; sed illud quod consequenter (1) intelligitur, potest magis declarare personae dignitatem.

Ad tertium dicendum, quod in litera non dicitur quod remota paternitate remaneat hypostasis Patris, sub proprietate innascibilitatis; sed dicitur absolute et universaliter, quod aliquis potest esse ingenitus, qui non est Pater; sicut et e converso aliquis est Pater, qui non est ingenitus.

QUAESTIO II.

Deinde quaeritur de imagine. Et circa hoc quaeruntur duo: 1.^o utrum imago in divinis essentialiter, vel personaliter dicatur; 2.^o utrum conveniat Spiritui sancto.

ARTICULUS I.

Ad primum sic proceditur. Et 1. videtur quod imago in divinis, tantum personaliter dicatur. Imago enim secundum Augustinum in libro 85 quaestionum, dicitur, quod est ex alio ductum ejus similitudinem gerens. Unde duorum ovorum unum non est imago alterius, quamvis sint similia, sed omne quod in divinis includit in sui intellectu originem, est persona; ergo imago est personale in divinis.

2. Praeterea Augustinus dicit, quod nihil est absurdius, quam imaginem ad se dici. Sed quod relative in divinis dicitur est personale; ergo imago est personalis.

5. Praeterea, omne id quod designat distinctionem in divinis est personale; sed imago est hujusmodi. Nihil enim est sui ipsius imago, secundum Hilarium; ergo in divinis imago dicitur personalis.

Sed contra. Secundum Hilarium, imago est ejus rei ad quam imaginatur species indifferens; sed species indifferens Patris et Filii est ipsa essentia; ergo imago dicitur essentialiter.

Praeterea, in solis essentialibus divinae personae conveniunt; sed nomine imaginis designatur convenientia divinarum personarum adinvicem, sicut et per nomen similitudinis; ergo imago in divinis dicitur essentialiter sicut et similitudo.

Respondeo dicendum, quod imago dupliciter potest accipi: scilicet proprie et improprie. Improprie quandoque sumitur imago pro exemplari; et sic imago in divinis essentialiter dicitur, in quantum divina essentia est exemplar, quod omnes creaturae imitantur, et expressius caeteris creatura rationalis. Et sic potest intelligi verbum Augustini positum in litera, quod una est sanctae Trinitatis essentialis divinitas, et imago ad quam factus est homo. Si autem imago proprie accipiatur, sic imago nominat aliquid, quod est ex alio ductum simile ei; et sic nomine imaginis duo intelliguntur: scilicet imitabilitas et id secundum quod fit imitatio. Hoc autem, secundum quod est imitatio, est commune utrique. Unde in divinis est ipsa essentia. Imitans vero est id quod ex alio ducitur ei simile: unde in divinis est persona. Sic ergo proprie imago accepta significat personam in recto, et essentiam in obli-

quo. Est enim imago persona ex alio ducta, habens eandem formam cum ipso. Et per hoc patet solutio ad utrasque rationes.

ARTICULUS II.

Ad secundum sic proceditur. Et 1. videtur quod nomen imaginis de Spiritu sancto dici possit. Primo per Damascenum, qui dicit Spiritum sanctum esse imaginem.

2. Praeterea, cuicumque convenit definitio, et definitum; sed Spiritui sancto convenit definitio imaginis quam Hilarius ponit in litera, et est in lib. 5 de Trinitate, ubi dicit, quod imago est ejus rei, ad quam imaginatur, species indifferens. Est enim Patris et Spiritus sancti species indifferens, sicut Patris et Filii; ergo Spiritus sanctus est imago Patris.

5. Praeterea, in infinitum expressius Spiritus sanctus repraesentat Patrem, quam creatura rationalis Trinitatem: sed creatura rationalis, propter expressam repraesentationem Trinitatis, dicitur Trinitatis imago; ergo multo fortius Spiritus sanctus dicitur imago Patris et Filii.

Sed contra. Imago regis, secundum Augustinum in sermone de Decem chordis, est in extranea natura, sicut in numero: seu in natura conformi sicut in Filio: sed Spiritus sanctus neque habet naturam extraneam a Patre, neque est Filius; ergo nomen imaginis ei non competit.

Praeterea, secundum Dionysium et Damascenum, Nihil de illa sancta Trinitate dicendum est, nisi quod nobis per auctoritatem sacrae Scripturae divinitus est expressum: sed in sacra Scriptura Spiritus sanctus imago non dicitur, sed solus Filius, ut patet Col. 1: « Qui cum sit imago Dei invisibilis: » ergo Spiritus sanctus non debet dici imago.

Respondeo. Dicendum, quod nomen imaginis proprie acceptum Spiritui sancto non convenit. Cujus triplex ratio assignatur. Prima est Richardi de sancto Victore, quod imago attenditur secundum extrinsecam. In divinis autem quasi extrinseca sunt notiones. Unde Filius qui convenit cum Patre in aliqua notione, scilicet communi spiratione, potest dici ejus imago; non autem Spiritus sanctus, qui in nulla notione convenit cum Patre et Filio.

Sed haec ratio non videtur consona dictis Augustini, qui vult quod secundum relationem originis, non attendatur similitudo nec aequalitas, in quibus ratio consistit imaginis. Secunda ratio est, quod imago quaelibet ducit in unum. Spiritus autem sanctus duceret in plures, videlicet in Patrem et Filium, si imago diceretur. Sed hoc non videtur prohibere. Nam Pater et Filius sunt unum Spiritus sancti principium, ut infra dicitur. Tertia ratio est quod imago attenditur secundum speciem rei, vel secundum ea quae speciem designant, sicut est figura; Filius autem procedit per modum naturae, per quem modum apud nos invenitur aliquid procedere in similitudinem speciei; Spiritus autem sanctus procedit per modum voluntatis, per quem modum nihil procedit apud nos in similitudinem speciei. Et ideo Filio competit nomen imaginis, non autem Spiritui sancto. Nam nomina a nobis imponuntur secundum ea quae apud nos sunt.

Ad primum ergo dicendum, quod apud Damascenum et plures doctores Graecorum, nomen imaginis Spiritui sancto attribuitur, quia hoc nomine

(1) *Al.* convenienter.

large utuntur, nihil in ipso, nisi perfectam similitudinem attendentes.

Ad secundum dicendum, quod quamvis Spiritus sanctus sit species indifferens, non tamen hoc declaratur in modo suae processiois, secundum quod nobis manifestatur per ea quae sunt apud nos.

Ad tertium dicendum, quod in artificiato invenitur species artis etiam apud nos; non autem in amore artificis. Et ideo creatura, in quantum habet speciem artis aeternae quae est Filius Dei, dicitur imago et ad imaginem; non autem Spiritus sanctus qui est amor.

DISTINCTIO XXIX.

Est praeterea aliud nomen etc. (V. edit. nostrae tom. VI, pag. 258.)

QUAESTIO UNICA.

Hic quaeruntur quatuor: 1.^o utrum una persona possit dici principium alterius in divinis; 2.^o utrum univoce dicatur principium respectu creaturae, et respectu personae; 3.^o utrum univoce dicatur principium Pater Filii et Spiritus sancti; 4.^o utrum una notione Pater et Filius sint principium Spiritus sancti.

ARTICULUS I.

Ad primum sic proceditur. Et 1. videtur, quod in divinis una persona non sit principium alterius. Quia secundum Philosophum in 5 Metaph.: « Principium et causa sunt idem: » sed Pater non est causa Filii; ergo nec principium.

2. Praeterea, in nomine principii prioritas quaedam intelligitur: sed una persona non est prior alia, ut supra habitum est; ergo una persona non potest dici principium alterius.

3. Praeterea, non est in genere quod non est in aliqua eius specie. Sed nihil eorum, in quae principium dividitur, convenit uni personae respectu alterius, sicut patet per singula inducenti: ergo una persona non potest dici principium alterius.

Sed contra est, quod dicitur Joan. 1: « In principio erat verbum: » Glossa « idest in Patre; » ergo Pater est principium Filii.

Praeterea, is a quo est alius, est ejus principium, sed a Patre est Filius; ergo Pater est Filii principium.

Respondeo. Dicendum, quod ex fide docetur unam personam ex alia procedere; sed processiois modus omnino nobis incomprehensibilis manet. Et ideo tanto aliquod nomen aptius est ad divinarum personarum originem designandum, quanto minus modum processiois exprimit. Inter omnia autem minus exprimit hoc nomen principium, utpote ceteris communius. Nam elementum importat quendam partialitatem. Ex nomine autem causae importatur quaedam dependentia ejus quod est a causa, in quantum causa est ad ejus esse sequitur aliud. Principium autem quandoque dicitur, quod neque est pars rei, neque est causa; sicut punctum principium lineae, a quo intelligitur linea fluere. Et ideo nomine principii utimur in divinis personis, non quasi hoc omnino conveniat; sed quia convenientius inveniri non potest.

Ad primum dicendum, quod principium et

causa sunt idem, quantum ad illos ordines, secundum quos utrumque dicitur; sicut principium materiale est idem quod causa materialis. Sed aliquis modus est principii qui non est causae; et secundum hoc aliquid est principium, quod non est causa.

Ad secundum dicendum, quod quamvis in divinis non sit prioritas unius personae respectu alterius, est tamen ibi ordo naturae; et in hoc salvatur ratio principii.

Ad tertium dicendum, quod modi principii a Philosophis assignantur secundum hoc quod in creaturisveniuntur. Unde secundum nullum eorum, proprie loquendo, competit nomen principii in divinis. Tamen secundum remotam similitudinem, habet convenientiam cum modo, quo efficiens dicitur principium; quia etiam pater dicitur esse efficiens principium filii in humanis.

ARTICULUS II.

Ad secundum sic proceditur. Et 1. videtur quod omnino aequivoce Pater dicatur principium Filii et creaturae. Dicitur enim creaturae principium, secundum rationem proprietatis. Non autem est prioritas ipsius ad Filium; ergo non est eadem ratio principii utrobique: et sic principium aequivoce dicitur.

2. Praeterea, plus distat processio divinae personae a processione creaturae, quam generatio carnalis a spirituali. Sed propter distantiam carnalis et spiritualis generationis aequivoce dicitur pater magister et generans; ergo multo amplius Pater dicitur aequivoce principium Filii et creaturae.

3. Praeterea, idem aequivoce dicitur, quod est idem numero et quod est idem specie, genere et analogia. Sed Pater Filio communicat eandem numerum naturam; creaturae autem non eandem, nec numero, nec specie, nec genere, sed per quamdam remotam analogiam; ergo cum ex hoc dicatur principium Filii et creaturae quod aliter se eis communicat, videtur quod aequivoce principium dicatur.

Sed contra hoc est quod Apostolus dicit ad Ephes. 5: « Ex quo omnis paternitas in caelo et in terra nominatur. » Sed in his quae sunt omnino aequivoce, unum non dicitur ex alio; ergo principium respectu creaturae et respectu divinae personae non dicitur aequivoce.

Praeterea, Basilius dicit, quod accipere a Patre Filius habet commune cum omni creatura; sed secundum hoc dicitur principium quia ab eo accipitur; ergo Pater non dicitur aequivoce respectu Filii et creaturae.

Respondeo. Dicendum, quod in his quae omnino aequivoce dicuntur, unum non potest esse ratio cognoscendi alterum; cum similitudo inter ea non attendatur, nisi secundum nomen. Sed principium in divinis personis cognoscimus aliquo modo ex principio quod in creaturis invenitur; sicut per Augustinum patet, qui ex processione intelligentiae a memoria, venatur processioem Filii a Patre. Unde non potest esse quod omnino aequivoce Pater dicitur esse principium Filii et creaturae, et multo minus Deus creaturae. Nec tamen omnino univoce dicitur. Nam si univoce diceretur principium, oporteret processioem univoce dici, et ulterius processiois terminum, scilicet essentiam. Sicut enim univoce dicitur Pater respectu filiorum natu-

ralium, sic et generatio et terminus generationis ipsorum respectu eorundem. Cum ergo nomen essentiae non univoce, sed analogice dicatur de Filio et creatura: per consequens nec nomen processionis, nec nomen principii respectu utriusque; sed per prius et posterius. Per prius quidem respectu Filii secundum rei veritatem; sed per posterius, secundum nominis impositionem.

Ad primum ergo dicendum, quod quamvis prioritas videatur ad rationem communem principii pertinere, quantum ad id a quo nomen imponitur; non tamen quantum ad id, cui nomen est impositum. Imponitur enim ad significandam originem unius ab alio, quae potest intelligi etiam prioritate non intellecta, ut ex supradictis patet.

Ad secundum dicendum, quod scientia quam communicat magister non est similitudo naturae, quam communicat generans, nec e converso, sicut essentia quae communicatur creaturae est similitudo essentiae quae communicatur Filio. Quamvis posset dici quod nec nomen Patris utrobique aequivoce dicitur, sed analogice.

Ad tertium dicendum, quod sicut nec unum, ita nec idem aequivoce dicitur secundum omnes illos modos. Vel potest dici quod etiam si idem aequivoce diceretur, non tamen propter hoc nomen principii; quia quanto perfectior est processio a principio, tanto major servatur identitas. Unde patet quod principium communicat in identitate, quantum possibile est. Et ideo identitatis diversitas non variat rationem principii: sed magis diversitas communitati in tali identitate.

ARTICULUS III.

Ad tertium sic proceditur. Et 1. videtur quod Pater univoce non dicatur principium Filii et Spiritus sancti. Dicitur enim principium Filii ratione generationis, sed Spiritus sancti ratione communis spirationis; ergo secundum diversam rationem, et sic aequivoce dicitur.

2. Praeterea, omne nomen personale ab aliqua notione imponitur; sed hoc nomen principium, est personale nomen, sive Pater dicitur principium Filii, sive Spiritus sancti. Cum ergo non sit aliqua notio communis per quam Pater utriusque principium dicatur, videtur quod principium non dicatur univoce de Patre respectu Filii et Spiritus sancti.

3. Praeterea, in his quae dicuntur univoce, unum non praesupponit aliud, quia univocum non praedicatur per prius et posterius: sed ordine naturae praesupponitur quod Pater sit principium Filii ad hoc quod sit principium Spiritus sancti; ergo nomen principii non dicitur univoce utrobique.

Sed contra. Nomen principii secundum processionem sumitur; sed nomen processionis dicitur univoce de processione Filii et Spiritus sancti; ergo et nomen principii respectu Filii et Spiritus sancti univoce dicitur.

Praeterea, communius est hoc nomen persona in divinis, quam hoc nomen principium personaliter sumptum: sed hoc nomen persona, dicitur univoce, ut supra dictum est; ergo multo fortius hoc nomen principium.

Respondeo. Dicendum, quod diversitas differentiarum impedit generis communis univocationem, eo quod differentiae rationem generis non ingrediuntur. Dicitur ergo quod hoc nomen principium

personaliter sumptum significat communicationem ejusdem naturae numero in generali. Unde quod communicetur per hunc vel per illum modum in divinis non variat rationem principii. Et ideo univoce dicitur Pater principium Filii, et Pater et Filius est simul principium Spiritus sancti.

Ad primum ergo dicendum, quod in ratione principii non includitur neque generatio neque communis spiratio, sed origo communis. Et ideo differentia generationis activae et communis spirationis univocationem principii non tollit.

Ad secundum dicendum, quod nomen principii imponitur ab aliquo notionali communi, quod est a quo alius; quod tamen notio non ponitur, quia notio debet esse specialis, ut supra dictum.

Ad tertium dicendum, quod nihil prohibet eorum de quibus aliquid univoce praedicatur, unum esse prius altero vel causam alterius, sicut binarius ternario; sed hoc oportet quod in ratione ejus, quod univoce praedicatur, ordinem non habeat nec aliquam difformitatem.

ARTICULUS IV.

Ad quartum sic proceditur. Et 1. videtur quod Pater et Filius non sint una notione principium. Sicut enim actus, ita et proprietas numerum trahit a suppositis; sed Pater et Filius sunt duo supposita; et hac ratione verba quae significant actum per modum actus, de eis pluraliter praedicantur, ut patet Joan. 10: « Ego et Pater unum sumus: » ergo non potest esse una notio vel proprietas Patris et Filii.

2. Praeterea, in divinis relationes sunt subsistentes; sed notio secundum quam Pater et Filius dicuntur principium Spiritus sancti, est quaedam relatio; ergo est persona subsistens. Si ergo est una relatio qua Pater et Filius ad Spiritum sanctum referuntur, erit una persona subsistens utrique (1) quod est haereticum.

3. Praeterea, communis spiratio opponitur processionis; sed processio est proprietas personalis; ergo et communis spiratio. Sed una proprietas personalis est tantum unius personae; ergo non potest esse Patris et Filii una proprietas, secundum quam principium Spiritus sancti dicantur.

Sed contra. Pater et Filius sunt unum principium Spiritus sancti; ergo forma significata in nomine principii est una in utroque. Hoc enim est de natura nominum substantivorum, ut ex praedictis patet.

Praeterea, secundum Anselmum, Pater et Filius in omnibus idem sunt, praeter ea in quibus distinguuntur per relationem originis: sed in proprietate praedicta non distinguuntur secundum relationem originis; ergo praedicta proprietas est una in utroque.

Respondeo. Dicendum, quod quodcumque plures aliquid unum operantur, oportet quod operatio singulorum sit partialis respectu communis operationis qua operatum efficitur, si singuli habeant distinctas operationes, sicut patet in trahentibus navem. Conatus enim uniuscujusque est pars totius tractionis, quae ex omnibus actionibus singularibus resultat. Non autem potest dici, quod Pater et Filius partialiter sint principium Spiritus sancti; quia sic esset uterque insufficientis et deficientis virtutis. Unde oportet quod utriusque actus notionalis sit unus numero, et per consequens proprietas quae

(1) *Lege* utriusque.

intelligitur illius actus notionalis principium, sit una numero in utroque.

Ad primum ergo dicendum, quod in oppositis diversis per essentiam non potest esse unus actus numero nec una proprietas. Sed si unius sint essentiae, possunt in uno actu convenire et in una proprietate, quamvis oporteat actum vel proprietatem pluraliter consignificari si adjective vel inhaerenter dicantur, non autem si substantive.

Ad secundum dicendum, quod sicut divinitas in divinis non est nisi subsistens, et tamen una deitas est Patris et Filii qui sunt duo subsistentes ex alia ratione distincti, similiter et de communi spiratione oportet intelligi.

Ad tertium dicendum, quod processio primo intelligitur in persona Spiritus sancti; quod requiritur ad hoc, quod proprietas personalis sit, ut supra dictum est. Et ideo est proprietas personalis ejus. Sed communis spiratio non potest esse prima notio, quae in Patre vel Filio intelligitur; cum ordinatione naturae praesupponatur generatio communi spirationi. in quantum generans et genitum simul spirant: unde non potest esse proprietas personalis.

DISTINCTIO XXX.

Sunt enim quaedam etc. (V. edit. nostrae tom. VI, pag. 245.)

QUAESTIO UNICA.

Hic quaeruntur quatuor: 1.^o utrum relatio Dei ad creaturam sit aliquid in Deo; 2.^o utrum dicatur de Deo ex tempore; 3.^o utrum aliquid absolutum de Deo possit dici ex tempore; 4.^o utrum aliquid significans relationem Dei ad creaturam possit dici de Deo ab aeterno.

ARTICULUS I.

Ad primum sic proceditur. Et 1. videtur quod nomina quae important relationem Dei ad creaturam, aliquam relationem in Deo realiter ponant. Supra enim dictum est quod Pater est principium Filii et creaturae, et non omnino aequivocae; sed dicitur principium Filii secundum aliquam relationem quae est in Deo realiter; ergo et Deus Filius dicitur principium creaturae secundum aliquam relationem realem.

2. Praeterea, quaedam sunt relativa secundum dici, ut scientia; quaedam secundum esse, ut Pater et Filius: sed de Deo respectu creaturarum dicuntur et ea quae sunt relativa secundum esse, sicut Dominus et alia hujusmodi; ergo hujusmodi relationes non solum secundum nomen vel secundum rationem in Deo sunt, sed etiam secundum esse.

3. Praeterea, cuilibet relationi respondet aliqua relatio opposita: sed in creaturis est aliqua relatio realis per quam referuntur ad Deum; ergo alicubi est opposita relatio: sed non in creaturis ipsis; neque in intellectu, quia sic non referuntur nisi ad creaturas et ad intellectum; ergo hujusmodi relatio est in Deo, ad quem creatura refertur.

Sed contra. Relativa sunt simul natura, secundum Philosophum: sed quicquid in Deo est, est omnino (!) quod est in creatura prius naturaliter; ergo in Deo non est aliqua relatio ad creaturam realiter.

(!) Lege omni eo.

Praeterea, quicquid est in Deo est subsistens et est essentia divina; si ergo aliqua relatio ad creaturam esset in Deo realiter, sequeretur quod esset divina essentia; et ita, cum relatio dependeat ab eo ad quod dicitur, sequeretur quod Deus secundum essentiam suam esset dependens a creaturis; quod est impossibile.

Respondeo. Dicendum, quod relatio non est aliud quam quaedam habitudo unius ad alterum. Unde secundum propriam rationem non habet, quod sit aliquid in eo de quo dicitur, sed hoc aliquando habet ex habitudinis causa. Causa autem habitudinis quandoque est in utroque extremorum, quandoque in neutro, quandoque in altero tantum. In utroque; sicut aequalitatis causa est in utroque aequalium, scilicet quantitas. Et ideo utroque ratione suae quantitatis realiter refertur ad alterum. In neutro vero est, quando habitudinem solus intellectus causat, sicut patet in relatione identitatis. Nam intellectus bis accipiens eandem rem adinvenit habitudinem identitatis. Et ideo identitas non est relatio realis, sed rationis tantum. In altero vero tantum existit habitudinis causa, quando unum dependet ab altero, et non e converso; sicut scientia nostra dependet a seibili. Unde ex hoc quod in ipsa scientia est, causatur in ea habitudo ad seibile, et sic in scientia est realis relatio. Sed seibile non dependet a scientia nostra. Unde ex parte ejus non est causa, quod referatur ad scientiam; sed solum ex parte intellectus nostri, qui intelligit ipsum sub ratione ejus, ad quod relatio scientiae terminatur; et pro tanto non est falsus nec vanus. Quia ergo Deus vel creator non dependet a creatura, sed e converso; inde est quod nomina quae dicuntur relative de Deo ad creaturas, significant solum relationem rationis. Quae vero dicuntur e converso, significant relationes reales.

Ad primum ergo dicendum, quod Pater dicitur principium Filii per communicationem divinae essentiae quae est in utroque aequaliter. Et ideo in utroque est relatio realis. Sed Deus Pater dicitur principium creaturae, in quantum communicat sibi similitudinem, quae est in creatura et non in Deo. Et ideo non est simile.

Ad secundum dicendum, quod non omnia relativa secundum esse important relationem realem, ut patet de identitate; sicut nec e contrario relativa aliqua secundum dici important relationem rationis, ut patet in scientia. Dicuntur enim relativa secundum dici quando principale significatum nominis non est relatio, sed aliquid aliud ad quod sequitur relatio; sive illa sit realis sive non; sicut principale significatum hujus nominis scientia est qualitas quam sequitur quidam respectus. Sed secundum esse relativa dicuntur, quando principale significatum nominis est ipsa relatio, sive sit realis, sive non.

Ad tertium dicendum, quod cuilibet relationi opponitur alia relatio, quae quandoque est in re ad quam relatio terminatur, quandoque est in intellectu tantum; non sicut in relato, sed sicut in intelligente aliquid sub relatione. Unde non oportet, quod opposita relatio referatur ad intellectum, sed ad rem quae per intellectum intelligitur.

ARTICULUS II.

Ad secundum sic proceditur. Et 1. videtur quod hujusmodi relativa non dicantur de Deo ex tempore,

sed ab aeterno. Quod enim est in potentia et non in actu est imperfectum: sed Deus ab aeterno fuit Dominus creaturae in potentia; si ergo non fuit Dominus in actu, aliquid imperfectionis in ipso cadit, quod est inconueniens.

2. Praeterea, secundum Ambrosium: « Hoc nomen, Dominus, nomen est potestatis; » sed Dei potestas fuit ab aeterno; ergo hoc nomen Dominus ab aeterno Deo conuenit.

5. Praeterea, nihil prohibet relationem rationis esse entis ad non ens, sicut dicimur priores his qui futuri sunt; sed relationes Dei ad creaturas sunt secundum rationem tantum; ergo nihil prohibet eas dici de Deo etiam creaturis non existentibus; et sic possunt dici de Deo, etiam ab aeterno.

Sed contra. Dominus non dicitur nisi qui habet seruum: sed nihil fuit ab aeterno quod Deo seruiret; ergo Deus non potest dici Dominus ab aeterno.

Praeterea, ad hoc est auctoritas Augustini quae in litera habetur.

Respondeo. Dicendum, quod quaecumque relatio est realiter in uno relativorum tantum, illud in quo non est relatio, non dicitur relative quia ipsum referatur, sed quia aliud refertur ad ipsum; sicut de seibili Philosophus dicit in 5 Met. Unde patet quod nomina praedicta dicuntur de Deo relative ex hoc solo, quod creatura refertur ad ipsum; quia per hoc intelligitur a nobis ipse referri ad creaturam. Unde eum creatura non ab aeterno referatur ad Deum, sed ex tempore ex quo coepit, patet quod huiusmodi relativa non dicuntur de Deo ab aeterno, sed ex tempore.

Ad primum ergo dicendum, quod sicut huiusmodi relationes Deo attribuuntur non quia ipse referatur, sed quia creatura refertur ad ipsum; ita dicuntur de Deo in actu vel in potentia vel in actu.

Ad secundum dicendum, quod hoc nomen Dominus, dicitur esse nomen potestatis non sicut proximi significati, sed sicut causae proximi significati. Significat enim proxime relationem, quae supra potestatem fundatur; sicut si diceretur, quod aequalitas est nomen quantitatis.

Ad tertium dicendum, quod ens non intelligitur referri ad non ens, ex hoc quod non ens referatur ad ipsum, sicut est in proposito. Et ideo ratio non sequitur.

ARTICULUS III.

Ad tertium sic proceditur. Et 1. videtur quod aliquid absolutum possit de Deo dici ex tempore. Deus enim ex tempore dicitur homo, quod est praedicatum absolutum; ergo aliquid absolutum de Deo praedicatur ex tempore.

2. Praeterea, propter haec relativa de Deo ex tempore dici possunt, ut videtur, quia non dicuntur de Deo secundum rem, sed secundum rationem tantum; sed alia absoluta possunt huiusmodi esse; et praecipue negativa, quia negatio nihil est, nisi secundum rationem; ergo aliquid absolutum de Deo dici potest ex tempore.

5. Praeterea, omne relativum super aliquid absolutum fundatur: sed aliqua relativa de Deo dicuntur ex tempore, ut dictum est; ergo oportet aliquid absolutum de Deo dici ex tempore.

Sed contra. Omne nomen, quod absolute praedicatur in divinis, significat essentiam divinam: sed ipsa est aeterna; ergo nihil absolutum de Deo potest dici ex tempore.

Praeterea, eicumque conuenit de novo aliquid absolutum, hoc necesse est mutari: sed Deus est immutabilis; ergo nihil absolutum de Deo potest dici ex tempore.

Respondeo. Dicendum, quod ubicumque aliquid de novo dicitur, oportet quod hoc sit ex aliqua mutatione praecedente, vel circa ipsum de quo dicitur, vel circa aliquid aliud. Mutatio autem non potest considerari in Deo, sed in creaturis solum; et ideo solum de novo potest dici de Deo quod respectum ad creaturam dicit, non autem quod de Deo dicitur absolute: et ideo simpliciter concedendum est, quod nullum absolutum de Deo potest praedicari ex tempore.

Ad primum dicendum, quod Deus dicitur homo propter unionem ad humanam naturam, quae quidem unio relatio quaedam est. Unde ratione relationis implicitae Deus dicitur homo ex tempore.

Ad secundum dicendum, quod licet negationes non sint res nisi rationis, tamen ex ipsa re aliquid de natura rei negatur, et non ex aliquo alio, sicut relationes de Deo dicuntur ratione creaturarum. Et ideo nomina negativa dicuntur de Deo ab aeterno, sed relativa ex tempore, propter immutabilitatem divinae naturae, et immutationem creaturarum.

Ad tertium dicendum, quod relationes quae de Deo dicuntur ex tempore, cum non sint realiter in Deo, sed in creaturis, fundantur super aliquid absolutum in creatura et non in Deo; quamvis in Deo sit aliquid absolutum ab aeterno, ratione cuius huiusmodi relationes ex tempore possunt ei attribui, creaturis in esse productis.

ARTICULUS IV.

Ad quartum sic proceditur. Et 1. videtur, quod nullum relativum possit de Deo dici ab aeterno, quod relationem ad creaturam importet: Deus enim relative ad creaturam non dicitur, nisi quia creatura refertur ad Deum: sed creatura ab aeterno non fuit quae posset referri ad Deum; ergo nihil ab aeterno de Deo dicitur relative ad creaturam.

2. Praeterea, huiusmodi relationes, ut dictum est, non sunt in Deo nisi secundum rationem: sed ratio nostra non fuit ab aeterno; ergo huiusmodi relationes non possunt conuenire Deo ab aeterno.

5. Praeterea, relationes aeternae sunt in Deo subsistentes personae: sed relationes quibus tres personae constituuntur, non dicuntur ad creaturas; ergo si in divinis sunt aliquae relationes aeternae, quae dicuntur ad creaturas, erunt in Deo plures personae quam res, quod est haereticum; nulla ergo relatio Dei ad creaturam conuenit ei ab aeterno.

Sed contra. Ideae distinguuntur secundum respectus ad res ideatas; sed ab aeterno fuit distinctio idearum, quia Deus ab aeterno distinctam cognitionem de rebus habuit; ergo aliquae relationes Dei ad creaturam sunt aeternae.

Praeterea, scientia relative dicitur ad scibile; sed Deus ab aeterno habuit scientiam de creaturis; ergo aliquid ab aeterno dicitur relative de Deo ad creaturas.

Praeterea, quicquid conuenit Deo ratione suae aeternitatis, conuenit ei ab aeterno. Sed Deus, ratione suae aeternitatis, est prior omnibus creaturis; ergo aliqua relatio ad creaturas conuenit Deo ab aeterno, scilicet proprietatis.

Praeterea, sicut supra habitum est, donum di-

citur relative ad dantem, et ad id cui datur, et ita ad creaturam: sed Spiritus sanctus ab aeterno est donum, ut supra habitum est; ergo idem quod prius.

Respondeo. Dicendum quod inter Deum et creaturam potest dupliciter relatio considerari. Uno modo, quod relatio sit realiter in creatura, et in Deo secundum rationem tantum: et hujusmodi relationes de Deo dici non possunt, nisi ex tempore. Alio modo sic, quod relatio non sit realiter nec in Deo nec in creatura, sed secundum rationem tantum: et hujusmodi relationes possunt dici de Deo, etiam creatura non existente. Unde nihil prohibet eas dici de Deo ab aeterno. Tunc autem relatio ad Deum secundum rem est in creatura, quando consurgit ex hoc, quod aliquid actu convenit creaturae, prout in rerum natura existit; sicut subesse Deo, et esse creaturam, et alia hujusmodi. Quando vero relatio consurgit ex hoc solum, quod creatura intelligitur vel a Deo vel ab homine, tunc relatio talis, nec in Deo nec in creatura realiter existit. Sic ergo ad utrasque rationes respondere oportet.

Ad primum ergo dicendum, quod ratio illa procedit in relationibus quae sunt realiter in creatura. In his enim verum est, quod Deus relative dicitur, quia creatura refertur ad ipsam.

Ad secundum dicendum, quod quamvis ratio nostra non fuerit ab aeterno: nunc tamen existens cognoscit, Deum ab aeterno fuisse; et secundum hoc potest eum intelligere sub aliqua relatione ab aeterno. Fuit nihilominus ab aeterno ratio divina, quae has habitudines ab aeterno non ignoravit.

Ad tertium dicendum, quod relationes realiter in Deo existentes sunt personae subsistentes, non autem aliae; sive dicantur ab aeterno, sive non.

Ad primum vero quod in contrarium objicitur, dicendum, quod respectus ideae ad creaturam est, non solum secundum quod est actu, sed secundum quod est in potestate facientis: et sic talis relatio non est realiter in creatura.

Ad secundum dicendum, quod cum dicitur, creatura est scibilis, hujusmodi relatio non attribuitur ei secundum quod est in actu, sed secundum quod est in intellectu: et similiter dicendum ad alia.

DISTINCTIO XXXI.

Praeterea considerari oportet etc. (V. edit. nostrae tom. VI, pag. 247.)

QUAESTIO UNICA.

Illic quaeruntur quatuor: 1.^o utrum ea quae sunt communia personis, alicui earum debeant appropriari; 2.^o de appropriatione quam facit Hilarius; 3.^o de appropriatione Augustini; 4.^o quomodo in divinis sit aequalitas, quam Augustinus Filio appropriat.

ARTICULUS I.

Ad primum sic proceditur. Et I. videtur quod illa, quae sunt communia tribus personis, alicui earum non debeant appropriari. Circa Trinitatem enim praecipue cavendus est error: quia, ut Augustinus dicit, periculosius alicubi non erratur; sed hujusmodi appropriatio potest esse occasio erroris, dum ea quae alicui personae appropriantur, possunt credi ab ea singulariter possideri; ergo hujusmodi appropriatio non est facienda in divinis.

2. Praeterea, quicquid est commune tribus personis, ad essentiam pertinet: sed essentia non appropriatur alicui personae; ergo nec aliquid aliud commune.

3. Praeterea, appropriatio non potest fieri nisi ratione similitudinis vel contrarietatis: sed inter commune et proprium in personis divinis non potest esse similitudo, cum differant ratione; nec contrarietas, cum simul uni personae conveniat commune et proprium; ergo communia personis divinis appropriari non possunt.

Sed contra. Personae divinae, secundum relationes originis distinguuntur. Sed origines personarum adaptantur communibus attributis: sicut dicitur, quod Filius procedit per modum naturae; Spiritus sanctus per modum voluntatis; ergo ea quae sunt communia personis, per appropriationem adaptari possunt.

Praeterea, nominibus personarum, personales proprietates exprimuntur: sed quaedam nomina personalia habent convenientiam cum aliquibus communibus, sicut verbum cum sapientia, amor cum bonitate; ergo attributa communia cum propriis personarum aliquam similitudinem habent, et ita personis appropriari possunt.

Respondeo. Dicendum, quod in appropriatione personarum attendenda est, et utilitas ex parte nostra, et ex parte Dei convenientia. Ex parte quidem nostra duplex utilitas ex appropriatione consequitur. Una qualiscumque apprehensio veritatis. Nam quia ex creaturis in Deum devenimus, quae efficaciter non nisi ejus essentialia demonstrant, oportet ulterius ex ipsis essentialibus considerationi personarum insistere: et hoc fit, essentialia personis appropriando per viam similitudinis. Alia utilitas est vitatio erroris; ne scilicet divinae personae cogitentur secundum modum nostrum: et ideo fit appropriatio per viam contrarietatis, quantum ad ea quae circa nos sunt; sicut Deo Patri attribuimus potentiam, ne cogitemus infirmum, sicut hominem patrem propter senectutem, et sic de aliis, ut infra dicitur. Ex parte autem Dei convenientia invenitur, secundum quod attributa communia propriis personarum sunt aliquo modo similia; et secundum quod divinae personae sunt personis humanis dissimiles.

Ad primum dicendum, quod error, qui sequi posset, excluditur, dum ratio appropriationis determinatur ex appropriatione.

Ad secundum dicendum, quod propria personarum sumuntur secundum relationes originis: et ideo illa attributa personis divinis, per convenientiam ad eorum propria, possunt appropriari, in quorum ratione aliquid ad originem pertinens includitur. Talis autem non est de essentia: et ideo ratio non sequitur.

Ad tertium dicendum, quod attributa essentialia, in quantum habent rationem principii, habent similitudinem cum propriis divinarum personarum, non tamen identitatem quantum ad rationem: sed contrarietatem habent ad condiciones personarum in humanis.

ARTICULUS II.

Ad secundum sic proceditur. Et I. videtur quod Hilarius inconvenienter essentialia attributa personis attribuat. Aeternitas enim non importat aliquam rationem originis, sed solum privat principia: sed

propria personarum ad originem pertinent; ergo aeternitas non debet alicui personae appropriari.

2. Praeterea, species, sive pulchritudo, per prius consideratur in repraesentante, quam in repraesentato: sed imago habet rationem repraesentantis; ergo imagini, idest Filio, non debet appropriari species, sed magis Patri.

3. Praeterea, utimur his quae in finem referimus: sed nulla persona referenda est ad aliud; ergo usus nulli personae appropriari debet.

4. Praeterea, usus potest accipi, aut active, aut passive. Si active accipiatur, magis videtur Patri et Filio convenire, quam Spiritui sancto. Uti enim magis est amantis, quam amoris. Si autem passive, sic usus, ut videtur, importat respectum ad creaturam, qui secundum rem est in creatura; ergo non debet divinae personae appropriari.

5. Praeterea, personae divinae per sua consueta nomina magis innotescunt: sed appropriatio fit causa notificandi personas; ergo magis debet uti nominibus consuetis, scilicet Filii et Spiritus sancti, quam imaginis et muneris.

Respondeo. Dicendum, quod appropriatio Hilarii accipitur, secundum convenientiam essentialium attributorum ad propria personarum: et ideo aeternitatem appropriavit Patri; speciem, idest pulchritudinem imagini, idest Filio; usum muneris, idest Spiritui sancto. Aeternitas namque convenit cum innascibilitate, quae est proprietas Patris, inquantum caret principio. Convenit etiam cum paternitate, inquantum est omnis alterius durationis principium. Similiter et pulchritudo, ratione magnitudinis, quam importat, convenit cum Filio, inquantum est Filius; quia ex hoc Filius dicitur, quod perfecte habet naturam Patris, quod ad spiritualem magnitudinem pertinet. Ratione vero consonantiae convenit cum Filio, inquantum est imago perfecte repraesentans Patrem. Ratione claritatis convenit cum Filio, inquantum est verbum, in quo omnium rationes resplendent. Haec enim tria pertinent ad rationem pulchritudinis. Usus autem convenit Spiritui sancto, et inquantum est amor, quo Pater et Filius invicem perfruuntur, et inquantum est donum, quo nos perfundimur. Et haec appropriationis ratio ex verbis Augustini in litera positae accipi potest.

Ad primum ergo dicendum, quod in successivis quodammodo secundum ex primo oritur. Unde inquantum aeternitas successivae durationis excludit principium originis ab alio, negationem includit; et sic convenit Patri ratione innascibilitatis. Ipsa autem aeternitas est principium aliarum durationum. Unde, et sic etiam positive includit originem.

Ad secundum dicendum, quod in repraesentato attenditur pulchritudo absolute: sed in repraesentante, ex convenientia cum repraesentato: et sic pulchritudo imagini attribuitur.

Ad tertium dicendum, quod usus hic accipitur non secundum quod contra fruitionem Dei dividitur, sed secundum quod fruitionem includit, ut ex ipsa distinctione patet.

Ad quartum dicendum, quod usus hic accipitur passive, idest quo aliquis utitur. Utitur autem Pater Spiritui sancto amando Filium et etiam nos; et nos, amando Deum; et sic non solum importatur relatio ad creaturam. Quae tamen si importetur, in Deo est secundum rationem, non tamen secundum rem.

Ad quintum dicendum, quod Hilarius posuit illa

nomina personalia in quibus magis exprimitur appropriationis ratio.

ARTICULUS III.

Ad tertium sic proceditur. Et 1. videtur quod Augustinus inconvenienter appropriet essentialia attributa personis. Personae enim secundum sua propria adinvicem distinguuntur: sed haec omnia appropriata ad idem pertinent. Nam unitas in aequalitate et in connexione includitur; ergo non conveniunt cum propriis personarum, et ita non convenienter personis appropriantur.

2. Praeterea, appropriata conveniunt personis ratione naturae communis: sed haec tria conveniunt personis ratione personarum; quia, ut Augustinus in litera dicit « Tres personae sunt unum propter Patrem, aequales propter Filium, connexae propter Spiritum sanctum; » ergo haec tria non inconvenienter sunt appropriata personis.

3. Praeterea, cuilibet personae convenit unitas personalis ratione suae proprietatis, essentialis vero ratione essentiae: essentia autem non appropriatur alicui personae, nec personae proprietas, cum sit propria; ergo unitas Patri appropriari non debet.

4. Praeterea, Filio, secundum quod est Filius, vel imago, vel verbum, magis convenit ratio similitudinis, quam aequalitatis; ergo Filio magis debet appropriari similitudo, quam aequalitas.

5. Praeterea, nexus proprie dicitur de Spiritu sancto; ergo non debet poni inter appropriata.

Respondeo. Dicendum, quod haec etiam appropriatio Augustini assignatur secundum viam similitudinis. Unitas autem habet rationem principii. Unde in quolibet genere oportet principium esse unum: et sic habet similitudinem cum proprio Patris, qui est principium totius deitatis. Aequalitas autem importat perfectam comparisonem unius ad alterum. Et quia Filius ex modo suae processionis habet quod perfecte Patrem imitetur, ideo ei aequalitas appropriatur. Spiritus autem sanctus, inquantum procedit ut amor, convenienter dicitur nexus. Nam amor est quaedam unio amantis et amati.

Ad primum ergo dicendum, quod aequalitas ab unitate causatur, et unio ad aequalitatem terminatur; et ideo convenienter Patri appropriatur unitas, Filio aequalitas, qui a Patre oritur, et Spiritui sancto nexus, qui est quaedam reflexio per amorem prolis in parentem.

Ad secundum dicendum, quod 1. propter nec dicit causam formalem, ut scilicet personae sint formaliter unum propter Patrem etc.; sed dicit rationem completionis, quia unitas statim invenitur in Patre, et ab eo Filius et Spiritus sanctus habent unitatem. Aequalitas vero intelligi non potest nisi praeintellecta Filii generatione, cum aequalitas sit ad minus duorum. Nexus vero non intelligitur in divinis, nisi tertia persona intellecta, quae duos connectit.

Ad tertium dicendum, quod unitas essentialis est quae Patri appropriatur. Habet enim unitas rationem principii; quod non habet essentia; quamvis sint unum secundum rem essentia et unitas.

Ad quartum dicendum, quod aequalitas in spiritualibus includit similitudinem. Nam attenditur

secundum magnitudinem perfectionis et virtutis, et super hoc addit similitudinis perfectionem.

Ad quintum dicendum, quod nexus amoris est proprium Spiritus sancti: sed secundum quod nomine nexus intelligitur quaecumque convenientia, sic est commune, et appropriatum Spiritui sancto.

ARTICULUS IV.

Ad quartum sic proceditur. Et 1. videtur, quod aequalitas in divinis sit relatio realis. Omnis enim relatio quae habet causam in eo de quo dicitur, est realis, ut supra dictum est: sed aequalitas habet causam in Deo, unitatem magnitudinis, sicut et in creaturis; ergo sicut in creaturis, ita et in Deo aequalitas est relatio realis.

2. Praeterea, si aequalitas non ponit aliquid realiter in Deo; ergo qui negat aequalitatem, non negat aliquid quod in Deo sit, et sic non est haereticus: et ita Arius, qui aequalitatem negavit personarum, non debuit haereticus judicari.

3. Praeterea, Filius convenit cum Patre, et a Patre distinguitur: sed illa relatio quae importat distinctionem Filii a Patre, realiter est in Deo, et positive; ergo similiter illa quae importat convenientiam Filii ad Patrem, ut aequalitas et similitudo.

Sed contra. Omnis relatio realiter in Deo existens est notio alicujus personae; si ergo aequalitas relationem in Deo importat, vel ponat, videtur quod sint plures notiones quam quinque.

Praeterea, aequalitatis est causa unitas; sed unum remote dicitur in divinis, ut supra Magister dixit; ergo et aequalitas, et similitudo; et sic non ponunt aliquid realiter in Deo.

Respondeo. Dicendum, quod in aequalitate et similitudine duo intelliguntur: scilicet aequalitatis suppositum, et aequalitatis causa. Suppositum autem aequalitatis vel similitudinis est aliquid distinctum, cum nihil sibi sit simile vel aequale; et sic in divinis dicit relationem, cum nihil aliud ibi sit distinctum. Causa vero aequalitatis vel similitudinis est unitas magnitudinis vel formae; quae unitas in divinis personis est secundum numerum. Sic ergo ex neutra parte potest esse aequalitas realis relatio. Nam relatio non refertur per aliquam aliam relationem realem, ut Avicenna dicit (sic enim esset in infinitum abire). Nec iterum, ubi est idem numero, potest esse realis relatio, sicut de identitate supra dictum est. Ex parte vero causae suae ulterius habet, quod remote dicantur sicut et unum.

Ad primum ergo dicendum, quod creaturae ab invicem distinguuntur per aliquid absolutum, nec convenient res causatae vel similes in una magnitudine vel forma numero, sed specie, sicut est in Deo: et ideo non est simile.

Ad secundum dicendum, quod quamvis aequalitas non sit relatio realis, tamen id ratione ejus attribuitur aequalitas, realiter est in Deo; et ideo negans aequalitatem haereticus est.

Ad tertium dicendum, quod relatio convenientiae Filii ad Patrem praesupponit aliam relationem distinguentem, quae nullam aliam relationem praesupponit: et ideo illae relationes, quae distinctionem important, sunt reales; non autem relatio aequalitatis vel similitudinis, quae super alias relationes fundatur, ut dictum est.

DISTINCTIO XXXII.

Hic oritur quaestio etc. (V. edit. nostrae tom. VI, pag. 235.)

Hic quaeritur de duobus. Primo de his quae pertinent ad Spiritum sanctum. Secundo de his quae pertinent ad Filium.

QUAESTIO I.

Circa primum quaeruntur duo: 1.^o utrum Pater diligat Filium Spiritu sancto; 2.^o an haec sit falsa, Pater et Filius diligunt nos Spiritu sancto.

ARTICULUS I.

Ad primum sic proceditur. Et 1. videtur quod Pater non diligat Filium Spiritu sancto. Idem enim est Deo esse, quod diligere. Sed Pater non est Spiritus sanctus; ergo non diligit Filium Spiritu sancto.

2. Praeterea, diligere aut sumitur essentialiter, aut notionaliter. Si sumitur essentialiter, sic Pater diligit essentia sua, non Spiritu sancto. Si autem sumitur ut dicit actum notionalem, sicut et hoc verbum generat; cum Pater non generet Filio, videtur quod non diligat Spiritu sancto.

3. Praeterea, eodem amore Pater diligit Filium et se: sed non diligit se Spiritu sancto; ergo nec Filium.

Sed contra. Omnis amans amat suo amore: sed Spiritus sanctus est amor Patris et Filii; ergo Pater amat Filium Spiritu sancto et e converso.

Praeterea, in anima nostra est imago increatae Trinitatis: sed mens nostra amat notitiam suam amore a se procedente; ergo Pater amat Filium, qui est sua sapientia, Spiritu sancto qui est amor a Patre procedens.

Respondeo. Dicendum, quod suscipiendo hanc loquutionem esse veram et propriam propter hoc quod sancti ea communiter utuntur, duplex modus fuit videndi eam. Quidam enim dixerunt, quod ablativus construitur in habitudine signi, ut sit sensus, Pater et Filius diligunt se Spiritu sancto, id est Spiritus sanctus est signum, quod Pater et Filius diligunt se. Alii vero dixerunt quod construitur in habitudine formae. Sicut enim homo formaliter diligit suo amore, ita Spiritus sanctus formaliter diligit Patrem. Neutrum autem horum sufficiens est per se. Nam amor causatus, quo mens suam notitiam amat, signum est quod Pater Filium diligit, nec tamen hoc amore dicitur Filium diligere. Similiter forma inhaerens est. Spiritus autem sanctus non significatur ut aliquid inhaerens Patri et Filio. Unde oportet has duas in unum conjungere; et si dicamus, quod ablativus construitur in habitudine signi vel quasi effectus formaliter denominantis. Actio enim ab agente procedit, et est signum vel effectus virtutis activae in agente; et comparatur ad agentem, ut forma in denominando, licet non in essendo. Ita enim denominatur aliquis agens actione, sicut albus albedine. Unde cum Spiritus sanctus sit amor Patris et Filii, et amor sit quaedam operatio amantis, Pater et Filius hoc modo dicerentur se Spiritu sancto amare, sicut aliquis dicitur agere actione a se procedente.

Ad primum ergo dicendum, quod licet in Deo secundum rem sit idem diligere et esse, tamen

diligere significatur per modum operationis, non autem esse: et ideo non est simile.

Ad secundum dicendum, quod diligere notionaliter sumitur in loquutione praedicta; non autem dicit solam notionem, sicut hoc verbum generare vel hoc verbum spirare; sed cum notione dicit ipsam personam. Nam diligere est emittere amorem. Ipsa autem persona Spiritus sancti significatur per actum amoris, notio autem in actu emissionis. Non autem persona Filii significatur ut actus generationis: et ideo non est simile.

Ad tertium dicendum, quod sicut Pater diligit Filium amore essentiali et notionali, ita et seipsum; quia quicquid diligentis est in Filio vel virtutis spirativae, totum etiam est in Patre.

ARTICULUS II.

Ad secundum sic proceditur. Et 1. videtur quod haec sit falsa, Pater et Filius diligunt nos Spiritu sancto. Quaecumque enim uno et eodem amore diliguntur, aequaliter diliguntur: sed Pater diligit Filium amore, qui est Spiritus sanctus; ergo si Spiritu sancto nos diligit, videtur quod aequaliter nos et Filium diligit; quod est inconveniens.

2. Praeterea, omne quod connotat effectum in creatura, dicitur esse essentialiter in divinis: sed cum dicitur, Pater diligit nos, importatur habitudo Dei ad creaturam; ergo diligere tenetur essentialiter. Sed Pater non diligit essentialiter Spiritu sancto, immo magis amore essentiali; ergo Pater non diligit nos Spiritu sancto.

3. Praeterea, amor procedit ab amante sapienter secundum modum bonitatis amati: sed Deus sapienter amat quicquid amat; ergo cum bonitas creaturae sit finita, amor quo Deus amat creaturas, est finitus; non ergo est Spiritus sanctus.

Sed contra est quod Augustinus dicit, quod Spiritus sanctus est genitoris genitique suavitas, ingenti largitate perfundens omnes creaturas; ergo Spiritus sanctus est amor quo Deus diligit creaturam.

Praeterea, Deus diligit sanctos, inquantum sunt membra Unigeniti sui, ut dicit Augustinus. Sed Unigenitus et membra sua sunt una persona mystica, et ita a Patre uno amore diliguntur. Sed Pater diligit Filium Spiritu sancto, ut supra dictum est; ergo et homines sanctos diligit Spiritu sancto.

Respondeo. Dicendum, quod cum Deus dicitur nos diligere, in dilectione sua duo possumus intelligere: scilicet amorem aeternum et effectum temporalem: et ratione utriusque diligit nos Spiritu sancto: sed aliter et aliter. Nam ratione aeternae dilectionis diligit nos Spiritu sancto, sicut et Filium. Nam quicquid diligentis est in nobis, totum est derivatum a Filio, sicut tota pulchritudo artificiatum est ab arte. Unde artifex diligendo artem, diligit artificiatum, inquantum sunt ab arte. Sed quantum ad effectum temporalem diligit nos per Spiritum sanctum, sicut per causam illius effectus. Nam omnia dona nobis dantur per Spiritum sanctum. Sic ergo cum dicitur, Pater diligit nos Spiritu sancto, ablativus potest uno modo construi in habitudine quasi formalis effectus, et alio modo in habitudine causae efficientis.

Ad primum ergo dicendum, quod licet Pater amet Filium et nos eodem amore, non tamen aequaliter; quia amor ille non aequaliter invenit in nobis et in Filio diligentis rationem.

S. Th. Opera omnia. V. 22.

Ad secundum dicendum, quod diligere in praedicta loquutione potest sumi notionaliter, non obstante, quod importat respectum ad creaturam. Nam notionalia non important primo et per se respectum nisi ad divinam personam: sed ex consequenti ad creaturam, inquantum creatura personam divinam imitatur. Sicut enim Deus verbo suo intelligit se et nos, inquantum intelligendo se intelligit nos, sic Spiritu sancto amat nos, inquantum amando Filium nos amat.

Ad tertium dicendum, quod mensura amoris sequitur bonitatem ejus quod primo et per se amatur, non autem ejus quod in alio amatur. Sic autem nos amamur in Patre et in Filio.

QUAESTIO II.

Deinde quaeritur de his quae pertinent ad Filium. Et circa hoc quaeruntur duo: 1.^o utrum Pater sit sapiens sapientia genita; 2.^o utrum Pater intelligat in Filio.

ARTICULUS I.

Ad primum sic proceditur. Et 1. videtur quod Pater sit sapiens sapientia genita. Sicut enim Spiritus sanctus est amor a Patre procedens, ita Filius est sapientia a Patre genita: sed Pater diligit amore a se procedente Spiritum sanctum, ut dictum est: ergo est sapiens sapientia gratia.

2. Praeterea, secundum Anselmum, dicere summo spiritui nihil aliud est quam intelligere. Verbum autem, secundum Augustinum, est sapientia genita: cum ergo Pater dicat et se et creaturas verbo suo, id est Filio, videtur quod ipse sit intelligens sive sapiens sapientia genita.

3. Praeterea, eadem sapientia est sapiens Pater et Filius: sed Filius est sapiens sapientia genita, et etiam ingenita; ergo et Pater utraque sapientia est sapiens.

Sed contra. Sapientia qua quis est sapiens, significatur ut forma ipsius: sed sapientia genita non significatur ut forma Patris, sed magis ut aliquid ex eo exortum; ergo Pater non est sapiens sapientia genita.

Praeterea, sicut se habet essentia ad esse, ita sapientia ad sapere; sed Pater nullo modo est eius essentia genita. Sic enim haberet esse ab eo quod genuit, quod est impossibile; ergo nullo modo est sapiens sapientia genita.

Respondeo. Dicendum, quod sapientia genita nominat hypostasim distinctam ab hypostasi Patris. Aliquis autem non potest dici sapiens per aliquam hypostasim, nisi quatenus ab ea sapientiam accipit. Unde, cum Pater nihil accipiat a Filio, eo quod Filius quicquid habet a Patre accipit, nullo modo potest dici quod Pater sit sapiens sapientia genita.

Ad primum ergo dicendum, quod amor significatur per modum operationis. Denominator autem aliquis agens per operationem quae est ab ipso. Sapientia autem significatur per modum formae inherens. Unde, cum non denominetur aliquis qualis ab aliqua forma quae sit ab ipso, sed quae est eo, non potest dici Pater sapiens sapientia genita.

Ad secundum dicendum, quod sicut amor, ita et verbum significatur per modum operationis; et ideo sicut recte dicitur, Pater diligit Spiritu sancto,

ita recte dicitur diligere verbo, non autem sapere sapientia genita, ratione jam dicta.

Ad tertium dicendum, quod aliquis potest dici sapiens aliquo tripliciter. Uno modo sicut forma inhaerente: et sic Filius est sapiens sapientia essentiali, quae neque est genita neque ingenita. Alio modo, sicut a quo accipit sapientiam: et sic Filius dicitur sapiens a sapientia ingenita, id est a Patre. Tertio modo sicut eo quo sapit, quod est alienius suppositi: et sic Filius dicitur sapiens sapientia genita, in quantum ipsa hypostasis Filii sapiens est. Filius autem est alia hypostasis a Patre, sed non alia essentia, habens tamen a Patre essentiam et non e converso: et ideo Filius aliquo modo dicitur esse sapiens sapientia genita, et etiam ingenita, Pater autem sapientia genita nullo modo.

ARTICULUS II.

Ad secundum sic proceditur. Et 1. videtur quod Pater non intelligat in Filio. Id enim in quo aliquid intelligitur est intelligendi principium: sed Filius non est principium intelligendi Patri; ergo Pater non intelligit in Filio.

2. Praeterea, intelligere aliquid in alio, est discurrere in uno in aliud. Sic enim nos conclusiones in principiis intelligimus. Sed Deus intelligit sine aliquo discursu; ergo Pater non intelligit aliquid in Filio.

3. Praeterea, idem est Deo intelligere et sapientiam esse. Sed Pater non est in Filio; sic enim aliquo modo, Filio sapiens diceretur; ergo Pater non intelligit in Filio.

Sed contra. Pater per intellectum operatur: sed Pater in Filio operatur: Gen. 1: « In principio creavit Deus caelum etc. » Glossa: id est in Filio; ergo Pater intelligit in Filio.

Praeterea, quicumque perfecte intelligit aliquid, intelligit in eo quicquid in eo repraesentatur: cum ergo Pater perfecte intelligat Filium, intelligit in eo, et seipsum quem Filius repraesentat, et omnes creaturas quae in Filio repraesentantur.

Respondeo Dicendum, quod intelligere in aliquo dupliciter dicitur. Uno modo accipere cognitionem in isto: sicut nos in creaturis Deum videmus, quia ex creaturis Dei notitiam accipimus; et sic Pater nihil intelligit in Filio. Alio modo dicitur aliquis intelligere in aliquo quia intuetur in eo esse, quod aliquo modo ibi est; sicut homo qui scit aliquam conclusionem videt eam vel intelligit in verbis alienius eam pronunciantis: et hoc modo Pater in Filio intelligit et se, et quicquid in Filio repraesentatur.

Ad primum ergo dicendum, quod obiectio illa procedit, quantum ad primum modum intelligendi in aliquo, non autem quantum ad secundum. In secundo enim modo, id in quo intelligitur aliquid, non se habet ut intelligendi principium, sed solum ut obiectum cognitionis.

Ad secundum dicitur, quod aliquid intelligitur in aliquo quandoque quidem ita quod alio actu intelligitur quod intelligitur et alio in quo intelligitur; sicut nos aliquo actu intelligimus conclusiones et principia: et sic intelligitur aliquid in aliquo cum discursu. Quandoque vero eodem actu intelligitur quod intelligitur et quo intelligitur; sicut eodem actu visionis videt aliquis speculum, et rem in speculo; et sic videtur aliquid in alio, sine di-

scursu eodem actu Deus intelligit quicquid intelligit. Unde absque omni discursu aliquid in alio intelligit.

Ad tertium dicendum, quod Pater non dicitur in Filio intelligere sicut in principio: sed sicut in objecto, ut dictum est. Sapiens autem significatur per modum habitus, sed intelligens per modum actus. Habitus autem non habet respectum ad obiectum nisi mediate, sed actus immediate; et ita Pater non ita dicitur sapiens in Filio, sicut intelligens in Filio.

DISTINCTIO XXXIII.

Post praedicta etc. (V. edit. nostrae tom. VI, pag. 265.)

QUAESTIO UNICA.

Hic quaeruntur quatuor: 1.^o utrum proprietates sint divina essentia; 2.^o utrum sint ipsae personae; 3.^o utrum sint in personis; 4.^o utrum sint in essentia.

ARTICULUS I.

Ad primum sic proceditur. Et 1. videtur quod proprietas non sit idem quod essentia. Quaecumque enim sunt idem, ita se habent quod, multiplicato uno, multiplicatur et reliquum: sed in divinis proprietates multiplicantur, essentia una manente; ergo proprietas et essentia non sunt idem.

2. Praeterea, quaecumque sunt idem, eorum est unum esse: sed esse relationis est ad aliud se habere, secundum Philosophum in Praedicam.; ergo si proprietas relativa est idem quod divina essentia, oportebit quod esse divinae essentiae sit ad aliud se habere, et sic haberet esse imperfectissimum.

3. Praeterea, impossibile est aliquos secundum idem convenire et distinguere: sed Pater et Filius conveniunt in essentia, distinguuntur autem in proprietatibus relationis; ergo proprietas relativa non est idem quod essentia.

4. Praeterea, de quocumque praedicatur essentia, praedicantur essentialia attributa: haec autem non praedicantur de proprietatibus: non enim dicitur quod paternitas sit sapiens vel quod creet; ergo proprietas non est essentia.

Sed contra. Nihil est adorandum adoratione patriae, nisi Deus: sed proprietates personarum sunt adorandae adoratione patriae, ut patet in Praefatione Trinitatis, « ut in personis adoretur proprietas; » ergo proprietates relativae sunt ipse Deus.

Praeterea, quicquid est praeter rei essentiam, vel nihil est vel accidens est: sed quod est nihil vel accidens non constituit alicujus naturae hypostasim; cum ergo proprietates hypostases constituent, ut supra dictum est, impossibile est quod sint aliquid extra divinam essentiam.

Respondeo. Dicendum, quod suppositis fidei fundamentis, necesse est ponere proprietates relativae esse divinam essentiam. Oportet enim dicere quod relationes istae vel sint res aliquae vel non. Si non sunt realiter, sed in ratione tantum, cum personae divinae non distinguantur nisi per huiusmodi relationes, sequeretur quod distinctio personarum in divinis esset secundum rationem tantum: quod est haeresis Sabellii. Si autem sunt res, de necessitate sunt creatae, si non sunt essentia divina;

quia sola divina essentia est increata: et ita sequeretur quod Pater et Filius et Spiritus sanctus, inquantum hujusmodi, essent creaturæ: quod est impiissimum. Unde oportet dicere quod relatio in divinis est idem realiter quod essentia divina, differt autem solum ratione. Nam relatio importat respectum ad alterum, non autem essentia. Et hunc respectum considerans Porretanus, dixit relationes in divinis non esse essentiam, sed assistentes tantum ad modum relationum quæ non ponunt aliquid reale in relatis, ut dextrum et sinistrum in lapide: sed postea hoc in Rhemensi concilio retractavit.

Ad primum ergo dicendum, quod relatio, ut dictum est, differt ratione ab essentia, inquantum est ad alterum. Ex hoc autem habet quod multiplicetur ratione oppositionis relativæ, non autem ex parte illa qua est cum essentia idem.

Ad secundum dicendum, quod in definitione Philosophi esse non sumitur pro actu essendi, sed pro ratione entis; prout dicitur, quod definitio est oratio significans quid est esse: et sic esse, id est relationis ratio in divinis, est ad aliud se habere; quamvis esse suum in divinis non sit aliquid quam esse essentia.

Ad tertium dicendum, quod personæ distinguuntur relationibus, secundum quod ad invicem opponuntur relative; non autem ex parte illa qua sunt unum cum essentia.

Ad quartum dicendum, quod attributa essentialia possunt significari in abstracto, vel in concreto. Si in abstracto, sic essentialiter prædicantur, et de essentia, et de proprietate in abstracto acceptis. Dicimus enim quod essentia divina, vel etiam paternitas, est bonitas, vel sapientia Dei. Si autem in concreto significantur, sic non prædicantur de essentia vel proprietate in abstracto significatis, nisi illa attributa quæ circumeant omne ens. Dicimus enim quod essentia vel potentia est ens una vel bona; non autem proprie, quod sit sapiens vel creans, sed hoc dicitur de Deo vel de Patre, qui significantur per modum suppositi, non autem essentia vel paternitas.

ARTICULUS II.

Ad secundum sic proceditur. Et 1. videtur, quod proprietates relativæ non sint idem quod divinæ personæ. Quia, secundum Augustinum. In omni eo quod dicitur relative, est aliquid, excepto hoc quod ad alterum dicitur: sicut denarius est aliquid excepto hoc quod dicitur pretium. Si ergo personæ divinæ dicuntur ad aliquid, ipsæ sunt aliquid præter ipsas relationes; et ita relationes non sunt personæ divinæ.

2. Præterea, personæ divinæ realiter distinguuntur: sed relatio non distinguitur realiter, ut videtur; quia non distinguuntur adinvicem nisi secundum quod ab essentia differunt, a qua differunt solummodo ratione; ergo proprietates relativæ non sunt ipsæ divinæ personæ.

3. Præterea, si proprietates relativæ essent idem quod personæ, hoc modo se haberet ad Deum proprietas, sicut persona: sed Deus dicitur trinus propter trinarium personarum; ergo diceretur quinus propter quinarium notionum: quod est falsum.

4. Præterea, persona divina est generans, vel genita, vel procedens: non autem proprietas; ergo proprietas non est persona.

Sed contra est quod Hilarius dicit: «Nec quicquam est Filius, nisi Filius:» sed Filius relationem significat; ergo Filius est ipsa relatio.

Præterea, illud quo constituitur aliquid, prius est eo naturaliter: sed personæ divinæ constituuntur relationibus ipsis; ergo si relationes non sunt ipsæ divinæ personæ, ergo erit aliquid prius ipsis personis: quod est hæreticum.

Respondeo. Dicendum, quod simplex non individuatur nisi a seipso. Divinæ autem personæ sunt simplices. Impossibile est ergo, quod relationes quibus distinguuntur, et quasi individuantur, sint secundum rem aliud quam ipsæ. Sed tamen sunt aliud ratione. Nam relationes, sive proprietates, significantur, ut quo aliquid distinguitur; persona autem, ut quæ distinguitur. Idem autem est in Deo quo distinguitur, et qui distinguitur: sed differt sola ratione, sicut qui est, et quo est, ut Deus et deitas. Quidam ergo attendentes horum alterum tantum, scilicet differentiam rationis, dixerunt proprietates non esse personas, ut Porretani. Quidam vero e converso attendentes solum identitatem rei, dixerunt proprietates non esse in divinis, sed tantum essentiam et personam. Sed secundum veritatem utrumque ponendum est per modum prædictum.

Ad primum ergo dicendum, quod in personis divinis est aliquid quod absolute dicitur, quod tamen non est aliud re, a relatione, sed ratione tantum: et hoc est essentia.

Ad secundum dicendum, quod quamvis relatio supra essentiam non addat aliquid, secundum rem, sed ratione tantum, sicut et bonitas vel sapientia; tamen quia relatio res quædam est, quæ est divina essentia, sicut et bonitas et sapientia: ideo Deus sicut realiter est bonus vel sapiens, ita realiter relatus: et per consequens est ibi realis distinctio, quæ relationem consequitur: et non rationis tantum.

Ad tertium dicendum, quod proprietates, licet sint ipsæ personæ secundum rem, non tamen significantur ut subsistentes sicut personæ: sed sicut inhaerentes. Numerus autem rebus non attribuitur secundum proprietates inhaerentes, sed secundum distinctionem rerum subsistentium: et ideo Deus non dicitur quinus propter quinarium notionum: sed trinus propter trinarium personarum.

Ad quartum dicendum, quod proprietates non significantur ut suppositum, sicut persona; et ideo, propter alium modum significandi, quæ conerective dicuntur de persona, de proprietate dici non possunt.

ARTICULUS III.

Ad tertium sic proceditur. Et 1. videtur quod proprietates non sint in personis. Idem enim non est in seipso, nisi ratione partium, ut probatur in 4. Physicorum. Sed persona divina non habet partes. Cum ergo proprietas sit idem quod persona, ut dictum est, videtur quod proprietas non sit in persona.

2. Præterea, proprietas in rebus creatis est in eo cuius est proprietas, per modum accidentis: (Nam proprium manat de genere accidentium secundum Boetium). Sed in Deo non potest esse aliquid accidens; ergo proprietas non potest esse in divina persona.

3. Præterea, relatio non habet rationem proprietatis, nisi secundum quod est ad alterum: (sic

enim distinguit): sed secundum quod est ad alterum non habet rationem inhaerentis, sed magis assistentis; ergo proprietates non sunt in personis.

Sed contra est quod dicitur in Praefatione: « In personis adoretur proprietas. »

Praeterea, differentia constitutiva est in specie, sicut rationale inest homini (1) sed sic proprietas personalis se habet ad personam, sicut differentia constitutiva ad speciem; ergo proprietas est in persona.

Respondeo dicendum, quod ex contrariis causis quidam convenerunt in hoc, quod dicerent proprietates non esse in personis. Porretani enim considerantes rationem relationis, secundum quam ad alterum dicitur, dixerunt proprietates in personis non esse, sed personis exterius quasi adhaerere. E contrario vero Praepositivus considerans proprietatem, seu relationum realitatem, dixit proprietates non esse in personis, sed ipsas personas; ponens quod quandoecumque proprietates in divinis nominantur, sumitur abstractum pro concreto, ut paternitas pro Patre, per modum quo loquimur sic, Rogo benignitatem tuam, id est, te benignum. Si vero utrumque horum consideratur simul, sicut et necesse est, oportet dicere proprietates in personis esse. Haec enim praepositio, in, importat distinctionem, in quantum est transitiva, et unionem, ratione suae significationis. Sic ergo suae transitioni sufficit transitio rationis, significationi autem unitas realis, ad hoc quod convenienter proprietas in persona esse dicatur.

Ad primum dicendum, quod proprietas et persona licet sint idem secundum rem, differunt tamen ratione, ut dictum est.

Ad secundum dicendum, quod in creaturis esse, quo proprietas inest, aliud est ab esse in quo subsistit id cui inest: et ideo proprietas est accidens. Sed in divinis esse quo proprietas inest personae est ipsum esse quo persona subsistit: et ideo non est accidens.

Ad tertium dicendum, quod relatio in divinis quamvis habeat rationem proprietatis ex respectu ad alterum, ipsa tamen relatio res quaedam est, per modum identitatis ad personam se habens: et per hunc modum proprietas in persona est.

ARTICULUS IV.

Ad quartum sic proceditur. Et 1. videtur, quod proprietates seu relationes non sint in essentia. Illud enim cui inest relatio refertur, et per consequens distinguitur: sed essentia divina non refertur nec distinguitur; ergo relatio non est in essentia.

2. Praeterea, cum relatio sit idem quod essentia, non potest in ea esse nisi per modum identitatis: sed hoc etiam modo est in persona, ut dictum est; ergo eodem modo est proprietas in essentia et in persona: sed ita est in persona quod eam distinguit; ergo si est in essentia, ipsa distinguitur.

3. Praeterea, cuiusque inest essentia, inest omne id quod est in essentia; si ergo proprietas, ut puta paternitas, est in essentia divina, erit in Filio in quo est divina essentia; non ergo proprietas est in essentia.

Sed contra. Quicquid non est in essentia divina, aut nihil, aut creatum est: sed neutrum eorum proprietati convenit, ut ex praedictis patet; ergo proprietas est in essentia.

(1) *Al.* huiusmodi.

Praeterea, persona divina est idem quod essentia secundum rem: sed proprietas secundum rem est in persona; ergo secundum rem est in essentia.

Respondeo. Dicendum, quod proprietas a persona et ab essentia differt ratione, cum utroque tamen est idem secundum rem, ut ex praedictis patet. Secundum hoc tamen quod ratione ab utroque differt, aliter comparatur ad utrumque. Nam ad essentiam se habet sicut omnino disparatum, ad personam vero se habet in hac consideratione per modum formae inhaerentis. Sic ergo in essentia esse proprietas dici non potest, nisi in quantum est secundum rem cum essentia idem; in persona vero esse dicitur etiam ex illa parte qua ab essentia differre videtur, prout significatur ut proprietas vel forma personae.

Ad primum ergo dicendum, quod ratio illa procedit de eo in quo est relatio sicut forma in supposito vel in subjecto. Sic autem non est in essentia, sed in persona, ut dictum est; et ideo essentia non refertur, nec distinguitur, sed persona.

Ad secundum dicendum, quod proprietas est in persona, non solum ratione realis identitatis, sicut dicitur esse in essentia, sed alio modo etiam, ut dictum est.

Ad tertium dicendum, quod ratio illa sequeretur, si eadem ratione diceretur proprietas esse in essentia qua essentia est in persona. Hoc autem non est. Nam essentia est in persona per modum formae, non autem proprietas in essentia: et ideo ratio non sequitur.

DISTINCTIO XXXIV.

Praedictis autem adjiciendum est. (*V. edit. nostrae tom. VI, pag. 271.*)

Hic est duplex quaestio. Primo de comparatione essentiae ad personam. Secundo de his quae translativae de Deo dicuntur.

QUAESTIO I.

Circa primum quaeruntur duo: 1.^o utrum essentia sit idem quod persona; 2.^o de hoc, quod essentialia attributa appropriantur in litera personis.

ARTICULUS I.

Ad primum sic proceditur. Et 1. videtur quod persona et essentia in divinis non sint idem. Persona enim significat aliquid incommunicabile, ut patet per definitionem Richardi qui dicit, quod persona est divinae naturae incommunicabilis existentia: sed essentia communis est pluribus; ergo essentia et persona non sunt idem in divinis.

2. Praeterea, affirmatio et negatio non verificantur de eodem; sed persona generat, non autem essentia; ergo persona et essentia non sunt idem.

3. Praeterea, omnis natura quae est idem cum persona ex seipsa, oportet quod individuatur: sed in natura divina non intelligitur individuatio, sive incommunicabilitas, ex essentia, sed ex proprietate; ergo essentia divina non est idem quod persona.

Sed contra. In Deo idem est quod est, et quo est, secundum Boetium: sed persona significatur ut quod est, vel qui est; essentia autem, ut quo est; ergo in divinis est idem essentia quod persona.

Praeterea, essentia est in persona: nam persona est rationalis naturae individua substantia; si ergo essentia divina non sit ipsa persona, sequitur quod persona divina sit composita; quod est inconveniens.

Respondeo. Dicendum, quod oportet dicere essentiam divinam esse idem quod persona secundum rem, et quod inter ea non sit distinctio nisi secundum intelligentiae rationem, ut in litera dicitur. Et hoc patet si consideretur qualiter differt in nobis essentia et persona. Nomine enim essentiae significantur sola essentialia rei principia: sed in nomine personae includuntur omnia quaecumque possunt ei convenire, sive sint essentialia, sive accidentalia. Ergo persona significatur per modum totius, sed essentia per modum partis. In omnibus ergo rebus in quibus invenitur aliquid praeter principia essentialia, differt essentia et persona realiter, et hoc est in omni creatura. In Deo autem praeter essentiam suam, non invenitur aliquid quod sit realiter distinctum, sed ratione tantum. Si autem praeter essentiam in Deo non esset aliquid, nec re nec ratione differens, tunc essentia esset idem quod persona re et ratione.

Ad primum dicendum, quod secundum hoc persona ratione differt ab essentia, quod includit in suo intellectu proprietatem, non autem essentia. Et ideo ex hoc quod ratione distinguuntur essentia, et persona, contingit, quod persona est incommunicabilis, et essentia communis.

Ad secundum dicendum, quod persona, quia includit in suo intellectu quicquid ratione est in divinis, ideo significatur per modum totius, id est ut suppositum subsistens, non autem essentia. Unde, cum generare sit rei existentis solum, ex ipsa differentia rationis contingit, quod persona generat, et essentia non generat.

Ad tertium dicendum, quod proprietates, per quam est individuatio vel incommunicabilitas in divinis, non est aliud ab essentia re, sed ratione tantum. Et ideo nec persona ab essentia.

ARTICULUS II.

Ad secundum sic proceditur. Et 1. videtur, quod inconvenienter in litera appropriantur essentialia attributa personis divinis. Sapientia enim est principium verbi: sed principium verbi in divinis est Pater; ergo sapientia debet appropriari Patri, et non Filio.

2. Praeterea, potentia in divinis dicitur, vel ad actum notionalem, ut generare, vel ad actum essentialem, ut creare. Sed neutra potentia Patri appropriatur. Nam potentia generandi est ei propria. potentia autem creandi non importat principium divinae personae; ergo Patri potentia non appropriatur.

3. Praeterea, virtus ad potentiam pertinet, quia est ultimum potentiae secundum Philosophum in 1. Caeli et mundi. Sed virtus appropriatur Filio: 1. ad Cor. 1: « Christum Dei virtutem, et Dei sapientiam: » et Spiritui sancto. Luc. 6: « Virtus de illo exibat, et sanabat omnes. » Ergo omnis potentia non debet appropriari Patri.

4. Praeterea, bonitas habet rationem causae finalis ad quam alia referuntur. Sed secundum Hilarium, Pater est, ad quem aliae personae referuntur; ergo bonitas magis est approprianda Patri, quam Spiritui sancto.

5. Praeterea, bonitas non est amor, sed amoris principium; cum ergo Spiritus sanctus sit amor, bonitas non debet Spiritui sancto appropriari, sed Patri vel Filio.

Respondeo. Dicendum, quod, sicut superius dictum est, duplici ratione fit appropriatio in divinis: scilicet ratione convenientiae ad propria divinarum personarum, et ratione differentiae ad propria humanarum personarum. Utroque autem modo convenit appropriatio, quae in litera ponitur, divinis personis. Nam apud nos patres consueverunt esse omnes impotentes, propter senium. Et ideo Deo Patri per contrarium appropriatur potentia. Filii apud nos sunt insipientes propter inexperientiam. Et ideo Filio Dei appropriatur sapientia. In nobis etiam ex multitudine irae, major attractio vel expulsio spiritus fit, propter accensionem sanguinis circa cor; et propter hoc, nomen spiritus quandam asperitatem sonat, secundum illud Isa. 45: « Spiritus robustorum quasi turbo impellens parietem. » Et ideo Spiritui sancto attribuitur bonitas. Similiter potentia habet rationem principii; et sic habet similitudinem cum propriis Patris, qui est principium totius deitatis. Sapientia vero cum Filio, qui procedit ut verbum, quod ad sapientiam pertinet. Bonitas vero Spiritui sancto congruit, qui procedit ut amor, ejus tota ratio est bonitas. Unde appropriatio in litera posita est conveniens.

Ad primum ergo dicendum, quod in nomine personali Patris non importatur aliquid ad sapientiam pertinens, sicut importatur in nomine personali Filii, quod est verbum; et ita sapientia non ita Patri ut Filio appropriatur; et praecipue cum verbum sit sapientia in actu, in quo completio sapientiae invenitur.

Ad secundum dicendum, quod potentia, secundum quod appropriatur Patri, accipitur in ordine ad actum essentialem. Haec autem potentia, licet non sit principium divinae personae, ex hoc ipso tamen quod est principium alienius, habet similitudinem cum principio personali, et ita Patri appropriatur.

Ad tertium dicendum, quod virtus potest tripliciter considerari. Uno modo secundum quod radicatur in potentia, et sic competit Patri: alio modo prout per eam potentia operatur; et sic competit Filio, per quem Pater operatur. Tertio modo, prout opus bonum reddit; et sic Spiritui sancto, cui appropriatur bonitas.

Ad quintum dicendum, quod ad bonitatem non refertur aliquid nisi per viam amoris. Et ideo bonitas Spiritui sancto, qui est amor, appropriatur.

Ad quintum dicendum, quod ex hoc ipso, quod bonitas est amoris principium, ideo habet quandam convenientiam cum amore; et ita appropriari potest Spiritui sancto; non autem Patri vel Filio, quia in propriis eorum nominibus non intelligitur aliquid ad bonitatem vel ad amorem pertinens.

QUAESTIO II.

Deinde quaeritur de his quae translative de Deo dicuntur. Et circa hoc quaeruntur duo: 1.º utrum nomina creaturarum debeant de Deo translative dici; 2.º utrum omnia quae de eo dicuntur, translative dicantur.

ARTICULUS I.

Ad primum sic proceditur. Et 1. videtur quod de Deo nihil translative dici debeat. In divina enim doctrina caveri debet hoc quod potest esse occasio erroris. Sed consideratio creaturarum, præcipue corporearum, fuit occasio idolatriæ errandi circa Deum, secundum illud Sapientiae 15, « Creaturæ Dei in odium factæ sunt, et in tentationem animæ hominum, et in mœcipulam pedibus insipientium; » ergo nomina creaturarum corporalium non debent translative in Dei prædicationem assumi.

2. Præterea, inter Deum et creaturam non potest attendi aliqua similitudo, quia neque genere, neque specie, neque accidente conveniunt: sed translatio attenditur secundum aliquam similitudinem, ut patet per Philosophum; ergo nomina creaturarum in Deum assumi non debent.

3. Præterea, plus accedunt ad Dei similitudinem substantiæ spirituales quam corporales: sed in divinam prædicationem non transumuntur nomina spiritualium creaturarum: non enim dicitur aliquando Deus Angelus vel anima; ergo multo minus nomina corporalium creaturarum sunt in divinam prædicationem transumenda.

4. Præterea, secundum Boetium in lib. de Trin., in divinis non oportet ad imaginationem deduci: sed huiusmodi transumptio ad imaginationem deducit: ergo inconvenienter fit in divinis.

Sed contra. Deus unicuique creaturæ providet secundum modum suum. Unde dicitur Matth. 23: « Dedit unicuique secundum propriam virtutem. » Sed modus conaturalis homini est, ut ex sensibilibus cognitionem accipiat; ergo convenienter homini traduntur divina, sub metaphora sensibilibus rerum.

Præterea, divina mysteria sunt infidelibus occultanda: Matth. 6: « Nolite sanctum dare canibus. » Sed quidam modus occultandi est dum spiritualia sub corporalibus figuris traduntur; ergo convenienter fit transumptio huiusmodi corporalium in divina.

Respondeo. Dicendum, quod secundum Philosophum, anima quodammodo est omnia, in quantum est potentia ad omnes species intelligibilem et sensibilem. Per hunc ergo modum anima hominis debet in divina cognitione perfici, per quem modum in creaturis divina bonitas diffunditur: quarum quaedam percipiunt divinam bonitatem immaterialiter, ut incorporea; quaedam vero materialiter, ut corporalia. Et ideo ad hoc quod homo perfecte Dei notitia perficeretur, oportuit quod partim de divinis instrueretur intelligibiliter et immaterialiter, quod fit per intelligibiles Dei nominationes, ut cum docemur Deum esse bonum et sapientem; partim vero quasi visibiliter et corporaliter, ut cum nobis divina sub similitudinibus rerum corporalium describuntur: et sic rebus divinis unimur, et quantum ad intellectum et quantum ad sensum, prout possibile est. Et hanc causam assignat Dionysius in epistola quam scribit ad Titum.

Ad primum ergo dicendum, quod erroris occasio tollitur per alia quæ in Scripturis de Deo dicuntur absque metaphora. Nam ex his quæ metaphorice dicuntur, non est aliquid asserendum, nisi per ea quæ plane in Scripturis dicuntur valeat approbari, ut Augustinus docet in lib. de Doctrina christiana.

Ad secundum dicendum, quod huiusmodi translatio corporalium ad divina, non fit secundum similitudinem generis vel speciei, aut accidentis, sed proportionalitatis, ut cum dicitur Deus iratus ex hoc, quod ita se habet ad puniendum, sicut homo iratus ad vindicandum.

Ad tertium dicendum, quod in divinis est imaginatio (1) relinquenda, quantum ad considerationis finem, in quo est iudicium; ut scilicet de divinis non iudicemus ad modum corporalium rerum; non autem quantum ad principium considerationis. Nam ex visibilibus creaturis quæ sub imaginatione cadunt, oportet in invisibilia divinorum manuduci intellectum, secundum doctrinam Apostoli ad Rom. 1.

Ad quartum dicendum, quod propter similitudinem spiritualium creaturarum ad Deum posset de facili existimari, quod secundum proprietatem, et non secundum metaphoram dicerentur de Deo: sed de creaturis visibilibus manifestum est, quod secundum proprietatem de Deo dici non possunt (2).

ARTICULUS II.

Ad secundum sic proceditur. Et 1. videtur quod nihil possit dici de Deo, nisi metaphorice. Nomen enim unius rei, non nisi metaphorice de alia prædicatur; sicut cum dicitur, homo, lapis. Sed Deus non nominatur a nobis nisi nominibus creaturarum. Unde dicitur in lib. de Causis quod cum Deus dicitur intelligens nominatur nomine causati sui primi; et eadem ratio est de aliis, quæ de Deo dicuntur; ergo nullum nomen dicitur de Deo nisi metaphorice.

2. Præterea, omne quod dicitur de aliquo ex sola ratione similitudinis, metaphorice prædicatur; sicut cum dicitur, pratum ridet. Sed Deum non possumus nominare nisi ex similitudine bonitatis ejus in creatura reperta: sic enim in Dei cognitionem devenimus; ergo omnia nomina quæ a nobis de Deo dicuntur, metaphorice de eo prædicantur.

3. Præterea, omne nomen quod ab aliquo verius removetur quam affirmetur, de eo prædicatur metaphorice: sed talia sunt divina nomina omnia: quia secundum Dionysium, negationes in divinis veræ sunt, affirmationes incompactæ; ergo non de Deo, nisi metaphorice, prædicantur.

Sed contra est quod Ambrosius distinguit nomina translative, contra alia divina nomina.

Præterea, omne quod dicitur de aliquo metaphorice, minus vere in eo existit, quam in eo unde metaphora sumitur: sed quaedam sunt nomina quorum res verius invenitur in Deo quam in creaturis, sicut esse bonum et alia huiusmodi; ergo non dicuntur de Deo metaphorice.

Respondeo: quod cum Deus sit causa exemplaris omnium rerum, ipsæ creaturæ proponuntur ut quaedam imago Dei, per quam in ipsum devenire possumus. Similitudo autem in aliqua imagine reperta, dupliciter potest considerari. Uno modo quantum ad rationem formæ: et sic imago ab exemplari non dissidet, et id quod notat formam imaginis, potest etiam exemplari convenire. Alio modo consideratur quantum ad esse quod habet in imagine, et sic dissidet ab exemplari: unde quod sic de imagine dicitur, exemplari non convenit; sicut esse euprum non convenit homini, sed esse

(1) *Al. imago.*

(2) *Responsiones ad tertium et quartum vicissim transponendæ sunt, ut servetur ordo in obijciendo adhibitis.*

sic effigiatum. Nomina ergo illa quibus designatur ratio formae, secundum quam creatura est Dei quasi imago, de Deo et creatura dicuntur: per prius tamen de Deo, cum illa ratio formae a Deo in creaturam effluat. Nomina vero in quorum significatione includitur etiam proprium esse creaturae, non conveniunt Deo, nisi metaphorice, sicut omnia quae species creaturarum designant, ut homo, lapis et huiusmodi. Et sic patet quod non omnia metaphorice dicuntur de Deo.

Ad primum ergo dicendum, quod nomen intellectus dicitur esse creaturae, in quantum ex creaturae inspectione ipsum imponimus. Quia tamen non est improprium (1) ad id quod est proprium creaturae, sed ad id in quo creatura Deum repraesentat, potest etiam de Deo absque metaphora dici.

Ad secundum dicendum, quod in nominibus metaphorice dictis, cum similitudine etiam includitur dissimilitudo: sed nomina quaedam sunt, quae id solum significant in quo creatura Deo est similis.

Ad tertium dicendum, quod nomina habent aliquid ex modo intellectus nostri quem significant: et quantum ad hoc, omnia nomina quae sunt a nobis imposita, inconvenienter Deo appropriantur, quia non eum intelligimus sicuti est. Aliquid vero habent et ex parte rei quam significant: et secundum hoc aliqua nomina Deo aptantur non metaphorice.

DISTINCTIO XXXV.

Cumque supra disseruerimus etc. (V. edit. nostrae tom. VI, pag. 279.)

QUAESTIO UNICA.

Hic quaeruntur quinque: 1.^o utrum in Deo sit scientia; 2.^o utrum sua consideratio sit sua substantia; 3.^o utrum cognoscat seipsum; 4.^o utrum cognoscat alia; 5.^o utrum cognoscat singularia.

ARTICULUS I.

Ad primum sic proceditur. Et 1. videtur quod scientia Deo non conveniat. Deo enim non convenit aliquid quod dependet ab aliquo principio, quia in eo nihil est causatum. Sed scientia dependet ab aliquo principio; nam scientiae principium est intellectus, secundum Philosophum in sexto Ethicorum; ergo scientia in Deo non est.

2. Praeterea, nihil potest Deo convenire, quod receptionem in eo importet: sed scientia importare videtur receptionem quamdam, cum intelligere dicatur non secundum motum ad res, sed secundum motum ad intelligentem; ergo scientia in Deo non est.

3. Praeterea, id quod est in mente nostra sublimius, est infra Deum: sed illud quod est in mente nostra supremum, non deputatur scientiae, sed sapientiae, secundum Augustinum; ergo in Deo non est scientia.

Sed contra est quod dicitur in Psalm. 138: « Mirabilis facta est scientia tua etc. »

Praeterea, secundum Anselmum, Omne quod est simplex et omnino melius esse quam non esse, Deo attribuendum est: sed scientia est huiusmodi; ergo est Deo attribuenda.

Respondeo. Dicendum, quod necessarium est in Deo ponere scientiam. Quod sic patet. Oportet enim, id quod est rerum omnium principium summe perfectum esse: quia omnia imperfecta reducuntur ad aliquod perfectum sicut ad principium, sicut

(1) *Lege impositum.*

semen ad plantam vel animal. Summa autem perfectio non potest inveniri nisi in cognitione. Nam res non cognoscens habet suam propriam perfectionem, et desunt sibi perfectiones omnium aliarum rerum: res autem cognoscens, non solum habet perfectionem propriam, per quam in natura sua subsistit, sed etiam aliorum, in quantum alia per formas suas possunt esse apud cognoscentem: et omnium, si res illa cognoscens nata sit omnia cognoscere; quod non potest esse, nisi habeat cognitionem intellectualem. Nam cognitio sensitiva ultra corporalia se non extendit. Oportet ergo Deum, qui est perfectissimus et a quo omnis perfectio derivatur, intellectivam cognitionem habere, quam scientiam dicimus ad praesens.

Ad primum ergo dicendum, quod scientia de Deo non dicitur nisi quantum ad id quod perfectionis est, scilicet ratione certitudinis; non autem secundum quod in nobis invenitur, per quemdam discursum ab intellectu principiorum deducta.

Ad secundum dicendum, quod ratio illa procedit de scientia quae est a rebus accepta: talis autem non est divina scientia, sed potius causans res.

Ad tertium dicendum, quod divina cognitio, et sapientia dicitur, in quantum seipsum Deus cognoscit; et scientia, in quantum res temporales intuetur: quamvis et ipsa sapientia etiam apud nos scientia quaedam sit, communiter nomine scientiae accepto, licet secundum aliquam scientiae acceptionem contra sapientiam distinguatur.

ARTICULUS II.

Ad secundum sic proceditur. Et 1. videtur quod operatio intellectualis Dei, non sit sua substantia. Omnis enim operatio est ab aliquo operante: sed divina essentia non est ab aliquo: ergo divina essentia non est ipsa operatio intellectualis Dei.

2. Praeterea, secundum essentiam suam, Deus non habet respectum ad creaturas: sed secundum operationem intellectualem ad creaturas referatur: ergo ipsa Dei consideratio non est substantia sua.

3. Praeterea, si essentia Dei est idem quod ejus intelligere, pari ratione erit idem quod ejus velle: sed quaecumque uni et eidem sunt eadem, sibi invicem sunt eadem; ergo Deo esset idem velle et intelligere: quod falsum videtur: multa enim intelligit quae non vult: et sic Dei essentia non est suum intelligere, ut videtur.

Sed contra. Ipse Deus est sua beatitudo, ut Boetius probat in lib. de Consol.; sed beatitudo, sive felicitas, est operatio intellectus, secundum Philosophum; ergo operatio intellectualis in Deo est ipse Deus.

Praeterea, operatio intellectus, cum non transeat in exteriorem materiam, est in ipso intelligente, ut patet per Philosophum 9 Metaph.: operatio ergo intellectualis Dei, est in ipso Deo. Sed quicquid est in Deo, est sua essentia; alias esset in eo aliquod accidens: ergo ipsum intelligere Dei est ipsa essentia.

Respondeo. Dicendum, quod quodcumque substantia rei est aliud quam ejus operatio, substantia est in potentia respectu operationis. Nam secundum operationem, res est in suo ultimo complemento. Impossibile autem est divinam substantiam esse in potentia respectu alicujus, cum ipsa sit actus purus et completus: unde necesse est dicere quod substantia Dei est ipsa sua operatio. Ex quo sequitur quod

Deo sit idem esse et vivere et intelligere et beatum esse. Nam substantia Dei est suum esse.

Ad primum ergo dicendum, quod esse ab aliquo in divinis accipitur dupliciter. Uno modo secundum originem rei, sicut Filius est a Patre; et sic essentiae divinae non competit esse ab alio. Alio modo secundum originem rationis; in quantum scilicet intellectus noster ea quae Deo attribuit, concipit secundum modum rerum quas inspicit: et sic operationem concipit, ut ab alio existentem, in quantum apud nos operans non est ipsa operatio, sed operationis principium.

Ad secundum dicendum, quod operatio Dei, quamvis sit ejus essentia secundum substantiam, tamen differt ratione: et ex hac parte contingit quod operatio intellectualis habet respectum ad res intellectas, quem respectum essentia non importat.

Ad tertium dicendum, quod sicut intelligere est idem re cum essentia divina, differens ratione, ita et velle: et ex hac parte quae ab essentia differunt, etiam abinvicem distinguuntur: et ideo alium respectum importat velle et intelligere: et propter hoc non oportet quod omnia sint volita a Deo, sicut seita sunt.

ARTICULUS III.

Ad tertium sic proceditur. Et 1. videtur quod Deus non intelligat se. Omne enim quod se intelligit, comprehendit se: quod autem comprehendit se, finitum est sibi: quorum utrumque habetur ab Augustino in libro 85 qq. Deus autem non est sibi finitus: quia, secundum Philosophum in 6 Physic., infinitum non potest transiri, neque a finito, neque ab infinito; ergo Deus non intelligit se.

2. Praeterea, scientia et intellectus non sunt nisi de universali. Nam secundum Boetium, universale est dum intelligitur, singulare dum sentitur. Sed Deus non est universale, quia sic non esset subsistens; ergo Deus a seipso intelligi non potest.

3. Praeterea, sicut se habet sensibile ad sensum, ita intelligere ad intellectum, ut dicitur in lib. de Anima. Sed sensibile a sensu non cognoscitur, quando est in naturam sentientis versum, ut patet de calore febris ecticae; ergo multo minus intelligibile, quod est omnino idem intellectui, potest ab intellectu intelligi: et sic Deus non potest intelligere seipsum.

Sed contra est quod Isidorus dicit, quod Trinitas sibi soli nota est, et homini assumpto.

Praeterea, quanto est nobilius intelligibile, tanto est nobilius ipsum intelligere. Sed intellectus creatus potest intelligere Deum. Ergo si Deus seipsum non intelligit; cum nullum intelligibile Deo aequiparari possit, intelligere creaturae nobilius erit quam intelligere Dei; quod est impossibile; ergo Deus intelligit seipsum.

Respondeo. Dicendum, quod aliqua forma ex hoc est intelligibilis quod est immaterialis. Quod patet ex hoc quod ab intellectu nostro nihil potest intelligi nisi post omnimodam depurationem a materia et materialibus conditionibus. Et quia intelligibile est perfectio intellectus, in quantum est intelligens actu, perfectio autem omnis est perfectibili proportionata; ideo oportet substantiam intelligentem esse immaterialem. Et in hoc conveniunt in-

telligibile et intelligens: differunt autem in duobus: scilicet in hoc quod intelligens oportet esse subsistens, sicut et quodlibet operans, non autem formam intelligibilem; et in hoc quod intelligibile comparatur ad intelligentem ut actus ad potentiam. Si ergo aliqua res immaterialis sit subsistens et ultima completionem completa, absque distinctione potentiae et actus, illa res erit intelligens seipsam. Hujusmodi autem Deus est; unde ipse seipsum perfecte intelligit.

Ad primum dicendum, quod Deus intelligit se, et comprehendit se, non obstante quod est infinitus. Non enim est infinitus privative, quasi habens partem post partem absque fine, quas necesse sit numerando pertransire ad completionem totius: sic enim esset impossibile ipsum comprehendere vel a se vel ab alio. Est autem infinitus negative, quia essentia sua nullo modo limitatur et similiter nec suum intelligere, quod est ejus essentia, ut probatum est. Sic ergo dicitur seipsum comprehendere, in quantum ejus essentia suum intelligere non excedit: et pro tanto etiam dicitur esse sibi finitus. Philosophus autem loquitur de infinito privative. Et sic patet solutio ad primum.

Ad secundum dicendum, quod duplex est intelligibile. Quoddam ex sua natura; et hoc non est universale, sed res immaterialis subsistens, sicut Deus. Aliud est intelligibile actu nostro, quod scilicet nos facimus intelligibile abstrahendo; et hoc est universale.

Ad tertium dicendum, quod sensus est virtus materialis, unde oportet quod cognoscat per alterationem et passionem; quod non potest esse, nisi sensibile sit diversum; intellectus autem divinus est immaterialis, nullo modo in potentia. Et ideo non est simile.

ARTICULUS IV.

Ad quartum sic proceditur. Et 1. videtur quod Deus non cognoscat alia a se. Intelligere enim est perfectio intelligentis. Si ergo Deus intelligit aliud a se, aliquid aliud ab ipso erit perfectio ipsius quod est impossibile.

2. Praeterea, actus distinguitur secundum objecta. Sed intelligere Dei est unica simplex operatio, cum ipsa sit ipsa Dei essentia. Si ergo intelligit seipsum, nihil aliud a se intelligit.

3. Praeterea, cognitio fit ratione similitudinis, quae est inter cognoscentem et cognitum. Sed inter Deum et creaturas est minima similitudo; ergo si Deus cognoscit eas, imperfectissime cognoscit: quod est inconveniens: non ergo cognoscit eas.

Sed contra est quod dicitur Heb. 4: • Omnia • nuda sunt et aperta oculis ejus. •

Praeterea, quicumque scit unum relativorum scit et aliud. Sed Deus est principium creaturarum: cum ergo ipse cognoscat seipsum, cognoscit et creaturas.

Respondeo. Dicendum, quod ex hoc aliquis est aliorum intellectivus, quod illa sunt apud ipsum modo intelligibili, sicut species rerum apud intellectum. Oportet autem effectus in sua causa aliquatenus praexistere et nobilius quam in seipsis. Agens enim producit sibi simile, nec agit ultra suae speciei virtutem. Sic ergo oportet creaturas esse in Deo, qui est earum causa: nec possunt in eo esse, nisi per modum ipsius Dei: quia unumquodque

inest alicui per modum ejus in quo est. Unde, cum Deus sit immaterialis et intellectualis naturae, creatura est in ipso immaterialiter et intelligibiliter.

Ad primum ergo dicendum, quod intelligentia est perfectio intelligentis, ratione suae similitudinis qua intelligitur: creaturae autem non per aliam speciem a Deo intelliguntur, quam per essentiam Dei, ratione cujus creaturae in Deo sunt. Nam creatura in creatore, est creatrix essentia, secundum Anselmum; unde consequitur quod Deus aliquo alio perficiatur.

Ad secundum dicendum, quod actus distinguitur non secundum materialem distinctionem objectorum, sed formalem; idest secundum rationem objecti: et sic non distinguuntur ea quae a Deo cognoscuntur, cum et se et alia per medium unum cognoscat, scilicet essentiam suam.

Ad tertium dicendum, quod quamvis sit maxima dissimilitudo inter Deum et creaturam, considerata proprietate naturali utriusque; tamen secundum modum repraesentationis est expressiva similitudo, inquantum divina essentia expressive representat creaturam. Haec autem similitudo, et non prima, ad cognitionem requiritur. Nam per speciem immaterialem res materiales cognoscuntur ab intellectu nostro.

ARTICULUS V.

Ad quintum sic proceditur. Et 1. videtur quod Deus singularia non cognoscat. Intellectus enim divinus immaterialior est quam noster. Sed intellectus noster, ratione suae immaterialitatis, singularia non cognoscit. Nam virtutes materiales ea tantum cognoscunt, ut imaginatio et sensus; ergo Deus singularia non cognoscit.

2. Praeterea, singulare individuatur per materiam: sed materia, cum sit in potentia solum, non habet similitudinem in Deo, qui est actus purus, et sic ab eo non cognoscitur; ergo nec singulare.

3. Praeterea, Deus omnia cognoscit per unam essentiam suam: sed unum non potest esse propria ratio multorum, ita quod sit uniuscujusque; cum de ratione proprii sit, quod alii non conveniat; ergo Deus non habet propriam cognitionem de rebus, sed solum communem: et ita non cognoscit singularia.

Sed contra. Nullus potest gubernare et judicare ea quae non cognoscit: sed Deus res particulares gubernat, et de actibus particularibus judicat; ergo singularia cognoscit.

Praeterea, quod scitur tantum in universali, scitur in potentia, quae quidem cognitio est imperfecta; si ergo Deus scit res tantum in universali, scit res imperfecte, quod est inconveniens.

Respondeo. Dicendum, quod Deus scit res, secundum quod est rerum causa. Sic enim ostensum est res in Deo existere, et per consequens ab eo intelligi. Ipse autem est causa rerum, non solum quantum ad naturam communem, sed etiam quantum ad omnia determinantia et individuantia naturam communem; et etiam quantum ad omnes causas proximas et remotas. Ita ergo Deus scit res, non solum quantum ad naturam communem, ut quidam dixerunt, neque solum secundum rationem generis et speciei, ut aliis visum est; sed etiam quantum ad singularitatem uniuscujusque. Unde perfecte cognoscit singulare: sicut ille qui cogno-

S. Th. Opera omnia. V. 22.

sceret omnia principia communia et individuoantia, et omnes causas proximas et remotas alicujus singularis, perfecte ipsum cognosceret.

Ad primum ergo dicendum, quod species intellectus nostri a rebus accipiuntur, quae non agunt nisi ratione formae. Unde species intelligibiles comparantur ad res ratione formarum suarum: et ideo per eas non cognoscitur singulare, quod non individuatur ex forma; praesertim cum tales species immaterialiter in intellectu recipiantur. Sed essentia divina per quam Deus intelligit, est repraesentativa formae et materiae, inquantum est utriusque causa; et ideo non est simile.

Ad secundum dicendum, quod secundum hoc similitudo rerum est in Deo, secundum quod res Deum imitantur. Rex enim similis dicitur imagini suae, inquantum imago eum imitatur. Et per hunc modum divina essentia est similitudo materiae, et cujuslibet entis; quia unumquodque inquantum participat de esse, in tantum divinam essentiam imitatur.

Ad tertium dicendum, quod essentia divina est exemplar proprium cujuslibet rei singularis, ex hoc quod alio et alio modo diversae res eam imitantur, sed nulla perfecte.

DISTINCTIO XXXVI.

Solet hic quaeri, cum omnia dicantur etc. (V. edit. nostrae tom. VI, pag. 287.)

Hic est duplex quaestio: Prima de rebus a Deo conditis. Secunda de ideis.

QUAESTIO I.

Circa primum duo quaeruntur: 1.º utrum ea quae Deus cognoscit, in Deo sint; 2.º utrum mala cognoscat.

ARTICULUS I.

Ad primum sic proceditur. Et 1. videtur quod ea quae Deus cognoscit, non omnia sint in ipso. Deus enim cognoscit res in propria natura existentes; sed res secundum quod sunt in propria natura, non sunt in Deo; quia secundum quod sunt in Deo, sunt creatrix essentia, ut Anselmus dicit; ergo ea quae Deus cognoscit, non sunt in Deo.

2. Praeterea, si creaturae sunt in Deo, aut per suam essentiam, aut per suam similitudinem. Non autem sunt per suam essentiam, quia sic essentialiter essent Deus; cum omne quod est in Deo, Deus sit. Nec per similitudinem; quia sic res verius essent in seipsis quam in Deo; quod est inconveniens; ergo creaturae a Deo cognitae, non sunt in Deo.

3. Praeterea, Joan. 1, dicitur: « Quod factum est, in ipso vita erat: » sed quod in Deo est vita, in se est vivens, (alias exemplatum discordaret ab exemplari,) multae autem creaturae sunt non vitae; ergo non omnes creaturae sunt in Deo.

Sed contra est quod dicitur Rom. 11: « Ex quo omnia, per quem omnia, in quo omnia etc. »

Praeterea, omne contentum est in continente: sed creaturae continentur a Deo; ergo creaturae sunt in Deo.

Respondeo. Dicendum, quod aliquid dicitur esse

in aliquo dupliciter. Uno modo secundum suam essentiam. Alio modo secundum suam similitudinem; quia similitudo rei quodammodo est res ipsa. Utroque autem modo creatura in Deo esse dicitur. Nam ipsae res creatae, prout in propriis naturis existunt, a Deo in esse continentur; et secundum hoc in esse dicuntur, ut in conservante et continente, secundum illud Act. 17, « In ipso vivimus, « movemur et sumus. » Omnes etiam creaturae, ut supra dictum est, Dei essentiam imitantur; unde sunt in Deo, etiam per similitudinem. Sed hoc contingit dupliciter: scilicet secundum similitudinem cognoscentis, et secundum similitudinem causae agentis. Nam agens agit sibi simile, sicut et cognitio fit per similitudinem. Haec autem duo in creaturis distinguuntur. Nam aliquid est in aliquo ut in potentia activa ejus existens, quod non est in eo per modum cognoscibilis, et e converso. In Deo vero isti duo modi junguntur: nam hoc modo cognoscit res quo causat eas.

Ad primum ergo dicendum, quod res ipsae per essentiam suam a Deo cognosci possunt, in quantum per similitudinem suam in Deo sunt: nam similitudo rei in intellectu existens, est causa quod res quae est extra animam, cognoscatur.

Ad secundum dicendum, quod res habent verius esse in Deo quam in seipsis: sed tamen nomen rei impositum secundum rationem propriae speciei, magis propriae praedicatur de re in propria natura existente, quam secundum quod est in Deo. Sicut similitudines rerum materialium, in intellectu nostro habent nobiliter esse quam in ipsis materialibus rebus; quamvis res materialis magis proprie dicatur homo vel lapis, quam species quae est in anima.

Ad tertium dicendum, quod similitudo rei in anima, vel in Deo, potest dupliciter considerari. Uno modo secundum esse quod in Deo habet: et sic dicitur esse vita in ipso: sic enim est ipse Deus, qui est vita. Alio modo secundum rationem formae per quam repraesentat rem exemplatam; et sic respondet ei res creata, et non primo modo; unde non oportet quod sola viventia sint in Deo.

ARTICULUS II.

Ad secundum sic proceditur. Et 1. videtur quod Deus non cognoscat mala. Deus enim cognoscit res, in quantum est causa rerum: sed Deus non est causa malorum; ergo et videtur quod non cognoscat mala.

2. Praeterea, ex hoc creaturae in Deo esse dicuntur, quod a Deo cognoscuntur: sed mala non sunt in Deo; ergo mala Deus non cognoscit.

3. Praeterea, quicquid cognoscitur, cognoscitur vel per simile, vel per contrarium. Sed mala non habent similitudinem in Deo, cum sit summum bonum: nec ejus essentiae contrariantur, quia cum Deus non sit in genere, nihil potest esse ei contrarium; ergo mala Deus non cognoscit.

Sed contra. Nullus potest esse ultor eorum quae ignorat: sed Deus est ultor malorum; ergo ipse cognoscit mala.

Praeterea, nullum bonum summo bono potest deesse; sed cognitio mali quoddam bonum est, cum per eam mala vitentur; ergo Deus cognoscit malum.

Respondeo. Dicendum, quod propria cognitio de aliquo haberi non potest, nisi cognoscatur prout est distinctum ab omnibus alijs. Quae quidem di-

stinctio in affirmatione et negatione consistit. Unde oportet quod quicumque habet alicujus rei cognitionem propriam, quod negationem ejus cognoscat; et eadem ratione privationem, quae est negatio quaedam. Cum ergo Deus, ut ex supra dictis patet, omnium rerum propriam notitiam habeat, omnium rerum negationes et privationes cognoscit. Unde notitia mali Deo non deest; quamvis aliquando dicitur nescire malos, in quantum eos non approbat: sic enim dicitur nesciens, quasi ad modum nescientis se habens.

Ad primum ergo dicendum, quod quamvis Deus causa malorum culpae non sit, est tamen causa bonorum quae per illa mala privantur, per quorum cognitionem illa cognoscit. Nec hoc est ex imperfectione divinae scientiae, ut mala per bona cognoscat; quia aliter cognoscibilia non sunt, cum non habeant speciem, sed sint privatio speciei.

Ad secundum dicendum, quod creaturae dicuntur esse in Deo ratione cognitionis, in quantum habent in ipso similitudinem; quod malis non competit; unde nullo modo sunt in Deo. Possunt tamen dici esse in ejus scientia, secundum quod in scientia alicujus esse dicitur omne id quod per scientiam comprehenditur.

Ad tertium dicendum, quod mala, quamvis non sint similia vel contraria divinae essentiae, sunt tamen contraria divinis effectibus, qui divinae essentiae simulantur; et sic per eorum similitudinem cognoscuntur a Deo.

QUAESTIO II.

Deinde quaeritur de ideis. Et circa hoc quaeruntur duo: 1.^o an omnium quae Deus cognoscit ideae in Deo sint; 2.^o de pluralitate idearum.

ARTICULUS I.

Ad primum sic proceditur. Et 1. videtur, quod rerum quas Deus cognoscit, non oportet ideas in eo ponere. Dicit enim Dionysius, 7 cap. de Div. nom.: « quod Deus non cognoscit res secundum ideam: » sed ideae non ponuntur in Deo nisi ad cognoscendum; ergo ideas non est ponere in Deo.

2. Praeterea, perfectissimus modus cognoscendi est Deo attribuendus: hoc autem est cognoscere rem per suam essentiam; ergo Deus cognoscit res per earum essentias; ergo non per ideas.

3. Praeterea, Deus cognoscit non solum entia, sed etiam non entia: sed non entium ideae non sunt in Deo; ergo non omnium quae a Deo cognoscuntur, ideas habet.

4. Praeterea, materia prima non potest habere ideam in Deo, cum idea sit forma; nec etiam singularia, cum sint infinita, nec accidentia; cum ideae participantur ab ideatis; accidentia vero non participant, sed sunt ipsae participationes; et haec tamen omnia Deus cognoscit; ergo non omnium quae Deus cognoscit, habet ideas in se ipso.

Sed contra est quod Augustinus dicit in lib. de civitate Dei: « Qui negat ideas esse, infidelis est, « quia negat Filium esse; » ergo necesse est ideas ponere.

Praeterea, omne agens per intellectum, habet rationem sui operis apud se: sed Deus est hujusmodi; ergo rationes rerum sunt apud Deum, quas ideas dicimus.

Respondeo. Dicendum, quod circa creaturas duplex fuit antiquorum error. Unus ponentium res casu constitutas: alius ponentium res processisse a primo principio per necessitatem naturae: quorum uterque excluditur per positionem idearum. Nam idea est forma exemplaris, ad cuius imitationem fit aliquid. Ea autem quae constituuntur a casu, non fiunt ad aliquid imitandum. Similiter quod agit ex necessitate naturae, non dicitur aliquid facere ad exemplar. Idem est ergo ideas ponere, quod ponere mundum factum ab aliqua arte, et propter aliquem finem. Finis autem rerum non est alius quam Deus: unde ideae ad quarum imitationem res mundi sunt factae, non alibi quam in mente divina ponendae sunt.

Ad primum ergo dicendum, quod intentio Dionysii est dicere quod Deus non cognoscat res per ideam acceptam a rebus. Unde alia translatio dicit loco hujus « Neque per visionem singulis se im-
mittit, et sic non excluditur omnino ideas esse
in Deo. »

Ad secundum dicendum, quod res per essentiam cognosci non possunt ab aliquo intellectu, nisi per essentiam in intellectu existant; qualiter res non sunt in intellectu divino. Unde non cognoscit res alias per earum essentias, sed per suam, per quam perfectius repraesentantur.

Ad tertium dicendum, quod idea, cum non dicat similitudinem tantum, sed similitudinem ad cuius imitationem aliquid fiat, proprie respicit practicam cognitionem quam habet artifex, non solum de his quae facere proponit, sed etiam de aliis quae per artem fieri possunt; quamvis non sit actu practica, nisi respectu eorum quorum factio est in proposito artificis. Et ideo nihil prohibet, Deum habere ideas illorum non existentium, quae facere potest; ut intelligamus ideam ad cuius imitationem fit, vel natum est aliquid fieri.

Ad quartum dicendum, quod practica cognitio fertur in rem secundum quod nata est per artem in esse deduci. Materia autem prima et accidentia quae consequuntur ex principiis substantiae, non sunt nata in esse produci, nisi per productionem substantiae perfectae; et ideo non habent separatim ideas, sed cognoscuntur et producantur per ideas substantiarum completarum. Secus autem est de accidentibus separabilibus, quae separatim producantur; et sic nihil prohibet separatim ea habere ideas. Singularia vero, quia per se existunt in esse separatim, habent ideas, non obstante eorum infinitate si esset; quia respectus rationis per quos plurificantur ideae, nihil prohibet in infinitum multiplicari.

ARTICULUS II.

Ad secundum sic proceditur. Et 1. videtur quod in Deo non sint plures ideae. Quia secundum Damascenum, in divinis omnia unum sunt, praeter ingenerationem, generationem et processionem, sed per huiusmodi non distinguuntur ideae; ergo non sunt plures.

2. Praeterea, in genere causae efficientis est devenire ad unum primum effectum, similiter in genere causae finalis ad ultimum unum finem, et in genere causae materialis ad unam primam materiam; ergo et in genere causae formalis est ponere unam primam formam; sed haec est idea; ergo est tantum una idea.

3. Praeterea, ideae diversificari non possunt secundum aliquid absolutum ratione simplicitatis divinae, nec secundum relationes personarum adinvicem; quia sic non importaretur in eis respectus ad creaturas; nec iterum per respectum ad creaturas in propria natura existentes, quia sic non essent plures ab aeterno; nec iterum per respectum ad creaturas in Deo existentes, quia sic sunt unum tantum; ergo ideae nullo modo possunt esse plures.

Sed contra est quod Augustinus dicit in lib. 85 quaestionum, quod non eadem ratione homo et equus est conditus: sed distinctio est causa numeri: sunt ergo plures rationes vel ideae rerum in Deo.

Praeterea, Heb. 11: « Fide credimus aptata esse
saecula verbo Dei, ut ex invisibilibus visibilia fierent. » Haec autem invisibilia nihil aliud sunt quam ideae; ergo sunt plures ideae.

Respondeo. Dicendum, quod cum ordo et distinctio rerum a divina sapientia processerint, oportet ponere quod diversarum rerum distinctae rationes apud Deum sint. Quod hoc modo potest intelligi, si intelligamus ideam, non solum id quo intelligitur, sed etiam id quod intelligitur. Artifex enim primo excogitat formam domus, per quam ulterius ejus cognitio derivatur in opus: unde ipsum excogitatum est idea, potius quam illud quo aliquid excogitavit. Divina ergo essentia, eo quod a nulla creatura plene imitabilis est, a diversis diversimode imitari potest, ita quod ab unoquoque imitetur secundum proprium modum. Hos autem imitabilitatis modos, Deus in sua essentia cognoscit, cum suam essentiam perfectissime intelligat. Ipsa ergo divina essentia, secundum quod est intellecta a Deo ut a tali creatura est imitabilis, sic est propria ratio vel idea hujus creaturae: et secundum quod intelligitur ut imitabilis aliter, est propria ratio alterius. Et sic sunt plures ideae vel rationes secundum diversos respectus ad creaturas, qui divinae essentiae cointelliguntur per intellectum divinum.

Ad primum ergo dicendum, quod Damascenus loquitur de his quae realiter distinguuntur secundum quod sunt in Deo; non autem de illis quae distinguuntur ratione, sed secundum quod cognoscuntur a Deo qui sicut est vere unum, ita etiam vere multa cognoscit.

Ad secundum dicendum, quod una prima forma est ipsa divina essentia, secundum se considerata; ex cuius intellectu, divinus intellectus cognoscit diversos modos imitabilitatis ipsius, in quibus pluralitas idearum consistit.

Ad tertium dicendum, quod ideae distinguuntur per respectus ad res in propria natura existentes. Sic enim res secundum ideas formantur; quae quamvis non fuerint ab aeterno, fuerunt tamen cognitae ab aeterno, etiam in propria natura existentes; et sic intellectus divinus poterat intelligere respectum essentiae suae ad res ipsas.

DISTINCTIO XXXVII.

Et quoniam demonstratum est ex parte etc. (V. edit. nostrae tom. VI, pag. 294.)

Hic est duplex quaestio. Primo quomodo Deus sit in rebus. Secundo quomodo Deus sit ubique.

QUAESTIO I.

Circa primum quaeruntur duo: 1.^o utrum Deus sit in rebus omnibus; 2.^o de modis quibus dicitur esse in rebus.

ARTICULUS I.

Ad primum sic proceditur. Et 1. videtur quod Deus in rebus non sit. Quod enim est in aliquo, non distat ab eo. Sed Deus infinite distat a qualibet creatura; ergo non est in aliqua creatura.

2. Praeterea, principia intrinseca rei sunt forma et materia: sed Deus non est principium rei, neque ut forma neque ut materia; ergo Deus non est in creatura.

3. Praeterea, nihil quod est in aliquo, excedit hoc in quo est, nisi forte sit partialiter in eo: sed Deus excedit quamlibet creaturam, nec habet partem; ergo Deus non est in aliqua creatura.

Sed contra est, quod dicitur Jerem. 23: Num. quid non caelum et terram ego impleo.

Praeterea, ubicumque est virtus Dei, est ipse Deus. Sed in qualibet re est virtus Dei; quia nulla res potest agere nisi virtus Dei in ea operetur, sicut virtus causae primae operatur in causa secunda; ergo Deus est in qualibet re.

Respondeo. Dicendum, quod diversimode corporale et spirituale in aliquo esse dicitur. Nam corporale dicitur esse in aliquo ut contentum in ipso, sicut locatum in loco. Spirituale autem dicitur esse in aliquo ut continens ipsum, sicut anima in corpore. Deus autem est continens quamlibet rem in esse, et immediate: quia ipse est creator et corporaliū et spiritualium: nec potest esse, quod rem in esse contineat nisi ille qui influit rebus esse, qui est rerum creator; sicut lumen in aere non continet et conservat nisi quod lumen communicat. Unde, cum oporteat agens immediatum esse conjunctum ei in quod agit, necessarium est Deum in qualibet re esse intimum, sicut esse rei est, quod inter omnia est rei intimum.

Ad primum ergo dicendum, quod Deus a creatura in infinitum distat per naturae differentiam; sed tamen per operationem unicuique conjungitur, in quantum tenet rem in esse.

Ad secundum dicendum, quod forma et materia sunt principia rei intrinseca, sicut partes essentiae. Deus autem non sic; sed sicut continens rem in esse.

Ad tertium dicendum, quod obiectio illa procedit de hoc quod est in aliquo sicut contentum in continente; non autem de hoc, quod est in aliquo sicut continens in contento.

ARTICULUS II.

Ad secundum sic proceditur. Et 1. videtur quod Deus non pluribus modis sit in rebus. Ubi enim unum sufficit, plura ponere est superfluum: sed unus modus essendi Deum in rebus sufficeret ad rerum conservationem; ergo superfluum est ponere plures modos.

2. Praeterea, ubicumque est essentia rei, ibi res est secundum suam potentiam et praesentiam; ergo non debent poni tres modi essendi Deum in rebus; scilicet per essentiam, potentiam et praesentiam.

3. Praeterea, gratia est quaedam specialis perfectio, quam creatura a Deo consequitur; si ergo unus modus essendi Deum in rebus accipiatur secundum gratiam, videtur quod pari ratione secundum quamlibet formam accipi debeat unus modus; quod est falsum.

4. Praeterea, habitatio firmam mentionem designat: sed effectus naturales, qui semper manent, firmiores esse videntur, quam effectus gratiae, qui quandoque amittitur; ergo Deus in omnibus creaturis inhabitat ratione naturalium effectuum, sicut in sanctis per gratiam: et sic modus quo Deus sanctos inhabitat, non debet poni specialis.

5. Praeterea, magis natura dicitur esse in supposito, quam e converso. Sed in unione Dei ad hominem, suppositum vel persona est ex parte Dei; ergo ratione illius unionis, non debet dici quod Deus sit in creatura, sed e converso.

Respondeo. Dicendum, quod isti modi dupliciter distinguuntur. Nam quidam eorum sunt generales respectu omnis creaturae. In omnibus enim est per essentiam, praesentiam et potentiam. Alii vero sunt speciales aliquibus creaturis, in quibus Deus est per gratiam. Primi ergo modi distinguuntur, secundum quod idem effectus diversimode comparatur ad Deum. In quantum enim est a Deo conservatus in esse, dicitur in creatura Deus esse per essentiam; in quantum est Deo cognitus, per praesentiam; in quantum totaliter potentiae ejus subjectus est, per potentiam. Sed alii modi distinguuntur secundum diversos effectus quos Deus in creatura facit. Nam secundum effectum communem, quem facit in qualibet creatura, scilicet esse naturale, sumuntur illi modi, qui sunt communes omni creaturae. Secundum vero esse spirituale, quod facit in sanctis per gratiam adoptionis, sumitur modus inhabitationis per gratiam. Secundum vero esse illud singulare, ad quod perducitur natura humana in Christo, ut scilicet sit una persona Dei et hominis, sumitur modus quo Deus est in Christo per gratiam unionis.


Ad primum ergo dicendum, quod unus istorum modorum quibus Deus est in omnibus creaturis, alterum ad sui perfectionem requirit. Non enim esse creaturae perfecte a Deo conservaretur, nisi perfecte divinae potestati subieceretur, et esset a Deo notum, qui omnia in sapientia facit. Si autem modi sufficerent quantum ad esse naturale; sed non quantum ad esse spirituale, propter quod alii superadduntur.

Ad secundum dicendum, quod licet isti modi communes se consequantur secundum rem, distinguuntur tamen secundum rationem. Nam aliud est creaturam a Deo conservari in esse, et aliud ejus cognitioni et potestati subiei.

Ad tertium dicendum, quod per gratiam habet creatura ad Deum specialem comparisonem, ut scilicet uniatur Deo per fruitionem amoris: et ideo gratia, prae aliis formis constituit specialem modum existendi Deum in rebus.

Ad quartum dicendum, quod inhabitatio quamdam familiaritatem designat, quia est propria mansio habitantis. Unde ratione familiaritatis quam Deus habet ad sanctos, qui ei conjunguntur per fruitionem amoris, dicitur Deus habitare in sanctis prae aliis creaturis.

Ad quintum dicendum, quod in Christo ex parte deitatis est et suppositum et natura. Ipsa ergo divina natura est in supposito hominis, in quantum



est idem suppositum divinae et humanae naturae, Suppositum etiam aeternum est in humana natura, inquantum in ea subsistit; sicut et suppositum Petri est in humana natura.

QUAESTIO II.

Deinde quaeritur quomodo Deus sit ubique. Et circa hoc quaeruntur duo: 1.^o utrum esse ubique Deo conveniat; 2.^o utrum sit ei proprium.

ARTICULUS I.

Ad primum sic proceditur. Et 1. videtur quod Deus non sit ubique. Esse enim ubique significat esse in loco. Sed esse in loco Deo non competit, cum sit incorporeus, et incorporea non sunt in loco, secundum Boetium; ergo Deus non est ubique.

2. Praeterea, esse ubique significat esse in pluribus locis ratione distributionis: sed Deus in rebus omnibus non est ut in pluribus locis, quia hoc modo est in toto mundo sicut anima in corpore, secundum Augustinum; ergo Deus non est ubique.

5. Praeterea, illud quod est in loco, comparatur ad locum, ut mobile ad immobile. Nam locus est immobilis, locata vero mobilia. Sed Deus comparatur ad res, ut immobile ad mobilia; ergo magis res sunt in Deo ut in loco, quam e converso: et ita Deus non est ubique.

Sed contra est quod in Psalm. 138, dicitur: « Si ascendero in caelum, tu illic es etc. »

Praeterea, sicut Deus est infinitae durationis, ita infinitae magnitudinis: sed ratione infinitae durationis Deus dicitur esse semper, idest in omni tempore; ergo ratione infinitae magnitudinis est ubique, idest in omni loco.

Respondeo. Dicendum, quod esse in loco dupliciter accipitur. Uno modo secundum quod aliquid est in loco ut in loco; et sic per se aliquid est in loco, quod loco mensuratur, ut corpus; per accidens autem, quicquid est in corpore. Alio modo dicitur aliquid esse in loco non ut in loco; et sic accidentia loci sunt in loco, et genus ipsius (1) et alia huiusmodi. Deus ergo dicitur esse ubique, et ratione ipsius loci, et ratione locatorum. Ratione loci, inquantum quemlibet locum in esse conservat, et sic est in quolibet loco, ut in qualibet re: sed hoc non est esse in loco ut in loco. Alio modo ratione locatorum; et sic est in quolibet loco, inquantum ipse est in omnibus locatis. Et ideo Deo competit esse ubique.

Ad primum ergo dicendum, quod Boetius accipit esse in loco ut in loco, et per se: sic autem Deo non competit esse in loco, nec aliquo, nec omni.

Ad secundum dicendum, quod non solum totum universum, quodam respectu communi ordinatur in Deum; sed etiam singulae partes secundum proprias habitudines. Et ideo Deus non solum est in rebus omnibus ut in uno universo; sed etiam in singulis, ut sunt ab invicem distinctae.

Ad tertium dicendum, quod obiectio illa procedit de eo quod mensuratur loco, quod per se est in loco ut in loco.

(1) *Lege et species.*

ARTICULUS II.

Ad secundum sic proceditur. Et 1. videtur quod esse ubique non sit proprium Deo. Quia universale, secundum Philosophum est ubique et semper; Deus autem non est universale, neque particulare; ergo esse ubique non est proprium Dei.

2. Praeterea, numerus partium universi, quaedam res est. Cum ergo numerus sit in numeratis, haec res erit ubique, et sic non solum Deus.

5. Praeterea, id quod est proprium Dei, non potest intelligi alicui creaturae convenire. Sed esse ubique potest intelligi alicui creaturae convenire: sicut si Deus fecisset unum corpus continuum quod totam capacitatem mundi impleteret; ergo esse ubique non est proprium Dei.

Sed contra est quod Ambrosius in litera probat Spiritum sanctum esse Deum propter hoc quod est ubique.

Praeterea, sicut Semper se habet ad tempus, ita Ubique ad locum. Sed Semper importat immensitatem; ergo et Ubique: et ita soli Deo convenit esse ubique, cum solus Deus sit immensus.

Respondeo. Dicendum, quod sicut hoc adverbium, semper, si proprie accipitur, non solum refertur ad omne tempus quod est vel erit, sed etiam ad omne tempus quod potest imaginari: ita etiam hoc adverbium, ubique, refertur ad omnem imaginabilem locum. Non enim proprie dicitur mundus semper fuisse, quamvis omni tempore fuerit, quia est accipere quando tempus non erat: sed hoc solum semper dicitur fuisse, extra cuius permanentiam non est possibile imaginari aliquod tempus. Similiter etiam illud proprie dicitur esse ubique absque quo nullus locus imaginari potest: hoc autem non potest esse nisi infinitum. Unde cum solus Deus sit infinitus, soli Deo competit esse ubique, proprie loquendo.

Ad primum dicendum, quod esse ubique significat esse in loco; quod per se non competit nisi rei subsistenti. Universalia autem quae non subsistunt, ut materia prima, et numerus, vel quaecumque huiusmodi, non sunt in loco nisi per accidens: et ideo non competit eis esse ubique, proprie loquendo. Et per hoc patet solutio ad secundum.

Ad tertium dicendum, quod si esset aliquod corpus continuum replens totum spatium caeli, non diceretur esse ubique proprie, duplici ratione. Primo quia extra illud corpus, est imaginabilis locus, ubi nihil corporis illius esset. Secundo, quia illud corpus esset in toto spatio, sicut in uno loco: in singulis vero locis non esset nisi ratione partium. Deus autem est totus in toto universo, et in qualibet parte universi; nec est possibile imaginari locum aliquem ubi ipse non esset illo posito. Unde sibi verissime et propriissime competit esse ubique.

Cumque divina natura etc. (V. edit. nostrae tom. VI, pag. 295.)

Hic est duplex quaestio. Primo de loco Angeli. Secundo de motu ipsius.

QUAESTIO I.

Circa primum quaeruntur duo: 1.^o utrum Angelus sit in loco; 2.^o utrum possit esse in pluribus locis.

ARTICULUS I.

Ad primum sic proceditur. Et 1. videtur quod Angelus non sit in loco. Esse enim in loco, secundum Philosophum in 5 Physicorum, dupliciter dicitur scilicet ut in loco, et non ut in loco, sed ut passio in subjecto. Angelus autem non est in loco, quia non mensuratur loco: nec est in loco ut passio in subjecto, quod patiens est: nec ut causa corporalium rerum: ergo Angelo nullo modo competit esse in loco.

2. Praeterea, sicut tempus est mensura quantitatis motus, ita locus quantitatis corporis. Sed illud quod omnino caret motu, non est in tempore. Ergo, cum Angelus omnino careat corporali quantitate, non est in loco.

3. Praeterea, locus est quantitas potentiam (1) habens, secundum Philosophum in Praedicam. Angelo autem nullo modo competit situs; ergo nec esse in loco.

Sed contra est quod Damascenus dicit, quod Angeli ibi sunt ubi operantur. Sed operantur in loco; ergo sunt in loco.

Praeterea, caelum empyreum, mox ut creatum est, sanctis Angelis est repletum, ut Strabo dicit. Sed caelum empyreum est locus corporalis; ergo Angeli sunt in loco corporali.

Respondeo. Dicendum, quod Angeli sunt in loco; alio tamen modo, quam corpora. Oportet enim inter locum et locatum, aliquem contactum intelligere. Est autem duplex contactus. Unus corporalis, secundum quem corpora sunt in loco: qui quidem contactus attenditur secundum conjunctionem terminorum magnitudinis; et ideo corpora sunt in loco, per quamdam commensurationem locati ad locum. Alius autem est contactus virtutis, secundum quem spiritualia possunt corporalia tangere, non autem secundum primum modum contactus. Hic autem contactus non requirit aliquam commensurationem quantitatis; et ideo Angeli sunt in loco, non tamen per commensurationem, sive per circumscriptionem. Sicut autem corpus, quamvis non tangat locum nisi ratione quantitatis dimensionis, est tamen in loco secundum substantiam; ita etiam Angelus, quamvis tangat locum secundum quantitatem virtutem.

Ad primum ergo dicendum, quod locus habet mensurae rationem ad id quod est in eo per commensurationem, scilicet ad corpus, unde sic esse in loco, ut in loco, est loco mensurari: non autem esse in loco per contactum virtutis, sicut Angeli sunt in loco: quia iste modus commensurationem non requirit.

Ad secundum dicendum, quod illa quae nullo modo moventur, non mensurantur tempore; dicuntur tamen esse in tempore, secundum quod tempori adsunt. Sic enim Deum fuisse heri, et futurum esse cras dicimus: et sic similiter potest dici quod Angelus in loco est: non quod loco mensuretur, sed quasi praesentialiter loco assistens.

Ad tertium dicendum quod objectio illa procedit de eo quod est in loco per commensurationem extremorum: rei enim habenti situm commensurari non potest quod situm non habet.

ARTICULUS II.

Ad secundum sic proceditur. Et 1. videtur quod Angelus possit esse simul in pluribus locis. Sicut

(1) *Lege positionem.*

enim se habet quod caret motu, ad tempus, ita se habet quod caret dimensione, ad locum. Sed quod caret motu, secundum suam indivisibilem durationem adest pluribus temporibus, ut patet de aeternitate et aevo, secundum quosdam; ergo Angelus, qui non habet dimensionem corporalem, potest simul esse in pluribus locis.

2. Praeterea, Angelus est simplicioris naturae quam anima, vel non minus simplicis. Sed quanto aliquid est simplicius, tanto in pluribus invenitur, ut dicitur 5 Metaph. Cum ergo anima sit tota in singulis partibus corporis, et Angelus poterit esse totus simul in pluribus locis.

3. Praeterea, caelum empyreum Angelis et sanctis datur pro gloria; sed gloria eorum nunquam minuitur; ergo inde nunquam recedunt. Sunt autem aliquando hic circa nos, cum in ministerium mittuntur; ergo Angeli sunt simul in pluribus locis.

Sed contra est quod Damascenus dicit, quod cum sunt in terra, non sunt in caelo.

Praeterea, secundum Philosophum in 4 Physicorum, ejusdem rationis est, duo corpora in uno loco esse, et quaecumque plura; ergo similiter ejusdem rationis est Angelos simul esse in duobus locis, et in quibuscumque pluribus: sed non potest simul esse Angelus in quibuscumque pluribus, quia sic esset ubique, quod est solius Dei proprium; ergo Angelus non potest simul esse in duobus locis.

Respondeo. Dicendum, quod Angelus in pluribus locis simul esse non potest: potest enim in loco esse per contactum virtutis: virtus autem finita, non potest simul ad plura terminari: unde ab una virtute finita non progrediuntur duo actus simul; et ideo ad duo diversa loca non potest attendi simul virtualis contactus ipsius Angeli; et propter hoc, in pluribus locis simul esse non potest. Nec tamen oportet quod sit solum in aliquo loco indivisibili, cum in loco non sit per commensurationem; potest enim esse in aliquo loco divisibili; et tunc virtus sua refertur ad omnes partes ipsius loci divisibilis, sicut ad unum locum.

Ad primum ergo dicendum, quod totum tempus est continuum, non autem omnia loca sunt continua, ut possint omnia loca ad Angelum comparari ut unum quid. Vel dicendum, quod quia Angelus est in loco per contactum, non autem potest simul duo loca contingere: ideo non potest esse simul in locis duobus: in tempore autem est per concomitantiam, quia aevum, quod est mensura Angeli, est totum simul: ideo Angelus potest adesse simul pluribus partibus temporis, ut quidam dicunt.

Ad secundum dicendum, quod anima non est in pluribus partibus corporis ut in pluribus locis, sed sicut forma in partibus unius perfectibilis. Angelus autem non est sicut forma, in loco aliquo corporali, sed sicut omnino disparatum secundum naturam. Et tamen potest in pluribus partibus unius loci esse simul, si virtualiter contingat locum continuum.

Ad tertium dicendum, quod esse actu in caelo empyreo, vel non esse, non auget neque minuit gloriam Angeli: sed hoc ad gloriam ipsius pertinet, quod talis locus sibi debeatur, qui ei debetur etiam cum actu in eo non est.

QUAESTIO II.

Deinde quaeritur de motu Angeli. Et circa hoc quaeruntur duo: 1.^o utrum moveatur in loco; 2.^o utrum moveatur in tempore.

ARTICULUS I.

Ad primum sic proceditur. Et 1. videtur quod Angelus in loco non moveatur. Omne enim quod in loco movetur, est in potentia ad locum, quia motus est actus existentis in potentia; et ita habet materiam ad ubi, sicut corpus caeleste. Sed Angelus non est hujusmodi, cum sit immaterialis, secundum Dionysium; ergo non movetur secundum locum.

2. Praeterea, omne quod movetur, movetur secundum locum, vel ex se, vel ex alio; sed Angelus non movetur ex alio (sic enim nobilior moveretur anima quam Angelus): nec iterum movetur ex se: quia omne quod sic movetur, dividitur in duas partes, quarum una est movens, et alia mota, ut probatur in 8 Physicorum: quod Angelo convenire non potest, cum sit indivisibilis substantia; ergo Angelus localiter non movetur.

3. Praeterea, omne quod movetur, partim est in termino a quo, et partim in termino ad quem, ut probatur in sexto Physicorum. Sed Angelus non habet partem et partem; ergo localiter non movetur.

4. Praeterea, motus localis est continuus. Si ergo Angelus movetur localiter, continue movetur; sed nihil movetur continue in loco nisi corpus; ergo Angelus est corpus: quod est impossibile. Probatio mediae. Omne quod movetur continue, pertransit omnia media sed inter duo extrema spatii, in quo est motus localis, sunt infinita indivisibilia, quae non possunt pertransiri nisi ab aliquo continuo, quod etiam sit in infinitum divisibile; quia indivisibile pertranseundo ea, omnia singillatim contingeret; quod est impossibile, quod infinita actu pertranseat; ergo omne quod movetur in loco continuo, est corpus continuum: et sic Angelus non movetur in loco.

Sed contra. Omne quod est aliquando hic et aliquando ibi, movetur in loco; sed Angelus est hujusmodi, ut ex scripturis patet, ex quibus habetur quod Angeli quandoque uni, quandoque alteri ministrant, et quandoque etiam sunt in caelo empyreo; ergo Angelus localiter movetur.

Praeterea, posito posteriori, ponitur prius. Sed motus localis est primus motuum, ut probatur in octavo Physicorum; ergo cum Angelus aliquo motu moveatur, quia non est omnino immobilis sicut Deus, videtur quod moveatur localiter.

Respondeo. Dicendum, quod sicut Angelo convenit aliter esse in loco quam corpori, ita et aliter in loco moveri. Corpus enim est in loco per commensurationem, et ita movetur commensurando se spatio. Angelus autem est in loco per contactum virtualem, in quo nulla commensuratio importatur. Virtus autem Angeli non est obligata ad hunc vel istum locum. Unde sicut quandoque est in hoc loco per contactum virtualem, ita quandoque potest esse in altero, sine aliqua commensuratione ad loca extrema vel media.

Ad primum ergo dicendum, quod corpus comparatur ad locum ut ad mensuram continentem; et ideo comparatur ad locum sicut potentia ad

actum. Nam continere est formae, contineri vero materiae. Sed virtus rei spiritualis, per quam tangit rem corporalem, non se habet ad locum ut potentia ad actum, sed magis e converso: unde non oportet quod Angelus habeat materiam ad ubi.

Ad secundum dicendum, quod ideo oportet motum ex se dividi in duo, quorum unum sit movens et alterum sit motum, in motibus corporalibus, quia non potest idem reducere se de potentia ad actum. Angelus autem non comparatur ad locum, vel ad motum, ut potentia ad actum. Et ideo in motu Angeli dictum Philosophi locum non habet.

Ad tertium dicendum, quod verbum Philosophi intelligitur de eo, quod movetur commensurando se spatio, ita quod motus ejus ex continuitate spatii continuitatem recipiat: quod aliter esse non potest, nisi continue intercipiat spatium, partim hic, partim ibi existendo. Motus autem Angeli non est per commensurationem, ut dictum est: unde non requiritur in eo continuitas, sed ordo tantum successione; ita quod Angelus, prius sit in hoc loco, et postmodum in aliis. Et ideo ratio non sequitur.

Ad quartum dicendum, quod motus Angeli in loco, potest esse continuus, et non continuus. Continuus quidem, inquantum potest esse in loco divisibili, ut ex supradictis patet: et sic paulatim et continue potest aliquid spatii attingere, sine hoc quod ipse in sua substantia sit divisibilis. Non continuus vero, secundum quod Angelus intelligitur sine medio diversa loca contingere.

Ad quintum dicendum, quod sicut ex supradictis patet, Angelus quamvis non sit corpus, potest tamen in loco divisibili esse: et sic motus ejus ex parte loci continui potest habere continuitatem, et ex parte Angeli potest esse non continuus, sed successivus solum, ut ex dictis patet: nec oportet quod omnia media transeat; quia motus ejus non est per commensurationem ad spatium, sed per virtualem contactum, qui quidem contactus continuitatem non requirit.

ARTICULUS II.

Ad secundum sic proceditur. Et 1. videtur, quod Angelus non moveatur in tempore. Omnis enim motus rei est secundum substantiam ejus, vel operationem: sed Angelus est substantia supra tempus existens, et secundum substantiam, et secundum operationem, ut dicitur in libro de Causis; ergo non movetur in tempore.

2. Praeterea, secundum Dionysium, 5 de Divinis nominibus, motus circularis Angeli attenditur secundum conversionem in Deum: rectus autem, secundum conversionem in inferiora: obliquus vero, secundum utrumque. Sed Angelus non indiget tempore ad hoc quod per intellectum convertatur ad Deum: quia ex hoc est aeternitatis particeps; neque ad hoc quod convertatur in inferiora, aut quod ordinem eorum ad Deum cognoscat, cum intellectum habeat deiformem: ergo motus Angeli non est in tempore.

Praeterea, cum Angelus movetur localiter, non potest esse simul in termino a quo et in termino ad quem, quia nihil est simul in pluribus locis: nec partim in uno et partim in altero, quia indivisibilis est. Oportet ergo quod semper sit vel totus in uno, vel totus in alio: et sic inter ista duo nihil cadit medium, scilicet inter esse Angelum

in uno termino et esse eum in alio. Sed omnis mutatio, inter cuius extrema nihil cadit medium, est in instanti; ergo Angelus movetur de loco ad locum in instanti; et ita non movetur in tempore.

4. Praeterea, illud a quo denominatur aliqua species motus, oportet esse motus terminum; quia motus, speciem a terminis recipiunt: sed tempus non est terminus alicujus motus, sed solum mensura; ergo non debet assignari Angelo motus, secundum tempus distinctus contra motum localem.

Sed contra est, quod Augustinus dicit in littera, quod Deus movet creaturam spiritualem per tempus, corporalem vero per tempus et locum.

Praeterea, ubicumque est aliqua successio, ibi est aliquo modo tempus. Sed in his quae ad Angelum pertinent, oportet esse aliquam successionem, vel quantum ad substantiam, vel quantum ad operationem: alias coaequaretur Deo in aeternitate, quod est impossibile; ergo oportet in his quae ad Angelum pertinent, intelligere tempus: et sic Angelus per tempus movetur.

Respondeo. Dicendum, quod motus dupliciter accipitur. Uno modo improprie, pro ipsa operatione intellectus vel appetitus; eo quod intellectus, intelligendo fertur in suum objectum, et appetitus appetendo: et hujusmodi motus tempore non mensuratur, nisi per accidens in nobis, in quantum intellectus noster accipit a continuo et tempore: quod quidem accidens in Angelis non est, unde talis eorum motus non est in tempore. Alio modo accipitur motus magis proprie, ex hoc quod aliquid transit ex uno in alterum: et sic in Angelo est duplex motus. Unus quando transit de loco in locum. Alius, quando transit de affectione in affectum, vel de intellectu unius rei in intellectum alterius rei: et in istis duobus motibus Angeli, oportet successionem intelligere, eo quod non est simul in pluribus locis, nec simul diversis affectionibus afficitur, in bonum scilicet et malum: nec etiam diversa simul per diversas species intelligit intellectu naturali, ut in secundo dicitur. Et ideo omnes hujusmodi motus sunt in tempore, et tempus quo hujusmodi motus mensurantur non est continuum; quia neque habet continuitatem ex motu quem mensurat, cum in operationibus sibi succedentibus, aut contactibus spiritualibus ad diversa loca, non sit aliqua continuitas: neque etiam habet continuitatem ex motu caelesti, ad quem praedicti motus nullum habent ordinem.

Ad primum ergo dicendum, quod per auctoritatem illam libri de Causis ostenditur Angelus totaliter esse supra tempus quod mensurat motum caeli: est tamen in operationibus Angeli tempus modo praedicto.

Ad secundum dicendum, quod Dionysius accipit motum pro operatione; et sic motus intellectualis naturae, tempore non mensuratur, per se loquendo.

Ad tertium dicendum, quod quando duo extrema mutationis sunt immediata, et alterum eorum habet continuitatem ratione alicujus motus annexi, tunc talis mutatio est terminus motus; et ideo non est in tempore, sed in termino temporis. Sed quando neutrum extremorum habet continuitatem, nec per se, nec per accidens, tunc talis mutatio non potest esse terminus motus: unde non potest esse, quod alter terminorum participet ad tempus praecedens, quo mensuratur motus, et alter ad terminum temporis, quo mensuratur terminus motus: sed oportet

quod duo termini habeant proprias mensuras eis respondententes, scilicet duo nunc sibi succedentia, quae ad praesens tempus dicimus.

Ad quartum dicendum, quod illud a quo nominatur aliquis motus, ut a dante speciem, oportet esse terminum motus, quia ab eo sortitur speciem; non autem si denominetur ut a mensurante. Contingit enim duobus modis, motum aliquem denominari.

DISTINCTIO XXXVIII.

Nunc vero ad propositum revertentes etc. (*V. edit. nostrae tom. VI, pag. 311.*)

Hic est duplex quaestio. Prima de causalitate divinae scientiae. Secunda de cognitione contingentium.

QUAESTIO I.

Circa primum quaeruntur duo: 1.^o utrum res sint causa scientiae Dei; 2.^o utrum scientia Dei sit causa rerum.

ARTICULUS I.

Ad primum sic proceditur. Et 1. videtur, quod res scitae, sint causa divinae scientiae. Veritas enim ad rationem scientiae pertinet, quia scientia non nisi verorum est: sed veritatis causa sunt res, quia ex eo quod res est vel non est, est oratio vera vel falsa; ergo res sunt causa scientiae Dei.

2. Praeterea, scientia est assimilatio scientis ad rem scitam, ut Algazel dicit. Causae autem non assimilantur effectibus, sed magis e converso, secundum Dionysium; ergo res scitae sunt causa scientiae, et non e converso.

3. Praeterea, quaecumque se consequuntur ad invicem, oportet quod dependeant ab una causa, vel unum eorum sit causa alterius. Sed Deum scire mala, et mala esse, consequuntur; cum ergo scientia Dei non sit causa malorum, videtur quod mala fieri sit causa quare Deus mala cognoscat. Non enim potest dici quod utrumque ex aliqua causa extrinseca dependeat.

Sed contra. Temporale non est causa aeterni: scientia autem Dei est aeterna; ergo res temporales scitae a Deo non sunt causa ipsius scientiae.

Praeterea, malum non est causa boni: sed scientia Dei est bonum: cum ergo scitorum a Deo quaedam sint mala, videtur esse impossibile quod res scitae sint causa divinae scientiae.

Respondeo. Dicendum, quod res scitae non possunt esse causa alicujus scientiae, nisi ratione speciei intelligibilis, qua sciens scit; in quantum illa species a rebus scitis accipitur, ut intellectu nostro accidit. Nam vis intelligendi non potest causari a re scita in quantum hujusmodi. Illud autem quo Deus intelligit omnes res, est essentia divina, ejus constat res causas non esse: unde res scitae nullo modo possunt esse causa divinae scientiae.

Ad primum ergo dicendum, quod veritatis, quae est in intellectu nostro, vel in signo ipsius, scilicet enunciatione, causa sunt res; non autem veritatis quae est in intellectu divino; eo quod intellectus noster est mensuratur a rebus, quarum intellectus divinus est mensura.

Ad secundum dicendum, quod verbum Algazel intelligitur de scientia nostra, quae a rebus sumitur; non autem de scientia divina. Vel si communiter accipiatur, accipitur assimilatio large, pro quacunque similitudine; sive sit causati ad causam, sive e converso.

Ad tertium dicendum, quod Deus malorum causa non est, nec divina scientia, cum mali causa bonum esse non possit, nisi per accidens; aliter enim malum causam non habet. Bonorum autem causa divina scientia est. Et sic ratione divinae scientiae infallibilis quidem est consequutio inter esse malorum ipsamque scientiam Dei, sed tamen malorum causa non est.

ARTICULUS II.

Ad secundum sic proceditur. Et 1. videtur quod scientia Dei non sit causa rerum scitarum. Posita enim causa ponitur effectus. Sed scientia Dei est aeterna: cum ergo res scitae a Deo sint temporales, earum causa scientia Dei non est.

2. Praeterea, Deus non tantum scit entia, sed etiam non entia: non entium vero causa non est, neque quod sint, neque quod non sint; ergo pari ratione, non erit causa entium.

3. Praeterea, scientia Dei comparatur ad res creatas, sicut scientia artificis ad artificata: artificiatorum autem causa non est scientia artificis, sed voluntas, quae movet ad opus; ergo scientia Dei non est causa rerum.

Sed contra est, quod in Psalm. 105, dicitur: « Omnia in sapientia fecisti. »

Praeterea, sicut scientia nostra mensuratur a rebus, ita res mesurantur divina scientia, ut patet per Philosophum 10 Ethicorum. Sed res sunt causae scientiae nostrae; ergo e converso scientia Dei est causa rerum.

Respondeo. Dicendum, quod omnium rerum creatarum, aequaliter est causa divina scientia. Omne enim imperfectum ab aliquo perfecto sumit originem. Formae autem in natura rerum existentes, ex hoc ipso quod in materiis recipiuntur, imperfectae sunt: ex hoc enim quod individuantur, communitas earum ad hoc particulare restringitur. Unde oportet harum formarum prima principia existere, formas suam communitatem retinentes; non quidem per se subsistentes, ut Plato dicebat: hoc enim impossibile ostendit Philosophus: sed existentes in intellectu divino. In solo enim intellectu, forma suae communitatis rationem servare potest: et haec formae dicuntur ideae, de quibus supra habitum est. Sic ergo scientia Dei continens huiusmodi formas, est prima rerum origo. Nec tamen omnium quae Deus scit, ejus scientia est causa. Nam ex scientia non procedit opus, nisi mediante voluntate imperante, et potentia exequente. Unde malorum, et non entium, ad quae Dei voluntas non inclinat; scientia Dei non est causa; similiter nec aeternorum, quae potentiae non subduntur. Unde scientia non est tota causa; sed simul scientia et voluntas.

Ad primum ergo dicendum, quod quia a scientia non procedit opus nisi mediante voluntate, non oportet, quod quodcumque fuerit divina scientia, fuerint creaturae; sed quando ei placuit.

Ad secundum dicendum, quod quantum ad non
S. Th. Opera omnia. V. 22.

entia, scientiae Dei deest voluntas operandi. Et ideo horum causa Deus non est.

Ad tertium dicendum, quod scientia artificis, etsi non sit causa proxima artificiatorum, est tamen causa prima, quam artificata imitantur.

QUAESTIO II.

Deinde quaeritur de cognitione contingentium. Et circa hoc quaeruntur duo: 1.º utrum Deus sciat contingentia futura; 2.º utrum scientia sua sit variabilis.

ARTICULUS PRIMUS.

Ad primum sic proceditur. Et 1. videtur, quod Deus nesciat contingentia futura. Nihil enim potest sciri nisi verum, ut habetur in primo Posteriorum: sed contingentia futura non habent veritatem, ut probatur primo Perihermenias; ergo de contingentibus futuris Deus scientiam non habet.

2. Praeterea, ista conditionalis est vera: si Deus scit aliquid, illud est verum: alias Deus sciendo falleretur. Sed hujus conditionalis antecedens est necessarium; ergo et consequens est necessarium. Nihil ergo contingens potest esse scitum a Deo.

3. Praeterea, scientia Dei est causa rerum creatarum: sed si causa est necessaria, et effectus necessarius erit; ergo cum scientia Dei sit necessaria, videtur quod res scitae ab eo sint necessariae; et ita non cognoscit contingentia.

Sed contra est, quod dicitur in Psal. 52: « Qui finxit sigillatim corda eorum, qui intelligit omnia opera eorum. » Sed opera humana sunt contingentia; ergo Deus de contingentibus scientiam habet.

Praeterea, Deus scit res, in quantum est causa rerum, ut ex supradictis patet: sed ipse est causa, non solum necessariorum, sed etiam contingentium; ergo ipse scit non solum necessaria futura, sed etiam contingentia.

Respondeo. Dicendum, quod futurum contingens dupliciter potest considerari. Uno modo secundum quod est futurum: et sic nihil aliud est cognoscere futurum contingens, quam cognoscere causas ejus, secundum ordinem quem habent ad ipsum. Et quia causae contingentium non habent immutabilem ordinem ad suum effectum, ideo secundum hunc modum contingens futurum immutabiliter sciri non potest. Alio modo potest considerari contingens futurum, ratione illius temporis, in quo futurum esse praedicatur, in quo quidem tempore futurum jam praesentialiter est, et per consequens determinatum ad unum; et sic certitudinaliter potest contingens cognosci, utpote per seipsum jam visum, sicut sensu percipimus Socratem sedere. Utrouque autem modo Deus de futuris contingentibus scientiam habet. Cum enim suae cognitionis intuitus, sit in momento aeternitatis, omnibus temporis partibus videt ab aeterno Deus rem, secundum statum quem habet in quolibet puncto temporis ipse extra tempus existens; et sic ab aeterno videt Socratem sedere: non autem ut futurum sibi, qui est extra tempus, sed ut praesens: futurum autem respectu aliorum quae tempore praecedunt. Videt nihilominus et ordinem mutabilem causarum, praecedentium ad hunc effectum. Et ideo plenissimam

cognitionem habet de omnibus contingentibus futuris.

Ad primum ergo dicendum, quod quavis contingentia veritatem determinatam non habeat antequam sint, tamen quando jam sunt, determinatam habent veritatem, et sic intuitus divinus in ea fertur.

Ad secundum dicendum, quod quidam dicunt hoc antecedens esse contingens, Deus scivit Petrum nasciturum, ratione contingentis quod implicatur, scilicet Petrum nasci. Sed hoc non oportet: quia id quod materialiter in propositione ponitur, nihil ad contingentiam vel necessitatem propositionis operatur. Aequè enim necessarium vel contingens est me dicere solem oriturum vel Petrum nasciturum. Et ideo alii dicunt antecedens praedictum esse necessarium, utpote aeternum: nec tamen sequitur quod consequens sit necessarium absolute propter defectum causae mediae quae est contingens. Sed hoc etiam non solvit: quia conditionalis esset falsa, cujus antecedens continet causam primam immobilem, consequens vero effectum causae secundae contingentem: ut patet in hac, si sol movebitur, arbor florebit. Et ideo alii dicunt quod consequens est necessarium, secundum quod ex antecedenti consequitur; hoc autem est secundum quod a Deo est scitum. Fertur enim divinus intuitus ad contingens, prout in sua praesentialitate est, quando necessitatem habet; quia omne quod est necesse est esse. dum est, secundum Philosophum. Quod autem futurum significetur, non est per respectum ad scientiam Dei, sed per respectum ad nos.

Ad tertium dicendum, quod scientia non est causa operationum nisi mediante voluntate, quae non ex necessitate operatur: unde ex necessitate scientiae necessitas operationum includi non potest.

ARTICULUS II.

Ad secundum sic proceditur. Et 1. videtur quod scientia Dei sit variabilis. Mutato enim uno relativorum, mutatur et reliquum; et destructo destruitur. Sed scientia relative dicitur ad scibile: cum ergo scibilia variantur, videtur quod scientia Dei varietur.

2. Praeterea, tanto scientia est certior quanto rei scitae conformior. Sed scientia Dei est certissima; cum ergo res scitae sint variabiles, utpote contingentes, videtur quod scientia Dei sit variabilis.

3. Praeterea, omnis scientia transiens de uno in aliud est variabilis, quia non eodem modo se habet ad utrumque. Divina autem scientia transit de uno in aliud, quia per essentiam suam creaturas cognoscit; ergo divina scientia est variabilis.

Sed contra. Divina scientia est ejus essentia, ut supra probatum est: sed ejus essentia est invariabilis; ergo et scientia.

Praeterea, primam rerum causam immobilem oportet esse, ut philosophi probaverunt: sed scientia Dei est omnium rerum prima causa, ut supra est dictum; ergo scientia Dei est invariabilis.

Respondeo. Dicendum, quod scientia Dei nullo modo variabilis est. Nam variatio in scientia non potest esse nisi vel ex parte scientis vel ex parte rei scitae. Ex parte quidem rei scitae scientia variatur, quando re mutata, existimatio de re incipit esse falsa, quae prius erat vera; vel e converso;

quod in divina scientia accidere non potest. Nam intuitus ejus fertur in omnes res, secundum quemlibet statum earum, ut ex praedictis patet. Ex parte etiam scientis Dei, scientia variari non potest, cum ipse Deus sit omnino immutabilis. Unde relinquitur scientiam Dei omnino invariabilem esse.

Ad primum ergo dicendum, quod respectus divinae scientiae refertur in rem, secundum quemlibet statum ejus ab aeterno; et ideo qualitercumque res varietur, scientia Dei invariabilis manet.

Ad secundum dicendum, quod scientia rei scitae, debet esse conformis per viam repraesentationis, non autem secundum proprietatem naturae: unde etiam et nos de rebus materialibus, scientiam immaterialem habemus. Et similiter de rebus mutabilibus habet Deus scientiam immutabilem.

Ad tertium dicendum, quod Deus eodem actu intelligit essentiam suam et res alias per suam essentiam, cum sua operatio sit sua essentia: et ideo nullus discursus vel transitus in ejus scientia esse potest, sicut est in scientia nostra; qui alio actu intelligimus principia, et conclusiones ex principiis.

DISTINCTIO XXXIX.

Praeterea solet quaeri etc. (V. edit. nostrae tom. VI, pag. 279)

Hic est duplex quaestio. Primo de augmento divinae scientiae. Secundo de ejus providentia.

QUAESTIO I.

Circa primum quaeruntur duo: 1.º utrum Dei scientia possit augeri; 2.º utrum possit minui.

ARTICULUS I.

Ad primum sic proceditur. Et 1. videtur, quod scientia Dei augeri possit. Cuilibet enim finito possibilis est additio. Sed ea quae Deus scit sunt finita, cum omne infinitum, inquantum hujusmodi, sit ignotum, ut dicitur 1. Physicorum; ergo eis quae Deus scit, potest fieri additio: et sic potest plura scire quam sciat.

2. Praeterea, Deus potest plura facere, quam sciat se facturum: sed nihil potest facere nisi illud cognoscat; ergo potest scire aliquid quod nescit; et ita ejus scientia potest augeri.

3. Praeterea, Deus non solum scit res, sed etiam enunciahilia, quae non possunt sciri nisi sint vera. Sed plura enunciahilia possunt esse vera quam modo sint vel unquam fuerint, aut futura sint; ergo Deus plura potest scire quam sciat: et ita ejus scientia potest augeri.

Sed contra. Omne quod augetur variatur. Scientia autem Dei invariabilis est, ut ostensum est supra; ergo scientia Dei non potest augeri.

Praeterea, nullum infinitum potest augeri. Sed scientia Dei est infinita, secundum illud Psalm.: « sapientiae ejus non est numerus; » ergo scientia Dei non potest augeri.

Respondeo. Dicendum, quod augmentum scientiæ alicujus potest dupliciter attendi. Uno modo quantum ad modum intelligendi, secundum quod scientior dicitur qui perspicacius intelligit: alio modo quantum ad res scitas, secundum quod ille dicitur scientior qui plura cognoscit. Primo quidem modo scientia Dei augeri non potest. Modus enim intelligendi efficaciam mediæ et virtutis intellectivæ consequitur, medium autem quo Deus intelligit, est ipsa divina essentia, quæ augeri non potest, cum sit infinita: similiter nec virtus intellectiva ipsius. Ex parte etiam intellectuum, non potest scientia Dei augeri. Nam scientia sic non augetur, nisi quando aliquid prius fuit omnino nescitum, et postea scitur. Nihil autem potest esse, quod sit a Deo omnino nescitum; cum ipse sciat aliquo modo quicquid fieri posset: sed tamen aliquid fieri potest quod non est scitum a Deo secundum aliquem specialem modum sciendi qui visio appellatur: per quem modum, Deus tantum scit ea quæ aliquando sunt. Quod autem per hunc modum aliqua nesciantur a Deo, non est ex defectu scientiæ, sed ex defectu seibilibus quæ extra divinum intellectum esse non habent. Unde si etiam esse ponerentur in rerum natura, nihil divinæ scientiæ aceresceret, quamvis a Deo viderentur. Et de hoc modo sciendi Magister loquitur in litera, cum dicit, quod posset ejus scientiæ aliquid esse subjectum, quod non est, sine scientiæ augmento.

Ad primum ergo dicendum, quod Deus infinitorum scientiam habet, non quidem visionis, sed simplicis notitiæ, in quantum cognoscit omnia quæ facere potest. Nec infinitorum cognitio est impossibilis, nisi ei qui numerando in multitudinis cognitionem pertingit. Infinita enim numerando pertransire est impossibile. Deus autem omnia simul intuitu uno videt: unde infinitorum scientiam habere potest; et præcipue cum virtus intellectiva ipsius sit infinita.

Ad secundum dicendum, quod ex hoc quod Deus potest aliquid facere, quod non est facturus, non sequitur quod aliquid possit scire quod nescit, nisi scientia visionis. Nec tamen sequitur, quod etiam visionis scientia augeatur, quia hoc est impossibile, si intelligatur composite Deum scire quod prius nescivit scientia visionis: quia hoc ipso quod ponitur aliquid ab eo produci æternaliter, ponitur a Deo visum fuisse; et in hoc sensu sequeretur scientiæ visionis augmentum. Divisim autem intelligendo, possibile est Deum scire scientia visionis, quod nunc nescit. Sed ex hoc non sequitur scientiæ augmentum; cum augmentum sit præexistenti magnitudini additamentum.

Ad tertium dicendum, quod Deus scit enunciabilia, non quidem componendo vel dividendo per suum intellectum, sicut nos scimus, cum in intellectu ejus nulla sit multiplicitas: scit enim composita simpliciter et multa univoce secundum Dionysium. Et ideo per essentiam suam scit omnia enunciabilia quæ a nobis formantur vel formari possunt, et quæ horum sint vera vel falsa. Unde sicut nec circa res, ita nec circa enunciabilia ejus scientia augeri potest.

ARTICULUS II.

Ad secundum sic proceditur. Et 1. videtur, quod scientia visionis minui possit. Illa enim solum scit Deus scientia visionis, quæ sunt vel fuerunt vel futura sunt: sed potest non esse futurum aliquid eorum quæ futura sunt; ergo scientia visionis minui potest.

2. Præterea, scientia visionis importat respectum Dei ad res temporales: sed non est inconveniens hujusmodi respectus variabiles ponere, sicut quod Deus quandoque dicitur Dominus cum prius non esset; ergo non est inconveniens ponere, quod scientia visionis per diminutionem varietur.

3. Præterea, scientia visionis, simul habet divinam voluntatem annexam: nihil enim est quod Deus esse nolit: et sic nihil Deus videt quod ipse nolit. Sed Deus potest non velle quod vult; ergo potest non videre quod videt; et ita potest scientia ejus visionis minui.

Sed contra. Omne necessarium est æternam: sed quicquid Deus videt, ab æterno videt; ergo necessarium est: et ita non potest Deus non videre quod videt: et sic scientia visionis minui non potest.

Præterea, visio Dei est ejus essentia: sed ejus essentia non potest minui; ergo nec ejus visio.

Respondeo. Cum dicitur Deus videre aliquid, non solum ostenditur qualiter Deus se habet ad rem visam; sed etiam qualiter res visa se habeat ad Deum, ut scilicet quandoque existens in propria natura. Et quamvis modus, quo Deus se habet ad rem visam, omnino sit invariabilis, quia ipse eodem modo cognoscit, quantum in se est, existentia et non existentia; tamen modus quo res visa se habet ad Deum, variabilis quidem est absolute, quia res in se considerata potest esse vel non esse in propria natura; invariabilis vero ex suppositione; quia supposito eam in propria natura aliquando esse vel a Deo videri, non est possibile eam non videri, vel in propria natura non esse: quasi possibile sit hæc simul duo esse, ut aliquid quandoque a Deo visum fuerit et postmodum futurum non sit. Quia ergo modus quo res visa se habet ad Deum est variabilis: ideo in sensu diviso concedi potest quod Deus potest non videre aliquid eorum quæ videt. Sed quia ex suppositione est invariabilis: ideo in sensu composito falsa est. Et propter hoc falsum est quod scientia visionis minui possit: quia diminutio hæc duo includit simul: ut scilicet primo sit visum, et postea non sit visum.

Ad primum ergo dicendum, quod supposito, quod aliquid eorum quæ futura sunt, impediretur ne eveniret; per hoc tamen scientia visionis divinæ non minueretur, quia hoc ipso quod ponitur impediri ne sit, ponitur ab æterno visum non esse.

Ad secundum dicendum, quod aliter est de respectu visionis et de respectu dominii. Nam respectus dominii, requirit creaturam subjectam in actu existere, non autem respectus visionis; et ideo ratio non sequitur.

Ad tertium dicendum, quod si intelligatur in sensu composito, falsum est, quod Deus possit non velle quod vult: non enim potest esse quod ejus voluntas mutetur. Si autem in sensu diviso, verum est: et ex hoc non sequitur quod scientia visionis minui possit.

QUAESTIO II.

Deinde quaeritur de providentia. Circa hoc quaeruntur duo: 1.^o qualiter providentia se habet ad scientiam; 2.^o utrum omnia divina providentia regantur.

ARTICULUS I.

Ad primum sic proceditur. Et 1. videtur quod providentia non pertineat ad scientiam, sed ad voluntatem. Ita enim dicit Damascenus in secundo: Providentia est voluntas, propter quam omnia quae sunt deductionem suscipiunt.

2. Praeterea, Boetius dicit in lib. de Consolatione, quod Deus sua bonitate mundum gubernat: sed bonitas ad voluntatem pertinet; ergo et providentia ejus est gubernare.

3. Praeterea, providentia, secundum Boetium, est ratio per quam Deus cuncta disponit; sed disponere est voluntatis: ergo et providentia.

Sed contra. Videtur quod solum pertineat ad scientiam. Dicit enim Boetius in quarto lib. de Consol. Illud certe manifestum est immobilem simplicemque formam gerendarum rerum esse providentiam: sed forma rerum agendarum in Deo est idea quae ad scientiam pertinet; ergo et providentia.

Praeterea, Augustinus dicit in lib. 85 qq.: « Lex incommutabilis omnia mutabilia, pulcherrima moderatur gubernatione: » sed gubernare et moderari ad providentiam pertinet; ergo lex incommutabilis est ipsa providentia: et sic providentia ad cognitionem pertinet, sicut et lex.

Respondeo. Dicendum, quod eum providentia sit pars prudentiae, secundum Tullium, eodem modo se habet ad scientiam et voluntatem, sicut et prudentia. Sed prudentia, secundum Philosophum, est virtus per quam recte disponuntur ea quae sunt ad finem; quod quidem fieri non potest, nisi fine praesupposito et in cognitione et affectione. Nullus enim recte ordinat aliquid in finem, nisi praecedat cognitio et desiderium finis, qui est principium et regula practicae cognitionis.

Sic ergo providentia ad cognitionem quidem essentialiter pertinet; sed voluntatem finis, quasi principium, praesupponit. Differt autem a scientia practica; quia scientia practica communiter est de fine, et de eo quod est ad finem; sed providentia consistit proprie circa ea quae sunt ad finem, ordinando ea in finem debitum.

Ad primum ergo dicendum, quod providentiam nominat voluntatem Damascenus, propter hoc quod voluntatem finis praesupponit, ut dictum est.

Ad secundum dicendum, quod Deus, secundum Augustinum, utitur nobis ad suam bonitatem et voluntatem: unde bonitas vel voluntas Dei se habet ad providentiam, sicut finis, ad quem per providentiam res ordinantur.

Ad tertium dicendum, quod disponere dupliciter sumitur. Quandoque pro actu exteriori, secundum quod ordo in ipsis rebus exterioribus constituitur: quandoque vero pro actu interiori, secundum quod ordo rerum in mente praecogitur. Primo modo dispositio pertinet ad imperantem actum exteriorem: sed secundo modo pertinet ad vim cognitivam. Sed tamen duplex ordo rerum mente cogitur: unus quo ordinantur ad invicem, et hoc pertinet proprie

ad dispositionem; quia disponere est singula ponere in loco suo. Alius ordo est rerum in finem; et hoc pertinet ad providentiam: unde gubernatio quae est rerum directio et custodia, ne a fine deficiant, proprie ad providentiam pertinet, quamvis unum pro alio quandoque ponatur.

Ad illud vero quod primum in contrarium objicitur, dicendum, quod providentia differt ab idea, quamvis utrumque ad cognitionem pertineat. Nam idea est forma alicujus rei in se considerate; providentia vero est forma ordinis rerum in finem.

Ad quartum dicendum, quod providentia non est omnino idem quod lex aeterna, sed eam praesupponit sicut principium. Nam principia operabilium leges dicuntur: et sic lex aeterna mediante providentia gubernat.

ARTICULUS II.

Ad secundum sic proceditur. Et 1. videtur quod non omnia regantur providentia. In his enim quae providentia alicujus gubernantur, nihil praeter intentionem accidit, nisi propter ignorantiam vel debilitatem gubernantis. Malum autem praeter intentionem accidit, ut dicit Dionysius. Cum ergo multa mala in mundo accidant, nec fas sit Deo infirmitatem vel ignorantiam ascribere, videtur quod res providentia non gubernentur.

2. Praeterea, nihil quod est provisum est casuale; si ergo omnia divina providentia aguntur, videtur quod nihil casu vel a fortuna contingit: quod est inconveniens.

3. Praeterea, 1 ad Corinth. 9 dicitur: « Numquid cura est Deo de bobus? » Vari autem ratione, nec de aliis animalibus brutis; ergo non omnia providentia reguntur.

4. Praeterea, quicumque sibi dimittitur, providentia regentis non gubernatur: sed mali sibi ipsis dimittuntur, secundum illud Psal. 80: « Dimittit eos secundum desideria cordis eorum etc. »

Sed contra est quod dicitur Sapientiae 14: « Tu autem, Pater, gubernas omnia providentia. »

Praeterea, Damascenus dicit quod est inconveniens alium esse rerum factorem et alium provisorem: sed Deus est omnium factor; ergo per eum omnia gubernantur.

Respondeo. Dicendum, quod omnia quae sunt in mundo divinae providentiae subjecta sunt: ad quod necessario ponendum cogit omnis scientia et infinita bonitas ipsius Dei: si enim cognosceret aliqua quorum gubernationem negligeret, non ostenderetur summe bonus. Sed sciendum est, quod non eodem modo se habent omnia ad providentiam. Nam quaedam sunt propter se provisae, quaedam vero propter aliud tantum: sicut in aedificiis principales partes domus sunt per se provisae ab artefice; sed fulcimenta et picturae providentur ad firmitatem vel decorem principalium partium. Illa ergo quae sunt incorruptibilia, sunt propter se provisae, quasi essentielles partes universi. Illa vero quae sunt corruptibilia, sunt provisae non propter seipsa, sed propter alia; sicut omnia corruptibilia propter animam rationalem.

Ad primum ergo dicendum, quod duplex est providentia, secundum Damascenum: scilicet approbationis, quae est de bonis, et concessionis, quae

est de malis: mala enim Deus non intendit; sed permittit, propter aliquod bonum quod inde elicit; et sic non sunt provisa quasi per se intenta; sed solum propter aliud, id est propter bonum quod inde elicitur.

Ad secundum dicendum, quod aliqua dicuntur casu in mundo accidere, per comparisonem ad causas proximas, praeter quarum intentionem accidunt; non autem per comparisonem ad causam primam, cui omnia sunt praevisa.

Ad tertium dicendum, quod etiam de brutis animalibus cura est Deo; alio tamen modo quam de hominibus. Nam bruta, sicut et aliae inferiores creaturae, propter hominem facta sunt: unde et providentia est de eis non propter seipsa, sed propter aliud. Et ideo eorum actus non remunerantur nec puniuntur.

Ad quartum dicendum, quod justis divina providentia excellentius gubernantur quam peccatores. Nam si qua mala sunt in justis, vel culpa vel poenae, in eorum bonum a Deo ordinantur, secundum illud Roman. 8: « Diligentibus Deum omnia cooperantur in bonum. » Sed mala peccatorum ordinantur in gloriam Dei, et in laudem justorum.

DISTINCTIO XL.

Praedestinatio vero de bonis salutaribus etc. (V. edit. nostrae tom. VI, pag. 526.)

QUAESTIO UNICA.

Hic quaeruntur quatuor: 1.^o de praedestinatione; 2.^o de praedestinationis certitudine; 3.^o de reprobatione; 4.^o de obduratione, quae est reprobationis effectus.

ARTICULUS I.

Ad primum sic proceditur. Et 1. videtur, quod praedestinatio non sit in Deo. Praedestinatio enim dicitur esse praeparatio beneficiorum Dei, ut habetur in Glossa, Rom. 8. Sed Deo, qui est completissimum agens, non convenit aliqua praeparatio; ergo Deo non convenit praedestinare.

2. Praeterea, nullum aeternum definitur per aliquod temporale: quicquid autem est in Deo, est aeternum: cum ergo praedestinatio per aliquod temporale definiatur, videtur quod praedestinatio non sit in Deo, sed magis in re praedestinata.

3. Praeterea, sicut a Deo bona sunt gratiae, ita et bona naturae. Sed ad bona naturae nullus praedestinari dicitur; ergo nec ad bona gratiae; ergo ad nihil videtur aliquis praedestinari.

4. Praeterea, sicut homines gratiam et gloriam a Deo consequuntur, ita et Angeli et beati: sed Angelis et beatis non convenit praedestinari, cum praedestinatio sit propositum miserendi, secundum Augustinum; in Angelis autem et beatis non est miseria; ergo nec hominibus convenit praedestinari: et ita nulli a Deo praedestinantur.

Sed contra est quod dicitur Rom. 8: « Quos praescivit, hos et praedestinavit. »

Praeterea, nullus sapiens sine proposito operatur, sed propositum Dei est praedestinatio, ut Augustinus

dicit; ergo Deus ante praedestinat illos quos salvat; et ita praedestinatio convenit Deo.

Respondeo. Dicendum, quod quamvis omnia sint divinae providentiae subjecta, speciali tamen modo rationales creaturae divinitus gubernantur, in quantum ad altiore finem perducuntur, et eorum actus remunerantur vel puniuntur, ut ex supra dictis patet. Et ideo ipsa providentia qua Deus creaturas rationales in beatitudinem ordinat, speciale nomen sortitur, et praedestinatio dicitur: destinare enim est aliquid in alterum dirigere; quod ad providentiam pertinet. Haec tamen praedestinatio super providentiam addit: quia providentia importat tantum ordinem provisorum in finem: sed praedestinatio respicit et ordinem et exitum ordinis; unde ex hoc ipso quod aliqua ordinantur in finem, providentiae subjacent: sed praedestinari non dicuntur nisi hoc modo ordinentur, ut praesciantur finem consequutura esse. Unde praedestinatio praescientiam in sui ratione includit, ratione cujus antecessio in praedestinationis nomine designatur.

Ad primum ergo dicendum, quod praeparatio qua agens praeparatur, ad imperfectionem agentis pertinet. Et ideo Deo non competit. Sed praeparatio qua praeparatur factum, imperfectionem agentis non importat; et talis praeparatio est praedestinatio. Nam prima praeparatio facti, est propositum facientis.

Ad secundum dicendum, quod actus voluntatis et intellectus in ipso operante sunt, et non in operato, ut dicitur 9 Metaphysicorum. Et ideo, cum hujusmodi actum praedestinatio designet, non est in praedestinato, sed in praedestinante. Denominatur autem aliquis praedestinatus ab actu praedestinantis, sicut et cognitus ab actu cognoscentis.

Ad tertium dicendum, quod quamvis bona naturae sint a Deo, non tamen excedunt mensuram creaturae sicut bona gratiae vel gloriae. Et ideo respectu horum est praedestinatio, et non respectu naturalium. Nam in illud proprie indigemus dirigi ex proposito alterius, quod supra nos est.

Ad quartum dicendum, quod si praedestinatus sumatur participialiter, sic Angeli et beati sunt praedestinati: quia praedestinatus est participium praeteriti temporis: unde quod aliquando est praedestinatum, semper erat praedestinatum. Si vero nominaliter sumatur, sic non convenit beatis nisi secundum quod diriguntur in continuitatem beatitudinis: beatitudinem enim jam habent, quia in eam jam non diriguntur. Definitio autem Augustini inducta loquitur de praedestinatione secundum quod respicit statum praesentis miseriae.

ARTICULUS II.

Ad secundum sic proceditur. Et 1. videtur, quod praedestinatio certitudinem non habeat. Praedestinatio enim non potest considerari, nisi aut ex parte praedestinantis, vel ex parte praedestinati. Sed ex parte praedestinantis non habet certitudinem: quia quem Deus praedestinavit potest non praedestinasse (ut Magister dicit in littera): nec etiam ex parte praedestinati; quia ad praedestinationis effectum liberum arbitrium concurrat, quod est causa contingens; ergo praedestinatio nullo modo certitudinem habet.

2. Praeterea, omnis causa habens certum ordinem ad suum effectum, de necessitate suum effectum includit si causa praedicta ponatur. Si ergo pra-

destinatio certum ordinem habeat ad suum effectum; cum praedestinatio jam sit posita, quia est ab aeterno, sequitur quod ejus effectus necessitatem recipiat a praedestinatione. Hoc autem est falsum, cum effectus ejus sit contingens; ergo praedestinatio non habet certitudinem.

3. Praeterea, omne illud quod potest augeri et minui, non habet certitudinem. Sed praedestinatorum numerus potest augeri. Deut. 1: « Dominus addat ad hunc numerum multa millia. » Glossa: « definitur apud Deum, qui novit qui sunt ejus. » Similiter etiam videtur posse minui: quia dicitur a Gregorio, 5 Moralium: « Aliis cadentibus, in eorum locum alii succedunt; » ergo praedestinatio non habet certitudinem.

4. Praeterea, id quod per se certitudinem habet, non indiget aliunde juvari. Sed praedestinatio juvatur orationibus sanctorum, ut Gregorius dicit; ergo praedestinatio certitudinem non habet.

Sed contra. Rom. 8: « Quos praescivit, hos et praedestinavit: » ubi dicit Glossa: « praedestinatio est praescientia et praeparatio beneficiorum Dei, quae certissime liberamur, quicumque liberamur. »

Praeterea, Augustinus dicit in libro de Praedestinatione sanctorum, quod veritas praedestinationis est immobilis; ergo praedestinatio certitudinem habet.

Respondeo. Dicendum, quod, sicut supra dictum est, praedestinatio non solum respicit ordinem in finem: sed etiam exitum, vel eventum ordinis, qui est consequutio finis. Haec autem finis consequutio habet quidem certitudinem per comparisonem ad causam primam: sed non per comparisonem ad causam proximam. Causa enim proxima liberum arbitrium est, quod in se consideratum deficere potest a finis consequutione: adhibentur tamen a Deo plurima beneficia, quibus conservatur, ne a fine deficiat; ut puta intercessionem sanctorum, exhortationes, et gratiae dona, quae omnia simul collecta certum ordinem habent ad consequutionem salutis. Et quia praedestinatio haec omnia ab aeterno providet, et praeparat proponendo: ideo praedestinatio respectu sui effectus certitudinem habet.

Ad primum ergo dicendum, quod certitudo praedestinationis non ex praedestinato est, sed ex praedestinante. Quod autem dicitur quod Deus potest non praedestinasse quod praedestinavit, intelligendum est divisim, non composite: Deum enim non praedestinare istum, per se loquendo est possibile: sed ex suppositione quod praedestinavit, est impossibile. Nec differt in Deo praedestinare et praedestinasse; cum actus praedestinationis aeternitate mensuretur. Obiectio autem procedit in sensu composito.

Ad secundum dicendum, quod secundum Dionysium, providentiae non est naturam perdere, sed salvare. Et ideo ita per causas contingentes aliquid faciendum ordinat, ut causae contingentiam non tollat: sed ex aliis concurrentibus causae defectum causae contingentis impedit. Et per hunc modum praedestinatio certissimum modum (1) habet ad suum effectum, et tamen libero arbitrio nulla necessitas imponitur.

Ad tertium dicendum, quod numerus praedestinatorum certus est, et formaliter, et materialiter: quia et tot, et hi salvantur, quot et qui praedestinati sunt; quamvis numerus materialis dependeat aliquo modo ex libero arbitrio. Formaliter vero

(1) *Lege ordinem.*

nullo modo; quia quod isti salventur, possunt nihilominus alii salvari. Auctoritates autem inductae loquuntur de numero eorum qui stant per praesentem justitiam.

Ad quartum dicendum, quod orationes sanctorum juvant praedestinationem, non ex parte causae sed ex parte effectus. Nec hoc derogat certitudini praedestinationis: quia divina praedestinatione omnia hujusmodi auxilia sunt homini divinitus praeparata.

ARTICULUS III.

Ad tertium sic proceditur. Et 1. videtur, quod Deus neminem reprobet. Ipse enim vult omnes homines salvos fieri, ut dicitur 1 Timoth. 1; ergo Deus neminem reprobat absolute.

2. Praeterea, sicut praedestinatio, ita et reprobatio certitudinem habet. Aliter enim numerus praedestinatorum augeri posset. Si ergo aliqui sunt a Deo reprobati, impossibile erit eos salvari; et ita sine culpa sua damnabuntur, quod est impossibile.

3. Praeterea, nullus sapiens hoc quod facit propter finem aliquem a fine consequendo excludit, quantum ex parte sua est: sed Deus omnes homines facit propter beatitudinem; ergo quantum ex ipso est, nullum reprobat a beatitudine consequenda.

Contra est quod dicitur Malach. 1: « Jacob dilexi, Esau odio habui: » quod de reprobatione malorum exponitur, sicut et primum de praedestinatione bonorum.

Praeterea, quicquid Deus vult, ab aeterno voluit: sed Deus vult punire malos, sicut et praemiare bonos.

Respondeo. Dicendum, quod divinae providentiae subjiuntur et bona et mala diversimode. Nam bona providentur sicut per se intentia: mala autem permittuntur, in quantum ad aliquod bonum ordinari possunt. Ordinavit ergo divina providentia ab aeterno humanam naturam ad beatitudinis consequutionem per liberum arbitrium: quod quia deficere potest per seipsum, a solo autem Deo inefficientiam habens; ideo ab aeterno proposuit quod quosdam permetteret deficere, quibusdam vero auxilia apponeret ne deficerent; ut in utrisque manifestaretur virtus gratiae, et defectus naturae. Defectum vero eorum qui defecturi essent, in bonum ordinavit; suae justitiae scilicet, quae pro culpa poenas retribuit. Sic ergo ab aeterno fuit propositum Dei, et respectu culpae praemittendae, et respectu poenae infligendae: et haec dicitur reprobatio. Unde quosdam ab aeterno reprobat.

Ad primum ergo dicendum, quod hoc quod dicitur quod vult omnes homines salvos fieri, intelligitur de his qui salvantur; quia nullus salvatur nisi ejus voluntate: et haec est expositio Augustini quae reprobationem non tollit. De hoc magis infra dicitur.

Ad secundum dicendum, quod reprobatio et praedestinatio habent certitudinem partim similem et partim dissimilem. Similem quidem quantum ad fines; quia sicut praedestinatio respectu gloriae habet certitudinem praescientiae et causae, ita reprobatio respectu poenae. Dissimilem vero respectu ejus quod est ad finem. Nam praedestinatio respectu gratiae habet certitudinem praescientiae et causae; sed reprobatio respectu culpae certitudinem praescientiae solum, non autem causae: et ideo certitudo reprobationis non excusat a culpa.

Ad tertium dicendum, quod humana natura habet quidem ordinem ad beatitudinem; non tamen necessarium, cum possit deficere. Et ideo ut naturae conditio manifestetur, Deus permittit quod aliqui ab illo bono deficiant.

ARTICULUS IV.

Ad quartum sic proceditur. Et 1. videtur, quod Deus neminem obduret vel excaecat. Anselmus enim dicit quod causa quare aliquis gratiam non habeat, non est quia Deus dare nolit, sed quia ipse non vult accipere; sed obduratio vel excaecatio ad privationem gratiae pertinet; ergo obdurationis vel excaecationis causa Deus non est.

2. Praeterea, duritia cordis quaedam culpa est; sed Deus non est auctor culpae; ergo ipse non obdurat.

3. Praeterea, nullus sapiens artifex materiam indispositam reddit ad suum opus: sed per excaecationem et obdurationem anima redditur indisposita ad receptionem gratiae, quae est opus Dei; ergo Deus non obdurat neque excaecat.

Sed contra est quod dicitur Rom. 9: « Cujus » vult miseretur, et quem vult indurat. »

Praeterea, caecitas et duritia quaedam poenae sunt: sed omnis poena a Deo est; ergo indurat et excaecat.

Respondeo. Dicendum, quod ad opus meritorium duo requiruntur: scilicet rectitudo rationis, et pronitas affectus in bonum; cum omne meritum electionem rectam requirat. Rectitudo autem rationis est necessaria in hoc quod videat quod bonum est, non solum in universali, sed etiam in particulari. Ex parte vero affectus requiritur ut non sit in seipso reflexus per amorem sui: sed per charitatem effluat extra se in Deum et proximum. Duplex ergo est indispositio ad meritum. Una ex parte intellectus, secundum quod errat in particulari operabili, prout omnis malus est ignorans; et hoc dicitur caecitas. Alia ex parte affectus, secundum quod per amorem sui in seipso retinetur ne extra se effluat: et hoc vocatur duritia. Utramque autem istorum ex duobus causatur. Uno modo ex ipsa naturae insufficientia vel corruptione, per quam natura de se est impotens ad cognoscendum bonum et amandum: et sic Deus dicitur excaecare vel obdurare, inquantum nullam sibi relinquit dispositionem ad meritum, gratiam non apponendo. Alio modo ex voluntate humana, quia propriae assentit concupiscentiae a qua impeditur ne bonum videat et amet; et sic caecitas et duritia non est a Deo, sed a malitia humana.

Ad primum ergo dicendum, quod Anselmus non est intelligendus quasi Deus non ex judicio suo judicet aliquem esse a participatione gratiae repellendum; sed quia illud judicium semper habet voluntatem hominis concomitantem quae gratiae repugnat, et per hoc gratia caret.

Ad secundum dicendum, quod duritia et caecitas secundum quod causantur ex actu voluntatis, habent rationem culpae; et sic a Deo non sunt, ut dictum est.

Ad tertium dicendum, quod licet artifex non facit materiam indispositam, facit tamen quodammodo, inquantum judicat dignum ut relinquatur in sua dispositione, reputans eam incongruam ad opus artis. Vel potest dici, quod quamvis per cae-

citatem et duritiam homo sit ad opus misericordiae indispositus, est tamen per hoc dispositus ad opus justitiae.

DISTINCTIO XLI.

Si autem quaerimus meritum et obdurationis etc. (V. edit. nostrae tom. VI, pag. 155.)

QUAESTIO UNICA.

Hic quaeruntur quatuor: 1.º utrum effectus praedestinationis et reprobationis possint habere aliquam causam meritoriam; 2.º utrum praescientia operationum sit causa praedestinationis; 3.º utrum praescientia operationum sit causa reprobationis; 4.º utrum scientia vel praescientia Dei mutetur quantum ad seita.

ARTICULUS I.

Ad primum sic proceditur. Et 1. videtur, quod effectus praedestinationis, gratiae scilicet appositio, possit habere causam meritoriam. Majus enim donum Dei est gloria quam gratia: sed gloria habet causam meritoriam; ergo et gratia habere potest.

2. Praeterea, sicut operatio naturalis potentiae est infra gratiam, ita operatio gratiae est infra gloriam. Sed per actus gratiae meremur gloriam; ergo et per actus naturae possumus mereri gratiam.

3. Praeterea, sicut se habet gratia ad merendum, ita gratiae privatio ad demerendum. Sed homo demerendo meretur gratiae privationem, scilicet obdurationem et excaecationem, ut in littera dicitur; ergo similiter potest, bene agendo, gratiam mereri.

Sed contra est quod dicitur Rom. 11: « Si enim » ex operibus, jam non ex gratia: » sed quod meritis redditur est ex operibus; ergo gratia pro meritis non datur.

Praeterea, meritum sine bona voluntate esse non potest. Sed voluntas, ad hoc quod bene velit, gratia praeventur, ut Augustinus dicit; ergo omne meritum gratia praecedat: et sic gratia sub merito cadere non potest.

Respondeo. Dicendum, quod nihil potest agere ultra suam speciem; potest tamen infra suam speciem agere; quod est quandoque effectus non adaequat causam. Quod enim effectus causam excedat, impossibile est. Status autem gratiae est supra statum rationalis naturae; quia per gratiam Deo unitur, qui est supra ipsam. Status vero culpae infra naturam rationalem est; quia per culpam inhaeret temporalibus rebus, quae infra ipsam sunt. Sic ergo patet quod per naturalia homo non potest ad statum gratiae merendo pervenire: potest autem per ea in statum culpae descendere. Et inde est quod in littera dicitur quod appositio gratiae non habet meritum, obduratio vero habet.

Ad primum ergo dicendum, quod licet gloria perfectior sit quam gratia, tamen gloria est postremum inter dona gratuita, et ideo potest sub merito cadere: non autem prima gratia.

Ad secundum dicendum, quod licet gratia imperfecta sit respectu gloriae; tamen, inquantum per eam Spiritus sanctus hominem inhabitat, qui perfectior est omni creatura, etiam gloria, opera gratiae possunt esse meritoria gloriae; non autem gratiae, opera naturae.

Ad tertium dicendum, quod gratia est principium merendi: sed gratiae privatio non intelligitur ut demeriti principium, sed magis ut terminus vel effectus; quia sola natura sufficit ad demeritum, per quod homo gratia privatur.

ARTICULUS II.

Ad secundum sic proceditur. Et 1. videtur, quod praescientia operationum sit causa praedestinationis. Quia secundum illud Rom. 9: « Miserebor eui miserebor, » dicit Glossa Ambrosii: « Misericordiam illi dabo, quem praescio toto corde post errorem re- versurum ad me. » Sed hoc dicitur ex persona Dei praedestinantis; ergo praescientia operationum est causa praedestinationis.

2. Praeterea, praedestinatio includit in se voluntatem divinam humanae salutis, non solum antecedentem, (quia sic omnes essent praedestinati,) sed etiam consequentem. Voluntas autem consequens, ut Damascenus dicit, respicit id quod est ex parte nostra; ergo praescientia operationum nostrarum est causa praedestinationis.

3. Praeterea, homines praesciti ab aeterno a Deo, non distinguuntur nisi secundum diversitatem operationum praescitorum: sed distribuere inaequaliter aequalibus, facit acceptionem personarum; si ergo ab aeterno Deus proposuit se daturum quibusdam gratiam, quibusdam vero non daturum, non habita operationis ratione, videtur fuisse personarum acceptio apud Deum: quod est contra id quod dicitur Act. 10.

Sed contra est illud Rom. 9: « Non ex operibus, etc. » Ubi dicit Glossa: « Sicut non pro meritis praecedentibus id fuit dictum: Jacob dilexi etc.; » ita nec pro meritis futuris: » et sic praescientia meritorum non est causa praedestinationis.

Praeterea, illud quod datur alicui propter merita, datur ei secundum justitiam, et non secundum misericordiam; si ergo praescientia meritorum est causa divinae praedestinationis, videtur quod salus hominum sit ex justitia, et non ex misericordia: quod est contra Apostolum ad Titum 5: « Non ex operibus justitiae, quae fecimus nos. »

Respondeo. Dicendum, quod in praedestinatione est duo considerare: scilicet propositum divinum, quod est aeternum, et effectum ejus temporalem, qui est appositio gratiae. Ille autem effectus non habet causam meritoriam, sicut dictum est, quamvis ex parte nostra aliquam dispositionem habere possit: quia opus humanum praescitum, voluntatem movet de necessitate, sicut causa finis, et illud sine quo finis haberi non potest; sicut voluntatem hominis beatitudo, et vita sine qua non est beatitudo. Finis autem voluntatis divinae est ejus bonitas, quae absque salute omnium hominum esse potest: unde salus hominis neque est finis divinae voluntatis, nec id sine quo finis ultimus haberi non possit a Deo: nec etiam est id sine quo aliquid aliud prius a Deo volitum esse non possit, ita quod ex illius suppositione debitum dicatur, sicut debitum est avi habere plumas: nam gratia non requiritur ad esse naturae. Unde patet quod voluntas divina non inclinatur ad dandam gratiam nisi ex mera liberalitate. Et ideo meritum praescitum causa vel ratio praedestinationis non est.

Ad primum ergo dicendum, quod verbum Ambrosii est referendum ad effectum praedestinat-

nis, qui est gratia, ad quam opus rectum hominis praecedens se habet ut dispositio, sequens vero ut finis. Ad hoc enim gratia datur, ut homo recte operando vitam aeternam mereatur.

Ad secundum dicendum, quod praedestinatio includit voluntatem consequentem, quae respicit aliquo modo id quod est ex parte nostra; non quidem sicut inclinans divinam voluntatem ad volendum, sed sicut id quod est dispositio vel finis respectu voliti a Deo, quod est gratiae appositio.

Ad tertium dicendum, quod inaequalitas distributionis ad aequales, acceptionem personarum causat in his quae secundum aliquod debitum dantur: in his vero quae ex mera liberalitate donantur, non est personarum acceptio, nec aliqua injustitia, si uni aequalium datur et alii non datur.

ARTICULUS III.

Ad tertium sic proceditur. Et 1. videtur quod praescientia operationum sit causa reprobationis. Deus enim non reprobatur aliquos ex misericordia, sed ex justitia. Justitia autem habet respectum ad opera nostra; ergo praescientia operationum est causa reprobationis.

2. Praeterea, voluntas, praecipue Dei, non est nisi de bono; sed reprobatio est voluntas damnandi, quod non est bonum nisi ex ordine ad meritum praecedens; ergo praescientia operationum est causa reprobationis.

3. Praeterea, illud quod facit injustitiam in opere, facit etiam injustitiam in voluntate. Sed injustitia esset, si Deus aliquem damnaret sine culpa praecedente; ergo et injustitia est ex parte voluntatis, si vult damnationem alicujus absque consideratione praecedentis culpa; cum ergo injustitia in Deum non cadat, videtur quod praescientia operationum sit reprobationis causa.

Sed contra est quod dicit Glossa, Rom. 9: « Numquid iniquitas est apud Deum? »: « Nemo dicat, quia Deus futura praeviderat, alterum elegisse, alterum reprobasse; » ergo sicut praescientia operationum non est causa praedestinationis, ita nec causa reprobationis.

Praeterea, sicut praedestinatio includit divinam voluntatem, ita et reprobatio: sed voluntatis divinae nihil est causa, ut dicit Augustinus; ergo praescientia operationum non est causa reprobationis.

Respondeo. Dicendum, quod voluntati divinae de salute hominis, duplex voluntas opponi videtur: scilicet voluntas de contradictorio, secundum quod vult aliquem non salvare, et voluntas de contrario, secundum quod vult damnare aliquem. Prima quidem voluntas non requirit aliquam rationem ex parte voliti, cum salus gloriae non sit debitum humanae naturae. Non enim requiritur ratio, quare non dem alicui cui dare non debeo: sed voluntas damnationis respicit rationem voliti in damnato, cum damnatio ex debito inferatur, quia finis damnationis est Dei justitia. Detrimentum autem damnationis ex parte nostra, non solum sunt opera mala hujus vel illius, sed etiam naturae infectio.

Reprobatio ergo, quae utramque praedictarum voluntatum includit, habet causam, quasi finem, divinam justitiam: habet vero quasi rationem voliti, non de necessitate, praescientiam operationum. Sed ad hoc sufficit praescientia imperfectionis naturae. Et per hoc patet solutio ad objecta. Nam primae

rationes concludunt (1), quod reprobatio habeat pro ratione voliti, praescientiam operationum, vel ejus-
 enimque ex quo juste damnatio sequatur. Secundae
 vero concludunt quod opera praescita, non sint
 causa reprobationis principalis, sed magis divina
 justitia quae est quasi finis, et concernit debitum
 ex parte damnandi: non autem bonitas Dei quae
 est finis salvationis, concernit aliquid ex parte nostra
 per modum debiti. Et quantum ad hoc est diffe-
 rentia inter reprobationem et electionem. Et per
 praedicta patere potest ordo praedestinationis ad
 electionem et dilectionem. Quia enim nihil eligitur
 nisi quod aliquando praecoptatur; ideo electio prae-
 supponit dilectionem. Quia vero nihil in finem sa-
 lutis infallibiliter ordinatur, nisi quod a peccatori-
 bus segregatur, et ejus salus a Deo amatur; ideo
 praedestinatio praesupponit electionem et dilectio-
 nem, quarum quaelibet est aeterna, sed vocatio
 temporalis: ideo effectus praedestinationis, qui est
 gratiae appositio in praesenti, ad vocationem per-
 tinet.

ARTICULUS IV.

Ad quartum sic proceditur. Et 1. videtur quod
 non quicquid scivit Deus, sciat. In Deo est idem
 scientia et praescientia. Sed non quicquid praesci-
 vit, praescit; ergo non quicquid scivit, scit.

2. Praeterea, scientia Dei non solum est de re-
 bus, sed de enunciabilibus, ut supra dictum est.
 Sed Deus aliquod enunciabile scivit quod modo ne-
 scit: scivit enim Christum nasciturum, quod modo
 nescit, alias scientia sua esset falsa; ergo non quic-
 quid Deus scivit, scit.

3. Praeterea, Deus scit omne verum, nec scit
 aliquid nisi verum: sed non quicquid fuit verum, est
 verum: nam eadem oratio, secundum Philosophum,
 quandoque est vera quandoque falsa; ergo non quic-
 quid Deus scivit, scit.

Sed contra. Quicumque nescit aliquid quod prius
 scivit, ejus scientia diminuitur: sed scientia Dei
 minui non potest, ut supra dictum est; ergo quic-
 quid Deus scivit, scit.

Praeterea, quicquid Deus scivit, ab aeterno sci-
 vit: sed quicquid fuit ab aeterno est, et erit semper;
 ergo quicquid Deus scivit scit, et sciet semper.

Respondeo. Dicendum, quod si scientia Dei re-
 feratur ad res, verum est absque dubio quod quic-
 quid Deus scivit, scit. Si vero referatur ad enunciabile,
 sic multiplex opinio est. Quidam enim dixerunt
 idem esse enunciabile, quod significat eandem rem,
 quacumque differentia temporali significet, ut Socratem
 currere et ecurrisse: et sic idem est quod Deus scit
 quando scit Socratem currere et Socratem ecurrisse.
 Sed hoc non potest esse, cum tempus sit de composi-
 tione enunciabilis, ut dicitur in 5 de Anima. Et ideo
 alii dicunt quod sunt diversa enunciabilia: unde si ad
 enunciabilia referatur, falsum est quod quicquid
 Deus sciverit sciat: et hoc propter mutationem rei,
 non propter mutationem divinae scientiae. Sed hoc
 non videtur verum, duplici ratione. Primo, quia Deus
 non habet scientiam de rebus componendo enun-
 ciabilia sicut nos: sed et composita scit simpliciter,
 ut Dionysius dicit. Secundo, quia enunciabile potest
 considerari ut scitum, et ut quo scitur. Primo modo
 consideratur ut res quaedam; et sic potest sciri et-
 iam quando falsum est, dum aliquis scit naturam
 et conditionem ejus. Secundo modo consideratur ut

(1) *At.* includunt.

signum rei scitae; et sic per ipsum non habetur
 scientia de re, vel de eo, quando falsum est. Sic
 ergo homo qui scivit Socratem currere, et postea
 ecurrisse, scit quicquid scivit: sed non quocumque
 modo: alio enim enunciabili scit eandem rem quo
 prius. Deus autem scit quicquid scivit, et quocum-
 que modo.

Ad primum ergo dicendum quod praescientia
 secundum rationem addit supra scientiam respectum
 ad res scitas, ratione ejus falsum est quod quic-
 quid Deus praescivit praescit.

Ad secundum dicendum, quod Deus scit enun-
 ciabilia, non quasi enunciabilia componendo. Et ideo
 non sequitur quod ejus scientia varietur, neque
 quantum ad id quod scit, neque quantum ad id
 quod scivit. Et per hoc patet solutio ad tertium.

DISTINCTIO XLII.

Nunc autem de omnipotentia, etc. (*V. edit. nostrae tom.*
VI, pag. 540.)

QUAESTIO UNICA.

Hic quaeruntur quatuor: 1.^o utrum in Deo sit
 potentia; 2.^o utrum ei omnipotentia conveniat;
 3.^o qua ratione omnipotens dicatur; 4.^o utrum ali-
 quid dicatur possibile secundum causas superiores.

ARTICULUS I.

Ad primum sic proceditur. Et 1. videtur quod
 in Deo non sit potentia. Cujuslibet enim potentiae
 suus actus est complementum. Sicut enim potentia
 passiva perficitur per formam, qui est actus primus,
 sic activa per operationem, qui est actus secundus:
 sed in Deo non ponitur potentia passiva, propter
 hoc quod sibi compleri non convenit, sed complere;
 ergo nec potentia activa in Deo ponenda est.

2. Praeterea, potentia significatur ut operationis
 principium: sed operatio Dei est sua essentia, qui
 principium non habet; ergo in Deo potentia ponenda
 non est.

3. Praeterea, omnis potentia quae non semper
 est conjuncta actui est mutabilis, saltem de otio in
 actum. In Deo autem est potentia non semper actui
 conjuncta, alias creaturae essent ab aeterno; ergo
 sequitur quod sit mutabilis de otio in actum: quod
 est inconveniens; ergo in Deo non est potentia.

Sed contra est quod dicitur in Psalm. 88:
 « Potens es Domine, et veritas tua, in circuitu tuo. »

Praeterea, potentia activa habet rationem cau-
 sae efficientis: sed Deus est causa efficiens omnium;
 ergo sibi maxime competit ratio potentiae activae.

Respondeo. Dicendum, quod secundum quod
 aliquid actu est, secundum hoc activum est; et se-
 cundum quod est activum, secundum hoc convenit
 habere potentiam activam, quae nihil aliud est quam
 principium actionis et acti. Unde cum Deo maxime
 competat esse actu, sibi praecipue competit ratio
 potentiae activae. Sed tamen sciendum quod poten-
 tia habet respectum ad tria. Primo ad subjectum.
 Secundo ad actum. Tertio ad effectum. Quantum
 ad duo prima, differenter se habet potentia in crea-
 turis et Deo. Nam in Deo potentia est idem secun-
 dum rem eam substantia potentis, et cum ejus o-
 peratione, differens solum ratione: quod in creaturis
 non accidit. Sed quantum ad tertium se habet in

Deo et creatura quodammodo. Nam potentia activa tam in Deo quam in creatura realiter distinguitur ab effectu, cuius est principium.

Ad primum ergo dicendum, quod potentia activa se habet in ratione completis secundum respectum ad effectum: sed in ratione completi secundum respectum ad operationem, quae in Deo secundum rem idem est cum potentia, ut dictum est. Potentia vero passiva se habet solum in ratione completi. Et ideo potentia activa potest Deo attribui, non autem passiva.

Ad secundum dicendum, quod divina essentia secundum rationem essentiae non habet principium, neque secundum rem, neque secundum modum intelligendi. Operatio autem divina, quae est idem essentiae secundum rem differens ratione, habet principium, secundum modum intelligendi, potentiam activam in Deo.

Ad tertium dicendum, quod potentia activa Dei semper est conjuncta operationi, cum sua operatio sit ejus substantia; non tamen semper effectui, cum effectus sequatur ad determinationem voluntatis.

ARTICULUS II.

Ad secundum sic proceditur. Et 1. videtur quod Deus non sit omnipotens. Dicitur enim 2 Timoth. 2, quod seipsum negare non potest; ergo non potest omnia, et ita non est omnipotens.

2. Praeterea, Hieronymus dicit quod, cum caetera Deus possit, non potest de corrupta facere virginem; ergo non est omnipotens.

3. Praeterea, Gen. 18, dicitur: « Num celare poterō Abrahami quae gesturus sum, cum futurus sit in gentem magnam et robustissimam? » Et 19: « Non poterō facere quicquam donec gradiaris illuc; » ergo Deus non omnia potest.

Sed contra est quod dicitur Luc. 1: « Non erit in possibile apud Deum omne verbum. »

Praeterea, omnis potentia quae aliqua potest et aliqua non potest, est finita: sed potentia Dei est infinita, ut etiam Philosophus probat; ergo omnia potest.

Respondeo. Dicendum, quod sicut dictum est, in Deo non ponitur potentia passiva, sed activa, eo quod est actus purus, nihil de potentia admixtum habens. Quia igitur est actus completus in se comprehendens quicquid in aliquo perfectionis esse potest, vel excogitari; ideo in omnia ejus virtus activa simpliciter potest. Dupliciter ergo aliquid potest dici Deum non posse. Uno modo quia pertinet ad passionem; sicut dicimus Deum non posse pati, non posse deficere, vel fieri, et alia hujusmodi. Alio modo, quia illud quod dicitur Deum non posse, non habet rationem actus: et hoc contingit ex hoc quod non potest habere rationem actus, et hoc contingit ex hoc quod non potest habere rationem entis, sicut quod implicat in se contradictionem. Quod etiam dupliciter contingit. Uno modo secundum quod implicat contradictionem absolute in se consideratum, sicut hominem esse asinum; et hoc simpliciter Deus non potest. Alio modo secundum quod in se consideratum contradictionem non implicat, sed solum per respectum ad aliud: sicut Petrum damnari in se consideratum non implicat contradictionem, sed per respectum ad praescientiam vel ordinationem Dei, quae se habent ad modum contradictorium, hujusmodi contradictionem implicat: et hoc

dicitur Deus posse facere ex potentia absoluta, sed non de potentia ordinata: vel posse simpliciter, sed non posse ex suppositione. Sic ergo tribus modis dicitur Deum non posse aliquid. Primo, quia sonat defectum. Secundo, quia implicat contradictionem. Tertio, quia repugnat praescientiae, vel ordinationi divinae. Prima ergo ratio procedit de primo, secunda de secundo (nam praeteritum non fuisse implicat contradictionem), tertia de tertio.

ARTICULUS III.

Ad tertium sic proceditur. Et 1. videtur quod Deus non dicatur omnipotens, quia omnia possit. Quia ly omnia, aut distribuit pro his quae sunt, aut pro his quae possunt esse. Si solum pro his quae sunt, hoc non sufficeret ad rationem omnipotentiae. Nam si quis diceret Deum non posse facere nisi ea quae sunt, omnipotentiam negaret. Si autem pro his quae possunt esse: aut secundum potentiam creaturae, et hoc iterum ad rationem omnipotentiae non sufficit. Nam omnipotentia Dei ad plura se extendit quam potentia creaturae. Aut secundum potentiam Dei, ut Deum posse omnia sit sensus, Deus potest omnia quae sunt ei possible: quod iterum ad rationem omnipotentiae non sufficit: quia sic et homo esset omnipotens qui potest omnia quae sunt ei possible; ergo Deus non dicitur omnipotens quia omnia possit.

2. Praeterea, in litera dicitur quod si Deus posset peccare, omnipotens non esset. Et sic non posse deficere ad ejus omnipotentiam pertinet; sed non posse deficere convenit Deo, in quantum habet potentiam perfectam; ergo ratio omnipotentiae in Deo magis est propter perfectionem potentiae, quam propter universalitatem possibilem.

3. Praeterea, Angelus, Luc. 1, rationem omnipotentiae insinuare videtur ex hoc, quod non est impossibile apud Deum omne verbum; sed verbum est quod mente concipitur; ergo Deus videtur dici omnipotens, non quia omnia possit simpliciter: sed quia potest omnia quae possunt cogitari.

4. Praeterea, Sapientiae 12 dicitur: « Subest tibi cum volueris posse; » ergo Deus ex hoc dicitur omnipotens, quia omnia potest quae vult, et non omnia simpliciter.

Sed contra: omnia quaecumque voluit Deus, fecit, sicut dicitur in Psalm. 115. Si ergo Deus dicitur omnipotens ex hoc solo quia potest quicquid vult, ratio suae omnipotentiae terminabitur ad ea quae fecit vel facturus est.

Respondeo. Dicendum, quod ratio omnipotentiae aliquid continet in se primo et principaliter, aliquid vero secundario. Principaliter quidem continet hoc quod per nomen significatur, scilicet quod omnia possit. Cum autem dicitur omnia posse, distributio refertur ad potentiae objectum: unde oportet quod intelligatur Deus omnipotens esse ex hoc quod potest omnia possible. Possible autem, secundum Philosophum in 3 Metaphysicorum, dupliciter dicitur. Uno modo secundum respectum ad aliquam potentiam; sicut cum dicitur hoc esse possibile huic vel illi. Alio modo non secundum aliquam potentiam, sed absolute, secundum quod contra impossibile dividitur, et cum necessario dividit verum. Sic enim dicitur possibile omne illud quod non habet in se repugnantiam ad esse, et hoc est quod in se contradictionem non implicat. Et respectu horum om-

nium distributio omnipotentiae intelligenda est. Sic ergo primo et principaliter ratio omnipotentiae in hoc consistit, quod potest omnia per potentiam activam quae in se contradictionem non implicat. Secundario vero ratio omnipotentiae includit quicquid ad perfectionem potentiae activae pertinet, ut quod non possit deficere quicquid vult, et sic de aliis.

Ad primum ergo dicendum, quod ratio illa procedit de possibilibus quo ad aliquem et non de possibilibus absolute.

Ad secundum dicendum, quod non posse deficere consequitur rationem omnipotentiae: sed non principaliter complet eam, ut dictum est.

Ad tertium dicendum, quod intellectus non est nisi entis. Unde ad hoc quod Deus possit facere quicquid in se consideratum potest esse, non habens repugnantiam contradictionis, sequitur quod possit facere quicquid mente concipi potest.

Ad quartum dicendum, quod posse quicquid vult absolute facere, non sufficit in Deo ad rationem omnipotentiae, sed posse quicquid vult se posse et per se ipsum. Hoc enim Deo competit et nulli creaturae. Et tamen consequenter se habet ad rationem omnipotentiae, et non principaliter. Et per hoc patet responsio ad ultimum.

ARTICULUS IV.

Ad quartum sic proceditur. Et 1. videtur, quod aliquid dicatur possibile secundum causas superiores, et non secundum causas inferiores. A mensura enim sumitur iudicium de mensuratis: sed potentia Dei mensura est omnium rerum, non autem potentia causae inferioris; ergoabilia dicuntur aliqua secundum causam superiorem, et non secundum causam inferiorem.

2. Praeterea,abilia dicuntur per respectum ad actum: sed aliqua actu eveniunt, secundum quod sunt in causis superioribus, non autem semper secundum quod sunt in inferioribus, ut dicitur in Glossa, Isa. 58; ergo etabilia aliqua dicuntur secundum causam superiorem, et non secundum causam inferiorem.

3. Praeterea, multa in rebus inferioribus accidunt quae causae inferioris potentiae non subjacent: sicut creatio animarum, justificatio impii, et alia hujusmodi; ergo si possibile diceretur aliquid secundum causas inferiores, haec impossibilia iudicarentur, quod falsum est.

Sed contra. Deus omnia potest, secundum illud Sap. 11, « Misereris omnium, quoniam omnia potes. » Si ergo aliquid dicatur possibile secundum causam superiorem et non secundum causam inferiorem, omniaabilia dicentur, et nihil impossibile.

Praeterea, a necessitate divinae scientiae, non iudicantur ea quae sciuntur a Deo. esse necessaria; ergo nec a potentia divina iudicantur ea quae potest,abilia.

Respondeo. Dicendum quod possibile dupliciter dicitur, sicut dictum est: absolute et respective. Absolute quidem dicitur aliquid possibile, ex habitudine praedicti ad subjectum, inter quae non est repugnantia, et non secundum causam superiorem vel inferiorem. Respective autem dicitur aliquid possibile per respectum ad causam proximam, ejus conditiones effectus imitatur. Effectus ergo illi qui habent causam proximam aliquam creaturam, iudicantur posibles vel impossibiles secundum res-

pectum ad causam inferiorem. Illi vero qui habent solum Deum causam, iudicantur posibles vel impossibiles, secundum respectum ad causam superiorem.

Ad primum ergo dicendum, quod a potentia Dei iudicantur aliquaabilia absolute sicut a propria mensura; non autemabilia respective, sed per respectum ad causam proximam.

Ad secundum dicendum, quod impossibile importat ordinem ad actum sive effectum. Secundum autem ordinem quem Deus rebus instituit, effectus suis causis proximis subsunt, quamvis aliquando aliter praeter illum ordinem Deus operetur. Et ideoabilitas effectus semper respicit causam proximam; sed eventus non semper.

Ad tertium dicendum, quod ratio ista procedit de his, quae solus Deus facere potest.

DISTINCTIO XLIII.

Quidam de sensu suo gloriantes etc. (V. edit. nostrae tom. VI, pag. 546.)

QUAESTIO UNICA.

Illic quaeruntur quatuor: 1.º utrum Deus possit non facere quae facit; 2.º utrum possit facere quae non facit; 3.º utrum potentia sua sit infinita; 4.º utrum Deus possit facere quod sint infinita actu.

ARTICULUS I.

Ad primum sic proceditur. Et 1. videtur quod Deus non possit non facere quae facit. Omne enim quod agit ex necessitate naturae, non potest non facere quod facit: sed Deus est hujusmodi agens: agit enim per essentiam suam, quae est ejus natura; ergo Deus non potest non facere quae facit.

2. Praeterea, justitia determinatur ad unum sicut et natura; quia, secundum Tullium, virtus est in modum naturae rationi consentanea; sed Deus operatur per justitiam, et non aliter; ergo ejus operatio est determinata ad unum: et ita quod facit non potest non facere.

3. Praeterea, nulla causa necessaria in causando potest non facere quod facit; sed Deus est talis causa, alias omnes aliae causae essent contingentes, cum effectus necessarius non possit esse nisi a causa necessaria; ergo Deus non potest non facere quae facit.

Sed contra. Omne agens per voluntatem potest non facere quae facit; sed Deus est agens per voluntatem, ut patet per illud Psalm. 134: « Omnia quaecumque voluit Dominus fecit; » ergo Deus potest non facere quod facit.

Praeterea, omne agens quod non potest non facere quod facit, semper facit suum effectum; si ergo Deus non potest non facere quod facit, ab aeterno creaturam fecisset, quod est haereticum.

Respondeo. Dicendum, quod sicut supra dictum est, aliquid implicat contradictionem dupliciter. Uno modo absolute. Alio modo respective. Non esse autem multa eorum quae facit Deus, non implicat contradictionem absolute. Nec iterum per respectum ad potentiam Dei. Non enim repugnat quod Deus possit hoc facere, et possit hoc non facere. Similiter nec per respectum ad effectum divinum: quia non repugnant haec duo, creaturam esse, et (1)

(1) *At. videtur non.*

posse non esse; cum omnis creatura, quantum est de se, sit potens non esse. Implicat autem contradictionem per respectum ad scientiam vel voluntatem divinam, quae etiam sunt divini effectus causa. Haec enim repugnant, quod Deus sciat vel velit aliquid esse, et non sit, propter certitudinem divinae scientiae et efficaciam voluntatis. Cum ergo dicitur Deum posse non facere id quod facit, quia in se repugnantiam non habet, simpliciter concedendum est quod Deus potest non facere quod facit, si nihil addatur; eo quod non facere non habet repugnantiam ad aliquid in loquutione positum. Addita autem scientia vel voluntate, erit loquutio vera in sensu diviso, falsa in sensu composito; ut si dicatur, Deus potest non facere quod scit vel quod vult se facere.

Ad primum ergo dicendum, quod Deus per essentiam suam agit; et tamen non agit ex necessitate naturae, sed ex proposito voluntatis. Nam essentia sua non solum natura est, sed voluntas.

Ad secundum dicendum, quod productio creaturarum est ex Deo, non secundum aliquod debitum, sed secundum voluntatem ejus, quae ordinem convenientem rebus imponit, in quo ratio justitiae consistit. Sic ergo hoc modo distinguendum est, si in praedicta loquutione addatur justitia, sicut si addatur voluntas: ut dicamus quod haec loquutio, Deus non potest non facere quod justum est fieri, est vera in sensu composito, falsa in sensu diviso.

Ad tertium dicendum, quod Deus est causa necessaria in creando; quia positae omnibus quae in eo ad creandum occurrunt, de necessitate sequitur effectus; inter quae unum est voluntas, quae non determinatur ad unum; et ideo Deus potest non facere quod facit.

ARTICULUS II.

Ad secundum sic proceditur. Et 1. videtur, quod Deus non possit facere quod non facit. Optimi enim, secundum Platonem, est optima adducere; sed quod per superabundantiam dicitur, uni soli convenit; ergo uno solo modo mundum a Deo fieri est possibile; non ergo potest alia facere quam facit.

2. Praeterea, Augustinus sic argumentatur. Si Deus potest, et non voluit, invidus fuit; sed invidia longe est a Deo; ergo quicquid boni potuit in mundo facere fecit, quia quicquid voluit fecit.

3. Praeterea, Deus non potest facere nisi quod vult facere; sed non vult facere nisi quod ab aeterno voluit: quod autem ab aeterno voluit, non potest non velle; ergo Deus non potest facere nisi quod facit.

Sed contra. Quicquid Deus facit, creatum est. Si ergo Deus non potest facere nisi quod facit, creatura adaequat potentiam creatoris: quod est contra Hugonem de Sancto Victore, qui dicit quod potentiam Dei non adaequat opus.

Praeterea, Deus potest facere omne id quod potest cogitari, ut supra dictum est: sed multa possunt cogitari quae Deus non fecit, utpote corvos albos; ergo potest facere aliqua quae non facit.

Respondeo. Dicendum, quod nullius sapientis voluntas ad impossibile nititur. Impossibile autem est ut effectus divini adaequentur bonitati divinae, cum essentiae Dei non possit esse alia essentia aequalis in bonitate, quae sit bonitas pura. Unde non est voluntas Dei quod omnia sint quaecumque bo-

nitatem ejus imitari possibile est; quia cum infinitis modis possit imitari divina bonitas, effectus divini bonitati divinae aequarentur; sed quod sint aliqua quae secundum aliquos modos divinam bonitatem imitantur. Et quia illi modi non aequantur divinae bonitati, ideo multi alii modi sunt quibus potest divina bonitas communicari quam sit communicata. Cum ergo potentia Dei se extendat ad omnia quae in se sunt possibiliter esse, patet quod absolute loquendo, Deus potest multa facere quae non facit. Si autem addatur aliquid pertinens ad scientiam vel voluntatem vel justitiam, distinguendum est, sicut et prius.

Ad primum ergo dicendum, quod optimum dupliciter dicitur. Uno modo absolute; et sic id quod fit, non potest esse optimum. Alio modo in genere aliquo determinato, vel secundum aliquem modum determinatum; et sic Deus optimum fecit unumquodque in sua natura, et in suo modo essendi: et sic non sequitur quod non potuerit alias naturas vel alios modos essendi facere.

Ad secundum dicendum, quod Augustinus hoc argumento utitur ad probandum aequalitatem Filii, quae ei debetur ex ipsa filiationis ratione; unde non tenet in creatoris, quae a Deo secundum debitum non procedunt.

Ad tertium dicendum, quod cum dicitur, Deus non potest facere nisi quod vult facere, si intelligatur composita, vera est. Non enim potest esse quod Deus faciat aliquid, et non velit illud facere. Si autem intelligatur divisa, falsa est.

ARTICULUS III.

Ad tertium sic proceditur. Et 1. videtur quod potentia Dei non sit infinita. Quanto enim potentia est major, tanto in minori tempore movet; si ergo potentia Dei est infinita, oportet quod moveatur in instanti, quod est impossibile.

2. Praeterea, potentia proportionatur essentiae a qua procedit; sed essentia Dei non est infinita, cum sit simplex; ergo nec potentia.

3. Praeterea, infinitum, secundum Philosophum in 5 Physicorum, imperfectum est; sed potentia Dei est perfectissima; ergo non est infinita.

Sed contra. Omni finito potest intelligi aliquid aequale; si ergo potentia Dei non sit infinita, poterit intelligi aliqua alia potentia quae est ei aequalis: quod est inconveniens.

Praeterea, illud quod omnia finit, non potest esse finitum: sed per potentiam Dei omnia intra suos fines collocantur; ergo potentia Dei non est finita, sed infinita.

Respondeo. Dicendum, quod duplex est quantitas. Una intensiva quae proprie in incorporeis rebus est, quibus, secundum Augustinum, idem est esse majus quod melius: alia est quantitas extensiva quae in continuam et discretam dividitur. Utraque autem quantitas in potentia considerari potest. Prima quidem secundum ipsam essentiam potentiae. Secunda vero quantum ad ejus objecta. Secundum autem utranque quantitatem, potentia Dei dicitur infinita. Intensive quidem, propter perfectionem suae actualitatis, quam activa potentia consequitur. Est enim Deus aetus perfectus, in se omnia comprehendens, quae ad perfectionem pertinere possunt. Extensive autem, quia potest in omnia secundum quae bonitas divina communicabilis est; quod est infinitum.

ais modis; et ideo Dei potentia est simpliciter infinita.

Ad primum ergo dicendum, quod ratio illa procedit de potentia in magnitudine, quae est virtus corporalis: haec enim si non esset infinita, ageret in tempore, utpote agens ex necessitate naturae. Divina autem potentia determinat tempus suae actioni pro suae voluntatis arbitrio.

Ad secundum dicendum, quod essentia Dei non est infinita extensive (1), quia infinitum excedit eujuslibet rei alterius perfectionem: unde etiam et ejus potentia hoc modo erit infinita.

Ad tertium dicendum, quod obiectio illa procedit de infinito privative dicto, quod imperfectionem importat, sicut et quaelibet privatio. In divinis autem dicitur infinitum negative, non privative.

ARTICULUS IV.

Ad quartum sic proceditur. Et 1. videtur quod Deus possit facere infinita simul actu. Deus enim potest reducere in actum omne illud quod est potentia in materia: sed in potentia materiae sunt infinita, ut patet per Philosophum 5 Physicorum; ergo Deus potest facere infinita actu.

2. Praeterea, scientia Dei est infinitorum, ut Augustinus dicit, 12 de Civitate Dei. Sed Deus per suam scientiam est causa rerum. Cum ergo scientia unius rei non impediatur in causando scientiam alterius rei, videtur quod Deus possit facere infinita in actu.

3. Praeterea, plus potest Deus facere quam homo potest intelligere: sed aliqui philosophi posuerunt esse infinita in actu, sicut Democritus et Anaxagoras; ergo Deus potest facere infinita actu.

Sed contra. Deus potest facere majus omni eo quod facit, quia ejus potentiam non adaequat opus, ut dicit Hugo de Sancto Victore; sed infinita materia in actu, non potest esse aliquid majus; ergo non potest esse quod Deus faciat infinita in actu.

Praeterea, omne illud cujus ratio compleatur in materia cum privatione, non potest in actu esse, quia nihil est in actu nisi secundum quod est sub forma: sed infinitum est hujusmodi, ut patet in 5 Physicorum; ergo infinitum in actu esse non potest.

Respondeo. Dicendum, quod Deus non potest facere aliquid esse in actu, cujus ratio contrarietur facto in quantum est factum, vel enti in actu in quantum est ens actu. Factum (2) autem, in quantum est factum, contrariatur quod sit aequale Deo: unde Deus non potest facere aequale sibi: et sic non potest facere aliquid quod sit modis omnibus infinitum, et quantum ad extensionem, et quantum ad intensionem. Existenti vero in actu, in quantum hujusmodi, repugnat esse infinitum, non solum per se, ut quidam dicunt, sed etiam per accidens, vel quocumque modo. Non enim potest esse aliquid in actu ens in genere, quod non determinetur ad aliquam speciem. Oportet autem, id quod ponitur infinitum, esse in genere quantitatis: unde oportet quod si sit actu, quod sit in aliqua specie quantitatis: quae quidem distinguuntur secundum determinatas mensuras; ut patet in numero, cujus species sunt binarius et ternarius; et in quantitate continua, cujus quasi species sunt bicubitum et tricubitum. Esse ergo aliquam quantitatem in actu vel continuam vel discretam, repugnat ei quod est

esse infinitum. Et ideo Deus non potest facere quod aliquid actu sit simpliciter infinitum, vel intensive, vel extensive, sive secundum quantitatem continuam, sive secundum discretam.

Ad primum ergo dicendum, quod Deus potest facere in actu quicquid est potentia in materia: non ita quod simul sit actu, sed successive, propter repugnantiam infiniti et existentis in actu, ut dictum est.

Ad secundum dicendum, quod licet scientia Dei sibi non repugnet in creando, est tamen repugnantia ex parte effectus, ut dictum est.

Ad tertium dicendum, quod philosophi ponentes infinitum actu, propriam vocem ignoraverunt, quia eorum positio sibi repugnat, ut ex dictis patet.

DISTINCTIO XLIV.

Nunc illud restat discutendum etc. (V. edit. nostrae tom VI, pag. 552.)

QUAESTIO UNICA.

Hic quaeruntur quatuor: 1.º utrum Deus potuerit facere universum melius quam sit; 2.º utrum quamlibet rem secundum se potuerit facere meliorem; 3.º utrum potuerit facere meliori modo; 4.º utrum quicquid potuerit, possit modo.

ARTICULUS I.

Ad primum sic proceditur. Et 1. videtur quod Deus non potuerit universum facere melius. Optimo enim nihil potest esse melius: sed universum est optimum, ut patet per illud quod dicitur Gen. 1: « Vidit Deus cuncta quae fecerat, et erant valde bona; » ergo universo non potest esse melius.

2. Praeterea, omne quod est communicabile creaturae est ei communicatum. Cum enim bonitas Dei infinita sit, ad eam pertinet, ut communique se quantumcumque potest: sed ex hoc universum est bonum, quod consistit ex creaturis divinam bonitatem participantibus; ergo universum melius esse non potest.

3. Praeterea, omni agenti propter finem, finis est ratio facendi et non faciendi: sed Deus agit propter finem, qui est sua bonitas, quae non potest esse ratio non faciendi universum in meliori bonitate, si melius esse posset; ergo Deus non potuit universum melius facere.

Sed contra. Omni finito Deus potest facere majus, cum sua potentia sit infinita, ut dictum est: sed bonitas universi est finita, alias aequaretur bonitati factoris, quod est impossibile; ergo Deus potest facere majorem bonitatem quam sit bonitas universi.

Praeterea, Hugo de S. Victore dicit, quod potentiam divinam non adaequat opus. Sed universum est opus Dei; ergo potentia Dei excedit totum universum: et sic potest aliquid aliud melius de toto universo facere.

Respondeo. Dicendum, quod sicut supra dictum est, contra rationem facti est, ut sit aequale factori: ratione cujus Deus non potest facere aliquid aequale sibi ipsi. Ergo universum, quod est a Deo factum, non participat bonitatem divinam perfecte, sed secundum aliquem modum et mensuram determinatam. Possumus ergo de universo loqui dupliciter.

(1) *Supple sed intensive.*

(2) *Lege facto.*

Uno modo absolute: et sic Deus potest aliquid facere melius toto universo: quia et ordo ejus ad Deum esset melior, quanto perfectius divinam bonitatem participaret; et ordo rerum adinvicem, quanto res essent meliores. In hoc enim duplici ordine bonum universi consistit, ut dicitur 9 Metaphysicae. Alio modo per respectum ad modum participandi divinam bonitatem, qui est universo a Deo praefixus: et sic universum melius esse non potest ordinatum, supposita scilicet mensura divinitus fixa; et secundum hunc modum dicitur universum esse optimum, vel Deus fecisse omnia valde bona. Unde patet responsio ad primum.

Ad secundum dicendum, quod multa sunt communicabilia creaturae quae non sunt communicata: et tamen Deus infinita bonitate creaturis communicat bona sua. Communicat enim eis, secundum quod ratio sapientiae exigit, secundum respectum ad modum quem divina bonitas praefixit.

Ad tertium dicendum, quod licet absolute loquendo divina voluntas non possit esse ratio quare universum non fiat melius; tamen potest esse ratio ejus, si praesupponatur modus a voluntate divina praefixus. Hoc enim divinae competit voluntati ut illud sit in rebus quod divina sapientia et voluntas determinat.

ARTICULUS II.

Ad secundum sic proceditur. Et 1. videtur Deus non possit facere aliquid melius qualibet re quam facit, secundum se considerata. Tanto enim aliquid est melius, quanto Deo propinquius. Sed natura humana in Christo nihil potest Deo esse propinquius; ergo Deus nihil poterit ea facere melius.

2. Praeterea, quanto aliquid est purius, tanto est melius: sed Anselmus dicit in lib. de Concep. Virg., quod decuit ut beata Virgo ea puritate niteret, quia major sub Deo nequit intelligi; ergo Deus non potest facere ea aliquid melius.

3. Praeterea, ut dicitur in lib. de Causis: « Deus aequaliter se habet ad omnia, sed omnia non aequaliter ad ipsum; » tantum ergo unaquaeque creatura de Dei bonitate recipit, quantum recipere potest; non ergo potest esse melior quam sit: nihil ergo Deus potest melius facere quam sit.

Sed contra. Inter quaelibet infinite distantia, possunt esse multa media; sed optima creatura distat a Deo in infinitum; ergo possunt esse aliqua media inter creaturam illam et Deum: et ita Deus potest facere aliquid melius omni creatura.

Praeterea, quicquid potest facere virtus inferior, potest facere Deus: sed virtus naturalis potest facere aliquid melius quam sit; ergo multo magis Deus.

Respondeo. Dicendum, quod duplex est creaturae bonitas: una accidentalis et alia essentialis: sicut hominis accidentalis bonitas consistit in scientia et virtutibus et aliis hujusmodi: bonitas vero ejus essentialis consistit in hoc, quod habet sensum et rationem. Bonitatem ergo accidentalem cujuslibet rei, Deus potest facere meliorem etiam manente re; quia talis bonitas est finita, et eam res secundum suam speciem non requirit. Bonitate vero essentialis, cujuslibet creaturae, cum sit finita, potest aliquam bonitatem majorem facere; non tamen in eadem re, sed in alia alterius speciei, quia mutatio bonitatis speciem variat.

Ad primum ergo dicendum, quod natura hu-

mana dupliciter potest considerari, secundum Damascenum. Uno modo secundum quod per intellectum separatur a divinitate; et sic secundum ipsum est servilis et defectibilis, in quantum est creatura quaedam: unde sic potest Deus facere aliam creaturam ea meliorem. Alio modo secundum quod est unita divinitati in persona; et sic Deus nihil potest facere melius Christo.

Ad secundum dicendum, quod purius dicitur aliquid per recessum a termino, melius per accessum ad terminum. Illud ergo quod omnino recedit ab impuritate culpae, est ita purum, quod nihil potest esse eo purius: non tamen sequitur quod non possit eo aliquid esse melius, nisi acciperemus puritatem ab omni defectu et imperfectione: sic autem non loquitur Anselmus.

Ad tertium dicendum, quod creatura participat divinam bonitatem, secundum mensuram suae capacitatis, quam ei divina sapientia et voluntas praefixit. Potest autem praefigere majorem; et sic plus de divina bonitate participaret.

ARTICULUS III.

Ad tertium sic proceditur. Et 1. videtur quod illud quod Deus facit non possit facere modo meliori. Sicut enim in litera dicitur, fuit alius modus nostrae liberationis Deo possibilis, sed nullus convenientior. Sed quanto aliquid est melius, tanto convenientius. Ergo Deus non potest meliori modo facere nostram liberationem, et eadem ratione nec aliquid aliud.

2. Praeterea, tanto aliquid fit melius quanto directius consequitur suum finem: sed finis cujuslibet creaturae est participatio divinae bonitatis secundum modum sibi praefixum, quem res quaelibet totaliter attingit: alias divina ordinatio falleretur; ergo Deus non potest facere meliori modo res quam facit.

3. Praeterea, modus operationis attestatur bonitati facientis. Justus enim est qui operatur juste, secundum Philosophum in 2 Ethic. Sed bonitate Dei nihil potest esse melius; ergo nec modo quo res facit, potest esse aliquis modus melior.

Sed contra. Anselmus in lib. de Natura boni dicit, quod secundum quantitatem bonitatis rei est quantitas modi speciei et ordinis: sed potest bonitate creata Deus aliam facere meliorem; ergo et modo quo facit res, potest aliquis modus esse melior.

Praeterea, modus rei a Deo factae quaedam creatura est, et ita est bonitatis finitae: ergo tali modo potest esse aliquis alius modus melior.

Respondeo. Dicendum, quod operatio media est inter operantem et operatum, ad minus secundum modum intelligendi. Modus ergo quo Deus facit res, potest intelligi dupliciter. Uno modo ex parte illa, qua operatio exit ab operante; et sic non potest Deus meliori modo facere res quam facit, quia modus ille sequitur bonitatem et sapientiam facientis, quae est infinita: alio modo ex parte facti: et sic, absolute loquendo, Deus potest facere res meliori modo quam facit, quia potest eis meliorem modum essendi tribuere: sed ex suppositione divini ordinis, qua unicuique finem certum praefixit, non potest fieri meliori modo. Et ex hac suppositione procedit prima et secunda ratio. Tertia vero de modo ex parte operantis: aliae duae de modo ex parte facti absolute. Unde patet solutio ad objecta.

ARTICULUS IV.

Ad quartum sic proceditur. Et 1. videtur quod Deus non possit quicquid olim potuit. Potuit enim Deus ab aeterno non praedestinare Petrum, quia voluntarie eum praedestinavit: sed modo non potest eum non praedestinasse: quia non potest esse quod aliquis sit non praedestinatus, postquam fuit praedestinatus; ergo Deus non potest quicquid potuit.

2. Praeterea, Deus potest facere quod Adam nullo tempore esset: sed hoc modo non potest, quia quod fuit non potest non fuisse: ergo Deus non potest quicquid potuit.

3. Praeterea, Deus potuit facere mundum istum qui modo est, quia fecit: modo autem non potest eundem facere, quia quod est non fit; ergo Deus non potest quicquid olim potuit.

Sed contra. Sicut Deus fuit omnipotens, ita et nunc est. Sed de ratione omnipotentiae est, ut simpliciter omnia possit; ergo Deus potest quicquid potuit.

Praeterea, omne agens ejus virtus in agendo non minuitur, potest quicquid potuit.

Respondeo. Dicendum, quod in hoc potentia et scientia differunt, quia scientia respicit res secundum quod sunt in cognoscente, potentia vero respicit res secundum quod exeunt a potestate, ut in seipsis existant. Unde enunciabile, quod est res rationis, se habet ad scientiam nostram ut medium quo res cognoscuntur: sed ad potentiam hujusmodi habitudinem non habet. Unde potentia non respicit enunciabile, nisi secundum rationem rei quam significat. Et ideo si res una per diversa enunciabilia significetur, idem possibile simpliciter judicatur. Sed in scientia diversitas enunciabilium modum scientiae nostrae variat, quamvis non divinae, ut supra dictum est. Loquendo ergo de potentia Dei per respectum ad rem quae significatur, cum dicitur, Deus potest hoc vel illud, aut potuit; dicendum, quod iste respectus potest variari dupliciter. Uno modo ex parte potentis: sicut caecus non potest videre, qui prius poterat videre: et secundum hunc modum Deus potest quicquid potuit: quia cujuscumque rei potentiam habuit, habet. Alio modo ex parte possibilis: et sic potest concedi quod Deus non potest aliquid quod potuit; quia hoc non habet rationem possibilis quod prius habebat. Ex quo enim aliquid in praeteritum transit, rationem possibilis amittit, quia potentia activa respicit praesens vel futurum.

Ad primum ergo dicendum, quod actus praedestinationis nunquam transit in praeteritum, cum mensuretur aeternitate: unde semper eodem modo se habet ad divinam potentiam, scilicet ut possibile non esse absolute, et ut impossibile non esse ex suppositione quod sit, propter immutabilitatem divini propositi. Aliae duae rationes procedunt de eo, quod jam in praeteritum transivit, et ita possibilis rationem amisit: unde patet solutio ex dictis.

DISTINCTIO XLV.

Jam de voluntate Dei etc. (*V. edit. nostrae tom. VI, pag. 557.*)

QUAESTIO UNICA.

Hic quaeruntur quatuor: 1.^o utrum in Deo sit voluntas; 2.^o utrum voluntas Dei sit causa rerum;

3.^o utrum voluntatis divinae ratio sit quaerenda; 4.^o utrum voluntas beneplaciti distinguatur contra voluntatem signi.

ARTICULUS I.

Ad primum sic proceditur. Et 1. videtur quod in Deo voluntas non sit. Voluntas enim est appetitus quidam: sed appetitus Deo non convenit, cum imperfectionem importet. Est enim rei non habitae, secundum Augustinum; ergo voluntas in Deo non est ponenda.

2. Praeterea, in Deo nihil est, ejus sit accipere aliquam causam: sed voluntas dicit respectum ad aliquam causam, scilicet finalem, quae est ejus objectum; ergo voluntas in Deo ponenda non est.

3. Praeterea, illud quod se habet ad opposita, in Deo esse non potest, cum sit mutabile: sed voluntas se habet ad opposita; ergo voluntas in Deo poni non potest.

Sed contra. Beatitudo Deo praecipue competit: sed beatitudo non est sine voluntate; quia secundum Augustinum, beatus est qui habet quicquid vult, et nihil mali vult; ergo in Deo est voluntas.

Praeterea, voluntas est principium laudabilium operationum: sed Deus propter sua opera laudandus est a nobis; ergo voluntas est in Deo.

Respondeo. Dicendum, quod cum Deus sit prima rerum causa, oportet in eo ponere illud, quod inter cetera magis habet rationem causae. Hoc autem est voluntas. Nam in hoc voluntas et natura differunt in causando: quod natura est causa determinati effectus: sed determinationis actus sui ad talem effectum ipsa non est causa, sicut non est causa sui ipsius. Ex hoc enim quod talis natura est, ad talem effectum determinatur. Voluntas autem non solum effectus determinati causa est, sed etiam habitudinis suae actionis ad determinatum effectum; quia in potestate voluntatis est hunc vel illum effectum agere. Propter quod sola ea quae voluntatem habent, dicuntur agere, quasi plenam potestatem et dominium habentia super suos actus: alia vero dicuntur magis agi. Et propter hoc in Deo est voluntas.

Ad primum ergo dicendum, quod nihil prohibet rationem speciei competere, et non rationem generis, quia ratio generis imperfectionem importat, ratione cujus in Deo ponimus voluntatem, non autem, proprie loquendo, appetitum.

Ad secundum dicendum, quod ratio illa procederet, si voluntas Dei haberet aliquam finem praeter seipsum. Ipsa enim divina bonitas est divinae voluntatis finis. Unde sicut Deus principaliter cognoscit essentiam suam, et alia in ipsa, ita voluntas Dei principaliter fertur in bonitatem suam, et in alia ratione ipsius, in quantum ad ejus bonitatem participandam ordinantur.

Ad tertium dicendum, quod voluntas Dei non se habet ad opposita per modum receptionis, sed per modum actionis. Et ideo non sequitur quod sit mutabilis, sed rerum mutativa.

ARTICULUS II.

Ad secundum sic proceditur. Et 1. videtur quod voluntas Dei non sit causa rerum. Quanto enim causa aliqua est prior, tanto est simplicior: simplicior autem est causa ea quae agit per natu-

ram, quam per voluntatem. (Nam voluntas naturam praesupponit.) Cum ergo Deus sit causa prima, videtur quod agat per naturam, non per voluntatem; et ita voluntas non est causa rerum, sed ipsa natura.

2. Praeterea, illud in Deo proprie est rerum causa, quod rationem principii habet; haec autem est potentia et voluntas in quantum hujusmodi; ergo causalitas rerum magis potentiae quam voluntati debet attribui.

3. Praeterea, effectus procedunt ab agente, secundum ejus similitudinem: sed similitudines rerum in Deo ad scientiam pertinent, et non ad voluntatem; ergo magis causalitas rerum scientiae, quam voluntati debet attribui.

4. Praeterea, a causa contingenti non potest procedere effectus necessarius. Sed in rebus causatis sunt multi effectus necessarii; ergo non possunt procedere a voluntate, quae est causa contingens, cum sit ad utrumlibet.

Sed contra est quod in Psalm. 134 dicitur: « Omnia quae voluit Dominus fecit. »

Praeterea, Dionysius dicit, de Divinis nominibus, quod divinus amor non permisit eum sine germine esse: sed amor ad voluntatem pertinet; ergo causalitas rerum voluntati principaliter debet attribui.

Respondeo. Dicendum, quod cum forma sit principium agendi, secundum hunc modum aliquid agit quo forma rei factae est apud ipsum: quod contingit dupliciter. Uno modo secundum esse naturae, sicut albedo est in lapide: alio per modum intentionis, sicut albedo in pupilla, et ulterius in intellectu: inter quos modos haec est differentia: quia forma secundum esse naturae alicui inhaerens, determinatum esse ibi habet, respondens propriae rationi illius formae: sed forma in intellectu non habet aliquod esse determinatum, quod respondeat ipsi formae: sed in quadam universalitate est ibi. Et ideo oportet quod omne agens in quo existit forma facti, per modum intelligibilem, sit agens indeterminatum, in hunc vel illum effectum, quod competit agenti per voluntatem. E contrario est de agente quod habet formam facti, secundum esse naturae. Et quia formae creaturarum sunt in Deo, non sicut in propria natura existentes, sed per modum intelligibilem, ideo Deus agit res per voluntatem: et sic causalitas rerum voluntati attribuitur.

Ad primum ergo dicendum, quod in Deo invenitur duplex origo. Prima quidem naturae, secundum quam Filius oritur a Patre: sed hoc non habet rationem causae et causati. Secunda, voluntatis prout creatura a Deo procedit: et in hac invenitur ratio causae et causati: quia, ut dictum est supra, voluntas est causa quod determinetur ad talem effectum, non autem natura. Nec tamen haec ratio derogat simplicitati causae primae quod per voluntatem agit; quia in Deo voluntas est idem quod natura.

Ad secundum dicendum, quod in agente per voluntatem, potentia se habet ut principium exequens, sed voluntas est quae imperat. Et ideo sicut primae causae, causalitas ei magis attribuitur.

Ad tertium dicendum, quod similitudo rei quae est in sciente, ratione suae universalitatis, non habet de se sufficienter rationem causae ad aliquem determinatum effectum, quem oportet esse particularem; sed per voluntatem determinatur ad particula-

rem effectum formae universalis. Et ideo causalitas magis attribuitur voluntati quam scientiae.

Ad quartum dicendum, quod licet voluntas Dei se habeat ad utrumlibet, tamen ratione suae immutabilitatis, necessitatem praestat rebus causatis. Et ideo non est causa contingens.

ARTICULUS III.

Ad tertium sic proceditur. Et 1. videtur quod voluntatis divinae ratio quaerenda sit. Cujuslibet enim sapientis voluntas, sapientia regulatur: sed in his quae per sapientiam fiunt, ratio invenitur; ergo voluntatis Dei causa sive ratio quaerenda est.

2. Praeterea, voluntas Dei non potest esse nisi justa. Sed justitia aliquam rationem respicit in his quae facit; ergo voluntatis Dei aliquam causam vel rationem oportet assignare.

3. Praeterea, cognita causa cognoscitur effectus: si ergo, non oportet aliam causam quaerere in rebus creatis nisi divinam voluntatem, videtur quod quilibet de facili possit omnia scire; cum planum sit de omnibus quae sunt, quod Deus velit ea esse; et sic superfluum esset addiscere scientias, in quibus aliae rerum causae inquiruntur.

Sed contra. Causae primae non est causa quaerenda: sed voluntas Dei est prima omnium causa; ergo voluntatis Dei non est causa quaerenda.

Praeterea, majorem potestatem habet Deus in universo, quam princeps in regno: sed in regno terreno, quod principi placuit legis habet vigorem; ergo multo fortius voluntas Dei sufficit ad hoc, quod aliquis effectus fiat; nec oportet aliam causam quaerere.

Respondeo. Dicendum, quod voluntas divina dupliciter considerari potest. Uno modo secundum respectum quem habet ad Deum volentem: et ex parte ista non habet aliquam causam, quae ab ipsa realiter differat; sed secundum modum intelligendi bonitas Dei se habet ad voluntatem Dei ut movens, sapientia ut dirigens. Alio modo potest considerari secundum respectum quem habet ad effectus volitos; et ex parte voluntatis divinae potest causa vel ratio assignari. Sicut enim creatura unaquaeque, ita et creaturarum ordo, subjacet voluntati divinae. Vult ergo unam creaturam esse causam alterius; et sic potest dici quod vult hoc propter illud.

Ad primum ergo dicendum, quod ratio illa procedit secundum primum modum, ut per se patet.

Ad secundum dicendum, quod prima regula justitiae est divina sapientia. Et ideo eadem ratio est de sapientia et justitia.

Ad tertium dicendum, quod ad scientiam effectus, oportet scire omnes causas, non solum remotas, sed etiam proximas; et ideo non sufficit ad scientiam de creaturis habendam, scire quod Deus vult eas esse; sed oportet etiam alias causas quaerere. Hoc tamen in vanitatem reputatur illis Philosophis, qui postposita voluntate Dei, solas causas inferiores quaerebant, de quibus Sap. 15, dicitur: « Vani sunt omnes homines, in quibus non subest scientia Dei. »

ARTICULUS IV.

Ad quartum sic proceditur. Et 1. videtur quod voluntas beneplaciti, contra voluntatem signi distinguere non debeat. Sicut enim in creaturis sunt

signa divinae voluntatis, ita scientiae et potentiae: nam ex magnitudine creaturae ostenditur Deus potens, et ex ordine, sapiens, ut habetur in Glossa Rom. 1. Sed potentiae et sapientiae non assignantur aliqua signa; ergo nec voluntatis.

2. Praeterea, aut illud quod Deus vult voluntate signi, vult voluntate beneplaciti, aut non; si non, signum erit falsum, cui signatum non respondet: si autem vult; ergo voluntas signi non debet a voluntate beneplaciti distingui.

3. Praeterea, unius signati unum debet esse signum: sed voluntas Dei est una et simplex; ergo non debent ei plura signa assignari.

4. Praeterea, illa quae se invicem consequuntur, non debent contra invicem distingui; sed voluntas beneplaciti et Dei operatio se consequuntur, quia « omnia quaecumque voluit fecit, » ut in Psalm. 134 dicitur; ergo operatio non debet inter signa voluntatis poni, quae contra voluntatem beneplaciti distinguuntur.

5. Praeterea, sicut est invenire bonum et melius, ita malum et pejus. Sed respectu boni et melioris, sunt duo signa voluntatis, scilicet consilium et praeceptum; ergo debent duo assignari respectu mali et peioris.

Respondeo. Dicendum, quod aliquid dicitur de Deo dupliciter. Uno modo secundum proprietatem, sicut spiritualia, ut sapientia, bonitas et huiusmodi. Alio modo metaphorice, sicut materialia. Quia ergo voluntas in nobis, et spiritualis est, et materialis, materialem passionem habet annexam, ideo utroque modo de Deo dicitur. Secundum quidem quod proprie de Deo dicitur voluntas, sic vocatur voluntas beneplaciti, quia vere et proprie loquendo aliquid vult voluntate beneplaciti. Secundum vero quod dicitur metaphorice, sic ea quae in nobis solent esse voluntatis effectus et signa, dicuntur Dei voluntas: propter hoc quod dicitur voluntas signi: sicut et id quod in nobis solet esse signum irae, scilicet punitio, in Scriptura metaphorice ira Dei nominatur. Est autem in nobis duplex signum, voluntatis accipere: uno modo quo ad prosecutionem boni; alio modo quo ad fugam mali. Quantum ad bonum, assignatur quidem voluntatis signum, secundum quod impetum facit ad opus, operatio Dei in nobis; secundum vero quod de agendis disponit, consilium et praeceptum. Sed consilium respectu eorum sine quibus finis haberi potest, sed non ita bene et congrue; praeceptum vero respectu eorum sine quibus finis haberi non potest. Sed quantum ad malum etiam est duplex signum. Malum enim quandoque impeditur, et sic est prohibitio; quandoque non impeditur, et sic est permissio.

Ad primum ergo dicendum, quod voluntatis divinae signa assignantur, non ad ostendendum quod Deus sit volens absolute, sed quod sit volens hoc vel illud. Et ideo scientiae vel potentiae signa non ostenduntur, sed voluntatis. Nam Deus omnia scit et potest; sed non omnia vult.

Ad secundum dicendum, quod sicut punitio non fit ad hoc a Deo ut ostendat se iratum, ita nec praeceptum ad hoc fit ut ostendat se volentem: propter quod non est signum falsum, quamvis Deus aliquid praecepiat, quod tamen non vult voluntate beneplaciti. Non enim dicuntur voluntatis signa quia adhibentur ad signandum Deum velle, sed quia in nobis solent esse signa volendi.

S. Th. Opera omnia. V. 22.

Ad tertium dicendum, quod voluntas non est causa determinata ad unum effectum. Et ideo non oportet unum solum signum ejus accipere.

Ad quartum dicendum, quod quamvis operatio Dei nunquam repugnet voluntati beneplaciti, tamen differt a voluntate beneplaciti, differentia temporalis ab aeterno. Nam operatio temporalis, voluntas vero beneplaciti aeterna.

Ad quintum dicendum, quod omne malum dicitur per remotionem a fine. Sed non omnia bona eadem ratione ordinantur in finem. Et ideo unum signum voluntatis, sufficit ad mala magna vel parva, non autem ad bona.

DISTINCTIO XLVI.

Hic oritur quaestio etc. (V. edit. nostrae tom. VI, pag. 362.)

QUAESTIO UNICA.

Hic quaeruntur quatuor: 1.^o utrum divina voluntas debeat distingui per antecedentem et consequentem; 2.^o utrum Deus velit omnes homines salvos fieri; 3.^o utrum mala fieri, sit bonum; 4.^o utrum Deus velit mala fieri.

ARTICULUS I.

Ad primum sic proceditur. Et 1. videtur, quod voluntas divina non debeat distingui per antecedentem et consequentem. Motus enim voluntatis sequitur actum cognitionis. Sed actus divinae cognitionis non habet prius et posterius, cum sua cognitio non sit discursiva; ergo non est verum quod Deus velit aliquid antecedenter et consequenter.

2. Praeterea, si in Deo ponitur voluntas antecedens et consequens: aut hoc erit propter ordinem voluntatis, aut propter ordinem volitorum. Sed non propter ordinem volitorum; quia sic voluntas antecedens esset de primis creaturis tantum. Similiter nec propter ordinem voluntatis, cum sit una et simplex; ergo divina voluntas non debet distingui per antecedentem et consequentem.

3. Praeterea, illud quod non potest alio impediri nec mutari, non iudicatur ex alio, sed a seipso tantum. Sed secundum Damascenum, voluntas in Deo dicitur antecedens, quasi ex seipso existens, sed consequens ex causa nostra; ergo videtur quod consequens voluntas, Deo non competat, cum ipso impediri non possit aliunde.

Sed contra est quod dicit Damascenus in 2 libro. « Oportet scire quod Deus antecedenter vult omnes homines salvos fieri, » non autem consequenter.

Praeterea, voluntas per prius est finis, quam eorum quae sunt ad finem. Sed Deus vult aliquid quasi finem, et aliquid quasi ad finem; ergo Deus vult aliquid antecedenter, et aliquid consequenter.

Respondeo. Dicendum, quod in actione alicujus agentis, est aliquid considerare ex parte facientis, et aliquid ex parte facti. Horum duorum, quod est ex parte facientis, prius est. Unde et voluntas divina, quae ejus operationem determinat ad effectum, aliquid respicit ex parte ipsius Dei volentis et facientis, sicut communicationem suae bonitatis vel aliquid huiusmodi; et aliquid ex parte facti, scilicet quod natura vel conditio rei factae requirit. Et quantum ad primum dicitur in Deo voluntas antecedens, quantum ad secundum dicitur voluntas consequens.

Ad primum ergo dicendum, quod Deus non dicitur aliquid antecedenter vel consequenter velle propter ordinem qui sit in actu ejus voluntatis, sed propter ordinem volitorum.

Ad secundum dicendum, quod ordo volitorum a Deo non est in proposito accipiendus secundum diversas creaturas, sed secundum diversa quae ad unam creaturam pertinent. Nam uni et eidem creaturae convenit aliquid ex parte Dei, scilicet totum id quod habet de bono; et aliquid ex parte sui, scilicet defectus: respectu quorum distinguitur voluntas antecedens et consequens, ut dictum est.

Ad tertium dicendum, quod ordo sapientiae hoc requirit, quod voluntas Dei referatur ad rem, secundum ejus conditionem. Et ideo voluntas in Deo consequens ponitur, quamvis Dei voluntas non possit impediri nec immutari a creatura.

ARTICULUS II.

Ad secundum sic proceditur. Et 1. videtur, quod Deus non velit omnes homines salvos fieri. Nihil enim est praedestinatio aliud quam propositum Dei de salute humana. Sed non omnes sunt praedestinati a Deo; ergo ipse non vult omnes homines salvos fieri.

2. Praeterea, voluntas Dei, ut supra dictum est, est prima et summa causa omnium rerum. Posita autem causa ponitur effectus. Si ergo Deus vellet omnes homines salvos fieri, omnes salvarentur; ejus contrarium patet.

3. Praeterea, quaecumque vult Deus salvari, diligit, eum diligere sit velle bonum dilecto: sed Deus aliquos habet odio, secundum illud Malach. 1, « Jacob dilexi, Esau autem odio habui; » et in Psal. 5: « Odisti omnes qui operantur iniquitatem; » ergo Deus non vult omnes homines salvos fieri.

Sed contra est quod Apostolus dicit, 1 Tim. 2: « Qui vult omnes homines salvos fieri. »

Praeterea, magis est proprium divinae voluntati quod est ex parte sua, quam quod est ex parte nostra. Sed secundum Damascenum, Deus, secundum quod est ex ipso, antecedenter vult omnes homines salvos fieri; sed secundum illud quod ex nobis est non vult, inquantum merita aliquorum repugnant; ergo magis est dicendum quod Deus velit omnes homines salvos fieri, quam quod non velit.

Respondeo. Dicendum, quod hoc verbum Apostoli, quod in quaestione versatur, quatuor modis a diversis intelligitur. Uno modo a Damasceno; qui dicit, Deus vult voluntate antecedente, omnes homines salvos fieri, sed non ex consequenti: quod patet ex praedictis. Nam quantum ex seipso est, Deus vult omnibus suam bonitatem communicare; vult tamen quod in communicatione debitus ordo servetur. Et ideo vult quod illi in quibus est impedimentum participationis gloriae, eam non participent. Secundo modo intelligitur ab Augustino et habetur in littera, ut scilicet sit distributio accommodata pro illis qui salvantur, quorum nullus nisi ex divina voluntate salvatur. Tertio modo intelligitur, ut fiat distributio pro generibus singulorum, et non pro singulis generum, quia de quolibet genere hominum vult aliquos salvos fieri, sed non omnes: et hoc tangitur in Glossa 1 Tim. 2. Quartus est intellectus Origenis, qui dixit quod simpliciter erant omnes salvandi voluntate divina.

Sed hic intellectus est erroneus; quilibet autem primorum est verus.

Ad primum ergo dicendum, quod praedestinatio includit voluntatem salutis, non solum antecedentem, sed etiam consequentem: quod patet ex hoc, quod praedestinatio est propositum cooperandi electis in salutem.

Ad secundum dicendum, quod ratio illa procedit de eo quod Deus simpliciter et absolute vult secundum ordinem suae sapientiae, sine quo nihil causae.

Ad tertium dicendum, quod odium illud Dei, non est secundum id quod est ex eo, sed secundum quod est ex parte eorum quos odio habere dicitur; qui sunt indigni bono, quod Deus praeparat dilectis a se. Unde hoc odium non contrariatur voluntati antecedenti sed consequenti.

ARTICULUS III.

Ad tertium sic proceditur. Et 1. videtur, quod mala fieri sit bonum. Bonum enim est, ut omnia sint quae ad perfectionem universi pertinent; sed multa bona pertinent ad perfectionem universi, quae non essent si mala non essent, sicut patientia sine persecutione non esset; ergo malum fieri bonum est.

2. Praeterea, omne justum bonum est. Sed malum fieri, justum est. Nam etiam culpa, poenae quaedam sunt, ut patet Rom. 1: « Propterea tradidit eos Deus, etc. », nec potest esse poena nisi justa; ergo malum fieri bonum est.

3. Praeterea, verum et bonum convertuntur. Sed verum est mala fieri; ergo et bonum.

Sed contra. Cujus generatio est bona, ipsum quoque est bonum, secundum Boetium; si ergo fieri mala est bonum, ipsa mala sunt bona: quod est impossibile.

Praeterea, fieri mala est per se effectus ejus quod est facere mala: sed facere mala est malum; ergo et fieri mala.

Respondeo. Dicendum, quod dupliciter de malo loqui possumus. Uno modo secundum se, alio modo secundum ordinem ad aliud: et hoc dupliciter. Uno modo secundum ordinem per se, alio modo secundum ordinem per accidens. Bonitas ergo de malo, secundum se considerato, dici non potest; nec de malo secundum ordinem quo per se ad aliquid ordinatur. Sed in ordine quo malum per accidens ordinatur ad aliquid, potest aliqua ratio bonitatis inveniri, inquantum mala sunt occasiones bonorum. Et ideo omnes in hoc concordant, quod malum non est bonum, quia per hoc removeretur bonitas a malo absolute. Similiter et in hoc concordant quod facere mala non est bonum, quia per hoc designatur ordo mali per se ad suam causam. Sed in hoc quod dicitur mala fieri vel esse, importatur ordo malorum ad alia communiter ad per se et per accidens; quia cum dicimus mala fieri vel esse, nihil aliud significamus quam mala inveniri inter res. Sic ergo videtur dicendum, quod mala fieri, per se loquendo est malum, sed per accidens est bonum, inquantum ex malo aliquod bonum occasionatur. Et quia quod est per se, verius dicitur quam quod est per accidens; ideo verior est opinio quae posuit quod mala fieri est malum, quam quae posuit quod mala fieri est bonum.

Ad primum ergo dicendum, quod illa bona

quae sunt de perfectione universi, non consequuntur ex malis nisi per accidens. Unde non sequitur, quod per se loquendo, malum fieri sit bonum.

Ad secundum dicendum, quod culpa non dicitur poena esse, nisi per accidens: vel ratione antecedentis, quod est desertio a Deo; vel ratione consequentis, quod est amissio honorum gratuitorum et vulneratio naturalium: vel ratione concomitantis, quod est aliqua passio affligens, sicut patet in peccato irae vel invidiae. Ipsa tamen poena non est etiam bona, nisi per accidens, scilicet ratione ordinis iustitiae.

Ad tertium dicendum, quod in processu illo est fallacia accidentis. Nam malum fieri non dicitur esse verum, nisi secundum ordinem quem habet ad intellectum vel enunciationem, prout significatur esse quod est, vel non esse quod non est: et hoc est bonum, et a Deo: nec tamen sequitur quod, per se loquendo, mala fieri sit bonum.

ARTICULUS IV.

Ad quartum sic proceditur. Et 1. videtur, quod Deus velit mala fieri. Omnis enim voluntas ex charitate procedens, Deo conformatur: sed aliquis sanctus ex charitate vult mala fieri, quia gloriatur in tribulationibus, ut dicitur Rom. 5; ergo et Deus vult mala fieri.

2. Praeterea, sicut culpa opponitur gratiae, ita et poena naturae. Sed Deus est auctor gratiae et naturae; ergo sicut conceditur quod Deus vult mala poenae fieri, ita debet concedi quod vult mala culpa fieri.

3. Praeterea, necessarium est mala fieri vel non fieri. Sed Deus non vult mala non fieri, alias non fierent; ergo Deus vult mala fieri.

Sed contra. Voluntas Dei est causa volitorum: sed voluntas Dei non est causa quod mala fiant; ergo Deus non vult mala fieri.

Praeterea, voluntas non est nisi finis, vel eorum quae sunt ad finem: sed mala fieri est recedere a fine: ergo Deus non vult mala fieri.

Respondeo. Dicendum, quod voluntas Dei non est nisi de bono. Mala autem fieri non est per se bonum, sed per accidens, ut dictum est. Non tamen potest dici, quod Deus velit fieri mala per accidens et non per se. Nam cum voluntas sequatur cognitionem; multa distinguuntur secundum voluntatem quae non distinguuntur secundum rem, eo quod distinguuntur secundum rationem. Unde voluntas quae est de re aliqua, non oportet quod sit de omnibus quae concomitantur rem illam. Et ideo de hoc quod est mala fieri, quod secundum se consideratum malum est, Dei voluntas non est. Est tamen de eo quod est ei annexum, vel sicut praecedens, vel sicut consequens. Praecedens quidem est potentia creaturae, qua potest deficere et non deficere, quam potentiam Deus esse vult: et secundum hoc dicitur permittere mala. Consequens est autem bonum, quod ex malo occasionatur, quod Deus vult: et ideo dicitur ordinare mala, sive velle mala fieri, secundum quid, et cum determinatione; scilicet secundum quod iustum est.

Ad primum ergo dicendum, quod sancti gloriantes in tribulationibus, nolunt peccata persecutorum, sed volunt quod inde sequitur; et similiter Deus.

Ad secundum dicendum, quod poena in sui

ratione includit ordinem debitum ad culpam; culpa vero non includit aliquem ordinem. Et ideo non est simile.

Ad tertium dicendum, quod quamvis necesse sit mala fieri vel non fieri, tamen Deus neutrum vult, loquendo de malis quae fiunt: sed vult permittere ea fieri: hoc enim bonum est. Non enim necessarium est quod voluntas etiam in alteram contradictionis partem feratur. Et si obijciatur, Deus non vult mala non fieri, dicendum, quod verum est; non tamen propter hoc factor malorum est, sed praeter Dei voluntatem dicuntur fieri, quia per negationem non ponitur nec affirmatur mala voluntas, sed potius negatur vel removetur, cum ei negatio praemittatur.

DISTINCTIO XLVII.

Voluntas quippe Dei etc. (V. edit. nostrae tom. VI, pag. 569.)

QUAESTIO UNICA.

Hic quaeruntur quatuor: 1.^o utrum Deus de necessitate velit quicquid vult; 2.^o utrum praeter voluntatem ejus aliquid fiat; 3.^o utrum praeter Dei voluntatem nihil fiat; 4.^o utrum voluntas Dei rebus necessitatem imponat.

ARTICULUS I.

Ad primum sic proceditur. Et 1. videtur quod de necessitate velit quicquid vult. Omne enim aeternum est necessarium: sed quicquid Deus vult, ab aeterno vult; ergo quicquid Deus vult, de necessitate vult.

2. Praeterea, quicquid Deus voluit vel vult, postquam vult illud vel voluit, non potest illud non velle vel non voluisse, quia voluntas ejus est immutabilis. Sed quicquid Deus vult vel voluit, nunquam non voluit; quia ab aeterno voluit quicquid voluit et vult; ergo Deus non potest non velle quod vult; et ita de necessitate vult quicquid vult.

3. Praeterea, ex principiis necessariis sequitur conclusio necessaria: sed secundum Philosophum, finis in appetibilibus est sicut principium; cum ergo Deus de necessitate velit suam bonitatem, quae est finis, de necessitate etiam volet omnia quae ad eam ordinantur; ergo Deus de necessitate vult quicquid vult.

Sed contra. Necessitas opponitur gratuita voluntati; sed Deus vult salvum hominem ex gratuita voluntate; ergo non ex necessitate.

Praeterea, voluntas Dei magis est libera quam nostra: sed voluntas nostra non ex necessitate vult quicquid vult; ergo nec voluntas Dei.

Respondeo. Dicendum, quod actus divinae voluntatis, cum sit ipsa Dei essentia, necessarius est: sed respectus divinae voluntatis ad volitum, qui importatur eum dicimus, Deum velle hoc vel illud, habet necessitatem quantum ad aliquod volitum, non tamen quantum ad omnia. Voluntas enim necessarium ordinem habet ad finem ultimum; quae quidem necessitas libertati non repugnat, quia non est necessitas coactionis, sed naturalis inclinationis; et per hunc modum homo de necessitate vult beatitudinem. Ad ea autem quae sunt ad finem, voluntas necessarium ordinem non habet, nisi sint

alia sine quibus finis haberi non possit. Sic ergo Deus de necessitate vult bonitatem suam, et quicquid in ipso est. Creaturas autem non vult de necessitate, quia hoc modo ordinantur ad divinam bonitatem: ut sine eis divina bonitas esse possit, et ei per creaturas nihil accrescat.

Ad primum ergo dicendum, quod aliquid dicitur esse necessarium dupliciter. Uno modo absolute, propter necessariam habitudinem subjecti ad prædicatum, sicut homo est animal: et sic non est necessarium, Deum velle aliquid circa creaturas; quia non est necessaria habitudo voluntatis ad volitum, ut dictum est. Alio modo dicitur esse aliquid necessarium ex suppositione, sicut dicitur Socrates moveri, si currit: et sic est necessarium, Deum aliquid velle circa creaturas, ex suppositione facta, quod ab æterno velit illud. Et similiter dicendum ad secundum.

Ad tertium dicendum, quod ratio illa procedit de eo quod est ad finem, necessariam habitudinem habens ad finem, sicut principia demonstrationis habent necessariam habitudinem ad conclusionem. Talem autem habitudinem non habent creaturæ ad divinam bonitatem, ut dictum est. Et ideo ratio non sequitur.

ARTICULUS II.

Ad secundum sic proceditur. Et 1. videtur, quod voluntas Dei non semper impleatur. Omnis enim causa prima, quæ producit effectum suum mediante causa secunda contingente, potest deficere in suo effectum, quamvis in se sit necessaria: sicut floritio arboris, propter defectum virtutis plantæ quandoque deficit, quamvis causa prima, scilicet motus solis, sit necessaria. Sed voluntas Dei producit suum effectum volitum, mediantibus causis secundis contingentibus, sicut libero arbitrio et aliis huiusmodi; ergo quandoque voluntas Dei deficit a suo volito.

2. Præterea, quicquid Deus præcipit, vult; alias esset duplex et fallax in præcipiendo, cum præceptum sit voluntatis signum: sed Deus multa præcipit quæ non fiunt; ergo voluntas Dei non semper impletur.

3. Præterea, duo contraria non possunt simul esse: sed mali homines habent voluntatem divinæ voluntati contrariam, quæ quandoque impletur; ergo voluntas Dei non semper impletur.

Sed contra. Voluntas semper impletur, nisi sit aliquid resistens; sed voluntati Dei nihil resistit, Rom. 9. Voluntas ergo Dei semper impletur.

Præterea, impletio voluntatis est ratio gaudii; ergo voluntatis cassatio est ratio tristitiæ: sed Deo non potest accidere aliqua tristitiæ ratio, cum sit beatissimus; ergo voluntas Dei semper impletur.

Respondeo. Dicendum, quod hæc est differentia inter voluntatem et cognitionem: quod voluntas importat ordinem volentis ad rem, cognitio autem rei ad cognoscentem. Et ideo, sicut res non habet esse nisi concurrentibus omnibus quæ ad esse rei requiruntur, ita nullus sapiens dicitur aliquid velle simpliciter, nisi quod vult consideratis omnibus quæ ad volitum concurrunt, tam ex parte volentis, quam ex parte voliti. Illud ergo Deus simpliciter vult, quod vult voluntate antecedente, tamquam ex seipso, et voluntate consequente, tamquam ex volito; et hoc totum impletur, ex quo nihil ei repugnat, nec ex parte volentis, nec ex parte voliti. Et ideo omne quod Deus simpliciter vult, impletur.

Ad primum ergo dicendum, quod ratio illa procedit, quando causa prima efficit effectum causæ secundæ, et non ipsam causam secundam. Sed voluntas divina non solum est de effectibus causarum contingentium; sed de ipsis causis contingentibus prout ordinantur in suos effectus. Unde voluntas divina, de effectu causæ contingentis excludit omnem defectum, qui causæ possit accidere. Vel dicendum, quod Deus non tantum est causa mediata, eo quod coagit cuilibet causæ; sed etiam immediata, eo quod agit per essentiam suam.

Ad secundum dicendum, quod præceptum divinum, semper est de eo quod Deus vult, quantum ex seipso est. Hoc enim vult nos velle. Et ideo respondet voluntati antecedenti, quæ non semper impletur, nisi consequens adjungatur.

Ad tertium dicendum, quod voluntas malorum contrariatur voluntati signi, scilicet præcepto. Non autem voluntati beneplaciti vel voluntati antecedenti, sed consequenti.

ARTICULUS III.

Ad tertium sic proceditur. Et 1. videtur quod præter Dei voluntatem nihil fiat. Potentius enim est agens, præter cuius voluntatem nihil potest fieri, quam illud præter cuius voluntatem aliquid fieri potest: sed Deus est agens potentissimum; ergo præter ejus voluntatem nihil potest fieri.

2. Præterea, quicquid Deus operatur vult: sed nihil potest fieri præter Dei operationem, quia ipse operatur in omni operante; ergo nihil potest fieri præter ejus voluntatem.

3. Præterea, quicquid obsequitur divinæ voluntati, non fit præter ejus voluntatem. Vult enim Deus quod omnia suæ voluntati obsequantur. Sed nihil fit quod divinæ voluntati non obsequatur, ut in litera dicitur; ergo nihil fit præter Dei voluntatem.

Sed contra. Deus non vult mala fieri, ut supra dictum est: sed multa mala fiunt: ergo multa fiunt præter Dei voluntatem.

Præterea, voluntas Dei causa est eorum quæ vult: sed multa fiunt quorum Deus non est causa, scilicet peccata: ergo multa fiunt præter Dei voluntatem.

Respondeo. Dicendum, quod voluntas Dei dupliciter accipitur. Uno modo voluntas beneplaciti, alio modo voluntas signi. Loquendo de voluntate beneplaciti, sic aliquid potest fieri præter voluntatem Dei, tam antecedentem quam consequentem. Non autem contra consequentem, quæ semper impletur, sed contra antecedentem quæ quandoque non impletur, ut dictum est. Loquendo autem de voluntate signi, sic, si loquamur de permissione et operatione, nec præter voluntatem Dei, nec contra eam potest aliquid fieri. Nihil enim potest fieri, quod Deus non operetur vel permittat. Si autem loquamur de præcepto, prohibitione, et consilio, sic non solum præter voluntatem divinam, sed contra eam multa fiunt: et hoc ideo, quia ista signa respondent voluntati antecedenti, quæ non semper impletur; alia vero duo respondent voluntati consequenti quæ semper impletur. Operatio quidem secundum quod voluntas consequens est de faciendo. Et ideo præter operationem potest aliquid fieri, sed non contra eam. Sed permissio respondet voluntati consequenti, secundum quod est de non impediendo: et ideo præter eam nihil potest fieri.

Ad primum ergo dicendum, quod non est ex impotentia divinae voluntatis, quod aliquid praeter eam fiat; sed ex ordine sapientiae, a quo procedit quod voluntas Dei non impediatur quod impedire potest. Et ideo illud quod praeter eam esse dicitur, est praeter eam, secundum quod est de non operando, et non secundum quod est de non impediendo.

Ad secundum dicendum, quod deformitas peccati est praeter operationem Dei, et praeter ejus voluntatem, quamvis substantia actus non sit praeter Dei operationem.

Ad tertium dicendum, quod voluntati Dei, prout est de ordine universi, obsequitur ille qui facit contra voluntatem Dei, non per se, sed per accidens, in quantum Deus ex malo elicit bonum; non tamen obsequitur voluntati, qua Deus velit hoc factum particulare. Et praeter talem voluntatem aliqua fiunt, in quantum Deus non vult hoc particulare factum fieri.

ARTICULUS IV.

Ad quartum sic proceditur. Et 1. videtur quod divina voluntas rebus volitis necessitatem imponat. Posita enim causa sufficienti, necesse est effectum poni. Sed voluntas Dei est sufficiens causa eorum quae ipse vult; ergo, cum voluntas Dei sit ab aeterno, videtur quod ejus volita sit necesse provenire.

2. Praeterea, quantumcumque causa est necessaria, et effectus contingens, propter contingentiam causae mediae, stante causa prima, potest effectus deficere, sicut stante motu solis deficit floritio arboris: sed stante voluntate Dei non potest deficere suum volitum: quia voluntas Dei semper impletur; ergo cum voluntas Dei sit causa necessaria, oportet quod effectus ipsius sint necessarii.

3. Praeterea, omnis conditionalis verae, cujus antecedens est necessarium absolute, et consequens est necessarium absolute, quia consequens sequitur ex antecedenti. Ex necessario autem nihil sequitur nisi necessarium. Sed haec conditionalis est vera. Si Deus vult aliquid, illud est vel erit; cum ergo antecedens sit necessarium absolute, quia est aeternum, et consequens erit necessarium absolute.

Sed contra. Omnia bona fiunt Deo volente. Si ergo voluntas Dei rebus volitis necessitatem imponat, omnia bona ex necessitate provenient; et sic perit liberum arbitrium; quod est inconveniens.

Praeterea, divinae providentiae est naturam non perdere, sed salvare. Perderetur autem, si rebus secundum naturam suam contingentibus necessitatem imponeret. Ergo divina voluntas, quam providentia includit, rebus necessitatem non imponit.

Respondeo. Dicendum, quod voluntate Dei non solum res in esse producuntur, sed etiam rebus producendis, modum quo producantur, praedeterminavit. Unde, cum voluntas Dei efficaciter impletur, oportet quod res fiant, et eodem modo sicut voluntas divina disposuit. Disposuit autem Deus ad completionem universi, ut quaedam fierent necessarii; et his praeparavit causas necessarias etiam secundas; quaedam vero ut fierent contingentem, et his praeparavit causas secundas contingentes. Et ideo divina voluntas rebus necessitatem non imponit.

Ad primum ergo dicendum, quod posita causa necesse est effectum poni, secundum illum modum, quo causa ad effectum ordinatur. Et ideo illo modo

res fiunt, quo voluntas divina disposuit; quaedam contingentem, quaedam necessario.

Ad secundum dicendum, quod quamvis contrarium ejus quod est volitum a Deo, non possit stare cum voluntate divina, possibilitas tamen ad contrarium potest stare cum ea, propter contingentiam causae mediae; et hoc sufficit ad hoc, quod effectus sit contingens, et non necessarius.

Ad tertium dicendum, quod ex hoc antecedenti, Deus vult aliquid, sequitur non solum illud esse, sed eo modo quo Deus vult. Et ideo contingentem quandoque, et quandoque necessario.

DISTINCTIO XLVIII.

Sciendum quoque etc. (V. edit. nostrae tom. VI, pag. 374.)

QUAESTIO UNICA.

Illic quaeruntur quatuor: 1.^o utrum voluntas nostra possit voluntati divinae conformari; 2.^o utrum ad conformitatem teneamur; 3.^o utrum perfecti et beati conforment voluntatem suam voluntati divinae, etiam in volito; 4.^o utrum passio Christi placere potuerit, cum Judaeorum actio Deo displiceret.

ARTICULUS I.

Ad primum sic proceditur. Et 1. videtur quod voluntas nostra, divinae voluntati conformari non possit. Nullus enim voluntatem suam potest conformare voluntati quam ignorat, quia non volumus nisi cognitum; sed voluntatem Dei ignoramus: ergo ei voluntatem nostram conformare non possumus.

2. Praeterea, eorum quae infinite distant, nulla potest esse conformitas. Sed voluntas nostra in infinitum distat a divina voluntate; ergo non potest una alteri esse conformis.

3. Praeterea, quaecumque sunt conformia, in una forma conveniunt. Sed non potest esse una forma voluntati divinae et nostrae communis, quia forma illa utraque voluntate prior existeret; ergo voluntas nostra divinae voluntati conformis esse non potest.

Sed contra. Super illud Psalm. 52: « Rectos deus et collaudatio, » dicit Glossa: « Recti sunt qui dirigunt cor suum, secundum voluntatem Dei, quae est regula nobis. » Sed regulatum conformatur regulae; ergo voluntas Dei voluntati nostrae conformis est.

Praeterea, obediens praecepto, conformatur voluntati voluntati praecipientis: sed multi divinis praeceptis obediunt; ergo eorum voluntas divinae voluntati conformatur.

Respondeo. Dicendum, quod voluntas divina dupliciter considerari potest. Uno modo ut significatur per modum potentiae. Alio modo ut significatur per modum operationis. Sic autem agitur hic de conformitate ad divinam voluntatem, et non primo. Actus autem voluntatis considerari potest dupliciter. Uno modo ut est causa: et sic voluntati divinae nostrae nostra voluntas conformatur, quando hoc volumus quod Deus vult nos velle. Sic enim in causis voluntariis effectus causae conformatur, in quantum sequitur dispositionem voluntatis et rationis, ut patet in artificiatibus et arte; et haec conformitas est secundum rationem causae efficientis.

Alio modo consideratur actus voluntatis ut est quidam actus: et sic voluntati potest aliquid conformari dupliciter. Uno modo ratione formae supervenientis, quam habet actus ex habitu: et sic conformamus voluntatem nostram voluntati divinae, inquantum volumus aliquid ex charitate, sicut et Deus vult: et haec conformitas attenditur secundum rationem causae formalis. Alio modo quantum ad speciem actus quam habet ex objecto, quod est duplex. Quoddam enim est finis: et sic voluntas nostra conformatur voluntati divinae, inquantum propter illud volumus, propter quod et Deus vult: et haec conformitas attenditur secundum rationem causae finalis. Aliud vero objectum est id quod est ad finem: et quantum ad hoc conformatur voluntas nostra divinae in volito, dum volumus id quod Deus vult: et haec est conformitas quasi secundum rationem causae materialis.

Ad primum ergo dicendum, quod voluntas Dei plene nobis nunc non est. Et ideo nec est plena conformitas. Est tamen aliqua secundum modum nostrae cognitionis.

Ad secundum dicendum, quod duplex est conformitas. Una perfecta aequalitatem includens, qualis est Filii ad Patrem; et talis non potest esse alicujus creaturae ad Deum, cum infinite distent. Alia imperfecta et non secundum eandem rationem; et sic creatura conformatur Deo.

Ad tertium dicendum, quod aliquid potest alteri conformari dupliciter: uno modo sicut formae; alio modo sicut formato. Primo modo voluntas nostra conformatur divinae, et secundo modo non.

ARTICULUS II.

Ad secundum sic proceditur. Et 1. videtur, quod voluntatem nostram divinae conformare non teneamur. Quicumque enim non facit id ad quod tenetur, ex hoc ipso peccat mortaliter. Si ergo tenemur voluntatem nostram divinae voluntati conformare, quod non facimus quandoque peccamus, videtur quod quodlibet peccatum sit duplex, et quodlibet veniale habeat mortale sibi adjunctum.

2. Praeterea, ad id non obligamur ex aliquo praecepto quod libero arbitrio non subjacet: sed conformitas voluntatis nostrae ad Deum, secundum rationem causae finalis efficientis et formalis, libero arbitrio non subjacet, quia ejus potestati non subest charitatem habere. In finem autem divinae voluntatis, qui est bonum, naturaliter tendit, non ex electione quae est liberi arbitrii. Voluntas autem divina efficaciter implet in nostra, quidquid vult; ergo ad conformitates praedictas non tenemur ex aliqua obligatione praecepti.

3. Praeterea, Deus vult damnationem alicujus hominis reprobati: et cum hoc ipse sciat, potest homini reprobo revelare; si ergo homo teneatur voluntatem suam conformare divinae voluntati in volito, sequitur quod iste teneatur suam damnationem velle, quod est inconveniens, cum talis voluntas sit contra charitatem; et sic quantum ad nullum modum conformitatis tenetur.

Sed contra. Unusquisque tenetur esse rectus: sed rectitudo consistit in conformitate ad divinam voluntatem, ut ex Glossa praedicta probatum est; ergo quilibet tenetur voluntatem suam divinae voluntati conformare.

Praeterea, quaelibet tenetur obedire: sed obe-

diendo Deo homo voluntatem suam divinae conformat; ergo homo tenetur voluntatem suam divinae conformare.

Respondeo. Dicendum, quod secundum hoc, divinae voluntati nostra voluntas conformari debet, secundum quod ipsa est regula nostrae voluntatis, quantum ad bonitatem. Bonitas autem in actu voluntatis, quantum ad aliquid consideratur absolute, et quantum ad aliquid respective. Absolute quidem primo et principaliter quantum ad finem: secundo quantum ad habitum, qui ex fine bonitatem habet: et tertio quantum ad rationem efficiendi, quia ex fine et habitu inclinatur aliquis ad agendum. Respective autem quantum ad volitum quod non habet bonitatem nisi ex ordine ad finem. Et ideo voluntati divinae tenemur nostram voluntatem conformare: Absolute quidem, quantum ad tres primas conformitates: primo et principaliter secundum causam finalem: secundo secundum causam formalem: et tertio secundum rationem causae efficientis; ut scilicet velimus quod Deus vult nos velle, et ex charitate, et propter bonum finem. Respective vero et non absolute, quantum ad volitum, si ut secundum id quod Deus vult in se, nobis displiceat: tamen secundum respectum ad divinam voluntatem nobis placeat, prout scilicet est a Deo volitum et ordinatum.

Ad primum ergo dicendum, quod conformitas nostrae voluntatis ad divinam est quaedam generalis conditio quae in omni bono opere requiritur: et ideo quando praetermittitur, non fit speciale peccatum, nec semper mortale; quia quandoque fit praeter eam, non contra eam.

Ad secundum dicendum, quod tres primae conformitates ad quas absolute tenemur libero arbitrio subjacent. Licet enim naturale sit nobis, ut in bonum tendamus, sicut in finem; non tamen in hoc vel in illud bonum, sed hoc per electionem accipimus. Quamvis etiam circa voluntatem nostram semper divina voluntas impleatur, non tamen semper a nobis hoc est per electionem. Similiter quamvis ad charitatem habendam vires liberi arbitrii non sufficiant; tamen per liberum arbitrium potest se homo ad eam praeparare et ejus acceptioni assentire.

Ad tertium dicendum, quod licet Deus possit alicui suam damnationem revelare de potentia absoluta, non tamen de potentia ordinata, quia cogereetur desperare; et si qua revelatio fieret, quae hoc sonaret, deberet intelligi secundum comminationem et non secundum praescientiam.

ARTICULUS III.

Ad tertium sic proceditur. Et 1. videtur quod perfecti et beati suam voluntatem non conformant divinae in volito. Beata enim Virgo in statu perfectionis erat, et tamen voluerat Christum non pati, alias de ejus passione non doluisset. Est enim dolor, secundum Augustinum, de his quae nobis nolentibus accidunt. Sciebat tamen per fidem Deum velle Christum pati; ergo perfecti non conformant voluntatem suam divinae in volito.

2. Praeterea, Christus inter omnes erat perfectissimus: sed in eo fuit aliqua voluntas divinae voluntati non conformis, scilicet voluntas naturalis qua volebat calicem a se transferri, quod Deus volebat; ergo voluntas perfectorum non semper conformatur divinae in volendo.

5. Praeterea, animae interfectorum propter Christum in plena fruitione beatitudinis sunt: et tamen desiderant aliquid et petunt quod Deus non vult, ut patet Apoc. 6: « Usquequo Domine non vindicabis etc. »; ergo nec beati voluntatem suam conformant divinae in volendo.

Sed contra. Secundum Tullium, amicorum est idem velle: sed praecipue beati sunt in perfecta amicitia ad Deum; ergo voluntatem suam divinae conformant in volendo.

Praeterea, electio perversa est, quando minus bonum magis bono praefertur: sed constat magis esse bonum quod Deus vult eo quod homo vult; cum ergo in perfectis et beatis nihil sit de perversitate electionis, videtur quod semper eligendo volunt hoc quod Deus vult.

Respondeo. Dicendum, quod volitum a Deo, accipi potest dupliciter. Uno modo in particulari et quasi materialiter. Alio modo in universali et quasi formaliter, scilicet secundum quod est volitum. Primo quidem modo non potest aliquis velle quod Deus vult, nisi sciat circa hoc particulare Dei voluntatem. Secundo autem modo non potest aliquis velle quod Deus vult, nisi secundum illam partem voluntatis quae nata est ferri in divina; quod non convenit voluntati sensualitatis, aut rationis inferioris, sed tantum voluntati rationis superioris. Sic ergo tam beati quam perfecti vel quicumque iusti, voluntatem superioris rationis conformant divinae voluntati in volito universaliter et formaliter sumpto. Sed in hoc differt inter beatos et viatores: quod beati secundum voluntatem praedictam, etiam in particulari volito voluntatem suam voluntati divinae conformant; non autem viatores, qui divinam voluntatem super particularibus non cognoscunt, sicut beati: sed secundum alias voluntates in eis non potest esse conformitas ad divinam voluntatem in volito universaliter et formaliter sumpto, licet quandoque per accidens in volito materialiter sumpto, quandoque vero in contrarium. Sed motus iste, qui est in contrarium, tanto est debilior et minus impeditus, quanto voluntas superior divinae fortius inhaeret. Peccatores vero secundum superiorem voluntatem non conformant voluntatem suam divinae in volito formaliter sumpto, etsi quandoque conformant per accidens in volito materialiter sumpto. Ex tali enim modo conformitatis nihil laudis accrescit vel tollitur.

Ad primum ergo dicendum, quod tristitia erat in beata Virgine de morte Christi, secundum quod inferior voluntas particulari volito repugnat; et hoc non est perfectioni contrarium. Et similiter dicendum ad secundum de voluntate inferiori qua Christus transferri calicem volebat.

Ad tertium dicendum, quod verba illa Apoc. sunt intelligenda quantum ad naturalem appetitum quem habent animae separatae de corporum resurrectione: et tamen secundum superiorem rationem animae beatorum volunt dilationem resurrectionis quam sciunt Deum velle.

ARTICULUS IV.

Ad quartum sic proceditur. Et 1. videtur quod non possit esse voluntas de passione, sine hoc quod sit de actione. Voluntas enim sapientis non est impossibilem, eo quod est cum electione quae semper est possibilem: sed impossibile est esse passionem sine actione; ergo nullius sapientis voluntas est de passione sine actione.

2. Praeterea, voluntas fertur in volitum, secundum quod est in rerum natura; quia bonum et malum sunt in rebus, secundum Philosophum: sed in rerum natura non est passio sine actione; ergo voluntas non fertur in passionem sine actione.

5. Praeterea, voluntas iudicatur mala ex malo quod male inseparabiliter conjungitur volito, sicut patet in voluntate fornicantis, qui vult delectationem cui inseparabiliter inhaeret deformitas: sed passioni innocentis, inseparabiliter adjungitur actio mala persequentis; ergo quicumque vult passionem Christi videtur velle actionem malam Judaeorum.

Sed contra. Quaecumque sunt separata secundum rem, possunt separari secundum actum animae per quem interdum etiam et conjuncta secundum rem separantur; sed passio Christi et actio Judaeorum sunt duae diversae res; ergo potest esse voluntas de uno, sine hoc quod sit de altero.

Praeterea, omne bonum fit Deo volente et nullum malum, ut ex dictis patet: sed passio Christi fuit bona, actio Judaeorum mala; ergo Deus voluit passionem Christi, non autem actionem Judaeorum.

Respondeo. Dicendum, quod in passione Christi duo est considerare: scilicet operationem Christi, qua passionem illatam voluntarie suscepit, et haec omnino separata est ab actione Judaeorum: unde potest esse de hac voluntas, sine hoc quod sit de actione Judaeorum. Est iterum ibi considerare ipsam passionem quae in se bona est, in quantum est iusta per comparisonem ad naturam speciei, quamvis non per comparisonem ad hoc individuum, et quae est etiam satisfactoria pro peccato totius humani generis. Est etiam mala, in quantum afflictiva innocentis; et hoc modo per se loquendo est effectus actionis Judaeorum. Primo vero modo est a Deo, sed non secundo.

Ad primum ergo dicendum, quod illa ratio procederet, si diceretur quod Deus vult passionem Christi esse et actionem Judaeorum non esse, quia haec duo sunt impossibilia; sed horum duorum unum est secundum voluntatem Dei, alterum est praeter eam, non contra eam.

Ad secundum dicendum, quod licet voluntas feratur in volitum secundum quod est in rerum natura, non tamen oportet quod feratur in omnia quae circumstant rem, sed solum in ea quae de esse rei sunt.

Ad tertium dicendum, quod voluntas effectus dependet a causa, sed non e converso. Unde quicumque vult causam, vult effectum per consequens, sed non e converso. Delectatio autem est causa deformitatis: sed passio Christi est effectus actionis Judaeorum: unde Deus non volendo actionem Judaeorum malam, voluit bonam passionem Christi, qui est semper Deus Benedictus in saecula saeculorum. Amen.

DE CREATIONE

LIBER SECUNDUS

PROLOGUS

• Quae vidi annuntiabo in sermonibus Domini
• opera ejus • Eecl. 42. Creaturarum consideratio et philosophis et theologis est communis. Differt tamen quantum ad tria, quae ex verbis propositis accipi possunt. Primo quantum ad cognitionis certitudinem. Secundo quantum ad probationis firmitatem. Tertio quantum ad considerationis rationem. Secundum certitudinem quidem, utraque consideratio differt. Nam philosophica consideratio naturali cognitioni innititur: et ideo de creaturis non omnino certam notitiam habet, sed dubiam et conjecturalem, secundum illud Sapientiae 9: « Cogitationes mortalium timidae, et incertae providentiae nostrae: » et ideo etiam non perfecte a philosophis enarrantur, nec uniformiter, ut diversitas opinionum ostendit: Eecl. 1: « Cunctas res difficiles non potest homo eas explicare sermone. » Sed cognitio theologica, divinae cognitioni innititur quae omnia clare et certitudinaliter videt. Heb. 4: « Non est ulla creatura invisibilis in conspectu ejus: » et haec certitudo derivatur ad sanctos quibus Deus secreta suae sapientiae revelat, secundum illud 1 Cor. 2: « Nobis autem revelavit Deus per spiritum suum; » et ideo tanquam certitudinaliter visa indubitanter annunciat. Eecl. 42: « Nonne Dominus fecit sanctos enarrare omnia mirabilia sua? » Et hoc est quod dicitur in Themate: « Quae vidi annuntiabo. » Secundum probationis vero firmitatem, utraque consideratio differt ex eo, quod philosophica primo ex causis creatis et invalidis et mutabilibus sumitur, ex quibus ratio firma haberi non potest. Unde dicitur Eecl. 9: « Intellexi, quod omnium operationum Domini nullam possit homo invenire rationem. » Sed probatio theologica innititur divino sermone qui semper est validus. Heb. 4: « Vivus est sermo Dei et efficax. » 2 Reg. 25: « Spiritus Domini locutus est per me, et sermo ejus per linguam meam: » et hoc est quod dicitur in Themate. « In sermonibus Domini. » Secundum vero considerationis rationem differentia invenitur. Nam philosophi considerant creaturas secundum rationem propriae naturae non habito respectu ad Deum. Unde de quibusdam dicitur Sap. 15: « Neque operibus attendentes agnoverunt quis esset artifex. » Sed theologi creaturas considerant secundum rationem; qua referuntur in Deum tripliciter. Primo quidem ut in causam efficientem, secundum illud Psalm. 9: « Delectasti me, Domine, in factura tua etc. » Secundo ut in causam finalem: Proverb. 16: « Universa propter semetipsum operatus est Dominus. » Tertio ut in formam exemplarem. Unde dicitur Ecclesiast. 1: « Effudit illam (scilicet sapientiam suam) super omnia opera ejus, » in quantum videlicet opera sapientiam imitantur. Et ideo sicut philosophi considerantes creaturas secundum naturas suas, considerant motum, in quo res in natura sua per-

ficatur vel a natura sua corrumpitur, ita theologus considerat motum creaturae secundum quem perficitur per conversionem ad Deum vel deficit per aversionem ab ipso; et hoc notatur in Themate, in hoc quod dicit « opera ejus. » Sic ergo ex praedictis verbis praesentis libri, in quo Magister de creaturis agit, potest accipi quadruplex causa: materia in operibus; finis in relatione ad Deum; forma in certitudine traditionis principii: causa efficiens in Dei sermone per quem haec doctrina inspiratur.

DISTINCTIO I.

Creationem igitur etc. (V. edit. nostrae tom. VI, pag. 295.)

QUAESTIO UNICA.

Hic quaeruntur quatuor: 1.^o utrum res sint creatae a Deo; 2.^o utrum sit aliquod principium increatum, praeter Deum; 3.^o utrum praeter eum sit aliquis creator; 4.^o utrum creaturarum universitas, quae mundi nomine nuncupatur, sit Deo coaeterna.

ARTICULUS I.

Ad primum sic proceditur. Et 1. videtur, quod nihil possit creari a Deo. Quicquid enim est, vel est substantia vel accidens: sed creatio non potest esse substantia, cum secundum eam denominetur aliquid creatum: similiter non potest esse accidens, quia sic esset in subjecto; vel quod est materia creati, quod est contra rationem creationis secundum quod creari dicitur quod ex nihilo fit; vel in ipso creato, quod est contra rationem subjecti, quod oportet esse prius accidente, cum tamen sit creatum posterius creatione: ergo creatio nihil est, et ita nihil creatur a Deo.

2. Praeterea, omne quod fit, possibile fuit prius fieri; alias impossibile fuisset fieri: nihil autem quod exit de potentia in actum creatur, quia omne hujusmodi fit de materia; ergo nihil fit per creationem.

3. Praeterea, impossibile est infinitam distantiam pertransitam esse: sed inter ens et simpliciter non ens est infinita distantia; ergo impossibile est quod aliquid sit factum ens, de simpliciter non ente; et sic impossibile est aliquid esse factum per creationem.

4. Praeterea, quod fit in permanentibus non est: ergo fieri rei est ante rei esse. Sed non potest esse nisi in aliquo supposito: ergo omne quod fit, fit ex aliquo subjecto, si sit de permanentibus; et ita nulla substantia potest creari, ut videtur.

Sed contra est, quod dicitur in Psalm. 148:

« Dixit et facta sunt, mandavit et creata sunt etc. »

Praeterea, unumquodque agit secundum quod est actu; scilicet secundum partem suae substantiae, scilicet formam; et facit aliquem effectum, secundum

partem suae substantiae, scilicet secundum formam, ut patet in agentibus naturalibus. Cum ergo Deus secundum totam substantiam suam sit actus, videtur quod totam substantiam effectus producere potest, et hoc est creare; ergo Deus potest facere res per creationem.

Respondeo. Dicendum, quod Deus ab omnibus intelligitur id quod est primum in genere causarum agentium. Inter quas effectus causae primae per causam secundam determinatur. Sic actio solis determinatur ad poni productionem per virtutem activam, quae est in planta. Oportet ergo quod causa secunda causet rem secundum quod est in determinata natura solis, sed causa prima secundum generalem rationem effectus: ideo ipse Deus qui est causa simpliciter prima, est causa universalis entis, inquantum hujusmodi; sicut ignis est causa calidi, inquantum est calidus. Et ideo ad causas secundas naturales pertinet efficere res secundum formam tantum, per quam unumquodque determinatur ad speciem propriam. Sed Dei est producere rem secundum totum illud quod est entitatis in ipsa, et quantum ad formam, et quantum ad materiam, et hoc est creare: unde Deo competit res in esse per creationem educere.

Ad primum ergo dicendum, quod creatio aliquid est et est accidens; non tamen mutatio, proprie loquendo; quia Deus non producit res in esse per mutationem vel motum proprie acceptum, sed per quemdam effluxum, cum nihil praesupponatur divinae factioni. Unde ipsa creatio nihil est aliud secundum rem, quam relatio quaedam qua creatura refertur ad Deum ad causam.

Ad secundum dicendum, quod secundum Philosophum 3 Metaphysicae, possibile dupliciter dicitur. Uno modo absolute, non secundum aliquam potentiam, sed ratione habitudinis praedicati ad subiectum, inter quae non est repugnantia: et sic possibile opponitur impossibili et necessario: et sic possibile fuit mundum esse antequam fuit. Alio modo dicitur aliquid possibile per respectum ad potentiam activam; et sic mundo antequam esset, possibile erat esse per respectum ad potentiam activam, sed non passivam.

Ad tertium dicendum, quod ratio illa procedit si distantia non entis ad ens esset infinita per extensionem: sic autem infinitum non est, sed solummodo per finis negationem; quia non ens terminum non habet.

Ad quartum dicendum, quod ratio illa procedit de fieri quod est per motum: non de fieri quod est per simplicem effluxum. Sic enim simul fit lux et facta est; et similiter creatura simul creatur et creata est.

ARTICULUS II.

Ad secundum sic proceditur. Et 1. videtur quod praeter Deum sit aliquod aliud principium increatum. Bonum enim principium mali esse non potest, quia unumquodque facit sibi simile: sed in rebus multa inveniuntur mala: non ergo possunt a Deo, qui bonus est, creari mala; ergo oportet quod vel omnia sint increata, vel reducantur ad aliquod malum increatum, quod sit omnium principium.

2. Praeterea, causarum genera adinvicem distinguuntur: sed in genere causae efficientis est unum principium increatum, idest Deus; ergo similiter in

S. Th. Opera omnia. V. 22.

aliis causarum generibus: et ita sunt plura principia increata.

3. Praeterea, omne quod creatur, aliqua creatione creatur. Creatio ergo qua creatur caelum, aut est creata, aut increata; si creata, oportet quod aliqua creatione creetur, et sic in infinitum. Relinquitur ergo quod sit increata: et ita praeter Deum esset aliquod aliud principium increatum.

4. Praeterea, omne quod fit, vel fit in tempore, vel in instanti temporis: quia fieri sine successione non est, nec successio sine tempore. Instans ergo vel tempus in quo creatum est caelum, aut est creatum, aut non. Si creatum, ergo in aliquo instanti vel tempore: et sic infinitum: quod est impossibile. Relinquitur ergo, quod praeter Deum sit aliquod aliud principium increatum.

Sed contra est, quod Sap. 11 dicitur: « Quomodo modo posset aliquis permanere, nisi tu voluisses? » Omnium ergo quae sunt esse et permanentia a voluntate Dei dependet. Sed quae sunt, per voluntatem ejus sunt ab eo creata; ergo nihil potest esse praeter ipsum, quod non sit ab eo creatum.

Praeterea, unitas est principium multitudinis: hoc autem non esset si plura increata ponerentur.

Respondeo. Dicendum, quod omnis res, cujus essentia non est suum esse, habet esse suum ab alio creatum: quia si esse rei est praeter essentiam ejus, oportet quod ei conjungatur per aliquam causam, quae quidem non potest esse ipsa rei essentia, sicut subjectum est causa accidentis; quia nihil potest esse causa alicujus, nisi per hoc quod esse habet. Unde relinquitur quod cujuscumque rei, quae non est suum esse, sit causa essendi aliquid ab eo separatum. Nulla autem res potest esse cujus essentia sit suum esse, nisi una tantum; quia hujusmodi rei esse non additur alicui per quod dividatur vel contrahatur, sic ut non posset esse nisi una absolute per se substans. Relinquitur ergo quod non potest esse nisi unum increatum; et per consequens, in ipsum sicut in causam, oportet res omnes alias reduci.

Ad primum ergo dicendum, quod malum, inquantum hujusmodi, non habet esse, nec est res aliqua: sed magis est privatio alicujus perfectionis in re; unde non habet causam efficientem, sed deficientem; et hujusmodi sunt causae mediae, propter hoc quod sunt ex nihilo.

Ad secundum dicendum, quod creare nominat actum causae efficientis: unde oportet id quod est primum in genere causae efficientis esse increatum. Sic materia prima est ingenita, non autem increata; quia cum habeat esse imperfectum, oportet quod a perfecto ente sumat originem. Forma autem et finis incidunt in idem eum efficiente: et sic restat unum solum esse principium increatum.

Ad tertium dicendum, quod creatio, relatio quaedam est, ut dictum est; relatio autem non refertur per aliquam relationem realem, ut Avicenna dicit; unde creatio non est creata per aliquam creationem, sed per seipsam.

Ad quartum dicendum, quod in tempore et in instanti non differunt esse et fieri. Non autem est necesse tempus esse in tempore, sicut nec locum in loco; unde non est necesse, quod instans primum creationis in alio instanti sit.

ARTICULUS III.

Ad tertium sic proceditur. Et 1. videtur quod creare soli Deo non conveniat. Unumquodque enim agens potest agere infra suam speciem. Sed anima rationalis secundum naturam est Angelo inferior; ergo Angelus potest animam facere. Sed anima non potest fieri nisi per creationem, cum non sit composita ex materia et forma: ergo Angeli creare possunt.

2. Praeterea, omne quod non habet materiam partem sui, non potest fieri nisi de nihilo, et ita per creationem. Sed formae naturales et accidentia non habent materiam partem sui; ergo non possunt fieri, vel educi in esse, nisi per creationem: sed educuntur in esse ab agentibus naturalibus; ergo causae naturales agentes creant.

3. Praeterea, ad immensitatem divinae bonitatis pertinet, ut omnis perfectio creaturae communicabilis, sit ei concreata; sed potestas creandi est creaturae communicabilis, cum in se contradictionem non implicet; ergo videtur, quod creare non sit proprium Dei.

Sed contra est, quod Damascenus dicit: « Omnes qui dicunt Angelos aliquid creare, maledictos esse: » de quibus tamen magis videtur, quam de aliis creaturis; ergo creare soli Deo convenit.

Praeterea, creare non est nisi agentis secundum totam suam substantiam; quia res secundum totam suam substantiam per creationem in esse educitur; sed agere secundum totam substantiam suam Deo convenit, cum ipse solus sit actus purus; ergo solius Dei est creatio.

Respondeo. Dicendum, quod sicut in prima quaestione dictum est, creatio proprie actio est primi agentis, quod nihil aliud in suo accidente (1) praesupponit. Ex secunda autem quaestione habitum est, quod primum agens est solus Deus; quia omnia alia sunt ab eo creata. Unde relinquitur, quod ipse solus est rerum creator: et creando res tradit eis possibilitatem, ut recipiant effectus causarum suarum agentium, non ex nihilo, sed ex potentia praesupposita; et ideo omnes aliae causae agunt per viam motus vel mutationis, solus autem Deus per creationem.

Ad primum ergo dicendum, quod quamvis anima sit secundum naturam infra Angelum, tamen modus creandi animam est supra potestatem Angeli quae est finita. Nam agere ex nulla potentia praesistente infinitae potentiae est. Quod patet ex hoc quod quanto potentia passiva est remotior ab actu, tanto indiget majori potentia activa.

Ad secundum dicendum, quod fieri, proprie loquendo, non est nisi rei subsistentis, cujus est et esse. Unde formae naturales non fiunt, sed compositum: ipsae vero formae educuntur de potentia materiae.

Ad tertium dicendum, quod potentia creandi repugnat rationi creaturae, tum per hoc quod est primi agentis; tum per hoc quod est infinita; et ideo ratio non sequitur.

ARTICULUS IV.

Ad quartum sic proceditur. Et 1. videtur quod mundus sit aeternus. Quod enim non habet contrarium, non est corruptibile neque generabile, quia generatio est ex contrario et corruptio in con-

(1) *Lege* in sua actione.

trarium. Sed caelum non habet contrarium: quod ejus motus ostendit, cui nihil est contrarium; ergo caelum est ingenerabile et incorruptibile, et ita aeternum, et per consequens totus mundus.

2. Praeterea, omne quod est semper in suo principio et suo fine, semper fuit et semper erit, quia post principium est aliud et ante finem: sed temporis nihil est accipere, nisi nunc, quod est principium futuri et finis praeteriti; et ita quando-cumque tempus est, est suum principium et finis; ergo tempus semper fuit, et semper erit; et per consequens motus et mobile.

3. Praeterea, si aliquid incipit moveri, oportet accipere aliquam aliam habitudinem moventis ad mobile nunc esse quam prius; hoc autem non potest esse nisi aliqua mutatio accideret vel ex parte mobilis, vel ex parte moventis; ergo antequam habet motum est alius motus; et sic motus semper fuit, et per consequens mundus.

4. Praeterea, omnis actio quae est ab agente non moto, nec per se, nec per accidens, est semper: quia quod agit postquam non agebat, fit de potentia actu agens, et ita exeundo in potentia in actum movetur vel per se vel per accidens: sed Deus non movetur per se neque per accidens; ergo omnis actio ejus est ab aeterno, et ita ab aeterno mundum fecit; mundus ergo est aeternus.

Sed contra. Omne quod creatur, ex nihilo est: sed mundus est creatus, ut ex supradictis patet; ergo ex nihilo: et ita habet esse post non esse; non ergo est aeternus.

Praeterea, si mundus fuit ab aeterno, et dies fuerunt ab aeterno, et similiter homines infiniti; ergo dies infiniti praecessissent diem istum, et infinitae animae remanerent a corporibus separatae: quorum utrumque impossibile est; quia ex primo sequeretur, quod infinita essent pertransita; ex secundo autem, quod essent infinita simul in actu.

Respondeo. Dicendum, quod sicut supra ostensum est, omnium quae sunt, praeter Deum, ipse Deus est causa; quae non agit quasi ex necessitate naturae, sed ex proposito voluntatis: agit enim per intellectum, qui est rerum principium mediante voluntate. Voluntas autem se habet ad utrumlibet: potest enim producere effectum suum, et non producere. Quia igitur Deus fecit mundum ad hoc, ut mundus Deum repraesentaret, fecit eum postquam non fuerat: hoc enim modo in mundo facultas divinae voluntatis repraesentatur, qua potest effectum producere et non producere. Unde fides catholica firmiter tenet, mundum non semper fuisse. Quidam vero philosophi, res non ex voluntate institutas esse, sed ex necessitate naturae ponentes, dixerunt, vel materiam, vel mundum esse aeternum; non quasi necessariis rationibus hoc asserentes, sed quibusdam probabilibus conjecturis. Unde dicitur in 1 Topicorum, quod sunt quaedam problemata de quibus rationem non habemus, ut utrum mundus sit aeternus.

Ad primum ergo dicendum, quod per rationem illam ostenditur a Philosopho in primo Caeli et mundi, quod caelum non exit in esse per generationem, quasi a causa naturaliter agente. Non autem removetur, quin exeat in esse per creationem, a causa voluntarie agente.

Ad secundum dicendum, quod cum dicitur, instans est principium futuri et finis praeteriti, intelligatur de instanti, secundum quod continuat

partes temporis. Unde non est necessarium quod primum instans sit finis alicujus temporis, neque quod ultimum sit principium temporis; quia neutrum continuat tempus tempori.

Ad tertium dicendum, quod ratio illa procedit de movente quod agit ex necessitate naturae, quale non est Deus; quia secundum immutabilem voluntatem Deus quandoque non produxit res, et quandoque produxit: quia ab aeterno voluit ut res producerentur postquam non fuissent.

Ad quartum dicendum, quod Deus non agit per actionem mediam, quae sit aliud a sua essentia: unde actio sua est aeterna, sicut et essentia sua est aeterna: sed effectus est temporalis secundum propositum suae voluntatis. Unde ex hoc quod aliquid de novo fit a Deo, non sequitur aliqua mutatio in Deo, sed solum in effectu.

QUAESTIO II.

Credamus ergo rerum creatarum. Hic quaeruntur quatuor: 1.^o utrum rerum omnium finis sit divina bonitas; 2.^o utrum omnia sint facta propter hominem; 3.^o utrum anima debuit corpori uniri; 4.^o de modo unionis.

ARTICULUS I.

Ad primum sic proceditur. Et 1. videtur quod non omnia facta sint propter Dei bonitatem. Ea enim quae sunt ad finem, aliquid conferunt ad finem, unde et utilia dicuntur: sed creaturae nihil conferunt ad divinam bonitatem; non ergo bonitas Dei est finis rerum.

2. Praeterea, bonitatem Dei percipit creatura cognoscendo et amando: sed non omnia possunt cognoscere et amare Dei bonitatem; ergo non omnia sunt propter eam, sicut propter finem.

3. Praeterea, agens facit effectum suum propinquiorem fini quantum potest: sed Deus non facit creaturas propinquas suae bonitati quantum potest, quia sic non posset eas facere meliores; ergo divina bonitas non est finis rerum.

Sed contra est, quod dicitur Prov. 16: « Uni-
« versa propter semetipsum operatus est Dominus. »

Praeterea, bonum habet rationem finis: sed Deus est primum et summum bonum; ergo ipse est ultimus finis omnium.

Respondeo. Dicendum, quod omne agens per voluntatem, quicquid agit, agit propter hoc quod est suae voluntatis finis. Nam quicquid agit, est volitum ab eo. Voluntas autem una ad unum ultimum finem ordinatur, ad quem ordinat quaecumque vult. Finis autem ultimus divinae voluntatis est sua bonitas, ut in principio libri dictum est: unde omnia quae facit, facit propter suam bonitatem, non constituendam, vel augendam, quia hoc est impossibile: sed multiplicandam eo modo quo multiplicari potest, scilicet per communicationem. Ideo ad hoc unaquaeque creatura facta est, sicut propter ultimum finem, ut divinam bonitatem suo modo particeps.

Ad secundum dicendum, quod ratio illa procedit quando agens agit ex appetitu finis, quem acquirere intendit; Deus autem non sic agit propter suam bonitatem, sed ex amore suae bonitatis, ut eam communicando multiplicet, sicut est possibile.

Ad secundum dicendum, quod duplex est modus

participandi divinam bonitatem: unus per assimilationem, et hic modus communis est omnibus creaturis, inquantum sunt bonae a bono Deo factae: alio modo per operationem, scilicet cognoscendo et amando; et hic modus proprius est rationalis creaturae, in quo etiam ratio beatitudinis consistit. Et ideo sola rationalis creatura facta est propter beatitudinem; sed omnes creaturae propter bonitatem.

Ad tertium dicendum, quod ratio illa procedit quando id quod est ad finem, perfecte potest consequi finem: tunc enim fit propinquus fini, quantum est possibile. Sed hoc non est in proposito: et ideo ratio non sequitur.

ARTICULUS II.

Ad secundum sic proceditur. Et 1. videtur, quod non omnia facta sunt propter hominem. Nobilior enim fit propter minus nobile, quia finis est nobilior eo quod est ad finem: sed aliquae creaturae sunt homine nobiliores, ut puta Angeli; ergo non omnia facta sunt propter hominem.

2. Praeterea, omnis res est propter suam operationem, ut dicitur in secundo de Caelo et mundo: sed aliquae res sunt, quarum operationes ad homines se non extendunt, ut lapilli qui sunt in visceribus terrae, et pisces qui sunt in profundo maris; ergo non omnia facta sunt propter hominem.

3. Praeterea, quodcumque id quod fit propter aliquem, cedit in nocumentum ejus, frustratur intentio agentis: sed Dei intentio non frustratur; cum ergo creaturae cedant in nocumentum hominis, secundum illud Sap. 14: « Creaturae Dei in odium
« factae sunt, et in tentationem animae hominum; » videtur quod creaturae non sint factae propter hominem.

Sed contra. Omne bonum quod accidit in universo, est intentum a Deo, alias casu accideret. Sed ex omnibus creaturis aliquid cedit in bonum hominis, secundum illud Rom. 8: « Diligentibus Deum
« omnia cooperantur in bonum; » ergo omnes creaturae aliquo modo factae sunt propter bonum hominis.

Praeterea, in omnibus quae sunt propter finem, posterius est finis prioris: sed creaturae sunt factae propter finem; cum ergo homo inter cetera sit ultimo creatus, ut patet Gen. 1; videtur, quod omnia sint propter hominem facta.

Respondeo. Dicendum, quod alicujus rei finis dicitur dupliciter. Uno modo principaliter, ad quem res principaliter ordinatur; et talis rerum finis est divina bonitas. Alio modo secundarius, per quem res principalem finem consequitur: et hoc modo finis omnium creaturarum est homo. Differentiter tamen ad hominem ordinantur creaturae superiores et inferiores. Superiores quidem, ut Angeli et corpora caelestia, per solam operationem per quam hominem perficiunt, et sic divinam similitudinem consequuntur, inquantum Deus est causa rerum: quae quidem assimilatio est finis cujuslibet creaturae, ut dictum est. Creaturae vero inferiores ordinantur ad hominem dupliciter. Uno modo quantum ad esse, inquantum imperfectiora appetunt formam perfectiorem, sicut elementa formam mixti, et sic deinceps usque ad formam hominis, quae est nobilissima inter formas inferiores. Alio modo quantum ad operationem, inquantum ex earum opera-

tionibus aliquod commodum homini acquiritur. Est etiam et tertius modus, quo omnia ad hominem ordinantur; scilicet per operationem hominis qui ex cognitione creaturarum in Dei cognitionem adducitur.

Ad primum ergo dicendum, quod objectio illa procedit de fine principali. Vel potest dici, quod nulla creatura est dignior homine, quantum ad finem suum ultimum.

Ad secundum dicendum, quod quamvis aliquae res sint quae non actu aliquid operantur circa hominem, natae sunt tamen operari, et homo natus est eas cognoscere, quamvis non actu cognoscit; et secundum naturalem appetitum materiae, tendunt in formam hominis, ut dictum est.

Ad tertium dicendum, quod ex hoc ipso quod creaturae aliquae nocent homini, vel quantum ad culpam occasionaliter, vel ad poenam active, cedunt in bonum hominis, vel ejusdem vel alterius.

ARTICULUS III.

Ad tertium sic proceditur. Et 1. videtur, quod anima rationalis corpori uniri non debuerit. Anima enim rationalis creata est propter beatitudinem, ut in litera dicitur: hoc autem consistit in cognitione Dei; cum ergo per corpus retardetur animae cognitio, secundum illud Sap. 9: « Deprimit terrena inhabitatio sensum multa cogitantem, » videtur quod anima corpori uniri non debuerit.

2. Praeterea, inaequalitas honorum a justo auctore non turbatur, nisi propter differentiam meritorum: sed nulla merita praecesserunt in Angelis et in animabus antequam crearentur; ergo divina justitia requirit quod aequales crearentur: et sic, cum Angeli non sint uniti corporibus, nec animae uniri debuerint.

3. Praeterea, anima est nobilissima formarum; si ergo convenienter unita est corpori, debuit uniri corpori nobilissimo; et ita corpori caelesti, vel etiam igni, quod est corpus subtilissimum, et inter corporalia nobilissimum; ejus contrarium videmus; et ita inconvenienter anima est corpori unita,

Sed contra. Si extrema sunt in natura, et medium in natura inveniri debet, ut patet per Philosophum, secundo de Caelo et mundo: sed invenitur in rebus creatura pure spiritualis, invenitur etiam pure corporalis; ergo ad completionem universi debuit esse anima composita ex spirituali et corporali, et ita spiritualis creatura, quae est anima, debuit corpori uniri.

Praeterea, perfectio in rebus consistit secundum quemdam circulum, in quantum scilicet ultima ad principium, per quamdam conjunctionem redeunt: sed inter creaturas, infima est corporalis, suprema vero spiritualis, media autem spiritus rationalis; debuit ergo, ad hoc quod esset perfectio in rebus, spiritus rationalis corpori uniri.

Respondeo. Dicendum, quod causa conjunctionis animae rationalis ad corpus, diversimode assignatur. Origenes namque pro causa assignat motum liberi arbitrii, per quam quaedam spirituales creaturae peccando meruerunt corporibus alligari. Sed ista positio abjicienda est. Primo, quia repugnat fidei, per quam credimus propter bonitatem Dei, non solum invisibilia, sed etiam visibilia esse creata, secundum illud Gen. 1: « Vidit Deus cuncta quae fecit etc. » Non ergo propter malitiam rationalis creaturae, sunt visibiles creaturae factae: sed quia

bonum est. Secundo, quia repugnat naturae ipsius animae, quae non per accidens, sed naturaliter corpori unitur; alias homo non esset ens naturale. Et ideo ex ipsa natura animae, unionis ratio est accipienda. Voluit enim Deus intellectuales creaturas, per quosdam gradus distinguere; inter quas anima humana, ordine naturae, est infima, sicut materia prima est infimum in genere sensibilibus. Unde, sicut materia prima in sui essentia considerata, est denudata omnibus formis, ita anima humana est formis denudata intelligibilibus: et ideo oportuit ut corpori uniretur, quatenus per corporea instrumenta, intelligibiles species a rebus, ad ipsam deferrentur: et in hoc includuntur duae rationes, quas Magister assignat. Tertia namque quam ipse ponit, est quaedam utilitas inde proveniens; scilicet quoddam exemplum futurae beatitudinis.

Ad primum ergo dicendum, quod corpus impedit animam a cognitione, ratione corruptionis, quae sequuta est ex peccato, et non ratione naturae.

Ad secundum dicendum, quod Deus ex ordine sapientiae suae, creaturas intellectuales inaequales instituit, ut diversi bonitatis gradus implerentur; quos omnes melius est esse, quam unum eorum tantum. Nec hoc tamen repugnat justitiae. Nam tales dignitates naturales, non attribuuntur alicui creaturae ex debito, sed ex Dei beneplacito.

Ad tertium dicendum, quod corpori caelesti conjungitur nobilior substantia, secundum quosdam, quam sit anima humana; scilicet intellectiva movens orbem, vel anima orbis. Potest tamen dici quod corpus caeleste vel ignis sit nobilior corpore humano quantum ad aliquid, non tamen quantum ad aptitudinem perficiendi operationes animae.

ARTICULUS IV.

Ad quartum sic proceditur. Et 1. videtur, quod anima non uniat corpori ut forma. Quod enim in se est substantia substans, non potest alteri ut forma uniri: quia quod in se subsistit, per se habet esse completum, et sic unio ad aliud est ei accidentalit: quod non convenit (1) de forma, quae secundum esse suum substantiale materiae unitur. Sed anima est in se substantia substans; quod patet ex hoc, quod sine corpore remanet.

2. Praeterea, anima rationalis, vel est intellectus, vel intellectivae potentiae subjectum. Sed intellectiva potentia nullius corporis actus est, ut dicitur in tertio de Anima; ergo anima rationalis non unitur corpori ut forma.

3. Praeterea, omnis forma substantialis immediate unitur materiae, ut patet in 8 Metaphysicorum; sed anima unitur corpori mediantibus potentiis et spiritibus, ut quidam dicunt; ergo anima non unitur corpori ut forma.

Sed contra est, quod Philosophus dicit in secundo de Anima, quod anima est actus corporis physici, potentia vitam habentis.

Praeterea, unamquodque collocatur in specie per suam formam: sed homo collocatur in specie per animam rationalem; ergo anima rationalis est forma corporis.

Respondeo. Dicendum, quod sicut dictum est, anima rationalis inter ceteras creaturas intellectuales, est inferior ordine naturae. Unde esse ejus est

(1) *Lege* contingit.

quodammodo affine (1) et proximum rebus corpora-
libus, ita quod esse animae rationalis, potest com-
municari corpori per modum quo communicatur
materiae esse formae. Alio tamen modo est de ani-
ma et de aliis formis. Nam esse quod acquiritur
materiae per alias formas, non est illarum forma-
rum ut subsistentium: sed esse quod acquiritur ho-
mini est ipsius animae principaliter, ut subsistentis,
et in ejus consortium perducitur corpus, ut illud
idem esse fiat compositi quod est animae subsi-
stentis. Et ideo anima rationalis in se considerata,
non solum est forma, sed substantia subsistens; et
ex hoc habet, quod possit per se habere operatio-
nem sine organo corporali: unde et movet corpus:
et sic unitur corpori ut motor et ut forma. Patet
ergo, quod homo est quoddam medium constitutum
inter creaturas pure spirituales et pure corporales,
communicans spiritualibus secundum animam, et
corporalibus secundum corpus: et sic reperitur in
homine hoc quod dicit Dionysius 7 cap. de Div.
nom., quod divina sapientia conjungit fines primo-
rum principii secundorum. Quidam vero posue-
runt quod anima unitur corpori solum ut motor
mobili, dicentes animam esse in corpore sicut nau-
ta est in navi. Sed secundum hoc, homo qui est com-
positus ex anima et corpore, non esset ens per se,
sed ens per accidens: quod est absurdum.

Ad primum ergo dicendum, quod anima, quamvis
sit substantia per se subsistens, tamen uniri quidem
potest ut forma, ita quod corpus uniatur ei quan-
tum ad ipsum esse suum substantiale, non quan-
tum ad aliquod aliud: quia sic unio illa esset acci-
dentalis.

Ad secundum dicendum, quod duplex est forma,
ut ex dictis patet. Quaedam quae secundum esse
suum a materia dependet, utpote per se non sub-
sistens: et a tali forma nihil potest procedere, quod
non sit actus corporis. Quaedam vero est forma,
ut anima rationalis, quae secundum esse suum non
dependet a materia, utpote in se subsistens: et ideo
ab anima rationali, quamvis sit secundum suam
essentiam corpori unita, possunt progredi quaedam
vires quae sunt actus corporis, ut sensitivae et
nutritivae; et quaedam quae non, ut intellectivae.

Ad tertium dicendum, quod spiritus et poten-
tiae, sunt media inter animam et corpus, prout
anima unitur corpori ut motor; quia his median-
tibus movet corpus: non autem prout unitur ei ut
forma: sic enim nihil est medium inter animam
et corpus, ut dicitur in 8 Metaphysicorum: nisi forte
per modum, quo dispositio praeparans materiam ad
formam, medium dicitur inter ea quodammodo.

DISTINCTIO II.

De angelica itaque natura etc. (V. edit. nostrae tom. VI,
pag. 401.)

Hic duplex quaestio. Prima de duratione Angeli.
Secunda de loco creationis ejus.

QUAESTIO I.

Circa primum quaeruntur duo: 1.^o utrum An-
gelus fuerit creatus ante creaturam corporalem; 2.^o
utrum ejus duratio, quae aevum dicitur, habeat
et posterius.

(1) *Al.* a fine.

ARTICULUS I.

Ad primum sic proceditur. Et 1. videtur quod
Angeli ante creaturam corporalem fuerint creati.
Basilus enim dicit in Exam., quod Angeli ante crea-
ti fuerant, quam creatura corporalis, ejus creatio-
nem Moyses ibi prosequitur; et ideo Moyses de re-
rum creatione loquens, de Angelis mentionem non
facit. Aliter enim insufficiens ejus narratio videretur.

2. Praeterea, nullus potest habere cognitionem
rei faciendae, nisi praexistat factioni illius; sed se-
cundum Augustinum in libro super Genesim ad li-
teram, Angelus accepit in verbo cognitionem creaturae
corporalis faciendae; ergo ipse fuit creatus ante crea-
turam corporalem.

5. Praeterea, plus distat creatura spiritualis a
corporali, quam corporales abinvicem: sed creatu-
rae corporales non sunt omnes factae simul; ergo
nec creatura spiritualis et corporalis simul.

Sed contra est quod dicitur Eccl. 18: « Qui
vivit in aeternum, creavit omnia simul: » quod
oportet intelligi saltem secundum materiam. Sed
materia Angeli non est sine Angelo; ergo Angelus
creatus est simul cum aliis creaturis.

Praeterea, si Angelus ante corporalia creatus
fuit, oportet quod nunc creationis Angeli, sit prius
quam nunc creationis mundi: sed ubicumque est
nunc prius et posterius, ibi est tempus; ergo se-
cundum hoc, tempus fuisset ante mundum: quod
est impossibile.

Respondeo. Dicendum, quod quidam dixerunt,
quod impossibile fuit Angelos ante creaturam cor-
poralem creari: quia non potest intelligi quod sint
distincti abinvicem, nisi in diversis locis existant.
Diversitas autem locorum, sine situ intelligi non
potest. Sed hoc non videtur efficaciam habere: quia
illa solum loco distinguuntur de necessitate, de quo-
rum ratione est situs, sicut quae subjacent quantitati
dimensionum: quod de Angelis dici non potest, cum
incorporei sint. Unde, sicut eorum substantia non
dependet ab aliqua dimensione, ita nec eorum di-
stinctio. Alii vero posuerunt Angelos ante crea-
turam corporalem creatos, sicut Basilus et Gre-
gorius Emissenus et multi antiquorum doctorum.
Quod quidem Deo possibile fuit: tamen ad hoc pro-
bandum, cum ex voluntate divina dependeat, non
potest efficax ratio haberi. Sed quia auctoritas in
Scriptura divina vel canonica expressa non inve-
nitur, est aliqua probabilis ratio, per quam Augu-
stinus et omnes moderni latinorum, ponunt An-
gelos simul cum natura corporali creatos fuisse. Ex
Angelis enim et creaturis corporalibus constituitur
universum, cujus partes principales decuit simul
esse, ut ostenderentur omnes univoco ordine, ad
unum quid pertinere.

Ad primum ergo dicendum, quod Basilus hu-
jusmodi opinionis fuit. Moyses vero praetermisit
Angelorum creationem, non quia ante creati fuis-
sent, sed quia invisibilia radi populo tradi non
poterant. Vel secundum aliquos, per caelum spiri-
tualis natura intelligitur.

Ad secundum dicendum, quod de re jam facta
potest accipi cognitio ejus ut faciendae, si consi-
deretur in causis suis, ex quibus procedit: multo
magis de re quae est in fieri: et sic non oportet
quod Angeli praexistenterent rerum factioni, sed simul
esse inciperent.

Ad tertium dicendum, quod creaturae corporales

creatae sunt simul in materia, sed non in forma, secundum quosdam. Sed Angeli materia non potest esse sine eo, si materiam habet. Unde oportet quod totaliter simul cum ceteris creaturis creatus sit.

ARTICULUS II.

Ad secundum sic proceditur. Et 1. videtur, quod in aevo, quod est duratio Angeli, sit prius et posterius. Quia per hoc differt in re aliqua esse et fuisse, quod est in ejus duratione accipere prius et posterius. Si ergo in duratione Angeli non est accipere prius et posterius, non differt in Angelo esse et fuisse; sed Deus non potest facere Angelum non fuisse; ergo non potest facere Angelum non esse: quod est impossibile.

2. Praeterea, si in aevo non sit prius et posterius, tota duratio Angeli simul est in actu; sed duratio Angeli est infinita ex parte post; ergo aliquod creatum est actu infinitum.

3. Praeterea, omnia successiva eadem mensura mensurantur, scilicet tempore, quamvis unum eorum sit prius et causa alterius: sicut motus caeli est causa motus pluviae, et tamen uterque motus tempore mensuratur; ergo et omnia alia, in quibus non est prius et posterius, eadem mensura mensurantur. Si ergo duratio Angeli non habet prius et posterius, non aliqua mensura mensurabitur quam duratione Dei, scilicet aeternitate; et sic Angelus erit aeternus: quod est inconueniens.

Sed contra, ubicumque intelligitur prius et posterius, ibi intelligitur tempus; si ergo in duratione Angeli sit prius et posterius, videtur quod mensuretur tempore.

Praeterea, prius et posterius in tempore causatur a priori et posteriori in motu, ut dicitur in 4. Physicorum: sed in esse Angeli, quod mensurat aevum, non est aliquis motus; ergo in aevo est prius et posterius.

Respondeo. Dicendum, quod Angelus dupliciter potest considerari. Uno modo secundum omnia quae ad ipsum pertinent; et sei mensuratur tempore. Est enim circa Angelum considerare aliquid secundum prius et posterius, in quantum operationes et affectiones ejus sunt sibi invicem succedentes: et sic dicit Augustinus, qq. super Genesim, quod creaturam spiritualem movet Deus per tempus. Alio modo potest considerari substantia Angeli secundum esse suum, praeter ea quae ipsum circumstant. Et sic, cum in esse Angeli non sit aliquis motus vel potentia, non potest tempore mensurari, sed aevo: et ita eum mensura sit homogenea mensurato, sicut Angeli esse simplex non habens prius et posterius, eo quod caret motu, ita aevum. Quamvis quidam dicunt quod aevum habet prius et posterius, sed sine innovatione, tempus vero cum innovatione. Quod non est intelligibile: quia duae partes durationis se invicem non includentes, non possunt esse simul: sicut annus includit mensem, non autem unus dies annum. Unde si ponuntur duae partes aevi, quarum una sit prior et alia posterior, sequitur quod una pars abscedat, et altera de novo adveniat; et ita erit ibi innovatio.

Ad primum ergo dicendum, quod rebus immobilibus non convenit differenter esse et fuisse, si considerentur secundum se; sed solum quando considerantur secundum habitudinem ad mensuram subjacentem vel adjacentem, scilicet tempus:

sic et in Deo differenter intelligimus esse vel fuisse secundum habitudines ad diversas partes temporis, ita etiam et in Angelo differt esse et fuisse. Et ex hac differentia sequitur quaedam necessitas circa hoc quod est Angelum fuisse, in quantum implicatur esse Angeli simul cum alia parte temporis; non autem cum dicimus Angelum esse.

Ad secundum dicendum, quod duratio Angeli non est infinita quasi extensive, sed solum negative, in quantum non deficit; sic et panis potest dici infinitus.

Ad tertium dicendum, quod omnes motus successivi conveniunt in uno genere; et ideo ad unam mensuram reduci possunt: non autem omne permanens est unius generis. Nam esse divinum est subsistens, non autem esse Angeli: et ideo non eadem mensura mensuratur.

QUAESTIO II.

Deinde quaeritur de caelo empyreo, in quo Angeli dicuntur esse creati. Et circa hoc quaeruntur duo: 1.^o utrum caelum empyreum sit corpus; 2.^o utrum habeat influentiam super alia corpora.

ARTICULUS I.

Ad primum sic proceditur. Et 1. videtur, quod caelum empyreum non sit corpus. Nullus enim locus corporeus potest incorporeo repleti; sed caelum empyreum repletum est Angelis in sui creatione, ut in littera dicitur; ergo caelum empyreum non est corpus.

2. Praeterea, omne corpus naturale est mobile: sed caelum empyreum non est mobile, alias motus ejus participaretur secundum varietatem situs aliquis corporis delati, sicut patet de aliis orbibus qui moventur; ergo caelum empyreum non est corpus naturale; mathematicum autem constat quod non est, quia mathematica sunt in imaginatione tantum.

3. Praeterea, omne corpus, aut est lucidum actu, ut ignis, aut est lucidum in potentia ut aer, aut opacum ut terra; sed caelum empyreum non est opacum ut terra, quia sic esset ignobile corpus: nec est lucidum in potentia tantum, quia sic nihil differret a caelo chrySTALLINO: nec est lucidum actu, quia sic continuo aer ex ejus praesentia illuminaretur, cum sit multo majus, quam corpus solis; ergo caelum empyreum non est corpus.

Sed contra. Corporum locus non potest esse nisi corporeus; sed caelum empyreum ponitur locus Christi et sanctorum, qui post resurrectionem corpora habent; ergo caelum empyreum est corpus.

Praeterea, invenitur in caelis aliquod corpus quod est totum diaphanum, sicut caelum chrySTALLINUM: aliquod quod est partim lucidum, sicut caelum SYDEREUM; ergo est aliquod quod est totum lucidum, et hoc est caelum empyreum.

Respondeo. Dicendum, quod omnes creaturae corporales propter hominem factae sunt. Quaedam vero subserviunt ei quantum ad esse naturale, quaedam vero quantum ad esse gratiae. Quantum ad naturam quidem, deserviunt ei corpora caelestia per motum, et alia etiam elementa hujus mundi, in quantum per ea corpus humanum generatur, nutritur et conservatur. Sic autem non deservit ei caelum empyreum; sed in ordine ad gratuitum

Dei beneficium: quod quidem exhibetur homini, non solum secundum animam, sed etiam per redundantiam ad corpus, ut etiam corpus glorificetur. Et quia ista perfectio corporis excedit omnem perfectionem naturae, ideo super omnia alia corpora naturaliter agentia, est a Deo provisum quoddam corpus, in quo praecipue sit locus corporum gloriosorum; et hoc est caelum empyreum.

Unde, et per quandam congruentiam omnibus spiritibus bonis et Deum contemplantibus, caelum empyreum pro loco deputatur; et ideo dicitur Angelus in caelo empyreo creatus esse.

Ad primum ergo dicendum, quod repletio illa non est intelligenda corporaliter, sicut locum implet corpus: sed inquantum ex praesentia spirituum, locus ille honorabilis redditur.

Ad secundum dicendum, quod alia corpora naturalia ordinantur ad hominem, secundum quod mutabilitati ejus deserviunt, quantum ad praesentem statum: sed caelum empyreum ordinatur ad ejus immutabilem felicitatem: et ideo inter alia corpora solum est immobile secundum omnes species motus.

Ad tertium dicendum, quod caelum empyreum lucidum est; sed tamen ratione suae subtilitatis, lux ejus oculis nostris perceptibilis non est, sicut corpora radios emittentia, quae quandam spissitudinem habent: unde et ignis in propria sphaera dicitur non lucere, ratione suae raritatis.

ARTICULUS II.

Ad secundum sic proceditur. Et 1. videtur, quod caelum empyreum influentiam habeat in corpora inferiora. Augustinus enim dicit in tertio de Trinitate, quod corpora crassiora et firmitiora per subtiliora et potentiora quodam ordine reguntur: sed caelum empyreum est potentius et subtilius aliis corporibus: ergo ad regimen aliorum influentiam habet.

2. Praeterea, extrema non conjunguntur nisi per media: sed caelum empyreum est medium ordine naturae inter animam rationalem et corpus elementatum infra animam, et supra corpus praedictum existens; ergo mediante aliqua influenza caeli empyrei, anima rationalis corpori conjungitur; et sic caelum empyreum influentiam habet in corpora inferiora.

3. Praeterea, nobilissimo corpori magis competit influere in alia, quam ab alio recipere impressionem. Sed caelum empyreum recipit impressionem ab alio: quod patet ex hoc quod in eo formantur voces sanctorum laudantium Deum in patria; ergo multo magis caelum empyreum in alia corpore influit.

Sed contra. Nullum corpus movet nisi motum, ut a philosophis probatur: sed caelum empyreum non movetur, ut dictum est; ergo non movet alia corpora, et ita in alia corpora influentiam non habet.

Praeterea, ex effectibus devenimus in causas. Si ergo caelum empyreum aliquem effectum in corporibus inferioribus haberet, naturali ratione posset deveniri in cognitionem caeli empyrei: cujus contrarium apparet ex hoc, quod philosophi de caelo empyreo mentionem non fecerunt.

Respondeo. Dicendum, quod caelum empyreum, sicut dictum est, principaliter ordinatur ad gloriam beatorum: ad quam quidem gloriam, reliqua cor-

pora nihil operantur, nisi a remotis, inquantum serviunt homini secundum necessitatem suae naturae. Quod autem ordinatur in aliquem finem, principaliter sic se habet, quod omnis ejus operatio in illum finem refertur; et ideo cum dispositiones corporum inferiorum non pertineant ad illam gloriam beatorum, quae est finis caeli empyrei, caelum empyreum non efficit dispositionem aliquam in corporibus aliis: quamvis quidam contrarium opinentur.

Ad primum ergo dicendum, quod Augustinus loquitur de corporibus mobilibus, quae ordinantur ad unum finem, scilicet ad gubernationem naturae; in quo ordine non est caelum empyreum.

Ad secundum dicendum, quod inter animam et corpus nihil cadit medium, sicut nec inter formam et materiam, ut dicitur in 8 Metaph., nisi per modum quo dispositio per quam materia est propria tali formae, dicitur esse media inter materiam et formam. Dispositio autem quae in corpore humano requiritur, ad hoc quod sit propria materiae animae rationalis, cum ad statum naturae pertineat, non dependet a caelo empyreo, sed ab aliis corporibus naturalibus.

Ad tertium dicendum, quod duplex est laus Dei; scilicet mentalis et vocalis. De prima non est dubium, quin Sancti et Angeli in patria Deum laudent; sed huic laudi caelum empyreum non deservit. Laus autem vocalis Angelis, et animabus non competit, sed nec hominibus post resurrectionem, ut quibusdam videtur. Cujus contrarium manifeste dicitur in Psalm. 149: « Exaltationes Dei in gutture eorum. » Glossa: « Quia in corde et lingua non desinunt laudare Deum a quo aeterna habent. » Unde dicendum est quod vocaliter Deum laudant, non propter aliquam necessitatem, sed ad hoc, ut quicquid in eis est, secundum modum suum gloria repleatur et Deo conjungatur. Nec hoc erit ad ignobilitatem caeli empyrei, si in eo formetur laus Dei per motum membri gloriosi.

DISTINCTIO III.

Ecce ostensum est etc. (V. edit. nostrae tom. VI, pag. 409.)

Hic est duplex quaestio. Primo de his quae pertinent ad naturam Angeli. Secundo de his quae pertinent ad gratiam, vel culpam.

QUAESTIO I.

Circa primum quaeruntur duo: 1.º de simplicitate Angeli; 2.º de distinctione Angelorum adinvicem.

ARTICULUS I.

Ad primum sic proceditur. Et 1. videtur, quod Angelus sit compositus ex materia et forma. Ut enim dicit Boetius in libro de Trinitate, forma simplex subjectum esse non potest: sed Angeli sunt subjectum virtutis et gratiae, et intelligibilium specierum; ergo Angeli non sunt formae simplices, et ita sunt compositi ex materia et forma.

2. Praeterea, in Angelis personalitas invenitur, ut in littera dicitur, et ita in eis est individuatio, quae est de ratione personae: individuationis autem principium est materia; ergo in Angelis est materia.

3. Praeterea, omne quod est, vel est actus purus

vel potentia pura, vel compositum ex utraque. Sed Angelus non est actus purus, quia sic in nullo differret a Deo; nec est potentia pura, quia sic in nullo differret a prima materia; ergo est compositus ex potentia et actu, et ita ex materia et forma.

Sed contra est, quod Boetius dicit in lib. de Duabus naturis: quod omnis natura incorporeae substantiae, nulli materiae innitur fundamento, sed Angelus est substantia incorporea; ergo materiam non habet.

Praeterea, Dionysius dicit 4 cap. de Divinis nominibus, quod Angeli intelliguntur immateriales et incorporeales.

Respondeo. Dicendum, quod circa compositionem Angeli est triplex opinio. Quidam enim dicunt quod est compositus ex materia et forma: quod non videtur verum propter duo. Primo ratione intellectualis naturae. Nam immunitas a materia, secundum Philosophum, est causa qua aliqua substantia sit intellectualis: cuius signum est, quod species intelligibiles actu fiunt per hoc quod separantur a materia, et omnibus materiae conditionibus: in quantum vero sunt intelligibiles actu, sunt unum cum intellectu: quia intellectus in actu est intelligibile in actu, secundum Philosophum. Secundo ratione corporeitatis. Nam oportet omnia, quae componuntur ex materia et forma, in materia communicare, eo quod totius distinctionis principium, est forma. Distinctio autem rerum ex materia una, praesupponit materiae divisionem, ut in diversis partibus materiae, diversae formae recipiantur, ad diversas res constituendas: diversae autem partes materiae intelligi non possunt, nisi intellectis dimensionibus in materia, secundum quas dividatur: et sic, si Angelus esset ex materia et forma compositus, sequeretur quod haberet dimensiones, et esset corporeus. Et ideo alii dicunt, quod est compositus ex natura et supposito, sicut et hic homo non est sua humanitas. Sed hoc in idem redit cum primo. Nam hoc individuum demonstratum addit super naturam communem materiam designatam, quae est individuationis principium. Unde differentia naturae et suppositi non invenitur nisi in habentibus materiam. Unde Avicenna dicit quod quidditas simpliciter, est ipsum simplex. Et ideo dicendum est, secundum Boetium, quod componitur ex quod est, et esse. Nihil enim est suum esse nisi Deus, qui non habet causam sui esse. Unde et natura, sive substantia Angeli, est aliud quam eius esse. Et ideo dicitur (1) in libro de Causis, quod intelligentia non est esse tantum, sed est forma et esse.

Ad primum ergo dicendum, quod Boetius loquitur de forma quae est omnino simplex, sicut natura divina quae est suum esse, quae est purus actus, et ideo subjectum esse non potest: hoc autem non est de Angelo, et ideo ratio non sequitur.

Ad secundum dicendum, quod sicut forma quae est receptibilis in materia, individuatur per materiam in qua recipitur, ita forma immaterialis individuatur ex hoc ipso quod per divisionem materiae dividi non potest: et per hunc modum ponitur personalitas in Angelo.

Ad tertium dicendum, quod esse est actus existentis. Unde substantia eius comparatur ad esse, sicut potentia ad actum. Et ideo, cum in Angelo differat substantia et esse, erit ibi actus et potentia: non autem materia et forma, sed forma et esse.

(1) *Id.* dicitur esse.

ARTICULUS II.

Ad secundum sic proceditur. Et 1. videtur quod in Angelis distinctio esse non possit. Distinctio enim, secundum Damascenum, est principium numeri. Numerus autem quantitas est, cuius subjectum est materia: cum ergo in Angelis non sit materia, ut dictum est, videtur quod nec numerus aut distinctio possit esse ibi.

2. Praeterea, in Angelis non est compositio naturae et suppositi, ut dictum est: sed unum suppositum non est pluribus Angelis commune; ergo nec una natura potest esse pluribus communis: hoc autem esset si in hoc genere, quod est Angelus, plures Angeli invenirentur; ergo non possunt esse plures Angeli.

3. Praeterea, si sint plures Angeli, aut differunt specie, aut numero; sed numero tantum differre non possunt: haec enim differentia est secundum distantiam materiae, non autem formae. Similiter nec specie differre possunt, cum omnes communicent in ultima differentia specifica, secundum quod sunt intellectuales: quam oportet esse ultimam, quia est id quod est nobilissimum in Angelis, quod convenit ultimae differentiae constitutivae; ergo Angeli adinvicem distinguuntur.

4. Praeterea, plus differt anima ab Angelo quam Angeli abinvicem. Sed Angelus et anima specie non differunt: nam unibile corpori et non unibile, per quae differre videntur, non sunt differentiae specificae, ut videtur, cum unibile conveniat animae secundum quod est forma: sic autem non est species nec in specie, sed pars speciei; ergo nec Angeli abinvicem specie distinguuntur, et sic idem quod prius.

Contra. Sicut Angelus est substantia incorporea, ita et anima. Sedveniuntur plures animae, etiam unius speciei: ergoveniuntur plures Angeli, etiam in una specie.

Praeterea, dicitur Dan. 7: « Millia millium ministrabant ei etc. »: ergo in Angelis est numerus nobis per Scripturam determinatus, et per consequens distinctio.

Respondeo. Dicendum, quod circa distinctionem est multiplex opinio. Quidam namque posuerunt omnes Angelos, vel saltem aliquos, qui sunt unius ordinis in eadem specie esse. Sed hoc non potest esse, nisi ponantur ex materia et forma compositi. Nam diversitas formae diversitatem speciei inducit. Diversitas autem materiae facit diversitatem secundum numerum tantum, ubi est forma unius rationis. Dato autem, quod essent ex materia et forma compositi, adhuc non possent numero tantum distingui, cum distinctio materiae unius rationis dimensiones requirat, quae in Angelis non sunt: materia autem, si non sit unius rationis, nec formam unius rationis habebit; et sic sequitur diversitas speciei. Et ideo alii dicunt quod Angeli, cum sint substantiae immateriales, differunt secundum causam et causatum. Sed hoc est contra fidem. Nam Angeli, cum sint immateriales, exeunt in esse per creationem, cuius solus Deus est auctor. Et ideo dicendum est secundum alios, quod omnes Angeli differunt abinvicem specie: quae quidem differentia sumitur ex diverso gradu perfectionis, secundum quod natura unius Angeli, magis vel minus Deo appropinquat, sicut in diversis speciebus rerum naturalium invenimus; et in ultimo horum gradu, est

anima rationalis, inter ceteras substantias incorporeas minus perfectam naturam habens; et ideo est in quodam confinio naturae corporae cui unitur ut forma, et incorporeae cui per intellectum assimilatur.

Ad primum ergo dicendum, quod numerus qui est species quantitatis, ut in primo libro dictum est, non invenitur nisi in habentibus quantitatem continuam: in aliis autem non invenitur multitudo opposita uni, quod est principium numeri.

Ad secundum dicendum, quod in substantiis simplicibus in quibus non est aliud natura quam ipsum suppositum, potest esse multitudo specierum in uno genere, non autem multitudo individuorum in una specie, quia individuum addit supra speciem naturam signatam per quam suppositum a natura distinguitur, et in eadem specie plura individua dividuntur. Sed species non addit supra genus aliam naturam, sed designationem seu determinationem naturae communis ad specialem modum perfectionis.

Ad tertium dicendum, quod Angeli sibiinvicem specie distinguuntur, et non numero tantum: intellectuale autem non est differentia specifica, sed pertinet ad naturam generis. Quod autem dicitur, quod differentia specifica est nobilissimum in unoquoque, intelligendum est non per modum, quo una forma est alia nobilior, sed per modum quo determinatum est nobilius indeterminato, sicut actus potentia.

Ad quartum dicendum, quod anima dupliciter potest considerari. Uno modo in quantum est forma; et sic neque est species, neque in specie, sed pars speciei. Alio modo ut substantia quaedam per se existens sine corpore: et quantum ad hoc potest poni in specie; et sic specie ab Angelo differt, in quantum ultimum gradum perfectionis in natura intellectuali tenet. Ex hoc autem habet anima, quod sit corpori unibilis, et quod sit rationalis, non pure intellectualis; et quod recipiat non solum a superioribus, sed etiam ab inferioribus id est a sensibilibus, et quod habeat liberum arbitrium vertibile post electionem, sicut et ante, et quod loquatur voce corporali. Unde per hoc quidam assignant differentiam inter Angelum et animam: non quod sint differentiae essentiales: sed in quantum essentiales differentiae, per convenientia naturalia innotescunt.

Ad primum vero, quod contra objicitur, dicendum, quod anima, licet non habeat materiam ex qua sit, sicut nec Angelus, habet tamen materiam in qua est, in quantum est forma corporis, quod non habet Angelus. Et ideo non est simile.

Ad secundum dicendum, quod in verbis illis ponitur determinatum pro indeterminato. Ut enim ostendatur multitudo Angelorum nostram cognitionem excedens, designatur per maximos numeros qui apud nos sunt, per se invicem multiplicatos, scilicet decem, centum et mille, per quos etiam solet perfectio designari.

QUAESTIO II.

Deinde quaeritur de his quae pertinent ad culpam vel gratiam. Et circa hoc quaeruntur duo: 1.^o utrum diabolus in primo instanti suae creationis malus esse potuerit; 2.^o utrum boni Angeli in primo instanti suae creationis habuerint gratiam.

S. Th. Opera omnia. V. 22.

ARTICULUS I.

Ad primum sic proceditur. Et 1. videtur quod diabolus in primo instanti suae creationis fuit malus. Augustinus enim super Genesim ad literam dicit: « Ea quae facta sunt leguntur in principio Genesim simul esse facta; » sed in primo instanti creationis caeli et terrae creati sunt Angeli; ergo in primo instanti quo Angeli creati sunt, facta est distinctio tenebrarum et lucis, quae quidem secundum Augustinum intelligenda est per conversionem vel aversionem angelicae naturae ad Deum; ergo in primo instanti suae creationis aliqui Angeli sunt aversi a Deo, et per consequens mali.

2. Praeterea, natura spiritualis potior est quam corporalis; sed natura corporalis in primo instanti, quo esse incepit, habet suam operationem, sicut ignis statim cum accenditur illuminat; ergo Angelus in primo instanti creationis potuit habere actum liberi arbitrii per quem fuit malus.

3. Praeterea, si diabolus aliquando non fuit malus, et postmodum est malus, est assignare aliquod instans in quo ultimo fuit innocens, et primum in quo fuit malus: quae quidem oportet esse duo, et non unum: quia non simul fuit malus et innocens: inter quaelibet autem duo instantia est tempus medium: est ergo dare aliquod tempus, in quo non fuit malus nec innocens: quod est impossibile. Et ita non potest dici, quod aliquando non fuerit malus.

Sed contra est quod dicitur Ezech. 28: « In delitiis paradisi Dei fuisti: » quod de diabolo exponitur: hoc autem non convenit diabolo postquam fuit malus; ergo aliquando non fuit malus.

Praeterea, Isa. 15 dicitur: « Quomodo cecidisti de caelo lucifer qui mane oriebaris? » non autem cecidit qui nunquam stetit: ergo diabolus aliquando fuit in caelo; et ita non semper fuit malus, sed in aliquo instanti fuit non malus.

Respondeo. Dicendum, quod quidam dixerunt, quod diabolus in primo instanti suae creationis fuit malus: et hoc dupliciter. Nam quidam eorum attribuant malitiam naturae ipsius, ut Manichaei: quod esse non potest: quia cujuslibet naturae quae est propter Deum, Deus est causa; nec potest esse nisi bonum, quod ab ipso est. Quidam vero attribuerunt malitiam voluntati, dicentes, quod per liberum arbitrium diabolus in primo instanti suae creationis peccavit et malus fuit. Sed hoc esse non potest. Cum enim peccatum sit contra naturam, non potest esse, quod naturali inclinatione voluntas Angeli tenderet in peccatum: sed hoc accidit per collationem quandam et deliberationem, quae non potest esse in instanti: et ideo magis potest dici quod in primo instanti suae creationis non peccaverit. Et propterea haec secunda opinio, tanquam primae vicina, a magistris est reprobata. Unde restat, ut communiter tenetur, quod in primo instanti suae creationis, diabolus bonus fuerit.

Ad primum ergo dicendum, quod omnis operatio creaturae jam praexistentis, pertinet ad opus propagationis naturae, non ad opera sex dierum, in quibus natura est instituta. Unde et aversio vel conversio liberi arbitrii, non pertinet ad opera sex dierum; computatur tamen inter opera sex dierum, secundum dictam expositionem, per quamdam anticipationem, sicut et quod dicitur: Germinet terra herbam virentem, et alia hujusmodi, ut Augustinus

dicit. Et ideo non oportet dicere secundum ejus expositionem, quod diabolus in primo instanti suae creationis fuerit malus; sed quod hoc factum fuerit per temporis processum, primo (1) ipsis naturis spiritualibus institutis.

Ad secundum dicendum, quod peccare non est actus naturalis liberi arbitrii, sed magis contra naturam: et ideo non sequitur quod in primo instanti peccare potuerit, ex hoc quod res naturales habent suas operationes naturales in primo instanti quo esse incipiunt.

Ad tertium dicendum, quod operationes Angeli nullum ordinem habent ad motum caeli. Unde non mensurantur aliquo modo motus liberi arbitrii ipsorum tempore quo mensurantur motus corporales quod est continuum, sed quodam tempore non continuo quod in vicissitudine operationum intelligitur: et ideo non oportet quod inter illud instans quo ultimo fuit innocens, et illud quo primo fuit malus, sit tempus assignare, eo quod non oportet ea continuari adinvicem; sicut nec operationes Angeli continuantur, sed consequenter se habent. Secus autem est de motibus liberi arbitrii in nobis qui aliquo modo mensuratur tempore continuo.

ARTICULUS II.

Ad secundum sic proceditur. Et 1. videtur quod Angeli in gratia creati non fuerunt. Ut enim dicit Augustinus super Genesim ad litteram, per hoc quod dicitur Genesis 1: « Fiat lux et facta est lux, » intelligitur illuminatio bonorum Angelorum per gratiam: sed per lucem gratiae divisum est inter lucem et tenebras, id est inter bonos Angelos et malos; cum ergo Angelus non fuerit malus in primo instanti suae creationis, nec etiam in ipso instanti aliquis Angelus gratiam habuerit, sequitur quod Angeli in gratia creati non fuerunt.

2. Praeterea, motus liberi arbitrii requiritur ad susceptionem gratiae, sicut et ad culpam: sed diabolus non potuit esse malus per motum liberi arbitrii, in primo instanti suae creationis; ergo eadem ratione, nec in ipso instanti primo aliqui Angeli gratiam acceperunt.

3. Praeterea, si in primo instanti creationis aliquibus Angelis gratia est collata, oportet quod omnibus collata fuerit, tam bonis quam malis, cum in nullo esset aliquid gratiae impedimentum: sed malis Angelis gratia non est collata: fuisset enim in eis aliquis motus liberi arbitrii in Deum, sine quo gratia non confertur, et ita a Deo postmodum averti non potuissent, cum liberum arbitrium Angelorum sit invertibile post electionem, ut communiter dicitur; ergo Angeli in gratia creati non fuerunt.

Sed contra est quod Augustinus dicit, quod Deus simul erat in Angelis condens naturam et tribuens gratiam.

Praeterea, sicut materia corporalis formatur naturalibus formis, ita natura spiritualis, secundum Augustinum, formatur per gratiam: sed res corporales secundum sententiam Augustini sunt simul creatae in materia et forma; ergo substantiae spirituales, scilicet Angeli, sunt simul creati in natura et gratia.

Respondeo. Dicendum, quod circa hoc est duplex opinio. Quidam enim dicunt, quod Angeli fuerunt creati in naturalibus tantum, sed postmodum gratia est collata quibusdam conversis ad Deum

(1) *Legre jam.*

dum alii averterentur. Haec autem opinio, licet multum sit communis, tamen dictis sanctorum repugnare videtur, qui asserere videntur Angelos in gratia creatos esse. Repugnat etiam divinae liberalitati, per quam suam bonitatem communicat omnibus, secundum suam capacitatem. Unde et gratiam tribuit omnibus, in quibus impedimentum gratiae non invenitur per peccatum actuale vel originale; quale impedimentum in primo instanti suae creationis Angeli non habuerunt: et ideo ab aliis probabiliter dicitur, quod omnes Angeli tam boni quam mali in gratia creati fuerunt.

Ad primum ergo dicendum, quod illa illuminatio per quam a tenebris vel a daemonibus boni Angeli sunt divisi est per gratiam consummatam quae ad gloriam pertinet quam Angeli in primo instanti creationis suae non habuerunt.

Ad secundum dicendum, quod non est simile de motu liberi arbitrii in bonum et malum. Nam ad bonum ordinatur naturaliter, malum autem est ei contra naturam.

Ad tertium dicendum, quod invertibilitas liberi arbitrii dicitur esse in Angelis post electionem, non quamlibet, sed completam: quando finaliter et perfecte adhaerent bono vel a malo declinant.

DISTINCTIO IV.

Hic solet quaeri etc. (V. edit. nostrae tom. VI, pag. 410.)

QUAESTIO UNICA.

Circa hanc partem quatuor quaeruntur: 1.º utrum naturali cognitione Angelus cognoscat per species; 2.º utrum cognoscat singularia; 3.º utrum naturali dilectione diligat Deum super omnia; 4.º utrum Angeli a principio creationis suae fuerint beati.

ARTICULUS I.

Ad primum sic proceditur. Et 1. videtur, quod Angelus non cognoscat res per aliquas species. Res enim materiales melius cognoscuntur in essentia divina, quam in propriis naturis: sed essentia Angeli est propinquior divinae essentiae quam res materiales; ergo res materiales potest Angelus cognoscere per propriam essentiam, cum nos cognoscimus eas in propriis naturis.

2. Praeterea, intellectus noster qui res materiales per proprias earum species cognoscit, cognoscit se per aliam speciem, ut patet in 5 de Anima. Sed Angelus cognoscit seipsum per essentiam propriam, per quam etiam cognoscit superiores et inferiores Angelos, ut videtur innui ex libro de Causis; ergo Angeli non cognoscunt per aliquas species.

3. Praeterea, propter hoc non possumus simul multa intelligere, ut Algazel dicit, quia diversis speciebus simul intellectus formari non potest. Si ergo Angelus res per species cognosceret, non posset simul multa intelligere: quod est contra Augustinum, qui dicit in libro de Trinitate, quod in patria omnem scientiam nostram simul uno conspectu videbimus: ibi autem Angelis erimus aequales.

4. Praeterea, Angeli cognoscunt res materiales in verbo, ut Augustinus dicit super Genesim ad litteram: sed in verbo sufficienter rerum similitudines continentur, quia verbum est ars plena rationum viventium, ut dicit Augustinus in libro de Trinitate.

ergo non est necessarium in Angelo ponere species ad intelligendum.

Sed contra est quod dicitur in libro de Causis, quod omnis intelligentia est plena formis: sed illae formae non sunt ibi principium essendi, quia sic unius tantum est una forma; ergo sunt principium intelligendi.

Praeterea, intellectus Angeli deficit a simplicitate intellectus divini: Deus autem intelligit omnia per unum; ergo oportet in intellectu Angeli multas species intelligibiles ponere.

Respondeo. Dicendum, quod Angelus cognoscit res materiales, non per essentiam suam, ut Deus, sed per species quae non sunt ejus essentia; non quidem acceptas a rebus; sicut nos intelligimus, sed ei naturaliter inditas. Cujus ratio est, quod omne quod convenit alicui per essentiam suam, convenit ei per propriam virtutem. Similitudo autem rerum cognitarum non convenit Angelo per propriam virtutem, sive ponantur Angeli esse creatores rerum, ut philosophi posuerunt, sive non, ut fides ponit. Si enim sunt in Angelo similitudines rerum, sicut in causa, oportet quod conveniat eis per virtutem divinam, per quam rebus dat esse, ut in littera de Causis dicitur. Si vero non sunt creatores, tunc similitudo rerum non convenit eis, nisi vel a creaturis accipiant, vel a Deo: quia quaecumque sunt similia, ita se habent, quod ambo causantur ab uno, vel unum est causa alterius. A rebus autem similitudines non accipiunt, cum non habeant vires sensitivas, quibus mediantibus species a rebus materialibus ad intellectum deferuntur. Unde relinquitur quod similitudo rerum sit in Angelis non per virtutem propriam, sed per virtutem divinam; et ita non est similitudo rerum per essentiam suam, sed per aliquid essentiae superadditum: et per consequens, nec per essentiam suam res cognoscunt, sed per species.

Ad primum ergo dicendum, quod essentia divina ratione suae infinitatis habet quod sit similitudo rerum omnium, eo quod ad nullum sit genus determinatum: essentia autem Angeli est finita, et ad specialem perfectionem determinata.

Ad secundum dicendum, quod Angelus perfecte naturam intellectualem habet, unde in operationem intellectualem potest respectu ejus quod actu in ipso est (1): et ideo per essentiam suam seipsum cognoscit. Secus autem est de intellectu possibili humano, qui est sicut imperfectum in natura intellectuali; unde non potest intelligere nec se, nec alia, nisi aliqua specie intelligibili perficiatur. Res vero alias, quarum essentia Angeli non est actus, Angelus per essentiam suam cognoscere non potest, sed per species superadditas: unde etiam unus Angelus alios per species intelligibiles cognoscit, non per essentiam cogniti, qui ejus menti non illabatur: neque per essentiam propriam, quae non est alterius Angeli similitudo nisi quantum ad naturam generis; et sic non potest esse principium cognitionis specialis, sed generalis tantum.

Ad tertium dicendum, quod Angelus bonus, quantum ad illam cognitionem, qua cognoscit res in verbo, per quam bonus est, potest simul multa cognoscere, utpote uno, scilicet verbo, multa cognoscens. Quantum vero ad cognitionem naturalem, qua cognoscit res per species, non cognoscit simul plura, quae per diversas species cognoscuntur.

(1) *Id.* respectu ejus quod actus etc.

Ad quartum dicendum, quod Angelus ad illam cognitionem qua cognoscit res in verbo, non indiget aliis speciebus per quas cognoscat res, quam verbo; sicut et qui videt hominem per ejus imaginem, eadem specie cognoscit imaginem et hominem: quamvis posset intelligens praeter speciem imaginis, speciem hominis formare. Sed hoc jam pertinet ad aliam cognitionem, qua scilicet homo in seipso cognoscitur. Sed quia perfectio gloriae non excludit perfectionem naturae: ideo praeter cognitionem gloriae, qua Angelus cognoscit res in verbo habet cognitionem naturalem, quae fit per species concreatas. Verbum enim et species intelligibiles concreatae sunt diversarum rationum: ideo eis mediantibus possunt simul actus diversarum cognitionum egredi ab intellectu; sicut simul ferrum ignitum scindit ratione subtilitatis, et urit ratione caliditatis.

ARTICULUS II.

Ad secundum sic proceditur. Et 1. videtur, quod Angelus singula non cognoscat. Omnis enim cognitio est per assimilationem cognoscentis ad cognitum: sed intellectus Angeli, cum sit immaterialis, non potest assimilari singularibus, in quantum hujusmodi, cum singularitatis principium sit materia; ergo Angelus singularia non cognoscit.

2. Praeterea, Angelus cognoscit res alias a se per species, ut dictum est. Si ergo singularia cognoscit, oportet quod singularium species sint apud ipsum, quod non videtur: quia vel essent infinitae species, apud ipsum actu, cum singularia sint infinita, saltem a potentia: vel oporteret quod ejus intellectui species intelligibiles continue abscederent et advenirent.

3. Praeterea, cognoscere particulare per universale, est intellectus discurrentis: sed formae quae sunt in Angelis, maxime superioribus, sunt universales, ut dicitur in libro de Causis; ergo si Angelos singularia cognoscit, videtur quod habeat intellectum discursivum: quod est contra Dionysium.

4. Praeterea, species quae sunt in intellectu, cum sint praeter hic et tunc, aequaliter se habent ad praesens, praeteritum, et futurum. Si ergo Angelus per species, quae sunt in ejus intellectu, singularia cognoscit, videtur quod aequaliter cognoscat praesentia et futura, et distantia secundum locum: quod esse non potest: quia scire futura solius Dei est, ut dicitur Isaiae 41: « Quae ventura sunt annunciate, et dicemus, quia Dii estis vos. »

Sed contra est, quod Angeli homines custodiunt, ut dicitur Psal. 90: « Angelis suis Deus etc. »

Praeterea, ut dicit Boetius lib. de Consolatione: « Quicquid potest virtus inferior, potest et superior: » sed homo potest cognoscere particularia; ergo multo magis Angelus.

Respondeo. Dicendum, quod secundum doctrinam fidei, necesse est ponere Angelos singularia cognoscere, propter hoc, quod ad ministerium hominum singularium deputantur. Heb. 2: « Nonne omnes sunt administratorii spiritus etc. » Quod qualiter esse possit, a diversis diversimode traditur. Quidam enim dicunt quod Angelus cognoscit singularia per species a singularibus abstractas. Sed hoc non potest esse: tum quia intellectus non movetur sensibilibus, nisi mediante sensu et phantasia, quae in Angelis non sunt: tum etiam quia

species sensibilibus in intellectu non recipiuntur nisi universaliter, et sic remanet eadem difficultas. Unde alii dicunt, quod Angeli singularia cognoscunt, cognoscendo ordinem causarum universalium quae sunt in universo, a quibus procedunt omnia particularia. Sed hoc esse non potest: quia quocumque universalium cognitio non sufficit ad cognitionem singularis, ut est singulare; quantumcumque enim universalia aggregentur, non faciunt singulare. Et ideo alii dicunt quod per applicationem specierum innatarum universalium ad res particulares Angeli particularia cognoscunt. Sed hoc non potest esse: quia intellectus non potest applicare aliquid ad id quod est ignotum. Unde notitia singularis praexigitur ad applicationem praedictam. Et propter hoc alii probabilius dicunt quod Angelis communicatae sunt similitudines idearum in mente divina existentium; quae cum sint principia rerum secundum formam et materiam, sunt medium respectu cognitionis, non solum universalis, sed particularis. Unde Angelus per species innatas, non solum universalia, sed particularia cognoscere potest.

Ad primum ergo dicendum, quod sicut idea in mente divina est similitudo et causa rei materialis secundum materiam et formam, ita et species intellectus angelici, quae est quaedam repraesentatio primae ideae, est similitudo rei secundum materiam et formam. Unde intellectus Angeli, per speciem concreatam assimilatur singulari, in quantum est singulare.

Ad secundum dicendum, quod quanto aliquis intellectus est perspicacior, tanto ex paucioribus potest plus cognoscere. Unde, cum intellectus Angeli sit perspicacior quam noster, non oportet quod singulorum cognitorum habeat singulas species: sed per unam speciem potest multa cognoscere, et tanto plura, quanto est superior: sicut si inferior per unam speciem hominis omnes homines cognoscat, et superior per unam speciem animalis cognosceret omnia animalia: et ideo non oportet ponere infinitas species actu in intellectu angelico.

Ad tertium dicendum, quod discursus attenditur in hoc, quod intellectus transit ab uno cognito in aliud cognitum; non autem secundum hoc quod per speciem aliquam res aliqua cognoscitur. Unde, quamvis Angeli per formas universales singularia cognoscant, non est tamen in eorum cognitione discursus.

Ad quartum dicendum, quod per speciem quam Angelus apud se habet, non potest Angelus aliquid singulare cognoscere, nisi habeat naturam, quam illa species repraesentat. Futura autem singularia nondum habent naturam; distantia vero secundum locum habent: et ideo Angelus non potest cognoscere futura; potest tamen cognoscere distantia secundum locum.

ARTICULUS III.

Ad tertium sic proceditur. Et 1. videtur, quod Angelus per pura naturalia non possit Deum diligere super se et super omnia. Nullus enim potest in actum virtutis, qui non habet virtutem, et praecipue secundum modum virtutis: qui enim iuste facit iustus est, ut dicitur in secundo Ethicorum; sed diligere Deum super omnia et supra se, dicit actum et modum charitatis; ergo Angelus per pura naturalia charitatem non habens, Deum supra se et supra omnia diligere non potest.

2. Praeterea, naturali dilectione tanto unumquodque magis diligitur quanto diligenti est magis propinquum et unitum. Unde similitudo est causa dilectionis. Sed nihil est alicui magis propinquum seipso; ergo impossibile est, quod Angelus naturali dilectione diligit aliquid supra se.

3. Praeterea, bona naturalia etiam in Angelis remanent post peccatum, ut dicit Dionysius: sed daemones non diligunt Deum super se et super omnia; ergo hoc ad naturalem conditionem non pertinet.

Sed contra. Dilectio naturalis Angelorum non potest esse perversa, quia natura non est mala: sed omnis dilectio respectu Dei est perversa, qua Deus super omnia non diligitur; ergo cum Angeli naturali dilectione Deum diligerent, cum super omnia dilexerunt.

Praeterea, sicut se habet verum ad cognitionem, ita bonum ad affectionem; sed cognitio Angelorum naturalis est vera; ergo et dilectio bona; et sic cum super omnia diligunt, cum nulla alia dilectio respectu Dei bona esse possit.

Respondeo. Dicendum, quod est duplex dilectio: scilicet concupiscentiae et amicitiae: quicumque enim diligit aliquem, bonum ei optat. Ad illum ergo cui bonum optat, habet amicitiam: respectu autem ejus quod optat, habet concupiscentiam; et praecipue cum sibi optat. Dixerunt ergo quidam, quod dilectione concupiscentiae Angelus, si in puris naturalibus creatus fuit, supra se Deum dilexerit, et super omnia; quia plus desideravit frui Deo, quam seipso vel quocumque alio: non autem dilectione amicitiae Deum supra se dilexit: quia bonum non optavit plus Deo quam sibi. Sed hoc non videtur conveniens. Nam Angeli in puris naturalibus diligebant Deum dilectione amicitiae; et hoc propter similitudinem bonitatis naturalis; quia est multo efficacior amicitiae ratio inter Angelos et Deum, quam inter duos homines sapientes. Si ergo amicitiam ad Deum non habebant, aequaliter se et Deum, vel Deum minus se diligentes, iam dilectio erat perversa, et ita iam non erant in statu naturae conditae, sed magis in statu culpae. Et ideo alii dicunt, quod etiam dilectione amicitiae, Deum super omnia Angeli diligebant, tamquam universale bonum, et sui ipsorum, et omnium aliorum; sicut et multi gentiles bonum reipublicae sibi ipsi praetulerunt absque gratia gratum faciente.

Ad primum ergo dicendum, quod diligere Deum super se et super omnia, non perfecte designat modum charitatis; sed oportet ut ista dilectio sit ex inclinatione gratiae, et non solum ex inclinatione naturae.

Ad secundum dicendum, quod proportio illa tenet in duobus aequaliter bonis; sed quando ex una parte est major excessus bonitatis quam ex altera propinquitatis, est e contrario; et sic est in proposito.

Ad tertium dicendum, quod naturale dicitur dupliciter. Uno modo, quod est consequens naturam de necessitate: et huiusmodi naturale per peccatum non tollitur. Alio modo dicitur naturale, in quod ex puris naturalibus possumus; et huiusmodi naturalia pervertuntur per peccatum: et sic est in proposito.

ARTICULUS IV.

Ad quartum sic proceditur. Et 1. videtur, quod Angeli sint creati beati. Beatitudo enim in visione Dei consistit. Joan. 17: « Haec est vita aeterna » etc. Sed Angeli in principio creationis viderunt Deum: viderunt enim res in verbo, ut Augustinus dicit super Genesim ad litteram; quod esse non potuit, si Deum per essentiam non viderunt: ergo Angeli in principio suae creationis beati fuerunt.

2. Praeterea, cognoscere causam per effectum, est intellectus discurrentis: hoc autem non convenit Angelis; ergo, cum a principio suae creationis Deum cognoverunt, ut in littera Magister dicit, videtur quod non per effectum, sed per essentiam eum cognoverunt: et sic idem quod prius.

3. Praeterea, Angeli in principio suae creationis naturaliter beatitudinem desiderabant. Si ergo non statim beatitudinem habuerunt, fuit eis poena absque culpa, vel pro dubitatione, si de futura beatitudine certi non erant, vel de dilatione, si certi erant. Spes enim quae differtur affligit animam, sicut dicitur Prov. 14. Hoc autem est inconveniens; ergo Angeli beati fuerunt.

Sed contra. Simul Angeli boni fuerunt beati, et mali miseri: quod designatur per hoc quod dicitur Genesis 1, quod divisit Deus lucem a tenebris. Sed nullus Angelus fuit malus et miser in principio suae creationis, ut supra habitum est: ergo nec Angeli boni fuerunt creati beati.

Praeterea, beatitudo per gratiam et hominibus et Angelis datur: et sic, quantum ad eam, homines et Angeli sunt pares: sed homines non sunt creati beati, ut patet de primo homine in statu innocentiae; ergo Angeli non fuerunt creati beati.

Respondeo. Dicendum, quod beatitudo perfectionem quamdam operationis importat, secundum Philosophum, qui dicit quod felicitas est operatio secundum virtutem perfectam. Est autem duplex perfectio: una secundum aliquod genus determinatum, alia vero simpliciter. Unde duplex est beatitudo: una per quam habet aliquis perfectam operationem, secundum modum perfectionis suae naturae: et sic homo et Angelus, beati creati sunt, quia scilicet in sui creationis principio habuerunt perfectam cognitionem de Deo ad quam natura creata se extendere potest: natura autem a perfectis sumit exordium, ut per Boetium patet in De consolatione. In hac autem operatione, qua Deus cognoscitur, beatitudo rationalis consistit. Alia beatitudo est, in quantum rationalis creatura habet perfectam operationem simpliciter; prout scilicet cognoscit Deum per essentiam suam sicut est: et hanc beatitudinem, Angeli in suae creationis principio non habuerunt.

Ad primum ergo dicendum, quod Deus tripliciter videtur. Uno modo per speciem alicujus rei, in qua est aliqua similitudo Dei: et ista cognitio competit secundum praesentem statum. Alio modo per aliquam similitudinem divinae virtutis, menti intelligentis impressam, et ista est Angelis naturalis: tertio modo absque similitudine per essentiam; et ista est visio propria beatorum. Secundo ergo modo, et non tertio, Angeli antequam essent beati, viderunt verbum, et res in verbo; tertio vero modo postquam beati fuerunt.

Ad secundum dicendum, quod ipsa similitudo Dei, quae est in mente Angeli naturaliter, est sicut species qua intellectus Angeli informatur ad Deum

cognoscendum. Unde per hoc non ostenditur ibi esse aliquis discursus, sicut nec in oculo, cum considerat lapidem per speciem lapidis. Ratio autem procedit quando effectus sumitur ut medium ad demonstrandum causam.

Ad tertium dicendum, quod desiderium Angelorum erat ordinatum. Unde non appetebant habere beatitudinem nisi determinato tempore, quod dilatum non fuit. Et ideo afflictio in eis esse non potuit.

DISTINCTIO V.

Post haec consideratio etc. (V. edit. nostrae tom. VI, pag. 451.)

Hic est duplex quaestio. Primo de aversione malorum Angelorum. Secundo de conversione honorum.

QUAESTIO I.

Circa primum quaeruntur duo: 1.^o utrum Angelus peccare potuerit; 2.^o utrum Dei aequalitatem appetierit.

ARTICULUS I.

Ad primum sic proceditur. Et 1. videtur quod in Angelo peccatum esse non potuit. Omne enim peccatum, secundum Ambrosium, ex errore est: sed in Angelis, cum sint intelligibiles substantiae, error esse non potest: quia intellectus semper rectus est, ut dicitur in tertio de anima; ergo in Angelo peccatum esse non potuit.

2. Praeterea, secundum Augustinum in tertio de Trinitate, sicut est ordo inter superiora corpora, et inferiora, ita inter superiores spiritus et inferiores: sed in corporibus superioribus peccatum accidere non potest; ergo nec in superioribus spiritibus.

3. Praeterea, alicui creaturae hoc conferri potest, ut peccare non possit. Ad immensitatem enim divinae bonitatis pertinet quod communicatum sit creaturae quicquid ei est communicabile. Sed inter ceteras creaturas Angelus est excelsior secundum naturam: nam dicit Augustinus, 11 Confessionum, quod factus est prope Deum; ergo Angelus peccare non potuit.

Sed contra est quod dicitur Job 4: « In Angelis suis reperit pravitatem. »

Praeterea, Hieronymus dicit: « Solus Deus est, in quem peccatum non cadit nec cadere potest; cetera cum sint liberi arbitrii, in utramque partem flexi possunt; » ergo Angelus peccare potuit.

Respondeo. Dicendum, quod in Angelis ante confirmationem peccatum accidere potuit, et in quibusdam accidit. Et hoc ideo, quia in voluntate peccatum accidit quando non recte ordinatur ad finem. Voluntas autem, ut quaedam natura est, necessariam inclinationem habet in id quod sibi naturale est, respectu vero aliorum nullam necessitatem habet; ergo illa sola voluntas est omnino impeccabilis, ejus natura est ipsa bonitas summa, quae est regula voluntatis. Omnis autem voluntas alia potest praeter hanc regulam agere: et ideo in ea potest peccatum accidere, si secundum suam naturam consideretur. Bonitas autem prima, quae est ultimus

finis et regula omnis bonitatis, non est natura voluntatis angelicae. Unde in voluntate angelica potest esse obliquitas et peccatum.

Ad primum ergo dicendum, quod intellectus Angeli, licet in eligendis non possit ligari passione, sicut in nobis accidit, potest tamen impediri a recto iudicio eligibilis per omissionem aliquorum quae consideranda sunt: non enim naturali cognitione omnia simul cognoscit. Aliquid autem secundum se consideratum est eligibile, quod consideratis aliis eligibile non est: et sic circa iudicium eligibilem in Angelo error esse potuit, quamvis non circa absolutam cognitionem eorum ad quae naturalis cognitio se extendit.

Ad secundum dicendum, quod in corporibus est solum natura, et non voluntas. Natura autem est determinata ad unum: unde in eius actione peccatum non potest accidere, nisi per eius corruptionem et impedimentum. Voluntas autem non est determinata ad unum: et ideo per eam Angelus peccare potuit.

Ad tertium dicendum, quod non posse peccare non potest taliter creaturae rationali communicari, ut ei per naturam insit: sicut non potest ei communicari, quod eius natura sit bonitas summa: communicatur autem aliquibus per gratiam; et sic quibusdam Angelis communicatum fuit.

ARTICULUS II.

Ad secundum sic proceditur. Et 1. videtur quod Angelus divinam aequalitatem non appetierit. Appetitus enim movetur a bono apprehenso, ut dicitur in tertio de Anima. Illud ergo quod non potest apprehendi, non potest appeti. Sed non potest apprehendi per intellectum aliquam creaturam esse Deo aequalem; ergo Angelus aequalitatem Dei non appetiit.

2. Praeterea, quicumque appetit alteri esse subiectus, non appetit ei esse aequalis. Sed omnis creatura naturaliter appetit Deo esse subiecta. In hoc enim perfectio uniuscuiusque rei consistit quod suo perfectivo subicitur, ut patet de materia et forma; ergo creatus Angelus, Dei aequalitatem non appetiit.

3. Praeterea, Anselmus dicit in libro de Casu diaboli, quod diabolus peccavit volendo aliquod commodum quod non habebat, nec velle tunc debuit, quod non ad augmentum illius beatitudinis esse poterat: sed esse aequalem Deo non poterat esse Angelo ad augmentum beatitudinis; ergo non peccavit hoc appetendo.

Sed contra est quod dicitur Isaiae 14, in figura diaboli: « In caelum ascendam etc. »: quod non potest intelligi de caelo empyreo, quia ibi creatus est: et sic restat ut intelligatur de caelo sanctae Trinitatis.

Praeterea, primum Angeli peccatum dicitur fuisse superbia, secundum illud Ecclesiastici 11: « Initium omnis peccati superbia: » haec autem est inordinatus appetitus propriae excellentiae. Nihil autem erat Angelo excellentius, nisi Deus, cuius excellentiam inordinate appetere posset; ergo Angelus peccavit, Dei aequalitatem appetendo.

Respondeo. Dicendum, quod aliquid potest alterius aequalitatem appetere dupliciter. Uno modo, ut sit ei aequalis absolute quantum ad omnia; et sic Angelus divinam aequalitatem appetere non potuit, sicut non potuit appetere se non esse: nihil

enim potest esse Deo aequale, nisi sit id quod Deus est: quia est bonitas et magnitudo per se existens cui nihil bonitatem vel magnitudinem participans aequari potest. Si autem appeteret se esse hoc idem quod est alter, ex hoc ipso appetit se non esse. Unde nullus potest appetere esse hoc, quod est alter: sed tantum, vel talis, vel taliter se habens. Alio modo potest aliquis appetere se esse aequalem alteri, quantum ad aliquid, in quantum appetit id quod illi soli debetur: et sic Angelus appetere potuit divinam aequalitatem, secundum quod appetivit aliquam excellentiam, quae soli Deo competit. Duplex est autem excellentia, quae soli Deo competit. Una respectu sui ipsius, in quantum sui fruitione beatus est; alia respectu creaturarum quibus praest. Utrumque autem istorum Angelus habere potuit, et habuisset si stetisset, ex munere divinae gratiae; et sic huiusmodi sancti Angeli appetiverunt. Sed diabolus hoc habere appetiit ex virtute suae naturae, quod soli Deo debetur: unde in quantum appetiit habere aliquid quod habiturus erat (illa tamen modo quo non erat habiturus, sed solus Deus habet per illum modum) dicitur Dei aequalitatem appetiisse. Et per hoc patet solutio ad obiecta. Nam primae rationes procedunt de aequalitate absoluta, aliae de aequalitate secundum quid.

QUAESTIO II.

Deinde quaeritur de conversione honorum Angelorum. Et circa hoc quaeruntur duo: 1.º utrum converti potuerint sine gratia; 2.º utrum sua conversione gloriam meruerint.

ARTICULUS I.

Ad primum sic proceditur. Et 1. videtur quod non indiguerunt gratia ad sui conversionem. Ad illud enim in quo ex suis naturalibus Angelus potest, gratia non indiget: sed ad hoc quod converteretur ad Deum Angelus poterat ex suis naturalibus: quia poterat Deum diligere super omnia ex naturalibus suis, ut supradictum est; ergo ad conversionem praedictam Angelus non indiguit gratia.

2. Praeterea, secundum Augustinum, gratia quae praeparat hominis voluntatem ad bene volendum est gratia operans: sed Angeli non indigebant gratia operante, ut in litera dicit Magister; cum ergo converti pertineat ad bene volendum, videtur quod in hanc conversionem gratia non indiguerunt.

3. Praeterea, conversio illa fuit quaedam gratiae praeparatio: sed aliquid potest se ad gratiam praeparare antequam gratiam habeat: ergo Angelus ad conversionem praedictam gratia non indigebat.

Sed contra est, quod in litera dicitur, quod converti ad Deum fuit ei charitate adhaerere: sed charitas sine gratia esse non potest, ut patet Rom. 5: « Charitas Dei diffusa est in cordibus nostris per Spiritum sanctum qui datus est nobis; » ergo conversio praedicta sine gratia esse non potuit.

Praeterea, per conversionem illam Angeli in statum altiore sunt promoti, quia in statum gloriae: sed hoc sine gratia esse non potest; ergo ad conversionem praedictam gratia requirebatur.

Respondeo. Dicendum, quod motus liberi arbitrii in Deum est duplex. Quidam imperfectus, sicut est in homine gratiam non habente, et est quasi actus ad virtutem; et ad hunc motum non requi-

ritur gratia gratum faciens. Requiritur autem gratia gratis data secundum quosdam. Quod quidem verum est, si nomine gratiae gratis datae intelligatur quodcumque divinum auxilium, sine quo nihil boni possumus; non autem si intelligatur aliquid habituale donum, quia sic esset abire in infinitum. Alius autem motus liberi arbitrii in Deum est perfectus, et est similis actui qui est a virtute, et in hunc motum liberi arbitrii nullus potest absque gratia, quae ei perfectionem praestat; talis autem motus fuit conversio bonorum Angelorum in Deum; et ideo ad eam gratia requirebatur.

Ad primum ergo dicendum, quod diligere Deum super omnia, prout ad hoc natura potest, est motus liberi arbitrii imperfecte, qualis non fuit conversio de qua loquimur.

Ad secundum dicendum, quod gratia operans habet duos effectus, quorum unus est remissio culpae; et quantum ad hoc gratia operans Angelis non fuit necessaria. Alius effectus est iustitiae gratuita adeptio: et quantum ad hoc in Angelis necessaria fuit.

Ad tertium dicendum, quod duplex est praeparatio vel dispositio ad gratiam sine ad quamcumque formam. Una imperfecta, quae praecedit formam; alia perfecta, sicut quae est necessaria ad formam, et hoc non est sine forma: et talis praeparatio ad gratiam, fuit praedicta Angelorum conversio, sicut motus contritionis qui est in justificatione impii.

ARTICULUS II.

Ad secundum sic proceditur. Et 1. videtur quod Angeli non meruerunt beatitudinem per conversionem praedictam. Quod enim perfectum est, non meretur: quia quod meretur est imperfectum: Angelus autem in ipsa conversione confirmatus fuit, et beatus, ut in litera dicitur, et per consequens perfectus; ergo per illam conversionem non meruit suam beatitudinem.

2. Praeterea, nullus meretur nisi viator: sed Angelus in illa conversione non fuit viator: fuisset enim simul viator et comprehensor, quod solius Christi est; ergo Angelus per suam conversionem beatitudinem non meruit. Item videtur, quod nec per opus ministerii, quod postmodum nobis exhibent, eam mereantur. Effectus enim non praecedit causam temporaliter: sed meritum ordinatur ad beatitudinem, sicut causa ad effectum; ergo non potest esse quod prius habeant beatitudinem et postea eam mereantur.

3. Praeterea, secundum Dionysium, superiores ordines ad ministerium non mittuntur; ergo per ministerium beatitudinem non merentur.

Sed contra videtur, quod sine merito non habeant. Praemium enim respondet merito; sed beatitudo habet rationem praemii; ergo absque merito haberi non potest ab aliqua creatura.

Praeterea, Bernardus dicit, quod peccatum Angeli in hoc fuit, quod sine merito beatitudinem habere voluit; non autem peccasset in hoc, si sine merito haberi posset; ergo beatitudo sine merito haberi non potest.

Respondeo. Dicendum, quod circa hoc ponuntur in litera duae opiniones: quarum ultima, quam Magister approbat, rationalis non videtur, propter duo. Primo, quia actus ministerii, quo Angeli ministrant, ad perfectionem gloriae ipsorum pertinet; cum per hoc maxime ad Dei similitudinem pertin-

gant, quod Dei cooperatores efficiuntur, ut Dionysius dicit. Unde non potest esse quod hoc sit meritum ad beatitudinem, si non est idem meritum et praemium. Secundo, quia pari ratione posset dici, quod gratia caderet sub merito, si per consequentia opera aliquid praehabitu mereri possemus. Unde secundum illos qui dicunt Angelos in gratia creatos non fuisse, oporteret dicere, quod eam meruissent praehabitu per huiusmodi consequentia opera: quod absurdum est dicere. (1) Propterea, opinio illa prima sustineri potest et debet, quod scilicet per illam conversionem, suam beatitudinem meruerunt. Ad eujus evidentiam sciendum, quod meritum se habet ad praemium sicut motus ad terminum, et sicut fieri ad factum esse. In his autem quae sunt subito, simul est fieri et factum esse; sicut simul res creatur et creata est, et hoc ideo, quia in talibus fieri non potest attribui tempori praecedenti, sicut accidit in motibus successivis; sed attribuitur ultimo instanti, in quo res est in facto esse, secundum quod est terminus temporis praecedentis in quo non erat: ut sic dicatur ea ratione in illo instanti res fieri, quia tunc primo est. Et similiter potest dici, quod in primo instanti conversionis, mens Angeli fuit beata ratione fractionis, quasi in facto existens; in eodem tamen instanti merebatur prout erat quasi in fieri, secundum quod convertebatur ad verbum, non praexistente aliqua beatitudinis perfectione. Si tamen dicamus quod Angeli fuerunt in gratia creati, nulla difficultas accidit: quia tunc potest dici quod per motum liberi arbitrii ante confirmationem beatitudinem meruerunt: quod enim absque merito eam habuerunt, non videtur posse convenienter dici, quia hoc solius Christi est, cui debetur absque merito fruitio divinitatis tanquam Filio naturali.

Ad primum ergo dicendum, quod licet Angelus prima conversione esset perfectus, tamen quia erat in principio suae perfectionis, et in termino imperfectionis, poterat sibi, secundum hoc, ratio merendi aliquo modo competere.

Ad secundum dicendum, quod Angelus merebatur ut viator; non quasi distans a termino, sed ut in termino viae existens. Alia concedimus.

DISTINCTIO VI.

Praeterea oportet sciri etc. (V. edit. nostrae tom. VI, pag. 457.)

QUAESTIO UNICA.

Hic quaeruntur quatuor: 1.^o utrum Lucifer fuerit supremus Angelus inter omnes Angelos; 2.^o quando alii minores peccaverint; 3.^o utrum post peccatum sit in eis aliquis ordo; 4.^o de loco qui eis competit post peccatum.

ARTICULUS I.

Ad primum sic proceditur. Et 1. videtur quod Lucifer non fuerit supremus Angelorum. Quia ad eum, secundum Gregorium, dicitur Ezech. 28: « Tu cherub protegens et extentus: » sed ordo Cherubim non est supremus ordo; ergo nec ille Angelus fuit supremus, vel superior inter omnes.

(1) Al. *ve:sa linea*, Praeterea, opinio etc.

2. Praeterea, Angeli inaequales sunt secundum ordinum distinctionem, quae est per dona gratiarum: sed ante conversionem quorundam, et aversionem aliorum, gratiam habebant, secundum unam opinionem; ergo nullus inter eos erat omnium supremus.

3. Praeterea, sicut est ordo in spiritualibus, ita et in corporalibus: sed in corporalibus accidit corruptio propter longe distare a primo, ut dicitur in secundo de Generatione; ergo et peccatum, quod est spiritualis corruptio, accidit in inferioribus Angelis, et non in supremo, qui erat Deo propinquissimus.

Sed contra est quod in litera dicit Gregorius, quod in Angelorum comparatione ceteris clarior fuerit.

Praeterea, primum peccatum Angeli fuit superbia: sed quanto erat altior, tanto majorem occasionem superbiae habebat; ergo videtur, quod primus inter peccantes, fuerit inter omnes altissimus.

Respondeo. Dicendum, quod circa hoc est multiplex positio. Origenes namque posuit omnes Angelus ab initio aequales fuisse creatos, et quod merito voluntatis quidam in superiorem ordinem, quidam in inferiorem sunt distincti. Et secundum hoc non posset dici, quod primus inter peccantes fuit aliis major: quia ante distinctionem bonorum a malis, non fuerunt complete ordines distincti. Damascenus vero dicit quod primus inter peccantes praerat terrestri ordini, secundum quod videtur aliis inferior fuisse. Augustinus vero 11 Gen. reliquit sub dubio, utrum fuerit de superioribus vel inferioribus. Gregorius vero expresse determinat eum ceteris superiorem fuisse: cui etiam auctoritates Scripturae canonicae consonare videntur. Unde ejus sententia communiter ab omnibus tenetur; et rationabiliter. Non enim in tantam praesumptionem efferi potuisset, ut Dei aequalitatem appeteret, si etiam aliquibus creaturis spiritualibus minor esset.

Ad primum ergo dicendum, quod etiam superiores quandoque censentur nominibus inferiorum ordinum, secundum Dionysium; et sic Lucifer, quamvis ad ordinem Seraphim spectaret, recte tamen cherubin dicitur, quod plenitudo scientiae interpretatur, ad designandum quod per elationem cecidit, quia scientia inflat, ut dicitur prima Cor. 7.

Ad secundum dicendum, quod Angeli non solum sunt inaequales secundum dona gratiarum, sed etiam secundum gradus naturae: sic enim abinvicem distinguuntur, ut supra praedictum est. Unde opinio Origenis stare non potest. Ordo autem in Angelis distinguitur, complete quidem quantum ad dona gratiarum facientia; materialiter vero quantum ad dona naturalia: et sic quodammodo erant ordines in Angelis ante distinctionem bonorum a malis, licet non perfecte.

Ad tertium dicendum, quod corruptio in corporalibus accidit ex defectu naturae, sed in spiritualibus ex defectu voluntatis; qui quandoque occasionem sumit ex perfectione naturae, in quantum potest esse superbiendi materia. Et ideo non est simile.

ARTICULUS II.

Ad secundum sic proceditur. Et 1. videtur, quod alii Angeli non sumpserint occasionem peccandi ex peccato primi Angeli. Sicut enim primus Angelus

per superbiam peccavit, ita etiam et alii, quia ipsa est radix omnium peccatorum spiritualium, quae sola esse in Angelis possunt: sed superbia non est ut alicui inferiori velit subdi potius quam superiori: sed e converso: magis enim ad excellentiam pertinet et libertatem subdi soli regi, quam regi et comiti; ergo alii Angeli, qui superbiendo Deum subterfugiebant, in peccatum primi Angeli non consenserunt, qui caeteris praeesse volebat.

2. Praeterea, quam cito primus Angelus peccavit, de caelo ejectus est: sed post suam dejectionem non potuit esse aliis occasio peccandi; ergo peccatum primi Angeli non fuit occasio peccati aliorum.

3. Praeterea, secundum Greg. ideo homo per alium reparari potuit, quia per alium cecidit; si ergo ruinae inferiorum Angelorum peccatum primi Angeli fuisset causa, videtur quod casus inferiorum Angelorum esset reparabilis; quod est contra fidem catholicam.

Sed contra est quod dicitur Apoc. 12, quod draco de caelo cadens, traxit tertiam partem stellarum secum: et ita casus primi Angeli videtur fuisse occasio casus aliorum.

Praeterea, multitudo non videtur posse concordare in aliquo uno, nisi aliqua sit concordantiae causa: sed multi Angeli in peccatum concordaverunt sicut et in poena sociati sunt; ergo aliqua fuit causa hujus concordiae; et praecipue videtur quod persuasio primi Angeli peccantis.

Respondeo. Dicendum, quod nullus praeesse potest nisi subditos habeat. Quia ergo primus Angelus peccando excellentiam praelationis appetit, consequitur etiam ut alios suae praelationi subjicere nisus fuerit. Sic ergo peccatum ejus aliquo modo fuit aliis occasio peccandi, in quantum ipse alios, excellentiam appetens provocavit, ut suae excellentiae consentientes etiam ipsi in hoc aliquam excellentiam consequerentur, sicut in exaltatione unius omnes ejus fautores exaltantur. Et sic peccatum primi Angeli ad peccatum aliorum comparatur aliquo modo ut causa, et non solum sicut excedens in gravitate culpae, ut quidam dicunt. Non tamen hoc intelligendum est sic quod prius temporaliter primus Angelus peccaverit, et postea alios ad consentiendum sibi incitaverit: sed simul totum est factum: scilicet quod primus Angelus peccavit et aliis persuasit et alii ei consenserunt. Quod quidem in nobis accidere non potest: quia suggerimus aliis nostris eordis propositum per loquutiones et nutus, qui corporeis motibus explentur, et ideo tempore indigent. Angeli autem sibiinvicem loquuntur ut sua desideria designent, spiritualibus signis quae subito fiunt. Et ideo simul fuit peccatum Angeli, persuasio et consensus: sicut simul est accensio eandelae, illuminatio aeris et visio, quia omnia sunt instantanea.

Ad primum ergo dicendum, quod excellentiam quam sibi inferiores Angeli indebite appetebant, non credebant se suis viribus posse acquirere, nisi per auxilium primi Angeli peccantis. Et ideo primo Angelo consenserunt, non quasi volentes subesse: sed quasi volentes ejus auxilio ad altiora quam eis competerent, promoveri.

Ad secundum dicendum, quod ratio illa procederet, si non simul omnia illa fuissent, ut dictum est.

Ad tertium dicendum, quod homo cecidit per diabolum tentantem: sed Angeli non per tentantem, sed per occasionem praebentem. Vel potest dici,

quod illa ratio non est sufficiens, sed est quaedam congruentia.

ARTICULUS III.

Ad tertium sic proceditur. Et 1. videtur quod in daemonibus non sit ordo. Dicitur enim Job 10, quod « in terra miseriae et tenebrarum nullus ordo, sed sempiternus horror inhabitat: » illius autem terrae cives sunt daemones; ergo in eis non est aliquis ordo.

2. Praeterea, quod ordinate fit bene fit. Sed Angeli mali nihil bene faciunt, ut infra dicitur; ergo Angeli mali non faciunt aliquid ordinate; et ita non est in eis aliquis praelationis ordo.

3. Praeterea, inter homines damnatos non ponitur aliquis ordo: sed una est damnatio hominum et Angelorum; ergo nec in Angelis damnatis est aliquis ordo.

Sed contra est quod dicitur Job 41: « Ipse est rex super omnes filios superbiae. »

Praeterea, Matth. 25 dicitur: « hic maledicti in ignem aeternum, qui paratus est diabolo et Angelis ejus: » quod non diceretur, nisi unus diabolus aliquam praelationem inter alios haberet.

Respondeo. Dicendum, quod in daemonibus invenitur aliquid dupliciter. Uno modo ex propria voluntate: et sic nihil pulchrum, nihil ordinatum in eis existit. Alio modo ex natura, et ex Dei ordinatione: et sic in eis est pulchritudo et ordo: secundum namque naturae conditionem quidam alii superiores existunt, et sic super alios habent potentiam. Deus etiam, qui summe bonus est, eos in malitiam cadere non permisisset, nisi eorum malitiam in bonum ordinare posset. Et ideo, ut decentius ex eorum malitia consequantur illud bonum ad quod Deus eorum malitiam ordinavit, statuit in eis praelationis ordinem; qui tamen, quamvis relatus ad Dei ordinationem sit rectus, relatus tamen ad eorum voluntates est perversus, et quantum ad finem, quia totum suae praelationis ordinem in nocentium hominis convertunt, et quantum ad ordinis usum, prout superiores per superbiam sibi dominium usurpantes, et inferiores coacti et renitentes obsequuntur.

Ad primum ergo dicendum, quod in inferno dicitur ordo non esse, tum quia voluntas damnatorum non ordinat aliquid in bonum; tum quia res poenales quae ibi sunt, naturalem ordinem non usquequaque servant; quia et ignis ardet, et non consumit et non lucret, et alia hujusmodi sunt ibi contra consuetum cursum naturae. Et tamen ibi ordo est divinae justitiae vindicantis in malos per malorum ministerium.

Ad secundum dicendum, quod objectio illa procedit de usu ordinis qui in daemonibus malus est, ipse autem ordo a Deo est et bonus est.

Ad tertium dicendum, quod homines damnati omnes sunt pares quantum ad naturam speciei, nec iterum deputantur ad exercitium vel punitionem aliorum, ut daemones. Et ideo non est simile.

ARTICULUS IV.

Ad quartum sic proceditur. Et 1. videtur quod aer caliginosus non sic conveniens locus daemonibus post casum. Daemones enim peccaverunt gravius quam animae damnatorum: sed animae da-

mnatorum statim post mortem detruduntur in infernum; ergo multo magis daemones statim post casum in infernum detruduntur, et non sunt in isto caliginoso aere, cum secundum Damascenum hoc sit Angelis casus, quod hominibus mors.

2. Praeterea, Angeli, cum sint damnati, poena ignis puniuntur: quod esse non posset nisi in inferno essent, ubi est ille ignis poenalis. Ergo daemones sunt in inferno: et sic idem quod prius.

3. Praeterea, si in hoc aere caliginoso daemones detinentur, hoc non videtur esse nisi propter exercitium quo sanctos tentando exercitant: sed postquam sunt victi ulterius tentare non possunt, ut in litera dicitur; ergo tunc ad minus deberent in infernum detrudi.

4. Praeterea, daemones in inferno puniunt animas damnatorum; ergo non sunt in isto caliginoso aere sed in inferno.

Sed contra est quod dicitur Ephes. 5 « secundum principem potestatis aeris hujus spiritus qui nunc operatur in filios diffidentiae: » quod de diabolo intelligitur: non autem diceretur hujus aeris princeps, nisi aer esset daemonibus pro loco deputatus; ergo etc.

Praeterea, Pet. 2. super illud, « Rudentibus inferni detractos, » dicit Glossa: « Hunc inferiorem aerem daemones quasi carcerem acceperunt. »

Respondeo. Dicendum, quod sicut dictum est, in daemonibus duo sunt: unum ex parte ipsorum, scilicet eorum malitia: aliud ex parte Dei, scilicet ordo quo ordinantur ad aliquod bonum, scilicet ad exercitium hominum, quibus impugnantes, coronas fabricant. Quantum ergo ad primum, debetur eis pro loco infernus, qui est locus poenalis. Culpa enim non convenienter ordinatur nisi per poenam. Sed quantum ad secundum debetur eis pro loco iste aer caliginosus, qui eorum officio competit, ut possint ad homines tentandos accedere; non tamen nimis eos infestare; quod esset si hic in terra habitationem cum hominibus accepissent. Sed post diem judicii praedictum exercitium necessarium non erit. Et ideo tunc daemones in infernum irrevocabiliter detrudentur.

Ad primum ergo dicendum, quod quidam graecorum ponunt de animabus damnatorum, quod non statim post mortem ad infernum descendunt, sed in die judicii: quod contrariatur ei expresse quod dicitur Luc. 16: « Mortuus est dives et sepultus est in inferno. » Et ideo dicendum est, quod non est simile de daemonibus et animabus. Nam daemonibus ex conditione suae naturae competit, ut supra homines sint, et ut eis aliquo modo prosint. Unde ne hic ordo totaliter periret, provisum est a divina sapientia, ut saltem occasionaliter eis prodessent per tentationis exercitium. Hoc autem de animabus dici non potest. Et ideo non est simile.

Ad secundum dicendum, quod quidam dicunt poenam sensibilem daemonum usque ad diem judicii dilatam esse: quod non videtur esse verum, cum ipsi non minus peccaverint quam animae quae statim post mortem poenam sensus incurrunt. Unde dicendum est secundum alios, quod semper igne inferni puniuntur, etiam quando in inferno non sunt: quia, ut dicit Glossa, Isa. 5 super illud « inflamata a gehenna » daemones secum fuerunt tormenta suarum flammarum ubicumque sunt. Quod non est intelligendum, quasi ipsum ignem corporeum ferant;

sed solummodo incendium quod ex igne sentiunt, in quantum agit in eos ut instrumentum divinae iustitiae.

Ad tertium dicendum, quod circa cessationem daemonum superatorum a tentatione est triplex opinio. Quidam enim dicunt, quod daemon victus non potest nec ipsum a quo vincitur, nec alium tentare, nec de eodem vitio, nec de alio. Alii dicunt, quod potest tentare de alio peccato, non autem de eodem, nec vincentem nec alios. Tertii dicunt, quod non potest tentare de eodem vitio victorem, potest tamen de eodem alios et de alio eundem: et hoc est magis probabile: quia perfecta victoria hominis non est nisi quando totaliter inclinatio ad vitium de quo tentatus est recedit. Secundum ergo primam opinionem intelligendum est, quod non semper ab officio tentationis excluditur daemon qui semel est victus: sed ad tempus determinatum. Secundum alios vero, nec ad tempus nec ab omni tentatione repellitur, sed ab aliqua: unde non est necessarium, quod omnino ab hoc caliginoso aere excludatur.

Ad quartum dicendum, quod sicut daemones sunt intentores vitiorum, ita sunt executores poenarum. Et ideo aliqui eorum sunt in hoc aere ad exercitium tentationis, et aliqui in inferno ad punitionem malorum. Quibus tamen vicissitudinibus hoc agatur, nobis ignotum est.

DISTINCTIO VII.

Supra dictum est, quod Angeli etc. (V. edit. nostrae tom. VI, pag. 552.)

QUAESTIO UNICA.

Hic quaeruntur quatuor: 1.^o de confirmatione honorum Angelorum; 2.^o de obstinatione daemonum; 3.^o de eorum cognitione; 4.^o de eorum potestate.

ARTICULUS I.

Ad primum sic proceditur. Et 1. videtur, quod liberum arbitrium Angeli non possit confirmari in bono. Necessitas enim libertati opponitur: sed confirmatio in bono quandam necessitatem importat; ergo liberum arbitrium Angelorum confirmari non potest.

2. Praeterea, secundum Damascenum, liberum arbitrium creaturae ex hoc est in malum flexibile, quod est ex nihilo: sed nulla gratia aufert libero arbitrio Angeli esse ex nihilo; ergo per nullam gratiam liberum arbitrium Angeli in bono confirmari potest.

3. Praeterea, illud quod est proprium Dei non potest alicui creaturae communicari. Sed non posse peccare proprium Dei est: unde Hieronymus dicit, « Solus Deus est in quem peccatum cadere non potest; » ergo non potest conferri Angelo, quod sit confirmatus in bono.

Sed contra. De ratione beatitudinis est securitas: timor enim poenam habet, ut dicitur 1 Joan. 4. Sed securitas boni non esset in Angelis, nisi in bono confirmati essent; ergo non essent beati. Necessesse est ergo Angelos bonos in bono confirmatos esse.

Praeterea, sicut liberum arbitrium est corruptibile per peccatum, ita corpus humanum per mortem. Sed corpus humanum per gloriam fit immortale,

ut habetur 1 Cor. 15: ergo et liberum arbitrium bonorum per gloriam confirmatur in bono.

Respondeo. Dicendum, quod liberum arbitrium Angeli in bono confirmatum est. Quae quidem confirmatio ex hoc potest intelligi, quod omnis voluntas naturaliter est ordinata ad bonum: unde nihil potest velle nisi sub ratione boni. Quamvis autem ex natura determinetur ad bonum in communi, non tamen ad bonum in speciali. Et ideo contingit peccatum ex hoc, quod illud quod non est vere bonum, accipitur tanquam bonum. Voluntas autem beatorum est determinata ad bonum, non solum in generali, sed in speciali, in quantum beati habent plenam cognitionem et continuam considerationem veri et summi boni. Et ideo sicut nunc nos non possumus non velle beatitudinem vel bonum in generali, ita nec beati possunt aliquod malum velle.

Ad primum ergo dicendum, quod necessitas coactionis libertati voluntatis opponitur, non autem necessitas naturalis inclinationis secundum quam necessario volumus esse beati: et huic est similis illa necessitas, quae est ex habitu gloriae confirmato; inclinatur enim in modum naturae.

Ad secundum dicendum, quod de natura liberi arbitrii creati est quod sit flexibile in malum, si sibi dimittatur; et tamen divina gratia regi potest ut in malum flecti non possit: sicut de natura aeris est, ut sibi relictus sit tenebrosus; et tamen per solem potest illuminari.

Ad tertium dicendum, quod esse per naturam impeccabilem in Deo est proprium; hoc tamen per gratiam homini vel Angelo convenire potest, in quantum Deo unitur.

ARTICULUS II.

Ad secundum sic proceditur. Et 1. videtur, quod daemones in malo obstinati non sunt. Nihil enim quod est contra naturam, potest esse perpetuum, ut patet per Philosophum 1 de Caelo et mundo. Sed malum est contra naturam rationalis creaturae, ut patet per Damascenum in tertio lib. 8 cap.; ergo non potest in daemonibus esse perpetuum: et sic non sunt ita obstinati in malo, quin ad bonum redire possint.

2. Praeterea, Dionysius dicit, 4 cap. de Div. nom., quod daemones bonum et optimum appetunt, scilicet esse vivere et intelligere; ergo non sunt obstinati in malo.

3. Praeterea, nullus credit nisi volens, ut dicit Glossa Rom. 9, super illud: « Corde creditur ad iustitiam: » sed daemones credunt, ut dicitur Jac. 2; ergo daemones, ad minus quantum ad hoc, bonam voluntatem habent.

Sed contra est, quod Augustinus dicit in lib. de Fide ad Pet.: « Daemones mala voluntate carere non possunt, nec poena. »

Praeterea, sicut se habet virtus ad beatitudinem, ita peccata ad miseriam, ut potest accipi a Philosopho in 1 Ethicorum: sed beati sunt confirmati in virtute; ergo et Angeli damnati sunt confirmati in malitia.

Respondeo. Dicendum, quod in daemonibus est natura bona et voluntas mala. Actus ergo naturae in eis bonus est: sed actus voluntatis in eis semper est malus: qui non est naturalis, sed eorum electioni subjectus. Cujus ratio est: quia quamdiu voluntas adhaeret malo fini, non potest aliquis a-

etus bonus a voluntate procedere. Voluntas autem daemoneis semel peccando malo fini inseparabiliter adhaesit, tum ratione suae simplicitatis, quia, non est in eo tanta diversitas potentiarum, sicut in nobis, ut per motum unius potentiae sit alia via ad reparationem alterius: sicut homo per hoc quod non vult despici secundum irascibilem, inclinatur ad dimittendum luxuriam in qua concupiscibilis deformatur: tum ex perspicacitate intellectus qui in eis apprehendit omnia immobiliter, sicut nos apprehendimus principia. Unde non sunt transuadibiles a malitia sicut nos: tum quia propter divinam justitiam quae decrevit in eis gratiam non esse adipiscendam propter culpae gravitatem per quam possint a malitia sanari: et ideo daemones sunt in malo obstinati.

Ad primum dicendum, quod naturale debet dici dupliciter. Uno modo quod de necessitate causatur ex naturae principiis nisi sit aliquod impedimentum, sicut naturale est lapidi deorsum ferri. Alio modo dicitur naturale id ad quod aliquid naturaliter ordinatur, sicut agere secundum rationem est naturale homini. Innaturale ergo quod primo naturali opponitur, non potest esse perpetuum, nisi forte impedimentum naturae sit perpetuum. Innaturale vero quod secundo naturali opponitur nihil prohibet esse perpetuum; ut hominem perpetuo ignorantem esse, licet ad scientiam naturaliter ordinetur. Sic autem malitia innaturalis dicitur, et non primo modo.

Ad secundum dicendum, quod illud appetere, de quo Dionysius loquitur, non est ex electione voluntatis, sed inclinatione naturae: quinimmo per voluntariam electionem naturale desiderium depravatur, prout determinatur ad illieita.

Ad tertium dicendum, quod credere quod est in daemoneis est cum quadam coactione, in quantum ex visibilibus signis quae cognoscunt, coguntur majestatem Dei recognoscere. Unde, licet ipsum credere in se bonum sit, non tamen ab eis bene fit.

ARTICULUS III.

Ad tertium sic proceditur. Et 1. videtur, quod daemones acumine scientiae non vigeant. Sicut enim voluntas praefertur bono, ita intellectus vero. Sed voluntas daemoneum totaliter est conversa a bono, ut dictum est; ergo intellectus a vero.

2. Praeterea, daemones sua scientia abutuntur, si quam habent: sed talibus doctrinam adhibere malum est; ergo daemones non habent rerum notitiam per revelationem bonorum spirituum.

3. Praeterea, experientia sumit initium a memoria, memoria vero a sensu, ut patet per Philosophum in principio Metaphysicae et in fine Posteriorum: sed daemones non habent sensum; ergo nec experientiam; non ergo vident acumine scientiae, ut in litera dicitur.

4. Praeterea, intellectiva cognitio, cum abstracta ab hic et nunc, aequaliter se habet ad praesentia et futura. Si ergo acumine scientiae vident, videtur quod futura cognoscant: et sic non videtur esse peccatum in consultationibus daemoneum de futuris. Hoc autem est falsum; ergo et primum, scilicet quod acumine scientiae vident.

Sed contra. Dionysius dicit quarto de Div. nom.:

• Data daemoneis Angelica dona nequaquam esse

• mutata dicimus: sed manent integra et splendidissima. • Perspicacitas autem intelligentiae est unum Angelicorum donorum; ergo adhuc in eis manet.

Praeterea, peccatum magis corrumpit voluntatem quam intellectum: sed post peccatum adhuc manet in daemoneis naturalis inclinatio ad bonum, quantum ad affectum; ergo et semper manet in eis naturalis cognitio quantum ad intellectum.

Respondeo. Dicendum, quod culpa naturam non auferit. Ex ipsa autem natura Angelica daemoneis acumen scientiae convenit: unde adhuc post culpam manet in eis. Ex sua autem natura habent acumen scientiae respectu quorundam immediate, quantum ad ea scilicet quae naturali cognitioni Angelorum subjacent, sicut sunt universales causae universi, et ad hoc dicuntur esse acuti per subtilitatem naturae. Respectu autem aliorum habent acumen scientiae ex sua natura mediate; et hoc dupliciter. Uno modo ex parte cognoscentis naturae; quae quanto propinquior est naturae bonorum spirituum, tanto facilius ab eis addiscere possunt: et sic dicuntur esse acuti per revelationem bonorum spirituum, respectu eorum quae naturalem cognitionem excedunt. Alio modo ex parte actualis cognitionis; in quantum scilicet ex eis quae naturaliter cognoscunt, aliquam conjecturam accipiunt eorum, quae non plene naturali ipsorum cognitioni subsunt, sicut sunt futura contingentia: et ad hoc dicuntur esse acuti per experientiam.

Ad primum ergo dicendum, quod actum voluntatis nos domini sumus, non autem cognitionis intellectivae. Unde magis ad naturam pertinet vera cognitio, quam recta affectio. In daemoneis autem bonitas naturae manet, non autem quantum est ex parte eorum.

Ad secundum dicendum, quod ipsum malum usum scientiae daemoneum, Deus ordinat in bonum electorum: et propter hoc non est inconveniens si per sanctos Angelos eis reveletur; non quidem per modum illuminationis, sed per modum locutionis.

Ad tertium dicendum, quod quamvis cognitio daemoneum non sit sensitiva, habet tamen aliquid simile cum sensitiva cognitione; hoc scilicet, quod sicut sensus non cognoscit per speciem quam habet, nisi rem quae jam est, ita et daemones: et secundum quod nova fuerint in rerum natura, per species innatas nova cognoscit; et sic experitur, qui effectus ex quibus causis magis procedere possunt.

Ad quartum dicendum, quod licet cognitio angelica, quantum est de se, aequaliter se habeat ad omne tempus, non tamen ea quae sunt futura, se habent eodem modo ad species, per quas daemones cognoscit, sicut quae sunt praesentia; quia nondum eis simulantur. Unde futura non nisi in suis causis ab eis cognosci possunt. Sic autem cognosci perfecte non possunt nisi effectus, qui ex necessitate ex causis suis proveniunt. Effectus autem contingentes in suis causis cognosci non possunt per certitudinem, sed per conjecturam; eo quod causae non sunt determinatae ad unum. Ad hujusmodi tamen effectus communicandos juvantur daemones longaevitae temporis, et revelatione superiorum spirituum, ut dictum est. Nec tamen sequitur, si aliqua futura cognoscunt, quod licet eos de futuris consultare. Sic enim pactum quodammodo cum daemone intelligitur: unde est quaedam species idolatriae, ut patet per Glossam I Cor. 16, super illud, • Nolo vos fieri socios daemoneum. •

ARTICULUS IV.

Ad quartum sic proceditur. Et 1. videtur quod virtute daemonum miracula fieri non possint. Antichristus virtute daemonum praecipue operabitur: sed de eo dicitur 2 Thess. 2, quod veniet in signis mendacibus; ergo per daemones miracula fieri non possunt.

2. Praeterea, daemones non operantur nisi per modum artis: sed ars formam substantialem non potest introducere; ergo non possunt daemones vera miracula facere, ut rerum species mutant.

3. Praeterea, virtus daemonis, cum sit spiritualis, caelestibus corporibus non subjacet: sed magi in hujusmodi miraculis quae faciunt determinatas constellationes observant; ergo eorum operationes non fiunt virtute daemonum.

Sed contra est quod Job 1, dicit Glossa, quod daemones possunt aerem commovere in alias tempestates.

4. Praeterea, Exod. 7 dicitur, quod Magi Pharaonis virgas in serpentes verterunt, qui cum virtute daemonum operabantur; ergo virtute daemonum miracula fieri possunt.

Respondeo. Dicendum, quod aliquod opus dicitur miraculosum dupliciter. Uno modo quantum ad substantiam facti, excedentis facultatem naturae; sicut suscitatio mortui, partus virginis, et similia: et hujusmodi miracula secundum rei veritatem daemones facere non possunt, sed solum secundum apparentiam. Alio modo quantum ad modum faciendi tantum, et non quantum ad substantiam facti; sicut sanatio febricitantis, quam natura facere potest, sed non in instanti: et hujusmodi miracula possunt daemones facere et secundum veritatem, et secundum apparentiam. Secundum veritatem quidem, non per modum imperii, sicut Deus facit, cujus voluntati natura obedit tamquam suo auctori; sed mediantibus causis naturalibus activis et passivis, quas Augustinus vocat seminales rationes: quas quidem causas adinvenire et colligere per acumen scientiae, et celeritate naturae possunt, ita ut eorum operationes miraculosae reddantur; sicut colligendo res quae erant in proxima dispositione ad generationem serpentum, ex virgibus serpentes fecerunt. Secundum apparentiam vero, inquantum imprimere possunt in phantasiam eam commovendo, et facere ut species quae ibi sunt, ad organa sensuum refluant, et sic videatur aliquid propriam speciem amisisse, quam tamen adhuc habet; sicut Augustinus narrat in libro de civitate Dei, quod quidam arte daemonum videbantur in bruta animalia converti.

Ad primum ergo dicendum, quod signa quae Antichristus faciet, possunt dici mendacia tripliciter. Uno modo, quia fiunt intentione fallendi. Alio modo, quia deficient a ratione signi. Namque signum, sive miraculum, est, quod excedit facultatem naturae: quod in signis Antichristi non erit. Tertio, quia quandoque deficient veritas rei in ejus signis, licet non semper; sed quandoque operabitur secundum apparentiam tantum.

Ad secundum dicendum, quod ars non operatur nisi mediante operatione naturae. Unde quando potest per proprias causas alicujus naturalis effectus apponere ad materiam, facit secundum rei veritatem effectum: sicut patet cum ligna igniuntur, vel cum infirmi sanantur per artem: alias non. In hoc autem daemones sunt potentiores quam homi-

nes. Unde multi veri effectus possunt fieri arte daemonum, qui non possunt fieri per artem hominum: sicut etiam apud nos peritus medicus sanat, quod imperitus sanare non potest.

Ad tertium dicendum, quod quamvis daemonis virtus stellis non subdatur, virtutes tamen rerum naturalium, quibus in sua operatione utuntur, stellis quadammodo subduntur. Et ideo certis horis invocati veniunt, quando sciunt corpora caelestia juvare ad hoc quod intendunt.

DISTINCTIO VIII.

Solet autem in quaestione versari etc. (V. edit. nostrae VI, pag. 265.)

QUAESTIO UNICA.

Hic quaeruntur quatuor: 1.º utrum Angeli sint naturaliter corporibus uniti; 2.º utrum quandoque corpora assumant; 3.º quas operationes in corporibus assumptis habere possunt; 4.º qualiter possunt in nos imprimere.

ARTICULUS I.

Ad primum sic proceditur. Et 1. videtur quod Angeli et daemones habeant corpora naturaliter sibi unita. Dicit enim Gregorius in homil. Epiph. quod Judaeis annunciavit Christi incarnationem rationale animal, id est, Angelus: sed animal naturaliter compositum est ex anima et corpore; ergo et Angelus.

2. Praeterea, formae incorporali magis congruit corpus incorporeale quam corporale. Sed aliqua forma incorporalis, scilicet anima rationalis, naturaliter unitur corpori, scilicet corporali; ergo multo amplius forma incorporalis unitur corpori naturaliter incorporali; hoc autem non potest intelligi nisi Angelus, qui est substantia incorporalis. Videtur igitur quod Angelus corpus habeat sibi naturaliter unitum; ergo Angeli naturaliter sunt corporei.

3. Praeterea, Angelo non minus est provisum in necessariis quam homini. Sed Angelus in aliquibus operibus suis indiget corpore sicut et homo, alias corpora non assumerent: ergo Angelus naturaliter habet corpus unitum sicut et anima humana.

Sed contra est quod dicit Dionysius, 4 cap. de Div. nom., quod Angeli incorporeales et immateriales intelliguntur.

Praeterea, inter creaturas invenitur aliqua creatura pure corporea, invenitur etiam alia ex spirituali et corporali composita: ergo ad completionem universi erit aliqua creatura pure spiritualis, et hoc erit Angelus; ergo etc.

Respondeo. Dicendum, quod circa corporeitatem Angelorum quatuor fuerunt positiones. Quidam namque dixerunt, Angelos aliquos habere corpora caelestia naturaliter sibi unita, animas orbium inter Angelos computantes, ut tangit Avicenna in sua Metaphysica, et Augustinus in Enchiridion, quamvis non definiat. Secunda positio est Rabbi Moysis qui posuit Angelos esse quaslibet virtutes naturales quas constat corpori unitas esse. Tertia positio fuit Platonicorum, qui posuerunt Angelos, quos calodaemones et cacodaemones appellabant, corpora aerea habere sibi naturaliter unita; quod etiam Augustinus in pluribus locis sentire videtur. Quarta est Dionysii quod omnes Angeli sunt incorporei: et haec

sententia, utpote rationabilior, communiter ab Ecclesia tenetur, eo quod corpora caelestia non constat esse animata. Virtutes etiam rerum corporearum non sunt intellectivae. Aer etiam et hujusmodi corpora simplicia non sunt vivificabilia, utpote ab aequalitate complexionis elongata, et maxime materialia. Unde quidam dicunt Augustinum hujusmodi verba dixisse, non quasi sententiando, sed opinionibus Platonicorum utendo; praecipue eum hoc non esset directe contra auctoritatem canonicae Scripturae.

Ad primum ergo dicendum, quod Angelus dicitur anima, non propter proprietatem naturae, sed propter similitudinem vitae et cognitionis, quasi metaphorice.

Ad secundum dicendum, quod substantia intellectualis unitur corpori naturaliter, ad hoc, ut per corpus aliquam perfectionem acquirat, praecipue in cognoscendo. Unde oportet hujusmodi corpus habere organa sensibilia, et sic esse passibile. Nam sentire pati est; et per consequens oportet esse corporale.

Ad tertium dicendum, quod homo indiget corpore ad suas operationes naturales, non autem Angelus; et ideo non est simile.

ARTICULUS II.

Ad secundum sic proceditur. Et 1. videtur, quod Angeli corpora non assumant. Si enim assumit aliquod corpus, aut illud corpus est mistum, aut simplex. Si mistum, maxime videretur, quod in illa natura assumerent, cujus speciem corpus assumptum praetendit, cum eos non deceat aliqua fictio; et sic quando apparent in figura hominis, assumerent aliquos homines; quod non videtur. Similiter nec assumunt corpus simplex: quia nec caeleste, cum non sit divisibile, et in aliam figuram transformabile: nec igneum, quia sic sui praesentia affligerent: nec aereum, quia aer non est susceptivus figurae, nisi secundum continuationem ad aliud corpus: nec aqueum, nec terreum, quia Angeli apparentes non possent statim disparere: ergo Angeli nullo modo corpus assumunt.

2. Praeterea, si Angeli assumunt corpora, hoc non est nisi ut aliquid divinitus hominibus annuncient: sed propter hoc non est necessarium ut corpus assumant, cum ipsae divinae personae visibiliter apparuerint in veteri Testamento, sicut patet Genes. 18, de Abraham, cui tres personae apparuerunt sub similitudine trium virorum; ergo Angeli nullo modo corpus assumunt.

3. Praeterea, omne corpus est divisibile partes habens; si ergo Angelus aliquod corpus assumeret, pari ratione quamlibet partem assumeret, et sic esset in pluribus locis simul; quod in primo libro improbatum est; ergo Angelus corpus non assumit.

Sed contra. Major est potestas Angeli quam hominis: sed homo potest assumere aliquod corpus non unitum sibi naturaliter; ergo multo fortius Angelus.

Praeterea, quod est de se incorporeum videri non potest, nisi corpore assumpto: sed Angeli ab hominibus quandoque visi leguntur in Scriptura, et tamen de se sunt incorporei, ut dictum est; ergo assumunt corpus.

Respondeo. Dicendum, quod quidam dixerunt Angelos nunquam corpora assumere. Totum vero quod in Scriptura de Angelorum apparitione legitur dicunt intelligendum fore, secundum visionem ima-

ginariam. Vel si secundum corporalem, dicunt hoc per modum praestigiorum factum esse, ita scilicet quod spiritus visibilis formaretur ab Angelis in visu. Huic autem repugnat quod quandoque Angeli apparentes non uni tantum, sed omnibus differenter (1) appareant; sicut patet de Angelis qui ierunt Sodomam; et de Angelo Tobiae. Hoc autem non convenit (2) in praestigiis et in his quae imaginatione videntur. Unde communiter tenetur, et sancti dicunt, quod Angeli quandoque corpora secundum veritatem assumunt: quod quidem congruit (3) quando non solum movent aliquod corpus, vel qualitercumque circa ipsum operantur; sed quando sic operantur circa corpus, ut transforment ipsum in aliquam figuram quae sit conveniens ad repraesentandum id quod de se Angeli manifestare debent. Hanc autem transformationem Angeli facere possunt, mediante virtutibus naturalibus activis; et hoc dico secundum suam naturam: sed Angeli boni ulterius in hoc possunt ex virtute imperii divini.

Ad primum ergo dicendum, quod corpus assumptum ab Angelo dupliciter potest considerari. Uno modo quantum ad principium assumptionis: et sic verum est, quod de aere assumunt sibi corpora, ut in litera dicitur, eo quod aer est maxime vertibilis in quodcumque. Alio modo quantum ad assumptionis terminum; et sic oportet quod aer ille inspissetur, et ita accedat ad proprietatem terrae, ad hoc quod sit aptum figurationi, quae non potest durare nisi in corpore solido. Nec oportet quod illud corpus solidum sit vere animal vel homo, quamvis figuram talem habeat; quia sola figura sufficit ad repraesentandum. Ipse etiam aer hoc modo inspissatus tam cito potest attenuari, ut subito Angelus non compareat.

Ad secundum dicendum, quod apparitiones factae sunt ministerio Angelorum, ut Augustinus probat in tertio de Trinitate. Angelus enim corpus assumens, quandoque figurat seipsum ad repraesentandum suas proprietates, et tunc dicitur ipsemet apparere; quandoque vero ad repraesentandum maiestatem divinam, et tunc dicitur Deus apparere.

Ad tertium dicendum, quod Angelus comparatur ad totum corpus assumptum, sicut ad unum aliquid. Et ideo est totus in toto et in qualibet parte, sicut et anima. Nec tamen propter hoc sequitur quod sit in pluribus locis simul.

ARTICULUS III.

Ad tertium sic proceditur. Et 1. videtur quod actiones, quas Angeli in corporibus assumptis exercent, non sint verae. Comestio enim et potus fuerunt argumentum resurrectionis, ut patet Actuum 10: « Dedit enim eum manifestum fieri testibus praeparatis a Deo, eis scilicet qui manducaverunt et biberunt cum Christo postquam resurrexit, etc. »: quod non esset, si spiritus posset vere manducare et bibere. Leguntur autem Angeli comedisse et bibisse, Gen. 18; ergo actiones, quas per corpus assumptum exercent, non sunt verae.

2. Praeterea, gignere non est nisi corporis viventis; cum ad hoc requiratur semen decessum, in quo sit virtus formativa: sed corpus sumptum ab Angelo non est vivum; ergo non potest filios generare. Et tamen dicitur Gen. 6: « Ingressi sunt filii

(1) *Lege* indifferenter.

(2) *Lege* contingit.

(3) *Forte* contingit.

• Dei ad filias hominum, illaeque genuerunt; • ergo idem quod prius.

5. Praeterea, si aliquam actionem hominis vere possent exercere, praecipue hoc esset de loquutione, quae est signum intellectus. Sed in eis non potest esse vere corporalis loquutio, cum tamen in corporibus assumptis multoties loquuti esse legantur; quia loquutio non venit ab intellectu ad organum corporale nisi mediante imaginatione, quae in Angelis non est; ergo nec aliquae actiones verae sunt.

Sed contra. Moveri maxime videtur esse proprietas corporalis: sed Angeli in corporibus assumptis vere moventur; ergo multo fortius et alias actiones vere exercent.

Praeterea, sentire est perfectior operatio, quae fiat per corpus verum: sed Angeli per corpus assumptum vere sentire videntur, alias organa sensibilia frustra assumerent; ergo multo fortius alias operationes corporum viventium habere possunt.

Respondeo. Dicendum, quod corpus assumptum ab Angelo vere est corpus, sed non vere vivum est. Unde in omnibus operationibus quas Angeli per corpus assumptum exercere videntur, quicquid potest pertinere ad corpus, absolute vel secundum naturam aeris, totum hoc vere est in actionibus Angelorum. Quicquid autem non potest pertinere ad corpus nisi secundum quod est vivum, non vere est ibi, nisi secundum similitudinem tantum. Nec tamen sequitur quod sit ibi aliqua falsitas; quia assumptio corporis ab Angelis ordinatur ad significandum tantum.

Ad primum ergo dicendum, quod in comestione aliquid est quod pertinet ad corpus in quantum est corpus, scilicet digestio cibi, et comminatio, et trajectio in interioram partem: et totum hoc potest vere esse in Angelis. Aliquid vero est quod convenit corpori vivo, scilicet nutritio, et alia quae consequuntur: et secundum hoc non fuit vera comestio in Angelis. Fuit tamen aliquo modo vera in Christo post resurrectionem: quia quavis eibis assumptis non nutritur corpus ejus propter statum gloriae ejus, habebat tamen naturaliter potentiam nutritivam.

Ad secundum dicendum, quod quidam dicunt Angelos bonos vel malos nullo modo posse generare, et quod in illa auctoritate Genesis intelliguntur per filios Dei, illi qui de stirpe Seth descenderunt, quia in cultu Dei perseverabant: per filios autem hominum, mulieres de stirpe Cain. Sed quia contrarium a multis asseritur, potest dici, quod sicut per semina aliarum rerum naturalium faciunt Angeli effectus naturales, ita per semen hominis operantur ad hominis generationem: quod quidem fieri potest, dum aliquis spiritus in corpore assumpto praebet se viro succubum et mulieri incubum. hoc autem non competit puritati bonorum Angelorum, sed immunditiae malorum.

Ad tertium dicendum, quod Angeli in corpore assumpto faciunt aliquid quod est locutioni simile, in quantum intelligunt, et suum intellectum exprimunt per sonos formatos, qui tamen soni non sunt voces, ad quarum formationem instrumenta animata requiruntur: et in hoc deficit operatio Angeli a perfecta ratione locutionis.

Ad quartum dicendum, quod moveri absolute est corporum: unde simpliciter concedi potest, quod Angeli movent corpora assumpta, et in eis per accidens moventur.

Ad quintum dicendum, quod nullo modo est

dicendum Angelos per corpus assumptum sentire; quia sentire proprie dicit actum animae vivificantis corpus, quod in Angelis non est.

ARTICULUS IV.

Ad quartum sic proceditur. Et 1. videtur, quod daemones intra corpora hominum esse non possunt. Dicit enim Glossa super illud Habacuc: 2: « Dominus in templo sancto suo, » quod « daemones simulacris exterioribus praesidere possunt, non autem interioribus esse: » ergo multo minus intrant humana corpora.

2. Praeterea, duo spiritus creati non possunt esse in eodem loco simul, ut in primo libro dictum est: sed anima est in qualibet parte corporis humani: ergo in nolla parte ejus potest esse daemon.

Sed contra videtur, quod daemones animabus etiam illabuntur. Daemones enim non operantur nisi ubi sunt: sed daemones operantur in animabus, imittendo cogitationes, ut dicitur in Psalm. 77: « Immissiones per Angelos malos: » ergo illabuntur animabus.

Praeterea, vis concupiscibilis et imaginativa sunt in anima: sed in has daemones imprimere possunt: quod videtur per hoc, quod intentores vitiorum dicuntur: ergo daemones animabus illabuntur.

4. Praeterea, cogitationes sunt in anima: sed daemones cogitationes cognoscunt, alias de eis homines non accusarent; ergo daemones animabus illabuntur.

Respondeo. Dicendum, quod Angelus, secundum Damascenum, ibi est ubi operatur. Non autem operatur intra ipsam essentiam animae, quia essentia animae a solo Deo est. Potest autem habere operationem in corpus humanum sicut et in alia corpora: et ideo non potest esse quod Angelus bonus vel malus animabus hominum illabatur. Potest tamen illabi corporibus: et inde est quod Angeli possunt imprimere secundum suam naturalem virtutem in potentias organicas affixas; non autem in potentias immateriales, sicut sunt intellectus et voluntas: nisi forte hoc dicamus, quod Angeli boni possunt illuminare intellectum aliquo modo virtute luminis gratiae quo replentur.

Ad primum ergo dicendum, quod daemon dicitur non adesse interioribus simulacris, ita quod uniatur simulacro ut forma, sicut anima corpori.

Ad secundum dicendum, quod anima non est in corpore sicut in loco, sed sicut forma in materia: et ideo non est unius rationis operatio quam anima in corpus efficit, et daemon. Unde sine confusione operationum uterque simul in eadem parte corporis potest esse. Unde ratio non sequitur.

Ad tertium dicendum, quod Angeli mali cogitationes immittere non possunt: sed tantum occasionem cogitandi praebere exterioribus, aliqua sensibilia aspectibus opponendo, vel interioribus phantasiam commovendo.

Ad quartum dicendum, quod in vim concupiscibilem et imaginativam daemones agere possunt, ex illa parte qua alligantur organibus corporeis; et ex hoc dicuntur intentores; non autem ex illa parte qua radicitur in anima.

Ad quintum dicendum, quod cogitationes cordium daemones seire non possunt, nec Angeli, nisi per revelationem: vel nisi in quantum eas per aliqua signa interiora vel exteriora cognoscunt multo perspicacius quam nos.

DISTINCTIO IX.

Post praedicta superest cognoscere etc. (V. edit. nostrae tom. VI, pag. 459.)

QUAESTIO UNICA.

Hic quaeruntur quatuor: 1.^o de distinctione ordinum et hierarchiarum; 2.^o de nominibus eorum; 3.^o de actibus hierarchicis, quos Dionysius assignat; 4.^o de assumptione hominum ad ordines Angelorum.

ARTICULUS I.

Ad primum sic proceditur. Et 1. videtur, quod in Angelis non debeant distingui tres hierarchiae et novem ordines. Quanto enim aliquid Deo est propinquius, tanto est simplicius et minoris divisionis: sed Angeli sunt propinquiores Deo quam homines; ergo in Angelis non sunt tres hierarchiae et novem ordines, cum hoc non sit in hominibus.

2. Praeterea, si ordines in Angelis distinguuntur; aut hoc est secundum naturam, aut secundum gratiam. Si secundum naturam, videtur quod tot debeant ibi esse ordines quot sunt Angeli; quia supra dictum est, quod omnes Angeli adinvicem specie differunt, et quod adinvicem sunt inaequales. Si autem secundum gratiam, videtur quod debeant esse solum septem ordines, cum sint septem dona Spiritus sancti.

3. Praeterea, eorum quorum est connexio, non videtur simul esse distinctio secundum ordinem. Sed omnes Angeli adinvicem connexionem habent, ut Dionysius dicit 4 cap. Caelest. hierarchiae; ergo videtur quod in eis non debeat esse distinctio ordinum.

4. Praeterea, Ecclesiastica hierarchia extracta est a caelesti, secundum Dionysium. Sed in Ecclesia superior ordo est praelatorum; ergo videtur quod in Angelis Dominationes et Principatus qui a praelatione nominantur, debeant esse superiores quam Cherubim et Seraphim etc., in quorum nominibus praelatio non ostenditur.

5. Praeterea, videtur esse contrarietas inter Gregorium et Dionysium in assignatione ordinum. Nam Dionysius ponit Virtutes supra Potestates et Principatus: Gregorius autem Principatus supra Potestates et Virtutes.

Respondeo. Dicendum, quod in Angelis invenitur triplex distinctio: scilicet hierarchiarum, ordinum et personarum. Hierarchiarum quidem distinctio accipitur secundum diversum modum in genere percipiendi divinum lumen. Nam cum hierarchia nihil aliud sit quam principatus, illi Angeli ad unam hierarchiam pertinere videntur, quorum est modo uno in genere participare divina. Et ideo sunt tres hierarchiae in Angelis. Nam prima hierarchia percipit divina mysteria, quae ad ministerium Angelorum spectant, in ipso suo fonte, scilicet Deo: et propter hoc ejus ordines nominantur ex respectu ad Deum. Secunda vero percipit divina mysteria in quibusdam rationibus universalibus: quare et ejus ordines expriment potestatem non limitatam. Tertia vero percipit divina mysteria in rationibus specialibus: unde ejus ordines habent potestatem limitatam ad hominem vel provinciam. Distinctio vero ordinum sumitur secundum diversos actus. Unde prima

hierarchia habet tres ordines, scilicet tres respectus rationalis creaturae ad Deum. Quorum primus est ut ab eo inhabitetur per gratiam, et ad hoc est ordo Thronorum. Secundus est ut feratur in ipsum per cognitionem, et hinc dicitur ordo Cherubim qui interpretantur plenitudo scientiae. Tertius est ut feratur per amorem, et hinc sumitur ordo Seraphim. Similiter secunda hierarchia habet tres ordines secundum quod tria requiruntur ad aliquem qui habet potestatem generalem regendi aliquam multitudinem: quorum primum est in operando disponere, et hinc dicitur ordo Dominationum. Secundum est imperium per robur potestatis manire, et hinc dicitur ordo Virtutum. Tertium est exequi quae ad officium regiminis pertinent, et hinc dicitur ordo Potestatum. Similiter tertiae hierarchiae sunt tres ordines: quorum supremus habet actum super unam gentem: et sic sunt Principatus. Secundus supra unum hominem, de his quae pertinent ad gentem: et sic sunt Archangeli. Tertius supra unum hominem, de his quae ad eum singulariter spectant; et sic sunt Angeli. Et ista distinctio procedit secundum assignationem Dionysii. Distinctio vero personarum unius ordinis est secundum diversam facultatem ad actum eundem, quarum numerus nobis ignotus est.

Ad primum ergo dicendum, quod in omnibus hominibus est unus modus accipiendi divina, scilicet in speculo et aenigmate, quia sunt unius speciei; et propter hoc est eorum una hierarchia. In Angelis vero, cum non sint unius speciei, possunt esse diversi modi accipiendi divina, et per consequens diversae hierarchiae.

Ad secundum dicendum, quod ordines distinguuntur in Angelis, et secundum dona naturalia initialiter, et secundum dona gratiae consummative, quia dona gratuita in eis sunt data secundum mensuram naturalium: non quidem sic, ut diversi ordines diversa dona naturalia vel gratuita habeant, ut oporteat secundum numerum donorum, numerum ordinum accipere; sed secundum quod eadem dona participantur a quibusdam plus, a quibusdam minus. Non tamen quaelibet diversitas talis facit ordinum distinctionem; sed aliquarum personarum in eodem ordine distinctionem faciunt, ut dictum est.

Ad tertium dicendum, quod distinctio Angelorum non est confusa, sed ordinata. Unde oportet, quod in eis sit duplex connexio ordinis. Una, secundum quod omnes ordinantur ad Deum, a quo illuminantur. Alia, secundum quod adinvicem ordinantur, per hoc, quod quidam alios illuminant.

Ad quartum dicendum, quod Angeli immediate a Deo accipiunt, non autem homines. Unde in Angelis summitas Angelorum ostenditur ex immediata relatione ad Deum; non autem in hominibus; sed ex praelatione super alios hominum excellentia designatur.

Ad quintum dicendum, quod Gregorius tradidit ordinem Angelorum secundum conformitatem ad gradus Ecclesiae, in qua praelati sunt alii superiores. Unde Principatus et Potestates, in quorum nominibus praelatio designatur, Virtutibus praeposuit, non autem in nomine virtutum. Dionysius vero attendens omnes Angelorum ordines in aliquo principatu facto, vel praelatione esse, non tradidit eorum ordinem secundum habere praelationem et non habere, sed secundum majorem vel minorem praelationem. Et quia virtus complementum pote-

statis designat, praeposuit Virtutes Potestatibus et Principatibus. Videtur autem verior assignatio Dionysii, utpote qui ab Apostolo immediate accepit.

ARTICULUS II.

Ad secundum sic proceditur. Et 1. videtur, quod nomina inconvenienter Angelis assignentur. A proprietate enim communi non debet aliquid speciale denominari. Sed amare et cognoscere Deum omnibus Angelis est commune: ergo inconvenienter aliqui speciales ordines ab his denominantur Cherubim et Seraphim.

2. Praeterea, non debet esse aliquod nomen totius et partis: sed hoc nomen Angelus communiter omnibus caelestibus spiritibus convenit; ergo nullus specialis ordo debet hoc nomen habere.

3. Praeterea, Rom. 10, dicitur « Idem dominus omnium: » Angeli ergo non habent dominum nisi Deum; et sic inconvenienter aliquis Angelorum ordo, Dominationes nominantur.

4. Praeterea, ejusdem est praecipere, judicare et rebelles coercere, et etiam in agendis praeesse: sed iudicium in nomine Thronorum intelligitur, praeeptum in nomine Dominationum, cohibitio in nomine Principatum; ergo inconvenienter his nominibus diversi ordines designantur.

5. Praeterea, archos in graeco, idem est quod princeps in latino. Unum autem nomen non debet diversis ordinibus imponi; ergo inconvenienter unus ordo vocatur Principatum, et alius Archangelorum.

Respondeo. Dicendum, quod sicut Dionysius dicit, nomina Angelorum imponuntur ad ostendendam deformes eorum proprietates. Quae quidem non sunt accipiendae solum secundum dona divina quae ab Angelis participantur, quia omnia dona sunt omnibus communia; neque etiam solum secundum diversum modum participandi, quia omnia dona in superioribus ordinibus sunt excellentius: et sic ipsi ab omnibus nominarentur: sed accipiuntur proprie per relationem donorum ad actus, qui competunt singulis ordinibus quasi ex officio. Unde superius dictum est quod ordines distinguuntur secundum diversitatem actuum. Actio ergo conveniens altiori dono, superiori ordini est quasi propria. Sicut supremum donum est charitas: unde superioris ordinis officium est, alios ad charitatem inducere, scilicet Seraphim: Cherubim vero inducere in Dei cognitionem: et quicumque inferiorum hoc faciunt, hoc agunt quasi a superioribus moti, et virtute eorum. Et hinc est, quod inferiores ordines nomina superiorum assumunt: quandoque, in quantum eorum virtute agunt; superiores vero etiam quandoque nomina inferiorum, in quantum inferiores per superiorum actus in suis propriis actibus diriguntur.

Ad primum ergo dicendum, quod quamvis omnes beati Angeli Deum cognoscant et ament, non tamen omnes quasi ex proprio officio aliquos ad hoc inducunt. Unde non vocantur omnes proprie Cherubim vel Seraphim. Sciendum autem est, quod haec nomina cum desinunt in n, ut Cherubim et Seraphim, sunt neutri generis: et pluralis numeri, et signant collegium ordinis. Cum vero desinunt in m, sunt masculini generis, pluralis numeri, ut Cherubim et Seraphim, et signant singulares personas. Cum vero desinunt in b vel in ph, ut Che-

rub et Seraph, sunt masculini generis, et singularis numeri.

Ad secundum dicendum, quod ab annunciatione missi omnes caelestes spiritus Angeli dicuntur; sed a speciali modo nunciandi, scilicet per usum exterioris ministerii, unus ordo specialiter dicitur Angelorum, qui scilicet singulis hominibus ad custodiam deputantur.

Ad tertium dicendum, quod dominari ex propria auctoritate solius Dei est; sed ex divina auctoritate accepta dominari, est et hominum et Angelorum.

Ad quartum dicendum, quod actus illi in se ordinem habent. Nam imperium Angelorum ex divino iudicio considerato, robor habet. Unde ordo Thronorum, ad quos spectat divina iudicia promulgare, praepositur Dominationibus, quarum est de agendis imperare. Exequutio vero principum sumit a praeepto. Unde post Dominationes sunt ordines exequentes: Virtutes, quantum ad res naturales, quae in miraculis divinae jussioni cedunt; et Potestates quantum ad daemones quos refraenant, et sequentes ordines quantum ad homines quos dirigunt.

Ad quintum dicendum, quod Archangeli habent nomen compositum, ut Dionysius dicit, a duobus ordinibus. Dicuntur enim Archangeli quasi principes Angeli, quia cum utrisque habent commune. Cum Angelis quidem, quia singulares personas instruunt, non autem de singularibus factis, ut Angeli: sed de his quae pertinent ad multitudinem, vel ad omnes; in quo conveniunt cum Principatibus; a quibus tamen differunt in hoc, quod Principatus deputantur ad curam totius multitudinis, non autem Archangeli.

ARTICULUS III.

Ad tertium sic proceditur. Et 1. videtur, quod inconvenienter a Dionysio distinguuntur tres actiones hierarchiae: purgatio, illuminatio, et perfectio. Ubi enim non est impuritas, non potest esse purgatio. Sed in bonis Angelis nulla est impuritas; ergo purgatio ibi locum non habet.

2. Praeterea, si unus Angelus alium illuminat, hoc est aut infundendo lumen quod habet, aut lumen creando. Si primo modo, sequitur quod idem numero lumen sit nunc in uno Angelo, et postea in alio Angelo. Si secundo modo, sequitur quod unus Angelus in altero lumen erexit. Utrumque autem horum est inconveniens; ergo unus Angelus alium non illuminat.

3. Praeterea, mentem rationalem solus Deus formare potest, ut dicitur in Glossa Rom. 10, super illud « Ex quo omnia. » Sed perficere est quoddam formare; ergo unus Angelus alium perficere non potest. Si vero dicatur, quod perficere est docere, contra: Jeremiae 51, dicitur « Non docebit vir ultra proximum suum, et vir fratrem suum; » ergo multo minus unus Angelus alium docet.

4. Praeterea, Gregorius dicit: « Quid est quod non videant qui videntem omnia vident? » Angeli autem vident Deum videntem omnia; ergo sciunt omnia; ergo non indigent doceri.

Respondeo. Dicendum, quod istae tres actiones in Angelis ad cognitionem tantum referendae sunt. Unde Dionysius dicit in Cael. hierarchia, quod illuminatio, perfectio et purgatio, nihil aliud est quam divinae scientiae assumptio. In omni actione autem qua aliquis ducit alterum in cognitionem,

duo est considerare: Quorum unum est medium per quod docet, et hoc est quasi lumen, unde ex hoc sumitur illuminatio. Aliud est effectus hujus medii, qui duplex est: scilicet, remotio ignorantiae, et quantum ad hoc est purgatio; et cognitio rei quae docetur, et quantum ad hoc est perfectio. Ad hoc enim doctrina terminatur, ut aliquis rem quae docetur cognoscat. Unde et doctores perfectores dicuntur.

Ad primum ergo dicendum, quod purgatio in Angelis non est ab impuritate, sed a nescientia.

Ad secundum dicendum, quod unus Angelus alium non illuminat, neque tradendo idem numero lumen, neque lumen in altero creando; sed ex aliquo intelligibili proposito, lumen praeesistens confortando ad cognoscendum; sicut intellectus hominis ex aliquibus sibi dictis confortatur ad intelligendum.

Ad tertium dicendum, quod formare mentem interius agendo, solius Dei est; sed exterius adminiculando, potest esse alterius.

Ad quartum, quod auctoritas Hieronymi referenda est ad cognitionem Dei. Unde subjungit: « Omnes enim cognoscent me, etc. » Sed quantum ad cognitionem aliorum, unus alio plus cognoscit in Dei cognitione; et sic unus alium poterit docere; non auctoritate quasi interius agendo, sed quasi ministerio interius (1) adminiculando.

Ad quintum dicendum, quod Gregorius loquitur de his, quorum cognitio pertinet ad substantiam beatitudinis. Vel loquitur quantum ad sufficientiam medii, scilicet divinae essentiae, quae sufficienter omnia demonstrat; non autem quantum ad capacitatem videntis, qui divinam essentiam non comprehendit.

ARTICULUS IV.

Ad quartum sic proceditur. Et 1. videtur, quod homines ad ordines Angelorum non assumantur. Distinctio gratiae sequitur distinctionem naturae. Unde Angeli qui fuerunt potiores in naturalibus, plus de gratuitis acceperunt. Sed homines secundum naturam sunt inferiores Angelis; ergo per gratiam eis non adaequantur.

2. Praeterea, plus distat homo ab Angelo, quam unus Angelus ab alio. Sed Angeli inferiores non assumuntur ad ordines superiorum; ergo nec homines ad ordines Angelorum.

3. Praeterea, ordines secundum actus distinguuntur. Sed actus ordinum non conveniunt hominibus, scilicet ad custodiam deputari hominum vel provinciae, vel hujusmodi; ergo homines non assumuntur ad ordines Angelorum.

Sed contra est, quod dicitur Math. 12, de hominibus post resurrectionem, quod erunt sicut Angeli Dei in caelo.

Praeterea, Deut. 32 « Statuit terminos populo- rum juxta numerum filiorum Dei, » secundum aliam literam.

Respondeo. Dicendum, quod circa hoc fuit multiplex positio. Origenes enim posuit quod finaliter omnes spiritus rationales in aequalitatem redigentur sicut et aequales creati sunt: cui contradicit quod habetur 1 Cor. 15: « Stella differt a stella in claritate. » Eustachius vero posuit quod nullus homo assumeretur in aequalitatem Angelorum. Sed secun-

dum hoc, beata Virgo infra Angelos esset, quae tamen supra omnes Angelos dicitur exaltata. Unde communiter creditur quod aliqui homines ad ordines Angelorum assumuntur. Quidam tamen dicunt, quod soli virgines: cui contradicit quod multi non virgines, ut Petrus et Magdalena, multis virginibus sunt potiores. Unde alii dicunt, quod omnes perfecti assumuntur ad ordines Angelorum. Alii vero, quod decimum ordinem constituent. Sed quia una erit caelestis Ecclesia, ideo convenientius ab aliis dicitur, quod omnes salvandi ad ordines Angelorum assumuntur.

Ad primum ergo dicendum, quod Angelis dantur dona gratiarum secundum quantitatem naturalium, non autem hominibus, sed secundum conatum. In Angelis vero conatus sequitur naturam, propter hoc, quod in natura eorum nihil est quod difficultatem inducat.

Ad secundum dicendum, quod quia perfectiones gratuitae in Angelis consequuntur perfectiones naturales, ideo inferiores ordines non possunt transferri in superiores, quia eorum natura mutari non potest. In hominibus autem est aliter, ut dictum est.

Ad tertium dicendum, quod in Angelis est duo considerare: scilicet participationem divinorum donorum; et ratione hujus homines ad ordines Angelorum assumuntur, propter similem modum participandi. Est etiam ibi considerare executionem donorum quantum pertinet ad ministeria in homines, quae competit Angelis ex ipso gradu naturae prout inter Deum et homines medium constituuntur; et quantum ad hoc non est intelligenda praedicta assumptio. Nam sicut animae damnatorum non dantur nobis in exercitium tentationis, ita nec animae Sanctorum in ministerium custodiae.

DISTINCTIO X.

Hoc etiam investigandum est etc. (V. edit. nostrae tom. VI, pag. 471.)

QUAESTIO UNICA.

Hic quaeruntur quatuor: 1.º utrum omnes Angeli assistant; 2.º utrum omnes ministrent; 3.º utrum ratione ministerii inter eos posset esse pugna; 4.º de loquutione eorum.

ARTICULUS I.

Ad primum sic proceditur. Et 1. videtur, quod omnes Angeli Deo assistant. Assistere enim alicui, nihil aliud videtur, quam conspectui ejus stare. Sed omnes beati, etiam homines, divino conspectui astabunt, secundum illud Psalm. 16: « Ego autem in justitia apparebo conspectui tuo etc. »; ergo omnes Angeli boni Deo assistant.

2. Praeterea, si aliqui Angeli Deo non assistant, praecipue hoc de inferioribus videtur. Sed minores Angeli qui exterius ministerium implent, Deo assistant: quia Gregorius dicit, quod et mittuntur Angeli, et assistant; ergo omnium Angelorum est assistere.

3. Praeterea, propinquiore sunt Deo Angeli boni quam mali. Sed Angeli mali Deo assistant. Unde dicitur Job 2: « Cum venissent filii Dei ut assisterent coram Deo, affuit etiam inter eos Satan; » ergo videtur quod omnes Angeli Deo assistant.

(1) *Lege exterius.*

S. Th. Opera omnia. V. 22.

Sed contra. Gregorius dicit in Homilia de centum ovibus: « Assistunt, qui sic contemplatione
« intima perfruuntur, ut ad explenda foris opera
« minime mittantur. » Aliqui autem mittuntur ad
explenda foris opera; ergo non omnes assistunt.

Praeterea, Dan. 7: distinguuntur assistentes a ministrantibus cum dicitur: « Millia millium mini-
« strabant ei, et decies millies centena millia assi-
« stebant ei; » ergo non omnes assistunt.

Respondeo. Dicendum, quod in assistendo tria importantur. Ille enim qui assistit alicui, ab eo videtur, et eum videt, et per eum immediate praeceptum suscipit, et ad alios defert; quae (1) tria apparent in his, qui alicui regi terreno assistunt. Et quantum ad haec tria speciali quodam modo Angeli supremae hierarchiae Deo assistere dicuntur. Primo quidem, quia speciali quodam modo oculi divinae providentiae super eos sunt, in quantum immediate a Deo illuminantur, quod non dicitur de aliis. Secundo, quia eum quodam speciali modo vident, ita ejus essentiam contemplantes ut in ea videant immediate quaecumque ad eorum officia pertinent. Tertio, quia ipsi immediate divina praecepta recipientes, aliis proponunt. Et hoc tertium est proprium eis: alia vero duo sunt etiam aliis communia, quamvis non per eundem modum; quia omnes aliquo modo divina providentia reguntur, et omnes aliquo modo Deum vident. Assistere ergo, proprie loquendo, convenit solis Angelis primae hierarchiae, quamvis aliquo alio modo etiam aliis convenire possit.

Ad primum ergo dicendum, quod ratio illa procedit quantum ad hoc, quod ad assistere requiritur videre Deum per essentiam: quod omnibus beatis commune est; sed in hoc non completur ratio assistendi.

Ad secundum dicendum, quod etiam minores Angeli, secundum Gregorium, assistere dicuntur, in quantum administrando a divina visione non retardantur.

Ad tertium dicendum, quod, sicut dicit Gregorius in secundo Moraliu, Satan venit coram Domino ut videretur, non ut videret. Unde assistere dicitur in quantum ipse et omnia facta ejus divinae voluntati et providentiae subiacent.

ARTICULUS II.

Ad secundum sic proceditur. Et 1. videtur, quod omnes Angeli ministrent. Hebr. 1 dicitur, quod
« omnes sunt administratorii spiritus in ministerium missi etc. »

2. Praeterea, si aliqui Angeli in ministerium non mittantur, praecipue hoc videtur de superioribus: sed supremi Angeli in ministerium mittuntur, scilicet Seraphim, ut habetur Isaiae 6: « Volavit ad me
« unus de Seraphim; » ergo omnes in ministerium mittuntur.

Praeterea, Filius et Spiritus sanctus in infinitum omnes ordines Angelorum transcendunt. Sed ipsi mittuntur ad nos: ergo multo fortius omnes Angeli.

Sed contra, videtur quod nulli Angeli in ministerium mittantur. Caelum enim empyreum ad gloriam pertinet Angelorum. Sed si in ministerium mittantur, aliquando a caelo empyreo absunt: quia cum sunt in caelo, non sunt circa nos, ut per Damascenum patet; ergo gloria eorum minueretur, quod est inconveniens.

(1) *Al.* quia.

Praeterea, una potentia per hoc quod occupatur circa unam operationem, ab aliis retardatur. Si ergo aliquis Angelus circa ministerium nostrum occupatur, sequitur quod a divina contemplatione retardetur; et ita eorum gloria minueretur, quod est inconveniens.

Respondeo. Dicendum, quod circa hanc quaestionem sunt duae opiniones. Una est dicentium, quod omnes Angeli ad exterius ministerium quandoque mittantur. Distinguuntur tamen secundum eos ministrantes ab assistentibus: quia ministrantes dicuntur illi ad quos ex officio proprii ordinis spectat ad ministerium mitti. Ad assistentes vero non pertinet mitti quasi ex officio, sed aliqua nova occasione suborta; sicut ad nunciandum incarnationem, vel aliquid hujusmodi. Et hanc opinionem tangit Gregorius in Homilia de centum ovibus, non tamen asserendo. Alia opinio est Dionysii et sequentium eum; qui dicunt, quod superiores Angeli nunquam in ministerium mittuntur; sed immobiliter ordo iste custoditur, ut divina ministeria per superiores in medios, et per medios in inferiores deveniant; et ita per superiores Angelos in inferiores, et per inferiores in homines: et hoc dicit se Dionysius ab Apostolis accepisse. Unde secundum hanc opinionem dicendum est, quod quidam Angelorum pertinent ad assistentem dispositionem, scilicet tres ordines supremae Hierarchiae; quidam vero ad ministrativam. Inter quos quidam sunt sicut impetrantes solum, qui exterius non exeunt, scilicet Dominationes; quidam vero exequentes, sicut Angeli inferiorum ordinum, quorum unusquisque interdum exit in exterius ministerium pro his quae ad officium proprii ordinis spectant.

Ad primum dicendum, quod ministrare dicuntur, sive in ministerium mitti, non solum illi qui immediate circa homines vel alia corporalia operantur: sed etiam illi per quos alii in hujusmodi ministeriis diriguntur.

Ad secundum dicendum, secundum Dionysium, quod ille Angelus qui Prophetae apparebat, fuit de inferiori ordine; et tamen Seraphim dicebatur, in quantum ex virtute Seraphim ad purgationem Prophetae est per incendium operatus. Vel dicendum secundum eundem, quod inferior Angelus qui visionem formabat non ostendit Prophetae seipsum in imaginativa visione, sed Deum in Seraphim, intendens non in seipsum, sed in sum superiorem prophetiae cognitionem reducere: sicut aliquis inferior sacerdos cum absolvit, dicit: Absolve te auctoritate Dei, et domini Papae.

Ad tertium dicendum, quod divinae personae mittuntur non quasi locum mutant, sicut Angeli. Unde aequivocae missio dicitur utrobique.

Ad quartum dicendum, quod caelum empyreum non est de essentia gloriae, sed de congruentia. Unde in nullo gloria Angelorum minuitur, quando mittuntur; quia etiam quando sunt extra caelum empyreum, gloriantur de hoc, quod talis locus eis debetur.

Ad quintum dicendum, quod ratio illa procedit quando una operatio non est ratio alterius. Contemplatio autem divina dirigit eos in ministeriis, quia Deum in omnibus pro regula habent: unde eorum contemplationem ministerium non retardat. Unde Gregorius dicit, quod cum ad nos veniunt, sic exterius implent ministerium, ut tamen nunquam desint interius per contemplationem.

ARTICULUS III.

Ad tertium sic proceditur. Et 1. videtur quod inter angelos ratione ministerii pugna esse non possit. Pugna enim paci opponitur: sed pax est de perfectione beatitudinis in qua sunt Angeli, ut patet per illud Psal. 147: « Qui posuit fines tuos pacem; » ergo in Angelis, cum sint in beatitudine, non potest esse pugna.

2. Praeterea, omnes Angeli voluntatem suam divinae voluntati conformant: sed in divina voluntate non est aliqua contrarietas; ergo nec inter Angelos potest esse discordia vel pugna.

3. Praeterea, quicumque pugnant vel discordant adinvicem, oportet quod vel alter eorum scienter defendat injustam causam, vel alter eorum decipiatur. Sed in Angelis non potest esse neque injustitia neque deceptio; ergo neque pugna sive discordia.

Sed contra est, quod habetur Dan. 10, ubi Angelus ei dixit: « Princeps Persarum restitit mihi » viginti et uno diebus. » Et alibi: « Et nunc revertar » ut proeliet adversus principem Persarum. » Sed isti principes sunt Angeli; ergo pugnant adinvicem.

Praeterea, Job 25: « Qui facit concordiam in » sublimibus: » sed concordia fieri non potest nec oportet nisi inter discordes; ergo inter sublimes Angelos est aliqua discordia.

Respondeo. Dicendum, quod concordia vel discordia inter voluntates aliquorum potest attendi dupliciter. Uno modo formaliter. Alio modo materialiter. Formaliter quidem quando voluntates contrariantur in fine; et talis discordia inter Angelos esse non potest; quia unusquisque eorum quicquid vult, vult ad gloriam Dei, et ad divinae voluntatis impletionem. Materialiter vero voluntates discordant, quando contraria volunt, sed propter eundem finem: et talis discordia voluntatum in Angelis esse potest, secundum Gregorium. Unusquisque enim Angelus qui alicui genti praeficitur, meritum suae gentis ad divinum examen refert. Quamdiu ergo diversarum gentium merita sunt sibi invicem contraria, dicuntur Angeli qui illis gentibus principantur contra se pugnare, inquantum contraria merita referunt ad divinum examen, quorum victoria est sui super se opificis voluntas summa, ut Gregorius dicit: et sic Deus revelans eis suam voluntatem concordiam in eis facere dicitur. Quidam tamen dicunt quod illa pugna quae legitur in Daniele, non est intelligenda inter bonos Angelos fuisse, sed et inter malos et bonos: quod Hieronymus sentire videtur. Magis tamen videtur literae congruere, quod intelligatur ex utraque parte de bonis.

Ad primum ergo dicendum, quod repugnantia voluntatum quantum ad finem, paci adversatur; non autem sic quantum ad volita, dummodo non adsit pertinacia.

Ad secundum dicendum, quod ratione conformitatis ad divinae voluntatem ad concordiam reducantur, ad quam cognoscendam diversa merita ad examen divinae sententiae referunt.

Ad tertium dicendum, quod in diversis gentibus potest talis esse dispositio, quod cujuslibet causa aliquid justitiae habeat: et secundum hoc quilibet Angelus causam suae gentis promovet apud Deum.

ARTICULUS IV.

Ad quartum sic proceditur. Et 1. videtur quod in Angelis loquutio esse non possit. Omnis enim loquutio est per aliquod signum. Signum autem ad cognitionem sensitivam pertinet, ut patet per definitionem signi, quam Magister ponit in quarto Sententiarum: « Signum est, quod praeter speciem quam » ingerit sensibus, facit aliud in cognitionem venire »; ergo, cum in Angelis non sit sensitiva cognitio, videtur quod non possit ibi esse loquutio.

2. Praeterea, Gregorius in Moralibus exponens illud Job 28: « Non adaequabitur ei aurum vel » vitrum, » ait: « Cum uniuscujusque vultus attendi- » tur, simul etiam scientia pene ratur »: et loquitur de beatis in patria qui sunt Angelis similes; cum ergo loquutio ad hoc sit, ut per eam cordium occulta alii pandantur, videtur quod Angeli mutua loquutione non indigeant.

3. Praeterea, in omni loquutione est ut a loquente aliquid ad audientem per medium perferatur quod excitet audientem: sed nihil tale in Angelis poni potest; ergo videtur quod loquutio in Angelis non sit.

Sed contra est quod dicitur 1 Corinth. 13: « Si » linguis hominum loquar, et Angelorum: » ubi Glossa expresse dicit Angelos loqui.

Praeterea, Gregorius dicit in secundo Moralium, quod Deus loquitur ad Angelos, et Angeli ad Deum: et ita Angelis loqui convenit.

Respondeo. Dicendum, quod loquutio Angelorum quodammodo est similis nostrae loquutioni, et quodammodo dissimilis. Similis quidem est, quantum ad deo. Primo quantum ad id de quo fit loquutio. Per loquutionem enim mentis conceptum exprimimus, quem unus Angelus in alio nosse non posset, quia solius Dei est corda scrutari. Secundo quantum ad id per quod fit loquutio. Nam sicut in nobis ad enunciamdum ea quae in nobis ab alio videri non possunt, utimur his quae in nobis ab alio possunt cognosci, sicut vocibus, vel quibuslibet sensibilibus signis; ita Angeli per ea quae unus de alio cognoscere naturaliter potest, suos invicem sibi nunciant conceptus. Differunt autem quantum ad hoc: quod nos utimur sensibilibus signis, Angeli autem intelligibilibus; et quod nostra loquutio per successionem temporum agitur, Angelorum autem in instanti.

Ad primum ergo dicendum, quod licet in Angelis non sit signum sensibile, est tamen ibi aliquid intelligibile, quod loco signi accipitur.

Ad secundum dicendum, quod in beatis cognoscetur conscientia per alios, inquantum iudicium interioris virtutis in quantitate gloriae manifestabitur. Non autem propter hoc oportet quod unus beatus omnes cogitationes alterius cognoscat.

Ad tertium dicendum, quod Angelus beatus est semper in actuali consideratione suae essentiae, et per consequens eorum quae ad ipsum spectant. Unde quando aliquis Angelus ad alium convertitur ut eum alloquatur, ipsa conversio ab alio Angelo cognoscitur tanquam ad se pertinens; nec est ibi aliqua excitatio necessaria; nec iterum oportet imponere (1) medium per quod loquutio deferatur; quia Angeli non sunt considerandi ut secundum situm distantes, ut distantia loci possit eorum intelligibiles operationes impedire.

(1) *Leje* ibi ponere.

DISTINCTIO XI.

Illud quoque sciendum est etc. (V. edit. nostrae tom. VI, pag. 476.)

QUAESTIO UNICA.

Hic quaeruntur quatuor: 1.^o utrum Angeli hominibus ad custodiam deputentur; 2.^o utrum Angeli in beatitudine proficiant; 3.^o utrum mysterium incarnationis per homines didicerint; 4.^o utrum ordines Angelorum post diem iudicii durent.

ARTICULUS I.

Ad primum sic proceditur. Et 1. videtur, quod Angeli hominibus ad custodiam non deputentur. Ad officium enim custodis pertinet, ut instruat eum, qui suae custodiae deputatur, secundum modum suum, et quod a malo eum retrahat. Hoc autem Angeli facere non videntur. Oporteret enim eos frequenter visibiliter hominibus apparere, quibus connaturale est, ut a sensibilibus cognitionem accipiant; ergo Angeli hominibus ad custodiam non deputantur.

2. Praeterea, si Angeli hominibus deputarentur ad custodiam, oporteret, quod omnibus deputarentur: sed non omnibus deputantur, quia neque confirmatis, neque pueris eum peccare non possint, neque Antichristo et aliis in malitia obstinatis, qui non sunt ad bonum reducibiles; ergo Angeli non deputantur hominibus ad custodiam.

3. Praeterea, si Angelus homini in custodiam deputaretur, oporteret, quod eum semper custodiret, et nunquam relinqueret. Sed quandoque homines derelinquunt. Unde Jerem. 8, ex persona Angelorum dicitur: « Curavinus Babylonem et non est sanata, derelinquamus ergo eam. » Et iterum constat quod aliquando sunt in caelo empyreo, et tunc hominibus non adsunt; ergo Angeli non videntur hominibus esse custodes.

Sed contra est, quod in Psalm. 90 dicitur: « Angelis suis mandavit de te, ut custodiant te in omnibus viis tuis. »

4. Praeterea, Isaiae 5 dicitur: « Auferam sepem ejus et erit in direptionem. » Glossa: « id est Angelorum custodiam; » ergo homines ab Angelis custodiuntur.

Respondeo. Dicendum, quod sicut dicit Augustinus, 5 de Trin., « inferiores per superiores quodam ordine reguntur. » Unumquodque autem regi dicitur, secundum quod in finem suum dirigitur, et impedimenta tolluntur, quod est providentiae, sive curae. Unde, cum Angeli sint superiores hominibus, ministerio Angelorum divina providentia homines gubernat. Et ideo Angeli hominibus in custodiam deputantur, quia custodire ad providentiam pertinet. Per officium autem custodiae Angelus exit in exterius ministerium, non quidem indifferenter circa omnia; sed specialiter circa quaedam, et circa aliquas determinatas personas. Et ideo officium custodiae non pertinet ad Angelos supremae hierarchiae, neque ad Angelos inferiorae. Quorum Principatus deputantur custodiae gentis: Angeli vero custodiae unius hominis: Archangeli autem medio modo inter hos se habent, ut dictum est.

Ad primum ergo dicendum, quod ea quae communiter fiunt non debent solitum cursum naturae excedere. Unde, cum Angelorum custodia om-

nibus sit communis, non oportet, quod Angeli homines instruant vel a malis retrahant, praeter solitum naturae cursum, visibiliter apparendo; sed invisibiliter illuminando vel occasiones exterius praeparando. Si quando vero visibiliter apparent, hoc specialis gratia est.

Ad secundum dicendum, quod omnibus pure viatoribus debetur Angelorum custodia, quia adhuc possunt in bono vel in malo proficere. Unde Angeli circa eos operantur vel impediendo ne pejores fiant, vel in melius promovendo, vel in his quia usum liberi arbitrii non habent, saltem corporaliter protegendo. Christo autem non competit habere Angelum custodem; tum quia ipse comprehensor erat, tum quia omnes Angelos ipse custodiebat.

Ad tertium dicendum, quod sicut homo subditur semper divinae providentiae, ita et Angelorum custodiae. Unde Angeli non derelinquunt hominem quantumcumque peccatorem simpliciter, quamvis quandoque deserant aliquem ex justo Dei iudicio, quantum ad aliquid, permittentes eum in aliquod malum incidere. Deserunt etiam quandoque hominem bonum vel malum, secundum locum, cum sunt in caelo empyreo; nunquam tamen secundum custodiae effectum.

ARTICULUS II.

Ad secundum sic proceditur. Et 1. videtur, quod Angeli in beatitudine proficiant. Caritas enim est merendi principium. Cum ergo in Angelis sit praecipua caritas, videtur quod per opera quae ex caritate circa nos agunt mereantur, et ita in beatitudine proficiant.

2. Praeterea, quanto aliquis intellectus magis illuminatur perspicacius cognoscit. Sed Angeli inferiores a superioribus illuminantur, ut Dionysius dicit: ergo in hoc proficiunt ut Deum perspicacius cognoscant, et in hoc beatitudo consistit; ergo in beatitudine proficiunt.

3. Praeterea, de ratione beatitudinis est perfectio: sed perfectioni Angelorum aliquid additur ex hoc quod cognoscunt aliqua quae prius non noverunt, tum ex superiorum illuminatione, tum ex mutua loquutione, tum ex rerum eventibus; ergo Angeli in beatitudine proficiunt.

Sed contra. Eiusdem videtur esse proficere et deficere: sed Angeli non possunt deficere per peccatum; ergo non possunt proficere per meritum vel praemium.

Praeterea, quamdiu aliquis est in statu proficiendi, est in via et non in termino; ergo si Angelus proficere potest, videtur quod sit viator: et sic, vel non est comprehensor, quod est erroneum; vel est simul comprehensor et viator, quod soli Christo competit.

Respondeo. Dicendum, quod circa hoc ponitur in litera duplex opinio. Quarum una posuit quod Angeli proficiant in praemio essentiali quod consistit in Dei cognitione et dilectione. Sed hoc non videtur esse verum. Nam secundum Damascenum, idem est Angelis confirmatio vel casus quod hominibus mors. Homines autem secundum statum in quo inveniuntur, in morte praemium vel poenam consequuntur, quibus nihil adjici vel subtrahi potest per opera eorum post mortem, sicut dicitur Ecl. 11: « Si ceciderit lignum ad austrum vel ad aquilonem, in quocumque loco ceciderit, ibi erit. » Unde

nec Angeli post confirmationem vel casum mutari possunt secundum statum suum, ut scilicet sint majoris vel minoris beatitudinis aut damnationis, quantum ad ea quae essentialiter ad beatitudinem vel damnationem pertinent. Et ideo alia opinio est, quod Angeli in his quae sunt de essentia beatitudinis non proficiunt post confirmationem, proficere tamen possunt in cognitione aliorum quae ad essentiam beatitudinis non pertinent. Et hoc verius videtur. Nam non est necesse Angelos videntes Deum per essentiam omnia cognoscere, quamvis in divina essentia omnia reluceant, quia eam non comprehendunt, et ita eis remanet in quo cognitio eorum proficere possit. Et sic excluditur quorundam tertia opinio dicentium Angelos beatos omnia in verbo cognoscere: quod manifeste Dionysius contrariatur, qui dicit Angelos a nescientia purgari.

Ad primum ergo dicendum, quod charitas, quamdiu est in via ad perfectionem, est principium merendi; sed cum est in termino perfectionis, non merendi, sed fruendi principium est.

Ad secundum dicendum, quod unusquisque Angelus illuminatur a Deo immediate lumine gloriae, quo Deum per essentiam videt; et istud lumen in eis nec proficit nec deficit, cum sit in termino perfectionis. Illuminatur vero unus Angelus ab alio de his quae ad cognitionem creaturarum spectant; quorum plura superior Angelus in Deo quam inferior cognoscit.

Ad tertium dicendum, quod non quaelibet perfectio est de essentia beatitudinis; sed illa quae est in plena participatione summi boni, ex cuius fruitione creatura rationalis bona efficitur. Unde, quamvis Angelorum cognitio proficiat in aliis quam in Deo, non sequitur quod proficiant in beatitudine. Ideo dicit Augustinus in lib. Conf.: « Qui te et illa » novit » scilicet creaturas « non propter illa beator, » sed propter te solum beatus. »

ARTICULUS III.

Ad tertium sic proceditur. Et 1. videtur, quod Angeli per homines mysterium incarnationis didicerint. Dicitur enim Ephes. 5: « Ut innotescat » Principibus et Potestatibus in caelestibus per Ecclesiam multiformis sapientia Dei: » et loquitur quantum ad mysterium incarnationis; ergo hoc mysterium Angeli ab hominibus didicerunt.

2. Praeterea, superiorum est illuminare inferiores. Sed quidam homines quibusdam Angelis sunt superiores, utpote Deo per gratiam propinquiores; ergo Angeli ab hominibus discere potuerunt incarnationis mysterium.

3. Praeterea, creatura rationalis potest aliam instruere et per illuminationem et per loquutionem. Loqui autem non potest superior solum inferiori, sed etiam inferior superiori. Ergo homines, quamvis sint Angelis inferiores, possunt per modum loquutionis aliquid conceptum vel divinitus revelatum Angelis intimare.

Sed contra est, quod Dionysius dicit quarto cap. de Cael. hierarch., quod homines per Angelos incarnationis mysterium sunt edocti.

Praeterea, incarnationis mysterium inter homines familiariter beata Virgo cognovit: sed ipsa cognovit hoc Angelo nunciante, ut habetur Luc. 1: ergo multo fortius alii homines didicerunt per Angelos, et non e converso.

Respondeo. Dicendum, quod incarnationis mysterium cognosci potest dupliciter. Uno modo secundum quod ex rationibus aeternis dependet; et sic homines ipsum per Angelos didicerunt, et non e converso. Nam revelationes divinae ad homines mediantibus Angelis deferuntur. Alio modo secundum quod est temporaliter expletum: et sic quantum ad aliquas particulares circumstantias, hoc mysterium Angeli cognoverunt, sicuti et alia temporalia cognoscunt, propter hoc quod fiunt eis praesentia quaedam futura, quae ex se scire non poterant nisi per divinam revelationem, per quam et ipsum incarnationis mysterium, omnes Angeli a mundi primordio etiam quantum ad rei substantiam didicerunt, ut Augustinus dicit super Genesim ad literam. Quia vero quaedam quae ad mysterium incarnationis pertinent, operatione hominum, et Apostolorum praecipue praedicatione completa sunt in actu, per hunc modum Angeli per homines hoc didicisse Hieronymus dicit.

Ad primum ergo dicendum, quod Ecclesia, secundum Augustinum, sumitur ibi pro triumphanti, non pro militanti: ut sit sensus quod principibus per Ecclesiam, id est in Ecclesia caelesti innotuit incarnationis mysterium. Vel si sumatur pro Ecclesia militante, haec determinatio « per Ecclesiam » non determinat hoc verbum, innotescat; sed praecedens, scilicet illuminare; ut sit sensus, quod Apostolo data est gratia illuminare omnes per Ecclesiam, id est qui sunt de Ecclesia. Vel si determinet hoc verbum innotescant, ut Hieronymus vult, oportet intelligi quod innotuit Angelis per Ecclesiam, in quantum hoc mysterium in Ecclesia completum est.

Ad secundum dicendum, quod licet homo possit esse major Angelo quantum ad causam, non tamen quantum ad statum, quamdiu homo est viator, et Angelus comprehensor. Sicuti herba aliqua est major parva arbore secundum praesentem statum quamvis in parva arbore sit causa majoris magnitudinis.

Ad tertium dicendum, quod inferiores superioribus loquuntur de his quae subjacent libero arbitrio. Tale autem non est incarnationis mysterium.

ARTICULUS IV.

Ad quartum sic proceditur. Et 1. videtur, quod ordines Angelorum post diem iudicii non erunt. Hierarchia enim est sacer principatus; et sic quilibet ordo qui est pars caelestis hierarchiae aliquam praelationem importat: sed in futuro cessabit omnis praelatio, ut dicit Glossa 1 Cor. 13; ergo ordines Angelorum non manebunt.

2. Praeterea, ordines Angelorum praecipue secundum actus distinguuntur, ut supra dictum est. Sed actus quorundam ordinum non erunt post diem iudicii; sicut miracula facere, daemones arcere, et alia huiusmodi; ergo aliqui ordines evacuabuntur, et eadem ratione alii.

3. Praeterea, ordo caelestis hierarchiae est quosdam illuminari, quosdam illuminare. Sed post diem iudicii unus Angelus alium non illuminabit, quia ulterius in cognitione non proficiet, utpote in ultima completionem existentes; ergo ordines Angelorum post diem iudicii non erunt.

Sed contra. Posita causa ponitur effectus. Sed causa distinctionis ordinum est distinctio in naturalibus donis et gratuitis, quae semper in An-

gelis erit, quia nunquam quantum ad hoc erunt omnes aequales; ergo post diem iudicii in Angelis erit ordo.

Praeterea, Angelorum et hominum in patria erit aequa conditio. Math. 22: « Erunt sicut Angeli » Dei in caelo. » sed in hominibus erit ordo distinctus etiam post resurrectionem, ut patet 1 Corinth. 15: « Stella differt a stella in claritate, sic » erit et resurrectio mortuorum; » ergo post diem iudicii etiam in Angelis erit ordo.

Respondeo. Dicendum, quod, cum ordo sit nomen potestatis, de ratione ordinis duo esse videntur; scilicet perfectio aliqua per quam in gradu constituitur, et actus ad quem potestas ordinatur. Quantum ergo ad primum, post diem iudicii ordines in Angelis remanebunt, sicut et modo sunt: unde et homines ad ordines Angelorum assumi dicantur. Sed quantum ad secundum, distinguendum est: nam unicuique ordini aliquo modo duplex actus respondet. Unus in ordine ad ea quae eorum ministerio temporaliter sunt agenda: et hic actus post diem iudicii non remanebit, quia tunc omnia ad suum terminum perducta erunt. Alius actus in comparatione ad Deum, qui est etiam principium eorum quae circa inferiora agunt, in quantum ejus imperio agunt: et iterum finis, in quantum de suis actibus in ipso gloriantur: et sic actus ordinum etiam post diem iudicii remanebunt.

Ad primum ergo dicendum, quod post diem iudicii cessabit praedictio, quantum ad officium dirigendi in finem, quia tunc erunt omnia in suo fine: non autem quantum ad dignitatis gradum.

Ad secundum dicendum, quod obiectio illa procedit de actibus, quos Angeli in inferiora agunt.

Ad tertium dicendum, quod licet Angeli inferiores post diem iudicii in scientia proficere non possint, tamen eorum cognitio continuabitur virtute superiorum Angelorum, prout in eis cognoscent aliqua, quae in Dei essentia non sufficient intueri.

DISTINCTIO XII.

Et de Angelicae naturae etc. (V. edit. nostrae tom. VI, pag. 487.)

QUAESTIO UNICA.

Hic quaeruntur quatuor: 1.^o utrum omnia creata sint simul secundum formam vel secundum naturam (1) tantum; 2.^o utrum illa materia aliam formam habuerit, si omnia non sunt simul secundum formam creata; 3.^o qualiter sint sex dies intelligendi, si omnia sint simul creata etiam secundum formam; 4.^o de modis divinarum operationum quae tanguntur in litera. (Quo ad hanc distinctionem nota p. p. qq. 66 per totum.)

ARTICULUS I.

Ad primum sic proceditur. Et 1. videtur quod omnia sint simul creata in formis suis distincta. Ea quae ad sui perfectionem operari vel cooperari non possunt, statim debent esse in principio perfecta (pro nihilo enim eorum perfectio differtur); sed universum non poterat operari neque cooperari ad primam institutionem naturae; ergo fuit creatum perfectum perfectione naturae; et ita in sui creatione habuit omnes species rerum distinctas.

(1) *Lege materiam.*

2. Praeterea, opus creationis divinam potentiam manifestat: sed magis manifestatur potentia agentis si subito operetur, quam si successive; ergo Deus in instanti universum perfectum creavit secundum species distinctum.

3. Praeterea, Boetius dicit, quod natura a perfectis sumit initium: sed totius naturae initium est prima rerum creatio; ergo tunc sunt omnia creata perfecta secundum species suas.

Sed contra est, quod dicit Gregorius exponens illud Eccl. 18: « Qui vivit in aeternum creavit » omnia simul. Deus, » inquit, « Omnia creavit simul » per substantiam materiae, sed non per speciem » formae. »

4. Praeterea, Gen. 1 dicitur, quod in principio creationis terra erat inanis et vacua. Hoc autem non esset si in principio omnes species rerum foissent distinctae; ergo non omnia sunt simul creata secundum species.

Respondeo. Dicendum, quod in universo sunt duae rerum species. Quaedam namque oportet immediate ponere ab ipso Deo esse facta, sicut Angelos, corpora caelestia et elementa mundi et prima individua animalium generatorum ex semine: ad haec enim producenda naturae virtus non potest. Quaedam vero sunt quae virtute naturae fieri possunt: et haec pertinent ad universi conservationem, sed prima ad universi institutionem. In primis ergo servatur ordo naturae, sed non temporis, secundum Augustinum, qui ponit omnia hujusmodi simul esse creata. In aliis vero oportet servari ordinem temporis. Sed secundum alios sanctos, in utrisque servatus est non solum ordo naturae, sed etiam temporis. Prima ergo opinio magis convenit rationi, nec est contra Scripturam; quia ea quae in Scriptura ordinem temporis importare videntur ad ordinem naturae Augustinus refert. Secunda vero magis convenit Scripturae, secundum suam superficiem. Quia ergo utraque a sanctis patrocinium habet, utramque sustinendo, objectionibus hinc inde factis respondendum est.

Ad primum ergo dicendum, quod imperfectio universi in principio creationis non fuit ad hoc, ut creatura se in perfectionem produceret, vel propter impotentiam facientis; sed ut ostenderetur universi perfectionem esse a Deo per imperfectiorem quae praecessit. Et per hoc patet responsio ad secundum.

Ad tertium dicendum, quod Boetius loquitur quantum ad primum principium rerum naturalium, quod quidem est secundum quod res in Deo sunt.

Ad quartum dicendum, quod Gregorius loquitur secundum suam opinionem. Nec est inconveniens quod circa ea quae non sunt de essentia fidei, sancti diversas opiniones habeant in expositionibus Scripturarum.

Ad quintum dicendum, quod per terram inanem et vacuum materia prima intelligitur, ut in litera dicitur, quae, ut in se consideratur, nullam formam habet. Praecedit autem alia non tempore, sed natura.

ARTICULUS II.

Ad secundum sic proceditur. Et 1. videtur, quod materia illa in qua omnia sunt simul creata vel facta, omni forma carebat. Illa enim materia primo creata erat perficienda per distinctionem formarum,

sequentium, non corrumpebat. Si ergo aliquam formam habebat, tunc formae supervenientes sunt illi superadditae. Sed omnes formae quae superadduntur formae essentiali sunt accidentales; ergo formae quibus res in speciebus distinctis constituuntur, sunt accidentales, quod est inconveniens.

2. Praeterea, si habebat aliquam formam, forma illa non poterit esse forma mixti corporis, quia hoc praesupponit formam miscibilem corporum. Similiter non posset esse forma alicujus elementorum, quia unum elementorum non est naturaliter materia alterius, ut probatur in secundo de Generatione. Similiter non potest esse aliqua alia forma; quia sic, aliqua alia forma per prius inesset materiae quam formae elementares; ergo non potest esse quod illa materia, in qua sunt omnia simul creata, habuerit formam.

3. Praeterea, quae sunt simul creata in materia, in una materia sunt facta. Sed materia non est una propter hoc quod habeat unam formam, sed propter hoc quod caret omni forma, ut Commentator dicit, in II Metaph.: ergo materia illa omni forma carebat; alias una non fuisset.

Sed contra. Creatio terminatur ad esse. Sed materia non habet esse nisi per formam; ergo sine forma creari non potest.

Praeterea, Augustinus dicit, quod omnia quaecumque facta sunt, sunt facta per artem divinam. Sed omne agens agit sibi simile. Cum ergo ars sit quaedam forma eorum quae sunt facienda per artem, necesse est quod omnia quae divinitus fiunt, habeant formam; et sic materia prima non fuit sine forma creata.

Respondeo. Dicendum, quod materia prima dupliciter accipi potest. Uno modo secundum quod ly primum, dicit ordinem naturae. Alio modo secundum quod dicit ordinem temporis. Primo modo loquendo, materia prima nullam formam habet, quia omne compositum ex materia et forma resolvitur ratione in materiam primam priorem ordine naturae; et cum non sit procedere in infinitum, oportet pervenire ad aliquam materiam, cujus pars non sit aliqua forma. Sed tamen materia prima sic accepta non potest esse sine aliqua forma sibi inherente, quamvis illa forma non sit pars ejus; quia cum dicimus esse simpliciter, intelligimus esse in actu, quod non est nisi per formam. Et per hoc patet, quod si accipiamus materiam primam secundo modo loquendi, id est, quae primo ante omnia est creata, non potest omni forma carere. Habuit autem formam non unam in omnibus suis partibus, sed diversas. Quod designant ipsa verba Scripturae, quae statim in principio creationis, terram et aquam nominant, per quae duo etiam alia elementa intelliguntur. Sic ergo dicendum est, secundam opinionem quae ponit non omnia simul creata esse in formis distinctis, quod materia prima habuit formas elementares substantiales, statim in sui creatione; quamvis non adhuc perfecte inessent elementis vires naturales, quae sunt principium operationum naturalium in eis.

Ad primum ergo dicendum, quod ratio illa procedit, si ponatur quod materia prima habuit unam formam secundum omnem sui partem, quae postmodum in rebus distinctis remaneat. Nos autem ponimus materiam secundum diversas partes diversas formas elementares habuisse. Et per hoc patet responsio ad secundum.

Ad tertium dicendum, quod materia proportionatur ei quod esse ex materia. Unde sicut totum universum est quasi unum corpus, unitate ordinis non continuitatis, ita materia prima creata habuit quamdam ordinis unitatem, non autem unitatem formae. Tota enim ordinabatur ad constitutionem universi perfecti; et sic tota habebat materiae rationem, prout erat in potentia ad ulteriorem perfectionem, quamvis aliqua perfectio jam ei inesset.

ARTICULUS III.

Ad tertium sic proceditur. Et 1. videtur, quod si omnia sint simul creata, non possit distinctio dierum convenienter salvari. Dies enim, tempus quoddam designat; ergo numerus dierum, successionem temporis importat. Duae autem partes temporis non sunt simul. Si ergo in prima rerum constitutione non fuit successio, videtur quod non fuerit ibi numerus dierum.

2. Praeterea, si dicatur quod dies accipiuntur pro cognitione Angelorum, Contra. Angelus omnia in verbo cognoscit una cognitione, sicut et verbum; si ergo cognitio Angeli dies dicitur, non debet pluralitas dierum distinguere.

3. Praeterea, diei adjungitur nox, quae est inter vespere et mane; sed inter dies illos vespere et mane numerantur; cum ergo nox, quae obscuritatem importat, ad Angelorum cognitionem pertinere non possit, videtur quod dies solus non possit modo praedicto.

4. Praeterea, quilibet dies, sicut habet vespere et mane, ita et meridiem; sed meridies non potest cognitioni Angelorum ascribi, cum ex hoc ipso quod Angelus est creatura, a plena luce distet; ergo videtur quod ejus cognitio dies convenienter diei non possit.

5. Praeterea, cognitio angelica est uniformis respectu omnium, cum non sit a rebus accepta. Si ergo per diem cognitio angelica designatur, oportet quod omnes dies essent uniformes; quod non videtur, cum primus dies habeat vespere et non mane, septimus e converso.

Respondeo. Dicendum, quod sicut de distinctione rerum Augustinus ab aliis sanctis aliter sentit, ita et de assignatione dierum. Nam alii sancti ad litteram intelligunt dies per successiones temporum distinctos, sicut et nunc distinguuntur: quod quidem Augustino non videtur, praecipue propter hoc quod cum Deus non successive operetur, sed solo imperio: constat rerum, opus, quod uni diei ascribitur, in momento temporis esse completum. Unde residuum tempus ejusdem diei superfluum videretur. Nisi forte diceretur secundum alios, quod per hoc magis distinctio rerum designatur. Unde Augustinus per diem intelligit angelicam cognitionem, et per sex dies cognitionem sex generum rerum; sicut per primum diem cognitionem creaturarum spiritualium, per secundam orbium caelestium, per tertiam elementorum, per quartam stellarum, per quintam avium et piscium, per sextam animalium et hominum. Qui quidem numerus, ratione suae perfectionis competit perfectioni universi. Sic ergo, cum dicitur aliquod Dei opus esse factum aliqua die, intelligitur esse factum Angelo cognoscente.

Ad primum ergo dicendum, quod obiectio illa procedit secundum quod dies materialiter et non spiritualiter intelligitur.

Ad secundum dicendum, quod cognitio Angeli qua cognoscit res in verbo, quamvis sit una ex parte medii quo cognoscit, tamen est multiplex ex parte rerum cognitarum.

Ad tertium dicendum, quod signanter Scriptura in constitutione rerum noctem non nominat inter dies, quia cognitioni angelicae, nox culpae vel ignorantiae non admiscetur. Nec oportet, omnia quae sunt in die corporali, inveniri in die spirituali.

Ad quartum dicendum, quod meridies est absque omni permistione tenebrae. Unde per meridiem signatur cognitio divina, qua res in seipso Deus cognoscit: per mane vero, intelligitur cognitio qua Angeli cognoscunt res in verbo, quia haec cognitio tendit a tenebris naturalis defectus in lucem divinam participandam: per vespere vero cognitio creaturae in propria natura; quia haec cognitio terminatur ad creaturam, quae de se deficiens est, sicut vespera terminatur ad noctem: et in Angelo cognoscente nox culpae fieret, si in creatura remaneret eam in laudem Dei non referens.

Ad quintum dicendum, quod Angelus seipsum non cognovit prius in verbo quam in propria natura, quia prius non potuit intelligere quam in propria natura esset. Unde primus dies qui significat cognitionem Angeli qua se cognoscit, mane non habet, sed solum vespere: dies autem septimus significat cognitionem divinae quietis qua in seipso quiescit, cui nulla tenebra admiscetur, nec aliquo fine terminatur, et propter hoc vesperam non habet.

ARTICULUS IV.

Ad quartum sic proceditur. Et 1. videtur, quod inconvenienter in litera Dei opera distinguantur. Nihil enim a Deo operatum est aeternum: sed dispositio rerum in verbo est aeterna; non ergo debet dici operatio.

2. Praeterea, materia non creatur sine forma, ut supra dictum est: forma autem est distinctionis principium; ergo opus creationis et distinctionis non sunt distinguenda.

3. Praeterea, ubicumque est multitudo, ibi est distinctio: sed in opere creationis multitudo invenitur: quia ponuntur quatuor simul creata, scilicet caelum empyreum, Angelica natura, materia corporalis et tempus: ergo in operatione creationis includitur opus distinctionis.

4. Praeterea, sicut distinctionis opus distinguitur ab opere creationis, ita opus ornatus ab opere distinctionis. Cum ergo opus ornatus praetermittatur, videtur, quod insufficientis sit enumeratio operum divinorum.

Praeterea, opus justificationis, glorificationis et creationis animarum sub nullo horum operum continetur; ergo insufficienter quatuor Dei opera assignantur.

Respondeo. Dicendum, quod duplex est operatio. Una quae est in ipso operante, ut velle, intelligere et huiusmodi; et secundum hoc sumitur primus modus, scilicet secundum quod Deus operatur in verbo omnia disponendo. Alia operatio est quae transit in rem exteriorem, sicut scribere vel aedificare. Haec autem operatio potest Deo attribui dupliciter. Uno modo mediante operatione alterius creaturae; et sic est quartus modus, secundum quod Deus operatur ex primordialibus naturae seminibus. Alio modo immediate absque ope-

ratione alterius creaturae: et hoc dupliciter. Uno modo quantum ad productionem substantiae principiorum naturalium; et sic est secunda operatio quae hic ponitur, scilicet creatio. Alio modo quantum ad collationem virtutum naturalium factam principiis naturae, per quas principia naturalia ab invicem distinguuntur; et sic est tertia operatio quae hic ponitur, scilicet distinctionis.

Ad primum ergo dicendum, quod operationi quae sistit in ipso operante, non respondet aliquod operatum, sed solum operationi quae procedit in rem exteriorem. Unde non sequitur quod sit aliquod operatum a Deo ab aeterno.

Ad secundum dicendum, quod quamvis in ipsa creatione fuerit aliqua rerum distinctio propter formas substantiales, non tamen fuit completa; sed eius completio attenditur per hoc quod virtutes activae et passivae rebus naturalibus conferuntur.

Ad tertium dicendum, quod illa quatuor coaeva sunt secundum genus distincta; sed oportet ulterius ut in eis secundum species distinctio attendatur quae ad opus distinctionis pertinet. Horum autem numerus ex his accipitur, quod inter primo creata connumerantur ea quae non possunt in eadem principia naturalia reduci. Accidens autem et substantia non conveniunt in materia. Similiter nec substantia spiritualis et corporalis, nec etiam corpora inferiora et superiora. Et ideo inter primo creata ponitur quantum ad spiritualia, natura Angelica: quantum ad corpora superiora caelum empyreum quod caeteris est nobilior, quantum ad corpora inferiora materia prima de qua omnia producantur, quantum ad accidentia, tempus quod solum est extra ea quae denominant, et unum respectu omnium.

Ad quartum dicendum, quod opus ornatus quodammodo includitur in opere distinctionis, et quodammodo non. Includitur quidem secundum quod opus distinctionis communiter accipitur pro unaquaque distinctione. Distinguitur vero secundum quod per opus distinctionis intelligitur distinctio principalium partium mundi quae fit per virtutes generales eis collatas, sicut in hoc quod elementa ad invicem secernuntur. Ornatus autem secundum quod species constituuntur a principalibus mundi partibus existentes, sicut stellae in caelo, aves in aere, pisces in aquis et animalia in terra, et hoc est secundum quod rebus conferuntur virtutes ad determinatas species ordinatae.

Ad quintum dicendum, quod omnia huiusmodi opera ad quartam operationem reducuntur, quia natura praeevens potest ad hoc aliquo modo cooperari, saltem disponendo, quamvis non sufficienter perficiendo.

DISTINCTIO XIII.

Prima autem distinctionis operatio etc. (V. edit. nostrae tom. VI, pag. 496.)

QUAESTIO UNICA.

Hic quaeruntur quatuor: 1.º utrum lux, de eius creatione hic agitur, sit lux spiritualis vel corporalis; 2.º si est, utrum sit substantia vel accidens; 3.º de modo productionis ipsius; 4.º qualiter et alia sint facta per verbum.

ARTICULUS I.

Ad primum sic proceditur. Et 1. videtur, quod lux, cujus hic productio commemoratur, fuit lux spiritualis. Lux enim diei causa existit. Dies autem cognitio Angelica hic intelligitur, secundum Augustinum, cujus principium non est aliquid corporale; ergo lux, de qua hic agitur, non est aliquid corporale, sed spirituale.

2. Praeterea, inter creaturas, substantiae spirituales sunt nobiliores: nec convenienter potuisset eorum creatio praetermitti a legislatore in Scriptura divina. Non autem commemoratur nisi ubi intelligitur per caeli creationem et lucis distinctionem; ergo lux aliquid spirituale hic assignat.

3. Praeterea, creatio uniuscujusque debet commemorari in suo perfectissimo, quia perfectum naturaliter est prius imperfecto: sed lux perfectissime invenitur in spirituali natura, et praecipue diffusio et manifestatio quae ad lucis pertinent rationem; ergo quod hic dicitur de lucis creatione, oportet intelligi in spirituali natura.

Sed contra. De rerum institutione debuit esse uniformis doctrina. Sed aliqua, quorum creatio a principio Genesis recitatur, proprie, et non metaphorice intelliguntur, sicut quod dicitur de plantis et animalibus. Cum ergo lux in spiritualibus metaphorice dicatur, ut patet per Ambrosium qui ponit splendorem inter ea quae de Deo transumptive dicuntur, videtur quod lux hic accipitur non pro spirituali, sed corporali.

Praeterea, lucem de qua hic agitur, tenebrae praecesserunt, ut patet Gen. 1. Sed tenebrae spirituales quae sunt ignorantia vel culpa, non praecedunt lucem spiritualement, cum Angelus in principio suae creationis malus non fuit, ut supra dictum est; ergo per lucem non potest hic intelligi lux spiritualis.

Respondeo. Dicendum, quod lux accipitur hic, et pro spirituali, et pro corporali; sed secundum diversorum expositionem. Augustinus namque posuit quod per caelum intelligitur spiritualis natura, et per lucem ejus formatio, qua formata est ad verbum conversa; sicut per terram intelligitur corporalis materia, et per alia subsequencia opera, formatio ejus ad determinatas species. Secundum vero Basilium et alios commemoratur hic creatio lucis corporalis, quae ideo primo inter caetera opera ponitur, quia est prima qualitas activa, per quam corpora superiora et inferiora agunt. Opus enim distinctionis vel ornatus attenditur secundum hoc quod rebus virtutes activae sunt collatae, vel generales, vel speciales. Unde in principio poni debuit lucis conditio. Secundum etiam expositionem Augustini idem ordo comperit. Nam formatio spiritualis naturae formationem corporalis praecedere debuit.

Ad primum ergo dicendum, quod ratio illa procedit secundum intentionem Augustini. Secundum alios enim per diem non signatur angelica cognitio, sed illustratio lucis corporalis.

Ad secundum dicendum, quod secundum Basilium, ideo Angelorum creatio praetermissa est, quia secundum eam, Angeli ante mundum corporalem creati sunt. Moyses autem corporalis mundi institutionem manifestare intendebat. Supponendo vero, secundum communem opinionem, quod Angeli cum mundo corporali creati sunt, potest dici quod Moy-

S. Th. Opera omnia. V. 22.

ses rudi populo loquebatur, qui ad spiritualia capienda non erat idoneus.

Ad tertium dicendum, quod manifestatio et diffusio per modum corporalem luci corporali competit. Non tamen sequitur quod ubi est verior manifestatio vel diffusio, ibi verius nomen lucis dicatur. Sicut non sequitur quod ubi verior cognitio, ibi verius cognitio dicatur, per hoc quod visio est cognitio quaedam.

Ad quartum dicendum, quod Augustinus videtur velle, quod lux in spiritualibus proprie accipitur; Ambrosii et Dionysii videntur sentire contrarium. Utrumque autem potest sustineri, ut dictum Ambrosii et Dionysii referatur, ad ipsum lucis nomen, dictum autem Augustini ad proprietatem lucis, secundum quam natura lucis a corporalibus ad spiritualia transfertur. Ideo autem potius in hoc primo opere metaphorica loquutione opus fuit, quam in sequentibus, quia spiritualia hominibus, et maxime rudibus, per corporalium similitudines manifestantur.

Ad quintum dicendum, quod secundum expositionem Augustini tenebrae non praecesserunt lucem tempore, sed natura; quia etiam spiritualis natura, in se considerata tenebrosa esset, nisi divinitus illuminaretur.

ARTICULUS II.

Ad secundum sic proceditur. Et 1. videtur, quod lux corporalis, de qua hic agitur, non sit accidens. Augustinus enim dicit in libro de Libero arbitrio, quod lux in corporibus tenet primum locum: et Philosophus in 5 Topicorum, quod lux est species ignis. Nullum autem corpus est accidens; ergo lux non est accidens.

2. Praeterea, cuicumque conveniunt corporis proprietates, illud est corpus: sed lux est hujusmodi, cum dicatur moveri, reverberari, conjungi alii luci, et ab ea separari; quae omnia sunt corporum; ergo lux est corpus, et sic idem quod prius.

3. Praeterea, cuilibet passibili qualitati est aliquid contrarium: sed luci non est aliquid contrarium; ergo non est passibilis qualitas. Sed non potest ad aliam speciem qualitatis reduci, nec in aliud genus accidentis; ergo lux non est accidens.

Sed contra est, quod Damascenus dicit lucem esse qualitatem ignis.

Praeterea, lux, secundum Philosophum, est actus lucidi, sine forma. Omnis autem forma quae advenit et recedit ab eo cujus est, speciem non mutans, est accidens: hoc autem de luce videmus, quia idem specie est aer lucidus et tenebrosus; ergo lux est accidens.

Respondeo. Dicendum, quod circa naturam lucis sunt multae opiniones. Quidam enim dicunt lucem esse corpus a corpori solari effluens.

Sed contra hoc est, quia sequeretur duo corpora esse in eodem loco, scilicet lucem et aerem, et corpus aliquod moveri in instanti, cum in instanti quo sol est in oriente, illuminetur aer usque in occidentem. Et ideo alii dicunt, quod lumen receptum in aere est accidens, sed lux, prout est in sole, est forma substantialis ejus. Contra quod est, quod forma substantialis non est sensibilis per se, sed solum per accidens; et iterum, quia sol secundum similitudinem suae lucis causat lumen in aere, quod constat accidens esse. Et ideo alii

dicunt quod lux nihil aliud est, nisi evidentia coloris. Contra quod est, quod lux aliquando apparet et color occultatur, sicut patet in noctilucis, quarum in nocte color occultatur, et lux apparet. Et ideo alii dicunt quod lumen, secundum quod est in aere, habet esse spirituale tantum. Est enim intentio lucis solaris in aere similis speciei lapidis in aere. Sed hoc non potest esse; quia huiusmodi intentiones non faciunt transmutationem in natura, quod tamen constat de lumine. Est enim calefactionis principium. Et ideo dicendum, quod lux, tam in sole, quam in aere, est qualitas; sed in sole est tamquam qualitas propria et naturalis; sed in aere, sicut qualitas ab alio mutuata; prout etiam calor aliter est in igne, et in corpore calefacto. Et sicut ignis per calorem suum agit, ita et sol per lucem. Et inde est quod per lucem fit omnis alteratio in istis inferioribus, ut Dionysius dicit, quia ipsa est qualitas primi alterantis.

Ad primum ergo dicendum, quod Augustinus et Philosophus accipiunt lucem pro corpore lucido in quo maxime lux invenitur, quantum ad inferiora corpora, quod est ignis.

Ad secundum dicendum, quod omnia ista dicuntur de luce vel radio quasi metaphorice, et non secundum proprietatem.

Ad tertium dicendum, quod oportet lucem esse in tertia specie qualitatis, sicut et alia sensibilia per se, non tamen habet contrarium, eo quod est qualitas primi alterantis, quod contrarietate caret.

ARTICULUS III.

Ad tertium sic proceditur. Et 1. videtur, quod inconvenienter lucis productio referatur. Totius enim luminis corporalis principium sol esse videtur. Sed principium est prius principiatio; ergo lucis productio non debuit poni ante productionem solis.

2. Praeterea, lux non facit diem et noctem, nisi per motum alicujus corporis quod circulariter movetur. Sed lux primo creata diem et noctem faciebat, ut patet Gen. 1; ergo videtur quod non debuit tradi productio lucis, sed alicujus corporis lucentis.

3. Praeterea, Deus creaturas visibiles facit ad suae potentiae manifestationem: sed lux est principium manifestationis; ergo statim a principio lucem facere debuit, ut lux a tenebris non praeveniretur.

4. Praeterea, Gen. 1, dicitur quod luminaria caeli facta sunt, ut sint in tempora et dies et annos; si ergo lux, de ejus creatione hic agitur, diem a nocte distinguebat, videtur quod creatio luminarium superflua fuerit.

Respondeo. Dicendum, quod sicut dictum est, opus distinctionis attenditur secundum quod partes mundi adinvicem sunt distinctae, per hoc quod eis sunt collatae virtutes activae generales, ad propagationem naturalium effectuum. Partes autem mundi possunt ad tres reduci: quarum suprema est totum corpus caeleste, infima corpus terrestre, media tria elementa, cum utroque extremorum convenientia. Harum trium partium triplex distinctio potest attendi: quarum prima est distinctio primae partis ab ultima; et hoc pertinet ad primam diem. Secunda est distinctio primae partis a media; et hoc pertinet ad secundam diem. Tertia est distinctio mediae partis ab ultima; et hoc pertinet ad tertiam diem. Corpus autem caeleste, quod est lucidum, di-

stinguitur a terrestri per lucem, quae est etiam communis virtus, per quam omnia corpora caelestia agunt: et sic convenienter primum distinctionis opus, est per lucis productionem.

Ad primum ergo dicendum, quod corpus solare, quantum ad suam substantiam, creatum fuit inter prima creata: sed in primo die intelligitur sibi fuisse lux collata, in quarto vero die intelligitur sibi fuisse collata virtus specialis, in qua ab aliis corporibus caelestibus distinguitur. Et quia substantia solis habens virtutem generalem activam, scilicet lucem, est informis respectu virtutis specialis, ideo dicitur in litera, quod de illa luce, corpus solis formatum est.

Ad secundum dicendum, quod substantiae specialium vel principalium mundi partium statim a principio creatae fuerunt: sed postmodum sunt eis virtutes generales vel spirituales attributae. Unde non fuit dicendum in prima die, quod corpora lucida fuerunt facta: sed quod lux sit eis data; et sic per motum circulearem corporis lucidi dies et nox fiebat; quamvis Damascenus dicere videatur quod tunc dies et nox facta fuerunt per emissionem et subtractionem radiorum; quod non videtur conveniens, cum emissio radiorum sit naturalis et non voluntaria.

Ad tertium dicendum, quod ut quidam dicunt, opus distinctionis statim cum opere creationis incepit, ita quod opus creationis ad primum diem pertineat. Sed melius videtur dicendum, sustinendo quod distinctio rerum per formas non sit facta simul, quod creatio fuerit ante omnem diem; et sic lucis carentia, quae tenebra nominatur, lucem praecessit. Decuit enim ut ab imperfectione ad perfectum divina opera ducerentur.

Ad quartum dicendum, quod in productione illius lucis solis intelligitur virtus generalis corporum caelestium. Et ideo oportuit postmodum fieri mentionem de formatione luminarium in quibus virtutes speciales continentur.

ARTICULUS IV.

Ad quartum sic proceditur. Et 1. videtur, quod non omnia sint facta per Dei verbum. Quod enim fit a solo verbo, statim est cum verbo profertur: sed verbum est ab aeterno prolatum a Deo; ergo si per verbum res factae sint, videtur quod fuerint ab aeterno.

2. Praeterea, per, denotat causam; si ergo Pater dicitur res fecisse per Verbum, videtur quod Verbum sit causa operationis Patris; et ita ejus essentiae, cum sua operatio sit ejus essentia.

3. Praeterea, opus creationis totius Trinitatis est; si ergo per Verbum creatio rerum facta dicitur, videtur quod pari ratione de Spiritu sancto in rerum creatione mentio fieri debuerit.

4. Praeterea, in his quae fiunt per Verbum, ipsum dicere est facere; si ergo res sunt factae per Verbum, non oportuisset quod postquam dictum est, dixit Deus, Fiat firmamentum, adderetur, Et fecit Deus firmamentum.

Sed contra est, quod dicitur Joan. 1 • Omnia • per ipsum facta sunt. »

Respondeo. Dicendum, quod cum dicitur aliquis facere per aliquid, haec propositio, per, causam operationis demonstrat: quod potest esse dupliciter. Uno modo secundum quod operatio ad operatum

terminatur; ut intelligamus per hoc fieri rem quod facit eam suscipere actionem principalis agentis: et sic, per, designat causam mediam, quae quidem est instrumentum, cum non habet virtutem eandem numero eum principali agente. Et sic dicitur homo percutere per baculum, vel rex operari per balivum. Alio modo, per, designat causam operationis, secundum quod exit ab operante: et sic per illud dicitur res operari quod est ei causa operandi; sive per modum finis, sive per modum formae; sicut dicitur ignis calefacere per calorem; sive per modum superioris agentis, sicut balivus dicitur operari per regem. Verbum ergo Dei, potest sumi ratione ejus quod est sibi proprium, quod est hypostasis Filii: et sic Pater dicitur operari per Verbum primo modo, quia scilicet genuit Verbum quod est operatorum principium, nec tamen est instrumentum Patris, ut Ariani dixerunt, quia habet eandem numero virtutem eum Patre. Potest etiam sumi ratione ejus quod ei appropriatur, scilicet divinae sapientiae vel artis; et sic Pater dicitur operari per Verbum secundo modo, sicut operari per suam sapientiam.

Ad primum ergo dicendum, quod ea quae fiunt per verbum, non oportet quod fiant quodcumque est verbum; sed quando per verbum determinatum est eis ut sint.

Ad secundum patet solutio ex dictis; quia causalitas praepositionis non refertur ad operantem, sed ad operatum.

Ad tertium dicendum, quod tam in operatione creationis, quam in operatione formationis rerum, fit mentio de tribus personis. In opere quidem creationis persona Patris intelligitur per Deum creatorem, persona Filii per principium in quo creata sunt, persona Spiritus sancti in spiritu qui aquis superferebatur. Similiter in opere formationis, persona Patris per Deum dicentem, persona Filii per verbum quod Deus dixit, persona Spiritus sancti in approbatione rerum factarum, cum dicitur, « vidit Deus etc. ». Quia enim verbum importat rationem dictorum. Et ideo rerum informitati non conveniebat nomen verbi, sed solum formationi, informitati vero nomen principii.

Ad quartum dicendum, quod per hoc quod dicitur, dixit Deus, intelligitur esse rerum in verbo: per hoc quod dicitur, fecit, intelligitur esse rerum in intelligentia angelica: per hoc autem quod dicitur, factum est, intelligitur esse rerum in propria natura. Et quia suipsius Angelus cognitionem habere non potuit, antequam in propria natura esset; ideo in opere primae diei, quod ad Angelos pertinet, secundum Augustinum, non interponitur, et fecit Deus. Vel si hoc opus ad lucem corporalem referatur, hoc ideo dicitur quia esse lucis est in continuo fieri, nec in ea differt esse factum et fieri.

DISTINCTIO XIV.

Dixit quoque Deus, fiat firmamentum etc. (V. edit. nostrae tom. VI, pag. 504.)

Hic est duplex quaestio: Prima de opere secundae diei. Secunda de opere tertiae diei.

QUAESTIO I.

Circa primum quaeruntur duo: 1.º de aquis quae sunt supra firmamentum; 2.º de ipso firmamento.

ARTICULUS PRIMUS.

Ad primum sic proceditur. Et 1. videtur, quod aquae quae supra firmamentum esse dicuntur, sint ejusdem naturae eum inferioribus. Inter ea enim quae sunt secundum suas naturas distincta, non necesse est esse aliquid distinguens: sed firmamentum ponitur quasi distinguens aquas superiores ab inferioribus, ut patet Gen. 1; ergo superiores et inferiores sunt ejusdem naturae.

2. Praeterea, philosophi dicunt, quod hoc modo se habet caelum in mundo, sicut cor in animali: sed cor in animali est situm in medio, et in ejus supremo est cerebrum, quod est aquae naturae; ergo et in mundo supra caelum sunt aquae.

5. Praeterea, corpora caelestia per suum motum sunt causa caloris, ut Philosophus dicit in libro de Caelo et mundo. Sed Saturnus inter planetas, velociorem habet motum, quantum ad motum diurnum, quia in una die motu suo majorem circulum pertransit; ergo motu suo maxima causa caloris esset, nisi aliquid impediret. Invenitur autem esse frigidissimus; ergo sua caliditas impeditur in circularitate aliquorum corporum frigidorum; et sic videtur quod supra firmamentum sint aquae frigidae.

Sed contra. Quanto aliquod corpus est superius in situ, tanto est subtilius: sed aqua non est subtilissimum corporum; ergo non debet esse supra omnia corpora.

Praeterea, nihil est extra suum locum naturalem, nisi per violentiam. Sed nihil violenter est supra lunam, quia corpora illa sunt impassibilia; cum ergo locus naturalis aquae sit circa terram, videtur quod supra caelos aquae hujus naturae non sunt.

Respondeo. Dicendum, quod supra firmamentum aliquas aquas esse dicere oportet propter auctoritatem Scripturae, cui non est fas repugnare. Per has autem aquas, quidam intelligunt aquas ejusdem speciei cum his quae apud nos. Sed hoc non potest esse secundum naturam, in cujus institutione oportet requiri quid natura rerum patiat, non quid Deus facere possit, ut Augustinus dicit. Et ideo alii per has aquas intelligunt spirituales substantias. Sed hoc non videtur literae convenire, quae dicit firmamentum dividere aquas ab aquis: nisi forte intelligatur, quod firmamentum dividit sicut medium in ordine naturae, utpote incorruptibilitatem habens eum spiritualibus substantiis, motum autem corporalem eum substantiis inferioribus. Quidam vero dicunt quod per firmamentum intelligitur aer iste super quem aquae pluviarum generantur: et hoc non videtur conveniens omnino. Nam in firmamento postea subditur, solem et lunam et stellas positas esse; quod de aere intelligi non potest. Unde convenientius dici potest quod aquae illae non sint ejusdem naturae eum aquis istis, sed aliquod corpus circulare de natura quintae essentiae, aquarum nomen habet, quod ponitur supra sphaeram stellarum fixarum etiam ab astrologis, et est totum diaphanum non habens aliquam partem lucidam acti; et per hanc similitudinem dicitur caelum aquarum vel

crystallinum, sicut corpus quod est totum lucidum actu, similitudine dicitur caelum igneum sive empyreum.

Ad primum ergo dicendum, quod firmamentum dicitur aquas ab aquis distinguere, non quasi earum distinctionem causans, sed quia secundum locum inter eas ponitur.

Ad secundum dicendum, quod cor in animali in medio ponitur ad majorem sui conservationem; caelum autem conservatione non indiget, cum de se sit impassibile: unde non est simile.

Ad tertium dicendum, quod Saturnus, licet habeat motum velocissimum, ut dictum est, dicitur tamen frigidus effective propter naturalem virtutem quam habet ad infrigidandum. Motus enim corporum caelestium est causa inferiorum alterationum, secundum quod per eum appropinquant et elongantur virtutes activae, quae sunt in corporibus caelestibus ab his inferioribus.

ARTICULUS II.

Ad secundum sic proceditur. Et 1. videtur, quod inconvenienter firmamenti productio describatur. Firmamentum enim caelum vocatur, Gen. 1. Sed caelum legitur creatum in principio ante omnem diem; ergo inconvenienter secunda die firmamentum fieri describitur.

2. Praeterea, firmamentum dicitur in quo sol, luna, et stellae sunt sita, ut patet per Gen. 1; sed sol, luna et stellae sunt in diversis sphaeris, ut astrologi probant; ergo de firmamento non debuit Scriptura facere mentionem, sicut de uno corpore.

3. Praeterea, Rabanus ponit septem caelos: scilicet empyreum, crystallinum, sidereum, igneum, olympium, aethereum, aereum. Firmamentum autem videtur esse caelum sidereum, cum in eo sidera posita esse legantur. Non ergo de eius formatione potius debuit fieri mentio quam de aliis caelis.

4. Praeterea, in corpore quod circulariter movetur, maxima fixio sive firmitas est in centro. Centrum autem mundi est terra; nomen ergo firmamenti magis debuit terrae attribui quam caelo.

5. Praeterea, caelum, secundum aliquos sanctos, ponitur esse de natura quatuor elementorum. Firmamentum autem in litera tangitur quasi ab aliis elementis distinctum; ergo videtur quod inconvenienter nomine firmamenti caelum designetur.

Respondeo. Dicendum, quod sicut in prima die posita est distinctio supremae partis mundi ab infima, ita ad secundam diem pertinet distinctio supremae partis a media. Quae quidem distinctio attenditur secundum hoc, quod in alterationibus quae in mediis elementis plurimae fiunt, et etiam in aliis motibus, se habet corpus caeleste ut movens et alterans, et alia ut mota et alterata. Intelligendum est ergo in hac secunda die esse caelesti corpori virtutem universalem movendi inferiora corpora attributam. Et quia in omni alteratione oportet pervenire ad aliquod primum alterans non alteratum, ideo ipsum caelum, quod tamquam primum alterans instituitur, nomen firmamenti accepit, propter impassibilitatem et naturae firmitatem.

Ad primum ergo dicendum, quod secundum Augustinum, per caelum in principio creatum intelligitur natura Angelica informis, per firmamentum autem caelum corporale. Secundum Rabanum vero per caelum in principio creatum intelligitur caelum

empyreum: per firmamentum vero secunda die factum, caelum sidereum. Potest etiam dici caelum idem utrobique commemorari: sed in principio creatum secundum substantiam, secunda die perfectum sive formatum secundum virtutem.

Ad secundum dicendum, quod licet sint diversae sphaerae, tamen omnes reputantur quasi unum corpus, propter sui unitatem naturae.

Ad tertium dicendum, quod numerus illorum septem caelorum sic accipi potest. Corpus enim aliquod dici potest caelum dupliciter. Uno modo per proprietatem naturae: et sic est triplex caelum: quorum primum est uniforme et immobile, scilicet empyreum; secundum uniforme et mobile, scilicet crystallinum; tertium difforme et mobile, scilicet sidereum. Alio modo dicitur aliquod corpus caelum propter similitudinem proprietatis caelestis; scilicet propter altitudinem et claritatem quae in aere et igne invenitur. Ignis ergo quantum ad supremam partem suae sphaerae, dicitur caelum igneum; quantum ad inferiorem dicitur caelum olympium a monte olympo, qui ultra nubes porrigitur dicitur. Aer vero, quantum ad superiorem sui partem, dicitur caelum aethereum, propter inflammationem ex vicinitate ignis. Nam secundum Philosophum, aether dicitur corpus velocis motus inflammabile vel inflammans. Quantum vero ad inferiorem partem dicitur caelum aereum. Et sic patet quod de omnibus caelis aliquando sit mentio in principio Genesis.

Ad quartum dicendum, quod corpus caeleste est firmum, et quantum ad naturam, quia non alteratur nec corrumpitur; et quantum ad locum, quia extra locum suum ferri non potest, nec secundum totum, nec secundum aliquam partem: quod de terra non contingit. Unde potius caelum quam terra dicitur firmamentum.

Ad quintum dicendum, quod sicut inter philosophos de natura corporis caelestis diversa fuit opinio, ita et inter sanctos. Nam Basilius et Augustinus Platonem sequentes, posuerunt firmamentum de natura quatuor elementorum. Dionysius vero Aristotelem sequens, posuit ipsum esse alterius naturae. Quorum ratio est, quia cum motus sit actus existentis in potentia, et alterius naturae sit motus alius, quia corporis caelestis motus est tantum ad naturam elementorum non ad formam, ideo ipsorum est alia potentia et natura. Hoc enim non est de pertinentibus ad fidem: et ideo non est inconveniens, si super hoc diversa sentiant.

QUAESTIO II.

Deinde quaeritur de opere tertiae diei. Et circa hoc quaeruntur duo: 1.^o de distinctione elementorum ab invicem; 2.^o de productione planetarum.

ARTICULUS I.

Ad primum sic proceditur. Et 1. videtur, quod inconvenienter elementorum distinctio recitetur. Ignis enim et aer sunt nobiliora inter elementa. Cum ergo de eis nulla fiat mentio, videtur quod insufficienter elementorum distinctio tangatur.

2. Praeterea, congregatio aquarum ad suum locum, motum localem designat. Sed aqua non fuit facta extra suum locum naturalem, quia sic violentum esset prius naturali; ergo cum aqua ante ter-

quam diem facta fuerit, inconvenienter de ejus congregatione in tertia die fit mentio.

5. Praeterea, sicut se habet aer ad aquam, ita aqua ad terram: sed aqua undique terram circumdat; ergo et terram oportet undique aquam circumdare; et sic non oportet in unum locum congregari, ut arida appareat.

4. Praeterea, in constitutione mundi, res secundum suam naturam sunt dispositae. Si ergo aquae ad unum locum sunt congregatae, videtur quod contra naturam sit, ut ab illo uno loco ad alia deriventur: quod indeficiens fluminum decursus falsum esse ostendit.

5. Praeterea, locus ubi aliquod elementum congregatur est locus ejus naturalis in quo nunquamque corpus est maxime simplex et purum: sed aqua in mari non est pura, sed terrestri permixta, ut ex ejus salsedine patet; ergo inconvenienter dicitur aquas esse ad mare congregatas, sicut ad proprium locum.

Respondeo. Dicendum, quod tertia dies deputatur tertiae distinctioni quae est mediae partis ab infima, scilicet trium elementorum a terra. Quae quidem distinctio est intelligenda secundum virtutes generales elementis attributas, inter quas quasi primae existunt gravitas et levitas, eo quod sunt principia motus localis qui naturaliter est primus motuum. Et ideo haec distinctio per congregationem aquarum quae motum localem designat, convenienter traditur.

Ad primum ergo dicendum, quod sicut dicitur, Plato principium Genesim legens, quatuor elementa ibi intellexit. Nam terra et aqua proprio nomine nominantur. Aerem vero intellexit per spiritum, qui aquis superfertur: ignem vero per caelum, quem igneae naturae existimavit esse. Et similiter intellexit Rabbi Moyses, excepto quod per caelum intellexit quintam essentiam, ignem vero per tenebras eo quod ignis in propria sphaera non luceat, secundum Philosophos. Sed quia quod dicitur de spiritu convenientius ad Spiritum sanctum refertur; ideo potest dici quod ignis et aer sunt intermissa propter populi ruditatem, qui corpora non existimavit nisi ea quae palpari possunt. Vel potest dici quod ignis et aer quantum ad superiorem partem signantur per caelum vel firmamentum propter sui altitudinem, inferior vero pars aeris, per aquam propter humiditatem. Ex aquae etiam congregatione in unum locum, dispositio aeris datur intelligi, quia aer accessit, unde aqua recesserat, et e converso.

Ad secundum dicendum, quod aquae non sunt extra locum suum factae; sed quia nondum eis perfecte operat virtus gravitatis, quae eis secundum speciem suam debetur, nondum ad proprium locum omnino redactae erant. Nec est simile de aquis ante sui perfectionem et post.

Ad tertium dicendum, quod necessitate finis factum est, ut aqua non undique terram circumdaret, ut scilicet in terra animalium et plantarum generatio esse posset. Competit etiam hoc elementorum naturae. Nam terra quasi grossissima minimam habet quantitatem et tota in unum constringitur. Aer vero tamquam subtilior, undique terram et aquam circumdat. Aqua vero medio modo se habet. Nam circumdat quidem terram in gyrum, sed non secundum omnem ejus superficiem.

Ad quartum dicendum, quod ex virtute corpo-

rum caelestium fit, quod aquae a loco principali decurrunt per terram ad generationem corporum mixtorum. Et ideo non est contra naturam; quia ea quae in corporibus inferioribus fiunt ex actione superiorum naturalia fiunt, ut Commentator dicit in tertio de Caelo et mundo.

Ad quintum dicendum, quod aqua maris in superiori parte est salsa, propter admistionem vaporis terrestris, cum adustione solaris radii; sed in profundo est dulcis. Elementa enim in suis extremitatibus se invicem alterant.

ARTICULUS II.

Ad secundum sic proceditur. Et 1. videtur, quod inconvenienter plantarum productio tertiae die ascribatur. Opus enim distinctionis ad principales partes mundi referendum esse videtur potius quam ad secundarias quae ad ornatum pertinent. Sed plantae non sunt hujusmodi; ergo earum productio non debuit poni inter opera distinctionis.

2. Praeterea, Philosophus dicit, quod sol est pater plantarum, terra vero mater: sed solis formatio describitur in quarto die; ergo inconvenienter dicitur plantas tertia die esse productas.

5. Praeterea, post peccatum hominis dicitur Genesis 5, quod Deus dixit homini quod terra ei spinas et tribulos germinaret. Dicitur etiam Genesis 2, quod Deus produxit de humo omne lignum pulchrum visu; ergo videtur quod inconvenienter plantarum productio tertiae die ascribitur.

4. Praeterea, sicut plantae in terra figuntur, ita et corpora mineralia; si ergo plantarum generatio cum terrae discretionem ponitur, videtur quod inconvenienter mineralia praeternittantur.

5. Praeterea, firmamentum est nobilius quam ipsa elementa et plantae: sed in secunda die, qua factum est firmamentum, non ponitur aliud pertinens ad operis approbationem; ergo multo minus debuit in tertia die poni: quod tamen ponitur cum dicitur: « Vidit Deus quod bonum esset. »

Respondeo. Dicendum, quod sicut dictum est, ad tertiam diem pertinet, quod elementis naturales virtutes sint attributae. Ad productionem autem plantarum sufficientes virtutes elementorum cum virtute caelestis: quod patet ex hoc quod plantae generantur in terra sponte absque ullo semine. Et ideo convenienter plantarum productio in tertia die ponitur. Sed tamen haec plantarum productio aliter exponitur ab Augustino, et aliter ab aliis sanctis. Augustinus enim vult quod in tertia die plantae fuerunt productae solum secundum virtutem seminalem, quae collata est terrae ad plantarum productionem; et quod dicitur: « Protulit terra etc. » vult per anticipationem dici. Alii vero dicunt quod in ipsa tertia die plantae productae sunt etiam in propria natura.

Ad primum ergo dicendum, quod plantae immobiliter terrae adhaerent. Et ideo computantur quasi partes terrae; et propter hoc earum productio cum opere distinctionis ponitur et non cum opere ornatu. Nam ad ornatum uniuscujusque elementi pertinent ea quae in illo elemento motum habent. Unde aves quae moventur in aere, quiescunt in terra, pertinent ad aeris ornatum: et inde est quod plantae ad nullius elementi pertinent ornatum.

Ad secundum dicendum, quod secundum Basilium, ideo plantarum productio formationi solis

in Scriptura praemittitur, ut excludatur error quorundam dicentium solem esse primam plantarum causam. Voluit autem per hoc Scriptura, omnium rerum primam causam Deum esse. Nec tamen sequitur quod effectus causam praecedat; quia ad productionem plantarum sufficit generalis virtus caelo collata in secunda die et elementis in tertia.

Ad tertium dicendum, quod post peccatum hominis non sunt de novo aliquae species plantarum productae, sed illae quae prius extiterant inceperunt hominibus esse poenales. Quod autem dicitur de plantatione lignorum paradisi, planum est secundum sententiam Augustini, qui dicit plantas in tertia die productas non fuisse in actu, sed solum quantum ad virtutem seminalem. Secundum alios vero hoc quod de lignis paradisi dicitur est per receptionem intelligendum.

Ad quartum dicendum, quod mineralia non habent altiorem gradum dignitatis in entibus, quam elementa. Plantae autem habent, quia sunt viventia. Et ideo non est simile.

Ad quintum, quod opus secundae diei completur per opus tertiae. Nam aquae in secundo distinguuntur a superioribus, in tertio a terra. Et ideo utriusque operis approbatio subjungitur in tertia die. Et iterum propter mysterium; quia binarius numerus est primus numerus qui ab unitate recedit et est signum peccati. Unde et quidam dicunt, hac die Angelos peccasse. Et propter hoc in quibusdam Ecclesiis ad honorem Angelorum persistentium, secunda feria missa celebrari consuevit.

DISTINCTIO XV.

Sequitur, dixit Deus: Fiant luminaria etc. (V. edit. nostrae tom. VI, pag. 511.)

QUAESTIO UNICA.

Haec quaeruntur quatuor: 1.^o de opere quartae diei; 2.^o de opere quintae diei; 3.^o de opere sextae; 4.^o de quiete et sanctificatione septimae.

ARTICULUS I.

Ad primum sic proceditur. Et 1. videtur, quod inconvenienter opus quartae diei describatur. Luminaria enim ab aliis partibus firmamenti sola luce differre videntur. Sed lux in prima die producta est; ergo non oportuit in quarta die de formatione luminarium fieri mentionem.

2. Praeterea, sicut probant astrologi, plures stellarum sunt luna majores; non ergo sol et luna, respectu omnium magna luminaria debent dici.

3. Praeterea, illud quod est proprium unius non debet multis attribui: sed distinguere diem et noctem est proprium solis; ergo non debet luminariis communiter attribui.

4. Praeterea, nobilior non est propter vilior: sed luminaria sunt nobiliora quam terra; ergo inconvenienter ponitur terrae illuminatio luminarium finis.

5. Praeterea, plus est esse causam quam signum: sed corpora caelestia sunt causa motuum qui sunt in istis inferioribus; ergo magis debuit dicere: Ut sint in causis, quam, ut sint in signa.

6. Praeterea, luminaria non praesunt dici vel

nocti nisi per illuminationem. Sed luna non semper lucet in nocte; ergo inconvenienter dicitur quod sol praest diei et luna nocti.

Respondeo. Dicendum, quod sicut in tribus praecedentibus diebus peractum est opus distinctionis, ita in his tribus superioribus peragitur opus ornatus. Quod quidem ab opere distinctionis differt quantum ad duo quae sunt de ratione utriusque. Primo quidem quantum ad hoc, quod per opus distinctionis principales mundi partes ab invicem discernuntur; per opus vero ornatus in ipsis principalibus mundi partibus aliqua praecipua constituuntur quae sunt ad ipsarum partium decorem. Secundo quia per opus distinctionis attribuuntur rebus generales virtutes ad agendum et patiendum; per opus vero ornatus speciales, quae scilicet sunt ad hanc vel illam speciem determinatae. Et secundum utrumque convenit idem numerus ac ordo. Nam in quarto die constituuntur in suprema parte mundi ea quae sunt in caelo praecipua; scilicet luminaria, quae scilicet habent virtutes ad determinatos effectus. In quinta producuntur animalia in media parte, scilicet in aquis pisces et in aere aves, in quibus etiam sunt virtutes generativae secundum propriam speciem. In sexta hoc idem fit in infima parte, scilicet terra.

Ad primum ergo dicendum, quod lux est quoddam commune omnibus corporibus caelestibus per quod agunt; sed praeter hoc cuiuslibet luminarium inest virtus specialis ad determinatos effectus, secundum ejus exigentiam lumen ejus operatur: et haec virtutes intelliguntur attributae eis in quarta die, et etiam praecedens lumen ampliatum.

Ad secundum dicendum, quod quamvis aliquae stellae secundum rei exigentiam sicut luna majores: luna tamen dicitur magnum luminare, tum propter apparentem magnitudinem, tum propter efficaciam effectus in istis inferioribus.

Ad tertium dicendum, quod licet solis proprium sit distinguere diem a nocte, annos tamen et quatuor anni tempora quantum ad esse eorum et tamquam ad eorum dispositionem, est etiam aliorum luminarium. Nam si solus sol esset, omni anno ver et aestas et alia tempora essent ejusdem dispositionis in calore et frigore. Accidit autem in eis variatio propter alia luminaria.

Ad quartum dicendum, quod corpora caelestia non sunt propter inferiora, sicut propter finem, nisi forte quantum ad hominem qui est eis dignior propter animam rationalem: sed finis eorum principaliter est assimilatio ad Deum, quem consequuntur in hoc quod inferiorum causa quodammodo existant, ex quo utilitas in inferioribus corporibus provenit.

Ad quintum dicendum, quod aliqua causa dicitur signum propter duo. Primo propter ejus sensibilitatem, unde fit ut suum effectum denunciet. Secundo propter modum causandi, quia scilicet ex ea suus effectus non necessario sequitur. Et propter haec duo, causae caelestes signa dicuntur. Tum quia per hoc quod sensibus patent, denunciant suos effectus latentes, quia sunt causae remotae et per defectum causarum proximarum eorum effectus impediuntur interdum. Ideo autem potius uti voluit nomine signi quam causae, ut tolleretur populo idolatriae occasio quae praecipue in veneratione luminarium consistebat; et iterum quia ad plura se extendit eorum signatio quam causalitas. Nam causae sunt solum corporalium; signa autem possunt

esse etiam spiritualium, inquantum corporalia ad spiritualia disponunt.

Ad sextum dicendum, quod de luna hic agitur secundum quod est in sui complemento, scilicet cum est quintadecima. Tunc enim totam noctem illuminat. Habet etiam secundum suam virtutem similitudinem cum nocte, inquantum est effective frigida et humida. Unde ab astrologia dicitur planeta nocturnus et sol diurnus.

ARTICULUS II.

Ad secundum sic proceditur. Et 1. videtur, quod inconvenienter opus quintae diei describatur. Aqua enim et aer sunt diversa elementa. Volatilia etiam et natatilia sunt diversa animalium genera; non ergo ad eundem diem pertinere debuit productio piscium quibus ornatur aqua et volatiliis quibus ornatur aer.

2. Praeterea, ignis est nobilissimus inter elementa; ergo ejus ornatus praetermitti non debuit.

3. Praeterea, nobilioris corporis nobilior debet esse ornatus: sed aer est corpus nobilior terra; cum ergo terra ornatur animalibus, videtur quod multo fortius aer, ut Platonici posuerunt.

4. Praeterea, unumquodque corpus sequitur motum elementi in eo praedominantis, et similiter quietem. Sed aves non habent naturalem quietem in aqua, sed magis in terra; ergo in compositione avium aqua non dominatur.

5. Praeterea, quaecumque sunt aquea a magis calido dissolvuntur, ut dicitur in quarto Meteororum. Corpora autem omnium animalium calore naturali dirigente (1) condensantur; ergo neque avium neque piscium materia est aqua.

Respondeo. Dicendum, quod opus ornatus debet respondere operi distinctionis. Unde, sicut in distinctionis opere aqua et aer prout simul computabantur sive cum distinguerentur a superioribus in secunda die, sive cum distinguerentur a terra in tertia, ita et eorum ornatus ad eundem diem pertinent; et hoc ideo quia aer et aqua sunt elementa maxime mobilia. Unde habent locum medium, ut a corporibus caelestibus permutata, vires superiorum ad terram deferant; et quodammodo in aqua est locus mixtionis.

Ad primum ergo dicendum, quod licet volatilia et natatilia sint diversorum generum, tamen in hoc conveniunt quod habent motum aliquo modo corporis levis secundum quod moventur in aere vel in aqua sine hoc quod demergantur vel in terram cadant. Aer etiam et aqua conveniunt in hoc quod sunt medium inter caelum et terram.

Ad secundum dicendum, quod ignis propter vehementiam virtutis activae quam habet, consumit omne quod est extraneae naturae. Unde, cum corpora quae sunt susceptiva vitae qua elementa ornantur, oporteat esse mista, igni non potuit aliquis ornatus attribui. Etsi enim aliqua mista ut ebenus et salamandra ad tempus in ignem non consumuntur, finaliter tamen ab igne consumerentur, si diu in eo remanerent.

Ad tertium dicendum, quod licet aer in se sit nobilior corpus quam terra, non tamen oportet quod nobilioribus animalibus ornatur. Nam nobilitas animalium est secundum quod nobiliori anima perficiuntur; quae tanto est nobilior, quanto corpus ad complexionem magis aequalem reducitur, ad quam

(1) *Leye digerente.*

requiritur abundantia gravium elementorum in materia, eo quod levia excedunt virtute ipsa gravia. Et ideo non potest esse quod animalia quae habent motum in aere sint nobilissima animalium. Unde in hoc Platonici erraverunt qui posuerunt aliqua animalia aerea rationabilia.

Ad quartum dicendum, quod in corporibus piscium et avium superabundat terra simpliciter, sed in comparatione ad animalia terrestria superabundat in eis aqua. In piscibus quidem aqua grossior, in avibus subtilior et vaporabilis. Unde tam aves quam pisces habent quietem in terra, licet habeant motum in aere vel aqua. Motus autem in praedictis elementis, quamvis naturalis sit eis, inquantum sunt elementa, non tamen inquantum sunt animata; quamvis ex naturali complexione eorum, magis competat eis motus praedictus quam animalibus terrestribus. Propositio ergo intelligitur de motu naturali, non de motu animalis. Corpora vero animalium aqueorum in aere moventur motu animali, scilicet virtute animae et plumarum. Sed motu animali si deserantur a virtute animae moventis moverentur deorsum non sursum. Et per hoc patet solutio ad quintum.

ARTICULUS III.

Ad tertium sic proceditur. Et 1. videtur, quod inconvenienter sexti diei opus describatur. Plus enim differt homo a quadropedibus quam quadropedia a volatilibus; eo quod homo prae caeteris rationem habet. Sed productio quadropedum et volatiliis ad diversos dies pertinet; inconvenienter ergo eadem die homo et bruta fiunt.

2. Praeterea, inter alia animalia homo corporibus caelestibus similior est tum quantum ad corpus quod per temperiem magis a contrarietate recedit, tum quantum ad motorem, qui utrobique est substantia rationalis; ergo immediate post formationem corporum caelestium, formatio hominis ante alia animalia poni debuit.

3. Praeterea, Deus eodem modo se habet ad omnia, quamvis non omnia eodem modo se habeant ad ipsum. Sed de aliis operibus Dei dictum est, « dixit Deus: Fiat lux. » Et iterum: « Fecit Deus; » ergo inconvenienter speciali modo loquendi dicitur de homine: « Faciamus hominem, » et « creavit Deus hominem. »

4. Praeterea, sicuti alia animalia, ita et homo ex anima et corpore componitur: sed in aliis animalibus simul ponitur corporis et animae productio; ergo inconvenienter circa hominem describitur seorsum factio utriusque.

5. Praeterea, Philosophus dicit in lib. de Animalibus, quod inter aquatica et gressibilia sunt aliqua animalia media, de quibus legislator mentionem non facit; ergo insufficienter animalium institutionem tradit.

Respondeo. Dicendum, quod, sicut superius dictum est, ad ornatum alicujus partis mundi pertinent corpora quae in illa parte motum habent; non autem per hoc quod habent ibi quietem; quia inquantum aliqua corpora quiescunt alicubi, adhaerent loco in quo quiescunt, et sic in unum cum eo computantur. Inquantum vero moventur, sic a loco separantur. Motus autem localis est signum perfectionis, ratione cujus ad ornatum elementi pertinere dicuntur: sicut motus animalium designat vitam ipsorum, et motus luminarium facit cogno-

scere eorum speciales virtutes. Licet ergo omnia animalia in terra quiescant, illa tamen specialiter ad ornatum terrae pertinent, quae in terra motum habent; sive totaliter terrae adhaereant, sicut reptilia; sive totaliter in sursum erigantur, ut homines; sive medio modo se habeant, ut iumenta, quae magis a terra elevantur, et bestiae, quae magis terrae appropinquant.

Ad primum ergo dicendum, quod homo, quantum ad motum, convenit cum quadrupedibus; ratione enim ad ornatum terrae pertinet, quamvis secundum rationem omnia excedat.

Ad secundum dicendum, quod illud est postremum in generatione, quod est completius. Homo autem quanto est similior, tanto est completior: unde ultimo ejus factio debuit poni.

Ad tertium dicendum, quod ad designandum nobilitatem hominis prae caeteris corporalibus creaturis, utitur speciali modo loquendi. Quia enim in homine singulariter est Dei imago impressa, consequenter in ejus constitutione fit mentio de pluralitate personarum, cum dicitur «*Faciamus.*» Quia vero corpus humanum ad nobilissimam formam producit, convenienter prae caeteris dicitur esse formatum. Quia vero ejus forma prae ceteris materialibus formis per creationem educitur, utpote in naturae seminibus non praexistens, deest in ejus constitutione de creatione fieri mentionem.

Ad quartum dicendum, quod animae aliorum animalium secundum esse suum a corporibus dependent, utpote sine quibus esse non possent; ac propter hoc simul eorum institutio cum corporibus traditur. Animae autem humanae a corporibus non dependent: et ideo non est simile.

Ad quintum dicendum, quod animalia media computantur inter ea, cum quibus magis conveniunt: non enim aequaliter cum utroque genere conveniunt.

ARTICULUS IV.

Ad quartum sic proceditur. Et I. videtur, quod ea quae ad septimum diem pertinent, inconvenienter in Scriptura tradantur. Completio enim aliquid operis est: sed Deus die septima opus suum complevit; non ergo tunc ab omni opere cessavit.

2. Praeterea, opus Dei est non solum naturae institutio, sed etiam ejus conservatio; sed in septima die, et deinceps, Deus opera sua conservat; ergo non cessavit die septima ab omni opere.

Si dicatur quod tunc cessavit a novis creaturis condendis, Contra. Secundum Philosophum in libro de Animalibus, frequenter apparent novae species animalium, quae nunquam apparuerunt. Deus etiam multa facit, quae nunquam antea fuerant: sicut quod creat animas, quod unit hominem Deo, quod glorificat homines; ergo die septima ab opere non requievit.

Praeterea, quies opponitur motui et labori: sed Deus absque omni motu et labore operatur; ergo ejus cessatio ab opere quies diei non debet.

Praeterea, bonum magis respicit finem quam principium: sed septima dies habet principium et non finem, id est mane et non vespere, e contrario autem prima; ergo potius debet benedici prima dies, quam septima.

Respondeo. Dicendum, quod dies isti, sicut supra dictum est, aliter accipiuntur secundum Augustinum, et aliter secundum alios sanctos. Augustinus

namque hos dies refert ad cognitionem angelicam; secundum quod res creatas intuetur: et sic dies distinguuntur dupliciter. Uno modo secundum diversa rerum genera; et sic distinguuntur sex dies adinvicem, ut dictum est. Alio modo secundum diversam rerum considerationem; et sic distinguitur dies septima a sex praecedentibus. Namque ad sex dies pertinet rerum consideratio, secundum quod egrediuntur a suo auctore: ad septimum autem consideratio earundem, secundum ordinem quem habent in finem, prout scilicet eorum auctor creatoris conditis in se, sicut in fine, requiescit, et non in rebus factis. Secundum vero alios sanctos, dies isti distinguuntur secundum diversum statum universi. Nam semper novo opere in perfectiorem statum universum producit; et sic sex dies ab invicem distinguuntur, et etiam septimus ab eisdem. Nam in primis sex diebus partes universi sunt constitutae in seipsis perfectae: septimo autem die incepit propagationis opus, per quod virtutes prius rebus collatae in actum exeunt: et sic opera propagationis non fiunt a solo Deo, sicut opera sex dierum; propter quod dicitur die septima quiescere.

Ad primum dicendum quod in hoc nostra translatio ab antiqua discordat: nam in litera nostra dicitur: «*Complexit Deus die septimo.*» In litera vero septuaginta dicebatur: «*Complexit Deus in die sexto.*» Utrumque autem verum est. Est enim triplex alicujus rei perfectio: una secundum esse, prout ex omnibus suis partibus integratur; alia secundum operationem, quae dicitur perfectio secunda; tertia secundum finis constitutionem, quae est perfectio ultima. Prima ergo consummatio universi pertinet ad sextam diem. Secunda vero et tertia ad septimum, ut ex dictis patet.

Ad secundum dicendum, quod conservatio divinorum operum, non est alia operatio ab eorum creatione, sed est ejusdem continuatio, et est simile de illuminatione aeris a sole. Ad conservationem etiam operis divini, aliquid causae secundae operantur; et sic ipsa conservatio rerum cum opere propagationis quamdam convenientiam habet.

Ad tertium dicendum, quod consummatio operum, de qua hic agitur, est secundum perfectionem naturae. Unde nihil prohibet ad perfectionem gratiae vel gloriae, alia de novo postmodum Deum fecisse. Omnes vero naturales effectus, qui de novo fiunt, vel praexistenter in seminalibus naturae rationibus, sicut omnia quae virtute naturae produciuntur, sive sint nova secundum speciem, sive non: vel praexistenter in suo simili, sicut animae rationales, quae de novo creantur; vel saltem in potentia obedientiae, sicut ea quae per miraculum fiunt.

Ad quartum dicendum, quod natura motus transfertur ad quamlibet operationem; et sic cessatio a qualibet operatione quies diei potest. Transfertur etiam ad desiderium finis nondum habiti; et sic quies dicitur ipsa fruitio finis, secundum quem desiderium quietatur; et utroque modo quies Deo attribuitur in septima die; tum quia cessavit a novis creaturis condendis, tum quia, rebus omnibus constitutis, non in eis, sed in ipso quievit sicut in fine.

Ad quintum dicendum, quod bonum habet rationem finis, et ex eo diffusio est. Et quia septimae diei attribuitur perfectio rerum secundum finem, et secundum operationem, per quam bonum crea-

turae collatum quodammodo diffunditur, convenienter dies septimus prae caeteris benedicitur. Ex hoc autem quod in ipso est perfectio secundum ultimum finem, sequitur quod vesperam non habeat. Sicut enim principium non potest esse incipiens, ita ultimus finis non potest esse deficiens.

DISTINCTIO XVI.

His excursus etc. (V. edit. nostrae tom. VI, pag. 522.)

QUAESTIO UNICA.

Hic quaeruntur quatuor: 1.^o utrum in creatura possit esse imago Dei, vel similitudo; 2.^o utrum omnis creatura sit ad imaginem, vel sola rationalis; 3.^o utrum imago perpetuo in homine maneat. 4.^o utrum omnis homo aequaliter sit ad imaginem.

ARTICULUS I.

Ad primum sic proceditur. Et 1. videtur, quod nulla creatura possit esse Dei imago. Imago enim, secundum Hilarium, est ejus rei ad quam imaginatur, species indifferens, vel rei ad rem coaequandam unita et indiscreta similitudo. Hoc autem omni creaturae convenire non potest in comparatione ad Deum; ergo in creatura non potest esse imago Dei.

2. Praeterea, inter ea quae sunt diversorum generum, non attenditur aliqua similitudo, sicut inter accidens et substantiam; sed Deus in nullo genere continetur; ergo creaturae sub certis generibus contentae, Deo similes esse non possunt.

3. Praeterea, similitudo est relatio aequiparantiae, et ad convertentiam dicitur. Simile enim est sibi simile. Sed Deus non est similis creaturis, ut patet Isa. 40: « Cui similem fecistis Deum etc. » ergo creatura non potest dici similis Deo.

Sed contra est quod dicitur Gen. 1: « Faciamus hominem ad imaginem et similitudinem nostram. »

4. Praeterea, ad perfectionem agentis pertinet, ut sibi simile agat: sed Deus est agens perfectissimum; ergo facit creaturas sibi similes.

Respondeo. Dicendum, quod similitudo attenditur secundum convenientiam in forma. Quae quidem convenientia dupliciter esse potest. Uno modo secundum quod forma illa eodem modo utrique convenit, sicut albedo duobus albis. Alio modo secundum quod illa forma in utroque diversimode invenitur, sicut domus quae est in materia similatur arti quae est in mente artificis. Primo ergo modo nulla creatura potest esse similis Deo, eo quod omnis creatura quicquid bonitatis habet, etiam per ipsum et per participationem bonitatis ejus habet, Deus autem per essentiam. In creatura autem quicquid est, finitum est, in Deo autem infinitum. Quae etiam in creatura sunt distincta, sunt in Deo unum. Sed quae quantumcumque in creaturis existunt, in Deo quodam nobiliori modo praexistunt. Et ideo secundo modo creaturas Deo similes esse oportet.

Ad primum ergo dicendum, quod duplex est imago; perfecta scilicet et imperfecta. Perfecta quidem Dei imago est solus Filius, et de hac procedunt definitiones Hilarii. Imperfecta autem Dei imago, est creatura; quae, secundum quod ad imaginem est, aliquid aequalitatis habet, non secundum commensurationem, sed secundum proportionem: in-

S. Th. Opera omnia. V. 22.

quantum etiam habet de similitudine, intantum habet de unitate et indiscretionem.

Ad secundum dicendum, quod quamvis Deus non determinetur ad aliquod genus, in eo tamen praexistunt nobilitates et perfectiones omnium generum. Unde res cujuslibet generis Deo aliquo modo assimilatur: non autem res unius generis similatur rei alterius, quia in uno genere non inveniuntur quae sunt alterius.

Ad tertium dicendum, quod ratio illa procedit, quando aliqua sunt similia secundum convenientiam in forma, quae eodem modo utrique attribuitur. Sic enim non est similitudo inter Deum et creaturam. Unde creatura dicitur Deo similis, non autem e converso; sicut domus dicitur similis arti, et non e converso.

ARTICULUS II.

Ad secundum sic proceditur. Et 1. videtur, quod non sola rationalis creatura sit ad imaginem. Ad imperfectam enim imaginis rationem, sufficit imperfecta imitatio: sed in qualibet creatura est aliqua imperfecta Dei imitatio; ergo, cum in creatura non sit imago, nisi secundum imperfectam imaginis rationem, videtur quod quaelibet creatura possit dici ad imaginem.

2. Praeterea, quanto aliquid est melius, tanto Deum perfectius imitatur: sed totum universum est melius quam creatura rationalis; ergo totum universum magis est ad imaginem quam rationalis creatura.

3. Praeterea, omnis transumptio fit ratione alicujus similitudinis: sed nomina aliquarum rerum corporalium frequentius de Deo transumptive dicuntur quam nomina rationalium creaturarum, sicut ignis et lucis; ergo major similitudo est eorum ad Deum quam rationalis creaturae; et ita magis debent dici ad imaginem.

Sed contra. Homo dicitur ad imaginem Dei secundum illud quod in nobis est excellentius, hoc est secundum mentem, ut Augustinus dicit in libro de Trinitate. Sed mens in sola creatura rationali invenitur; ergo sola rationalis creatura est ad imaginem.

Praeterea, inter rem et ejus imaginem nihil cadit medium: sed sola rationalis creatura Deo adhaeret; ergo ipsa sola est ad imaginem.

Respondeo. Dicendum, quod in omni creatura est aliqua Dei similitudo, non tamen Dei imago, proprie loquendo. Imago enim similitudinem includit, et super eam addit duo: quorum unum est expressio unius ab altero. Unde duorum ovorum, quamvis similium, unum non est alterius imago, quia unum non est ex alio, ut Augustinus dicit in libro 85 quaest. Aliud est ut similitudo attendatur quantum ad speciem rei, vel saltem quantum ad ea quae sunt signum speciei, sicut figura. Unde aliquid dicitur esse hominis imago, non propter similitudinem in albedine, sed principaliter propter similitudinem in figura. Ratione ergo primi non deficit, quin in qualibet creatura sit Dei imago. Similitudo enim Dei in qualibet creatura, ab ipso Deo derivatur: sed deficit ratio secundi. Nam in rationali creatura sola invenimus omnia quae nobis de perfectione divinae naturae sunt nota. Creatura enim rationalis sola est, quae vivit et intelligit: et propter hoc sola rationalis creatura est ad imaginem: ut

Augustinus dicit in libro 85 quaest. Tertium autem addit imago supra similitudinem; scilicet aequalitatem; quae tamen non requiritur nisi ad perfectam imaginem, qualiter solus Filius est imago. Unde Filius ita est imago, quod non ad imaginem. Praepositio enim quamdam distantiam importat. Ceterae vero creaturae neque sunt imago, neque ad imaginem.

Ad primum ergo dicendum, quod non quaelibet imperfecta imitatio sufficit ad rationem imperfectae imaginis: sed requiritur quod sit imitatio aliqualis, quantum ad omnia essentialia rei quae in specie includuntur, sicut homo est imago sui patris; vel saltem quantum ad signum, sicut denarius est imago Caesaris.

Ad secundum dicendum, quod universum est melius rationali creatura extensive, in quantum plura bona complectitur: non tamen est melius nec aequè bonum intensive quantum ad omnes ejus partes, cum rationalis creatura sit nobilissima pars universi.

Ad tertium dicendum, quod similitudo creaturae ad Deum attenditur dupliciter. Uno modo secundum participationem divinae bonitatis; et sic creatura rationalis est Deo simillima. Alio modo secundum similitudinem proportionis; et sic nihil prohibet aliquas alias creaturas esse Deo similiores, a quibus fit transumptio ad divina: sicut quod Deus dicitur ignis, quia ita se habet ad calefactionem spiritualem sicut ignis ad corporalem.

ARTICULUS III.

Ad tertium sic proceditur. Et 1. videtur, quod imago in homine non semper remaneat. In Psal. 72 enim dicitur: « Domine, in civitate tua imaginem ipsorum ad nihilum rediges; » ubi dicit Glossa: « Peribit imago, quia nec similitudinem retinebunt qui de beatitudine nihil habebunt; » ergo imago non semper in homine manet.

2. Praeterea, imago similitudinem includit, ut Augustinus dicit. Sed similitudo Dei non semper manet in anima, quia attenditur secundum innocentiam et justitiam, quae per peccatum tolluntur; ergo nec imago.

3. Praeterea, in litera dicitur, quod imago consideratur in cognitione veritatis: sed cognitio veritatis non semper manet in homine; ergo nec imago.

Sed contra. Si imago Dei tolleretur ab homine, praecipue hoc fieret per peccatum: sed per peccatum non tollitur, ut patet in Psal. 85: « Verumtamen in imagine pertransit homo; » ergo imago in homine semper manet.

Praeterea, naturalia hominis semper in homine manent: sed imago Dei in anima attenditur secundum memoriam, intelligentiam et voluntatem, quae sunt ei naturalia; ergo nunquam homo amittit Dei imaginem.

Respondeo. Dicendum, quod ad imaginem pertinet aliquid dupliciter. Uno modo quasi ei essentiali. Alio modo sicut completivum ejus quantum ad bene esse, ut patet in imagine corporali. Designatio enim lineamentorum est essentialis imagini; sed superinductio colorum complet decorem imaginis. Ita et imago Dei in nobis essentialiter consistit in mente et in his quae eam consequuntur naturaliter. Ex ipsa enim natura humana mens habet, quod possit esse capax Dei: quod non esset, nisi a

materia conformitatem ex sua natura haberet ad Deum. Sed perfectio imaginis in quantum ad bene esse, consistit in hoc quod anima Deum actualiter capit; quod fit quo ad gratiam et virtutes. Quantum ergo ad primum, imago semper manet in creatura rationali; sed quantum ad secundum, amittitur per peccatum.

Ad primum ergo dicendum, quod imago Dei dicitur perire in peccatoribus et in praesenti et in futuro. Utrobique enim Dei civitas statum habet. In praesenti quidem igitur in eis perit, in quantum eorum mens, actu Deum non capit per gratiam habitantem. In futuro vero, in quantum potentia naturalis ligatur, ut nunquam in actum exire possit virtutis; tamen illud quod est naturae semper manet.

Ad secundum dicendum, quod similitudo in plus est quam imago: unde aliqua similitudo contra imaginem dividitur. Similitudo quidem quantum ad intellectum, quae est prima perfectio rationalis creaturae, in quantum hujusmodi, pertinet ad essentialem imaginem rationem: Sed similitudo secundum ea quae praecedunt intellectum, sicut essentia, et proprietates ejus ut immortalitas et similia, et ea quae sequuntur, sicut affectus, et habitus perficiens potentiam, distinguitur contra imaginem cum dicitur Gen. 1: « Faciamus hominem ad imaginem et similitudinem nostram, » et sic ad similitudinem pertinent innocentia et justitia.

Ad tertium dicendum, quod cognitio veritatis accipitur ibi non pro actu, sed pro potentia, quae semper manet.

ARTICULUS IV.

Ad quartum sic proceditur. Et 1. videtur, quod imago Dei non magis sit in Angelo quam in homine. Ad rationem enim imaginis pertinere videtur, ut Augustinus dicit in lib. 85 quaest., quod « substantia interposita in illa, ab ipsa veritate formatur, » et ideo nihil est illi conjunctius: sed hoc convenit animae sicut et Angelo; ergo Angelus non est magis ad imaginem quam homo.

2. Praeterea, differentia generum vel specierum aliorum salvatur in omnibus quae sunt in illis generibus vel speciebus: sicut quia ignis specie est aere subtilior, quilibet ignis quolibet aere subtilior est. Sed non quilibet Angelus quolibet homine melior est, quia Christus et beata Virgo sunt supra omnes Angelos; ergo Angelus non est simpliciter secundum genus suum homine melior; et ita nec magis ad imaginem.

Praeterea, sicut Angelus perspicacior in intelligendo quam homo, ita unus homo quam alius, et vir quam mulier. Si ergo ratione praedicta Angelus sit magis ad imaginem quam homo, vir esset magis ad imaginem quam mulier, et unus vir alio: quod non videtur, cum ea quae ad speciem consequuntur, aequaliter convenient omnibus quae sub illa specie continentur.

Sed contra est, quod Augustinus dicit, 11 Confess.: « Duo fecisti, Domine: unum prope te, scilicet Angelum, et aliud prope nihil, » scilicet materiam primam. Sed propter propinquitatem rationalis creaturae ad Deum dicitur esse ad Dei imaginem rationalis creatura; ergo Angelus est magis ad imaginem quam homo, utpote propinquior.

Praeterea, Gregorius exponens illud Ezech. 28:

• Tu signaculum similitudinis, » dicit: « Quanto in eo subtilior est natura, eo magis in illo imago Dei insinuatur expressa. » Sed constat Angelum esse subtilioris naturae quam hominem; ergo Angelus est magis ad imaginem Dei quam homo.

Respondeo. Dicendum, quod cum imago sit quaedam similitudo ad Deum, ibi est major expressio imaginis, ubi est major similitudo. Creaturae autem rationalis ad Deum potest similitudo dupliciter attendi. Una secundum perfectionem naturae: et sic Angelus est Deo similior, tum propter naturam subtiliorem, tum propter intellectum perspicaciorum. Alia secundum habitudinem ad res: et sic in homine invenitur aliqua similitudo ad Deum quae non est in Angelis: sicut quod unus homo est principium omnium hominum: quod anima est tota in qualibet parte corporis: sicut Deus est principium omnium entium, et etiam totus in qualibet parte mundi. Prima autem similitudo est verior, sicut et verius esse habet ens absolutum quam relatio; et ideo secundum primam similitudinem verius attenditur imago. Dicendum est ergo, quod in Angelo est simpliciter imago Dei expressior, sed in homine secundum quid.

Ad primum ergo dicendum, quod licet anima immediate formetur ab ipsa veritate, sicut et Angelus, tamen Angelus perfectius formatur, loquendo secundum naturam utriusque; quia secundum illam veritatem perfectius cognoscit, quia in eo lumen intellectuale in sua puritate perseverat. In homine autem est figuris sensibilibus obumbratum, unde eum discursu cognoscit. Unde dicit Isaac, quod ratio creata est in umbra intelligentiae. Nam secundum gratiam et gloriam possunt esse pares.

Ad secundum dicendum, quod excellentia quae est in Christo et beata Virgine, est gratiae vel gloriae, non naturae.

Ad tertium dicendum, quod differentia Angeli ad hominem non continetur sub specie una, sicut et differentia viri ad virum, vel viri ad mulierem. Unde non est simile. Nec tamen est inconueniens, quod quanto in aliquo natura humana est perfectior, tanto in eo sit divina imago expressior.

DISTINCTIO XVII.

Hic de origine animae etc. (V. edit. nostrae tom. VI, pag. 527.)

QUAESTIO UNICA.

Hic quaeruntur quatuor: 1.^o utrum anima sit de Dei substantia; 2.^o utrum sit facta ex aliqua materia corporali, vel spirituali; 3.^o utrum sit facta extra corpus; 4.^o de paradiso, utrum sit locus corporalis, vel spiritualis.

ARTICULUS I.

Ad primum sic proceditur. Et 1. videtur, quod anima sit de Dei substantia. Flatus enim est substantia flantis: sed Deus in faciem hominis insufflavit vel inspiravit legitur spiraculum vitae; ergo spiraculum vitae, quod est anima, est de substantia Dei.

2. Praeterea, unitas operationis attestatur unitatem naturae. Sed anima convenit eum Deo in operatione naturae intellectualis; ergo est ejusdem naturae cum ipso.

3. Praeterea, omnis forma, quae non est multiplicabilis per diversas materias, non potest habere imaginem alterius naturae, cum imago formam contineat exemplaris. Sed forma deitatis est huiusmodi. Cum ergo in anima sit imago Dei, videtur quod anima sit de substantia, sive de natura Dei.

Sed contra. Natura divina est intransmutabilis: sed anima humana multis transmutationibus subiacet; ergo non est de natura divina.

Praeterea, causa efficiens et materialis in idem non incidunt, ut Philosophus dicit in 2^o Physicorum. Sed Deus est causa efficiens omnium; ergo nullius rei potest esse causa materialis: et ita anima non potest fieri de substantia Dei.

Respondeo. Dicendum, quod ista positio dicentium, animam esse de Dei substantia, ex tribus erroribus originem habere potest. Quorum primus est dicentium: Deum non esse aliquid distinctum a rebus: sed quod ipse in quibusdam est essentia, in quibusdam natura, in quibusdam anima, in quibusdam intellectus, ut Avicenna narrat. Secundus error fuit dicentium Deum esse animam mundi, ut Augustinus narrat in lib. de Civitate Dei: qui communiter ponebant omnes animas partes esse illius, qua totus mundus animatur. Tertius error fuit dicentium animam esse vel principium vel ex principiis, ad hoc ut omnia cognosceret, ut Philosophus narrat in primo de Anima. Ex quo sequitur, quod eum principium rerum Deus dicatur primum, anima sit de natura divina. Primus autem horum errorum reprobatur per hoc, quod Deus non est omnia, sed omnibus altius, ut etiam Philosophus probat in 11^o Metaphysicorum. Secundus vero reprobatur per hoc quod Deus nec est corpus, nec forma corporis, ut etiam Philosophus probat. Tertius vero error excluditur per hoc quod anima non cognoscit omnia quia sit idem omnibus, quasi omnium principia continens: sed quia est in potentia omnia. Unde constat positionem praedictam esse falsam et erroneam, qua dicitur animam esse de Dei substantia.

Ad primum ergo dicendum, quod illa auctoritas Genesis, secundum Augustinum, non cogit ponere animam esse de Dei substantia. Primo, quia homo flatum non emittit de sua substantia, sed de aere respirato, qui non est de substantia corporis, et multo minus de substantia animae. Secundo, quia anima non potest facere flatum nisi de corpore, cum non sit creatrix: Deus autem qui est infinitae potentiae, potest animam de nihilo creare; et sic dicitur flasse, in quantum hominis flatum creavit.

Ad secundum dicendum, quod ratio illa sequeretur, si intellectualis operatio eodem modo Deo et animae conveniret: quod patet esse falsum. Unde ex hoc non unitas, sed similitudo naturae concludi potest.

Ad tertium dicendum, quod ratio illa procederet, si in homine esset similitudo vel imago deitatis perfecta, cuius contrarium supra dictum est.

ARTICULUS II.

Ad secundum sic proceditur. Et 1. videtur, quod anima sit creata de aliqua materia. Omne enim quod habet materiam, ex materia est factum: sed anima habet materiam: quod ostenditur ex hoc, quod est accidentibus subjectum: nam forma simpliciter subjectum esse non potest, ut Boetius dicit; ergo anima est facta ex materia.

2. Praeterea, sicut se habet materia corporalis ad corpora, ita spiritualis ad spiritus: sed cum dicitur: *in principio creavit Deus caelum et terram*, secundum Augustinum per caelum intelligitur spiritualis natura informis, per terram vero corporalis; ergo sicut ex materia informi praesistente facta sunt corpora, sic et anima rationalis ex materia praesistente facta est.

3. Praeterea, perfecto non potest fieri additio, quia perfectum est cui nihil deest: sed universum per opera sex dierum fuit perfectum, ut supra dictum est; ergo nulla pars universo de novo additur. Hoc autem esset, si anima ex non praesistente materia fieret, cum quotidie multae animae fiant; ergo videtur quod anima sit de aliqua materia facta.

Sed contra. Omnis forma est simplicis essentiae, alias iretur in infinitum: sed anima est quaedam forma; ergo est simplicis essentiae: non ergo est facta de aliqua materia.

Praeterea, omne quod fit ex materia, exit in esse per generationem: omne autem generabile est corruptibile; si ergo anima rationalis sit ex materia, sequitur quod sit corruptibilis: quod est inconveniens.

Respondeo. Dicendum, quod aliud est fieri ex materia, et aliud est fieri cum materia. Illa enim ex materia fiunt, quibus eorum materia praesistit: et cum materia sine forma esse non possit, oportet quod materia ex qua aliquid fit, successionem formarum in se patiat: quod non invenitur nisi in rebus generabilibus et corruptibilibus, inter quarum formas est aliqua contrarietas; quae de anima dici non possunt, nisi forte secundum errorem illorum qui animam esse corpoream existebant. Unde anima non debet dici facta esse ex aliqua materia spiritali vel corporali. Fieri vero cum materia dicuntur illa, quae sic fiunt, ut habeant materiam partem sui. In quo circa animam non est omnium concursus sententia; quibusdam dicentibus animam ex materia et forma compositam, aliis hoc negantibus. De hoc autem quid verius sit, in primo libro dictum est, et ideo praetermittatur ad praesens.

Ad primum ergo dicendum, quod illa ratio non probat animam fieri ex materia, sed animam habere materiam. Cui tamen, secundum eos qui hoc negant, potest responderi, quod anima quamvis non habeat materiam, non est omnino simplex, cum sit composita ex quo est et quod est, sicut alibi expositum est.

Ad secundum dicendum, quod informitas in corporali natura intelligitur quantum ad primum esse: sed in spiritali natura quantum ad esse secundum, non quantum ad primum. Et ideo corporales res, secundum esse naturae, fiunt ex materia praesistente. Res autem spirituales fiunt secundum esse gratiae ex natura considerata absque gratiae forma.

Ad tertium dicendum, quod perfectio universi essentialis quae est secundum species, fuit in primis sex diebus completa; non autem accidentalis, quae est secundum individua.

ARTICULUS III.

Ad tertium sic proceditur. Et 1. videtur, quod animae creatae fuerint extra corpora. Finis enim rei respondet ejus principio: sed anima remanet post finem corporis; ergo et ante corpus creata fuit.

2. Praeterea, productio rei debet esse conveniens naturae ipsius: sed intellectus, secundum Philosophum, nullius corporis actus est; ergo anima rationalis non debet fieri in corpore.

3. Praeterea, creatura rationalis corpori non unita, est nobilior creatura rationali corpori unita, ut patet de Angelo et anima: sed nulla dignitas subtrahitur animae rationali nisi propter ejus demeritum; ergo ex aliquo demerito animae rationalis est, quod corpori unitur. Hoc autem non esset nisi corpori praesistisset; ergo animae sunt creatae ante corpora.

Sed contra. Quandoque est anima rationalis, potest agere aliquid boni vel mali; sed animae rationales ante corpora nihil boni vel mali egerunt, ut patet per Apostolum Rom. 9; ergo animae non sunt ante corpora creatae.

Praeterea, forma in via generationis non est prior materia, sed magis posterior: sed anima est forma corporis; ergo anima ante corpus creari non potuit.

Respondeo. Dicendum, quod opinio quorundam fuit, animas ante corpora creatas esse: cujus duplex fuit occasio. Una apud Platonicos, qui cum ponerent generationem perpetuam, et animas immortales, coeli sunt ponere circulationem in animabus, ne in infinitum excreceret numerus animarum, dicentes easdem animas, quae nunc a corporibus absolvuntur, rursus post aliqua tempora corporibus alligari. Secunda occasio fuit apud Origenem qui inaequalitatem creaturarum rationalium ex diversitate meritorum procedere credidit ne Deus injustus videretur, inaequalitatem in creaturis rationalibus instituens absque meritorum diversitate. Utrumque autem per idem reprobatur: per hoc scilicet quod anima rationalis non accidentaliter, sed naturaliter corpori unitur: alias homo non esset naturale sed accidentale. Ex hoc autem quod anima naturaliter unitur corpori, sequitur quod una anima uni corpori debeatur. Nam una forma uni materiae respondet: et unum agens uni proprio instrumento convenit. Ea etiam quae naturaliter sunt, sub merito non cadunt. Et praeterea, si animae rationali est essentialiter uniri corpori, esse sine corpore est ei accidentale. Naturale autem est accidentali prius. Unde anima non est facta sine corpore, sed in corpore.

Ad primum ergo dicendum, quod animam esse sine corpore post mortem, est ei per accidens, scilicet per mortem corporis, quae est ex peccato consecuta.

Ad secundum dicendum, quod intellectus dicitur nullius corporis actus esse, quia potentiae intellectivae non deputatur aliquod organum in corpore, sicut potentiae visivae. Non autem per hoc voluit Aristoteles quod anima rationalis corporis forma non esset.

Ad tertium dicendum, quod inaequalitas spiritalium creaturarum est secundum earum naturam; unde ex merito non dependet. Nec tamen ex hoc aliqua injustitia Deo potest ascribi, cum ex mera sua bonitate creaturas instituerit, non quidem aequales, ut diversi gradus bonitatis implerentur, ex quibus constaret universi admirabilis pulchritudo. Nec ex hoc animae aliqua dignitas subtrahitur, quod Angelo non est aequalis; cum haec inaequalitas naturam utriusque consequatur.

ARTICULUS IV.

Ad quartum sic proceditur. Et 1. videtur, quod paradisi in quo homo creatus dicitur, non sit aliquis locus corporalis. Dicitur enim in littera quod paradisi ille usque ad lunarem globum pertingit: sed hoc non potest dici de aliquo loco terreno, propter sphaeram ignis quae lunae orbi contingatur; ergo paradisi ille non est aliquis locus corporalis et terrenus.

2. Praeterea, si paradisi ille corporalis esset, arbores in eo plantatae essent corporales; quod non videtur, cum lignum vitae sit ipsa sapientia, ut habetur Proverb. 5. Lignum etiam, quod scientiam boni et mali causat, non potest esse corporeum; ergo nec paradisi ille potest esse corporalis.

3. Praeterea, flumina illa, quae dicuntur a paradiso procedere, alibi habent notam originem. Fons etiam ille, secundum Damascenum, est Oceanus, qui totam terram circumdat: ergo ea quae dicuntur de paradiso illo, ad litteram intelligi non possunt, ut paradisi ille sit locus corporeus.

Sed contra. Postquam homo peccavit, in paradiso spirituali non remansit. Dicitur autem Gen. 5, quod per aliquod temporis spatium remansit in paradiso; ergo oportet quod intelligatur de corporali.

Praeterea, rei corporali debetur locus corporalis; sed paradisi est deputatus homini in statu innocentiae tamquam proprius locus; cum ergo homo ex anima constaret et corpore, videtur quod paradisi ille corporalis fuerit.

Respondeo. Dicendum, quod communis Ecclesiae sententia habet, quod paradisi ille sit locus corporalis. Unde opinio Origenis reprobat, qui posuit omnia, quae de paradiso illo dicuntur, mystice intelligenda esse. Rationabiliter autem ad litteram intelligitur: nam homo in statu illo felicitatem quamdam habuit, sicut in anima, in quantum scientia et virtutibus praeditus erat, ita et in corpore, quod erat quodammodo impassibile, et immortale. Unde ei debebatur non solum paradisi felicitati spirituali conveniens, sed etiam corporalis, competens corporali. Qui quidem locus, ab omnibus perturbationibus erat liber, sub aequinoctiali constitutus versus Orientem, ut quidam dicunt, quasi in optima parte mundi.

Ad primum ergo dicendum, quod paradisi ille terrestris non intelligitur esse exaltatus usque ad globum lunarem ratione situs; sed propter quamdam temperiem, et incorruptionis similitudinem.

Ad secundum dicendum, quod lignum vitae licet quandoque mystice accipiatur pro sapientia, per quam vita spiritualis habetur, tamen quaedam corporalis arbor est, quae ex hoc lignum vitae dicitur, quod vitam homini in statu innocentiae conservabat. Sicut et Jerusalem, quamvis sit terrena civitas, quandoque tamen sumitur pro caelesti. Lignum vero scientiae boni et mali dicitur ab eventu: quia per ejus esum homo expertus est quid intersit inter obedientiae bonum et inobedientiae malum.

Ad tertium dicendum, quod duplex est origo fluminum. Una prima, scilicet Oceanus, et sic loquitur Damascenus. Alia proxima; et sic origo illorum quatuor fluminum est fons paradisi. Quod autem illa flumina alibi videntur habere originem, ex hoc provenit, quod a paradiso egressa, iterum sub terra demerguntur. Unde ibi originem habere dicuntur, ubi iterum renascuntur.

DISTINCTIO XVIII.

In eodem quoque paradiso etc. (V. edit. nostrae tom. VI, pag. 540.)

Hic est duplex quaestio. Prima, de traductione mulieris ex viro. Secunda, de traductione animae ex anima.

QUAESTIO I.

Circa primum quaeruntur duo: 1.^o utrum corpus mulieris de costa viri fuerit factum; 2.^o de seminalibus rationibus, et miraculis, quae praeter eas fiunt.

ARTICULUS I.

Ad primum sic proceditur. Et 1. videtur, quod mulier non sit facta ex costa viri. Formatio enim unius ex alio, non pertinet ad opus primae institutionis naturae, sed magis ad opus propagationis: opus autem propagationis ex rationibus seminalibus perficitur. Cum ergo in rationibus seminalibus non esset, ut ex costa viri fieret mulier, ut in littera dicitur, videtur quod inconvenienter mulier de costa viri formata dicatur.

2. Praeterea, in corpore hominis non potest esse divisio continui sine sensu doloris: dolor autem in homine esse non potuit ante peccatum; ergo non potest dici quod mulier sit ex costa viri formata ante peccatum.

3. Praeterea, ex corpore parvae quantitatis absque additione fieri non potest corpus magnae quantitatis nisi per rarefactionem, ut patet per Augustinum, 10 super Genesim ad litteram. Non autem potest fuisse corpus mulieris tanto rarius costa viri quanto eam in quantitate excessit: sic enim esset rarior aere; ergo aliquid additum est costae, ad hoc quod ex ea (1) mulier formaretur. Magis ergo debet dici quod ex illo addito formata est mulier, quam ex costa, cum illud sit majoris quantitatis.

Sed contra est auctoritas Scripturae Gen. 2. Praeterea, Actuum 17 dicitur, quod Deus fecit ex uno omne hominum genus: hoc autem non esset, nisi mulier esset formata; ergo etc.

Respondeo. Dicendum, quod convenienter mulier ex viro est formata: tum propter conditionem mulieris, quae cum sit imperfecta, debet a perfecto originem sumere: tum etiam propter charitatem inter homines insinuandam, ut homines magis se diligant, ex uno se esse cognoscentes: tum ad viri dignitatem ostendendam, qui est principium universale sui generis, sicut et Deus est principium omnium. Convenienter etiam et de costa dicitur esse formata, ut ostendatur eam viro datam esse in sociam non in dominam vel ancillam, ut in littera dicitur.

Ad primum ergo dicendum, quod opus propagationis naturalis praesupponit principia activa et passiva; et ita eam vir sit principium activum in generatione humana, femina passivum, utriusque formatio non ad opus propagationis, sed ad primam (2) rerum institutionem pertinet. Nec obstat quod femina ex viro facta legitur; quia etiam vir dicitur esse factus ex terra et similiter animalia et plantae.

Ad secundum dicendum, quod costa illa non fuit de perfectione Adae, prout erat quaedam per-

(1) *U.* extra.

(2) *Al.* passivam.

sona singularis, sed prout erat totius humani generis principium. Propter quod etiam illa costa resurget in Eva, in qua est de perfectione individui, non autem in Adam. Illud autem quod hoc modo se habet ad hominem, non solum sine dolore, sed cum delectatione deciditur, sicut patet de semine. Unde non oportet quod in costae amotione, Adam dolorem senserit; et praecipue cum hoc factum legatur eo in sopori extasis constituto.

Ad tertium dicendum, quod Hugo de sancto Victore et quidam eum sequentes, dicunt, quod ex multiplicatione materiae costae absque omni additione vel rarefactione mulier est formata: et ponunt simile de multiplicatione quinque panum. Sed haec multiplicatio intelligi non potest nisi vel quod crescat ipsa essentia materiae secundum se; vel ita quod crescat quantitas cui subest. Primum non potest intelligi nisi per creationem novae materiae vel per additionem materiae praeevantis. Sed hoc non potest intelligi sine rarefactione: quae quia ibi esse non potuit, ut objectio probat, oportet quod intelligatur illa formatio esse facta ex costa vel per novam materiae creationem vel per additionem exterioris. Et tamen ex costa formata dicitur mulier, quia illa materia vel addita vel de novo creata, mediante materia costae in formationem mulieris transivit.

ARTICULUS II.

Ad secundum sic proceditur. Et 1. videtur, quod miracula non sint, quae fiunt praeter rationes seminales. Inter rationes enim seminales computari oportet non solum vires activas, sed etiam passivas, sine quibus naturales effectus non producantur. Sed eorum quae mirabiliter fiunt virtutes passivae in rebus naturalibus praeevantis, quia, ut ab Augustino, habetur in litera, « Dedit Deus naturis, ut ex eis haec mirabilia fieri possent: » ergo miracula non fiunt praeter rationes seminales.

2. Praeterea, creatio rerum et justificatio impiorum et resurrectio mortuorum praeter rationes seminales fiunt. Haec tamen non sunt miracula: eum creatio non ordinatur ad gratiae manifestationem, justificatio impii frequenter accidat, resurrectio mortuorum non sit praeter fidelium spem; quae omnia ad miraculum requiruntur; ergo non ex hoc aliqua dicuntur miracula, quod praeter rationes seminales fiunt.

3. Praeterea, facultas creaturae non se extendit supra rationem seminalem: extendit autem se ad opera miraculosa, quia homines et Angeli miracula dicuntur facere. Fiunt etiam quandoque miracula de his quae per naturam fieri possunt, sicut patet in sanatione infirmorum; ergo non ex hoc est aliquid miraculosum, quod praeter rationes seminales fit.

Sed contra. Miracula, ut in litera dicitur, ad commendationem gratiae fiunt: sed gratia eum sit supernaturalis, non potest sufficienter commendari nisi per effectus supernaturales, qui seminales rationes naturae excedunt; ergo miracula sunt praeter rationes seminales.

Praeterea, miraculum est aliquid arduum et insolitum quod praeter spem admirantis apparet et facultatem naturae excedit: omne autem quod est secundum rationes seminales est infra facultatem naturae; ergo miracula sunt praeter rationes seminales.

Respondeo. Dicendum, quod admiratio proprie est, cum alicujus effectus visibiliter apparentis causa non comprehenditur. Ex quo patet quod aliquid potest cadere sub admiratione dupliciter. Uno modo non propter seipsum, sed propter defectum admirantis qui non comprehendit causas secundum se comprehensibiles. Unde in his contingit quod unum et idem quod non est admirabile sapienti est admirabile idiotae; sicut eclipsis solis vel lunae vel aliquid hujusmodi. Alio modo propter seipsum, quando scilicet causa est secundum se incomprehensibilis: et hujusmodi sunt, quae sola virtute Dei fiunt, quam humanus intellectus comprehendere non potest: et ideo haec sunt cuilibet admiranda; propter quod haec dicuntur miracula proprie loquendo. Ad ea autem quae sola virtute divina fiunt, seminales rationes naturae non operantur: et ideo oportet dicere, quod miracula praeter rationes seminales fiunt.

Ad primum ergo dicendum, quod potentia passiva refertur ad activam: et ideo duplex est potentia passiva. Una naturalis quae educitur in actum per agens naturale, et haec inter rationes seminales computatur. Alia obedientialis, quae habet ordinem ad potentiam activam divinam, cui omnis creatura obedit: et haec non computatur inter rationes seminales. De hac loquitur Augustinus in litera.

Ad secundum dicendum, quod creatio rerum licet a solo Deo sit, non tamen proprie potest dici miraculosa: quia sicut aliquis effectus particularis ex sua natura habet ordinem ad suam causam proximam, ita universitas creaturarum ad Deum; et ideo exitus universi a Deo non est miraculosus, sicut nec exitus cujuslibet effectus a propria causa. Similiter nec justificatio impii proprie miraculosa est: quia licet ratio seminalis eam non compleat, ad eam tamen disponere potest. Resurrectio autem mortuorum miraculosa est; non enim eadit sub spe naturae, quamvis cadat sub spe gratiae.

Ad tertium dicendum, quod sancti homines dicuntur miracula facere orando. Angeli vero orando et ministerium adhibendo, non autem propria virtute perficiendo. Natura vero ad opus miraculi se non extendit: quia opus miraculi excedit facultatem naturae, vel secundum substantiam facti, ut resuscitatio mortui, vel secundum modum faciendi, ut curatio februm quae fit solo imperio vel oratione.

QUAESTIO II.

Deinde quaeritur de traductione animae. Et circa hoc quaeruntur duo: 1.^o utrum anima rationalis sit ex traduce; 2.^o utrum anima sensibilis et vegetabilis sint ex traduce.

ARTICULUS I.

Ad primum sic proceditur. Et 1. videtur, quod anima rationalis sit ex traductione. Accidens non traducitur, nisi subjectum tradueatur: peccatum autem originale, cujus subjectum est anima rationalis, traducitur a parente in prolem; ergo anima rationalis est ex traduce.

2. Praeterea, homo generat sibi simile secundum speciem: sed genitus homo habet speciem per animam rationalem; ergo anima rationalis geniti traducitur a generante.

3. Praeterea, omne quod dat complementum

operi cooperatur operanti: sed Deus non cooperatur adulteris; ergo non cooperatur nec dat complementum eorum actui; et sic animae natorum ex adulterio non sunt per creationem a Deo; relinquuntur ergo quod a parentibus traducantur.

Sed contra est quod dicitur Eccl. ult. : « Donec revertatur pulvis in terram suam, unde erat, spiritus ad Deum qui dedit illum: » ex quo videtur quod spiritus humanus sit a Deo per creationem corpori immixtus.

Praeterea, majus est educere aliquid in esse, quam formare ipsum: sed mens rationalis ab ipsa praedicta (1) veritate formatur, ut Augustinus dicit; ergo immediate a Deo creatur.

Respondeo. Dicendum, quod impossibile est animam rationalem cum semine traduci. Cujus ratio est, quia nulla forma vel virtus traducitur per translationem corporis, nisi quae ad divisionem corporis dividitur. Omnis autem talis forma est a materia dependens secundum esse et suam operationem. Anima autem rationalis habet operationem praeter communicationem corporis; scilicet intellectualem, ut probat Philosophus in 5 de Anima. Unde non potest dici quod sit virtus materialis quae dividatur ad divisionem corporis: et propter hoc non potest dici quod traducatur cum translatione seminis. Et hoc est quod Philosophus dicit in 16 de Animalibus, quod principia, quorum opera sunt sine corpore, oportet ab extrinseco esse: per quod probat intellectum esse ab extrinseco. Patet etiam ex dictis, quod si ponatur animam esse ex traduce, de necessitate sequitur eam esse corruptibilem, sicut et ceteras formas materiales, quae a materia dependent secundum esse et operationem. Et ideo utrumque aequaliter est haereticum.

Ad primum ergo dicendum, quod ex infectione animae, in qua peccatum originale incepit, infectum est corpus, et ex corporis infectione iterato anima infusa inficitur, ut infra melius patebit. Et sic non oportet quod originale traducatur per translationem animae, sed per translationem corporis.

Ad secundum dicendum, quod homo generat sibi simile per hoc quod materia humani corporis per virtutem generativam hominis, fit in ultima dispositione ad susceptionem animae rationalis; non quod ipsa rationalis anima sit effectus generativae virtutis.

Ad tertium dicendum, quod in actione adulterii est duo considerare: scilicet id quod naturae est, et sic ei Deus cooperatur animas creando; et id quod est perversae voluntatis, et sic Deus ei non cooperatur, sed eam prohibet et punit.

ARTICULUS II.

Ad secundum sic proceditur. Et 1. videtur, quod anima sensibilis non sit ex traduce. Anima enim sensibilis ejusdem rationis est in homine et in aliis animalibus: sed in homine non est ex traduce, cum in substantia non differat a rationali quae non traducitur; ergo anima sensibilis non est ex traduce, etiam in brutis.

2. Praeterea, nulla substantia per se subsistens incipit esse nisi per generationem vel creationem: sed anima sensibilis brutorum est substantia per se subsistens: quod ejus opera demonstrant, quae corpus movent. Formae enim non subsistentes, non

(1) *Lege* praedicta, ab ipsa.

possunt esse motores, ut patet de formis gravium et levium in 8 Physicorum. Anima autem sensibilis non potest per se generari, cum sit forma quaedam non composita ex materia et forma; relinquuntur ergo quod exeat in esse per creationem et non ex traduce.

5. Praeterea, effectus non est nobilior sua causa. Sed corpus caeleste non est animatum, ut communiter tenetur, et sic est minus nobile quolibet corpore animato, secundum regulam quam Augustinus ponit in lib. de vera Religione; ergo per virtutem corporis caelestis non potest produci anima sensibilis. Sed translationis quae est in generatione aliquo modo est causa corpus caeleste, quia homo generat hominem et sol, secundum Philosophum: ergo anima sensibilis in brutis non est ex traduce, sed ex creatione.

Sed contra est quod dicitur Gen. 2: « Producant aquae reptile animae viventis. » Ex quo patet quod ad productionem brutorum, aliquid operatur virtus corporeae naturae; non ergo sunt per creationem.

Praeterea, Philosophus dicit in 16 de Animalibus, quod intellectus solus est ab extrinseco.

Respondeo. Dicendum, quod circa hoc est duplex opinio. Quidam enim dicunt animam sensibilem in brutis et vegetabilem in plantis fieri per creationem. Sed hoc non videtur verum; quia cum factionis terminus sit esse, hoc modo alicui competit fieri, sicut et esse. Animae autem brutorum et plantarum non habent esse per se subsistens, sed a materia dependens, sicut aliae formae materiales: quod ostenditur ex hoc quod post corpus non manent: et ideo eis fieri non competit separatim, sed simul cum corpore, et eadem operatione. Et ideo alii dicunt, quod sicut corpus traducitur per seminis translationem, ita et praedictae animae traducuntur. Quae quidem transductio hoc modo debet intelligi: quod in semine deciso, quod jam fere erat assimilatum, est virtus animae, sicut et in ceteris corporis partibus: quae quidem virtus in semine existens anima nondum dici potest, quia nondum habet materiam sufficienter dispositam et organizatam. Est tamen aliquid de genere animae, cujus actione materia praeparatur, et sic tandem in fine generationis anima dici potest; sicut parva scintilla subtracta ab igne materiam exteriorem convertendo in magnum ignem augetur.

Ad primum ergo dicendum, quod licet omnia animalia convenient in anima sensibili, non tamen in omnibus anima sensibilis est unius speciei: quia sic animalia specie non differunt, cum talis differentiae sit forma principium. Et ideo nihil prohibet animam sensibilem hominis per creationem esse, non autem animas aliorum animalium.

Ad secundum dicendum, quod ipsum movere non est operatio animae sensibilis solum, sed conjuncti. Movet enim anima sensibilis per imperium appetitus, cujus actio per organum corporale exercetur. Unde non sequitur quod anima sensibilis sit substantia per se subsistens.

Ad tertium dicendum, quod dato quod caelum non sit animatum, nihilominus motus ejus est ab aliqua substantia vivente, scilicet a Deo per ministerium Angelorum; et ideo ex virtute, quam a motore consequitur, potest esse causa sensibilis animae: in quibusdam quidem animalibus immediate, ut in animalibus generatis ex putrefactione, in quibus

virtus caelestis se habet in loco virtutis formativae: in aliis vero mediante virtute seminis, ut in animalibus quae ex semine generantur.

DISTINCTIO XIX.

Solent quaeri plura de statu primi hominis etc. (V. edit. nostrae tom. VI, pag. 552)

QUAESTIO UNICA.

Haec quaeruntur quatuor: 1.^o utrum homo in primo statu fuerit aliquo modo immortalis; 2.^o utrum impassibilis; 3.^o de causa immortalitatis et impassibilitatis, utrum fuerit a natura vel gratia, 4.^o utrum lignum vitae immortalitatem conservaverit.

ARTICULUS I.

Ad primum sic proceditur. Et 1. videtur, quod homo in statu innocentiae non fuerit immortalis. Cujus enim principia sunt corruptibilia, ipsum est corruptibile, cum nihil sit stabilius suis principiis: sed principia corporis humani, scilicet quatuor elementa, erant corruptibilia: ergo corpus humanum erat corruptibile; non ergo immortale.

2. Praeterea, variatio differentiae specificae seu constitutivae mutat speciem: sed mortale ponitur differentia specifica hominis, cum dicitur quod homo est animal rationale mortale; si ergo Adam erat immortalis, erat etiam alterius speciei.

3. Praeterea, cibus assumitur ad restaurationem deperditi. Sed homo in statu innocentiae cibo indigebat; ergo aliqua deperditio fiebat in ejus corpore; et ita ejus corpus non erat immortale.

Sed contra est quod dicitur Rom. 5: « Per unum hominem peccatum intravit in mundum et per peccatum mors. »

Praeterea, id quod imponitur homini in poenam non competit ei in statu innocentiae. Sed mors imposita est homini in poenam, ut patet Gen. 2: « Quaecumque die comederitis morte moriemini »; ergo in statu innocentiae homo erat immortalis.

Respondeo. Dicendum, quod aliquid potest alicui attribui dupliciter: uno modo ratione sui ipsius, sicut aeri diaphanum. Alio modo ratione alterius, sicut eidem esse illuminatum actu. Corpori ergo humano in statu innocentiae, ratione sui ipsius immortalitas non competebat, cum esset ex contrariis compositum, sicut et cetera corruptibilia. Competebat autem ei ratione animae quae immortalis erat, ut pote immaterialis. Unde ut sua materia formae non deficeret, data fuit animae virtus in statu innocentiae, ut corpus contineret absque morte, quamdiu ipsa se contineret sub Deo: et sic mors non poterat in corpore accidere, nisi prius peccatum in anima praecessisset. Patet ergo quod quamvis homo in statu innocentiae aliquo modo mortalis, et aliquo modo immortalis dici potuerit, verius tamen immortalis dicebatur, quia immortalitas competebat et absolute, et mortalitas sub conditione, scilicet si peccaret.

Ad primum ergo dicendum, quod ratio illa procedit secundum conditionem materiae, et non secundum potestatem formae.

Ad secundum dicendum, quod mortalitas ponitur differentia hominis secundum conditionem principiorum naturalium, quae, quantum est in se, semper sunt corruptibilia, nisi aliquid impediatur.

Ad tertium dicendum, quod quamvis aliqua particularis dissolutio in corpore Adae esse potuerit, non tamen poterat esse totius corporis destructio. Propter vim enim regitivam corpus quasi dependitum restaurabatur; sicut elementa sunt corruptibilia secundum partem, et non secundum totum.

ARTICULUS II.

Ad secundum sic proceditur. Et 1. videtur, quod corpus Adae in primo statu non fuerit impassibile. Impassibilitas enim est quaedam dos corporis gloriosi: sed corpus hominis in primo statu non fuit gloriosum; ergo non fuit impassibile.

2. Praeterea, sicut qualitas activa est principium actionis, ita qualitas passiva est principium passionis. Sed in corpore hominis erant qualitates passivae, ut humidum, siccum et molle; ergo erat passibile ab interiori et exteriori.

3. Praeterea, sentire, quoddam pati est, secundum Philosophum in secundo de Anima: sed corpus hominis in primo statu fuit sensibile; ergo fuit passibile.

4. Praeterea, somnus, passio quaedam est: sed homo in statu innocentiae dormivisset, secundum illud Gen. 2: « Inmisit Deus soporem in Adam; » ergo etc. Dicendum ad ista duo, quia sentire et dormire non remouent hominem a naturali dispositione, sed ordinant ad bonum naturae.

Sed contra. Passio est corporis principium, quia omnis passio magis facta, abjicit a substantia, secundum Philosophum: sed corpus hominis erat incorruptibile in primo statu, ut dictum est; ergo erat impassibile.

Praeterea, nihil patitur nisi propter debilitatem, quia agens est potentius patiente: sed in homine in statu innocentiae debilitas esse non potuit; ergo nec passio.

Respondeo. Dicendum, quod passio dupliciter sumitur. Quandoque enim importat receptionem tantum, secundum quod sentire vel intelligere, pati dicitur. Quandoque autem importat et receptionem, et abjectionem: et iste est magis proprius modus passionis; quando scilicet aliquid ita recipit id quod est agentis, ut abjiciatur ab eo quod erat sibi proprium et connaturale; sicut patet in aqua calefacta. Accipiendo ergo passionem primo modo, corpus hominis in statu innocentiae erat passibile, quia erat perfectibile, quod ad ejus pertinet dignitatem. Sed accipiendo passionem secundo modo, non erat corpus hominis passibile secundum totum, vel secundum partes speciei, quae tandem manent, quamdiu corpus permanet integrum. Erat tamen passibile, scilicet secundum partes materiae, quae fluunt et refluent.

Ad primum ergo dicendum, quod impassibilitas est dos corporis gloriosi, secundum quod corpus humanum indefectibilem firmitatem consequitur ex gloria animae in justitia confirmatae; unde dicitur tunc impassibilis homo vel immortalis, quasi omnino non potens mori vel pati. Sed impassibilitas primi status erat secundum quod corpus continebatur ab anima absque hoc quod consequeretur ab ea perpetuam firmitatem, quia nec ipsa justitia animae erat confirmata. Unde dicebatur impassibilis vel immortalis homo, quia poterat non mori, secundum quod poterat nec peccare.

Ad secundum dicendum, quod ratio illa procedit de primo modo passionis.

Ad tertium dicendum, quod ratio illa procedit quantum ad conditionem materiae, secundum quam corpus humanum erat passibile; sed impediatur a passione interiori, per virtutem animae continentis corpus: a passione vero exteriori, per divinam providentiam exterius protegentem.

ARTICULUS III.

Ad tertium sic proceditur. Et 1. videtur, quod immortalitas, vel impassibilitas primi status esset naturalis. Magis enim est natura forma, quam materia, ut dicitur in secundo Physicorum: sed secundum conditionem suae formae, homini immortalitas et impassibilitas debebatur; ergo ei naturaliter conveniebat.

2. Praeterea, corpus Adae fuit temperatissimum: sed corruptio in corporibus mistis accidit propter praedominium alterius contrariorum; ergo corpus Adae naturaliter erat incorruptibile et impassibile.

3. Praeterea, naturale est formae, quod det esse materiae; ergo formae incorruptibili naturale est, quod det esse perpetuum: sed anima, quae est forma hominis, est incorruptibilis; ergo vita hominis naturaliter est perpetua; et sic naturaliter homo erat impassibilis et immortalis.

Sed contra. Ea quae sunt naturalia, non amittuntur per peccatum, ut patet per Dionysium quarto cap. de Div. nom. Immortalitas autem primi status amissa est per peccatum; ergo non erat naturalis.

Praeterea, ex eadem materia corpus hominis sumptum est, et aliorum animalium: sed alia animalia naturaliter erant corruptibilia; ergo et homo.

Respondeo. Dicendum, quod in rebus compositis ex materia et forma, quod pertinet ad perfectionem, consequitur formam: quod vero pertinet ad defectum, consequitur materiam. Et ideo respiciendo ad formam, mors, et corruptio, et senium, et huiusmodi dicuntur esse innaturalia, ut patet in secundo de Caelo et mundo. Sed respiciendo ad materiam sunt naturalia. Et unumquodque iudicatur proprie secundum ordinem ad suam causam. Inde est quod corruptiones rerum naturalium, simpliciter naturales dicuntur, quando fiunt secundum exigentiam principiorum materialium, quamvis sint contra intentionem formae, ex qua dicuntur naturales secundum quid. Quia igitur ex principiis materialibus non inerat homini incorruptibilitas, sed solum ex principio formali, idest anima, quae non habebat potestatem corpus perpetuo conservandi ex natura sua, sed solum ex munere gratiae, ideo immortalitas illa non erat ex natura, sed ex gratia.

Ad primum ergo dicendum, quod corruptio semper consequitur ex necessitate materiae. Unde an ipsa sit naturalis, magis iudicandum est ex materia quam ex forma.

Ad secundum dicendum, quod corpus Adae erat temperatissimum, non quia esset aequalitas inter contraria secundum quantitatem, sed secundum proportionem, prout quodlibet contrariorum illam qualitatem servabat, quae requirebatur ad debitam complexionem totius. Secundum autem quantitatem non est possibile adaequare contraria in aliquo misto: quia in misto non potuisset praecedere alteratio, nec esse unitas aut motus vel locus naturalis, propter praedominium unius elementi. Et praecipue

S. Th. Opera omnia. V. 22.

corpus animatum oportet quod excedat in calore secundum quantitatem, cum calor sit instrumentum animae, ut patet in secundo de Anima.

Ad tertium dicendum, quod naturale est formae, quod perficiat materiam secundum eius conditionem. Et ideo non est naturale animae rationali, quod materiae corporali esse perpetuum tradat.

ARTICULUS IV.

Ad quartum sic proceditur. Et 1. videtur, quod lignum vitae nullo modo fuerit causa incorruptionis in primo statu. Quod enim est corruptibile, non potest incorruptionem praebere. Sed illud lignum erat corruptibile, alias in cibum sumi non potuisset; nam cibus convertitur in substantiam nutriti; ergo lignum vitae non poterat esse incorruptionis causa.

2. Praeterea, nihil mutatur a suo genere per aliud extrinsecum: sed corruptibile et incorruptibile genere differant, ut patet in 19 Metaphysicorum; ergo nullus cibus assumptus potuit esse causa incorruptionis, corpori naturaliter corruptibili.

3. Praeterea, ad cibum sequitur somnus, per quem vita quodammodo diminuitur: unde dimidium vitae in 1 Ethic. appellatur. Non autem potest idem esse causa perpetuitatis et diminutionis vitae; ergo lignum vitae non poterat esse causa immortalitatis.

Sed contra est, quod dicitur Gen. 3: « Videat « ne forte sumat de ligno vitae, et comedat, et vivat in aeternum. »

Praeterea, nomina sunt arboribus paradisi imposita ex effectu: sicut lignum scientiae boni et mali dicebatur, quod per ejus esum, experimentaliter homo scivit distantiam inter bonum et malum; ergo pari ratione lignum vitae dicebatur, quod vitam causabat vel conservabat.

Respondeo. Dicendum, quod immortalitas primi status non erat ex hoc, quod corpori fuerit perpetua firmitas collata, ut erit post resurrectionem; sed ex regimine animae, quae sic suum corpus poterat gubernare, ut mortis defectum non experiretur, nisi prius peccaret. Anima autem in regimine corporis quibusdam auxiliis utitur, vel interioribus, sicut organis, vel exterioribus, sicut cibis et tegumentis. Sic ergo ad conservationem incorruptionis in primo statu duo concurrissent: una quasi principalis causa ex parte animae, scilicet iustitia non interrupta; alia quasi causa secundaria, scilicet sumptio cibi, quorum auxilio anima corpus sustentabat. Aliter tamen quantum ad hoc adjuvabatur anima per esum ligni vitae, et aliorum ciborum. Nam per alios cibos restaurabatur deperditum; per lignum autem vitae hoc, quod ex aliis cibis erat conversum, reducebatur ad perfectam assimilationem, ne ex eorum additione virtus conservativa debilitaretur, quae est causa detrimenti et corruptionis, ut dicitur in primo de Generatione: sicut vinum per admistionem aquae tandem reducit ad aquosum. Ex quo patet, quod principali causa remota, scilicet innocentia, nec aliis cibis, nec ligno vitae potuisset immortalitas conservari, quamvis esus ligni vitae ad vitam diuturniorem contulisset.

Ad primum ergo dicendum, quod ratio illa probat, quod lignum vitae non potest esse principalis causa incorruptionis.

Ad secundum dicendum, quod ratio procedit de corruptibili et incorruptibili per naturam. Nihil autem prohibet ut id quod est per naturam corruptibile,

alicujus exterioris auxilio per gratiam incorruptionem conservet.

Ad tertium dicendum, quod quidam dicunt, hominem in statu innocentiae non potuisse dormire: ejus contrarium Boetius dicit, et etiam in Scriptura Gen. 2: « Immisit Deus soporem in Adam: » quamvis hoc de sopore extasis possit exponi. Et ideo alii dicunt, quod eibus assumptus erat ei causa somni, sicut et nobis: et licet actu impedirentur aliquae operationes vitae per somnum, tamen eo confortabatur natura ad diutius persistendum. Unde somnus connumerandus est inter alias passiones, quae ad perfectionem pertinent patientis.

DISTINCTIO XX.

Post hoc videndum est qualiter primi parentes etc. (V. edit. nostrae tom. VI, pag. 560.)

QUAESTIO UNICA

Hic quaeruntur quatuor: 1.^o utrum si homo innocentiam servasset, fuisset in statu illo generatio; 2.^o utrum filii nati fuissent perfecti secundum corpus; 3.^o utrum perfecta scientia fuisset secundum intellectum; 4.^o utrum perfecta gratia et virtute, secundum affectum.

ARTICULUS I.

Ad primum sic proceditur. Et 1. videtur, quod si homo perstitisset, generatio non fuisset. Ad hoc enim est generatio, ut quae secundum individuum conservari non possunt, saltem secundum speciem conserventur, ut patet in secundo de Anima: sed homo in statu innocentiae conservari potuisset secundum individuum; ergo generatio in statu innocentiae non fuisset.

2. Praeterea, in statu innocentiae non fuisset aliqua corruptio: sed generatio per coitum, quae est propria humano generi, sine corruptione esse non potest, tum propter seminis decisionem, tum propter virginitatis amissionem; ergo homo in primo statu non generasset.

3. Praeterea, delectatio, quae est in actu generationis, propter sui vehementiam ligat rationem, ut non sit possibile aliquid intelligere in ipsa, secundum Philosophum in 6 Ethic. In statu vero innocentiae tanto fuisset delectatio vehementior, quanto sensus perspicacior, et natura integrior: multo ergo fuisset tunc, in actu generationis, ligata fortius ratio, quam nunc: quod est inconveniens; ergo in statu innocentiae generatio non fuisset.

Sed contra est quod dicitur Gen. 1: « Crescite et multiplicamini, et replete terram; » quod non potest esse nisi per generationem; ergo generatio in statu innocentiae fuisset.

Praeterea, distinctio maris et feminae, ad generationis naturalis officium ordinatur: sed in statu innocentiae fuerunt sexus distincti, ut patet Gen. 1 et 2; ergo fuisset in statu innocentiae generatio naturalis.

Respondeo. Dicendum, quod quidam doctores Graecorum, ut Gregorius Nyssenus et Damascenus posuerunt, quod in statu innocentiae generatio per coitum non fuisset. Fuisset tamen multiplicatum humanum genus aliter divina virtute, quae etiam Angelos sine generatione multiplicavit. Sed haec

positio videtur repugnare naturae, secundum quam ille modus multiplicationis est homini naturalis sicut et caeteris animalibus: unde in statu naturae integrae etiam homini competeat. Repugnat etiam Scripturae, quae feminam in adjutorium hominis factam dicit: quod non potest convenienter exponi, nisi de adjutorio generationis: quia in aliis non minus vir per virum potuisset adjuvari. Potest etiam esse occasio erroris, ut credatur, actum naturalem sine peccato esse non posse, si in statu innocentiae talis actus esse non potuisset. Et ideo, secundum sententiam Augustini dicendum est, quod si status innocentiae durasset, humanum genus per conjunctionem maris et feminae multiplicatum fuisset, sicut et modo multiplicatur, excepto quod tunc fuisset praedieta conjunctio sine concupiscentiae turpitudine, propter membrorum obedientiam, et dominium rationis.

Ad primum ergo dicendum, quod generatio hominis ante peccatum fuisset necessaria ad multiplicationem individuum, licet non ad conservationem speciei; et praecipue quia homo non erat immortalis, quasi non potens mori, sed quasi potens non mori.

Ad secundum dicendum, quod in statu innocentiae concubitus fuisset absque defectiva corruptione, vel vituperabili. Cum ergo semen sit superfluum alimenti, ejus decisio moderata, naturam corporis in nullo gravasset. Virginitas autem non fuisset per corruptionem mentis, neque quantum ad habitum, sicut fit per illicitum concubitum; neque quantum ad actum, sicut fit in actu matrimoniali post peccatum, propter rationis ligamentum. Fuisset autem soluta integritas carnis, sed huic praeponderaret fecunditas prolis.

Ad tertium dicendum, quod delectatio coitus fuisset in statu innocentiae major secundum quantitatem, sed minor secundum proportionem; quia scilicet ratio fuisset multo fortior, ut per hujusmodi delectationem impediri nullatenus posset.

ARTICULUS II.

Ad secundum sic proceditur. Et 1. videtur, quod in statu innocentiae homines omnino perfecti nascerentur secundum corpus. Homo enim est nobilissimum animalium: sed quorundam animalium filii ita nascuntur, ut statim habeant membrorum usum, sicut patet de multis; ergo multo fortius homines statim nati haberent usum membrorum, nisi propter defectum peccati.

2. Praeterea, homo in statu innocentiae filios ejusdem dignitatis genuisset: sed Adam statim factus habuit usum membrorum et perfectam quantitatem; ergo etiam nati ex eo statim utrumque habuissent.

3. Praeterea, omne agens perfectum et non impeditum, generat sibi simile. Sed in generatione humana pater est tamquam agens. Cum ergo natura humana fuerit tunc perfecta, nullumque impedimentum in ea extiterit, videtur quod filii mox nati fuissent similes patri, et quantum ad usum membrorum et quantum ad quantitatem perfectam, et quantum ad sexum; et sic fuissent nati absque omni defectione corporali; scilicet virtutis, quantitatis et sexus.

Sed contra. Ab extremo in extremum non transitur nisi per medium: sed inter esse perfectum, et purum non esse, medium est esse imperfectum;

ergo omne quod exit de non esse in esse, in sui principio est imperfectum; ergo homines in statu innocentiae mox nati, non fuissent perfecti.

Praeterea, homo dicitur minor mundus, quia est similis universo: sed universum in sui principio fuit imperfectum, ad minus secundum illos qui ponunt non omnia fuisse simul creata secundum formam; ergo homines in statu innocentiae a principio fuissent imperfecti.

Respondeo. Dicendum, quod circa hanc quaestionem partim omnes opiniones concordant, partim omnes discordant. De quantitate enim omnes dicunt, quod oportebat filios parvulos nasci, propter materni uteri necessitatem. Similiter oportebat nasci mares et feminas, propter generationis effectum. Sed de perfectione virtutis est diversa opinio. Quidam enim dicunt, quod pueri mox nati, usum membrorum perfecte habuissent: sicut in quibusdam animalibus nunc videmus, innitentes verbis Augustini quae in litera ponuntur. Sed quia Augustinus hujusmodi sine assertione dicit, aliis videtur, quod sicut in processu temporis perfectam statoram, ita et perfectum usum membrorum adepti fuissent, et non statim a principio. Non enim cogimur, ab homine in primo stato remove nisi defectus culpa vel poenae. Defectus autem qui est in pueris quantum ad motum membrorum, sequitur naturalem membrorum dispositionem, propter eorum molliem et teneritudinem. Nec tamen dicendum, quod adeo imperfectum usum membrorum habuissent, sicut nunc pueri habent; hoc enim absque poenali incommodo esse non posset. Sed nihil tamen super hac quaestione certum determinari potest: sicut nec Augustinus determinat, propter hoc quia in canonica Scriptura nihil super hoc traditur.

Ad primum ergo dicendum, quod filii hominum in principio suae nativitatis, prae multis aliis animalibus majorem defectum patiuntur in usu membrorum, propter majorem molliem, et temperiem complexionis, quae necessaria est ad sensus perspicacitatem.

Ad secundum dicendum, quod Adam habuit duplicem dignitatem: unam quae competebat ei secundum quod erat homo innocens, sicut quod erat impassibilis, immortalis, et alia hujusmodi; et hoc ab eo in filios devenisset. Aliam habebat, in quantum erat principium totius humanae naturae. Hoc autem aliis incommunicabile erat: et ad hanc pertinet, quod statim in principio suae factionis perfectam habuit quantitatem et virtutem: quia natura a perfectis sumit initium.

Ad tertium dicendum, quod generatio feminae non contigisset in statu innocentiae ex debilitate virtutis activae in semine, neque ex materiae indispositione, sicut nunc frequenter accidit: sed vel ex imaginatione parentum, quam frequenter imitatur forma prolis: vel ex alio principio intrinseco permittente, vel venti, vel corporis caelestis, vel hujusmodi. Dicit enim Philosophus in libro de Animalibus, expertum esse apud pastores, quod oves concipiunt masculos flante aquilone, sed feminas austro flante.

ARTICULUS III.

Ad tertium sic proceditur. Et 1. videtur, quod pueri mox nati in statu innocentiae, in scientia perfecti fuissent. Defectus enim scientiae errorem et ignorantiam causat; sed haec ad poenalitatem

praesentis vitae pertinent, ut Augustinus dicit; ergo pueri non fuissent in statu innocentiae absque scientiae perfectione.

2. Praeterea, cognitio magis connaturalis est homini, quam aliis animalibus: sed alia animalia mox nata, cognitionem habent ad se pertinentium: ovis enim sequitur matrem et fugit lupum; ergo et homines nati absque perfectione scientiae non fuissent.

3. Praeterea, sensus magis dependet a corpore, quam intellectus: sed sensus in pueris in statu innocentiae perfectus fuisset, quia et nunc pueri non minus vident vel audiunt quam proveci; ergo multo fortius intellectus perfectionem habuisset.

Sed contra. Anima unita est corpori, ut in corpore scientia perficiatur: sed hoc non esset necessarium, si statim a principio suam perfectionem haberet, et non eam acquireret per corporea instrumenta; ergo pueri mox nati perfectionem scientiae non habuissent.

Praeterea, perfectio animae corporis perfectioni proportionatur: sed corpus hominis non fuisset statim perfectum in nativitatis principio, ut dictum est; ergo nec intellectus secundum scientiam.

Respondeo. Dicendum, quod perfectio intellectus dupliciter attenditur. Uno modo secundum habitum. Alio modo secundum actum. Contingit enim habentem habitum scientiae ab actu impediri, ut in ebriis patet. Iterum contingit habentem perfecte usum rationis habitu scientiae carere, ut patet in idiotis. De perfectione igitur secundum habitum, utrum eam mox nati habuissent, pro certo asseri non potest. Nam si perfectio scientiae, quam constat prius hominem habuisse, fuit ei collata ratione naturae humanae, oportuit in ea filios sibi similari. Si autem fuit sibi collata sicut singulari personae a qua, sicut a principio, esset per doctrinam in alios derivanda, non oportuit quantum ad hoc ei similes filios nasci. De perfectione vero secundum actum sententia dependet ex quaestione praemissa. Si enim pueri mox nati usum membrorum habuerunt, patet quod habuerunt perfectum usum memorativae et imaginativae et cogitativae, quae organis corporalibus utuntur; et sic nihil fuisset, quod rationis usum impediret. Si vero usum membrorum non habuissent ex impedimento actuum praedictarum virtutum, impeditus fuisset usus rationis; et hoc absque assertione ad praesens potest sustineri.

Ad primum ergo dicendum, quod non quolibet carentia scientiae ignorantia dicitur: unde lapides non dicimus ignorantes, sed supposita aptitudine habendi scientiam.

Ad secundum dicendum, quod alia animalia consequuntur convenientia et fugiunt nociva naturali instinctu: homo vero per rationis deliberationem: unde non est simile. Et praeterea memoria et imaginatio magis impediuntur in suis actibus in hominibus mox natis quam in aliis animalibus, propter majorem cerebri humiditatem: nam homo habet inter alia animalia maximum cerebrum, considerata sui corporis quantitate, ut Philosophus dicit in libro de Animalibus.

Ad tertium dicendum, quod licet in pueris non impediatur usus sensuum exteriorum, impediuntur tamen actus interiorum a quibus immediate accipit intellectus.

ARTICULUS IV.

Ad quartum sic proceditur. Et 1. videtur, quod pueri in statu innocentiae nati habuissent gratiam: quia secundum Augustinum, qualis Adam fuit, tales filios genuisset: sed Adam, si perstitisset, confirmatus fuisset; quod sine gratia esse non potest; ergo filios per gratiam confirmatos genuisset.

2. Praeterea, justitia non est sine gratia, ut dicitur Rom. 5: « Justificati gratis per gratiam ipsius. » Sed carentia justitiae est peccatum originale secundum Augustinum; si ergo pueri absque gratia nati fuissent, fuisset in eis peccatum originale: quod patet esse falsum.

3. Praeterea, bonum potentius est quam malum, secundum Dionysium. Sed Adam peccando in posteriores transmisit peccatum; ergo multo fortius, si perstitisset, ejus filii in gratia nati fuissent.

Sed contra est, quod Hugo de sancto Victore dicit: « Quod si homo perstitisset, generasset filios sine peccato, sed tamen non necessario paternae haeredes justitiae. »

Praeterea, gratia est immediate a Deo; ergo non non transfunditur a parente in prolem: et sic non fuit necessarium filios Adae in statu innocentiae cum gratia nasci.

Respondeo. Dicendum, quod duplex est perfectio justitiae in homine. Una naturalis: et hanc oportet dicere filios Adae statim genitos habuisse in statu innocentiae; alias fuisset in eis defectus culpae et poenae. Alia perfectio justitiae ad gratiam pertinet; per quam homo, non solum ratione agere potest, sed etiam meritorie. Et quia hoc ex sola liberalitate divinae bonitatis dependet, non potest efficax ratio soni ad alterutrum ostendendum; praesertim cum super hoc Scripturae canonicae auctoritas non habeatur. Et ideo quidam circa hoc dixerunt, quod fuissent nati cum gratia in statu innocentiae, aliis hoc negantibus.

Ad primum ergo dicendum, quod secundum quosdam, Adam, etiamsi tentationi restitisset, non fuisset statim in gratia confirmatus; sed tunc solum quando fuisset ad beatam et spiritualem vitam translatus: postea autem filios non genuisset. Si tamen tunc confirmatus esset, non fuisset necessarium alios statim natos confirmatos fuisse, quamvis quidam hoc dicunt. Non enim oportet filios parentibus assimilati in perfectionibus personalibus, et praecipue quae per actus acquiruntur; sed solum in naturalibus: non enim grammaticus generat grammaticum.

Ad secundum dicendum, quod peccatum originale aufert non solum gratiam, sed etiam ordinem justitiae naturalis, propter inobedientiam inferiorum ad superiorem.

Ad tertium dicendum, quod peccatum originale est peccatum naturae principaliter, et personae consequenter: sed donum gratiae e converso se habet; et ideo non est simile. Simile tamen est de justitia originali quae naturam in statu innocentiae consequabatur, per quam inferiora in statu illo suis superioribus obediebant. Unde et justitia fuisset a parentibus in filios propagata, sicut et nunc peccatum originale.

DISTINCTIO XXI.

Videns igitur diabolus etc. (V. edit. nostrae tom. VI, pag. 368.)

QUAESTIO UNICA.

Hic quaeruntur quatuor: 1.º ejus sit tentare; 2.º utrum omnis tentatio sit peccatum; 3.º de processu tentationis qui in litera describitur; 4.º de peccato Adae quod ex tentatione subsequutum est.

ARTICULUS I.

Ad primum sic proceditur. Et 1. videtur, quod tentatio hominis non convenienter diabolo attribuitur. Cujus enim causa in nobis est, non est exteriori causae attribuendum: sed omnium peccatorum aliqua causa inclinantes in nobis sunt; non ergo tentatio hominis ad peccatum debet attribui diabolo.

2. Praeterea, tentare ignorantis est: sed cognoscere hominum condiciones de facili daemon potest propter acumen scientiae naturalis; ergo tentare hominem diabolo non competit.

3. Praeterea, tentatio inter aequales constitui debet: sed diabolus est multo potentior homine, quia de eo dicitur Job 40: « Non est potestas super terram, quae ei comparetur; » ergo non juste est institutum vel permissum a Deo, quod diabolus hominem tentet.

Sed contra. Videtur quod solus diabolus tentet: quia ad Thess. 3 super illud: « Ne forte tentaverit vos is qui tentat, » dicit Glossa: « Solus diabolus ejus officium est tentare. »

Praeterea, tentare nihil aliud esse videtur, quam experimentum sumere ad cognoscendum ignota: sed hoc neque Deo competit, qui nihil ignorat, neque mundo, neque carni, quorum non est cognoscere; ergo solus diabolus tentat.

Respondeo. Dicendum, quod duplex modus est tentandi. Unus per essentiam, ut cum dicitur ignis est calidus. Alius per causam, ut cum dicitur sol est calidus. Tentatio igitur per essentiam suam potest attribui Deo et homini et diabolo. Deus namque tentat, ut alios cognoscere faciat: homo, ut ipsemet cognoscat: diabolus, ut agnoscat et decipiat. Sed per causam tentatio attribuitur rebus mundi et carni: quia ex his homo inclinatur in aliqua, ex quibus de eo experimentum capi potest: caro quidem quantum ad interiora appetibilia, sed mundus quantum ad exteriora.

Ad primum ergo dicendum, quod licet in nobis sint vitiorum aliqua causa, non tamen movent efficaciter, nisi ab exteriori moveantur: et ideo ad exercitium hominum permissum est diabolo tentare: sic enim malitia ordinatur in bonum.

Ad secundum dicendum, quod licet diabolus possit cognoscere exteriores hominis condiciones, non tamen interiores ex quibus est pronitas ad peccandum; et ideo tentat, ut sciat ad quod vitium unusquisque magis est pronus, ut sic in illud inducat.

Ad tertium dicendum, quod quantumcumque diabolus sit in se fortis, tamen non potest hominem cogere ad peccandum: et quantum ad hoc debilis reputatur: unde Bernardus ait: « Debilis est hostis, qui non potest vincere nisi volentem. » Ad alia responsio patet ex dictis.

ARTICULUS II.

Ad secundum sic proceditur. Et 1. videtur, quod tentatio non possit esse peccatum. Tentatio enim se habet ad peccatum, sicut motus ad terminum, ut albatio ad albedinem: sed albatio non est albedo; ergo nec tentatio potest esse peccatum.

2. Praeterea, in peccato non est gaudendum, nec peccatum est virtutis materia. De tentationibus autem gaudendum est: dicitur enim Jacob. 1: « Omne gaudium existimate, fratres mei, cum in tentationes varias incideritis: » quae etiam sunt virtutis materia, ut in litera dicitur, cum eis non consentitur; ergo tentatio non potest esse peccatum.

5. Praeterea, quanto major est impulsus ad peccatum, tanto minus videtur esse peccatum: unde percussus ex ira minus peccat, quam ex electione. Sed violentior est tentatio carnis, quam diaboli vel mundi, ut in litera dicitur; si ergo tentatio quae est a mundo et diabolo non est peccatum, ut in litera dicitur, nec tentatio quae est a carne erit peccatum; et sic nulla.

Sed contra. Tentatio quae est a carne est concupiscentiae motus, qui est peccatum, ut dicitur in Glossa Rom. 7; ergo tentatio a carne est peccatum.

Praeterea, Christus assumpsit infirmitates nostras praeter peccatum: sed tentatio carnis in eo non fuit, quia nec pugna carnis ad spiritum quae non est sine peccato, ut Augustinus dicit; ergo tentatio carnis est peccatum.

Respondeo. Dicendum, quod voluntas, in cuius actu peccatum consistit, dupliciter inclinatur. Uno modo ex objecto: et sic inclinatur per tentationem mundi, in quantum res mundi alliciunt voluntatem: et similiter per tentationem diaboli, qui huiusmodi concupisibilia homini vel offert exterius, vel interiorius repraesentat, imaginationem commovendo. Alio modo inclinatur voluntas ex inferiori appetitu, in quantum per suum actum in aliquid tendit: et sic inclinatur voluntas in tentationem carnis. Objectum autem non habet rationem peccati: et ideo tentatio exterior, quae est a mundo et diabolo, non est peccatum: sed actus sensualitatis per fomitem corruptae potest esse peccatum, ut infra dicitur. Et ideo tentatio interior, quae est a carne, est peccatum.

Ad primum ergo dicendum, quod tentatio carnis perhibetur esse peccatum veniale, quod ad mortale se habet ut motus ad terminum vel dispositio ad formam.

Ad secundum dicendum, quod tentatio carnis est materia virtutis qua motui sensualitatis actualiter resistitur; et tunc non habet rationem peccati, et ex hac ratione tentatio quaelibet convenienter est materia gaudendi, in quantum est virtutis materia per dissensum.

Ad tertium dicendum, quod proportio illa est intelligenda caeteris paribus, quod hic non contingit.

ARTICULUS III.

Ad tertium sic proceditur. Et 1. videtur, quod fuerit incompetens rationis processus, qui in litera describitur. Diabolus enim sicut a felicitate, ita a felicitatis loco fuit exclusus: sed paradus in quo positus erat Adam, erat quidam felicitatis locus; non ergo convenienter fuit, quod diabolus illic accedere posset.

2. Praeterea, in primo statu corpus animae

subjiciebatur et non e converso, ut supra dictum est; si ergo diabolus hominem tentavit, non debebat eum visibiliter, sed invisibiliter tentare.

5. Praeterea, res corporales propter hominem factae esse nocivae homini per peccatum coeperunt, ut patet Genesis 2: « Maledicta terra in opere tuo: spinas et tribulos germinabit tibi; » ergo inconveniens fuit, quod diabolus est usus serpente in hominis nocumentum.

4. Praeterea, superbiorum est intendere ad magna: unde Job 41 dicitur: « Omne sublime videt oculus ejus. » Sed vir erat potior muliere; ergo superbiae diaboli competentius fuit virum impetere quam mulierem.

5. Praeterea, memoria praecepti inducit ad implendum: unde in Psalm. 102 dicitur: « Ut memores sint mandatorum ipsius ad faciendum ea: » sed diabolus intendebat mulierem inducere ad transgressionem praecepti; ergo inconvenienter ei de praecepto mentionem fecit.

Respondeo. Dicendum, quod voluntas nocendi est diabolo a seipso, sed potestas est ei a permissione divina: multa enim potest virtute naturae quae non facit, quia non permittitur. Sic ergo in tentatione primorum parentum, ex qua nocumentum hominis intendebat, aliquid fuit quod competebat ejus malevolae voluntati, in quantum a Deo permittebatur: sicut quod mulierem est aggressus, ex qua virum deciperet: aliquid autem est quod competebat divinae prohibitioni, ne tentatio esset nimis violenta; sicut quod per serpentem tentavit: et ex his duobus pensatis totus tentationis processus convenienter invenitur.

Ad primum ergo dicendum, quod paradus terrestris erat locus felicitatis ejusdam, in quantum ad ipsam requirebatur tranquillitas corporalis quae ad diabolum non pertinebat: unde a tali loco non erat necessarium eum arcere.

Ad secundum dicendum, quod diabolus in statu innocentiae nullam potestatem habebat in homine: unde non poterat ejus imaginationem commovere, per quem modum invisibiliter tentat; et sic habuit necesse visibiliter tentare.

Ad tertium dicendum, quod res temporales homini non poterant esse nocivae ante peccatum, nisi per suum consensum; sine quo nec serpens, quo diabolus utebatur, ei nocivus fuisset.

Ad quartum dicendum, quod diabolus cum superbia habet astutiam, ex qua processit ut hominem invaderet ex ea parte ubi posset facilius superare, scilicet parte mulieris.

Ad quintum dicendum, quod diabolus existimabat praeceptum Domini memoriae mulieris firmiter inhaerere; unde ad hoc commemoravit, ut impugnaret.

ARTICULUS IV.

Ad quartum sic proceditur. Et 1. videtur, quod peccatum Adae fuerit ceteris gravius. Quanto enim inest major facultas ad vitandum peccatum, tanto peccatum est gravius: sed Adam ceteris hominibus majorem habuit facultatem vitandi peccatum, tum propter perfectionem scientiae, tum propter integritatem naturae; ergo ejus peccatum fuit ceteris gravius.

2. Praeterea, quantitas poenae designat quantitatem culpae: sed peccatum Adae fuit gravius pu-

nitum ceteris peccatis: quia pro illo peccato mors in omnes pertransiit, ut dicitur Rom. 5; ergo peccatum Adae ceteris gravius fuit.

5. Praeterea, in statu innocentiae Adam venialiter peccare non poterat, quia ipse status Adae ad gravitatem peccati operatur: hic autem status in posteris Adae non fuit; ergo peccatum Adae ceteris gravius fuit.

Sed contra. Pejus est de Dei misericordia desperare quam de ipsa confidere. Adam autem peccans, de spe cogitavit, ut infra dicitur; cum ergo multi alii in desperationem labantur, peccatum Adae gravius non fuit.

Praeterea, quanto major est contemptus in peccato, tanto peccatum est gravius: sed Adam non tantum contempsit, sicut illi qui cum cognovissent Deum, divinum honorem idolis impenderunt; ergo peccatum Adae non fuit ceteris gravius.

Respondeo. Dicendum, quod gravitas peccati ex duobus pensari potest. Primo et principaliter ex ipsa specie actus: et sic peccatum Adae non fuit ceteris gravius, neque quantum ad actum interiorum, neque quantum ad actum exteriorum: quia multa peccata secundum speciem suam sunt graviora peccato quod Adam commisit: nec motus mentis ejus tantum contemptum habuit Dei, sicut plurimum aliorum. Secundo consideratur gravitas peccati ex conditione peccantis: sicut patet, quod in eodem genere peccati plus peccat sciens quam ignorans, sacerdos quam laicus: et per hunc modum peccatum Adae ceteris gravius fuit: quia ipse ceteris peccatoribus in altiori gradu constitutus erat. Sed tamen prima gravitas, cum sit peccato essentialis, praeponderat secundae, quae est quasi accidentalis. Et ideo peccatum Adae secundum quid fuit ceteris gravius, sed non simpliciter.

Ad primum ergo dicendum, quod proportio illa tenet in eodem genere peccati.

Ad secundum dicendum, quod non est propter gravitatem peccati Adae, quod ex ipso mors in omnes pertransiit: quia quodecumque peccatum mortale in statu innocentiae commissum fuisset, idem esset sequutum, propter hoc quod tota natura humana erat in primis parentibus, et per primum peccatum mortale corruptio gratiae facta fuit.

Ad tertium dicendum, quod non ideo dicitur Adam venialiter peccare non potuisse, quia veniale peccatum ab eo commissum, esset mortale: sed quia veniale peccatum committitur praeter hoc, quod mens avertatur a Deo. Non autem poterat contingere in statu innocentiae aliquis defectus animae vel corporis, ante aversionem a Deo.

DISTINCTIO XXII.

Sic diligenter investigandum videtur etc. (*V. edit. nostrae tom. VI, pag. 575.*)

Hic est duplex quaestio. Prima, de peccato parentum primorum. Secunda, de ignorantia.

QUAESTIO I.

Circa primum quaeruntur duo: 1.^o quid fuerit peccatum Adae; 2.^o quis gravius peccaverit, utrum ipse, vel Eva.

ARTICULUS I.

Ad primum sic proceditur. Et 1. videtur, quod primum Adae peccatum non fuerit superbia. In hoc enim praecipue superbisse videtur, quod divinam similitudinem appetiit a diabolo repromissam dicente: « Eritis sicut Dei. » Sed eam non appetiisset, nisi prius consequi credidisset. Aut igitur ibi peccatum superbiae non fuit, si similitudinem imitationis appetiit et credidit: aut peccatum infidelitatis praecessit, si non credidit et appetiit divinae aequalitatis similitudinem.

2. Praeterea, secundum Augustinum, « Amor sui inordinatus, est principium omnis peccati: » talis autem amor est peccatum; ergo primum peccatum Adae fuit amor sui, quod non est superbiae vitium.

3. Praeterea, ex primo peccato hominis, humana natura est infecta et corrupta, ut supra dictum est: hoc autem factum est per inobedientiam, ut patet Rom. 5; ergo inobedientia est primum peccatum.

Sed contra est, quod dicitur Eccl. 10: « Initium omnis peccati superbia. »

Praeterea, in hoc probabile est Adam primo peccasse, quod solet maxime bonis spiritualibus insidiari, quorum habebat copiam: hoc autem est peccatum superbiae, quia, ut Augustinus dicit, « Superbia bonis operibus insidiatur ut pereant; » ergo primum peccatum Adae fuit superbia.

Respondeo. Dicendum, quod peccatum in actu exteriori a voluntate procedit. Unde illud est primum peccatum in homine ex quo voluntas inclinatur ad imperandum exteriorum actum peccati. Sicut si aliquis propter appetitum pecuniae hominem occidat, avaritia homicidium praecedit. Voluntas autem hominis inclinata est ad peccandum ex appetitu excellentiae, quam diabolus repromisit: unde patet, quod primum peccatum hominis fuit superbia.

Ad primum ergo dicendum, quod homo non appetiit aequalitatis similitudinem, sed similitudinem imitationis; tamen ultra hoc quod ei competebat; voluit enim perfectionem scientiae adipisci, ut propria ratione absque superioris lege vel mandato, se et sibi subdita gubernaret. Et hoc est quod Augustinus dicit: « Noloit ut servus teneri praeepto. » Et sic patet, quod non fuit infidelitas primum peccatum, quia non credidit Deo aliquid posse aequari.

Ad secundum dicendum, quod amor sui inordinatus est, secundum quod homo aliquod bonum sibi inordinate appetit. Et ideo amor sui inordinatus non est aliquod speciale peccatum, alia praecedens; sed in se alia includit, et in aliis includitur: secundum enim diversa, quae aliquis sibi inordinate appetit, diversa sunt genera peccatorum.

Ad tertium dicendum, quod inobedientia quandoque est speciale peccatum, cum scilicet aliquis ex praeepti contemptu peccat: quandoque autem sumitur prout est conditio consequens omne peccatum mortale. Peccatum igitur Adae, quantum ad actum exteriorum praecessit interior elatio, quae est superbia: sed quia peccatum quodlibet est caelestium inobedientia mandatorum, ut Ambrosius dicit, ideo peccatum Adae Apostolus inobedientiam appellavit.

ARTICULUS II.

Ad secundum sic proceditur. Et 1. videtur, quod vir gravius peccaverit quam mulier. Status enim personae operatur ad gravitatem culpae, sicut supra

dicitur est: sed Adam est altioris status quam mulier, utpote mulieris caput, et magis spiritali praeditus mente; ergo Adam gravius peccavit quam Eva.

2. Praeterea, quantitas causae, ex effectus quantitate apparet: sed peccatum Aadae in omnes peccatum et mortem traduxit, ut patet Rom. 5: quod de peccato Evae non dicitur; ergo peccatum Aadae fuit gravius quam Evae.

5. Praeterea, peccatum in Spiritum sanctum gravius est peccato quod ex concupiscentia procedit: sed peccatum Aadae in Spiritum sanctum fuisse videtur, qui sub spe veniae peccavit, quod ad praesumptionem pertinet, quae peccati in Spiritum sanctum species ponitur: mulier autem peccavit ex concupiscentia dignitatis et pomi; ergo mulier minus peccavit quam vir.

Sed contra. Poena respondet culpae: mulier autem fuit gravius punita quam vir, ut patet Gen. 3; gravius ergo peccavit mulier quam vir.

Praeterea, mulier ipsa peccavit, et virum ad peccandum induxit, non autem e converso; ergo mulier gravius peccavit quam vir.

Respondeo. Dicendum, quod primum peccatum hominis fuit elatio, ut dictum est; et ex ea viri et mulieris peccata principaliter pensanda sunt. Major autem elatio fuit in muliere quam in viro: quod ex effectu apparet: nam elatio in muliere fecit ut verum esse crederet et possibile, quod serpens promittebat: et ideo dicitur esse seducta. In viro autem hoc fieri non potuit; sed sub quadam conditione ipse appetiit excellentiam repromissam, si possibile foret, et inductus exemplo, et benivolentia uxoris. Unde, simpliciter loquendo, peccatum Evae gravius fuit, et sic peccatum Aadae fuit gravius secundum quid. Aggravatur enim peccatum circumstantibus personam peccantis. Unde patet responsio ad primum.

Ad secundum dicendum, quod non est propter gravitatem peccati Aadae quod totam naturam humanam infecit et corruptit; sed propter hoc quod tota erat in eo. Perfectiori autem modo erat in Adam quam in Eva: quia in Adam erat sicut in principio activo, in Eva sicut in principio materiali: unde infectio humani generis magis attribuitur peccato Aadae quam Evae.

Ad tertium dicendum, quod quamvis Adam sub spe veniae peccaverit, non tamen peccavit in Spiritum sanctum: speravit enim de Dei misericordia cum proposito poenitendi; quod in peccato praesumptionis non est.

QUAESTIO II.

Deinde quaeritur de ignorantia. Et circa hoc quaeruntur duo: 1.^o utrum ignorantia sit peccatum; 2.^o utrum ignorantia vel error in statu innocentiae esse potuerit.

ARTICULUS I.

Ad primum sic proceditur. Et 1. videtur, quod ignorantia non possit esse peccatum. Peccatum enim est dictum vel factum vel concupitum contra legem Dei: sed ignorare nihil horum est; ergo non potest esse peccatum.

2. Praeterea, meritum et demeritum, secundum Augustinum, in voluntate consistunt: sed scire et

ignorare non sunt in voluntate, sed in intellectu; ergo non sunt peccata.

5. Praeterea, peccatum non excusatur per aliud peccatum, sed aggravatur; sed ignorantia excusat; ergo ipsa non est peccatum.

Sed contra. Poena non debetur nisi culpae: et tamen debetur ignorantiae, ut patet Isa. 5: « Propterea captivus ductus est populus meus, quia non habuit scientiam; » ergo ignorantia est culpa.

Praeterea, omittit ea ad quae quis tenetur, est culpa: sed homines tenentur aliqua scire; ergo ignorare ea est peccatum.

Respondeo. Dicendum, quod ignorantia quandoque est peccatum, quandoque excusat a peccato, quandoque vero concomitatur peccatum. Peccatum siquidem est, in quantum sequitur voluntatem; cum scilicet aliquis ea quae scire tenetur, vult nescire, vel non curat scire. Tunc autem excusat peccatum, secundum quod consideratur ut voluntatem praecedens: sic enim involuntarium causat, et per consequens diminuit rationem peccati, vel totaliter excludit peccatum: ratione ejus dicitur excusare a toto, quando scilicet ignorantia est immunis a peccato; ut cum ignorat aliquis quae scire vel non tenetur, vel non potest: tunc enim actus ex tali ignorantia causatus, a peccato totaliter excusatur. Tunc vero ignorantia excusat sequens peccatum in parte, sed non in toto, quando ipsa ignorantia habet aliquid culpae annexum. Tunc vero ignorantia culpam comitatur, quando ex affectu culpae impeditur rationis actus, secundum quod omnis malus dicitur ignorans: et haec ignorantia nec excusat peccatum, nec est per se peccatum, sed est quaedam peccati conditio.

Ad primum ergo dicendum, quod sicut de omissione, ita et de ignorantia est duplex opinio. Quidam enim dicunt, quod peccatum omissionis consistit in actu voluntatis, per quem aliquis non vult facere quod tenetur: et secundum hoc, peccatum ignorantiae est quoddam concupitum, prout scilicet aliquis vult nescire. Alii dicunt, quod ommissio, in solo defectu ejus, ad quod quis tenetur, consistit: quodcumque enim ille defectus in hominis potestate consistit, voluntarius judicatur, quia et ipsius non velle est voluntarium, sicut velle, cum utrumque in voluntate consistat: et secundum hoc, ignorantiae peccatum dicitur, secundum quod praedicto modo est voluntarium; et ita reducitur ad concupitum.

Ad secundum dicendum, quod peccatum omne dicitur esse in voluntate, non sicut in subjecto, sed sicut in primo motore; secundum hoc enim quaelibet potentia animae nata est esse subjectum peccati, secundum quod per imperium a voluntate potest moveri; et ita in intellectu potest esse peccatum, sicut in subjecto.

Ad tertium dicendum, quod ignorantia excusat peccatum, ejus voluntatem praecedit, involuntarium causans: est autem peccatum, in quantum sequitur voluntatem. Si vero sequatur et praecedat, erit peccatum, et excusans peccatum non in toto, sed in parte.

ARTICULUS II.

Ad secundum sic proceditur. Et 1. videtur, quod in statu innocentiae error vel deceptio esse potuerit. Dicit enim Apostolus, 1 ad Tim. 2, quod Adam

non est seductus, sed mulier: haec autem seductio peccatum praecessit: quia secundum Ambrosium, « Omne peccatum est ex errore; » ergo ante peccatum in statu innocentiae fuit seductio et error.

2. Praeterea, supra, dist. 21, dixit Magister, quod mulier ideo serpentem non horruit, quia illam a Deo creatum scivit. Ab eo enim loquendi usum credidit accepisse. hoc autem erat falsum; ergo mulier ante peccatum decepta fuit.

3. Praeterea, homo in statu innocentiae sensibus utebatur, ut patet Gen. 3, ubi dicitur: « Videns igitur mulier lignum etc. »; sed quandoque sensus annunciant rem aliter quam sit, sicut patet quod a remotis, parva videntur etiam magna; ergo ad minus quantum ad hoc deceptio in statu innocentiae potuit esse.

Sed contra est, quod Augustinus dicit in lib. de Libero arbitrio: « Approbare vera pro falsis, non est natura instituti hominis, sed poena damnati. » Hoc autem est errare seu decipi; ergo in statu innocentiae error vel deceptio esse non potuit.

Praeterea, omne malum hominis vel est poenae vel culpae; quorum neutrum in statu innocentiae potuit esse: sed deceptio, seu error, quoddam malum est; ergo in statu innocentiae esse non potuit.

Respondeo. Dicendum, quod differentia est inter nescientiam, ignorantiam et errorem. Nescientia enim simplicem scientiae negationem importat, et hanc nihil prohibet in statu innocentiae fuisse respectu quorundam, sicut non habuit omnem scientiam, de quo infra patebit. Ignorantia vero, proprie loquendo, privationem scientiae importat, quae est cum deest alicui scientia quam debuit, vel saltem potuit habere; et hoc semper est vel poena, vel culpa: unde in statu innocentiae esse non potuit. Error vero dicit assensum rationis in aliquod falsum firmatum, qui si firmatus non fuerit, non dicitur error, secundum quosdam, sed opinio falsa. Dicunt igitur quidam, quod in statu innocentiae assensus rationis non potuit alicui falso applicari cum firmitate, ut sic errare diceretur: potuit autem sine firmitate, ut sic falsum opinaretur. Sed quia qualiscumque applicatio rationis ad falsum, habet rationem inconvenientis et mali, et non solum defectus boni, ideo probabilius dicitur a quibusdam, quod nec error nec falsa opinio in statu innocentiae potuit esse; cum nec in corpore quodecumque inconveniens vel malum esse potuerit antequam homo peccaret, et ita multominus in intellectu.

Ad primum ergo dicendum, quod illa seductio ex inordinato appetitu excellentiae causabatur; sicut et error electionis, ex quo peccatum actuale procedit, consequitur inordinatam affectionem, quae claudit intuitum rationis.

Ad secundum dicendum, quod verbum Magistri non est intelligendum, quod mulier credidisset serpentem usum loquendi naturaliter accepisse, cum scientia rerum naturalium ei non deesset: credidit autem aliqua virtute latente serpentem loqui, quod etiam verum erat; sed non contulit, utrum hoc fieret operatione daemonis mediante.

Ad tertium dicendum, quod ratio illa non cogit deceptionem in statu innocentiae fuisse: nec quantum ad iudicium sensus, qui iudicabat secundum quod recipiebat: nec quantum ad iudicium intellectus, qui causam differentiae inter sensus apparentiam et rei veritatem cognoscebat.

DISTINCTIO XXIII.

Praeterea quaeri solet etc. (V. edit. nostrae tom. VI, pag. 375.)

QUAESTIO UNICA.

Hic quaeruntur quatuor: 1.^o utrum Deus convenienter permisit hominem cadere in peccatum; 2.^o qualiter Adam Deum cognovit in statu innocentiae; 3.^o qualiter alias creaturas; 4.^o qualiter ea quae ad ipsum spectabant.

ARTICULUS I.

Ad primum sic proceditur. Et 1. videtur, quod non convenienter Deus permisit hominem cadere in peccatum. Natura enim humana excellentior est omnibus corporalibus creaturis: sed aliquam corpoream creaturam, scilicet caelestem, ita firmavit, ut in ea malum esse non posset; ergo et hominem taliter debuit instituere, quod omnino peccare non posset.

2. Praeterea, nullus sapiens custos permittit latronem intrare, quem scit esse furaturum vel occisurum: sed Deus praesciebat hominem per diaboli tentationem esse periturum; ergo non convenienter hominem permisit a diabolo tentari.

3. Praeterea, Rom. 1, super illud, « Non solum qui faciunt etc. » dicit Glossa: « Consentire est tacere cum possit redarguere, » et eadem ratione qualitercumque aliter possit impedire. Sed Deus poterat impedire ne Adam peccaret, voluntatem ejus convertendo ad bonum; ergo videtur quod aliquo modo consenserit, peccatum non impediendo: quod est inconveniens: et ita inconvenienter permisit hominem cadere in peccatum.

Sed contra. Sicut creaturae corporales sunt veritabiles per corruptionem et alterationem, ita et spirituales per electionem, quia ex nihilo utraeque sunt: sed non inconvenienter Deus permittit mutari corporales creaturas secundum motus corporales; ergo convenienter permittit mutari spirituales secundum electionem per quam homo incidit in peccatum.

Praeterea, illud quod pertinet ad laudem hominis non debet ei subtrahi: sed ad laudem justi pertinet, quod possit peccare: unde Eccl. 51, dicitur: « Qui potuit transgredi, et non est transgressus: facere mala, et non fecit; » ergo non decuit quod Deus hominem impediret, ne posset peccare.

Respondeo. Dicendum, quod dupliciter potuisset hominis peccatum impediri a Deo. Uno modo ut auferretur peccandi potentia; alio modo ut impediretur peccati actus. Potentia quidem peccandi per naturam carere creatura rationalis non potest, quia ex hoc ipso quod est ex nihilo, ejus potestas potest vergere in defectum: potest tamen per gratiam confirmantem talis potentia totaliter ligari, ne in peccatum ruere possit: quod quidem non debetur naturae institutae, sed naturae ultima perfectione perfectae. Unde et Angelis, quibus erat brevior via statuta ad beatitudinem perveniendi, statim quasi a principio praedieta potentia est ligata; non autem homini quem decebat longior via, propter majorem distantiam a Deo, secundum ordinem naturarum. Peccati autem actum Deus impedire noluit, propter bona quae praevidebat ex peccato illo occasionaliter provenitura.

Ad primum ergo dicendum, quod sicut in corporibus caelestibus non potest esse peccatum naturae, ita nec in creatura rationali; in qua tamen potest esse peccatum secundum electionem, qua corpus caeleste caret.

Ad secundum dicendum, quod non esset contra custodiam sapientiam permittere latroni aditum ad auferendum, si ex hoc multa commoda consequi praevideret: quod est in proposito.

Ad tertium dicendum, quod in verbis illius Glossae quibus dicitur: « Consentire est tacere cum « possis redarguere, » intelligendum est, et debeas: quod in proposito locum non habet: nam ex rationali causa, licet nobis non perfecte nota, peccatum hominis impedire non debuit.

ARTICULUS II.

Ad secundum sic proceditur. Et 1. videtur, quod homo in statu innocentiae Deum per essentiam videret. Videre enim Deum per essentiam, est sine medio videre: sed Adam in statu innocentiae Deum sine medio videbat, ut Magister dicit prima dist. lib. 4; ergo videbat Deum per essentiam.

2. Praeterea, 1 ad Cor. 13, duo modi divinae cognitionis distinguuntur: scilicet, visio fidei, quae est per speculum et aenigma, et visio gloriae, quae est facie ad faciem. Sed Adam non cognoscebat Deum visione fidei, ratione obscuritatis, et quia non ex auditu solo cognoscebat, ut in litera dicitur, cum tamen fides sit ex auditu, Rom. 10; ergo Adam in primo statu videbat Deum facie ad faciem.

3. Praeterea, sicut se habet sensus ad sensibile, ita intellectus ad intelligibile; sed sensus, si non sit impeditus, apprehendit sensibile sibi praesens; cum ergo intellectus hominis in statu innocentiae nullatenus esset impeditus, videtur quod intelligibile ubique praesens, scilicet Deum, per essentiam viderit.

Sed contra est, quod Joan. 1 dicitur: « Deum « nemo vidit unquam » et loquitur de viatore; ergo, cum in statu innocentiae homo esset viator, Deum per essentiam videre non potuit.

Praeterea, esse viatorem et comprehensorem soli Christo convenit: sed Adam in statu innocentiae erat viator; ergo non erat comprehensor: et ita Deum per essentiam non videbat.

Respondeo. Dicendum, quod quidam dixerunt Adam in primo statu Deum per essentiam vidisse; non tamen ita clare sicut in patria videbitur; et ideo non erat beatus. Sed hoc non potest esse; quia distinctio beati a non beato non sufficienter accipitur per hoc, quod est clarius vel minus clare videre; cum talis distinctio etiam inter ipsos beatos inveniatur: quia unus clarius videt alio. Unde per hoc oportet accipere distinctionem praedictam, quod beati Deum per essentiam vident, non autem alii. Unde Adam, qui beatus non erat, Deum per essentiam non videbat. Habebat autem duplicem cognitionem de Deo: unam gratiae per internam allocutionem, sive illustrationem, aliam naturae per creaturas: non quidem ut ex creaturis in cognitionem Dei veniret, sicut nos; sed quia in creaturis Deum considerabat, quem interiori revelatione plenius cognoscebat. Et per hoc patet responsio ad primum; intelligitur enim Adam Deum cognovisse sine medio creaturarum, quod esset cognitionis causa.

Ad secundum dicendum, quod Adam per fidem Deum cognovit, et ex auditu interiori, quamvis non exteriori. Nec in statu illo, propter hoc ponitur ali-

qua obscuritas ex impedimento naturalis luminis, sicut in nobis est, sed ex defectu: quia lumen naturae, vel etiam gratiae, non sufficit ut per ipsum divina essentia videatur.

Ad tertium dicendum, quod oculus corporalis ex sui natura, sufficienter proportionatus est ad visibile corporale: unde, nisi impedimentum interveniat, potest ipsum videre. Sed intellectus humanus ex sua natura non habet sufficientiam ad Deum videndum: unde nisi aliquid naturae superaddatur, quantumcumque natura sit integra et non impedita, Deum per essentiam videre non potest.

ARTICULUS III.

Ad tertium sic proceditur. Et 1. videtur, quod Adam in statu innocentiae non habuit omnium creaturarum scientiam. Inter ceteras enim creaturas Angeli nobiliores sunt. Sed Angelos in statu innocentiae Adam non cognoscebat per essentiam, cum intellectus humanus naturaliter non cognoscat sine phantasmate, ut patet per Philosophum in lib. de Anima; ergo non omnium creaturarum notitiam habuit.

2. Praeterea, non est ejusdem perfectam scientiam habere, et ad perfectionem scientiae moveri: sed Adam in statu innocentiae ad perfectionem scientiae movebatur: aliter enim frustra sibi dati essent sensus: non enim indignisset ut in paradiso positus operando vires naturae experiretur, quod tamen Augustinus ponit super Genes. ad literam; ergo Adam in statu innocentiae perfectam cognitionem de creaturis non habuit.

3. Praeterea, inter creaturas quaedam erant futurae, quaedam vero in sola cognitione existentes; hujusmodi autem cognoscere solius Dei est; ergo Adam in statu innocentiae non habuit omnium creaturarum notitiam.

Sed contra est, quod Augustinus dicit, 13 de Civitate Dei, quod in statu innocentiae nihil erat, quod bona voluntas in statu illo non adipisceretur. Sed bona voluntate, Adam poterat velle in statu innocentiae omnium rerum scientiam habere; ergo omnium rerum scientiam habuit.

Praeterea, sicut corpus hominis proficit in debitam quantitatem, ita anima in debitam scientiam; sed Adam in principio suae conditionis habuit perfectam corporis quantitatem; ergo pari ratione habuit perfectam rerum scientiam.

Respondeo. Dicendum, quod in creaturis quaedam sunt, quae ab homine cognosci possunt naturali ratione. Quaedam vero ad quae naturalis ratio non sufficit. Horum ergo prima Adam in statu innocentiae omnia perfecte cognovit: oportet enim, ut ante illud quod est in potentia, praecedat quod est in actu, cujus operatione alia reduci possunt de potentia in actum. Hujusmodi autem cognoscibilia existunt in potentia a principio in nobis, quantum ad prima principia, quae sunt quasi semina aliorum, naturali ratione cognoscibilia: unde oportuit, quod omnis hujusmodi cognitio esset in actu in primo parente, ut per ejus doctrinam posterius perfectionem scientiae adipiscerentur. Ea vero ad quae ratio naturalis non sufficit, per revelationem ab homine cognosci possunt: unde in his Deus est doctor, non homo: et ideo horum omnium, non habuit Adam notitiam, sed aliorum, quae Deus ei voluit revelare.

Ad primum ergo dicendum, quod Adam in statu innocentiae Angelos cognoscebat cognitione quia est, non autem cognitione quid est: neque naturali ratione, per quam scientiam rerum ex phantasmatis sumimus, quae in Angelorum essentiam sufficienter ducere non possunt: neque etiam ex revelatione, quae semper fit servato naturali modo cognitionis: unde secundum Dionysium, divinus radius pervenit ad nos, circumvelatus sensibilibus velaminibus.

Ad secundum dicendum, quod Adam debuit habere omnia quae sunt de integritate naturae humanae. Unde, sicut habuit vim augmentativam, quamvis corpus auctum non fuerit; ita habuit vires sensitivas, quamvis ex sensibilibus scientiam non adquisierit: sed potius scientiam habitam sensibilibus experiebatur; et hoc erat ei iudicandum, cum per hoc novo modo res cognosceret.

Ad tertium dicendum, quod huiusmodi scire non poterat nisi per revelationem, ut dictum est.

ARTICULUS IV.

Ad quartum sic proceditur. Et 1. videtur, quod Adam in statu innocentiae, non habuit suiipsius perfectam notitiam. Homo enim habet animam rationalem, quam non cognoscebat, eadem ratione, qua nec Angelos; ergo non perfectam habebat suiipsius notitiam.

2. Praeterea, bruta animalia naturaliter cognoscunt eis expedientia vel nociva; sicut patet de agno, qui sequitur matrem, et fugit lupum: sed homo non habuit notitiam sibi expedientium et nocivorum, ut videtur ex hoc quod Dei praeceptum contempsit, diaboli secutus consilium; ergo non habuit perfectam sui notitiam.

3. Praeterea, nihil magis ad hominem pertinebat, quam ea quae circa ipsum futura erant: horum autem notitiam non habuit, ut in litera dicitur; ergo non habuit perfectam notitiam sui, et ad se pertinentium.

Sed contra. In statu innocentiae nihil fuit vitiosum: sed non cognoscere se ipsum sonat in vitium; ergo homo se ipsum cognovit.

Praeterea, aliarum creaturarum homo notitiam accipit, ratione cuiusdam propinquitatis quam habent ad ipsum, utpote propter hominem facta: sed homo est sibi ipsi propinquissimus; ergo sui ipsius notitiam praecepue habuit.

Respondeo. Dicendum, quod sicut in seminibus naturalis cognitionis, praexistunt in potentia alia cognoscibilia naturalia, ita et in ipsa natura hominis, et eorum quae ad ipsam spectant. Et ideo sicut aliarum rerum naturalium, ita sui ipsius et ad se spectantium primus homo notitiam habuit duplicem: et contemplativam et practicam. Contemplativam quidem, ut in se ipso et in rebus aliis Dei sapientiam miraretur; practicam vero, ut sciret qualiter seipso et rebus aliis uti deberet.

Ad primum ergo dicendum, quod ea quae in homine sunt, sufficienter ducere possunt ad cognoscendum essentiam animae humanae, non autem ad cognoscendum essentiam Angeli: formam enim oportet esse materiae proportionatam; et ideo non est simile.

Ad secundum dicendum, quod Adam in statu innocentiae, scivit sibi expedire, ut Dei praeceptum sequeretur, et daemonis consilium evitaret; sed mo-

tus elationis menti ejus superveniens, electionem rationis pervertit.

Ad tertium dicendum, quod futura contingentia, non sunt naturali cognitione cognoscibilia: et ideo non oportuit, quod ea quae circa ipsum futura erant, homo cognosceret naturali ratione; neque etiam erat decens ut sibi revelaretur, ne poena doloris sive tristitiae de malis futuris, culpam praecederet.

DISTINCTIO XXIV.

Nunc diligenter investigari oportet etc. (V. edit. nostrae tom. VI, pag. 590.)

QUAESTIO UNICA.

Hic quaeruntur quatuor: 1.^o utrum homo in statu innocentiae potuerit sine gratia stare; 2.^o de libero arbitrio, quid sit; 3.^o quid sit sensualitas; 4.^o utrum ratio superior et inferior, sint eadem potentia vel diversae.

ARTICULUS I.

Ad primum sic proceditur. Et 1. videtur, quod homo in statu innocentiae, sine gratia non potuerit stare. Hoc enim quod homo per se potest habere, non habet necesse ab alio petere: sed homo in statu innocentiae necesse habebat a Deo petere perseverantiam, sicut et alia Dei dona; ergo non poterat per seipsum stare, sine auxilio gratiae.

2. Praeterea, declinare a malo, est una pars iustitiae: sed vera iustitia sine gratia haberi non potest; ergo Adam sine gratia non poterat peccatum vitare.

3. Praeterea, praemium non debetur nisi merito: sed victoriae debetur praemium, ut patet Apoc. 2, et 3; ergo vincere peccatum est meritorium. Si ergo Adam in statu innocentiae per seipsum stare potuit, tentationem daemonis superando, videtur quod potuerit per seipsum proficere ad meritum vitae: quod est falsum, ut ostenditur in litera; ergo et primum, scilicet quod potuerit sine gratia stare.

Sed contra. Nulla poena in statu innocentiae fuit: sed necessitas peccandi est quaedam poena; ergo non fuit in statu innocentiae; et sic homo poterat non peccare, et per consequens stare, sine gratia.

Praeterea, homo in statu innocentiae, non erat minus perfectus secundum animam, quam secundum corpus: sed absque novae gratiae additione poterat corpus ejus a corruptione praeservari; ergo multo fortius anima a peccato.

Respondeo. Dicendum, quod circa statum primi hominis, est duplex opinio. Quidam enim dicunt, eum in gratia fuisse conditum; alii vero absque gratia: de quo infra quaeretur dist. 29. Supposito tamen quod absque gratia creatus fuerit, ut locum habeat quaestio praesens, dicendum est quod in statu illo Adam habuit omne illud, ad quod facultas naturae se potest extendere; non autem illud, quod naturae facultatem excedit. Opera autem meritoria excedunt facultatem naturae, cum per ea homo adipiscatur supernaturalem beatitudinem: sed non cadere in peccatum, non excedit facultatem naturae, quia peccatum contra naturam recte insti-

tutum est. Et ideo homo in statu innocentiae, si gratiam non habuit, mereri non potuit; potuit tamen abstinere a peccato.

Ad primum ergo dicendum, quod Deus non solum est gratiae dator, sed etiam naturae auctor et gubernator. Unde ad eum recurrere debemus non solum in his quae pertinent ad facultatem gratiae, sed etiam in his quae pertinent ad facultatem naturae.

Ad secundum dicendum, quod licet habitus iustitiae infusae, non possit esse sine gratia, nihil tamen prohibet aliquem iustitiae actum fieri ab aliquo gratiam non habente; et sic declinare a malo poterat primus homo, quamvis gratiam non haberet.

Ad tertium dicendum, quod abstinere a peccato, non semper est vincere peccatum, sed tunc quando aliquis a peccato impugnatur. Nec tamen ipsa peccati victoria est meritoria, nisi quando gratia informatur, sicut est et de ceteris actibus virtutum.

ARTICULUS II.

Ad secundum sic proceditur. Et 1. videtur, quod liberum arbitrium inconvenienter in litera describatur. Facultas enim habitus esse videtur, cuius est, potentiam facere facilem ad agendum: sed liberum arbitrium non est habitus, cum sit aliorum habituum subjectum; ergo liberum arbitrium inconvenienter dicitur esse facultas.

2. Praeterea, bruta ab hominibus sola voluntate et ratione discernuntur: sed discernuntur per liberum arbitrium; ergo liberum arbitrium est ratio vel voluntas; non ergo aliquid rationis vel voluntatis.

3. Praeterea, ratio et voluntas sunt diversae potentiae, etiam genere distinctae; cum ratio pertineat ad cognitivas, voluntas autem ad appetitivas: sed liberum arbitrium est unum aliquid; ergo non debet per voluntatem vel rationem definiri.

4. Praeterea, liberum arbitrium affinius est bono quam malo, cum nihil appetatur nisi sub ratione boni: sed potest per se ipsum in malum consentire; ergo et absque gratia bonum eligere: et ita inconvenienter dicitur, quod libero arbitrio bonum eligitur, gratia assistente.

5. Praeterea, Anselmus dicit quod posse peccare, neque est libertas, neque est pars libertatis: sed illud quod non est de essentia rei, non debet in ejus definitione poni; ergo electio peccati non debet poni in definitione liberi arbitrii.

Respondeo. Dicendum, quod quaedam res sunt quae operantur absque iudicio, sicut inanimata. Quaedam vero cum iudicio, sed non libero, imo ex ipsa natura determinato ad unum, sicut bruta quae ex naturali aestimatione unum appetunt, et alium refugiunt. Homo vero, et iudicium de suis operibus habet, et libertatem in iudicando: quae quidem libertas provenit, cum ex ratione quae ad opposita viam habet, tum ex voluntate quae non est determinata ad unum. Unde homo est dominus sui iudicii, quia potest sic vel aliter iudicare de agendis: et pro tanto dicitur esse liberi arbitrii. Sic ergo convenienter liberum arbitrium notificatur in litera per hoc, quod ponitur radix libertatis, in hoc quod dicitur rationis, voluntatis autem et libertatis effectus in hoc, quod dicitur quae bonum eligitur etc.

Ad primum ergo dicendum, quod duplex est facultas. Una per inclinationem; et sic habitus fa-

cilitatem in potentia operatur, inclinans eam ad alterum oppositorum. Alia est per remotionem impedimenti: sicut homini dicitur esse facile illud, respectu cuius non impeditur: et sic dicitur liberum arbitrium facultas, in quantum homo non impeditur quin possit hoc facere vel non facere.

Ad secundum dicendum, quod liberum arbitrium non est aliquid per essentiam diversum a ratione et voluntate; imo est per essentiam ipsa voluntas, ut Damascenus dicit in 3 lib. Differt tamen a voluntate, ratione. Nam voluntas dicitur, secundum quod aliquid absolute appetit; liberum vero arbitrium secundum quod eligit aliquid propter rationem: hic enim actus est proprius liberi arbitrii. Unde quod dicit, quod libertas est facultas rationis et voluntatis etc., intelligendum est intransitivae, id est ratio et voluntas, faciles ad efficiendum. Similiter cum dicitur, quod est liberum de voluntate iudicium, voluntas ponitur ibi pro volito.

Ad tertium dicendum, quod quamvis ratio et voluntas, absolute loquendo, sint potentiae diversae, tamen habent ordinis unitatem, in quantum ratio dirigit voluntatem: unde et liberum arbitrium convenienter per rationem et voluntatem describitur: quia electio non completur sine iudicio rationis et appetitu voluntatis. Ipsa tamen electio, appetitus quidam est rei consiliatae, ut dicitur in 3 Ethicorum. Unde liberum arbitrium essentialiter est voluntas et non ratio.

Ad quartum dicendum, quod bonum naturae commensuratum, potest eligere liberum arbitrium absque gratia, non autem bonum meritorium, quod facultatem naturae excedit; et de hoc hic loquimur.

Ad quintum dicendum, quod posse peccare non est pars libertatis, absolute consideratae: consequitur tamen liberum arbitrium humanum, quod hic definitur, in quantum est ex nobis, vel in quantum est per peccatum corruptum.

ARTICULUS III.

Ad tertium sic proceditur. Et 1. videtur, quod inconvenienter sensualitas in litera describatur. Sicut enim sensualitas est inferior viribus intellectivis, ita est superior anima vegetabili; ergo inconvenienter in ejus descriptione dicitur, quod est vis animae inferior.

2. Praeterea, in litera habetur quod quicquid est nobis commune et belluis, ad sensualitatem pertinet: plures autem potentiae sunt nobis belluisque communes: ergo sensualitas non debet dici quaedam vis, sed quaedam vires.

3. Praeterea, ex sensualitate procedit appetitus rerum ad corpus pertinentium: hic autem appetitus non solum ad concupiscibilem, sed etiam ad irascibilem pertinet; ergo sensualitas utramque includit; ergo non est una vis, sed plures.

4. Praeterea, inter omnes vires sensualitatis, primum locum tenet sensus exterior; ergo motus ejus ab aliqua vi animae oritur; inconvenienter ergo dicitur, quod motus qui intenditur in exteriores sensus, sit ex sensualitate.

5. Praeterea, appetitus est principium motus in animalibus, ut patet in 3 de Anima. Non ergo debet dici quod appetitus et motus communiter ab una potentia animae orientur; sed quod motus orientur ab appetitu.

Respondeo, dicendum, quod sicut electio liberi

arbitrii in hominibus ex rationis deliberatione procedit, ita motus appetitivae partis in brutis consurgit ex apprehensione sensus: et hac ratione ipsa vis appetitiva sensitivae partis sensualitas nominatur. Tendit autem haec appetitiva in duo: quorum unum est bonum particulare, conveniens ad actum sentiendi, sicut odor suavis est conveniens ad odorandum et color pulcher ad videndum. Aliud est bonum particulare conveniens ad conservationem animalis, sicut cibus potus et alia huiusmodi. Et ideo quantum ad primum, dicitur quod ex sensualitate motus est qui intenditur in exteriores sensus. Quantum vero ad secundum dicitur quod ex sensualitate est appetitus rerum ad corpus pertinentium.

Ad primum ergo dicendum, quod quia corpus est inferior pars hominis: ideo vires omnes animae quae a corpore dependent, inferiores dicuntur, quamvis sint aliquibus superiores; illae vero quae in sola anima consistunt, superiores dicuntur, quamvis sint aliquibus inferiores.

Ad secundum dicendum, quod aliqua potentia pertinet ad sensualitatem dupliciter. Uno modo essentialiter: et sic sola vis appetitiva sensibilis ad sensualitatem pertinet. Alio modo ordinaliter: et sic omnes vires sensitivae partis ad sensualitatem, nam apprehensivae inferiores ordinantur ad appetitum sensibilem, ut moventes ipsum; sed motivae exequentes motum, ut imperatae ab appetitu.

Ad tertium dicendum, quod licet appetitus sensibilis in duas vires distinguatur, scilicet in irascibilem et concupiscibilem, tamen potest dici una vis secundum genus.

Ad quartum dicendum, quod quamvis sensus exterior praecedat, quantum ad omnes actus, omnes vires sensitivae partis; tamen ad hoc quod sensus exterior operetur in actu, aliquid confert sensibilis appetitus: requiritur enim ad videndum in actu intentio quae conjungat visum visibili: quae quidem intentio aliquando est sensualitatis, quamvis etiam possit esse naturalis appetitus.

Ad quintum dicendum, quod motus non accipitur hic pro motu corporis exteriori, sed pro interiori appetitu.

ARTICULUS IV.

Ad quartum sic proceditur. Et 1. videtur quod ratio superior et inferior sint diversae potentiae. Augustinus enim dicit 12 de Trin.: « Imago Trinitatis est in superiori parte rationis, non autem in inferiori. » Imago autem assignatur in anima secundum potentias; ergo ratio superior et inferior non sunt una potentia.

2. Praeterea, ratio superior et inferior per officia distinguuntur, ut in litera dicitur: nomine autem officii actus designatur; cum ergo diversitate actuum potentiarum distinctio innotescat, videtur quod ratio superior et inferior sint diversae potentiae.

3. Praeterea, Philosophus dicit in 7 Ethicorum: « Ad ea quae sunt genere altera, oportet determinari alteras potentias animae: » sed ratio superior intendit aeternis, inferior vero corporalibus; cum ergo aeternum et temporale sint diversa genera, videtur quod ratio superior et inferior sint diversae potentiae.

Sed contra est, quod Augustinus dicit 12 de Trin.: « Cum disserimus de natura mentis humanae,

« de una quadam re disserimus, nec eam in haec « duo, scilicet inferiorem rationem et superiorem, « nisi per officia geminamus; » sed diversae potentiae sunt diversae res; ergo ratio superior et inferior non sunt diversae potentiae.

Praeterea, plus requiritur ad distinctionem potentiarum quam habituum; sed idem habitus charitatis est respectu aeterni et temporalis, scilicet Dei et proximi; ergo multo fortius eadem potentia rationis esse potest de temporalibus et aeternis.

Respondeo. Dicendum, quod differentia potentiarum accipitur secundum diversitatem objectorum: non quidam materialem, quae consistit in diversitate rerum, sed formalem quae attenditur secundum diversitatem propriae rationis objecti. Proprium autem objectum intellectus est ens universale; unde et ad omnia se extendit intellectiva cognitio. Unde nulla rerum diversitas sufficit ad diversitatem intellectivarum potentiarum, sed solummodo diversitas rationum; prout anima intellectiva ratione diversa circa eandem rem vel diversas operatur: sic enim voluntas ab intellectu distinguitur et intellectus possibilis ab agente. Ratio autem superior et inferior differunt secundum respectum ad diversas res: nam ratio superior intendit aeternis contemplandis vel consolendis, inferior vero temporalibus considerandis et disponendis. Unde patet quod ratio superior et inferior non sunt diversae potentiae.

Ad primum ergo dicendum, quod imago Trinitatis in anima non attenditur secundum potentias absolute, sed per comparisonem ad objecta.

Ad secundum dicendum, quod non quaelibet diversitas actuum sufficit ad diversitatem potentiarum, sed talis diversitas quae in idem principium reduci, non possit: sicut facere intelligibilia in actu et recipere ea non possunt in idem principium reduci, cum unum sit ens in actu, aliud ens in potentia: et inde est quod intellectus agens et possibilis sunt diversae potentiae. Hoc autem non est de actibus inferioris et superioris rationis: ejusdem enim esse potest principium ad superiora et ad inferiora converti; et propter hoc ratio non sequitur.

Ad tertium dicendum, quod in verbis praedictis Philosophi referenda est diversitas generis non ad genus rei, sed ad genus objecti.

Illud quoque praetermittendum non est etc. (V. edit. nostrae tom. VI, pag. 591.)

QUAESTIO UNICA.

Hic quaeruntur quatuor: 1.^o utrum in sensualitate possit esse peccatum; 2.^o utrum in ratione; 3.^o utrum in ratione inferiori possit esse peccatum mortale; 4.^o utrum peccatum veniale possit fieri mortale.

ARTICULUS I.

Ad primum sic proceditur. Et 1. videtur quod in sensualitate non possit esse peccatum. Sensualitas enim nobis et pecoribus communis est. Si ergo in sensualitate potest esse peccatum, poterit esse in brutis, quod est inconveniens.

2. Praeterea, secundum Augustinum, nullus peccat in eo quod vitare non potest; sed motus sensualitatis vitare non possumus, quin insurgant; ergo in eis peccare non possumus.

3. Praeterea, peccatum est dictum vel factum

vel concupitum contra legem Dei: sed sensualitas non percipit legem Dei, quia tantum circa sensibilia versatur; ergo in sensualitate non potest esse peccatum.

Sed contra est quod dicitur Rom. 8: « Quod odi malum illud facio, » Glossa, « scilicet concupiscere »; sed concupiscere est motus sensualitatis; ergo motus sensualitatis potest esse peccatum.

Praeterea, Augustinus dicit, quod nonnullum vitium est, cum caro adversus spiritum concupiscit: hoc autem est per actum sensualitatis; ergo actus sensualitatis potest esse peccatum.

Respondeo. Dicendum, quod cum voluntas sit qua peccatur et recte vivitur, ut Augustinus dicit; in omni actu qui voluntatis imperio subicitur, potest esse peccatum et meritum. Voluntatis autem imperio subduntur non solum actus exteriores membrorum, sed etiam interiores motus sensibilis appetitus; licet non eodem modo. Nam membra exteriora directe obediunt imperio voluntatis, nisi sit impedimentum; sed appetitus interior indirecte; inquantum scilicet per voluntatem proponi possunt sensualitati aliqua imaginabilia quae sensualitatis motum excitent vel impediunt. Et ideo in actibus exteriorum membrorum potest esse peccatum mortale, sicut et in actu voluntatis: sed in motu sensualitatis non potest esse peccatum mortale, sed veniale tantum; quia non perfecte voluntati obedit.

Ad primum ergo dicendum, quod sensualitas in homine aliquo modo participat rationem, inquantum rationali voluntati nata est obedire, non autem in brutis. Et ideo non est simile.

Ad secundum dicendum, quod licet omnes motus sensualitatis non sint in potestate nostra, cum hic vel ille in potestate nostra existat, non enim possumus facere quod nullus sensualitatis motus inordinatus in nobis surgat, possumus tamen hunc vel illum impedire, quia non potest continentis mentis intentio contra omnia invigilare.

Ad tertium dicendum, quod licet sensualitas legem Dei non advertat, obedit tamen aliquo modo rationi ad quam pervenit legis praeceptum; et pro tanto in sensualitate potest esse peccatum.

ARTICULUS II.

Ad secundum sic proceditur. Et 1. videtur, quod in ratione non possit esse peccatum. Ratio enim cognitiva potentia est: peccatum vero in appetitu non in cognitione consistit. Non enim cognoscere mala est peccatum, sed appetere. Ergo in ratione non potest esse peccatum.

2. Praeterea, regula in quolibet artificio debet esse absque errore; alias nulla certitudo haberi poterit: sed ratio est regula humanorum actuum, quia secundum rationem rectam actus virtutum in medio collocantur, ut patet in secundo Ethicorum; ergo in ratione non potest esse peccatum.

3. Praeterea, cum peccatum in actu consistat, alicui potentiae peccatum attribui non potest, nisi secundum exigentiam sui actus: actus autem rationis, non est delectatio in delectationibus carnis; ergo ratione talis delectationis non debet poni peccatum in ratione.

Sed contra. Ratio se habet ad opposita: sed per rationem recte operamur; ergo per eam etiam possumus peccare: et sic in ratione potest esse peccatum.

Praeterea, contingit peccare non solum ex passione, sed etiam ex electione; electio autem aliquo modo ad rationem pertinet: ergo in ratione potest esse peccatum.

Respondeo. Dicendum, quod ratio dupliciter accipitur. Quandoque prout a voluntate distinguitur, sicut cognitiva ab appetitiva; quandoque vero prout voluntatem includit: sicut dicitur in tertio de Anima, quod voluntas in ratione est: sic enim rationem, totam rationalem animae partem nominamus. Utroque autem modo in ratione potest esse peccatum. Primo quidem, secundum quod errat in iudicando de his, quorum veritatem scire tenetur; ut patet in haeticis. Secundo vero prout errat in eligendo: qui quidem error communiter est et voluntatis quae inordinate appetit, et rationis quae in electione aliquo modo errat, prout ejus iudicium in particulari eligibili obscuratur; et per hunc modum dicitur esse peccatum in ratione.

Ad primum ergo dicendum, quod ratio hic accipitur, prout includit appetitivam et cognitivam: et tamen in ipsa etiam cognitiva potest esse peccatum, ut dictum est.

Ad secundum dicendum, quod prima regula infallibilis in humanis actibus, sunt prima principia juris naturalis, quae ad synderesim pertinent, ex quibus ratio conferendo procedit. Unde in ratione potest esse peccatum, non autem in synderesi.

Ad tertium dicendum, quod delectatio circa carnis delectabilia rationi attribuitur in quantum ratio considerat ipsas delectandi rationes. Et ideo talis delectatio inferiori rationi attribuitur, cujus objectum sunt temporalia; non autem superiori, cuius objectum sunt aeterna. Sed quia superior ratio de inferioribus iudicat, ideo ultimum imperium actus rationi superiori attribuitur. Unde quando consentitur in actum, dicitur esse peccatum in ratione superiori: quando vero in sola delectatione cum aliqua deliberatione peccatum consistit, dicitur esse peccatum in ratione inferiori: sed primum desiderium talis delectationis ad sensualitatem pertinet.

ARTICULUS III.

Ad tertium sic proceditur. Et 1. videtur, quod in inferiori ratione non possit esse peccatum mortale. Ad inferiorem enim rationem pertinet peccatum, quod sola delectatione agitur: sed huiusmodi peccatum non potest fieri mortale, neque per moram temporis, cum talis circumstantia non mutet genus, et sic in infinitum aggravare non possit; nec iterum per consensum, quia consensus in veniale non potest esse mortale peccatum; ergo in ratione inferiori non potest esse peccatum mortale.

2. Praeterea, sensualitati et inferiori rationi commune est per delectationem peccare; si ergo in inferiori ratione potest esse peccatum mortale, pari ratione poterit esse in sensualitate; quod falsum est; ergo et primum.

3. Praeterea, superior ratio propinquius percipit praeceptum divinae legis quam ratio inferior, sicut et ratio inferior propinquius quam sensualitas; si ergo in sensualitate non est peccatum nisi veniale; in ratione vero inferiori, quandoque mortale, quandoque veniale; sequitur quod in ratione superiori semper sit mortale: quod tamen est falsum; ergo

et hoc quod in ratione inferiori possit esse peccatum mortale.

Sed contra. Ratio inferior comparatur mulieri, sicut et superior viro. Sed in conjugio primorum parentum, sicut vir, ita et mulier poterat peccare mortaliter; ergo et in figurali conjugio non solum ratio superior, sed etiam inferior mortaliter peccare potest.

Praeterea, nullus damnatur nisi pro peccato mortali: sed homo damnabitur pro peccato, quo voluit in illicitis delectari, licet non voluerit operari, ut Augustinus dicit 12 de Trin., et habetur in littera; ergo consensus in delectationem est peccatum mortale: et ita in ratione inferiori, cui attribuitur, potest esse peccatum mortale.

Respondeo. Dicendum, quod peccatum veniale deficit a perfectione peccati mortalis. Qui quidem defectus potest contingere ex duobus. Uno modo ex parte ipsius actus peccati, quod non contrariatur legi, sed est praeter legem; sicut patet de verbo otioso. Alio modo ex parte peccantis; quando scilicet deliberatio ad peccandum non intervenit: unde subiti motus, etiam circa ea quae sunt peccata mortalia ex genere, sunt venialia peccata. Quaelibet autem vis in nobis circa proprium objectum habet aliquem motum subitum; sed circa objecta inferiorum virium, quas regit, non habet motum subitum, sed solum iudicium cum deliberatione. Quia igitur sensualitas deliberationem non habet, sed solum motum subitum, ideo non potest motus ejus esse peccatum mortale in quacumque materia. Ratio vero inferior cum sit circa temporalia, communicat cum objecto in sensualitate; et ideo circa delectabilia sensualitatis potest habere motum subitum, qui semper est veniale peccatum. Circa eadem etiam, ex ipsa natura rationis, potest habere motum deliberatum: qui circa materiam mortalis peccati, erit mortalis; circa materiam venialis erit venialis. Ratio vero superior circa aeterna potest habere motum subitum, qui potest esse peccatum veniale, ut aliquis motus infidelitatis. Et eadem ratio est de motibus contra voluntatem, quos patiuntur sanctissimi viri etiam in his quae ad fidem pertinent. Sed circa temporalia non habet motum subitum, sed tantum consensus deliberatum: qui erit venialis in his quae ex suo genere sunt venialia, mortalis in his quae ex suo genere sunt mortalia.

Ad primum ergo dicendum, quod delectatio quae sequitur rem delectatam, est ejusdem generis cum ipsa re cogitata; quamvis delectatio cogitationem sequens ad aliud genus pertineat. Et ideo cum delectatio surgit de mortali peccato cogitato in ratione inferiori; si hoc sit per ejus motum subitum, est peccatum veniale; si autem per consensus deliberatum, erit peccatum mortale: et tunc dicitur morosa delectatio, non ex mora temporis, sed ex superveniente consensu. Nec obstat, quod consensus ille est in veniale; quia delectatio ante consensus erat mortalis ex genere, sed venialis per accidens, scilicet ex defectu deliberationis.

Ad secundum dicendum, quod ratio inferior circa delectabilia carnis, non habet tantum motum subitum, sicut sensualitas; et ideo non est simile.

Ad tertium dicendum, quod defectus deliberationis aufert rationem peccati mortalis, et in his quae sunt mortalia ex genere: non autem deliberatio apponit rationem mortalis peccati his quae ex suo genere sunt venialia: et ideo quamvis in sen-

sualitate quae semper deliberatione caret, non sit nisi veniale peccatum, non sequitur quod in superiori ratione, quae semper circa temporalia deliberationem habet, non sit nisi peccatum mortale.

ARTICULUS IV.

Ad quartum sic proceditur. Et 1. videtur, quod peccatum veniale possit fieri mortale. In littera enim dicitur, quod quaedam sunt quae ubi saepius fiant, hominem damnant, ut verbum otiosum et hujusmodi: sed damnatio est effectus peccati mortalis; ergo peccatum veniale, si frequenter iteretur, fiet mortale.

2. Praeterea, delectatio ante consensus est venialis, sed post consensus fit mortalis, ut dictum est; ergo veniale potest fieri mortale.

3. Praeterea, dispositio fit habitus: sed veniale est dispositio ad mortale; ergo veniale potest fieri mortale.

Sed contra. Ea quae in infinitum distant, non possunt invicem permutari: sed mortale et veniale sunt hujusmodi, ut ex eorum poenis apparet; ergo veniale non potest fieri mortale.

Praeterea, plus distant veniale et mortale quam duo mortalia ad invicem: sed unum mortale non transit in aliud, sicut homicidium nunquam fit adulterium; ergo veniale nunquam potest fieri mortale.

Respondeo. Dicendum, quod cum mortale sit majus peccatum quam veniale, dupliciter potest intelligi quod veniale fiat mortale. Uno modo per viam permutationis, sicut ex aqua fit aer. Alio modo per viam additionis, sicut ex guttis fit torrens. Primum potest intelligi dupliciter. Uno modo quod actus, qui prius fuit veniale peccatum, idem numero postmodum fiat mortale: quod esse non potest: quia idem actus numero ex quo transit, resumere non potest. Alio modo ita quod actus qui, aliquo modo factus, esset venialis, tali modo fiat quod sit mortalis: et hoc possibile est: nam verbum otiosum, quod est veniale ex genere, si tantum complaceat quod in eo finis vitae constituatur, et propter ipsum homo praeceptum transgredi proponeret, esset peccatum mortale. Similiter per additionem dupliciter potest intelligi quod veniale fiat mortale. Uno modo directe; vel quod multa venialia perveniant ad quantitatem unius mortalis. Sed hoc est impossibile: quia in veniali, quantumcumque iteretur, non est aversio a bono incommutabili, neque conversio ad bonum commutabile, ut ad finem; quod est in quolibet mortali. Alio modo indirecte: ita scilicet quod multa venialia disponunt ad mortale: et hoc est possibile. Nam, quando quis multoties venialiter peccans, ab his quae Dei sunt impeditur, crescente temporalis boni complacentia, facilius in peccatum mortale ruit. Sic ergo patet ex dictis, quod illud quod est veniale, proprie loquendo, nunquam fit mortale.

Ad primum ergo dicendum, quod verbum quod in littera tangitur, intelligitur per modum dispositionis, secundum quod multa venialia disponendo, quandoque ad mortale perducuntur.

Ad secundum dicendum, quod ille motus delectationis, qui fuit venialis, nunquam fiet mortalis: sed consensus superveniens, qui est mortale peccatum, est alius actus, cum diversarum potentiarum non sit unus numero actus. Unde non sequitur

quod actus, qui prius fuit venialis, postea sit mortalis.

Ad tertium dicendum, quod dispositio aliquando est ejusdem generis de eo, ad quod disponit, sola imperfectione differens; et talis dispositio, fit id ad quod disponit; sicut dispositio ad scientiam fit scientia. Aliquando vero dispositio est alterius generis, sicut calor est dispositio ad formam substantialem ignis; et talis dispositio nunquam fit id ad quod disponit. Et est tertia dispositio, quae nunquam fit idem cum habitu, neque in eodem; sicut bonitas imaginationis quae disponit ad honestatem intellectus: et ita est de veniali et mortali.

DISTINCTIO XXV.

Jam vero ad propositum redeamus etc. (V. edit. nostrae tom. VI, pag. 609.)

QUAESTIO UNICA.

Hic quaeruntur quatuor: 1.^o utrum liberum arbitrium sit in Deo; 2.^o utrum sit in homine; 3.^o utrum libertas arbitrii aliquam servitutem patiat; 4.^o utrum eadem libertas sit, qua potest in bonum et in malum.

ARTICULUS I.

Ad primum sic proceditur. Et 1. videtur, quod in Deo non sit liberum arbitrium. Actus enim liberi arbitrii est electio: sed hoc Deo competere non potest: quia nec consilium, quod praesupponit, cum consilium sit dubitantis et ignorantis; ergo liberum arbitrium non est in Deo.

2. Praeterea, liberum arbitrium, ut in littera dicitur, non refertur ad praesens vel praeteritum, sed solum ad contingentia vel futura. In Deo autem nihil est contingens vel futurum: sed omnia sunt ei praesentia; ergo liberum arbitrium in Deo non est.

3. Praeterea, illa quae sunt determinata ad unum, nec habent liberum arbitrium, ut patet in rebus inanimatis: sed Dei virtus est determinata ad bonum, quia malitia esse non potest in eo; ergo in Deo non est liberum arbitrium.

Sed contra est quod dicitur 1 Corinth. 12: « Haec omnia operatur unus atque idem Spiritus, » dividens singulis, prout vult. » Glossa: « Pro voluntatis libero arbitrio; » ergo Deus habet liberum arbitrium.

Praeterea, Damascenus dicit quod homo est ad imaginem et similitudinem Dei, in quantum habet intellectum et liberum arbitrium: hoc autem non esset si Deus liberum arbitrium non haberet; ergo in Deo est liberum arbitrium.

Respondeo. Dicendum, quod, sicut supra dictum est, ad hoc quod aliquis sit liberi arbitrii, duo requiruntur: scilicet quod habeat iudicium de suis actibus, et quod huiusmodi iudicium sit in potestate iudicantis, non quasi ei ab alio praefixum. Haec autem duo, in Deo inveniuntur. Primum quidem ex hoc quod est intellectus: ex hoc enim sequitur, quod iudicet de his quae agit. Secundum autem ex conditione suae naturae, quae ab aliis non dependet. Unde iudicium de agendis non est praefixum ei ab aliquo superiori agente, sicut est in brutis; neque sequitur per modum necessitatis propriam naturam. Quicquid enim Deus circa crea-

turas vult, tale est, ut absque eo nihilominus perfectio divinae honestatis salvetur. Unde patet, quod non vult illud ex necessitate naturae, sed ex arbitrii libertate. Et sic concedimus, quod Deus habeat liberum arbitrium.

Ad primum ergo dicendum, quod cum liberum arbitrium cognitionem praesupponat; sicut intellectus Dei differt a nostro in hoc quod est absque omni ignorantia et dubitatione, ita et liberum arbitrium in Deo habet electionem absque inquisitione consilii praecedente, quod non est in nobis.

Ad secundum dicendum, quod licet Deo sint omnia praesentia, nec secundum quod est in ipso, sit aliquid contingens; tamen ipsae res quae divinae electioni subjacent, in seipsis sunt futurae et contingentes.

Ad tertium dicendum, quod licet virtus operativa divina, sit determinata ad bonum, quod contingit ex perfectione divinae naturae, quae deficere non potest; non tamen est determinata ad unum; quia Deus bene operando potest hoc vel illud facere vel non facere.

ARTICULUS II.

Ad secundum sic proceditur. Et 1. videtur, quod homo non sit liberi arbitrii. Quicumque enim est liberi arbitrii, est dominus suorum actuum. Homo autem non est huiusmodi, ut videtur per id quod dicitur Jeremiae 10: « Non est in homine via ejus; » nec viri est, ut ambulet et dirigat gressus suos; » ergo homo non est liberi arbitrii.

2. Praeterea, id quod potest ab altero immutari non est liberum; quia liberum est quod causa sui est. Sed arbitrium hominis potest immutari a Deo. Unde dicitur Proverb. 20: « Cor regis in manu Domini, et quocumque voluerit vertet illud; » ergo homo non est liberi arbitrii.

3. Praeterea, sicut bruta, quaedam naturaliter appetunt, ita et homines; scilicet beatitudinem: sed bruta non sunt liberi arbitrii; ergo nec homines.

Sed contra est quod dicitur Ecl. 15: « Deus ab initio constituit hominem, et reliquit eum in manu consilii sui. » Glossa, « in potestate liberi arbitrii. »

Praeterea, nullus debet puniri vel praemiari nisi pro eo quod est in ejus potestate. Sed homo punitur et praemiatur pro suis actibus; ergo ipse est dominus suorum actuum; et ita est liberi arbitrii.

Respondeo. Dicendum, quod in quolibet cognoscente est actio, et iudicium de actione. Actio autem illa quae subditur agentis iudicio, est quodammodo in potestate agentis, ut scilicet possit eam agere vel non agere: sed iudicium non est in potestate iudicantis, nisi in habentibus intellectum et rationem, qua super suum iudicium reflectatur, ipsum discutendo. Actio ergo brutorum, aliquantulum est in eorum potestate, in quantum possunt quiescere vel moveri: sed iudicium de agendo, nullatenus in eorum potestate existit, sed ex aestimatione naturali procedit. Unde brutum non est liberi arbitrii; et multo minus creaturae cognitione carentes: omnis autem rationalis creatura habet iudicium de actione, et per consequens arbitrii libertatem.

Ad primum ergo dicendum, secundum Gregorium Nyssenum, quod verbum illud Prophetiae est referendum ad executionem electionis, quae non est in potestate nostra; non autem ad electionem

ipsam, quae in nostra potestate existit, licet meritoria esse non possit nisi per gratiae donum.

Ad secundum dicendum, quod operatio, quam Deus in liberum arbitrium operatur ipsum vertendo et mutando, non praedicit ejus libertati; quia Deus operatur in libero arbitrio secundum modum ejus, sicut et in qualibet alia re.

Ad tertium dicendum, quod jam ex dictis patet, quod non est simile de brutis et homine.

ARTICULUS III.

Ad tertium sic proceditur. Et 1. videtur, quod liberum arbitrium servitutem non compatiatur. Servus enim, secundum Philosophum, 8 Ethicorum, est sicut quoddam instrumentum animatum; instrumentum autem non est a se, sed ab alio movetur; quod est contra liberi arbitrii rationem; ergo liberum arbitrium servitutem habere non potest.

2. Praeterea, omnis necessitas, vel est naturalis inclinationis, vel coactionis: sed necessitas peccandi in libero arbitrio non potest esse naturalis inclinationis, quia peccatum contra naturam est; neque coactionis, quia liberum arbitrium cogi non potest; ergo in libero arbitrio peccandi necessitas esse non potest, et ita nec servitus peccati.

5. Praeterea, omne illud quod patitur contrarii commisionem, potest augeri et minui, et per consequens totaliter tolli. Si ergo liberum arbitrium aliquam servitutis commisionem patitur, poterit augeri et minui, et quandoque totaliter tolli: quod est impossibile: non ergo liberum arbitrium compatiatur aliquam servitutem.

Sed contra est quod dicitur Joan. 8: « Qui facit peccatum, servus est peccati. »

Praeterea, liberatio proprie est a servitute: sed homo per Dei gratiam liberatur a peccato, ut patet Rom. 6; ergo homo potest esse servus peccati; et sic idem quod prius.

Respondeo. Dicendum, quod liberum secundum Philosophum est quod est causa sui. Unde per oppositum accipi potest, illud esse servum, quod sui causa esse non potest. Quod quidem contingit dupliciter. Uno modo, quando ita aliquid ab exteriori ducitur, quod nullo modo ipsum agat, sed solummodo agatur: tunc enim violentiam patitur: violentia enim est, cujus principium est extra, nil conferente vim passo. Et quantum ad hoc est servitus coactionis, quam liberum arbitrium non compatiatur. Alio modo, quando aliquid ita ab exteriori ducitur, quod ipsum non solum agitur, sed agit: et hanc servitutem liberum arbitrium compatiatur. Quod quidem potest accipi vel respectu interioris electionis: et sic est servitus justitiae vel culpae, secundum quod aliquis ex habitu virtutis vel vitii inclinatur ad similem electionem: vel respectu exterioris executionis: et sic est servitus miseriae, in quantum per poenalitatem praesentes, exterior executio impeditur.

Ad primum ergo dicendum, quod ratio illa procedit de servitute coactionis, per quam aliquid ita agitur, quod nullo modo agit.

Ad secundum dicendum, quod circa necessitatem peccandi, communiter ab omnibus dicitur, quod liberum arbitrium peccato subjectum, non potest se a peccato eximere, neque etiam potest peccatum veniale cavere in generali, quamvis possit in speciali hoc vel illud cavere; quod similiter

quidam dicunt de peccato mortali; quamvis aliis videatur, quod per liberum arbitrium homo possit cavere ne incidat in novum peccatum. Sed prima opinio magis consonat dictis Augustini. Quocumque autem modo dicatur, necessitas peccandi, licet non proveniat ex naturali inclinatione, provenit tamen ex inclinatione fomitis vel vitiosi habitus.

Ad tertium dicendum, quod libertas a coactione non patitur aliquam permissionem; unde nec augetur, nec minuitur, nec totaliter tollitur: sed libertas a peccato, vel a miseria, quibus contrariae servitutes libero arbitrio inesse possunt, augetur, et minuuntur, et totaliter tolluntur.

ARTICULUS IV.

Ad quartum sic proceditur. Et 1. videtur, quod non sit eadem libertas qua quis est liber ad bonum et malum. Posse enim peccare, ut Anselmus dicit, neque est libertas arbitrii, neque pars libertatis: sed posse facere bonum pertinet ad arbitrii libertatem; ergo non est eadem libertas in bonum et in malum.

2. Praeterea, libertas ad bonum est per justitiam, libertas ad malum est per peccatum: justitia autem et peccatum non sunt idem; ergo nec libertas praedicta.

5. Praeterea, plus differt bonum et malum, quam diversi status in malo: sed secundum diversos status accipiuntur diversae libertates, ut in littera patet; ergo multo fortius aliqua libertas est ad bonum et ad malum.

Sed contra. Potentia rationalis eadem est oppositorum: sed libertas est conditio rationalis potestatis; ergo eadem est ad bonum et ad malum.

Praeterea, sicut liberum arbitrium habet ex parte voluntatis libertatem, ita habet ex parte rationis scientiam, sive discretionem: sed eadem est scientia boni et mali; ergo pari ratione et eadem libertas respectu utriusque.

Respondeo. Dicendum, quod sicut jam ex dictis patet, liberum arbitrium habet quamdam libertatem, quae sequitur naturam potentiae, per quam est liberum a coactione; et haec libertas se extendit ad bonum et ad malum. Habet vero aliam libertatem ex habitu ipsam perficiente; quia habitus justitiae facit libertatem ad bonum, habitus autem culpae libertatem ad malum. Eadem autem potentia est boni et mali, sed non idem habitus: justitia enim se habet ad bonum tantum, sed culpa tantum ad malum. Et ideo, loquendo de prima libertate, eadem est respectu utriusque, non autem loquendo de secunda.

Ad primum ergo dicendum, quod posse peccare, non est de necessitate liberi arbitrii in quacunque natura, vel in quocunque statu; et secundum hoc intelligendum est dictum Anselmi. Pertinet tamen ad arbitrii libertatem in aliqua natura, et in aliquo statu: et quantum ad hoc, libertas ad malum pertinet ad potentiae libertatem, quae est una respectu boni et mali.

Ad secundum dicendum, quod objectio illa procedit de libertate quae est ex habitu.

Ad tertium dicendum, quod secundum diversos status, liberum arbitrium diversis habitibus perficitur secundum quos diversae libertates distinguuntur. Nam ante peccatum perficiebatur originali justitia; post peccatum ante reparationem justitia

naturali; post reparationem vero, justitia gratuita; sed in statu gloriae justitia consummata. Tamen in omnibus his statibus libertas quae est ex natura potentiae, eadem manet.

DISTINCTIO XXVI.

Haec est gratia operans et cooperans etc. (V. edit. nostrae tom. VI, pag. 617.)

QUAESTIO UNICA.

Hic quaeruntur quatuor: 1.^o de gratiae necessitate; 2.^o de ejus quidditate; 3.^o de ejus subjecto; 4.^o de ejus divisione.

ARTICULUS I.

Ad primum sic proceditur. Et 1. videtur, quod non sit necessarium ponere gratiam in homine. Homo enim est ceteris animalibus nobilior. Sed in aliis animalibus non requiritur aliquid superaddi eorum naturalibus; ergo nec homo super sua naturalia gratia indiget.

2. Praeterea, idem est aliquem esse alicui gratum et ei acceptum: sed per hoc quod aliquis dicitur alicui acceptus, nihil ponitur in acceptato, sed in acceptante; ergo gratia nihil ponit in homine, qui dicitur Deo gratus, sed solum in Deo.

3. Praeterea, sicut anima est vita corporis, ita Deus est vita animae. Sed anima est vita corporis nullo mediante; ergo non est necessarium, ad hoc quod Deus sit vita animae, quod sit ibi aliqua gratia media.

Sed contra. Illud quo homo proficit ad recte operandum, est homini maxime necessarium: sed gratia est hujusmodi, ut patet 1 Cor. 15: « Abundantius illis omnibus laboravi, non autem ego, sed gratia Dei mecum: » gratia ergo homini est necessaria.

Praeterea, hoc quo homo consequitur finem ultimum, est ei maxime necessarium. Sed gratia est hujusmodi, ut patet Rom. 6: « Gratia Dei vita aeterna; » ergo gratia est homini necessaria.

Respondeo. Dicendum, quod nomen gratiae, quamdam acceptationem designat. Deus autem, quamvis omnes creaturas acceptet, quantum ad aliquod bonum, tamen specialiter acceptat sanctos ad fruendum bono, quod ipse Deus est: et illi, quos sic acceptat, simpliciter ei grati dicuntur. Plena autem Deitatis fruitio omnem naturam creatam excedit. Unde ad hoc quod aliquis ad tantum bonum reddatur idoneus, requiritur, quod ei super naturam addatur aliquod speciale donum: et hoc est quod gratiam nominamus. Et sic patet, quae est necessitas ponendi gratiam.

Ad primum ergo dicendum, quod inter ceteras excellentias, quibus homo irrationabilibus praeminet creaturis, ista est praecipua, quod est capax supernaturalis boni. Unde hoc ad ejus perfectionem pertinet, quod gratia indiget, per quam ad praedictum bonum reddatur idoneus.

Ad secundum dicendum, quod ipsa divina acceptatio facit cointelligi, sicut suum effectum, aliquid, per quod fit homo idoneus ad hoc, ad quod acceptatur.

Ad tertium dicendum, quod anima vivificat cor-
S. Th. Opera omnia. V. 22.

pus formaliter, Deus autem effective: et ideo non est simile.

ARTICULUS II.

Ad secundum sic proceditur. Et 1. videtur, quod gratia sit idem quod virtus. Gratia enim quoddam accidens est, cum sit quidam motor animae, ut Glossa dicit super Psalm. 105: « Ut exhilaret faciem in oleo. » Non autem potest reduci ad aliquod genus quam ad qualitatem, nec ad aliam qualitatis speciem quam ad primam, in qua virtus et scientia continentur. Gratia autem non est scientia, cum magis ad affectum pertineat quam ad intellectum; ergo gratia est virtus.

2. Praeterea, per gratiam liberum arbitrium hominis praeparatur ut bonum velit, et adjuvatur ne frustra velit. Hoc autem facit per charitatem et alias virtutes; ergo gratia non est aliud a virtutibus.

3. Praeterea, ejusdem secundum idem, non sunt diversae formae. Opus autem meritorium, in quantum hujusmodi, est formatum per charitatem et gratiam; ergo charitas est idem quod gratia.

Sed contra est, quod Augustinus dicit, in libro de Correctione et gratia, quod gratia praeventit fidem et charitatem. Nulla autem virtus est prior fide et charitate; ergo gratia non est virtus.

Praeterea, Spiritus sanctus datur nobis in gratiae dono: sed datio Spiritus sancti praecedat charitatem sicut causa effectum; quia, ut dicit Rom. 5: « Charitas Dei diffusa est in cordibus nostris per Spiritum sanctum, qui datus est nobis; » ergo gratia praecedat charitatem: et sic idem quod prius.

Respondeo. Dicendum, quod secundum quosdam, gratia et virtus sunt idem per essentiam, sed differunt ratione: nam virtus dicitur prout est recti operis principium, gratia autem secundum quod facit hominem Deo acceptum. Hoc autem patet esse falsum, si de qualibet virtute intelligatur: tum quia essent tot gratiae quot virtutes in homine uno, tum quia aliquae virtutes absque gratia esse possunt. Si autem hoc specialiter pro aliqua virtute dicatur, scilicet charitate, probabilior erit opinio. Nam charitas sine gratia esse non potest. Sed cum charitas quamdam inclinationem appetitus in bonum supernaturale importet, quae quidem inclinatio non proportionatur ad esse naturae; oportet quod aliquod spirituale esse praecintelligatur in anima ante charitatem, per quod homo fit divinitatis particeps. Sic enim appetitus ejus poterit per charitatem tendere in divina, et per alias virtutes ea quae Dei sunt operari. Unde, sicut esse naturale praecedat inclinationem naturalis appetitus, ex viribus naturalibus, ita gratia charitatem, et alias virtutes.

Ad primum ergo dicendum, quod gratia reduciatur ad primam speciem qualitatis. Nec tamen oportet, quod sit scientia vel virtus: cum non perficiat immediate ad actum potentiae affectivae vel cognitivae, sed ad esse spirituale, quod philosophi non cognoverunt: unde ab eis hujusmodi accidens est praetermissum.

Ad secundum dicendum, quod illi effectus conveniunt gratiae primo et principaliter, sed virtutibus secundo et mediate (1); nam gratia non est immediatum actus principium, sed spiritualiter essendi.

Ad tertium dicendum, quod nihil prohibet eisdem esse plures formas ordinatas. Unde et actus

(1) Al. immediate.

meritorius informatur, et virtute eliciente actum, quantum ad hoc, quod ad finem proximum ordinatur: et per prudentiam, quantum ad hoc, quod debitis circumstantiis vestitur: et charitate, quantum ad ultimum finem ordinatur: et gratia, quantum ad hoc, quod redditur Deo acceptum.

ARTICULUS III.

Ad tertium sic proceditur. Et 1. videtur, quod gratia non sit in essentia animae sicut in subjecto. Quaecumque enim perfectio est in aliqua potentia animae, perficit ad actum illius potentiae; sed gratia non perficit ad esse naturale, quod est actus essentiae animae; anima enim per suam essentiam est forma corporis; ergo gratia non est in essentia animae sicut in subjecto.

2. Praeterea, opposita nata sunt fieri circa idem. Sed culpa, quae opponitur gratiae, non est in essentia animae sicut in subjecto, sed in potentia; ergo nec gratia.

3. Praeterea, gratuita praesupponunt naturalia. Sed potentiae naturaliter inhaerent subjecto animae; ergo gratia est in substantia animae mediante potentia: et sic immediatum subjectum gratiae non est essentia animae, sed potentia.

Sed contra. Gratia importat acceptionem a Deo: sed primo acceptatur anima a Deo quam ejus opera, ut patet per illud quod dicitur Gen. 4: « Respexit Deus ad Abel, et ad munera ejus; » ergo gratia per prius est in ipsa substantia animae, quam in potentiis, quibus ad operationes ordinatur.

Praeterea, quanto aliquid est prius et Deo propinquius, tanto per prius donis divinis repletur: sed essentia animae est prior et Deo propinquior quam potentia, quae a Deo causatur, essentia animae mediante; ergo gratia quae est principium divinorum donorum, est in essentia animae sicut in subjecto.

Respondeo. Dicendum, quod supposito, gratiam et virtutem per essentiam differre, ut dictum est; oportet dicere, quod gratia non est in potentia animae sicut in subjecto, sed in essentia. Cum enim potentia sit proximum principium operandi, omnis perfectio potentiae immediate ordinatur ad opus. Id autem quo ad bene operandum perficimur, virtus est; oportet ergo, si gratia non est virtus, quod non sit in potentia animae, sicut in subjecto, sed in essentia. Sic enim perfectiones perfectibilibus proportionaliter respondebunt. Nam sicut essentia animae est principium esse naturalis et ab ea fluunt potentiae quae sunt actum naturalium principia; ita gratia, quae est in essentia animae, est principium esse spiritualis, et ab ea fluunt virtutes in potentiis, quae sunt proxima principia actuum meritoriorum.

Ad primum ergo dicendum, quod licet gratia non sit principium esse naturalis, est tamen principium esse spiritualis, per quod naturale perficitur.

Ad secundum dicendum, quod culpa, quae ex actu causatur, est, sicut in proximo subjecto, in potentia animae, quae est proximum actus principium. Culpa autem originalis quae ex infectione carnis contrahitur, est sicut in proximo subjecto in essentia animae, per quam anima corpori unitur ut forma. Et similiter habitus virtutum ex actibus acquisitarum, vel ad actus proxime ordinarum, subiecta sunt potentiae: sed illius perfectionis quae de super venit, et ad actum immediate non ordinatur,

scilicet gratiae, essentia animae subjectum proprium debet esse.

Ad tertium dicendum, quod gratuita praesupponunt naturalia, si proportionaliter accipiantur, ut fiat comparatio actuum ad actuum principia, id est virtutum ad potentias; et principiorum essendi, ad primum essendi principium: et ita comparatur gratia ad essentiam animae.

ARTICULUS IV.

Ad quartum sic proceditur. Et 1. videtur, quod gratia inconvenienter per operantem et cooperantem distinguatur. Eadem enim gratia praeparat voluntatem ad bene volendum, et ad efficaciter implendum. Primum autem horum pertinet ad gratiam operantem, secundum ad gratiam cooperantem; ergo eadem est in nobis gratia operans et cooperans; et sic inconvenienter gratia per haec duo distinguitur.

2. Praeterea, nulla forma, quae non est subsistens, habet operationem sine communicantia sui subjecti. Quod enim per se non est, per se agere non potest; sed gratia non est forma subsistens, cum sit accidens; ergo non operatur per se, sine communicantia subjecti, et sic gratia nunquam est operans tantum, sed cooperans.

3. Praeterea, gratia principaliter se habet in actu meritorio, ut ex litera patet: sed cooperans non est principale agens, sed secundarium; ergo gratia cooperans non debet dici.

4. Praeterea, Augustinus dicit in libro de Natura et gratia, quod gratia praevenit ut pie vivamus, et obsequamur, ut semper cum illo vivamus, et nunc praevenit ut vocemur, et tunc subsequitur ut glorificemur, et gratia praeveniens pertinet ad statum viae, subsequens vero ad statum gloriae; sed status isti sunt omnino disparati; ergo praeveniens et subsequens, non debet in eadem definitionem venire, et sic nec gratia operans et cooperans, quae idem videntur esse cum praedictis.

Respondeo. Dicendum, quod gratia dupliciter accipitur. Uno modo secundum quod est quoddam donum Dei in nobis. Alio modo, secundum quod significat divinam voluntatem, vel operationem, quae circa nos gratis operatur. Utroque autem modo convenienter, per operantem et cooperantem dividitur. Sed oportet, si primo modo gratia accipitur, quod sumatur operari et cooperari formaliter: et secundum hoc dicitur gratia operans, prout ea informatur homo ad hoc, quod sit justus: cooperans vero secundum quod inclinatur ad juste agendum, quasi primum principium: et tunc patet quod eadem numero est gratia operans et cooperans, sicut idem numero calor est quo ignis est calidus et quo calefacit. Si autem accipitur gratia secundo modo, oportet quod sumatur operari et cooperari effective, ut dicatur gloria operans secundum quod Deus in nobis operatur bonum propositum voluntatis, quo primo ei adhaeremus: gratia vero cooperans secundum quod operatur in nobis omnia consequentia, scilicet efficaciam et perseverantiam in merendo: et sic etiam gratia operans et cooperans est eadem ex parte operantis, et non ex parte operatorum.

Ad primum ergo dicendum, quod quamvis gratia operans et cooperans non differant per essentiam, secundum aliquem modum accipiendi, diffe-

runt tamen ratione: et hoc sufficit ad hoc quod convenienter distingui possint.

Ad secundum dicendum, quod gratia non potest per se operari effective; potest tamen formaliter, sicut enim albedo facit album, ita gratia facit justum; et secundum hoc, gratia dicitur operans, quia in hoc nullo modo operatur ipsum subjectum; operatur autem quantum ad actum secundum, qui est operatio; et secundum hoc gratia dicitur cooperans.

Ad tertium dicendum, quod gratia, quamvis sit principalior in agendo quam liberum arbitrium, si ad eandem actionem referantur, potest tamen principalitas attribui libero arbitrio ratione alterius actionis ad quam perficitur, sed per gratiam alterius rationis. Vel dicendum, quod liberum arbitrium perficitur ad bene volendum per gratiam operantem; hoc autem est principale respectu executionis. Unde gratia ad eam perficiens merito cooperans dicitur.

Ad quartum dicendum, quod distinctiones gratiae operantis et cooperantis, omnes sunt praevenientis et subsequenteris: sed illa distinctio, quam objectio tangit, est proprie praevenientis et subsequenteris, non autem cooperantis et operantis, eo quod in prima salvatur ratio posterioris, et ita potest pertinere ad gratiam subsequenterem. Praemium autem in quantum huiusmodi, non habet rationem operationis, sed magis receptionis; et ita non proprie pertinet ad gratiam cooperantem. Communiter tamen in eandem divisionem incidere possunt, quae ad statum viae et patriae pertinent, cum haec ad illa ordinentur.

DISTINCTIO XXVII.

Si vero quaeritur quomodo illa gratia etc. (*V. edit. nostrae tom. VI, pag. 628.*)

QUAESTIO UNICA.

Hic quaeruntur quatuor: 1.^o utrum virtus sit actus, vel habitus; 2.^o de definitione virtutis in litera posita; 3.^o utrum per actus virtutum aliquis possit mereri vitam aeternam ex condigno; 4.^o utrum per actum alicujus virtutis possit mereri justificationem.

ARTICULUS I.

Ad primum sic proceditur. Et 1. videtur, quod virtus sit habitus, vel actus (1). Sicut enim habetur in litera ex Augustino, bonus usus liberi arbitrii est virtus; sed usus liberi arbitrii est actus; ergo virtus est actus.

2. Praeterea, virtutes inter maxima bona computantur: habitus autem non sunt maxima bona, sed actus, quia actus sunt habitibus posteriores; ergo virtutes non sunt habitus, sed actus.

3. Praeterea, vitium virtuti opponitur, cum mutuo se expellant. Sed vitium est in genere actus, ipsi enim actus peccata sunt; cum ergo opposita sint in eodem genere, videtur, etiam quod virtutes sint actus.

Sed contra. Virtutes manent in dormientibus, cum non nisi per peccatum perdantur: non autem sunt in eis actus virtuosus, ad quos electio requiritur; ergo virtutes non sunt actus.

Praeterea, nihil est causa suiipsius; sed virtus est causa boni actus. Nam virtus est quae bonum

(1) *Lege non sit habitus, sed actus.*

facit habentem, et opus ejus reddit bonum; ergo virtus non est ipse actus bonus.

Respondeo. Dicendum, quod virtus nominat potentiae complementum. Est enim ultimum potentiae, ut dicitur in princ. lib. Caeli et mundi; potentia autem non significat ipsum actum, sed ejus principium; unde nec virtus essentialiter est actus, sed ejus principium. Indiget enim actus meritorius in nobis duplici principio. Uno naturali, quod secundum actum ministret; et hoc est potentia. Alio vero indiget naturalibus superaddito, quo actus rectificentur et formentur: ipsa enim potentia rationalis se habet ad diversa; ideoque indiget aliqua forma, per quam determinate inclinetur ad debitam et rectam actionem prompte et delectabiliter faciendam; et haec forma est habitus virtutis.

Ad primum ergo dicendum, quod Augustinus bonum usum liberi arbitrii virtutem nominat, non essentialiter, sed materialiter, secundum quod virtus dicitur, in quo virtus manifestatur.

Ad secundum dicendum, quod virtutes inter maxima bona computantur, non quia sunt simpliciter optima; sed secundum genus; prout in infimo genere bonorum numerantur ea quae non sunt necessaria ad recte vivendum, bona scilicet exteriora; in medio vero quae sunt necessaria, sed non sufficienter, quia se habent et ad bonum et ad malum, scilicet potentia: in supremo vero ea quae sunt necessaria et sufficientia, utpote determinata ad bonum; et haec sunt tam habitus quam actus.

Ad tertium dicendum, quod actus peccati directe contrariatur actui virtutis; habitus vero vitiosus habitui virtutis, et se per modum contrarietati expellunt: sed quod actus peccati habitum virtutis expellat, hoc non est per directam contrarietatem, sed in quantum separat a Deo, qui est causa conservans virtutem; sicut corpus opacum expellit lumen ab aere, in quantum interpositione sua impedit radiorum solis influxum.

ARTICULUS II.

Ad secundum sic proceditur. Et 1. videtur, quod inconvenienter virtus in litera describatur. Idem enim non potest poni in diversis generibus sibi non subalternis: sed virtus ponitur in genere quantitatis; distinguitur enim quantitas virtutis contra quantitatem molis; ergo inconvenienter ponitur in genere qualitatis.

2. Praeterea, sicut albedo non est alba, ita videtur bonitas non esse bona: sed virtus est bonitas quaedam virtuosus, quia bonum facit habentem, secundum Philosophum; ergo inconvenienter dicitur qualitas bona.

3. Praeterea, mens est suprema pars animae in qua est Dei imago, ut Augustinus dicit in libro de Trinitate: sed quaedam virtutes sunt, quae non sunt in suprema parte animae, sed in inferioribus partibus, ut de temperantia et fortitudine Philosophus dicit in libro Ethicorum. Ergo inconvenienter dicitur quod virtus est bona qualitas mentis.

4. Praeterea, illud quod est proprium alicujus virtutis, non debet poni in definitione communis virtutis; sed rectitudo videtur proprie ad justitiam pertinere; ergo inconvenienter ponitur in communi definitione virtutis, cum dicitur, quae recte vivitur.

5. Praeterea, quicumque de aliquo superbit, eo male utitur: sed de virtutibus multi superbiunt, quia Augustinus dicit in regula: « Superbia etiam

« bonis operibus insidiatur etc. »; ergo falsum est quod nullus virtutibus male utatur.

6. Praeterea, Augustinus dicit: « Qui creavit te sine te, non justificabit te sine te: » sed justificatio non est nisi per virtutem; ergo Deus virtutes non facit sine nobis.

7. Praeterea, gratia non est virtus, ut supra dictum est; sed haec definitio convenit gratiae; ergo inconvenienter datur de virtute.

Respondeo. Dicendum, quod definitio ista sufficienter continet omnia quae sunt necessaria ad cognitionem virtutis. Continet enim causam formalem per hoc, quod tangit genus ipsius, cum dicitur, quod est qualitas mentis. Vel dicendum, quod duplex est virtus. Quaedam perfecta, quae ducit ad veram felicitatem, et haec est virtus gratuita. Quaedam imperfecta, quae non inducit ad felicitatem veram, quae dicitur virtus politica, seu acquisita. Haec autem non pertinet ad theologum, sed ad philosophum moralem: prima pertinet ad theologum, et ideo definit eam Augustinus ut gratuitam, et non politicam. Et quia scire arbitramur unumquodque, cum causas cognoscimus, ideo describit eam per quatuor causas: scilicet causam formalem, cum dicit, « qualitas. » Continet etiam causam materialem ipsius secundum duo: scilicet quantum ad ipsius subjectum virtutis, quod est mens; et quantum ad habitudinem ipsius ad subjectum, in hoc quod dicitur, quod est bona qualitas mentis; virtus enim est quae bonum facit habentem. Continet etiam causam finalem proximam simpliciter, quantum ad duo: scilicet quantum ad ipsum actum virtutis, qui est recte operari, in hoc quod dicitur, qua recte vivitur: et quantum ad habitudinem ad proprium actum, in hoc quod dicitur, qua nullus utitur male: ita enim ordinatur ad bonum actum, quod mali actus principium esse non potest: cuius contrarium est de potentia. Continet etiam causam efficientem in hoc quod dicit « quam Deus in nobis etc. »

Ad primum ergo dicendum, quod virtus secundum essentiam suam est in genere qualitatis: sed dicitur quantitas virtutis secundum quamdam similitudinem, prout virtus est divisibilis secundum objecta: divisio enim est propria quantitatis.

Ad secundum dicendum, quod in formis transcendentibus, hoc est speciale, quod circa omnia abstracta ponuntur. Quicquid enim intellectu concipitur, accipitur sub ratione entis: unde et ipsa essentia vel bonitas intelligitur ut ens quoddam, et per consequens ut unum et bonum, quae convertuntur cum ente: et sic essentia dicitur ens, ex hoc ipso quod ea aliquid bonum est.

Ad tertium dicendum, quod omnis virtus est in aliqua potentia, quae vel est mens per essentiam, vel per participationem. Irascibilis autem et concupiscibilis, in quantum rationi obediunt, participant aliquid mentis.

Ad quartum dicendum, quod rectitudo constituta in rebus exterioribus, quae in iudicium veniunt, est propria iustitia: sed rectitudo actus, secundum quod regulatur ratione, est communis omnibus virtutibus.

Ad quintum dicendum, quod virtute nullus male utitur, cum ipsa non sit principium mali usus: quia ex hoc ipso quod est usus a virtute procedens, malus esse non potest. Superbientes autem de virtute, ea male utuntur quasi visus (1) objecto.

(1) *Al.* usus.

Ad sextum dicendum, quod virtutem infusam, de qua definitio datur, Deus in nobis operatur sine nobis efficientibus, non tamen sine nobis consentientibus.

Ad septimum dicendum, quod gratia non est immediatum principium boni operis, quod designatur in hoc, quod dicitur « qua recte vivitur: » nam vita hic sumitur pro actu vitae. Unde per istam particulam, virtus a gratia distinguitur.

ARTICULUS III.

Ad tertium sic proceditur. Et 1. videtur, quod non possumus per actum virtutum gloriam mereri ex condigno. Dicit enim Glossa, Rom. 6, super illud « gratia Dei vita aeterna. » « Ut intelligeremus « Deum ad aeternam vitam, pro sua miseratione nos « perducere, non meritis nostris »; ergo et sic non possumus per merita nostra ad gloriam pervenire.

2. Praeterea, meritum condignum aequatur mercedi: sed actus virtutum, quos nunc agimus, non aequantur in valore praemio vitae aeternae, ut patet Rom. 8, ubi dicitur: « Existimo quod non sunt condignae passionibus huius temporis ad futuram gloriam, quae revelabitur in nobis; » ergo per actus virtutum non meremur ex condigno vitam aeternam.

3. Praeterea, servus qui se totum et sua totaliter domino debet nihil apud eum potest mereri: sed hoc modo nos debemus nos et nostra Deo; ergo nihil apud eum mereri possumus; et sic per actus virtutum gloriam non meremur.

Sed contra est quod dicitur secundae ad Timoth. 4: « Reposita est mihi corona iustitiae, » Glossa: « Videtur quod vitam aeternam tanquam « debitam reddet cuilibet fidei, quia promeruit eam « per fidem; » ergo per virtutum opera aliquis vitam aeternam meretur ex condigno.

Praeterea, sicut se habet culpa ad poenam, ita opus virtutis ad gloriam. Sed culpa ex condigno poenam aeternam meretur; ergo et actus virtutis ex condigno vitam aeternam meretur.

Respondeo. Dicendum, quod in opere virtutis duo possumus considerare: scilicet illud quod est ex parte liberi arbitrii, et id quod est ex parte gratiae. Quantum ad illud quod est ex parte liberi arbitrii, merita nostra non sunt condigna illius gloriae: sed quantum ad illud, quod est ex parte gratiae, sic sunt condigna. Unde et ipse Spiritus sanctus, qui in gratia nobis datur, et in nobis per gratiam operatur, dicitur esse pignus hereditatis nostrae, ut patet ad Eph. 1. Unde etiam Glossa dicit Rom. 6, quod merita quibus vita redditur per gratiam in nobis facta sunt.

Ad primum ergo dicendum, quod gratia datur nobis ex sola Dei miseratione: et ideo salus aeterna non meritis nostris, in quantum nostra sunt, ascribitur; sed divinae miserationi, ex qua est gratia merendi quae merendi efficaciam praebet.

Ad secundum dicendum, quod licet opera nostra non aequantur praemio aeterno secundum quantitatem, aequantur tamen secundum proportionem praesupposita efficacia gratiae; sicut parvum semen postmodum adaequatur arbori magnae ad quam virtus seminis est proportionata.

Ad tertium dicendum, quod homo per gratiam consequitur libertatem filiorum Dei, ut sic iam non operetur ut servus, sed ut liber per Christum

ex spontanea voluntate: et ita nihil prohibet quin mereatur.

ARTICULUS IV.

Ad quartum sic proceditur. Et 1. videtur, quod fides non mereatur justificationem. Illud enim quod praecedit omne meritum, non cadit sub merito; sed justificatio praecedit omne meritum, quia nullus potest mereri nisi sit justus; ergo justificatio non cadit sub merito.

2. Praeterea, meritum est sufficiens ad habendum praemium: sed fides non sufficit ad justificationem, sicut patet in iis qui habent fidem informem; ergo fides justificationem non meretur.

3. Praeterea, justificatio fit per infusionem gratiae: hoc autem non cadit sub merito, quia gratiam Dei nihil meriti praecedit humani, ut Augustinus dicit; ergo fides justificationem non meretur.

Sed contra est quod dicitur Rom. 5: « Justificati ergo ex fide pacem habeamus ad Deum. »

Praeterea, justificatio est purgatio a peccato: hoc autem fit per fidem; unde dicitur Act. 15: « Fide purificans corda eorum; » ergo fides justificationem meretur.

Respondeo. Dicendum, quod de justificatione possumus loqui dupliciter. Uno modo quantum ad sui principium. Alio modo quantum ad sui complementum. Principium quidem justificationis est prima gratiae infusio: et quantum ad hoc justificatio non cadit sub merito fidei, si meritum proprie accipiatur. Sed quia prima gratiae infusio fit cum motu fidei formatae, qui quidem est dispositivus ad justificationem, potest dici aliquo modo quod motus fidei justificationem meretur, prout est quaedam dispositio ad ipsam, improprie accipiendo meritum. Complementum autem justificationis consistit in plena curatione peccatorum et augmento spiritualium donorum: et quantum ad hoc justificatio cadit sub merito fidei formatae quae est inter prima Dei dona. Unde Rom. 5, super illud, « justificati ex fide, » dicit Glossa: « Cum fides impetrat justificationem, ipsa gratia meretur augeri. » Et sic patet solutio ad objecta.

DISTINCTIO XXVIII.

Id vero inconcusse etc. (V. edit. nostrae tom. VI, pag. 657.)

QUAESTIO UNICA.

Hic quaeruntur quatuor: 1.^o utrum homo in peccato existens, sine gratia possit peccatum vitare; 2.^o utrum possit aliquod bonum facere; 3.^o utrum possit mandata legis implere; 4.^o utrum aliquis sine gratia possit se praeparare ad gratiam habendam.

ARTICULUS I.

Ad primum sic proceditur. Et 1. videtur, quod homo in peccato mortali existens peccatum mortale vitare non possit. Augustinus enim dicit in libro de Perfectione justitiae, quod malitia se habet ad animam, sicut curvitas ad tibiam; et quod actus peccati claudicationi comparatur: sed habens tibiam curvam non potest non claudicare; ergo existens in peccato mortali non potest vitare peccatum.

2. Praeterea, id quod aliquis potest ex seipso

non habet necesse petere a Deo. Sed vitare peccatum necesse est petere a Deo, ut patet 2 ad Corinth. ult.: « Oramus autem Deum, ut nihil mali facialis; » ergo homo per seipsum non potest peccatum vitare.

3. Praeterea, si aliquis sine gratia posset peccatum vitare, hoc posset ille qui solo originali peccato detinetur. Hoc autem non potest aliquis: alias veniens ad adultam aetatem posset esse sine gratia, et sine peccato mortali: quod est impossibile: sic enim aliquis adultus, neque ad gloriam, neque ad poenam sensus finaliter perveniret; ergo nullus absque gratia potest peccatum vitare.

Sed contra est quod Hieronymus dicit: « Nos dicimus hominem semper peccare et non peccare posse, ut semper nos liberi consteamus esse arbitrii; » ergo dicere quod aliquis sine gratia non possit peccatum vitare repugnat libertati arbitrii.

Praeterea, necessitas peccandi obstinatio quaedam est: sed non omnes qui sunt sine gratia sunt obstinati; ergo non omnes qui sunt sine gratia habent necesse mortaliter peccare.

Respondeo. Dicendum, quod circa hanc quaestionem, sic caute loquendum est, ut neque excludendo necessitatem peccandi, necessitatem gratiae tollamus secundum Pelagium, neque necessitatem peccandi ponendo, tollatur liberum arbitrium secundum Manichaeum. Sciendum est ergo quod liberum arbitrium se extendit ad aliquem particularem aetum, non autem ad totius temporis cursum. In potestate enim liberi arbitrii est quod nunc velim hoc vel aliud, aut non velim; sed non est in potestate liberi arbitrii quod nullo tempore aliquid voliturus sim: non enim est in ejus potestate immutabilitatem habere. Et ideo dicendum est, quod homo, etiam sine gratia in peccato mortali existens, potest consentire vel non consentire in hoc peccatum quantum ad nunc: et contrarium dicere tolleret arbitrii libertatem. Sed non potest homo sine gratia firmare se, ut nullatenus in hoc vel illud peccatum consensurus sit: imo haec firmitas non potest ei esse nisi ex adiutorio divinae gratiae. Et ideo dicendum est, quod homo in peccato mortali existens potest singula peccata mortalia vitare; non tamen potest facere quod omnia vitet, quia hoc ejus electioni non subditur.

Ad primum ergo dicendum, quod similitudo illa quantum ad aliquid tenet, et quantum ad aliquid non tenet. Nam anima peccatoris, nisi in contrarium renitatur, labitur in peccatum opportunitate accepta, sicut et tibia curva claudicat. Sed tamen anima peccatoris potest contra niti per rationis iudicium, quod non potest tibia curva.

Ad secundum dicendum, quod abstinere ab omni peccato, ut conjunctionem accipiatur, non subiacet libero arbitrio, ut dictum est; et ideo Apostolus hoc a Deo pro suis subditis petebat.

Ad tertium dicendum, quod ille qui est in peccato originali tantum, veniens ad adultam aetatem, necesse habet vel se ad gratiam praeparare vel negligentiae culpam incurrere; et sic non erit in statu medio. Unde non sequitur, quod necesse habeat in hoc vel in illud peccatum consentire. Ad ea etiam quae sunt in contrarium, patet de facili responsio ex dictis.

ARTICULUS II.

Ad secundum sic proceditur. Et 1. videtur, quod homo absque gratia bonum facere non possit. Dicitur enim Roman. 7: « Velle adiacet mihi, perficere autem bonum non invenio; » ergo homo per liberum arbitrium non potest sine gratia bonum facere.

2. Praeterea, cogitatio boni praecedit operationem ejusdem; sed homo non potest per seipsum bonum cogitare sine gratia, ut dicitur 2 Corinth. 2: « Non quod sufficientes simus cogitare aliquid a nobis quasi ex nobis; » ergo sine gratia bonum operari non possumus.

3. Praeterea, operatio boni est actus alicujus virtutis: sed virtutes sunt in nobis per gratiam; ergo sine gratia bonum operari non possumus.

Sed contra. Creatura rationalis melior est irrationalibus creaturis: sed aliae creaturae possunt aliqua bona facere per sua naturalia; ergo multo magis homo per sua naturalia absque gratia, bonum agere potest.

Praeterea, unumquodque potest in hoc quod est sibi naturale: sed naturaliter vult homo bonum, ut dicit Glossa Rom. 7; ergo homo potest facere bonum per seipsum sine gratia.

Respondeo. Dicendum, quod gratia potest accipi dupliciter. Uno modo pro aliquo habituali dono animae divinitus indito. Alio modo pro ipsa divina voluntate, seu providentia, qua gratis nobis bona largitur. Primo modo accipiendo gratiam, possumus aliqua bona sine gratia facere, quae sunt naturae nostrae proportionata; non autem bona meritoria quae nostrae naturae facultatem excedent. Secundo autem modo accipiendo gratiam, nullum bonum sine gratia facere possumus. Indiget enim homo divino auxilio ad bonum operandum, dupliciter. Uno modo in quantum Deus operator interior in omni natura et voluntate. Alio modo in quantum exterius occasiones et adminicula praebet per suam providentiam bene operandi.

Ad primum ergo dicendum, quod Apostolus loquitur de bono meritorio: vel loquitur secundum Glossam, de bono perfecto, quod est omnino non concupiscere.

Ad secundum dicendum, quod cogitatio boni non potest esse in nobis sine divino auxilio: potest tamen esse sine gratiae habituali dono.

Ad tertium dicendum, quod actus de genere alicujus virtutis, potest esse in eo qui non habet virtutem per iudicium rationis: sicut aliquis qui non habet habitum justitiae, potest facere justa.

ARTICULUS III.

Ad tertium sic proceditur. Et 1. videtur, quod aliquis possit implere praecepta legis sine gratia. Dicitur enim primae Joan. 5: « Mandata ejus gratia non sunt; » sed illud quod non est grave, potest homo ex libertate arbitrii facere; ergo et mandata legis implere.

2. Praeterea, nullus peccat in eo quod vitare non potest, ut Augustinus dicit. Sed aliquis non habens gratiam peccat omitendo legis praecepta; ergo sine gratia legis praecepta impleri possunt.

3. Praeterea, nullus juste corripitur, si non facit quod facere non potest. Sed homo etiam sine

gratia corripitur, si praecepta legis non impleat; ergo sine gratia potest praecepta legis implere.

Sed contra. Qui servat Dei mandata, pervenit ad vitam aeternam. Unde Dominus dixit adolescenti: « Si vis ad vitam ingredi, serva mandata. » Si ergo homo potest sine gratia praecepta legis implere, poterit sine gratia ad vitam aeternam pervenire: quod est contra Apostolum Rom. 7: « Gratia Dei, vita aeterna. »

Praeterea, lex sine gratia dicebatur occidere, ut patet Rom. 7: quod non esset, si sine gratia legis praecepta possent impleri; ergo legis praecepta sine gratia impleri non possunt.

Respondeo. Dicendum, quod impletio praeceptorum legis potest accipi dupliciter. Uno modo quantum ad modum faciendi, quem legislator intendit; ut scilicet ea quae lex praecepit taliter fiant ut sint meritoria vitae aeternae: et sic nullo modo impletio legis sine gratia esse potest. Alio modo potest sumi impletio legis, quantum ad substantiam facti, quod lege imperatur; et sic sine gratia aliquis potest singula legis praecepta servare per liberum arbitrium: sed non subiacet potestati liberi arbitrii, ut totaliter legem servet in nullo transgrediens vel omitting; sicut non subiacet libero arbitrio omnia peccata vitare. Alii tamen dicunt, quod subiacet libero arbitrio servare omnia praecepta, quantum ad vitacionem peccati, sed non ad meriti gloriae adeptionem: et secundum has opiniones de facili patet responsio ad argumenta.

Ad primum ergo dicendum, quod sicut dicit Augustinus in libro de Natura et gratia, praecepta Dei intelliguntur esse levia amanti quae sunt dura timenti. Et sic non sequitur quod possunt impleri, nisi ab habente virtutem charitatis.

Ad secundum dicendum, quod homo peccat omitendo, quando non servat singula legis praecepta quantum ad substantiam facti. Si autem substantiam facti servet et non modum, non incurrit omissionis, quantum ad illud praeceptum, quamvis peccatum careat merito vitae.

Ad tertium dicendum, quod recte homo corripitur qui praecepta non implet, quia potest ex libero arbitrio servare mandata, quantum ad substantiam: neque est sine ejus negligentia quod gratia caret, per quam potest servare praecepta etiam quantum ad modum.

ARTICULUS IV.

Ad quartum sic proceditur. Et 1. videtur, quod homo per seipsum se possit praeparare ad gratiam habendam. Non enim homo debet induci ad hoc quod per seipsum non potest; sed homo inducitur ut seipsum ad gratiam praepararet, ut patet Zachariae 1: « Convertimini ad me, et ego convertar ad vos; » ergo homo potest seipsum ad gratiam habendam praeparare.

2. Praeterea, Apoc. 5 dicitur: « Si quis aperuerit mihi, intrabo ad eum. » Sed Deus ad nos intrat per gratiam; ergo nostrum est nos ad gratiam praeparare, eor nostrum ei aperiendo.

3. Praeterea, illud quod facere non possumus in nobis non est: sed nos ad gratiam praeparando dicimur facere quod in nobis est; ergo praeparare nos ad gratiam est in nostra potestate; et ita ad hoc gratia non indigemus.

Sed contra est quod dicitur Joan. 6: « Nemo

« potest venire ad me, nisi Pater qui misit me, traxerit eum. »

Praeterea, illud quod ex nobis possumus, non habemus necesse petere a Deo orando. Habemus autem necesse petere a Deo, ut nos ad gratiam praepararet ad se convertendo, ut patet in Psalm. 84: « Convertite nos, Deus, salutaris noster; » ergo non est omnino in potestate nostra nos ad gratiam praeparare.

Respondeo. Dicendum, quod si per gratiam accipitur aliquod habituale donum, gratis nobis collatum, possumus sine gratia praeparare nos ad gratiam habendam. Si enim ad recipiendum lumen gratiae gratum facientis praexigitur aliquod habituale donum, pari ratione ad illud donum praexigetur aliquid aliud, et sic in infinitum. Si vero per gratiam intelligatur divina providentia, qua misericorditer homo ad bonum dirigitur, sic sine gratia non potest homo se praeparare ad habendam gratiam gratum facientem: tum quia mensuram praeparationis necessariae ignoramus: tum quia voluntas non mutatur de una dispositione in aliam, nisi moveatur aliquo interiori instinctu vel exteriori occasione excitante: et haec omnia per divinam providentiam dispensantur. Unde non possumus sine Dei auxilio ad habendam gratiam praeparari.

Ad primum ergo dicendum, quod nos inducimur ad faciendum, etiam ea quae ex divino auxilio possumus; quia quae per amicos possumus aliquantulum per nos ipsos possumus, ut dicitur in 5 Ethicorum; et sic inducimur, ut convertamur ad Deum, a quo tamen petimus, ut nos convertat. Unde dicitur Thren. 4: « Convertite nos, Domine, ad te, et convertemur. »

Ad secundum dicendum, quod aperire eor nostrum Deo possumus, sed non sine divino auxilio. Unde ab eo petitur 2 Machab. 1: « Adaperiat Dominus eor vestrorum. »

Ad tertium dicendum, quod potestas nostra nihil operari potest sine Deo qui operatur in omni natura et voluntate. Unde, cum dicimus aliquid esse in nobis, non excludimus Dei auxilium.

DISTINCTIO XXIX.

Post haec considerandum est etc. (V. edit. nostrae tom. VI, pag. 645.)

QUAESTIO UNICA.

Hic quaeruntur quatuor: 1.^o utrum homo in gratia creatus fuerit; 2.^o utrum gratia operante indignerit; 3.^o utrum potuisset post peccatum per lignum vitae a morte praeservari; 4.^o utrum convenienter propter peccatum fuerit de paradiso eiectus.

ARTICULUS I.

Ad primum sic proceditur. Et 1. videtur, quod homo non fuerit in gratia creatus. Gratia enim, quantum est de se, inclinat ad vitandum peccatum. Nihil autem erat in statu innocentiae quod hominem ad peccatum inclinaret; si ergo in gratia homo creatus fuisset, nullatenus peccasset: quod patet esse falsum.

2. Praeterea, homo per gratiam potest proficere ad meritum vitae: hoc autem in sui conditione A-

dam non poterat, ut dicit Magister supra, distinctione 22; ergo non fuit conditus in gratia.

3. Praeterea, cum gratia omnes virtutes simul infunduntur: sed Adam non habuit omnes virtutes, quia non habuit patientiam, cum nullas molestias pateretur; nec perseverantiam, quod patet ex sequenti peccato; ergo homo non fuit conditus in gratia.

Sed contra. Nullus spoliatur ab his quae non habet: sed homo per peccatum fuit vulneratus in naturalibus et spoliatus gratuitis, ut patet in Glossa super illud, Luc. 10, « homo quidam descendebat etc. »; ergo homo in gratia conditus fuit.

Praeterea, sine gratia, ad Dei visionem perveniri non potest: sed carentia visionis divinae, est poena consequens ex peccato; ergo ante peccatum homo gratiam habuit.

Respondeo. Dicendum, quod circa hoc est triplex opinio. Quidam enim dixerunt, quod homo ante peccatum gratiam non habuit, nec virtutes gratuitas; sed naturam habuit integram quae fuit per peccatum corrupta. Omnes autem auctoritates, quas Magister adducit ad probandum homini infuisse, exponunt de virtutibus naturalibus, quae in ipso propter integritatem humanae naturae excellentissimae fuerunt. Sed hoc non competit dictis sanctorum. Augustinus enim ponit hominem in statu innocentiae, quadam felicitate praeditum esse, per quam ab omnibus passionibus animi et peccatis erat immunis, ut patet 14 de civitate Dei. Ipsa etiam familiaritas Dei ad hominem, significat eum habuisse gratiam. Et ideo alii dicunt, quod homo ante peccatum gratiam adeptus fuit, non tamen est in gratia conditus. Sed hoc etiam irrationabile videtur. Nam cum homo ad beatitudinem habendam creatus sit, ad quam non nisi per gratiam perveniri potest, non fuit conveniens ut homini in sua conditione defuerit perfectio gratiae, cum Dei perfecta sint opera. Et ideo secundum aliquos, dicendum est, quod homo in gratia creatus fuit.

Ad primum ergo dicendum, quod inclinatio gratiae non est necessitatis: unde ea non obstante, per liberum arbitrium homo potuit cadere in peccatum.

Ad secundum dicendum, quod Magister supra loquutus fuit secundum opinionem ponentium, hominem in gratia conditum non fuisse; vel loquebatur ad ostendendum quid homo posset ex liberi arbitrii potestate, de qua tunc agebatur.

Ad tertium dicendum, quod Adam in statu illo habuit omnes virtutes simul cum gratia: quamvis enim passionibus non subjaceret, habebat tamen naturam, in quam huiusmodi passiones accidere possent. Perseverantiam autem, quae est specialis virtus, habuit, cum aliquando habuit propositum finaliter persistendi in bonis: quamvis non habuit perseverantiam quae est circumstantia virtutum, earum permanentiam designans.

ARTICULUS II.

Ad secundum sic proceditur. Et 1. videtur, quod homo in statu innocentiae gratia operante non indignerit. Sicut enim in Angelis bonis nullum praecesserat peccatum, ita nec in homine: sed hac ratione Magister supra dist. 5: posuit Angelos gratia operante non indignasse; ergo eadem ratione, nec homo in statu innocentiae, gratia operante indignuit.

2. Praeterea, justificatio impii est proprius ef-

fectus gratiae operantis: sed hoc non fuit in statu innocentiae, quando nulla impietas in homine praecesserat; ergo homo in statu illo gratia operante non indigebat.

3. Praeterea, homo indiget gratia plus post peccatum, quam ante, cum majorem defectum patitur: sed misericordia Dei, ex qua gratia procedit, miseriam intuetur, ut Bernardus dicit; ergo plus gratiae contulit homini post peccatum quam ante: sed tam ante quam post habuit gratiam cooperantem; ergo ante peccatum non habuit gratiam operantem.

Sed contra. Posito posteriori ponitur prius: sed gratia operans naturaliter praecedat cooperantem; ergo cum homo gratiam cooperantem habuerit, habuit etiam operantem.

Praeterea, Gen. 2 dicitur, quod posuit hominem in paradiso, ut operaretur et custodiret illud: quod uno modo exponitur ab Augustino super Gen. ad literam, ut Deus per hominem operaretur, quantum ad esse justitiae. Hoc autem fit per gratiam operantem; ergo homo in statu innocentiae habuit gratiam operantem.

Respondeo. Dicendum, quod gratia operans habet duos effectus: quorum unus est ei essentialis, scilicet facere justum, et Deo gratum: alius est ei accidentalis, scilicet iniquitatem removere. Sicut albedinis proprius et per se effectus est facere album: sed quod nigredinem aliquando abiciat, hoc accidit ei ex conditione subjecti cui advenit, in quo nigredo praecesserat. Dicendum est ergo quod homo in statu innocentiae, gratia operante indiguit, quantum ad primum et principalem effectum; non autem quantum ad secundum et accidentalem. Et quantum ad hoc etiam supra dicit Magister, Angelos gratia cooperante non indiguisse. Et per hoc patet solutio ad primum.

Ad secundum dicendum, quod justificatio impii includit duos praedictos effectus gratiae operantis: quia ad justificationem impii, requiritur infusio gratiae quasi terminus ad quem, et remissio culpae, quasi terminus a quo. Ergo quantum ad primum, justificatio in statu innocentiae potuit esse; sed non quantum ad secundum.

Ad tertium dicendum, quod homo post peccatum indiget gratia ad plura quam ante: sed ad justitiam habendam non minus indigebat gratia ante, quam post: et ideo gratia operante indiguit ante peccatum, sicut et post.

ARTICULUS III.

Ad tertium sic proceditur. Et 1. videtur, quod Adam post peccatum per esum ligni vitae a morte praeservari potuisset. Bonum enim efficacius est ad agendum quam malum: sed per lignum scientiae boni et mali, quod erat mortis effectivum, ut dicitur Gen. 2, de immortali factus est mortalis; ergo multo fortius per lignum vitae potuit vitam continuare, etiam mortalis factus.

2. Praeterea, ea quae agunt virtute naturae, similiter agunt in peccatorem et justum; sicut ignis similiter calefacit corpus utriusque. Sed lignum vitae, virtute naturali, corpus hominis ante peccatum poterat praeservare a morte; ergo pari ratione post peccatum.

3. Praeterea, Dominus post peccatum hominem ab esu ligni vitae coereuit, ne poenam mortis evaderet, quam peccando meruerat, ut patet Gen. 3 cum dicitur: « Videte ne forte sumat de ligno vitae et

« vivat in aeternum »: hoc autem frustra fuisset, nisi per lignum vitae mortem potuisset vitare. Potuit ergo Adam, etiam post peccatum, per esum ligni vitae praeservari a morte.

Sed contra. Illud quod est necessarium necessitate absoluta, nulla naturali virtute potest immutari; sed corpus hominis post peccatum habet necessitatem moriendi, ut patet in Glossa Rom. 8 super illud, « corpus quidem mortuum est propter peccatum. » Haec autem est necessitas absoluta, cum sit necessitas materiae; non ergo poterat virtus naturalis ligni vitae hominem post peccatum praeservare a morte.

Praeterea, manente culpa, poena non potest auferri. Sed mors est poena originalis peccati, ut patet Rom. 5: « Per unum hominem peccatum in mundum intravit, et per peccatum mors. » Lignum autem vitae, non poterat peccatum originale auferre; ergo nec a morte praeservare.

Respondeo. Dicendum, quod remota virtute principalis agentis, per actionem instrumenti, effectus produci non potest: non enim per serram fieret scamnum sublata arte artificis. In statu autem innocentiae, respectu hujusmodi effectus, qui est perpetua continuitas vitae, principalis agens erat anima, quae virtute originalis justitiae, poterat corpus suum praeservare a morte adhibitis aliquibus adminiculis, quibus ut instrumentis utebatur; inter quae praecipuum erat lignum vitae. Unde remota originali justitia, nec lignum vitae, nec aliquid aliud naturale, potest praeservare a morte. Sicut nunc videmus quod natura fortis, adminiculo alicujus medicinae, corpus sanat; si autem vigore naturae sublato, medicina eadem apponatur, non poterit perficere sanitatem.

Ad primum ergo dicendum, quod lignum scientiae boni et mali, non induxit statum mortalitatis, aliqua virtute naturali: sed per transgressionem praeepti, per quam est justitia originalis sublata.

Ad secundum dicendum, quod ratio illa procedit de rebus illis naturalibus quae habent effectus sicut causae principales agentes, et non sicut instrumenta justitiae alicujus: sed de ligno vitae erat totum contrarium.

Ad tertium dicendum, quod licet per lignum vitae, non potuit homo post peccatum totaliter praeservari a morte, potuit tamen ejus virtute diutius mortem differre, quod ei jam in miseria constituto non expediebat: et sic verba Domini magis per compassionem, quam per insultationem sunt accipienda.

ARTICULUS IV.

Ad quartum sic proceditur. Et 1. videtur, quod non convenienter homo in poenam peccati, sit de Paradiso terrestri ejectus. Ea enim quae homo per peccatum amisit, per Christi passionem et ejus sacramenta recuperat: sed homo per hoc non ducitur in Paradisum terrestrem; ergo ejectio de Paradiso terrestri non fuit conveniens poena pro peccato.

2. Praeterea, per quae peccat quis, per haec et torquetur, ut patet per Sap. 11: sed homo in paradiso peccavit; ergo miseriam in paradiso terrestri debuit sustinere.

3. Praeterea, homo remediabiliter peccavit, Angelus vero irremediabiliter: sed non legitur aliqua custodia apposita, ne Angelus peccans rediret in

caelum empyreum; ergo multo minus debuit homo taliter a paradiso expelli, quod etiam apponeretur custodia per quam reditus impediretur.

Sed contra. Locus debet proportionari locato. Sed per peccatum homo factus est miser; ergo non debuit remanere in paradiso terrestri, quae erat locus felicitatis eujusdam.

Praeterea, homo per peccatum reductus est ad statum convenientem suo principio, ut Dionysius dicit in Caelesti hierarchia. Sed homo extra paradysum factus est, et postmodum in paradiso positus; ergo post peccatum debuit a paradiso excludi, et in locum in quo conditus fuerat, reduci.

Respondeo. Dicendum, quod anima hominis taliter fuerat instituta, ut quamdiu ipsa inobediens Deo non fieret, nullam inobedientiam sentiret in suo corpore, nec aliquod nocuum ex exterioribus rebus quae propter hominem factae sunt, et ei subjectae. Post peccatum autem et ex corpore rebellionem sensit, et ex rebus exterioribus nocuum. Et ideo ante peccatum positus fuit in loco temperatissimo et delicatissimo, ubi nullam molestiam ex rebus exterioribus sentiret: sed post peccatum ad locum turbulentum et angustiis plenum debuit educi, de quo dictum est ei Gen. 3: « Male-
« dicta terra in opere tuo, spinas et tribulos ger-
« minabit tibi. »

Ad primum ergo dicendum, quod per mortem Christi restituuntur nobis potiora his, quae per Adae peccatum amisimus. Unde non reducimur in vitam animale et paradysum terrestrem; sed in gloriam spiritualem et caelum empyreum, quo etiam Adam transferendus esset, si perstitisset.

Ad secundum dicendum, quod Adama per peccatum, indignum se paradiso terrestri reddiderat: unde ex hoc ipso quod a paradiso excluditur, punitur in hoc in quo peccavit; sicut contingit cum aliquis ab Ecclesia expellitur, propter sacrilegium in Ecclesia commissum.

Ad tertium dicendum, quod caelum empyreum est locus spiritualis gloriae; unde ab ejus accessu sufficienter arcentur daemones pondere culpae: sed paradysus terrestris erat locus vitae animalis in qua communicabat homo etiam post peccatum: unde impedimenta redeundi specialia debuerunt apponi: partim spiritualia per ministerium angelorum, quae per Cherubim intelliguntur; partim corporalia, quae per gladium flammeum intelliguntur; inter quae etiam est nimius aestus intermedius inter paradysum terrestrem, et nostram habitabilem rationem.

DISTINCTIO XXX.

In superioribus insinuatam etc. (V. edit. nostrae tom. VI, pag. 652.)

QVAESTIO UNICA.

Hic quaeruntur quatuor: 1.^o utrum aliquod peccatum ad Adam in posteros per originem traducatur; 2.^o quid sit illud peccatum; 3.^o utrum defectus quos sentimus, sint poena illius peccati; 4.^o utrum caro omnium hominum fuerit in Adam.

ARTICULUS I.

Ad primum sic proceditur. Et 1. videtur, quod a primo parente non traducatur aliquod peccatum
S. Th. Opera omnia. V. 22.

in posteros. Accidens enim traduci non potest, nisi subjectum traducatur: sed subjectum peccati est anima rationalis, quae non traducitur a parente in prolem; ergo nec peccatum aliquod a primo parente in posteros traduci potuit.

2. Praeterea, secundum Augustinum, 12 super Gen. ad literam, « agens est nobilius patiente: » sed corpus non est nobilius anima; ergo non potest, per infectionem seminis corporalis, anima infici.

3. Praeterea, ex hoc ipso aliquis defectus a culpa excusatur, quod est involuntarius, nec est in potestate ejus in quo invenitur. Sed omne quod est in nobis per originem est involuntarium, in nostra potestate non existens; ergo nullum peccatum potest esse in nobis, per originem a primo parente traductum.

Sed contra est quod dicitur Rom. 5: « Per unum hominem peccatum intravit in mundum, et per peccatum mors. »

Praeterea, nullus indiget spirituali ablutione, qui non est spiritualiter infectus: sed pueri mox nati indigent spirituali ablutione, scilicet baptismo; ergo habent aliquam spiritualem infectionem: quod non esset, si culpa per originem non traduceretur.

Respondeo. Dicendum, quod circa hanc quaestionem, in litera tanguntur duo errores; quorum unus excludit sacramentorum gratiae necessitatem, scilicet error Pelagianorum, qui contendebant in parvulis nullum esse peccatum, et sic per consequens non indigebant baptismo, nec redemptione quae facta est per Christum. Alius error repugnat divinae justitiae, dicentium, scilicet, in parvulis non esse reatum culpae, sed solum esse reatum poenae, ad cujus solutionem indigent Christo, et ejus sacramentis. Injustum est enim aliquem obligari ad poenam sine culpa, cum poena juste non nisi culpae debeatur. Et ideo dicendum est, quod in parvulis est culpa originaliter traducta a primo parente. Ad cujus evidentiam sciendum est, quod aliquid potest homini attribui dupliciter. Uno modo ratione singularis personae. Alio modo ratione totius naturae. Cui autem attribuitur aliquid primo modo, attribuitur singulis divisim: cum ante secundo modo, attribuitur omnibus velut uni; quia participatione speciei, plures homines sunt unus homo, ut dicit Porphyrius. Sicut ergo peccatum actuale alicui homini attribuitur ratione singularis personae, cujus est agere; ita peccatum originale attribuitur homini ratione naturae. Nam origo, sive generatio, ad naturae conservationem ordinatur; unde sufficit voluntas inordinata unius, qui fuit principium totius naturae, ad construendam rationem culpae in omnibus, qui ab eo naturam humanam naturali origine acceperunt.

Ad primum ergo dicendum, quod anima primi hominis peccando infecit corpus, corpus autem infectum traducitur cum infectione libidinis seminatam, ex qua infectione contingit etiam animam infici, quia forma sequitur modum materiae: unde ex indispositione corporis multos defectus homo a nativitate incurrit; sicut patet de his qui sunt a nativitate naturaliter stolidi.

Ad secundum dicendum, quod corpus infectum non infecit animam quasi agendo, sed magis recipiendo. Quod enim recipitur in altero, sequitur modum recipientis; et sic omnes formae commensurantur materiis, non tamen a materiis patiuntur.

Ad tertium dicendum, quod licet defectus qui ex infectione corporis redundat in animam, non sit

voluntarius voluntate hujus personae in quam peccatum originale traducitur, est tamen voluntarium voluntate illius personae, quae fuit totius naturae principium, ex qua ratio culpae redundat in naturam, et per consequens in eos qui naturam corruptam a primo parente naturali generatione accipiunt. Propter quod dicitur, quod persona infecit naturam, et natura infecit personam.

ARTICULUS II.

Ad secundum sic proceditur. Et 1. videtur, quod concupiscentia non sit peccatum originale. In statu enim innocentiae peccatum originale non fuit. Fuit autem ibi concupiscentia, sicut et amor, ut patet per Augustinum, 14 de Civitate Dei; ergo concupiscentia non est originale peccatum.

2. Praeterea, concupiscentia aut significat potentiam concupiscendi, aut habitum, aut actum: non est autem peccatum originale, secundum quod significat potentiam, quia sic est naturalis et nihil naturalium est malum: neque secundum quod significat actum, quia sic originale ab actuali non differret: neque secundum quod significat habitum; neque etiam (1) potest dici quod sit habitus infusus, quia sic esset a Deo; neque quod sit naturalis, quia sic non esset malus; neque quod sit acquisitus, quia oporteret actus praecedere; ergo concupiscentia nullo modo est originale peccatum.

3. Praeterea, originale peccatum habet animam pro subjecto: concupiscentia vero de qua nunc loquimur, habet carnem pro subjecto. Non enim potest dici quod peccatum originale sit concupiscentia qua spiritus adversus carnem concupiscit: sed magis est illa, qua concupiscit caro adversus spiritum; ergo concupiscentia non est peccatum originale.

Sed contra est quod dicitur in Glossa Rom. 6: « Non regnet peccatum in vestro mortali corpore, id est, fomes peccati; » ergo ipsa concupiscentia, quae est fomes peccati, est peccatum.

Praeterea, primi motus ex corruptione originalis peccati proveniunt: sed primi motus sunt concupiscentiae actuales, ut patet in Glossa Rom. 7; ergo originale peccatum est ipsa concupiscentia.

Respondeo. Dicendum, quod de peccato possumus dupliciter loqui. Uno modo quantum ad sui originem. Alio modo quantum ad sui consummationem: quae quidem consistit in privatione spiritualis boni, per quod homo Deo adhaereat: malum enim est privatio boni. Haec autem privatio ex indebita habitudine ad aliquod commutabile bonum contingit, per modum, quo ex interpositione corporis operari sequitur privatio locis; et ita in ipsa habitudine ad commutabile bonum, origo peccati consistit; quam etiam directe respicit voluntas, unde est ratio culpae. Et ideo sicut peccatum actuale, originaliter et quasi materialiter est actualis concupiscentia commutabilis boni, consummatio autem est gratiae defectus; ita peccatum originale, originaliter quidem et materialiter est concupiscentiae corruptio in nobis, ex peccato primi parentis relicta: consummative autem est carentia justitiae vel gratiae: ex hoc enim ipso quod anima semini infecto infusa redditur ad concupiscendum prona, efficitur inepta ad gratiae susceptionem.

Ad primum ergo dicendum, quod in primo statu erat concupiscentia, sed ordinata, quae rationem peccati non habet.

(1) *Lege enim.*

Ad secundum dicendum, quod originale peccatum est concupiscentia habitualis, ex qua aliquis fit pronus ad concupiscendum, non per aliquem habitum superadditum, sed per subtractionem originalis justitiae, per quam continebantur inferiores animae vires et corporis membra, ut nihil in eis contingeret praeter ordinem rationis.

Ad tertium dicendum, quod originale peccatum est illa concupiscentia, qua caro adversus animam concupiscit: quae tamen non est in carne, sed in anima: dicitur enim caro concupiscere, in quantum anima per carnem concupiscit.

ARTICULUS III.

Ad tertium sic proceditur. Et 1. videtur, quod defectus praesentis vitae non sint poenae originalis peccati. Filii enim pro peccato parentum puniri non debent: unde habetur Deut. 24: « Non occidentur patres pro filiis, nec e converso; sed unusquisque pro peccato suo morietur. » Sed peccatum originale ex sola voluntate primi parentis est inductum; ergo injustum est, ut pro eo filii ex Adam geniti puniantur.

2. Praeterea, mors et defectus corporales, ex necessitate materiae proveniunt. Sed in materia communicamus cum brutis: cum ergo in brutis hujusmodi defectus non habeant rationem poenae, nec in nobis habebunt.

3. Praeterea, peccatum originale communiter est in omnibus: sed aliqui horum defectuum non sunt in omnibus communiter, sed quidam in his et quidam in aliis: quidam enim nascuntur caeci, alii surdi vel alios defectus habentes; ergo hujusmodi defectus non sunt poena originalis peccati.

Sed contra est quod dicitur Rom. 8: « Corpus quidem mortuum est propter peccatum. »

Praeterea, poena consequitur culpam: sed culpa primi parentis in posteros traducitur, ut dictum est; ergo et poena mortis quam ei Dominus comminatus est Gen. 2: « Quaecumque die comederitis etc. »

Respondeo. Dicendum, quod non quilibet defectus boni est poena; sed solum defectus boni, quod aliquis debet habere: non enim est poena homini quod non habet alas; est autem ei poena si non habeat manus. Est autem aliquid homini debitum dupliciter. Uno modo ex conditione principiorum naturalium. Alio modo ex manere divino. Immortalitas enim et tranquillitas omni-moda corporis, non est debita homini, quasi sua principia naturalia consequens, cum corpus ejus sit ex contrariis compositum; sed facta sunt ei debita in statu innocentiae ex divini numeris concessione. Et ideo defectus quibus hujusmodi bona privantur, sunt poenales, et sequuntur originale peccatum.

Ad primum ergo dicendum, quod filii Adae non puniantur pro peccato Adae, sed pro peccato quod per Adam in eos est traductum, ut patet per Apostolum, Rom. 5: « Per unum hominem peccatum in hunc mundum intravit, et per peccatum mors. »

Ad secundum dicendum, quod ratio illa procedit secundum conditionem principiorum naturalium, praetermissa concessione divini numeris.

Ad tertium dicendum, quod licet defectus corporales aliqui, non sint communes secundum se, sunt tamen communes secundum suam causam, quae directe est originalis peccati poena, scilicet

destitutio corporis a virtute animae, qua continebantur contraria in misto, ut contra salutem corporis in se invicem non agerent, nec ab extrinseco corpus laederetur: haec enim virtute subtracta, secundum diversas elementorum commistiones et exteriora agentia in pueris et adultis diversi corporales defectus inveniuntur: quae tamen diversitas a divina providentia debite ordinatur.

ARTICULUS IV.

Ad quartum sic proceditur. Et 1. videtur, quod caro omnium non fuerit in Adam. Ex Adam enim procedunt ejus posteri per generationem, quae est ex semine: sed semen, secundum Philosophum, non est decimum ex substantia generantis, sed ex superfluo alimenti: ergo non potest esse quod omnium caro fuerit in primo parente.

2. Praeterea, secundum Philosophum in 2 de Anima, nutrimentum in principio est dissimile, sed in fine est simile nutrito: id autem quod nutritur est caro et os, et hujusmodi partes corporis; ergo nutrimentum in fine fit caro: sed non totum nutrimentum hominum fuit in Adam; ergo nec omnium hominum caro.

3. Praeterea, corpus Adae fuit finitum: sed ex finito non potest fieri infiniti decisio, secundum eandem quantitatem. Cum ergo generatio hominum, secundum cursum naturae, possit in infinitum durare, videtur quod semina ex quibus homines generantur, non fuerint in Adam, cum sint ejusdem quantitatis.

Sed contra. Accidens non traducitur sine translatione subjecti: sed originale peccatum ab Adam in omnes traductum est: non autem per translationem subjecti quod est anima; ergo ad minus per translationem corporis; ergo ad minus omnium hominum caro in Adam fuit.

Praeterea, seminales rationes ad rerum originis pertinent: sed Augustinus dicit quod nos fuimus in Adam, non solum secundum seminalem rationem, sed etiam secundum corpulentam substantiam; ergo non solum sumus ex Adam exorti, sed ipsa substantia carnis nostrae in Adam fuit.

Respondeo. Dicendum, quod circa hanc quaestionem sunt duae opiniones. Una est dicentium, quod quicquid est in corpore nostro de veritate humanae naturae, totum in Adam substantialiter fuit, et ex eo per modum cujusdam multiplicationis est propagatum in omnes. Sed haec opinio non videtur conveniens, propter duo. Primo, quia multiplicatio corporis non potest intelligi sine additione materiae, vel de novo creatae vel aliunde acceptae, aut sine rarefactione. Unde Augustinus dicit 10 super Genesim ad litteram, quod nihil est absurdius, quam putare nullum esse corpus quod manente naturae suae quantitate, id est nulla natura exteriori addita undique crescat, nisi rareseat: et de hoc supra, distinct. 18, dictum est. Sed quia generans et generatum differunt numero, et conveniunt specie, non oportet quod substantia carnis filii, fuerit eadem numero in parente: sed sufficit, quod in filio producat ex quacumque materia ad similitudinem speciei cum carne parentis. Et ideo alii dicunt, quod caro omnium hominum non fuit substantialiter et actualiter in Adam, sed originaliter tantum; et sic in Adam omnes potuerunt peccare, et ab eo generari peccatores. Unde secundum

hanc opinionem, ad utrasque rationes respondendum est.

Ad primum ergo dicendum, quod semen est materialiter ex alimento, sed speciem et virtutem habet ex ipso generante, cujus virtute nutritiva et generativa est ad debitam digestionem productum, et hoc ab Adam primo originem sumpsit.

Ad secundum dicendum, quod nutrimentum illud, quod in carnem convertitur, non fuit materialiter in Adam; sed virtus per quam convertitur ab Adam descendit, et quia species carnis, quae per nutrimentum advenit, est ex praedicta virtute; ideo consequenter tota hominum caro, in Adam originaliter fuit secundum speciem, licet non secundum materiam.

Ad tertium dicendum, quod ratio illa procederet, si omnia semina, ex quibus homines generantur, fuissent materialiter in Adam.

Ad quartum dicendum, quod corpus nostrum ex Adam traducitur: non quod sit idem numero secundum materiam, sed secundum similitudinem speciei; quia nec peccatum originale, quod in nobis est, est idem numero cum peccato Adae.

Ad quintum dicendum, quod secundum seminalem rationem et corpulentam substantiam esse in Adam, dicit quid in nobis ex Adam fuit, non per quem modum. Omnium enim hominum praeter Christum tam ratio seminalis, id est vis activa in generatione, quam etiam corpulenta substantia, fuit in Adam secundum originem, non tamen fuit ibi per modum substantiae corpulentae in actu. Quaestio autem de veritate humanae naturae pertinet ad tractatum de resurrectione.

DISTINCTIO XXXI.

Nunc superest investigare etc. (V. edit. nostrae tom. VI, pag. 668.)

QUAESTIO UNICA.

Hic quaeruntur quatuor: 1.º utrum per translationem corporis possit originale peccatum traduci; 2.º utrum sit in corpore, sicut in subjecto, vel in anima; 3.º utrum mandati ab originali post baptismum transmittant peccatum originale in prolem; 4.º utrum transmissio originalis peccati usque ad finem mundi perseveret, an aliqui sine peccato originali sint nascituri.

ARTICULUS I.

Ad primum sic proceditur. Et 1. videtur, quod per translationem corporis, peccatum originale traduci non possit. Transmissio enim corporis fit ex semine mediate: sed semen non est susceptivum culpae, cum non habeat animam quae non traducitur in semine; ergo per translationem corporis peccatum originale traduci non potest.

2. Praeterea, in translatione corporis est commixtio sexuum, sed divinitus instituta, et semen corporeum a Deo creatum, et delectatio, quae concupiscentiam vel libidinem facit, est ex principiis naturae causata: quae omnia non possunt esse causa peccati; ergo per translationem corporis, peccatum originale traduci non potest.

3. Praeterea, habitus animae per carnis translationem non traducuntur; ergo pari ratione nec

animae defectus: sed peccatum originale est quidam animae defectus; ergo per corporis traductionem non traducitur.

Sed contra. Peccatum originale pervenit in nos a primo parente, ut patet Roman. 5: « Per unum hominem peccatum in hunc mundum intravit: » sed nos a primo parente non traducimur nisi secundum corpus; ergo originale peccatum per carnis traductionem traducitur.

Praeterea, sicut se habet peccatum actuale ad actum, ita se habet peccatum originale ad originem. Sed peccatum actuale causatur ex inordinatione actus; ergo et peccatum originale ex corruptione originis: origo autem est per traductionem corporis; ergo per traductionem corporis originale peccatum traducitur.

Respondeo. Dicendum, quod sicut supra dictum est, peccatum originale proprie est peccatum naturae; nec respicit personam, nisi mediante natura. Persona enim primo infecit naturam, sed postmodum natura infecit personam: unde secundum hoc peccatum originale ad prolem devenit, secundum quod ad eum pervenit natura humana. Hoc autem fit per traductionem corporis, in quantum corpus eum libidine seminatur. Unde et traductio originalis peccati, fit per traductionem corporis eum libidine seminati. Sicut enim actus generationis absolute consideratus, traducit naturam, ita libidini permistus traducit naturam cum culpa. Libido enim actui permista, ex peccato originali parentis initium sumit, et ex hoc habet efficaciam originale peccatum traducendi in prolem; sicut ipse generationis actus, in quantum est effectus naturae, naturam traducit in prolem.

Ad primum ergo dicendum, quod licet in semine non possit esse culpa, est tamen ibi aliqua infectio, ex libidine causata, quae est principium culpae; sicut in semine leprosi non est lepra, sed aliqua corruptio, quae est principium leprae.

Ad secundum dicendum, quod commissio sexuum, secundum se considerata, non habet, quod peccatum originale transmittat in prolem; sed hoc habet ex libidine conjuncta, quae sicut est ex peccato, ita peccatum causat. Libido enim est uno modo inordinatus actus voluntatis, et sic est peccatum; alio modo est inordinata delectatio, vel fervor coitus, et sic est actus peccati; tertio modo est inordinatio virium: et sic est causa peccati.

Ad tertium dicendum, quod habitus, qui sunt in anima, sunt accidentia personalia: et ideo per traductionem seminis non causantur in prole. Sed peccatum originale respicit naturam: et ideo per actum naturae, scilicet generationem, traducitur, sicut et ipsa natura.

ARTICULUS II.

Ad secundum sic proceditur. Et 1. videtur, quod subjectum originalis peccati, non sit anima sed caro. Sicut enim peccatum actuale causatur per operationem alicujus potentiae, ita peccatum originale, per traductionem carnis; sed peccatum actuale est in illa potentia, sicut in subjecto, ejus est operatio per quam peccatum actuale committitur: ergo peccatum originale est in carne, sicut in subjecto, per ejus traductionem contrahitur.

2. Praeterea, peccatum originale est fomes, vel concupiscentia, ut supra Magister dixit; sed concu-

piscentia, vel est in carne, vel est in viribus carni annexis; ergo similiter peccatum originale.

3. Praeterea, si peccatum originale sit in anima, aut est in essentia aut in potentia; sed non in essentia animae, quia sic aequaliter omnes vires respiceret; quod patet esse falsum, cum generativa prae aliis dicatur esse infecta. Nec etiam potest esse in potentiis, cum potentiae ordinentur ad actum, quem originale peccatum non respicit; ergo anima nullo modo potest esse originalis peccati subjectum.

Sed contra. Opposita habent fieri circa idem: sed peccatum originale opponitur originali justitiae ejus subjectum erat anima; ergo et peccatum originale.

Praeterea, omnis defectus qui est in carne tantum, est poena et non culpa: quia sola anima culpae susceptiva est: si ergo originale non esset in anima, sed in carne, non esset culpa, sed poena tantum; ejus contrarium supra habitum est.

Respondeo. Dicendum, quod sicut supra dictum est, peccatum originale non respicit personam, nisi mediante natura. Ad naturam autem proprie pertinet ratio speciei, et quae ipsam consequuntur: ad personam autem, proprie pertinent actus qui sunt singularium, et potentiae quae ad actus ordinantur. Ipsa autem anima, in quantum est forma corporis, quod est per essentiam suam, perficit rationem speciei; et ideo peccatum originale respicit essentiam animae, sicut principale subjectum, et ex consequenti carnem, ejus actus est anima per suam essentiam: sicut etiam peccata actualia, quae sunt in concupiscibili et irascibili, sicut in principalibus subjectis, sunt etiam ex consequenti in organis, quorum praedictae vires sunt actus.

Ad primum ergo dicendum, quod traductio carnis, non hoc modo se habet ad carnem, sicut operatio potentiae ad potentiam. Nam potentia est principium suae operationis; sed caro est effectus suae traductionis, ejus principium est infectio naturae generantis, quae principaliter consistit in anima.

Ad secundum dicendum, quod concupiscentia non dicebatur esse originale peccatum, nisi originaliter et materialiter; sed consummative et essentialiter peccatum originale est carentia gratiae, vel justitiae originalis, ejus subjectum est essentia animae.

Ad tertium dicendum, quod peccatum originale habet essentiam animae pro subjecto, in quantum est perfectio naturae; et ideo praecipue potentias illas respicit quae ad actum naturae, scilicet generationis, immediatius ordinantur: in quo quidem actu vis generativa est ut exequens, concupiscibilis ut imperans, tactus ut delectationem causans. Et ideo vis generativa prae aliis viribus animae dicitur esse peccato originali infecta, et vis concupiscibilis prae aliis motivis, et tactus prae aliis sensibus: et hoc ideo, quia hujusmodi vires non solum in se inordinationem habent, sed etiam in alios transmittunt infectionem culpae.

ARTICULUS III.

Ad tertium sic proceditur. Et 1. videtur, quod baptizati originale peccatum non traducant in prolem. Peccatum enim originale non est in nobis, nisi in quantum ex Adam per generationem descen-

dimus: sed parvulus iste non generatur ex Adam, nisi mediante proximo parente, in quo non est infectio originalis peccati; ergo peccatum originale in filio ex eo generato, non contrahitur.

2. Praeterea, peccatum originale simul contrahitur cum natura: sed filius non posset trahere humanam naturam ex patre, qui eam non haberet; ergo nec peccatum originale potest trahi a patre baptizato.

3. Praeterea, ut Augustinus dicit in libro de Nuptiis et concupiscentia: libido, quae est filia peccati, peccatum originale causat in prole: sed possibile est aliquem baptizatum ad carnis commisionem ex libidine non moveri, vel si sit ibi libido non est filia peccati, cum peccatum originale jam sit per baptismum purgatum; ergo baptizatus non transmittit originale in prolem.

Sed contra. Baptismus principaliter contra originale ordinatur: sed pueri ex baptizatis nati per Ecclesiam baptizantur; ergo originale contrahunt.

Praeterea, ad hoc est exemplum de Circumcisione, quod in littera ab Augustino ponitur.

Respondeo. Dicendum, quod aliquid haberi potest dupliciter. Uno modo in actu. Alio modo in radice. Quando ergo aliquis baptizatur, peccatum originale desinit habere in actu, remanet originalis infectio in radice. Sicut enim dictum est, infectio originalis terminatur ad personam, sed causatur ex natura: per sacramentum autem baptismi, purgatur persona ab infectione originali, sed tamen manet inordinatio in natura; et ideo peccatum originale manet quodammodo in radice. Ea autem quae sic habentur a generante, per actum generationis traducuntur ad prolem, sicut attonsi generant capillatos, et circumcisi praepucios. Unde nihil prohibet peccatum originale a parentibus baptizatis traduci in prolem.

Ad primum ergo dicendum, quod peccatum originale ad quemlibet nostrum pervenit ex Adam, mediante proximo parente; qui etsi non habeat culpam originalem actualiter, habet tamen radicaliter, ut dictum est.

Ad secundum dicendum, quod natura non potest haberi in radice, quae habeatur in actu ab aliquo generante; sic tamen habetur a semine generantis; unde non est simile.

Ad tertium dicendum, quod licet baptizatus interdum ex libidine non moveatur ad carnis commisionem, tamen libido, ipsam carnalem commisionem inseparabiliter sequitur: et quamvis hoc non causetur ex peccato, sicut ex proximo principio, ipso generante a culpa originali purgato, causatur tamen sicut a primo principio a peccato primi parentis.

ARTICULUS IV.

Ad quartum sic proceditur. Et 1. videtur quod non semper homines cum peccato originali nascentur. Manente enim culpa, manet et poena: sed poena originalis peccati est necessitas moriendi, quae a quibusdam in fine mundi tollitur. Nam illi qui vivi in adventu domini reperientur, ulterius non moriuntur, ut Hieronymus sentire videtur; ergo illi in peccato originali non nascentur.

2. Praeterea, petitio generalis Ecclesia, non potest frustrari: sed Ecclesia communiter petit, ut sibi debita dimittantur, inter quae originale peccatum

continetur, ut Augustinus dicit; cum ergo ista petitio sit una de quatuor ultimis, quas Augustinus dicit ad praesentem statum pertinere, videtur, quod quandoque homines sine peccato originali nascentur.

3. Praeterea, secundum Augustinum, ut dictum est, ex libidine, quae actui generationis conjungitur, peccatum originale in prolem traducitur: sed possibile esset, ad minus divina virtute, ut absque tali libidine carnalis commistio fieret; ergo non est inconveniens dicere, quod aliqui quandoque sine peccato originali nascentur.

Sed contra est, quod habetur Rom. 5: « Mors in omnes homines pertransit, in quo omnes peccaverunt. » Loquitur autem de peccato originali, secundum Glossam Augustini; ergo omnes, qui in Adam fuerunt secundum seminalem rationem, in Adam peccato originali tenentur obnoxii. Sic autem in Adam fuerunt omnes, praeter Christum; ergo omnes, praeter eum, originale peccatum contrahunt.

Praeterea, super illud Psal. 50: « Ecce enim in iniquitatibus conceptus sum, » dicit Glossa: « Nemo nascitur nisi trahens poenam, et meritum poenae, nisi tu, qui de Spiritu sancto conceptus es. » Meritum autem poenae est originale peccatum, ut dictum est; ergo nullus nascitur sine originali peccato, praeter Christum.

Respondeo. Dicendum, quod sicut ex dictis patet, inde est, quod peccatum originale trahitur etiam ad filios baptizatorum, quia infectio praedicti peccati manet radicaliter in natura, etiam mundata persona per gratiam Christi. Et ideo non potest contingere, quod aliquis actu naturae ex alio propagetur absque originali peccato, nisi ponatur natura in generante esse totaliter purgata, et non solum persona; quod quidem simul debet esse in omnibus qui naturam unam participant: et hoc erit in resurrectione, quando in omnibus electis, natura humana ab omni infectione et corruptione mundabitur. Et ideo ante resurrectionem communem, nullus qui per actum naturae generatur, potest concipi sine originali peccato. Hoc etiam ponere, redit quodammodo in haeresim Pelagianorum: sequeretur enim parvulos, qui sine peccato originali nascuntur, redemptione facta per Christum non indigere.

Ad primum ergo dicendum, quod opinio illa, quae dicit aliquos in fine mundi absque morte in gloriam transferendos, communiter non tenetur: nec Hieronymus eam approbat, sed super hoc diversorum opinionem narrat. Contrariatur enim sententiae Apostoli, qua dicitur Rom. 5, quod « mors in omnes pertransit, » et I ad Cor. 15: « In Adam omnes moriuntur. » Nec tamen oportet, si aliqui divina virtute absque morte transferentur in gloriam, quod propter hoc a peccato originali fuerint immunis: quia poena peccati originalis, est directe necessitas moriendi: omnis tamen necessitas creaturae subest divino arbitrio: unde potest eos, qui necessitatem moriendi habent, a mortis corruptione liberare.

Ad secundum dicendum, quod a peccato originali liberationem impetrat Ecclesia pro spiritualibus filiis, qui regenerantur per Christi sacramenta, non ita quod in prima nativitate aliqui sine peccato originali nascentur: sic enim secunda nativitas locum non haberet.

Ad tertium dicendum, quod actualis libido in commistione carnali existens, est signum infectionis, radicaliter in natura existentis. Unde sublata actuali

libidine ab actu generationis, nihilominus sequeretur peccatum originale in prole, nisi radicalis infectio naturae tolleretur; quod non erit nisi in resurrectione communi.

DISTINCTIO XXXII.

Quoniam supra dictum est, peccatum originale etc. (V. edit. nostrae tom. VI, pag. 675.)

QUAESTIO UNICA.

Hic quaeruntur quatuor. 1.^o de remissione peccati originalis per baptismum; 2.^o De infectioe animae per corpus infectum; 3.^o utrum infectio originalis peccati sit in omnibus aequalis; 4.^o de inaequalitate et aequalitate animarum.

ARTICULUS PRIMUS.

Ad primum sic proceditur. Et 1. videtur, quod peccatum originale per baptismum non remittatur. Peccatum enim actuale non remittitur, quamdiu manet actus. Sed etiam post baptismum, peccatum originale manet actu, ut Augustinus dicit in lib. de Nuptiis et concupiscentia: ergo peccatum originale non remittitur per baptismum. Vel sic. Sicut se habet actus in peccato actuali, ut materialiter deformitati substans, ita etiam et concupiscentia in originali: sed non potest esse quod deformitas peccati tollatur manente actu peccati, quia tales actus sunt, qui bene fieri non possunt; ergo et manente tali concupiscentia, non potest originalis culpa deleri.

2. Praeterea, quales sunt habitus, tales actus redduntur, ut in secundo Ethicorum dicitur. Sed concupiscere, quod procedit ex concupiscentia inordinata, est peccatum post baptismum, sicut et ante; ergo concupiscentia, quae manet post baptismum, adhuc retinet rationem culpae.

3. Praeterea, remota causa removetur effectus: sed causa poenalitatum praesentis vitae est peccatum originale, ut supra dictum est; cum ergo hae poenalitates remaneant post baptismum, videtur quod peccatum originale per baptismum non remittatur.

Sed contra. Rom. 5 dicitur, « quod majus est donum Christi, quam peccatum Adae: » sed per peccatum Adae omnes nascuntur cum originali peccato; ergo multo amplius per donum Christi, omnes regenerati per baptismum, a peccato originali purgantur.

Praeterea, poena non aufertur manente culpa: sed poena originalis peccati est earentia visionis divinae, quae aufertur per baptismum. Baptismus enim januam regni caelestis aperit; ergo per baptismum culpa originalis remittitur.

Respondeo. Dicendum, quod in progressu originalis peccati, quaedam circulatio invenitur. Nam primo, quando persona corrumpit naturam, ex culpa consecutae sunt poenalitates spirituales, ut rebellio carnis ad spiritum, et corporales, ut fames et sitis, et alia hujusmodi. Postmodum vero quando natura inficit personam ex libidine, quae ad rebellionem carnis et spiritus pertinet, in quantum est filia peccati, secuta est peccati originalis infectio in persona generata. Sicut in primo parente culpa personalis, quae naturam inficit, remitti potuit per poenitentiam, remanente corruptione naturae: ita

etiam remanente fomite vel concupiscentia in generato, potest per baptismum ejus persona ab infectioe originalis culpae mundari, ut videlicet naturae corruptio, personae non imputetur in culpam.

Ad primum ergo dicendum, quod concupiscentia sive fomes, est materiale in peccato originali, sicut substantia actus in peccato actuali. Et quia concupiscentia manet post baptismum, quae est quasi actus originalis: ideo Augustinus dicit, quod manet actu, et transit reatu: sicut e contra, peccatum actuale quandoque transit actu, et manet reatu. Sciendum tamen, quod non est similis ratio de concupiscentia, et actu peccati actualis. Nam actus actualis peccati, quamdiu manet, subjacet voluntati agentis, non autem postquam transit: concupiscentia vero, dum manet, non subjacet voluntati habentis. Unde concupiscentia potest remanere sine culpa, non autem actus peccati actualis.

Ad secundum dicitur, quod ipsum concupiscere, est quodammodo in potestate personae concupiscentis: non autem concupiscentia habitualis, quae post baptismum manet: et ideo non est simile.

Ad tertium dicendum, quod ad originale peccatum duplex poena consequitur. Una inquantum respicit personam, scilicet earentia visionis divinae; et haec statim aufertur a persona per baptismum a peccato originali mandata. Alia vero est quae respondet ei, inquantum respicit originale peccatum ipsam naturam: unde purgata persona adhuc manet quamdiu natura totaliter purgetur, quod erit in resurrectione communi: et hujusmodi poenae sunt rebellio carnis ad spiritum per concupiscentiam, necessitas moriendi et alia hujusmodi.

ARTICULUS II.

Ad secundum sic proceditur. Et 1. videtur, quod anima ex hoc ipso quod corpori infunditur non maculetur originali culpa. Anima enim corpori unitur per hoc quod corpori infunditur: sed a Deo infunditur corpori, quia creando infunditur; si ergo ex hoc ipso quod corpori infunditur maculetur, videtur quod ejus maculationis Deus sit auctor: quod est impossibile, quia ipse non est auctor ejus rei cujus est ultor, ut Fulgentius dicit; ergo et primum est impossibile, scilicet quod anima ex unione ad corpus maculetur.

2. Praeterea, culpa non maculat nisi peccantem: sed anima non peccavit, nec in se, quia ante corpus non fuit, nec in primo parente, in quo originaliter non fuit; ergo non potest esse, quod ex unione ad corpus maculetur.

3. Praeterea, non est sapientis artificis taliter suum opus facere, quod suo fine frustretur: sed finis animae rationalis est beatitudo qua per maculam originalis peccati privatur; si ergo ex unione ad corpus praedictam maculam contrahit, videtur quod Deus non sit sapiens qui animam facit eam corpori uniendo. Hoc autem est impossibile; ergo et primum; scilicet quod ex unione ad corpus anima maculetur.

Sed contra. Perfectior est unio animae ad corpus, quam corporis ad corpus. Sed corpus inquinatur per contactum corporis immundi: unde dicitur Levit. 11: « Qui tetigerit cadaver, immundus erit; » ergo multo fortius anima ex unione ad corpus immundum maculetur.

Praeterea, anima ex hoc quod corpori unitur,

incipit pertinere ad naturam ex Adam tractam; haec autem est originali culpa maculata; ergo anima ex hoc quod corpori unitur, originali culpa maculatur.

Respondeo. Dicendum, quod sicut supra dictum est, ex peccato primi parentis non solum ejus persona est maculata, sed etiam ipsa natura humana: et haec macula est originale peccatum: quia per prius naturam respicit quam personam ex Adam generati. Unde ad rationem peccati originalis, nihil aliud requiritur, nisi participatio cum eadem natura humana ex Adam tracta. Et quia anima hujusmodi naturae fit particeps, quando corpori unitur, inde est quod ex unione ad corpus maculatur.

Ad primum ergo dicendum, quod licet Deus sit causa unionis animae ad corpus, non tamen est causa infectionis corporis, ex qua originale peccatum relinquitur in anima. Et ideo non est causa originalis peccati: sicut et causat substantiam actus in actuali peccato, non tamen deformitatem culpae actualis: quia ipse non causat obliquitatem voluntatis et actus ex qua est ratio culpae.

Ad secundum dicendum, quod licet in Adam anima non fuerit, fuit tamen in eo corpus cui naturaliter unitur. Nec ipsum peccatum originale respicit animam nisi in quantum est pars humanae naturae per unionem ad corpus.

Ad tertium dicendum, quod licet anima, per hoc quod originali inficitur, sine careat qui est proprius rationalis creaturae, nisi per baptismum mundetur; non tamen caret sine, qui sibi et omnibus creatoris est communis, scilicet per assimilationem ad Deum secundum divinae bonitatis participationem; et melius est saltem istum finem habere, quam utroque sine carere.

ARTICULUS III.

Ad tertium sic proceditur. Et 1. videtur, quod infectio originalis peccati, sit in uno major quam in alio. Augmentata enim causa crescunt effectus; sed libido quae est causa originalis peccati est major in uno quam in alio; ergo et originale peccatum in uno magis quam in alio consistit.

2. Praeterea, illud quod est aequaliter in omnibus non intenditur nec remittitur: sed fomes vel concupiscentia remittitur per baptismum sive minoratur; ergo non est necessarium quod in omnibus sit aequaliter; ergo nec culpa originalis in omnibus aequalis invenitur.

3. Praeterea, quantitas poenae respondet quantitati culpae. Deut. 33: « Pro mensura peccati erit « plagarum modus; » sed poenalitates praesentis vitae non sunt aequaliter in omnibus; ergo nec infectio originalis peccati.

Sed contra. Inordinatio voluntatis est causa culpae: ergo secundum ejus quantitatem, attenditur quantitas culpae: sed ab eadem inordinata voluntate, scilicet Adae, est infectio culpae originalis in omnibus, qui ex eo propagantur; ergo in omnibus est culpa aequalis.

Praeterea, peccatum originale directe respicit naturam humanam prout trahitur ex Adam per actum naturae: sed natura aequaliter est in omnibus; ergo et infectio originalis peccati.

Respondeo. Dicendum, quod illud quod participatur a pluribus secundum magis et minus differentiam inter participantia constituit: minus enim album a magis albo per intensionem et remissio-

nem distinguuntur. Unde illud quod participatur a pluribus, non in quantum sunt distincta, sed in quantum sunt unum, non potest participari ab eis secundum magis et minus. Peccatum autem originale communiter omnibus ex Adam genitis provenit secundum quod conveniunt in una radice; et ideo non convenit eis secundum magis et minus, sed in omnibus est aequaliter.

Ad primum ergo dicendum, quod libido quae est in commistione carnali, non est causa originalis peccati, secundum quod causatur ex peccato primi parentis. Unde, quantumcumque intendatur vel remittatur, quia habitudo ad illud peccatum semper eadem manet, ideo semper sequitur aequale peccatum.

Ad secundum dicendum, quod minoratio fomitis potest considerari tripliciter. Uno modo per appositionem gratiae qua spiritus fortificatur, et per consequens caro minus ei potest rebellare; et sic diminuitur per baptismum. Alio modo secundum conditionem principiorum naturalium, prout in uno ex naturali complexione vel etiam ex assuetudine multiplicantur vel minuuntur concupiscentiae incentiva; et sic iterum fomes vel concupiscentia minui potest. Tertio modo secundum ordinem ad primam fomitis causam quae est subtractio originalis justitiae per quam rebellio carnis ad spiritum impediatur; et sic fomes in omnibus est aequalis, et hoc modo pertinet ad originalem culpam. Unde et ipsa culpa in omnibus est aequalis.

Ad tertium dicendum, quod proxima poena originalis peccati in omnibus est aequalis, scilicet subtractio originalis justitiae; per quam et anima tranquillabatur, et corpus absque corruptione conservabatur; sed quod actuales poenae in uno sint fortiores quam in alio contingit ex diversitate principiorum naturalium et agentium exteriorum.

ARTICULUS IV.

Ad quartum sic proceditur. Et 1. videtur, quod animae ex sui creatione non sint inaequales. Diversitas enim formalis non facit differentiam speciei, nisi quatenus sequitur materiae diversitatem: sed id quod anima habet ex sui creatione non est ei ex parte materiae corporalis: si ergo animae humanae inaequales fuerunt ex sua creatione, videtur quod non omnes homines sint unius speciei: quod est inconveniens.

2. Praeterea, Gregorius dicit, quod natura omnes homines sunt pares: hoc autem non esset, si una anima ex sua creatione esset dignior anima alterius; ergo omnes animae ex sua creatione sunt aequales.

3. Praeterea, in Angelis, qui ex sua creatione sunt natura inaequales, secundum mensuram naturalium gratuita conferuntur: sed hoc non contingit in hominibus; ergo animae ex sua creatione non sunt inaequales.

Sed contra. Secundum diversitatem finis diversificantur ea quae sunt ad finem, et non e converso: sed anima est finis corporis, ut patet per Philosophum 2 de Anima; ergo diversitas quae est in hominibus secundum corpora causatur ex diversitate animarum, et non e converso; et sic oportet quod animae ex sua creatione sint inaequales.

Praeterea, instrumenta assignantur arti secundum artificis conditionem: sed anima comparatur

ad corpus, sicut artifex ad instrumenta, ut patet per Philosophum 1 de Anima; ergo secundum diversitatem animarum diversa corpora eis aptantur; et sic idem quod prius.

Respondeo. Dicendum, quod de anima est duplex opinio. Quidam enim dicunt, quod est composita ejus substantia ex aliquo materiali et formali; et secundum hoc potest dici, quod absque diversitate speciei potest in animabus inaequalitas inveniri secundum seipsas per diversitatem; ejus quod est materiale in anima. Alii vero dicunt, quod anima est forma simplex: unde omnis differentia quae esset ex parte ipsius in differentiam speciei resultaret, nisi sit talis diversitas quae ex corpore originemumat. Unde secundum hanc opinionem dici oportet, quod ex hoc ipso quod corpora sunt diversa, sequitur quod animae quae in ipsa creatione corporibus infunduntur diversitatem habeant: aliter enim est de differentia speciei et de differentiis individuorum in eadem specie. Nam quantum ad ea quae ad speciem pertinent, diversitas materiae sequitur diversitatem formae: sed quantum ad accidentia individuantia est e converso. Et ex his de facili patet responsio ad objecta secundum utramque opinionem. Prima enim ratio supponit quod ex sui creatione individuatio non sit animae ex parte corporis. Secunda supponit quod homines sint pares quantum ad naturam individui et non tantum speciei. Tertia supponit, quod secundum mensuram tantum naturalium, sine conatu data sit Angelis gratia. Quarta supponit, quod secundum diversitatem finis qui est forma, sit diversitas materiae, non tantum quantum ad ea quae ad speciem pertinent, sed etiam quantum ad accidentia individuantia; cum tamen in his sit e converso. Quinta supponit, quod instrumentum conjunctum assimilatur arti, secundum artis conditionem, non tantum in his quae pertinent ad speciem, sed in his quae pertinent ad individuum: cum tamen in his sit e converso.

DISTINCTIO XXXIII.

Praedictis adjiciendum videtur etc. (V. edit. nostrae tom. VI, pag. 684.)

QUAESTIO UNICA.

Hic quaeruntur quatuor: 1.^o utrum parvuli inquinentur peccatis proximorum parentum; 2.^o utrum pro patris culpa filius juste possit puniri; 3.^o utrum peccatum originale sit in uno homine unum; 4.^o de poena parvulorum cum originali decedentium.

ARTICULUS I.

Ad primum sic proceditur. Et 1. videtur, quod ex peccatis proximorum parentum, filii inquinentur. Quanto enim aliquid est propinquius, tanto efficacius agit: sed peccatum proximi parentis est in filio propinquius quam peccatum Adae: cum ergo ex illo peccato omnes ex Adam progeniti, inquinentur; videtur quod multo fortius per peccatum proximorum parentum.

2. Praeterea, peccatum actuale majoris est infectionis quam quaevis poena: sed aliqua poena proximi parentis transmittit peccatum in prolem,

scilicet libido carnali commitioni adjuncta; ergo multo fortius peccatum actuale proximi parentis infect prolem.

3. Praeterea, natura humana non est totaliter peccato primi parentis infecta, alias non posset magis infecti per peccata sequentia: sed quando natura erat totaliter integra, potuit per peccatum actuale primi parentis infecti, ut sic transmitteretur in prolem; ergo et quamdiu aliquid integritatis manet, potest per peccata sequentia proximorum parentum aliquid infectionis superaddi, quod redundet in prolem: et sic idem quod prius.

Sed contra est quod dicitur Rom. 5: « Per unum hominem peccatum in mundum intravit, et per peccatum mors: » si autem proximorum parentum peccata in filios traducerentur, non per unum solum hominem in mundum mors introisset, sed per plures; ergo peccata proximorum parentum per originem non traducuntur.

Praeterea, majoris efficaciae est gratia quam peccatum; sed gratia, qua peccatum originale remittitur, non redundat a proximo parente in prolem, alias baptizatorum filii sine peccato originali nascerentur; ergo nec peccata proximorum parentum in filios traducuntur.

Respondeo. Dicendum, quod genitus a generante numero differt: convenit autem cum eo in natura speciei. Unde ea quae ad naturam pertinent, a parente traducuntur in prolem, non ea quae pertinent ad ipsam personam generantis. Unde peccatum actuale, quod Adam personaliter commisit, in filios traduci non potuisset, nisi per illud peccatum natura fuisset vitiata: quod contingit per hoc quod toti humanae naturae collata originalis justitia per peccatum praedictum est subtracta. Nihil autem remansit eorum quae ad totam naturam pertinebant, quod esset subtrahibile per peccatum; et ideo sequentia peccata actualia naturam infectere vel corrumpere non poterant; et propter hoc sequentia peccata vel ipsius Adae, vel aliorum parentum, in filios traduci non possunt.

Ad primum ergo dicendum, quod natura humana, quae infectur per peccatum primi parentis, est proximior genito, quam parens propinquus, qui suo peccato naturam infectere non potest, ut dictum est. Unde ratio non sequitur.

Ad secundum, quod libido illa non transmittit peccatum in prolem, nisi in quantum ex peccato primi parentis procedit.

Ad tertium dicendum, quod natura humana remanet corruptibilis per peccata sequentia, quantum ad ea quae sunt singularium personarum; non quantum ad ea quae sunt totius naturae.

ARTICULUS II.

Ad secundum sic proceditur. Et 1. videtur, quod filii quandoque pro patribus puniantur. Dicitur enim Exod. 20: « Ego sum Deus zelotes, visitans iniquitates patrum in filios in tertiam et quartam generationem. » Nec est hoc propter peccata filiorum, eo quod patres imitentur: quia sic nulla generatio determinaretur, nec magis peccata patrum in filios visitari dicerentur, quam quorumlibet aliorum, quos etiam homines imitantur in peccatis; ergo directe pro peccatis parentum filii divina poena visitantur.

2. Praeterea, justitia humana exemplata est a divina: sed secundum humanam justitiam, filii pro

peccatis parentum exhaeredantur; ergo secundum justitiam divinam puniuntur filii pro peccatis parentum.

3. Praeterea, sicut populus gubernatur a rege, ita filii a parentibus: sed populus quandoque punitur pro peccato regis, sicut patet 2 Reg. ult., quod peccatum David, quo populum numeravit, per pestilentiam in populo est punitum; ergo et filii pro peccatis puniuntur.

Sed contra est quod dicitur Deut. 24: « Non occidentur patres pro filiis, nec filii pro patribus. »

Praeterea, innocentes puniri non debent: sed contingit filios esse innocentes ex parentibus peccatoribus natos; ergo filii pro peccatis parentum puniri non debent.

Respondeo. Dicendum, quod duplex est poena. Una, qua quis punitur in bonis animae: et quia animam filius a patre non trahit, sed habet immediate a Deo, ideo tali poena filii pro peccato patris nullo modo puniuntur: et hoc est quod significatur Ezechielis 18: « Omnes animae meae sunt, ut anima patris, et ita anima filii mea est. » Alia poena est, qua quis punitur in bonis corporis, vel exterioribus, quae, vel filius habet a patre, vel per ea debet patri providere: et tali poena quandoque punitur filius pro peccato patris, quasi res quaedam patris existens, sicut occiduntur pecora, dirimuntur domus, in quibus nulla est culpa, pro eo quod sunt res peccatoris, qui in eis punitur. Huiusmodi etiam poenae non semper inferuntur pro peccato quod quis personaliter commisit: sed quandoque ad exercitium justitiae, sicut fuit in Job, vel ad custodiam virtutis in Paulo. Unde non est inconveniens si huiusmodi poenis innocentes filii pro peccatis patrum puniuntur. Vel dicendum, quod auctoritas illa intelligitur de poena temporali, et in illis qui imitando peccatum parentum, non praestant impedi- mentum vindictae. Et per hoc patet solutio ad objecta. Nisi quod ad primum oportet dicere, quod ideo tertia et quarta generatio determinatur, et potius fit mentio de peccato parentum quam aliorum, quia filii liberius imitantur peccata parentum, utpote a pueritia in eis nutriti, et praecipue illorum quorum memoria adhuc manet, quod est in tertia et quarta generatione. Unde et ipsi magis quam parentes puniuntur, quia ex majori contemptu et libidine peccant.

ARTICULUS III.

Ad tertium sic proceditur. Et 1. videtur, quod originale peccatum non sit unum sed multa. Unum enim accidens non potest esse in diversis substantiis: sed per originale peccatum omnes potentiae animae corrumpuntur; ergo originale peccatum non est unum.

2. Praeterea, effectus proportionatur causae; sed causa originalis peccati est peccatum Adae, in quo fuerunt multa peccata, ut supra Magister dixit; ergo originale peccatum non est unum sed multa.

3. Praeterea, unum et idem non inclinatur ad diversa et contraria: sed originale peccatum inclinatur ad omnia peccata actualia, cum sit pronitas ad omne malum, ut Anselmus dicit: peccata autem actualia sunt diversa, et ad invicem contraria; ergo peccatum originale non est unum.

Sed contra est quod dicitur in Glossa, Rom. 5, quod unus homo unum peccatum transmisit in S. Th. Opera omnia. V. 22.

mundum, et loquitur de peccato originali; ergo etc.

Praeterea, peccatum originale est peccatum naturae: natura autem est una; ergo et peccatum originale est unum.

Respondeo. Dicendum, quod unitas et multitudo in defectibus et privationibus attendenda est secundum ea quae desunt vel privantur. Id autem quod privatur per originale peccatum, est unum, scilicet originalis justitia: unde et peccatum originale est unum. Nec potest dici quod multiplicetur ex parte causae, sicut deformitates peccatorum actualium, quibus una gratia tollitur, multiplicantur per comparisonem ad actus inordinatos, per quos gratia auferitur. Nam originalis deformitatis causa est primum peccatum primi parentis, ut supra habitum est; hoc autem oportet esse unum. Unde omnibus modis originale peccatum habet unitatem.

Ad primum ergo dicendum, quod in aliquibus pluribus adunatis potest esse defectus communiter duobus modis. Aut quia singulorum singulae perfectiones tolluntur, et sic oportet plurimum plures esse defectus; sicut si oculis subtrahatur visus, auribus auditus, et sic de aliis. Alio modo per hoc quod ab omnibus subtrahitur unum continens commune; et sic est unus defectus plurimum; sicut per unam febrem singula membra debilitantur, virtute regitiva totius corporis debilitata. Et per hunc modum uno peccato originali omnes potentiae animae corrumpuntur, in quantum privantur originali justitia, qua omnes potentiae animae in ordine debito continebantur.

Ad secundum dicendum, quod quamvis in peccato Adae plura fuerunt, tamen unum illorum fuit primum, scilicet peccatum elationis, ut ex supra dictis patet; et hoc solum naturam humanam infectum originali peccato, ut dictum est.

Ad tertium dicendum, quod originale peccatum non inclinatur ad singula peccata actualia per se et directe, sed indirecte et quasi per accidens, in quantum auferit originalem justitiam, per quam continebatur vires animae, ne in peccatum laberentur; et sic est quasi removens prohibens.

ARTICULUS IV.

Ad quartum sic proceditur. Et 1. videtur, quod descendantibus pueris cum peccato originali poena sensibilis debeatur. Majori enim culpae debetur major poena; sed originale peccatum est majus quam veniale, quia originale facit indignum vita aeterna, non autem veniale: sed veniali peccato debetur poena sensibilis; ergo etiam et originali.

2. Praeterea, ad poenam sensibilem pertinet ignis et vermis. Per vermem autem intelligitur interior afflictio quae pueris, ut videtur, deesse non potest, cum damnatum maximum quod incurrunt cognoscant; ergo pueri cum originali decedentes poena sensibili puniuntur.

3. Praeterea, non remittitur reatus poenae nisi culpa remissa: sed per peccatum originale aliquis obligatur ad poenam sensibilem, sicut ad mortem et poenales vitae praesentis; ergo, cum pueris non baptizatis non sit culpa originalis remissa, videtur quod poena sensibili sint puniendi.

Sed contra. Acerbitas poenae sensibilis respondet delectationi culpae, ut dicitur Apoc. 18: « Quantum glorificavit se et in deliciis fuit, tantum

• date ei tormentum et luctum; • sed in peccato originali non est aliqua delectatio, sicut nec operatio; delectatio enim operationem consequitur, ut ex 10 Ethicorum patet; ergo nec in pena erit aliqua sensibilis afflictio.

Praeterea, ponitur communiter, quod pueri non baptizati specialem locum habent, in quo manebunt praeter consortium aliorum damnatorum: hoc autem non esset si poena sensibili non punirentur, sicut et alii; ergo poena sensibili non punientur.

Respondeo. Dicendum, quod in his qui ex Adam nascuntur infectio originalis peccati pervenit ad personam ex infectione naturae; unde et personae pro tali peccato poena non debetur, nisi talis quae pertinet ad conditionem naturae sibi relictæ. Pertinet autem ad naturam relictam sibi, ut divina visione careat, ad quam consequendam deficit omnis facultas naturae creatæ. Pertinent etiam ad naturam humanam sibi relictam mors et poenalitates vitae praesentis, quae ex principiis naturae proveniunt. Sed poena sensibilis in anima separata non pertinet ad conditionem naturae: unde tali poena pueri sine baptismo decedentes non puniuntur: sed sola earentia visionis divinae.

Ad primum ergo dicendum, quod veniale peccatum est peccatum personae: et ideo potest puniri alia poena personali quae non pertineat ad conditionem naturae: non autem originale, quod est peccatum naturae.

Ad secundum dicendum, quod quidam dicunt, puerorum non baptizatorum animas esse adeo obtenebratas, quod non cognoscunt damnum quod incurrerunt pro peccato originali. Sed hoc non videtur verum; cum alii damnati, qui magis sunt obtenebrati, hoc damnum cognoscant, et exinde affligantur. Et ideo dicendum est quod cognoscunt, et tamen non affliguntur, quia sciunt nunquam in sua potestate fuisse bonum consequi quo privantur; sicut rusticus non affligitur de hoc quod non est rex: affligeretur autem si rex esset potuisset.

Ad tertium dicendum, quod poenae sensibiles praesentis vitae pertinent ad conditionem naturae sibi relictæ; non autem poenae sensibiles quae sunt post mortem; et ideo non est simile.

DISTINCTIO XXXIV.

Post praedicta de peccato actuali etc. (V. edit. nostrae tom. VI, pag. 695.)

QUAESTIO UNICA.

Hic quaeruntur quatuor: 1.º utrum malum aliquid sit; 2.º de causa mali; 3.º de subjecto; 4.º de effectu.

ARTICULUS I.

Ad primum sic proceditur. Et 1. videtur, quod malum aliquid sit. Nullus enim debet puniri pro nihilo: punitur autem aliquis de malis quae facit; ergo malum aliquid est.

2. Praeterea, id quod nihil est non potest esse neque genus, neque differentia, neque contrarium: sed malum est genus, quia bonum et malum sunt genera aliorum, secundum Philosophum in Praedicamentis. Est etiam differentia in habitibus animae, qui differunt per bonum et malum. Contrariatur

etiam malum bono secundum Philosophum in Praedicamentis; ergo malum aliquid est.

3. Praeterea, quod non est, non potest agere: sed malum agit, quia pugnat contra bonum et corrumpit ipsum, ut Dionysius dicit; ergo malum aliquid est.

Sed contra est quod Augustinus dicit, quod inquantum sumus, boni sumus; et eadem ratione, inquantum aliquid est, bonum est.

Praeterea, bonum et ens convertuntur: sed malum non est bonum; ergo malum nihil est.

Respondeo. Dicendum, quod malum dupliciter accipitur. Uno modo in abstracto. Alio modo in concreto. Abstracte accipiendo malum, hoc modo est, sicut et aliae privationes sunt, ut caecitas, aut surditas; nam malum nihil est nisi privatio boni. Hujusmodi autem privationes dicuntur esse, non quia habeant aliquam essentiam, sic enim nihil sunt; sed secundum quod esse significat veritatem propositionis, prout respondetur ad quaestionem an est. Si enim quaeratur, an caecitas sit, respondetur quod est, propter hoc quod invenitur in oculo talis defectus. Si autem quaeratur quid est, respondetur, nihil est, quia non habet essentiam. Accipiendo vero malum concrete, sive dicatur malum, quod est subjectum talis privationis, sine quod est causa, malum aliquid erit, etiam ut essentiam habens; non inquantum malum, sed inquantum tale vel tale ens; sicut aer tenebrosus aliquid est, non inquantum est tenebrosus, sed inquantum corpus quoddam.

Ad primum ergo dicendum, quod cum aliquis punitur pro malo quod facit, non ponitur pro nihilo, sed pro hoc quod facit in sua actione nihilum, id est inordinationis defectum.

Ad secundum dicendum, quod malum non est genus, nec differentia, nec contrarium, nisi in concretione acceptum.

Ad tertium dicendum, quod malum in concretione acceptum pugnat et corrumpit active, non ex virtute mali, sed ex virtute boni, ut Dionysius dicit. Sed in abstractione acceptum corrumpit non active, sed formaliter: sicut caecitas dicitur corrumpere visum, quia est corruptio visus.

ARTICULUS II.

Ad secundum sic proceditur. Et 1. videtur, quod bonum causa mali esse non possit. Dicitur enim Matth. 7: • Non potest arbor bona fructus malos • facere. • Effectus autem comparatur ad causam, sicut fructus ad arborem; ergo ex causa bona malus effectus consequi non potest.

2. Praeterea, si bonum est causa mali; aut inquantum est bonum, aut inquantum deficiens. Si inquantum bonum; ergo nihil prohibet summum bonum esse causam mali. Si autem inquantum est deficiens, defectus autem ipse quoddam malum est, sequitur quod malum est causa mali; non ergo bonum.

3. Praeterea, omne bonum est a primo bono; quicquid autem est causa causae, est causa effectus; si ergo aliquod bonum est causa mali, sequitur quod primum bonum sit causa mali; quod est inconveniens; ergo bonum non est causa mali.

Sed contra. Nihil est causa, nisi secundum quod aliquo modo influit vel agit: sed malum non agit nisi virtute boni, ut dicit Dionysius; ergo malum non potest esse causa boni, nisi virtute boni.

Praeterea, omnis causa diffundit seipsam in ef-

fectum: hoc autem pertinet ad rationem boni; nam bonum est diffusivum suiipsius; ergo nihil potest esse causa mali nisi bonum.

Respondeo. Dicendum, quod malum non habet causam per se, eo quod non potest esse intentum; quod enim est intentum, habet rationem finis et boni. Unde sequitur, quod malum non habeat causam nisi per accidens; quae quidem causa per se intendit bonum: sed malum intendit (1) praeter intentionem causae. Boni autem per se causa non potest esse nisi bona; unde oportet mali causam bonam esse. Causatur autem ex bono malum, in quantum bonum, quod ex causa bona operatur, est incompetens alicui; et ex hoc sequitur ratio mali. Non enim omne bonum est cuilibet competens. Et sic etiam ipsa voluntas, quae de se bona est, in quantum tendit per appetitum in aliquod bonum, quod non est sibi conveniens, fit causa culpa.

Ad primum ergo dicendum, quod verbum Domini referendum est ad voluntatem actualem, quae si bona sit in actu, causa peccati esse non potest; et si mala, actus ex ipsa procedens non potest esse bonus.

Ad secundum dicendum, quod bonum potest esse causa mali ex hoc, quod est particulare bonum: hinc enim habet quod bonum ex eo causatum, non est omnibus conveniens, sed alicui. Primum autem bonum, idest Deus, non est particulare bonum, sed est bonum omnis boni, ut Augustinus dicit. Et ideo causa mali esse non potest.

Ad tertium dicendum, quod quicquid est causa causae, in quantum est causa, est causa efficiens. Bonum autem causatum est creatum a Deo, secundum quod est bonum. Sed est causa mali, secundum quod est particulare, et distans a perfectione summi boni. Hoc autem non est in bono creato; immo hoc habet secundum quod est ex nihilo. Unde non sequitur, quod Deus sit causa mali.

ARTICULUS III.

Ad tertium sic proceditur. Et 1. videtur, quod subjectum mali bonum esse non possit. Malum enim est privatio boni: sed habitus non potest esse subjectum privationis, sicut nec affirmatio negationis; ergo bonum non potest esse subjectum mali.

2. Praeterea, plus convenit subjectum et accidens, quam duo accidentia unius subjecti; sed duo contraria accidentia non possunt esse simul in eodem subjecto, cum includant affirmationem et negationem, quae simul esse non possunt; ergo multo minus unum contrarium potest esse alterius subjectum; sed malum et bonum sunt contraria; ergo bonum, subjectum mali esse non potest.

3. Praeterea, bonum habet rationem perfecti, malum vero est perfectionis privatio: sed quod est privatio perfectionis non potest esse perfectum; ergo bonum non potest esse mali subjectum.

Sed contra. Nihil potest esse alienius subjectum, nisi substantia: sed omnis substantia bonum est, utpote a Deo creata; ergo mali subjectum non potest esse nisi bonum.

Praeterea, si mali subjectum non esset aliquod bonum, sed malum, sequeretur quod aliquod esset malum integrum: hoc autem est impossibile, quia secundum Philosophum in 4 Ethicorum: «Malum si integrum sit, importabile fit, et destruit seipsum;» ergo subjectum mali non potest esse nisi bonum.

(1) *Lege incidit.*

Respondeo. Dicendum, quod malum, ut ex dictis patet, est boni privatio. Non autem quaelibet carentia boni, malum dici potest. Non enim est malum lapidi, quod ratione caret. Illius ergo carentia boni malum est, quod est debitum et conveniens haberi. Id autem cui convenit aliquod bonum habere, non potest esse nisi bonum. Nam malum bono non convenit. Unde relinquatur, quod subjectum mali non possit esse nisi aliquod bonum.

Ad primum ergo dicendum, quod privatio formae specialis non potest esse sicut in subjecto in habitu vel forma cui opponitur directe et in speciali; sed privatio formae generalis potest esse sicut in subjecto, in eo quod sibi opponitur in generali, et non in speciali. Malum autem est privatio bonitatis, quae est perfectio generalis omnibus entibus communis: et ideo malum est sicut in subjecto in bono: quod quidem sibi opponitur secundum communem rationem boni et mali, non autem secundum specialem rationem huius boni et huius mali: sicut malum culpa non contrariatur bono naturae secundum speciales rationes, sed solum secundum generales.

Ad secundum dicendum, quod malum non est sicut in subjecto in bono, quod ei in speciali contrariatur; est tamen sicut in subjecto in bono, quod ei opponitur in generali, ut dictum est.

Ad tertium dicendum, quod nihil prohibet id, quod est una perfectione perfectum, per defectum alterius perfectionis, quae superaddi deberet, imperfectum dici.

ARTICULUS IV.

Ad quartum sic proceditur. Et 1. videtur, quod malum totaliter corrumpat bonum. Quod enim per se alicui convenit, convenit ei semper: sed malum, in quantum huiusmodi, corrumpit bonum; ergo semper corrumpit bonum: ergo finaliter totum consumet.

2. Praeterea, omne finitum per divisionem aliquoties factam consumitur: sed bonum creatum est finitum; si ergo primum malum aliquid de bono corrumpit, videtur quod multiplicatio mali totum corrumpat.

3. Praeterea, malum non requirit bonum, nisi ad hoc quod in eo fundetur, sicut in subjecto; ergo omne bonum, quod non est mali subjectum, potest totum consumi per malum: sed bonum, quod per malum diminuitur, non est mali subjectum, quia nullum accident diminuit suum subjectum; ergo bonum, quod per malum diminuitur, potest totaliter per malum consumi.

Sed contra. Malum non potest esse nisi in bono, ut dictum est; sed si totum bonum consumeretur, iam non esset in bono; ergo malum non potest totum bonum consumere.

Praeterea, malum non consumit nisi bonum quod ei opponitur: sed non totum bonum opponitur alicui particulari malo; ergo per aliquod malum non potest totum bonum corrumpi.

Respondeo. Dicendum, quod aliquod bonum est, quod totum per malum tollitur, scilicet bonum quod opponitur malo; sicut visus per caecitatem, et gratia per culpam. Aliquod vero bonum est, quod nec tollitur, nec diminuitur per malum; scilicet bonum in quo malum fundatur, sicut in subjecto: sicut aer non diminuitur per tenebras, nec substantia animae per culpam. Aliquod autem bonum

est, quod non totaliter tollitur, sed tamen diminuitur per malum, et potest in infinitum diminui, si in infinitum multiplicetur malum: et hoc bonum est habitas, vel ordo ad bonum: quae quidem diminuitur per malum, in quantum elongatur a bono; non tamen potest totaliter tolli, quia sequitur naturam illius rei, in qua malum fundatur.

Ad primum ergo dicendum, quod malum non corrumpit bonum active, sed formaliter; si abstractio accipiatur ut supra dictum est. Unde idem malum semper corrumpit bonum, in quantum semper est boni corruptio; non tamen sequitur, quod continue bonum diminuatur.

Ad secundum respondent quidam, quod aliquod finitum, per divisionem potest diminui in infinitum, et tamen totaliter non consumetur, si servetur in dividendo eadem proportio, et non eadem quantitas. Si enim a linea centum pedum dematur continue unus pes, tandem tota linea consumetur. Si autem dematur medium lineae, et iterum medium medii, et sic inde, nunquam stabit divisio. Hoc autem in proposito locum non habet: quia non est ratio, quare secundum malum non tantum in quantitate corrumpat de bono quantum primum, vel etiam amplius. Et ideo aliter dicendum est, quod illa habitas non diminuitur per subtractionem, sed per elongationem quae fit per appositionem contrarii; sicut corpus per hoc quod subicitur albedini, ejus habitas a nigredine elongatur, et tanto amplius quanto albedo fuerit intensior: et si albedo posset in infinitum intendi, semper fieret minor habitas; nunquam tamen totaliter tolleretur, quoadiu corporis natura maneret, quam intensio albedinis non tollit. Similiter, augmentum culpae non tollit naturam animae, ad quam sequitur habitas ad bonum. Unde talis habitas nunquam consumitur, licet semper per peccatum diminuatur.

Ad tertium dicendum, quod habitas praedicta est medium inter bonum subjecti mali in quo ipsa habitas radicitur, et bonum quod est malo contrarium, quod est habitas praedictae terminus; et ideo medio modo se habet; quia diminuitur, sed non totaliter consumitur.

DISTINCTIO XXXV.

Post hoc videndum est quid sit peccatum etc. (*V. edit. nostrae tom. VI, pag. 701*)

QUAESTIO UNICA.

Hic quaeruntur quatuor: 1.^o de divisione mali per poenam et culpam; 2.^o utrum malum culpae semper consistat in actu; 3.^o utrum semper in actu interiori; 4.^o utrum actus in quo peccatum consistit, sit a Deo.

ARTICULUS I.

Ad primum sic proceditur. Et 1. videtur, quod malum culpae inconvenienter contra malum poenae dividatur. Corruptio enim passiva quaedam poena est, ut in litera dicitur: sed omne malum, in abstractione loquendo, est privatio boni formaliter, et ita passive; ergo omne malum est malum poenae. Non ergo malum culpae contra malum poenae dividi debet.

2. Praeterea, culpa et poena non sunt nisi in rationali creatura; sed malum est in pluribus aliis; ergo inconvenienter malum per culpam et poenam dividitur.

3. Praeterea, ea quae ex opposito dividuntur sunt simul, secundum Philosophum in Praedicationis; sed culpa et poena non sunt simul: nam malum per prius dicitur de culpa quam de poena, cum culpa sit causa poenae: ergo malum inconvenienter per culpam et poenam dividitur.

Sed contra. Voluntarium et involuntarium convenienter contra se dividuntur: sed malum culpae habet rationem voluntarii, poena autem involuntarii; ergo convenienter poena contra culpam dividitur.

Praeterea, agens contrariatur patienti, secundum Philosophum, in lib. de Generat., contraria autem ad invicem convenienter dividuntur: cum ergo culpa et poena distinguantur secundum actionem et passionem; videtur quod culpa et poena convenienter ad invicem distinguantur.

Respondeo. Dicendum, quod creatura rationalis habet aliquam rationem bonitatis omnibus creaturis communem, et aliquam propriam sibi. Quod enim perficiatur formis ad esse, et bene esse, hoc sibi et omni creaturae commune est. Quod autem habeat dominium super suam operationem, quae est ejus bonum, et quae in ipsa manens, non in exteriorem materiam tendit, hoc est proprium sibi, ut patet de actu voluntatis. Sciendum tamen quod etiam ea quae creatura rationalis cum aliis habet communia, quodammodo voluntati subduntur in ipsa, et sic quodammodo ei conveniunt. Malum igitur per quod proprium bonum rationalis creaturae corrumpitur, dicitur malum culpae: Malum vero quo corrumpitur bonum, quod sibi et aliis est commune, quantum ad modum habendi, licet forte non quantum ad substantiam rei habitae, dicitur malum poenae, in quantum est ejus voluntati contrarium. Unde privatio cujuscumque quod creatura rationalis non habet ad perfectionem sui esse, vel ad esse, poena vocatur.

Ad primum ergo dicendum, quod formalis privatio boni non habet rationem poenae, nisi quando rationalis creatura formaliter aliquo bono privatur. Malum vero culpae attenditur, secundum quod actus creaturae rationalis, formaliter aliquo bono privatur, et non ipsamet: unde ratio non sequitur.

Ad secundum dicendum, quod ista divisio mali, non est divisio mali communis, sed mali quod est proprium creaturae rationalis, in qua specialis ratio bonitatis invenitur.

Ad tertium dicendum, quod verbum Philosophi intelligitur de divisione univoce: malum autem analogice de culpa et poena praedicatur per prius de culpa quam de poena, quia principale bonum creaturae rationalis est ejus operatio, in ejus defectu culpa consistit: nam operatio est ejus ultima felicitas.

ARTICULUS II.

Ad secundum sic proceditur. Et 1. videtur, quod peccatum sine aliquo actu esse non possit. Peccatum enim est factum vel dictum vel concupitum contra legem Dei: sed in his omnibus aliquis actus designatur; ergo peccatum sine actu esse non potest.

2. Praeterea, omne peccatum voluntarium est: sed nihil dicitur voluntarium nisi per actum vo-

luntatis; ergo in quolibet peccato oportet esse aliquem actum.

5. Praeterea, posita causa punitur effectus; si ergo non agere sit causa peccati, sequitur quod continue peccet aliquis quaecumque non agit; et sic peccatum omissionis esset gravius quam commissionis, quod non continue agitur: quod est falsum;—ergo et primum, scilicet quod peccatum possit esse sine actu.

Sed contra. Nullus juste punitur nisi pro aliquo peccato: sed juste aliquis punitur, ex hoc solo quod non facit quod facere debet; ergo ex hoc solo aliquis peccat quod non agit; et sic ad peccatum non requiritur actus.

Praeterea, omne peccatum in quo est actus aliquis, est actuale peccatum; si ergo in omni peccato actus requiratur, sequitur quod omne peccatum sit actuale; quod est falsum.

Praeterea, si peccatum sine actu esse non possit, cessante actu cessabit peccatum: hoc autem est falsum: quia adhuc post actum remanet aliquis peccato subjectus; ergo peccatum sine actu esse potest.

Respondeo. Dicendum, quod sicut dictum est, malum culpae consistit in hoc, quod creatura rationalis destituitur bono propriae operationis, cuius est domina. Hoc autem bono potest destitui dupliciter. Uno modo, quia operatio debita totaliter tollitur; et sic est peccatum omissionis. Alio modo, quia operatio debita bonitate privatur; et hoc est peccatum commissionis. Sicut autem actus inordinatus rationem culpae non habet nisi secundum hoc quod voluntati est subjectus, ita nec actus omissionis culpae rationem habere potest, nisi secundum quod voluntati subicitur. Ad hoc autem non requiritur aliquis actus voluntatis, quo quis velit non facere quod tenetur; sed sufficit voluntatis potestas, quia potest facere et non facere. Quidam tamen dicunt quod omissionis peccatum esse non potest sine actu, ad minus interiori. Sed hoc non videtur: quia contingit quandoque quod voluntas, nec ad actum debitum, nec ad oppositum movetur, nec ad aliquid ex quo rationem culpae habere possit; et tamen aliquis efficitur reus omissionis si non faciat quod tenetur. Unde relinquitur quod contingit esse peccatum absque omni actu.

Ad primum ergo dicendum, quod in hoc quod dicitur dictum vel factum vel concupitum, intelliguntur etiam opposita. Sicut enim in idem genus reducitur quiescere et moveri, ita concupiscere et non concupiscere; et sic de aliis.

Ad secundum dicendum, quod ipsa omissio voluntaria, non de necessitate dicitur propter voluntatis actum, sed propter hoc quod in potestate voluntatis consistit.

Ad tertium dicendum, quod non quaecumque aliquis non agit peccatum omissionis incurrit, sed tunc solum quando agere tenetur: praecepta enim affirmativa quae obligant ad agendum, etsi obligent semper, non tamen ad semper.

Quartum concedimus.

Ad quintum dicendum, quod peccatum primum originale, etsi in se actum non habeat, habet tamen rationem culpae, ex actu primi parentis.

Ad sextum dicendum, quod etiam peccata quae in actu consistunt, manere dicuntur post actum, non quantum ad substantiam peccati, sed quantum ad effectum qui est privatio gratiae: propter quod Augustinus dicit quod transeunt actu et remanent reatu.

ARTICULUS III.

Ad tertium sic proceditur. Et 1. videtur, quod actus exterior non pertineat ad peccatum. Membra enim exteriora non possunt esse substantia peccati: sed actus exteriores membris corporalibus aguntur, ergo actus exterior ad peccatum non pertinet.

2. Praeterea, peccatum merito opponitur; sed quantitas meriti tota dependet ex radice charitatis; ergo et quantitas peccati tota dependet ex cupiditate voluntatis; et sic actus exterior ad peccatum non facit.

5. Praeterea, illud quod de se pertinet ad perfectum, quocumque modo agatur, peccatum est: sed actus exterior nisi ex voluntate procederet, non esset perfectum; ergo actus exterior de se ad perfectum non pertinet.

Sed contra. Peccatum est transgressio legis divinae: sed per actum exterioriorem aliquis contra legem divinam agit; ergo actus exterior pertinet ad peccatum.

Praeterea, meritum et peccatum opponuntur: sed actus exterior facit ad meritum: quod patet ex hoc, quod martyribus actu debetur aureola, non autem martyribus voluntate; ergo et similiter actus exteriores pertinent ad peccatum.

Respondeo. Dicendum, quod aliquis actus habet rationem culpae ex duobus: idest ex hoc quod actus est inordinatus, et ex hoc quod voluntarius. Inordinatio autem per prius est in actu exteriori quam interiori. Ex hoc enim voluntas est inordinata quod in aliquid inordinatum tendit, sicut in fornicationem vel homicidium. Sed voluntarium quod complet rationem culpae per prius est in actu interiori quam exteriori, cum actus exterior non sit voluntarius nisi per hoc quod est per intentionem imperatus; et ideo peccatum in utroque consistit; scilicet interiori et exteriori actu. Actus tamen exterior rationem culpae non habet nisi ab interiori, cum tamen actus exterior aliquid deformitatis addat.

Ad primum ergo dicendum, quod membra corporalia non causant exterioriorem actum, quasi per se agantur, sed sicut ab interioribus viribus acta; et ideo exteriora membra non sunt subjecta peccati, sed interiores vires.

Ad secundum dicendum, quod respectu essentialis praemii, quantitas meriti ex sola charitate interiori pensatur; sed respectu accidentalium praemii, quod consequitur decentiam et honestatem actus, actus pensatur ex exteriori actu; et similiter peccati deformitas ex exteriori actu pensatur.

Ad tertium dicendum, quod deformitas exterioris actus est materialis in peccato, sed formaliter ratio culpae completur ex hoc quod est voluntarius et ideo actus exterior nisi ex voluntate procedat, non potest esse peccatum.

ARTICULUS IV.

Ad quartum sic proceditur. Et 1. videtur, quod substantia actus peccati non sit a Deo. Homo enim ex hoc quod substantiam actus peccati causat, peccare dicitur. Si igitur substantia actus sit a Deo, sequitur quod ipse Deus peccet; quod est absurdum.

2. Praeterea, quaecumque inseparabiliter se consequuntur, ita se habent, quod unum eorum non potest esse sine altero; sed quidam actus sunt qui inseparabiliter habent deformitatem annexam; ergo

si substantia actus a Deo est, et deformitas actus a Deo erit.

5. Praeterea, differentia specifica est de substantia rei: sed malum est differentia specifica aliquorum actuum. Sicut enim habitus animae specie distinguuntur per bonum et malum; ita et eorum actus; si ergo substantia actus peccati sit a Deo, sequetur quod Deus sit causa mali; quod est inconueniens; ergo substantia actus peccati non est a Deo.

Sed contra. Substantia actus peccati quoddam ens est. Omne autem ens est a Deo; ergo substantia actus peccati est a Deo.

Praeterea, omnis motus est a primo motore; ergo et omnis actio est a primo agente. Primum autem agens est Deus; ergo substantia cuiuslibet actus est a Deo.

Respondeo, Dicendum, quod causa prima in effectum causae secundae vehementius influit quam etiam causa secunda, ut patet in lib. de Causis; et ideo oportet ut id quod est a voluntate, secundum hoc quod ejus causa est Deus, sit a Deo. Quod autem est a voluntate secundum aliquid, ejus causa non est Deus, nec erit a Deo. In peccato autem est duo considerare: scilicet naturam actionis et deformitatem actus. Natura autem actionis est a voluntate, secundum quod est quaedam activa potentia et ad bonum ordinata; cum nihil agat nisi ad bonum respiciens, ut dicit Dionysius. Sed deformitas peccati causatur ex voluntate secundum defectum qui eam consequitur secundum quod est ex nihilo. Nihili autem Deus non est causa: qui tamen causa est cuiuslibet activae potentiae et ordinis ad bonum; et ideo substantia actus peccati est a Deo; non autem deformitas. Et quia peccatum utrumque dicit, non potest simpliciter concedi quod peccatum sit a Deo. Et est simile de claudicatione: ejus deformitas est ex defectu cruris; sed substantia actus ex virtute gressiva.

Ad primum ergo dicendum, quod homo est causa tam substantiae actus peccati, quam deformitatis: non autem Deus; et ideo non est simile.

Ad secundum dicendum, quod licet substantia actus fornicationis, sine deformitate fieri non possit, non sequitur quod reducatur in eandem causam primam; sed in eandem causam proximam.

Ad tertium dicendum, quod deformitas vel malum est differentia specifica actus secundum quod est in genere moris, non autem secundum quod est in genere naturae.

DISTINCTIO XXXVI.

Sciendum est tamen quaedam sic esse peccata etc. (V. edit. nostrae tom. VI, pag. 710.)

QUAESTIO UNICA.

Hic quaeruntur quatuor: 1.^o utrum peccatum possit esse causa peccati; 2.^o utrum possit esse idem peccatum et poena; 3.^o utrum aliqua passio possit esse peccatum; 4.^o utrum omnis poena pro peccato infligatur.

ARTICULUS I.

Ad primum sic proceditur. Et 1. videtur, quod peccatum non possit esse causa peccati. Sicut enim se habet motus ad motum, ita peccatum ad pecca-

tum: sed motus non est causa motus, sicut nec qualitatis qualitas secundum Philosophum; ergo nec peccatum potest esse causa peccati.

2. Praeterea, id quod nihil est non potest causam habere, nec causa esse: sed peccatum nihil est, et nihil fiunt homines dum peccant, ut Augustinus dicit; ergo unum peccatum non potest esse causa alterius.

3. Praeterea, unum contrariorum non est causa alterius: sed quaedam peccata sunt adinvicem contraria, ut avaritia prodigalitati; ergo ad minus talium, unum non potest esse alterius causa.

Sed contra est, quod Gregorius dicit: quod peccatum quod mox per poenitentiam non diluitur, suo pondere ad aliud trahit; ergo unum peccatum est causa alterius.

Praeterea, quicquid est causa causae est causa effectus: sed actus peccati est causa habitus ex quo iterum sequitur actus peccati; ergo peccatum est causa peccati.

Respondeo. Dicendum, quod peccatum potest esse causa peccati quatuor modis. Primo per accidens quasi removens prohibens, in quantum scilicet per peccatum mortale tollitur gratia, qua sublata homo cadit facilius in peccatum; et sic quodlibet peccatum mortale cuiuslibet potest esse causa. Secundo mediante habitu vel dispositione ex actu peccati consequente et ad similem actum inclinante; et sic peccatum est causa peccati in eadem specie. Tertio modo in quantum unum peccatum alteri materiae subministrat, ut gula luxuriae; quia venter mero aestuans, facile in luxuriam spumat, ut Hieronymus dicit. Quarto in quantum unum peccatum advocat alterum ad suum finem; sicut cum aliquis occidit hominem, ut pecuniam rapiat, avaritia est homicidii causa.

Ad primum ergo dicendum, quod motus potest esse causa motus, non autem terminus vel subiectum. Unde nihil prohibet peccatum esse causam peccati.

Ad secundum dicendum, quod peccatum ratione deformitatis nihil est: sed ratione actus aliquid est, et sic potest causam habere et causa esse. Vel sic dicendum, quod unum contrariorum non est causa alterius per se, sed per accidens esse nihil prohibet, sicut frigidum calefacit, ut in 8 Physicorum dicitur.

Ad tertium dicendum, quod licet peccata aliqua sint contraria secundum speciem actus, tamen omnia gratiae opponuntur; et ex hac parte potest contingere, ut quodlibet peccatum sit cuiuslibet causa.

ARTICULUS II.

Ad secundum sic proceditur. Et 1. videtur quod idem possit esse culpa et poena. Augustinus enim dicit in lib. Confess.: « Jussisti Domine; et sic est, « ut poena sibi sit omnis inordinatus animus: » sed inordinatio animi quaedam culpa est; ergo idem est culpa et poena.

2. Praeterea, carere quacumque perfectione poena est: sed carere originali justitia est originale peccatum, secundum Anselmum; ergo idem est culpa et poena.

3. Praeterea, conjunctio inconvenientium quaedam poena est; sicut si homo in dignitate constitutus abjecto habitu indueretur; sed ipsa culpa est inconvenientis rationali creaturae; ergo ipsa culpae commissio quaedam poena est.

Sed contra. Culpa et poena differunt, sicut actio et passio: sed non potest esse idem actio et passio, ut supra Magister dicit; ergo nec culpa et poena.

Praeterea, culpa ordinatur ad poenam, sicut medicina ad morbum. Poenae enim medicinae sunt, ut in 2 Ethicorum dicitur. Sed non est idem medicina et morbus; ergo non est idem culpa et poena.

Respondeo. Dicendum, quod non potest esse idem per se poena et culpa. Poena enim dicitur aliquid ex hoc quod est contrarium voluntati, culpa vero ex hoc ipso quod est voluntarium. Unde culpam agimus, sed poenam patimur. Per accidens tamen potest esse idem culpa et poena, in quantum aliquid adjungitur culpae quod est poena. Quod quidem potest ei adjungi tripliciter. Uno modo sicut praecedens culpam et causam ipsius: et sic sequens peccatum dicitur esse poena praecedentis peccati, ratione subtractionis gratiae, ex qua provenit sequens peccatum. Secundo adjungitur ei sicut concomitans peccatum; sicut quaedam passiones affligentes hominem, concomitantur quaedam peccata, ut perturbatio irae, et anxietas concupiscentiae. Tertio modo conjungitur ei sicut posterior effectus; et hoc modo ipsa culpa dicitur esse poena, ratione deordinationis animae, et turpitudinis, et indecentiae quam ei infert. Primo igitur modo unum peccatum est poena alterius peccati; sed duobus modis sequentibus est peccatum sui ipsius poena.

Ad primum dicendum, quod illa inordinatio non sequitur culpam ut ejus effectus.

Ad secundum dicendum, quod carentia originalis justitiae in se considerata est poena; sed in quantum est ex voluntate primi parentis, habet rationem culpae.

Ad tertium dicendum, quod ipsa indecentia quae est ex conjunctione inconvenientium, quaedam poena est quae culpam consequitur.

ARTICULUS III.

Ad tertium sic proceditur. Et 1. videtur, quod aliqua passio possit esse peccatum. Ira enim et invidia, quaedam passiones sunt, quae tamen connumerantur inter capitalia peccata; ergo passiones possunt esse peccata.

2. Praeterea, actualis concupiscentia quaedam passio est: sed hoc est peccatum, ut patet in Glossa, Rom. 7; ergo passio potest esse peccatum.

3. Praeterea, meritum et demeritum, cum sint contraria, sunt ejusdem generis. Sed merita possunt esse passiones. Martyres enim passionibus aureolam meruerunt; ergo et passionibus contingit demereri; et ita passiones possunt esse peccata.

Sed contra. Nulla passio est actio: sed peccatum est actio: in hoc enim a poena differt, ut supra habitum est; ergo passio non potest esse peccatum.

Praeterea, non contingit esse peccatum, nisi illud, cujus principium est in nobis. Sed passionis principium non est in nobis, principium autem peccati in nobis est; ergo passio non potest esse peccatum.

Respondeo. Dicendum, quod passio per se loquendo, non potest esse peccatum, sed per accidens peccatum esse potest: quod quidem contingit dupliciter. Uno modo secundum quod passio, actui voluntatis subditur, quae eam voluntarie sustinet vel desiderat. Alio modo secundum quod ex actu

voluntatis passio causatur. Ex operatione enim appetitus superioris, per quamdam redundantiam, sequitur passio in appetitu inferiori. Utroque autem illorum modorum, ipse actus voluntatis est per se peccatum; sed passio est peccatum per accidens.

Ad primum dicendum, quod ira et invidia non computantur inter peccata capitalia, secundum quod sunt passiones quaedam; sed secundum quod sunt actus voluntatis, quibus passiones adjunguntur.

Ad secundum dicendum, quod ipse motus concupiscentiae, non est peccatum ut est passio, sed prout est in potestate voluntatis existens, quae potest eum prohibere vel non prohibere.

Ad tertium dicendum, quod passiones martyrum fuerunt meritoriae, secundum quod eas per voluntatem acceptaverunt, vel patienter sustinuerunt propter Deum; et ita etiam possunt esse demeritoriae, in quantum voluntas alio modo ad eas se habet.

ARTICULUS IV.

Ad quartum sic proceditur. Et 1. videtur, quod poena non semper infligatur alicui pro peccato. Job enim de se ipso dicit: « Non peccavi et in amaritudinibus moratur oculus meus: » haec autem amaritudines poenae quaedam erant; ergo poena infligitur alicui absque peccato.

2. Praeterea, Salvator noster ab omni peccato immunis fuit: Joan. 8: « Quis ex nobis arguet me de peccato? » et tamen multas poenas sustinuit; ergo poena aliquando infligitur absque culpa.

3. Praeterea, poena temporalis, temporali prosperitati opponitur; sed aliqui interdum temporali prosperitate florent, absque virtutis merito Jer. 12: « Quare via impiorum prosperatur? » ergo pari ratione et poena temporalis aliquando infligitur, absque demerito culpae.

Sed contra Hieronymus dicit: « Quicquid mali patimur, peccata nostra meruerunt, » et ita poena non nisi peccato infligitur.

Praeterea, iudicium humanum exemplatur a iudicio divino: sed secundum humanum iudicium, poena nulli infligitur nisi pro culpa; ergo nec secundum divinum.

Respondeo. Dicendum, quod cum poena sit passiva corruptio boni, duplex est poena, sicut duplex est bonum. Est autem quoddam bonum hominis, in quantum est homo; et huiusmodi sunt bona spiritualia, quorum privatio simpliciter et absolute est hominis poena: et talis poena nunquam est nisi pro peccato illius qui punitur. Est autem aliud bonum hominis, non in quantum est homo, sed in quantum est animal, vel corpus; et huiusmodi sunt bona corporalia, quorum privatio, absolute non potest dici hominis poena, sed solum secundum quid, nisi quatenus horum defectus in defectum spiritualium redundaret. Si enim temporalium defectus spiritualibus prodest et abundantia nocet; e contrario abundantia dicenda est poena, et defectus erit utilis, sicut Philosophus dicit in 10 Eth.: « Fortuna secundum eam mensuram dicenda est bona quae rationis bonum juvat. » Superabundantia autem divitiarum, secundum eundem Philosophum, quae opus virtutis impedit, bona fortuna dicenda non est sed mala. Unde nihil prohibet huiusmodi poenam alicui infligi absque propria culpa, ut quaedam promoventia ad virtutem. Sciendum tamen, quod licet poenae quandoque sint absque culpa personae, semper ta-

men sunt cum culpa naturae, ex qua factum est, ut per hujusmodi defectus, oporteat hominem ad bona spiritualia promoveri. Et per hoc patet solutio ad objecta. Vel dicendum ad primum, quod hoc quod homo ad augmentum meriti flagellatur, non est poena sibi in quantum homo est, sed bonum ejus; est tamen poena in quantum naturam animalem habet; et ideo talis poena sequitur culpam naturae infectae, quae si infecta non esset, homines sine hujusmodi molestiis ad perfectum meriti pervenirent.

Ad secundum dicendum, quod Christus nullo modo poenam habuit quae esset poena hominis in quantum est homo, quia in bonis rationis superabundavit, nec aliquem defectum in eis passus est. Habuit tamen aliquam, quantum ad naturam communem: et ideo non oportuit quod esset aliqua culpa in eo; sed quod aliqua culpa praecessisset in natura humana. Unde Isa. 53: «Propter scelus populi mei percussi eum.»

Ad tertium dicendum, quod per hoc quod impij prosperitatem habent, frequenter in eorum malum est, ut ex dicto Philosophi in auctoritate superius patet. Unde in hoc ipso puniuntur. Similiter etiam et quod justi in adversitatibus sint, in eorum bonum eedit, quia per hoc ad virtutem proficiunt. Unde non est eis poena, praecipue in quantum homines sunt: sed magis praemium.

DISTINCTIO XXXVII.

Sunt autem et alii plurimi etc. (V. edit. nostrae tom. VI, pag. 718.)

QUAESTIO UNICA.

Hic quaeruntur quatuor: 1.^o utrum oporteat ponere omne ens esse a Deo; 2.^o utrum actus peccati sit natura aliqua, vel aliquod bonum; 3.^o utrum Deus possit dici causa peccati; 4.^o utrum omnis poena sit a Deo.

ARTICULUS PRIMUS.

Ad primum sic proceditur. Et 1. videtur, quod non omne ens sit a Deo. Quicquid enim est a Deo, est sibi simile aliquo modo; sed aliquid est, quod nullo modo est Deo simile, sicut materia prima quae est potentia pura cum Deus sit actus purus; ergo non omne ens est a Deo.

2. Praeterea, Augustinus dicit: «In idolo forma hominis non est facta per verbum.» Sed forma hominis in idolo est aliquid: non ergo omne ens est factum per verbum, et ita nec a Deo, cum quicquid Deus facit, faciat per verbum.

3. Praeterea, de quocumque potest dici ipsum esse, potest dici quod est ens: sed deformitas peccati est; ergo est ens: nec tamen est a Deo; ergo non omne ens est a Deo.

Sed contra. Omne ens, aut est causa, aut causatum. Quicquid autem est a quocumque causatum, est a Deo, quia effectus causae secundae, est causae primae. Aut ergo aliquid ens est et causa tantum, aut est a Deo causatum: sed quod est causa tantum, est causa prima, quae Deus est; ergo omne ens, quod non est Deus, est a Deo.

Praeterea, quicquid est creatum, est a Deo; si ergo aliquid ens sit, praeter Deum, quod non sit

a Deo, hoc non erit creatum; et sic erunt plura increata, quod est haereticum. Oportet igitur ponere omne ens esse a Deo.

Respondeo. Dicendum, quod haereticum est dicere aliquid ens, in quantum ens, non esse a Deo: nec solum fidei contrarium est; sed etiam rationi. Omne enim quod est, aut est necessarium, aut possibile. Quod autem necessarium, aut est per se necessarium, aut est aliunde necessarium. Quicquid autem est necessarium aliunde, constat quod causam sui esse habet ab eo, a quo ejus necessitas dependet. Quod autem est possibile, necesse est ut causam habeat; quia quantum est in se, potest esse et non esse. Unde si esse ei applicetur, hoc est per aliquam causam extrinsecam. Et sic relinquitur quod omne ens oportet reduci, sicut in causam, in id quod per se necesse est esse; quod est solus Deus, qui est suum esse. Unde relinquitur quod omne ens sit a Deo.

Ad primum ergo dicendum, quod quantum materia prima habet de esse, tantum habet de Dei similitudine. Non autem est ens actu, sed potentia; et sic etiam ad Deum similitudinem habet.

Ad secundum dicendum, quod forma hominis in idolo, secundum quod est res quaedam, a Deo est; sed in quantum ordinatur ad ostendendum aliquid nomen in idolo, sic a Deo non est: sic enim cura sit falsum signum, nihil est.

Ad tertium dicendum, quod cum dicimus privationes esse, hoc non est propter aliquod esse reale, quod eis attribuatur; sed propter esse compositionis, quod ratio format eas apprehendens; et ideo non dicuntur entia naturae, sed rationis; et hoc ipsum quod in ratione sunt, a Deo est. Et sic licet deformitas peccati, secundum quod est in re, non sit a Deo, secundum tamen quod est in apprehensione rationis, a Deo est; quia non sumus sufficientes cogitare aliquid ex nobis quasi a nobis (2 ad Cor. 5).

ARTICULUS II.

Ad secundum sic proceditur. Et 1. videtur, quod peccatum non sit natura aliqua. Sicut enim dicit Augustinus super Joan.: «Peccatum nihil est, et nihil fiunt homines cum peccant;» ergo peccatum non est natura aliqua.

2. Praeterea, omnis natura ex genere suo bona est: sed aliqua peccata mala sunt in genere suo, sicut fornicatio, et homicidium; ergo peccata non sunt natura aliqua.

3. Praeterea, omnis natura ordinata est, cum sit a Deo. Quae enim a Deo sunt, ordinata sunt, ut dicitur Rom. 13. Sed peccata sunt inordinata; ergo non sunt aliqua natura.

Sed contra. Quicquid est in aliquo praedicamento, est natura aliqua; sed peccata sunt in aliquo praedicamento: sunt enim in eodem genere cum actibus virtutum; ergo peccata sunt natura aliqua.

Praeterea, nihil potest esse causa alicujus rei naturalis, nisi sit natura aliqua; sed peccatum est causa alicujus rei naturalis, sicut adulterium est causa generationis humanae; ergo peccatum est natura aliqua.

Respondeo. Dicendum, quod secundum Boetium in lib. de duabus Naturis, natura multipliciter dicitur. Uno modo significat rem cujuslibet praedicamenti. Alio modo substantiam. Tertio modo prin-

cipium motus. Quarto modo differentiam specificam uniuscujusque. In peccato est etiam duo considerare: scilicet ipsam actionem, et deformitatem, scilicet inordinationem. Ipsa igitur peccati actio est natura aliqua primo modo, et quarto, sicut et alia accidentia naturae quaedam sunt, nisi quod actiones non sunt naturae permanentes, ut quantitates et qualitates, et ex hoc minus habent de ratione entis et naturae. Secundo vero modo naturae non sunt. Sed ipsa deformitas peccati non est natura aliqua, nec primo, nec secundo modo, nec tertio, nec quarto, secundum eundem ubi supra.

Ad primum ergo dicendum, quod ratio peccati sumitur ex ipsa deformitate; et ideo, in quantum peccatum est, nihil est, quia deformitas nulla natura est, licet ipsa peccati actio aliquid sit.

Ad secundum dicendum, quod duplex est bonitas: scilicet bonitas naturae, et bonitas moris. Prima bonitate, natura omnis bona est, secundum genus naturae suae. Actus autem peccati dicitur esse malus ex genere, malitia moris: et secundum hoc determinatur ad genus moris, quod quidem accipitur secundum ordinem actus ad indebitam materiam; sicut malum ex genere dicitur laedere innocentem, et e contrario bonum ex genere dicitur actus relatus ad debitam materiam, ut vestire nudum.

Ad tertium dicendum, quod quantum ad substantiam actus, remanet aliquis ordo in peccato et ad agentem, et ad finem; sed quantum ad deformitatem, sic est ibi inordinatio sola; et hoc modo non est natura aliqua.

ARTICULUS III.

Ad tertium sic proceditur. Et 1. videtur, quod Deus sit causa peccati, etiam in quantum est peccatum. Quod enim est causa unius oppositorum per sui praesentiam, est causa alterius per suam absentiam: sicut gubernator navis est causa salutis navis per suam praesentiam, submersionis per absentiam. Sed Deus in quantum est praesens animae per gratiam, est causa actus meritorii; ergo in quantum est absens per subtractionem gratiae, est causa peccati.

2. Praeterea, duritia cordis quoddam peccatum est, cum ei poena debeatur, ut patet Rom. 2: « Secundum duritiam tuam, et cor impenitens, thesaurizaz tibi iram. » Sed Deus est causa duritiae cordis, quia ut dicitur Rom. 9, « Cujus vult miseretur, et quem vult indurat; » ergo Deus est causa peccati.

5. Praeterea, quod est causa causae, est causa effectus. Sed aliqua quae sunt effectus Dei sunt causa peccati. Inclinat enim ad peccatum quandoque complexio corporis, et exteriores creaturae; ergo Deus est causa peccati.

Sed contra. Quicumque est causa peccati, peccat; sed Deus non potest peccare; ergo Deus non est causa peccati.

Praeterea, Fulgentius dicit, quod Deus non est ultor illius rei, cujus est causa; est autem ultor peccati; ergo non est causa peccati.

Respondeo. Dicendum, quod omnia quae sunt a Deo causata procedunt ab eo sicut ab artifice artificiatum. Unde in Psal. 105 dicitur: « Omnia in sapientia fecisti. » Defectus autem qui est in artificiato contra artem, non potest esse ab arte, sed incidit ex defectu instrumenti vel materiae. Peccatum autem, in quantum hujusmodi, divinae arti contrariatur eo quod est aversio ab incommutabili bo-

S. Th. Opera omnia. V. 22.

no, quod est omnium artificiatorum a Deo finis, et per consequens principium illius primae artis: nam principia artificiatorum sunt fines, ut patet in 2 Physicorum. Relinquitur ergo quod peccatum non possit esse a Deo; sed ex defectu alicujus creaturae, per quam Deus operatur, sicut per instrumentum.

Ad primum ergo dicendum, quod non est in potestate navis, vel ejus arbitrio, ut a gubernatore deseratur: et ideo submersio navis attribuitur gubernatori sicut causae: sed peccator ex proprio arbitrio se separat a Deo: unde ei imputatur suum periculum: nec oportet dicere quod Deus sit causa peccati.

Ad secundum dicendum, quod Deus non dicitur indurare inducendo malitiam, sed non largiendo gratiam, quod est ex culpa peccantis, ut dictum est.

Ad tertium dicendum, quod quantumcumque aliqua inclinare ad peccatum videantur, non tamen possunt cogere ad peccandum. Sed homo proprio arbitrio labitur in peccatum. Unde sibi soli peccatum debet imputari.

ARTICULUS IV.

Ad quartum sic proceditur. Et 1. videtur, quod non omnis poena sit a Deo. Ut enim dicit Augustinus, Deus non est causa tendendi in non esse. Sed per malum poenae quis tendit in non esse; ergo Deus non est causa poenae.

2. Praeterea, privatio gratiae quaedam poena est. Hujusmodi autem Deus causa non est; sic enim Dei actio mala esset, cum peccatum ex hoc praecipue malum sit, quod gratiam tollit; ergo non omnis poena est a Deo.

5. Praeterea, nihil quod per se est causa peccati, est a Deo, quia sic Deus esset causa peccati. Sed fomes per se est causa peccati, cum de se inclinet ad peccatum: et sic non est a Deo. Est autem poena quaedam; non ergo omnis poena est a Deo.

Sed contra. Poena est effectus judicii. Sed omnium judicium ad Deum pertinet, quia ipse judicat omnem terram, ut dicitur Gen. 18; ergo omnis poena est a Deo.

Praeterea, omne bonum est a Deo. Sed omnis poena est bona, in quantum est justa; ergo omnis poena est a Deo.

Respondeo. Dicendum, quod bonum et malum se habent sicut privatio et forma: nam malum est privatio boni. Id autem quod est causa alicujus formae, est causa privationis formae alterius, quae tamen forma causata esse non potest: unde idem est causa generationis et corruptionis. Habet autem rationem boni, quod aliquis privetur eo, quo cum privari justum est: et ideo malum poenae est a Deo. Sed qui bonum commutabile immoderate amat, facit privationem, ex qua est malum culpae, quia ex hoc sequitur aversio a bono incommutabili. Ille autem amor immoderatus non est a Deo. Unde malum culpae a Deo esse non potest.

Ad primum ergo dicendum, quod aliquis per poenam tendendo in non esse, tendit in nobilius esse, scilicet in esse justitiae. Unde nihil prohibet poenam esse a Deo.

Ad secundum dicendum, quod Deus non est causa privationis gratiae agendo aliquid contrarium gratiae, sed non influendo; ad hoc ut servetur ordo justitiae qui cum sit bonum commune, praeponderat bono particulari istius.

Ad tertium dicendum, quod fomes a Deo est, non sicut a generante fomitem, sed sicut non apponente originalem justitiam, ex cuius absentia sequuntur motus concupiscentiae inordinati. Unde idem iudicium est de fomite, et de privatione gratiae.

DISTINCTIO XXXVIII.

Post praedicta de voluntate etc. (V. edit. nostrae tom. VI, pag. 727.)

QUAESTIO UNICA.

Hic quaeruntur quatuor: 1.^o utrum voluntas iudicetur bona ex fine; 2.^o utrum omnes bonae voluntates habeant unum finem; 3.^o quis sit ille finis; 4.^o de differentia voluntatis et intentionis.

ARTICULUS I.

Ad primum sic proceditur. Et 1. videtur, quod voluntas non sit iudicanda bona ex fine. Sicut enim Augustinus dicit 19 de civ. Dei: « Omnis homo etiam belligerando, pacem requirit. » Pax autem est quoddam bonum; voluntas autem bellandi frequenter est mala: non ergo debet voluntas iudicari bona ex fine.

2. Praeterea, ad bonitatem actus non sufficit una circumstantia sola: sed propter aliquid, quod ad finem pertinet, est una circumstantia sola; ergo consideratio finis non sufficit ad bonitatem actus voluntatis.

3. Praeterea, ex eisdem aliquid est et augetur. Sed augmentum bonitatis in actu voluntatis non iudicatur ex fine, sed magis ex habitu charitatis: alias quantum aliquis intenderet, tantum faceret: quod non videtur verum, cum dans obolum pro Deo possit intendere tantum facere sicut ille qui dat centum marchas; ergo nec bonitas voluntatis iudicanda est ex fine.

Sed contra. Bonitas habet rationem finis: sed ea quae per se competunt fini, non pertinent ad ea quae sunt ad finem, nisi ex ordine ad finem; ergo bonitas voluntatis iudicanda est ex fine.

Praeterea, ab eodem habet aliquid esse et bonitatem: sed actus voluntatis habet esse a fine, qui voluntatem movet; ergo et eius bonitas est ex fine.

Respondeo. Dicendum, quod aliud est de actu voluntatis et de actu exteriori. In actu enim exteriori, aliud est objectum et aliud est finis. In actu vero voluntatis idem est objectum et finis. Nam finis et bonum est proprium objectum voluntatis: non tamen omnis finis est voluntatis objectum, sed finis proximus. Si autem actus exterior iudicatur bonus ex genere, propter debitam materiam et objectum, ita et actus voluntatis propter debitum proximum finem. Ex fine vero remoto habet bonitatem similem illi bonitati, quam actus exterior habet ex fine. Et sic tota bonitas voluntatis dependet ex fine proximo et remoto.

Ad primum ergo dicendum, quod licet finis remotus sit bonus qui est pax, tamen finis proximus non est bonus, in his qui indebite bella volunt.

Ad secundum dicendum, quod in bonitate finis includuntur et aliae circumstantiae. Non enim bonum finem appetit, si non appetat quando est bonus et ubi est bonus: et sic de aliis.

Ad tertium dicendum, quod in malis sequitur

quod quantum aliquis intendit, tantum facit, quia ad intentionem peccati sufficit intentio contemptus: non autem sequitur in bonis, quod quantum aliquis intendat tantum faciat: quia propositum voluntatis non sufficit ad bonitatem actus. Plura enim requiruntur ad bonum quam ad malum. Nec tamen sequitur propter hoc, quod voluntas non iudicetur bona ex fine. Intentio enim non respicit nisi finem remotum.

ARTICULUS II.

Ad secundum sic proceditur. Et 1. videtur, quod non omnium rectarum voluntatum, sit unus finis. Unusquisque enim agens ex ratione cogitat de fine propter quem agit. Sed non est aliquod unum de quo cogitent omnes, quando rectam voluntatem habent; ergo non omnium rectarum voluntatum unus est finis.

2. Praeterea, finis est qui movet efficientem. Sed quandoque agens etiam recte movetur a duobus, quorum unum est spirituale, et aliud temporale, ut patet in his qui vadunt ad Ecclesiam propter distributiones; ergo non omnium rectarum voluntatum unus est finis.

3. Praeterea, aut hoc intelligitur de fine proximo, aut ultimo. Si de ultimo, non oportet dicere rectarum voluntatum unum esse finem, sed simpliciter omnium voluntatum. Nam omnes propter beatitudinem appetunt quicquid volunt, ut Augustinus dicit in 15 de Trinitate. Si autem de fine proximo intelligatur, tunc patet esse falsum quod dicitur, omnium rectarum voluntatum esse unum finem: cum diversos fines possumus recta voluntate appetere.

Sed contra. Sicut res procedunt a principio, ita ordinantur in finem. Sed omnium rectarum voluntatum est unum principium, scilicet Deus, qui nostras voluntates rectificat; ergo et omnium earum unus est finis.

Praeterea, unius generis non est nisi una mensura, ut patet in 10 Metaphysicorum. Sed omnes voluntates sunt unius generis; ergo habent unam mensuram, quam etiam oportet esse earum regulam, ex qua dirigantur. Sed voluntas rectitudinem habet ex fine, ut dictum est; ergo omnium rectarum voluntatum unus est finis.

Respondeo. Dicendum, quod sicut prius dictum est, est finis proximus et finis ultimus. In fine autem proximo, non oportet omnes voluntates rectas convenire, cum diversi diversa et contraria interdum recte velint, referendo ad finem charitatis; sicut etiam contingit rectae voluntatis unius hominis esse diversos fines, cum diversa recte et licite appeti possint. Finis autem ultimus, nec in uno homine, nec in diversis recte potest esse nisi unus; quia quicumque alius finis ultimus constituitur praeter Deum, erit perversitas, dum quis fruatur alio praeter Deum. Unde oportet omnium rectarum voluntatum esse unum ultimum finem.

Ad primum dicendum, quod non oportet quod finis ultimus semper actu cogitetur, sed quod habitu teneatur: et sic ratio non probat quin omnium rectarum voluntatum possit esse unus ultimus finis.

Ad secundum, quod ille qui movetur ad eundem ad Ecclesiam, propter aliquod spirituale et temporale, si rectam habeat voluntatem, non ponit in temporali ultimum finem, sed vult illud ut se sustentet in servitio Dei. Unde non quaerit ipsum

tamquam finem ultimum, sed tamquam utile ad finem.

Ad tertium dicendum, quod omnes voluntates, tam rectae quam non rectae, conveniunt in appetitu beatitudinis, secundum formalem ejus rationem: quia omnes volunt optimum quod consequi possunt; sed solummodo rectae voluntates conveniunt in appetitu beatitudinis, etiam per applicationem ad subiectum, dum quaerant suum optimum ubi quaerendum est, scilicet in Deo.

ARTICULUS III.

Ad tertium sic proceditur. Et 1. videtur, quod ultimus finis rectorum voluntatum non sit charitas. Charitas enim est quoddam creatum, ut in primo libro habitum est; sed ponere finem ultimum in aliquo creato, est frui utendo, quod est humana perversitas secundum Augustinum; ergo charitas non est ultimus finis rectorum voluntatum.

2. Praeterea, finis ultimus hominis est vita aeterna, ut patet Rom. 6: « Habetis fructum vestrum in sanctificatione, finem vero vitam aeternam. » Sed sicut dicitur Joan. 17: « Haec est vita aeterna, ut cognoscant te verum Deum, etc. » Ultimus ergo finis, in quo rectae voluntates conveniunt, non est dilectio, sed cognitio.

3. Praeterea, omnis motus naturaliter tendit ad quietem, sicut ad finem: sed quietatio appetitus in fine est delectatio, quae non est idem quod dilectio, cum dilectio sit causa afflictionis in absentia amati, et delectationis in ejus praesentia; ergo finis voluntatum non est dilectio, sed magis delectatio.

Sed contra. Voluntates hominum rectae sunt, secundum quod divinis regulantur praeceptis. Finis autem praecepti est charitas, ut habetur 1 ad Tim. I; ergo charitas est finis rectorum voluntatum.

Praeterea, finis rationalis creaturae est Deo adhaerere, secundum illud Psal. 72: « Mihi adhaerere Deo bonum est; » sed magis adhaeret homo Deo per dilectionem, ut dicit Hugo de S. Victore: « Prius Deus diligitur quam intelligitur; et intrat dilectio, ubi cognitio foris stat; » ergo dilectio Dei est finis rectorum voluntatum.

Respondeo. Dicendum, quod cujuslibet motus, finis dupliciter assignatur: scilicet ipsa res quae quaeritur, et illius res adeptio. Sicut motus gravis finis dicitur uno modo locus proprius qui est deorsum, et alio modo quies in loco. Sed quies in loco dicitur esse finis propter locum: quod patet ex hoc quod non quaelibet quies est finis motus corporis gravis: sed quies in tali loco. Et sic res est finis per seipsam. Adeptio vero rei est finis propter rem ipsam. Ita igitur et rectorum voluntatum finis tamquam res quaedam ratione sui ipsius, est ipse Deus: ratione vero Dei, finis est Dei adeptio, quam quidem homo adipiscitur cognoscendo, amando, et in eo delectando. Et sic patet quod et ipsa visio, et dilectio, et delectatio finis ultimus dici possunt. Et per hoc patet solutio ad objecta.

ARTICULUS IV.

Ad quartum sic proceditur. Et 1. videtur, quod intentio non sit idem quod voluntas. Quia Luc. II super illud, « Lucerna corporis tui est oculus tuus, » dicit Glossa: « Oculus, idest intentio. » Sed oculus in anima est ratio vel intellectus; ergo intentio pertinet ad rationem, et non ad voluntatem.

2. Praeterea, voluntas vel est de fine, vel de

his quae pertinent ad finem. Sed actus voluntatis respectu finis est fruitio, et respectu ejus quod est ad finem est usus et electio; ergo intentio in illo modo est actus voluntatis.

3. Praeterea, impossibile est idem esse simul bonum et malum. Sed contingit voluntatem esse malam, et intentionem bonam; sicut cum quis rapit ut eleemosynas det; ergo non est idem intentio et voluntas.

Sed contra. Differentia actuum cognoscitur ex objectis: sed objectum intentionis est finis et idem est objectum voluntatis; ergo intentio est idem quod voluntas.

Praeterea, ubi unum propter alterum, ibi unum tantum. Sed voluntas est propter intentionem: ex hoc enim quod aliquid intendimus, ad volendum inclinamur; ergo intentio et voluntas non differunt.

Respondeo. Dicendum, quod intentio importat ordinem voluntatis in finem, non absolute sed per comparisonem (1) ad id quod est ad finem. Si enim voluntas absolute feratur in beatitudinem, dicitur eam velle, non intendere. Sed si feratur in aliquid ut ex eo beatitudinem quaerat, sic dicitur beatitudinem intendere. Comparatio autem unius ad alterum non est voluntatis secundum seipsum, sed secundum quod dirigitur per rationem, quae est vis collativa. Et ex hoc etiam patet quod proprie loquendo idem motus voluntatis est, quo voluntas vult finem proximum et intendit ultimum. Eodem enim motu movetur anima in aliqua duo secundum quod unum eorum ad aliud ordinatur; sicut cum movetur in statuam Herculis et in Herculem. Secus autem esset si moveretur in unumquodque absolute secundum quod utrumque est res quaedam. Unde cum intentio sit motus quidam voluntatis in finem ultimum secundum quod ordinatur in ipsum finis proximus, patet quod idem est motus in utrumque, et utrumque comparatur ad voluntatem sicut unum objectum: secus autem esset, si voluntas ferretur in utrumque absolute.

Ad primum ergo dicendum, quod intentio dicitur oculus, ratione ejus quod habet a ratione; esse enim oculum non attribuitur intentioni secundum quod est actus voluntatis simpliciter, sed secundum quod vis rationalis in voluntate manet.

Ad secundum dicendum, quod fruitio est finis absolute: sed intentio per comparisonem ad id quod est ad finem.

Ad tertium dicendum, quod nihil prohibet unum et eundem actum habere bonitatem ex una circumstantia, et malitiam ex altera: sicut cum quis pascit esurientem propter inanem gloriam, actus est bonus ex genere, sed malus ex intentione. Et simile est cum dicitur voluntas esse mala, et intentio esse bona.

DISTINCTIO XXXIX.

Hic autem oritur quaestio etc. (V. edit. nostrae tom. VI, pag. 734.)

QUAESTIO UNICA.

Hic quaeruntur quatuor: 1.º utrum vires naturales corrumpantur per peccatum; 2.º utrum in actu voluntatis et aliarum virium possit esse peccatum; 3.º utrum homo naturaliter velit bonum; 4.º utrum scintilla rationis semper velit bonum, et nunquam extinguatur.

(1) At operationem.

ARTICULUS PRIMUS.

Ad primum sic proceditur. Et 1. videtur, quod potentiae naturales per peccatum nullatenus corrumpantur. Actus enim potentiae quia per peccatum corrumpitur, fit peccatum, ut in litera dicitur; ergo potentiae naturales per peccata non corrumpuntur.

2. Praeterea, quantitas potentiae, determinatur per comparisonem ad actum; sed potentia post peccatum non minus potest in actum quam ante; ergo nullae potentiae per peccatum diminuuntur, et ita nullatenus corrumpuntur per peccatum.

3. Praeterea, nihil agit ad sui corruptionem: sed peccatum est quaedam actio potentiae naturalis; ergo potentia naturalis non corrumpitur per peccatum.

Sed contra. Secundum Augustinum, malum dicitur quia adimit bonum: sed peccatum est quoddam malum potentiae naturalis; ergo aliquod bonum adimit, et ita potentia naturalis per peccatum corrumpitur.

Praeterea, peccatum opponitur merito; sed per meritum perficitur potentia naturalis; ergo et per peccatum corrumpitur.

Respondeo. Dicendum, quod potentia naturalis dupliciter potest considerari. Uno modo secundum quod radicitur in natura. Alio modo secundum quod habet ordinem ad actum. Primo modo, potentia naturalis per peccatum, nec corrumpitur, nec minuitur, quia naturalia principia per peccatum non tolluntur: sed sic potentia naturalis non est subjectum peccati, sed secundo modo. Nam cum potentia naturalis, quodammodo speciem sortiatur ex actu ad quem est (1): potentia autem non est sicut propter finem, propter actum malum, sed propter actum bonum: unde quando potentia deordinatur ab actu bono, quodammodo aufertur ei id ad quod secundum suam speciem determinatur. Unde potentia naturalis quodammodo per peccatum corrumpitur; non autem totaliter; eo quod non totus ordo potentiae ad bonum privatur per peccatum.

Ad primum ergo dicendum, quod per peccatum deordinatur actus secundum seipsum: potentia vero in ordine ad actum; et ideo non est simile.

Ad secundum dicendum, quod peccatum non dicitur corrumpere potentiam, quasi aliquid de essentia potentiae tollat: sed quia per peccatum potentia naturalis impeditur a bono actu, per modum cuiusdam elongationis, ut supra dictum est. Et ideo ratio non sequitur.

Ad tertium dicendum, quod corruptio potentiae accidit praeter intentionem peccantis. Unde non sequitur quod quavis potentia peccatum corrumpat, quod potentia agat ad sui corruptionem.

ARTICULUS II.

Ad secundum sic proceditur. 1. Videtur quod in actu voluntatis non sit peccatum magis quam in actu aliarum potentiarum. Voluntatis enim per se objectum est bonum, non autem aliarum potentiarum; ergo bonitas voluntatis minus potest depravari per peccatum, quam bonitas aliarum virtutum.

2. Praeterea, voluntas non est nisi boni, vel ejus quod videtur bonum. Si ergo aliquis peccet

(1) *Locus iste valde corrupte in aliis editis legitur; nempe: Sed sic potentia naturalis est subjectum peccati. Secundo modo: nam cum potentia naturalis quodammodo speciem sortiatur ex actu ad quem est potentia aut non est etc.*

volendo malum, oportet quod illud malum videatur esse bonum. Hoc autem est per rationem vel intellectum; ergo obliquitas peccati per prius est in intellectu quam in voluntate.

3. Praeterea, infidelitas est maximum peccatum. Ipsa autem est in intellectu, secundum quod doctrinae fidei dissentit; ergo non minus intellectus per peccatum quam voluntas depravatur.

Sed contra. Peccato debetur poena pro mensura peccati, ut patet Dent. 23. Sed quantitas poenae augetur secundum quod crescit inordinatio voluntatis: quia quanto quis habet voluntatem magis inordinatam in peccato, tanto magis dignus est poena. Non autem crescit, sed diminuitur per inordinationem intellectus; quia quanto aliquis ignorantior est, tanto minorem poenam meretur; ergo magis peccatum consistit in voluntate quam in intellectu.

Praeterea, nulli imputatur aliquis actus nisi ejus est dominus; sed non sumus domini nostrorum actuum nisi per voluntatem; ergo peccatum praecipue est in voluntate.

Respondeo. Dicendum, quod sicut supradictum est, de ratione culpae duo sunt: scilicet inordinatio operationis, quod potest esse rationali creaturae commune et aliis creaturis; iterum quod actio sit in potestate agentis, quod est proprium rationalis naturae, in qua tantum est malum culpae. Si ergo peccatum consideretur quantum ad operationem inordinatam, aequaliter potest esse in omnibus potentiis. Si autem consideretur quantum ad hoc, quod est in potestate agentis; sic primo et principaliter est in voluntate quae est libera et domina sui actus; secundo vero in omnibus potentiis, quibus a voluntate imperatur. His vero quibus voluntas imperare non potest, sicut nutritivae et generativae, nullo modo potest convenire ratio culpae, quia in hoc ultimo consistit formaliter ratio culpae. Inde est quod proprie loquendo, culpa per prius est in actu voluntatis quam aliarum virium.

Ad primum ergo dicendum, quod bonum et malum, cum sint opposita, sunt circa idem. Unde sicut bonum per prius pertinet ad voluntatem quam ad alias vires, ita et malum.

Ad secundum dicendum, quod hoc quod iudicium rationis pervertit in peccante, imputandum est voluntati, quae potest reprimere concupiscentiam, ex qua ligatur iudicium rationis.

Ad tertium dicendum, quod in intellectu et in aliis viribus quibus imperatur a voluntate, est peccatum secundo, ut dictum est, secundum hoc quod habent ordinem ad voluntatem; et sic peccatum infidelitatis est in intellectu.

ARTICULUS III.

Ad tertium sic proceditur. Et 1. videtur, quod homo naturaliter non velit bonum. Naturalibus enim non meremur; si ergo homo naturaliter velit bonum, volendo bonum non meretur.

2. Praeterea, ea quae sunt naturalia sunt communia apud omnes; sed velle bonum non est omnibus hominibus commune; ergo non est homini naturale.

3. Praeterea, hominis est tantum una natura: una autem natura habet inclinationem tantum ad unum. Cum ergo homo aliquo modo velit malum naturaliter, secundum illud ad Ephes. 2: «Eramus natura filii irae,» videtur quod naturaliter non velit bonum.

Sed contra. Unumquodque naturaliter tendit in suum simile: sed homo secundum suam naturam est bonus; ergo naturaliter vult bonum.

Praeterea, sicut se habet verum ad intellectum, ita se habet bonum ad voluntatem; sed intellectus cognoscit verum; ergo voluntas naturaliter vult bonum.

Respondeo. Dicendum, quod finis est ratio volendi ea quae sunt ad finem, scilicet beatitudinem, secundum quod, quoddam bonum perfectum nominat: unde voluntas humana quicquid vult, vult in ordine ad bonum. Et quia ea quae sunt ad finem habent rationem bonitatis ex ordine ad finem, inde est, quod voluntas humana naturaliter vult bonum: nec bonum quodcumque, sed bonum quod est sibi proprium: et hoc est bonum, quod est secundum rationem. Unde in hujusmodi bonum, voluntas quadam inclinatione tendit.

Ad primum ergo dicendum, quod naturalis appetitus voluntatis respicit bonum in generali; sed per rationis collationem determinatur aliquod bonum speciale: et sic nunquam voluntas actualiter vult bonum naturali appetitu, quin admisceatur ei appetitus deliberativus rectus vel perversus; et sic potest esse meritum vel demeritum.

Ad secundum dicendum, quod in naturali appetitu boni omnes conveniunt, sed in appetitu deliberativo non omnes.

Ad tertium dicendum, quod natura humana licet sit una, tamen integratur ex diversis. Est enim in ea natura intellectiva et sensitiva, et per intellectivam inclinatur in bonum rationis, per sensualitatem vero in delectabile carnis; et praecipue secundum quod est per peccatum corrupta. Et sic patet, quod non est idem inclinans naturaliter ad bonum et ad malum. Eadem tamen est potentia naturalis, quae hoc et illud appetit; sed non est idem actus.

ARTICULUS IV.

Ad quartum sic proceditur. Et 1. videtur, quod superior scintilla rationis non semper velit bonum. Scintilla enim rationis aliquid rationis est: velle autem non est rationis, sed voluntatis; ergo inconvenienter dicitur, quod scintilla rationis semper velit bonum.

2. Praeterea, lumen rationis non extinguitor per essentiam, quia intellectus perpetuo manet in anima; ergo non potest intelligi quod extinguatur nisi secundum actum, ut cum ratio errat: sed non solum inferior ratio, sed etiam superior errat interdum; ergo superior scintilla rationis extinguitor.

3. Praeterea, superior scintilla rationis videtur esse conscientia: quia post verba Hieronymi quae hic inducuntur, subditur in Glossa Ezech. 1: « Hanc autem conscientiam saepe praecipitari videmus; » sed conscientia frequenter errat; ergo superior scintilla rationis potest extinguui.

Sed contra. In quolibet genere oportet esse aliquam primam rectam et infallibilem regulam: hoc autem non esset in judiciis rationis, si superior ejus scintilla quandoque extingueretur; ergo scintilla rationis nunquam extinguitor.

Praeterea, in peccatore semper remanet aliquid, quod remurmurat malo; alias non esset vermis conscientiae in damnatis: sed remurmurare malo pertinet ad superiorem scintillam rationis; ergo superior scintilla rationis non extinguitor.

Respondeo. Dicendum, quod in cognitione spe-

culativa sunt quaedam principia naturaliter nota, in quibus nunquam contingit errare, ut, Omne totum est majus sua parte, et similia: in aliis vero contingit esse errorem. Ita et in cognitione practica sunt quaedam quasi prima principia juris naturalis, in quibus omnes consentiunt, et nullus in eis errare potest; quorum habitus synderesis dicitur, sicut habitus principiorum speculativorum dicitur intellectus. Unumquodque autem horum convenienter scintilla nominatur; quia sicut scintilla est aliquod modicum, quod evolat ex igne, etiam cum ignis extinguitor: ita errore existente circa ea quae sunt ex principiis, verum judicium rationis circa principia manet, quae sunt minima quantitate, sed maxima potestate.

Ad primum ergo dicendum, quod superior scintilla rationis dicitur velle, sicut et ratio, in quantum ad volendum inclinatur.

Ad secundum dicendum, quod superior scintilla rationis non est ratio superior, sed habitus principiorum, ex quibus tam superior quam inferior ratio procedit.

Ad tertium dicendum, quod conscientia non est synderesis, sed applicatio synderesis ad aliquod particulare factum; in qua applicatione contingit esse errorem propter errorem minoris propositionis. Nam universale judicium synderesis non potest applicari ad particularem actum, nisi mediante aliqua particulari propositione, quam tamen ratio superior vel inferior administrat, in qua contingit esse errorem; et ex hoc sequitur error in conscientia.

DISTINCTIO XL.

Post haec adjiciendum videtur de actibus etc. (V. edit. nostrae tom. VI, pag. 743.)

QUAESTIO UNICA.

Hic quaeruntur quatuor: 1.^o utrum aliqui actus sint ita boni, quod nullo modo possint male fieri; 2.^o utrum aliqui sint ita mali, quod nullo modo bene fieri possint; 3.^o utrum aliqui actus sint indifferentes; 4.^o utrum bonitas actus ex voluntate dependeat.

ARTICULUS I.

Ad primum sic proceditur. Et 1. videtur, quod aliqui actus sint ita boni, quod nullo modo possint male fieri. Quia circa ultimum finem boni non contingit esse malum aliquod; sed aliquis actus noster est ultimus finis rectarum voluntatum, scilicet diligere Deum, ut supra dictum est; ergo aliquis actus ita bonus est, quod nullo modo potest fieri male.

2. Praeterea, virtutibus, secundum Augustinum, nullus male utitur; ergo actus virtutum ita sunt boni, quod nullo modo male fieri possunt.

3. Praeterea, illud quod convenit alicui secundum rationem suae speciei, non potest ab eo removeri: sed aliqui actus secundum suam speciem sunt boni. Bonum enim et malum sunt differentiae specificae actuum moralium; ergo aliqui actus sunt ita boni, quod nullo modo male fieri possunt.

Sed contra. Quicquid fit timore servili, male fit, ut Augustinus dicit: sed nullus est actus adeo bonus, quin timore fieri possit; ergo nullus actus est adeo bonus, quin possit male fieri.

Praeterea, sicut substantia actus, ita et modus agendi ex voluntate determinatur: sed voluntas ho-

minis se habet ad bonum et malum; ergo quantumcumque aliquis actus sit bonus, potest per voluntatem bene vel male fieri.

Respondeo. Dicendum, quod actus aliquis potest dupliciter considerari. Uno modo secundum quod sortitur genus ex materia: et sic nullus actus est adeo bonus, quin male fieri possit: quia actus qui est bonus ex genere, potest indebitis circumstantiis vestiri, et ita male fieri. Alio modo potest considerari actus non solum secundum ordinem ad materiam, sed concernendo omnes circumstantias quibus vestitur: et sic etiam concernit modum agendi. Unde patet quod sic accipiendo actum bonum, aliquis actus est adeo bonus, quod nullo modo male fieri possit.

Ad primum ergo dicendum, quod diligere Deum est finis ultimus, non quocumque modo, sed secundum quod eligi debent: et ideo nihil prohibet, quin dilectio Dei possit male fieri, sicut patet in his qui diligunt Deum propter temporalia.

Ad secundum dicendum, quod actus virtutis est actus perfectus et quantum ad materiam, et quantum ad circumstantiam, et quantum ad intentionem: et sic patet quod non potest male fieri.

Ad tertium dicendum, quod actus moralis illam bonitatem quam ex specie habet, nullatenus amittit. Haec autem bonitas est, secundum quam dicitur bonum ex genere. Sed tamen potest superaddi aliqua malitia ex indebito fine, vel quacumque circumstantia.

ARTICULUS II.

Ad secundum sic proceditur. Et 1. videtur, quod nullus actus sit adeo malus, quin bene fieri possit. Voluntas enim cum naturaliter ordinetur ad bonum magis se habet ad bonum quam ad malum; cum ergo nullus actus ex voluntate procedens sit ita bonus, quod non possit fieri male, ut dictum est, videtur quod nullus sit adeo malus, quin possit fieri bene.

2. Praeterea, actus dicitur malus, in quantum caret aliquo bono; sed omne bonum privatum potest recompensari per aliquod majus bonum. Cum ergo intentio voluntatis possit fieri ad infinitum bonum, videtur quod ex tali intentione possit actus, quantumcumque malus, bene fieri.

3. Praeterea, bonum ex fine dependet. Sed quantumcumque sit malus aliquis actus, potest fieri bono fine; ergo potest fieri bene.

Sed contra. Quicquid est de substantia rei, inseparabiliter ei inhaeret: sed aliquis actus secundum speciem suae substantiae malus est; ergo adeo potest esse malus aliquis actus, quod nullo modo bene fieri potest.

Praeterea, si actus per se mali bene fieri possent, praecipue hoc esset ex hoc, quod bona intentione fierent: sed hoc modo bene fieri non possunt, quia, ut dicit Philosophus in 8 Ethicorum, qui agunt mala propter bonum, simulantur his qui inconvenienti medio utuntur ad propositum ostendendum; ergo aliqui actus sunt adeo mali, quod nullo modo possunt bene fieri.

Respondeo. Dicendum, quod circa haec tangitur duplex opinio in litera. Una, quae ponebat omnes actus esse indifferentes, et quantum in se est, posse bene et male fieri: quorum ratio fuisse videtur, quod actus ex sua substantia non habet quod sit malus; sed ex aliquo addito, vel circumstantia, vel fine. Sed hoc non convenienter dicitur: quia licet

actus ex hoc quod est ens non habeat quod sit malus, habet tamen quod sit malus ex hoc, quod sit tale ens specificatum. Specificatur enim actus ex materia, vel ex objecto: unde interdum habet malitiam. Et ideo aliqui actus sunt, qui secundum suam speciem accepti, non sunt indifferentes, sed mali, quamvis malitiam non habeant ex ratione sui generis. Ex quo autem actus ex parte materiae malitiam habet, nullo modo potest fieri bene: quia malum causatur ex singularibus defectibus, ut Dionysius dicit. Unde una sola circumstantia inordinata sufficit ad hoc, quod actus non bene fiat.

Ad primum ergo dicendum, quod non est simile de bono et malo. Nam secundum Dionysium, bonum consistit ex una et tota causa; malum autem ex singularibus defectibus. Unde ex hoc, quod malus est actus ex genere, sufficit ad hoc, quod male fiat. Non autem sufficit ad hoc quod bene fiat, quod est bonus ex genere.

Ad secundum dicendum, quod ratio illa procederet, si homo per actum malum posset consequi summum bonum. Sed hoc non potest esse; quia actus malus est incompetens medium ad consequendum finem bonum, ut dictum est.

Ad tertium dicendum, quod licet res habeat bonitatem ex fine, requiritur tamen quod sit fini bono proportionata. Malus autem actus bono fini proportionatus non est. Unde ratio non sequitur.

ARTICULUS III.

Ad tertium sic proceditur. Et 1. videtur, quod nullus actus humanus possit esse indifferens. Aut enim aliquis actus est ordinabilis in bonum finem, et actu ordinatus in ipsum: aut si non est ordinabilis de se malus est. Si est ordinabilis et non ordinatus, est vanus, et per consequens malus: si autem est ordinabilis et ordinatus est bonus; ergo nullus actus est quin sit bonus et malus.

2. Praeterea, plus est facere quam dicere; sed nullum verbum est hominis, quod non sit bonum vel malum, quia etiam verba otiosa sunt mala, ut patet Matth. 12: « Omne verbum otiosum, quod locuti fuerint homines, reddent de eo rationem; » ergo multo fortius omnis actus vel est bonus vel malus.

3. Praeterea, actus dicitur malus ratione alicujus privationis, quae in actu fundatur: sed privatio et habitus non habent medium circa proprium susceptibile; ergo omnis actus vel est bonus vel malus.

Sed contra. Bonum et malum, secundum Philosophum in Praedicamentis sunt contraria mediata; ergo inter ea potest esse aliquod medium; et sic aliquis actus potest esse neque bonus neque malus.

Praeterea, aliqui actus secundum genus suum indifferentes sunt, ut levare festucam vel aliquid hujusmodi; qui bonitatem habent vel malitiam praecipue ex intentione finis. Contingit autem ipsum finem esse indifferentem ad quem talis actus per intentionem refertur; ergo actus remanebit omnino indifferens.

Respondeo. Dicendum, quod circa hoc est duplex opinio. Quidam enim dicunt omnes actus esse indifferentes et aliquos per se bonos vel malos. Quidam vero nullum actum esse indifferentem. Quaelibet autem harum opinionum potest esse vera. Actus autem aliquis potest tripliciter considerari.

Uno modo ratione sui generis: et sic omnis actus est indifferens: quia ex hoc quod est actus non habet quod sit bonus vel malus. Alio modo potest considerari ex specie sua quam habet ex materia vel objecto; et sic aliquis actus est indifferens, qui scilicet ex materia sua non habet nec malitiae, nec bonitatis rationem: non autem omnis actus est talis. Tertio modo potest considerari aliquis actus secundum individuum, et sic oportet quod consideretur cum omnibus circumstantiis, quae ad actum concurrunt: et sic nullus actus ex deliberativa voluntate procedens est indifferens, quin sit bonus vel malus: et hoc quia si refertur in finem debitum, est bonus, alias autem est malus. Tenetur enim voluntas deliberativa omnem actum referre in Deum vel immediate vel mediate. Etsi enim non semper actu cogitet de Deo, tamen habitu semper refert in Deum, et quodammodo actu, in quantum vis actualis intentionis praecedentis remanet in actibus sequentibus. Et per hoc patet solutio ad objecta.

ARTICULUS IV.

Ad quartum sic proceditur. Et 1. videtur, quod actus iudicetur bonus vel malus ex voluntate. Quod enim habet aliquid ex specie sua, convenit ei secundum seipsum: sed actio quandoque ex specie sua est bona vel mala, ut ex supradictis patet; ergo bonitas et malitia actionis non est semper iudicanda ex voluntate, sed secundum seipsam.

2. Praeterea, actio mediante voluntate refertur ad finem: sed aliquando potest esse finis bonus et actio mala; ergo malitia actionis vel bonitas, non semper iudicatur ex voluntate.

3. Praeterea, si malitia actionis vel bonitas, semper ex voluntate iudicaretur, plus mereretur vel demereretur qui aliquid vult et facit, quam qui vult tantum. Hoc autem est falsum, quia sic facere bonum esset superfluum, postquam illud aliquis vult; ergo non est verum quod bonitas vel malitia actionis iudicetur semper ex voluntate.

Sed contra est, quod dicitur Matth. 12: « Non potest arbor bona fructus malos facere, neque mala bonos. » Per arborem autem designatur voluntas, per fructus vero opera; ergo bonitas operum ex voluntate pensanda est.

Praeterea, Augustinus dicit, quod voluntas est qua peccatur et recte vivitur; ergo bonitas ex voluntate iudicanda est.

Respondeo. Dicendum, quod voluntas potest dici bona vel mala per comparisonem ad duo: scilicet ad finem proximum qui est materia vel objectum, id est volitum ipsum ad finem remotum. Ex altero autem horum non potest voluntas simpliciter dici bona, sed solum secundum quid. Ad hoc vero quod sit bona simpliciter, oportet bonitatem concurrere in utroque: sed ad hoc quod sit mala simpliciter sufficit malitia in altero tantum. Sive enim quis velit malum propter bonum, sive bonum propter malum voluntas est simpliciter mala: sed tunc solum est simpliciter bona, quando quis vult bonum propter bonum. Patet ergo quod voluntas et actio semper se concomitantur in malitia et bonitate, secundum quod bonitas et malitia pertinent ad meritum et demeritum, non autem secundum quod simpliciter rectitudinem vel inordinationem important. Potest enim esse actio inordinata, et tamen non est de-

meritoria, si omnino involuntarie fiat; si vero voluntarie, jam erit et voluntas mala quae vult malum, et actio mala. Et simile est de actione et voluntate bona.

Ad primum ergo dicendum, quod licet actiones aliquae habeant aliquam rectitudinem vel inordinationem ex seipsis secundum quod dicuntur bonae vel malae ex genere, tamen bonitatem vel malitiam moralem secundum quod sunt meritoriae vel demeritoriae, laudabiles vel vituperabiles, non habent, nisi secundum quod sunt voluntariae.

Ad secundum dicendum, quod bonitas quae est ex ordine ad finem convenit actui ex voluntate: bonitas vero quae est ex rectitudine actus, convenit voluntati per actum, in quantum scilicet voluntas vult bonum quod est actio bona: et nisi utraque bonitas concurrat, voluntas simpliciter dici bona non potest.

Ad tertium dicendum, quod quantum ad meritum praemii essentialis, actus exterior nihil addit ad malitiam vel bonitatem, nisi sit talis actus in quo intendatur vel remittatur voluntas: et hoc ideo quia talis bonitas consideratur in ordine ad finem ultimum. Nec tamen actio est superflua: quia actio adjicit aliquid respectu praemii accidentaliter secundum quod per eam decor honestatis perficitur, et ex ea consequitur aliquis fructus, ut aedificatio proximi vel relevatio miserorum.

DISTINCTIO XLI.

Cumque intentio, ut supradictum est etc. (*V. edit. nostrae tom. VI, pag. 752.*)

QUAESTIO UNICA.

Hic quaeruntur quatuor: 1.^o utrum absque fide omnis actio sit peccatum; 2.^o utrum aliqua virtus possit esse in infideli; 3.^o utrum ex timore servili possit aliquid bene fieri; 4.^o utrum omne peccatum sit voluntarium.

ARTICULUS PRIMUS.

Ad primum sic proceditur. Et 1. videtur, quod omnis actio infidelium sit peccatum. Dicitur enim Rom. 14: « Omne quod non est ex fide, peccatum est. » ubi Glossa dicit, « quod omni vita infidelium est peccatum. » Vita autem hic pro actu vitae accipitur; ergo infidelis in quolibet suo actu peccat.

2. Praeterea, omnis actus qui ex recta intentione non procedit, est peccatum. Tenemur enim actus nostros referre in Deum, secundum quod dicitur 1 Corinth. 10: « Omnia in gloriam Dei facite. » Recta autem intentio non potest esse, nisi per fidem; quia fides intentionem dirigit, ut in litera habetur; ergo omnis actio infidelis est mala.

3. Praeterea, defectus qui est in primo principio, redundat ad omnia sequentia, cum omnia sequentia regulentur ex primo: sed infidelitas est quidam defectus circa intellectum ex quo voluntas et ratio regulatur; ergo infidelis habet et voluntatem et actionem distortam; et ita omnis ejus actio est peccatum.

Sed contra. Hoc ad daemonum obstinationem pertinet, ut mala sit omnis eorum actio quae ex voluntate deliberata procedit: sed infideles non sunt

damnati nec obstinati; ergo non omnis actio eorum est mala.

Praeterea, consilium non datur nisi de bono: consiliatur autem infidelibus, ut aliquid faciant etiam in infidelitate existentes; non ergo omnis eorum actio est peccatum.

Respondeo. Dicendum, quod aliqua actio potest dici infidelis dupliciter. Uno modo per se, cum scilicet actio ex infidelitate procedit. Haec autem actio est infidelis inquantum huiusmodi: omnis autem talis actio, constat, quod est simpliciter peccatum. Alio modo dicitur actio infidelis per accidens; quae scilicet non procedit ex infidelitate, licet sit cum infidelitate. Hoc autem non est actio infidelis inquantum huiusmodi. Hanc autem infidelem actionem, contingit non esse peccatum. Per infidelitatem enim totum bonum naturalis cognitionis non (1) aufertur: et secundum hoc quod aliquid manet, ex eo potest procedere actus qui non est peccatum.

Ad primum ergo dicendum, quod Glossa loquitur de vita infidelium quae ex infidelitate procedit: quod patet ex intentione Apostoli ibidem. Loquitur enim de illis qui a cibis in lege prohibitis abstinabant, propter infidelitatem qua credebant legalia esse servanda. Vel potest dici quod omnis infidelium vita dicitur esse peccatum, quia est cum peccato. Nullum enim peccatum sine fide remittitur, Act. 13: « Fide purificans corda eorum. »

Ad secundum dicendum, quod fides rectificat intentionem in Deum perfecte, prout requiritur ad ipsum acquirendum; sed naturalis cognitio de Deo potest dirigere intentionem in Deum, si videtur peccatum.

Ad tertium dicendum, quod ratio illa procederet, si infidelitas totam cognitionem intellectus perverteret: quod patet esse falsum.

ARTICULUS II.

Ad secundum sic proceditur. Et 1. videtur, quod in infidelibus non possit esse aliqua virtus. Caritas enim est mater virtutum et fidei fundamentum. Sed infideles carent caritate et fide; ergo non habent aliquam virtutem.

2. Praeterea, falsus denarius non est denarius, quia unumquodque ita se habet ad verum sicut ad ens; ergo falsa virtus non est virtus: sed sicut Augustinus dicit, ubi deest agnitio aeternae veritatis falsa virtus est, etiam in optimis moribus, quod habet locum in infidelibus; ergo infideles non habent aliquam virtutem.

3. Praeterea, ut dicitur in 8 Physicorum, virtus est dispositio perfecti ad optimum. Sed infideles, nec perfecte boni esse possunt, nec disponuntur ad optimum quod est aeterna felicitas; ergo in eis nulla virtus esse potest.

Sed contra. Ex frequenti bene agere fit homo virtuosus, ut dicitur in 2 Ethic.: sed infideles possunt frequenter bene agere; ergo possunt fieri virtuosus.

Praeterea, fortitudo quaedam virtus est; haec autem in quibusdam infidelibus maxime fuit, qui propter bonum virtutis pericula intrepide sustinebant; ergo potest esse in infidelibus.

Respondeo. Dicendum, quod virtus perfectio quaedam est. Aliquid autem potest dici perfectum simpliciter, et secundum quid. Simpliciter quidem perfectum dicitur, quod habet quicquid natum est

habere et debet habere ad minus pro tempore illo: et talis perfectio in infideli esse non potest, quia non habet ea quibus ordinetur ad beatitudinem quae debent et possunt haberi in hac vita. Secundum quid vero perfectum potest dici, quod habet illa quae pertinent ad aliquem specialem perfectionis modum: et talis perfectio potest esse in infideli, quia potest habere illa bona quae homo natus est consequi ex propriis naturalibus. Et ideo virtus in infideli esse non potest secundum perfectam sui rationem, sed solum secundum imperfectam: et huiusmodi sunt virtutes politicae de quibus philosophi tractaverunt, et in quibus claruerunt plures gentilium. Et per hoc patet solutio ad objecta.

ARTICULUS III.

Ad tertium sic proceditur. Et 1. videtur, quod non quicquid fit ex timore servili male fiat. Illud enim quo nullus male utitur est virtus: ergo illud quo nullus bene utitur est peccatum vel vitium; si ergo ex timore servili nihil bene fiat, videtur quod timor servilis sit vitium, et sic non erit a Deo, quod est contra Glossam, Rom. 8.

2. Praeterea, nullus male agendo disponitur ad bonum, cum contrarium non sit dispositio ad suum contrarium: sed timor servilis disponit ad charitatem, introducit enim charitatem, sicut seta lineam ut dicit Augustinus: non ergo quicquid fit ex timore servili male fit.

3. Praeterea, peccatores nihil agunt ex amore, quia charitatem non habent, nec ex timore initiali vel casto qui sine charitate non est; ergo quicquid agunt boni, agunt ex timore servili. Si ergo quod ex timore servili agunt non bene fit, videtur quod quicquid peccatores agunt, male agunt: quod est falsum; ergo et primum, scilicet quod quicquid fit timore servili male fiat.

Sed contra. Illud quod male non fit potest simul esse cum charitate: sed cum charitate non potest esse quod aliquis bonum agat ex timore servili; ergo quicquid sit ex timore servili, male fit.

Praeterea, sicut se habet cupiditas ad consecrationem boni charitatis, ita se habet timor servilis ad vitiationem mali poenae: sed quicquid fit ex cupiditate male fit; ergo quicquid fit ex timore servili male fit.

Respondeo. Dicendum, quod tunc aliquid dicitur fieri ex timore servili, quando agens in agendo bonum principaliter habet oculos ad poenam quam intendit vitare: et sic patet quod voluntas ejus magis repugnat malo poenae quam malo culpae, per quam Deus offenditur, et nisi poenam timeret, iniquitatem committeret. Hoc autem ad perversitatem voluntatis pertinet; quia quanto aliquid malum magis oditur, tanto contrarium bonum magis amatur: et sic bonum naturae quod per poenam tollitur magis amatur quam bonum increatum: quod est perversae voluntatis. Quod autem fit ex perversa voluntate male fit, quantumcumque sit bonum ex genere. Unde quicquid fit ex timore servili male fit.

Ad primum ergo dicendum, quod timor, secundum quod quandam reverentiam Dei importat, bonum est et donum Dei; sed ipsa servilitas vitium est, ex qua contingit, quod quicquid ex eo fit, male fit.

Ad secundum dicendum, quod ex hoc ipso quod

(1) *Al. deest non; et paulo infra, loco aliquid legitur aliquis.*

aliquis assuescit ad faciendum bonum, licet non bene, sequitur quod quandoque libenter faciat bonum. Et per hunc modum contingit quod timor servilis disponit ad charitatem.

Ad tertium dicendum, quod licet infideles non habeant charitatem, habent tamen naturalem Dei dilectionem ex qua multa facere possunt; et sic non sequitur quod quicquid agunt ex timore servili agant.

ARTICULUS IV.

Ad quartum sic proceditur. Et 1. videtur, quod non omne peccatum sit voluntarium. Quod enim homo non potest vitare, non est voluntarium: sed homo absque gratia non potest vitare peccata mortalia nec venialia, etiam in gratia existens; ergo non omne peccatum est voluntarium.

2. Praeterea, ratio peccati formaliter ex deformitate sumitur; sed deformitas peccati non est voluntaria; ergo peccatum non debet voluntarium dici.

3. Praeterea, illud quod est ignotum est involuntarium: sed multa peccata per ignorantiam committuntur; ergo non omne peccatum est voluntarium.

Sed contra. Frustra prohibetur nobis, quod non est in nostra voluntate constitutum; sed peccata prohibentur nobis lege divina in qua nihil est frustra; ergo peccata sunt voluntaria.

Praeterea, involuntarium meretur misericordiam et veniam, ut dicitur in 3 Ethicorum: peccata vero merentur poenam; ergo peccata non sunt involuntaria.

Respondeo. Dicendum, quod in culpam imputari non potest alicui nisi illud cuius est causa. Unde cum peccata homini imputentur ad culpam, oportet quod peccatorum ipse sit causa. Eorum autem quae involuntarie committuntur, non est causa ille qui committit, sed hoc quod ad committendum cogit. Unde oportet omnia peccata, secundum quod rationem culpae habent, voluntaria esse. Et propter hoc in voluntate esse dicitur peccatum, sicut in causa, quamvis non semper sicut in subiecto.

Ad primum ergo dicendum, quod licet homo non possit vitare omnia peccata, sicut dictum est, potest tamen vitare singula, ut supra patuit.

Ad secundum dicendum, quod licet homo non velit deformitatem peccati, vult tamen illud ad quod de necessitate sequitur peccati deformitas; et ex hoc peccatum voluntarium fit.

Ad tertium dicendum, quod peccata quae per ignorantiam committuntur vel fiunt ex tali ignorantia quae et ipsa peccatum est in quantum est aliquo modo voluntaria; vel ignorantia illa non est talis quae excludat voluntatem peccati, quia non ignorantur omnia ex quibus causatur peccati deformitas. Si tamen ignorantia nullo modo esse peccatum, et si tolleretur penitus voluntarium, etiam quod ex ea sequeretur, non haberet rationem peccati.

DISTINCTIO XLII.

Cum autem voluntas mala etc. (V. edit. nostrae tom. VI, pag. 738.)

QUAESTIO UNICA.

Hic quaeruntur quatuor: 1.^o utrum actio et voluntas sit unum peccatum vel duo; 2.^o de differentia peccati venialis et mortalis; 3.^o de duabus radicibus peccatorum, scilicet timore et amore; 4.^o de numero capitalium vitiorum.

ARTICULUS I.

Ad primum sic proceditur. Et 1. videtur, quod voluntas et actio sint diversa peccata. Peccatum enim in aliquo actu consistit, ut supra habitum est; ergo ubi non est idem actus, non est idem peccatum: sed non est idem actus voluntatis interior, et membrorum exterior; ergo sunt diversa peccata.

2. Praeterea, peccatum dicitur ex hoc, quod legi Dei contrariatur. Sed diversis praeceptis prohibetur actus interior et exterior. Haec enim sunt duo praecepta decalogi: « Non moechaberis, » et « Non concupisces, » Exod. 10; ergo sunt diversa peccata.

3. Praeterea, si voluntas et actio sunt unum peccatum, hoc autem peccatum commissum est cum aliquis voluntate in peccatum consentit, sequetur quod cum agit actum exteriorem, nullum peccatum committat: quod est inconveniens; ergo et primum; scilicet quod voluntas et actio non sint unum peccatum.

Sed contra. Eadem est actio instrumenti et principalis agentis: sed membra, quibus actus exterior exercetur, sunt instrumenta voluntate mota; ergo idem peccatum est quod fit per voluntatem, et per exteriora membra.

Praeterea, diversa peccata mortalia sunt seorsum et distinctim confitenda. Sed non requiritur ut homo distinctim confiteatur voluntatem interiorem, et actum exteriorem; ergo voluntas interior et actus exterior sunt unum peccatum.

Respondeo. Dicendum, quod voluntas interior dupliciter potest considerari. Uno modo secundum quod est actui exteriori conjuncta; et sic est idem peccatum voluntas interior, et actus exterior; cum actus exterior rationem culpae consequatur ex hoc, quod est voluntarius. Alio modo potest considerari secundum quod est ab actu distincta; ut si aliquis primo in fornicationem consentiat, et postea eam actu exerceat; et sic sunt diversa peccata. Oportet enim quod quando actus exterior impletur, etiam interior voluntatis actus iteretur; et sic sunt ibi duo actus voluntatis, et per consequens duo peccata. Et per hoc patet solutio ad objecta.

ARTICULUS II.

Ad secundum sic proceditur. Et 1. videtur, quod peccatum mortale contra veniale, inconvenienter dividatur. Species enim ab invicem distinguuntur, per ea quae sunt de essentia specierum. Sed distinctio mortalis et venialis peccati sumitur penes reatum, qui non est de essentia peccati: quod patet ex hoc quod peccatum transit actu, et remanet

reato: ergo inconvenienter peccatum mortale contra veniale dividitur.

2. Praeterea, omne peccatum tollit virtutem, cum peccatum virtuti contrarietur; sed virtus non tollitur nisi per peccatum mortale; ergo omne peccatum est peccatum mortale; et sic divisio nulla est.

3. Praeterea, mortale peccatum et veniale ad invicem differre videntur per ordinem ad praeceptum. Nam peccatum mortale est contra praeceptum, non autem peccatum veniale; cum ergo praeceptum sit extra essentiam peccati, videtur quod inconvenienter peccatum, per mortale et veniale distinguatur.

Sed contra. Culpa est meritum poenae; sed diversae poenae veniali et mortali peccato debentur, ut in litera habetur; ergo sunt diversa peccata.

Praeterea, peccatum veniale est dispositio ad mortale; sed dispositio convenienter contra habitum dividitur, ut patet in Praedicamentis; ergo et veniale contra mortale.

Respondeo. Dicendum, quod divisio peccati per mortale et veniale sumitur penes reatum ad poenam. Nam peccata illa, quibus aeternae mortis poena debetur, mortalia dicuntur; ea vero quae facile veniam consequuntur dicuntur venialia. Quod contingit tripliciter. Uno modo ex causa: ut cum aliquod peccatum committitur per ignorantiam vel infirmitatem, quae sunt ratio facilis indulgentiae. Alio modo ex evento; ut cum culpa quae committendo fuerat mortalis, obligando ad poenam aeternam, per confessionem facta est venialis, manente obligatione ad poenam temporalem. Tertio modo dicitur veniale ex genere, et sic accipitur hic: et tunc differentia mortalis et venialis peccati, sumitur in ordine ad charitatem. Nam ille actus qui ex suo genere privat aliquid, quod requirit charitas Dei et proximi, est peccatum mortale ex genere; sicut idololatria, homicidium et similia. Actus vero qui hoc non tollit, aliquam tamen inordinationem habens, est peccatum veniale ex genere. Contingit tamen id quod est secundum suum genus veniale, fieri mortale, si in eo finis voluntatis constituatur, quia hoc erit iam contra hoc quod charitas Dei requirit, ut scilicet in eo solo voluntatis nostrae finis constituatur.

Ad primum ergo dicendum, quod licet reatus maneat post actum peccati, est tamen essentialis peccati effectus; quia ex hoc ipso, quod peccatum contra Deum est commissum, aliquis poenae est debitor: quod quidem debitum dimittitur, quando macula culpae per gratiam deletur, et praecedens inordinatio peccati per satisfactionem expiatur.

Ad secundum dicendum, quod peccatum veniale non tollit virtutis habitum, quia charitati non contrariatur, quae est mater virtutum; impeditur autem virtutis actus. Unde convenienter contra mortale distinguatur.

Ad tertium dicendum, quod quia omnia praecepta divinae legis in finem charitatis ordinantur, ideo sumitur differentia peccati mortalis et venialis, per differentiam ad praecepta legis; quae tamen si nulla essent explicitae data, maneret praedicta differentia per ordinem ad charitatem.

ARTICULUS III.

Ad tertium sic proceditur. Et 1. videtur, quod inconvenienter duae radices peccati assignentur,

scilicet timor et amor. Ut enim habetur Eccl. 10, « Initium omnis peccati superbia. » Hoc autem sub neutro horum comprehenditur; ergo inconvenienter radices peccatorum tanguntur.

2. Praeterea, divisio debet fieri per opposita. Timor autem non opponitur amori, sed spei magis, cum timor sit in irascibili, amor in concupiscibili; ergo inconvenienter timor et amor radices peccatorum ponuntur.

3. Praeterea, radix arboris non est arbor; ergo nec radix peccati est peccatum. Sed timor male humilians, et amor male inflammans sunt quaedam peccata; ergo non debent poni radices peccatorum.

Sed contra. Eisdem generatur virtus et corrumpitur, ut patet 2 Ethic.; sed timore et amore ordinate habitis, exerceantur actus virtutum; ergo et ex timore et amore inordinatis vitia oriuntur.

Praeterea, peccatum ex voluntate procedit. Sed voluntas vel bonum prosequitur, quod fit per amorem; vel malum fugit, quod fit per timorem; ergo radices peccatorum sunt amor et timor.

Respondeo. Dicendum, quod radix in peccatis dicitur metaphorice ad similitudinem radiceis arboris; in qua sunt duo consideranda. Unum est quod radix est principium nutritionis arboris; in quo differt a summitate arboris, quae est etiam quoddam arboris principium. Aliud est quod radix est proximum principium arboris, et ei conjunctum; per quod differt a semine. Peccatum autem fomentum suscipit ex conversione ad bonum commutabile; consummatur vero in aversione, ubi est quasi quaedam summitas peccati. Radix vero huiusmodi quidem in conversione quasi remotum principium, est fomes originaliter tractus; et etiam consequitur amor sui inordinatus, ex quo omnis mala affectio oritur. Proxima autem principia quasi conjuncta ad peccatum incitantia, sunt cupiditas alicujus boni temporalis consequendi, et timor alicujus boni temporalis, quod aliquis vitare nititur per peccatum; et ideo timor et amor ponuntur hic peccatorum radices.

Ad primum ergo dicendum, quod superbia respicit peccatum ex parte aversionis. Unde potest dici aliquod peccati initium, sed non radix.

Ad secundum dicendum, quod timor ex parte objecti, amori opponitur. Nam timor est de malo, amor vero de bono; et propter hoc ex opposito dividuntur.

Ad tertium dicendum, quod timor et cupiditas sive amor, secundum quod nominant actum peccati, non sunt radices, sed secundum quod nominant passiones.

ARTICULUS IV.

Ad quartum sic proceditur. Et 1. videtur, quod inconvenienter septem capitalia vitia in litera nominantur. Capitalia enim vitia principalia dicuntur: principalia vero sunt mortalia. Cum ergo multa sint peccata mortalia quae hic non nominantur; neque omnia quae hic numerantur, sint mortalia; videtur quod inconvenienter septem capitalia vitia nominantur.

2. Praeterea, vitia capitalia dicuntur, ex quibus alia peccata oriuntur. Sed ex quolibet peccato alia peccata oriuntur; ergo peccatum quodlibet potest dici capitale.

3. Praeterea, Gregorius dicit quod ex superbia

omnia oriuntur; ergo ipsa sola debet dici vitium capitale.

4. Praeterea, inanis gloria ex superbia nascitur. Sed caput non oritur ab alio; ergo inanis gloria non debet dici capitale: et sic male numerantur haec septem vitia capitalia.

Sed contra. Vitium et virtus opponuntur, sed septem sunt principalis virtutes, scilicet tres theologicae, et quatuor cardinales; ergo septem debent esse vitia capitalia.

Respondeo. Dicendum, quod vitium aliquod dicitur capitale dupliciter. Uno modo quia est dignum poena capitali; et sic non sumitur hic. Alio modo quia est caput aliorum vitiorum; et hoc modo hic accipitur. Dicitur autem aliquod peccatum esse caput aliorum, per modum quo principes dicuntur capita populorum. Princeps autem ordinat populos sibi subditos ad proprium finem. Unde illa peccata capitalia dicuntur, quae habent fines principales, ad quos nata sunt ut plurimum alia peccata ordinari: et hic est unus modus, quo peccatum oritur ex peccato, ut supra, distinct. 36, dictum est. Finis autem ad quem nata sunt peccata ordinari, aut est objectum concupiscibilis aut irascibilis. Concupiscibilis autem duplex. Unum est, bonum adipiscendum: et hoc vel bonum exterius, respectu cuius est avaritia: vel bonum delectabile carnis: quod est ordinatum, vel ad conservationem individui, respectu cuius est gula: vel ad conservationem speciei, respectu cuius est luxuria. Aliud objectum, est malum vitandum; et dico malum quod reputatur boni concupiti impeditivum. Quod quidem impedimentum vel est in ipso concupiscente, et sic est accidia, quae abhorret laborem spirituales, in quantum impedit corporalem iucunditatem: vel est in alio; et sic est invidia, quae tristatur de bono alterius, prout aestimatur impeditivum proprii boni. Irascibilis etiam objectum est vel bonum arduum adipiscendum, respectu cuius est superbia vel inanis gloria: aut est malum illatum repellendum, et sic est ira. Ex parte vero rationis non accipitur vitium capitale; quia bonum rationis non movet ad peccata, sed magis ad actus virtutum: nec in ratione est peccatum nisi per viam defectus, qui non habet rationem finis moventis. Unde infidelitas non ponitur peccatum capitale, nec alia huiusmodi.

Ad primum ergo dicendum, quod peccata capitalia dicuntur principalia, in quantum sunt principia aliorum; non quia sint aliis graviora, prout peccata mortalia principalia possunt dici. Unde non oportet omnia peccata mortalia dici capitalia: nec etiam omnia peccata capitalia in omnem eventum esse mortalia.

Ad secundum dicendum, quod in mortalibus consideratur illud quod frequenter accidit. Licet autem ex quibuslibet peccatis quaelibet oriri possint modo praedicto, frequentius tamen aliqua ex aliquibus oriuntur: et secundum hoc quaedam peccata ponuntur specialiter quorundam capita.

Ad tertium dicendum, quod licet ex superbia omnia vitia oriri possint, frequentius tamen ex ea et proximius aliqua specialia oriuntur, et quaedam alia ex aliis; sed tamen Gregorius hac ratione non ponit superbiam inter vitia capitalia, sed omnium capitalium caput. Loco autem ejus ponit inanem gloriam, quae est proxima filia superbiae. Et ex hoc patet solutio ad quartum.

DISTINCTIO XLIII.

Est praeterea quoddam genus peccati etc. (V. edit. nostrae tom. VI, pag. 775.)

QUAESTIO UNICA.

Hic quaeruntur quatuor: 1.^o utrum peccatum in Spiritum sanctum, sit speciale peccatum; 2.^o de speciebus ejus; 3.^o utrum sit irremissibile; 4.^o quibus conveniat in Spiritum sanctum peccare.

ARTICULUS I.

Ad primum sic proceditur. Et 1. videtur, quod peccatum in Spiritum sanctum non sit speciale peccatum. Peccare enim in Spiritum sanctum, est ex certa malitia peccare. Sed secundum quodlibet genus peccati potest aliquis ex certa malitia peccare; ergo peccatum in Spiritum sanctum non est aliquod speciale peccatum.

2. Praeterea, peccatum in Spiritum sanctum dividitur contra peccatum est ignorantia et ex infirmitate: sed peccare ex ignorantia vel infirmitate, non nominat speciale genus peccati; ergo nec peccatum in Spiritum sanctum.

3. Praeterea, malum, secundum Dionysium, est praeter voluntatem: nullus autem appetit malum nisi prout est apparens bonum: ergo nullum peccatum est ex certa malitia, sed ignorantia: et sic nullum genus peccati est in Spiritum sanctum.

Sed contra. Peccatum in Spiritum sanctum distinguitur ab aliis peccatis, ut patet Matth. 12; ergo est speciale genus peccati.

Praeterea, gravitas peccati sequitur speciem ejus; sed peccatum in Spiritum sanctum, gravitate distinguitur ab aliis peccatis; ergo est speciale genus peccati.

Respondeo. Dicendum, quod peccatum in Spiritum sanctum dicitur dupliciter. Uno modo, quando quis peccat specialiter contra personam Spiritus sancti; sicut Macedonius, qui dixit Spiritum sanctum esse creaturam: et sic non accipitur hic. Alio modo dicitur peccatum in Spiritum sanctum, quod est contra attributum Spiritus sancti: et sic accipitur hic. Attribuitur autem Spiritui sancto bonitas, per appropriationem quamdam, sicut Patri potentia, et Filio sapientia. Unde sicut peccatum quod fit ex infirmitate est contra Patrem, quod est ex ignorantia contra Filium; ita ex certa malitia contra Spiritum sanctum. Ex certa autem malitia aliquis peccat, quando existens certus de peccati malitia, ex electione id operatur, et non ex passione quae pertinet ad infirmitatem. Quod quidem contingit dupliciter. Uno modo ex inclinatione habitus. Habens enim habitum luxuriae, proprio iudicio, non ex passione incitatus, prorumpit in actum luxuriae: et sic peccare ex certa malitia non dicit speciale genus peccati, nec proprie est peccare in Spiritum sanctum. Alio modo contingit ex hoc, quod aliquis abjicit ea per quae a peccato retraheretur: et praecipue quae pertinent ad bonitatem divinam, sicut misericordia, quam repellit desperatio; et sic proprie est peccatum in Spiritum sanctum; et est speciale genus peccati, cum habeat specialem materiam, scilicet retrahens a peccato, in quantum repulsum.

Ad primum ergo dicendum, quod in peccato in Spiritum sanctum, conjunguntur duo peccata: unum

scilicet quod proprie est peccatum in Spiritum sanctum, ut repellere misericordiam per desperationem, vel justitiam per praesumptionem. Aliud est actus peccati qui ex hoc sequitur, ut fornicatio, vel quodcumque aliud. Sic ergo quantum ad secundum actum, qui fit ex certa malitia, non est speciale peccatum; sed quantum ad primum, qui est ipsa certa malitia.

Ad secundum dicendum, quod infirmitas vel ignorantia, pertinent ad excusationem peccati. Unde non addunt specialem rationem peccati. Sed malitia peccatum aggravat, et ideo non est simile.

Ad tertium dicendum, quod aliquis non dicitur ex certa malitia peccare, quia ipsum malum ei placeat ratione mali; sed illud quod certum est ei esse malum. Sed in eligendo, errat perverso iudicio rationis, eligendo quod non est eligendum: qui quidem error ad ignorantiam non pertinet, sed ad malitiam.

ARTICULUS II.

Ad secundum sic proceditur. Et 1. videtur, quod species peccati quae sunt in Spiritum sanctum, inconvenienter in litera ponantur. Fides enim praecedit spem et charitatem. Sed desperatio quae opponitur spei, ponitur peccatum in Spiritum sanctum; ergo et infidelitas, quae opponitur fidei, species peccati in Spiritum sanctum deberet poni.

2. Praeterea, illud quod potest esse accidens cuiuslibet peccati, non debet poni species alicujus peccati: sed impenitentia potest esse accidens cuiuscumque peccati; ergo non debet poni species peccati in Spiritum sanctum.

3. Praeterea, misericordia Dei est infinita, spes autem hominis est finita; ergo nunquam superflue potest homo de Deo sperare; ergo praesumptio, quae ad superfluitatem spei pertinet, non debet poni peccatum in Spiritum sanctum.

4. Praeterea, nullum peccatum, quod committitur ex infirmitate vel ignorantia, est peccatum in Spiritum sanctum: sed praesumptio, et desperatio, et alia quae hic tanguntur, possunt ex ignorantia committi, vel ex infirmitate; ergo non sunt peccata in Spiritum sanctum.

5. Praeterea, invidia est unum de septem vitiis capitalibus; sed alia non ponuntur species peccati in Spiritum sanctum; ergo nec invidia. In contrarium est, quod in litera determinatur per auctoritates sanctorum.

Respondeo. Dicendum, quod sicut dictum est, peccatum in Spiritum sanctum est, cum quis a se abiecit ea per quae a peccato retrahi posset. Retrahitur autem homo a peccato vel commisso, vel committendo. A commisso, per poenitentiam: ad quam duo requiruntur: scilicet propositum de caetero non peccandi, quod repellit obstinatio: et dolor de peccato praeterito, quod repellit impenitentia. A peccato vero committendo retrahit timor Dei et amor. Timorem repellit praesumptio: amor vero praesupponit spem et fidem. Fidem repellit impugnatio veritatis agnitae, spem desperatio; amorem charitatis, invidentia fraternae gratiae. Et sic sunt septem species peccati in Spiritum sanctum, quae in litera ponuntur.

Ad primum ergo dicendum, quod infidelitas, peccatum in Spiritum sanctum poni non potest, quia habet quemdam defectum cognitionis: et sic

ad ignorantiam pertinet; sed loco ejus ponitur impugnatio veritatis agnitae.

Ad secundum dicendum, quod impenitentia dupliciter accipitur. Uno modo pro proposito nunquam poenitendi; et sic est speciale peccatum, et ponitur species peccatum in Spiritum sanctum. Alio modo pro actuali impenitentia, prout scilicet aliquis non poenitet usque ad mortem; et sic est circumstantia peccati. Tamen Augustinus videtur velle in libro Retractionum, quod haec circumstantia requiratur, ad hoc quod aliquod peccatum sit in Spiritum sanctum.

Ad tertium dicendum, quod homo non potest nimis de Dei misericordia sperare: potest tamen de ea sperare inordinate, cum spes omnino timorem expellit.

Ad quartum dicendum, quod huiusmodi non sunt peccatum in Spiritum sanctum, nisi cum aliquis ex certo proposito et per se aliquid istorum committit.

Ad quintum dicendum, quod invidia de profectu proximi non est peccatum in Spiritum sanctum; sed invidia pro defectu divinae gratiae, sicut Judaei invidabant fidei Christi divulgationi.

ARTICULUS III.

Ad tertium sic proceditur. Et 1. videtur, quod peccatum in Spiritum sanctum non sit irremissibile. Remissio enim peccatorum fit per bonitatem Spiritus sancti; hoc autem omnem gravitatem culpae excedit; ergo nullum peccatum est irremissibile.

2. Praeterea, secundum Damascenum, idem est Angelis casus, quod hominibus mors: sed Angeli post casum in hoc ceciderunt, ut peccata eorum essent irremissibilia; ergo peccatum hominis ante mortem non est irremissibile.

3. Praeterea, liberum arbitrium se habet ad bonum et ad malum; sed in hac vita liberum arbitrium hominis non est determinatum ad malum ut redire ad statum justitiae non possit; et sic nullum ejus peccatum est irremissibile.

Sed contra est, quod dicitur Matth. 12: « Qui peccaverit in Spiritum sanctum, non remittetur ei. nec in hoc saeculo, nec in futuro. »

Praeterea, remota causa removetur effectus: sed Spiritus sanctus est causa remissionis peccati; ergo peccatum, quod specialiter gratiae Spiritus sancti opponitur, est irremissibile.

Respondeo. Dicendum, quod remissibilitas peccati in Spiritum sanctum potest intelligi dupliciter. Uno modo ita quod nunquam remittetur: et sic peccatum in Spiritum sanctum dicitur irremissibile, si accipiatur cum circumstantia finalis impenitentiae, sicut accipit Augustinus. Peccatum enim de quo aliquis non poenitet usque ad mortem, nunquam remittetur. Alio modo potest dici irremissibile, quia non de facili remittitur, quamvis aliquando remittatur. Et hoc contingit ex tribus. Primo quia non habet in se causam excusantem vel alleviantem quae ad facilitatem remissionis operetur; sicut habet peccatum, quod ex ignorantia vel infirmitate committitur. Secundo quia cum ex electione peccatur, finis constituitur in peccato. A fine enim aliquis non de facili avellitur; sicut nec a cognitione principiorum mutatur. Finis enim in operabilibus, est sicut principium in speculativis. Tertio quia peccans in Spiritum sanctum repellit

a se ea quibus veniam mereri posset; et haec inter ceteras causas est potior. Et per hoc patet solutio ad objecta.

ARTICULUS IV.

Ad quartum sic proceditur. Et 1. videtur, quod primum peccatum hominis non possit esse in Spiritum sanctum. Hoc enim peccatum est ceteris gravius: sed paulatim homo fit pessimus, sicut et paulatim fit perfectus; ergo primum peccatum hominis innocentis non potest esse peccatum in Spiritum sanctum.

2. Praeterea, si primum peccatum innocentis potest esse in Spiritum sanctum, maxime videtur quod primus homo et diabolus in Spiritum sanctum peccasset. Sed hoc non est verum. Nam Adam in aliquo fuit seductus, secundum Augustinum; et sic ex ignorantia peccavit: diabolus vero potentiam appetiit, et sic videtur in Patrem peccasse; ergo primum peccatum hominis innocentis non potest esse in Spiritum sanctum.

3. Praeterea, peccatum in Spiritum sanctum est peccatum ex certa malitia: sed certa malitia quoddam peccatum est; ergo primum hominis peccatum non potest esse in Spiritum sanctum.

Sed contra. Peccatum in Spiritum sanctum ex voluntate procedit: sed voluntas libera est ad omnia volita; ergo statim potest prodire in peccatum in Spiritum sanctum.

Praeterea, peccatum Adae, quantum ad aliquid ceteris fuit gravius; ergo peccati gravitas non impedit, quin homo statim possit in Spiritum sanctum peccare.

Respondeo. Dicendum, quod sicut dictum est, ex certa malitia contingit peccare dupliciter. Uno modo per inclinationem habitus: et sic ex certa malitia peccare non potest homo statim a principio, sed postquam habitum peccati ex pluribus actibus requisivit. Unde Philosophus in 5 Ethicorum dicit, quod difficile est injusta facere per modum quo injustus facit. Alio modo peccat aliquis ex certa malitia expellendo retrahentia a peccato, quod potest homo statim facere. Unde, cum hoc proprie sit peccare in Spiritum sanctum, statim a principio potest homo in Spiritum sanctum peccare.

Ad primum ergo dicendum, quod perfectio virtutis quantum ad modum agendi non inest homini statim; sed quantum ad genus facti, potest statim inesse; quia quantumcumque perfectum actum potest homo statim facere: et similiter est de peccato.

Ad secundum dicendum, quod peccatum primi hominis et Angeli non fuit in Spiritum sanctum, secundum quod est speciale peccatum; quia uterque peccavit ex superbia. Quantum vero ad circumstantiam peccati, utrumque fuit in Filium, quia non consideraverunt quae consideranda erant ad evitacionem peccati.

Ad tertium dicendum, quod ipsa malitia ex qua aliquod peccatum procedit, est peccatum in Spiritum sanctum. Unde nihil prohibet ipsum esse primum.

DISTINCTIO XLIV.

Post praedictam consideratione etc. (V. edit. nostrae tom. VI, pag. 782.)

Hic est duplex quaestio: Prima de causa potentiae. Secunda de obedientia.

QUAESTIO I.

Circa primum quaeruntur duo: 1.^o utrum potentia peccandi sit a Deo; 2.^o utrum omnis potestas praelationis sit a Deo.

ARTICULUS PRIMUS.

Ad primum sic proceditur. Et 1. videtur, quod potentia peccandi non sit a Deo. Illud enim quod sequitur creaturam, secundum quod ex nihilo, non est a Deo; quia non esse non habet Deum causam. Sed posse peccare competit creaturae, secundum quod est ex nihilo; ergo potentia peccandi non est a Deo.

2. Praeterea, potentia peccandi est per se causa peccandi: si igitur Deus est causa potentiae peccandi, et peccatum erit a Deo; quod est inconveniens.

3. Praeterea, effectus habet similitudinem suae causae: sed in Deo nulla potentia peccandi est; ergo ab eo potentia peccandi non est.

Sed contra. Omne ens est a Deo: sed potentia peccandi est quoddam ens; ergo a Deo.

Praeterea, potentia eadem est oppositorum: sed potentia bene agendi est a Deo; ergo et potentia peccandi.

Respondeo. Dicendum, quod posse peccare est posse agere actum deficientem. Deficere vero in actu ex defectu potentiae contingit. Unde in potentia peccandi est aliquid potentiae, secundum quod est principium actus peccati: et sic potentia peccandi est a Deo. Est etiam in ea aliquis defectus, secundum quem sequitur in peccato defectus; et sic non a Deo.

Ad primum ergo dicendum, quod ratio illa procedit de potentia peccandi ex parte defectus.

Ad secundum dicendum, quod potentia peccandi est a Deo, sicut et substantia actus peccandi: sed sicut deformitas peccati non est a Deo, ita nec defectus potentiae.

Ad tertium dicendum, quod effectus divinus imitatur Deum, sed imperfecte. Unde quod est in Deo sine defectu, in creatura est cum defectu.

ARTICULUS II.

Ad secundum sic proceditur. Et 1. videtur, quod non omnis praelatio sit a Deo. Nihil enim quod a Deo fit perverse fit: sed quidam ad praelationem perverse perveniunt, ut simoniaci et violenti; ergo non omnis praelatio est a Deo.

2. Praeterea, quae a Deo sunt, ordinata sunt, ut dicitur Rom. 13. Sed in aliquibus praelationibus est inordinatio, quia ordinem justitiae non sequuntur; ergo non omnis praelatio est a Deo.

3. Praeterea, Rom. 13, probat Apostolus, quod potestati non est resistendum, quia potestas est a Deo: sed potestati alicujus praelationis est resistent-

dum, scilicet daemonis; ergo non omnis praelatio est a Deo.

Sed contra est, quod dicitur Prov. 8: « Per me reges regnant, et legum conditores justa discernunt. »

Praeterea, Rom. 15 dicitur: « Non est potestas nisi a Deo: » sed omnis praelatio in aliqua potestate fundatur; ergo omnis praelatio est a Deo.

Respondeo. Dicendum, quod in praelatione tria possunt considerari. Primum est ipse praelationis ordo, quo quidam aliis praeferuntur; quod ad pulchritudinem universi pertinet, et quoddam bonum est, unde est divinae sapientiae effectus. Secundum est modus quo ad praelationem pervenitur; qui quandoque malus est et non est a Deo, quandoque vero est a Deo. Tertium est praelationis usus, qui quando bonus est a Deo est, non autem quando est malus.

Ad primum ergo dicendum, quod ratio illa procedit de modo adipiscendi praelationem.

Ad secundum dicendum, quod ratio illa procedit de usu praelationis.

Ad tertium dicendum, quod diabolo conceditur a Deo potestas, tamquam hosti ad impugnandum ad exercitandum, non tamquam regi ad gubernandum; et ideo est ei resistendum.

QUAESTIO II.

Deinde quaeritur de obedientia. Et circa hoc quaeruntur duo: 1.^o utrum praelatis homo obedire teneatur; 2.^o utrum superioribus praelatis semper magis teneatur obedire.

ARTICULUS I.

Ad primum sic proceditur. Et 1. videtur, quod subditus praelatis non semper teneatur obedire. Gravior enim est servitus peccati, quam servitus hominis: sed per gratiam Christi homo liberatur a servitute peccati: Rom. 6: « Liberati a peccato servi facti Deo; » ergo multo magis liberatur a servitute hominis; non ergo semper Christiani tenentur suis dominis obedire.

2. Praeterea, filii regum non tenentur hostibus regum obedire: sed homines justi sunt filii aeterni regis, scilicet Dei. Rom. 8: « Ipse Spiritus testimonium reddit spiritui nostro, quod sumus filii Dei; » ergo cum infideles et peccatores sint hostes Dei, videtur quod justii infidelibus et peccatoribus obedire non teneantur.

3. Praeterea, maxime videntur ad obedientiam praelatorum religiosi teneri, qui obedientiam profitentur; sed ipsi non tenentur obedire in omnibus suis praelatis. Unde dicit Bernardus in libro de Dispensatione et praecepto: « Nihil praelatus prohibeat horum quae promisit, nihil plus exigat quam promisit; » ergo nec alii subditi suis dominis obedire tenentur.

Sed contra est, quod dicitur 1 Pet. 2: « Servi, subditi estote dominis vestris non tantum bonis et modestis, sed etiam dyscolis. » Sed in subjectione obedientia includitur; ergo subditi suis praelatis obedire tenentur.

Praeterea, Matth. 22: « Reddite quae sunt Caesaris Caesari, et quae sunt Dei Deo: » sed inter alia quae Caesari debebantur erat, ut ejus praeceptis et legibus obediretur; ergo subditi tenentur obedire

dominis temporalibus praeter obedientiam quam debent Deo.

Respondeo. Dicendum, quod sicut divina providentia reguntur res naturales quodam ordine, ita et res humanae. In gubernatione autem rerum naturalium talis ordo attenditur: quod Deus infinita per superiora movet, sicut habetur ab Augustino 5 de Trinitate: et similiter in rebus humanis oportet quod inferiores a Deo, moventibus superioribus, gubernentur. Movent autem praelati suos subditos per imperium. Unde sicut quilibet tenetur subesse divinae providentiae, ita et obedire suis praelatis. Sed in hac obligatione sunt tria attendenda. Quorum primum est, ut praelatus juste praelationis locum obtineat: alias si per potentiam occupaverit, non tenentur subditi ei obedire, nisi ejus praelatio sit ratificata per consensum subditorum vel auctoritatem alicujus superioris. Secundum est, ut praecepta non proponat contraria divinis praeceptis: sic enim praeciperet contra ordinem divinae providentiae; unde subditi ei obedire non deberent, sicut nec divinae providentiae repugnare. Tertium est, ut praecepta proponat his ad quae se extendit sua praelatio; alias subditi ei non tenerentur obedire; sicut si princeps saecularis vellet disponere de spiritualibus suo praecepto.

Ad primum ergo dicendum, quod subjectio, qua homo subditur homini, est ex ordine divinae providentiae, contra quem est subjectio qua homo subditur peccato; et ideo non est simile.

Ad secundum dicendum, quod licet praelatus in quantum est peccator, sit hostis Dei, tamen in quantum est praelatus, est Dei minister, ut patet Rom. 15; et secundum hoc debetur ei obedientia et reverentia.

Ad tertium dicendum, quod praelatio praelati in aliqua religione se extendit ad ea quae sunt illius religionis secundum regulam ordinata: vel explicite, sicut praecepta regulae; vel implicite, sicut poenae pro culpis et mutua obsequia: et in his non est dubium quod subditus tenetur praelato obedire. In his vero quae sunt regula graviora, communiter dicitur, quod obedire non tenetur, quia hujusmodi jus praelationis excedunt. Similiter etiam de his quae sunt contra Deum vel contra regulam, clarum est quod obedire non tenetur; de indifferentibus vero est diversa opinio; quibusdam dicentibus quod religiosus in his tenetur obedire praelato: quibusdam quod non. Tamen perfectae obedientiae est obedire in omnibus quae non sunt contra Deum.

ARTICULUS II.

Ad secundum sic proceditur. Et 1. videtur, quod non sit magis obediendum superiori praelato, quam inferiori. Superior enim est spiritualis praelatio, quam temporalis; si ergo superiori praelato semper esset magis obediendum, videtur quod quantum ad omnia esset magis obediendum spirituali praelato quam temporali.

2. Praeterea, archiepiscopus episcopo superior est: sed in quibusdam subditus episcopi, magis ei obedire tenetur quam archiepiscopo; ergo non semper superiori praelato est magis obediendum.

3. Praeterea, episcopus est supra abbatem: sed monachus plus tenetur obedire abbati quam episcopo vel Papae, quia abbati obedientiam vovit, non

episcopo vel Papae: ergo inferiori praelato aliquando est magis obediendum.

Sed contra. Praelatio causat obedientiae debitum; ergo ei, qui est in superiori praelatione constitutus, major obedientia debetur.

Præterea, ordo praelationis in humanis, est sicut ordo motionis in rebus naturalibus. Sed in naturalibus quanto causa movens est superior, tanto vehementius movet, ut patet in libro de Causis: ergo et in rebus humanis quanto praelatus est superior, tantum ejus praeceptum magis astringit.

Respondeo. Dicendum, quod praelatio superior et inferior dupliciter se possunt habere. Uno modo sic, quod tota praelatio inferior a superiori causeatur et disponatur, sicut praelatio proconsulis se habet ad potestatem imperatoris vel potestas balivi ad potestatem regis, aut episcopi ad potestatem Papae: et in talibus quantum ad omnia est magis obediendum superiori praelato; quia quod obediatur inferiori, hoc non est nisi ex auctoritate superioris. Alio modo se possunt habere hoc modo quod inferior non totaliter dependeat a superiori, sed ambae procedant ab una suprema quae inferiorem in quibusdam supponit superiori, non au-

tem in omnibus; sicut se habet potestas archiepiscopi et episcopi, quorum ordinatio dependet ex auctoritate Papae, qui immediate habet auctoritatem a Domino Jesu Christo. Unde in talibus obediendum est magis superiori quantum ad ea in quibus est superior, non autem quantum ad omnia. Et per hoc patet solutio ad primum quod obiciebatur de praelatione spirituali et temporalis: quia una non totaliter dependet ex altera, sed utraque a Deo; et ideo utrique est magis obediendum in his in quibus accepit praelationem a Deo. Et similiter patet solutio ad secundum de praelatione archiepiscopi et episcopi.

Ad tertium dicendum, quod monachus in his quae ad disciplinam regularem pertinent plus tenetur obedire abbati, quam episcopo. In his enim se voto astrinxit abbati. Sed in his quae pertinent ad ecclesiasticam ordinationem plus tenetur obedire episcopo. Sed in utrisque plus tenetur obedire Papae, a quo et abbas praelationem habet et regulam quam monachus vovet, firmitatem. Super omnes autem obedire tenemur Deo et Patri Domini nostri Jesu Christi, cujus honor et imperium in saecula saeculorum. Amen.

DE INCARNATIONE VERBI

LIBER TERTIUS

PROLOGUS.

« Si habes brachium sicut Deus, et si voce simili tonas, circumda tibi decorem, et in sublime erigere, et esto gloriosus, et speciosus induere vestibus. » Job 40. Infirmus homo in suae conditionis principio, duplici dignitate praeditus fuit: scientia scilicet et virtute. Scientia scilicet, ut Deum cognosceret, et seipsum, nec non et alias creaturas. Ecel. 17: « Cor dedit illis, » scilicet hominibus, « excogitandi, et disciplina intellectus replevit illos: Creavit illis scientiam spiritus. » Virtute vero, ut seipsum contineret, et alia gubernaret. Sap. 10: « Eduxit de limo terrae; et dedit illi virtutem continendi omnia. » Per peccatum vero in utroque laesus est: nam, et virtus ejus est infirmata: Sap. 9: « Infirmus homo, et exigui temporis: » et cognitio obscurata. Job 24: « Nos quippe involvimur tenebris. » Unde convenienter ei subveniri non poterat, nisi per scientiam infallibilem, et virtutem indeficientem, quae est Dei Filius. 1 Corinth. 1: « Christum Dei virtutem, et Dei sapientiam. » Sapientia vero Dei secundum seipsam, propter ejus altitudinem, est hominibus incognita. Ecel. 1: « Sapientiam Dei praecedentem omnia, quis investigabit? » Virtus vero divina, ratione suae immensitatis, erat hominibus formidanda. Job 25: « Nolo multa fortitudine contendat mecum, ne magnitudinis suae mole

me premat. » Et ideo ut homini conveniens adhiberetur remedium, voluit Dei Filius naturam humanam assumere, ut homo hominibus subveniret. Ipse ergo, qui in natura divina est virtus, secundum humanam naturam est brachium, quo genus humanum est salvatum. Isa. 40: « In brachio suo congregabit agnos. » Luc. 1: « Fecit potentiam in brachio suo. » Psal. 45: « Brachium eorum non salvavit eos, sed dextera tua et brachium tuum. » Sed ipse Dei Filius, qui in divina natura est sapientia genita, verbum Patris, secundum naturam assumptam voci comparatur. Verbum enim in voce, est Filius in carne, ut Augustinus dicit: « Ipse ergo Dei Filius incarnatus nobis ostenditur cum dicitur, Si habes brachium sicut Deus, et voce simili tonas. » De qua voce, Cant. 2, scriptum est: « Sonet vox tua in auribus meis: » et Psal. 17: « Intonuit de caelo Dominus, et Altissimus dedit vocem suam. » Et recte hac voce dicitur intonare, quia ante Christi adventum, divinae sapientiae sacramenta hominibus obscure et in quodam susurrio proponebantur. Job 4: « Porro ad me dictum est verbum absconditum et quasi furtive suscepit auris mea verba susurrii ejus. » Sed per Christum hujusmodi sacramenta clare sunt hominibus patefacta. Matth. 28: « Docete omnes gentes etc. »: et in Psal. 61, dicitur: « Vox tonitruui tui in rota. » Glossa: « Tonitruui, id est

« aperta; in rota; totius mundi. » In Filio autem Dei incarnato, tres substantiae inveniuntur: scilicet divinitas, et corpus, et anima. Divinitas quidem amicta est humanitatis decore. Psal. 92: « Dominus regnavit « decorem indutus est: » ideo ad exprimendum incarnationis mysterium dicit: « Circumdata tibi deco- « rem. » De quo scilicet humanitatis decore dicitur in Psal. 44: « Speciosus forma prae filiis homi- « num. » Et sponsa in Canticis 1: « Eccc tu pul- « cher es dilecte mi, et decorus. » Corpus vero sublimatum est in crucis patibulo. Joan. 12: « Ego « si exaltatus fuero a terra, omnia traham ad me « ipsum. » Et Joan. 5, dicitur: « Sicut exaltavit « Moyses serpentem in deserto, ita oportet exaltari « filium hominis. » Et in huiusmodi praemium, dotatus est incorruptionis gloria. Psal. 20: « Glo- « riam et magnum decorem impones super eum. » Quantum ergo ad passionis supplicium dicit: « In « sublime erigere. » Quantum ad gloriae praemium, « esto gloriosus. » Anima vero virtutibus et gratiis ornatur. Joan. 1: « Plenum gratiae et veritatis. » Isa. 4: « Apprehendent septem mulieres, » id est enim septem dona Spiritus sancti, « virum unum, » id est Christum: et ideo dicitur, « Speciosis induere vesti- « bus. » Isa. 61: « Induit me vestimentis salutis: et « indumento iustitiae circumdedit me. » Prov. 31: « Fortitudo et decor indumentum ejus. » His etiam vestibus Christus suam sponsam, id est fidelem animam decorat. Ezech. 16: « Unxi te oleo, » scilicet gratia Spiritus sancti « et vesti vi te discoloribus, » id est variis virtutibus. Et de his per ordinem Magister in hoc 5 tractatu, scilicet de sacramento incarnationis, de mysterio passionis, de virtutibus et donis quibus et Christus plenus fuit, et fideles animos replet. Dividitur autem liber iste in partes duas. In prima determinat de divina incarnatione. In secunda vero determinat de virtutibus et donis Filii Dei incarnati, 25 distinct. Prima dividitur in duas partes. In prima determinat de Dei incarnatione. Secundo prosequitur conditionem Filii Dei incarnati, 6 distinct. Prima in tres. In prima determinat de incarnatione ex parte assumptis, quia sit. In secunda ex parte assumpti, quid sit: distinct. 2. In tertia ex parte utriusque, ejusmodi sit, distinct. 3. Prima in tres. Primo ostendit incarnationem auctoritate Apostoli. In secunda ostendit quae persona fuerit incarnata: quae incipit, ibi, « Diligenter. » In tertia, utrum Pater, vel Spiritus sanctus potuerit incarnari, ibi, « Si vero quaeritur. » Quae dividitur in duas: quia primo ostendit veritatem: secundo objicit in contrarium et solvit, ibi, « Sed « forte aliqui. » Illa pars quae incipit, « Diligenter, » dividitur in tres. In prima ostendit qualiter Filius fuerit incarnatus: scilicet quia decebat Deum, ut in sapientia, in qua omnia condiderat, sicut dicitur in Psal. 151; in eadem omnia restauraret. In secunda ostendit, quare Pater non fuerit incarnatus: quia scilicet non est ab alio, sicut Filius: quae incipit ibi, « Ideo etiam Filius. » In tertia, quare Pater et Spiritus sanctus non fuerit incarnatus, ut scilicet idem esset in divinitate et humanitate Filius, ibi, « Sed « solus Filius in carne missus est. » Illa pars in qua objicit in contrarium, quae incipit, « Sed forte, » dividitur in duas. In prima objicit, quod Pater et Spiritus sanctus incarnati fuerunt, cum indivisa sint opera Trinitatis. In secunda respondet, quia incarnationem est tota Trinitas operata, sed tamen est tantum ad Filium terminata: quae incipit, ibi, « Ad quod dicimus. »

DISTINCTIO I.

Cum venit igitur plenitudo temporis etc. (V. edit. nostrae tom. VII, pag. 6.)

QUAESTIO UNICA.

Circa partem istam quaeruntur quinque: 1.^o utrum Deus potuerit incarnari; 2.^o utrum congruum fuerit eum incarnari; 3.^o utrum una persona potuerit sine alia incarnari; 4.^o utrum Pater vel Spiritus sanctus potuerit incarnari; 5.^o utrum tres personae unam potuerint assumere naturam.

ARTICULUS I.

Ad primum sic proceditur. Et 1. videtur, quod non fuerit possibilis incarnatio. Omne unibile est passibile ad unionem, omne autem passibile ad unionem, est per motum seu passionem ad unionem, reducibile a priori agente vel movente: sed Deo nihil est prius, nec mutari nec pati potest; ergo non potest uniri.

2. Praeterea, quorum non est proportio, non est possibilis unio: sed inter creatorem et creaturam nulla est proportio, propter distantiam infinitam; ergo non est possibilis eorum unio.

3. Praeterea, magis convenit creatura eum creatura, quia in aliquo genere propinquo vel remoto convenit, quam creatura eum creatore, quae in nullo conveniunt genere. Sed Deus non potest facere quod duo contraria, quorum utrumque est creatum, simul in eodem uniantur; ergo nec quod creatura creatori.

Contra. Non videtur majoris difficultatis, duas personas in una natura existere, quam duas naturas in una persona. Sed simul plures personae divinae in una natura existunt; ergo similiter plures naturae in una persona possunt uniri.

Praeterea, aut est ex defectu creaturae vel creatoris, quod non possint uniri: sed non est ex defectu creatoris, quia sic non esset summe perfectus; nec ex defectu creaturae, quia sic non esset perfecta ejus obedientia ad creatorem; ergo creaturae et creatoris unio, est possibilis.

Ad hoc dicendum est, quod quando aliquid est quod secundum aliquid sui sonet perfectionem, et secundum aliquid imperfectionem, excluso quod imperfectionis est, secundum id quod perfectionis habet, Deo est possibile: quia tantum id absolute Deo est impossibile, quod implicat contradictionem: quia hoc nihil est, quod in defectum divinae potentiae sonat, quia divina potentia deficere non potest. Unio autem non nisi ratione potentialitatis et materialitatis respectu ejus quod ex eis effectum est, imperfectionem includit; quia ratio partis et materiae est ratio imperfecti. Sed imperfectio incarnationi divinae non convenit. Haec igitur subtrahata, incarnatio quae est divinae personae ad humanam naturam unio, Deo erit possibilis; non tamen ita, quod ex humana et divina natura aliquid unum sicut totum ex partibus constituatur, ut homo ex anima et corpore. Et ideo concedendum est quod Deus potuerit incarnari.

Ad id quod objicitur in contrarium « Quod unibile est, est possibile ad unionem, » dicendum quod Deus dicitur unitus, non per relationem existentem in ipso, sed in creatura, sicut est de aliis relatio-

nibus temporalibus de Deo dicitur. Unde dicitur unibilis, non per aliquam potentialitatem quae sit in ipso, sed in creatura; et sic nec per motum vel passionem suam unitur, sed per motum vel passionem creatorae.

Ad secundum dicendum est, quod duplex est proportio. Una secundum mensurationem quantitatis adinvicem. Unde, cum mensura sit rei mensurae vel terminatae, erit tantum inter res finitas terminatas: et talis non potest esse inter Deum et creaturam, de qua procedit argumentum. Est alia proportio quae est ordinis habitudo; et haec est inter res ordinatas adinvicem, ut inter agens et patiens, inter formam et materiam, potentiam et actum; et haec potest esse inter finitum et infinitum, quando finitum ad infinitum ordinatur: alioquin Deus non posset agere in creaturam, nec creatura pati a creatore: et talis sufficit ad unionem.

Ad tertium dicendum, quod dupliciter aliqua conveniunt: scilicet in aliquo communi, et iterum in ordinis habitudine. Major autem vel minor convenientia in unitate alicujus communis, non facit ad majorem vel minorem rationem unionis in aliqua persona: quia sic magis essent unibiles duae animae quam anima cum corpore: quod est falsum. Sed major et minor convenientia in ordinis habitudine confert ad rationem personae; sicut apparet in anima et corpore. Unde quamvis creatum magis conveniat cum aliqua creatura in aliquo communi, non tamen sequitur, si non potest uniri cum aliqua creatura, quod non possit uniri cum creatore.

ARTICULUS II.

Ad secundum sic proceditur. Et 1. videtur, quod non congruat Deum incarnari. Natura enim humana, cum sit finita, Deus potest facere aliquid majus. Sed eo quod se majus est, potest humana natura reparari, ut videtur, praesertim si a Deo sit hoc ordinatum; ergo non fuit aliqua necessitas incarnationis divinae propter reparationem generis humani.

2. Praeterea, qui potest satisfacere de majori peccato, potest de minori: sed peccatum actuale est majus quam originale, cum plus habeat de ratione voluntarii, sine qua non est ratio peccati. Cum ergo homo possit pro mortali satisfacere, multo fortius potest pro originali; et sic idem quod prius.

3. Praeterea, sicut est vituperabile nimia elatio, ita et nimia humiliatio: sed tanta est humiliatio quando Deus fit homo quanta est elatio quando homo appetit esse Deus; ergo, cum nullum vituperabile Deum deceat, non decet Deum esse hominem.

Sed contra. Infinitam potentiam, sapientiam, bonitatem, decet se per effectum infinitum manifestari; sed nullus effectus Dei infinitus est, sed solus Deus; ergo congruit ut effectui suo conferret, ut esset Deus.

Praeterea, Sap. 8, dicitur: « Sapientia vincit malitiam, » sed per malitiam propriam et diaboli humanum genus dejectum est, quantum deijci potuit; ergo per sapientiam debuit exaltari quantum exaltari potuit; ergo natura humana uniri debuit Filio Dei, quia sic exaltata est quantum potuit exaltari.

Ad hoc dicendum, quod potissima ratio quare Deus incarnatus est, secundum sanctos sive secundum congruentiam, est reparatio generis humani.

S. Th. Opera omnia. V. 22.

Unde post lapsum deceit Deum incarnari, ne nobilissima creaturarum, videlicet homo, frustraretur suo fine, idest beatitudine, ad quam creata erat, qua se privaverat per peccatum. Cum enim, secundum Anselmum, homo teneretur satisfacere de peccato, et satisfacere non posset, cum peccator ad satisfaciendum indignus reddatur, nec etiam alia creatura quia totum suum esse Deo debet, nedum pro alio aliquid solvere possit; ideo ad hoc quod satisfacere deberet et posset, decebat, cum esse Deum et hominem: Deum ut posset, hominem ut deberet; ergo post lapsum decebat Dei Filium incarnari.

Ad illud ergo quod objicitur in contrarium, dicendum est, quod nulla res particularis creata poterat fieri melior quam tota humana natura, quae habet quamdam rationem infinitatis, ex hoc, quod est in infinitum communicabilis per generationem. Hoc autem quod satisfacit oportet aliquid particulare esse; cum satisfactio sit per actionem, quae non est nisi rei particularis.

Praeterea, dato quod melior simpliciter fieret, quin creatura esset, totum quod posset per se Deo deberet; unde non relinqueretur sibi quod pro alio satisfacere posset.

Praeterea, cum in statu primo, homo acceperit quaedam quae sunt supra naturam suorum principiorum, scilicet impassibilitatem et originalem justitiam, perfecte cum reparare est ad gradum super naturam suam elevare; et ideo hoc, solum conditori naturae fuit possibile, qui naturas instituit, et in ea gradus ordinavit.

Ad secundum dicendum, quod quamvis peccatum actuale habeat plus de voluntario quam originale, tamen originale privat majus bonum, scilicet bonum naturae, quia potentior est quam persona, ejus bonum per peccatum actuale privatur. Peccatum autem habet remedium ex parte boni, quod aufert per satisfactionem, quae est quaedam redditio debiti. Sed ex parte culpae, quam ratione voluntarii sequitur, habet remedium per gratiam: et sic est difficilius satisfacere pro originali quam actuali. Vel dicendum, secundum alios, quod non sufficit purus homo satisfacere de mortali nisi praesupposita fide passionis Christi, ex ejus virtute satisfactio efficaciam habet.

Ad tertium dicendum, quod hominem appetere esse Deum, est ex praesumptione, et ideo est peccatum; sed quod Deus sit homo, est ex charitatis amore, et ideo non est vituperabile.

ARTICULUS III.

Tertio quaeritur, utrum una persona possit sine alia incarnari: videtur quod non. Sicut essentia est una trium personarum, ita et operatio. Sed assumptio est operatio Trinitatis; ergo omnium erit una assumptio; ergo omnes assument unam naturam.

2. Praeterea, dicit Damascenus quod in divinis omnia unum sunt, praeter generationem, et ingenerationem, et processionem: sed incarnatio Dei nullum horum est; ergo cum tres personae communicent in incarnatione, et sit una incarnatio, incarnabuntur reliquae.

3. Praeterea, major est unio quae est per gratiam unionis, quam quae est per gratiam adoptionis: sed per gratiam adoptionis non potest alicui uniri una persona sine alia; ergo nec per gratiam unionis; et sic non potest una sine alia incarnari.

Contra. Major est distinctio rei et rationis, quam quae est rationis tantum: sed distinctio personarum est distinctio rei et rationis; ergo major est ea, quae est pure rationis: sed Deus omnia quae creat, non creat una ratione; ergo, cum una persona incarnatur, non oportet quod reliquae incarnentur.

Praeterea, incarnatio includit in suo intellectu missionem: sed potest una persona mitti sine reliqua; ergo potest una persona incarnari sine reliqua.

Ad hoc dicendum est, quod quando aliqua duo in aliquo conveniunt, et in aliquo differunt, si aliquid unitur alicui eorum, ratione ejus in quo conveniunt, oportet quod reliquo uniatur: non autem si ei unitur ratione ejus in quo ab alio distinguitur. Cum igitur personae divinae uniantur in essentia et distinguantur in proprietate personali, non oportet quod si cui earum uniatur aliquid in persona, quod reliquae uniatur: et ideo cum natura humana sit unita Filio in persona, non in natura, non propter hoc oportet, quod alii uniatur.

Ad illud ergo quod in contrarium objicitur, dicendum, quod assumere, duo importat; videlicet operationem, et terminum operationis. Quamvis autem in operatione tota Trinitas sit operata assumptionem, tamen est ad solum Filium terminata.

Ad secundum dicendum, quod incarnatio generationem includit in suo intellectu, quae proprietas personalis est ipsius Filii, quia facta est incarnationis unio in persona Filii, quae per generationem constituitur, quamvis incarnatio non sit ejus aeterna generatio.

Ad tertium dicendum, quod uniri personam per gratiam adoptionis, est eam per ejus effectum uniri, in quo tota Trinitas communicat: et ideo tota Trinitas unitur. Sed uniri per gratiam unionis est uniri in persona, cujus personalis proprietas non est toti Trinitati communis; et ideo non oportet quod tota Trinitas uniatur.

ARTICULUS IV.

Ad quartum sic proceditur. Et 1. videtur, quod Pater carnem assumere non potuerit. Minimum enim inconveniens, secundum Anselmum, est Deo impossibile: sed, si Pater carnem assumeret, sequeretur inconveniens, ut scilicet essent in Trinitate plures Filii: ergo Pater carnem assumere non potuit.

2. Praeterea, opposita non possunt conjungi in eodem. Sed innascibilitas, quae est proprietas Patris, opponitur nativitati, per quam Filius de Virgine carnem sumpsit; ergo Pater non potuit carnem assumere.

3. Praeterea, missio Filii, ut in litera dicitur, est ipsa incarnatio. Sed Pater non potest mitti, ut dicit Augustinus in libro de Trinitate; ergo nec incarnari.

Sed contra. Humana natura non magis distat a Patre quam a Filio: si ergo potuit uniri Filio, similiter potuit uniri et Patri.

Praeterea, eadem dignitas est Patris et Filii: sed posse assumere carnem ad dignitatem Filii pertinet; ergo et Patri competit.

Respondeo. Dicendum, quod dupliciter dicitur Deus aliquid posse. Uno modo de potentia absoluta, scilicet secundum se considerata; et sic potest omne illud, quod contradictionem non implicat, et quod non vergit in defectum potentiae facientis: quod enim contradictionem implicat fieri non potest, eo

quod seipsum destruit, defectus autem in divinam potentiam non cadit. Alio modo dicitur Deus posse aliquid de potentia ordinata, idest considerato ordine divinae sapientiae; et sic Deus dicitur posse omne illud, quod ordinatum est per suam sapientiam, vel ordinari potest: quod enim de se inordinationem dicit, Deo non est possibile; sicut peccare, eo quod ordinatum non potest esse. Quod vero de se inordinationem non dicit, potest esse ordinatum; et ideo a Deo fieri potest, quamvis forte divina sapientia aliter ordinaverit; sicut non est impossibile Deo salvare aliquem, quamvis non sit praedestinatus. Patrem autem incarnari, neque contradictionem implicat, neque defectum aliquem Patris sonat. Unde est possibile de potentia absoluta. Similiter etiam non importat de se aliquam inordinationem, quamvis non sit ordinatum a divina sapientia ut ita fiat. Et ideo etiam de potentia ordinata, est possibile Patrem incarnari: non quia ita ordinatum sit, sed quia ita per divinam sapientiam ordinatum esse potest: et eadem ratio est de Spiritu sancto. Rationes vero, quare magis congruum fuit Filium incarnari, in litera tanguntur.

Ad primum ergo dicendum, quod esse duos Filios in Trinitate ab aeterno est de se inconveniens, et simpliciter impossibile: vergeret enim in confusionem personarum. Sed esse in Trinitate unum Filium ab aeterno in deitate, et alium ex tempore in humanitate, non esset inconveniens, si ita fuisset per divinam sapientiam ordinatum. Et propterea Pater potuisset carnem assumere, sine hoc quod Filius esset; sicut Adam carnem habuit, et Filius non fuit.

Ad secundum dicendum, quod innascibilitas Patris opponitur nativitati aeternae, non autem nativitati temporali, quae est respectu alterius naturae; et propterea sine nativitate posset carnem assumere, ut dictum est.

Ad tertium dicendum, quod incarnatio Filii dicitur missio; quia ipse est ab alio. Patris autem incarnatio, si foret, missio non esset, quia ipse Pater ab alio non est.

ARTICULUS V.

Ad quintum sic proceditur. Et 1. videtur, quod tres personae non possunt assumere unam naturam. Si enim tres personae assumunt unam naturam humanam: aut in unitate, quae teneat se ex parte assumentis, vel assumpti. Sed non potest esse in unitate assumentis: quia illa unitas, vel est naturae, vel personae: non potest esse unitas naturae, in quantum conveniunt personae, quia sic transiret natura in naturam: nec unitas personae, quia sic tres personae essent una persona. Nec potest esse ex parte assumpti, quia assumere est ad se sumere: oportet igitur, quod assumatur in alterius unitatem. Cum ergo non sit aliqua unitas, in qua possit una natura a tribus personis assumi, tres personae non possunt unam naturam assumere; et hoc est, quod Anselmus dicit in libro de conceptu Virginis: « Plures personae non possunt assumere unum eundem hominem. »

2. Praeterea, uniens et unitum communicant sibi in idiomate, ut dicit Damascenus; ergo si tres personae assumunt unam naturam humanam, unus homo erit Pater et Filius et Spiritus sanctus; ergo Pater esset Filius et Spiritus sanctus, et e converso;

quod est impossibile, quia si sic esset confusio idiomatum; ergo impossibile est, quod una natura sumatur a tribus.

3. Praeterea, si tres personae assumerent unum et eundem hominem, aut unica, aut pluribus unionibus: sed non unica, quia sic in una natura conveniunt divina in qua non est facta unio: nec pluribus, quia sic essent plures incarnationes; ergo impossibile est, quod una natura personis pluribus uniatur.

Contra. Gratia imitatur naturam: sed naturaliter tres personae conveniunt in una divina natura; ergo per gratiam unionis poterunt in natura una humana convenire.

4. Praeterea, humana natura habet quod sit assumptibilis, eo quod est ad imaginem: sed simul est trium personarum una imago; ergo simul potest a tribus assumi.

Ad hoc dicendum, quod assumere est aliquid ad se sumere, sicut dictum est. Si ergo tres personae assumerent naturam humanam, oporteret, quod in suam unitatem assumerent. Ista autem unitas non potest esse, nisi vel unitas naturae communis, hoc est divinae, et hoc est impossibile, quia sic natura transiret in naturam: aut unitas propria uniuscujusque, quae est unitas personalis: et sic in propriam unitatem uniuscujusque personae posset ipsam quaelibet persona assumere. loquendo de potentia absoluta; quia non est majoris potentiae Filius quam Pater, vel Spiritus sanctus. Sed non est de potentia ordinata, qua aliquid ordinatum est; cum unius personae incarnatio, ad reparationem mille mundorum sufficeret secundum ordinem divinae sapientiae, scilicet, qua aliquid ordinari potuit: quamvis alii contrariam opinionem teneant, propter rationem primo positam.

Ad primum ergo dicendum est, quod si assumerent unam naturam tres personae in unitatem personae, non oporteret quod essent una persona, quia assumerent in propriam personae unitatem, secundum quam quaelibet est una, etiam ab alia distincta. Et quod dicit Anselmus, quod non possunt assumere unum hominem, intelligendum est, unum hominem, id est, unam personam humanam, et non unam naturam.

Ad secundum dicendum, quod communicatio idiomatum, intelligitur respectu naturae alterutrius: unde praedieta positione facta, hic homo non communicaret Filio in idiomate Patris, sed solum in idiomate humanae naturae.

Ad tertium dicendum, quod unio secundum rem prout relatio est, esset una ex parte humanae naturae, quia accidentia ejusdem speciei impossibile est in eodem multiplicari secundum naturam: sed secundum rationem intelligentem, tres personas hac relatione referri, secundum pluralitatem personarum essent plures ex parte ipsarum personarum.

Expositio textus.

Plenitudo temporis etc.

Sciendum quod tempus incarnationis dicitur plenitudo temporis literaliter intelligendo, quia tempus praefinitum a Deo de incarnatione impletum est. • Factus est de muliere etc. • Christus dicitur factus de muliere, non secundum divinam naturam, sed secundum humanam, secundum quam est natus de muliere;

et mulier non importat hic corruptionem, sed sexus designationem. • Factum sub lege etc. • Sciendum quod Christus non dicitur esse sub lege quantum ad metum legis, vel quantum ad causam; quia sic omnes in peccato nati, sunt sub lege; sed quantum ad observantiam legis. • Ut eos qui sub lege erant • redimeret etc. • Christus dicitur eos qui sub lege erant redemisse, quia eis praedicavit, non quin venerit ad alios redimendum. Haec est mulier Evangelica de qua Luc. 15. Sciendum quod divina sapientia mulier dicitur non propter fragilitatem, sed propter fecunditatem. Eccles. 24: • A generationibus meis implemini. • • Nec eandem Trinitatem in specie columbae etc. • Sciendum quod columba illa potest dupliciter considerari: vel in quantum res est quaedam, et sic pertinet ad totam Trinitatem ut ejus effectus; vel secundum quod est signum; et hoc modo tantum ad Spiritum sanctum pertinet, cujus invisibilis missio designatur per adventum columbae.

DISTINCTIO II.

Et quia in homine tota humana natura etc. (V. edit. nostrae tom. VII, pag. 22.)

QUAESTIO UNICA.

Postquam determinavit Magister de incarnatione ex parte assumptis, hic intendit determinare de ea ex parte assumpti: et dividitur in partes tres. In prima ostendit quid sit assumptum. In secunda quale fuerit quod fuit assumptum. In tertia ostendit quo agente, assumptum formatum sit, quarta dist. ibi, • Cum vero incarnatio verbi etc. • Prima in duas: quia primo ostendit quid sit assumptum, quia humana natura integra ex suis partibus constat. In secunda determinat ordinem assumptionis, ibi, • Assumpsit Filius Dei animam, et carnem etc. • Prima in duas. In prima ostendit humanam naturam integram ex suis partibus esse assumptam. In secunda excludit errorem, ibi, • Errant igitur etc. • • Assumpsit Dei Filius animam et carnem. • Dividitur haec pars in duas. In prima ostendit ordinem naturae. In secunda ordinem temporis, ibi, • Si autem • quaeritur. •

ARTICULUS I.

Hic primo quaeritur. 1. Utrum humana natura fuerit prae aliis assumptibilis. Et videtur quod non, quia Deo a creatoris infinite distanti, non magis approximat una creatura quam altera, quia infinito nihil est majus: sed non nisi propter majorem propinquitatem aliquid dicitur magis alio assumptibile; ergo omnes creaturae sunt aequaliter assumptibiles.

2. Praeterea, sicut dicit Augustinus ad Volusianum: • In rebus mirabilibus, tota ratio facti est • potentia facientis; • ergo non est major ratio ex parte assumpti, quare unum sit magis reliquo assumptibile.

3. Praeterea, ait Gregorius: • Quanto in Angelo • natura est subtilior, eo magis in illo imago Dei • insinuat expressa; • cum ergo per imaginem aliquid habeat ordinem ad assumptionem Angelica natura magis est assumptibilis quam humana.

Sed contra. Deus facit semper quod melius est,

et magis congruum; cum ergo assumpsit humanam naturam; ergo majorem habuit congruitatem ad assumptionem.

Praeterea, assumptio est actus divinae personae habentis distinctionem secundum originem: sed nulla natura creata habet personam distinctam origine, nisi natura humana; ergo eam magis convenit assumi quam aliam naturam.

Respondeo. Dicendum, quod assumptibile dicitur aliquid, eo quod potest assumi: indicat enim potentiam creaturae ad assumptionem. Haec autem potentia est tantum obedientiae. Cum ergo omnis creatura in aequali obedientia se habeat ad suum creatorem, Deus omnem creaturam aequaliter poterit assumere, loquendo de potentia absoluta, secundum quam potest quicquid est aliquid, et quod defectum potentiae non sonat. Loquendo autem de potentia ordinata, sic Deus dicitur posse, quod congruit ordinationi suae sapientiae: et hoc modo aliqua creatura dicitur alia magis assumptibilis, et quia majorem congruitatem habet ad assumptionem: et hoc modo natura humana est prae aliis assumptibilis, cum congruitatem habeat prae aliis, quantum ad tria quae in assumptione requiruntur. Primo quia in eo expressior similitudo invenitur, quam in aliis creaturis. In creaturis enim irrationalibus est tantum similitudo vestigii: in Angelis autem, etsi sit similitudo imaginis sicut in homine, non est tamen ita expressa similitudo, quantum ad aliqua accidentalia; sicut quod anima est in toto corpore tota, ut Deus in mundo; quamvis forte quo ad essentialia in Angelis sit similitudo expressior. Secundo quantum ad terminum assumptionis: quia illa assumptio terminata est in personam distinctam origine: nulla autem creatura habet talem personalitatem nisi natura humana; et ideo ipsa est magis assumptibilis. Tertio quantum ad finem assumptionis; quia sic perfectio universi, dicitur finis assumptionis praecipuus. Cum enim ipsa ultimo sit creata, cum Deus ipsam assumpsit, principium creatorum unum est ultimae creaturae: et ideo in hac assumptione relictet figura orbicularis quae maxime est perfecta: et ob hoc naturam humanam congruit magis assumi. Et ipsa natura humana convenit cum omni creatura: unde homine unio, quodammodo omnis creatura unita est. Sicut si dicatur finis assumptionis liberatio a peccato, quia in irrationali creatura peccatum non erat, in Angelo vero erat, sed irremediabile, in homine vero remediabile; ideo natura humana, secundum hoc, debebat assumi.

Ad primum ergo dicendum, quod distantia Dei et creaturae, infinita est ex parte Dei; et sic nulla est ea major. Nihil enim potest esse magis distans a creatura, quam Deus. Sed ex parte creaturae est finita, quia esse creaturae est finitum; et ideo ex hac parte, una creatura invenitur magis distans quam alia a Deo. Et est simile, sicut si intelligamus duas lineas, quarum una sit finita, et alia infinita.

Ad secundum dicendum, quod omne factum, respectu potentiae absolutae, aequaliter potest fieri a creatore. Respectu tamen potentiae ordinatae, secundum quam facit quod congruit ordinationi suae sapientiae, magis congruit quod ex una fiat quod vult facere creator, quam ex alia; sicut jam dictum est in solutione problematis.

Ad tertium dicendum, quod divina natura tripliciter consideratur. Vel in se, vel in persona di-

stincta proprietate originis, vel prout est exemplar universi. Primo modo Angelus est magis ad similitudinem imaginis, cum ejus natura sit simplicior et subtilior. Secundo modo et tertio, natura humana magis facta est ad similitudinem imaginis, quia sic habet inter creaturas tantum personam distinctam ratione originis, et habet participationem cum omnibus universi partibus.

ARTICULUS II.

Secundo quaeritur, utrum totam naturam humanam assumpserit; et videtur quod non. Creatura enim, ex hoc quod est ad imaginem, habet ordinem ad assumptionem: in carne enim est tantum similitudo vestigii; ergo ipsa non est assumpta.

2. Praeterea, ad hoc quod corpus vivificetur, sufficit quod ei vivificabili principium vitae uniatur; cum ergo Deus, qui est principium vitae, uniatur corpori in incarnatione, non oportet quod animam assumat.

5. Praeterea, ut dicit Boetius, species est totum esse individuorum: sed natura humana non erat totum esse Christi; ergo non fuit in Christo ut species resultans ex anima et corpore.

Ad oppositum Damascenus est qui ait: « Quod erat inassumptibile erat incurabile: » sed totum hominem curavit; ergo totum hominem assumpsit.

Praeterea, in symbolo Athanasii dicitur: « Perfectus etus Deus, perfectus homo; ex anima rationali, et humana carne subsistens; » ergo perfectam et integram naturam humanam Deus assumpsit.

Ad hoc dicendum, quod sicut subtracta unitate variatur species numeri, ita subtracta differentia essentiali et sine eo quod est essenziale res variatur. Cum ergo Deus verum hominem assumpserit, omnia ejus principia essentialia et proprietates resultantes ex principiis ejus essentialibus assumpsit. Sic ergo totam naturam humanam assumpsit.

Ad primum ergo quod objicitur in contrarium, dicendum est, quod quamvis secundum se in carne sit tantum similitudo vestigii, tamen secundum suam formam, id est animam, communicat similitudini imaginis.

Ad secundum dicendum, quod duplex est principium vitae, effectivum et formale. Non autem sufficit ad hoc quod vivificetur corpus, quod uniatur Deo, qui est principium vitae effectivum; sed oportet quod uniatur principio formali, quod est anima; et ideo oportebat animam assumere ad corporis vivificationem.

Ad tertium dicendum, quod verbum Boetii intelligitur de individuo, quod est unius naturae tantum; et non de individuo, quod est plurium naturarum.

ARTICULUS III.

Ad tertium sic proceditur. Et 1. videtur, quod sine medio Deus assumpserit quod assumpsit. Remoto enim medio quo aliqua conjunguntur, extrema separantur: sed separata anima, non fuit dissoluta unio divinitatis a carne; ergo non mediante anima caro assumpta est.

2. Praeterea, impossibile est quod per idem medium aliquid uniatur superiori et inferiori: sed mediante spiritu anima unitur corpori, ut dicitur in libro de differentia spiritus et animae; ergo non mediante spiritu unitur suo creatori.

3. Praeterea, gratia aequaliter respicit tres personas, cum sit Trinitatis effectus; si ergo mediante gratia unius est Filius Dei animae, aequaliter tota Trinitas unietur.

Ad oppositum est Augustinus ad Volusianum: « Filius Dei animam rationalem assumpsit, et per eam sibi corpus adaptavit: » et ita unam partem humanae naturae assumpsit mediante alia.

Praeterea, distantia per aliquod medium utriusque proximum congrue conjunguntur: sed anima proximior est Deo quam corpus, cum sit ad imaginem Dei, spiritus autem quam anima, quia Deus spiritus est, Joan. 4; ergo Deus assumpsit corpus mediante anima, et animam mediante spiritu.

Ad hoc dicendum, quod duplex est medium. Medium efficientiae, et medium congruentiae. Medium efficientiae duplex; scilicet faciens unitum, et faciens unibile. Cum ergo nulla creatura effecerit incarnationem, nihil tali medio efficientiae, quod est faciens unitum, Christus assumpsit: sed tamen servato ordine ad finem unionis, qui est liberatio a peccatis, corpus assumptibile fuit per animam et anima per mentem, hoc est spiritum; et corpus et anima per naturam humanam: et sic fuit ibi medium efficientiae faciens unibile. Loquendo tamen de medio congruentiae, animam mediante gratia, et corpus mediante spiritu assumpsit; quia congruum erat carnem vivificatam, et animam sua imagine insignitam, et gratia repletam assumere.

Ad illud quod objicitur in contrarium, dicendum est, quod remoto medio congruentiae non oportet quod extrema separentur; et tale medium fuit anima respectu unionis corporis.

Ad secundum dicendum, quod aequivocatur spiritus: dicitur enim corpus subtile spiritus, mediante quo anima suas animales operationes exercet; et hoc spiritu mediante, anima unitur corpori ut motor, quamvis immediate ut forma. Alio modo dicitur spiritus suprema pars animae, ut mens quae est imaginis subjectum; et isto spiritu dicitur anima ut medio uniri Deo.

Ad tertium dicendum, quod tota Trinitas uniebatur animae Christi per gratiam inhabitantem; non tamen ad totam Trinitatem, unio quae est in persona, terminabatur.

ARTICULUS IV.

Ad quartum sic proceditur. Et 1. videtur, quod incarnatio perfecta non fuerit in instanti. Motus praecedit terminum motus. Cum ergo natura humana et ejus conceptio se habeant ut terminus motus et motus, conceptio praecedat naturam humanam.

2. Praeterea, quod est ultimum in resolutione est primum in compositione: cum ergo in separatione animae Christi a carne remanserit unio divinitatis ad carnem, haec unio praecessit unionem animae ad carnem.

3. Praeterea, extremum prius unitur medio, quam alteri extremo. Cum ergo, sicut jam dictum est, anima quodammodo fuerit medium unionis divinitatis ad carnem, prius fuit divinitas unita animae quam carni; et sic non fuit incarnatio tota simul.

Ad oppositum Damascenus ait: « Simul fuit caro, simul animata caro, simul Dei verbi caro. »

Praeterea, incarnatio fuit operatio Spiritus sancti: operatio autem Dei non requirit moram suc-

cessionis: ergo non fuit successive incarnatio, sed tota simul.

Ad hoc dicendum, quod in incarnatione Christi, neque conceptio corporis, neque creatio animae, neque unio utriusque potuit praecedere tempore unionem ad personam Verbi; quia quam cito est anima vel corpus, vel conjunctum, iam cito est hypostasis: natura enim esse non habet nisi in aliquo individuo. Aut ergo remansisset hypostasis creata carnis vel animae vel conjuncti cum hypostasi verbi; et sic in Christo essent duae hypostases; aut per assumptionem esset aliquid consumptum in natura assumpta, quod esset indecens. Et similiter anima vel corpus non potuit prius assumi a Dei verbo antequam adinvicem uniretur ad constituendam humanam naturam; quia partes praedictae sunt assumptibiles ex hoc, quod sunt partes humanae naturae. Et ideo ista quatuor simul fuerant: conceptio corporis, et creatio animae, unio utriusque, et assumptio a Dei verbo; et sic incarnatio perfecta est in instanti.

Ad id quod objicitur in contrarium, quod in motu ubi differunt principium motus, medium et terminus motus, motus temporis ordine praecedat terminum motus. Non fuit autem sic in proposito; quia fuit operatio supernaturalis et instantanea.

Ad secundum dicendum, quod ultimum in resolutione, si terminatur ad eum resolutio, prius est in compositione. Non sic autem se habuit unio divinitatis ad carnem ut terminus separationis animae cum carne, quia haec uniones non sunt unius rationis; et ideo non oportuit quod prius tempore fuerit talis unio quam animae cum carne.

Ad illud quod ultimo objicitur, dicendum, quod extremum non oportet quod prius uniat medio congruentiae; quia non propter hoc principaliter unitur alteri extremo, magis quam alteri extremo; et tale medium, sicut habitum est, fuit anima in unione divinitatis ad carnem.

Expositio textus.

Quod autem humanae naturae etc.

Nomine humanae naturae anima et corpus materialiter intelliguntur. « Errant igitur qui nomine « humanitatis. » Sciendum est quod per hanc proprietatem, quae ab eis humanitas dicitur, potest intelligi forma sive species communis: et talem humanitatem quidam dicebant assumptam a Christo: et hoc falsum est. « Quod autem evidenter etc. » Sciendum est quod Magister in alio sensu utitur verbo Joannis quam ipse Joannes; scilicet quod non naturam in communi assumpsit, ut puta speciem. Joannes autem ostendit quod non ex divinitate et humanitate una natura conficitur sicut ex anima et corpore. « Neque enim sanctus etc. » Sciendum est quod secundum intentionem Magistri, si Christus assumpsisset hominem universalem, oportet quod de omnibus ejus individuis praedicaretur. Secundum intentionem vero Damasceni, si una natura resultaret ex unione divinae naturae et humanae, quam servaret hoc nomen Christus, illa natura esset communicabilis actu vel potentia pluribus; et sic hoc nomen Christus esset praedicabile de pluribus. « Omnia autem quae in nostra natura etc. » Et intelligendum est de principiis essentialibus humanae naturae, et ejus naturalibus proprietatibus. « Et tamen praedicant

« istum visibilem, etc. » Quod radii solares sparsi per feces non inficiuntur, est, quia sol cum eis non communicat in materia; anima autem communicat corpori in materia, non ex qua, sed in qua; et ideo ex conjunctione ad corpus inficitur. Divinitas autem non communicat cum corpore, neque in materia ex qua, cum non sit materialis, neque sicut in materia in qua, cum non uniatur corpori sicut forma ejus.

DISTINCTIO III.

Quaeritur etiam de carne Verbi etc. (V. edit. nostrae tom. VII, pag. 55.)

QUAESTIO UNICA.

Superius determinavit Magister quid in humana natura assumpserit Dei Filius. In hac parte determinat conditionem assumpti: quae dividitur in duas. Primo determinat veritatem; secundo movet quasdam dubitationes, ibi, « Cum autem illa caro etc. » Prima in duas: quia primo determinat assumpti qualitatem, quod scilicet fuit ab omni contagione operatione Spiritus sancti immunis. In secundo qualitatem ejus, ex qua assumptum est, hoc est Virginis, ibi, « Mariam quoque etc. » Quae dividitur in duas. In prima ostendit eam de omni contagione et fomite peccati mundatam, et potentiam generativam Dei et hominis sibi collatam, auctoritate Damasceni. In secunda auctoritatibus Augustini de Fide ad Petrum. « Cum autem illa caro etc. » Haec dividitur in duas, secundum duas dubitationes, quas ponit et solvit. Secunda incipit, ibi, « Illi autem » sententiae quam supra diximus. « Prima dividitur in tres. Primo enim movet dubitationem. Secundo solvit eam, ibi, « Quia ea determinatione etc. » Tertio ex solutione elicit conclusionem: scilicet quod Christus primitias nostrae massae assumpsit: quae incipit ibi, « Quocirca etc. »

ARTICULUS I.

Hic quaeritur primo, utrum Beata Virgo fuerit in utero sanctificata: et videtur, quod non. Augustinus enim ad Dardan. ait: « Sanctificatio, qua singuli efficimur templum Dei, non nisi renatorum est: » nemo autem renascitur, nisi prius nascatur; ergo nullus habet gratiam sanctificantem, antequam nascatur: ergo in utero Beata Virgo non fuit sanctificata.

2. Praeterea, dicit Hieronymus: « Non mihi credas, si aliquid tibi dixerit, quod ex novo Testamento, vel veteri haberi non possit: » cum ergo de sanctificatione Beatae Virginis in utero in veteri Testamento vel in novo nihil dicatur; non est credendum eam in utero sanctificatam.

3. Praeterea, non tollitur effectus vel dispositio ab aliquo, quamdiu suae causae conjungitur, sicut calor, quamdiu conjunctus est igni: sed proles originale contrahit a parentibus: ergo non tollitur a prole, quamdiu parentibus conjungitur: sed quamdiu est in utero, conjungitur parentibus: ergo non potest sanctificari in utero.

Contra: hoc, quod aliis sanctis legimus esse concessum, non est fas dicere tantae Virgini fuisse negatum: sed Joanni et Jeremiae beneficium sanctificationis in utero, legimus esse concessum: ergo non est Virgini denegatum.

Praeterea, Ecclesia non solemnizat nisi pro aliquo sancto: solemnizat autem nativitatem Beatae Virginis: ergo sancta nata fuit.

Ad hoc dicendum, quod Beata Virgo, nec ante conceptionem, nec in conceptione ante animae infusionem sanctificata fuit: quia proprium subjectum gratiae sanctificantis est anima. Nec in ipso instanti infusionis animae, quia sic non contraxisset originale, sicut nec Christus: et ideo omnibus non conveniret redimi per Christum: sed tantum sanctificata creditur post animae infusionem, quia hoc aliis sanctis est collatum. Et ideo Matri sapientiae maxime deuit hoc conferri, in quam nihil coinquinatum incurrit, ut dicitur Sap. 7.

Ad primum ergo dicendum, quod verbum Augustini intelligitur de regeneratione, quae fit per legem communem: quod notatur in hoc quod dicit, « qua singuli efficimur templum Dei, » quae fit per Ecclesiae sacramenta.

Ad secundum dicendum, quod quamvis sanctificatio Virginis in utero expressa non legatur in Scripturis veteris et novi Testamenti: tamen haberi potest ex his quae ibi leguntur: quia si sanctificati sunt et Joannes et Jeremias, qui Christum praenunciaverunt, multo magis creditur sanctificata Virgo, quae Christum genuit.

Ad tertium dicendum, quod conjunctio ista prolis ad parentem non impedit; cum sit solum ex parte corporis, et non ex parte animae, in qua est peccatum.

ARTICULUS II.

Ad secundum sic proceditur. Et 1. videtur, quod per sanctificationem in utero non fuerit a fomite liberata. Nil enim, quod ad virtutem promovet, ei subtrahendum fuit, cui virtutis perfectio debebatur: sed fomes ad virtutem promovet: unde et Paulo petenti a se stimulum carnis amoveri dictum est: « Virtus in infirmitate perficitur, » 2 Corinth. 12; ergo cum Matrem Dei summa virtutis, seu sanctificationis perfectio deeeret, fomes ab ea per sanctificationem removeri non debuit.

2. Praeterea, videtur, quod per eam immunitatem a peccato consecuta non fuerit. Ambrosius enim dicit super illud, « Spiritus sanctus superveniet in te »; « Superveniens Spiritus sanctus in virginem, mentem ejus ab omni sorde castificavit vitiorum; » hoc autem dicitur pro tempore quo Christum concepit: ergo aliquas sordes vitiorum post sanctificationem in utero contraxit, a quibus postmodum mundata est.

3. Praeterea, certitudo impeccabilitatis non habetur nisi per justitiam confirmantem: si ergo Beata Virgo per sanctificationem in utero consecuta fuisset impeccabilitatem, consecuta etiam fuisset confirmationem: quod non videtur, cum hoc magis pertineat ad secundam sanctificationem, quando in utero concepit Salvatorem, vel ad tertiam quando est glorificata.

Ad oppositum, Beatae Virgini ultra quam aliis sanctificatis in utero, aliquid collatum est: sed gratia sanctificans alios sanctificatos in utero, purgavit a culpa: ergo Beatam Virginem etiam a fomite totaliter liberavit. Item Bernardus in epistola ad Lugd. Canonicos dicit: « Puto quod copiosior gratia sanctificationis in Beatam Virginem descenderit, quae non

« solum ortum ejus sanctificavit, sed eam ab omni peccato deinceps custodivit. »

Ad hoc dicendum est, quod circa istam quaestionem aliquid est circa quod omnes conveniunt: scilicet, quod per primam sanctificationem fuerit Virgo ab originali, et reatu originalis purgata. De emundatione autem ejus a fomite, diversi diversa loquuntur. Quidam enim dicunt, quod per primam sanctificationem fomes ex toto sublatos est. Quibus contradicit quod in litera ex verbis Damasceni dicitur, quod in secunda sanctificatione supervenit Spiritus sanctus eam purgans: quod non potest intelligi nisi de purgatione a fomite; quia peccatum actuale non commisit, ut Augustinus in litera dicit. Et ideo dicunt alii, quod quantum ad aliquid fuit purgata a fomite in prima sanctificatione, et quantum ad aliquid fomes remansit. Et isti tripliciter dividuntur. Quidam enim dicunt quod duplex est actus fomitis: scilicet impellere ad malum, et difficultatem facere in bono. Quantum ad primum actum, qui est inclinatio ad malum, dicunt eum in prima sanctificatione substractum: quantum autem ad secundum, qui est difficultatem facere in bono, dicunt eum remansisse, sed in secunda sanctificatione remotum. Hoc autem stare non potest: et hoc, quia secundum idem ex quo est pronitas ad unum contrariorum, est difficultas ad alterum; sicut gravitas deorsum trahit, et difficultatem facit in ascensu. Et ideo alii dicunt quod fomes est corruptio personae, in quantum impellit ad malum, et in quantum facit difficultatem in bonum; et sic a Beata Virgine in prima sanctificatione fuit remotus vel abstractus. In quantum autem est corruptio naturae, ratione ejus infectio originalis per actum naturae in prolem transit, sic ab eo purgata est in secunda sanctificatione, ut prolem sine omni peccato originali conceperet. Hoc etiam non videtur conveniens: quia originale, quantum ad id quod culpa est, transit in prolem a patre qui dat speciem et id quod in generatione formale est. Quantum autem ad id quod poenae est, sicut sunt corporis passibilitates, transit in prolem a matre quae materiam administrat. Unde non videtur esse causa quare Christus sine originali conceptus est, purgatio matris a fomite; sed magis quia sine virili copula natus est: quam causam assignat Anselmus in libro de Conceptione Virginis. Defectus autem poenales, non ex necessitate, sed ex voluntate assumpsit. Et ideo alii dicunt, quibus consentiendum videtur, quod post primam sanctificationem remanserit quantum ad essentiam, sed impeditus per gratiam sanctificantem ne in peccatum declinaret, aut a bono retraheret. Contingit enim habitum aliquando ligari ne in actus exire possit, ut scientiam per ebrietatem. In secunda vero sanctificatione, essentialiter fomes ille substractus est. In assumptione autem est Virgo a peccati poenalitibus liberata; quia sicut pie creditur, resurrexit glorificata in corpore et anima.

Ad illud vero quod in contrarium objicitur, dicendum, quod fomes non per se in bonum promovet, sed per accidens, in quantum causa humiliationis est, et sic causa evitandi maximum malum, scilicet superbiam. Si tamen hoc malum aliter vitaretur, simpliciter melius esset fomitem non esse.

Ad secundum vero dicendum est, quod castificatio a sordibus vitiorum non intelligitur remotio existentium, sed impedimentum futurorum.

Ad tertium dicendum, quod in ipsa prima san-

ctificatione consecuta est immunitatem a peccato, non per gratiam confirmantem, sed per ligationem fomitis in malum inclinantis, et per custodiam divinae providentiae; sine qua, etiam fomite omnino extincto, peccare potuisset propter arbitrii libertatem.

ARTICULUS III.

Ad tertium sic proceditur. Et 1. ostenditur quod sit naturalis generatio Christi ex Virgine. Filiatio enim nativitatem consequitur: sed Christus dicitur naturalis filius matris, sicut et naturalis filius Patris, ut Augustinus dicit in libro de Fide ad Petrum; ergo generatione naturali nascitur ex matre.

2. Praeterea, operatio miraculosa non est ab aliqua creatura, sed a creatore: vere autem dicitur quod Virgo genuit Christum; ergo generatio talis non est miraculosa.

5. Praeterea, generatio Christi ex Virgine, aut est naturalis, aut violenta: sed non fuit violenta, quia mater fuit; et aliquo modo contulit ad generationem; quia violentum est ejus principium est extra, nil conferente vim passo; ergo est naturalis.

Ad oppositum Anselmus de Conceptione Virginis: « Spiritus sanctus virtus Altissimi de Virgine muliere, virum Virginem mirabiliter propagavit. »

Praeterea, nihil mirabilius quam quod creatura creatorem, Virgo Filium generaret; sed haec fuerunt in Christi generatione; ergo non fuit naturalis.

Ad hoc dicendum, quod in conceptione corporis humani duo est considerare: materiam scilicet quam administrat mater, secundum Philosophum; et virtutem activam quae est in semine patris, secundum eundem. In conceptione ergo Christi fuit materia naturalis humani corporis ab ipsa Virgine praeparata; et ex hoc naturalis mater Christi dicitur. Quia vero non concepit ex virili semine, sed ex Spiritu sancto, ipsa virtus Spiritus sancti fuit agens conceptionem corporis Christi; et sic agens supernaturale fuit supernaturaliter conceptionem perficiens; et ideo dicitur tota conceptio non fuisse naturalis, sed miraculosa; cum magis denominandae sint res naturales vel supernaturales ab agente quam a materia.

Ad illud quod primo objicitur in contrarium patet responsio.

Ad secundum dicendum, quod Beata Virgo dicitur genuisse Christum, non sicut principium activum praebens ad generationem, sed sicut ministrans materiam naturalem. Unde non est inconveniens quod generatio illa miraculosa fuerit. Operatio enim miraculosa, quamvis non sit alicujus creaturae sicut agentis, tamen potest esse alicujus creaturae sicut materiae; ut quando miraculose ex aliqua materia creata Deus aliquid facit.

Ad tertium dicendum, quod quantum ad hoc quod Virgo materiam ministravit, et fomentum conceptus praebuit, potest dici aliquo modo naturalis generatio Christi ex Virgine, quamvis non simpliciter.

ARTICULUS IV.

Ad quartum sic proceditur. Et 1. videtur quod Christus in lumbis Abrahae fuit decimatus. Decimatio enim quidam actus singularis est: sed Christus maxime videtur per decimam figurari, ratione perfectionis, quae denario competit; ergo Christus praecipue in Abraham decimatus fuit.

2. Praeterea, caro Christi non fuit in Abraham a reliqua ejus carne distincta, ut quidam errantes posuerunt; et ita in eo peccato fuit obnoxia: sed ratione peccati competit alicui decimari in Abraham; ergo Christus in Abraham decimatus fuit.

5. Praeterea, Christus processit ex Abraham mediante Beata Virgine: sed Beata Virgo fuit in lumbis Abrahae decimata; ergo et Christus.

Ad oppositum, Hebraeorum 7, Apostolus praefert sacerdotium Melchisedech sacerdotio Levitico per hoc, quod Levi in lumbis Abrahae decimatus fuit. Si ergo Christus in lumbis Abrahae decimatus fuit, eadem ratione sacerdotium ejus erit inferius sacerdotio Melchisedech, quod est absurdum.

Praeterea, Augustinus dicit, 10 super Genesim ad literam: « illud in Abrahae carne decimabatur » quod curabatur: sed Christus est unde curabatur humanum genus, non qui curatur: ergo Christus in lumbis Abrahae decimatus non fuit.

Ad hoc dicendum, quod ille qui decimas dat, praefigurat se liberatione indigere; eo quod sibi retinet novem, et alteri dat decimum, quod significat perfectionem, quasi totam perfectionem suam alteri ascribens. Cum ergo Abraham decimas dedit, praefiguravit se liberatione indigere, et omnes suos posteros qui ita cum peccato ex ipso propagandi erant secundum carnalem concupiscentiam, sicut et ipse a suis parentibus propagatus erat. Christus autem non erat propagandus ab eo per concupiscentiam carnis, cum natus sit ex Virgine: et ita quasi immunis a peccato non significabatur liberatione indigere, Abraham decimas dante. Et propter hoc Christus non dicitur decimatus in lumbis Abrahae, sicut Levi et alii.

Ad primum ergo dicendum, quod in decimatione Abrahae praefigurabatur Christus ut decima, alii vero, ut a quo decima accipiebatur. Et ideo in illa decimatione Christus non erat ut decimatus sed ut decima.

Ad secundum dicendum, quod in decimatione est considerare figuram et figuratum. Ratione ergo figurae aliquis dicitur esse decimatus pro tempore illo, quo erat in lumbis Abrahae. Tunc enim ille actus singularis praecessit. Sed ratione figurati decimari competit alicui, secundum quod in propria persona existit: sic enim est liberatione indigens. Christus autem in propria persona existens distinctus fuit ab omnibus aliis filiis Abrahae, ut medicina ab infirmis: et ideo ei non competit decimatio, quamvis caro ejus non fuerit actu distincta in Abraham a reliqua carne ejus.

Ad tertium dicendum, quod Christus non descendit a Beata Virgine per concupiscentiam carnalem, sicut ipsa ad Abraham: et ideo beata Virgo potuit praefigurari, ut liberatione indigens, et per consequens decimata, non autem Christus.

Expositio textus.

Obnoxia fuisse peccato etc.

Contra. Quod non est non potest esse peccato obnoxium. Sed caro Christi non fuit nisi in ipso; ergo in Beata Virgine non fuit peccato obnoxia. Dicendum est quod quamvis caro Christi actualiter fuerit in ipso tantum, tamen materialiter fuit in Beata Virgine et in aliis: sed differenter: quia in Beata Virgine fuit essentialiter, sed in aliis paribus fuit o-

riginaliter: et secundum illud modum quo in unoquoque fuit, sic peccato obnoxia erat. « Potentia receptiva Dei verbi etc. » Respectu conceptionis Dei simul datus fuit virgini actus et potentia ad actum; secundum quam dici posset quod hoc est possibile, quia respectu hujus se habebat in pura potentia obedientiae. « Similiter autem et generativam. » Hoc autem dupliciter, in quantum virgo peperit filium: et quantum ad hoc habebat virgo potentiam passivam naturalem quae per agens naturale in actum reduci posset. Unde dicitur Spiritus sanctus ei potentiam generativam contulisse, quia actum potentiae sibi contulit: sicut aliquis dicitur mihi praebere visum, quia facit me videre.

« Ita et leviticus ordo etc. »

Sed contra. Potest contingere quod Papa decimas solvat alicui simplici sacerdoti, et tamen Papa est illo sacerdote major. Sed dicendum, quod Apostolus non intendit probare, quod Melchisedech major fuerit personaliter quam Aaron vel Levi; sed quod sacerdotium significatum per Melchisedech, id est Christi, majus fuerit sacerdotio Aaron. Cum ergo « Levi et Christus secundum carnem essent etc. » Dicitur Levi fuisse in Abraham secundum corpulentam substantiam et seminalem rationem; quia, ut dicit Augustinus, 4 super Gen. ad literam, Cum sit in semine et visibilis corpulentia, scilicet ipsa materia, et invisibilis ratio, scilicet vis activa, utrumque concurrat ex Abraham: quia et semen patris Levi in quo est vis activa, et materia quam mater ejus ministravit, originaliter tracta est ex praecedentibus parentibus. Sed in conceptione Christi non fuit aliqua vis activa quae traheretur ex Abraham; et ideo non dicitur fuisse in Abraham secundum seminalem rationem. Sed materia corporis Christi, quam Virgo ministravit, deducta est originaliter ab Abraham. Et ideo dicitur Christus in Abraham fuisse secundum carnem vel secundum corpulentam substantiam: non quod caro Christi vel corpulentam substantia ejus fuerit in Abraham actu, sed originaliter tantum.

DISTINCTIO IV.

Cum vero incarnatio verbi etc. (V. edit. nostrae tom. VII, pag. 41.)

QUAESTIO UNICA.

Superius Magister determinavit quale fuerit assumptum: in hac parte determinat de effectu assumptionis. Haec autem dividitur in tres partes. Primo enim quaerit quare opus incarnationis Spiritui Sancto attribuat. Secundo, cum de Spiritu sancto Christus sit conceptus, quare non dicitur filius Spiritus sancti, sicut natus de virgine dicitur filius virginis, ibi, « Sed non est hic diutius » immorandum. Tertio quaerit, cum eum natum profiteamur, cur Apostolus dicat eum factum, ibi, « Sed quaeri potest etc. » Quaelibet istorum dividitur in duas; in quaestionem et solutionem, sicut apparet in litera. Pars illa, ubi ponit solutionem secundae quaestionis, ibi, « Non est autem concedendum, dividitur in tres partes. » In prima ostendit, quod Christus non est natus de Spiritu sicut de Patre. In secunda, quare de Spiritu sancto natus dicatur rationem assignat, ibi, « Profecto modo ista etc. » Ubi assignat duas rationes: unam quantum ad operis rationem, quia scilicet illa unio

per gratiam facta est; aliam ex parte operantis, quia Spiritus sanctus operatus est illam conceptionem.

ARTICULUS I.

Hic quaeritur primo, utrum incarnatio approprietur Patri: et videtur quod sic. Ei enim attribuitur potentia: sed potentia in Deo est principium efficiendi; ergo efficientia incarnationis Patri approprianda est.

2. Praeterea, Damascenus dicit, quod divina sapientia venit in virginem sicut divinum semen: sed semen est activum in generatione; ergo actio incarnationis debet appropriari sapientiae Dei, idest Filio.

5. Praeterea, Matth. 1 dicitur: « Quod in ea natum est, de Spiritu sancto est; » ergo incarnatio convenit Spiritui sancto.

4. Contra. Operatio Dei est ejus essentia: sed essentia non est appropriabilis; ergo nec incarnatio quae Dei operatio est.

5. Praeterea, Damascenus in 1 cap. 5 lib. dicit, quod in incarnatione simul manifestantur bonitas, potentia, justitia et sapientia Dei; ergo non est magis appropriabilis uni personae quam alteri.

Ad hoc dicendum, quod quamvis in omni operatione connotante effectum in creatura reluceant appropriata personarum, sicut in incarnatione apparet, secundum Damascenum dicentem, quod in ea relucet bonitas, sapientia et potentia Dei; bonitas in quantum proprii plasmatum non despexit salutem; potentia, in quantum maxime distantia conjunxit; sapientia, in quantum convenientem modum ejus invenit, quod impossibile videbatur: tamen unaquaque operatio alicui personae magis dicitur appropriabilis secundum quod in ea appropriatum illius personae magis manifestatur. Quanto vero opus aliquod est magis indebitum et excedens meritum creaturae, tanto magis Dei gratia et bonitas in Deo manifestatur. Et quia opus incarnationis est tale; ideo appropriatur principio gratiae, scilicet Spiritui sancto: et sic tertium concedendum est. Respondendum est igitur ad omnia alia argumenta.

Cum ergo dicitur, quod potentia Patri attribuitur, dicendum, quod quamvis potentia reluceat in incarnatione, tamen magis ibi apparet ratio bonitatis; quia potentia in opere, sed bonitas in fine operis: finis vero est causa causarum: unde ab illo debet potius fieri denominatio.

Ad secundum dicendum, quod semini convenit ratio agentis conjuncti: sed efficienti etiam ratio agentis separati. Unde sapientiae quae est Filius attribuitur ratio seminis, sed Spiritui sancto ratio efficientis.

Ad quartum dicendum, quod quamvis operatio sit essentia, tamen opus operatum non est essentia, et de illo hic loquitur. Vel dicendum quod operatio et essentia differunt secundum connotatum; et ratione connotati potest fieri appropriatio.

Ad quintum dicendum, quod quamvis appropriata omnium personarum in incarnatione reluceant, tamen maxime appropriatum Spiritus sancti, sicut jam dictum est.

ARTICULUS II.

Ad secundum sic proceditur. Et 1. videtur, quod Christus secundum quod homo, sit Filius Trinitatis; *S. Th. Opera omnia. V. 22.*

quia Christus secundum quod homo creatura est: sed omnium creaturarum, praecipue quae sunt ad imaginem, pater dicitur Trinitas; ergo Christus secundum quod creatura, est filius Trinitatis.

2. Praeterea, cujuslibet habentis gratiam dicitur pater tota Trinitas: sed Christus maxime gratiam habuit; ergo est maxime filius Trinitatis.

5. Praeterea, videtur, quod sit Filius Spiritus sancti sic. Secundum Philosophum 13 de Animalibus, actio est ex semine patris in generatione: sed omnem actionem quam facit in generatione semen patris, fecit Spiritus sanctus in conceptione Christi; ergo est pater Christi, cum ratione actionis praedictae aliquis dicatur pater.

Contra. Inconveniens est, quod Filii nomen ad aliam personam transeat, sicut in 1 distinct. dictum est; ergo similiter quod et Patris nomen ad aliam personam, seu ad totam Trinitatem.

Praeterea, filiatio est determinata hypostasis seu suppositum, secundum Damascenum: sed hypostasis in qua facta est unio incarnationis in Christo est tantum a Patre, quia illa est persona divina; ergo Christus incarnatus est tantum Filius Patris.

Respondeo. Dicendum, quod Christus nec secundum quod Deus, nec secundum quod homo filius Trinitatis est: quia nec per generationem naturalem. Nam sic, secundum quod Deus, Filius est solius Patris; secundum quod homo, solius matris. Nec per creationem; quia filiatio consequitur personam, quae in Christo non est creata. Non enim caro dicitur filia, sed homo filius. Nec per adoptionem; quia per gratiam unionis habet filiationem simpliciter, scilicet naturalem: unde non debet dici Filius secundum quid, id est per gratiam vel creationem (his enim tribus modis aliquis dicitur filius). Unde non debet dici Filius Trinitatis.

Ad primum ergo quod objicitur in contrarium, dicendum, quod creatio non convenit personae, sed potius naturae Christi; filiatio autem e converso; et ideo non potest dici per creationem filius.

Ad secundum dicendum, quod aliquis dicitur filius Trinitatis per gratiam adoptionis, et non per gratiam unionis; et ideo Christus, cum per gratiam unionis sit filius, est filius naturalis solius Patris, non autem adoptionis totius Trinitatis.

Ad tertium dicendum, quod Spiritus sanctus seminis operationem exereuit in incarnatione Christi, quasi artifex operando in materiam exteriorem. Semen autem operationem in generatione operationum exereuit in materiam sibi conjunctam; et ideo, quamvis in actione sit similitudo, in modo agendi non est similitudo.

ARTICULUS III.

Ad tertium sic proceditur. Et 1. videtur, quod Beata Virgo non sit mater Christi. Dicit enim Damascenus: « Juste et vere Theotocon, idest Dei genitricem sanctam Virginem nominamus; » Christotocon vero, idest Christi genitricem, non dicimus Virginiaem; ergo non est mater Christi.

2. Praeterea, plus contulit ad conceptionem Christi Spiritus sanctus, quam Beata Virgo: quia agens est praestantior in actione quam materia; ergo si Spiritus sanctus non potest dici pater Christi, neque Beata Virgo mater.

5. Praeterea, videtur quod nec Dei, in Deo non

differt Deus et deitas: sed non potest dici mater deitatis; ergo nec mater Dei.

Contra. Matth. 1: « Cum esset desponsata mater Jesu. » Jesu autem est Deus; ergo mater Dei.

Praeterea, Augustinus dicit: « Talis fuit illa unio quae Deum faceret hominem et hominem Deum; » ergo idem est Deus et homo: et sic mater hominis et mater Dei.

Ad hoc dicendum, quod secundum opinionem Philosophi mater duplicem operationem exercet in generatione: quia materiam praeparat et ministrat, et conceptum virtute matricis fovet. Cum ergo hanc duplicem operationem in generatione Christi fecerit Beata Virgo, quia et materiam praeparavit et conceptui fomentum praebuit, ideo bene mater Christi dicenda est.

Ad illud ergo quod primo objicitur de Damasceno, dicendum, quod non intendit negare quin sit vera mater Christi: sed non in eo intellectu quo dicebant haeretici per Christum personam hominis tantum non Dei intelligentes. Cum haereticis autem, ut ait Hieronymus, nec debemus vocabula habere communia.

Ad secundum dicendum, quod quamvis Spiritus sanctus plus fecerit in conceptione Christi, quam Virgo tamen non potest dici pater, sicut Virgo mater: quia non ex substantia sua, et sibi similem in specie produxit filium: nec alia hujusmodi quae requiruntur ad rationem patris inveniuntur in eo.

Ad tertium dicendum, quod Deus et divinitas, quamvis sint idem re, differunt tamen ratione: quia Deus significat per modum subsistentis et suppositi, divinitas autem per modum formae: secundum autem Philosophum non forma, sed quod est hoc aliquid generatur.

ARTICULUS IV.

Ad quartum sic proceditur. Et 1. videtur, quod antiqui patres meruerunt incarnationem. Qui meretur aliquid, meretur et illud sine quo haberi non potest, alioquin cassum esset meritum: sed patres antiqui meruerunt vitam aeternam, quae sine Christi incarnatione non potest haberi; ergo meruerunt incarnationem.

2. Praeterea, oratio quae fit ab aliquo sub quatuor debitis conditionibus, scilicet pro se et ad salutem, et pie et perseveranter, dicitur merendo impetrare quod petit: sed sancti pro incarnatione obtinenda sic oraverunt; ergo merendo impetraverunt incarnationem.

3. Praeterea, secundum Bernardum: « Fides Beatae Virginis conjunxit illa tria fata, scilicet Deum, animam et carnem: » sed non conjunxit nisi merendo, sicut Ecclesia cantat. « Quae dominum omnium meruisti portare; » ergo etc.

Contra. Ad Timoth. 5: « Apparuit benignitas et humanitas salvatoris nostris Dei non ex operibus justitiae quae fecimus nos etc. » Sed benignitatem nominat Apostolus ostensam Christi incarnationem; ergo non est secundum merita.

Praeterea, incarnatio Christi est beneficium impensum toti naturae humanae: sed meritum nullius puri hominis extendit se ad totam naturam humanam: ergo sancti Patres non meruerunt incarnationem.

Respondeo. Dicendum, quod duplex est meritum; condigni et congrui. Sancti autem partes in-

carnationes meruerunt merito congrui, scilicet se ad suscipiendum tantum beneficium praeparando; et non merito condigni, quia non eam per meritum hoc modo debitam sibi fecerunt; quamvis sic potuerunt mereri ejus accelerationem. Deus enim disposuerat, ut eorum precibus et meritis fieret acceleratio.

Ad primum ergo quod in contrarium objicitur, dicendum, quod vitam aeternam mereri non potuerunt sine his quae comitantur vitam aeternam, sicut est gaudium de vita aeterna, et impassibilitas et alia hujusmodi. Ea vero quae sunt ducentia ad vitam aeternam sicut principia merendi, non meruerunt, quamvis sine eis vita aeterna haberi non possit; quia talia non cadunt sub merito; sicut gratia et hujusmodi: et inter illa computatur incarnatio Filii Dei.

Ad secundum dicendum, quod oratio quae fit pro se dupliciter potest intelligi. Vel pro se tantum; vel pro se cum aliis simul. Primo modo accipitur inter condiciones orationis. Secundo autem modo sancti petebant pro se, idest non pro se solum, sed pro toto mundo.

Ad tertium dicendum, quod Beata Virgo non meruit incarnationem, nisi supposita incarnatione facienda: et sic meruit, ut per eam fieret, non quidem merito condigni, sed congrui, inquantum debebat quod Dei mater ea puritate niteret qua major sub Deo nequit intelligi, sicut dicit Anselmus.

Expositio textus.

Uno nominato tres intelliguntur.

Hoc intelligendum de essentialibus: non est autem concedendum absolute. Sciendum autem quod haec praepositio Ex vel denotat causam efficientem vel materiale. Ad hoc autem quod aliquid natum ex alio materiali filius dicatur, oportet quod in similitudine speciei producatum cum eo ex quo nascitur, sicut filius matri; et ideo capilli et lumbricus non dicuntur filii ejus, ex quo materialiter nascuntur. Ad hoc etiam quod aliquid natum de aliquo active dicatur filius ejus, oportet quod producatum de substantia agentis et in similitudine speciei, et quod sit agens principale. Primae autem duae condiciones deficiunt in Spiritu sancto: unde nec dicitur pater Christi. Secunda autem et tertia, deficiunt in aqua; quia renatus spiritualiter non assumit similitudinem aquae, sed similitudinem Dei, et aqua est instrumentum divinae virtutis operantis in ea.

DISTINCTIO V.

Praeterea inquiri oportet etc. (V. edit. nostrae tom. VII, pag. 64.)

QUAESTIO UNICA.

Postquam determinavit Magister quid sit assumens et quid sit assumptum: hic determinat simul de utroque ejusmodi sit utrumque; et dividitur in tres partes: quia primo movet quaestionem; secundo solutionem ponit, ibi, « ilaec inquisitio. » In tertia determinat consequentes dubitationes. Sed dividitur prima in duas. Primo determinat quaestionem

quantum ad ejus facilitatem. Secundo quantum ad ejus difficultatem, ibi, « De parte vero quaestionis. » Haec dividitur in tres. Primo ponit auctoritates ad partem negativam, scilicet quod natura non assumpsit naturam. Secundo ad partem affirmativam, ibi, « Cui videtur obviare. » Tertio ex auctoritatibus inductis colligit solutionem et ejus confirmationem subjungit, ibi, « Ex verbis autem Augustini superius positus etc. » « Sed quaeritur utrum eadem. » Haec dividitur in duas. Primo enim movet dubitationes circa praedictam determinationem: et primo quantum ad hoc quod dixit naturam assumpsisse naturam; secundo quantum ad hoc quod dixit personam non esse assumptam, ibi, « Ideoque non personam hominis assumpsit. » Circa primum duo facit. Primo quaerit utrum natura divina possit dici facta caro. Secundo utrum possit dici facta homo, ibi, « Si autem natura divina. » « Ideo non personam divinam. » Haec dividitur in duas. Primo ostendit veritatem. Secundo objicit dubia in contrarium et solvit, ibi, « Hic a quibusdam opponitur etc. »

ARTICULUS. I.

Hic modo proceditur. Et 1. videtur, quod persona non assumpsit naturam humanam. Majorem enim compositionem facit compositio substantiae ad substantiam, quam accidentis ad substantiam; sed persona divina non est susceptibilis additionis secundae; ergo multo minus primae; sed additio alterius naturae ad personam est additio substantiae ad substantiam; ergo ejus additionis non est susceptibilis persona.

2. Praeterea, actus personalis non attribuitur naturae, ut generare; sed assumere actus personalis est, quia proprius personae Filii; ergo non attribuitur naturae.

3. Praeterea, actus sunt singularium; ergo abstracta a singularibus natura non agit; ergo nec assumit.

Contra. Joan. 1: « Verbum caro factum est, » et hoc non nisi per carnis assumptionem; ergo Verbum assumpsit carnem; ergo persona naturam.

Praeterea, assumptio terminatur ad unitum: ergo quicquid est unitum, potest dici assumens vel assumptum; sed natura divina est unita; ergo assumens vel assumpta: sed non assumpta, ergo assumens. Et hoc est quod Gregorius dicit: « Carnem deitas, anima mediante, suscepit. »

Ad hoc dicendum, quod assumere dicitur tripliciter. Uno modo communiter et improprie; secundum quod assumere nihil aliud est quam aliquid ad alterum sumere: et in hoc sensu potest dici, quod tota Trinitas assumpsit humanam naturam Filio. Secundo modo dicitur assumere proprie, quasi ad se sumere; sicut homo assumit sibi vestem, vel socium ut simul cum eo commoretur: et sic natura divina dicitur assumere humanam, quia virtute divinae naturae factum est, ut natura humana associaretur divinae in una persona. Tertio modo propriissime dicitur assumere, sumere aliquid ad se et in se, sicut assumo cibum ad me, ut sit aliquid mei: et hoc modo divina persona assumpsit naturam humanam, quia natura humana facta est natura personae divinae, in qua scilicet subsistit. Sic autem natura divina non assumpsit humanam, quia natura humana non est facta aliquid divinae naturae.

Ad illud ergo quod objicitur in contrarium, di-

cendum, quod si fieret additio substantiae per modum compositionis, major esset. Sed non sic fit proposito, imo per modum associationis. Accidentis vero non potest addi nisi per modum compositionis, cum ejus esse sit inesse, ut dicit Boetius.

Ad secundum dicendum, quod verum est de actu personali, qui est personae ut subjecti agentis, ut generare: sed assumere est actus personae ut termini.

Ad tertium dicendum, quod duobus modis potest intelligi natura divina abstracta a personalitate. Uno modo ut intelligatur divina natura sine personis distinctis, prout distinguit fides: et sic abstracta a personalitate, naturae divinae convenit assumere, quia adhuc intelligitur ut quaedam res subsistens prout intelligitur a Gentilibus et Judaeis. Unde competit ei agere. Alio modo dicitur, ut intelligatur simpliciter absque omni personalitate: et sic non consideratur secundum quod est in re, sed solum secundum quod est in intellectu: et sic non competit ei agere, nec assumere.

ARTICULUS II.

Ad secundum sic proceditur. Et 1. videtur, quod natura non possit assumi. Quod enim assumitur unitur: nam ideo assumitur ut uniat, et quod unitur fit unum: sed natura humana non est facta unum cum Filio Dei, quia haec est falsa, Filius Dei est humana natura; ergo nec ab ipso assumpta.

2. Praeterea, natura idem est quod essentia; sed non assumpsit essentiam, quia essentia dicitur ab essendo, et esse est suppositi: non assumpsit autem suppositum: et sic nec esse, nec essentiam; ergo nec naturam.

3. Praeterea, secundum Boetium in libro de Duabus naturis et una persona Christi, natura, prout in Christo duae naturae dicuntur, est unamquamque rem informans specifica differentia: sed Christus non assumpsit specificam differentiam: non enim assumpsit, ut ait Damascenus, eam naturam quae nuda contemplatione consideratur, sed in atomo; ergo non assumpsit naturam.

4. Praeterea, videtur quod assumpserit personam. Separata enim ab assumpto per intellectum natura divina, quod remanet est persona: sed nihil remanet nisi quod assumptum fuerat; ergo persona est assumpta.

5. Praeterea, assumpsit animam: anima est persona: est enim rationalis naturae substantia individua, quod est definitio personae, secundum Boetium: ergo assumpsit personam.

Ad hoc dicendum est quod persona assumi non potest. Cum enim assumens non sit assumptum; si persona Dei assumpsisset personam hominis, persona Dei non esset persona hominis; et sic essent duae personae in Christo, quod est haeticum. Sunt autem duae naturae in Christo, scilicet humana et divina; et ideo dicendum quod humana natura est assumpta.

Ad illud quod objicitur in contrarium, dicendum, quod uniri dicitur dupliciter. Vel unum fieri, vel in uno fieri. Primo modo natura humana non unitur divinae, sed secundo.

Ad secundum dicendum, quod quamvis secundum grammaticam, essentia dicitur ab essendo, tamen essentia est causa essendi: unde naturaliter prior est essentia quam esse actuale ipsius perso-

nae, seu suppositi. Unde assumendo essentiam, non est necesse assumere personam.

Ad tertium dicendum, quod Boetius appellat specificam differentiam rei quidditatem, et non animae intentionem, et de hac obiciebatur. Sed quia persona non est assumpta, ideo respondendum est ad duo argumenta quae hoc ostendunt. Et primo ad primum dicendum, quod quamvis assumptum separatum haberet esse personale, quia iam per se subsisteret, quamdiu tamen manet unitum, non habet rationem personalitatis, quia nobiliori se est unitum.

Ad quartum dicendum quod anima, nec conjuncta nec separata est persona, quia apta nata est ut sit forma corporis, et pars hominis. Ratio autem partis contrariatur rationi personae, cum persona sit quid completum et perfectum, et per se subsistens. Ratio autem partis est ratio imperfecti; et ideo ei non convenit ratio personae.

Quod ergo obicitur de definitione Boetii, dicendum quod *ly* individua, secundum quod cadit in definitione personae, secundum quosdam, triplicem excludit communicabilitatem. Prima est universalis: nullum enim universale est persona. Secunda est partis, quia persona nominat aliquod totum. Tertia est assumptibilis ad aliquid dignius, quia persona nominat aliquod completum proprietate ad dignitatem pertinente; et ideo animae, cum sit pars naturae humanae, convenit non esse personam.

ARTICULUS III.

Ad tertium sic proceditur. Et 1. videtur, quod unio nihil sit. Unio enim est in extremis quae uniantur; ergo est in natura humana, et in divina: sed in humana nihil est increatum, in divina autem nihil creatum; ergo unio, nec est creator, nec creatura; ergo nihil est.

2. Praeterea, unio est relativum aequiparantiae: relativa enim aequiparantiae aequaliter se habent ad utrumque extremum; ergo vel est in utraque natura: quod esse non potest, quia sic aliquod creatum accidens esset in Deo: vel in neutra; ergo nihil est.

3. Praeterea, nihil creatum videtur dici de Deo, nisi per causam ut creator, vel similitudinem, ut leo, vel per assumptionem ut homo. Sed unio non dicitur per causam, quia sic diceretur de tota Trinitate: nec per similitudinem, quia non diceretur proprie, sed metaphorice: nec per assumptionem, quia unio non est assumpta; ergo nullo modo: et sic unio qua Deus unitur, nihil est.

4. Praeterea, videtur quod sit idem quod assumptio. Assumere enim est ad se sumere: ad se sumere est sibi conjungere vel unire; ergo non differt assumptio ab unione.

Ad hoc dicendum, quod unio tripliciter potest accipi. Uno modo prout unio idem est quod unio: et sic idem est quod divina essentia. Alio modo ut unio est passio: et sic est quaedam naturae assumptae dependentia ad assumptam. Tertio modo, et proprie unio est relatio consequens hujusmodi actionem et passionem: et sic est quaedam comparatio vel habitudo unitorum. Relationum autem quaedam sunt realiter in utroque extremorum, quando est mutua dependentia relativorum adinvicem, sicut in patre et filio. Quando autem unum extremum dependet ab altero realiter, et non e converso, tunc relatio est in eo in quo est depen-

dentia secundum rem, in altero vero secundum intellectum, quia non potest unum relativum intelligi sine reliquo, sicut apparet in seibili et scientia; et hoc modo se habet omnis relatio quae est creatoris ad creaturam. Unde, cum unio Dei et hominis sit hujusmodi, in humana natura erit secundum rem, quia in ea est dependentia ad suum creatorem: in Deo autem, cum nulla sit dependentia, erit secundum intellectum.

Ad illud ergo quod obicitur, quod unio est in unitis, verum est in altero secundum rem, in altero secundum rationem.

Ad secundum dicendum, quod unio simpliciter est aequiparantiae relatio: non tamen unio creatoris et creaturae, sicut nec similitudo creaturae et creatoris, nisi secundum modum intelligendi, non existendi. Inter Deum namque et creaturam nulla est aequiparantia.

Ad tertium dicendum, quod unio dicitur de Deo per assumptionem; non quod ipsa sit assumpta, sed quia est assumptionis terminus.

Ad quartum quod obicitur quod est assumptio, sciendum quod assumptio et unio simul tempore Christo fuerunt; differunt tamen re et ratione quadrupliciter. Prima differentia sumitur ex parte assumpti: quia assumptum manet diversum, quod unitur fit unum: unde suppositum unitur sive persona, assumitur autem natura. Secunda ex parte extremorum; quia unio, quantum est de se, aequaliter respicit utrumque extremorum; sed assumptio requirit in assumente ens stabile ad quod aliud trahitur, non e converso: unde natura divina dicitur unita, sed non assumpta. Tertia ex parte termini, quia assumptio in suo intellectu terminata cui fit conjunctio includit, unio vero non: unde tota Trinitas univit Filio naturam humanam, sed non assumpsit. Quarta ex parte ipsius fieri; quia assumptio ordinatur ad unionem, ut via ad terminum. Et sic apparet solutio ad argumentum; quia ad se sumere non dicit sibi unire, immo actum ordinatum ad illum sicut via ad terminum. Primo enim est sumere, et postea unire assumptum.

ARTICULUS IV.

Ad quartum sic proceditur. Et 1. videtur, quod sit facta unio in natura. Quando enim duo conjunguntur valde inaequalia in virtute, quod praedominans est transmutat aliud in suam naturam, sicut patet in gutta aquae et vegete vini: sed natura divina et humana sic se habent; ergo divina transmutat in se humanam.

2. Praeterea, proprietates corporis et animae non dicerentur simul de aliquo uno, nisi constituerent haec duo naturam humanam; ergo a simili, proprietates divinae et humanae naturae, non dicerentur simul de Christo nisi constituerent unam naturam in Christo.

3. Praeterea, ex duabus naturis nullam unam naturam constituentibus, non fit aliquod unum. Christus vero est unum ex duabus naturis; ergo constituunt in eo unam naturam.

4. Praeterea, videtur quod non in persona. Non enim potest fieri communicatio vel unio in incommunicabili; persona vero, sicut dicit Richardus, rationalis naturae incommunicabilem substantiam vel existentiam dicit; ergo non potest fieri in ea unio, sive communicatio.

5. Praeterea, major est convenientia secundum

rem unam, quam secundum rationem unam; ergo major est convenientia in persona quae est secundum rem, quam quae est in genere vel in specie, quae est secundum rationem; si ergo divina et humana natura non possunt convenire in genere et specie, multo minus in persona.

Ad hoc dicendum, quod cum omnis unio terminetur ad unum, unio autem naturarum in Christo non potest esse in una natura; ergo oportet quod sit in persona. Quod autem unio non possit fieri in natura, sic ostenditur. Natura enim quamvis multipliciter dicitur, ut patet per Philosophum § Metaphysicorum, tamen hic accipitur prout significat rei quidditatem, sive essentiam, quae in definitione continetur: et hoc modo non est aliqua una natura in Christo, in qua facta sit unio: quia nec humana, nec divina, nec media, eum ex his omnibus sequatur transmutatio naturae divinae: quia aut divina transmutaretur in humanam, aut e converso: quod est impossibile: cum ea quae non communicant in materia, nec transmutentur adinvicem: aut utrumque transiret in mediam permissionem: quod eadem ratione est impossibile, cum mixtio sit miscibilium unio alteratorum, sicut in de Generatione dicitur: aut utraque manens constitueret tertiam, et hoc vel per viam combinationis, sicut duae lineae, et sic natura divina esset corporea: aut per viam compositionis, ut corpus et anima, et sic componibilis, quod falsum est. Restat ergo, quod facta sit unio in persona divina, non autem in humana: quia personalitas divina non potest ad aliam trahi, cum sit incorruptibilis et aeterna: ergo oportet quod sit unio in persona divina.

Ad illud ergo quod objicitur in contrarium, dicendum, quod propositio habet veritatem in agentibus mutuo et patientibus, quod hic non contingit.

Ad secundum dicendum, quod non est simile; quia in humanis secundum personas multiplicatur natura. Unde non potest fieri unio in persona, quin fiat in natura; secus autem in divinis.

Ad tertium dicendum, quod Christus dicitur unum ex duabus naturis, unum exigitive, non compositive: non ita quod illud unum sit factum ex utraque natura; sed quia factum est utriusque naturae; unde non oportet ex istis esse unam naturam, sed unam personam.

Ad illud quod objicitur de persona, dicendum, quod communicabilitas passiva, qua aliquid communicatur alteri transiens ad personalitatem ipsius, contra rationem personae est: sed non activa, qua se communicat alteri personae manens per se in seipsa. Vel dicendum, quod communicabilitas secundum praedicationem, est contra rationem personae; non autem communicabilitas adunationis; quia cum aliquid possit personae adjungi, multa in una persona possunt adunari. Potest enim persona esse totum integrale, sed non universale.

Ad quintum dicendum, quod major est convenientia in persona quam in genere vel specie secundum actum existendi, non tamen secundum naturam. Unde diversorum generum res adunantur in persona una, ut substantia et accidens, non autem in natura una.

Expositio textus.

« Id quod proprium non quod commune; » ergo natura communis non accipit naturam humanam.

Respondeo. Illud quod commune, in quantum commune, non accipit.

« Sed in propria persona Fili inatura, quae semper genita etc. »

Contra. Natura divina non generat, nec generatur.

Respondeo. Improprie loquitur, ponens naturam pro persona.

« In forma Dei. » Sciendum quod forma uno modo dicitur ex relatione ad materiam, quam perficit. Alio modo ex privatione materiae, seu potentialitatis. Primo modo divinitas non dicitur forma, sed secundo.

« Sed quaeritur utrum etc. » Videtur quod sic, quia vere dicitur incarnata.

Respondeo. Incarnari dupliciter accipitur. Vel secundum carnem fieri, vel carni uniri. Primo modo non dicitur natura divina incarnata, sed secundo.

« Ideoque non sic dicitur divina natura esse homo etc. »

Contra. De quocumque praedicatur Filius Dei, praedicatur homo: sed natura divina est Filius Dei; ergo est homo. — Dicendum, quod differentia est in nomina substantiva et adjectiva. Substantiva enim non tantum significant formam, sed suppositum formae, unde possunt praedicari ratione utriusque: et quando praedicantur ratione suppositi, dicitur praedicatio per identitatem: quando autem ratione formae, dicitur per denominationem seu informationem: et haec magis est propria praedicatio, quia terminus in praedicamento tenetur formaliter. Adjectiva autem significant tantum formam, et ideo non possunt praedicari nisi per informationem: unde haec est falsa, *Essentia est generans*; quamvis haec sit vera, *Essentia est Pater*. Cum ergo dicitur, *Filius Dei est homo*, est praedicatio per informationem, et non per identitatem. Cum vero dicitur, *Essentia divina est homo*, est praedicatio per identitatem: quia est idem secundum rem cum supposito hominis: non autem per informationem, quia natura divina non significat ut suppositum subsistens in humana. Et ideo dicit Magister, quod non est una vera sicut alia; nec tamen dicit eam simpliciter esse falsam.

DISTINCTIO VI.

Ex praemissis autem emergit quaestio etc. (V. edit. nostrae tom. VII, pag. 75.)

Divisio textus.

Postquam determinavit de incarnatione Dei, hic incipit determinare condiciones Dei incarnati. Dividitur autem haec pars in duas. In prima determinat de his quae conveniunt Deo incarnato ratione unionis. In secunda de his quae pertinent ad naturam absolute assumptam, dist. 13, ibi, « Practerea, sciendum est Christum. » Prima in duas. In prima determinat de his quae dicuntur de Deo incarnato, exprimentia unionem; sicut eum dicitur, *Deus est homo*, vel *factus homo*. In secunda determinat de his quae ei conveniunt consequenter ad unionem, dist. 8, ibi, « Possunt praedicta modo veri. » Prima in tres. Primo movet quaestionem de locutionibus exprimentibus unionem. In secunda ponit diversas opiniones de modo unionis, ibi, « Alii enim dicunt. » In tertia ostendit quomodo intelliguntur diverse praedictae locutiones secundum

diversas opiniones, dist. 7, ibi, « Secundum primum etc. ». « Alii enim dicunt. » Hic ponit opiniones, dividitur in partes tres, secundum tres opiniones, quas ponit. Secunda incipit ibi, « Sunt autem alii. » Tertia ibi, « Sunt etiam alii. » Quaelibet autem harum trium partium dividitur in duas, in opinionem et confirmationem. Confirmatio primae opinionis incipit ibi, « Sed ne de suo sensu. » Secunda ibi, « De hoc autem Augustinus. » Confirmatio autem tertiae, ibi, « Ne autem illi de suo sensu. »

Expositio.

Ad intellectum autem harum opinionum, ante disputationem oportet tria breviter videre. Primo, in quo ad invicem convenient. Secundo, in quo differant. Tertio quid unaquaeque ponat. Circa primum sciendum est, quod in hoc convenient omnes, quod neque ponunt in Christo duas personas, sicut Nestorius, neque unam tantum naturam, sicut Eutyches: sed media via incedunt inter duas haereses. Circa secundum sciendum est, quod cum in Christo sint duae uniones, una scilicet animae ad corpus, alia humanitatis ad personam divinam, quantum ad utrumque differt tertia opinio a duabus primis, eo quod duae primae dicunt ex anima et corpore in Christo esse unum quid constitutum, quod tertia opinio negat. Item tertia opinio dicit, animam et carnem accidentaliter personae verbi advenire, ut homini vestimentum: quod prima et secunda opinio negat. Similiter etiam quantum ad has duas uniones differt secunda opinio a prima. Quantum quidem ad unionem animae et corporis, hoc modo. Nam prima opinio assumptioni utriusque horum a divina persona praecintelligit unionem eorum adinvicem, secundum quod uniuntur ad constituendum et humanitatem et hominem: et ideo concludit humanam naturam et hominem esse assumptum. Secunda vero opinio, assumptioni praecintelligit unionem animae et corporis, secundum quod conjungitur ad constituendam humanitatem, non autem secundum quod uniuntur ad constituendum hominem: unde dicit humanam naturam esse assumptam, non autem hominero. Neutra tamen opinio dicit unionem animae et corporis praecedere tempore assumptionem, sed solo intellectu. Differt autem homo ab humanitate, quia homo dicit quid completum subsistens, non autem humanitas. Quantum vero ad unionem animae et corporis cum persona verbi, differunt hoc modo. Nam secunda opinio dicit, quod illae duae substantiae pertinent ad personalitatem verbi, ita quod post incarnationem verbi persona subsistit in his substantiis simul, et in substantia divina; quod prima opinio negat, dicens tantum per assumptionem hoc factum esse, ut persona verbi sit illa substantia composita ex anima et corpore. Circa tertium sciendum est, quod prima opinio ponit hominem assumptum. Item ponit in Christo duo supposita et duas hypostases. Item, quod Christus est duo neutraliter licet non masculine. Item, quod homo non supponit suppositum aeternum, sed temporale tantum: quorum contraria omnino ponit secunda opinio: scilicet quod homo non est assumptus, sed humana natura. Item, quod in Christo est unum tantum suppositum. Item, quod Christus est unus et unum. Item, quod hic homo supponit suppositum aeternum, subsistens in natura temporaliter. Tertia vero ponit

opinio, quod homo non praedicat de Christo aliquid compositum ex anima et corpore, sed ponitur materialiter pro partibus humanae naturae. Item, quod anima et corpus non pertinent ad personalitatem verbi; in quo convenit cum prima opinione. Item, quod in Christo est unum tantum suppositum; in quo convenit cum secunda.

QUAESTIO UNICA.

ARTICULUS I.

Hic quaeritur primo, utrum in Christo sit tantum una hypostasis vel suppositum; et videtur quod non. Sicut dicit Boetius in libro de Duabus naturis, « omnis substantia particularis, secundum proprietatem vocabuli, potest dici hypostasis, licet secundum usum dicatur solum de substantiis nobilioribus: » sed in Christo sunt duae substantiae particulares; ergo duae hypostases.

2. Praeterea, suppositum dicitur, quasi sub alio positum. Sed inconveniens est dicere, quod aliquid divinum ponatur sub creata natura: ergo oportet ponere aliquod suppositum non divinum. Est autem in Christo divinum suppositum: ergo duo.

3. Praeterea, res naturae, idem videtur quod naturale: sed naturale, ut dicitur in 2 Physic., est proprietas creata ex principiis naturae, vel compositum ex naturalibus principiis; sed neutrum istorum istorum convenit divinae personae: ergo divina persona non erit res humanae naturae; et sic sunt duae res naturae.

4. Praeterea, omne quod est, aut est universale, aut particulare: sed humana natura est in Christo: cum ergo non sit universalis, erit particularis: sed omne particulare est individuum; ergo sunt ibi duo individua.

5. Praeterea, Filius Dei assumpsit corpus animae unitum: corpus enim non unitum, cum non sit inanimatum, non est assumptibile: sed ex unione corporis et animae constituitur homo, cum unio praedicta non sit minoris efficaciae in Christo, quam in nobis: ergo assumpsit hominem: ergo aliquem hominem; ergo suppositum hominis. Cum ergo assumens non sit assumptum, in Christo erunt duo supposita.

6. Praeterea, in Psal. 64, dicitur: « Beatus quem elegisti et assumpsisti: » loquitur de Christo homine: ergo idem quod prius.

Ad hoc dicendum, quod particulare duplicem habet respectum: ad naturam communem, et ad proprietates consequentes naturam: et secundum hunc duplicem respectum, nomine primae vel secundae impositionis potest nominari. Res enim naturae, cum sit primae impositionis, nominat particulare per respectum ad naturam communem. Suppositum autem, cum sit nomine secundae impositionis, nominat habitudinem particularis ad naturam communem, prout subsistit in ea; particulare autem, prout exceditur ab ea. Nomina autem quae significant particulare per respectum ad proprietates consequentes naturam, nominant etiam ipsum per habitudinem ad naturam: et hoc potest esse dupliciter. Nomine primae impositionis, ut hypostasis nominat particulare in quolibet genere substantiae, persona autem in genere rationalis substantiae; nomine etiam secundae impositionis, sicut individuum nominat particulare, prout est in se indivisum; singulare, prout ab aliis est divisum. Secundo, ista nomina differunt:

quia aliqua nominant particulare in quolibet genere, ut particulare singulare individuum: aliqua in genere substantiae tantum, sicut persona, hypostasis, et res naturae et suppositum. Cum autem substantia dicatur a per se stando, nullum istorum dicitur nisi de re per se existente. Unde nec de parte nec de accidente dicuntur, de quibus alia possunt dici, quae in omnibus generibus inveniuntur. Quamvis enim haec albedo vel manus dicatur individuum vel singulare, non tamen potest dici hypostasis vel suppositum. Et ideo secundum secundam opinionem, quae ponit in Christo unam tantum rem subsistentem, quae etiam verior est, ut patebit, dicendum quod omnia nomina illa quae significant particulare in quolibet genere, possunt dici esse duae in Christo; sicut haec manus dicitur esse individuum vel singulare vel particulare. Haec tamen plura individua de Christo non praedicantur, sicut nec partes naturae, nec ipsa etiam natura humana. Non autem duas hypostases, vel res naturae, vel supposita dicimus esse in Christo, cum non ponuntur duo per se subsistentia in eodem. Nihilominus tamen, sicut dicimus unionem factam in persona, ita in individuo singulari et particulari: quia quamvis haec tria ultima possint dici de non per se subsistentibus, nihilominus tamen dicuntur de per se subsistentibus; et sic possumus dicere Christum unum individuum, non autem possumus dicere Christum esse plura individua: et similis est ratio de aliis, etiam quae significant particulare de quolibet genere.

Ad illud quod objicitur, quod omnis substantia particularis potest dici hypostasis, dicendum est, quod hoc intelligitur de substantia particulari, quae est in genere substantiae per praedicationem, non per reductionem; idest de eo quod perfecte participat naturam generis sicut ens completum in illo genere; quale non est pars substantiae. Non enim genus substantiae praedicatur de manu, quamvis substantia, secundum quod contra accidens dividitur, de ipsa praedicatur. Et secundum haec, duae substantiae particulares in Christo non sunt.

Ad secundum dicendum, quod in Christo sunt duo supposita locutionis quamvis non naturae. Suppositio enim de qua hic objicitur, importat inferioritatem, quod esset indignitatis, sed sustentationem.

Ad tertium dicendum, quod res naturae, per se loquendo, est quod habet naturam. Sed quod hoc sit compositum, accedit, in quantum compositum ex materia et forma, quae sunt principia naturae, non adjungitur alteri existenti simplici.

Ad quartum, humana natura est particulare et individuum, non tamen subsistens; et ideo non est hypostasis, vel suppositum.

Ad quintum dicendum, quod non est propter inefficaciam unionis animae et corporis, ut eorum conjunctio, secundum quod praecognoscitur unioni ad divinam personam, non faciat hominem, sed humanam naturam in Christo. sed est ex hoc, quod non fuerunt conjuncta ad hoc quod per se subsisterent, sed ut divina persona subsisterent in eis. Unde, quamvis iste terminus homo, in Christo ex ratione sui significati comprehendat duas substantias, scilicet animam et carnem, tertiam tamen comprehendit ex parte suppositi, scilicet divinam.

Ad illud autem quod objicitur de auctoritate Psalmistae, dicendum, quod homo sumitur ibi pro natura

humana. Nam cum id quod assumitur, secundum intellectum praecedat unionem; si homo dicatur assumptus, oportet quod intelligatur homo antequam intelligatur assumptus. Sed homo universalis non potest dici assumptus, ut supra dictum est. Homo autem particularis est quid subsistens, habens esse completum. Quod autem habet esse completum in quo subsistit, non potest uniri alteri nisi tribus modis: vel accidentaliter, sicut tunica homini: et hunc modum unionis ponit tertia opinio quae non tenetur nisi vel per modum aggregationis, sicut lapis lapidi in acervo. Vel aliquo accidente, sicut homo unitur Deo per amorem vel per gratiam: et neutra harum est unio simpliciter sed secundum quid: et ideo nulla istarum convenit Christo. Unde nullo modo concedendum est, quod homo sit assumptus.

ARTICULUS II.

Ad secundum sic proceditur. Et 1. videtur quod Christus non sit unum. Christus enim est unum unitate increata, et est unum unitate creata: unitas autem creata non est unitas increata; ergo Christus est duo.

2. Praeterea, unum est esse Filii Dei et Patris: si ergo est unum esse hujus hominis et Filii Dei, unum erit esse hujus hominis et Dei Patris: ergo iste homo erit in uno esse unitus Deo Patri. Hoc autem est impossibile: ergo impossibile est, quod hujus hominis et Filii sit unum esse, sed duplex: esse autem est suppositi: igitur in Christo erunt duo supposita, et sic Christus erit duo.

3. Praeterea, Christus est aliquid impassibile, et est aliquid passibile: sed passibile non est aliquid impassibile; ergo est aliquid et aliquid; ergo non est unum.

Contra. Quicquid est, ideo est, quia unum numero est; si ergo Christus non est unum, nihil est: quod est haeresis.

Praeterea, ea quae non sunt unum, non possunt de se univoce praedicari: sed Deus praedicatur de homine Christo, et e converso: ergo Christus est unum.

Ad hoc dicendum, quod neutrum genus est informe et indistinctum: masculinum autem est formatum et determinatum: unde masculinum genus non praedicatur absolute nisi de re perfecta subsistente. Unde non potest dici quod humanitas vel albedo Petri est aliquid, sed quod est aliquid: sed de Petro possumus dicere, quod est aliquid. Similiter etiam in Christo potest dici de persona, quod est aliquid, et quod est aliquid: de natura autem quod est aliquid, et non quod est aliquid. Secundum autem secundam opinionem, illud aliquid, quod est natura assumptum non praedicatur de Christo, quia non habet rationem hominis, sed humanitatis. Aliquid ergo, secundum quod praedicatur de Christo, non significat tantum naturam, sed naturae suppositum: et quia plurale est geminatum singulare, ideo Christus non potest dici aliqua, nisi essent in eo duo supposita naturarum: quod negat secunda opinio, et similiter tertia. Et ideo utraque opinio dicit quod Christus est unum; sed secunda dicit quod est unum per se; tertia vero quod est unum per accidens, sicut homo albus. Sed prima opinio dicit, quod assumptum non tantum habet rationem humanitatis, sed etiam hominis; et tamen non potest

diei aliquis, quia alteri digniori est conjunctum: sed dicitur aliquid, et illud aliquid prædicatur de persona assumente. Et ideo sequitur quod Christus est aliquid, scilicet assumens, et aliquid, scilicet assumptum; et quod duo neutraliter, et non masculine.

Ad illud ergo quod primo objicitur in contrarium, dicendum est, quod terminus numeralis se habet communiter ad personam: et naturam. Unde loquendo de unitate personali, est tantum una in Christo secundum quam dicitur unus Christus: Loquendo autem de unitate naturali, est duplex unitas. Non tamen sequitur quod sit unum et unum; quia unum quod de Christo prædicatur, non refertur ad naturam sed ad suppositum naturae, quod non geminatur.

Ad secundum dicendum est, quod esse dupliciter accipitur secundum Philosophum in *Metaphysicis*; scilicet esse rationis, unum de alio affirmantis vel negantis; et hoc est prædicatum accidentale, et est in mente quod prædicatur de subjecto mediante hoc verbo Est ut copula, non autem in re est, quia nihil est medium in re inter formam et materiam, et multo minus inter prædicatum et subjectum. Aliud est esse naturae; et hoc dicitur dupliciter. Nam esse aliquando dicit actum primum, qui est rei essentia, quae est actualiter essendi principium: et hoc modo dicitur quod definitio significat quid est esse. Aliquando dicit actum secundum, qui est actus entis per essentiam, sicut lucere est actus lucentis per ipsam lucem. Primo modo esse dicitur de propositionibus; secundo modo de naturis; tertio modo de naturarum suppositis, quia est actus suppositi ut quod est, formae vero ut quo est.

Primo modo non loquimur hic de esse. Secundo modo est in Christo duplex esse, idest duplex essentia; et sic non unitur humanitas in esse divino, quia sic uniretur Patri. Tertio modo est ibi unum esse; et hoc modo proprie nec partes nec accidentia habent esse, sed tantum suppositum completum, quod est secundum omnia illa: et hoc modo in esse suppositi divini unitur humanitas: quod quidem esse est unum, quamvis ad plura possit habere respectum, sicut esse unius hominis se extendit ad omnes partes ejus. Nec valet « unum est esse hominis et Patris; ergo hic homo est unitus Deo « Patri »: quia haec unio facta est in esse divino prout est in persona Filii sive sub proprietate filiationis, sub qua non est in Patre.

Ad tertium dicendum, quod media est falsa, quae dicit quod aliquid passibile non est aliquid impassibile. Idem enim suppositum quod est passibile secundum unam naturam, est impassibile secundum aliam.

ARTICULUS III.

Ad tertium sic proceditur. Et 1. videtur quod persona Christi post incarnationem non sit composita. Omne enim quod de simplici fit compositum mutatur: sed persona Christi non mutatur: ergo cum fuerit simplex, postea non est facta composita.

2. Praeterea, nullum aeternum est compositum: sed persona Christi est aeterna; ergo non est composita.

3. Praeterea, ad simplicitatem divinae essentiae pertinet quod non sit composita, nec alteri componibilis. Ad oppositum dicit Damascenus naturas

duas unitas invicem in unam compositam hypostasim Filii Dei.

Praeterea, Athanasius in Symbolo dicit: « Sicut « ex anima rationali et carne unus est homo, ita Deus « et homo unus est Christus: » sed anima rationalis, et caro sunt partes hominis; ergo Deus et homo sunt partes Christi.

Respondeo. Dicendum, quod ad rationem totius duo pertinent. Unum est, quod esse totius compositi pertineat etiam ad omnes partes ejus, quia partes non habent proprium esse, sed sunt sub esse totius. Aliud est quod partes componentes causant esse totius. Prima conditio totius invenitur in persona Christi, quia utraque natura in esse personae communicat: sed secunda conditio non reperitur. Illud enim esse non causatur ex conjunctione naturarum sicut esse compositi causatur ex conjunctione componentium: et ideo aliquo modo post incarnationem potest dici composita, in quantum salvatur ibi aliqua conditio compositi. Non tamen est ibi vera ratio compositionis, quia deficit altera conditio. Nec dicendum quod dicatur composita solum secundum nominis expositionem, quasi cum alio posita; quia sic prima opinio et tertia poneret personam compositam sicut et secunda, quod falsum est.

Ad primum ergo quod in contrarium objicitur, dicendum, quod verum est de compositione integrali non de exigitiva: illa enim potest fieri per associationem, et associatio fit mutatione unius extremi sine mutatione alterius: et sic natura humana est meliorata, divina remanente in transmutata.

Ad secundum dicendum, quod persona non dicitur composita, quasi esse suum sit ex multis constitutum: hoc enim est contra rationem aeterni: sed quia ad multa quae assumuntur in ejus esse se extendit.

Ad tertium dicendum, quod de ratione simplicitatis summae est quod neque sit composita ex partibus, neque componatur alteri tanquam pars. Sic autem persona non est composita, quia neque ex partibus constituta.

Ad quartum dicendum, quod Damascenus dicit compositam hypostasim, in quantum est aliquid ibi de ratione compositionis; non quod simpliciter sit composita quantum ad perfectam rationem compositionis.

Ad ultimum dicendum quod similitudo illa est quantum ad aliquid, et non quantum ad omnia.

ARTICULUS IV.

Ad quartum sic proceditur. Et 1. ostenditur quod non sit compositio animae et corporis ad invicem in Christo. Damascenus enim dicit: « In Domino Jesu Christo non est commune speciem « accipere: » sed ex anima et corpore unitis consurgit natura speciei: ergo videtur quod non fuerint unita ad invicem.

2. Praeterea, post ultimam compositionem non potest esse aliqua compositio: sed ultima compositio in natura est animae rationalis ad corpus; ergo si illa unio esset in Christo, non posset sequi unio ad divinam personam.

3. Praeterea, anima non unitur corpori nisi ut vivificet ipsum; sed potuit vivificari ex conjunctione ad ipsam vitam quae est verbum: ergo non oportuit eum animae uniri.

4. Praeterea, videtur quod natura humana accidentaliter Verbo uniatur. Ad Phil. 2: « Habitu inventus ut homo; » ergo cum habitus sit genus accidentis; videtur quod Deus fuerit homini accidentaliter unitus.

5. Praeterea, omne quod advenit esse completo est accidens: sed humana natura advenit Filio post esse completum; ergo advenit ei accidentaliter.

Juxta hoc quaeritur: an unio divinitatis ad carnem sit maxima unionum.

Respondeo. Dicendum, quod unio animae ad carnem constituit rationem hominis, et omnium ejus partium. Unde remota anima non dicitur homo neque oculus neque caro, nisi acquivoce sicut homo pictus; et ideo si tollatur unio animae Christi ad carnem, sequitur quod non sit verus homo, neque caro ejus vera caro: quod est haereticum. Et ideo opinio ista a Papa Alexandro pro haeretica est condemnata.

Ad illud vero quod objicitur in contrarium, dicendum quod Damascenus loquitur quantum ad unionem divinitatis ad humanam naturam, ex qua non consurgit tertia natura speciei; non quantum ad unionem animae ad corpus.

Ad secundum dicendum, quod compositio animae rationalis ad carnem est ultima in operibus naturae; sed compositio humanitatis ad personam Verbi non fit operatione naturae, sed virtute divina.

Ad tertium dicendum, quod verbum vivificat carnem Christi active; et ideo requiritur anima ut formaliter vivificet.

Ad quartum dicendum est, quod substantia non potest esse accidens alicujus, quamvis conjunctio unius substantiae ad alteram possit esse accidentaliter, ut sic una substantia alteri accidentaliter advenire dicatur. Sed hoc non potest esse nisi dupliciter: vel quod conjugatur ei secundum contactum sicut vestis homini; aut sicut mobile motori, sicut Angelus conjungitur corpori quod assumit. Et cum contactus non sit nisi corporum, humana natura non potest uniri divinae, nisi sicut mobile motori, sicut Angelus alicui corpori unitur. Haec autem unio non facit communicationem idiomatum naturarum ad invicem. Et ideo humana natura divinae non unitur accidentaliter. Et quod dicit Apostolus quod habitu inventus est ut homo, hoc dicit quia natura humana in Christo habet aliquam similitudinem cum accidente, et praecipue cum habitu, quantum ad tria. Primo, quia advenit personae divinae post esse completum, sicut habitus et omnia accidentalia. Secundo, quia est in se substantia, et advenit alicui sicut vestis homini. Tertio, quia melioratur ex unione ad Verbum, et non commutat Verbum; sicut vestis formatur secundum formam vestientis, et non mutat vestientem. Unde antiqui dixerunt, quod vergit in accidens; et quidam propter hoc addiderunt quod degenerat in accidens: quod tamen non ita proprie dicitur, quia natura humana in Christo non degenerat, imo magis nobilitatur.

Ad quintum dicendum, quod quamvis adveniat post esse completum, tamen non est accidentaliter adveniens, quia trahitur ad unionem in illo esse, sicut corpus advenit animae in resurrectione.

Ad illud quod ultimo quaerebatur, dicendum, quod unio ista potest dupliciter considerari: vel quantum ad id in quo fit unio, vel quantum ad ipsa quae uniuntur. Si primo modo unio (1) fiat in persona divina, quae est maxime unum et simplicis-

simum, sic est maxima unio post unionem essentiae in tribus personis. Quamvis enim persona sit ita simplex et unum sicut essentia, tamen quaelibet trium personarum est idem re cum ipsa essentia in qua unitur. Non autem utraque natura in Christo est idem secundum rem cum ipsa persona in qua fit unio; quia humana natura non est idem re cum persona divina, quamvis altera natura, scilicet divina, sit omnino idem re cum ipsa. Si secundo modo, sic non est maxima unio. Sed prima consideratio est unionis secundum se, et secundum quod unum est. Secunda autem consideratio est unionis non secundum quod unio. Et ideo dicendum est, quod est maxima simpliciter, quamvis non sit maxima secundum quid.

Expositio textus.

« Alii enim dicunt. » Haec opinio prima falsa est, sed non reprobata, ut erronea. « Utrumque « Christus. » Hic resolvendus est nominativus in genitivum, idest utriusque naturae: vel in ablativum, idest in utraque natura. Similiter, quod invenitur alia et aliud et alia quaecumque similia in incarnatione. « Factam compositam. » Sciendum quod non fuit composita proprie, scilicet conjunctio duorum ad constituendum aliquid; sed large, idest conjunctio duorum in uno. Hoc vero fieri potuit mutatione humanae naturae, sine mutatione divinae naturae. « Mulier essentialiter esset Deus. » Sciendum, quod quamvis manente ordine, qui nunc est, videatur inconveniens quod mulier esset caput viri, tamen si Deus id faceret, conveniens esset.

DISTINCTIO VII.

Secundum vero primam. etc. (V. edit. nostrae, tom. VII, pag. 89.)

QUAESTIO UNICA.

Postquam Magister determinavit opiniones de modo unionis, in hac parte determinat qualiter propositiones, quibus unio significatur, sint intelligendae; et dividitur in partes quatuor. In prima exponit eas secundum primam opinionem. In secunda vero secundum secundam, ibi, « In secunda enim sententia. » In tertia secundum tertiam, ibi, « In hac vero sententia. » In quarta relinquit auctori judicium de praedictis, ibi, « Satis diligenter. » Prima dividitur in duas. In prima ponit primae opinionis expositionem. In secunda movet, et solvit contrariam objectionem. « Huic autem sententiae etc. » « In secunda vero « sententia. » Et dividitur in duas. Primo secundum secundam opinionem exponit propositiones praedictas. In secunda solvit ea quae videntur huic sententiae adversari: « Determinat autem etc. » Prima in duas: quia primo exponit illas in quibus fit praedicatio mediante hoc participio, Factus, et hoc verbo, Est. In secunda, mediante hoc participio, Praedestinatus. « Determinat autem etc. » Haec dividitur in tres. Primo solvit auctoritates, quae videntur probare, quod homo sit assumptus. Secundo illas quae videntur probare, quod Christus sit duo. « Sed iis videtur adversari. » Tertio illas, quae probant, quod persona non sit composita: « In hac « sententia etc. » Haec dividitur in duas. Primo praedictas exponit propositiones secundum tertiam

(1) *Lege cum unio.*

sententiam. Secundo dubitationes incidentes contra ipsam determinata: « Secundum istas etc. » Haec dividitur in tres. In prima ostendit qualiter Christus dicatur praedestinatus. Secundo qualiter dicitur minor Patre, vel deificatus. « Et tamen, cum dicitur Christus ». In illa, quod non debet dici homo divinus, et qualiter dicitur esse ex duabus naturis: « Et licet dicatur etc. »

ARTICULUS I.

Ille primo proceditur. Et 1. videtur quod haec sit falsa: Deus est homo. Omne enim quod praedicatur, aut praedicatur per se, aut per accidens: sed homo non praedicatur de Deo per se, quia sic conveniret cum supposito divinae naturae: nec iterum praedicatur per accidens, quia Deo nihil accidit; ergo homo nullo modo praedicatur de Deo.

2. Praeterea, major est unio personarum in natura una, quam duarum naturarum in persona una: sed una persona non praedicatur de alia; ergo nec homo praedicatur de Deo, nec e converso.

3. Praeterea, magis conveniunt quae uniantur in natura et persona, quam quae tantum in persona: sed anima et corpus uniantur in natura et persona una, Deus autem et homo in persona, et non in natura. Cum igitur anima non possit praedicari de corpore, nec e converso; videtur quod Deus non possit praedicari de homine, nec e converso.

Contra. Secundum Anselmum, ut esset qui posset genus humanum redimere, et pro genere humano satisfacere, oportuit eundem esse Deum et hominem: ergo praedicatio Dei de homine, et e converso, est praedicatio ejusdem de se ipso: ergo est vera.

Praeterea, quaecumque uni et eidem sunt eadem, sibi invicem sunt eadem: sed Christus est Deus, et ipsemet est homo: ergo Deus est homo, et e converso.

Ad hoc dicendum est, quod secundum omnes opiniones, ista propositio ponitur esse vera; sed differenter. Tertia enim opinio dicit, quod in hac propositione est praedicatio per inhaerentiam, sicut cum dicitur, Homo est albus: quia ponit quod natura humana accidentaliter divinae personae advenit. Sed hoc stare non potest; quia ponit ex anima et corpore unum non resultare, sed animam et corpus, ut separata, a Verbo assumpta, et non unita; et ideo non potest dici quod Deus sit homo, nisi materialiter; quia partes humanae naturae unitas habuit, sicut et totum integrale materialiter de suis partibus praedicatur. Secundo, quia dato quod ex partibus humanae naturae aliquid resultaverit, non tamen illud potest praedicari de Deo, nisi denominative; quia ponit quod humana natura Deo advenerit quasi habitus: quia sicut homo non potest dici vestis, sed vestitus, ita similiter homo non potest praedicari de Deo; imo, potius Deus diceretur humanatus. Secundum autem primam opinionem, cum dicitur, Homo est Deus, vel e converso, est haec praedicatio per identitatem. Sed quia ponit duo per se subsistentia, sive supposita, in Christo; ideo non potest Deus de homine, vel homo de Deo praedicari. Nec potest dici, quod sunt idem in persona; quia persona illa invenitur habere identitatem cum supposito divino: et ideo oportet quod sit distincta a supposito humano, a quo suppositum divinum distinctum est, ut prima opinio dicit. Non est autem intelligibile quod aliqua adinvicem numerentur,

et unum de altero praedicetur; quia differentia est causa numeri, identitas autem causa verae praedicationis; et ideo prima opinio irrationalis est. Secundum autem secundam opinionem, in praedicta propositione est praedicatio per informationem essentialem, quia Deus supponit suppositum personae Filii, et hoc idem est suppositum humanae naturae per illam naturam informatum, secundum modum intelligendi, inquantum subsistit in ea. Unde sicut haec est vera et propria, Petrus est homo; ita et ista: Deus est homo: quia scilicet suppositum divinae naturae, est etiam humanae naturae suppositum.

Ad primum ergo quod in contrarium objicitur dicendum, quod haec est per se vera, Deus est homo, ratione suppositi divini, quod subsistit in humana natura. Unde sicut et homo per se de Socrate praedicatur, ita et homo de Christo; non autem ratione formae significatae per hoc quod dico, Deus. Unde non sequitur quod possit praedicari de omnibus, in quibus est natura divina; sed de quibus praedicatur Filii suppositum. Nec tamen potest dici, quod hoc sit per accidens, Deus est homo, sicut, Homo est albus; quia iste terminus, Homo, praedicatur de Deo tamquam includens in suo significato suppositum divinum, quod est suppositum hominis: sed hoc quod dico, Album, non includit in suo significato suppositum hominis, cum tantum qualitatem significet; sed tantum quasi extrinsecum ipsum copulat.

Ad secundum dicendum est, quod personae divinae secundum quod sunt unum, de se invicem praedicantur. Unde dicimus quod natura Patris est natura Filii, non tamen secundum quod sunt distinctae in persona; ideo nomina personalia de se invicem non praedicantur. Similiter ex hoc, quod naturae sunt diversae, per eadem nomina quae significant vel supponunt personam, praedicantur de se invicem: non autem illa nomina quae significant naturas tantum.

Ad tertium dicendum, quod sicut anima et corpus non praedicantur de se invicem, sed tamen habens animam est habens corpus: sic natura divina et humana non praedicantur de se invicem, sed homo et Deus, qui non tantum naturam, sed idem suppositum naturae designant.

ARTICULUS II.

Ad secundum sic proceditur. Et 1. videtur, quod haec sit falsa, Deus factus est homo. Quod enim fit aliquid, subjectum est passionis: sed Deus nullius passionis est subjectum, cum sit impassibilis; ergo non potest esse factus aliquid.

2. Praeterea, cum fieri hominem, sit fieri substantiam, et fieri substantiam sit fieri simpliciter; ergo quod fit homo, fit simpliciter: sed Deus non potest dici simpliciter factus; ergo nec factus homo.

3. Praeterea, mutari est aliud fieri: sed Deus nullo modo potest dici mutatus; ergo nec factus potest dici. Ad oppositum Joan. 1: « Verbum caro factum est. »

4. Praeterea, omne quod est, et non fuit prius, dicitur esse factum: sed haec est vera, Deus est homo, ut supradictum est, et non fuit semper vera; ergo Deus factus est homo.

Ad hoc dicendum, quod hoc participium, Factus, potest absolute praedicari et subjectum determinare,

ut dicatur, Iste homo factus, vel Deus factus: et cum utrumque supponat divinum suppositum, cui non potest contingere factio, ideo ista propositio, Deus factus est homo, isto modo est falsa. Si autem determinet subjectum in comparatione ad praedicatum, tunc ista propositio est vera; et tunc est sensus: Factum est quod Deus sit homo: quia factio non ponitur circa Deum secundum rem, sed tantum secundum rationem; quia unio secundum quam dicitur Deus esse vel factus homo, in Deo est secundum rationem, in natura autem humana secundum rem. Sed veritas hujus propositionis magis patebit infra.

Ad illud quod objicitur in contrarium, dicendum, quod hoc intelligitur de factione quae ponitur circa ipsum secundum rem, non secundum intellectum.

Ad secundum dicendum, quod quamvis fieri hominem, sit fieri secundum substantiam, tamen in Christo habet similitudinem aliquam cum fieri accidentis in hoc quod advenit supposito alterius naturae; et ideo non dat ipsi esse simpliciter et absolute, sed esse tale, sicut album homini. Tunc autem fieri secundum substantiam dat esse simpliciter et absolute, quando dat esse suppositi, quod est esse simpliciter et absolute.

Ad tertium dicendum, quod mutari proprie dicitur per remotionem a termino a quo; fieri autem per accessum ad terminum ad quem. Quia igitur nihil remotum est a Deo, nec secundum rem, nec secundum rationem: aliquid autem advenit ei secundum rationem, etsi non secundum rem; ideo potest dici fieri, sed non mutari.

ARTICULUS III.

Ad tertium sic proceditur. Et 1. videtur, quod haec sit falsa, scilicet, Homo factus est Deus: quia secundum Damascenum, Homo et Deus communicant sibi idiomata; ut scilicet quicquid dicitur de homine, possit dici de Filio Dei. Sed haec est falsa, Filius Dei est factus Deus; ergo et haec, Homo est factus Deus.

2. Praeterea, aut homo supponit pro natura, aut pro persona. Sed non pro natura: quia natura assumpta non est Deus: non pro persona, quia assumens semper fuit Deus; ergo haec est falsa, Homo factus est Deus.

3. Praeterea, quia album advenit homini et non e converso, dicitur homo fieri albus et non e converso; ergo a simili, quia humanitas advenit Deo, et non e converso, debet dici Deus fieri homo, non homo Deus.

Contra. Augustinus: « Talis fuit illa susceptio, quae Deum faceret hominem, et hominem Deum. »

Praeterea, factio quae importatur per hoc participium Factus, secundum rem non ponitur in Deo, sed in humana natura; sed homo significat humanam naturam. Cum enim participium ponat essentiam suam circa subjectum in comparatione ad praedicatum, videtur quod magis haec sit vera, Homo factus est Deus, quam haec, Deus factus est homo.

Ad hoc dicendum est, quod si factio importata per participium referatur sive ad subjectum, sive ad praedicatum absolute, sive ad subjectum in relatione ad praedicatum, cum dicitur, Deus factus est homo, est falsa: quia iste terminus homo supponit suppositum divinum, quod absolute non potest

dici factum, nec factus Deus, quia nunquam non fuit Deus. Si autem referatur ad compositionem, utraque istarum est vera, Deus factus est homo, et Homo factus est Deus; et est sensus: Factum est ut Deus sit homo et e converso.

Ad illud ergo quod objicitur in contrarium, dicendum est, quod verbum Damasceni intelligendum est de illis quae conveniunt naturae secundum se, et non habent repugnantiam ad alteram naturam. Quod autem dicitur, Deus homo factus, Deus non convenit naturae secundum se, sed ratione unionis. Unde non sequitur, Homo factus est Deus; ergo Filius Dei factus est Deus; sicut non sequitur, Homo unitus est Deo; ergo Deus unitus Deo.

Ad secundum dicendum, quod homo tenetur pro persona, quam non determinat participium, sed totam locutionem; quia factum est ut persona divina in humanitate existens esset Deus.

Ad tertium dicendum, quod non dicitur homo factus Deus, quia factio sit determinativa suppositi hominis absolute vel in respectu ad praedicatum, sicut jam dictum est, et sic procedit argumentum; sed in quantum est determinativa compositionis.

Sed quia ista propositio, Homo factus est Deus, secundum omnes sensus habet falsitatem, tantum secundum unum sensum veritatem; ideo respondendum est ad argumenta, quae probant eam esse veram. Unde quod dicit Augustinus quod talis fuit susceptio etc. illud intelligendum est, ut referatur factio ad totum compositum tantum.

Ad quintum dicendum, quod factio ponitur secundum rem circa humanam naturam; sed hoc nomen, homo, non supponit humanam naturam, sed suppositum aeternum, circa quod non ponitur factio secundum rem, sed secundum rationem; non respectu divinae naturae quae semper ei inluit, sed respectu humanae. Et ideo dicitur, Deus factus est homo, et non convertitur.

ARTICULUS IV.

Ad quartum sic proceditur. Et 1. videtur, quod haec sit falsa: Ille homo est praedestinatus esse Filius Dei. Praedestinatio est rei futurae. Filius Dei non est res futura, imo aeterna; ergo aliquis non potest praedestinari esse Filius Dei.

2. Praeterea, praedestinatio praecedit finem respectu ejus: sed Filium Dei nihil praecedit; ergo nihil potest praedestinari ad hoc, quod sit Filius Dei.

3. Praeterea, videtur quod haec sit falsa: Filius Dei praedestinatus est esse homo. Ad hoc enim dicitur aliquid praedestinari, quod convenit ei per gratiam: sed non est gratia Filio Dei quod sit homo; ergo Filius Dei non est praedestinatus esse homo.

4. Praeterea, videtur quod haec sit vera: Filius Dei est praedestinatus esse Filius Dei. Filius enim Dei, in quantum est homo, est praedestinatus esse Filius Dei: sed alia quae praedicantur de Filio Dei, praedicantur de ipso etiam sine reduplicatione, sicut, Filius Dei est mortuus; ergo filius Dei praedestinatus esse Filius Dei.

5. Praeterea, videtur quod haec sit vera, Filius Dei est praedestinatus. In Christo enim non est nisi unum suppositum: sed de illo supposito potest dici simpliciter, quod est praedestinatum; ergo potest dici quod Filius Dei est praedestinatus.

Respondeo. Dicendum, quod cum dicitur, Homo

praedestinatus est esse Filius Dei, per participium ratione praepositionis importatur antecessio. Aut ergo respectu subjecti solum, aut respectu praedicati, aut respectu totius copulati. Si respectu subjecti solum, vera est, quia hic terminus, homo, dicit suppositum aeternum in natura humana: et licet respectu ejus simpliciter nulla possit esse antecessio, tamen respectu ejus, ut est in natura humana, potest. Si vero respectu praedicati, falsa est propositio: quia respectu filii Dei nulla potest esse antecessio. Si respectu copulati, vera est: quia praedestinatum erat ut homo esset filius Dei. Cum ergo duos habeat sensus veros et unum falsum, potius judicanda est esse vera.

Ad quod objicitur quod Filius Dei non est res futura, et quod praedestinatio non praecedit finem hunc, scilicet qui est esse filium Dei, dicendum quod argumenta concludunt propositionem esse falsam, prout antecessio denotatur respectu praedicati; quod concedendum est. Unde patet responsio etiam ad secundum.

Ad tertium dicendum quod haec propositio, Filius Dei est praedestinatus esse homo, distinguenda est ut praecedens: quia potest notari antecessio respectu subjecti vel respectu praedicati vel respectu totius copulati. In primo sensu est falsa, in duobus reliquis est vera: et ideo potius judicanda est vera quam falsa. Et quod objicitur quod non est gratia Filio Dei quod sit homo, tamen est homo per gratiam unionis, per quam humana natura est assumpta in unitatem divinae personae.

Ad quartum dicendum, quod haec propositio Filius Dei est praedestinatus esse Filius Dei, secundum quod esse accipitur secundum rei veritatem, falsa est; quia nihil est; in propositione hac temporale, respectu cuius possit notari antecessio. Sed secundum quod accipitur secundum manifestationem, sic conceditur. Et quod objicitur quod Filius Dei, in quantum est homo, est praedestinatus esse Filius Dei, dicendum quod hoc intelligitur de attributis quae non claudunt in se repugnantiam et contradictionem ad esse filii. Nam talia non praedicantur de ipso nisi cum reduplicatione determinante, per quam notatur attributum inesse naturae non personae; ut: Filius Dei, in quantum homo, incipit esse vel est creatura et alia hujusmodi.

Ad quintum dicendum, quod haec est falsa, Filius Dei est praedestinatus, cum non ponatur aliquid respectu cuius possit antecessio denotari: sed haec: Filius Dei, in quantum est homo, est praedestinatus, est vera: quia importari potest antecessio respectu hominis quantum ad naturam humanam. Et quod objicitur de supposito, dicendum quod quamvis sit unum suppositum, tamen est duarum naturarum suppositum: et potest sibi aliquid convenire ratione unius naturae, quod non convenit sibi absolute, sicut esse creaturam.

Expositio textus.

• Id quod prius erat, cap. 1, et habens naturam • quam prius non habebat. Utrumque Christus. • Ille resolvendus est nominativus in ablativum vel genitivum: utrumque, id est utriusque naturae vel utraque natura.

DISTINCTIO VIII.

Post praedicta inquiri debet etc. (V. edit. nostrae tom. VII, pag. 98.)

QUAESTIO UNICA.

Postquam determinavit Magister de iis quae conveniunt Deo incarnato ut exprimentia unionem, hic determinat de eis quae conveniunt ei consequentia unionem; et dividitur in partes duas. In prima determinavit de iis quae conveniunt uni naturae ex unione ad alteram. In secunda determinat de iis quae conveniunt personae ratione assumptae (1) 10 Distinct. Prima in duas. In prima determinat quid conveniat divinae naturae ex unione ad humanam. In secunda, quid conveniat humanae ex unione ad divinam, 9 distinct. ibi, • Praeterea in-
• vestigari. • Prima in duas. In prima inquit utrum divina natura debeat dici nata in Christo ex unione ad humanam. Secundo an ratione duplicitatis naturae possit dici Christus bis natus, ibi, • Quaeri etiam solet. • In prima parte movet et solvit an natura in Christo possit dici nata ex unione ad humanam. Secundo opponit in contrarium et solvit ad objectionem. • Videtur tamen. •

ARTICULUS I.

Hic primo quaeritur utrum divina natura in Christo sit nata: et videtur quod sic. Quicquid enim idem est cum nascente et de ipso in recto praedicatur, cum eo nascitur: unde nato Petro nascitur homo. Cum ergo essentia divina idem sit cum filio Dei, et de eo in recto praedicetur, ipso nato de Virgine ipsa nascetur.

2. Praeterea, incarnatio in Christo ordinata fuit ad nativitatem; ergo quod incarnatum est: sed natura divina incarnata est; ergo nata.

5. Praeterea, videtur quod natura humana possit dici nata. Natura enim humana, quamvis generet hunc hominem, intendit generare hominem simpliciter: sed illud quod est per se et principaliter intentum a natura generante, vere dicitur nasci; ergo homo simpliciter nascitur. Sed homo naturam significat humanam; ergo ipsa vere generatur et nascitur.

4. Praeterea, humana natura Christi producta est de Virgine. Aut ergo per creationem de nulla substantia, aut per factionem de aliena substantia, aut per generationem de substantia sua: patet autem quod nec per creationem nec per factionem; ergo per generationem; ergo est genita.

Ad hoc dicendum, quod nasci fieri quoddam est. Quod autem fit, ad hoc fit, ut sit. Unde secundum quod alicui convenit esse, ita convenit sibi fieri. Esse autem et fieri proprie subsistentis est. Unde ipsum proprie dicitur nasci et fieri. Forma autem et natura dicitur esse ex consequenti. Non enim subsistit; sed in quantum in ea subsistit, suppositum dicitur esse. Unde ex consequenti convenit eis fieri vel nasci; non quia ista nascuntur, sed quia per generationem accipiuntur. Unde cum natura divina non sit accepta per generationem humanam, natura autem humana sit per eam accepta, natura divina non poterit dici nata, nisi pro persona accipiatur. Natura autem humana non per se, sed quia consequenter ad generationem se habet, dicitur nata.

(1) *Supple naturae.*

Ad primum ergo quod objicitur in contrarium, dicendum, quod quamvis hoc in humanis sit verum, eo quod omne tale cum ipso producit, non tamen in divinis, nisi quantum essentia cum persona est idem re, non tamen cum productione personae producit, quia est inter ea differentia in modo significandi, qui facit quod aliquid de natura dicatur, quod de persona dici non potest.

Ad secundum dicendum, quod illud quod incarnatur assumendo carnem ad se et in se, dicitur nasci, sicut persona. Sic autem non incarnatur natura, ut ex dictis patet. Unde ratio non sequitur.

Ad tertium dicendum, quod homo non significat tantum naturam humanam, prout hic loquimur secundum quod significatur hoc nomine humanitas, sed compositum sive subsistens in natura; et ideo non sequitur ratio.

Ad quartum dicendum est, quod quamvis per generationem producat humana natura, non tamen proprie generatur; quia illud proprie dicitur generari ad quod actus generationis terminatur. Hoc autem est suppositum.

ARTICULUS II.

Ad secundum sic proceditur. Et 1. videtur, quod Christi non sint duae nativitates. Nasci enim non est proprie naturae: sed personae. In Christo autem est tantum una persona; ergo una nativitas.

2. Praeterea, generatio vel nativitas est una ad esse: sed in Christo est tantum unum esse; ergo una nativitas.

3. Praeterea, ea quae non sunt unius rationis, non connumerantur adinvicem, sicut lattabile et caeleste non dicuntur duo canes: sed nativitas Christi corporalis et aeterna non sunt unius rationis; ergo non sunt duae nativitates.

Sed contra. Secundum nativitatem aeternam Christus accepit naturam divinam, secundum autem temporalem humanam; ergo sicut sunt duae naturae in Christo, ita duae nativitates.

Praeterea, secundum aliquam nativitatem Christus dicitur filius matris, secundum autem illam non est filius patris; ergo in Christo sunt duae nativitates.

Respondeo. Dicendum est quod illud propter dicitur nasci, quod egreditur a generante conjunctum ei, sicut embrius conjungitur matri et fructus arbori, unde nasci proprie dicitur generatio viventium. Vivere autem competit Christo et secundum naturam divinam, et secundum humanam, et ideo proprie utraque competit Christo secundum nasci. Et ideo sicut ponimus in Christo duas processiones, scilicet temporalem et aeternam, ita duas nativitates.

Ad primum ergo dicendum, quod quamvis nasci sit personae, tamen est ejus naturae ratione, et ideo secundum duas naturas sunt duae nativitates.

Ad secundum dicendum est, quod esse Christi quamvis sit unum, tamen habet respectum ad duas naturas, et hic duplex respectus duplici nativitate acquiritur.

Ad tertium dicendum, quod nativitatis temporalis et aeternae est una ratio secundum analogiam, non autem secundum univocationem, sicut etiam et naturae divinae et humanae.

ARTICULUS III.

Ad tertium sic proceditur. Et 1. videtur, quod Christus non possit dici bis natus. Nihil enim dicitur nasci ex hoc, quod advenit ei aliquid post esse completum, sicut si capillus homini adveniat; sed natura humana advenit filio Dei post esse completum; ergo ratione ejus non potest dici bis natus.

2. Praeterea, hoc adverbium, bis, importat actuum successionem: sed non succedit aeternae temporalis, cum aeterna sit semper; ergo ratione duarum nativitatum non potest dici bis natus.

3. Praeterea, ubi non est interruptio, non utimur hoc adverbio, bis: sed generatio aeterna non interruptitur; ergo ratione ejus non potest dici Christus bis natus.

Sed contra. Bis, importat actuum numerum, cum sit adverbium numerandi: sed duplex est Christi nativitas; ergo secundum eas debet dici bis natus.

Praeterea, plus distat processio temporalis ab aeterna, quam temporalis a temporali: sed ratione processionum temporalium Spiritus sanctus dicitur Apostolis bis datus a Gregorio; ergo ratione duarum nativitatum, temporalis et aeternae, debet dici Christus bis natus.

Respondeo. Dicendum, quod bis importat numerum actus; non secundum quod actus numeratur ex subjecto, quia duobus currentibus non dicitur quod bis curratur; neque etiam secundum quod actus numeratur ex terminis; quia si aliquid moveatur simul secundum alterationem et augmentum, non dicitur quod bis moveatur; sed importat numerum actuum, secundum quod actus numeratur propter diversam mensuram. Quod quidem contingit dupliciter. Uno modo quando sunt duae naturae ejusdem generis, sicut duo tempora; quod non contingit nisi per interruptionem; et propter hoc adverbium bis, importat actus interruptionem cum dicitur, bis curratur. Alio modo quando duae mensurae non sunt ejusdem generis, sicut aeternitas et tempus: et hoc modo dicitur Christus bis natus, quia una ejus nativitas mensuratur aeternitate, alia vero tempore.

Ad primum ergo dicendum, quod quamvis natura humana adveniat Filio Dei post esse completum, tamen non advenit ei accidentaliter, ut capillus homini, sed substantialiter; et ideo non est simile.

Ad secundum et tertium dicendum, quod rationes illae procedunt, quando hoc adverbium, bis, designat diversas mensuras ejusdem generis: et hoc non est in proposito.

ARTICULUS IV.

Ad quartum sic proceditur. Et 1. videtur, quod in Christo sint duae filiationes. Multiplicata enim causa multiplicatur effectus: sed filiatio est effectus nativitatis; ergo ea multiplicata, multiplicatur. Sed in Christo sunt duae nativitates; ergo duae filiationes.

2. Praeterea, relativa posita se ponunt et perempta se perimunt; ergo interempta maternitate interimitur filiatio qua Christus est filius matris, sed non interimitur illa qua est filius patris; ergo haec non est illa; ergo sunt duae.

3. Praeterea, si Pater fuisset natus de Virgine, fuisset filius Virginis: sed tamen non aeterna filiatione; ergo Christus similiter.

Contra. Omne accidens aliquod habet subjectum immediate et id denominat, ut albedo superficiem. Sed filiatio temporalis non denominat naturam, sed personam. In persona vero non potest esse aliquod accidens temporale secundum rem; ergo filiatio temporalis nihil ponit in Christo secundum rem.

Praeterea, filiatio est proprietas personalis, sed persona tantum una est in Christo; ergo et filiatio.

Ad hoc dicendum, quod quidam propter duas natiuitates et naturas existentes, dicunt in Christo duplicem esse filiationem: quia ponunt filiationem personam respicere mediante natura, et eam advenire ratione generationis. Sed contra eos est, quia filiatio consequitur generationem ut determinativa suppositi non natura media, quia sic eam denominaret, sicut apparet in aliis accidentibus quae conveniunt toti ratione partis, quia per partem determinant totum, sicut crispitudo. Filiatio autem nec determinat, nec denominat naturam. Unde non potest dici natura filia; et ideo non potest per eam determinare suppositum vel denominare. Sciendum est igitur, secundum alios, quod cum filiatio sit relatio, et nulla relatio temporalis possit Deo convenire secundum rem, in Christo autem non sit nisi divinum suppositum, secundum communiorum opinionem; filiatio quae erit temporalis relatio non poterit in eo poni realiter; et ideo non possunt esse in Christo duae reales filiationes, una temporalis et alia aeterna. Nihilominus tamen dicitur ex tempore filius Virginis realiter, sicut realiter dicitur Dominus ex eo, quod realiter creatura refertur ad ipsum. Unde concedendum est, quod in Christo est una filiatio realis qua refertur ad patrem, et respectus quidam rationis quo refertur ad matrem, secundum quem realiter dicitur filius, quia mater realiter refertur ad ipsum.

Ad primum ergo quod objicitur in contrarium, dicendum, quod natiuitas non solum numeratur ex parte ejus quod nascitur, sed ex parte modi nascendi, quia dicitur actum nascendi. Unde quamvis idem sit quod nascitur ex utero et in utero, tamen dicitur duplex natiuitas. Quia ergo in Christo quamvis sit unus actus, tamen duplex est modus et duplex actus nascendi; ideo recte dicitur in Christo duplex natiuitas, non autem duplex filiatio. Vel dicendum, quod natiuitas non est tota causa filiationis, sed natiuitas cum esse completo nascentis, quod est hoc unitum.

Ad secundum dicendum, quod maternitas ponit alium respectum in Christo, sicut jam dictum est, et illa remota removet illum respectum, sed non oportet, quod ponat aliam filiationem realem, quia ejus non est susceptivum suppositum divinum.

Ad tertium dicendum, quod si Pater carnem assumpsisset de Virgine, esset filius Virginis; non quidem per aliquam realem filiationem ejus suppositum aeternum esset subjectum, sed per respectum rationis tantum.

Expositio textus.

« Hoc est enim nasci de Virgine, scilicet hominem assumere ». Verum est si assumere dicatur ad se sumere et in se; quod personae convenit, non naturae, ut ex supradictis patet.

DISTINCTIO IX.

Praeterea investigari oportet etc. (V. edit. nostrae tom. VII, pag. 103.)

QUAESTIO I.

Postquam determinavit Magister quid conveniat divinae naturae ex unione ad humanam, hic determinat quid conveniat humanae naturae ex unione ad divinam; et dividitur in duas. In prima quaerit an humana natura in Christo sit latria adoranda. In secunda determinat veritatem, ibi, « Ideo quibusdam etc. » Et haec dividitur in duas, secundum quod duas ponit opiniones. Secunda incipit ibi, « Aliis placet. » Et haec in tres. In prima ponit solutionem. In secunda respondet ad objectionem factam in contrarium, ibi, « Nec contra hoc facit. » In tertia solutionem confirmat, ibi, « De hoc Hieronymus ita ait. »

Hic est duplex quaestio. Prima de latria. Secunda de dulia.

ARTICULUS I.

Primo itaque videtur, quod latria non sit specialis virtus. Omnis enim virtus in libera voluntate consistit: sed hoc non competit latriae, cum sit servitus quaedam, ut in litera dicitur; ergo latria non est virtus.

2. Praeterea, latria est servitus Deo debita. Sed per omne opus virtutis Deo servitur; ergo omne opus virtutis ad latriam pertinet, et sic latria non est specialis virtus.

3. Praeterea, omnis virtus specialis aut est theologica, aut cardinalis: sed latria non est virtus theologica, cum habeat actum exteriorem, scilicet sacrificium offerre; theologiarum autem virtutum actus sunt interiores, ut credere, sperare et diligere. Nec iterum est cardinalis, cum habeat Deum pro objecto. Latria enim Deus colitur; ergo latria non est specialis virtus.

Sed contra est, quod Tullius in rhetoricis ponit religionem speciem justitiae, religio autem idem est quod latria, ut patet ex definitione quam ponit. « Religio est quae cuidam naturae, quam divinam vocant cultum caeremoniamque affert »; ergo latria est specialis virtus.

Praeterea, speciali vitio specialis virtus opponitur: sed idolatria est speciale vitium cui opponitur latria; ergo latria est specialis virtus.

Respondeo. Dicendum, quod ubi est specialis ratio objecti in actibus humanis laudabilibus, ibi necesse est ponere specialem virtutem. Deo autem prae omnibus est serviendum. Unde obsequium, quod Deo debetur, habet specialem rationem objecti inter actus laudabiles; et ideo latria quae debitum obsequium Deo reddit, est specialis virtus.

Ad primum ergo dicendum, quod servitium quo Deo servimus non excludit libertatem, quia aliquis per seipsum agit sine coactione, quae libertas ad virtutem requiritur, sed excludit libertatem qua aliquis per seipsum agit, quae verae virtuti opponitur. Nam actus verae virtutis in Deum ordinantur.

Ad secundum dicendum, quod aliqua virtus dicitur generalis dupliciter. Uno modo simpliciter: vel quia est genus omnium virtutum, ut justitia generalis; vel quia est causa quodammodo aliarum virtutum, sicut prudentia virtutum moralium. Alio

modo dicitur aliqua virtus generalis secundum quid, in quantum scilicet utitur actibus aliarum virtutum materialiter circumponens rationem proprii et specialis objecti: et sic latria potest dici generalis virtus, quia actus ceterarum virtutum assumit quasi quoddam obsequium Deo debitum: et sic simpliciter est specialis virtus ratione objecti, generalis autem secundum quid.

Ad tertium dicendum, quod latria non est virtus theologica, quamvis virtutes theologicas praesupponat. Reducitur autem ad unam cardinalium, scilicet ad iustitiam, cuius est reddere debitum. Nec Deus est objectum huiusmodi virtutum, sed id quod Deo redditur, quod est quid creatum. Deus autem cui redditur est finis.

ARTICULUS II.

Ad secundum sic proceditur. Et 1. videtur, quod humana natura non sit adoranda adoratione latriae in Christo. Glossa, super illud Psalm. 98: « Adorate scabellum pedum ejus etc. », dicit quod caro Christi non est adoranda adoratione latriae quae Deo debetur.

2. Praeterea, Augustinus de Civitate Dei: « Cum in forma Dei sacrificium sumat, in forma servi sacrificium maluit esse quam sumere »; ergo in forma servi non licet ei sacrificium exhibere; ergo nec ipsum latria adorare ad quam pertinet exhibitio sacrificii.

3. Item, cui convenit adorare non convenit adorari. Christo homini convenit adorare. Joan. 4: « Nos adoramus quod scimus etc. »; ergo ei non convenit adorari.

Contra. Omne rationale aut servire alicui debet, aut ei serviendum est. Humana natura in Christo nulli debet servire, quia non est serva, ut ait Damascenus; ergo ei serviendum est; ergo latria quae est servitus adoranda est.

Praeterea, secundum Athanasium, « Sicut anima rationalis et caro unus est homo, ita Deus et homo unus est Christus: » sed una est veneratio animae et carnis; ergo Dei et hominis.

Ad hoc dicendum est quod dupliciter aliquid honoratur. Uno modo propter seipsum: et sic solum honoratur suppositum rationalis naturae cuius est agere actus virtutis, cui debetur honor. Alio modo honoratur aliquid propter id cuius est, sicut manus regis vel vestis eius honoratur uno et eodem honore quo rex honoratur. Sed secundum secundam opinionem in Christo non est aliquod suppositum creatum. Natura vero humana quae est creata, non est suppositum, sed suppositi aeterni in ea subsistentis; unde magis est adoranda secundo modo quam primo, scilicet honore uno cum verbo; et sic latria adoratur. Secundum vero primam opinionem, quae ponit suppositum creatum in Christo, magis adoranda est humanitas Christi primo modo scilicet separatim, quam secundo et per seipsam, et sic adoratur dulia excellentiori modo, plus quam alia creatura: Deo enim in quantum est creator, debetur latria.

Ad illud ergo quod objicitur in contrarium, quod non eadem adoratione etc. dicendum est, quod verum est, si consideretur per se.

Ad secundum dicendum, quod Augustinus non dicit quin potuerit; sed maluit esse quam sumere,

quia sumere conveniebat ei in forma servi per accidens non per se, esse autem sacrificium per se.

Ad tertium dicendum, quod non convenit eidem adorare et adorari eodem modo; sed potest esse, quod uni conveniat adorare per se, et eidem adorari conveniat per accidens. Adorare autem conveniebat animae Christi per se, adorari vero per accidens.

QUAESTIO II.

ARTICULUS I.

Deinde quaeritur de dulia. Et 1. videtur, quod dulia idem sit quod latria. Honor enim Deo debetur est latria: sed dulia est honor debitus Deo, quia super illud Psalmi 7: « Domine Deus meus in te speravi, » dicit Glossa: « Dominus omnium per potentiam cui debetur dulia; » ergo dulia idem est quod latria.

2. Praeterea, eadem virtute Deus et proximus diligitur, scilicet charitate; ergo et eadem virtute honorantur: sed Deus honoratur latria, proximus autem dulia; ergo latria et dulia sunt eadem virtus.

3. Praeterea, per dulia ponitur species duliae: sed latria est iperdulia, cum sit supra dulam; ergo latria est species duliae.

Sed contra. Sapientia et scientia sunt diversa dona: quia unum est de aeternis, alterum de temporalibus; ergo et latria quae debetur Deo, est alia virtus a dulia, quae debetur homini.

Praeterea, major est excellentia Dei respectu hominis quam alicujus doni creati respectu alterius; sed propter excellentiam doni magnificentia ponitur a Philosopho in 4 Ethicorum, distincta virtus a liberalitate quae circa dona communia actum habet; ergo et latria quae impertat honorem Deo debitum est distincta virtus a dulia quae importat honorem creaturae debitum et exhibitum.

Respondeo. Dicendum, quod cum honor alicui debeatur ratione suae bonitatis, ubi est alia ratio bonitatis, oportet esse aliam rationem honoris. Bonitas autem Dei et creaturae non coincidunt in unam rationem; cum Deus sit bonus per essentiam, creatura per participationem; et ideo honor Deo debitus et creaturae ad unam virtutem non pertinet; et propter hoc oportet latriam et dulam esse diversas virtutes.

Ad primum ergo dicendum, quod nomen duliae dupliciter accipitur. Quandoque communiter pro omni honore, et sic loquitur Glossa illa. Quandoque specialiter pro honore debito creaturae; et sic nunc de dulia loquimur.

Ad secundum dicendum, quod ratio diligendi proximum ex charitate Deus est, et ideo eadem virtute Deus et proximus diligitur. Secus autem de dulia et latria, ratione iam dicta.

Ad tertium dicendum, quod creatura aliqua ex hoc quod creatori unitur, aliis creaturis praeponeatur; tamen extra terminos creaturae non ponitur, nec in naturam divinam convertitur. Et ideo iperdulia quae tali creaturae debetur, quamvis excedat dulam aliis creaturis debitam propter quod iperdulia dicitur, non tamen extra genus duliae ponitur, sed nec ad latriam gradum pertingit.

ARTICULUS II.

Ad secundum sic proceditur. Et 1. videtur, quod peccatores non debeant honorari dulia. Honor enim, ut dicit Philosophus, est reverentia exhibita alicui in testimonium virtutis: sed peccatores, etiam praelati, non habent virtutem; ergo qui eos honorat, falsum testimonium perhibet, quod est peccatum.

2. Praeterea, Gregorius dicit in pastoralis: « In exemplum culpa vehementius extenditur, cum pro reverentia ordinis peccator honoratur; » ergo malus praelatus non est honorandus, et multo minus malus subditus.

3. Praeterea, secundum Philosophum, Honor non debetur nisi rebus divinis: peccator non est res divina, quia perdit Dei imitationem et similitudinem; ergo honor non debetur ei.

Sed contra. Videtur quod dulia debeat etiam daemonibus exhiberi. Damascenus: « Cujus gratia nos invicem honoramus, nisi quia ad imaginem Dei sumus? » sed haec ratio manet in daemonibus et peccatoribus; ergo eis est honor duliae exhibendus.

Item videtur, quod irrationabilibus, quia in eis est vestigia; quod est similitudo Dei, sicut imago, etsi non adeo expressa: magis autem et minus non diversificantur speciei; ergo irrationabilia aliquo modo sunt dulia adoranda.

Ad hoc dicendum est, cum honor sit exhibitio reverentiae in testimonium virtutis, secundum quod homo se habet ad virtutem sic se habet ad honorem ceteris paribus. Cum ergo daemon nullatenus sit capax virtutis, nullatenus est adorandus. Quia vero bonus in summo gradu virtutis est, summe est honorandus honore duliae communis. Quia etiam habens officium inducendi ad virtutem et conservandi virtutem, ut praelatus in quantum huiusmodi melior est quam susceptor; ideo magis honorandus, etiam si actu sit malus. Quia vero subditus bono malo subdito virtuti est propinquior, ideo magis honorandus; quia bonus actu est virtuosus, malus vero non actu, sed potentia.

Ad primum igitur quod objicitur in contrarium, dicendum, quod verbum Philosophi intelligitur de virtute quae est in actu vel in aptitudine.

Ad secundum dicendum, quod praelatus in eo quod peccator, non est honorandus, quamvis in quantum praelatus sit honorandus. Et quamvis huiusmodi honor possit esse occasio peccandi aliis, non tamen causa.

Ad tertium dicendum, quod etiam peccator aliquo modo est res divina, in quantum est imago Dei et capax ejus.

Ad quartum dicendum, quod sola substantia imaginis non est ratio honoris, sed tantum reducibilitas ad actualem capacitatem ejus cujus est imago; quae deficit in daemonibus et peccatoribus damnatis.

Ad quintum dicendum, quod similitudo vestigii non ponit aptitudinem ad virtutem, sicut similitudo imaginis; et ideo dulia non debetur eis.

Expositio textus.

« Una adoratione incontaminata carne ejus; » ergo videtur quod Filius sit magis adorandus quam Pater. Dicendum quod humanitas ejus non adoratur latria, nisi propter divinitatem; et ideo non facit ipsum magis adorabilem, sed plura in ipso adorari.

« Nemo carnem Christi manducat nisi prius adoret. » Loquitur de manducatione spirituali, non tamen sacramentali. Vel nemo manducat, id est manducare debet.

DISTINCTIO X.

Solet etiam a quibusdam quaeri etc. (V. edit. nostrae tom. VII, pag. 115.)

QUAESTIO UNICA.

Postquam determinavit Magister qualiter aliquid conveniat vel non conveniat uni naturae ex hoc quod est alii associata in persona Christi, hic intendit determinare quid conveniat ipsi personae ratione humanae naturae. Quid enim conveniat sibi ratione divinae naturae, in primo libro dictum est. Dividitur autem haec pars in duas. Primo quaerit utrum conveniant Christo ratione humanae naturae illa quae ad dignitatem humanae naturae pertinent. In secunda de iis quae pertinent ad defectum, distinctione 2. Prima in duas. In prima inquit de illis quae pertinent ad dignitatem naturalem. Secundo de iis quae pertinent ad dignitatem gratiae, ibi, « Si vero quaeritur. » Circa primum duo facit. Primo movet quaestionem. Secundo objicit ad utramque partem et solvit. « Quod enim persona; » et dividitur in duas, secundum duas vias quibus ad quaestionem propositam argumentatur. « Sed aliter nituntur. » Circa primum duo facit. Primo ponit objectionem. Secundo solvit, ibi, « Propter haec inconvenientia, » et haec dividitur in duas. Primo respondet ad quaestionem. Secundo ad rationem. « Id tamen non sequitur. » « Sed aliter nituntur. » Hic ponit aliam objectionem: et primo objicit. Secundo solvit, ibi, « Ad quod dici potest. » « Si vero quaeritur. » Haec dividitur in duas partes secundum duas quaestiones quas ponit. Prima est de filiatione secundum adoptionem. Secunda de praedestinatione, ibi, « Deinde inde sequitur. » Circa primum duo facit. Primo ostendit quod Christus non sit filius adoptivus. Secundo objicit in contrarium: et circa hoc duo facit. Primo objicit. Secundo solvit, ibi, « Ad quod dici potest. » Tertio solutionem confirmat. Primo quantum ad hoc quod Christus est naturalis filius Virginis, ibi, « Quod vero naturaliter. » Secundo quantum ad hoc, quod non filius adoptivus.

ARTICULUS I.

Hic primo quaeritur, utrum Christus secundum quod homo sit Deus: et videtur quod sic. Ad Phil. 2: « Dedit illi nomen gloriae. » In quantum homo assumpsit nomen Dei non usurpative, sed vere: sed nomen quod habet vere in quantum est homo vere dicitur de eo secundum quod homo; ergo vere dicitur quod Christus secundum quod homo est Deus.

2. Praeterea, Christus est Deus per gratiam unionis: sed gratia unionis non convenit ei nisi secundum quod est homo; ergo secundum quod est homo est Deus.

3. Praeterea, secundum quod est homo praedestinatus est esse filius Dei, et sic Deus.

Contra. Christus secundum quod est Deus fuit ab aeterno: si igitur Christus secundum quod homo

est Deus, secundum quod homo fuit ab aeterno: quod falsum est.

Praeterea, praedicata opposita non conveniunt eidem secundum idem: sed Christus secundum quod homo est creatura; ergo non creator, et sic nec Deus.

Ad hoc dicendum est, quod cum dicitur, Christus secundum quod homo est Deus, ly secundum quod replicat causam inhaerentiae praedieati ad subjectum. Potest ergo replicare ut habeat causam naturam humanam; et sic est falsa, quia nullo modo est causa natura humana, quod homo sit Deus. Vel personam: et hoc dupliciter, quia ut hujusmodi hominis personam; et sic est vera, quia persona hujusmodi hominis, idest Christi, est Deus: et ideo ista simpliciter est vera: Christus secundum quod ille homo, est Deus. Vel personam absolute hominis et non hujusmodi hominis determinatam: et sic non est simpliciter concedenda, quia non cuilibet personae hominis convenit esse Deum.

Ad illud ergo quod objicitur in contrarium, dicendum, quod assumptio significatur per modum motus. Cui autem convenit per se ad aliquod moveri, non convenit per se esse id: sicut nigrum per se movetur in albedinem, non tamen per se est album. Similiter assumere nomen Dei, potest convenire Christo secundum quod homo, et tamen esse Deum non ei convenit secundum quod homo.

Ad secundum dicendum, quod hoc nomen Christus, significat personam in duabus naturis. Unde non convenit ei per gratiam quod sit Deus ab aeterno, sed quod simul sit Deus et homo, hoc est per gratiam unionis.

Ad tertium dicendum, quod haec propositio, Christus secundum quod homo, praedestinatus est esse filius Dei, est duplex. Nam si haec determinatio, secundum quod homo, determinet hoc participium praedestinatus, est vera et est sensus. Christus est praedestinatus secundum quod homo, ut sit filius Dei. Si autem hoc verbum sit, falsa est, et est sensus, Christus praedestinatus est ut sit filius Dei secundum quod homo; et in hoc sensu infertur conclusio.

ARTICULUS II.

Ad secundum sic proceditur. Et 1. videtur, quod Christus secundum quod homo, sit persona. Persona, secundum Boetium, est rationalis naturae substantia individua: sed Christus secundum quod homo est hujusmodi; ergo secundum quod homo est persona.

2. Praeterea, auctor naturae naturam non destruit, sicut dicit Augustinus. Cum igitur dignitas personalis in homine sit natura aliqua, per unionem non destruitur; ergo secundum quod homo, est persona.

3. Praeterea, videtur quod secundum quod homo sit individuum: Christus enim secundum quod homo est aliquid, sed non aliquid universale; ergo aliquid particulare; ergo secundum quod homo, est individuum.

4. Praeterea, individuatio nihil est nisi natura speciei et accidentia individuantia: sed Christus secundum quod homo habet naturam humanam et accidentia individuantia ipsum; ergo secundum quod homo est individuum.

S. Th. Opera omnia, V. 22.

5. Praeterea, videtur quod secundum quod homo sit suppositum vel res naturae. Christus secundum quod homo, est res quaedam: sed non est res nullius naturae; ergo est, secundum quod homo, res naturae.

6. Praeterea, natura non habet esse actu nisi in suo supposito et in re sua Natura vero humana habet esse actu in Christo secundum quod homo; ergo Christus secundum quod homo est suppositum vel res humanae naturae.

Ad hoc dicendum est quod in Christo non est nisi una persona quae est persona aeterna. Nullum autem aeternum convenit Christo secundum quod homo, proprie loquendo. Unde haec non est vera, Christus secundum quod homo, est persona, nisi reduplicetur suppositum hominis Christi, ut dicatur, Christus secundum quod iste homo, est persona: et hoc verum est.

Ad illud ergo quod objicitur in contrarium, dicendum, quod Christus non secundum quod homo sed secundum quod iste homo, est individua substantia rationalis naturae. Unde secundum quod iste homo, est persona, sicut est Deus.

Ad secundum quod objicitur de destructione personae, dicendum, quod nunquam humanae naturae assumptae a Verbo per se infuit personalitas. Unde non est in ea aliquid destructum; sed illud quod inesse poterat est in melius commutatum.

Ad tertium, quod quaeritur de individuo, sciendum est quod in Christo sunt plura individua; quia individuum invenitur in substantia et accidentibus. Sed tamen non omnia de Christo praedicantur, sed tantum secundum quod individuum in substantia invenitur secundum quod per se stat et ab aliis est divisum; et hoc modo individuum in Christo non est aliud quam persona. Unde sicut haec est falsa, Christus secundum quod homo, est persona, ita ista est falsa, Christus secundum quod homo, est individuum. De his autem individuis non potest dici quod Christus secundum quod homo sit individuum, quia de eo minime praedicantur. Quod ergo dicatur quod Christus, secundum quod homo, est aliquid aut universale, aut particulare, dicendum, quod neutrum concedendum est; quia homini ut homini, accidit esse universale vel particulare: sed ista vera est; Christus secundum quod est iste homo est aliquid particulare, ut fiat reduplicatio pro persona.

Ad quartum dicendum, quod argumentum non probat quod Christus secundum quod homo sit individuum, sed quod habeat individua naturam humanam.

Ad quintum, quod quaeritur, utrum sit suppositum vel res naturae, secundum quod homo, dicendum, quod suppositum vel res naturae duo importat: scilicet respectum ad naturam communem, et aliquid subsistens cui inest ille respectus: quorum unum est in Christo secundum quod homo, scilicet respectus ad naturam communem; non autem reliquum, quia ex humana natura nihil resultat subsistens per se in Christo. Ideo haec est falsa, Christus secundum quod homo, est suppositum vel res naturae. Tamen accedit ad veritatem magis quam aliqua praedictarum; inquantum ista nomina imponuntur a respectu ad naturam communem. Unde si suppositum sumatur adjective, est vera: Christus enim, secundum quod homo, supponitur humanae naturae vel est aliquid suppositum hu-

manae naturae. Quod ergo obicitur, quod suppositum vel res naturae dicitur a communi ex hoc quod habet naturam communem, dicendum, quod non ex solo respectu ad naturam communem dicitur quis suppositum vel res naturae simpliciter, sed ex proprietate per se subsistendi in natura illa. Hoc autem Christo, secundum quod homo, non convenit.

Ad sextum dicendum, quod suppositum alicujus naturae dicitur dupliciter: vel in quo natura ipsa subsistit, vel quod per ipsam naturam subsistit. Primo modo verum est quod natura non habet esse actu nisi in suo supposito. Secundo modo non. Nec enim accidentia subsistunt in subjecto, nec tamen subjectum per ea subsistit.

ARTICULUS III.

Ad tertium sic proceditur. Et 1. videtur, quod Christus secundum quod homo, sit filius adoptivus. Hilarius: « Potestas divinitatis non amittitur cum « carnis humanitas adoptatur, » et loquitur de Christo; ergo Christus secundum quod homo adoptatus est.

2. Praeterea, major est dignitas adoptivi filii, quam servi: sed Christus secundum quod homo, dicitur servus; ergo multo magis filius adoptivus.

3. Praeterea, Augustinus dicit, quod « ea gratia « fit homo quicumque Christianus, qua ille ab utero « factus est homo »: sed quicumque ab utero fit Christianus, hoc fit per gratiam adoptionis; ergo et ille homo factus est Christus per gratiam adoptionis, et ita est filius adoptivus.

Ad oppositum Ambrosius in Glossa, Rom. 1, super illud: « Qui praedestinatus est filius Dei etc. » dicit: « Volvi et revolvi Scripturas, et Christum nunquam quam filium adoptivum inveni. »

Praeterea, adoptare totius Trinitatis est: sed Christus non potest dici totius Trinitatis filius, quia non est filius suipsius; ergo non potest dici filius adoptivus.

Ad hoc dicendum est, quod de ratione adoptionis vel adoptionis duo sunt. Unum est, quod haereditas ad quam adoptatur aliquis, ei non conveniat ex natura, sed gratia. Secundum, quod respectu ejus habeat aptitudinem naturalem. Propter primum Christo non convenit adoptari, quia ex natura Patris haereditas sibi convenit, cum sit filius naturalis. Propter secundum non convenit irrationalibus creaturis, quia respectu haereditatis aeternae, nullam habent habitudinem naturalem. Cum autem rationalis creatura naturaliter sit capax haereditatis aeternae, nec eam adipisci possit nisi per gratiam, ideo tantum ei convenit in filium adoptari.

Ad illud ergo quod primo obicitur in contrarium, dicendum, quod adoptari in praedicta auctoritate attribuitur Christo non in se, sed in membris.

Ad secundum dicendum de servo, quod non est simile; quia per hoc non implicatur contradictio aliqua ad aliquod attributum filii Dei. Sed per filium adoptivum implicatur; scilicet quod prius fuerit natura filius, et postea gratia filius.

Ad tertium dicendum, de auctoritate Augustini, quod similitudo est quo ad causam gratiae, quia est sine meritis praecedentibus in illo homine et in nobis; non quantum ad effectum; quia illa est gratia unionis secundum quam efficitur filius naturalis; sed illa qua homo efficitur christianus, est gra-

tia adoptionis, secundum quam efficitur filius adoptivus.

ARTICULUS IV.

Ad quartum sic proceditur. Et 1. videtur, quod ratione personae praedestinatio Christo conveniat. Ad Rom. 1: « Praedestinatus est Filius Dei: » sed filiatio convenit personae, non naturae; ergo et praedestinatio.

2. Praeterea, quod convenit illi homini, convenit personae filii Dei propter communicantiam idionatum; sed homini illi convenit praedestinari, sicut ceteris Sanctis; ergo convenit personae Filii Dei.

3. Praeterea, cujus est praedestinari, ejus est per gratiam mereri, et per gloriam praemiari: sed hoc est proprie suppositi cujus est agere, non naturae; ergo et praedestinari.

Ad oppositum. Aeterno non convenit praedestinari; personam Christi est aeterna; ergo non convenit Christo ratione personae praedestinari.

Praeterea, Rom. 1, dicit Glossa, quod praedestinatio est uno modo de hoc quod non fuit semper; sed nihil est in Christo quod non fuerit semper, nisi humana natura; ergo praedestinatio est de natura.

Respondeo. Dicendum, quod praedestinari est ad gratiam praeparari. Hoc autem dupliciter est: vel ad gratiam adoptionis, vel ad gratiam unionis. Praeparari ad gratiam adoptionis convenit aliis, non Christo: praeparari vero ad gratiam unionis convenit naturae quae est unita. Personae autem non convenit secundum se, sed in quantum est suppositum humanae naturae; et ideo praedestinatio potest utrique convenire in Christo; sed primo et principaliter naturae; personae vero non, nisi in quantum est suppositum ipsius naturae.

Quod ergo obicitur de filiatione, dicendum, quod verbum Apostoli intelligendum est de Christo ratione personae existentis in humana natura; quia sic ei convenit filiatio, non ratione naturae.

Ad secundum dicendum, quod ratio procedit de praeparatione ad gratiam adoptionis, quae est principium merendi; non unionis in persona.

Ad tertium dicendum, quod illi homini convenit praedestinari cum reduplicatione, scilicet in quantum homo est; et similiter Filio Dei.

Expositio textus.

« Christum secundum hominem non esse personam, nec aliquid ». Primum conceditur simpliciter. Secundum vero est error tertiae opinionis.

« Illa tamen descriptio personae ».

Contra. Boetius tradit eam in hac materia specialiter.

Respondeo. Magister intelligit secundum quod verba striete et proprie accipiuntur; Boetius secundum quod large. Non autem sic dicitur Filius natura. Nam cum dicitur Deus natura, ablativus formaliter construitur: quando dicitur Filius natura, construitur originaliter. « Christum Virginis Filium « esse natura et gratia ». Sciendum est quod Christus, in quantum homo, Filius est Virginis natura; in quantum Deus gratia, non quae sit in Deo, sed quae in homine; scilicet gratia unionis.

DISTINCTIO XI.

Solet etiam quaeri etc. (V. edit. nostrae tom. VII, pag. 122.)

QUAESTIO UNICA.

Postquam Magister determinavit qualiter ea quae sunt dignitatis in humana natura de Christo dici possunt, consequenter determinat ea quae ad defectum humanae naturae pertinent: et dividitur in partes duas. In prima inquit, utrum nomen creaturae, quod de humana natura dicitur, de Christo possit dici. In secunda, utrum illi defectus, qui consequuntur ipsam in quantum est creatura, vel alio modo, ipsi convenire possint, 12 dist., ibi, « Post praedicta etc. » Prima dividitur in duas partes. Primo movet quaestionem, utrum Christus possit dici creatura vel factus. In secunda respondet. Secunda incipit ibi, « Ad quod dici potest ». Haec dividitur in duas. Primo enim ostendit quod Christus non simpliciter dicendus est creatura. In secunda dicit, quod potest dici creatura, addita determinatione: quae incipit ibi, « Sed addita determinatione recte dici potest. »

ARTICULUS I.

Ad primum sic proceditur. Et 1. videtur quod Dei Filius sit creatura. Quod enim habet aliquid ab aliquo, quantum est de se, caret illo; si ergo Filius habet esse ab alio, quantum est de se, caret illo, et sic de se est nihil; sed omne tale est creatum; ergo etc.

2. Praeterea, creatio prior est aliis actionibus, sicut terminus ejus quod est ens, prior est terminis aliarum: sed in posteriori semper includitur prius; si ergo Filius Dei dicitur genitus, potest dici creatus.

3. Praeterea, quod habet esse ab alio, non est necesse esse, cum ab altero dependeat ejus esse, ut vult Avicenna in sua Metaphysica: sed quod non est necesse esse, possibile est esse: quod autem possibile est esse, est creatum, seu creatura, quia quod possibile est esse, possibile est non esse; ergo quod ab alio habet esse, est creatum: sed Filius Dei est hujusmodi; ergo etc.

Ad oppositum. Nulla creatura consubstantialis est suo creatori; sed Filius consubstantialis est Patri; ergo non est creatura.

Praeterea, omne quod dicitur per similitudinem, reducitur ad id quidem proprie dicitur: sed homines dicuntur filii Dei propter assimilationem ad unigenitum Filium Dei, ad Rom. 8: « Conformes fieri imaginis Filii sui; » ergo ipse proprie Filius dicitur: sed nullus proprie dicitur filius alicujus, nisi habeat eandem naturam specie quam pater habet; ergo cum Filius non possit eandem speciem naturam habere cum Deo Patre nisi eandem communicantiam numero habeat, eadem essentia divina numero est in Patre et Filio; et sic Filius vere est Deus, et non creatura.

Ad hoc dicendum est, quod quamvis Filius habeat esse ab altero, idest a Patre; tamen idem numero esse habet propter perfectionem generantis, qui totum esse communicat, et simplicitatem rei, quae per generationem communicatur, scilicet divinae naturae, in qua non est differentia essentiae et esse. Cum ergo illud esse divinum quod sibi

communicatur, sit necessarium, habet esse necessarium non habens possibilitatem ad non esse. Hujusmodi autem non est esse creatum, sed increatum; et ideo Filius non potest dici creatura.

Ad illud ergo, quod primo objicitur in contrarium, « Omne quod habet esse ab alio etc. », dicendum, quod intelligendum est illud, secundum quod ly ab alio, accipitur neutraliter, non masculine. Sic enim haberet rationem principii differentis per essentiam. Tunc enim unius esse differret ab esse alterius: quod hic non contingit.

Quod objicitur, « Creatio includitur in omni actione etc. », dicendum, quod in actione aeterna, nec includitur, nec praesupponitur. In actione vero temporali non includitur in ejus intellectu, sed praesupponitur; quia actio temporalis circa creaturam est; et ideo praesupponit creationem creaturae. Cum autem dicitur, quod prius includitur in posteriori, hoc verum est quando prius est de ratione posterioris, ut animal hominis.

Ad tertium dicendum sicut ad primum, quod Filius quamvis habeat esse a Patre, non habet tamen esse diversum a Patre: et ideo non oportet quod esse ejus sit dependens vel possibile, et ita nec creatum.

ARTICULUS II.

Ad secundum sic proceditur. Et 1. videtur, quod Christus sit creatura. De quocumque praedicatur inferius, et superius: sed creatura est superius ad hominem; ergo, cum homo praedicetur de Christo, praedicabitur de eo creatura.

2. Praeterea, omne quod est, aut est creatum, vel increatum: sed Christus est homo, ergo homo est creatus, vel increatus: non homo increatus sicut nec homo aeternus, quia accidens hoc discolhaeret naturaliter subjecto; ergo homo creatus, et sic creatura.

3. Praeterea, magis distant a Deo defectus creaturae quam natura ejus: sed Christus denominatur a defectibus creaturae, unde dicitur mortuus; ergo magis denominabitur a natura, ut dicatur creatus.

Contra. Hugo de sancto Victore dicit: « Hoc est esse creatum, aliquid de nihilo esse, idest esse post nihil. » sed Christus nunquam fuit nihil; ergo non est creatura.

Praeterea, creatura non potest praedicari de supposito aeterno: sed Christus dicit suppositum aeternum; ergo non potest dici creatura.

Ad hoc dicendum est, quod creatio proprie respicit esse, ut dicitur in libro de Causis, quod esse est per creationem, alia vero per informationem. Et ideo ad illud pertinet proprie creatio ejus est esse. Esse autem per se et simpliciter est suppositi subsistentis. Alia vero dicuntur esse, in quantum suppositura in eis subsistit, ut natura ipsius suppositi, et accidentia ejus. Et ideo esse dictum simpliciter de supposito significat esse personale ipsius: esse vero secundum quod convenit parti, vel accidenti, non dicitur simpliciter de supposito, sed suppositum dicitur esse in eo. Ideo cum dicitur, Christus est, significatur ipsius esse suppositi, non autem esse ipsius naturae, vel accidentis, aut partis. Esse autem ipsius suppositi est esse divinum non creatum; et ideo non potest dici Christus esse creatura, quia sic daretur intelligi esse ipsius suppositi creatum; quod est falsum.

Quod ergo obijciunt in contrarium, dicendum, quod homo praedicatur de Christo ratione naturae significatae, creatura vero praedicatur de homine ratione sui esse, et non proprie ratione naturae; et ideo non oportet quod nomen creaturae de Christo praedicetur, cum non secundum idem praedicetur de Christo, homo et creatura. Vel dicendum quod quantum ad esse hujusmodi hominis non est superior creatura ad hominem; et ideo non oportet, quod creatura praedicetur de Christo.

Ad secundum dicendum, quod cum dicitur, « Christus aut homo creatus etc. » propositio haec: Christus est homo creatus, distinguenda est: quia si participium determinet praedicatum in comparatione ad subjectum, cum praedicetur gratia formae, notatur creatio inesse formae per terminum significatae, et sic est vera. Si vero determinet praedicatum absolute, tunc notatur creatio inesse praedicato gratia suppositi, quia tunc praedicatum est subjectum ratione determinationis, et sic est falsa. Ex primo autem sensu secundum quem vera est, non sequitur quod Christus sit creatura: sed quod humanitas sit creatura.

Ad tertium dicendum, quod ratio creaturae non principaliter pertinet ad suppositum, quod in Christo est aeternum; sed defectus naturales, ut mori, et pati, pertinent ad suppositum ratione naturae, vel partium ipsius, quae in Christo est creata; ideo ratio non sequitur.

ARTICULUS III.

Ad tertium sic proceditur. Et 1. videtur, quod Christus, secundum quod homo, non possit dici creatura. Quicquid enim praedicatur de altero secundum quod ipsum est, id est secundum aliquod attributum essenziale, praedicatur de eo simpliciter: sed creatura non praedicatur de Christo simpliciter; ergo non de Christo secundum quod homo, cum homo sit ejus essenziale praedicatum.

2. Praeterea, nihil est creatum in Christo, nisi natura humana: sed haec est falsa, Christus secundum quod homo est natura humana; ergo et haec, Christus secundum quod homo, est creatura.

3. Praeterea, quod dicitur de Christo secundum quod homo, non excludit esse divinum, cum homo sit Deus: sed esse creaturam excludit ab eo esse divinum; ergo non praedicatur de eo secundum quod homo.

Contra. Quod non est aeternum, est creatum: sed Christus secundum quod homo, non est aeternus; ergo secundum quod homo, est creatura.

Praeterea, omne quod est factum, est creatum: sed Christus, secundum quod homo, est factus; ergo Christus secundum quod homo est creatus.

Ad hoc dicendum est, quod illud quod convenit parti, si non est natum toti convenire per partem, absolute denominat totum; sicut aliquis dicitur crispus simpliciter propter crispitudinem capillorum. Quod autem convenit parti, ita quod aptum natum est toti convenire per partem, non simpliciter denominat totum, nisi cum reduplicatione partis; sicut aliquis non dicitur albus simpliciter, quamvis sit albus in pede, nisi reduplicetur pes, ut dicatur albus pede: nec hoc proprie dicitur, sed figurative, id est per synecdochen. Unde cum natura humana se habeat ad personam compositam Christi sicut pars, quamvis proprie pars dici non

possit, sicut nec proprie persona composita, ut supra dist. 6, dictum est, et creatio naturae, et non personae nata sit convenire, cum esse utrique aliquo modo conveniat; non potest dici de Christo quod sit creatura simpliciter, quia humana natura creata est, nisi fiat additio, ut dicatur, secundum hominem: et tunc tropica, vel figurativa est, ut dicit Magister in litera; quia sic per partem denominatur totum.

Quod ergo obijciunt in contrarium, « Quicquid praedicatur de aliquo secundum quod ipsum est etc. » Dicendum quod verum est ubi est praedicatio propria, non figurativa, ut hic.

Ad secundum quod obijciunt de natura humana, dicendum quod natura humana in abstracto non praedicatur de Christo secundum quod homo: sed conditiones ejus in concreto, secundum quod homo, possunt praedicari de Christo, vel proprie, vel improprie. Creatura autem in concretione dicitur, eo quod omne creatum, creatura est: et ideo potest praedicari de Christo, secundum quod homo.

Ad tertium quod obijciunt, quod secundum quod homo non excludit esse divinum etc. Dicendum quod id quod dicitur de Christo secundum quod homo, praedicatione propria non figurativa, non repugnat alteri naturae, unde potest praedicari de eo simpliciter; sed non id quod dicitur figurative et improprie.

ARTICULUS IV.

Ad quartum sic proceditur. Et 1. videtur, quod ea, quae sunt humanae naturae, non possint dici de Filio Dei. Omnis enim proprietas humanae naturae est quid creatum: sed creatura non praedicatur de Filio Dei; ergo nec proprietates humanae naturae.

2. Praeterea, ea quae praedicantur de Christo secundum quod homo, non praedicantur de Christo secundum quod Filius Dei est: sed ea quae sunt humanae naturae, praedicantur de Christo secundum quod homo; ergo etc.

3. Praeterea, naturae humanae convenit assumi a Filio Dei: sed hoc non convenit Filio Dei; ergo nec omnia quae conveniunt naturae humanae, dicuntur de Filio Dei.

Contra. De quocumque praedicatur aliquid, praedicantur omnia consequentia ad ipsum; ergo, cum de Filio Dei praedicetur homo, de ipso praedicantur omnia quae consequuntur ad ipsum.

Praeterea, Christus est persona subsistens in duabus naturis, scilicet divina et humana: sed omnia quae conveniunt divinae naturae possunt praedicari de Christo; ergo pari ratione omnia quae conveniunt humanae naturae.

Ad hoc dicendum est, quod natura et suppositum in quibusdam differunt re et ratione, sicut in compositis; in quibusdam autem ratione et non re, sicut in divinis. Sed differentia quae est secundum rationem, est differentia oppositionis, quia natura et suppositum habent oppositas rationes. Unde istae intentiones non possunt mutuo praedicari de eisdem. Unde natura non potest dici incommunicabilis, nec suppositum communicabile, nec in abstracto, nec in concreto, nec etiam in divinis, vel humanis. Differentia autem quae est secundum rem, non est oppositionis, sed est sicut principii formalis ad formatum, sive principiatum; et ideo

quae secundum rem ad naturam pertinent, possunt praedicari de supposito, sicut natura praedicatur, scilicet in concreto. Quia autem unio facta est in supposito, ideo de illo supposito possunt praedicari ea quae consequuntur utramque naturam: sed differenter: quia ea quae consequuntur naturam divinam, praedicantur de eo in concreto et in abstracto, sicut et ipsa natura, quae utroque modo de ipso supposito praedicatur. Ea vero quae consequuntur naturam humanam, non praedicantur de eo nisi in concreatione, sicut nec ipsa natura praedicatur de Christo nisi in concreatione. Quia autem humana natura habet rationem partis, sicut jam dictum est, in Christo: ideo ea quae nata sunt de se et personae et naturae convenire, non possunt praedicari de supposito nisi cum additione, sicut ea quae sunt partis de toto, sicut apparet in hoc nomine, creatura.

Ad primum ergo quod objicitur in contrarium, quod omnis proprietas naturae humanae est quid creatum etc. Dicendum, quod sicut natura humana, quae est creatura, praedicatur de Christo in concreto, non tamen creatura, ita quamvis attributa naturae humanae sint creata, nihilominus in concreto de ipso Christo praedicantur, quamvis non creatura; et hoc est propter negationem inclusam in hoc nomine, creatura, quae non in aliis includitur.

Ad secundum quod objicitur, quod ea quae praedicantur de Christo secundum quod homo etc. Dicendum, quod non est simile; quia ad veritatem propositionis sufficit, quod praedicatum conveniat subjecto quocumque modo; sive ratione suppositi, sive ratione formae: sed ad hoc quod propositio sit per se, oportet quod conveniat sibi ratione formae importatae per subjectum. Unde haec est vera, Deus est passus; non tamen est per se, quia passio non convenit subjecto ratione divinitatis, quamvis conveniat sibi ratione suppositi.

Ad tertium dicendum, quod assumere convenit naturae ratione unionis; et ideo non oportet quod conveniat Filio Dei. Secus autem esset si conveniret naturae, ratione naturae.

Expositio textus.

« Omnia per ipsum facta sunt etc. » Et videtur, hoc non esse ad propositum; quia Augustinus intendit de Filio Dei, in quantum est Filius Dei. Dicendum, quod quia non est in Christo aliud suppositum nisi persona Filii Dei, ideo sicut de Filio dici non potest quod sit creatura, ita nec de Christo.

« In Deo creatura esse non potest. »

Contra. Rom. 11: « In quo, scilicet in Christo, sunt omnia. » Et dicendum quod sunt in ipso creaturae, non per essentialiter, sed sicut in causa per similitudines ideales, quae secundum quod in eo sunt, creatae non sunt.

DISTINCTIO XII.

Post praedicta quaeritur etc. (V. edit. nostrae tom. VII, pag. 428.)

QUAESTIO UNICA.

Postquam determinavit Magister utrum Christus possit dici creatura, hic determinat de defectibus qui consequuntur naturam humanam, secun-

dum quod creatura est. Primo determinat de isto defectu qui est incipere esse, qui consequitur communem creaturam. Secundo de his quae consequuntur specialiter humanam naturam, ibi, « Solet etiam quaeri. » Circa primum duo facit. Primo movet quaestionem, et objicit pro et contra. Secundo determinat eam: « His igitur auctoritatibus. » « Solet quaeri ». Haec dividitur in tres. In quarum prima determinat de defectibus his qui pertinent ad defectum ex parte animae. Ideo non immerito quaeritur. Tertio de his, qui pertinent ad defectum carnis. « Solet etiam quaeri. » Prima in tres. Primo movet quaestionem, scilicet utrum aliunde quam de genere Adam Christus hominem assumere poterit. Secundo solvit, « Sane dici potest. » Tertio solutionem confirmat « Ut enim ait Augustinus. » « Ideo non immerito quaeritur. » Haec dividitur in tres partes. Primo enim quaerit, utrum Christus poterit peccare: et ostendit quod non. Secundo solvit « Haec disceptatio opus. » Tertio dupliciter objicit contra solutionem et solvit. Quidam tamen probare conantur. « Solet enim quaeri. » Haec dividitur in duas partes. Primo enim ponit quaestionem. Secundo subjungit solutionem. « Quidam tamen arbitrantur etc. »

ARTICULUS I.

Hic primo ostenditur quod haec sit vera, Ille homo incoepit esse. De illo homine praedicantur attributa utriusque naturae: ergo sicut ratione divinae naturae potest dici quod semper fuerit, ita ratione humanae quod esse inceperit.

2. Praeterea, nasci temporaliter est mutari de non esse in esse: sed esse hujusmodi incoepit esse; ergo cum Christus natus sit, temporaliter incoepit esse Christus.

3. Praeterea, iste homo supponit personam compositam: sed persona composita non fuit ab aeterno; ergo nec iste homo fuit ab aeterno; ergo incoepit esse.

Juxta hoc quaeritur an haec sit vera. Iste homo incoepit esse Deus: et videtur quod sic.

4. Praeterea, antequam mundus fieret, nullus homo erat Deus; ergo ejus contradictoria erat falsa, scilicet, aliquis homo erat Deus: modo autem est vera; ergo aliquis homo est Deus, qui primo non fuit Deus: non nisi iste homo; ergo iste homo incoepit esse Deus.

5. Praeterea, per gratiam unionis ille homo est Deus: sed gratia unionis non semper fuit; ergo nec ille homo semper fuit Deus; ergo incoepit esse Deus.

Ad hoc dicendum, quod terminus in praedicto positus tenetur ratione formae, in subjecto ratione suppositi. Cum igitur inchoatio repugnet personae Christi, non autem naturae humanae ipsius Christi; ergo ista est falsa, Iste homo incoepit esse Deus, vel iste homo coepit esse Deus; quia inchoatio non ponitur circa divinam personam, nisi cum reduplicatione naturae intelligatur, secundum quod homo. Haec autem est vera, ille homo, Christus, sive Deus, incoepit esse homo. Tamen si hoc verbum, coepit, exponatur in participium, et feratur ad totam propositionem, ut dicatur, coepit, idest inchoatum est, haec propositio erit vera, iste homo coepit esse Deus.

Quod objicitur ergo in contrarium de attributis, dicendum est quod quamvis sit subjectum utrius-

que naturae, tamen per divinam constituitur in esse supposito, per humanam non, sed advenit supposito constituto. Hinc est, quod omnia attributiva divinae naturae conveniunt isti supposito, et de illo praedicantur. Attributa vero humanae naturae quaedam sunt non repugnantia attributis ipsius divinae naturae vel personae contradictorie, et illa praedicantur; quaedam vero repugnant propter negationem inclusam, ut incoepitio, creatio; et illa non simpliciter praedicantur, nisi cum reduplicatione naturae.

Ad secundum quod objicitur, quod nasci temporaliter est mutari etc. Dicendum, quod nasci temporaliter ex matre non est natum convenire supposito nisi ratione corporis; et ideo simpliciter potest dici natus temporaliter. Sed incipere esse, non est natum convenire naturae suppositi tantum; sed etiam ipsi supposito; et ideo non potest praedicari de supposito aeterno simpliciter, nisi cum reduplicatione naturae, quamvis ipsa natura incoeperit esse.

Ad tertium quod objicitur de persona composita, dicendum, quod haec est vera, Persona composita semper fuit; non tamen haec est vera, Persona ista semper fuit composita: quia ad veritatem compositionis sufficit quod praedicatum conveniat subjecto; nec oportet quod conveniat ei ratione formae significatae vel appositae ex parte subjecti; sed ratione totius, quod est ex parte praedicati, oportet praedicatum convenire subjecto.

Ad quartum quod objicitur « Nullus homo erat, » dicendum, quod ab aeterno fuit verum dicere, Nullus homo est Deus; quia suppositum aeternum nondum erat suppositum humanae naturae. Unde non poterat sumi sub dicta distributione, sicut nunc potest post unionem. Unde quamvis ab aeterno non esset verum dicere, Aliquis homo est aeternus, modo tamen est verum dicere, Aliquis, vel ille homo est ab aeterno. Vel dicendum quod haec, scilicet Aliquis homo erat Deus ab aeterno, non erat falsa quia illud suppositum, quod est Christi hominis, non esset Deus, sed quia tunc non erat suppositum humanum. Sed tamen cum inferebatur; ergo iste incoepit esse Deus, intelligitur quod suppositum, quod est Christi hominis, non semper fuerit Deus, quod est falsum; et ideo non sequitur argumentum.

Ad quintum quod objicitur de gratia unionis, dicendum, quod haec determinatio, per gratiam, idem operatur quantum ad hoc. Hinc est quod dicitur secundum quod homo. Unde ex hac non potest verificari simpliciter quod coeperit esse Deus. Unde nec est falsa simpliciter, et vera secundum quid.

ARTICULUS II.

Ad secundum sic proceditur. Et 1. videtur, quod aliunde potuit assumere hominem quam de genere Adam. Augustinus « Poterat aliunde assumere hominem, in quo esset mediator Dei et hominum, quam de genere Adam. »

2. Praeterea, qui vult pro alio satisfacere, oportet quod non sit obligatus pro se: Natura de genere Adae tota erat obligata pro se: ergo ad satisfaciendum non debebat illam assumere.

3. Ad oppositum. Prophetiae praedixerunt Christum nasci de semine David, et sic de genere Adam; cum ergo prophetia sit infallibilis veritatis, aliter non poterat contingere.

4. Praeterea, una natura rerum naturalium refertur ad unum principium; ergo extra Adam, qui fuit primum principium, nihil fuit naturae humanae: sed quod non est, assumi non potest; ergo non potuit assumi aliunde.

5. Praeterea, si satisfactor non esset de genere Adae, ejus satisfactio non pertinisset ad filios Adae. Ad hoc ergo quod satisfactio ad filios Adae pertineat, oportet Christum satisfactorem esse de genere Adae.

Respondeo. Dicendum, quod aliunde potuit assumere de potentia: sed non de congruentia qua aliquid ordinatum est. Congruitatis vero ratio sumitur ex ostensione divinae potentiae in hoc quod de natura victa a diabolo vicit eum. Ex ostensione etiam divinae sapientiae in hoc, quod de natura morbida facit antidotum. Ex ostensione divinae justitiae in hoc, quod illud quod peccaverat, fecit emendari. Ex ostensione divinae misericordiae in hoc quod peccatoribus dedit summam spem et fiduciam.

Ad quod objicitur de Augustino, Respondeo quod poterat de potentia, sed non de congruentia, ut dictum est.

Ad secundum quod objicitur de satisfactione, dicendum, quod naturam quam assumpsit, prius natura purgavit ab obligatione peccati, et sic non obligatus fuit pro se ratione personae, nec ratione naturae assumptae.

Ad tertium quod objicitur de praedicatione prophetarum, dicendum, quod hujusmodi praedictio non imponit necessitatem eventus simpliciter, sed sub conditione, idest supposita tali ordinatione divina; unde non excludit possibilitatem simpliciter.

Ad quartum quod objicitur de uno principio humanae naturae, dicendum, quod natura propaganda per viam generationis naturalis tota fuit in illo principio virtute non mole: sed nihilominus supernaturaliter Deus potuit aliam naturam humanam, quae prius non erat, facere, et illam assumere.

Ad quintum quod objicitur de filiis Adae, dicendum, quod satisfactio pertinisset ad filios Adae, quia eadem esset natura in speciem, licet non ab Adam naturaliter propagata; sicut Eva formata de costa Adae, licet non per viam naturae, eadem in specie cum Adam est.

ARTICULUS III.

Ad tertium sic proceditur. Et 1. videtur, quod Christus peccare potuerit. Sicut nullus peccat in eo quod vitare non potest, ita nec meretur; si ergo Christus bonum vitare non potuit, benefaciendo non meruit: hoc autem est falsum; ergo bonum vitare potuit: sed declinare a bono, est peccatum; ergo peccare potuit.

2. Praeterea, Joan. 8: « Si dixero quod non novi etc. »: sed hoc dicere potuit; ergo mendax esse potuit, et sic peccare.

3. Praeterea, dicit Philosophus: « Potest enim Deus et studiosus prava agere. »

Sed contra. Videtur quod Christus non habuit potentiam peccandi. Potentia peccandi, secundum Anselmum, addita libero arbitrio diminuit libertatem, et remota auget: sed Christus liberum arbitrium non habuit diminutum; ergo habuit illud sine potentia peccandi.

Praeterea, Christus secundum quod homo, fuit Deo maxime similis: sed Deus non habet potentiam peccandi; ergo nec Christus, secundum quod homo.

Ad hoc dicendum, quod Christus peccare non potuit, triplici ratione. Una, quia suo fini per gloriam comprehensionis anima sua conjuncta erat. Altera, quia secundum statum viatoris, per gratiam perfectae sanctitatis esse debuit omnium actuum humanorum prima regula infallibilis. In quolibet autem genere ita est, quod primum regulans torqueri non potest, quia alias esset error in omnibus quae ab ipso regulantur. Tertia, quia natura humana in Christo quasi quoddam instrumentum naturae divinae eam moventis et in ea operantis fuit, quae ad peccatum movere non potest.

Ad id vero quod objicitur, quod peccare potuit, quia nullus peccat in eo quod vitare non potest, dicendum, quod impossibilitas vitandi bonum dupliciter potest intelligi. Vel ex necessitate coactionis: vel ex necessitate immutabilitatis voluntatis. Primo modo excludit meritum; secundo modo non, quia non excludit voluntarium.

Ad secundum quod objicitur de mendacio etc. Dicendum, quod mendacem orationem proferre potuit materialiter, non tamen significative: et ideo mendax esse non potuit, quia mentiri est contra mentem ire. Vel dicendum, quod potuisset alia plura verba dicere si voluisset; quia ad veritatem conditionalis, sufficit necessitas habitudinis, etiam si non sit veritas antecedentis seu consequentis. Et similiter intelligendum est verbum Philosophi, scilicet quod potest Deus prava facere, supple, si vult. Hujus tamen conditionalis tam antecedens quam consequens, est impossibile. Unde patet solutio ad tertium.

Ad quartum quod objicitur de potestate peccandi, dicendum quod cum quaeritur, an habuerit Christus potentiam peccandi, quaestio ista potest dupliciter intelligi. Uno modo, ut intelligatur potentia peccandi qua peccatur, secundum quod *ly* peccandi, est gerundium verbi impersonalis: et sic dicendum est, quod Christus habuit potentiam peccandi. Habuit enim liberum arbitrium, quae est potentia, qua ab aliquibus peccatur. Alio modo potest intelligi potentia peccandi, idest potentia ad peccandum, secundum quod *ly* peccandi, est gerundium verbi personalis: et sic Christus non habuit potentiam peccandi, quia non potuit peccare, ut dictum est.

Ad quintum dicendum, quod quamvis Christus, secundum quod homo, maxime fuerit Deo similis, non tamen excluditur per hoc libertas liberi arbitrii, nisi prout est ad peccatum ordinata, non in quantum est natura quaedam. Liberum autem arbitrium Christi hominis est creatum, et ita mutabile.

ARTICULUS IV.

Ad quartum sic proceditur Et 1. videtur, quod non debuit Christus sexum aliquem accipere. Sexus enim ordinatur ad generationem carnalem: sed Christus non venerat ut esset principium generis humani per generationem carnalem, sed spiritua-lem; ergo sexum assumere non debuit.

2. Praeterea, videtur quod debuit sexum femineum assumere. Reparatio enim respondet ruinae: sed prima ruina fuit per feminam; ergo principium generationis debuit esse per feminam; ergo Christus sexum femineum assumere debuit.

3. Praeterea, videtur quod ab utroque sexu carnem assumere debuit; quia, ut dicit Apostolus ad Heb. 2: « Per omnia debuit fratribus assimilari: » sed naturaliter alii homines generantur ab utroque sexu; ergo et Christus ab utroque sexu carnem assumere debuit.

4. Praeterea, videtur quod debuit assumere carnem de viro tantum. Generatum enim debet assimilari generanti, et e converso; ergo cum debuit esse vir, debuit de viro carnem assumere.

Contra. Oportuit utriusque sexus liberationem in ejus carne ostendi; cum ergo debuerit esse vir, debuit de muliere carnem assumere.

Ad hoc dicendum est, quod Filius Dei naturam humanam assumpsit, ut esset reparator totius humanae naturae; et ideo oportuit quod in humana natura esset perfectissimus, et quantum ad naturam, et quantum ad gratiam. Debuit ergo habere sexum, ne aliquid naturalium ei deesset; et sexum virilem, in quo major perfectio invenitur. Debuit absque commixtione sexuum nasci, ne per concupiscentiam coitus culpam originalem contraheret, quod perfectioni gratiae derogaret. Debuit etiam ex muliere tantum, ut cum toto humano genere convenientiam haberet; cum viris quidem ratione sexus quem assumpsit, cum mulieribus ratione matris de qua assumpsit.

Ad secundum quod objicitur, quod ruina fuit per feminam, dicendum, quod non per mulierem intravit originale peccatum in mundum, sed per virum; et ideo debuit per virum principaliter fieri reparatio.

Ad tertium quod objicitur de Apostolo, quod debuit per omnia fratribus assimilari, verum est in natura; sed non in culpa, quae sequitur de necessitate ex commixtione sexuum concupiscentia.

Ad quartum quod objicitur de similitudine principii, dicendum, quod sufficit similitudo in natura speciei, non autem requiritur in accidente.

Expositio textus.

Creavit stellas etc.

Hic legitur in Glossa Fulgentii: « Haec, inquit, stella nonquam prius apparuit: » sed nunc puer eam creavit, et Magis prae via deputavit.

« Quidam arbitrantur eam eum potuisse. »

Contra. Minimum inconueniens, est Deo impossibile: sed mulierem esse caput Ecclesiae, est inconueniens. Dicendum, quod si Deus fecisset, non esset inconueniens, quamvis non esset forte tantae congruitatis.

DISTINCTIO XIII.

Praeterea sciendum etc. (V. edit. nostrae tom. VII, pag. 156.)

QUAESTIO UNICA.

Postquam determinavit Magister de conditionibus praecedentibus actum unionis, usque ad 6 distin., et de conditionibus consequentibus actum unionis, usque hoc; hic determinat, quae conveniunt Christo secundum humanam naturam, quae etiam est exaltata per incarnationem. Haec autem pars dividitur in tres partes. In prima determinat de his quae per eum natura humana assumpsit. In secunda de his quae per naturam humanam

operatus est, dist. 17: « Post praedicta etc. » In tertia de morte, quam in natura humana sustinuit, dist. 21: « Post praedicta considerandum. » Prima in duas. Primo determinat de perfectionibus quas cum natura humana assumpsit. Secundo de defectibus, quos cum ea assumpsit, dist. 13: « Il-
 « lud quoque etc. » Prima in duas. Primo determinat de perfectionibus cum humana natura assumptis, quantum ad earum plenitudinem. Secundo, quantum ad perfectionem divinae naturae, dist. 14, ibi, « Illic quaeri opus. » Prima in duas. Primo determinat plenitudinem perfectionis quantum ad gratiarum effectus, et scientiam intellectus, quam Christus ab instanti conceptionis suae accepit. Secundo, objicit in contrarium: « Huic autem videtur
 « obviare: » et haec dividitur in duas. In prima objicit in contrarium per auctoritatem canonis. Secundo per auctoritatem sanctorum. « Alibi tamen scriptum. » Prima in duas. « Primo objicit in contrarium. » Secundo solvit, et solutionem per auctoritates confirmat. Ad quod sane dici potest. « Alibi tamen scriptum etc. » et haec dividitur in partes tres. Primo objicit in contrarium per auctoritatem Ambrosii. Secundo, quid veritatis praedicta auctoritas contineat ostendit. « Haec verba Ambrosii. » Tertio, id quod videtur falsum determinat et exponit. « Sed ex qua
 « causa etc. »

ARTICULUS I.

Hic primo quaeritur, utrum aliqua gratia in Christo fuerit creata. Et 1. videtur, quod non. Instrumentum enim non indiget aliquo habitu quo regatur in opere, quia regitur per agens principale: sed anima Christi erat quasi instrumentum divinitatis, quia regebatur per eam, sicut caro per animam regitur, ut instrumentum ejus, sicut dicit Damascenus in tertio libro; ergo anima Christi nullo habitu gratiae regente indigebat.

2. Praeterea, sicut se habet filiatio naturalis ad adoptivam, ita bonitas naturalis ad gratuitam: sed Christus, quia Filius est naturalis, non potuit habere filiationem adoptivam; ergo quia naturaliter bonus, non potest habere bonitatem gratuitam.

3. Praeterea, gratia datur hominibus, ut assimilentur Deo; sed Christus nunquam fuit dissimilis Deo; ergo non indiget gratia.

Contra. Gratia est perfectio et vita animae, sicut anima corporis: sed non fuit corpus Christi perfectum sine anima unita; ergo nec anima sine gratia.

Praeterea, gratia est principium merendi: sed Christus meruit sibi et nobis; ergo et ipse habuit gratiam creatam.

Ad hoc dicendum, quod gratia creata, in anima duo facit. Primo perficit eam in se quantum ad esse spirituale, secundum quod Deo similatur. Secundo in respectu ad operationem per virtutes, quae ab ejus essentia fluunt, sicut potentia ab essentia animae. Et quia decebat naturam humanam in Christo maxime esse perfectam; ideo in eo, propter hoc, duplex gratiae perfectio fuit necessaria, quia quantum ad haec duo divinitas eam formaliter non perficiebat.

Ad primum ergo, quod objicitur in contrarium, dicendum, quod duplex est instrumentum: scilicet inanimatum, sicut securis, quod ita agitur, quod non agit, et ideo non indiget habitu regente in o-

pere. Secundum est instrumentum animatum, scilicet quod agit et agitur, sicut servus: et hoc indiget habitu regulante, ut imperium domini debite exequatur; ita et anima Christi ad hoc quod perfecte divina operaretur habitu indigebat.

Ad secundum quod objicitur de adoptione, dicendum, quod filiatio personam respicit ratione cujus Christus naturaliter est filius; et ideo non convenit sibi filiatio adoptiva quae extra necessitatem in contrarium naturalis filiationis importat. Gratia autem est perfectio naturae, cujus subjectum est anima quae est pars humanae naturae; et ideo quamvis gratia importet aliquid naturaliter non inherens, tamen poterat ratione naturae humanae Christo convenire.

Ad tertium quod objicitur de dissimilitudine quam tollit gratia, dicendum, quod gratiae est facere Deo similem: nec oportet quod de dissimili faciat semper similem, sed non simili similem. Nec oportet quod negatio dissimilitudinis semper praecedat tempore similitudinem, sed natura, sicut potentia est ante actum; sicut in aere prius est intelligere non lucidum actu, quam lucidum actu.

ARTICULUS II.

Ad secundum sic proceditur. Et 1. videtur, quod tres praedictae gratiae quae ponuntur in Christo non sunt idem. Non enim est idem quod communicatur alteri et quod non communicatur. Gratia capitis communicatur, quia de plenitudine ejus omnia accipiunt membra; gratia vero personae singularis, et gratia unionis non communicantur; ergo non sunt eadem gratia.

2. Praeterea, quae possunt separari actu vel intellectu non sunt idem: sed si natura humana esset vel intelligeretur non unita, non haberet gratiam unionis; haberet autem gratiam personae singularis; ergo non sunt eadem gratia.

3. Praeterea, diversorum actuum diversi sunt habitus; sed bene operari in se, et aliis influere, et divinitati unire sunt diversi actus; ergo habitus a quo egrediuntur sunt diversi; ergo ut prius.

Contra. Unius animae una est gratia gratum faciens; aut ergo gratia personae singularis, ut gratia capitis et gratia unionis in Christo, una et eadem gratia sunt, aut aliqua illarum non est gratum faciens: sed hoc falsum est; ergo sunt una gratia.

Praeterea, eadem est scientia in anima qua in se perficitur et qua suo cognoscibili jungitur et aliis cognitionem docendo influit; ergo a simili eadem est gratia in Christo qua in se perficitur et qua principio gratiae unitur et qua aliis gratiam influit; ergo et illae tres gratiae non sunt nisi una gratia.

Ad hoc dicendum, quod secundum quod gratia unionis dicitur ipsa unio gratuita, aut effectus unionis qui est communicatio idiomatum, sic differt a gratia capitis et personae singularis. Sed secundum quod gratia unionis dicitur gratia disponens ad unionem, sic una est gratia essentialiter: sed differt ratione: quia in quantum subjectum proprium ad opera bona perficit, dicitur gratia personae singularis: in quantum ad hoc quod Deo uniatur, disponit per modum congruitatis, dicitur gratia unionis: in quantum potentem efficit redundare in alios, dicitur gratia capitis. Si autem per gratiam intelligen-

tur gratuita Dei voluntas, sic constat quod est una tantum gratia, quia una et eadem voluntate Deus omnia gratuita dona largitur.

Ad quod ergo objicitur de communicatione gratiae capitis, dicendum, quod de plenitudine illius omnes accipiunt per similitudinem non per essentiam: et ideo per essentiam manet eadem cum aliis duabus gratiis in Christo.

Ad secundum quod objicitur, quod possunt separari actu et intellectu, dicendum, quod separatio quae est in intellectu, ostenderet earum differentiam in consideratione non in re. Quae vero esset in re actu, ostenderet differentiam realem, si esset. Et quia hoc non fuit, ideo idem realiter sunt.

Ad tertium quod objicitur de differentia actuum, dicendum, quod non ostendunt nisi differentiam rationis; cum ab una gratia elici possunt omnia tria. Duo quae in contrarium objiciuntur concedenda sunt, in quantum praedictae gratiae differunt ratione.

ARTICULUS III.

Ad tertium sic proceditur. Et 1. videtur, quod Christi gratia fuerit infinita. Omne enim immensum est infinitum: sed gratia Christi fuit sine mensura. Joan. 5: « Non ad mensuram dat Deus spiritum; » ergo fuit infinita.

2. Praeterea, omne finitum multotiens sumptum potest aequari alteri finito; si ergo gratia Christi fuit finita, tantum potuisset gratia alicujus sancti augmentari, quod aequaretur illi. Hoc autem est impossibile; ergo non est finita.

3. Praeterea, effectus infinitus exit a causa infinita: sed meritum Christi fuit infinitum, in quantum fuit sufficiens ad salutem infinitorum hominum; ergo gratia creans ipsum infinita.

Contra: Nullum creatum, infinitum. Gratia Christi fuit creata; ergo finita.

Praeterea, infinito nihil majus est. Si ergo gratia Christi esset infinita, gratia increata non esset ea major. Hoc autem est falsum; ergo et primum.

Ad hoc dicendum est, quod gratia dicitur donum gratis collatum. Donum autem homini Christo gratis collatum, fuit creatum et increatum. Increatus fuit ipse Spiritus sanctus qui in ejus anima requievit, ut dicitur Isa. 11. Et esse personam Verbi, quod est donatum naturae humanae per unionem: Et sic simpliciter gratia Christi est infinita. Creatum autem donum ejus, est ipsa gratia qua formaliter anima ejus perficiebatur: et haec quodammodo fuit finita, et infinita. Finita fuit secundum essentiam, in quantum habuit esse limitatum: sed quatuor modis fuit infinita. Uno modo quantum ad actum; quia concurrebat ad actum potentiae infinitae cui unita erat, idest divinae. Alio modo quantum ad eos in quos poterat operari; quia non limitabatur ad aliquos determinatos effectus, sed potest in infinitis operari redemptionem. Tertio modo quantum ad rationem medii; quia disponebat per modum congruentiae ad unionem infinite distantium, quod nulla alia gratia creata facere poterat. Quarto modo, sicut quidam dicunt, per rationem gratiae; quia quicquid fuit de ratione gratiae totum illi homini fuit collatum: et ideo dicitur gratia sine mensura, quia non ad determinatos usus sive effectus dabatur, sicut aliis sanctis; sicut alicui dicitur, quod accipiat vinum sine mensura, quando sibi totum datur, licet ipsum vinum in se sit finitum.

S. Th. Opera omnia. V. 22.

tum. Quod ergo objicitur quod fuit sine mensura, intelligendum est quantum ad dictos modos. Quod etiam objicitur, quod omne finitum potest adaequari etc. dicendum quod quantitas unius finiti secundum speciem, excedit quantitatem secundum speciem alterius finiti. et cum quantumcumque crescat quantitas individui finiti (1) excessi, nullo modo potest pervenire ad quantitatem secundum speciem finiti excedentis; sicut quantumcumque homo intelligat, non potest pervenire ad modum quo intelligit Angelus; et ideo quantumcumque crescat gratia puri hominis, non potest pervenire ad aequalitatem quantitatis gratiae hominis uniti. Diversa enim est specie perfectio gratiae secundum diversos status, ut puta, hominis viatoris vel comprehensoris et uniti, sunt diversi gradus, ad quorum unum perveniri non potest per augmentum alterius.

Ad tertium quod objicitur de merito infinito, dicendum, quod non tantum causatur ex gratia creata, sed ex increata: non quod ipsa sit forma operis; sed quia valor operis aut dignitas consideratur non tantum ex forma sui principii operis, sed etiam ex dignitate agentis, quae est persona infinita.

ARTICULUS IV.

Ad quartum sic proceditur. Et 1. videtur, quod Christi gratia possit augmentari. Omni enim finito possibilis est additio: sed gratia Christi finita erat; ergo ei possibilis erat additio.

2. Praeterea, per gratiam augetur capacitas gratiae, sicut per scientiam capacitas scientiae: sed secundum Philosophum, intellectus non corrumpitur, sed melioratur ab excellenti intelligibili; ergo quanto majorem habebat gratiam, tanto erat capax amplioris: et sic ejus gratia poterat augeri.

3. Praeterea, ad nullum effectum finitum potest divina potentia finiri quin possit majorem efficere. Capacitas gratiae in Christo, et gratia ipsa, finita erat: ergo Deus poterat majorem efficere.

Contra. Quod in termino augmenti est, augeri non potest: sed gratia Christi erat in termino augmenti, quia erat gratia comprehensoris; ergo augeri non potest.

Praeterea, Pater non invidet Filio ullam bonitatem; ergo dat ei omnem bonitatem cujus est capax; ergo non potest esse capax majoris bonitatis quam divinae; et sic non potest augeri ejus bonitas gratiae.

Ad hoc dicendum, quod augmentum non competit rei secundum quod est in termino, sed secundum quod est in via ad terminum: quia secundum quod res est in termino, tota potentialitas capacitatis impleta est ex fine implente, et ideo non habet ulterius quo crescat. Cum autem gratia detur homini ad hoc, ut per eam homo Deo uniatur, tunc gratia ad suum terminum pervenit, quando Deo maxime unit. Non autem potest magis uniri quam in persona. Et ideo gratia hominis uniti est in termino; et augeri non potest; sed proficit secundum actus: et sic intelligitur Christus gratia profecisse. Quod autem objicitur, quod omni finito possibilis est additio: Dicendum, quod loquendo de finito et additione mathematicae, idest secundum imaginationem, verum est: sed loquendo naturaliter, verum non est. Nam omnium natura constantium

(1) *Al.* infiniti.

terminus est, et ratio magnitudinis et augmenti. Et ideo gratia Christi augeri non potuit; quia tanta fuit ejus capacitas, ultra quam augmentatum esse non potuit, remanente natura humana, seu natura creata: et Deus non potest facere aliquam capacitatem increatam.

Ad secundum quod objicitur de augmento capacitatis, dicendum, quod verum est hoc citra terminum et finem augmenti; sed in conjunctione cum fine et termino per gratiam, non augetur capacitas gratiae.

Ad tertium quod objicitur de limitatione potentiae, dicendum quod hoc, quod gratia Christi major esse non possit, non est ex limitatione potentiae dantis, sed ex capacitate suscipientis.

Expositio textus.

« In sanctis vero quod solus tactus etc. » Videtur hoc esse falsum; quia Origenes super Levitico distinguit quinque sensus spirituales in sanctis.

Respondeo. Sensus spirituales possunt distingui per similitudinem ad actus sensuum corporalium, et sic sunt omnes in omnibus: vel per comparisonem ad esse animalis, sic quod tactus est de necessitate, alii de bene esse. Ideo in sanctis dicitur solus tactus, in Christo omnes; quia in sanctis omnibus sunt omnia quae pertinent ad necessitatem spiritualis vitae, sed non quaecumque pertinent ad bene esse. In Christo vero sunt omnia.

« Quibus datus est spiritus ad mensuram. »

Contra. Jac. 1: « Qui dat omnibus affluenter etc. » Glossa dicit: « Omnia dat non in mensura. » Et dicendum, quod in mensura dare, potest dupliciter intelligi. Vel ex largitate dantis; et sic nulli dat in mensura, quia omnibus dat ex largitate infinita. Vel ex capacitate recipientis; et sic dat cuilibet eum mensura, quia nulli dat ultra quam capax sit.

« Non secundum essentiam, sed secundum similitudinem. »

Contra. Ergo pari ratione, Petrus potuit dici caput. Et dicendum, quod sumitur ibi similitudo active, in quantum Christus influxit nobis gratiam, sive similitudinem ministerio, et ut causa disponens, non efficiens. Hujusmodi vero dispositio causatur ex tribus. Unum est comparatio nostra circa ipsum per fidem, spem et charitatem in ipsum. Aliud est operatio ejus circa nos per meritum et opus redemptionis, et interpellationis pro nobis. Tertium est conjunctio ejus ad nos, et e converso, secundum conformitatem naturae humanae; quia ex hac conjunctione humanum genus Deo Patri est acceptum.

« Quantum ad visum. »

Contra. Similiter posset dici Deus proficere in sapientia.

Respondeo. Dicendum, quod non est simile; quia Deus reputatur in sapientia semper esse perfectus, sed ille puer non sic reputabatur. Et iterum. In operibus Christi semper ostendebatur major et major perfectio secundum augmentum temporis, quod non est in Deo.

DISTINCTIO XIV.

Hic quaeri opus est, etc. (V. edit. nostrae tom. VII, pag. 146.)

QUAESTIO UNICA.

Postquam determinavit Magister de plenitudine donorum in Christo absolute, hic agit de eis in comparisonem ad divinam plenitudinem. Et primo agit de comparisonem humanae scientiae ad divinam. « Si vero quaeritur. » In prima parte, primo ponit aliorum opiniones, et eorum rationes. Secundo suam rationem et solutiones rationum « Quibus respondententes ». « Si vero quaeritur ». Haec pars in partes duas: quia primo determinat veritatem; secundo opponit in contrarium, et solvit objectionem ibi. « Sed si anima. »

ARTICULUS I.

Hic primo ostenditur quod in Christo non fuerit aliqua scientia creata. Qui enim scit aliquid scientia nobiliori, ut per demonstrationem, non indiget scire idem scientia ignobiliori, ut per rationem probabilem. Christus sciebat quaecumque sciri possunt, nobilissima scientia, scilicet increata; ergo non indigebat in aliquo scientia creata.

2. Praeterea, in praesentia majoris luminis superfluit minus; ergo in praesentia divinae scientiae illuminantis, superfluit lux scientiae creatae.

3. Praeterea, cognitio fidei, propter sui imperfectionem, non potest stare cum cognitione patriae: sed incomparabiliter imperfectior est humana scientia respectu divinae; ergo non potest stare cum alia in eodem sciente.

Sed contra. Scientia increata non est forma animae; ergo per illam anima non erat sciens formaliter; ergo oportet aliam in ea esse scientiam quae sit sciens, scilicet creatam.

Praeterea, plus convenit cognitio divina et humana in Christo homine, quam natura intellectiva et sensitiva in homine, et eorum cognitiones; sed cognitio intellectiva in homine non excludit sensitivam, quae est minus perfecta; ergo nec cognitio divina in Christo excludit humanam.

Ad hoc est dicendum, quod cum in Christo sit una persona, et duae naturae: quod convenit Christo ratione personae, oportet quod sit unum: sed quae convenient ei ratione naturarum, oportet quod sint duo. Unde, cum scientia pertineat ad naturam humanam et divinam, oportet in Christo ponere duas scientias, unam increatam et alteram creatam, sicut duas voluntates, et duo libera arbitria. Quod ergo objicitur de scientia nobiliori, dicendum, quod quamvis persona non indigeret, quia erat sciens divina scientia, tamen natura indigebat scientia creata tanquam propria perfectione. Non enim perfectiebatur formaliter divina. Quod objicitur de luminaribus, dicendum quod licet luminare scientiae increatae praesens esset animae Christi, ut illuminans eam effective, non tamen ut illuminans formaliter; ideo indigebat altero lumine scientiae creatae. Duorum vero luminarium lux habet fieri formaliter circa idem susceptibile, scilicet circa sensum, qui informatos lumine majori non percipit minus, cum etiam sint ejusdem rationis: quod non est in scientia creata et increata.

Quod objicit de cognitione fidei, dicendum, quod non est simile; quia utraque habet fieri circa idem susceptibile, et repugnat una alteri; sed non, sic scientia humana et divina.

ARTICULUS II.

Ad secundum sic proceditur. Et 1. videtur, quod anima Christi sciat omnia quae scit Verbum. Dicit enim Gregorius: « Quid est quod non videant, « qui videntem omnia vident? » sed anima Christi videt omnia quae videt Verbum.

2. Praeterea, majus est id quod est Deus, quam quicquid Deus facit vel potest facere, quia totum hoc est creatura; sed anima Christi videt id quod est Deus, scilicet ejus essentiam; ergo videt quicquid facit vel potest facere: et sic videt omnia quae videt Verbum.

3. Praeterea, quicquid Deus potest facere, potest manifestare: sed quicquid Deus alicui creaturae potest manifestare, animae Christi creditur esse manifestatum; ergo anima Christi scit quicquid Deus potest facere: et sic idem quod prius.

Sed contra. Creatura in nullo potest aequari Creatori: sed anima Christi creatura est; ergo non potest aequari Deo in numero seibilibum.

Praeterea, Verbum scit creare; quod de anima Christi dici non potest; ergo anima Christi nescit quicquid scit Verbum.

Respondeo. Dicendum, quod in Verbo, sive in Deo, distinguitur duplex cognitio. Una quae dicitur visionis, per quam videt Deus quasi praesentia, omnia quae sunt, erunt et fuerunt. Alia dicitur simplicis intelligentiae, per quam non solum illa scit, sed etiam omnia quae potest facere. Anima igitur Christi scit quicquid est, fuit vel futurum est, quia ipse est omnium reparator et iudex. Sed non potest scire omnia quae Deus potest facere, quia hoc esset comprehendere Deum. Quando enim aliquid ad multa se potest extendere, nihil aliud est ipsum comprehendere, quam cognoscere omnia in ipso, ad quae se extendere potest. Quod patet ex hoc, quod qui plenius aliquid cognoscit, plura in eo videt eorum in quae potest. Unde, cum anima Christi non possit comprehendere Verbum, non potest cognoscere quicquid potest facere Deus. Et ita anima Christi non novit quicquid scit Verbum, scientia simplicis intelligentiae.

Ad primum ergo dicendum, quod Gregorius loquitur quantum ad sufficientiam aedii, non quantum ad capacitatem cognoscentis, scilicet in Verbo. Verbum enim de se efficax est ratio cognoscendi omnia. Sed quia aliquis videns Verbum non comprehendit Verbum: non oportet quod cognoscat omnia, quorum Verbum potest esse ratio cognoscendi. Vel dicendum, quod ratio illa procedit de scientia visionis.

Ad secundum dicendum, quod quamvis Verbum sit majus quam id quod in Verbo cognoscitur, tamen majus est videre aliquid in Verbo, quam cognoscere Verbum: sicut facilius est cognoscere aliquid principium in se, quam conclusionem in principio intueri.

Ad tertium dicendum, quod si distributive accipiatur, Quicquid Deus potest facere, potest manifestare, verum est: quia quodlibet eorum quae potest facere, potest manifestare. Si autem intelligatur quasi collective, falsum est. Non enim Deus

potest facere, quod aliqua creatura sciat quicquid ipse potest facere, sicut nec quod possit eum comprehendere. Sed quia rationes in contrarium videntur concludere etiam quantum ad scientiam visionis, ideo ad eas respondendum est. Et dicendum ad primum, quod numerus seibilibum materialiter se habet ad scientiam, ratio vero sciendi formaliter; et ideo quantitas scientiae simpliciter attenditur non secundum numerum seibilibum tantum, sed secundum modum comparandi rationem sciendi ad seibilia, in quo modo anima Christi Verbo non aequatur.

Ad secundum, quod hoc verbum, scit, est verbum protheticum; ut cum dicitur: Iste scit hoc facere, intelligitur, scit se hoc facere. Et quia anima Christi non scit se creare, vel qualiter ipsa creat: ideo non potest dici, quod ipse scit creare. Novit tamen illam artem et virtutem qua Deus creat, videndo Verbum.

ARTICULUS III.

Ad tertium sic proceditur. Et 1. videtur, quod anima Christi non cognoscat infinita in Verbo. Potentia enim animae Christi cum sit finita, non potest capere infinita; sed qui scit aliquid, capit illud; ergo non novit in Verbo infinita.

2. Praeterea, ex infinitate divinae potentiae est, quod potest facere infinita: sed anima Christi non comprehendit infinitatem divinae potentiae; ergo nec in ea cognoscit infinita.

3. Praeterea, impossibile est pertransire infinita: sed non potest esse iudicium de infinitis, nisi pertransiendo infinita; ergo impossibile est iudicare de infinitis, et sic cognoscere infinita.

Ad oppositum. Anima Christi scit quicquid scit Verbum scientia visionis, ut dictum est: sed durante generatione in infinitum, Verbum scientia visionis sciret infinita; ergo potentiae istius facta anima Christi sciret infinita.

Praeterea, non minus est cognoscere infinitum, quam infinita; sed anima Christi nescit infinitum, quia videt Deum: ergo potest noscere infinita.

Respondeo. Dicendum, quod sicut dictum est, anima Christi scit omnia quaecumque Deus scit scientia visionis; et ita scit omnes creaturas praesentes, praeteritas et futuras. Et quamvis non comprehendat Verbum, comprehendit tamen creaturas quas cognoscit in Verbo. Quicumque autem comprehendit aliquid, scit omne hoc, ad quod illius virtus se extendit: sicut Deus, qui comprehendit essentiam suam, scit omnia quae sunt in potentia sua. Unde et anima Christi scit omnia quae sunt in potentia omnium creaturarum. In potentia autem creaturae sunt infinita, quamvis nunquam reducerentur ad actum. Reducerentur tamen quodammodo successive, si mundus in infinitum duraret. Et ideo anima Christi secundum quidem scientiam visionis, scit tantum finita, sed scientia simplicis intelligentiae scit infinita, ut quidam dicunt, in quantum scit multa quae sunt in potentia creaturae, quae nunquam erunt nec fuerunt. Potest etiam aliter dici, quod cum capacitas animae Christi tanta fuerit, qua major non tantum aliqua creatura fuerit, sed nec potuerit esse, ideo dicendum, quod non tantum est sibi communitata cognitio cujuslibet creaturae praeteritae, praesentis et futurae creatae, sed etiam possibilis creari. Unde si possent infinita

actu creari, omnia haec cognosceret anima Christi. Sed quia communiter dicitur, quod non possunt infinita creari: ideo anima Christi non cognoscit infinita, secundum quod alii dicunt, etiam scientia simplicis intelligentiae. Sed hoc per impossibile posito, anima Christi cognosceret infinita, scientia simplicis intelligentiae.

Quod ergo objicitur, « Quod cum potentia animae Christi etc. » dicendum, quod si recipiendo in se sciret infinita, esset infinita. Sed infinita quae sunt in Verbo intuendo in Verbo, non propter hoc est infinita.

Ad secundum quod objicitur, quod comprehenderet divinam potentiam, dicendum, quod hoc est falsum; quia praeter ea quae sciret Deus multa alia posset facere; cum ejus potentia non possit a creatura aliqua limitari, sicut aliqui volunt.

Ad tertium, quod objicitur de iudicio infinito, dicendum, quod sicut jam dictum est, uno finito intuitu iudicare de infinitis non est impossibile. Hoc enim Deus facit, quia seipsum, et simul iudicat de infinitis possibilibus quae cadunt sub sua potestate, cum constet eum ea distincte cognoscere. Iudicare autem de infinitis discurrendo per species infinitas, hoc est impossibile, quia sic porteret numerare et pertransire infinita.

ARTICULUS IV.

Ad quartum sic proceditur. Et 1. videtur, quod in scientia rerum in proprio genere Christus profecerit. Non enim proficere in eo, quo quis potest proficere, est magnus defectus: sed in omni scientia, qua quis non omnia scit, potest proficere; ergo cum Christus per hanc scientiam non omnia sciverit, videtur quod potuerit proficere in ea.

2. Praeterea, intellectus agens abstrahabat in ipso species a phantasmatis, quia hoc est ejus actus, alias frustra sumpsisset eum: sed species abstracta a phantasmatis recipitur in intellectu possibili; ergo semper in Christo plures species recipiebantur in intellectu possibili ejus; ergo proficiebat in ea.

3. Praeterea, omni finito possibilis est additio: simplicitas cognitionis animae Christi finita erat; ergo possibilis est ei additio; ergo poterat proficere in ea.

Contra. Perfecti non est proficere: sed Christus secundum animam fuit perfectus; ergo non profecerit.

Praeterea, Damascenus dicit: « Qui dicunt Christum proficere sapientia et aetate, ut additamentum suscipientem, non eam quae secundum hypostasim, unionem est, venerantur: » sed illa unio omnino veneranda est; ergo non debemus dicere, quod in scientia profecerit.

Respondeo. Dicendum, quod praeter scientiam qua anima Christi praescit res in Verbo, cognoscit etiam res in proprio genere per species intelligibiles. Et haec scientia ponitur in anima Christi ad hoc, quod naturalis perfectio ei non subtrahatur. Naturaliter enim anima humana nata est perfici per species intelligibiles. Secundum hanc autem scientiam non novit omnia simpliciter, sed omnia illa, ad quae naturalis ratio potest; et hoc per lumen scientiae infusum, quod quidem plenissime in instanti conceptionis percepit, sicut et de gratia dictum est. Unde quantum ad hanc scientiam non profecerit, neque quantum ad numerum scibilium, neque quantum ad modum sciendi; sed solummodo

quantum ad certitudinem experimentalem; sicut cum aliquis videt sensibiliter, quod prius habitu scientiae tenebat.

Ad quod ergo primo objicitur, quod qui non proficit in eo quo potest proficere etc. dicendum, quod quamvis Christus hoc genere cognitionis, scilicet rerum in proprio genere, non omnia scivisset, tamen non potuit quantum ad ea proficere; tum quia sunt quaedam quae hoc genere cognitionis cognosci non possunt, sicut essentia Dei; tum quia quaedam singularia contingentia non sunt de perfectione scientiae. Singularia enim non cadunt sub arte.

Ad secundum quod objicitur de intellectu agente, dicendum, quod per lumen intellectus agentis, in Christo non fuit aliqua species de novo recepta in intellectu possibili ejus, cum tales species prius fuerint in eo; sed fuit nova conversio facta a speciebus quae erant in phantasia; sicut aliquid sciens convertitur super idem imaginatum.

Quod objicitur, Quod finita, dicendum, quod quamvis finita esset, tamen erat in termino suo naturali, ideo nihil ei addi poterat.

ARTICULUS V.

Ad quintum sic proceditur. Et 1. videtur, quod anima Christi habuerit omnipotentiam. Matth. ult. dicitur: « Data est mihi omnis potestas in caelo et in terra: » et constat quod loquitur ibi « Christus secundum humanam naturam; » ergo secundum humanam naturam habuit omnipotentiam.

2. Praeterea, scientia practica includit operationem. Sed anima Christi habuit omnem scientiam practicam; ergo potuit omnia operari, et sic fuit omnipotens.

3. Praeterea, sicut omnipotentia Dei est infinita, ita omnium scientia; sed fuit capax omnis scientiae; ergo omnipotentiae.

Sed contra. Omnipotentia est virtus activa infinita: nulli autem substantiae finitae potest dari virtus infinita; ergo animae Christi non potuit dari omnipotentia.

Praeterea, de omnipotentia est potentia conservandi ipsam animam Christi: hoc non potuit ei dari; ergo etc.

Ad hoc dicendum, quod unumquodque, secundum quod est in potentia, habet pati; sed secundum quod in actu est, habet agere. Infinitas ergo potentiae activae ponit infinitum in actu; sed infinitas potentiae passivae non nisi infinitum in potentia. Et quia in creatura non potest esse infinitum actu, sed potentia tantum; ideo non potest dari creaturae infinita potentia activa, quia esset essentia infinita; sed passiva potest, ut patet in materia prima. Cum ergo omnipotentia ponat in creatura potentiam activam infinitam, omniscientia non, sed passivam tantum, non potuit humanae naturae in Christo communicari omnipotentia sicut omniscientia. Quod ergo objicitur primo. « Data est mihi etc. » Dicendum, est quod illa datio intelligitur dupliciter: vel secundum rem, vel secundum manifestationem. Secundum rem intelligitur omnipotentia dari Christo ab instanti conceptionis, secundum quod homo: non per informationem, sed per unionem secundum communicantiam attributorum. Secundum manifestationem vero

a tempore resurrectionis, secundum quod res dicitur fieri quando innotescit.

Ad secundum quod objicitur de scientia practica, dicendum, quod non solum est ad productionem operis, sed ad cognitionem operis sive directionem. Primo modo concernit causalitatem, quia practica est secundum rem et modum. Unde qui sic habet scientiam practicam, cum causalitate scilicet, dicitur habere practice. Secundo modo non quamvis sit practica secundum rem, non tamen secundum modum: hoc modo Christus habuit scientiam practicam, sed non practice. Quod objicitur de omniscientia: Dicendum, quod non est simile: quia omnipotentia ponit in creatura potentiam activam infinitam, sed omniscientia non. Non enim importat rerum causalitatem, sed assimilationem.

Expositio textus.

« In nullo creatura Creatori aequatur. » Intelligendum est quantum ad rationem rei habitae, et quantum ad modum habendi; quia si quid idem communicatur Deo et creaturae, non tamen secundum eundem modum, et secundum eandem rationem. « Nemo novit quae sunt Dei. » Non excluditur ex hoc Pater et Filius, qui habent eandem potentiam cum Spiritu sancto. « Naturaliter est capax scientiae. » Est enim anima facta ad sciendum omnia, non ad faciendum omnia.

DISTINCTIO XV.

Illud quoque praetermittendum non est etc. (V. edit. nostrae tom. VII, pag. 159.)

QUAESTIO UNICA.

ARTICULUS I.

Illic quaeritur primo, utrum debuit naturam humanam cum infirmitatibus nostris assumere. Et 1. videtur, quod non. Contraria enim contrariis curantur, sed Christus naturam humanam assumpsit, ut curaret defectus nostros; ergo defectus ejus assumere non debuit, sed potius conditiones oppositas defectibus.

2. Praeterea, poena non debet esse nisi cum culpa praecessit: sed in Christo culpa esse non potuit; ergo nec poenalis defectus in eo esse debuit.

3. Praeterea, defectus, quos cum humana natura accipimus, contrahere dicimur: si ergo Christus cum humana natura defectus nostros assumpsit, videtur quod eos contraxerit; quod non conceditur.

4. Praeterea, Christus venit auferre omnes defectus nostros; si ergo ad hoc aliquos assumpsit ut eos sanaret, videtur quod pari ratione omnes debuerit assumere, ut ignorantiam, culpam, et alia hujusmodi.

Contra. Ad Hebr. 2: « In quo passus est, et tentatus, potens est his qui tentati sunt auxiliari: » sed Christus ad auxiliandum hominibus venit; ergo debuit eorum defectus suscipere.

Praeterea, Christus venerat ad redimendum genus humanum: sed opus redemptionis congrue complere non poterat, nisi per passionem; ergo debuit defectus assumere, secundum quod passibilis fuit.

Ad hoc dicendum, quod Christus ad hoc venit ut humanum genus reduceret in Deum a quo per peccatum abduetum erat: et ideo sicut mediator, ea quae Dei sunt, transfundit in nos, et ea quae nostra sunt, quodammodo in Deum. Non autem nostra quae in nobis tantum sunt, et a nobis, non a Deo, scilicet peccata, quia per haec ad Deum non ordinamur, sed magis deordinamur a Deo: sed ea quae in nobis a Deo sunt, omnia in se ordinata sunt, et ad ipsum nos per ea ordinamur; et ideo ea quae fecit in nobis, ut puta naturam secundum perfectiones naturae, et defectus poenales, et quosdam naturales, sicut indigentiam cibi quam homo in statu innocentiae habuisset, in Deum transtulit, non in naturam divinam, sed in personam, assumendo humanam naturam. Hoc enim in sua persona suscipere, est Deo ipsa repraesentare ad placandum nobis ipsum.

Ad illud quod objicitur in contrarium, quod contraria contrariis curantur, optime, per curationem causae suae, et per consequens per contraria causae. Causa autem horum defectuum nobis est culpa; et ideo removendo culpam sanavit defectus. Culpam autem removet pro peccatis satisfaciendo per poenam quam sustinuit; et sic suscepit nostros defectus ut eos curaret.

Ad secundum quod objicitur, quod poena non debet praecedere, nisi culpa praecesserit, dicendum, quod culpa praecessit in natura, quamvis non in persona, cujus vices in satisfaciendo gerebat.

Ad tertium dicendum, quod nos dicimur contrahere hujusmodi defectus, quia ex debito peccati originalis, cum quo naturam humanam accipimus, de necessitate in nobis sunt; Christus autem accepit naturam humanam sine peccato originali; et sic hos defectus habuit, non ex aliqua necessitate debiti, sed ex pura voluntate assumentis. Et propter hoc dicitur, quod assumpsit hujusmodi defectus, non contraxit.

Ad quartum dicendum, quod Christus venerat curare defectus humanae naturae, ad quod requirebatur gratiae plenitudo; et ideo defectus illos Christus non suscepit qui pertinent ad imperfectiorem gratiae, vel alienius gratuiti doni; sicut est ignorantia, difficultas ad bonum, et cetera hujusmodi. Nec iterum oportuit quod assumeret omnes defectus personales, ut lepram et caecitatem, et alia hujusmodi, quaeveniuntur in diversis personis; sed solum illos qui consequuntur totam humanam naturam, ut famem sitim et hujusmodi. Et hoc est quod dicit Damascenus: quod Christus assumpsit passiones naturales, idest, quae consequuntur totam naturam, et inde trahibiles, idest quae non pertinent ad defectum gratiae.

ARTICULUS II.

Ad secundum sic proceditur. Et 1. videtur, quod in Christo non fuerint animae passiones. Dicitur enim de Christo, Isa. 42: « Non erit tristis, neque turbulentus; » ergo pari ratione, neque passiones alias habuit.

2. Praeterea, per virtutem homo quietatur a tumultibus passionum: sed in Christo fuerunt perfectae virtutes; ergo non fuerunt in eo animae passiones.

3. Praeterea, passiones animae impediunt iudicium rationis. Unde Gregorius dicit, quod sicut ira

per vitium excaecat oculum mentis, ita per zelum turbat: sed in Christo iudicium rationis nullatenus fuit impeditum; ergo in Christo passiones animae non fuerunt.

Sed contra est, quod ipse dicit, Matth. 26: • Tristis est anima mea usque ad mortem: • et Marc. 14 dicitur: • Coepit Jesus pavere et taedere. •

Praeterea, Christus magis venit ad curandum defectus animae quam corporis. Sed ipse assumpsit dolores corporis ad sanandum defectus corporales; ergo similiter assumpsit passiones animae ad sanandum animae defectus.

Respondeo. Dicendum, quod in Christo vere fuerunt animae passiones, ut gaudium, dolor et huiusmodi; sed secundum tres conditiones differentes a nobis. Primo, quia in nobis passiones quandoque deducunt rationem, quod in Christo non fuit: et ideo dicitur quod timor in Christo non fuit passio quasi perfecta, sed propassio, quasi inchoatio passionis in inferiori parte. Secundo, quia in nobis passio, etsi non deducat rationem, tamen aliquantulum eam commovet et impedit; quod in Christo non fuit, virtute Verbi faciente, ut unaquaeque potentia haberet propriam operationem sine impedimento alterius, ut per Damascenum patet. Tertio, quia in nobis frequenter passiones praeveniunt iudicium rationis; et tunc dicitur passio motus subitus. Sed hoc in Christo non fuit: quia inferiores vires ita erant subjectae rationi, quod nullus motus in eis surgere poterat, nisi ratione ordinante.

Ad primum ergo dicendum, quod per illam auctoritatem Isaiae, excluditur a Christo tristitia rationem deducens vel impediens.

Ad secundum dicendum, quod passiones illae quae sequuntur iudicium rationis, non impediunt perfectionem virtutis, imo eam ostendunt. Illae vero aliquantulum impediunt, quae iudicium rationis praeveniunt.

Ad tertium dicendum, quod passiones impediunt iudicium rationis in nobis, non autem in Christo, ratione iam dicta.

ARTICULUS III.

Ad tertium sic proceditur. Et 1. videtur, quod dolor non fuerit in Christo in superiori parte rationis. Passio enim, secundum Philos. in 7. Physicorum, non est nisi in parte animae sensitiva: sed dolor est quaedam passio; ergo non ponitur in superiori ratione Christi.

2. Praeterea, tunc anima a passione deducitur, quando passio usque ad superiorem rationem pertingit: sed anima Christi non deducebatur a passionibus; ergo passio doloris non pervenit usque ad superiorem rationem in Christo.

3. Praeterea, contraria non possunt simul esse in eodem: sed in superiori ratione Christi erat maximum gaudium ex fruitione divinitatis; ergo non potuit esse ibi dolor ex passione.

Sed contra est, quod in Psal. 87 dicitur: • Repleta est malis anima mea. • Glossa exponens de Christo, • id est doloribus: •; ergo in qualibet parte animae Christi fuit dolor.

Praeterea, major est affinitas potentiarum animae ad essentiam animae, quam animae ad corpus: sed anima secundum essentiam compatitur corpori patienti; ergo multo magis superior ratio compatiebatur in Christo essentiae patienti.

Respondeo. Dicendum, quod ratio superior dupliciter potest considerari. Uno modo secundum quod in essentia animae radicitur; et sic est natura hominis, quia forma eius. Alio modo secundum quod per propriam operationem convertitur in suum objectum; et sic est ratio ut ratio. Primo modo dolor fuit in ratione superiori animae Christi; quia laesio corporis per accidens redundabat in animae essentiam, prout est forma corporis; et per consequens in omnes potentias, secundum quod in esse animae radiceantur. Secundo modo in ratione superiori animae Christi dolor non fuit, quia ex consideratione sui objecti, scilicet boni aeterni, nulla sibi dolendi occasio praebatur; sed maximi gaudii. Et ideo dicitur quod ratio superior patiebatur dolorem ut natura, non autem ut ratio; sicut si aliquis pungeret oculum, diceretur visus pati ut est natura oculi, non ut est visus. Sic enim patitur quando laeditur ex vehementi luce.

Ad primum ergo dicendum, quod Philosophus loquitur de passione proprie dicta, quae est cum transmutatione corporali; et iterum secundum quod passio inest alieni potentiae per operationem propriam. Superiori autem rationi potest inesse passio communiter accepta; et etiam passio proprie dicta; non secundum actum proprium, sed secundum quod radicitur in essentia animae.

Ad secundum dicendum, quod dolor non venit usque ad superiorem rationem, ut immutans eam a rectitudine propriae operationis; et ideo non fuit deducta a passionibus.

Ad tertium dicendum, quod dolor et gaudium, quae fuerunt in superiori ratione Christi, non fuerunt contraria; quia non fuerunt de eodem; sed gaudium de fruitione, dolor de passione. Et iterum non est inconveniens, quod contrariorum motuum unus attribuitur alicui rei per se, et alius per accidens; sicut patet de eo qui movetur in navi in contrarium motus navis. Dolor autem passionis attribuitur animae Christi quasi per accidens; gaudium vero fruitionis per se.

ARTICULUS IV.

Ad quartum sic proceditur. Et 1. videtur, quod in Christo quantum ad corpus non fuerit verus dolor. Major fuit gratia in Christo quam in tribus pueris: sed tres pueri, virtute gratiae, in fornace sunt conservati illaesi ab ignis ustione, ut patet Dan. 3; ergo multo fortius corpus Christi immune fuit propter abundantiam gratiae, a passionis dolore.

2. Praeterea, Christus perfectius contemplabatur Deum quam Moyses: sed Moyses ex vehementia divinae contemplationis non sensit afflictionem famis vel sitis, eum quadraginta diebus et noctibus a cibo abstinuit, ut habetur Exod. 34; ergo multo fortius Christus dolorem passionis non sustinuit.

3. Praeterea, secundum Philosophum in 6. Eth., Tristitia vehemens omnem delectationem impedit, etiam non contrariam; ergo et contra, delectatio vehemens omnem dolorem aufert: sed in anima Christi fuit vehementissima delectatio de fruitione; ergo non potuit in eo esse dolor passionis.

Sed contra est quod dicitur Isa. 53: • Vere languores nostros ipse tulit, et dolores nostros ipse portavit. •

Praeterea, quanto complexio est temperatior, tanto ex laesione major dolor percipitur: sed Chri-

stus ereditur habuisse temperatissimam complexionem; ergo ex laesione corporis maximum dolorem sensit.

Respondeo. Dicendum, quod ad dolorem duo concurrunt: scilicet laesio ex parte corporis, et sensus ex parte animae. Est enim dolor sensus laesionis potentiae. In Christo non fuisse verum dolorem, est alterum praedictorum remove, vel utrumque. Laesio autem corporis de Christo negari non potest nisi negetur veram carnem habuisse, sicut Manichaei dicunt. Sensus autem laesionis huius negari non potest in Christo, nisi dicatur quod non habuit animam sensitivam; sed solum corpus, et divinitatem, ut Eudomius dicebat. Utrumque autem horum est erroneum; et ideo erroneum est dicere verum dolorem in Christo non fuisse.

Ad primum ergo dicendum, quod pueri fuerunt immunes a laesione ignis, non virtute alicujus gratiae creatae, eum adhuc corpora eorum non essent impassibilia: sed sola virtute Dei miraculose eos protegente; per quam quidem potuisset et corpus Christi immune ab omni laesione servari, nisi quia propter redemptionem humani generis decebat eum pati.

Ad secundum dicendum, quod ex naturali colligantia, qua potentiae animae in una essentia radicantur, contingit quod dum una potentia intenditur in suo actu, reliqua in suo actu impeditur, et quod ex potentiis sit mutuus refluxus in invicem; et ex hoc contigit in Moyse, quod per vehementiam contemplationis etiam inferiores vires absorbebantur ne afflictionem famis sentirent. Sed hoc in Christo locum non habet; quia Verbum quod erat unum permittebat unamquamque potentiam pati et operari quod erat ei proprium, sine hoc quod de una fieret impedimentum in altera, vel refluxus; et hac ratione de eo singulariter fuit verum quod erat simul viator et comprehensor. Et propter hoc nec contemplatio, aut vehemens delectatio quae erat in superiori parte ex fruitione, impediabat sensum laesionis sive dolorem, nec e converso. Unde patet solutio ad tertium. Philosophus enim loquitur secundum communem et naturalem cursum.

Expositio textus.

« Non corpus sentit sed anima etc. » Sciendum quod eorum quae sunt conjuncta, quaedam insunt toti ratione animae, sicut sentire et huiusmodi; et haec attribuuntur animae eodem modo loquendi quo dicitur calor calefacere, quia est principium calefaciendi. Quaedam enim insunt toti ratione corporis, ut dormire et huiusmodi; et haec attribuuntur corpori non animae, quamvis toti conjuncto convenient. Quaedam non per corpus, immo etiam sine corpore. Sciendum quod delectari, dolere contristari et huiusmodi quandoque nominant passionem sensibilem, quandoque actum voluntatis aliquid desiderantis vel refugientis. Primo modo sunt conjuncti solius. Secundo modo, et animae separatae.

« Suscepit nostram vetustatem. »

Sed contra. Simile non consumit simile, sed contrarium suum.

Respondeo. Dicendum, quod non per se vetustas poenae consumit poenam, sed in quantum est materia meriti; et sic est conjuncta novitati gratiae, et sic opponitur culpae, et sic etiam poenae ex culpa causatae.

« Non assumpsit ignorantiam. »

Sed contra. Damascenus: « Naturam ignobilem et servilem accepit. » Item Leo Papa: « Adoraverunt Magi infantem in nullo a puerili generalitate differentem. »

Respondeo. Damascenus loquitur de natura per incestum separata, Leo Papa secundum apparentiam, et non secundum existentiam « Unigenitus Deus hominem verum. » Verba haec Hilarii videntur dolorem passionis et terrorem excludere, quae tripliciter solvuntur. Quidam enim dicunt Hilarium hoc retractasse; et hoc videtur probabile ex his auctoritatibus, quas Magister in litera adducit, quarum una incipit ibi, « Interroga quid sit. » Alia « cum haec passionum genera. » Alii dicunt quod loquitur de Christo quantum ad divinitatem. Solutio autem Magistri consistit in hoc quod non dolorem, sed tria circa dolorem voluit a Christo remove. Primo dominium doloris: quod patet ex hoc quod dicit: « Quoniam igitur infirmitatem dominatam. » Secundo meritum doloris: quod patet ex hoc quod dicit: « Non enim vitiosae infirmitatis. » Tertio necessitatem doloris: quod patet ex hoc quod dicit: « Videmus an ille passionis ordo. » Infirmitatem non habens naturam ad dolendum. Hoc dicitur, quia non erat in natura illa meritum doloris, id est peccatum. « Quia differentia corporis ista ex natura ut feratur in ulnis. » Hoc non de natura corporis considerata in se, sed ex virtute deitatis adjunctae. « Ut fieri potest. » Hic videtur ab ipso excludere timorem et tristitiam. Dicendum, quod loquitur de timore prout est passio, et non prout est propassio. « Pati potuit etc. et passibile esse non potuit. » Dicendum, quod pati significat passionem per modum actus. Unde ad suppositum refertur, secundum quod est suppositum cujuscunque naturae. Quia pati inest sibi ratione humanae naturae, ideo dicitur quod pati potuit. Passibile autem significat potentiam ad patiendum, ut illud informantem, de quo dicitur. Et quia verbum, secundum se non informabatur potentia patiendi, ideo dicit quod passibile esse non potuit, scilicet secundum se, quamvis passibile fuerit ratione naturae assumptae.

DISTINCTIO XVI.

Hic oritur quaestio etc. (V. edit. nostrae tom. VII, pag. 175.)

QUAESTIO UNICA.

ARTICULUS I.

Hic primo quaeritur, et 1. videtur, quod necessitas moriendi sit tantum homini ex peccato. Ad Rem. 7: « Corpus mortuum est propter peccatum, » Glossa « idest necessitati mortis addictum. »

2. Praeterea, natura dat instrumentum proportionatum suo motori; si ergo motor humani corporis est immortalis, instrumentum ejus naturaliter est immortale: necessitas igitur moriendi in corpore humano non est naturalis.

3. Praeterea, omne quod inest ex judicis sententia culpam prohibentis, inest ex culpa: sed mortalitas inest ex judicis sententia. Gen. 3: « Cinis es et in cinerem reverteris; » ergo inest ex culpa.

Sed contra. Omne compositum ex contrariis naturaliter est corruptibile, cum contraria agant et patiantur adinvicem: sed tale fuit humanum corpus

ex sua prima institutione: ergo naturaliter est corruptibile.

Praeterea, omne generabile naturaliter est corruptibile, sicut probatur primo Caeli et mundi: sed corpus humanum naturaliter est generabile; ergo corruptibile.

Ad hoc dicendum, quod in statu innocentiae quamvis corpus ratione contrarietatis principiorum haberet aliquem ordinem ad corruptionem, tamen in anima erat virtus continendi corpus sub se, quamdiu ipsa contineretur sub Deo: per peccatum vero illa sublata est. Nunc igitur necessitas moriendi partim est ex natura conditionis humani corporis, ut a causa disponente: partim a peccato ut a causa removente prohibens; et hoc modo necessitas moriendi est poena ex peccato contracta.

Ad primum ergo quod objicitur de Apostolo, dicendum, quod peccato attribuitur necessitas moriendi, ut causae meritoriae removenti prohibens.

Ad secundum quod objicitur de instrumento, dicendum, quod non oportet instrumentum proportionatum esse motori in duratione, sed in aptitudine suscipiendi impressionem motoris, quamdiu est instrumentum ejus.

Ad tertium quod objicitur de sententia, dicendum, quod non totaliter est a sententia: sed partim est a dispositione naturali corporis.

Ad primum vero quod in contrarium objicitur dicendum, quod contraria, ex quibus corpus humanum constitutum erat, virtute animae innocentis continebantur, ita quod ad dissolutionem corporis agere non potuissent.

Ad secundum dicendum, quod quamvis homo in statu innocentiae ex natura materiae esset corruptibilis, tamen ex virtute formae, scilicet animae justitia originali perfectae, habebat quamdam incorruptibilitatem, ut scilicet posset non mori.

ARTICULUS II.

Ad secundum sic proceditur. Et 1. videtur, quod in Christo non fuerit necessitas moriendi. Isa. 55: « Oblatus est, quia ipse voluit. » Quod autem fit voluntarie, non subest necessitati; ergo non habebat necessitatem moriendi.

2. Praeterea, quod ex necessitate fit, non est laudabile vel meritorium: sed mors Christi fuit laudabilis et meritoria; ergo non habuit necessitatem moriendi.

3. Praeterea, potentius non de necessitate patitur a minus potente: sed Christus fuit potentior quolibet alio passionem vel mortem inducente; ergo non habuit necessitatem moriendi vel patendi.

Sed contra. Sicut Christus fuit verus Deus, ita fuit verus homo; sed in divinitate habuit attributa naturalia caeterarum personarum divinarum; ergo in humanitate habuit attributa naturalia caeterorum hominum, et ita necessitatem moriendi.

Praeterea, Christus assumpsit omnes defectus humani generis, qui ad defectum gratiae non pertinent, ut eos curaret, sicut prius dictum est: sed necessitas moriendi est defectus toti humano generi communis, qui per Christum removebitur; ergo illum defectum Christus assumpsit, cum non pertineat ad imperfectionem gratiae.

Respondeo. Dicendum, quod quidam dicunt in Christo aliam necessitatem moriendi non fuisse, nisi ex fine; quia scilicet necessarium erat cum mori ad

redemptionem humani generis. Sed hoc non videtur solvere quaestionem: ex hoc enim habetur quare necessarium fuit Christum mortem suscipere, non quod necessitas mortis sit assumpta. Et iterum non videtur sufficienter dici, quod in Christo fuit necessitas moriendi etiam ex parte materiae. Assumpsit enim corpus absque illa dispositione, per quam in statu innocentiae corpus Adae conservabatur a mutua contrariorum actione in invicem ad dissolutionem. Et hoc patet ex hoc, quia passus est fameam, et sitim, et alia hujusmodi. Necessitas autem materiae est necessitas absoluta. Et ideo secundum alios dicendum est, quod referendo ad humanam naturam Christus absolutam necessitatem patendi assumpsit, quamvis ista necessitas naturae divinae illius potentiae non derogat, per quam poterat mors prohiberi.

Ad primum ergo quod objicitur de voluntate moriendi, dicendum, est quod voluntas moriendi, non excludit naturalem moriendi necessitatem in Christo, sicut et in multis sanctis martyribus hoc apparet.

Ad secundum, quod objicitur. Quod fit de necessitate, non est laudabile, dicendum, quod si haec necessitas tollat promptitudinem voluntatis, verum est: sed non, si est cum voluntatis promptitudine.

Ad tertium quod objicitur: « Potentius non de necessitate patitur: etc. » Dicendum, quod non est inconveniens, quod aliquid corpore Christi fuerit, secundum quid, potentius, quamvis non simpliciter; sicut clavus, et lancea, in quantum clavus fuit durus, quod pertinet ad potentiam naturalem: et caro Christi mollis, quod pertinet ad naturalem impotentiam, secundum Philosophum in Praedica- mentis, fuerunt corpore Christi potentiores, sed non simpliciter.

ARTICULUS III.

Ad tertium sic proceditur. Et 1. videtur, quod necessitas patendi, vel moriendi, subfuerit voluntati humanae Christi. Joan. 10: « Nemo tollit a me animam meam, sed ego pono eam; » ergo in ejus voluntate humana erat eam ponere, vel sumere. Hoc enim hominis est, non Dei: quia nunquam deposuit eam, ex quo semel assumpsit.

2. Praeterea, sicut inferiores vires sunt sub ratione, ita corpus sub anima; sed inferiores vires in Christo obediebant et subjacebant voluntati rationis; ergo et corpus quantum ad ea quae in eo accidere poterant, subjacebat voluntati Christi humanae.

3. Praeterea, non minus poterat anima Christi per gratiam unionis, quam anima Adae per gratiam innocentiae a morte conservare; ergo et anima Christi similiter per gratiam unionis.

Sed contra. Conservare a morte quod habet necessitatem moriendi, miraculum est: sed miraculum opus est solius potentiae divinae; ergo animae Christi non communicabatur conservare corpus suum a morte, quod habebat necessitatem moriendi.

Praeterea, corpus humanum non servatur a morte nisi per gratiam innocentiae, sicut fuit in primo statu; vel per gloriam, sicut in statu ultimo: sed utrumque istorum dare est solus Dei; ergo anima Christi corpus suum non poterat a corruptione praeservare.

Ad hoc dicendum est quod circa hoc est du-

plex opinio. Quidam enim dicunt, quod erat sub voluntate animae Christi corpus suum a corruptione per gratiam unionis conservare, sicut erat in Adam, sub cuius erat voluntate, per gratiam innocentiae, corpus suum conservare illaesum.

Sed contra est, quia non erat similis dispositio ex parte corporis susceptibilis utriusque: alias Christus nihil accepisset in conditione suae naturae de secundo statu: quia nihil aliud videtur de secundo statu accepisse, nisi dispositionem corporis qua necessarium sit eum pati et mori. Posse etiam pati et mori fuit etiam in primo statu. Et ideo alii dicunt, et probabilius, quod ejus non suberat voluntati; quia ejus est solius immutare cursum et legem naturae impositam, qui naturam instituit et ordinavit, qui est solus Deus. Et ideo neque corporalis aliqua virtus, neque spiritualis aut animae aut Angeli, neque etiam Christi animae, potuit immutationes facere legis naturae impositae divinitus, nisi per modum orationis. Et ideo, cum secundum legem et cursum naturae mors corpus Christi consequeretur, ut Magister dicit in littera, ideo necessitas moriendi in ipso non subdebatur voluntati ejus humanae, sed solum divinae.

Quod ergo objicitur de Joan. dicendum, quod persona divina loquitur, quamvis in quantum homo, qui et in hoc divinae suberat voluntati.

Ad secundum quod objicitur de sensualitate, dicendum, quod quamvis esset sub ejus regimine sensualitas, non tamen vires naturales; quia vires sensitivae natae sunt obedire rationi; vires autem naturales, vel animae vegetabilis, et etiam corporis, non sunt natae obedire rationi: et ideo non est similis ratio.

Ad tertium quod objicitur de gratia innocentiae, dicendum est quod si eadem esset dispositio ex parte corporis susceptibilis, bene sequeretur: sed jam non sic erat, ut dictum est.

ARTICULUS IV.

Ad quartum sic proceditur. Et 1. videtur, quod claritas corporis gloriosi non potuerit simul inesse cum mortalitate assumpta. Luc. 11: « Non gustabunt mortem, donec videant regnum Dei. » Glossa: « Glorificationem corporis in imaginaria repraesentatione futurae beatitudinis. »

2. Praeterea, non possunt eidem contraria inesse. Sed corpori Christi inerat opacitas; non ergo naturalis claritas: et sic idem quod prius.

3. Praeterea, excellens claritas visibilis corrumpit visum, quia excellentiae sensibilibus corrumpunt sensum, secundum Philosophum: sed claritas illa, licet maxima, non laesit apostolorum visum; ergo non fuit vera claritas visibilis, sed imaginabilis.

Sed contra. Sicut argumentatur Augustinus, Si unum eorum quae dicuntur in Evangelio, non est verum, sed imaginarium: similiter potest dici de aliis.

Praeterea, nihil fit simulatorie in operibus veritatis; ergo illa claritas fuit vera, non simulatoria.

Ad hoc dicendum, quod claritas corporis Christi quam habuit in transfiguratione fuit vera in se: sed tamen imago et signum claritatis gloriosae et non claritas gloriosa. Et ratio est, quia ille fulgor fuit aliqua proprietas corporis gloriosi permanens in corpore: sed miraculose et divinitus inductus in Christi corpore, cum contraria non simul sint in eodem. Unde corpus Christi tunc non poterat habere

S. Th. Opera omnia V. 22.

claritates gloriosi, cum adhuc glorificatum non esset. Fuit tamen ille fulgor ejusdem generis cum fulgore corporum glorificatorum; non tamen ita perfectus, sed sicut claritas viae assimilatur claritati patriae. In Moyse autem fuit similis claritas claritati patriae, sicut fides visioni, non ejusdem generis: et ideo aspectum intuentium offendebat; quod non fuit de Christi claritate: et ratio erat, quia anima Christi glorificata erat, non autem anima Moysi. Unde et corpori ejus poterat convenienter attribui claritas gloriosa, non autem corpori Moysi, ne prius esset gloria in corpore quam in anima.

Quod ergo objicitur de Glossa, respondendum est, quod imaginaria dicitur, quia erat imago claritatis gloriosae ex divinitate in corpore Christi latente proveniens; non quia esset in sola imaginatione.

Ad secundum quod objicitur de opacitate, dicendum, quod non secundum idem erat opacitas et claritas: quia opacitas interiorius erat in natura ipsius corporis, sed fulgor in superficie; sicut aes politum interiorius est opacum, in superficie splendidum. Non tamen, sicut in aere, inerat hujusmodi claritas ex aliqua naturali corporis dispositione; sed miraculose ab ipso Deo.

Ad tertium quod objicitur de excellenti visibili, dicendum, quod non erat de genere claritatis hujus mundi, sed futurae: ideo non corrumpebat visum, sed nucebat, sicut futura claritas faciet. Vel non corrumpebat, ipso Christo conservante.

DISTINCTIO XVII.

Post praedicta considerari oportet etc. (V. edit. nostrae tom. VII, pag. 178.)

QUAESTIO UNICA.

ARTICULUS I.

Hic primo quaeritur, utrum in Christo fuerint plures voluntates: et videtur quod non. Velle enim, cum sit operatio quaedam, personae est: sed in Christo est tantum una persona, divina scilicet: ergo et una voluntas.

2. Praeterea, voluntatis est ducere et non duci: sed in Christo affectus humanus divina voluntate ducebatur, ut dicit Damascenus; ergo affectus humanus non debet dici voluntas in Christo.

3. Praeterea, sensualitas significatur per serpentem, in qua est primus motus peccati; sed in Christo non fuit aliquod peccatum; ergo in ipso non est voluntas sensualitatis.

Sed contra. Quod est inassumptibile est incurabile: sed voluntas rationis et sensualitatis curatione indigebat; ergo utraque fuit assumpta.

Praeterea, voluntate rationis Christus voluit quicquid voluit Deus: sed aliqua voluntas fuit in Christo, qua voluit aliud quam Deus; ut patet Matth. 26: « Non sicut ego volo, sed sicut tu; » ergo praeter voluntatem divinam et voluntatem rationis fuit in Christo voluntas sensualitatis, qua non voluit quicquid Deus.

Ad hoc dicendum, quod cum in Christo fuerint duae naturae integrae, divina scilicet et humana: et de utriusque ratione sit voluntas, in Christo non tantum fuit voluntas divina, sed etiam humana. In homine autem quaedam est voluntas per essentiam, sicut

voluntas rationis. Alia est voluntas per participationem; sicut sensitivus appetitus dicitur voluntas, quia obedit imperio voluntatis. Voluntas autem rationis dupliciter potest considerari; scilicet ut ratio et ut natura. Prima distinctio est secundum naturas. Secunda secundum potentias. Tertia quantum ad modum accipiendi. Et ideo omnes praedictae voluntates fuit in Christo.

Ad illud quod primo objicitur, quod velle est personae, dicendum, quod verum est, ut agentis: sed ut est principii, actus est potentiae naturalis. Et quia in Christo sunt duae naturae; ideo duae voluntates, quanvis unus volens.

Ad secundum quod objicitur, quod voluntas humana ducitur a divina, dicendum est, quod non ducitur cogendo, sed regendo; et hoc non est contra rationem voluntatis.

Ad tertium quod objicitur de sensualitate, dicendum, quod sensualitas dicitur serpens et principium peccati, non quantum ad potentiam naturae, quam Christus assumpsit: sed quantum ad corruptionem fomitis quae in Christo non fuit.

ARTICULUS II.

Ad secundum sic proceditur. Et 1. videtur, quod in Christo fuerint contrariae voluntates. Voluntates sunt contrariae quae sunt contrariorum volitorum: sed secundum divinam voluntatem et rationis, ut ratio consideratur, volebat mori; secundum autem sensualitatis voluntatem et rationis, ut natura consideratur, nolebat mori; ergo praedictae voluntates sunt contrariae.

2. Praeterea, Augustinus dicit in lib. de Trin.: « Voluntatum contrarietas est ex contrarietate volitorum: » sed volita rationis et sensualitatis in Christo fuerunt contraria, quia sensualitas refugiebat mortem quam ratio acceptabat; ergo in Christo fuit contrarietas voluntatum.

3. Praeterea, secundum Damascenum, in Christo unicuique naturae permittebatur operari quod suum est: sed appetitus sensitivi est appetere delectabile sensui, appetitus autem rationis ab huiusmodi abstinere; ergo velle sensualitatis erat contrarium velle rationis.

Sed contra. In rebellionem sensualitatis ad rationem consistit pugna carnis ad spiritum: sed secundum Augustinum, nonnullum vitium est cum caro concupiscit adversus spiritum: et in Christo nullum est vitium; ergo hoc non fuit in Christo.

Praeterea, nihil quod regulatur ab aliquo contrariatur illi: sed sensualitas regulatur a ratione et ratio a voluntate divina; ergo nulla fuit contrarietas harum voluntatum ad invicem.

Respondeo. Dicendum, quod duae voluntates possunt adinvicem differre dupliciter. Uno modo quantum ad volita: et haec est differentia materialis. Alio modo quantum ad rationem volendi: et haec est diversitas formalis. Prima igitur diversitas non sufficit ad contrarietatem voluntatis, sed secunda. Nam si aliqui duo diversa velint propter unam rationem, non dicuntur contrarias habere voluntates: ut puta si unus vult pluviam propter conservationem frugum aestimans eam utilem fore: alius propter eandem rationem vult siccitatem reputans eam utilem. Unde et si unus motum mentis alterius cognosceret, invicem suas voluntates acceptarent. Sed si ex diversis rationibus etiam idem

vellent, contrarias voluntates haberent. Dicendum est ergo quod in Christo fuit differentia voluntatum quantum ad volita. Nam sensualitas et ratio ut natura quae non conferunt, sed absolute aliquid considerant, molestiam corporis et mortem, tanquam malum refugiebant. Sed voluntas divina et ratio ut ratio mortem acceptabant, ut utilem ad salutem humani generis. Ex quo etiam patet, quod non ex contrariis rationibus volitorum diversitas procedebat. Unde et voluntas divina et ratio, ut ratio, acceptabant motum sensualitatis et rationis ut natura; nec invicem se impediabant huiusmodi voluntates. Et ideo quamvis esset contrarietas volitorum in Christo, non tamen fuit contrarietas voluntatum in Christo, neque rebellio aliqua. Et per hoc patet solutio ad objecta.

ARTICULUS III.

Ad tertium sic proceditur. Et 1. videtur, quod non semper Christus fuerit exauditus. In Psalm. 21: « Clamabo per diem et non exaudies, » dicitur in persona Christi.

2. Praeterea, oravit ut discipuli credentes in eum servarentur a malo: hoc autem non accidit nec de malo culpa, nec de malo poenae; ergo ejus oratio non fuit exaudita.

3. Praeterea, oravit ut calix ab eo transiret, ut patet Matth. 26. Hoc autem non fuit factum; ergo etc.

Sed contra, ad Hebr. 5: « Exauditus est pro sua reverentia. »

Praeterea, Joan. 11: « Ego autem sciebam, quia semper me audis. »

Praeterea, oratio sua non fuit minus efficax, quam aliorum Sanctorum: sed alii Sancti exaudiuntur, quando cum debitis conditionibus orant, sicut ipse dicit: « Petite et accipietis, » Luc. 11; ergo et ipse quod petiit accepit.

Respondeo. Dicendum, quod orare est superioris rationis quae in Deum convertitur. Illa ergo oratio alicujus simpliciter est in quantum superior ratio consentit, sive proprio motu, sive tracta ab aliqua inferiorum virium. Superior autem ratio in Christo, quae Deo plenissime fruebatur, hoc solum proprio motu volebat quod sciebat Deum velle: ab inferiori autem vi non trahebatur. Quicquid autem Deus vult impletur: et sic omnis oratio quae simpliciter Christi fuit, impleta est. Sed tamen sciendum quod ratio superior quandoque proponebat orationem, non quasi insinuans motum proprium, sed motum sensualitatis vel naturalem motum inferioris rationis, in quoungebatur quasi officio advocati, et tamen motus suus proprius erat in contrarium volitum. Proponebat tamen ad hoc quod veritas naturae ostenderetur; et talis oratio non fuit exaudita, quia nec simpliciter Christi erat.

Quod objicitur, « Clamabo etc. » dicendum, quod Christus in persona Ecclesiae loquitur, dicit Glossa. Dicendum, quod oratio sensualitatis Christi fuit et rationis ut natura: quae quamvis non fuerit exaudita secundum materiam, fuit tamen secundum superioris rationis proponentis intensionem.

Ad secundum quod objicitur, quod oravit pro Apostolis, dicendum, quod quamvis proposuerit generaliter, tamen specialiter impetrare intendebat pro aliquibus, et sic exauditus fuit.

Quod objicitur de transitu calicis, dicendum,

quod in illa oratione expressit motum sensualitatis; non quod illud quod petiit, simpliciter vellet; sed ut veritatem naturae assumptae in se esse indicaret.

ARTICULUS IV.

Ad quartum sic proceditur. Et 1. videtur, quod Christus, secundum quod homo, dubitaverit. Ubi enim est timor et dubitatio: in Christo fuit verus timor; ergo et vera dubitatio.

2. Praeterea, videtur quod sensualitas in Christo non potuerit dubitare. Sensualitas enim sequitur apprehensivam sensitivae partis: sed futurum periculum de quo erat passio non praesciebat sensus; ergo sensualitas de ipso non poterat dubitare; quia nihil dubitat de aliquo periculo sibi venturo, nisi cognoverit.

3. Praeterea, Christus non magis scivit imminente morte sibi futuram passionem, quam a principio: sed a principio sensualitas in ipso non trepidabat; ergo nec tunc.

Sed contra. Secundum Philosophum, dubitatio ligat rationem ne procedere possit: sed in Christo ratio non fuit ligata; ergo non fuit in Christo dubitatio rationis.

Praeterea, ubi est summa securitas, ibi non est aliqua dubitatio; sed in Christo fuit summa securitas. Psalm. 26: « Si consistent adversum me castra; » ergo in Christo non fuit dubitatio.

Ad hoc dicendum, quod dubitatio dupliciter dicitur. Primo et principaliter significat fluctuationem rationis; ex consequenti vero tractum est ad fluctuationem affectus formidantis aliquid terribile aggredi. Primo modo non fuit in Christo, quia contingit ex defectu scientiae. Secundo modo quantum ad sensualitatem fuit, quia contingit ex infirmitate naturae: non tamen quantum ad rationem, quia auxilium divinum imminere videbat, quod sensualitas non apprehendebat.

Ad primum igitur quod objicitur, quod dubitatio timor est, dicendum, quod dubitatio, prout pro timore accipitur, in Christo fuit quantum ad sensualitatem.

Ad secundum quod objicitur, quod sensualitas non apprehendebat futurum periculum, dicendum, quod verum est ex se: sed ex ratione apprehendebat; quia ex his quae ratio apprehendit, formantur formae particulares in imaginatione, ex quibus sensualitas nata est moveri.

Ad tertium quod objicitur, quod non magis scivit imminente passione etc. dicendum, quod passio a principio conceptionis dubitationem non faciebat; quia non ut imminens tunc praevidebatur; sed solum quando jam imminebat, dubitationem faciebat. Appetitus enim sensitivus natus est a sensibili praesenti praecipue moveri.

Expositio textus.

« Sed quia motum gessit dubitationis. »

Sed contra est quod supra dixit Augustinus dist. 13: quia eadem ratione omnia quae de Christo dicuntur, non fuerunt vera. Et dicendum quod erat vera dubitatio quantum ad sensualitatem, quamvis non quantum ad rationem. « Intende lector. » Verba Hilarii sunt exponenda secundum quod ratio pro se, non pro sensualitate: sic enim non pro se, sed pro suis oravit. Secundum autem quod pro

sensualitate, proponebat ut advocatus ejus, sic orabat pro se.

DISTINCTIO XVIII.

De merito etiam Christi etc. (V. edit. nostrae tom. VII, pag. 189.)

QUAESTIO UNICA.

ARTICULUS I.

Hic primo quaeritur, utrum meruerit sibi immortalitatem corporis. Et videtur quod non. Praemium enim dignius est merito; sed bonus motus animae Christi, quo merebatur, est dignior quolibet corporali; ergo non merebatur immortalitatem corporis.

2. Praeterea, videtur quod nec impassibilitatem animae. Id enim quod est nobis naturale, non meremur: sed anima secundum suam naturam est impassibilis; ergo impassibilitatem non meruit.

3. Praeterea, videtur quod nec exaltationem; quia ex hoc ipso quod natura humana assumpta fuit, exaltata est, et nomen divinitatis sibi debetur: sed assumptionem non meruit, ut supra, distin. 4, dictum est; ergo nec exaltationem.

Sed contra. Bona gloriae nulla creatura habet sine merito: sed immortalitas corporis, impassibilitas animae, exaltatio naturae sunt bona gloriae; ergo ipsa non habuit sine merito, et sic ea meruit.

Praeterea, « Qui se humiliat exaltabitur, » Luc. 14: sed Christus se humiliavit usque ad corporis mortalitatem, animae passibilitatem, usque ad nomen humani nuncupationem; ergo per contrarium exaltari debuit usque ad corporis immortalitatem, animae impassibilitatem, et nomen divini nuncupationem seu manifestationem.

Ad hoc dicendum est, quod ad meritum in ordine ad ea quae sunt bona simpliciter, quatuor requiruntur quantum ad id quod quis mereri dicitur. Primum est quod illud sit de pertinentibus ad beatitudinem. Secundum est quod illud sit non habitum, prout quivis illud meretur. Tertium est quod illud sit non debitum. Quartum est quod illud, ordine naturae ad minus, sequatur meritum. Haec autem quatuor in Christi corporis immortalitate, in animae suae impassibilitate, in naturae humanae exaltatione inveniuntur: quia prima duo sunt de his quae pertinent ad essentiam beatitudinis corporis et animae: tertium ad ejus bene esse. Item non fuerunt a Christo semper habita, nec fuerunt sibi debita ratione naturae, quamvis essent debita ratione personae: sed ad ejus meritum subsequuntur tempore, et ita ipsa meruit.

Ad illud ergo quod objicitur, quod praemium dignius est merito, dicendum, quod hoc habet veritatem in praemio substantiali animae et non in aliis. Vel dicendum, quod immortalitas corporis melior est quo ad aliquid, in quantum pertinet ad statum bonitatis, actus vero mentis ad statum viatoris: sed simpliciter est e converso.

Ad secundum quod objicitur, quod anima secundum suam naturam est impassibilis, dicendum, quod verum est secundum se naturaliter; sed per accidens est passibilis ad passionem corporis: secundum se etiam est passibilis ex ordine divinae justitiae, ut patet de animabus damnatorum.

Ad illud quod tertio objeitur, quod humana natura fuit exaltata secundum assumptionem, dicendum est quod hoc est verum realiter: sed tamen non in cordibus hominum, quia nec tunc fuit manifestata; et res in sacra Scriptura dicitur fieri quando innotescit.

ARTICULUS II.

Ad secundum sic proceditur. Et 1. videtur, quod nobis non meruit. Ezech. 18: « Anima quae peccaverit ipsa morietur; » ergo a simili in contrarium, anima quae bene faciet praemiabitur: sed sicut nullus peccat alteri, ita nullus meretur alteri; ergo etc.

2. Praeterea, sicut laus, ita et meritum consistit circa actum voluntarium: sed nemo actu suo comparat alteri laudem; ergo nec meritum.

3. Praeterea, nec aperiitionem januae meruit nobis Christus. Si enim Christus meruit nobis aperiitionem paradisi, aut ergo sufficienter, aut insufficienter. Si insufficienter, ergo meritum ejus fuit imperfectum. Si sufficienter, ergo non oportet nos laborare ad merendum paradisi aperiitionem: sed utrumque istorum est falsum; ergo non meruit nobis aperiitionem paradisi.

Sed contra. Peccatum Adae januam clausit. Christus per passionis meritum peccato Adae satisfecit; ergo januam aperuit.

Praeterea, nullus pervenit ad gloriam sine merito. Parvuli baptizati perveniunt ad gloriam; ergo ex aliquo merito: non proprio; ergo alterius: sed non alienius puri hominis; ergo Christi, qui fuit Deus et homo.

Ad hoc dicendum est, quod actio Christi meritoria, quamvis esset humana, tamen erat a virtute divina, quia anima et corpus erant quasi instrumentum divinitatis, sicut dicit Damascenus; et ideo poterat super totam naturam humanam. Et quia omnes homines sunt unus homo in natura communi, ut dicit Porphyrius; inde est quod Christi meritum, quod ad naturam se extendebat, etiam ad singulos extendere se poterat. Et inde est quod obstaculum ingressus Paradisi quod omnibus commune est, id est peccatum originale, solus Christus potuit auferre. Et ideo hoc subtracto, dicitur per similitudinem nobis aperuisse januam Paradisi; quia sicut clausio januae est obstaculum prohibens ab ingressu domus, ita janua Paradisi clausa dicitur, inquantum peccatum originale est obstaculum prohibens ab introitu Paradisi.

Quod objeitur quod nullus peccat alteri, dicendum, quod non est simile; quia malum proprium est unuscuique; sed bonum est commune ratione communis vinculi, scilicet charitatis. Vel dicendum, quod sicut peccatum Adae transit in posteros per generationem carnalem, ita meritum Christi transit in alios, qui sunt membra ejus, per generationem spiritualem.

Ad secundum dicendum, quod actus humanus dicitur laudabilis, inquantum declarat suum principium, quod est virtus; sed meritorius dicitur, inquantum per ipsum aliquid acquiritur. Et inde est quod aliquis potest alteri mereri, sed non potest ex actu alterius laudari.

Ad tertium dicendum, quod meritum Christi fuit sufficiens ad aperiendum januam omnibus: sed ad hoc quod habeat efficaciam in aliquo, requiritur quod fiat conjunctio ad Christum per fidem et charitatem,

ARTICULUS III.

Ad tertium sic proceditur. Et 1. videtur quod non in primo instanti conceptionis suae Christus mereri potuerit. Opus enim meritorium, cum sit ex electione, est deliberativum; quia secundum Philosophum, electio consequitur consilium: sed omne deliberativum est successivum, non instantaneum; ergo opus meritorium non est instantaneum: et sic Christus in primo instanti mereri non potuit.

2. Praeterea, sicut meritum est per liberum arbitrium, ita et peccatum: sed diabolus non potuit peccare in primo instanti suae creationis; ergo nec anima Christi in primo instanti suae conceptionis mereri.

3. Praeterea, omne quod habuit Christus ab instanti suae conceptionis, habuit ab altero, non a se; meritum autem a merente est; ergo non habuit meritum.

4. Praeterea, Christus erat similis ex parte corporis ceteris parvulis: sed propter imperfectionem corporeorum organorum, alii parvuli non habent ab instanti suae conceptionis usum liberi arbitrii; ergo nec anima Christi.

Sed contra. Non minus est habere actum gloriae quam actum gratiae: sed a primo instanti conceptionis suae anima Christi, cum fuerit unita divinitati, habuit actum gloriae; ergo potuit habere actum gratiae.

Praeterea, perfectior est potentia perfecta simul habitu et actu quam habitu solum: potentia merendi in Christo fuit perfectissima semper; ergo in primo instanti conceptionis suae habuit meritum in actu, non habitu solum.

Ad hoc dicendum est, quod omnes concedunt animam Christi fuisse perfectam in primo instanti conceptionis suae merito habituali. De merito autem actuali sunt duae opiniones. Quidam enim dicunt, quod non potuit simul incipere esse et mereri. Sed hoc non impedit; quia fuit ibi simultas temporis, et non naturae. Alii autem dicunt, quod in eodem instanti quo conceptus est, habuit perfectionem actualis meriti. Cum enim actio meritoria sit ex voluntate deliberata, duplex potest esse impedimentum, quare non sit in eodem instanti cum voluntate. Vel ex parte deliberationis, quia successiva est: et tale non fuit in Christo, qui non indigebat aliqua deliberatione, cum in primo instanti omnia simul certitudinaliter cognosceret in Verbo: vel ex parte voluntatis, quia non potest simul esse et agere. Hoc autem non impedivit in Christo; quia voluntas in primo instanti habuit actum suum, cum Deo frueretur: et sic in eodem meritorie potuit eum diligere. Et ideo Christus in primo instanti conceptionis suae potuit diligere Deum; atque ideo potuit in primo instanti conceptionis suae mereri.

Quod objeitur de opere deliberativo, dicendum, quod deliberatio discurrens non exigitur ad meritum nisi propter incertitudinem: Christus autem certus erat circa ea quae sunt ad finem, et quantum ad ipsum finem, cum omnia in primo instanti in verbo videret.

Quod objeitur de peccato Angeli, dicendum est, quod non est simile, quia Angelum deliberare oportebat, cum non per essentiam Verbum videret, sicut anima Christi videbat. Vel dicendum, quod meritum est consentaneum naturae, cum sit ejus

perfectio: demeritum autem est dissentaneum, cum sit ejus corruptio; et ideo non est simile de merito et demerito.

Quod objicitur, quod in primo instanti quicquid habuit ab altero, dicendum, quod in primo instanti meritum ab alio habuit, scilicet in quantum ad meritum exigitur gratia: et a seipso, in quantum meritum procedit ex libero arbitrio.

Quod objicitur de aliis infantibus, dicendum, quod non est simile; quia imperfectio a parte corporis non impediabat animam Christi, sicut aliorum; et hoc ideo, quia Christus simul erat comprehensor secundum actum perfectum animae et viator secundum impressionem corporis. Unde in eo fuit singulare, quod perfectio animae et imperfectio corporis non se impediabant.

ARTICULUS IV.

Ad quartum sic proceditur. Et 1. videtur quod non potuerit per passionem mereri. Meriti enim principium est in patiente, quia est voluntarium ejus principium est intra, ut dicit Philosophus. Sed principium passionis non est in patiente, sed in agente; ergo Christus per passionem non meruit.

2. Praeterea, meritum est facere de indebito debitum, vel de minus debito magis debitum: sed nihil Christo post passionem fuit de novo debitum aut magis debitum; ergo non meruit pati.

3. Praeterea, omne meritum principaliter est in rationali voluntate: passio vero Christi principaliter fuit in corpore; ergo non fuit meritoria.

Sed contra. Augustinus loquens de humilitate passionis, dicit: « Humilitas, claritatis est meritum: claritas autem, humilitatis praemium. »

Praeterea, actibus virtutum meremur: sed Christus ex charitate, quae est maxima virtus, passus est. Joan. 15: « Majorem charitatem nemo habet etc. »; ergo ipse per passionem suam meruit.

Ad hoc dicendum est, quod actus, quo quis meretur, est ille ejus agens est dominus et qui est gratia informatus, quia voluntas informata charitate est principium meriti: et ideo omni tali actu Christus merebatur. Cum igitur passionem suam voluntarie sustinuerit « Oblatus est enim quia voluit » ut dicitur Isa. 54, et voluntas haec charitate fuerit informata; non est dubium, quod per passionem suam meruit.

Ad illud quod primo objicitur, quod meriti principium est in nobis, dicendum est, quod passio in quantum passio, non est meritoria, quia sic principium ejus est extra: sed meritoria est in quantum est acceptata per voluntatem. Sic enim est voluntaria, et principium ejus est intra. Acceptatur autem a voluntate dupliciter: vel sicut voluntarium absolute, sicut in Christo qui se voluntarie passioni obtulit, ut nostrae redemptionis opus expleret: vel sicut voluntarium mixtum, sicut quando aliquis, etsi vellet non pati, tamen magis vult sustinere passionem, quam quod aliquid contra Deum faciat: et sic etiam contingit passione mereri.

Ad secundum dicendum (1), quod meritum est de indebito etc. dicendum, quod insufficiens est divisio. Nam dicitur tertio modo quis mereri, quando facit de debito uno modo, vel una ratione, debitum alio modo; sicut puer baptizatus facit sibi debitum regnum caelorum cum pervenit ad perfectam aeta-

(1) *Lege* ad secundum quod objicitur.

tem per actum proprium, quod prius erat ei debitum alio modo, scilicet ratione habitus: et sic Christus per passionem sibi meruit.

Quod objicitur, omne meritum est in voluntate rationali, ad hoc dicendum est, quod quamvis meritum sit in ratione complete et causaliter, tamen in aliis viribus potest esse materialiter.

Expositio textus.

« Et amota ignea rhomphaea. » Quae quidem posita in paradiso terrestri, significat impedimentum, quod prohibebat ingressum paradisi caelestis. « Sed nec mox post carnis. » Probabile hoc est, quia etiam aliae animae sanctorum, quae nihil purgabile habent, mox post separationem a corpore impassibiles fiunt. « In qua forma crucifixus est, in ea exaltatus est. »

Sed contra. Exaltatio, est usque ad aequalitatem Patris, quod non convenit humanae naturae in qua crucifixus.

Respondeo. Dicendum, quod (quamvis naturae secundum se non conveniat, tamen convenit personae in natura; ita quod terminus exaltationis refertur ad personam, motus vero ad naturam. « Qui multo amplius humiliatus est. » Sciendum, quod ex parte termini a quo, et ex parte termini ad quem, magis fuit Christi humilitas in descensu, quam priorum parentum in ascensu; quia Christus ab essentiali et vera divinitate descendit ad statum poenalem naturae humanae, Adam vero a statu innocentiae voluit ascendere ad statum divinitatis non essentialiter, sed participative per assimilationem.

« Implere Dei decreto. » Decretum dicitur praeceptum, quod Adam transgressus est, quod Christus obediendo implevit. Vel decretum dicitur sententia mortis, quam in Adam transtulit: et hoc etiam decretum Christus implevit, quando mortem sustinuit. Chyrographum dicitur memoria praevaricationis Adae sive reatus ipsius, quod Christus pro nobis satisfaciendo delevit. « Tantum fuit peccatum ipsius etc. »

Sed contra. Alius modus liberationis fuit possibilis.

Respondeo. Verum est ex parte Dei, sed non ex parte nostra.

DISTINCTIO XIX.

Nunc igitur quaeramus etc. (V. edit. nostrae, tom. VII, pag. 498.)

QUAESTIO UNICA.

ARTICULUS I.

Hic primo objicitur, quod Christus non liberavit nos a peccato per passionem suam. Corporale enim non potest agere in spirituale: passio Christi corporalis fuit: ergo non potest agere in animas nostras spirituales, et sic nec earum peccata delere.

2. Praeterea, liberatio dicitur esse a peccato justificatio: sed hoc attribuitur resurrectioni. Rom. 4: « Resurrexit propter justificationem nostram »; ergo liberatio a peccato non debet attribui passioni, sed resurrectioni.

3. Praeterea, eorum quae sunt aequalia, unum non destruit alterum: sed quantum bonum erat passio Christi ex parte patientis, tantum malum erat occisio ex parte occidentium; ergo illud pec-

catum per passionem deleri non potuit, et sic non omnia peccata.

Sed contra Apoc. 1: « Lavit nos a peccatis nostris in sanguine suo. » Ad Coloss. 2: « Convificavit nos cum illo, donans nobis omnia delicta; » ergo passio Christi omnia delet.

Praeterea, per emendam et satisfactionem condignam fit remissio peccati; sed passio Christi fuit emenda condigna pro peccatis nostris; ergo etc.

Ad hoc dicendum est, quod aliquid dicitur delere peccatum dupliciter: aut per modum causae formalis, et sic gratia delet peccatum; aut per modum causae efficientis; et hoc tripliciter. Aut principalis, et sic convenit tantum Deo, apud quem residet auctoritas, et principalitas deletionis culpae, Aut instrumentalis, et sic convenit sacramentis. Aut per modum merentis, et hoc dupliciter: vel insufficienter, et sic convenit puro homini, in quantum unus alteri potest mereri primam gratiam merito congrui, non condigni. Aut sufficienter; et sic convenit Christo, ut agenti, deleri culpam, passioni autem ejus ut principio per quod agit; quia actio ejus, cum sit Dei, non tantum hominis, potest in totam naturam: et ideo ipse sufficienter disposuit totam naturam per meritum et passionem suam ad deletionem culpae, non autem alius purus homo: sed quod aliquis deletionem peccatorum non consequatur, hoc est ex dispositione ejus.

Quod ergo objicitur, quod corporale non potest agere in spirituale, dicendum, quod quamvis secundum se esset corporalis passio Christi, tamen in quantum divina, et accepta a voluntate ejus, habuit virtutem spiritualem.

Ad secundum quod objicitur de resurrectione, dicendum, quod justificatio notat remissionem peccati secundum terminum ad quem, peccati autem deletio secundum terminum a quo. Et ideo attribuitur peccati liberatio morti quae vitam passibilem vitae peccatrici similem in poena a Christo ademit: justificatio autem resurrectioni per quam nova vita in Christo inchoata est. Unde Apost. ad Rom. 4: « Resurrexit propter justificationem, et traditus est propter delicta nostra. »

Ad tertium quod objicitur de peccato crucifigentium, dicendum, secundum Anselmum, quod quia nesciebant Christum esse Dei Filium, ignorantia excusavit in parte peccatum eorum. Unde malum eorum non fuit aequale bono vitae Christi. Dato etiam quod scivissent, quamvis aequale fuisset materialiter, id est quo ad factum seu opus operatum, non tamen formaliter quo ad radicem faciendi vel opus operans: quia Christus mortem sustinuit ex majori bonitate quam illi intulerunt ex malignitate. Et praeterea bonum est efficacius quam malum, quod non nisi virtute boni agit, ut dicit Dionysius.

ARTICULUS II.

Ad secundum sic proceditur. Et 1. videtur, quod per passionem Christi non sumus liberati a diabolo. Libertas enim hominis in hoc consistit quod liberum arbitrium ejus cogi non potest: sed sicut nunc liberum arbitrium cogi non potest a diabolo, ita nec etiam ante Christi passionem; ergo passio Christi non liberavit nos a potestate diaboli.

2. Praeterea, daemon ante passionem non habebat potestatem, nisi vel animam tentandi, vel corpus vexandi: sed hanc eandem adhuc habet, et

exerect; ergo ab ejus potestate liberati non sumus.

5. Praeterea, sicut diabolus non potest modo affligere homines, nisi permissus, ita ante passionem non poterat, ut patet Job 1. Et sicut ante poterat permissus, ita postea potuit, ut patet in Antonio qui permissione divina a daemonio fuit flagellatus; ergo ita potens est in nobis sicut ante fuit.

Sed contra. Victoris est adversarium a potestate domini abjicere: sed Christus per passionem victor fuit. Apoc. 5: « Vicit leo de tribu Juda; » ergo a potestate domini diabolus ejecit.

Praeterea, Joan. 12, instante passione dixit Dominus: « Nunc princeps hujus mundi ejicietur foras; » ergo per passionem Christi dominium sui principatus amisit.

Ad hoc dicendum est, quod potestas diaboli in duobus constituitur, secundum duas manus ejus. Unam, qua impellit ad peccatum, alteram, qua trahit ad supplicium. Utrumque exercet universaliter contra totum genus humanum, et particulariter contra personas. Secundum primam, primos parentes, et in eis totum genus humanum vicerat quoad peccatum originale, et quo ad actualia, quantum ad multos. Secundum vero alteram omnes ad infernum trahebat et detinebat. Secundum Christus destruxit in omnibus quo ad sufficientiam, in membris autem fuit quo ad efficientiam. Sed primam debilitavit eum hostem vicit, et hominibus multa auxilia praeparavit, pro peccato originali satisfaciendo.

Ad primum ergo quod objicitur de coactione, dicendum, quod licet ante passionem non posset cogere liberum arbitrium sicut nec modo, tamen poterat magis inclinare, in quantum homo erat debilius ad resistendum. Unde haec libertas quam per Christum consequuti sumus, dicitur libertas a peccato. Libertas enim a coactione inest nobis a natura.

Ad secundam quod objicitur « sicut habebat potestatem in corpore et anima, ita et modo », dicendum, quod non habet tantam; quia quamvis tentet, non ita facile superat propter auxilium gratiae.

Ad tertium quod objicitur de permissione, dicendum, quod major erat tunc potestas diaboli permissa propter reatum naturae humanae.

ARTICULUS III.

Ad tertium sic proceditur. Et 1. videtur, quod per passionem Christi non sumus liberati ab aeterna poena. Quod enim infinitum est finire non potest; sed poena aeterna infinita est; ergo non potest destrui.

2. Praeterea, minus non potest in majus: minus est mors temporalis quam aeterna; ergo mors temporalis Christi non potest in destructionem motus aeterna.

5. Praeterea, posita causa sufficienti ponitur effectus: sed adhuc in illis qui vim passionis Christi omnibus modis in se recipiunt, manet temporalis poena; ergo passio Christi non liberat a poena temporali, et ita multominus ab aeterna.

Sed contra. Zach. 2: « Tu autem in sanguine testamenti tui eduxisti vinetos de lacu. »

Praeterea, peccatum est causa mortis aeternae: sed Christus liberavit nos a peccato, ergo a poena aeterna.

Respondeo. Dicendum, quod mors Christi suf-

sciens fuit, quantum est de se, ad expiandum omne peccatum, et per consequens ad liberandum ab omni poena. Sed hanc liberationem non efficit nisi in illis qui Christo passo conjunguntur per fidem formatam, vel per fidei sacramentum; quorum nullus poenam aeternam incurrit, quantum ad poenam sensus, si perseverent. Incurrerant tamen aliqui, quantum ad poenam damni, quae est carentia visionis divinae, ante solutum pretium propter reatum naturae humanae, licet fidem mediatoris haberent. Sic ergo passio Christi efficienter dicitur liberare a poena aeterna sensus, dando auxilium ne aliquis eam incurrat; non autem, ut postquam aliquis eam incurrit, ab ea liberetur. A poena autem aeterna damni liberavit utroque modo.

Ad primum igitur dicendum, quod poena est infinita durante causa, scilicet culpa vel reatu. Esset tamen finibilis, culpa vel reatu cessante; et sic poena damni in sanctis Patribus est finita, cessante reatu naturae.

Ad secundum quod opponitur quod minus non potest in majus, dicendum, quod mors Christi major fuit, licet non quantitate molis, tamen quantitate virtutis et dignitatis; eo quod mors Dei est, ex immensa charitate suscepta.

Ad tertium quod objicitur de poena temporali, dicendum est, quod duplex est poena temporalis: quia quaedam est naturalis, et debita ex peccato originali; quaedam personalis debita ex peccato actuali. Primam Christus abstulit ab omnibus per sufficientiam in praesenti. Auferet autem ab omnibus qui sunt passionis suae participes per efficientiam in futuro, quia sic non expedit modo tolli. Secundam vero quo ad sufficientiam quidem tollit in praesenti ab omnibus. Tollit etiam quod ad reatum, non quo ad actum, per efficientiam ab aliquo, secundum quod contingit eos ad liberationem disponi, vel ad universalem per baptismum, vel ad particularem per poenitentiam: quia poenitentia non tantum est poena, sed etiam medicina, sicut vult Philosophus. Et ideo isto modo non oportuit ab omnibus poenam auferri, nec necesse est quod in causis, quae agunt ex ordinatione sapientiae, quod posita causa statim ponatur effectus, sed quando sapientiae ordo requirit: et taliter agit passio Christi.

ARTICULUS IV.

Ad quartum sic proceditur. Et 1. videtur, quod non sit secundum humanam naturam mediator. Non enim est idem extremum et medium, respectu ejusdem motus: sed natura humana fuit extremum reconciliationis: ergo non fuit medium.

2. Praeterea, secundum hoc mediator est secundum quod nos Deo conjunxit; sed non potuit Deo nos conjungere, nisi inquantum est Deus; ergo secundum quod Deus, est mediator.

3. Praeterea, medium est compositum ex extremis: sed compositum ex humana natura et divina non est in Christo nisi persona; ergo non ratione humanae naturae, sed ratione compositae personae est mediator.

4. Praeterea, videtur quod non possit dici redemptor. Redemptio enim est iterata emptio; sed nunquam ante passionem nos emerat; ergo per passionem nos non redemit.

5. Praeterea, nemo quod suum est, emit; nos autem eramus Christi; ergo nos non emit, et sic non redemit.

Ad hoc dicendum est, quod mediator ex hoc dicitur quod inter extrema mediat, prout inter ea est medium. Medium autem inter extrema potest esse dupliciter: vel secundum ordinem, inquantum est sub primo et supra ultimum: et hoc exigitur ad rationem medii proprie dicti: vel secundum participationem utrorumque extremorum. Haec autem duo conveniunt Christo secundum humanam naturam: quia secundum eam a Deo beatitudinem participat, ab hominibus autem infirmitatem. Inquantum etiam homo, supra homines fuit per plenitudinem gratiarum et unionem, et infra Deum propter naturam creatam. Ideo, proprie loquendo, ratione humanae naturae mediator est. Sed quia ratione naturae divinae, ac etiam personae, non est infra Deum, quamvis sit super homines: ideo non potest dici mediator ratione utriusque, cum potissima ratio medii ei desit.

Ad primum ergo dicendum, quod humana natura, prout est in Christo, non est extremum, quia in Christo non egebat reconciliatione, cum non esset peccato infecta.

Ad secundum quod objicitur, quod non potuit reconciliare nos, nisi inquantum Deus, dicendum quod quamvis potentia reconciliandi attribuitur ei inquantum Deus, tamen exhibitio reconciliationis per satisfactionem attribuitur ei secundum quod homo; et ideo secundum humanam naturam, quae est proxima causa reconciliationis, dicitur mediator.

Ad tertium quod objicitur, quod medium compositum est ex extremis, dicendum, quod quamvis persona communicet cum utroque extremorum, hoc est cum Deo et homine secundum naturas, non tamen secundum ordinem medii; et ideo non potest dici mediator secundum personam.

Ad quartum quod objicitur de redemptione, dicendum, quod per peccatum primorum parentum totum humanum genus a Dei gloria erat alienatum, et in potestatem usurpativam diaboli secundum culpam et poenam redactum. Per passionem vero Christi et Deo sumus restituti, et a diabolo liberati. Unde hujusmodi liberatio habet rationem duplicis emptionis. Inquantum enim a potestate diaboli eripuit nos, dicitur nos emisse sicut rex regnum occupatum ab adversario per laborem certaminis. Inquantum vero Deum nobis placavit, dicitur nos redemisse, sicut pretium solvens satisfactionis pro nobis, ut a poena et a peccato liberaremur.

Quod objicitur de iterata emptione, dicendum, quod iterata emptio per praepositionem importata, non refertur ad actum emptionis, quasi alias empti fuerimus, sed ad terminum actus, quia alias sui fueramus in statu innocentiae. Emere enim est aliquid suum facere: redimere vero aliquid facere iterato suum.

Ad illud quod objicitur, quod nemo quod suum est, emit, dicendum, quod eo modo quo suum est, emi non potest: sed quod meum est uno modo, et non meum altero modo, emere possum; sicut si aliqua res sit mea quantum ad proprietatem, non tamen quantum ad usum. Et sic quamvis humanum genus fuerit Dei per creationem, tamen est redemptum ut alio modo sit suum, scilicet per justificationem.

Expositio textus.

• Culparum Chyrographa. • Chyrographum dicitur a Chyros, quod est manus, et graphia, quod est scriptura, quasi scriptura manualis, quae memoriam debitori facit, et obligationem ad solvendum; dicuntur enim chyrographa nostrorum peccatorum per mortem Christi deleta, in quantum memoria peccatorum nostrorum amota est secundum quod eorum non recordatur ad puniendum, vel in quantum obligatio poenae seu reatus amotus est. Si ergo Christus secundum vos o haeretici, unam habeat tantum naturam, bene dicitur: non quod secundum divinam naturam sit medius, seu personam: sed quia ex illa habet humana natura proprietatem quae media est inter Deum et homines, scilicet quia ex illa habet ut sit hominibus superior, et Deo proximior.

DISTINCTIO XX.

Si vero quaeritur etc. (V. edit. nostrae tom. VII, pag. 207.)

QUAESTIO UNICA.**ARTICULUS I.**

Hic primo quaeritur, utrum solus Christus potuit satisfacere pro humana natura, vel alter purus homo. Quia secundum Philosophum, qui famulatur Diis et patribus secundum potentiam suam justus est, quamvis ad aequalia non possit: et sic ad gratiarum actionem pro beneficiis sufficit homini secundum posse reddere; ergo similiter ad satisfactionem pro maleficiis; ergo sufficit ad reparationem hominis satisfactio quam homo potest facere.

2. Praeterea, bonum potentius est ad agendum quam malum, quia non agit nisi virtute boni: sed unus homo per unum malum actum potuit humanam naturam corrumpere; ergo multo fortius per multos actus bonos potuit reparare.

3. Praeterea, crudelis est creditor qui a debitore exigit plusquam possit, aut dominus qui a servo. Cum ergo dominus crudelis non sit, non exigit ab homine plusquam possit; ergo ad emendam humani peccati sufficit satisfactio quam homo potest facere.

Ad oppositum. Pro injuria infinita requiritur infinita emenda. Peccatum est infinita injuria, quia fit contra infinitum Deum. Tanto enim est major injuria, quanto major est ille in quem peccatur; ergo requiritur infinita emenda pro eo: sed nulla res finita potest infinitam emendam facere; ergo nullus purus homo potest pro peccato satisfacere.

Praeterea, nullus pro alio potest reddere quod pro seipso debet; sed quaelibet creatura totum quod est Deo debet; ergo nulla pura creatura potest pro alia sufficienter satisfacere.

Ad hoc dicendum est, quod secundum quantitatem culpae oportet fieri quantitatem emendae. Culpa vero, qua corrupta erat tota natura humana, infinita erat tripliciter. Primo ex parte ejus cui facta erat injuria, qui est Deus. Secundo ex parte boni quod per peccatum ablatum erat, scilicet vita aeterna. Tertio ex parte naturae quae per peccatum corrupta erat, quae infinitatem quandam habet, in quantum est multiplicabilis per infinita supposita, de se. Cum igitur injuria fuerit quodammodo de se infinita, nec pura creatura posset infinitam e-

mendam facere, non potuit pro peccato humani generis satisfacere purus homo.

Ad hoc ergo quod objicitur in contrarium de gratiarum actione, dicendum, quod non est simile de gratiarum actione et satisfactione: quia ad immunitatem gratiarum actionis creatura deduci non potest, quin semper teneatur gratias agere: sed ad immunitatem satisfactionis potest. Non enim tenebatur in primo statu satisfacere, nec tenebatur in statu gloriae, ubi tamen tenebatur id gratiarum actionem.

Ad secundum quod objicitur, quod bonum potentius etc. dicendum, quod quamvis bonum potentius sit, tamen difficilius est illud bonum facere: quia bonum ex tota causa consistit, sed malum ex particularibus defectibus, secundum Dionysium. Et licet homo potuerit facere actum universalis corruptionis, non tamen universalis reparationis.

Ad tertium quod objicitur de crudelitate, dicendum, quod plusquam possit facere homo, nec per se, nec per alium, exigere crudelitas est: sed Deus ab homine exigit id quod ipse dat ei posse, licet per se non possit. Unde non est crudelitas in eo.

ARTICULUS II.

Ad secundum sic proceditur. Et 1. videtur, quod satisfactio non debuerit fieri per passionem mortis Christi, Bernardus enim dicit, quod una gutta sanguinis Christi fuit sufficiens pretium nostrae redemptionis: sed aliquid de sanguine Christi effusum est in Christi circumcisione; ergo superfluit ejus passio.

2. Praeterea, tanta in nobis potest esse contritio, quod sufficit ad remissionem culpae et poenae; ergo cum quaelibet poena quam Christus pro nobis sustinuit, majoris efficaciae in merendo fuerit, quaelibet contritio, potuit sufficere ad satisfactionem peccatorum nostrorum sine poena passionis.

3. Praeterea, poena pensatur ex radice et dignitate personae patientis; cum ergo ex aequali radice, id est charitate, et ab aequali persona omnis poena Christi tolerata fuerit, quantumlibet minima poena ipsius fuit aequivalens ad effectum nostrae redemptionis.

Contra. Ad Hebr. 2: « Decbat auctorem salutis eorum per passionem consummari. »

Praeterea, homo per peccatum erat debitor mortis; igitur satisfactor pro eo oportuit quod solveret mortem.

Ad hoc dicendum est, quod quia Christi satisfactio non fuit pro uno homine tantum, sed pro tota natura humana, ideo tres conditiones continere debuit: scilicet, ut esset universalis respectu omnium satisfactionum, et ut esset exemplaris respectu poenae pro qua satisfaciebat. Universalis autem non erat per praedicationem de multis: sed habens virtutem respectu omnium: ideo assumere debuit in seipso illam poenam ad satisfaciendum, quae continet in se virtute omnes poenas, quamvis non in actu. Hujusmodi autem est mors, quae est finis omnium terribilium, ut dicit Philosophus in Ethic. Et ideo per passionem mortis debuit satisfacere pro omnibus. In quantum vero fuit exemplaris respectu nostrarum satisfactionum, debuit habere magnitudinem excedentem omnes satisfactiones, quia exem-

plar debet esse praestantius exemplato; et ideo secundum maximam poenarum debuit satisfacere, scilicet mortem. Iterum pro peccato primi hominis Deus mortem quasi poenam inflixit dicens: « Quae cumque hora comederitis etc. »; ideo mortem subire debuit ad satisfaciendum.

Ad illud quod objicitur in contrarium de auctoritate Bernardi, dicendum, quod quamvis una gutta sanguinis quam in circumcissione fudit esset sufficiens ad omnem satisfactionem, considerata conditione, non tamen quantum ad genus poenae, quia mors debebatur ad relaxandum debitum mortis.

Ad secundum quod objicitur de contritione, dicendum, quod quamvis quaelibet poena sufficeret, quantum est ex radice vel conditione personae, non tamen quantum est de genere poenae. Et similiter est dicendum ad tertium.

ARTICULUS III.

Ad tertium sic proceditur. Et 1. videtur, quod alius modus non fuerit possibilis. Ambrosius enim dicit: « Tantum fuit peccatum nostrum, ut salvari non possemus, nisi Christus pro nobis debitoribus mortis moreretur. »

2. Praeterea, quod est contra Dei justitiam est impossibile: peccatum dimitti, sine legitima satisfactione contra justitiam Dei est; ergo impossibile; sed non poterat aliter fieri legitima satisfactio, ut probat Anselmus, nisi per mortem Christi; ergo hic modus erat necessarius ad satisfaciendum.

3. Praeterea, fidei non potest subesse falsum: sed antiqui patres crediderunt Christum passurum; ergo non potuit aliter esse.

Contra. Gregorius 15 Moral.: « Deus omnipotens qui nos existere fecit de nihilo, revocare nos etiam sine sua morte potuisset. »

Praeterea, Dei potentia non determinatur ad aliquod finitum et determinatum; ergo non determinatur ad istum tantum liberationis modum.

Ad hoc dicendum est, quod liberatio et redemptio differunt: quia redemptio fit justo pretio soluto, sed liberatio quocumque modo. Dicitur ergo quod non potuit genus humanum aliter redimi nisi per incarnationem et passionem alicujus personae divinae, quia non potuit aliud esse justum pretium, id est condigna satisfactio. Si vero quaeratur an potuerit aliter liberari: aut quaeritur de potentia a parte hominis: et dicendum quod non, quia homo nullo modo liberare se potuit, nisi quomodo eum Deus liberare disposuit. Aut a parte Dei liberantis. Et dicendum, quod sic, quia ejus potentia non est limitata. Aut ex parte nostra simul et Dei: et sic dicendum est quod quamvis fuerit alius modus possibilis, nullus tamen ita conveniens.

Ad primum ergo quod objicitur in contrarium de Ambrosio, dicendum, quod excludit potentiam ex parte nostra, non Dei.

Ad secundum quod objicitur, quod est contra Dei justitiam etc. dicendum, quod hoc intelligitur conjunctim, non divisim. Nam non potest simul esse quod Deus aliquid faciat, et illud sit injustum: sed illud quod modo est injustum, posset facere esse justum.

Ad tertium quod objicitur, quod fidei non potest subesse falsum, dicendum, quod fides antiquorum fuit de passione Christi futura, praesupposita Dei ordinatione quod ita fieret; tamen ex ejus

S. Th. Opera omnia. V. 22.

suppositione passio Christi necessitatem habet conditionatam non absolutam.

ARTICULUS IV.

Ad quartum sic proceditur. Et 1. videtur, quod Deus Pater Filium non tradiderit ad passionem. Injustitia enim est innocentem morti tradere: igitur, cum Pater sit justus, Filium morti non tradidit.

2. Praeterea, mortuus est ex gratia; non ergo ex debito, et sic non ex obedientia Patris; ergo Pater eum non tradidit.

3. Praeterea, ejus generatio bona est, ejus corruptio mala est; cum ergo generatio Christi fuerit optima, ejus mors, tamquam corruptio ipsius, fuit pessima; ergo non fuit a Deo.

Contra. Rom. 8: « Proprio Filio suo non pereit etc. »

Praeterea, omnis poena est a Deo: passio Christi fuit quaedam poena; ergo fuit a Deo.

Ad hoc dicendum est quod in passione Christi quatuor est considerare. Unum ex parte naturae passibilis ejus erat corruptiva. Alterum ex parte voluntatis ejus acceptantis. Tertium respectu finis; quartum respectu inferentis. Secundum haec quatuor Pater dicitur eum tradidisse passioni, diversis modis. Quo ad primum, in carne passibili Filium mittendo: quo ad secundum, ipsi Christo secundum quod homo, voluntatem patiendi inspirando: quo ad tertium passionem ejus ab aeterno ad salutem generis humani ordinando: quo ad quartum potestatem occidendi, quamvis non voluntatem crucifixoribus dando, secundum illud Joan. 19: « Non haberes in me potestatem etc. »

Ad quod ergo in contrarium de innocente objicitur, dicendum, quod tradere eum invitum, peccatum est: sed tradere voluntarium pro salute fratrum opus misericordiae est.

Ad secundum quod objicitur, de gratia et debito, dicendum, quod obedientia voluntaria non excludit gratiam, cum sit debitum voluntarium, non coactum.

Quod objicitur quod passio Christi fuit mala etc. dicendum, quod considerata secundum omnes sui circumstantias praesertim in respectu ad finem, bona est simpliciter; considerata secundum se tantum, mala est malitia poenae. Judicium vero de re secundum partem est judicium secundum quid. Bona ergo dicenda est simpliciter, mala secundum quid solum.

Expositio textus.

« Quia sic justitia superatus est diabolus. » Sciendum quod hic intelligenda est haec dictio tantum. Hic distinguendum; quia potest intelligi de opere operante; et sic malum operati sunt; vel opere operato, et sic bonum operati sunt.

DISTINCTIO XXI.

Post praedicta considerandum est etc. (V. edit. nostrae tom. VII, pag. 215.)

QUAESTIO UNICA.

ARTICULUS I.

Hic primo quaeritur. Et 1. videtur, quod in morte Christi sit divinitas separata a carne. Remoto enim medio separantur extrema: sed mediante anima divinitas carni conjungebatur, ut in 2 dist. dictum est; ergo divinitas est separata, cum anima non remansit carni unita.

2. Praeterea, corpus insensibile non videtur unibile: sed in morte remansit corpus insensibile; ergo non unibile.

3. Praeterea, videtur quod ab anima. Joan. 10: « Ego pono animam meam etc. »: ergo Verbum a se deposuit animam.

4. Praeterea, plurium unitorum non est una unio: sed post separationem animae a carne anima et caro fuerunt duo; si ergo divinitas utrique remansit unita, fuerunt ibi duae uniones; et sic aliqua unio fuit ibi de novo, cum antea non fuerit nisi una.

Contra. Leo Papa dicit quod tanta fuit unio Dei et hominis, ut nec supplicio posset dirimi nec morte distingui: sed homo nominat corpus et animam; ergo divinitas non fuit in mortis supplicio ab anima vel carne divisa.

Praeterea, post mortem dicitur Dei Filius jacuisse in sepulchro, et descendisse ad inferos: hoc autem non nisi propter unionem divinitatis ad corpus et animam; ergo post mortem remansit eis unita divinitas.

Ad hoc dicendum, quod ex tribus sumitur ratio quare in morte Christi non fuerit separata divinitas a corpore et anima. Primo ex parte Dei; quia cum sit immutabilis, ei cui est perfecte conjunctum, immutabilitatem praestat, ut etiam immutabiliter sibi adhaereat, ut apparet in beatis. Secundo ex parte ipsius assumpti; quia per mortem quam ex obedientia Patris sustinuit, non debuit suam dignitatem amittere, sed magis clarificari. Tertio ex fine unionis; quia ea quae per mortem ipsius circa ipsum acta sunt, non fuissent nobis salutaria, nisi divinitas esset adjuncta.

Ad primum dicendum est, quod objectio procedit de medio necessitatis. Anima autem est medium congruentiae, quantum ad actualem unionem divinitatis ad carnem; licet sit medium necessitatis quantum ad unibilitatem, ut in 2 dist. dictum est.

Ad secundum quod objicitur, quod corpus Christi fuit insensibile, dicendum, quod insensibile dupliciter dicitur. Aut quod nec habet, nec habere potest sensum. De tali verum est quod objicitur, et sic corpus Christi non erat insensibile. Aut quod non habet et tamen natum est habere; et sic corpus Christi erat insensibile, et de hoc non est verum quod objicitur.

Ad tertium, quod objicitur de Joan., dicendum, quod Filius Dei non posuit animam a se, sed a carne in qua a morte separata fuit.

Ad quartum dicendum, quod in morte Christi fuit una unio ad animam et carnem ex parte personae divinae, in quantum relatio unionis est secun-

dum rationem tantum; sed ex parte assumptorum, scilicet animae et corporis, fuerunt duae in actu, cum prius esset una tantum in actu et plures in potentia. Et sic non oportet quod fuerit ibi facta nova unio, sicut nec in definitione continui fit omnino novum corpus, licet unum dividatur in multa.

ARTICULUS II.

Ad secundum sic proceditur. Et 1. videtur, quod ex separatione animae a carne non fuerit caro mortua. Quod enim unitum est principio vitae, vivit; sed caro tunc erat unita principio vitae, id est divinitati; ergo tunc vivebat.

2. Praeterea, nobilior est, secundum Augustinum, in libro de vera Religione, substantia vivens quam non vivens. Caro Christi fuit nobilior omni carne; ergo semper fuit vivens.

3. Praeterea, potentior est deitas ad vivificandum quam anima; si ergo anima unita necessario vivificat, multo fortius divinitas unita.

Contra. Quod vivit non suscitatur a morte: sed caro Christi, suscitata est a morte; ergo in morte non vivebat.

Praeterea, quod vivit habet aliquem actum vitae: sed caro Christi non habebat aliquem actum vitae, quia nec sensum nec motum quae sunt actus vitae; ergo caro Christi non vivebat.

Respondeo. Dicendum, quod vivere, secundum Philosophum in 2 de Anima, viventibus est esse. Hujusmodi autem esse principium formale est anima, sicut quaelibet forma substantialis est ei cujus est forma principium respectu proprii esse. Separata autem forma, removetur esse cuius forma est proprium principium; et ideo separata anima a carne Christi non potuit caro vivens remanere.

Ad primum quod objicitur, quod corpus erat unitum divinitati, dicendum, quod non erat unitum formaliter, et haec unio formalis requiritur ad vivere.

Ad secundum quod objicitur, quod nobilior est substantia vivens, dicendum, quod verum est caeteris paribus. Sed caetera non sunt paria; quia anima separata, caro habebat divinitatem unitam, nec corpus simpliciter sed ad tempus carebat vita.

Ad tertium quod objicitur, quod potentior est deitas ad vivificandum etc., dicendum, quod verum est; sed ipsa vivificat per modum principii efficientis non formalis. Unde requiritur unio alterius formae vivificantis.

ARTICULUS III.

Ad tertium sic proceditur. Et 1. videtur, quod caro Christi post mortem debuit incinerari. Sicut supra dictum est, omnes defectus nostros suscepit, qui sunt communiter naturae et non pertinent ad imperfectionem gratiae; sed incineratio est hujusmodi; ergo corpus Christi incinerari debuit.

2. Praeterea, sicut mors est poena originalis peccati, ita et incineratio. Dicitur enim Gen. 3: « Terra es et in terram ibis: » sed Christus mortem sustinuit, ut nos a reatu originalis peccati absolveret; ergo etiam incinerationem.

3. Praeterea, praemium respondet merito. Sed corpus Christi est summe exaltatum per gloriam resurrectionis. Cum igitur humilitas sit meritum exaltationis, ut patet Phil. 2, videtur quod debuerit

summe humiliari, et ita usque ad incinerationem.

Sed contra est quod dicitur in Psal. 13: « Non dabis sanctum tuum videre corruptionem: » quod non potest intelligi de corruptione mortis; ergo oportet dicere quod Christus fuit immunis a corruptione putrefactionis seu incinerationis.

Praeterea, incineratio est in corporibus nostris propter fomitis corruptionem; hic autem in Christo non fuit; ergo non debuit incinerari.

Respondeo. Dicendum, quod sicut Christus voluntate propriae personae defectibilitatem humanae naturae assumpsit, ita etiam omnes defectus actuales voluntarie secundum voluntatem humanam sustinuit. Volens enim esurivit et sitivit, et alia huiusmodi perpessus est, ut Damascenus dicit. Et hoc ideo ut huiusmodi defectuum perpessio reputaretur ei ad meritum quo sibi et nobis meruit, et nobis ad exemplum. Corpus autem post animae separationem voluntatem non habuit. Unde post mortem incinerationis vel putrefactionis defectus ei non compete-
tebat.

Ad primum ergo dicendum, quod hoc intelligendum est de defectibus mortui corporis, et hoc ratione iam dicta.

Ad secundum dicendum, quod ex hoc quod voluntarie mortem sustinuit, ab omni poena originalis peccati nos absolvit. Unde non oportuit quod ejus corpus ulterius incineraretur.

Ad tertium dicendum, quod anima separata, corpus non est in statu merendi. Unde ratio non sequitur.

ARTICULUS IV.

Ad quartum sic proceditur. Et 1. videtur, quod propter mortem carnis Filius Dei non possit dici mortuus. Contradictoria non sunt simul vera de eodem: sed de Filio Dei vere dicitur, quod est immortalis, et per consequens non est mortuus; ergo non potest dici mortuus.

2. Praeterea, ea quae habent repugnantiam intellectuum ad Dei Filium de ipso non praedicantur, ut nomen creaturae: sed tale attributum est esse mortuum, quia repugnat ad esse vitam, quod convenit Filio Dei; ergo de eo non praedicatur.

3. Praeterea, quod aeternum est caret fine vitae; quod moritur habet finem; ergo persona, cum sit aeterna, non potest dici mortua.

Ad oppositum in Symbolo dicitur: « Crucifixus, mortuus. »

Praeterea, per separationem animae a corpore quilibet dicitur mortuus: sed in Filio Dei fuit separata anima a carne; ergo Christus fuit mortuus.

Ad hoc dicendum, quod mors est attributum naturae humanae et non secundum se natum convenire personae, sed tantum ratione naturae. Unde eum talia simpliciter et sine determinatione dicantur de persona; ideo vere potest dici Christus mortuus, sicut quis absolute dicitur crispus, cum partis, scilicet capillorum ratione et non totius personae crispitudo sibi conveniat.

Ad quod in contrarium objicitur, quod Christus dicitur immortalis, dicendum, quod hoc verum est, quia ea quae sunt utriusque naturae possunt affirmari de persona: sed tamen haec, Christus non est mortuus, est vera secundum quid, et falsa simpliciter: quia ad veritatem affirmativae sufficit, quod secundum aliquam naturam conveniat, quod dicitur de persona: sed ad veritatem negativae oportet quod

secundum neutram. Non est autem inconveniens ut unum contradictoriorum dicatur de aliquo simpliciter, et de reliquo secundum quid.

Ad secundum quod objicitur, quod ibi est repugnantia, dicendum, quod falsum est; quia mors, cum sit conditio humanae naturae, refertur tantum ad humanam. Unde non opponitur divinae vitae qua vivit persona.

Ad tertium, quod objicitur de aeterno, dicendum, quod aeternum, in quantum aeternum, caret fine. Persona vero, quantum sit aeterna, et sic careat fine secundum se, et secundum naturam divinam, tamen secundum naturam assumptam, dicitur ortum et finem habere in tempore.

Expositio textus.

« Non in illo mutatus est. » Hoc dicitur, non quod humana natura a sua conditione naturali mutata sit; sed quia ampliorem acceperit perfectionem secundum quam facta est melior.

DISTINCTIO XXII.

Hic quaeritur utrum in illo triduo etc. (V. edit. nostrae tom. VII, pag. 225.)

QUAESTIO UNICA.

ARTICULUS I.

Hic primo quaeritur. Et 1. videtur, quod Christus in triduo fuit homo. De quocumque praedicatur differentia specifica, de eo praedicatur species; sed de Christo praedicatur rationale propter unionem ad animam rationalem, sicut prius; ergo de eo poterit praedicari species hominis, et ita homo.

2. Praeterea, omne habens naturam humanam est homo: sed in triduo Christus habuit naturam humanam, scilicet animam et corpus; ergo Christus in triduo fuit homo.

3. Praeterea, omnis sacerdos est homo: Christus in illo triduo erat sacerdos, quia dicitur in Psal. 109: « Tu es sacerdos in aeternum; » ergo in illo triduo erat homo.

Contra. Homo mortuus non est homo: sed Christus in triduo fuit mortuus; ergo Christus non fuit homo.

Praeterea, vivum superius est ad hominem, sicut dicitur in libro de Causis: sed Christus in triduo non vivebat; ergo non erat homo.

Ad hoc dicendum est, quod opinio Magistri et Hugonis de sancto Victore fuit, quod Christus in illo triduo fuerit homo: sed ad hoc movebantur diversis rationibus. Hugo enim dicit, quod tota personae hominis est in anima, et ipsa erat homo proprie loquendo; et ideo anima post mortem potest dici homo, non solum in Christo, sed etiam in aliis hominibus.

Sed contra hanc opinionem est, quia si anima est persona hominis, ergo corpus adveniens ei advenit enti completo ultima completionem, et ita accidentaliter. Magister autem dicit, quod solus Christus post mortem fuit homo, quia corpus et anima post mortem aliquo modo manent unita in Christo, in quantum utrumque manet unitum Verbo. Sed quia non erant simul adinvicem unita; ideo non eo modo erat homo tunc, quo caeteri homines.

Sed contra hoc est, quia sequitur quod Christus aequivocè erat homo; ergo non erat homou- sion matri suae, idest consubstantialis; nisi dicatur, quod Christus alio modo dicebatur tunc homo, quam prius, ut etiam Magister dicit. Et ideo com- munis opinio est, quod Christus in triduo non fuit homo; quia hominem faciebat eum quasi materia- liter corporis et animae assumptio; sed formaliter eorum invicem conjunctio quae soluta fuit in triduo.

Ad illud quod in contrarium objicitur de ratio- nali, dicendum est, quod rationale, secundum quod est differentia, compositum nominat, ut dicit Avi- cenna, quamvis ab anima sumatur. Et sicut post mortem non erat homo, ita non erat rationale, se- cundum quod rationale nominat differentiam homi- nis (et sic procedit argumentum) sed solum secun- dum quod nominat potentiam animae.

Ad secundum quod objicitur, quod habebat na- turam humanam, dicendum, quod natura humana dupliciter intelligitur. Uno modo materialiter pro ipsis partibus humanae naturae; et sic Christus a- liquo modo habuit naturam humanam in triduo. Alio modo formaliter pro ipsa forma compositi, quae resultat ex anima et corpore; et sic Christus non habuit naturam humanam in triduo.

Ad tertium dicendum, quod sacerdos dicitur aliquis dupliciter. Uno modo ratione characteris, qui manet in anima post mortem; et sic aliquis post mortem potest dici sacerdos. Quamvis enim forte in anima Christi non sit ratio characteris, est tamen ibi spiritualis potestas sacerdoti. Alio modo quantum ad sacrificii oblationem quae est exequu- tio sacerdotii; et sic nec Christo, nec alteri conve- nit sacerdotum anima a corpore separata.

ARTICULUS II.

Ad secundum sic proceditur. Et 1. videtur, quod Christus ubicumque sit homo. Quaecumque enim conveniunt Filio Dei per naturam, conveniunt filio hominis per gratiam: sed esse ubique convenit Filio Dei per naturam; ergo Christo homini per gratiam.

2. Praeterea, omnis homo ubicumque est, ibi est homo: sed Christus est homo; ergo ubicumque est, ibi est homo: sed est ubique; ergo ubique est homo.

3. Praeterea, omne quod est, aut est homo, aut non homo; si igitur Christus non est ubique homo, erit alicubi non homo; quod falsum est.

Contra. Christus secundum quod homo non fuit nisi ubi fuit anima ejus et caro: sed ista non fue- runt ubique; ergo nec Christus secundum quod homo.

Praeterea, Christus est homo singularis: sed singularia sunt hic et nunc, universalia ubique, se- cundum Philosophum; ergo Christus secundum quod homo non est ubique.

Ad hoc dicendum est, quod personae Verbi convenit esse ubique, naturae autem assumptae non. Quia ergo hic terminus homo a parte subjecti te- netur pro persona, a parte praedicati pro natura, quia terminus in praedicato positus tenetur forma- liter, in subjecto materialiter; ideo cum hic termi- nus homo ponitur a parte subjecti, sic, Christus homo est ubique, est vera propositio. Cum autem ponitur a parte praedicati, sic, Christus est homo ubique, est falsa, quia significatur humanitas ejus esse ubique. Haec autem, Christus, secundum quod homo, est ubique, potest esse vera et falsa, quia ly

secundum potest importare conditionem naturae, et sic falsa est; vel unitatem suppositi, et sic est vera.

Ad primum ergo quod objicitur in contrarium, « Quodcumque convenit Filio Dei per naturam etc. » dicendum, quod hoc intelligitur de gratia unionis, per quam fit unio in supposito, non in natura. Unde non oportet quod divina conditio attribuatür natu- rae humanae, sed supposito humanae naturae.

Ad secundum quod objicitur, quod omnis ho- mo, ubicumque est, homo est, dicendum, quod secus est in aliis hominibus et in Christo; quia in aliis natura humana cujuslibet adaequatur suo supposito: in Christo vero non; quia ibi erat suppositum infinitum, idest divinum, et finita una natura, idest humana.

Ad tertium, quod objicitur, quod aut ubique homo, aut etiam alicubi non homo, dicendum, quod insufficiens est divisio, quia non per imme- diata. Nam quamvis homo et non homo opponatur ut affirmatio et negatio, tamen hae duae proposi- tiones non sic opponuntur, quia utraque affirmativa est. Et est simile, ut si demonstrato homine nigro dicatur: iste est homo: aut ergo albus homo, aut albus non homo.

ARTICULUS III.

Ad tertium sic proceditur. Et 1. videtur, quod Christus in caelum ascenderit ratione divinae na- turae et non humanae, sic. Secundum Hieronymum, humanae naturae non est propria virtute ascende- re, sed virtute aliena: Christus autem ascendit in caelum propria virtute, sicut dicitur Isa. 65: « Gra- « diens in multitudine virtutis suae; » ergo ra- tione naturae divinae, non humanae, ascendit in caelum.

2. Praeterea, cui convenit terminus motus ei- dem et motus. Cum igitur terminus ascensionis in caelum, scilicet sessio ad dexteram, quae importat aequalitatem Patris, conveniat Christo ratione divi- nae naturae, ratione ejus est aequalis Patri, igitur et ascensio in caelum conveniet sibi ratione divinae naturae.

3. Praeterea, non est idem terminus motus et principium: sed humana natura est terminus de- scensionis in uterum Virginis. Secundum hoc enim descendit, quia carnem assumpsit; ergo non ascen- dit ratione humanae naturae.

Ad oppositum, Damascenus dicit, quod ascensio et descensio motus sunt corporum; ergo videtur quod ascendit et descendit ratione naturae humanae.

Praeterea, quod ubique est, non mutat locum. Deus autem ubique est; ergo non mutat locum. Ascensio et descensio dicunt mutationem loci; ergo videtur quod non conveniant Christo ratione divi- nae naturae.

Ad hoc dicendum est, quod ascendere et de- scendere dicuntur proprie et per translationem. Proprie sunt motus corporum; et sic non competit Christo secundum rationem divinae naturae: sed ratione humanae, secundum quam descendit in in- fernum et ascendit in caelum. Per translationem autem sic convenit Christo descendere ratione divi- nae naturae, inquantum exinanivit semet ipsum formam servi accipiens. Ascendere autem nec me- taphorice Christo ratione divinae naturae convenire potest; quia, ut supradictum est, non est dictum quod divinitas ascendit nisi quatenus in notitia ho-

minum crescat. Conveniunt tamen personae ratione naturae, quia sunt actus. Actus autem sunt suppositorum.

Ad hoc ergo quod objicitur in contrarium, quia humanae naturae non est propria virtute ascendere, dicendum, quod ascendere non attribuitur humanae naturae virtute ejus fuit motus, sed ut subjecto proprio et immediato motus illius.

Ad secundum dicendum, quod sedere ad dexteram Patris dupliciter potest intelligi. Uno modo secundum quod est idem quod esse aequalem Patri; et sic convenit Christo ratione divinae naturae ab aeterno. Alio modo secundum quod est idem quod esse in potioribus bonis Patris; et sic convenit Christo etiam secundum humanam naturam; et ita est terminus ascensionis per quam exaltata est humana natura Christi super omnem creaturam, non solum ordine dignitatis sed etiam loco.

Ad tertium dicendum, quod descensus in Virginem est quidam descensus metaphorice dictus, inquantum Deus etiam sibi univit inferiorem naturam.

ARTICULUS IV.

Ad quartum sic proceditur. Et 1. videtur, quod Christus non descenderit ad inferos in triduo. Luc. 22: « Hodie mecum eris in Paradiso; » non ergo illa die fuit in inferno.

2. Praeterea, quod virtuosius est, magis est Christo conveniens. Sed virtuosius est solo imperio liberare de carcere, quam descensu corporali in ipsum carcerem; ergo magis est Christo conveniens liberatio per imperium, quam per descensum ad inferos.

3. Praeterea, optimo debetur optimus locus; cum ergo Christus optimus sit, locus autem inferni pessimus, unde dicit Augustinus ad Dardanum, quod nomen inferni in Scriptura semper in malo accipitur; ergo Christo non convenit; et sic non descendit ad inferos.

Contra. In symbolo dicitur: « Descendit ad inferos. »

Praeterea, gloriosius est vincere tyrannum in sede et regno proprio quam extra. Christus autem gloriosissime vicit Diabolum; ergo in sede et regno proprio.

Ad hoc dicendum est, quod nomine inferni potest intelligi vel poena vel locus poenae. Primo modo non descendit anima Christi ad infernum, quia nec poena damni nec poenae sensus digna erat. Secundo modo descendit ad illam partem inferni quae dicitur limbus patrum seu sanctorum animarum, et hoc ut sanctos ibi detentos liberaret: non quia sine descensu non posset eos liberare si vellet; sed ut sua praesentia eos consolaretur, et ostenderet descendendo quantum eos diligeret, et ut adversarium devictum confunderet.

Ad primum ergo quod objicitur de Paradiso, dicendum, quod loquitur de Paradiso spirituali qui est visio Dei, non corporali.

Quod objicitur quod virtuosius etc. dicendum, quod licet illud sit signum majoris potentiae, hoc tamen majoris misericordiae ad liberandum.

Ad tertium quod objicitur quod optimo debetur optimus locus, dicendum, quod verum est secundum se: sed dispensative propter nos ad tempus potest Christo post mortem aliquis locus poenalis

convenire; non quantum ad supplicium, per quem modum loquitur Augustinus de inferno, sed quantum ad loci substantiam.

Expositio textus.

« Fidei argumentum a philosophicis argumentis est liberum », quia per ea, nec probari, nec improbari potest. « Et ipse forte ante mortem. » Hoc dicit propter tertiam opinionem quae dicebat, quod etiam ante mortem hoc modo erat homo, quia una eademque unio est, quantum est ex parte assumentis, non quantum ex parte assumptorum. « Totus in caelo, totus in inferno. » Sciendum quod totus accipitur hic pro perfecto, non pro composito ex partibus. Totum vero naturaliter accipitur pro composito. Sed quod composita dicitur persona Christi ex duabus naturis, intelligi debet compositione exigitiva non integrali. « Haec de corrigia. » Pes occultatus significat deitatem. Calceamentum exterius apparens significat humanitatem. Corrigia calciamenti significat modum et gratiam unionis. Ossa regis Idumaeae, fortes seu difficiles et interiores proprietates ejus. Usque ad cinerem consumatum, ultimam perscrutationem, quae fit per modum resolutionis.

DISTINCTIO XXIII.

Cum supra habitum sit etc. (V. edit. nostrae tom. VII, pag. 256.)

QUAESTIO UNICA.

ARTICULUS I.

Hic primo quaeritur. Et 1. videtur, quod praedicta definitio male assignetur. Nulla enim qualitas est substantia: fides est qualitas, cum sit virtus quae est bona qualitas mentis, ut dicit Augustinus; ergo fides non est substantia.

2. Praeterea, prius non debet definiri per posterius: fides est prior quam spes; ergo non debet definiri per speranda.

3. Praeterea, argumentum dicitur, quia arguit mentem ad assentiendum alicui: sed mens arguitur ad assentiendum aliquibus ex hoc quod illa sunt ei apparentia; ergo videtur esse oppositum in adjecto, quod dicitur argumentum non apparentium.

4. Praeterea, fides est cognitio quaedam; sed omnis cognitio est secundum quod aliquid apparet cognoscenti, ut videtur in sensitiva et intellectiva cognitione; ergo inconvenienter dicitur quod fides sit non apparentium.

Respondeo. Dicendum, quod in praedicta definitione Apostoli sufficienter continentur ea ex quibus potest fides definiri; quamvis ordo definitionis ab eo praetermittatur, sicut ab aliis auctoribus: et hoc sic patet. Fides enim habitus quidam est qui per actum suum, qui est credere, sufficienter manifestatur. Cum autem aliquis credat ex hoc, quod imperio voluntatis intellectus ejus determinatur ad assentiendum alicui, actus credendi ex duobus dependet: scilicet ex fine qui movet voluntatem, et ex objecto, in quod voluntas inclinatur intellectum. Finis autem movens ad credendum est vita aeterna quam speramus; ejus prima inchoatio in nobis est habitus fidei per quem illum finem cognoscimus, naturalem cognitionem superexcedentem; et quan-

tum ad hoc dicitur fides esse substantia rerum sperandarum, secundum quod prima pars uniuscujusque rei dicitur esse substantia illius rei, secundum Philosophum. Objectum vero, in quod intellectus a voluntate inclinatur, est veritas prima naturalem cognitionem excedens: et sic dicitur argumentum non apparentium, in quantum ipsa fides est argumentum ad assentiendum praedictae veritati. Sic ergo apparet materia fidei, seu objectum, in hoc quod dicit, non apparentium. Actus in hoc quod dicit, argumentum. Ordo ad finem, in hoc quod dicit, substantia rerum sperandarum. Ex actu autem datur intelligi et genus, scilicet habitus, qui per actum cognoscitur, et subiectum, scilicet mens. Nec plura requiruntur ad alicujus virtutis definitionem. Et sic apparet sufficientia praedictae definitionis.

Ad hoc ergo quod primo objicitur quod fides dicitur substantia, dicendum, quod non proprie, quasi sit in genere substantiae; sed per quamdam similitudinem; scilicet in quantum prima est inchoatio, et fundamentum totius spiritualis vitae, sicut substantia est fundamentum omnium entium.

Ad secundum quod objicitur, quod fides definitur per rem sperandam, dicendum, quod illud quod inclinatur ad fidem, circumloquitur Apostolus per rem sperandam; et non ponit illud ut spei objectum, sed potius ut fidei finem.

Ad tertium quod objicitur de argumento, dicendum, quod fides non inducit, seu arguit mentem ex rei evidentia, sed ex inclinatione voluntatis: et ideo non sequitur, quod sit ibi oppositum in adjecto.

Ad quartum quod objicitur, quod fides est cognitio, dicendum, quod cognitio duo importat; scilicet visionem et assensum; et quantum ad visionem contra fidem distinguitur. Unde dicit Gregorius quod visa non habent fidem, sed agnitionem. Quantum autem ad certitudinem assensus fides est cognitio seu visio, sicut dicitur 1 ad Corinth. 13: « Videamus nunc per speculum etc. » Argumentum autem procedebat primo modo et non secundo, secundum quod dicitur fides cognitio.

ARTICULUS II.

Ad secundum sic proceditur. Et 1. videtur, quod fides non sit virtus. Virtus enim contra cognitionem dividitur: unde scientia et virtus ponuntur genera diversa, ut patet in 4 Topic. Sed fides continetur sub cognitione; ergo non est virtus.

2. Praeterea, virtus dicitur per comparisonem ad bonum. Virtus enim est, quae bonum facit habentem, et opus ejus bonum reddit, ut dicitur in 2 Ethic. Sed fidei objectum est verum, non autem bonum; ergo fides non est virtus.

3. Praeterea, praesentia objecti non tollit habitum virtutis: sed objectum fidei est veritas prima, quae cum praesto erit menti, non erit fides, sed visio; ergo fides non est virtus.

Contra. Virtus est dispositio perfecti ad optimum: sed hoc convenit fidei: disponit enim hominem ad beatitudinem, quae est optimum; ergo fides est virtus.

Praeterea, Hugo de sancto Victore dicit, quod tres sunt virtutes sacramentales; scilicet fides, spes et charitas.

Respondeo. Dicendum, quod virtus dicitur, secundum Philosophum, quae facit bonum agentem et opus ejus bonum reddit. Actus autem aliquis

dicitur bonus dupliciter. Uno modo absolute: quando scilicet actus ponit potentiam in suo complemento, sicut scire intellectum, et obedire faciliter rationi, concupiscibilem: et sic acceperunt philosophi bonitatem actus, eo quod in actibus nostris summam felicitatem hominis ponebant: et ideo dixerunt virtutes principia actuum taliter bonorum, ut scientiam et temperantiam. Alio modo dicitur actus bonus in ordine ad finem; et sic apud nos dicuntur actus boni, in quantum sunt meritorii vitae aeternae; quod quidem non est, nisi actus sit voluntarius, et charitate informatus. Quia ergo actus fidei formatae secundum hoc meritorius est, quod ex voluntate et charitate procedit; pro tanto fides formata virtus dicitur secundo modo, sed non primo, cum per hoc non ponatur intellectus absolute in suo complemento. Fides autem informis neque primo, neque secundo.

Ad primum, quod objicitur, quod cognitio dividitur contra virtutem, dicendum, quod non contra virtutem simpliciter; sed contra virtutem moralem, quae communius virtus dicitur.

Ad secundum, quod objicitur, quod virtus dicitur per comparisonem ad bonum, dicendum, quod bonum illud, ad quod ordinatur, non est objectum alicujus actus; sed est ipse actus perfectus quem virtus elicit. Unde, licet verum a bono ratione differat, tamen quia hoc ipsum, quod est considerare verum, et assentire primae veritati propter seipsam, est quoddam bonum intellectus et meritorium; ideo fides, quae ad hunc actum ordinatur, dicitur virtus.

Ad tertium, quod objicitur, quod veritas prima est objectum fidei, dicendum, quod non, nisi haec ratione, prout est non apparens. Unde quando veritas prima praesto erit intellectui, amittet rationem objecti fidei.

ARTICULUS III.

Ad tertium sic proceditur. Et 1. videtur, quod non sit idem habitus fidei informis, et formatae. Gratia enim adveniens non habet minorem efficaciam in fideli, quam in infideli: sed in infideli, cum convertitur, cum gratia simul habitus fidei infunditur; ergo similiter in fideli: et ita habitus fidei formatae est alius ab habitu fidei informis.

2. Praeterea, fides informis est principium timoris servilis; fides autem formata, timoris casti, vel initialis: sed adveniente timore initiali vel casto excluditur timor servilis; ergo adveniente fide formata, excluditur fides informis.

3. Praeterea, Boetius dicit, quod accidentia corrumpi possunt, alterari nequaquam; sed habitus fidei informis est quoddam accidens; ergo non potest alterari ut fiat ipsemet formatus.

Contra. Res non diversificatur nisi per ea quae sunt de rei essentia: sed charitas est extra essentiam fidei; ergo ex hoc, quod est esse cum charitate, vel extra charitatem, non diversificatur habitus fidei.

Praeterea, Jac. 2 dicitur: « Fides sine operibus mortua est. » Glossa « quibus reviviscit; » ergo ipsa fides informis, quae fuit mortua, formatur et reviviscit.

Ad hoc dicendum, quod circa hoc sunt diversae opiniones. Quidam enim dicunt, quod eum gratia

infunditur novus habitus fidei formatae, et eo adveniente habitus fidei informis discedit.

Sed contra hoc est, quia nihil expellitur nisi per suum oppositum. Cum ergo fides informis non opponatur fidei formatae nisi ratione informitatis, si tolleretur quantum ad essentiam, oporteret, quod informitas esset ei essentialis; et sic habitus fidei informis, quantum ad suam essentiam esset malus, nec donum Dei esset.

Praeterea, cum post peccatum mortale subtracta gratia et fide formata remaneat fides in aliquo, si non esset idem habitus fidei informis et formatae, oporteret, quod ipsi peccatori novus habitus fidei infunderetur, cum videamus eum post peccatum credere; et sic ex hoc, quod aliquis peccaret, disponeretur ad recipiendum aliquod donum Dei; quod est falsum. Et ideo alii dicunt, quod non tollitur habitus, sed tantum actus fidei informis, adveniente charitate.

Sed contra hoc est, quia habitus sic remaneret otiosus.

Praeterea, cum actus fidei formatae non essentialiter contrarietur actui fidei informis, non potest eum impedire. Et ideo dicendum est eum aliis, quod fides informis manet adveniente charitate, et ipsamet formatur, sed sola informitas tollitur. Et hoc sic ostenditur. Habitus enim et potentiae diversificantur dupliciter: scilicet ex objectis, et diverso modo agendi. Prima diversitas facit essentialem diversitatem ipsorum. Ex secundo autem diversificantur secundum completum et incompletum, et non secundum essentiam. Fides autem formata et informis non differunt in agendo secundum diversos actus, quia utraque est principium credendi: sed in modo agendi; quia prima assentit primae veritati perfecta voluntate, secunda autem imperfecta. Unde non distinguuntur sicut diversi habitus, sed sicut habitus perfectus et imperfectus. Unde, cum idem habitus, qui prius fuit imperfectus, possit fieri perfectus, ipse habitus fidei informis fit formatus.

Ad primum ergo, quod objicitur, quia gratia non habet minorem efficaciam in fidei, quam in infidei, dicendum, quod verum est; sed hoc est per accidens quod in eo, qui habet fidem, non causet alium habitum fidei, quia in eo ipsam invenit.

Ad secundum, quod objicitur de timore servili, dicendum: timor servilis non expellitur adveniente charitate, quantum ad substantiam doni, sed solum quantum ad servilitatem; et sic etiam fides quantum ad informitatem solum, adveniente gratia.

Ad tertium, quod objicitur, quod accidens alterari non potest, dicendum, quod verum est; tamen subjectum accidentis secundum aliquod accidens alteratur; et sic accidens variari dicitur ut terminus alterationis, non ut subjectum.

ARTICULUS IV.

Ad quartum sic proceditur. Et 1. videtur, quod fides non sit prior aliis virtutibus. Omnes enim virtutes simul infunduntur: sed eorum, quae simul sunt, unum non est post alterum; ergo fides non est prior aliis.

2. Praeterea, virtutibus theologice ordinamur in Deum, ut in finem: sed spes et charitas propinquiores sunt fini quam fides, quae habent finem pro objecto sub ratione finis; ergo sunt propinque-

res fini quam fides, et ita priores, cum finis sit principium in operativis.

3. Praeterea, fides principaliter est in intellectu speculativo: sed speculativa vita sequitur activam, quia, ut dicit Gregorius, « Nullus pervenit ad contemplativae oculum, nisi prius depuretur mens per exercitium activae; » ergo virtutes morales, quae pertinent ad activam, sunt prius fide.

Contra. Cognitio praecedit affectionem; fides est in cognitione, virtutes autem aliae sunt in affectione; ergo fides aliis prior est.

Praeterea, in omnibus virtutibus requiritur intentio: sed fides intentionem dirigit, ut dicit Augustinus; ergo fides est ante alias virtutes.

Ad hoc dicendum est, quod aliquid potest dici prius altero, tempore, et natura. Tempore quidem omnes virtutes simul sunt, quia simul divinitus infunduntur: sed secundum naturam ordo virtutum pensandus est ex actibus. Actus autem fidei consistit in cognitione veri, quam praesupponit affectio boni quae in omnibus aliis virtutibus exigitur: et ideo fides, quantum ad id quod fidei est, prior est aliis omnibus virtutibus secundum naturam.

Ad primum ergo, quod objicitur de infusione virtutum, dicendum est, quod illa ratio procedit de ordine temporis.

Ad secundum, quod objicitur, quod spes et charitas sunt priores et propinquiores fini, dicendum, quod hoc est verum, quantum ad consecutionem finis. Quanto enim aliquid est propinquius consecutioni finis, tanto est remotius in motu ad finem; et quanto aliquid est propinquius ordinationi in finem, tanto est prius in motu in finem.

Ad tertium quod objicitur de vita contemplativa, dicendum, quod fides non tantummodo pertinet ad vitam contemplativam, immo est principium activae et contemplativae, in quantum ostendit finem utriusque.

Expositio textus.

« Aliud est credere in Deum. » Ratio illius est. Nam illa tria nominant actum unum in substantia, sed differentem ratione. Nam Deus, sive prima veritas, ad actum credendi se habet in triplici ratione: scilicet ut objectum quod creditur, et sic actus fidei dicitur credere Deum: ut ratio quare creditur, et sic ponitur actus fidei credere Deo (nam ideo credimus, quia Deus dixit): ut finis fidei, et sic actus fidei dicitur credere in Deum. « Non sicut corpus. » Sciendum quod hanc experimentalem cognitionem quam quis habet de fide sua, separat Augustinus a quatuor generibus visionum: scilicet a visione exteriori, per hoc quod dicit: « Sicut corpora, » et a visione imaginis, quae ex ipsa relinquitur, in hoc quod dicit: « Et per ipsorum imaginem. » Et a visione imaginativae quae ex diversis generibus rerum visarum, format aliquam rem nunquam visam, in hoc quod dicit: « Non sicut ea quae nunc videmus, » et a visione actuali eorum, quae sunt extra nos, per hoc quod dicit: « Nec sicut hominem. »

DISTINCTIO XXIV.

Hic quaeritur etc. (V. edit. nostrae tom. VII. pag. 258.)

QUAESTIO UNICA.

ARTICULUS I.

Hic primo quaeritur. Et 1. videtur, quod non sit veritas increata objectum fidei. Actus enim per se subjecta distinguuntur: sed actus fidei et visio Dei per essentiam sunt actus diversi; cum ergo objectum visionis praedictae sit ipsa veritas prima, non erit objectum actus fidei.

2. Praeterea, veritas prima sic se habet ad fidem, sicut lumen ad visum: lumen autem non est per se objectum visus, sed magis color in actu, ut dicit Ptolomaeus; ergo nec veritas prima est per se objectum fidei.

3. Praeterea, fides non est nisi de his quae in Symbolo continentur, quia est collatio credendorum: sed in Symbolo continentur quaedam quae ad creaturam pertinent, sicut passio et huiusmodi; ergo objectum fidei non est veritas increata tantum.

Contra. Dionysius, 7 cap. de Divin. nominibus, dicit, quod fides divina est circa simplicem et circa semper existentem veritatem: haec autem est veritas increata.

Praeterea, omne creatum est mutabile, sed verum: quod subest fidei, non est mutabile, quia fidei non potest subesse falsum; ergo non est creatum.

Ad hoc dicendum, quod objectum alicujus potentiae, potest aliquid tripliciter dici. Vel formaliter, scilicet illud ad quod actus terminatur primo et per se: vel materialiter ad quod terminatur consequenter et per accidens. Verbi gratia, visus primo et per se terminatur ad lucem, quae actu et per se habet potentiam visivam per se movere, sed non primo ad colorem qui est potentia movens non actu, nisi per lucem; per accidens vero ad ea quae colorem ipsum in eodem subjecto vel antecedunt, ut substantia, vel comitantur vel consequuntur, ut alia accidentia. Sic fidei objectum formale est prima veritas. Ipsa enim est ratio credendi in omnibus articulis. Materiale autem est aliquod creatum attributum, ut resurrectio Christi vel passio. Accidentale vero aliquid, quod ad huiusmodi articulos antecedit, vel concomitatur vel consequitur.

Ad illud ergo quod primo objicitur quod veritas prima est objectum visionis patriae, dicendum, quod hoc est verum, ut in sua specie apparens: fidei autem ut non apparens. Unde, quamvis sit idem re, utriusque actus objectum, non tamen est idem ratione; et sic diversam speciem actus facit.

Ad secundum quod objicitur de lumine, dicendum, quod lumen quodammodo est objectum visus, quodammodo non. In quantum enim non nisi per hoc, quod ad aliquod corpus terminatum conjungitur, dicitur non esse per se objectum visus, sed magis color qui semper est in corpore terminato. In quantum vero non nisi per lucem videri potest color, lux primum visibile esse dicitur, ut idem Ptolomaeus dicit; et sic veritas prima est primo et per se objectum fidei.

Ad tertium quod objicitur de articulis Symboli, dicendum, quod fides non est proprie et per se de his secundum se, sed ut sunt attributa divina; ut resurrectionem fore non est articulus, sed resurre-

ctionem faciendam esse a Deo. Et hoc modo intelligendi sunt articuli qui ponuntur in Symbolo.

ARTICULUS II.

Ad secundum sic proceditur. Et 1. videtur, quod fides non sit circa verum complexum. Richardus de sancto Victore dicit « Articulus est veritas indivisibilis de Deo credita »; ergo veritas incompleta est objectum fidei, cum ejus objectum sit articulus.

2. Praeterea, in vero complexo incipit tempus, quia secundum Philosophum in 3 de Anima, « In complexione intellectus incidit tempus. » In articulo fidei non incidit tempus; alioquin nullus crederet passionem Christi tempore quo patiebatur nisi qui crederet eum actu pati; quod est falsum; ergo verum complexum non est articulus, et sic nec objectum fidei.

3. Praeterea, fides semper est eadem: quia dicit Augustinus, quod fides non est variata, sed tempora sunt mutata: sed verum complexum, seu enunciabile, non est idem secundum diversa tempora, scilicet esse, fore, fuisse; ergo non est de vero complexo.

Contra. Per fidem differt fidelis ab infideli: non autem differt per incomplectum sed per complexum: quia Judaeus credidit adventum Christi, sicut et nos: sed in hoc distinguimur, quia credimus eum venisse, quem ipsi respectant venturum; ergo fides est de complexis.

Praeterea, verum non est nisi circa complexum, ut dicitur in Praedicamentis: sed fides non est nisi veri; ergo non est nisi complexi.

Ad hoc dicendum est, quod fidem esse circa verum complexum, apparet dupliciter. Primo ex parte fidei, quia ejus actus est assentire; quia credere est cum assensione cogitare, ut dicit Augustinus: assentire autem non potest aliquis, nisi ei quod est verum. Veritas autem non consistit nisi in complexione, vel intellectu, vel vocum: ideo fidei objectum oportet quod sit verum complexum. Et hoc patet per hoc quod philosophi illam operationem intellectus quae componit et dividit appellant fidem. Secundo etiam ex ratione proprii objecti, quod est veritas prima, de qua non potest sciri quid est, ut in ejus cognitione intellectus formatione utatur, sicut in cognitione simplicium quidditatum; sed cognoscitur quia est; quod fit per intellectum componentem et dividentem. Et ideo dicendum est, quod fides est de complexo sine determinatione temporis, cum determinatione autem temporis per accidens propter ejus manifestationem; quamvis alii dixerint quod fides sit circa verum incomplectum; quod stare non potest, propter rationes praedictas.

Ad illud ergo quod primo objicitur de veritate indivisibili, dicendum quod quamvis veritas divina divina sit indivisibilis secundum rem, tamen accipitur secundum alium intellectum modo composito secundum diversa ejus attributa.

Ad secundum quod objicitur, quod in compositione intellectus incidit tempus, dicendum quod quamvis incidat tempus aliquo modo, non tamen tempus determinatum, nisi per accidens, scilicet per doctrinam praedicationis; vel alio modo, sed confusum. Unde per accidens est determinatio temporis, de necessitate salutis. Tamen determinatio temporis pertinet ad fidem, sicut ea quae tertio modo fidei attribuantur, non sicut ea quae secundo.

Ad tertium quod objicitur de variatione articulo-
rum, dicendum quod circa hoc dixerunt aliqui,
quod enunciabilia trium temporum non sunt nisi
unum enunciabile.

Sed contra est quod secundum veritatem phi-
losophi allegatam, tempus est de essentia enun-
ciabilis; unde variatur secundum diversas differen-
tias temporum quae exprimentur. Et ideo dicendum
est cum aliis, quod enunciabile indeterminatum,
quod est articulus per se, non est mutatum; sed
enunciabile determinatum, quod est articulus per
accidens. Unde fides non est variata, nisi accidentali
variatione; quia tempus determinatum non est de
substantia articuli, sed accidens. Vel dicendum, quod
habitus habet unitatem ex unitate objecti, secun-
dum quod est in re, non secundum quod est in
acceptatione nostra. Et quia res credita est eadem,
ideo fides est una, licet diversa enunciabilia for-
mentur propter diversum modum accipiendi, ut
accipitur praesens, praeterita, vel futura.

ARTICULUS III.

Ad tertium sic proceditur. Et 1. videtur, quod
fides est de visis. Joan. 20, dicitur: « Quia vidisti
me, Thoma, credidisti »; ergo fides est de re visa.

2. Praeterea, scientia demonstrativa, quae major
est fide, potest esse de re visa, ut puta de eclipsi;
ergo a minori fides potest esse de viso.

3. Praeterea, Beata Virgo videns Filium passum,
aut credebat articulum de passione, aut non: si
non, non erat catholica; si sic, ergo fides ejus erat
de viso.

Contra. Gregorius: « Apparentia fidem non habent,
sed agnitionem »; ergo fides non est de re appa-
renti visui.

Praeterea, super illud Joan. 14: « Vado parare
vobis locum, » dicit Augustinus: « Eatur non videatur,
lateat, ut credatur; » ergo fides esse de re latenti.

Respondeo. Dicendum, quod cessante ratione
objecti fidei, oportet quod fides cesset. Unde cum
non apparens pertineat ad rationem objecti fidei,
ut ex definitione Apostoli patet, ex quo aliquid est
apparens desinit de eo esse fides secundum quod
est apparens. Si autem aliquid est quod simul sit
secundum aliquid apparens, et secundum aliquid
non apparens, potest simul esse visum et creditum
ratione diversorum: et ita erat in Christo, cujus
humanitas videbatur, et divinitas latebat, quae est
principale fidei objectum.

Ad hoc ergo, quod primo objicitur, « Quia vidisti
me, etc. » dicendum, quod non dixit, quia cre-
didisti me. Aliud enim vidit, et aliud credidit.

Ad secundum, quod objicitur de scientia de-
monstrativa, dicendum, quod non est simile; quia
cognitiones disparatae sunt, sed non oppositae: sed
fides et visio cognitiones oppositae sunt, quia una
importat de ratione sui occultationem objecti altera
manifestationem.

Ad tertium, quod objicitur de Beata Virgine,
dicendum quod aliud videbat, et aliud credebat.
Videbat enim hominem pati, sed credebat Deum pati.

ARTICULUS IV.

Ad quartum sic proceditur. Et 1. videtur, quod
fides possit esse de re scita. Aliquis enim sciens
Deum creatorem, potest hoc ipsum credere, si con-
S. Th. Opera omnia. V. 22.

vertatur ad fidem, ut apparet in aliquo philosopho:
et constat, quod propter fidem non obliviscitur
scientiam quam de Deo habuit; ergo idem scit et
credit aliquis.

2. Praeterea, illud ad quod habetur ratio pro-
bans, est scitum: sed ad ea quae fides credit, ha-
betur ratio probans. Unde dicit in 1 Petr. cap. 5:
« Parati reddere rationem de ea, quae in vobis est
fide et spe. » Et Richardus de sancto Victore
dicit, quod ad id quod necesse est esse, non de-
ficit ratio, probans illud esse necessarium; ergo ea
quae credit fides, possunt esse scita.

3. Praeterea, omnis probatio convincens intel-
lectum facit scientiam: sed ad credenda convincitur
intellectus per miracula, sicut apparet in daemo-
nibus; ergo fides est de scitis.

Contra. Scientia accipitur per rationem, quia
per demonstrationem: sed ea de quibus est fides,
sunt supra rationem; ergo de his quae sunt fidei,
non potest esse scientia.

Praeterea, sicut caritas diligit Deum supra
omnia, sic fides adhaeret ei super omnia: sed cha-
ritas non compatitur secum amorem quo ama-
tur Deus propter temporalia; ergo nec fides cogni-
tionem cui adhaeretur propter rationes: sed hoc est
scientia; ergo non compatitur scientiam.

Respondeo. Dicendum, quod omne quod est
scitum, est visum intellectui. Nam scientia est per
resolutionem in prima principia, quae sunt intel-
lectui pervia. Unde, sicut fides non potest esse de
his quae videntur corporaliter, inquantum hujus-
modi, ita nec de his quae sciuntur. Potest tamen
de eodem haberi scientia ab uno, et fides ab al-
tero; sicut per certitudinem beati sciunt ea quae
nos credimus, quae sunt supra intellectum cujus-
libet viatoris: et haec sunt credibilia simpliciter.
Unus etiam viator potest scire id quod alius credit;
sicut Philosophus scit Deum esse, quod rusticus
credit: sed haec non sunt credibilia simpliciter, sed
solum respectu ejus qui scientiam non habet. Qui-
dam tamen dicunt quod de hujusmodi, potest ab
eodem simul haberi scientia et fides, diversis ta-
men rationibus: sed primum melius est.

Ad primum ergo, quod objicitur, jam apparet
solutio secundum eos. Secundum alios tamen di-
cendum, quod alia ratione est creditum, scilicet
propter testimonium primae veritatis, et alia ratione
scitum, sicut per rationem demonstrantem. Nec
dicunt hoc esse impossibile, cum sint separabiles
praedictae cognitiones.

Ad secundum, quod objicitur de auctoritate
Petri et Richardi, dicendum, quod hoc intelli-
gitur de ratione defendente fidem ab impugnatione
haereticorum; non de ratione ipsam probante, nisi
persuasive. Quamvis enim de eo, quod oportet
credi, sit necessaria ratio, ut Richardus dicit,
tamen nobis est occulta; ut idem Richardus dicit,
quod rationes credibilium sunt ignotae nobis, sed
notae Deo et beatis.

Ad tertium, quod objicitur de miraculis, dicen-
dum, quod miracula non probant per se fidem,
sed veritatem annunciantis fidem; et ideo de his
quae fidei sunt, non faciunt scientiam.

Expositio textus.

« Transeat in fidem. »

Contra. In patria non erit fides. Solutio: dicen-

dum, quod fidem vocat large, quemcumque assensum eum cognitione, non solum de rebus non apparentibus.

• Dicimus eum fidem passionis habuisse. »

Contra. Beata Virgo se concepisse sine viro experimento sensibili scivit, et tamen credidit.

Respondeo. Scivit se concepisse puerum; sed credidit se concepisse Deum.

• Est tamen de his, quae visu interiori. »

Contra. Quia est de non apparentibus.

Respondeo. Non apparentia intellectui quo ad claram cognitionem, non qualemcumque.

DISTINCTIO XXV.

Praedictis adjiciendum etc. (V. edit. nostrae tom. VII, pag. 266.)

QUAESTIO UNICA.

ARTICULUS I.

Hic primo quaeritur, utrum in Symbolo Apostolorum contineantur omnia credenda: et videtur quod non. Si quis fornicationem non crederet esse mortale peccatum, judicaretur esse haereticus: sed haec et similia credenda non ponuntur in dicto symbolo; ergo non omnia.

2. Praeterea, necessarium est credere corpus Christi sub specie panis in altari esse: sed hoc ibi non continetur; ergo nec omnia credenda.

3. Praeterea, multa plura addita sunt in Symbolo Nicaeno et Athanasii, quam in Symbolo Apostolorum; ergo in isto non continentur omnia credenda.

Juxta hoc quaeritur de differentia istorum Symbolorum trium.

Item quaeritur, quare non tangitur in Symbolo Nicaeno de descensu ad inferos.

Item de distinctione articulorum positorum in Symbolo Apostolorum.

Solutio. Ad primum dicendum est, quod sicut in scientiis videmus quaedam antecedentia ad scientiam, et principia generalia, quae secundum substantiam non intrant demonstrationem, quaedam consequentia, ut corollaria, quaedam principalia, ut ea quae intrant demonstrationem secundum substantiam, sic quaedam sunt necessaria ad fidem, ut antecedentia, quae sunt de dictamine rationis naturalis; quaedam principalia, ut articuli ad quorum cognitionem et assensum, lumen primae veritatis principaliter illuminat: quaedam consequentia ad fidem, scilicet illa quae ad articulos possunt reduci: et hujusmodi sunt, quae possunt reduci generaliter ad omnia, quae in sacra Scriptura determinantur ut contraria eorum non pertinaciter asserantur; et ita reducuntur ad illud: « Credo sanctam Ecclesiam catholicam: » quia catholica Ecclesia in doctrina sacrae legis adunatur. Ponuntur ergo in Symbolo Apostolorum expresse credenda principalia, scilicet articuli, ad quos alii possunt reduci. Et per hoc patet solutio ad primum et ad secundum; quia credere illa esse peccata reducitur ad illud, sanctam Ecclesiam. Credere corpus Christi in altari ad illud, sanctorum communionem. Nam inter alia sancta etiam sacramenta continentur.

Ad tertium dicendum, quod necessitas editionis Symbolorum fuit duplex: scilicet instructio fidelium in credendis; et ad hoc editum est Symbolum Apostolorum. Item impugnatio haeresum; et ad hoc edi-

ta sunt alia duo: primo Nicaenum, secundo Athanasii; et ita secundum quod diversae haereses pullulabant, diversa apponebantur remedia, et ita non propter insufficientiam primi symboli; et per hoc apparet differentia Symbolorum.

Ad aliud dicendum, quod hoc non tangitur propter haeresim Arii, contra quem principaliter illud concilium fuit congregatum, qui ponebat Christum puram creaturam. Unde descensus ad inferos qui secundum superficiem videbatur quemdam specialem defectum sonare, debuit subicri.

Ad quartum dicendum, quod articuli possunt distinguere dupliciter. Uno modo secundum distinctionem auctorum, et sic sunt duodecim secundum duodecim Apostolos, quorum quilibet aliquid apposuit. Quid autem unusquisque apposuerit, a diversis diversimode assignatur, nec est magnae utilitatis aut certitudinis: et ideo intermittatur ad praesens. Alio modo secundum ipsas res creditas: et sic diversi articuli computantur, ubi invenitur diversa difficultas ad credendum. Sic ergo articuli sunt quatuordecim: quia vel pertinent ad divinitatem, vel ad humanitatem Christi. Si ad divinitatem hoc tripliciter. Primo quantum ad essentiam et sic est articulus de essentiae unitate. Secundum quantum ad personas; et sic sunt tres articuli: unus de persona Patris, alius de persona Filii, tertius de persona Spiritus sancti. Tertio quantum ad operationem divinitatis; et sic sunt tres articuli. Primus quantum ad effectum naturae, et sic est articulus de creatione rerum. Secundus quantum ad effectum gratiae, et sic est articulus de justificatione, scilicet « sanctam Ecclesiam catholicam, sanctorum communionem, remissionem peccatorum. » Tertius quantum ad effectum gloriae; et sic est articulus de resurrectione gloriosa et gloria Sanctorum. Articuli vero pertinentes ad humanitatem sunt septem. Primus de conceptione, secundus de nativitate, tertius de passione, morte et sepultura, quartus de descensu ad inferos, quintus de resurrectione, sextus de ascensione, septimus de adventu ad iudicium.

ARTICULUS II.

Ad secundum sic proceditur. Et 1. videtur, quod non oportuerit ante adventum Christi credere pertinentia ad humanitatem ejus. Hebr. 2: « Oportet accedentem ad Deum credere quia est, et quia remunerator est. » Aut ergo Apostolus insufficientis est, aut sufficit haec duo credere.

2. Praeterea, Isa. 65: « Quis est iste qui venit de Edom? » Glossa: « Aperte declaratur quod quia Angeli donec impleretur mysterium incarnationis non cognoverunt. » Si non Angeli, ergo multo magis nec homines.

3. Praeterea, non tenetur quis nisi ad quod sibi praeceptum est aliqua lege. Sed nulla lege praeceptum erat antiquis credere incarnationem seu in mediatorem; ergo ad hoc non tenebantur.

Contra. Augustinus dicit: « Eadem fides mediatoris quae nos salvat, salvabat antiquos. »

Praeterea, peccatum originale non remittitur nisi per fidei sacramentum: sed hoc habet virtutem a passione Christi; ergo eam credere oportebat.

Ad hoc dicendum, quod, sicut supra probatum est, aliqua pura creatura non potuit satisfacere pro peccato Adae: sed oportuit satisfacientem esse Deum et hominem. Necessae etiam fuit satisfactionem ad

omnes in quibus habuit efficaciam pervenire. Hoc autem non habuit esse nisi per fidem ipsius mediatoris, vel fidei professionem quae fiebat oblationibus et operibus patrum, vel fidei sacramentum, scilicet baptismum, vel circumcisionem. Sicut enim peccatum Adae non contrahitur nisi ab his qui carnaliter ab eo generantur, sic nec satisfactio Christi nisi ab his qui spiritualiter ab eo regenerantur. Unde sine fide Christi explicita vel implicita nullus unquam potuit salvari. Qualibet autem tenetur vitare damnationem; et ideo quilibet tenebatur fidem mediatoris habere post peccatum.

Ad primum ergo quod objicitur de Apostolo, dicendum, quod illa duo ponit, non quasi post peccatum sufficientia, sed quasi omni tempore necessaria: quia semper, etiam ante peccatum, oportuit credere quod Deus est ens immutabile per se, et principium conferens aliis esse; et quod est finis quo ad remunerationis beatitudinis.

Ad secundum quod objicitur de Angelis, dicendum, quod sciebant in generali, sed non quantum ad omnes speciales circumstantias.

Ad tertium quod objicitur de lege, dicendum, quod lege naturae bene praecipiebatur liberationem a malis a Deo quaerere et expectare; et ipsa, quavis non de se, tamen adjuncta per gratiam bene dictabat de mediatore post lapsum, et in nulla lege fuit salus sine auxilio gratiae.

ARTICULUS III.

Ad tertium sic proceditur. Et 1. videtur, quod omnes tenebantur credere omnes articulos. Lev. 15, dicitur de leproso quod offerat sextarium pro mundatione. Glossa: « Sextarius est verissima fidei confirmatio, ubi si plus effunditur ponitur, si minus deficit »; ergo ad emundationem peccati oportet habere plenam fidei mensuram: si plenam; ergo omnium articulorum fidei.

2. Praeterea, non est vera obedientia in aliquo, nisi obediat omnibus praeceptis; ergo nec vera fides, nisi distincte assentiat omnibus articulis.

3. Praeterea, sicut se habet charitas ad diligenda, sic fides ad credenda: sed omnibus est charitas necessaria omnium diligendorum; ergo et fides omnium credendorum.

Contra. Pauci sunt qui sciant distincte omnes articulos numerare: sed omnes alios damnare crudele est; ergo etc.

Praeterea, si modo omnes credere tenentur omnes articulos explicitè, et ante incarnationem non oportebat, difficilius est lex evangelii quam Moysi.

Ad hoc dicendum est, quod ad necessitatem salutis non exigitur credere omnes articulos explicitè, nisi in illis qui habent alios docere ut praefati, doctores et praedicatores. Credere autem omnes implicitè non sufficit, in habentibus usum liberi arbitrii; quia non potest esse quod homo conversatus inter fideles, vel sit negligens et contemptor suae salutis, vel quin habeat explicitam cognitionem de aliquibus articulis, et fides illuminat ad assentiendum illis. Credere autem aliquos explicitè aliquos implicitè, hoc sufficit simplicibus. Illos autem quos oportet credi explicitè maxime sunt unitas essentiae et trinitas personarum; et hoc quia in nomine Patris, et Filii, et Spiritus sancti signant se fideles, et conferuntur sacramenta. Similiter de

redemptore oportet credere nativitatem, passionem, resurrectionem, peccatorum remissionem, quia ex solemnitatibus Ecclesiae in actus repraesentantur; similiter futurum iudicium. Alios autem sufficit credere implicitè, hoc modo ut praeter hos habeat homo propositum credere quicquid credit Ecclesia, nihil in particulari discredendo; et cum explicantur a praefatis et doctoribus catholicis, acquiescendo.

Ad primum ergo quod objicitur de Glossa Levitici, dicendum, quod est duplex plenitudo; scilicet sufficientiae et copiae. Prima consistit in credendo omnes articulos implicitè vel explicitè. Secunda in credendo omnes explicitè. De prima autem loquitur Glossa.

Ad secundum quod objicitur de obedientia, dicendum, quod non tenetur homo implere omnia praecepta, nisi pro loco et tempore; et tunc tenetur nullum ignorare. Similiter est in proposito. Vel dicendum, quod non est simile de fide quae est cognitio, quam contingit esse in universali et particulari; et de obedientia, quae circa operationem est, quae respicit particulare.

Ad tertium quod objicitur de diligendis, dicendum, quod non est simile; quia ad diligenda inclinatur instinctus naturae evidenter; non sic ad credenda.

ARTICULUS IV.

Ad quartum sic proceditur. Et 1. videtur, quod plura sint modo credenda quam ante. In evangelio enim in operandis multa adduntur moralia, ut puta consilia; ergo et in credendis multa credita; ergo etc.

2. Praeterea, modo credit Ecclesia quae Angelis non erant revelata ante Christi adventum: sed homines non tenebantur credere quae Angeli ignorabant; ergo moderni plura credunt quam antiqui.

3. Praeterea, multa proponuntur modo credenda fidelibus, quae tunc antiquis non proponebantur: sed non proponerentur nisi essent credenda; ergo nunc sunt plura credenda quam prius.

Contra Fides charitati proportionatur. Non est autem augmentatus in novo Testamento numerus diligendorum; ergo nec numerus credendorum.

Praeterea, sicut ostendit Philosophus in fine Elenchorum, propter imperfectionem primorum qui invenerunt artes, factum est augmentum in scientiis: sed ea quae fidei sunt, non invenit homo sed Deus, in quem non cadit aliqua imperfectio; ergo non potest fieri augmentum in eis.

Ad hoc dicendum est, quod numerus credendorum potest dupliciter accipi; explicitè vel implicitè. Primo modo non est augmentatus. Secundo modo est: quia omnia quae nunc explicitè credimus, antiqui vel explicitè, vel implicitè credebant; quia credentes in redemptorem, in doctrinam redemptoris credebant. Sed quod in fide antiquorum erat implicitum, Christus praesentialiter veniens adimplevit explicando. Et per hoc patet solutio ad objecta: quia non adduntur in evangeliiis, nec proponuntur ab Ecclesia, nova, sed explicantur antiquitus implicita; et illa cognoscebant Angeli in universali, etsi non omnia in particulari et explicitè.

Expositio textus.

« Non ideo post fidem. »

Contra. Matth. 1. Glossa: « Fides generat spem,

« spes charitatem. » Intelligitur hoc quod ad actus, non quantum ad habitus.

« Non quod fides vel spes causa vel tempore. »

Contra. Frequenter praecedit fides in formis etiam tempore.

Respondeo. Loquitur de fide virtute.

DISTINCTIO XXVI.

Est autem spes etc. (*V. edit. nostrae tom. VII, pag. 277.*)

QUAESTIO UNICA.

ARTICULUS I.

Hic primo quaeritur. Et videtur, quod spes non sit virtus. Boetius in libro de Consolat. ponit spem unam de quatuor passionibus principalibus: nulla autem passio est virtus; ergo spes non est virtus.

2. Praeterea, nulla virtus opponitur alicui bono: quia sicut dicitur in Praedicamentis, bonum bono non est contrarium, sicut malum malo: sed spes opponitur timori, quod est bonum quoddam et laudabile, quia donum Dei; ergo spes non est virtus.

3. Praeterea, virtus cum sit de genere honesti, operatur bonum propter seipsam; ergo non habet actum mercenarium: sed spes habet actum mercenarium, quia respicit praemium; ergo non est virtus.

Contra. Virtus est medium duarum malitiarum: sed spes est medium duarum malitiarum, scilicet praesumptionis et desperationis; ergo est virtus.

Praeterea, quod facit nos pervenire ad salutem, est virtus: spes est huiusmodi. Rom. 8: « Spe salvi facti sumus; » ergo est virtus.

Respondeo. Dicendum, quod ad virtutem tria requiruntur: scilicet objectum conveniens, ratio ordinans, et modus ex parte agentis; scilicet ut sit perfecte exequens. Haec autem tria in spe inveniuntur. Nam objectum eius est aeterna beatitudo, quae est quoddam difficile et bonum. Modus autem agentis perfectionem habet, quia est cum certitudine. Ratio etiam spem ordinat, dum homo non inaniter sperat, sed ex gratia et meritis. Et haec tria tanguntur in definitione spei. Modus, cum dicitur, certa expectatio; objectum, cum dicitur, futurae beatitudinis: ordo rationis, cum dicitur, ex gratia et meritis proveniens. Unde patet quod spes est virtus.

Ad primum quod in contrarium objicitur de Boetio, dicendum, quod aequivoce accipitur spes ad spem passionem et habitum. Spes autem passio non est virtus, sed quae est habitus partis intellectivae: quod infra dicitur.

Ad secundum, quod objicitur, quod spes opponitur timori, dicendum, quod spes quae est virtus, non opponitur timori qui est donum, quia spes extendit se in Deum ex consideratione divinae largitatis, timor vero dicit resiltionem ex consideratione propriae pravitalis: et ita non est secundum idem resiltio timoris, et extensio spei: et ideo non sunt contraria: sed spes passio contrariatur timori qui est similiter passio.

Ad tertium, quod objicitur de actu mercenario, dicendum, quod facere aliquid propter commodum temporale facit actum mercenarium, non autem facere propter remunerationem aeternam, quae nihil

aliud est quam Deus; et sic non servitur Deo, nisi propter seipsum; quia, ut dicitur in libro de Ecclesiae dogmatum: « Continentia non sibi sufficit ad salutem, si solo amore pudicitiae retinetur. »

ARTICULUS II.

Ad secundum sic proceditur. Et 1. videtur, quod spes non sit distincta ab aliis virtutibus. Virtutes enim distinguuntur per actus, et actus per objecta: sed objectum spei, scilicet futura beatitudo, est objectum omnium virtutum theologiarum; ergo ipsa non distinguitur ab eis.

2. Praeterea, virtutes theologicae sunt ad ordinandum nos in Deum: sed per cognitionem eius et amorem sufficienter ordinantur in ipsum; ergo non est ponere tertium habitum virtutis theologicae ab aliis duabus distinctum.

3. Praeterea, expectare, dicit quoddam tendere in Deum: sed tam fides quam charitas tendit in ipsum; ergo cum non habeat differentem actum, ab eis non distinguitur.

Contra. Apostolus, 1 Cor. 13, connumerat eam duabus aliis, scilicet fidei et charitati; ergo habet ab eis esse divisum.

Praeterea, qui cognoscit finem, et amat, non tendit in illum, nisi speret ipsum assequi; ergo ad tendendum in Deum requiritur alius habitus, praeter habitum cognitionis et amoris.

Ad hoc dicendum, quod habitus non distinguitur secundum materiam objectorum, sed secundum rationes formales motivas in ipsis. Unde, quamvis sit idem objectum materialiter trium virtutum theologiarum, quod est Deus; tamen quia alia ratione tendunt in ipsum, quia fides respicit in eo summum verum, spes autem summum arduum, charitas autem summum bonum, unde objecta earum formaliter differunt: ideo praedictae virtutes ad invicem distinguuntur. Patet ergo solutio ad primum, quod objectum est in contrarium, de objecto.

Ad secundum, quod objicitur de sufficienti ordine, dicendum est, quod non sufficienter per illa duo ordinamur ad tendendum in finem ultimum; quia quantumcumque cognosceremus et diligeremus, nisi speraremus ipsum consequi, nunquam tenderemus in ipsum.

Ad tertium, quod objicitur de tendere in Deum, dicendum, quod quamvis quaelibet virtus tendat in objectum suum, tamen aliter et aliter. Nam spes tendit in illud, ut distans, et difficile ad assequendum: et ideo ejus tendere proprie dicitur expectare, per quod quaedam distantia intelligitur; non autem sic aliarum virtutum.

ARTICULUS III.

Ad tertium sic proceditur. Et 1. videtur, quod spes quae est virtus non sit in parte animae intellectivae. Intellectivae enim abstrahit a quantitate et tempore: sed potentia, in qua est spes, non abstrahit a tempore, quia considerat futuram beatitudinem; ergo non est in parte intellectiva.

2. Praeterea, in intellectiva non sunt contrariae passiones; quia delectationi quae est secundum intellectum, nihil est contrarium, ut dicit Philosophus. Cum ergo spes contrarietatem habeat ad timorem et desperationem, non est in parte intellectiva.

5. Praeterea, ea quae sunt in parte intellectiva, sunt ipsius animae secundum se, sine hoc quod communicat corpori: sed spes non est ipsius animae secundum se, sed cum communicatione corporis, eadem ratione qua gaudium et amor, ut dicitur in libro de Anima; ergo spes non est in parte intellectiva.

Ad oppositum. Futura beatitudo non comprehenditur a sensitiva; cum ergo spes, quae est virtus, sit de futura beatitudine, non est in parte sensitiva.

Praeterea, post mortem non remanet nisi intellectiva, secundum Philosophum; remanet autem spes post mortem, ut patet in patribus qui erant in limbo; ergo est in intellectiva.

Respondeo. Dicendum, quod circa hoc inveniuntur diversae opiniones. Quidam enim distinguunt concupiscibilem et irascibilem duplicem; scilicet sensitivam respectu sensibilium, et intellectivam respectu spiritualium; et in irascibili intellectiva, non sensitiva, dicunt esse spem. Sed quia divisio haec, nec a philosophis, nec a sanctis emanat, nec bonum delectabile et terribile, qui dividunt affectivam sensualitatis, possunt dividere affectivam rationis, cum sub ratione boni rationalis, quod objectum est affectivi superioris, praedicta bona, scilicet utile et difficile, non differant: ideo dicunt alii quod est in nobis irascibilis et concupiscibilis, quae sit rationalis non per essentiam sed per participationem tantum; et sic irascibilis habet in se spem. Sed tamen quavis possit hoc modo esse subjectum virtutis moralis, quae habet materiam sensibilem, non tamen theologicae quae habet materiam omnino spiritualem, et potentiae sensitivae inapprehensibilem. Et ideo dicendum est cum aliis quod non est in parte animae intellectiva concupiscibilis et irascibilis, secundum proprietatem: sed secundum actuum similitudinem. Sicut enim ex parte cognitivae videmus quod ratio dicitur sensus, quia habet actum sensui similem; sic ex parte motivae voluntas nominabitur nomine irascibilis et concupiscibilis, quia habet actus eis similes, quamvis ratio et voluntas habeant actus nobiliores quam sensus et appetitus inferior; et sic in voluntate dicitur esse spes.

Ad primum ergo quod in contrarium objicitur de differentia temporis, dicendum, quod quamvis intellectiva apprehensiva non concernat aliquod tempus determinate, quia abstrahit ab omnibus conditionibus materialibus individuantibus, tamen affectiva intellectualis fertur in bonum quod est extra animam, secundum diversas temporis differentias.

Ad secundum quod objicitur quod in intellectiva non sunt contrariae passionis, dicendum, quod nec spes quae est passio est in parte intellectiva, sed spes quae est virtus. Et sic patet solutio ad tertium.

ARTICULUS IV.

Ad quartum sic proceditur. Et 1. videtur, quod in Christo fuerit spes. In Psal. 50, dicitur in persona ejus: « In te Domine speravi; » ergo in eo fuit spes.

2. Praeterea, videtur quod etiam in Angelis et beatis sit spes. Est enim in Angelis certa expectatio remunerationis de ministerio in quo merentur, et in animabus de stola corporis; ergo habent spem.

3. Praeterea, videtur quod sit etiam in daemonibus et in animabus damnatis; quia sicut fides est informis, ita et spes: sed habent fidem informem; ergo et spem.

Uterius videtur quod non sit in animabus existentibus in purgatorio, quia spes non est de eo quod infallibiliter expectatur, sicut solem oriri eras: sed sic expectant illi qui sunt in purgatorio; ergo non habent spem.

Praeterea, videtur quod nec in patribus existentibus in limbo; quia spes quae differtur affligit animam: sed in sanctis patribus qui erant in limbo non erat aliqua afflictio; ergo nec spes.

Respondeo. Dicendum, quod in spe tria sunt consideranda. Unum ex parte objecti, quod est ipsa beatitudo aeterna, quae Deus est, in cuius fruitione praemium essenziale consistit. Secundum ex parte medii, quod est gratia et meritum, per quae beatitudo speratur. Tertium ex parte sperantis, scilicet status ejus ut nondum habeat quod sperat. Propter primum et tertium simul non fuit spes in Christo, nec in Angelis, nec in beatis. Propter secundum non est in daemonibus, nec in damnatis, quia nec possunt gratiam vel meritum habere. Sed propter tria simul est in viatoribus, patribus in limbo et in animabus in purgatorio.

Quod ergo primo objicitur de Christo, dicendum, quod spes sumitur ibi pro expectatione praemii accidentalitatis, de quo non est proprie spes, cum habeat Deum pro objecto.

Ad secundum quod objicitur, de Angelis et animabus sanctis, dicendum, quod illud quod sperant non est pars praemii substantialitatis: et ideo non est in eis proprie spes.

Ad tertium quod objicitur de damnatis et daemonibus, dicendum, quod non est simile de fide et spe, quia fides informis non facit tendere in creditum sicut in rem consequendam, sicut facit spes tendere in ipsum speratum: quamvis etiam in daemonibus non sit fides informis, quae est habitus infusus.

Ad quartum de existentibus in purgatorio, dicendum, quod illi qui sunt in purgatorio, et illi qui erant in limbo, habent spem, quia spes non evacuatur nisi per habitum contrarium, vel propter habitum beatitudinem. Et quod objicitur de certitudine, dicendum, quod hoc est ratione status, quia non possunt amplius demereri; et tamen non evacuat spem, quia non perveniunt ad rem speratam.

Ad quintum vero quod objicitur quod affligebantur sancti Patres, dicendum quod certitudo spei in eis deficere non poterat. Unde delectatio quae causatur ex certitudine absorbebat omnes afflictiones, quae ex dilatione affligere possunt. Vel dicendum, quod non poterant affligi, quia non erant capaces afflictionis.

Expositio textus.

- Spes non nisi bonorum. •
- Contra. Spes est de liberatione a malo.
- Respondeo. Liberatio a malo bona est.
- Verum ad se pertinentium. •
- Contra. Luc. ult.: « Nos sperabamus quod ipse
- esse redempturus Israel. •
- Praeterea, dicit auctoritas: • De nemine desperandum est. •
- Respondeo. Spes accipitur dupliciter: proprie, et

sic est de re ad propriam beatitudinem pertinente; vel communiter; et sic est de eventibus aliorum.

DISTINCTIO XXVII.

Cum autem Christus etc. (V. edit. nostrae tom. VII, pag. 290.)

QUAESTIO UNICA.

ARTICULUS I.

Hic primo quaeritur, utrum charitas sit virtus, Et videtur, quod non. Finis enim virtutis non est virtus, sed felicitas secundum Philosophum, vel beatitudo, secundum sanctos. Sed charitas est finis virtutum, quia praeceptorum quae dantur de operibus virtutum, ut dicitur 1 Tim. 1: « Finis » praecepti est charitas; » ergo non est virtus.

2. Praeterea, ad id quod natura per se sufficit, non oportet per virtutem aliquam elevari. Sed diligere Deum per se et super omnia potest creatura rationalis per se, quia innata est sibi notio veri et amor boni; ergo non oportet quod per virtutem aliquam elevetur.

5. Praeterea, virtus est circa bonum et difficile. Sed amare non est difficile. Dicit enim Augustinus in libro Confess., quod nihil dulcius quam amari et amare; ergo circa actum amandi nulla est virtus.

Ad oppositum. Nihil expellit peccatum nisi virtus: hoc autem maxime facit charitas, quae operit universa delicta, ut dicitur Proverb. 10; ergo etc.

Praeterea, quod est maxime meritorium, est maxime virtuosum: opus charitatis maxime est meritorium; ergo maxime virtuosum.

Ad hoc dicendum est, quod virtus est dispositio perfecti ad optimum. Charitas autem est maxima dispositio, quia propinquissima perfecti ad optimum. Respicit enim finem, idest Deum sub ratione finis. Virtutes autem cardinales sunt de his quae sunt ad finem. Reliquae autem duae theologicae, quamvis sint de fine, tamen non sub ratione finis: ideo charitas maxime est virtus.

Ad illud quod in contrarium objicitur, quod charitas est finis, dicendum quod finis dicitur, non quia ipsa sit finis ultimus virtutum, sed quia fini ultimo propinquior est. Est enim id quo omnes aliae virtutes in finem ultimum ordinantur.

Ad secundum quod objicitur de natura, dicendum, quod quamvis naturalis amor et desiderium suavi boni insit nobis, prout participabile est secundum gradum naturalis facultatis, non tamen prout est participabile supra statum facultatis naturae; et ideo hoc natura per se non sufficit.

Ad tertium quod objicitur de difficili, dicendum, quod difficultas virtutis non semper attenditur in labore operis, sed in excessu naturalis possibilitatis: quia potentia naturalis sine habitu non potest in effectum proprium virtutis.

ARTICULUS II.

Ad secundum sic proceditur. Et 1. videtur, quod non sit una virtus. Charitas enim est de fine, et de his quae sunt ad finem. Sed diversae sunt virtutes de utrisque; sic enim differunt virtus cardinalis et theologica; ergo charitas non est una virtus.

2. Praeterea, charitas habet duo objecta, duos actus, duos modos, duo praecepta; virtutes autem

distinguuntur per actus et objecta; ergo non est una virtus.

5. Praeterea, quod est forma virtutum multiplicatur secundum multiplicationem virtutum: sed charitas est forma virtutum; ergo multiplicatur secundum virtutes.

Ad oppositum. Quia color non videtur nisi per lucem, eadem est in specie visio lucis et coloris; ergo a simili, quia bonum creatum non diligitur ex charitate nisi propter increatum, eadem est dilectio utriusque.

Praeterea, in omni genere motus primus motor est unus. In genere virtutum, primus motor est charitas, quia movet omnes alias ad suum finem; ergo charitas est una.

Juxta hoc quaeritur, utrum charitas possit esse informis.

Respondeo. Dicendum, quod habitus non distinguuntur penes distinctionem objectorum materialium, sed formalem, quae attenditur secundum propriam rationem objecti. Propria autem ratio objecti amoris est bonum: quod quidem de eo quod est ad finem dicitur ex ipso ordine ad finem, de fine vero principaliter: et sic finis, et quod est ad finem, non habent formalem differentiam in ratione boni, cum finis sit ratio bonitatis ejus quod est ad finem. Et ideo virtus charitatis non distinguitur penes duo objecta, quae sunt Deus et proximus; cum alterum sit sicut finis, alterum sicut quod est ad finem.

Ad primum ergo dicendum, quod nihil prohibet aliquam differentiam esse formalem, respectu alicujus potentiae vel habitus, et materialem respectu alterius; sicut odorabile et audibile differunt formaliter in respectu ad sensum proprium, sed materialiter in respectu ad sensum communem vel imaginarium; et similiter finis et quod est ad finem, differunt formaliter in respectu ad virtutem, quae ad actum ordinatur; cum non eadem ratione cadat sub actu nostro finis et quod est ad finem. Differunt autem materialiter in respectu ad charitatem ratione jam dicta, quae ordinatur ad finem.

Ad secundum quod objicitur de diversitate objectorum et actuum, dicendum, quod diversitas objectorum quorumlibet, sufficit ad diversitatem actuum secundum numerum, et modorum, et praeceptorum: sicut alius est actus et modus videndi rem distantem et propinquam: sed non sufficit ad diversitatem actuum et habituum secundum speciem, nisi sit diversitas objectorum secundum speciem: quae non est in proposito, quia bonum creatum non nisi sub ratione boni increati diligitur.

Ad tertium dicendum, quod objectio illa procedit de forma intrinseca quae intrat essentiam rei. Sic autem charitas non est forma virtutum; sed est quasi forma extrinseca, in quantum id quod charitas circa actum virtutis ponit, scilicet relatio in finem ultimum, est formale respectu actus virtutis. Et inde est quod charitas dicitur finis aliarum virtutum, et etiam motor, in quantum advocat alias virtutes in suum finem.

Ad ultimum dicendum, quod sicut gratiae quodlibet peccatum opponitur ratione esse gratuiti, quod dat cuilibet virtuti, ita et charitati ratione relationis actuum virtutum in finem, cum quodlibet peccatum avertat a fine ultimo. Et ideo per omnia peccata per quae amittitur gratia, quae est forma virtutum, per eadem amittitur charitas. Non autem tollitur gratia nisi per peccatum mortale; et ideo non po-

test tolli gratia et eharitas remanere. Et propterea non potest eharitas esse informis.

ARTICULUS III.

Ad tertium sic proceditur, Et 1. videtur, quod dilectio qua Deum diligimus modum habeat. Secundum enim Augustinum « quanto plus aliquid habet de modo, specie et ordine, tanto melius est: » eharitas vero optima est inter caetera dona Dei; ergo plus habet de modo.

2. Praeterea, omne creatum consistit in modo, quia omnia in numero et mensura disposuit Deus, Sap. 11. Charitas qui creatum est; ergo consistit in modo.

5. Praeterea, omnis actus immoderatus est vitiosus: actus eharitatis non est vitiosus; ergo non est immoderatus; ergo habet modum.

Ad oppositum. Bernardus de diligendo Deum: « Causa diligendi ipsum Deum ipse Deus est; modus, sine modo diligere »; ergo dilectio Dei non habet modum.

Praeterea, dilectio mensuranda est ad diligibile: sed divina bonitas est immensa; ergo dilectio ipsius non habet modum.

Ad hoc dicendum est, quod aliquis actus tripliciter dicitur habere modum: aut secundum limitationem essentiae, aut secundum determinationem debitae circumstantiae, aut secundum proportionem medii inter superfluum et diminutum. Primo modo, omnis actus creatus habet modum. Secundo modo omnis actus virtuosus, quia est ex debitis circumstantiis commensuratus. Tertio modo, actus virtutum cardinalium. Actus vero virtutum theologiarum, sicut eharitatis, duplex est. Unus est exterior in effectu; et hic etiam habet modum, quia potest se nimis affligere exterius in servitio Dei. Alter interior in affectu; et hic non; quia mensuram accipit ex ratione objecti movente, quae infinitas est; et ideo non potest homo Deum nimis diligere.

Ad illud ergo quod objicitur in contrarium: de Augustino, dicendum, quod ejus auctoritas intelligenda est secundum primum modum: et sic actus eharitatis habet modum, cum sit quid creatum; et sic apparet solutio ad secundum.

Ad tertium quod objicitur de actu vitioso, dicendum, quod quantumcumque Deus diligatur, actus non erit immoderatus, quia non excedit proportionem sui objecti. Ad reliqua duo argumenta, dicendum, quod procedunt secundum tertium modum, secundum quem actus eharitatis non dicitur habere mensuram.

ARTICULUS IV.

Ad quartum sic proceditur. Et 1. videtur, quod iste modus, qui est in praecepto, possit impleri in via; quia Hieronymus dicit: « Qui dicit Deum aliquid impossibile praecepisse, anathema sit. » Sed hoc Deus praecepit omnibus in statu viae existentibus; ergo hoc potest fieri a viatoribus.

2. Praeterea, magis necessarium est ad salutem praeceptum eharitatis quam aliarum virtutum; sed ista possunt et debent in via impleri; ergo illud multo magis.

5. Praeterea, omne praeceptum ligat: sed non in statu patriae, quia ibi non est necessarium legem dari; ergo in statu viae. Sed non nisi ad implendum; ergo in via potest impleri.

Contra. Augustinus: « Cum inest aliquid carnalis concupiscentiae, non ex tota anima diligitur Deus: » sed hoc semper est in via; ergo non potest in via praedictum praeceptum impleri.

Praeterea, nemo potest in via simul ad multa cor suum convertere: sed necesse est ad multa praeter Deum cor in via convertere; ergo non potest in Deum totaliter converti.

Ad hoc dicendum est, quod totum et perfectum dicitur cui nihil deest. Hoc autem potest esse dupliciter: aut eorum quae debet, aut eorum quae potest habere. Prima est totalitas perfectionis viae. Secunda patriae. Illo praecepto, secunda indicatur ut terminus viae: prima vero praecipitur viatori, non secunda. De prima totalitate est omnia in Deum ordinare habitu, non semper actu; de secunda actu; quia perfectio virtutis consistit in habitu, quae est perfectio viatoris, sed perfectio felicitatis in actu, quae est perfectio comprehensoris. Secunda perfectio excludit omnem affectum alienum: et hoc non potest esse in via, nisi per privilegium speciale, ut forte in Virgine fuit, et in raptu Apóstoli Pauli. Prima autem excludit omnem affectum contrarium; et sic potest impleri in via.

Ad primum ergo quod objicitur in contrarium de Hieronymo, dicendum, quod in praecepto divino continetur aliquid sicut directe praeceptum vel prohibitum: et hoc potest impleri in via, et nisi impleatur est peccatum mortale: aliquid vero continetur, sicut quod notificatur per legem esse bonum vel malum, ut homo sciat in quid debeat tendere; et hujusmodi omissio non facit peccatum mortale, sed veniale. Dicit enim Glossa, Rom. 7, de hoc praecepto: Non concupisces, « quo prohibetur delectatio et consensus. » Non autem prius; qui tamen per hoc ostenditur esse malus, quamvis in via vitari non possit. Et similiter dicendum est in proposito.

Ad secundum quod objicitur de actibus aliarum virtutum, dicendum, quod non est simile: quia actus aliarum virtutum non sunt de substantia beatitudinis, quae est omnium virtutum finis, sicut actus eharitatis; propter quod habet modum sola talem, qui competit ei, ut est patriae et ut est viae.

Ad tertium quod objicitur de praecepto legis, dicendum, quod modus patriae potius ponitur ibi ut documentum fidei, quam ut praeceptum legis; et ideo non sequitur quod in via possit impleri. Ad reliqua duo patet solutio ex his quae dicta sunt.

Expositio textus.

« Propter duo delicta. »

Contra. Unius habitus unum est objectum.

Respondeo. Unum est objectum principale et formaliter, id est Deus: sed plura materialiter.

« Odit animam suam. » Loquitur de odio effectus non affectus.

« Isti sunt duo modi. »

Contra. Unius actus debet esse unus modus.

Respondeo. Verum est secundum idem: sed modus ille « ex toto corde » est ex parte diligentis: ille vero « propter se » modus est ex parte diligibilis.

DISTINCTIO XXVIII.

Hic quaeri potest utrum etc. (V. edit. nostrae tom. VII, pag. 508.)

QUAESTIO UNICA.

ARTICULUS I.

Hic primo quaeritur, utrum angeli sint diligendi ex charitate: et videtur quod non. Secundum enim Augustinum, « Charitas est illarum rerum quae societate quadam nobis referuntur in Deum: » sed Angeli non habent societatem nobiscum, quia non est Diis conversatio cum hominibus, Dan. 2; ergo charitas non est respectu illorum.

2. Praeterea, charitas est amicitia quaedam: sed nimia distantia status amicitiam solvit, ut dicitur in 9 Ethic. Cum ergo maxima distantia sit inter nos et Angelos secundum statum, videtur, quod inter nos et eos charitas esse non possit.

5. Praeterea, Angeli non sunt juxta nos, quia superiores, nec infra nos, quia sunt incorporei; nec nos ipsi, quia a nobis natura et persona distincti, nec supra nos in ordine diligendorum, quia non sunt Deus, nec Deo in persona uniti; ergo non sunt in numero diligendorum ex charitate.

Contra, Magister ait: « Nomine proximi intelliguntur Angeli; » ergo sunt ex charitate diligendi.

Praeterea, charitas divina est exemplar et regula charitatis nostrae; sed Deus ex charitate diligit Angelos; ergo et nos debemus.

Respondeo. Dicendum, quod amicitia non potest esse nisi eorum, qui eandem vitam participant. Unde non dicitur homo amicus esse bruto seu insensibili creaturae. Cum ergo charitas sit quaedam amicitia, ut dicitur 1 Joan. 1: « Si autem in luce ambulamus sicut et ipse in luce est, societatem habemus ad invicem », non potest esse nisi eandem vitam participantium. Quamvis autem angeli non participant nobiscum in vita naturali eadem secundum speciem, tamen participant in vita spirituali quae est per gratiam; et in hac participant ad invicem, et cum Deo: ideo secundum hanc vitam potest esse charitatis amicitia inter nos, et Angelos, et Deum.

Ad primum quod objicitur in contrarium, dicendum, quod quamvis quoad participationem vitae naturalis non habeant nobiscum societatem, habent tamen quoad participationem vitae spiritualis; scilicet gratiae in praesenti, et gloriae in futuro.

Ad secundum dicendum, quod distantia status solvit amicitiam saecularem, quae in conversatione vitae exterioris consistit, non autem amicitiam charitatis quae consistit in conversatione cum Deo.

Ad tertium dicendum, quod Angeli juxta nos sunt in genere, et participatione gratiae et gloriae, cum eam a Deo recipiant sicut et nos, quamvis sint superiores dignitate naturae et status.

ARTICULUS II.

Ad secundum sic proceditur. Et 1. videtur, quod daemones diligendi sint ex charitate. Lev. 9: « Diliges proximum tuum sicut teipsum. » Glossa: « Proximus non propinquitate sanguinis intelligendus, sed societate rationis. » Sed daemones et damnati sunt nobis proximi societate rationis; ergo a nobis ex charitate sunt diligendi.

2. Praeterea, mali homines propter bonam naturam sunt ex charitate diligendi: sed ut dicit Dionysius, 4 cap. de Div. nominibus, « In daemombus est natura bona, quia naturalia per peccatum non amiserunt; » ergo sunt diligendi ex charitate.

5. Praeterea, omnis creatura rationalis, quae est nobis ad obtinendum beatitudinem utilis, est ex charitate diligenda: sed daemones nobis ad exercitium dati tales sunt; ergo sunt ex charitate diligendi.

Sed contra. Ut dicit Augustinus « qui diligit proximum, vel quia justus est, vel ut justus sit diligere debet: » sed daemon talis non est, nec esse potest; ergo non est ex charitate diligendus.

Praeterea, nono Ethic. dicit Philosophus, quod amicitia dissolvenda est ad eos qui sunt insanabiles, propter malitiam abundantiam; cum ergo daemones maxime abundant in malitiis, quis in ea obstinati sunt; multo fortius ad eos non est habenda amicitia.

Respondeo. Dicendum, quod ratio diligendi ex charitate hominem vel angelum, est participatio summi boni beatificantis, secundum Augustinum: quia id charitas habet pro objecto. Haec autem participatio in quibusdam jam reducta est ad actum, ut in beatis; in quibusdam est habitu, sed nondum actu, ut in justis viatoribus; in quibusdam nec actu nec habitu, sed potentia sola, ut in malis viatoribus: in quibusdam nullo modo reducibilis est ad actum, ut in daemombus et damnatis. Primi ergo sunt maxime ex charitate diligendi: secundi minus quam illi, tertii minus quam secundi; quarti nullo modo ex charitate sunt diligendi, quamvis amore quem includit charitas, in quantum Dei creaturae, possunt diligi; non ita quod charitas feratur directe ad ipsos: sed ad eum cujus sunt creaturae: et sic amore concupiscentiae, non tamen amore benevolentiae vel amicitiae diligendi sunt.

Ad quod primo objicitur de Glossa, dicendum, quod rationis societatem intelligit, non tantum in nature similitudine, sed in potestate vel possibilitate participationis divinae.

Ad secundum quod objicitur de malis hominibus, dicendum, quod non est simile: quia in illis est capacitas imaginabilis reducibilis ad actum: sed in daemombus et damnatis non.

Ad tertium quod objicitur de utilitate, dicendum, quod per se et ex intentione propria daemones a beatitudine impediunt, sed per accidens solum et ex alterius ordinatione proficiunt.

ARTICULUS III.

Ad tertium sic proceditur. Et 1. videtur, quod creaturae irrationales sint diligendae ex charitate. Omne enim diligere meritorium est ex charitate: sed diligere temporalia ad serviendum Deo est meritorium; ergo est ex charitate.

2. Praeterea, circa idem habet esse virtus et vitium: sed amor libidinosus habet esse circa irrationabilia; ergo et circa eadem habet esse charitas.

5. Praeterea, videtur quod virtutes diligendae sunt ex charitate. Propter quod unumquodque, et illud magis: sed amicitia charitatis diligit amicum propter honestum; ergo diligit magis honestum seu virtutem.

Contra. Charitas est virtus theologica; ergo habet beatitudinem, quae est ultimus omnium virtutum finis, pro objecto: sed creaturae irrationales non sunt capaces beatitudinis; ergo non sunt ex charitate diligendae.

Praeterea, charitas includit in se benevolentiam: sed benevolentia non potest esse ad irrationabilia, ut dicitur in 8 Ethic.; ergo nec charitas.

Respondeo. Dicendum, quod aliquid diligitur ex charitate dupliciter: vel dilectione amicitiae, in qua consistit principalis actus charitatis; et sic non diliguntur irrationales creatorae vel virtutes, quia ad eas non habetur amicitia; vel dilectione concupiscentiae quae includitur in actu charitatis, quia diligere aliquem est velle ei bonum: et sic diliguntur ea bona quae possunt alteri concupisci. Unde cum irrationales creaturae et virtutes possint ab aliquo, sibi et aliis concupisci ut eorum bona et ad beatitudinem promoventia: ideo sic possunt diligi ex charitate, non tantum imperante, sed eliciente motum praedictum; quia charitas elicit actum dilectionis, non tantum ad ea ad quae est principaliter, sed etiam ad alia quae in illa ordinantur.

Ad quod ergo objicitur in contrarium de merito, dicendum, quod hujusmodi actus ex charitate est, non tamen qua terminetur ipsum temporale ut objectum; sed in Deum vel proximum; in ipsum vero ut materiam circa quam versatur dilectio.

Ad secundum quod objicitur quod virtus et vitium habent esse circa idem, dicendum, quod verum est circa idem subjectum, non tamen circa idem objectum. Vel dicendum, quod non est necesse, si aliqua virtus habeat esse circa temporalia, quod illa sit charitas; sed aliqua alia, sicut liberalitas, vel alia hujusmodi.

Ad tertium quod objicitur, quod propter quod unum quodque etc., dicendum, quod propositio illa habet veritatem in illis, quae secundum eandem rationem dicuntur. Non autem eadem ratione diligitur homo et virtus. Unde ratio non sequitur.

ARTICULUS IV.

Ad quartum sic proceditur. Et 1. videtur, quod homo non debeat seipsum diligere ex charitate; quia charitas minus quam inter duos esse non potest, ut dicit Gregorius; ergo non potest esse alicuius ad seipsum.

2. Praeterea, nihil vituperabile est ex charitate: sed amare seipsum est vituperabile, unde 2 Tim. 3 dicitur: « Erunt homines seipsos amantes; » ergo homo ex charitate seipsum non diligit.

3. Praeterea, videtur quod nec corpus nostrum. Nihil enim quod non est in Deum ordinabile per fruitionem est ex charitate diligibile: corpus autem nostrum est hujusmodi, quia non est capax divinae fruitionis; ergo non est ex charitate diligendum vel diligibile.

Contra. Homo debet diligere proximum sicut se ipsum: sed proximum debet diligere ex charitate: ergo et se.

Praeterea, in numero diligendorum ex charitate, secundum Augustinum, unum membrorum est illud quod nos sumus, aliud quod infra nos est, scilicet corpus nostrum; ergo nos et corpora nostra debemus diligere ex charitate.

Respondeo. Dicendum, quod in amicitia, forma diligendi amicum accipitur exemplariter ex forma diligendi seipsum. Nam amicus est alter ipse, ut dicit Philosophus. Similiter in amicitia spirituali quae est charitas. Unde ait: « Diliges proximum tuum sicut teipsum. » Ex hoc ergo patet quod charitas
S. Th. Opera omnia. V. 22.

primo reflectitur in diligendum proprium subjectum, et postmodum ad diligendum proximum.

Ad illud ergo quod objicitur de Gregorio, quod Gregorius dicere intendit, quod non potest esse charitas ad seipsum solum; non quod non possit esse ad seipsum.

Ad secundum quod objicitur de amore sui, dicendum, quod amor sui ad exteriorem hominem reprehensibilis est ut diligatur in eo vitium non natura, ut in bonis corporis finis voluntatis constituitur: sed quo ad interiorem laudabilis est.

Ad tertium quod objicitur de corpore, dicendum, quod quamvis non sit ordinabile per se immediate in Deum, tamen ordinabile est per animam mediate: et sic est beatificabile, et sic etiam diligibile.

Expositio textus.

• Nemo unquam carnem suam. •

Contra. Aliqui se interficiunt.

Respondeo. Hoc non contingit ex odio carnis, sed ratione alicujus accidentis; in quantum scilicet vel retardat a vita meliori, vel in quantum detinet in statu aliquo odibili. Oritur hic quaestio. Videtur quod dilectio Angelorum, et beatae Virginis, et Christi, secundum quod homo, non contineatur in dilectione proximi, sed in dilectione Dei; quia supra nos est quasi influens nobis vitam spiritualem quae est per gratiam seu gloriam.

Respondeo. Quod sic, neque Angelus, neque Virgo, neque Christus, secundum quod homo, supra nos sunt, quia ejus est beatificare et gratiam dare cuius est nos creare, ut dicitur; et ideo sunt diligendi, sicut simul nobiscum participantes a Deo vitam aeternam; et in hoc sunt juxta nos quamvis sint supra nos in hoc quod plenius participant.

DISTINCTIO XXIX.

Post praedicta etc. (V. edit. nostrae tom. VII, pag. 514.)

QUAESTIO UNICA.

ARTICULUS I.

Hic primo quaeritur. Et 1. videtur, quod charitas ordinem non habeat. Bernardus enim dicit: « Amor nescit gradum, dignitatem non considerat: » in omni autem ordine est gradus; ergo nescit ordinem.

2. Praeterea, ubi est ordo, ibi est proportio: sed inter diligibile creatum et increatum non est proportio; ergo nec ordo.

3. Praeterea, ille ordo aut attenditur secundum habitum, aut secundum actum: si secundum actum; ergo charitas dormientis non est ordinata: si secundum habitum; ergo charitas non est unus habitus, quia ordo non est in re una.

Ad oppositum. Ubi unum propter alterum, ibi ordo: sed charitas diligit aliquid propter alterum, sicut omnia propter Deum; ergo charitas habet ordinem.

Praeterea, actus virtutum variantur secundum exigentiam objectorum: sed objectum charitatis, quod est bonum, ordinem habet, cum quoddam sit melius altero; ergo etc.

Respondeo. Dicendum, quod ab eodem actus speciem recipit et mensuram, sicut ab eodem habet

res esse specificum et mensuratum. Cum ergo actus charitatis speciem recipiat ab objecto charitatis, quod est bonum, ab eodem recipiet et sui mensuram. Unde secundum differentiam boni in diligibilibus oportet quod sit ordo et differentia charitatis; et ideo quia non omnia diligibilia aequaliter participant bonum, non sunt aequaliter diligenda.

Ad illud quod objicitur de Bernardo, dicendum, quod gradus in dilectione dupliciter potest attendi. Uno modo per comparisonem diligibilis ad diligibilia; et sic amor habet gradum. Alio modo per comparisonem diligentis ad diligibile; et sic dicitur amor gradum nescire, propter fiduciam quam amicus concipit de amico, non impediente excellentia gradus.

Ad illud de proportione dicendum est, quod proportio potest esse dupliciter. Aut proprie, idest habitudo secundum commensurationem quantitatis: aut communiter. Quaelibet habitudo primo modo non requirit proportionem semper, sed secundo modo; et sic est proportio inter Deum et creaturam, quamvis non primo modo.

Ad illud quod objicitur de actu et de habitu, dicendum, quod ordo ille actus est ut suscipiens, scilicet materialiter: sed habitus ut agentis, scilicet effective. Ordo vero bene potest radicari in uno ut in causa, in altero ut subjecto.

ARTICULUS II.

Ad secundum sic proceditur. Et 1 videtur, quod ordo charitatis non sit attendendus secundum affectum, sed secundum effectum. Sicut se habet fides ad credenda, sic charitas ad diligenda: sed fides, eo quod per eandem rationem primae veritati credit quaecumque credit, aequaliter credit omnia; ergo a simili charitas eo quod per eandem rationem diligit quaecumque diligit, aequaliter diligit omnia; ergo non habet ordinem secundum affectum.

2. Praeterea, diligere ex affectu aliquem hoc est velle ei bonum: sed omnibus vult charitas idem bonum, scilicet Deum; ergo omnes aequali affectu diligit.

3. Praeterea, ordo charitatis est in praecepto: sed praecepta non obligant quantum ad affectum: quia dum exhibeam unicuique quod debeo, etsi sine affectione faciam, non sum reus praecepti; ergo ordo charitatis non attenditur secundum affectum.

Sed contra. 1 Joan. 5: « Filioli, non diligamus verbo vel lingua, sed opere et veritate; » ergo charitas vera ordinat et opus et affectum.

Praeterea, probatio dilectionis est exhibitio operis, ut dicit Gregorius; ergo non tantum ad ordinem dilectionis pertinet motus dilectionis interior, sed etiam motus exterior; ergo ordo charitatis pertinet ad affectum et effectum.

Respondeo. Dicendum, quod in affectu ordo potest esse dupliciter. Uno modo secundum quantitatem boni, quod desideratur alicui; et sic in affectu charitatis non est ordo, quia omnibus unum bonum optatur. Alio modo secundum intensionem actus: et sic ordo charitatis attendendus est, et quantum ad affectum et effectum aequaliter omnibus paribus. Et ratio est, quia affectus exterior non pertinet ad charitatem, nisi in quantum ex affectu procedit, in quo primo est charitatis actus. Unde, cum charitas ordinata praecipitur, oportet quod ordo in affectu observetur, et ex affectu in effectum

prodeat, ita quod ei qui plus ex affectu diligitur, magis in effectum impendatur omnibus paribus. Sed quia quandoque illi qui magis diliguntur ex affectu, nostri auxilii non indigent; ideo magis providendum est minus dilectis indigentibus.

Ad quod ergo primo objicitur de fide, dicendum, quod non est simile; quia ratio credendi non est veritas prima, secundum se accepta, sed ut annunciata. Sub aequali vero certitudine in omnibus articulis est annunciata. Bonitas vero prima non aequaliter est ab omnibus diligendis participata.

Ad secundum objectum, quod omnibus vult charitas idem bonum; dicendum, quod quamvis velit bonum idem secundum substantiam omnibus, non tamen eadem intentione affectus.

Ad tertium quod objicitur de praecepto, dicendum, quod ille qui impendit quod debet alicui sine affectu, quamvis non sit reus praecepti quod est de actu iustitiae, est tamen reus praecepti quod est de actu charitatis. Unde ad Rom. 1, reputatur in vitium, sine affectione esse: quod intelligendum est de affectu voluntatis, non sensualitatis.

ARTICULUS III.

Ad tertium sic proceditur. Et 1. videtur, quod ex charitate homo debeat magis diligere extraneos quam propinquos. Charitas enim fundamentum habet honestum: sed major honestas invenitur quandoque in extraneis quam in propinquis; ergo magis diligendi sunt ex charitate.

2. Praeterea, effectus respondet affectui: sed in aliquibus, idest collatione beneficiorum ecclesiasticorum, debemus majorem in affectum amoris ostendere ad bonos extraneos quam ad propinquos malos; ergo magis diligendi sunt ex affectu extranei quam propinqui.

3. Praeterea, Augustinus dicit: « Boni extranei, malis filiis praeponendi sunt; » ergo magis diligendi.

Contra. Ad Gal. 6: « Operemur bonum ad omnes, maxime autem ad domesticos fidei; » ergo propinqui praeferendi sunt extraneis.

Praeterea, 1 ad Tim. 5: « Qui suorum, et maxime domesticorum, curam non habet, fidem negavit et est infideli deterior; » ergo magis habenda est cura propinquorum quam aliorum.

Respondeo. Dicendum, quod in amore duo sunt consideranda. Unum est approbatio qua amans approbat amatum et complacet sibi in eo. Aliud est desiderium quo aliquis optat bonum amato in amore benevolentiae. Primum debetur amato ratione bonitatis; sed secundum ratione propinquitatis; quia desiderium est rerum ad nos pertinentiam. Quanto autem propinquiores sunt nobis, tanto magis eorum bona ad nos pertinent. Sic ergo quantum ad primum semper meliores diligendi sunt, ut scilicet magis approbentur: sed quantum ad secundum propinquiores, ut eis vehementiori affectu bona desideremus: et sic etiam in effectum amicitiae debet esse ordo. Secundum vero effectum qui est ad salutem, sive animae, sive corporis, necessarius requiritur ordo ex debito, non tamen ex parte aliorum effectuum. Si tamen sint beneficia privata, requiritur de congruo; si publicum, non sic; quia in huiusmodi beneficiorum collatione debet respici communis utilitas, non conjunctio personalis; et magis in ecclesiasticis quam in civilibus.

Quod ergo objicitur quod fundamentum charitatis est honestum, dicendum est quod extranei, in quantum communicant nobiscum in operibus honestis, sic magis sunt diligendi: in quantum vero in origine naturae, propinquiores et parentes magis; non in quantum mali: sed ad hoc ut sint boni. Vel dicendum, quod ratio probat meliores magis diligendos amore approbante, et non bonum illis desiderante.

Ad secundum quod objicitur de collatione beneficiorum, dicendum, quod ordo beneficiorum ecclesiasticorum non tantum attenditur penes ordinem charitatis ad proximum, hunc vel illum: sed potius ad totam Ecclesiam, et ad Christum; scilicet secundum ordinem ecclesiasticae utilitatis.

Ad tertium quod objicitur de Augustino, dicendum, quod hoc intelligitur in collatione ecclesiasticorum beneficiorum non temporalium; quia illa respiciunt utilitatem Ecclesiae, haec necessitatem naturae vel personae.

ARTICULUS IV.

Ad quartum sic proceditur. Et 1. videtur, quod omnes teneantur habere charitatem perfectam. 1. Joan. 3: « Si Christus pro nobis animam posuit, et nos debemus pro fratribus animas ponere: » haec autem perfectio charitatis est, quia majorem charitatem nemo habet quam ut animam suam ponat quis pro amicis suis; ergo tenemur omnes perfectam charitatem habere.

2. Praeterea, Gregorius: « In via Dei non progredi regredi est: » sed omnes tenentur non regredi; ergo tenentur ad perfectionem tendere.

3. Praeterea, quilibet magis tenetur diligere proximum, quam corpus proprium: sed ponere vitam corporalem pro fratribus est perfectae charitatis; ergo tenetur quilibet habere perfectam charitatem.

Contra. Sufficit ad salutem habere charitatem; ergo non est necesse habere perfectam charitatem.

Praeterea, perfecto non est possibilis additio: charitas in via semper potest augeri; ergo nunquam potest perfici.

Respondeo. Dicendum, quod duplex est perfectio charitatis viae. Una est secundum intensionem, ut scilicet perfecte diligit. Alia secundum objecta vel opera, ut perfecta faciat. Unaquaeque harum autem perfectionum dupliciter attenditur in charitate. Uno modo quantum ad esse, in quantum est perfecta in specie sua; et ad hanc omnes tenentur: quia sine hac non potest esse charitas. Alia est perfectio quantum ad bene esse: et in hac perfectione, secundum aliquos distinguendum est; quia ad perfectionem quae est per intensionem tenetur quis tendere, quamvis non teneatur eam habere; sed ad perfectionem quae est secundum objecta seu opera, non tenetur simpliciter quis nec tendere, nec eam habere; sed tenetur eam non contemnere, nec contra eam se firmare, sed tamen tenetur in casu ad aliqua opera perfectionibus operibus similia.

Ad illud quod primo objicitur de Joanne, dicendum, quod ponere animam pro fratribus, quandoque est de necessitate salutis, sicut cum cura fratrum est nobis commissa. Vel quando ex nobis non potest aliter vitari quin proximos scandalizemus quam mortem sustinendo; et sic loquitur Joannes. Quandoque vero est de perfectione charitatis, sicut

eum quis sponte se offert ad mortis periculum pro salute proximorum; et sic loquitur Dominus in evangelio.

Ad secundum quod objicitur de Gregorio, dicendum, quod ad perfectionem patriae tenemur tendere; nec ex hoc sequitur quod teneamur eam in praesenti habere, sed laborare ut in futuro habeamus. Secundum alios tamen tenemur tendere ad perfectionem charitatis, quantum ad bene esse secundum intensionem, non secundum opera.

Ad tertium quod objicitur de corpore nostro, dicendum, quod mori pro fratre, dupliciter contingit; aut pro salute ejus et utilitate, et hoc est perfectionis: aut pro necessitate, quia aliter non potest fieri; et hoc est necessitatis.

Expositio textus.

« Multorum charitas inordinata est. » Charitatem hic large pro quacumque dilectione ponit. « Qui si boni sint, malis filiis praeponendi sunt. » Non in illis quae ad naturalem communicationem pertinent, sicut est haereditatis divisio et educatio et hujusmodi.

DISTINCTIO XXX.

Hic quaeri solet etc. (V. edit. nostrae tom. VII, pag. 323.)

QUAESTIO UNICA.

ARTICULUS I.

Hic primo quaeritur, utrum teneantur omnes ad diligendum inimicos. Et 1. videtur, quod non. Luc. 6: « Diligite inimicos vestros, » dicit Glossa, « hoc perfectorum est: » sed ad ea quae sunt perfectorum, non omnes tenentur: ergo ad dilectionem inimicorum non omnes tenentur.

2. Praeterea, Matth. 4: « Accipiens Jesus panes, » dicit Glossa: « Non alia quam quae scripta erant praedicat, sed legem et prophetas gravia esse demonstrat. » Sed in veteri lege non tenebantur homines ad diligendum inimicos. Matth. 5, dictum est antiquis: « Diliges amicum tuum et odio habebis inimicum tuum; » ergo nec modo tenemur ad dilectionem inimicorum.

3. Praeterea, charitas facit voluntatem hominis voluntati divinae conformem: sed Deus odit aliquos, sicut dicitur Malach. 1: « Esau odio habui; » ergo licet odio aliquos habere, et sic inimicos.

Contra. Luc. 6: « Diligite inimicos vestros. » Glossa: « Non sufficit non odisse, sed quod supra naturam est praecipimur diligere; » ergo ad hoc tenemur.

Praeterea, tenemur diligere proximum ex praeccepto Dei: sed nomine proximi intelligitur omnis homo, ut dicit Augustinus in libro de Decem chordis; ergo etc.

Respondeo. Dicendum, quod affectus dilectionis est duplex: primus innocentiae, secundus beneficentiae. Primo affectu tenemur diligere omnes inimicos ne optemus eis mala, in quantum mala sunt, id est per se: sed mala in quantum eis expedientia vel Ecclesiae vel reipublicae fore credimus, per accidens optare possumus. Secundus duplex est, quia unus est principalis, quem charitas primo et per se elicit, ut optare dilecto bona spiritualia, scilicet gratiam et gloriam: alter quem secundo et per

accidens elicit; ideo nec semper, quia non semper expedit dilecto, ut optare ei bona temporalia. Primo modo tenemur affectu diligere inimicos, secundo modo non; sed minus secundo modo debemus diligere inimicos Ecclesiae quam personae. Nam illis optare prosperitatem temporalem imperfectionis est potius, quam perfectionis; nisi per accidens, in quantum scilicet beneficiis attrahi sperantur ad Ecclesiae devotionem. Inimicis autem personae optare bona temporalia perfectionis est, nisi per accidens, in quantum putantur eis vel aliis fore nociva.

Ad quod ergo primo objicitur, quod diligere inimicos perfectorum est, dicendum, quod hoc intelligitur de dilectione beneficentiae, secundum modum dictum.

Ad illud, « Dictum est antiquis etc. », dicendum, quod de inimico Ecclesiae, dictum erat eis in lege, quantum ad dilectionem beneficentiae in temporalibus; sed de inimico personae non nisi ex prava doctorum interpretatione.

Ad tertium quod objicitur, quod charitas conformat voluntatem nostram divinae, dicendum, quod Deus non vult malum alienius loquendo de malo culpa, sed permittit; et haec permissio bona est. Malum autem poenae cuius est auctor, vult non in quantum malum, quia non delectatur in poenis, sed in quantum justum; et sic nos possumus velle.

ARTICULUS II.

Ad secundum sic proceditur. Et 1. videtur, quod omnes teneantur signa beneficentiae inimicis ostendere. Luc. 6: « Diligite inimicos vestros, » dicit Glossa: « Ecclesia pro inimicis tria facit: diligit orat et bene facit: » sed membrum Ecclesiae tenetur ad faciendum simile quod facit Ecclesia; ergo non est membrum Ecclesiae qui hoc non facit.

2. Praeterea, similiter praecipitur Matth. 5, diligere inimicos et benefacere eis; ergo eadem ratione homines obligantur ad utrumque: sed ad primum omnes tenentur; ergo et ad secundum.

3. Praeterea, abnegare homini signa familiaritatis et sua beneficia, quaedam vindicta videtur: sed homo tenetur se non vindicare, sicut patet Rom. 12: « Non vosmetipsos vindicantes »; ergo tenetur homo non subtrahere sua beneficia inimicis.

Contra. Matth. 5, dicit Glossa super verbo illo, « Diligite inimicos, » quod benefacere inimicis et orare pro eis est cumulus perfectionis: sed ad illa quae sunt perfectionis non omnes tenentur; ergo nec ad praestandum inimicis beneficia.

Praeterea, Ecclesia indicit bella contra tyrannos persecutores suos; ergo licet inimicis malefacere; ergo non tenemur eis benefacere.

Respondeo. Sicut est in affectu, ita in effectu ab eo procedente distinguendum. Nam ad effectum innocentiae omnes tenentur ut inimicis mala non inferant, nisi forte per accidens propter bonum personae vel reipublicae. Quo ad effectum beneficentiae distinguendum est; quia tenetur eis benefacere beneficio spirituali necessario ad salute, et pro eis orare non in speciali, sed in communi, sic non excludendo eos ab orationibus nostris communibus. Temporalis autem beneficio non tenemur, nisi in casu necessitatis; et tunc est magis opus justitiae quam amicitiae: extra casum vero necessitatis in statu opportunitatis non tenemur. Circa hoc, tamen secundum aliquos, est distinguendum: quia aut est

inimicus Ecclesiae aut personae. Inimico personae benefacere perfectionis est, nisi per accidens, in quantum ipsum beneficium vel sibi vel alteri occasionaliter nocivum est. Utilius enim, ut ait Augustinus, esurienti panis subtrahitur, si de cibo securus justitiam negligat, quam esurienti panis frangitur, ut injustitiae seductus acquiescat. Inimico vero Ecclesiae beneficium subtrahere perfectius est, nisi per accidens, in quantum ipsum beneficium Ecclesiae fore speratur utile, ut quando per beneficia speratur reconciliandus Ecclesiae.

Ad quod ergo primo objicitur de Glossa. Luc. 6, dicendum, quod illa tria Ecclesia facit, sed differenter in diversis membris. Nam diligere facit ex praecepto in omnibus; benefacere beneficio temporali et orare speciali oratione facit ex consilio in solis perfectis.

Ad secundum quod objicitur de simili forma praecipienda, dicendum, quod quamvis forma sit eadem, non tamen ratio et praecipientis intentio.

Ad tertium quod objicitur de abnegatione signorum et beneficiorum, dicendum, quod negare homini signa familiaritatis quando necessitas ex peteret, esset vindicta, vel etiam quando veniam peteret, vel quando se ille qui hostis habetur ad familiaritatem ingereret, et si habeatur praesumptio quod non fite vel irrisorie faciat; quia tunc diligit, et inter inimicos non est deputandus, sicut aliqui dicunt. Sed quod aliquis ultro se ad familiaritatem inimico ingerat, hoc perfectionis est.

Ad quartum quod objicitur incontrarium de Glossa, dicendum, quod hoc intelligitur de beneficio temporali in casu opportunitatis, non tamen necessitatis.

Ad quintum quod objicitur de consideratione Philosophi, dicendum, quod quando oppositum dicitur de opposito per se, scilicet in quantum oppositum est, tunc tenet consideratio; sed non quando dicitur de opposito in quantum convenit proposito; sicut cum visibile dicitur de albo, in quantum convenit cum nigro, non in quantum ei opponitur. Similiter benefacere dicitur de amico, in quantum convenit cum inimico, scilicet ratione naturae communis; sed considerare vel secreta communicare convenit, in quantum opponitur inimico.

Sextum autem concedendum est; quia inimicis est malefaciendum cum ab Ecclesia exponuntur, ut sic ad bonum amicitiae convertantur; vel si incorrigibiles sunt, ut alii in pace conserventur.

ARTICULUS III.

Ad tertium sic proceditur. Et 1. videtur, quod majoris meriti sit diligere inimicum quam amicum. Matth. 5: « Dominus dixit; Si dilexeritis eos qui vos diligunt, quam mercedem habebitis? » sed meritum dicitur respectu mercedis; ergo majoris meriti est diligere inimicum quam amicum.

2. Praeterea, Gregorius: « Servitia quanto minus debita, tanto magis grata: » sed servitium quo servitur Deo in dilectione inimicorum est magis indubitum; ergo magis Deo gratum.

3. Praeterea, principium meriti in gratia consistit; sed dilectio inimicorum est opus solius gratiae, dilectio amicorum est opus etiam naturae inclinantis; ergo illud magis gratuitum; ergo magis immeritorium.

Contra. Minus bonum dimittendum est pro ma-

jori bono, sed non e converso: sed in aequali necessitate magis est opus dilectionis amico quam inimico impendendum; ergo magis est diligendus.

Praeterea, pejus est odire amicos quam inimicos; ergo, a contrariis, melius est diligere amicos quam inimicos.

Respondeo. Dicendum, quod comparatio potest attendi vel quantum ad habitus, vel quantum ad actus. Si quantum ad habitus, sic constat perfectiorem esse illum habitum quo inimicus diligitur, eum includat etiam amicorum dilectionem; quia qui inimicos diligit, multo magis amicos. Si autem attendatur comparatio quantum ad actus, tunc actus isti possunt comparari, vel quantum ad ipsa diligibilia, vel quantum ad rationem diligendi. Si ad diligibilia, sic melius est diligere amicum. Si quantum ad rationem diligendi, sic cum in dilectione inimici ratio esse non possit nisi Deus, in dilectione vero amici sit aliqua ratio temporalis, praefertur quantum ad hoc inimicorum dilectio; et pro tanto majoris meriti esse dicitur, quia meritum consistit in hoc, quod actus nostri referantur in Deum. Si tamen amicus diligeretur ex aequali vel majori Dei charitate, vel e converso, inimicus propter aliquid aliud quam propter Deum diligeretur, comparatio praedicta cessaret. Sed hujusmodi comparationes fiunt secundum ea quae frequentius accidere solent.

Ad illud ergo quod opponitur de minori bono, dicendum, quod minus bonum dimittendum est pro majori, ceteris paribus: sed ubi minus bonum est magis debitum quam majus, non est dimittendum pro majori. Dilectio vero amicorum magis est debita, quam dilectio inimicorum, et sic magis meritoria.

Ad illud, quod pejus est odire amicos quam inimicos, dicendum, quod in his quae se habent ex additione, potius tenet consequentia in contrario quam in ipso. Nam quamvis vivere sit melius quam esse, tamen non esse pejus est quam non vivere. Diligere inimicos quo ad conatum voluntatis, se habet ex additione ad diligere amicos. Unde quamvis diligere inimicos sit melius, tamen odire amicos est pejus. Prima tria argumenta concedenda sunt, quia probant veritatem.

ARTICULUS IV.

Ad quartum sic proceditur. Et 1. videtur, quod meritum non consistat in charitate principaliter. Dicitur enim gratia esse principium merendi; sed charitas non est idem quod gratia; ergo non consistit meritum principaliter penes charitatem.

2. Praeterea, nullus meretur nisi justificatus: sed fidei est justificare, ut patet Rom. 5; ergo apud ipsam praecipue est virtus merendi.

3. Praeterea, charitas minuit difficultatem operis circa meritum; ergo non est principaliter merendi radix.

Contra. Illud videtur radix merendi esse, sine quo nullum meritum valet: sed charitas est hujusmodi, ut patet 1 ad Cor. 13; ergo charitas est radix merendi.

Praeterea, illud est radix merendi, quod opponitur omni demerito: charitas est hujusmodi; ergo etc.

Respondeo. Dicendum, quod sicut in oculo principium primum et remotum videndi est anima, principium propinquum sed non immediatum, po-

tentia visiva, principium proximum bona dispositio organi, scilicet lux: sic in anima primum et remotum principium merendi est gratia, quae ponit animam in statu merendi; principium propinquum, sed non immediatum, habitus cujuslibet virtutis; sed principium propinquum et immediatum charitas, et in ratione subjecti, quia forma est voluntatis, in qua est principium totius meriti, et in ratione objecti, quia objectum ejus est finis ultimus, ex cujus intentione est perfectio totius meriti.

Ad illud de gratia, dicendum, quod gratia est remotum principium, non immediatum.

Ad quod objicitur de fide, dicendum, quod nec actus fidei nec aliarum virtutum sunt justificantes, nisi in quantum sunt informati charitate.

Ad illud de difficultate, dicendum quod difficultas operis proprie non facit ad meritum nisi dimissionis poenae, per modum cujusdam commutationis; sed quasi per accidens, in quantum auget conatum voluntatis. Charitas vero facit majorem inclinationem voluntatis; unde ipsa auget meritum; et quanto major est conatus, majus est meritum respectu praemii accidentaliter, quod respicit ipsum actum; non respectu praemii essentialiter; quia quantitas ejus respicit quantitatem habitus charitatis. Vel aliter dicendum, quod duplex est facilitas. Una quae provenit ex promptitudine voluntatis; et haec non minuit meritum sed auget; et hanc facit charitas. Alia quae est ex natura operis; et talem non facit charitas. Haec autem diminuit meritum.

Expositio textus.

• An unus et idem motus. •

Contra. Non potest anima simul multa apprehendere ut plura; ergo nec diligere.

Respondeo. Dicendum, quod loquitur de unitate motus in utrumque in generali, non in speciali; id est de unitate, non secundum numerum, sed secundum speciem.

• Igne peccator ibi ferventior. •

Contra. Motus charitatis unius novitii, est ferventior motu charitatis viri perfecti aliquando.

Respondeo. Dicendum, quod fervor qui est de intentione finis facit actum meliorem; qui vero ex aliqua dispositione subjecti vel objecti, non oportet.

• Verba sponsionis ejus. •

Contra. Ergo peccator dicens, Pater noster, peccat, qui promittit quod non facit.

Respondeo. Dicendum, quod non peccat; quia non dicit in persona propria, sed in persona Ecclesiae.

DISTINCTIO XXXI.

Illud quoque etc. (V. edit. nostrae tom. VII, pag. 331.)

QUAESTIO UNICA.

ARTICULUS I.

Hic primo quaeritur. Et 1. videtur, quod charitas semel habita non possit amitti. Majus enim est destruere jam existens, quam resistere advenienti: sed charitas omnis, destruit peccatum existens in eodem subjecto; ergo multo magis resistit advenienti.

2. Praeterea, si charitas a peccato destruitur, aut ergo a peccato non existente in eodem subje-

cto, aut ab existente in eodem subjecto. Si non ab existente, Contra. Quod non est non potest agere; et ita peccatum quod non est, non potest charitatem expellere. Si ab existente; ergo opposita simul sunt in eodem; quod est falsum; ergo charitas non destruitur.

5. Praeterea, si destruitur, aut actione alterius, aut proprii subjecti. Si alterius, Contra. Solus Deus agere potest in libero arbitrio, quia ipse tantum superior est. Deus vero non est causa destructiva honorum. Si proprii subjecti, Contra. Motus in unoquoque secundum naturam sic praedominantis, in omni habente charitatem ipsa est praedominans; ergo omnes motus fiunt secundum naturam ipsius: sed quod secundum naturam alicui est, ipsum non destruit; ergo actione subjecti charitas non destruitur.

Contra. Apoc. 2: « Habeo adversum te pauca, quia charitatem primam reliquisti; » ergo charitas potest amitti.

Praeterea, quicumque non potest peccare, habet liberum arbitrium confirmatum: sed non omnis qui habet charitatem, habet liberum arbitrium confirmatum; ergo aliquis habens charitatem potest peccare: sed per peccatum amittitur charitas; ergo potest amittere charitatem.

Respondeo. Dicendum, quod omnis forma est in materia sibi proportionata et debite disposita. Destructa ergo debita dispositione, destruetur forma; sicut debito temperamento corporis destructo desinit in eo esse anima. Debita autem dispositio hominis ad gratiam, est ejus conversio ex toto corde ad Deum. Destructa ergo praedicta dispositio, desinet in eo esse gratia, seu charitas. Per omne autem peccatum mortale praedicta dispositio perditur; quia peccatum est aversio ab incommutabili bono, et conversio ad commutabile bonum; et ideo per omne peccatum mortale, desinit in homine esse charitas.

Ad quod primo objicitur in contrarium, quod majus est destruere jam existens, dicendum, quod ipsa charitas de se resistere potest; sed subjectum se charitati subtrahit, et contrario supervenienti se supponit.

Ad secundum « aut a peccato existente » dicendum, quod a peccato existente, quod quidem charitatem destruit, non active, sed formaliter; et ideo in eodem instanti quo culpa esse incipit, charitas esse desinit; et sic non sunt simul.

Ad tertium de actione, dicendum, quod destruitur actione proprii subjecti. Et quod dicitur, omnis motus est per naturam praedominantis, hoc intelligitur in motu naturali, non voluntario. Vel dicendum, quod charitas in habente praedominatur semper habitu, sed non actu.

ARTICULUS II.

Ad secundum sic proceditur. Et 1. videtur, quod fides non evacuetur. Adveniente lumine majori, non destruitur lumen minus; ergo nec lumen fidei, adveniente lumine gloriae.

2. Praeterea, nihil destruitur nisi a suo contrario: sed fidei, quantum est ad genus cognitionis, cognitio patriae non opponitur; ergo quantum ad genus non tollitur.

3. Praeterea, videtur quod nec spes. Magis opponuntur habitus gratuiti culpae, quam gloriae: sed

spes per culpam non tollitur; ergo nec per gloriam.

4. Praeterea, sicut se habet spes ad salvatos, sic desperatio ad damnatos: sed in damnatis manet desperatio; ergo spes in salvatis.

Contra. Habitus simplices formae sunt; ergo quando destruuntur, totaliter destruuntur: sed fides quo ad aenigma, spes quo ad expectationem, destruuntur; ergo totaliter.

Praeterea, ad Rom. 8: « Quod enim videt quis, quid sperat? » ergo non potest esse de visis intellectui, sicut nec fides: sed in gloria videntur omnia speranda et credenda; ergo in ea fides et spes evacuabuntur.

Respondeo, quod status gloriae est perfectus, status viae imperfectus. Quae ergo imperfecta sunt, quamvis haec sint in statu viae, non tamen erunt in statu gloriae. Sunt autem quidam habitus in statu viae qui habent imperfectionem essentialem, quae scilicet convenit eis secundum rationem propriae speciei; quidam qui accidentalem. Primi totaliter tollentur. Secundi manebunt, sed perficientur. Quia ergo fides ratione aenigmaticae cognitionis, spes ratione carentiae rei expectatae, essentialiter sunt imperfectae; ideo in patria essentialiter tollentur adveniente clara visione, et praesentia rei expectatae.

Ad primum quod objicitur de lumine, dicendum, quod ubi minus lumen majori non opponitur, manet, ut in luminibus corporalibus: sed ubi opponitur, non manet, ut contingit in aliquibus luminibus spiritualibus. Sic autem se habet fides et visio.

Ad secundum dicendum, quod destructio, cum sit actus naturae, non respicit genus vel speciem quae sunt rationis, nisi ex consequenti. Respicit enim primo particularia, quibus destructis, ex consequenti destruuntur genera et species, prout sunt in eis. Secundum alios tamen fides quantum ad genus cognitionis in patria non destruitur. Sed hoc est impossibile, si intelligatur, quod eadem numero cognitio sit fides viae et visio patriae: sicut nec homo et asinus possunt esse idem animal numero. Si vero intelligatur quod non manet eadem cognitio numero sed genere, hoc in idem redit cum eo quod dicit, quod fides secundum substantiam cessat.

Ad tertium dicendum, quod unumquodque tollitur per suum contrarium. Unde et spes tollitur per culpam contrariam, scilicet desperationem, non autem per alias culpas quae non opponuntur ei nisi ratione suae formae. Unde per eas redditur informis. Sed status gloriae opponitur ei quantum ad suam speciem, ut dictum est; et ideo eam evacuat.

Ad quartum de desperatione, dicendum, quod non similiter se habent. Nam desperatio auget poenam damnatorum, spes vero minuit gloriam salvandorum.

ARTICULUS III.

Ad tertium sic proceditur. Et 1. videtur, quod charitas destruat. 1 Cor. 13: « Cum venerit quod perfectum est, evacuabitur quod ex parte est: » sed charitas est ex parte: quia illud praeceptum, « Diliges Dominum Deum tuum, » non totaliter impletur in via; ergo charitas evacuabitur.

2. Praeterea, qui habet unam virtutem, habet omnes, secundum Hieronymum: sed in futuro fides non habetur; ergo nec charitas.

5. Praeterea, ad charitatem pertinet inimicos diligere: sed Sancti in patria non diligunt inimicos damnatos, eis enim bona gratiae et gloriae non optabunt propter conformitatem voluntatis ad Deum; ergo charitas non manet.

Contra. 1 ad Corinth. 13: « Charitas nunquam excidit. »

Praeterea, perfectae charitatis est inimicos diligere: sed Christus et sancti in patria perfectionem habent charitatis; ergo diligunt inimicos, et sic malos; et ita in eis ordo charitatis servabitur.

Respondeo. Dicendum, quod circa charitatem est considerare habitum, actum, modum et ordinem. Habitus et actus nihil habent imperfectionis: ideo in eis nihil tollitur, sed augebitur. Modus duplex est: quantitatis ex parte Dei, scilicet diligere Deum propter se et super omnia; et quantitatis ex parte nostra, scilicet ex toto corde. Primus in praesenti non habet aliquid imperfectionis: unde non tollitur sed augebitur. Secundus ex parte subjecti, non sui, imperfectionem habet, et ejus imperfectio tollitur. Circa ordinem autem est considerare duo. Primo ordinem essentialem quatuor diligendorum ex parte ipsius charitatis, secundum naturam propriam; sicut quod solet diligere primo quod supra nos est; et hoc manebit. Et ordinem accidentalem ex parte subjecti secundum statum, ut diligere magis propinquos quam alios, qui in statu viae nobis amplius junguntur.

Ad primum, quod charitas est ex parte, dicendum, quod hoc habet ex imperfectione subjecti non sui; quia imperfectio non pertinet ad rationem propriae speciei, cum amor sit tam praesentis quam absentis.

Ad secundum, quod qui habet unam etc., dicendum, quod hoc intelligitur in statu viae solum. Vel dicendum, quod hoc intelligitur de virtutibus perfectis solum.

Ad tertium dicendum, quod charitas refertur tantum ad eos, qui sunt in gratia vel gloria, vel esse possunt; unde se non extendit ad damnatos, ut supra dictum est. Diliguntur tamen a sanctis ex charitate Dei sicut et daemones, in quantum scilicet Dei creaturae sunt.

ARTICULUS IV.

Ad quartum sic proceditur. Et 1. videtur, quod scientia evacuetur. 1 ad Cor. 13: « Scientia destruetur: » sed accidens quod destruitur totaliter tollitur; ergo scientia totaliter tollitur.

2. Praeterea, scientia maxime delectabilis est; ergo si remanebit, habebit plus delectationis minus bonus philosophus, quam optima vetula.

5. Praeterea, memoria est pars animae sensibilis, secundum Philosophum: sed potentia sensibilis in morte perit, ergo et memoria; ergo et omnis scientia existens in memoria.

Contra Angeli et Christus quamvis videant in Verbo, cognoscunt tamen res in propria natura; ergo et sancti similiter facient; ergo et in eis erit scientia a rebus accepta, per quam cognoscent res in generibus propriis.

Praeterea, damnati retinent eorum quae hic aguntur scientiam, ut patet in divite; ergo magis salvati.

Respondeo. Dicendum, quod in scientia est considerare habitum, actum et modum. Habitus non

habet oppositionem cum gloria, nec cum poena: ideo manebit. Actus non sic, quia est ratiocinationis et inquisitionis. Hic cessabit in beatis, ut dicit Magister; et alium actum habebunt, quia videbunt veritatem rerum per simplicem intuitum non ratiocinativum. In damnatis autem respectu eorum quae elici possunt ex his quae scient, forte praedictus actus manebit, sed ad eorum afflictionem. Modus est intelligere cum phantasmate qui convenit sibi ex parte corporis. Cum enim intelligere sit actus conjuncti per animam, et corpus non communicet sibi ex parte actus, quia intellectus non est potentia conjuncta organo, oportet quod communicet sibi ex parte objecti, cum non sit possibile aliter; et ideo oportet intelligere cum phantasmate, quia phantasma est species corporalis. Separata ergo anima a corpore, praedictus modus non remanebit. Similiter nec post resurrectionem, quando corpus sequitur animam, et non e converso.

Ad primum quod opponitur de Apostolo, dicendum, quod scientia destruetur quantum ad modum, et quantum ad actum mutabitur; quamvis quantum ad terminum actus, qui est certitudo, et quantum ad habitum, remaneat.

Ad quod obiicitur de delectatione, dicendum, quod quamvis quo ad hoc habeat philosophus majorem delectationem accidentalem, tamen habebit vetula majorem substantialem.

Ad tertium de memoria, dicendum, quod secundum Sanctos, non tantum est memoriae sensibilis, sed etiam intellectualis in anima rationali, quae est pars imaginis.

Expositio textus.

« Quae semel habita non amittitur », id est vix amittitur.

« Radix omnium malorum cupiditas. »

Contra. Eccles. 10: « Initium omnis peccati superbia. »

Respondeo. Utraque generaliter, non specialiter accepta, omnis mali radix est; sed differenter; quia superbia in aversione a bono incommutabili, cupiditas in conversione ad bonum commutabile.

« Scientia secundum sui actum. »

Contra. Frustra est habitus sine actu.

Respondeo. Non dicit habitum mansurum sine actu, sed sine eo qui nunc est, scilicet ratiocinatio; quamvis remaneat quantum ad terminum actus qui est certitudo.

DISTINCTIO XXXII.

Praemissis adjiciendum etc. (V. edit. nostrae tom. VII, pag. 542.)

QUAESTIO UNICA.

ARTICULUS I.

Hic primo quaeritur, utrum Deus diligat creaturam: et videtur quod non. Amor enim quandam animi passionem importat; sed aliae passionis animae ut ira, odium, et hujusmodi, non sunt in Deo nisi secundum effectum et similitudinem; ergo nec amor.

2. Praeterea, si Deus diligit creaturam, aut ergo fruendo, aut utendo: sed ipse nec fruitur creatura, nec eam refert in finem alterum, quia nec crea-

tura est ejus finis, nec ipse creatura indiget ad consequendum aliquem finem; ergo non diligit creaturam.

5. Praeterea, amor Dei ad creaturam, aut est affectus, aut effectus: si affectus, ergo affectio est in Deo; si effectus, ergo amor ad creaturam non est in Deo sed a Deo.

Contra. Joan 3: « Sic Deus dilexit mundum, ut « Filium suum unigenitum daret. »

Praeterea, amor est primum donum, et ita ratio omnis doni: cum ergo a Deo creaturae multa dona donentur, et nisi ex amore dari non possint, creatura a Deo diligitur.

Respondeo. Dicendum, quod unicuique habenti cognitionem amabile est proprium bonum. Unde, cum in Deo sit sui cognitio perfecta, amat suam bonitatem. Bonum autem alicujus non solum dicitur secundum hoc quod in ipso est, sed etiam secundum quod est in alio per similitudinem. Unde cum bonitas quae est in creatura sit similitudo divinae bonitatis, Deus diligit creaturam.

Ad quod primo objicitur de passione, dicendum, quod amor quandoque nominat passionem, secundum quod est in parte sensitiva; quandoque vero non: sed solum operationem voluntatis secundum quod est in parte intellectiva; et hoc modo Deo convenit, non primo.

Ad secundum dicendum, quod Deus non refert ad aliam creaturam, sed ad seipsum; et ideo utitur ea.

Ad tertium quod amor Dei ad creaturam, aut dicit affectum etc., dicendum, quod si affectio nominet passionem, sic non competit Deo: si autem nominet operationem affectivae virtutis, scilicet voluntatis, sic competit Deo, sicut et velle.

ARTICULUS II.

Ad secundum sic proceditur. Et 1. videtur, quod Deus non diligit omnem creaturam. Deus enim ex charitate diligit quicquid diligit: sed non omnia sunt ex charitate diligenda, ut rationabilia; ergo Deus non diligit omnia.

2. Praeterea, nihil idem simul diligitur et oditur: sed Deus odit reprobos. Malach. 1: « Esau odio « habui; » ergo non diligit eos.

3. Praeterea, dilectio est causa electionis, sive ratio: sed Deus non omnes eligit; ergo non omnes diligit.

Contra. Sap. 11: « Diligit omnia quae sunt. »

Praeterea, Gen. 1: « Vidit Deus cuncta quae « fecerat, et erant valde bona. » Secundum Augustinum autem, per hoc significat quod omnia approbavit: sed nihil approbatur nisi quod amatur; ergo Deus omnia amat.

Respondeo. Dicendum, quod duplex est dilectio; quaedam generalis, qua quis vult alteri bonum quodcumque; quaedam vero specialis, qua vult alteri bonum, quod sibi convivat; et haec est dilectio amicitiae. Prima dilectione Deus diligit omnia, quia voluntas ejus causa est in eis omnium suorum bonorum. Secundo modo distinguendum est, quod voluntas Dei duplex est: quaedam antecedens quae respicit naturam, quaedam consequens quae respicit meritorum exigentiam. Primo modo Deus diligit dilectione amicitiae omnem creaturam rationalem. Secundo modo solos electos.

Ad primum, Deus diligit ex charitate, dicendum,

quod Deus diligit omnia, id est creaturas irracionales et charitate diligit, non sicut charitatem habens ad illa, sed sicut ordinans ea ad illa ad quae charitatem habet.

Ad secundum de odio, dicendum, quod idem secundum idem non diligitur et oditur. Unde in peccatoribus aliud odit Deus, id est peccatum, aliud diligit, ut naturam.

Ad tertium quod dilectio est causa electionis, dicendum, quod verum est de dilectione amicitiae quae sequitur voluntatem consequentem, et hac non omnes diligit.

ARTICULUS III.

Ad tertium sic proceditur. Et 1. videtur, quod Deus non diligit creaturam ab aeterno. Dilectio enim non est nisi boni: sed creaturae non fuerunt bonae ab aeterno; ergo non diligit eas ab aeterno.

2. Praeterea, dilectio Dei ad creaturam significat essentiam, et connotat effectum in creatura: omne tale attributum dicitur de Deo ex tempore, ut creator, Dominus; ergo et dilectio creaturae.

3. Praeterea, amans vult, esse amatum: sed Deus non volebat creaturas esse antequam essent, quia si voluisset eas esse, fuissent; ergo non amabat eas antequam essent.

Contra. Electio sequitur dilectionem: sed sanctos ab aeterno elegit. Eph. 1: « Elegit nos ante mundi « constitutionem; » ergo ab aeterno eos dilexit.

Praeterea, de non sciente Deus ab aeterno non potuit fieri sciens; ergo nec de non diligente diligens; ergo quoscumque diligit, ab aeterno diligit.

Respondeo. Dicendum, quod dilectio Dei dupliciter potest accipi. Aut pro actu dilectionis inferiori, aut pro exteriori. Primo modo idem est quod velle bonum alicui. Secundo modo, idem quod impendere bonum alicui. Primo modo dicitur secundum essentiam. Secundo modo secundum efficientiam. Primo modo notat effectum in creaturam habitu non in actu; secundo modo etiam in actu: unde primo modo est aeterna, secundo modo temporalis.

Ad primum quod dilectio non est nisi boni, dicendum, quod verum est; sed potest esse boni existentis in propria natura: et sic creaturae non fuerunt bonae ab aeterno: vel in Dei praescientia, et sic ab aeterno fuerunt bonae.

Ad secundum « connotat effectum, » dicendum, quod non connotat effectum in actu, sed in habitu: et hoc modo cum connotat effectum in creatura potest dici de Deo ab aeterno; et ideo ab aeterno convenit Deo dilectio affectus, quamvis non effectus.

Ad tertium quod Deus non volebat ab aeterno esse creaturas, dicendum, quod si ly ab aeterno; determinat hoc verbum, volebat, falsa est: si determinat hoc verbum, esse, vera est; quia ab aeterno volebat esse creaturas; sed non eas esse ab aeterno, sed secundum ordinem suae sapientiae. Voluit enim ab aeterno creaturarum productionem, sed non voluit producere eas ab aeterno.

ARTICULUS IV.

Ad quartum sic proceditur. Et 1. videtur, quod Deus omnia aequaliter diligit. Cognitionem consequitur dilectio: sed Deus aequaliter cognoscit omnem creaturam; ergo aequaliter diligit.

2. Praeterea, Deus eodem modo se habet ad o-

omnia, secundum Dionysium: dilectio vero Dei dicitur habitudinem ejus ad creaturam; ergo eodem modo diligit omnem creaturam; ergo aequaliter.

5. Praeterea, idem actus non potest esse intensior et remissior nisi secundum diversas sui partes: sed Deus eodem actu simplici diligit omnia; ergo non diligit unum plus altero.

Contra. Charitas est boni in quantum bonum; ergo magis bonum magis diligit.

Praeterea, ordo charitatis est de perfectione ipsius: sed charitas Dei perfectissima est; ergo secundum ordinem unum plus altero diligit.

Juxta hoc quaeritur an magis diligat genus humanum quam Christum. Secundo an magis Angelum quam hominem. Tertio an magis innocentem quam poenitentem. Quarto an magis praescitum justum, quam peccatorem praedestinatum.

Respondeo. Dicendum, quod dilectio Dei dupliciter potest considerari. Aut quoad ipsam voluntatem, aut quoad bonum volitum. Primo modo una et aequali dilectione diligit omnem creaturam. Secundo modo non, quia uni creatorae vult majus bonum quam alii.

Ad primum, quod objicitur de cognitione, dicendum, quod non est simile; quia cognitio nullum effectum connotat aut ponit in creatura, sed dilectio sic. Nam dilectio de sui ratione dicitur motum ad res, non autem cognitio.

Ad secundum, quod aequaliter se habet Deus ad creaturam, dicendum, quod dilectio non tantum importat id quod est ex parte Dei, sed etiam id quod est ex parte creaturae, ejus bonum prout est a Deo volitum, in dilectione Dei includitur. Et ideo, quia creaturae non se habent aequaliter ad Deum, nec possunt aequaliter bonitatem ejus participare; ideo non aequaliter omnes diligit.

Ad tertium de intensione actus, dicendum, quod non dicitur magis diligere quia intensius diligit, sed quia majus bonum vult.

Ad quarto quaesita, dicendum, quod Deus aequali dilectione affectus omnia diligit, quamvis non effectus; et ideo Christum quantum ad naturam humanam etiam dicitur diligere magis tota creatura, quia ad majus bonum, scilicet ad unionem divinae personae. Angelum autem quo ad naturam, quae nobilior est, magis homine; quamvis quo ad bonum gloriae se habeant ut excedentia et excessa, vel aequalia. Innocentem autem magis poenitente, quo ad praemium accidentale, propter dignitatem innocentiae; quamvis quo ad praemium essenziale magis diligat plus habentem de charitate. Praescitum autem justum, ut nunc, magis praedestinatum injusto; quamvis simpliciter magis diligat praedestinatum, quia simpliciter vult ei majus bonum.

Expositio textus.

• Futura jam facta sunt. •

Contra. Ergo sunt ei praeterita non praesentia.

Respondeo. Factum esse dupliciter accipitur: quia vel dicit praeteritionem motus et praesentiam termini, vel praeteritionem utriusque. Primo modo intelligit, non secundo.

DISTINCTIO XXXIII.

Post praedicta etc. (V. edit. nostrae, tom. VII, pag. 507.)

QUAESTIO UNICA.

ARTICULUS I.

Hic primo quaeritur. Et 1. videtur, quod virtutes cardinales non distinguantur a theologiceis. Ad eundem enim habitum pertinet cognoscere principia, et quae ex principiis cognoscuntur: sed finis est principium in operabilibus, ut dicit Philosophus in 7 Ethic.; ergo habitus virtutum theologiarum, qui sunt de fine, non debent distingui ab habitibus virtutum cardinalium, qui sunt de operationibus propter finem.

2. Praeterea, ad quae potentia determinata est, non indigemus aliquo habitu: sed cognitio existendi Deum nobis naturaliter inserta est, ut dicit Damascenus: sed et desiderium summi boni omnibus innatum est; ergo ad cognitionem et dilectionem Dei, qui est summum bonum, non indigemus habitu aliquo; ergo sufficiunt virtutes aliae sine theologiceis.

3. Praeterea, videtur quod non distinguantur a virtutibus intellectualibus. Prudentia enim, in 7 Ethic., inter intellectuales virtutes ponitur, est etiam una de quatuor virtutibus cardinalibus; ergo similiter videtur quod aliae virtutes cardinales ab intellectualibus non distinguantur.

4. Praeterea, omnis virtus moralis consistit in medio determinato secundum rectam rationem, ut dicitur 2 Ethic.; cum ergo ratio per intellectuales virtutes rectificetur, videtur quod ipsae intellectuales sint de essentia moralium, et ita ab eis minime distinguantur.

Contra. Magis distat Deus a creaturis, quam quaevis creaturae ab invicem: sed diversitas aliquarum creaturarum requirit diversitatem habituum; ergo virtutes quae habent Deum pro objecto, multo magis ab aliis distinguuntur.

Praeterea, in 1 Ethicorum, Philosophus dividit morales contra intellectuales.

Respondeo. Circa hanc questionem sciendum est, quod differunt gratia, virtus, donum, beatitudo et fructus. Gratia enim perficit animae essentiam, sed virtus et donum perficiunt potentiam; sed differenter; quia virtus perficit potentiam ad agendum modo humano; donum autem ad agendum modo divino. Unde fortitudo, prout est virtus, habet pro mensura vires humanas; sed prout donum, potentiam divinam. Beatitudo autem est operatio doni; quia secundum Philosophum, felicitas est perfecta operatio perfectae virtutis. Fructus autem est delectatio consurgens ex praedicta operatione, vel ipsa virtus, prout est ratio delectationis. Virtutum autem duplex est genus. Quoddam reintegrandum potentias, ut sunt virtutes sacramentales. Aliud expedientium, sive perficientium potentias ad opus: et istarum quaedam sunt de fine, quaedam sunt de his quae sunt ad finem. Primae sunt theologicae, secundae cardinales, sive intellectuales: sed intellectuales perficiunt cognitivam, ad cognoscendam; cardinales autem motivam ad agendum.

Ad primum quod opponitur de cognitione principiorum, dicendum, quod non est verum. Nam cognitio principiorum pertinet ad intellectum, cognitio

conclusionum ad scientiam, quae sunt diversae virtutes intellectuales.

Ad secundum de cognitione et desiderio naturali, dicendum, quod duplex est participatio Dei: quaedam secundum naturam, quaedam supra naturam. Ad primam inserta est nobis naturalis cognitio et desiderium, non autem ad secundam, ad quam ordinant virtutes theologicae collatae nobis a Deo.

Ad tertium quod objicitur de prudentia, dicendum, quod non est simile de ea et aliis virtutibus; quia ipsa media est inter intellectuales et morales virtutes. Est enim essentialiter intellectualis, cum sit habitus cognitivus. Sed est moralis materialiter, quia circa materiam moralium ut habitus directivus versatur, etc., cum secundum Philosophum, sit recta ratio agibilem.

Ad quartum quod objicitur de medio, dicendum, quod aliter determinatur medium per virtutem intellectualem, quae est prudentia, quia per modum dirigentis: aliter per moralem, quia per modum exequentis et inclinantis in medium. Unde dicit Tullius quod per modum naturae operatur.

ARTICULUS II.

Ad secundum sic proceditur. Et 1. videtur, quod virtutes cardinales ab invicem non distinguuntur. Eorum quae ex opposito dividuntur, unum non ponitur in definitione alterius: sed prudentia est recta ratio quae ponitur in definitione moralium virtutum, ut patet 2 Eth.; ergo morales virtutes a prudentia non distinguuntur.

2. Praeterea, omne peccatum non expellitur nisi per omnem virtutem: sed per justitiam expellitur omne peccatum, ut patet in justificatione impii; ergo ab ipsa aliae virtutes cardinales non distinguuntur.

3. Praeterea, diversarum formarum una non denominat alteram. Non enim dicitur grammatica alba, vel e converso. Virtutum vero harum una denominat alteram; quia secundum Augustinum dicitur justitia prudens, temperans et fortis; ergo non sunt diversae virtutes.

Contra. Habitus distinguuntur secundum actus: sed Augustinus distinguit diversos actus virtutum cardinalium in litera; ergo virtutes cardinales ab invicem distinguuntur.

Praeterea, quae dividuntur ab invicem, distinguuntur: sed secundum sanctos et philosophos, virtutes cardinales dividuntur ab invicem; ergo distinctae sunt.

Respondeo. Dicendum, quod ad virtutes concurrunt diversae conditiones, quarum singulae in certis materiis praecipuam rationem laudis habent. Unde et virtutes quae circa illas materias sunt, ab illis conditionibus nomina sortiuntur; sicut in consiliandis discretio, a qua denominatur prudentia, quae est circa consilia; in actionibus et judiciis et communicationibus rectitudo, a qua sumitur nomen justitiae; in periculis mortis constantia, a qua sumitur fortitudo; in delectationibus carnis modestia, a qua sumitur temperantia. Possunt ergo istae quatuor virtutes sumi dupliciter. Uno modo secundum generales conditiones virtutis quas notant: et sic quaelibet earum est generalis ad omnes virtutes; et ita una non distinguitur ab alia per substantiam habitus. Alio modo, secundum quod concernunt specialem materiam; et sic penes objecta distinguuntur quasi

habitus diversi; secundum quod prudentia est circa consilia, justitia circa communicabilia, fortitudo circa mortis pericula, temperantia circa carnis delectabilia. Primo modo dicuntur virtutes cardinales quasi generales. Secundo quasi principales; quia sunt circa materias in quibus conditiones virtutis praecipue laudem habent.

Ad primum ergo quod objicitur de definitione, dicendum, quod quando aliqua conditio aequaliter recipiunt communis praedicationem, tunc unum non ponitur in definitione alterius; sed quando conditio non aequaliter, sed per prius et posterius recipiunt communis praedicationem, tunc primum ponitur in definitione alterius, sicut substantia in definitione accidentium: et propterea prudentia ponitur in definitione aliarum virtutum, in qua per prius bonum rationis, et per consequens ratio virtutis invenitur; quia prius est quod est per essentiam, quam quod est per participationem.

Ad secundum quod objicitur de justitia, dicendum, quod justitia dicitur dupliciter. Generalis quae complectitur hominis totalem rectitudinem. Secundo modo specialis quae continet rectum ordinem ad proximum principaliter. Prima est generalis ad omnes virtutes, secundum quam dicitur justificari impius. Secunda est specialis.

Ad tertium quod objicitur de denominatione, dicendum, quod forma una alteram denominare potest dupliciter: aut per inhaerentiam, ut albedo superficiem: aut per causam, ut fortitudo dicitur bona, quae in bono expenditur. Hoc modo, quia virtutes connexae sunt, et una coadjuvat alteram ad actum suum denotant sese.

ARTICULUS III.

Ad tertium sic proceditur. Et 1. videtur, quod virtutes morales sint nobis a natura. Damascenus dicit in 3 libro: • Naturales sunt virtutes, et naturaliter et aequaliter insunt hominibus. •

2. Praeterea, secundum Philosophum in 2 Physicorum, • Quae ex principiis naturalibus causantur a natura sunt: • sed ratio est de principiis naturalibus hominis; cum ergo virtutes ex ratione procedant, videtur quod sint naturales.

3. Praeterea, homo est perfectior inter alia animalia: sed aliis animalibus a natura est dispositio ad agendum ea quae eis competunt, sicut hirundini ad faciendum nidum; cum ergo virtutes nihil aliud sint quam inclinationes ad opera convenientia homini; videtur, quod virtutes morales sint homini a natura inditae.

Contra. Secundum Dionysium 4 cap. de Div. nom., • Bona naturalia non amittuntur per peccatum: • sed virtutes amittuntur; ergo non sunt naturales.

Praeterea, Sap. 8 dicitur: • Sobrietatem docet et prudentiam et justitiam et virtutem. Et in eodem dicit: • Non possum esse continens nisi Deus dederit; • ergo non sunt a natura, sed a Deo.

Respondeo. Dicendum, quod quaedam sunt virtutes cardinales quae ordinant in bonum societatis divinae, quod est per gratiam seu gloriam. Et quia hoc bonum est supra facultatem naturae; ideo haec virtutes non a natura, sed a Deo sunt in nobis. Quaedam autem sunt virtutes cardinales quae ordinant in bonum societatis terrenae, quod nostrae naturae commensuratum est. Et de his distinguendum est: quia possunt considerari dupliciter. Se-

cundum esse imperfectum, sive quantum ad earum principia: et sic sunt a natura, quia seminaria virtutum, secundum Philosophum, indita sunt nobis in naturali cognitione et amore boni. Vel secundum esse perfectum sive earum consummationem, et sic sunt in nobis ab assuefactione; et hoc est quod dicit Philosophus in secundo Ethicorum, « Innatis nobis ea suscipere, perfectis vero per assuefactionem. » Et per hoc patet responsio ad auctoritatem Damascenum.

Ad secundum, quod causatur ex ratione, dicendum, quod ratio, ut est natura hominis, non est principium virtutum, sed ratio ut ratio.

Ad tertium quod opponitur de aliis animalibus, dicendum, quod homo, propter hoc quod habet rationem quae est collativa, se habet ad multas operationes quarum ratio est principium; et ideo non potest sufficienter ei provideri secundum aliquod, quod sit penitus naturale; quia natura determinata est ad unum.

ARTICULUS IV.

Ad quartum sic proceditur. Et 1. videtur, quod virtutes morales non consistant in medio. In nullo enim indivisibili est accipere medium et extrema: sed passiones et operationes circa quae sunt virtutes morales, sunt indivisibiles; ergo non sunt in medio.

2. Praeterea, quaedam virtutes morales magis appropinquant alteri extremo quam reliquo; sicut fortis plus assimilatur audaci quam timido, ut dicit Philosophus; ergo, cum medium aequaliter differat ab extremis, virtutes morales non sunt in medio.

3. Praeterea, non est idem medium et extremum. Sed virtus est extremum, quia est ultimum potentiae, ut dicitur principio Caelo et mundi; ergo non est in medio.

Contra. In libro Ethicorum dicit Philosophus quod virtus est habitus in medietate consistens quo ad nos.

Praeterea, sicut se habet ars ad factibilia, sic et virtus ad agibilia: sed ars corrumpitur a superfluo et diminuto; ergo et virtus quae est in medio.

Ad hoc dicendum est, quod virtutes morales sunt circa passiones et operationes directae secundum regulam rationis. In omnibus autem regulatis consistit rectum, secundum quod regulae adaequatur. Aequalitas autem media est inter majus et minus; et ideo oportet quod rectum virtutis consistat in medio ejus quod superabundat, et ejus quod deficit a mensura rationis rectae.

Ad primum ergo dicendum, quod actiones et passiones, quamvis sint indivisibiles per essentiam, sunt tamen per accidens divisibiles, vel secundum tempus vel secundum aliquid hujusmodi; et ideo secundum hoc est in eis medium accipere.

Ad secundum de appropinquatione, dicendum, quod medium dupliciter potest accipi. Vel inter aliqua extrema secundum se, et sic est aequae distans; vel inter extremum comparatione ad aliquam regulam extra, et sic non oportet. Sic enim virtus moralis media est inter superfluum et diminutum, non in se, sed in comparatione ad rationem rectam.

Ad tertium quod virtus est extremum, dicendum, quod virtus formaliter est extremum, quia bonum et perfectum; sed materialiter medium, quia negotiatur circa medium passionum et operationum humanarum.

ARTICULUS V.

Ad quintum sic proceditur. Et 1. videtur, quod virtutes morales non manent in patria. Fides et spes sunt nobiliores quam virtutes morales: sed illae tollentur in patria; ergo multo magis istae.

2. Praeterea, virtutes morales perficiunt in vita activa: sed tunc cessabit activa vita; ergo et ipsae.

3. Praeterea, temperantia est in concupiscibili, fortitudo in irascibili; ergo, cum haec sint partes animae sensitivae, secundum quam anima non est separabilis, non manent in anima separata.

Contra. Haec virtutes fuerunt in Christo, qui tamen erat beatus; ergo manebunt in beatis.

Praeterea, Sap. 1, « Justitia perpetua est et immortalis; » ergo manebit; ergo, cum virtutes sint connexae, etiam aliae manebunt.

Respondeo. Virtutes morales quaedam sunt infusae, quaedam acquisitae. Acquisitae dirigunt in vita civili et habent bonum civile pro fine. Et quia haec civitas non manebit in patria; ideo nec ipsae. Infusae vero dirigunt in vita spirituali, secundum quam homo civis efficitur civitatis Dei. Et quia haec civitas manebit, manebunt et ipsae. Sed istarum duo sunt actus. Quidam circa materiam propriam secundum distantiam a fine, quidam circa ipsum finem; sicut fortis in periculo pugnae exercet actum pugnandi qui est circa materiam propriam, scilicet timores et audacias; post victoriam autem actum gaudendi de victoria. Primus actus adveniente fine evanescit: secundus actus qui est circa ipsum finem, in consequitione finis manebit. Unde gaudet justitia de fine adepto per actus justitiae; et similiter aliae virtutes.

Ad quod objicitur de fide et spe, dicendum, quod quamvis nobiliores sint ratione objecti, tamen habent essentialiter annexam imperfectionem, quam non habent morales.

Ad secundum de vita activa, dicendum, quod virtutes quae perficiunt in vita activa, non oportet quod tollantur, cum aliquis transfert se ad vitam contemplativam; sed habent alios actus, in quantum pertingunt ad finem proximum, quia contemplativa vita est finis activae. Et ideo harum virtutum actus differentes describit Macrobius, secundum earum diversos gradus; scilicet secundum quod politicae vel purgatoriae vel purgati animi.

Ad tertium de irascibili, dicendum, quod ipse potentiae radicaliter manent in anima separata et habitus earum; licet non permaneant ut sunt perfectiones actu corporalium organorum.

Expositio textus.

« In quo habuerunt usus ejusdem. » Virtutes enim quae consistunt circa passiones illatas habuerunt eundem usum in Christo, quem in nobis, propter passibilitatem corporis. Habuerunt etiam usum quem habent in patria propter perfectionem. Sed de virtutibus quae sunt circa passiones innatas secus est; quia istae passiones in Christo non fuerunt. Procedunt enim a corruptione fomitis qui in Christo non fuit; et ideo non fuit necessarium eas per virtutem cohiberi. Unde non habuerunt in eo usum circa passiones, sicut habent in nobis.

DISTINCTIO XXXIV.

Nunc de septem donis etc. (V. edit. nostrae tom. VII, pag. 377.)

QUAESTIO I.

Hic quaeruntur quatuor: 1.^o de differentia donorum et virtutum; 2.^o de numero donorum; 3.^o de differentia doni et beatitudinis; 4.^o utrum dona manent in patria.

ARTICULUS I.

Ad primum sic proceditur. Et 1. videtur, quod dona sint septem virtutes. Gregorius enim dicit in *Moralibus*: « Per septem filios Job septem virtutes intelliguntur, » et enumerat ibi septem dona; ergo dona sunt virtutes.

2. Praeterea, cuiusque convenit definitio, et definitum: sed definitio virtutis praedicator de dono, quia donum est bona qualitas mentis qua recte vivitur, quam Deus in nobis sine nobis operatur, quae est definitio virtutis, secundum Augustinum; ergo dona sunt virtutes.

3. Praeterea, Jac. 1 dicit Glossa, quod per donum perfectum, quod dicitur de sursum descendens, intelliguntur bona gratuita: sed virtutes inter bona gratuita continentur; ergo virtutes sunt dona.

Contra. Dicit Gregorius super Job, quod dantur dona in adiutorium virtutum; ergo non sunt virtutes.

Praeterea, timor ponitur inter septem dona: non tamen potest dici quod sit virtus, quia nec theologica, nec cardinalis; ergo dona non sunt virtutes.

Respondeo. Dicendum, quod circa differentiam donorum et virtutum diversi diversa dixerunt. Quidam namque posuerunt inter ea differentiam per hoc quod dona dicuntur per comparisonem ad Deum dantem virtutes per comparisonem ad actus. Alii per hoc quod virtutes sunt magis in affectiva parte, dona magis in cognitiva. Tertii per hoc quod virtutes sunt ad operandum, dona ad resistendum tentationi. Quarti per hoc quod virtutes expurgant a peccatis, dona a sequelis peccati. Quinti per hoc quod virtutibus conformemur Christo in operatione, donis vero in passione. Sed omnes hac differentiae non videntur sufficientes: quia si recte considerentur omnia quae praedicta sunt, virtutibus et donis conveniunt communiter. Et ideo alii dicunt, quod differunt per hoc quod virtutes dantur ad perfectionem potentiarum, dona vero in adiutorium earum. Perficitur autem unumquodque secundum modum suum: sed adiutorio indiget ad id quod suum modum excedit. Sic ergo differentia doni et virtutis intelligenda est ex diversitate actuum. Nam actus virtutis procedit a potentia secundum modum sibi connaturalem, sicut actus fidei ab intellectu in speculo et aenigmate. Actus vero doni procedit a potentia secundum modum altiore: sicut actus doni intellectus est videre spiritualia in quadam claritate, quod est supra modum nobis connaturalem. Et haec differentia ipsis nominibus competit. Nam virtus est perfectio rei. Donum vero rei superadditur.

Ad primum quod dona sunt virtutes, dicendum, quod hoc pro tanto verum est, quia dirigunt in actibus humanis qui non conveniunt brutis, sicut

et virtutes; sed sunt supra virtutes, in quantum ultra modum humanum perficiunt.

Ad secundum de definitione virtutis, dicendum, quod in omni definitione virtutis, si proprie virtutis est, exprimitur aliquid quod ad modum humanum pertinet; vel in ipso actu ex quo sumitur definitio virtutis intelligitur modus agendi proportionatus homini. Unde nec dicta nec alia definitio convenit donis secundum quod de virtutibus datur.

Ad tertium de donis gratuitis, dicendum, quod non quaelibet virtus gratuita potest dici donum proprie, secundum praedictam rationem doni.

ARTICULUS II.

Ad secundum sic proceditur. Et 1. videtur, quod plura debeant esse dona. Sicut timor est de malo futuro, ita dolor et pudor de malo praeterito et gaudium de liberatione ab ipso; ergo videtur, quod ita debet poni in numero donorum, sicut timor.

2. Praeterea, ad justitiam reducuntur sicut partes, pietas, caritas, amicitia, et sic de aliis; ergo quae ratione pietas ponitur donum, eadem ratione omnes aliae partes justitiae.

3. Praeterea, inter ista dona ponuntur tria, quae pertinent ad executionem; ut pietas et fortitudo et timor: sed fortitudini adjungitur suum motivum, scilicet consilium, pietati vero scientia; ergo timori debet aliquod directivum alterum assignari.

Contra. Videtur quod debeant esse pauciora. Donum, ut dictum est, altius est virtute: sed timor non videtur sonare in aliquam eminentiam; ergo non videtur quod debeat inter dona computari.

Praeterea, non potest species esse altior suo genere, neque aliquid aliud seipso: sed donum est aliquid aliud virtute; cum ergo pietas sit pars justitiae, et fortitudo sit quaedam virtus cardinalis, videtur quod neutra debeat dici donum.

Respondeo. Dicendum, quod virtus et donum conveniunt in materia, differunt autem in modo agendi, sicut dictum est. Unde secundum diversitatem materialium, in quibus virtutes operantur, oportet diversitatem donorum accipere. Operatio autem virtutis est, aut circa vitam activam, aut circa contemplativam. Circa contemplativam dupliciter. Uno modo accipiendo alienius cognitionem; et sic est donum intellectus. Alio modo iudicando de cognitis, et sic est donum sapientiae. Circa activam vero dupliciter. Uno modo dirigendo per actum rationis; et sic quantum ad inquisitionem, est donum consilii; quantum ad iudicium de consiliatis est donum scientiae. Alio modo exequendo; et sic quantum ad operationes et communicationes vitae est donum pietatis, quantum vero ad passiones irascibilis est donum fortitudinis, quantum autem ad passiones concupiscibilis est donum timoris, quo omnes carnales concupiscentiae reprimuntur: secundum illud Psal 118: « Confige timore tuo carnes meas. »

Ad primum quod objicitur de pudore, dolore et gaudio, dicendum, quod non est simile: quia dolor et pudor incipientium est, sed gaudium perfectorum; ideo illa duo sunt effectus virtutum, sed gaudium fructus est. Dona vero magis proficientium: et ad profectum valet timor.

Ad secundum quod objicitur de partibus justitiae, dicendum, quod donum elevat ad id hominem, quod est supra se; ideo convenienter donum respondens justitiae ex parte illa justitiae sumitur

quae ei, quod maxime supremum est, debetur. Huiusmodi autem est pietas quae debetur Deo et patri carnali vel patriae.

Ad tertium, quod obijcitur de timore, dicendum, quod idem est directivum in recessu a termino et in accessu ad alium terminum; ideo timor, qui sonat in recessu a termino, non habet aliquod speciale directivum, quam quae dirigunt in aliis exequentibus, scilicet fortitudine, pietate, quae pertinent ad accessum ad terminum.

Ad quartum dicendum, quod timor sonat in quamdam subjectionem hominis ad Deum. Quanto autem magis creatura creatori subijcitur, tanto major est; et ideo timor in excellentiam sonat, secundum quod importat reverentiam ad Deum. Sic enim maxime donum Dei est.

Ad quintum dicendum, quod pietas quae est donum est supra justitiam et supra omnes partes ejus. Unde non est idem cum pietate quae est virtus, ut infra patebit.

ARTICULUS III.

Ad tertium sic proceditur. Et 1. videtur, quod donum sit idem quod beatitudo. Omne enim quod a Deo datum est, potest dici donatum: sed beatitudo est aliquid a Deo collatum; ergo est donum.

2. Praeterea, secundum Philosophum in libro Physicorum, non est devenire a primo ad ultimum nisi per medium. Dona autem a Magistris ponuntur media inter virtutes et beatitudines; cum ergo beatitudines dicantur virtutes a sanctis; ergo sunt dona.

3. Praeterea, virtus perfecta beatificat, quia felicitas, secundum Philosophum, est operatio virtutis perfectae: sed donum est virtus perfecta, propter perfectiorem modum agendi; ergo donum beatificat. Sed nihil beatificat nisi beatitudo; ergo donum est beatitudo.

Contra. Operatio et habitus, quod est principium ejus, differunt per essentiam: sed sic se habent beatitudo ad donum, ut patet per auctoritatem Philosophi allegatam; ergo beatitudo non est donum.

Praeterea, quod potest esse sine altero, non est idem cum eo: sed donum potest esse sine beatitudine, ut virtus sine operatione, ut patet in dormiente; ergo beatitudo non est donum.

Respondeo. Secundum Philosophum felicitas est operatio virtutis perfectae. Beatitudo autem idem est quod felicitas; ideo est operatio perfectae virtutis. Nulla autem virtus est perfectior dono; ergo felicitas est operatio doni. Fructus autem est delectatio consequens ex ipsa operatione; sive ipsa virtus, prout causa vel ratio delectationis. Secundum enim Philosophum omnis operatio procedens ex habitu perficiente naturam habet delectationem annexam.

Ad quod obijcitur, quod est a Deo datum, dicitur donum, dicendum, quod verum est large sumendo donum: sed stricte dicitur donum habitus infusus elevans potentiam ad altiorem modum agendi; et sic septem enumeratis habitibus convenit ratio doni.

Ad secundum quod beatitudines dicuntur virtutes, dicendum, quod eo modo loquendi hoc dicitur, ut virtus dicitur actus virtutis, et non proprie.

Ad tertium, quod donum beatificat, dicendum, quod aliquid dicitur beatificare in via dupliciter.

Uno modo ut principium actus; et sic donum beatificat. Alio modo ut ipse actus; et sic beatitudo beatificat, sicut movemur motu et virtute motiva.

ARTICULUS IV.

Ad quartum sic proceditur. Et 1. videtur, quod dona non maneat in patria. 1 ad Cor. 13: «Scientia destruetur,» dicit Glossa: «Ipsa etiam docet conservari in medio pravae et perversae rationis, quod in patria penitus non erit;» ergo nec donum scientiae.

2. Praeterea, timor est ad retrahendum a malo: sed in patria omne malum cessabit; ergo non erit ibi timor.

3. Praeterea, pietas est ad compatiendum miseriae proximi: sed in patria non erit miseria, nec compassio; ergo nec pietas.

Contra. Christus fuit simul viator et comprehensor: sed in Christo fuerunt dona excellentissime, licet esset comprehensor; ergo similiter in aliis comprehensoribus erant.

Praeterea, dicit Ambrosius: «Caelestis patria flumine Spiritus sancti rigatur, septem spiritualium virtutum, id est septem donorum fluens meatu;» ergo dona erunt in patria.

Respondeo. Dicendum, quod donum, cum agat altiori modo quam sit modus humanus, accipit suae actionis regulam et mensuram altiorem, scilicet divinam. Possunt autem actus donorum considerari dupliciter. Uno modo secundum quod comparantur ad propriam mensuram quae Deus est; et sic actus omnium manebunt in patria. Alio modo secundum quod comparantur ad materiam propriam; et sic actus donorum qui perficiunt in vita contemplativa manebunt, sed assument perfectiorem modum; quia modus vitae hujus, quantumcumque sit perfectus, non potest adaequari modo patriae. Actus vero donorum perficientium in vita activa, non manebunt secundum hunc modum. Vita enim activa tolletur, sed contemplativa manebit. Et per haec patet solutio ad objecta.

Et quia de timore etc. (V. edit. nostrae tom. VII, pag. 378.)

QUAESTIO II.

ARTICULUS I.

Hic primo quaeritur. Et 1. videtur, quod timor filialis non sit idem in substantia cum servili. Habitus enim distinguuntur secundum objecta: sed aliud est objectum timoris servilis et filialis; quia timor servilis timet poenam, filialis separationem; ergo timor servilis et filialis sunt diversi habitus.

2. Praeterea, plus distat a perfectione doni timor servilis quam virtus, quae cum gratia esse potest. Sed virtus differt secundum habitum a timore filiali, qui est donum; ergo multo amplius et timor servilis.

3. Praeterea, omnis timor ex aliquo amore procedit. Nullus enim timet amittere nisi quod amat: sed timor servilis procedit ex amore sui, timor autem filialis ex amore Dei: cum ergo hi duo amores sint omnino diversi, timor servilis et filialis differunt secundum substantiam habitus.

Sed contra. Sicut se habet habitus fidei informis ad fidem formatam, ita timor servilis ad filia-

lem. Sed fides formata et informis, non differunt secundum substantiam habitus; ergo nec timor servilis et filialis.

Praeterea, timor servilis timet poenam: sed separatio a Deo quam timet et filialis timor est quaedam poena; ergo timor servilis non differt a filiali secundum substantiam habitus.

Respondeo. Dicendum, quod timor et tristitia diversimode respiciant malum. Tristitia enim respicit malum, prout est praesens in seipso; sed timor prout est futurum in causa sua existens. Unde timor non respicit malum nisi mediante causa, a qua potest malum provenire; sicut timeo mortem, propter eum qui potest mortem inferre. Timor autem, qui est ex Spiritu sancto, facit hominem respicere ad Deum sicut ad causam quae potest malum infligere vel prohibere, quodcumque sit malum illud: et ideo quamvis timor filialis et servilis diversa mala respiciant, tamen quia non nisi ab eadem causa, ideo est unus habitus secundum substantiam: sed unus perfectus, scilicet filialis qui perfectius conjungit Deo, alter imperfectus, scilicet servilis qui imperfectus.

Ad primum ergo dicendum, quod ratio illa procederet, si timor quem Spiritus sanctus in nobis operatur, principaliter ordinaret nos in hoc quod odit malum. Ordinatur autem nos principaliter in Deum, quem facit nos revereri tam secundum servilem, quam secundum filialem timorem.

Ad secundum dicendum, quod virtus minus distat a dono timoris filialis quam servilis, considerata perfectione et imperfectione, non autem considerata actu et objecto.

Ad tertium dicendum, quod amor est principium timoris, secundum quod habet respectum ad malum quod horret, non autem secundum quod habet respectum ad causam mali.

ARTICULUS II.

Ad secundum sic proceditur. Et 1. videtur, quod timor servilis tollatur adveniente charitate. Dicitur enim 1 Job 4, quod timor non est in charitate: quod exponitur de timore servili; ergo timor servilis non manet charitate adveniente.

2. Praeterea, a timore servili denominatur aliquis servus: sed ille qui habet charitatem jam non est servus sed filius, secundum illud Rom. 8: « Non enim accepistis spiritum servitutis iterum in timore etc. » ergo adveniente charitate timor servilis recedit.

3. Timor servilis odit praesentiam ejus quem timet. Respicit enim Deum ut punientem: sed charitas facit praesentiam Dei amari; ergo timor servilis charitati opponitur; et ita adveniente charitate timor servilis recedit.

Sed contra. Timor servilis a Spiritu sancto est, ut habetur in Glossa, Rom. 8, super illud: « Non enim accepistis etc. » Sed dona Spiritus sancti non sunt sibi ipsis contraria; ergo charitate adveniente, quam Spiritus sanctus operatur, timor servilis non tollitur.

Praeterea, timor servilis a fide informi principium sumit, filialis vero a fide formata: sed fides informis non tollitur secundum substantiam charitate adveniente; ergo nec timor servilis.

Respondeo. Dicendum, quod timor servilis adveniente charitate non tollitur secundum substan-

tiam, sed tollitur ejus imperfectio, sive servilitas quam habet oculus principaliter ad poenam. Et hoc ideo, quia timor respicit sicut principale objectum, unde speciem habet, Deum ut potentem mala inferre, vel a malis liberare. Et propter hoc, quantumcumque varietur respectus timoris secundum mala, quae Deus potest inferre vel prohibere, talis variatio non attingit ad speciem timoris, sed consequitur speciem; et ideo per hoc non tollitur substantia habitus, sed formatur eum prius esset informis. Quod enim ad hoc vel illud malum respiciat timor, provenit ex diversa affectione amoris, ut supra dictum est: et propter hoc charitate adveniente quae est amor perfectus, timor formatur et perficitur. Et per hoc patet solutio ad primas rationes. Procedunt enim de timore servili ratione suae servilitatis.

ARTICULUS III.

Ad tertium sic proceditur. Et 1. videtur, quod fortitudo donum, non differat a fortitudine quae est virtus. Secundum Dionysium in *Caelest. hierarch.*, « Spiritualium proprietates ex nominibus nos oportet accipere: » sed habitus virtutis et donum, communicant in fortitudinis nomine; ergo communicant in proprietate; ergo habent identitatem.

2. Praeterea, Gregorius dicit, « fortitudo contra adversa dat fiduciam trepidanti, » et loquitur de fortitudine dono: sed hoc facit fortitudo virtus; ergo fortitudo virtus est donum.

3. Praeterea, donum differt a virtute in quantum ipsam excedit: sed fortitudinis virtus, cum sit circa difficillimum, quod est mors, non potest excedi ab aliquo; ergo donum fortitudinis non differt a fortitudine quae est virtus.

Contra. Diversorum generum et non subalternativum positorum diversae sunt species et differentiae: sed donum et virtus sunt hujusmodi genera; ergo fortitudo quae est in genere doni, differt a fortitudine quae est in genere virtutis.

Praeterea, secundum Augustinum, fortitudinis est non tantum terrenas cupiditates repellere, sed penitus oblivisci: hoc autem non est fortitudinis virtutis, quia cupiditates non sunt materia ejus; ergo fortitudo virtus, non est fortitudo donum; ergo non sunt idem.

Respondeo. Dicendum, quod fortitudo virtus et fortitudo donum, differunt quantum ad modum agendi: quia altiori regula regulatur, scilicet divina potentia, fortitudo donum, quam fortitudo virtus, quae regulatur potentia humana. Unde dicit Philosophus in 5 Eth., quod fortis est instupefactibilis, ut homo in his, scilicet terribilibus, quae sunt secundum hominem. Unde quamvis non esset fortitudinis virtutis, quod aggredere quisquam aliquid super humanas vires, secundum philosophum, ut quod aliquis martyr nudus ingeneret se in manus hostium, tamen hoc est fortitudinis doni, secundum theologum.

Ad quod objicitur de nomine, dicendum, quod fortitudo donum et virtus, sicut conveniunt in nomine, sic in aliqua proprietate; quia utrumque est ad aliquid difficile sustinendum. Sed non oportet quod sint idem in re, cum in agendo diversis regulis regulentur.

Ad secundum quod objicitur de verbo Gregorii, dicendum, quod fortitudo virtus, dat fiduciam

trepidanti in trepidatione causata ex difficultate non excedente humanas vires; seu si excedat, contra talem trepidationem dat confidentiam fortitudo donum, ex fiducia divini auxilii.

Ad tertium quod objicitur quod virtus fortitudinis est circa difficillimum, dicendum, quod hoc verum est secundum genus, non tamen secundum comparisonem ad operantem, quia non excedit vires ejus. Sed fortitudinis donum, est circa illa quae excedunt humanam facultatem, quamvis non divinam potentiam cui innititur.

ARTICULUS IV.

Ad quartum sic proceditur. Et 1. videtur, quod pietas non sit donum. Donum enim immediatius ordinat ad Deum quam virtus: sed pietas donum non immediatius ordinat in Deum quam pietas quae est virtus, quia secundum Augustinum, 10 de civitate Dei. Pietas proprie Dei cultus solet intelligi, quam graeci Theosebiam vocant; ergo pietas non est donum.

2. Praeterea, secundum Gregorium in principio Moral., Pietas est quae docet opera misericordiae frequentare: hoc autem est actus misericordiae: ergo pietas est idem cum misericordia: misericordia autem est virtus: ergo et pietas: virtus autem non est donum; ergo nec pietas.

3. Praeterea, pietas, secundum Tullium, est benevolentia in parentes: et ponit eam partem justitiae: sed justitia est virtus; ergo et pietas; ergo non est donum.

Contra est quod dicitur Isa. 11: ibi enim inter dona computatur.

Praeterea, donum est perfectio excellentissima: sed pietas est hujusmodi, quia valet ad omnia, ut dicitur 1 Tim. 4: ergo pietas maxime debet poni donum.

Respondeo, quod donum in communicationibus, alius dirigit quam aliqua alia virtus, quia secundum divinam regulam. Communicatio autem quae fit alicui propter Deum, dicitur opus pietatis; et ideo donum quod hanc communicationem propter Deum facit, congrue nominatur nomine pietatis.

Ad primum quod objicitur, quod donum immediatius ordinat in Deum, dicendum, quod hoc verum est, quantum ad modum operandi, sive mensuram operis; non autem quantum ad objectum vel finem. Et ideo licet pietas, quae est latria, ipsi Deo exhibeatur, in hoc tamen accipit aliquid humanum pro mensura, scilicet obligationem qua Deo obligatur propter beneficium acceptum, ratione cuius est debitor ei. Sed pietas quae est donum, in hoc accipit aliquid divinum pro mensura, ut scilicet Deo honorem impendat, non quia sit ei debitor, sed quia Deus honore dignus est. Unde in honorando Deum accipit pro mensura Dei dignitatem.

Ad secundum dicendum, quod differenter est misericordiae et pietatis opera alicui impendere. Misericordiae enim est, in quantum mensuratur mensura aliqua humana in actu suo: scilicet vel conjunctione sanguinis, vel familiaritate, vel saltem naturae similitudine. Sed pietatis donum est, in quantum regulatur divina regula in actu suo; vel quia quilibet misericordiae opera impendentes sunt Filii Dei, vel divina similitudine insigniti.

Ad tertium dicendum, de verbo Tullii, quod pietas in parentes, in quantum accipit mensuram

aliquid humanum, est virtus: in quantum autem aliquid divinum, sic est donum.

Expositio textus.

• Sic timor malus est. • Ergo quaecumque timetur carnis periculum sive amissio temporalis boni, timor peccatum est.

Respondeo. Non, nisi sit inordinatus: ex eo enim quod mala times, corrigis te.

Contra. Secundum Augustinum, in timore servili manet voluntas peccandi.

Respondeo. Verum est, non absoluta sed conditionata.

• Sciendum quod uterque timor. •

Contra. Principium nobilius est principiato: timor autem ignobilis donum est, quam sapientia.

Respondeo. Non dicitur ejus principium causaliter, sed dispositive.

DISTINCTIO XXXV.

Post praemissa diligenter considerandum est etc. (V. edit. nostrae tom. VII, pag. 400.)

QUAESTIO UNICA.

ARTICULUS I.

Hic primo quaeritur, utrum sapientia sit donum. Et 1. videtur, quod non. Cognitio enim divinarum in praesenti non habetur nisi per speculum et in aenigmate. 1 ad Cor. 13: • Videmus nunc per speculum etc.: • haec autem est cognitio fidei; ergo omnis cognitio viae de divinis est fides: ergo sapientia est fides, et sic virtus et non donum.

2. Praeterea, sapientia per studium acquiritur: nullum autem donum acquiritur; ergo sapientia non est donum.

Contra. Isa. 11 computatur inter alia dona.

Praeterea, donum est habitus nobilissimus: sed inter omnes habitus rationis, sapientia videtur nobilissima; ergo sapientia maxime debet dici donum.

Respondeo. Dicendum, quod sapiens in singulis dicitur ille, qui per cognitionem altissimae causae quam habet, scilicet finalem, de omnibus quae sunt in illo genere optime judicat. Unde et sapiens simpliciter est, qui per cognitionem quam habet de Deo, qui est omnium finis, de rebus recte judicat. Quod potest esse dupliciter. Uno modo secundum simplicem notitiam: et sic aliquis potest dici sapiens etiam si sit malus. Alio modo secundum notitiam affectivam; quae procedit ex hoc, quod homo per affectum amoris Deo unitur, sicut dicit Dionysius de Hierotheo, quod patiendo divina didicit divina; sicut etiam temperatus de his quae ad temperantiam pertinent optimum iudicium habet. Et talis sapientia ponitur hic donum Spiritus sancti, secundum quam spiritualis judicat omnia, ut habetur 1 Corinth. 2.

Ad primum ergo quod objicitur de speculo, dicendum, quod hoc habet locum in cognitione simplici quae est quasi per visum vel auditum, non experimentalis, quae est quasi gustus, de qua dicitur 1 Joan. 5: • Unctio docet vos de omnibus. •

Ad secundum de sapientia acquisita, dicendum, quod aequivoce accipit sapientiam philosophus et theologus, sicut dictum est.

ARTICULUS II.

Ad secundum sic proceditur. Et 1. videtur, quod intellectus non sit donum. Nullum enim donum est natura per aliquod lumen insitum nobis; sed intellectus nobis naturaliter insitus est; ergo intellectus non est donum.

2. Praeterea, dona gratuita dantur per gratiam; sed intellectus quandoque major est in habentibus minorem gratiam vel nullam; ergo non est donum gratuitum.

3. Praeterea, secundum Philosophum, 6 Eth., sapientia et intellectus virtutes sunt intellectuales; nulla autem virtus est donum; ergo intellectus non est donum.

Contra. Isa. 11, numeratur inter septem dona.

Praeterea, donorum propria est ratio, ut per ea quis super humanum modum operetur: sed operatio intellectus est praecipue super hominem, ut dicitur in Ethicis; ergo intellectus maxime debet dici donum.

Respondeo. Dicendum, quod invisibilia Dei dupliciter cognosci possunt a nobis. Uno modo per considerationem divinarum effectuum: et sic per fidem ea cognoscimus, quae divinis verbis assentit, in quibus nobis divina traduntur per comparationem ad divinos effectus. Et ideo de visione fidei dicitur 1 Cor. 13: « Videmus nunc per speculum » in aenigmate. » Alio modo cognoscuntur transcendendo omnes Dei effectus, secundum quod omnibus quae videntur vel dicuntur, Deus cognoscitur praeminere: et hoc proprie dicitur intelligere divina, quasi intrinsecus ad ea penetrare: et hoc contingit dupliciter. Uno modo videndo ea per essentiam: et sic intelligunt beati. Alio modo videndo solum de eis quid non sunt, non autem quid sunt, per aliquod lumen infusum: et sic intelliguntur in via, et ita intellectus ponitur donum Spiritus sancti, secundum illud Apostoli 2 Cor. 4: « Non » contemplantibus nobis quae videntur, sed quae non » videntur. »

Ad primum quod objicitur, quod intellectus est nobis naturaliter insitus, dicendum, quod hoc verum est, prout est habitus principiorum; et sic non est donum; sed prout per lumen supremum facit in se conspiciere spiritualia, et sic non est vobis insitus, sed potius infusus, et sic est donum.

Ad secundum quod objicitur de dono gratuito, dicendum, quod intellectus aequivoce accipitur pro habitu acquisito et pro perspicacitate ingenii naturalis, et sic est in malis; et pro habitu infuso, et sic est in sanctis viris.

Ad tertium, quod sapientia et intellectus virtutes sunt intellectuales, dicendum, quod loquitur de intellectu qui est habitus acquisitus, non infusus, per illustrationem luminis naturalis, non supernaturalis.

ARTICULUS III.

Ad tertium sic proceditur. Et 1. videtur, quod consilium non sit donum. Quia secundum Tullium, consilium est alicujus faciendi vel non faciendi vere excogitata ratio: sed hujusmodi excogitata ratio a natura est, non a gratia; ergo non est donum gratuitum.

2. Praeterea, Gregorius: « Spiritus sanctus contra » praecipitationem, mentem instruit consilio: » sed

hoc pertinet ad cautelam quae est prudentiae; ergo consilium est virtus et non donum.

3. Praeterea, dona se extendunt ad illa quae sunt de necessitate salutis: sed consilium, secundum quod communiter dicitur, dirigit in his quae sunt perfectionis non necessitatis; ergo consilium non est donum.

Sed contra. Isa. 11 inter dona computatur.

Praeterea, virtutibus respondent dona. Sed quaedam virtus est ordinata ad bene consiliandum, scilicet eubulia, de qua Philosophus in 6 Ethic., determinat; ergo videtur quod debeat esse aliquod donum, quod perficiat nos ad recte consiliandum. Hoc autem est consilium; ergo est donum.

Respondeo. Dicendum, quod secundum Philosophum in 3 Ethic., consilium est quaestio de operabilibus a nobis: et ideo non est de fine, qui est principium in operandis, sicut nec in aliis scientiis est quaestio de principiis illius scientiae. In his autem quae sunt ad finem recte quis consiliatur, secundum Philosophum, si debitum finem praestituat, si media accommodata ad finem inveniat, si tempore convenienti consilium perficiat, ne tempus agendi per moram transeat; et ad hanc certitudinem consilii perducit eubulia, ut dicit Philosophus in 6 Ethic. Sed quia operabilia humana contingentia sunt et possunt deficere ne ad finem intentum perducant per quae homo consiliatur, ideo certitudinem consilii attingere non est humanum sed divinum, cujus est per certitudinem eventus contingentium praevidere; et ideo oportet quod ad hanc certitudinem, mens instinctu Spiritus sancti elevetur, supra humanum modum, ad quem non potest rationis dictamine; et ideo consilium est donum.

Ad illud quod primo objicitur de Tullio; dicendum, quod loquitur de consilio, prout est actus naturalis rationis, non prout est habitus infusus a Deo.

Ad secundum de cautela, dicendum, quod cavere praecipitationem ex dictamine rationis, hoc est cautelae virtutis. Sed ex instinctu Spiritus sancti, quo filii Dei aguntur, Rom. 8, est consilii donum.

Ad tertium quod consilium dirigit in his quae necessitatis sunt, dicendum, quod quamvis in arduis, ad quae omnes non tenentur, praecipue sit donum consilii, secundum quod Philosophus in 3 Ethic. ait, « consilium adhibetur in difficultibus, in quibus nobis » non credimus, » nihilominus potest esse in aliis.

ARTICULUS IV.

Ad quartum sic proceditur. Et 1. videtur, quod donum scientiae non sit tantum de his humanis, sed etiam de divinis. Est enim, secundum Augustinum, de quibus fides saluberrima gignitur, nutritur et roboratur: sed hujusmodi sunt divina; ergo scientia est de divinis.

2. Praeterea, altior est scientia donum, quam scientia quae est virtus intellectualis: sed illa etiam est de divinis, sicut metaphysica; ergo multo magis scientia donum.

3. Praeterea, caput est conforme membri: sed sapientia quae est de divinis, ut metaphysica, dicitur caput scientiarum; ergo et scientia de divinis est.

Contra. Augustinus dividit sapientiam a scientia per hoc, quod sapientia est de divinis, et scientia de humanis.

Praeterea, ad idem non sunt necessarii duo ha-

bitus, si unus perfecte perficiat. Sed ad divina perfecte ordinat sapientia; ergo scientia non est divinorum.

Respondeo. Duorum dividendum aliquod commune, illud quod differentiam dignitatis super rationem communis addit, nomen proprium ex illa differentia accipit. Quod autem nullam differentiam dignitatis addit, nomen commune retinet. Sicut patet in proprio et definitione: quia proprium essenziale dicitur definitio: proprium vero accidentale vocatur nomine communi, scilicet proprium. Et ideo quia sapientia est, quae de altissimis super scientiam addit iudicium, et aliarum scientiarum ordinationem, proprium nomen habet, propter quod sapientia dicitur: aliae vero scientiae quae ei subduntur, cum nullam differentiam dignitatis superaddant, simpliciter nomen scientiae retinent. Et ideo ex ratione sui nominis apparet quod sapientia est de divinis, cum illa sint digniora, et non scientia, sive loquamur de scientia secundum quod est virtus intellectualis, sive secundum quod est donum.

Ad primum, scientia est de his quibus fides saluberrima etc., dicendum, quod humana ducunt in cognitionem divinorum. Et ideo Augustinus dicit, quod scientia est de rebus humanis; non tamen de omnibus, sed de his quibus fides gignitur.

Ad secundum, quod altior est scientia donum, dicendum, quod altior est quo ad modum, quia ex praesentia Spiritus sancti certitudinaliter de agentis iudicat, sed ex conjecturis quibusdam prudentia, secundum quod dicitur Sap. 9: « Cogitationes mortaliū timidāe, et incertae providentiae nostrae. » Sed metaphysica ex universalibus principiis certitudinaliter de aliis scientiis iudicat. Sed non quo ad objectum scientia donum, altior est metaphysica, quia scientia donum, de humanis rebus, metaphysica autem est de rebus divinis.

Ad tertium, quod sapientia est caput scientiarum, dicendum, quod metaphorica est loquutio. Secundum autem Dionysium, ex similitudinariis loquutionibus non est argumentandum.

Expositio textus.

« Quo fides saluberrima gignitur. » Hoc intelligitur quantum ad distinctionem articulorum sive quantum ad exhortationem ad fidem, secundum quod fides est ex auditu, non quantum ad habitum fidei qui est ex infusione. « Abstinere vero a malis, etc. ». Hoc est timoris sicut exequentis, scientiae sicut dirigentis.

DISTINCTIO XXXVI.

Solet etiam quaeri. etc. (V. edit. nostrae tom. VII, pag. 413.)

QUAESTIO UNICA.

ARTICULUS I.

Hic primo quaeritur, utrum virtutes politicae sint connexae. Et 1. videtur quod non. Virtutes enim politicae ex actibus acquiruntur, ut probat Philosophus in 2 Ethic.: sed actus non sunt connexi; ergo nec politicae virtutes.

2. Praeterea, secundum Philosophum in 4 Ethic., sicut prudentia omnes virtutes morales, ita sapientia. S. Th. Opera omnia. V. 22.

tia ordinat omnes scientias quasi caput scientiarum, ut dicitur in 6 Ethic.: sed propter hoc scientiae non connexae sunt; ergo nec virtutes.

5. Praeterea, secundum Philosophum in 4 Eth., qui circa honores mediocres moderate se habet, non est magnanimus: constat autem quod est virtuosus secundum aliam virtutem quam ipse dicit innominatam; ergo una virtus potest haberi non habita alia.

4. Praeterea, Augustinus dicit ad Hieron., quod non est divina sententia qua dicitur, qui habet unam habet omnes; ergo, cum omnis vera sententia divina sit, secundum Ambrosium, « Omne verum a quo cumque dicatur, a Spiritu sancto est, » videtur quod non sit vera sententia.

Contra. Hieronymus ad Pammachium: « Quatuor virtutes describunt Stoici, ita sibi connexas, ut qui unam non habuit omnibus careat, et qui unam habuerit omnes habeat; » ergo omnes virtutes sunt connexae.

Praeterea, species infert genus; ergo iustitia infert virtutem; ergo quicumque est iustus, est virtuosus; ergo omni virtute plenus.

Respondeo. Virtus potest dupliciter considerari. Uno modo secundum esse ipsius imperfectum, secundum quod inest nobis a natura secundum quod dicit Philosophus, quod seminaria virtutum insunt nobis a natura: et sic virtus dicitur quaedam naturalis inclinatio ad actum virtutis: et hoc modo una potest haberi sine alia, cum naturaliter aliqui apti sint ad liberalitatem qui sunt praeconi ad luxuriam ex natura suae complexionis. Alio modo consideratur virtus secundum esse perfectum, quod ex assuetudine recipit, et sic accipit nomen politicae virtutis; et hoc modo omnes virtutes sunt connexae. Ad quod triplex ratio ex philosophorum dictis accipitur. Prima quidem sumitur ex ordine virtutis ad prudentiam. Nulla enim virtus sine prudentia esse potest, per quam virtus quaelibet in finem suum tendit per debita media, quae prudentia consiliando adinvenit. Unde dicit Gregorius quod nisi virtutes reliquae ea quae appetunt prudenter agant, virtutes nequaquam esse possunt. Similiter nec prudentia, cum sit recta ratio agibilium, potest esse sine virtutibus aliis moralibus per quas habemus rectam aestimationem de fine, qui est principium operabilium: quia qualis unusquisque est secundum habitum, talis finis videtur ei; sicut aliquis errans circa principia speculativa perverse ratiocinatur. Secunda ratio sumitur a conditionibus, quas communiter in omni virtute oportet esse. Unde Seneca dicit: « Omne quod bene fit, iuste, fortiter, prudenter temperateque fieri. » quamvis unamquamque quaelibet virtus principaliter sibi vendicet: propter quod illius conditionis causa est in quolibet alia virtute; quia secundum Philosophum, illud quod est maximum in quolibet genere, est causa aliorum. Unde fortis, qui est circa maxima difficilia perseverans, facile in aliis difficultatibus minoribus perseverat. Tertia ratio sumitur ex fine quem intendit quaelibet virtus. Quaelibet enim virtus operatur propter bonum virtutis simpliciter quod principaliter intendit; ideo nullo modo ab ipso intentionem deflectit. Unde virtus non potest esse cum aliquo vitio.

Ad primum quod objicitur, quod actus non sunt connexi, dicendum, quod verum est quantum ad materiam, cum possit se aliquis exercere, ita in actu alienius virtutis, quod non alterius: non tamen

quantum ad formam quam imponit ratio circa actum cuiuslibet virtutis, quia ex eisdem principiis procedit circa materiam cuiuslibet virtutis, scilicet ex intentione et dilectione proprii boni; quamvis ejus bonum, scilicet rationis, quantum ad aliquam conditionem magis reluceat in aliqua virtute quam in alia, sicut jam dictum est.

Ad secundum de prudentia et sapientia, dicendum, quod non est simile; quia scientiæ aliae addunt principia specialia ad principia communia sapientiæ: sed non sic virtutes super principia prudentiæ, cum eadem sint principia illius et aliarum virtutum, secundum Philosophum. Fines moralium virtutum qui se habent ut principia, in practicis sunt principia prudentiæ et aliarum virtutum.

Ad tertium, quod objicitur de magnanimitate, dicendum, quod qui moderate se habet circa mediocres honores, quamvis non habeat semper actum magnanimitatis, quod ejus materia non sibi competit, habet tamen habitum, quo etiam circa illa optime se haberet si materia illa sibi competeret: et sic est de liberali et magnifico.

Ad quartum dicendum, quod ab Augustino negatur esse divina sententia. Qui habet unam, habet omnes, dicendum, quod hoc est, quia non est ex sacra Scriptura prolata, propter quod necesse sit ei consentire.

ARTICULUS II.

Ad secundum sic proceditur. Et 1. videtur, quod virtutes gratiæ non sint connexæ. Christus habuit omnes virtutes cui tamen defuit fides et spes: in peccatoribus etiam est fides in quibus non est charitas; ergo una virtus potest haberi sine altera.

2. Praeterea, perseverantia est quaedam virtus: sed multi habent virtutes aliquas in quibus non perseverant; ergo una virtus potest haberi sine alia.

3. Praeterea, conjugati et innocentes possunt habere castitatem sine virginitate et poenitentia; ergo non est necessarium, quod qui habet unam, habeat omnes.

Contra. Gregorius: « Virtus vera non est, si cum aliis mixta non est; » ergo connexio est in virtutibus veris.

Praeterea, ut dicit Augustinus in litera, virtus est charitas qua diligitur quod diligendum est; ergo qui charitatem non habet, nullam virtutem habet, quia non diligit quod diligere debet. Qui vero charitatem habet, omnem virtutem habet, quia diligit omne quod diligendum est; ergo virtutes gratiæ, ita connexæ sunt, quod qui habet unam, habet omnes.

Respondeo. Ex tribus sumitur ratio quare virtutes sunt annexæ. Primo ex parte charitatis quæ est forma virtutum, quæ est una. Secundo ex parte gratiæ, quæ est radix virtutum, quæ est una. Tertio ex parte efficientis, idest Dei, a quo impium est dimidiâ sperare veniam, ut Sancti dicunt, qui nihil imperfectum relinquunt. Unde quando aliquem justificat, omnes virtutes ei simul infundit.

Ad primum de Christo et aliis hominibus, dicendum, quod Christus erat non purus viator, sed comprehensor; et ideo virtutes, scilicet fides, spes, quæ habent imperfectionem annexam, quæ non compatiuntur secum statum perfectionis, sive comprehensionis, non fuerunt in Christo. Connexio autem virtutum intelligitur esse in statu viæ, qui est

status imperfectionis. In aliis autem hominibus quamvis sint fides et spes non tamen habent rationem virtutis, quia sunt sine charitate, a qua est omnis ratio virtutis, secundum theologum, quia per eam habent assequi finem virtutis, qui est beatitudo.

Ad secundum de perseverantia, dicendum, quod uno modo est specialis virtus, secundum quod dicit propositum persistendi ut non recedat quis a ratione recta propter tristitias, sive a virtute, ut dicitur 7 Eth.; et sic est simul de necessitate cum aliis virtutibus. Alio modo est quoddam accidens virtutum, secundum quod dicit ipsarum continuationem usque in finem; et sic non est necessarium quod sit simul cum aliis virtutibus.

Ad tertium de poenitentia et virginitate, dicendum, quod poenitentia super essentiam virtutis, quæ consistit in peccati detestatione, addit accidens quoddam, scilicet dolorem de peccato commisso. Quantum ergo ad primum est in innocente, quamvis non quantum ad secundum. Similiter est de virginitate dicendum, quæ præter essentiam virtutis, quæ consistit in abstinencia a licito coitu, addit accidens quoddam, scilicet propositum perpetuæ integritatis. Quantum ad primum est in conjugato, quamvis non quantum ad secundum.

ARTICULUS III.

Ad tertium sic proceditur. Et 1. videtur, quod virtutes non sunt æquales. 1 Cor. 13 dicitur, quod charitas major est fide et spe: sed quælibet harum est virtus; ergo una virtus est major alia.

2. Praeterea, quantitas virtutis objecto mensuratur: sed una virtus ad plura objecta se extendit quam alia; ergo una virtus est major alia.

3. Praeterea, habitus est ad actus habilitare: sed homo quandoque est magis habilis ad actus unius virtutis quam ad actus alterius; ergo habet unam virtutem magis intensam quam aliam.

Contra. quæcumque simul et ab eadem causa æqualiter causantur simul augmentantur et minuantur: sed virtutes a gratia eadem omnes simul causantur; ergo simul augmentantur et minuantur; ergo semper sunt æquales.

Praeterea, secundum quantitatem virtutis est quantitas meriti, et secundum quantitatem meriti quantitas præmii: sed non potest eidem deberi præmii majus; ergo non potest in eodem esse virtus major et minor; ergo omnes sunt æquales.

Respondeo. Dicendum quod de æqualitate virtutum est loqui tripliciter. Aut quo ad quantitatem dignitatis; et sic non sunt æquales, quia charitas major est aliis. Aut quo ad quantitatem extensionis per comparisonem ad objecta; neque sic sunt æquales, quia ad plura se extendit prudentia quam temperantia. Aut quo ad intensionem seu vigorem quantitatem: et hoc dupliciter. Uno modo quo ad vigorem essentialem, quem recipit virtus ex parte gratiæ. Alio modo quo ad vigorem accidentalem quem recipit ex parte subjecti. Primo modo sunt æquales, scilicet quo ad habitum. Secundo modo inæquales, scilicet quo ad usum. Habitus enim totaliter est a gratia, sed usus est partim a libero arbitrio. Et sic patet responsio ad prima duo objecta.

Ad tertium de habilitate ad actum, dicendum est, quod hoc non tantum potest contingere ex diversitate habituum, sed ex diversa dispositione subjecti.

ARTICULUS IV.

Ad quartum sic proceditur. Et 1. videtur, quod vitia sint connexa. Vitium enim est privatio virtutis; sed qui habet unum vitium privatus est omni virtute; ergo habet omne vitium.

2. Praeterea, Jac. 2 dicitur; « Qui offenderit in uno, factus est reus omnium. »

3. Praeterea, sicut una est radix omnium virtutum, scilicet gratia vel charitas, ita una omnium malorum, scilicet cupiditas, 1 Tim. 6; ergo sicut propter connexionem in una radice, qui habet unam virtutem, habet omnes: ita propter connexionem consimilem, qui habet unum vitium, habet omnia.

4. Praeterea, virtus et vitia, secundum theologos, sunt immediate opposita: sed nulla virtus inest habenti aliquod peccatum; ergo insunt omnia vitia opposita singulis virtutibus habenti aliquod peccatum.

Contra. Peccatum contingit infinitis modis, secundum Dionysium et Philosophum: sed impossibile est infinita inesse eidem; ergo non possunt omnia peccata connexa esse.

Praeterea, impossibile est contraria simul eidem inesse: sed contrarium est vitium vitio, sicut prodigalitas avaritiae; ergo etc.

Respondeo. In vitio est duo considerare: unum ex parte aversionis a bono incommutabili: aliud ex parte conversionis ad multa bona commutabilia. Ex parte aversionis connexa sunt vitia, id est quo ad subtractionem gratiae et poenam damni; sed non ex parte conversionis, id est quo ad pronitatem culpae et poenam sensus. Nam habitus ipsi, scilicet pronitates vitiorum, generantur ex operibus nostris. Unde non habent unam causam, sed multas, quae simul concurrere non possunt. Habitus vero virtutum habent causam unam, scilicet Deum; ideo habent connexionem.

Ad primum quod objicitur, quod vitium est privatio virtutis, dicendum quod duplex est privatio. Una quae est privatio simplex, ut caecitas est visus. Alia est fundata super contrarium habitum, ut nigrum albi. Primo modo qui habet unum vitium, privatus est omni virtute. Secundo vero modo, non primo, vitium dicitur privatio virtutis.

Ad secundum dicendum, quod dictum Jacobi intelligitur de reatu quoad poenam damni, non sensus.

Ad tertium, sicut una est radix, dicendum, quod non est simile: quia charitas una numero radix est omnium virtutum in eodem: sed cupiditas non una numero, nec specie, sed genere, radix est omnium vitiorum.

Ad quartum, virtus et vitium sunt opposita immediate, dicendum, quod hoc intelligitur secundum quod vitium dicitur simplex privatio, non secundum quod dicitur vitium proprie privatio fundata super habitum contrarium; quia per unum actum vitii amittitur virtus gratuita, non tamen generatur habitus vitii.

Expositio textus.

« Ubi est charitas, quid est quod possit deesse »? ergo omnes aliae virtutes superfluent.

Respondeo. Hoc intelligitur propter necessariam connexionem aliarum virtutum, quarum ipsa est causa. Nec tamen aliae virtutes superfluent: quia per charitatem perficitur voluntas, per alias virtutes aliae vires.

« Quanto magis inest virtus, tanto minus inest vitium. »

Contra. Non simul sunt.

Respondeo. Dicendum, quod loquitur de vitio poenae, id est pronitatis ad malum, non culpae. Vel potest dici quod dicitur minus habere de vitio, qui a vitio magis elongatur.

« Quia non justificationis gratia. »

Contra. Impletio praeceptorum Dei justificat.

Respondeo. Intelligitur de opere operato, non de opere operante.

DISTINCTIO XXXVII.

Sed jam distributio decalogi etc. (V. edit. nostrae tom. VII, pag. 420.)

QUAESTIO UNICA.**ARTICULUS I.**

Hic primo quaeritur. Et 1. videtur quod non fuerit necessarium aliquod praeceptum tradi homini. Rom. 8: « Peccatum occasione scripta per mandatum operatum est in me omnem concupiscentiam; » ergo mandatum est occasio omnis concupiscentiae; sed tale non debuit homini imponi a Deo, quod operaretur in homine omnem concupiscentiam; ergo nec mandatum.

2. Praeterea, infirmi non sunt oneribus aggravandi, sed alleviandi: cum ergo homo post peccatum infirmatus fuerit, non debuit ei onus praeceptorum imponi.

3. Praeterea, lex cogit hominem meta poenae: sed coactio detrahit merito, quia servitia quanto magis voluntaria sunt, tanto magis grata; ergo non debuit ei lex mandatorum dari.

Contra. Rom. 8. « Peccatum non cognovi nisi per legem: » sed necessarium fuit peccatum noscere, ut scilicet vitaretur; ergo necessarium fuit legem dari.

Item, in intelligibilibus disciplinarum non sufficit homini cognitio interior sine doctrina exteriori; ergo nec in operabilibus virtutum lex interior sine exteriori.

Respondeo. Necessarium fuit praecepta legis naturalis populo dari, et in scriptum redigi, propter quatuor rationes. Primo, quia per contrariam consuetudinem peccandi, ratio naturalis, in qua scripta erant, erat obtenebrata. Secundo, quia etsi in aliquibus vigeat ratio, tamen propter amorem boni in eis deficientem, coactione praecepti ad bonum inducendi erant. Tertio, ut ad opera virtutis non solum natura inclinaret, sed reverentia divini imperii. Quarto, ut magis memoriae traderentur, et frequentius in cogitatione versarentur.

Ad primum de verbo Apostoli, dicendum, quod mandatum per accidens auget concupiscentiam, quia ex eo quod aliquid prohibetur, ponitur homini quasi in alto; et ideo quasi quoddam arduum illud appetit homo: sed per se docet quid cavendum. Et quia homo excaecatus per culpam indigebat cogitare quid cavendum, ideo necessarium fuit ei tradi mandatum.

Ad secundum de infirmis, dicendum, quod quamvis infirmi non sint onerandi oneribus oppressivis quae virtutem debilitant, sunt tamen onerandi oneribus alleviatis, seu sanativis, quae virtutem juvant; et talia sunt onera praeceptorum.

Ad tertium de coactione, dicendum, quod duplex est coactio. Quaedam violentiae, et haec tollit meritum. Quaedam obligationis, et haec non tollit, quia non aufert libertatem voluntatis. Primo modo non cogit lex, sed secundo. Unde non diminuit meritum in eo qui voluntarie implet legem, sed in eo qui solo metu punitionis cogitur ad implendum.

ARTICULUS II.

Ad secundum sic proceditur. Et 1. videtur, quod non debeant esse decem legis praecepta. Rom. 12: « Plenitudo legis est dilectio; » ergo non oportuit dari nisi praeceptum dilectionis.

2. Praeterea, Rom. 7: « Concupiscentiam ne sciebant esse peccatum, nisi lex diceret. » Glossa: « Bona est lex quae dum concupiscentiam prohibet, omnia mala prohibet; » ergo suffecisset prohiberi concupiscentiam sine prohibitione aliorum malorum.

Contra. Contingit peccare in Deum, in se et in proximum; ergo debuerunt dari praecepta prohibentia peccatum non tantum in Deum vel proximum, sed etiam in seipsum; ergo plura debuerunt esse praecepta.

Praeterea, ubicumque contingit peccatum esse in opere, contingit esse peccatum in interiori concupiscentia: quia consensus in peccatum, peccatum est. Sed furtum et moechia prohibentur diversis praeceptis, quantum ad actum et concupiscentiam; ergo eadem ratione alia peccata debuerunt duplicibus praeceptis prohiberi.

Praeterea, ad Gal. 5: « Lex propter transgressionem posita est; » ergo debuerunt dari prohibitiones de singulis speciebus transgressionum, scilicet de peccato superbiae, vanae gloriae, invidiae, et ceteris aliis peccatis.

Respondeo. Dicendum, quod secundum duo praecepta charitatis in Deum et in proximum, dantur praecepta ordinantia in Deum, scilicet praecepta primae tabulae; ordinantia vero in proximum, praecepta secundae. In Deo autem sunt summa majestas quae appropriatur Patri, summa sapientia, id est veritas quae Filio, summa bonitas, quae Spiritui sancto. Primum praeceptum ordinat per actum exterioris operationis, quae est adoratio unius Dei in summam majestatem. Secundum per actum sermonis de non jurando in summam veritatem. Tertium per actum cordis, qui est sanctificatio in summam bonitatem. Ad proximum autem ordinant praecepta secundae tabulae, secundum quod in eo reuelat imago Dei. Aut ergo secundum quod in eo reuelat proprietas Patris: et sic in eum ordinat primum praeceptum secundae tabulae, quod est honorare parentes: aut veritas Filii: et sic illud praeceptum quod est, Non falsum testimonium dices: aut bonitas Spiritus sancti, et sic debemus ei innocentiam, scilicet ne laedamus eum in propria persona: et contra hoc nocumentum ordinat illud, Non occides: ne laedamus in persona sibi conjuncta, nec in rebus suis; et hoc neque in actu exteriori, neque interiori.

Contra. Nocumentum in persona conjuncta actu exteriori est illud, Non moechaberis. Actu interiori, Non concupisces uxorem proximi tui.

Contra. Nocumentum in rebus suis actu exteriori est illud, Non furtum facies: actu interiori, Non concupisces rem proximi tui.

Ad primum quod obicitur de dilectione, dicendum, quod in praecepto dilectionis continentur omnia per reductionem, sicut in generali principio: sed nihilominus oportuit dari praecepta moralia magis specialia et propinqua, propter legis naturalis obtenebrationem.

Ad secundum de concupiscentia, dicendum, quod in prohibitione concupiscentiae continentur omnes prohibitiones per reductionem, sicut in prima radice generali; sed nihilominus, quia tam generalis prohibitio non sufficeret, oportuit dari alias prohibitiones magis expressas in speciali.

Ad tertium, quod contingit peccare in Deum et in se et in proximum, dicendum, quod secundum philosophum, lex intendit bonum commune: ideo non praecipit vel prohibet actus hominis nisi in quantum ad alterum ordinantur. Inde est, quod non dat specialia praecepta vel prohibitiones de ordinatione sui quoad seipsum; sed haec implicite docet in ordinatione sui ad Deum et ad proximum.

Ad quartum de adulterio et furto voluntatis et operis, dicendum, quod non est simile; quia major est inclinatio naturae corruptae ad adulterium et furtum, quia in uno movet voluptas, in altero utilitas, quam in homicidio et aliis.

Ad quintum de prohibitionibus, dicendum, quod quamvis lex propter transgressores sit posita, non tamen oportuit omnia mala expresse prohiberi, sed illa quae primo vitanda occurrunt ad virtutem tendendi. Et ex hoc apparet ordo praeceptorum: quia enim primo occurrunt vitanda peccata operis quam oris, et illa quam cordis tanquam graviora, ideo hunc ordinem tenet legislator in prohibitionibus faciendis, quantum ad aliqua praecepta.

ARTICULUS III.

Ad tertium sic proceditur. Et 1. videtur, quod non omnia legis praecepta ad haec decem reducuntur. Ea quae sunt diversorum generum, ad se invicem non reducuntur: sed moralia et caeremonialia sunt diversorum generum; ergo caeremonialia ad moralia non reducuntur.

2. Praeterea, manente causa manet effectus: sed quaedam praecepta legis mutata sunt, ut puta caeremonialia et aliqua judicialia, moralibus praeceptis manentibus; ergo non reducuntur ad ista sicut ad causam.

5. Praeterea, quae sunt a principio voluntario, ut artificialia, ad ea quae sunt naturalia non reducuntur. Sed caeremonialia sunt a voluntate instituentis, moralia a natura; ergo caeremonialia ad moralia non reducuntur.

Contra. Dilectio Dei et proximi in illis decem praeceptis et continetur et praecipitur: sed omnia praecepta legis ad dilectionem Dei et proximi reducuntur, ut habetur Matth. 22: « In his duobus mandatis universa lex pendet et Prophetiae »; ergo reducuntur ad illa decem.

Praeterea, omne praeceptum rationale ad rationem rectam reducitur; ergo ad jus (1) naturale: sed decem praecepta decalogi continent ea quae sunt de dictamine juris naturalis; ergo ad ea omnia alia praecepta rationalia reducuntur.

Respondeo. Sicut in speculandis ex primis et universalibus principiis, omnia alia principia derivantur et probantur; et ideo ad ea omnia reducuntur: ita et in agendis ex primis praeceptis legis

(1) *At.* ad illud.

naturalis omnia alia praecepta derivantur et producantur, ideo ad ea omnia alia reducuntur; et ideo judicialia, moralia et positiva.

Ad primum, illa quae sunt diversorum generum etc., dicendum, quod quamvis non reducuntur ad invicem reductione essentiali, reduci tamen possunt reductione causali, ut accidentia omnia ad substantiam; quia subjecta materia cum forma, secundum Philosophum, causa est omnium quae fiunt in ea.

Ad secundum, manente causa, dicendum, quod caeremonialia non reducuntur ad moralia ut ad causam immediatam, sed remotam, mediante aliqua causa variabili, scilicet significatione Christi venturi incarnandi. Similiter quaedam judicialia quae pro loco et tempore statuebantur: illud vero intelligitur de causa per se et immediata.

Ad illud de artificialibus, dicendum, quod quamvis non reducuntur ad naturalia ut ad genus vel causam efficientem, reducuntur tamen per aliquem modum, in quantum per instrumenta naturalia, et ex materia naturali fiunt.

ARTICULUS IV.

Ad quartum sic proceditur. Et 1. videtur, quod praecepta decalogi sint dispensabilia. Omnis vicarius habens a domino suo sibi commissam plenitudinem potestatis, potest in praeceptis domini sui dispensare; ergo Papa potest dispensare in praeceptis Christi, et sic in praeceptis decalogi.

2. Praeterea, ex praecepto iudicis, quamvis lex dicat: « Non occides, » licet tamen occidere; ergo iudex potest contra legis praeceptum dispensare.

3. Praeterea, ex praecepto imperatoris vel iudicis licet rem alienam invito domino contrectare, et ei auferre; ergo potest contra praeceptum de non furando dispensare.

4. Praeterea, Machabaei dispensaverunt contra praeceptum de sabbato, 1 Machab. 2; ergo licet homini contra praecepta decalogi dispensare.

Contra. Dicit Bernardus in lib. de Dispensatione et praecepto: « Nulli licet dispensare contra praeceptum a suo superiori impositum: » sed praecepta decalogi sunt praecepta divina; ergo nulli homini licet in eis dispensare.

Praeterea, in quolibet genere est una prima mensura, quam oportet esse certissimam et infallibilem, ut dicit Philosophus in Ethicis: sed prima mensura omnium actuum humanorum est lex decalogi; ergo in nullo casu ab ea discedere licet, et sic nulli licet in praeceptis huiusmodi dispensare.

Respondeo. Cujus est instituere naturam, ejus tantum est immutare naturam. Unde, cum nullius hominis sit naturam instituere, nullius hominis erit eam immutare. Sed praecepta decalogi sunt de jure naturali: ideo in eis, nec in aliis, prout vim eorum continent, licet alicui homini dispensare. Potest autem in aliis, si sit sine istorum praesudicio, ut puta in praeceptis legis positivae, dispensari ab illo qui auctoritatem habet.

Ad primum quod objicitur de vicario, dicendum, quod illud verum est de vicario habente plenitudinem potestatis simpliciter universalem, non de illo qui habet restrictam et determinatam. Vicarius autem Christi non habet plenitudinem universalem. Non enim potest facere miracula quae faciebat

Christus; sed habet restrictam ad ea quae pertinent ad cathedram, in quibus habet plenitudinem potestatis.

Ad secundum quod ex praecepto iudicis licet occidere, dicendum, quod occidere simpliciter malum est et prohibitum, nec hoc licet ex praecepto iudicis facere. Tamen occidere maleficum non est malum, nec prohibitum ministro juris; et hoc licet ex praecepto iudicis facere.

Ad tertium de praecepto imperatoris, dicendum, quod contrectare rem alienam invito domino, non est malum secundum se, nisi addatur, fraudulenter. Unde ex causa addita licet hoc facere; non tamen licet furari. Et praeterea ex praecepto imperatoris illud quod erat alicujus alterius, fit non suum propter aliquam culpam, et sic non contrectatur alienum.

Ad quartum de sabbato, dicendum, quod non fuit dispensatio, sed interpretatio. Nam legem defendere non erat servile opus, sed liberrimum et licitum quocumque tempore.

Expositio textus.

Haec Origenes dicit duo esse mandata. Sicut Origenes primum mandatum dividit in duo, ita duo ultima mandata quae sunt de prohibitione concupiscentiae conjungit in unum; et sic praecepta denarium non transcendunt. « Idololum nihil est in mundo. » Hoc autem multipliciter intelligi potest. Uno modo in quantum idololum est similitudo; et sic Origenes exponit, ut dicatur idololum nihil esse, quia nullius rei existentis est similitudo, sed alicujus non-existentis in rerum natura: sicut faciebant gentiles idololum duplici capite; vel cum corpore hominis et capite bovis, vel aliquo simili modo. Alio modo potest intelligi de idolo, secundum quod est res quaedam: et hoc dupliciter. Uno modo quantum ad formam quae existimatur esse in idolo, et non est in eo, scilicet forma divinitatis. Alio modo quantum ad effectum, quia scilicet ad peccatum quod nihil est, inducit.

« Cum quis plus accipit in usura. »

Contra. Ergo non in solis rebus corporalibus est usura.

Respondeo. Haec usura accipitur metaphorice, non proprie.

« Vel si in hyeme demus decem modios. »

Contra. Possibile est quod decem in hyeme valeant quindecim in aestate.

Respondeo. Hoc intelligitur supposito aequali valore.

DISTINCTIO XXXVIII.

Sciendum est tamen etc. (V. edit. nostrae tom. VII, pag. 451.)

QUAESTIO UNICA.

ARTICULUS I.

Hic primo quaeritur. Et 1. videtur, quod inconvenienter definiatur mendacium in littera. Qui enim verum loquitur quod falsum esse credit, secundum Augustinum mentitor; ergo aliquando est mendacium, ubi non est falsa significatio vocis.

2. Praeterea, qui dicit mendacium jocosum, non habet intentionem fallendi; ergo mendacium non semper est cum intentione fallendi.

5. Praeterea, contingit significare vere vel false aliquid non solum verbis sed etiam factis vel nutibus, et per haec contingit falsum significare ex intentione fallendi sine verbis; ergo mendacium non est semper falsa significatio vocis.

Contra. Augustinus in littera: « Mendacium est falsa significatio vocis, cum intentione fallendi. »

Juxta hoc quaeritur de differentiis mendacii in littera positus, penes quid sumuntur.

Respondeo. Mendacium dicit respectum ad intentionem dicentis ad rem significatam, sicut et quilibet actus moralis qui ex intentione specificatur. Unde ad completam rationem mendacii, exigitur falsitas ex parte rei; et hoc est in mendacio quasi materiale: et ex parte intentionis loquentis, scilicet intentio fallendi; et hoc est formale; ideo in definitione ejus tangitur utrumque. Mentiri autem dicit solam comparationem ad loquentem: et ideo ad mentiri sufficit falsitas ex parte intentionis loquentis, vel quod aliter significet sermo quam sit in intentione. Et per hoc patet solutio ad primum. Non enim oportet quod quicumque mentitur mendacium dicat.

Ad secundum de mendacio jocosum, dicendum quod actus fallendi potest dupliciter considerari. Uno modo secundum quod exit a fallente, in quantum falsum significat: et sic qui dicit mendacium jocosum intendit fallere, quia intendit falsum dicere. Alio modo secundum quod habet effectum in eo qui fallitur; et sic non intendit fallere. Et ideo in mendacio jocosum est minimum de ratione mendacii, quia non habet omnino intentionem fallendi. Intentio enim fallendi duplex est: aut quo ad se, id est, falsum dicendi; aut quo ad alterum, scilicet decipiendi. Primo modo semper est intentio fallendi in quocumque mendacio; sed non secundo modo.

Ad tertium de falsis nutibus, dicendum quod vox large comprehendit quodcumque signum, quo conceptus mentis exprimitur: et secundum hoc, contingit mentiri non tantum verbis, sed nutibus. Vel potest dici quod contingit fallere nutibus, non tamen mentiri proprie, quia mentiri appropriate significat fallaciam in verbis, sive scriptis, sive prolatis.

Ad illud de differentiis mendaciorum, dicendum quod mendacium dividitur penes intentionem mentientis, quia illud est formale in eo. Aut ergo mentiens intendit prodesse, et sic est officiosum; aut delectare, et sic jocosum; aut nocere, et sic perniciosum. Et haec est prima divisio quam ponit Magister. Si intendit nocere proximo: aut hoc est in bono spirituali, ut in doctrina religionis, et sic est prima species: aut in corporali, ita quod nulli prosit, et sic est secunda: aut ita quod alicui prosit, et sic est tertia. Sed hoc non potest esse in bono spirituali, quia nocendum in illo nulli potest prodesse. Si intendit delectare: vel seipsum, et sic est quarta: vel alterum, et sic est quinta. Si intendit prodesse proximo: aut in bono temporali, et sic est sexta: aut in persona sua conservanda, et sic est septima: aut in spirituali bono conservando, ut virginitatem, vel hujusmodi, et sic est octava.

ARTICULUS II.

Ad secundum sic proceditur. Et 1. videtur, quod non omne mendacium sit peccatum. Nullum enim peccatum fit instinctu Spiritus sancti: sed

Jacob, ut in littera dicitur, propter familiare consilium Spiritus sancti quod a matre acceperat, dixit se esse primogenitum cum non esset, et ita mentitus est; ergo aliquid mendacium non est peccatum.

2. Praeterea, plus est falsum significare facto quam verbo: sed falsa significatio per factum non semper est peccatum, ut patet in Domino qui se finxit longius ire. Luc. 24; ergo multo fortius, nec falsa significatio per verbum.

3. Praeterea, sophista, in quantum hujusmodi, frequenter dicit falsum in disputatione ex intentione fallendi; nec tamen peccat, quia sic ars sophistica esset peccatum; ergo non omne mendacium est peccatum.

4. Praeterea, in scripturis sacris leguntur aliqui sine peccato dixisse falsum scienter, ut ille Judic. 9, lerunt ligna ad rhamnum; ergo non omne falsum scienter dictum est peccatum.

Contra. Augustinus in lib. de Mendacio dicit: « Quisquis aliquid genus mendacii quod peccatum non sit esse putaverit, seipsum turpiter decipit; ergo omne mendacium peccatum est. »

Praeterea, nihil opponitur virtuti quae est veritas, nisi peccatum: sed omne mendacium opponitur virtuti, quae est veritas, ut patet in Ethic.; ergo omne mendacium est peccatum.

Respondeo. Dicendum, quod in omnibus actibus per defectum ejuslibet circumstantiae debitae, etiam omnibus aliis concurrentibus, contingit committi peccatum. Cum autem locutio inventa sit ad exprimentum conceptionem cordis, quodcumque aliquis loquitur ore quod in corde non habet, loquitur quod non debet. Hoc autem contingit in omni mendacio; ideo omne mendacium est peccatum, quantumcumque aliquis propter bonum mentiatur.

Ad primum quod objicitur de Jacob, dicendum, quod sibi primogenitura Dei electione debebatur, et ad illum intellectum, cum dixit se esse Esau primo genitum, Spiritus sanctus ejus verba ordinabat, ejus instinctu et intellectu loquebatur. Unde, quia hoc significare intendebat ad quod Spiritus sanctus ordinabat verba; ideo a mendacio excusatur. Et eadem ratio est de verbis omnium illorum, in quibus mendacium concedere nefarium videtur.

Ad illud quod de secundo objicitur de falsa significatione facti, dicendum, quod non est simile de verbo et de facto. Nam verba sunt instituta ad significandum verum: unde qui ad falsum eis utitur, abutitur faciendo quod non debet: sed facta non sunt instituta ad significandum. Vel dicendum, quod per simulationem facti, non intendebat falsum significare Christus vel quicumque vir sanctus; sed verum occultare, quod bene licet aliquando. Vel dicendum, quod illa simulatio in figura fiebat, quia figurabat quod ipsi adhuc longe erant a veritate. Sicut autem verba figurativa veritatem habent pro sensu in quo dicuntur, non pro sensu quem faciunt, ut si quis dicat, pratum ridet, ita et facta figurativa.

Ad tertium de sophista, dicendum, quod propositiones disputativae, potius dicuntur interrogando quam asserendo. Proponuntur enim respondententi judicandae et non asseruntur. Sic respondens aliquando respondet falsum, tentando opponentem.

Ad quartum quod objicitur de Jud. 9, dicendum, quod verba quae in sacra Scriptura fiunt, aut sunt

verba ejus qui Scripturam edidit, aut sunt verba alicujus qui in Scriptura recitatur loquens. Si primo modo, sic non contingit in eis mendacium; quamvis aliqua in Scriptura dicantur figurate, quae videntur esse falsa in primo aspectu; quia in figurativis locutionibus non potest sensus verborum quem primo aspectu faciunt, sed quem proferens sub tali modo loquendi facere intendit. Si secundo modo: aut sunt alicujus cujus malitia in Scriptura arguitur, et sic non est inconveniens quod sint etiam perniciose mendacia: sicut verba Judaeorum Christum blasphemantium; aut alicujus qui commendatur non de perfectione virtutis, sed de profectu ad virtutem, sicut obstetrices commendantur quod in hoc profecerunt, quod non in damnum alicujus, sed in obsequium divinum mentitae sunt: aut sunt verba alicujus qui commendatur de perfectione virtutis et in exemplum proponitur: et tunc est eadem ratio sicut de verbis Scripturae.

ARTICULUS III.

Ad tertium sic proceditur. Et 1. videtur, quod omne mendacium sit peccatum mortale. Nullus perditur nisi propter mortale: sed omnis qui loquitur mendacium perditur, secundum illud Psalm. 5: « Perdes omnes etc. »; ergo omne mendacium est peccatum mortale.

2. Praeterea, si mendacium excusatur a peccato mortali, praecipue mendacium officiosum tale esse videtur: sed hoc est mortale, sicut dicit Gregorius de mendacio obstetricum in Glossa super Exod. 1: « Benignitatis earum merces quae in aeterna vita remunerari poterat, per culpam mendacii in temporalem recompensationem mutata est; » ergo omne mendacium peccatum est mortale.

3. Praeterea, impugnatione veritatis agnitae peccatum mortale est, cum sit una species peccati in Spiritum sanctum: sed omne mendacium impugnat veritatem agnitam; ergo est peccatum in Spiritum sanctum.

Contra. Super Exod. 5, dicit Gregorius, quod infirmis propter conservandam vitam alterius mentiri conceditur: sed nullum mortale conceditur; ergo non omne mendacium est mortale.

Praeterea, Gregorius dicit, quod « mendacium officiosum facile credimus relaxari: » sed peccatum ex hoc dicitur veniale quod facile remittitur; ergo mendacium officiosum est veniale.

Respondeo. Dicendum, quod mortale est, quod privat et avertit a vita. Vita vero consistit in charitate Dei et proximi. Mendacium ergo quod avertit a charitate vel Dei, ut perniciosum quod fit in doctrina religionis, vel proximi, ut alia duo perniciose, peccatum mortale est: mendacium vero, quod non avertit a charitate Dei vel proximi, ut officiosum et jocosum, non est mortale, sed veniale.

Ad primum de Psalmista, dicendum, quod illud intelligitur de mendacio pernicioso tantum.

Ad secundum de obstetricibus, dicendum, quod in opere obstetricum duo fuerunt. Invenio conservandi pueros Hebraeorum, et intentio fallendi Aegyptios. Hoc fuit peccatum; sed intentio liberandi fuit pia. Et licet non fuerit meritoria propter mendacium annexum, fuit tamen ad meritum dispositiva: et sic intelligitur quod dicit Hieronymus, quod edificavit illis domos spirituales non propter earum

meritum de condigno, sed de congruo propter dispositionem ad meritum. Dictum autem Gregorii intelligitur de computatione mercedis, non quam jam meruissent, sed quam illo opere mereri potuissent si earum benignitas gratia informata fuisset. Prima namque commutatio non potest fieri nisi per mortale; sed secunda etiam potest fieri per veniale.

Ad illud de impugnatione veritatis agnitae, dicendum, quod quamvis in omni mendacio deseratur, non tamen directe impugnatur.

ARTICULUS IV.

Ad quartum sic proceditur. Et 1. videtur, quod viro perfecto mentiri sit peccatum mortale. Dicit Augustinus in litera: « Perfecto non convenit mentiri pro alterius vita, ne dum servat vitam alterius perdat suam; » ergo mendacium officiosum ei est peccatum mortale; ergo multo magis quodecumque aliud mendacium.

2. Praeterea, dicit Magister in litera, quod perfectis viris etiam mendacium officiosum vel jocosum damnabile est; ergo et mortale peccatum.

3. Praeterea, perfectus mentiendo aliis exemplum passim mentiendo praestat; ergo dicto minus recto occasionem ruinae praestat; ergo scandalizat, et sic peccat mortaliter.

Contra. In infinitum distat veniale et mortale peccatum: nulla vero circumstantia aggravat peccatum in infinitum; ergo cum perfectio sit quaedam circumstantia, non facit de veniali mortale peccatum.

Praeterea, nullus tenetur ad aliquid praecise, nisi ex praeepto vel voto: sed non mentiri perfectus non habet specialiter in praeepto vel in voto; ergo non tenetur ad non mentiendum plusquam alii.

Respondeo. Dicendum, quod nihil viro perfecto est peccatum mortale quod non est viro imperfecto, nisi sit contra ejus votum; quia ad hoc ultra virum imperfectum tenetur. Perfectio enim genus peccati non mutat, sed quantitatem auget. Unde cum ad non mentiendum non obligaverit se ex voto; ideo mentiri ei non semper peccatum est mortale, sicut nec viro imperfecto, quamvis gravius peccatum sit ei mendacium.

Ad primum de Augustino, dicendum, quod perdere vitam dupliciter est. Vel per causam immediatam, et sic perditur per quodecumque mortale: vel dispositionem propinquam, et sic per grave veniale.

Ad illud Magistri, dicendum, quod mendacium viri perfecti est damnabile per dispositionem, non per causam.

Ad tertium de scandalo, dicendum, quod si per mendacium scandalum facit, quod sit mortale peccatum, ejus mendacium est mortale ratione annexi: et similiter esset, si ex mendacio imperfecti scandalum esset. Sed non ita facile potest esse annexum quod faciat ipsum esse mortale; quia non semper, quantum in se est, praebet occasionem ruinae.

Expositio textus.

« Praecipue si iteretur. » Hoc dicit, in quantum multiplicatio venialium disponit ad mortale. — « Ut ab immunditia corporali aliquem tueatur. » Sed quid faciendum est ipsi mulieri, si propter immunditiam quaeratur? Quidam dicunt, quod si propositum non

consentiendi habet, non debet venialiter peccare; sed debet spem suam in Deum ponere, qui non patitur tentare supra posse. Alii autem dicunt, quod debet veniale peccatum committere; maxime si sentit se imperfectam, potius quam incurrat mortalis peccati periculum. Sed hoc est contra rationem peccati, quod sit debitum vel eligibile. Unde in se contradictionem implicat.

• Nec omne mendacium isto praecepto prohiberi. • Intelligendum est directe, sicut contrarium praecepto. • Nec praedicta descriptione mendacium • joci includi. • Verum est si intelligatur intentio fallendi, secundum quod fallacia est, non tantum in dicente, sed etiam in audiente qui fallitur.

DISTINCTIO XXXIX.

Nunc de perjurio videamus etc. (V. edit. nostrae tom. VII, pag. 457.)

QUAESTIO I.

ARTICULUS I.

Hic primo quaeritur. Et 1. videtur, quod omne perjurium sit mortale. Quod est directe contra Dei praeceptum, est mortale peccatum: sed omne perjurium est hujusmodi, quia est contra illud praeceptum, Non assumes nomen Dei tui in vanum; ergo omne perjurium est peccatum mortale.

2. Praeterea, Augustinus in quodam Sermone dicit, quod falsa juratio est perniciosa: sed nihil dicitur perniciosum, nisi peccatum mortale; ergo omnis falsa juratio est peccatum mortale.

3. Praeterea, majus peccatum in genere est perjurium quam mendacium; ergo, cum mendacium semper sit ad minus veniale peccatum, perjurium semper erit mortale peccatum.

Contra. Sicut contingit mentiri jocosae, ita perjurare: sed mendacium jocosum est veniale peccatum; ergo a simili perjurium jocosum potest esse veniale peccatum.

Praeterea, non impletio juramenti perjurium est: sed non omnis qui non implet peccat mortaliter, ut si habeat legitimum impedimentum; ergo non omne perjurium est peccatum mortale.

Respondeo. Dicendum, quod perjurium dicitur juramentum inordinatum. Aut ergo juramentum est solemnizatum, ut illud quod fit coram iudice supra sacrosancta, et sic perjurium est grave et mortale: aut non solemnizatum, et tunc aut est deliberatum eum debita deliberatione, et tunc falsum jurat percipiens esse falsum, et percipiens se jurare peccat mortaliter. Si autem non est solemnne, nec eum deliberatione, ut accidit in communi sermone, tunc dicitur esse grave veniale: et hoc ideo, quia actus moralis non perfecte habet suam speciem ante deliberationem rationis.

Ad primum ergo quod omne perjurium est contra Dei praeceptum, dicendum, quod non est verum de quolibet; sed de illo solum, quod cum plena deliberatione et consensu profertur; sicut etiam delectatio concupiscentiae praeveniens deliberationem non est contra praeceptum non concupiscendi.

Ad secundum de perniciose juratione, dicendum, quod falsa juratio non dicitur perniciose, nisi quando est cum plena deliberatione jurantis.

Ad tertium, majus peccatum in genere est perju-

rium, dicendum, quod quamvis sit majus peccatum in genere, non tamen oportet quod in qualibet specie. Unde quamvis genus perjurii pejus sit genere mendacii, tamen aliqua species perjurii non est pejus aliqua specie mendacii.

ARTICULUS II.

Ad secundum sic proceditur. Et 1. videtur, quod majus sit peccatum perjurare per creaturam quam per Deum. Matth. 23:17. Qui jurat in templo jurat in templo et in Deo; ergo qui perjurat per templum, perjurat per templum et per Deum: sed pejus est duo contemnere quam unum solum; ergo majus est peccatum.

2. Praeterea, ubi est major solemnitas in jurando, majus est peccatum in perjurando: sed major est solemnitas in jurando per creaturam, ut puta per Evangelium vel reliquias, quam per Deum; ergo etc.

3. Praeterea, major reputatur blasphemia jurare per oculos Dei quam per Deum; ergo major est contemptus perjurare per oculos Dei, quam per Deum; ergo majus perjurium.

Contra. Majus est peccatum contemnere veritatem increatam quam creatam; ergo Deum quam creaturam; ergo perjurare per Deum quam per creaturam.

Praeterea, illud quod est magis contra praeceptum divinum est majus peccatum: sed perjurium per Deum est magis contra praeceptum divinum, quia ibi directe et immediate assumitur nomen Dei in vanum: in perjurio vero per creaturam non; ergo et majus peccatum est perjurium per Deum quam per creaturam.

Respondeo. Dicendum, quod majus esse peccatum unum altero potest esse dupliciter: aut per se et secundum naturam proprii generis, aut per accidens propter aliquid additum. Primo modo perjurium per Deum est majus peccatum, ut ait hic Chrysostomus. Secundo modo potest esse aliquando majus peccatum perjurare per creaturam, ut per Evangelium vel corpus Christi, ratione solemnitatis, vel ratione contemptus majoris, vel ratione scandali, vel conscientiae, vel alicujus hujusmodi.

Ad primum de templo, dicendum, quod quamvis jurans in templo juret in Deo tacite, non tamen expresse. Vel dicendum, quod qui jurat in templo, jurat in eo, ut est Dei vestigium. Unde nihil aliud contemnit in eo, nisi Deum. Vel dicendum, quod quia creatura respectu Dei nihil est; ideo nihil addit ultra Deum, neque supra. Unde non duo, sed unum contemnitur.

Ad secundum de majori solemnitate, dicendum, quod tale perjurium est majus peccatum per accidens propter solemnitatem, non per se.

Ad tertium de blasphemia, dicendum, quod in creaturis illis magis contemnitur Deus a blasphemantibus quam in seipso. Contemnitur enim incarnationis beneficium in quo maxime Dei bonitas et charitas nobis ostenditur. Unde major est blasphemia per accidens ratione contemptus.

Ad duo argumenta contraria respondetur, quod pejus est perjurium per Deum, per se loquendo, et ceteris paribus.

QUAESTIO II.

ARTICULUS I.

Circa secundum quaeruntur tria. Primo sic proceditur. Et 1. videtur, quod jurare non sit per se bonum: et arguitur sic. Omnis actus cujus consuetudo mala est, malus est: sed consuetudo jurandi mala est. Eccl. 5: « Jurationi non assuescat os tuum; » ergo jurare malum est.

2. Praeterea, jurare simpliciter sine additione causae, est jurare pro nihilo: et hoc est assumere nomen Dei in vanum; ergo cum hoc sit per se malum, jurare est malum per se.

3. Praeterea, videtur quod in nullo casu sit licitum jurare. Jurare enim universaliter est prohibitum: Matth. 5: « Ego autem dico non jurare omnino; » ergo universaliter est illicitum.

4. Praeterea, in sortibus et judiciis quae fiunt per ignem et aquam, vel per duellum, expectatur divinum testimonium: et propter hoc sunt prohibita, quia ibi videtur esse quaedam Dei tentatio: sed juramentum est invocatio divini testimonii; ergo est illicitum.

Contra. Jurare est, ut ait Augustinus, jus veritatis Deo reddere. Et alibi dicit, quod jurare est Deum testem veritatis adhibere: sed horum utrumque est bonum; ergo jurare est bonum.

Praeterea, Angelus jurasse legitur, Apoc. 10: « Juravit per viventem in saecula saeculorum etc. »: et similiter Apost. 2 Cor. 1: « Ego testem invoco Deum in animam meam etc. » et tamen non peccaverunt; ergo jurare non semper est peccatum.

Respondeo. Sicut in genere boni naturalis duo sunt bonorum genera, scilicet propter se appetenda, et sanari: quaedam vero propter aliud tantum, ut mederi; ita in genere boni moralis, quaedam sunt bona quae propter se appetenda sunt, ut actus virtutum: quaedam non nisi propter aliud ex aliqua necessitate, ut curae animarum; non quia malae, sed quia periculosae. Ex hoc genere est juramentum. Est enim bonum quoddam periculosum propter lubricum linguae et facilem contemptum et irreverentiam nominis divini; et ideo per se non est appetendum, sed propter alterum, scilicet propter aliquam necessitatem vel utilitatem; non quia sit in se malum, sed quia est occasio propinqua mali, idest periculosum. Quia ergo se exponere rei periculosae passim et indifferenter malum est: sed cum debita cautela et ex necessitate aliqua non est malum, sed bonum; ideo, quamvis jurare non sit malum, quia tamen est periculosum; ideo passim et sine causa jurare est malum; cum debita autem cautela et necessitate non est malum, sed bonum et licitum.

Ad primum, quod consuetudo jurandi est mala, dicendum, quod hoc non est quia jurare sit in se malum, sed quia est periculosum; et ideo per accidens consuetudo jurandi est mala.

Ad secundum, jurare simpliciter sine additione causae est jurare pro nihilo, dicendum, quod non est verum. Nam jurare simpliciter, quamvis non ponat de se causam jurandi, non tamen excludit eam. Jurare vero pro nihilo excludit causam jurandi. Unde ubicumque contingit jurare, contingit simpliciter jurare, non tamen pro nihilo jurare.

Ad tertium, Matth. 5: « Non jurare omnino, » dicendum, quod hic prohibetur facilitas jurandi

S. Th. Opera omnia. V. 22.

propter periculum, ut scilicet quis non ex quacumque causa juret, et non simpliciter juramentum.

Ad quartum de sortibus, dicendum, quod non est simile; quia ibi inducitur divinum testimonium ad rem omnino incertam et determinatur ei modus testificandi: sed in juramento certus est is qui jurat licet non is cui juratur.

ARTICULUS II.

Ad secundum sic proceditur. Et 1. videtur, quod omne juramentum, etiam illicitum, sit servandum. Dicit Augustinus, quod « meretrix quae jurat se servaturam fidem peccatori mala est ei adhaerendo sed peior fidem non servando »; ergo videtur quod juramentum illud, licet illicitum, sit servandum.

2. Praeterea, Josue servavit juramentum factum Gabaonitis contra praeceptum Domini: tale est illicitum; ergo servandum est juramentum illicitum.

3. Praeterea, videtur quod non omne juramentum licitum sit servandum. Qui jurat se nunquam intrare religionem, jurat licitum, et nihilominus potest intrare sine peccato; ergo non omne juramentum licitum est servandum.

4. Praeterea, qui jurat se nunquam futurum Episcopum, nihilominus pro necessitate Ecclesiae et mandato superioris tenetur suscipere episcopatum; ergo non omne juramentum, quamvis licitum, est servandum.

Contra. Dicit Canon: « Juramentum non est vinculum iniquitatis; » ergo non ligat ad illicitum.

Praeterea, dicit Isidorus quod « omne juramentum est servandum, quod servatum non vergit in interitum salutis aeternae; » ergo si vergit non est servandum; ergo juramentum illicitum non est servandum.

Respondeo. Dicendum, quod duplex est juramentum: quoddam assertorium de praeterito, quoddam promissorium de futuro. Sicut autem materia debita juramenti assertorii, est verum et non falsum, ita materia juramenti promissorii bonum et non malum. Qui enim jurat malum, obligatur quidem ad peccatum male jurando, sed non obligatur ad implendum illud quod male juravit. Notandum ergo, quod illud quod jurando promittitur, aut est totaliter et aperte malum, et tunc auctoritate propria est frangendum. Si totaliter et aperte bonum, nullatenus est frangendum. Si partim bonum, partim malum, partim est tenendum, partim frangendum. Si vero dubium, non est auctoritate propria, sed superioris interpretatione frangendum.

Ad primum de meretrice, dicendum, quod in juramento meretricis duo sunt: unum quod adhaerebit isti, et hoc est malum: alterum quod non alteri, et hoc est bonum: et in hoc frangendo juramentum, peccat gravius quam servando; quia dum servat, peccat fornicando, et non perjurando: sed dum adhaeret alteri, peccat utroque modo.

Ad secundum de Gabaonitis, dicendum, quod Josue servavit utrumque: et praeceptum, et juramentum. Juramentum quidem in hoc quod non eos interfecit morte naturali; praeceptum vero in hoc quod eos interfecit morte civili redigendo in servitutem. Unde dicit Ambrosius quod mulcavit eos meliori morte, scilicet servitute divini ministerii.

Servavit quippe intentionem praecipientis, licet non omnino superficiem verborum praeepti ipsius.

Ad illud de ingressu religionis, dicendum, quod quamvis licitum sit non intrare, non tamen est licitum obligare se ad nunquam intrandum, quia religio est de perfectione vitae.

Ad quartum de episcopatu, dicendum, quod quamvis expediat subterfugere, tamen pertinaciter excusare non est bonum. Unde obligare se ad non recipiendum, malum est. Unde, quamvis oblatum recipere non debeat, tamen debet recipere injunctum, vel pro necessitate Ecclesiae impositum; alioquin jam vergeret in deteriorem exitum.

ARTICULUS III.

Ad tertium sic proceditur. Et 1. videtur, quod juramentum coactum sit obligatorium. Augustinus ex consilio Ambrosii cuidam qui coactus juraverat quandam ducere in uxorem, respondit quod matrimonium teneret; ergo coactum juramentum est obligatorium.

2. Praeterea, Isidorus dicit: «Omne juramentum est servandum, quod servatum non vergit in pejorem exitum»; ergo juramentum coactum licitum, est servandum.

Contra. Dicit lex civilis, «quod vi vel metu gestum est, ratum non habeo», ait praetor.

Praeterea, secundum Philosophum, coactum est involuntarium: sed involuntarium non obligat; ergo nec coactum.

Praeterea, matrimonium vel votum coactum, non est obligatorium; ergo nec juramentum.

Respondeo. Duplex est juramentum. Assertorium: et in hoc coactio non potest esse sufficiens ut falsum juretur; quia nihil potest sufficienter cogere ad hoc, quod homo mortaliter peccet. Unde tale juramentum, quantumque coactum, est obligatorium ad peccatum. Aliud est juramentum promissorium: et in hoc potest esse coactio sufficiens ut vitetur majus periculum, ut mortis vel alicujus hujusmodi; quod sine peccato contingere potest: et tunc talis coactio, si possit in constantem virum cadere, tollit obligationem juramenti in foro contentioso; sed in foro conscientiae est obligatorium, quia magis debet homo subire damnum temporale quam frangere fidem. Habet tamen remedium ut in judicio ab eo repetat quod perdidit: quod si juraverit se non repetiturum, potest judici denunciare, qui ex officio debet raptorem ad restituendum cogere. Si autem juraverit se non denunciaturum, contra charitatem fraternam juravit, qua quis tenetur ad correctionem fratris operam dare, et non tenetur observare.

Ad illud de lege civili, dicendum, quod intelligitur hoc in judicio fori contentiosi, non conscientiae.

Ad secundum, quod coactum est involuntarium, dicendum, quod non est involuntarium simpliciter, cum voluntas non possit cogi absolute, sed sub conditione: et ideo voluntarium secundum quid. Magis enim vult tantum solvere et aliquid hujusmodi facere, quam mori vel peccare.

Ad tertium de voto et matrimonio, dicendum, quod non est simile de matrimonio; quia liber consensus ad haec requiritur, ad juramentum autem tale, sufficit conditionatus. Nec est simile de voto; quia per votum obligatur homo Deo, cui non placet coactum servitium; per juramentum obligatur

homo hujusmodi, cui tantum valet aliquid coacte solutum ut pecunia, sicut spontanee.

Expositio textus.

« Infirmis ergo illud prohibuit » propter duo. Primo ne creaturis crederent aliquid numen inesse. Secundo ne tali juramento se obligari non credentes, fidem frangerent. « Sancta synodus decrevit. » Excipiuntur tamen casus illi in quibus mora traheret periculum; sicut pro pace facienda, vel aliquid hujusmodi.

DISTINCTIO XL.

Sextum praeeptum est etc. (V. edit. nostrae. tom. VII, pag. 445.)

QUAESTIO UNICA.

ARTICULUS I.

Hic primo quaeritur. Et 1. videtur, quod haec duo praeepta inconvenienter assignentur, arguendo sic. Unum peccatum, uno praeepto debet prohiberi: sed unum et idem est peccatum cordis et operis; ergo eadem debet esse prohibitio utriusque.

2. Praeterea, sicut in furto et moechia contingit peccare corde et opere, ita et in caeteris peccatis: sed alia praeepta non variantur per concupiscentiam et opus; ergo nec praeeptum de concupiscentia et moechia.

3. Praeterea, de differenti peccato differens debet dari praeeptum, sive prohibitio: concupiscentia autem curiositatis et ambitionis, quae est peccatum, differt ab aliis; ergo aliud praeeptum dari debuit de prohibitione curiositatis et ambitionis.

4. Praeterea, omne quod fit contra prohibitionem, peccatum mortale est: sed concupiscere, peccatum veniale est, ut patet in primis motibus; ergo non debuit prohiberi.

Respondeo. Dicendum, quod duplex est concupiscentia: quaedam conjuncta operi, et illa prohibetur eodem praeepto cum ipso actu: quaedam separata; et haec prohibetur separatim respectu quorundam actuum, et respectu quorundam non. Sunt enim actus quidam, quorum objectum est bonum aliquid concupiscibile, ut furari et moechari: et hi non solum ut sunt in actu, sed ut in apprehensione, movent delectationem. Quidam vero sunt quorum objectum est nocuum aliquid, ut homicidium; et hi non movent de se concupiscentiam, sed potius horrorem et fugam; et ideo illorum oportuit prohiberi actum per se et concupiscentiam per se; horum vero non, sed simul utrumque.

Ad primum, unum et idem est peccatum cordis et operis, dicendum, quod quamvis concupiscentia conjuncta operi sit idem peccatum cum opere exteriori, tamen concupiscentia separata aliud peccatum est. Hoc autem illis duobus praeeptis prohibetur.

Ad secundum de duplici furto et adulterio, dicendum, quod non est simile, quia non est similis inclinatio et delectatio in opere et appetitu homicidii sicut in opere et appetitu furti et adulterii; immo magis est ibi horror naturalis; quia hic movet aliquid concupiscibile bonum, ibi movet nocuum et malum.

Ad tertium de differenti peccato, dicendum, quod concupiscentia curiositatis quae fit per oculos, pertinet ad delectationem sensuum; et ideo, reducitur ad prohibitionem concupiscentiae carnalis. Concupiscentia vero ambitionis, bonorum et dignitatum, ad prohibitionem concupiscentiae possessionis quae talibus occasionem praestat.

Ad quartum de primis motibus, dicendum, quod non quaelibet concupiscentia prohibetur illis praeceptis; sed illa sola quae consistit in consensu rationis, prout consentit vel in opus, vel in delectationem. Lex enim hominibus datur, non brutis. Unde prohibet motus humanos, non brutales.

ARTICULUS II.

Ad secundum sic proceditur. Et 1. videtur, quod lex vetus non prohibeat animum. Exod. 20. dicit Glossa, quod « lex vetus prohibebat manum, non animum. »

2. Praeterea, in Evangelio facta est additio perfectionis. Matth. 5: « Omnis qui viderit mulierem ad concupiscendum eam etc. »: hoc autem non esset si prohiberetur in lege actus exterior, et concupiscentia interior; ergo non prohibebatur ibi.

5. Praeterea, nihil prohibet animum, nisi gratia; sed lex vetus non dabat gratiam; ergo non prohibebat animum, sed tantum manum.

Contra. Rom. 7: « Concupiscentiam nesciebam etc., » ubi Glossa: « Bona est lex quae dum concupiscentiam prohibet, omnia mala prohibet; » ergo lex cohibet animum interiorem, et non tantum manum.

Praeterea, Levit. 19 dicitur: « Ne oderis fratrem tuum in corde tuo: » ubi manifeste cordis odium prohibetur.

Respondeo. Lex Moysi et divina, erat ordinans hominem ad Deum; et civilis ordinans hominem ad proximum; secundum statum reipublicae. Dico ergo quod in quantum divina et spiritualis, prohibebat concupiscentiam non solum progressivam in exteriora signa operis, ut in sollicitatione mulieris, sed interiorem prohibitionem morali, transgressoribus infligendo poenam aeternam. Sed in quantum civilis, prohibebat concupiscentiam progressivam solum prohibitionem judiciali, transgressoribus infligendo poenam temporalem. In quantum ergo divina, prohibebat quidem manum et animum: in quantum vero civilis, manum non animum, cohibitione judiciali, scilicet, infligendo poenam.

Ad primum, quod lex prohibebat manum, dicendum, quod loquitur de lege in quantum civilis quo ad prohibitionem judicialem, non in quantum divina et spiritualis.

Ad secundum de additione in Evangelio, dicendum, quod additio Evangelii dicitur fieri ad legem secundum intellectum legis literalem, non secundum spiritualem; vel ad ipsam in quantum lex civilis, non in quantum spiritualis. Sic enim Evangelium erat in lege non secundum verborum expressionem, sed secundum legis intentionem.

Ad tertium, nihil prohibet animum nisi gratia, dicendum, cohiberi animum dupliciter est: vel per modum inclinantis, et sic prohibet gratia; vel per modum jubentis, et sic lex.

ARTICULUS III.

Ad tertium sic proceditur. Et 1. videtur, quod lex vetus justificabat. Matth. 19: « Si vis ad vitam ingredi, serva mandata; » ergo observantia mandatorum moralium legis, de quibus loquitur, vitam praestabat; ergo justificabat.

2. Praeterea, Rom. 5: « Ex operibus legis non justificabitur. » Glossa, Augustinus loquitur secundum caeremonialia, non secundum moralia quae justificabant; ergo lex vetus justificabat.

5. Praeterea, Beda dicit, quod justitia legis suo tempore custodita, non solum bona temporalia, sed etiam vitam conferebat aeternam; ergo vere justificabat.

Contra. Supra illud Psal. 18: « Lex domini immaculata », Glossa « Lex vetus non faciebat animas immaculatas; ergo non justificabat. »

Praeterea, super illud 2 Cor. 5: « Litera occidit. » Glossa: « Litera, inquit, occidens, est decalogus; » ergo lex occidebat quantum ad moralia etiam, et non justificabat.

Respondeo. Justificari dupliciter contingit. Vel justitiam conferendo, vel ad justitiam disponendo. Contingit autem dupliciter justificare conferendo justitiam; quia aut justitiam politicam acquisitam, et sic opera legis justificabant, quia bonos habitus relinquebant. Sed de hac justitia non loquimur hic. Aut justitiam gratuitam infusam. Hoc autem modo lex vetus non justificabat, sed nova, quia gratiam et justitiam in sacramentis ministrat. Ad justitiam disponendo dupliciter contingit justificari. Aut justitiam promerendo; et sic opera legis justificabant quia augmentum justitiae apud Deum promerebantur. Aut etiam docendo; et sic etiam lex justificabat declinationem mali et operationem boni docendo. Sed quia magis docebat declinationem in qua consistit inchoatio justitiae, lex vero nova magis operationem boni in qua complementum justitiae, ideo lex vetus dicebatur docendo justificare imperfecte, Evangelium vero perfecte. Et sic patet solutio ad quatuor prima.

Ad ultimum, litera occidit, dicendum, quod lex dicitur dupliciter occidere. Uno modo per causam, morte temporali in praeceptis judicialibus. Altero modo per occasionem, morte etiam aeterna in praeceptis moralibus; et hoc triplici ratione. Una ratio sumitur ex parte rei concupiscibilis, quam ostendendo nec gratiam ad cavendum dando, concupiscentiam excitabat, sicut aqua visa, sitim. Altera ex parte concupiscentiae, quae naturaliter in vetitum quasi in arduum tendit. Lex autem prohibendo sive vetando, rem vetitam quasi arduum constituebat. Tertia ex parte actus concupiscendi, cujus inordinationi per quam legi naturali repugnat, circumstantiam praevaricationis legis scriptae peccatum aggravantem addebat.

ARTICULUS IV.

Ad quartum sic proceditur. Et 1. videtur, quod lex non promittebat temporalia; et sic non differabat ab Evangelio promittente aeterna. Quod promittitur in lege est praemium virtutis; bonum temporale non potest esse praemium virtutis, quia praemium melius est merito; ergo non est promissum in lege.

2. Praeterea, videtur, quod male assignetur differentia legis et Evangelii penes timorem et amorem. Multi in veteri Testamento observabant legem ex amore, multi in novo ex timore observant eam; ergo non est differentia legis utriusque.

3. Praeterea, videtur, quod nulla sit differentia haec. lex est gravitatis, Evangelium suavitatis. Dicitur enim Matth. 5: « Jota unum etc. »: ubi dicit Glossa, quod omnia legalia in Evangelio recapitulantur. Et Chrysostomus dicit, quod mandatum Christi legem tenet inclusam. Sed opus quod continet aliud in se, gravius est illo; ergo gravius est onus Evangelii, onere legis.

Respondeo. Differentia legis et Evangelii multiplex est. Una secundum causam efficientem; quia lex per Moysen data est; sed gratia et veritas per Jesum Christum Filium Dei, et Dominum nostrum. Joan. 1. Secunda penes causam finalem, et quo ad finem proximum; quia finis legis justitia imperfecta in declinatione mali, quod contrariatur praeceptis, est: finis vero Evangelii perfecta justitia in operatione boni perfecti, quod continetur in praeceptis et consiliis. Et quo ad finem ultimum: quia Evangelium aperte promittit et confert bona aeterna, lex vero non nisi sub figura temporalium promittebat aeterna, eo quod nondum poterant aeterna dari. Tertia penes causam materiale; quia lex continebat praecepta multa carnalia et caeremonialia, et sacramenta inefficacia; sed Evangelium praecepta spiritualia, et sacramenta efficacia. Quarta penes causam formalem: quia lex data est per modum timoris sub comminatione poenarum, unde eam dedit Deus de caelo terribiliter tonando: sed Evangelium per modum benignitatis, et sub promissione praemiorum. Unde ipsum Dominus dedit de terra inter discipulos sedendo, et dulciter colloquendo.

Ad illud, quod objicitur contra primam differentiam, dicendum, quod quamvis expresse lex promitteret temporalia, tamen figurative promittebat

aeterna. Promissa vero temporalia non ponebantur in lege ut praemia virtutum, sed ut excitantia ad virtutem; sicut distributiones quotidianae quae fiunt in Ecclesia, non ponuntur ut praemium venientis ad Ecclesiam, sed ut incitamentum veniendi.

Ad secundum, quod objicitur contra secundam differentiam de observantibus legem ex amore, dicendum, quod in veteri lege, secundum Augustinum, quidam erant pertinentes ad novam legem, ut perfecti qui legem servabant ex amore; et e contrario in nova sunt multi pertinentes ad veterem, qui Evangelium servant ex servili timore. Haec autem differentia datur secundum communem statum, non quantum ad personas singulares.

Ad illud, quod objicitur de tertia differentia, dicendum, quod de comparatione legis et Evangelii in gravitate est loqui dupliciter, sicut de gravitate alicujus oneris: aut secundum se, aut in comparatione ad vires portantis. Secundum se, adhuc dupliciter: aut secundum quantitatem praeceptorum, et sic lex vetus gravior; aut secundum qualitatem, sic lex nova, quia perfectiora praecepta dantur in ea. In comparatione vero ad vires portantis lex nova levior est propter gratiam quae confertur in ejus sacramentis, ex qua gratia fluunt virtutes, quae sunt onus leve.

Ad illud, Evangelium continet legem, dicendum, quod continet eam in sensu legis spirituali, sed non in sensu literali ex quo habebat maximam gravitatem.

Expositio textus.

« Non ancillam. » Sciendum, quod ancilla dupliciter potest concupisci. Uno modo ad concubitum, et sic pertinet ad sextum praeceptum. Alio modo ad dominium, et sic pertinet ad septimum praeceptum. Jesu Christo filio Dei incarnato et passo, sicut superius est ostensum, sit honor et gloria per infinita saecula saeculorum. Amen.

DE SACRAMENTIS

LIBER QUARTUS

PROLOGUS

« Medicina omnium in festinatione nebulae. »
Eecl. 45. Sacramenta novae legis per nebulam designantur triplici ratione. Primo propter principium. Nam nebularum principium sunt pluviae. Sunt enim pluviarum reliquiae, ut Philosophus dicit. Ita et sacramenta novae legis sunt quaedam divinae incarnationis reliquiae, de quibus Psal. 20 dicitur. Eccles. 45: « Aperti sunt thesauri et evolaverunt nebulae quasi aves. » Latere enim in cruce pendens apertus in quo sunt omnes thesauri sapientiae et scientiae Dei absconditi, ut dicitur Col. 2, perfluxerunt sacramenta quibus Ecclesia constituitur, et per quae in caelum evolatur. Secundo propter signum, Nam nebula est signum serenitatis futurae, secundum Philosophum. Ita et sacramenta sunt signa serenitatis gratiae per quam serenatur a culpa, et gloriae per quam serenatur a miseria. Et ideo dicitur Num. 1: « Nebulae pulvis pedum ejus, » scilicet Dei; quasi ejus praesentiam in anima praesignant, per quam praesentiam anima serenatur. Unde subjungitur: « Increpans mare et exsiccans illud. » Tertio propter occultationis effectum. Nam per nebulam occultantur res a nostris aspectibus. Ita et in sacramentis occultatur invisibilis gratia quae operatur salutem. 5 Reg. 8: « Dixit Dominus ut habitaret in nebula. » Hujus ergo nebulae, scilicet Ecclesiae sacramenta, describuntur in verbis praemissis, quantum ad tria. Tangitur namque sacramentorum effectus, virtus et tempus. Effectus quidem in hoc quod dicit: « Medicina. » Sunt enim sacramenta quaedam spirituales medicinae sanantes peccati vulnera: et de hac medicina dicitur Eecl. 58: « Altissimus de terra creavit medicinam. » De terra namque, id est de humanitate Christi, sacramenta medicinalem efficaciam habent contra peccatum. Isa. 44: « Delevi ut nubem iniquitates tuas, et quasi nebulam peccata tua. » Virtus vero ostenditur in hoc quod dicit: « Omnium: » quia efficaciam habent sufficientem ad omnem medelam: et hoc est propter virtutem passionis Christi, quae in eis operatur « qui est propitiatio pro peccatis nostris, et non solum pro nostris, sed etiam pro totius mundi, » ut dicitur 1 Joan. 2. Et ideo dicitur Eecl. 24: « Sicut nebula texi omnem terram: » remedium, scilicet sacramenta, contra fontis ardorem praebendo. Tempus vero ostenditur in hoc quod dicit « in festinatione, » Per sacramenta enim fit quaedam praelibatio futurae salutis quae erit in beatis: ut sic per sacramentorum institutionem salus repromissa festinare videatur, quantum ad sui primordia. Unde dicitur Eecl. 56: « Festina tempus, » scilicet gratiae, in quo sacramenta dantur « et memento finis », scilicet perfectionis gloriae. Et ideo dicitur Amos 4: « Et annuntians homini colloquium suum faciens nebulam matutinam, » id est sacramenta quae sunt tempore

gratiae quod est quasi matutinum respectu plenae claritatis quae erit in patria. Sic ergo ex verbis praemissis accipi potest materia hujus quarti libri, in quo Magister agit de sacramentis et gloria resurgentium quae per sacramenta inchoatur et praesignatur.

DISTINCTIO I.

Samaritanus enim etc. (V. edit. nostrae tom. VII, pag. 432).

QUAESTIO I.

Hic quaeruntur quinque: 1.º de definitione sacramenti; 2.º de ejus necessitate; 3.º utrum consistat in verbis et rebus; 4.º de effectu sacramentorum novae legis; 5.º de effectu sacramentorum veteris legis.

ARTICULUS I.

Ad primum sic proceditur. Et 1. videtur, quod Magister non bene definiat sacramentum, cum dicit quod est sacrae rei signum. Hoc enim quod dico, Deus vel Spiritus sanctus, signum est res sacrae, non tamen sacramentum; ergo etc.

2. Praeterea, agnus paschalis Exod. 12, et serpens Num. 21, et columba, Luc. 5, et petra fundens aquas, 1 Cor. 10, signa fuerunt rerum sacrarum, non tamen dicuntur esse sacramenta; ergo.

Ad secundam definitionem Augustini positam in litera, Sacramentum est invisibilis gratiae visibilis forma, sic opponitur. Corpus Christi in altari et character in baptismo et inseparabilitas matrimonii non sunt formae visibiles, et tamen sunt sacramenta; ergo male dicit quod sacramentum est visibilis forma.

Praeterea, gratia quaedam forma est. Formae vero non est forma etc.

Contra expositionem hujus definitionis a Magistro in litera positam « talem ut ipsius similitudinem gerat et causa existat » sic opponitur. Aqua benedicta signum est et causa alienius gratiae quae ibi confertur, per quam fit remissio venialis; et tamen non est sacramentum.

Praeterea, Episcopalis consecratio signum est alienius gratiae quae ibi confertur, scilicet potestatis episcopalis; et tamen non est sacramentum.

Respondeo. Dicendum, quod sacramentum dicitur a sacrando active. Hoc autem potest fieri tripliciter. Aut efficiendo tantum; et sic res sacra dicitur sacramentum, ut dicit Magister, sicut Christi passio quae est causa meritoria sanctificationis nostrae. Aut signando tantum, et sic definitur primo a Magistro, Sacramentum est sacrae rei signum. Aut utroque modo; et sic definitur ab Augustino

secundum expositionem Magistri in litera positam. Sacramentum est invisibilis gratiae visibilis forma, cujus similitudinem gerit et causa existit.

Ad illud quod contra primam definitionem obijcitur de hac voce, Deus vel Spiritus sanctus, dicendum, quod hujusmodi voces signa sunt rei sacrae, in quantum res est, non in quantum nos per eam sanctificamur. Similiter omnis effectus causatus a Deo. Sacramentum autem est signum rei sacrae, in quantum sacra est et sanctificans nos. Vel dicendum, quod sacramentum dicitur id quod habet significare rem sacram, ut dicit Hugo de Sancto Victore, ab aptitudine naturalis similitudinis, et ab actu institutionis, et ex eo quod spiritualem gratiam sanctificantem continet. Primum et tertium deficient in hujusmodi signis.

Ad secundum de agno paschali et reliquis aliis, dicendum, quod omnia illa, large accipiendo nomen sacramenti, secundum primam definitionem sacramenta dici possunt, quia sunt sacrae rei signa; non tamen proprie.

Ad tertium quod obijcitur contra definitionem Augustini de corpore Christi et characteris baptismi et inseparabilitate matrimonii, dicendum, quod hoc non dicuntur sacramenta, nisi in quantum sunt conjuncta aliquibus visibilibus formis.

Ad quartum, quod formae non est forma, dicendum, quod hoc verum est de forma intrinseca quae est pars rei, non de extrinseca, quae est potius expressio, seu similitudo, sicut figurae animalis potest esse forma repraesentativa extrinseca.

Ad quod obijcitur contra expositionem Magistri de aqua benedicta, dicendum, quod quamvis venialia ibi remittantur, non tamen oportet quod ibi nova gratia conferatur; quia ad remissionem venialis non requiritur novus habitus gratiae, sed novus motus sufficit. Vel dicendum, quod illa remissio fit non per modum sacramenti, sed per modum meriti, ratione novi actus liberi arbitrii gratia informati.

Ad sextum quod obijcitur de consecratione episcopali, dicendum, quod gratia quae ibi confertur, non est gratia gratum faciens quae ex hoc inesse incipiat, nisi forte ratione devotionis suscipientis quae debet inesse. Potestas vero episcopalis non est gratia sacrans subjectum proprium, sed est gratia gratis data. Vel potest dici quod consecratio episcopalis, quamvis non sit sacramentum, est tamen quid sacramentale. Ordinatur enim ad sacramentum ordinis conferendum; et sic nihil prohibet quod in ea gratia detur.

ARTICULUS II.

Ad secundum sic proceditur. Et 1. videtur, quod sacramenta novae legis non debuerunt institui, nec ex parte Dei, nec ex parte sacramenti, nec ex parte aegroti. Quod non ex parte Dei, probatur. Majus est recreare quam creare, quia secundum Augustinum, majus est justificare impium quam creare caelum et terram: sed Deus creavit hominem sine omni medio; ergo et recreare debuit; et ita sine sacramentis.

2. Praeterea, videtur quod nec ex parte sacramenti. Contraria enim contrariis curantur: sed homo morbum peccati incurrerat, se per affectum rebus terrenis subjiciendo; ergo non convenienter curatur

per hoc quod subjicit se corporalibus elementis in susceptione sacramentorum.

5. Praeterea, videtur quod nec ex parte aegroti. Quanto magis aretata est via veniendi ad sanitatem, tanto pejus est aegro: sed additis sacramentis ipsis mandatis aretata est via, quia prius per observantiam mandatorum, sine sacramentis habebatur salus; ergo institutio sacramentorum mala est aegroti.

Contra. Ad habendum sanitatem plura necessaria sunt infirmo quam sano, scilicet medicamenta; ergo licet fides et opera ad salutem sufficere possent ante peccatum, tamen post peccatum oportuit addi medicamenta; ergo sacramenta.

Praeterea, tanto efficacior est medicina spiritualis quanto infirmus ad eam devotius afficitur: sed spiritus in corpore ad spiritualia in corporalibus magis afficitur quam ad pura spiritualia; ergo talem fuit utile esse medicinam: sed hujusmodi sunt sacramenta; ergo.

Respondeo. Dicendum, quod gratia donorum et virtutum, in hoc differt a gratia sacramentorum, quod prima est ad perfectionem et expeditionem potentiarum respectu ipsorum actuum; secunda vero est ad curationem morbi, sive ad integrationem potentiarum, propter vulnerationem ipsarum per peccatum. Quia ergo curatio morbi et reintegratio potentiarum necessaria est: ideo post peccatum necessarium fuit institui sacramenta, ut in elementis corporalibus gratiam curationis homo quaereret, ex quibus occasionem morbi acceperat.

Ad primum quod obijcitur de creatione, dicendum, quod non est simile: quia creatio est de nihilo, et ideo in creando non potest esse dispositio ad creationem; sed recreatio est prius existentis; et ideo potest esse dispositio in re creato. Unde quamvis Deus sine medio creet, tamen in recreatione potest aliquod medium disponens intervenire; et hujusmodi sunt sacramenta quae sunt causae disponentes ad gratiam.

Ad secundum dicendum, quod homo morbum peccati incurrit se subjiciendo rebus terrenis propter ipsas: sed e contrario curatur subjiciendo se eis propter Deum.

Ad tertium, quod quanto magis aretata est via ad sanitatem etc., dicendum, quod verum esset, si plures viae essent ita efficaces et expeditae et honae sicut una. Sed non est sic in proposito; quia sacramenta valent ad debilitationem fontis et ad remissionem poenae vel pro toto vel pro parte.

ARTICULUS III.

Ad tertium sic proceditur. Et 1. videtur, quod sacramenta novae legis non consistant in rebus et verbis. Ex duobus enim quae non possunt conjungi non potest aliquid unum fieri; sed res et verba non possunt conjungi; ergo non potest ex eis unum sacramentum fieri.

2. Praeterea, sicut in sacramentis requiruntur verba, ita facta quaedam, ut dicit Hugo in litera de Sacramentis: sed facta non ponuntur de integritate sacramenti; ergo nec verba debent poni.

5. Praeterea, poenitentia et matrimonium sunt quaedam sacramenta; sed de integritate eorum non sunt verba aliqua; ergo non est verum de omnibus sacramentis, quod consistant in rebus et verbis.

Contra. Medicina debet proportionari morbo: sed morbus peccati, hominem quantum ad animam et

corpus infecerat; ergo in medicina debet esse aliquid ad corpus, et aliquid ad animam pertinens; oportet ergo esse rem corporalem et vocem significativam: et sic in sacramento, cum sit quaedam medicina contra peccati morbum instituta, et res et verba oportet esse.

Praeterea, sacramenta ex naturali similitudine repraesentant, secundum Hugonem; cum ergo repraesentent ea quae gesta sunt circa auctorem suum, scilicet Christum, in quo fuit verbum unitum rei sensibili, scilicet carni, in sacramentis debet esse res et verbum.

Respondeo. Dicendum, quod commune est omnibus sacramentis, quod consistant in rebus sensibilibus invisibilem gratiam significantibus: sed speciale est sacramentis novae legis quod consistant etiam in verbis, triplici ratione. Una est ex parte causae; ut scilicet perfectius repraesentent auctorem suum, in quo fuit unio verbi et carnis. Altera est ex parte signi; quia expressiora debent esse signa, quanto propinquiora sunt signatis. Huiusmodi sunt autem verba, quae inter signa obtinent principatum, ut dicit Augustinus in libro de Doctrina Christiana. Tertia est ex parte virtutis sacramenti, quia habet efficaciam ratione significationis. Sanctificatio vero creaturae fit per verbum Dei et orationem, ut dicitur 1 Timoth. 4.

Ad primum quod opponitur de duobus quae non possunt conjungi, dicendum, quod quamvis non possit ex separatis fieri unum unitate absoluta in essendo, potest tamen secundum quid fieri unum unitate relativa per comparisonem ad aliquid unum, scilicet in causando vel significando; sicut pater et mater sunt unum principium completum generationis. Sacramentum vero unum dicitur non unitate absoluta, sed relativa, in significando unum et causando.

Ad secundum de factis, dicendum, quod facta non pertinent ad essentiam, sicut res et verba, sed ad usum sacramenti. Vel dicendum, quod facta continentur sub rebus.

Ad tertium de poenitentia et matrimonio, dicendum, quod matrimonium, secundum quod est in officium, et poenitentia, secundum quod est virtus, non habent aliquam formam verborum: sed secundum quod utrumque est sacramentum in dispensatione ministrorum Ecclesiae consistens, utrumque habet aliqua verba, sicut in matrimonio sunt quaedam de praesenti exprimentia consensum et benedictiones ab Ecclesia institutae: in poenitentia autem est absolutio sacerdotis verbotenus facta. Vel dicendum, quod in his ut sacramenta sunt, requiruntur aliqua signa loco verborum.

ARTICULUS IV.

Ad quartum sic proceditur. Et 1. videtur, quod sacramenta novae legis non sint causa gratiae. Dicit enim Bernardus in sermone de Coena Domini: « Sicut investitur canonicus per librum, Abbas per baculum, Episcopus per anulum, sic divisiones gratiarum sunt diversis traditae sacramentis. » Sed liber non causat canonicum, nec anulus Episcopum; ergo nec sacramenta gratiam.

2. Praeterea, nobilior est agens patiente, secundum Augustinum 12 super Genesis, et Aristotelem 5 de Anima; et causa dignior est effectui: sed tam anima rationalis quam gratia praevalet sensibilibus

elementis; ergo sacramentum quod est materiale elementum, non potest agere in animam ad causandam gratiam.

3. Praeterea, sacramenta non causant gratiam in anima per modum influentiae, quia sic facerent ipsam; nec iterum educunt eam de potentia materiae, quia gratia non est in potentia materiae; ergo nullo modo gratiam causant.

4. Praeterea, nihil agit effectum spirituales, nisi per aliquam spiritualem virtutem. Sed in sacramentis non est aliqua spiritualis virtus, cum sint materialia elementa; ergo videtur quod sacramentum non sit causa gratiae.

Contra. Augustinus dicit: « Aqua baptismatis corpus tangit et cor abluit: » sed cor non abluatur nisi per gratiam; ergo sacramenta novae legis gratiam causant.

Praeterea, quamvis scientia sit res spiritualis, tamen signum exterius, ut doctrina, potest esse causa scientiae in anima; ergo a simili, quamvis gratia sit res spiritualis, tamen signum exterius potest esse causa gratiae in anima.

Respondeo. Circa hoc duae sunt opiniones. Quidam enim dicunt, quod non ex virtute aliqua quae sit in sacramentis, sed per modum cuiusdam participationis et ordinationis, virtute divina eis assistente, sunt causa gratiae. Deus enim sic ordinavit quod illi infunderet gratiam qui se subiceret sacramento; sicut denarius plumbeus dicitur esse causa collationis centum librarum, quia rex sic ordinavit, ut habenti talem denarium darentur centum librae.

Sed contra hoc est, quod secundum haec, sacramenta non essent causa gratiae, sed signum gratiae conferendae, suscipienti sacramentum; sicut nec denarius plumbeus est causa, sed signum tantum collationis centum librarum. Unde haec positio est directe contra dicta Sanctorum dicentium, quod sacramenta novae legis efficiunt, quod figurant, et Augustinum dicentem « Quae est tanta vis aquae, ut cor abluat? » Et ideo alii dicunt quod duplex est causa gratiae. Una principalis, quae causat et efficit gratiam. Alia ministerialis, quae disponit ad gratiam. Et sic sacramentum, ut est instrumentum divinae misericordiae, est causa gratiae; quia instrumentally causat dispositionem necessariam, quantum est de se, ut characterem, vel aliquem ornatum animae ad gratiam, agendo in corpus naturali actione, utputa abluendo, vel tergendum; sicut etiam quodlibet aliud instrumentum ad actionis principalis agentis effectum, pervenit actione naturali.

Ad primum, Bernardus dicendum, quod similitudo attenditur quantum ad figurationem eorum de quibus loquitur, sed non quantum ad causalitatem.

Ad illud quod nobilior est agens patiente, et causa suo effectui, dicendum, quod verum est in quantum agens, non tamen simpliciter; sicut ferrum, in quantum agit in corpus humanum, nobilior est eo, non tamen simpliciter. Propositio autem secunda veritatem habet de causa principali, non de instrumentali.

Ad tertium, aut sacramenta influunt vel educunt gratiam, dicendum, quod causant non influendo, sed disponendo; ut dicantur gratiam influere, sicut influunt instrumenta aliquam formam, quia per ea Deus gratiam influit, ut in corpore dictum est.

ARTICULUS V.

Ad quintum sic proceditur. Et 1. videtur, quod sacramenta veteris legis justificabant. Dicit enim Hugo in libro de sacramentis: « Sacramentorum autem alia fuerunt ante legem, alia sub lege, alia sub gratia: specie quidem differentia, sed eundem effectum sanctificationis habentia; » ergo justificabant.

2. Praeterea, dicimus in Canone: « Respicere digneris, et accepta habere, sicuti accepta habere dignatus es munera pueri tui justis Abel: » cum ergo ita placeat sacrificium, ut faciat nos placentes; et sic Deo placuit sacrificium Abel; sequitur a simili, quod legis sacrificia Deo placuerint, et per consequens homines justos fecerint.

3. Praeterea, impossibile est sine gratia satisfacere: sed sacramenta veteris legis erant satisfactoria, unde pro diversis peccatis diversa sacrificia injungebantur, ut patet in libro Lev. 2; ergo gratiam conferebant.

Sed contra. Heb. 10 dicitur: « Impossibile est sanguine hircorum et taurorum auferri peccata: » sed gratia tollit peccatum; ergo antiqua sacramenta gratiam non conferebant.

Praeterea, Isaias 1: « Holocausta nolui, » Glossa, « Praeterito utens, ostendit se sacrificia Judaeorum nunquam amasse; » ergo non justificabant.

Respondeo. In sacramentis legalibus duo est reperire: scilicet opus operans, idest usum sacramenti, et opus operatum, idest ipsum sacramentum. Utrum autem justificarent quo ad haec duo, vel alterum illorum, triplex legitur opinio. Una Hugonis de Sancto Victore, quod utroque modo justificabant: et quo ad opus operans per modum meriti, quando fiebant ex charitate, et quo ad opus operatum per modum sacramenti, in quantum erant signa Christi et sacramentorum ejus, unde eorum susceptio erat quaedam Christi professio: et ideo mediantibus nostris sacramentis, directe et indirecte habebant justificare. Sed haec opinio contrariatur dictis Sanctorum, qui dicunt quod lex erat occasio mortis, in quantum ostendebat peccatum, et gratiam adjutricem non conferebat. Nec differt utrum eam directe, vel indirecte conferrent. Secunda autem opinio contraria huic, est opinio Magistri dicentis, quod nec quo ad opus operans, nec quo ad opus operatum gratiam conferebant; eo quod opus operans erat institutum in onus, non in meritum; et opus operatum in signum, non in causam.

Sed contra hoc est, quod actus virtutis, si sit gratia informatus, est meritorius. Unde opus operans in his sacramentis, cum esset actus virtutis, idest laetitia, quia exhibitione talium sacramentorum Deus colebatur, si erat gratia informatus, erat meritorius. Ideo tertia opinio communis dicit, quod justificabant quo ad opus operans per modum meriti, non quo ad opus operatum, per modum sacramenti.

Ad primum de Hugone, dicendum, quod opinio ejus fuit illa, quam nos non sequimur.

Ad secundum de Canone, dicendum, quod petimus, ut placeat similiter, quo ad devotionem sanctificationis, non quo ad efficaciam sacrificii.

Ad tertium quod erant satisfactoria, dicendum, quod verum est quo ad opus operans, non quo ad opus operatum.

Fuit tamen inter illa etc. (V. edii. nostrae tom. VII, pag. 455.)

QUAESTIO II.

Hic quaeruntur quatuor: 1.º utrum ante circumcisionem parvuli salvarentur, in fide informi parentum; 2.º an sufficeret fides, sine aliquo exteriori signo; 3.º de necessitate institutionis circumcisionis; 4.º de effectu circumcisionis.

ARTICULUS I.

Ad primum sic proceditur. Et 1. videtur, quod ante circumcisionem, parvuli in fide informi parentum non potuerint salvari. Fides enim informis est mortua, ut dicit Jacobus: sed quod mortuum est, nec sibi, nec alteri prodest; ergo nec fides informis subjecto proprio vel alieno prodest.

2. Praeterea, quod Deo non placet, neminem justificat: sed fides informis Deo non placet; ergo neminem justificat.

3. Praeterea, efficacior est charitas quam fides: sed charitas aliena, nunquam sufficit ad meritum; ergo nec fides ad justificationem.

Contra. Nunquam potest constare de fide formata patris; ergo si illa requirebatur, nunquam poterat constare de salute parvuli; quod est inconveniens.

Praeterea, peccatum actuale parentis, non debet nocere parvulo: noceret autem, si fides parentis efficaciam salvandi parvulum perderet ex peccato adjuncto; ergo non perdit, sed salvat.

Respondeo. Fides operatur ad subjectum, et ad objectum. Ex parte subjecti, non habebat fides virtutem salvandi parvulum, sed ex parte objecti; cum virtus subjecti particularis sit, et determinata ad unum; virtus autem objecti, quod Deus est, universalis et infinita. Cum autem informitas insit fidei ex parte subjecti, non tamen ex parte objecti, informitas fidei non tollebat fidei virtutem salvandi parvulum.

Ad primum, quod fides informis mortua est, dicendum, quod quamvis sit mortua quo ad meritum de condigno, non tamen de congruo. Vel quamvis sit mortua quo ad subjectum proprium, non tamen quo ad objectum.

Ad secundum, fides informis Deo non placet, dicendum, quod falsum est. Nam fides informis, cum sit a Deo, placet tamquam meritoria ex congruo, et ut disponens ad charitatem; sed non ex condigno.

Ad tertium dicendum, quod secus est de fide et charitate. Nam fides est primum per quod homo Deo conjungitur; et ipsa fides cum sit in cognitione, respicit suum objectum in quadam universalitate; sed charitas in ratione ad proprium subjectum, secundum quod affectus tendit in proprium bonum.

ARTICULUS II.

Ad secundum sic proceditur. Et 1. videtur, quod parvulis non sufficeret fides, sine signo exteriori. Non enim erat fides tunc majoris virtutis, quam modo: sed modo non sufficit salvare parvulum fides sine exteriori signo; ergo nec tunc.

2. Praeterea, si sola fides sufficiebat, tunc parvuli nati de fidelibus non poterant damnari: sed

nodo et tempore legis damnari possunt; ergo peioris conditionis sunt nunc quam tunc.

3. Praeterea, actus fidei interior, aequae se potest extendere ad iam natos et conceptos; ergo si non requirebatur aliquod signum exterius circa parvulos, aequae bene poterat salvari parvulus conceptus per motum fidei intrinsecum, sicut iam natos.

Contra. Sola fides parvulis sufficiebat, secundum Gregorium: non ergo requirebatur aliquod sacramentum vel signum.

Praeterea, Hugo dicit quod tempore legis naturae non fuerunt aliqua sacramenta in praecepto: sed sine eo quod non est in praecepto est salus, et cum originali non est salus; ergo sola fide sine aliquo sacramento, poterat tolli originale, et salus esse.

Respondeo. Circa haec est duplex opinio. Una dicentium, quod nunquam sufficiebat fides, sine exteriori signo, in quo esset fidei professio. Sed parvulis sufficiebat fides aliqua, et aliena professio; adultis propria. Sed quia non videtur consonare verbis Gregorii in litera positus, ideo alii probabilius dicunt, quod cum ad remedium originalis nulla signa vel sacramenta forent adhuc instituta, sufficiebat professio fidei, directa ad salutem parvuli in solo motu interiori, sine ullo exteriori.

Ad primum ergo, Non minoris efficaciae erat fides, dicendum, quod hoc non convenit (1) propter minorem efficaciam fidei; sed propter obligationem ad plura, sine quorum observantia non est salus.

Ad secundum, quod peioris conditionis sunt nunc quam tunc, dicendum, quod verum est quantum ad aliquid, quia illi tunc facilius curabantur; sed simpliciter melioris conditionis sunt nunc; quia in baptismo multo major datur gratia quam tunc, et est modo major certitudo salutis.

Ad tertium de parvulo concepto, dicendum, quod puer adhuc in utero matris existens, quantum ad humanam cognitionem pertinet, non habet esse distinctum a matre; et ideo per actum hominis, gratiam consequi non potest; nec nunc ut mundetur ab originali per baptismum, nec tunc ut mundaretur per fidem parentum.

ARTICULUS III.

Ad tertium sic proceditur. Et 1. videtur, quod non fuerit necessarium circumcisionem dari. Sapientis enim est facere aliquid quanto brevius potest: sed per fidem sufficienter originale purgabatur in lege naturae; ergo non oportuit in remedium originalis, circumcisionem dari.

2. Praeterea, peccato originali non debetur poena sensibilis; ergo non congruit ei medicina poenalis, et sic nec circumcisio.

3. Praeterea, infirmo debili, non debet dari medicina gravis; ergo parvulis dari non debuit medicina circumcisionis.

Contra. Contraria contrariis curantur; ergo morbo qui per delectationem generativae contrahitur, congrue applicatur medicina inferens dolorem membro generationis.

Praeterea, circumcisio est signaculum fidei, quae est in praecipuo patris nostri Abrahae, Rom. 4: sed conveniens fuit illam fidem signari, ejus nos oportet omnes imitatores existere; ergo congruit circumcisionem dari.

(1) *Lege contingit.*

S. Th. Opera omnia. V. 22.

Respondeo. Circumcisionis institutionis duplex fuit causa. Una expressa signatio ablationis originalis; ut sicut explicatio fidei crescebat secundum processum temporis, ita cresceret distincta signatio sacramentalium signorum. Hanc autem circumcisio repraesentat, quantum ad quatuor. Primo quantum ad membrum generationis in quo fiebat, per quam originale transfunditur. Secundo quantum ad figuram circularem in qua signatur circulus, qui est in processu originalis infectionis, secundum quod persona corrumpit naturam, et natura personam. Tertio quantum ad poenam quae erat in circumcissione, contra delectationem concupiscentiae, in qua praecipue viget fomitis virtus. Quarto quantum ad sanguinis effusionem, in quo signatur passio Christi per quam pro originali satisfaciendum erat: et quantum ad hanc virtutem definitur circumcisio, quod est signaculum curationis ab originali. Secunda causa fuit, distinctio fidelis proprie ab infideli, propter fidem ejus cui data fuit circumcisio, scilicet Abrahae: et quantum ad hanc utilitatem definitur a Damasceno circumcisio « est signum determinans « Israel a gentibus cum quibus conversabatur. »

Ad primum, quod brevius erat remedium in lege naturae, dicendum, quod verum est; sed non utilius; quia etsi morbum tollebat, non tamen notificabat.

Ad secundum de poena sensibili, dicendum, quod intelligitur hoc de poena aeterna, quae est inutilis ad salutem suam; non de temporali, quae est utilis.

Ad tertium de infirmo debili, dicendum, quod est gravitas importabilis, quae non debet imponi infirmo; et est gravitas tolerabilis, quae potest imponi et debet, ratione annexae utilitatis; quia imponitur non ut poena, sed ut medicina.

ARTICULUS IV.

Ad quartum sic proceditur. Et 1. videtur, quod in circumcissione, non conferatur gratia. In sacramento enim aequae vel amplius se extendit ratio signandi quam efficiendi: sed ratio signandi in circumcissione, solum est in ablatione non in collatione; ergo et ratio efficiendi; ergo solum aufert originale, et non confert gratiam.

2. Praeterea, baptismus non amplius nunc facit, nisi quod aufert culpam, et confert gratiam; si ergo hoc ipsum circumcisio faciebat, baptismus in nullo circumcissionem excedit.

3. Praeterea, ad Rom. 4, ubi Apostolus ait: « Signaculum justitiae fidei, » dicit Glossa: « In circumcissione tantum peccata remittebantur, et non dabatur gratia. »

Contra. Tenebra non expellitur, nisi per lucis introductionem; sed circumcisio tenebram spiritualem, id est culpam expellebat; ergo lucem spiritualement, id est gratiam introducebat.

Praeterea, Beda dicit, quod idem remedium conferebat circumcisio contra onus peccati originalis, quod confert baptismus, qui januam regni caelestis aperit: sed baptismus gratiam confert, et non solum culpam aufert; ergo circumcisio idem facit.

Respondeo. Circa hoc quadruplex legitur opinio. Una dicentium, quod circumcisio tollebat peccatum, sed non conferebatur ibi gratia.

Sed contra est. Nam si decedebat statim post circumcissionem parvulus; aut ibat in infernum sine culpa, aut in paradysum sine gratia; quorum neutrum dicendum est. Alia est dicentium, quod tolle-

batur culpa, et ibi conferebatur gratia, non per vim circumcisionis, sed solo beneplacito divino.

Sed contra est, quod non tollitur culpa nisi per gratiam: quod ergo tollit culpam, oportet quod conferat gratiam per quam tollit culpam. Altera est dicentium, quod tollit culpam, et confert gratiam, quo ad effectus gratiae privativos, ut privare peccato, et huiusmodi, non positivos.

Sed contra hoc est, quod non potest esse gratia sine effectu, qui est facere gratum Deo et dignum vita aeterna. Hic vero effectus positivus est, non privativus. Et ideo aliorum verior est opinio dicentium, quod dabit gratiam quantum ad effectus privativos culpae et reatus, et quantum ad effectus gratiae positivos, sicut ordinare animam, et habilitare potentias ad agendum, et huiusmodi; quamvis gratia baptismalis hoc perfectius facit, quia gratia baptismalis reprimit concupiscentiam, ut non sit difficile contra eam agere; ad quod non sufficiebat gratia per circumcisionem collata.

Ad primum, non extendit se amplius ratio signandi in sacramento quam efficiendi, dicendum, quod hoc verum est, quantum ad effectum sacramenti principalem, et non secundarium. Circumcisionis autem principalis effectus, est remotio culpae, sed ex consequenti collatio gratiae.

Ad secundum quod obijcitur de baptismo, dicendum, quod amplior gratia datur in baptismo, ut dictum est.

Ad tertium de Glossa, dicendum, quod conferebatur gratia ex intentione, non principali, sed secundaria; quia circumcisionis signatio est in auferendo, et non in conferendo.

2

Jam ad sacramenta novae legis etc. (V. edit. nostrae tom. VII, pag. 477.)

QUAESTIO UNICA.

Hic quaeruntur quatuor: 1.^o de tempore institutionis sacramentorum novae legis; 2.^o de numero sacramentorum; 3.^o utrum baptismus Joannis fuerit sacramentum; 4.^o utrum baptizati baptismo Joannis, fuerint rebaptizandi baptismo Christi.

ARTICULUS I.

Ad primum sic proceditur. Et 1. videtur, quod ante lapsam debuissent institui sacramenta. Quia enim diabolus peccavit irremediabiliter, ideo cum ipso fuit creatus locus suae poenae; ergo quia homo remediabiliter, ideo cum ipso debuit institui ejus remedium. Sed ejus remedia sunt sacramenta; ergo simul cum creatione hominis, debuerunt institui sacramenta.

2. Ad idem, matrimonium, quod minus habet de efficacia, ante lapsum fuit institutum; ergo similiter et caetera sacramenta, cum plus habeant de efficacia.

3. Praeterea, videtur quod tempore legis naturae, statim post eam debuerint institui. Ex quo enim est morbus, debet esse medicina; cum ergo omnia sacramenta novae legis sint quaedam medicinae peccatorum; ex quo peccata fuerunt, debuerunt esse sacramenta.

4. Praeterea, videtur quod tempore legis mo-

saicae sacramenta ista instituta sunt ad eruditionem, exercitationem et habilitationem: sed istis indigebat homo, maxime illo tempore; ergo debuerunt institui.

5. Praeterea, videtur quod semper eadem sacramenta debuerunt institui: quia idem est institutor, scilicet Christus; idem morbus, contra quem sunt instituta, scilicet peccatum; ab eodem habent efficaciam, scilicet a passione Christi; et eadem virtute, scilicet fidei; ergo sacramenta semper sunt eadem.

Respondeo. Sacramenta novae legis sunt instituta in remedium contra morbum spirituales. Ad curam autem morbi spiritualis, exiguntur ad minus tria. Duo ex parte infirmi: scilicet cognitio infirmitatis, et cognitio impotentiae propriae ut quaeratur medicus. Tertia est ex parte medici; cognitio videlicet ejus potentiae. Cum ergo, tempore legis naturae, nondum cognosceretur morbus, unde bene ob ejus cognitionem instituta est lex; tempore autem legis scriptae etsi cognitus est morbus, nondum cognita erat hominis impotentia, dicebat enim quod non deerat qui faceret, sed qui praeciperet; ideo post haec tempora in adventu medici, debuerunt medici sacramenta gratiam conferentia institui a quo habent efficaciam.

Ad primum, cum diabolo paratus est locus suae poenae, dicendum, quod non est simile; quia facilius permittit se cadere qui videt medicinam praeparatam ante morbum. Poena autem a culpa detinet. Ideo bonum fuit tunc instituere poenam, non tamen medicinam.

Ad secundum de matrimonio, dicendum, quod non est simile de eo et de reliquis sacramentis: quia sacramenta instituta sunt in remedium: in quo matrimonium communicat cum aliis sacramentis: tamen ante lapsum institutum est in officium naturae.

Ad tertium, ex quo morbus est, dicendum, quod semper fuit medicina; non tamen medicina perfecta, sed sufficiens pro statu morbi et infirmi.

Ad quartum, quod his ad quae instituta sunt sacramenta tempore legis mosaicae indigebat homo, dicendum, quod non tantum ad hoc, sed ad gratiae collationem sacramenta novae legis valent, et sic sunt medicina. Medicina autem non debet institui nisi adsit cognitio infirmitatis et impotentiae infirmi, et potentiae medici, ut dictum est.

Ad quintum, idem est institutor etc., dicendum, quod non sequitur: quia sapiens institutor, instituit unicuique convenientia temporis sacramenta secundum quod oportet. Similiter, licet idem sit morbus, non tamen simpliciter cognitus. Licet etiam ab eodem habeant virtutem, scilicet a passione; quae nunc est exhibita, sed tunc erat promissa.

ARTICULUS II.

Ad secundum sic proceditur. Et 1. videtur, quod inconvenienter assignentur septem sacramenta. Sacramenta enim efficaciam habent a passione Christi: sed passio Christi sufficienter operator in Eucharistia in ejus commemorationem offertur, ut patet Matth. 26; ergo non debuit esse aliud sacramentum.

2. Praeterea, lex nova minus habet de figuris quam lex vetus vel naturae: sed lex naturae habet tantum tria sacramenta, scilicet oblationes, decimas et sacrificia, ut dicit Hugo de Sancto Victore. In lege etiam veteri non erat aliquod sacramentum respondens confirmationi et extremae unctioni; ergo non debent esse tot sacramenta.

Sed contra. Videtur, quod debeant esse plura. Est enim unum sacramentum contra peccatum originale, scilicet baptismus; aliud contra actuale mortale, scilicet poenitentia; ergo etiam debet esse aliud contra veniale.

Praeterea, sacramenta magis ordinantur contra defectus spirituales, quam corporales: est autem aliquod sacramentum contra poenam corporalem, scilicet extrema unctio; ergo debet esse aliquod specialiter contra poenam spiritualem.

Praeterea, sacramenta ad sanctificandum ordinantur: sed multae aliae sunt sanctificationes quae inter illa septem non computantur; sicut patet de consecratione aquae benedictae, templi, altaris et aliorum huiusmodi; ergo sunt plura quam septem sacramenta.

Respondeo. Dicendum, quod numerus sacramentorum sic accipi potest. Sacramenta enim ordinantur contra defectus qui nobis sunt ex peccato; ad quod ordinantur dupliciter. Uno modo auferendo causam defectus, scilicet peccatum; vel impediendo ne fiat; ad quod ordinantur matrimonium: vel expiando iam factum: et sic contra originale ordinatur baptismus, contra actuale poenitentia. Alio modo ordinantur contra defectum; supplendo id quod deest ad perfectionem. Est autem duplex perfectio. Una in ordine ad operationem; et ad hanc ordinatur Ordo, quantum ad executionem bonorum: Confirmatio vero quantum ad perpeccionem malorum. Per Ordinem enim redditur homo idoneus dispensator sacramentorum; et per Confirmationem fortis Confessor Christi nominis inter adversa. Alia perfectio est in ordine ad fidem; et ad hanc ordinatur extrema unctio respectu finis intra: per eam enim praeparatur ad gloriam resurrectionis; et Eucharistia respectu finis extra, quia per eam Christo capiti unimur. Potest et aliter accipi. Quia sacramentum ordinatur vel contra culpam, vel contra poenam. Secundum quosdam contra culpam originalem baptismus, contra mortalem poenitentia, contra venialem extrema unctio. Contra poenam infirmitatis confirmatio malitiae, Eucharistia; ignorantiae, ordo, concupiscentiae, matrimonium.

Ad primum ergo dicendum, quod Eucharistia quamvis totum Christum contineat, et sic passionis memoriale, non tamen ordinatur ad omnes effectus passionis, sed ad principalem, qui est uniri Christo. Unde alia sacramenta requiruntur ad eam ut dispositiones quaedam.

Ad secundum dicendum, quod in lege naturae non erant ita signa expressa, sicut in nova lege. Unde non erant distincta secundum determinatos effectus gratiae, sed in quadam generalitate. Sic enim per sacrificia figurabatur Christi passio, per oblationes patientis charitas qua passioni se obtulit; per decimas passionis necessitas, quia in eis signatur imperfectio nostra quae indiget perfici a Christo. In veteri tamen lege fuerunt plurimae figurae ut imperfectae; non tamen confirmationis et extremae unctionis, propter hoc quod in eis perfectio requiritur gratiae, quae legem veterem non competebat.

Ad tertium dicendum, quod quidam dicunt aliqua sacramenta in remedium venialis dari, sicut Eucharistiam et extremam unctionem. Sed hoc non videtur conveniens; quia non existentibus venialibus, adhuc praedicta sacramenta necessaria essent. Et ideo dicendum, quod poenitentia ordinatur contra omne actuale, tam mortale quam veniale.

Ad quartum dicendum, quod sacramentum non

datur contra poenam principaliter, sed secundaria intentione. Ideo ibi datur contra illam poenam quae ex peccato immediate consequitur et ad peccatum inclinatur; non autem ad eam quae pro peccato infligitur. Unde extrema unctio per prius respicit spiritualem poenam quam corporalem.

Ad quintum dicendum, quod aqua benedicta non ordinatur directe in remedium, sed magis ad removendum prohibens, scilicet potestatem inimici. Sanctificationes vero aliae, de quibus objectio tangit, ordinantur ad sacramentum Eucharistiae. Unde magis sunt sacramentalia quam sacramentum.

ARTICULUS III.

Ad tertium sic proceditur. Et I. videtur, quod baptismus Joannis non fuerit sacramentum. Joan. enim 3, ubi dicitur « Erat Joannes baptizans etc. » dicit Glossa: « Quantum catechumenis nondum baptizatis prodest doctrina fidei, tantum profuit baptismus Joannis ante baptismum Christi: » sed catechismus est sacramentale, non sacramentum; ergo baptismus Joannis non erat sacramentum, sed sacramentale.

2. Praeterea, omne sacramentum est alicujus legis: sed baptismus Joannis non fuit sacramentum veteris legis, quia terminata fuit in Joanne, secundum illud Matthaei 11: « Lex et Prophetiae usque ad Joannem. » Nec fuit sacramentum novae legis, quia non fuit institutum a Christo; ergo non fuit sacramentum.

3. Praeterea, omne sacramentum novae legis gratiam eausat: sed baptismus Joannis gratiam non conferebat; ergo non est sacramentum novae legis. Nec iterum veteris legis, quia in veteri lege non fuit institutum; ergo nullo modo est sacramentum.

Contra. Sacramentum est sacrae rei signum: sed baptismus Joannis erat signum baptismi Christi; ergo et sacramentum.

Praeterea, Augustinus dicit: « Accedit verbum ad elementum, et fit sacramentum: » sed in baptismo Joannis accedebat verbum ad elementum aquae. Baptizabat enim in nomine venturi, ut dicitur Actorum 10; non ergo baptismus ejus fuit sacramentum.

Respondeo. Sacramentum potest accipi dupliciter: scilicet aut communiter, prout dicitur sacrae rei signum; aut proprie, prout dicitur signum sacrae rei et causa. Primo modo baptismus Joannis sacramentum fuit, id est signum baptismi Christi. Secundo modo non. Hoc autem sacramentum erat quodammodo medium inter sacramenta veteris et novae legis, sicut dispositio quodammodo media est inter privationem et formam, quia viam praeparabat ad baptismum Christi. Conveniebat enim quodammodo cum sacramentis veteris legis in hoc quod erat signum tantum; cum sacramentis novae legis in materia, et quodammodo in forma, quia dabatur in nomine venturi.

Ad primum de catechismo, dicendum, quod non est simile: quia sacramentalia manent cum ipsis sacramentis, quorum sunt dispositiones; et posteriora sunt institutione, licet priora executione: sed baptismus Joannis non sic se habuit ad baptismum Christi; et ideo fuit sacramentum per se.

Ad secundum, omne sacramentum est alicujus legis, dicendum, quod sicut dispositio formae redu-

citur ad genus formae ad quam disponit: ita baptismus Joannis reducitur ad sacramenta novae legis ad quae disponebat.

Ad tertium dicendum, quod baptismus Joannis gratiam non conferebat; quia per ipsum non fiebat aliquid quod non esset ab homine tantum, a quo gratia dari non potest. Erat enim ablutio, per quam ipse Joannes assuefaciebat homines ad ritum baptismi Christi; ideoque non erat completum sacramentum, sed dispositio quaedam ad sacramentum Christi.

ARTICULUS IV.

Ad quartum sic proceditur. Et 1. videtur, quod baptizati baptismo Joannis non erant baptizandi baptismo Christi. Hieronymus super Joel dicit:

• Baptizati a Joanne in nomine venturi, quia dixerunt, neque si Spiritus sanctus est audivimus, iterum baptizati sunt: • sed si haec est causa sufficiens, cum multi audivissent quia Spiritus sanctus est, illi multi non erant rebaptizandi.

2. Praeterea, Act. 8 dicitur, quod Apostolis in Samariam venientes, illos qui baptizati erant in nomine Jesu, non baptizabant, sed tantum manus imponebant; cum ergo baptismus Joannis in nomine Jesu fuit sine collatione Spiritus sancti datus: videtur quod baptizati baptismo Joannis non rebaptizabantur.

3. Praeterea, in sacramentis quod datur non est iterandum, sed quod omittitur est supplendum; ergo in baptizatis baptismo Joannis non oportebat ablationem externam iterari, sed tantum Spiritus sancti dationem suppleri: hoc autem fiebat per manuum impositionem; ergo non oportebat iterum baptizari, sed tantum manuum impositione confirmari.

Contra. Augustinus super Joan. dicit: « Dedit Judas baptismum, et non est baptizatum post Judam: dedit Joannes et baptizatum est post Joannem; » ergo post baptismum Joannis est baptizandus baptismo Christi.

Praeterea, character baptismalis est fundamentum omnium sacramentorum; ergo nullum sacramentum potest accipi, nisi post susceptum baptismi sacramentum; et ita confirmationem debite suscipere non poterant illi qui tantum a Joanne baptizati erant.

Respondeo. Circa haec fuit duplex opinio. Una, quod baptismus Joannis in nomine Christi susceptus cum fide Trinitatis et impositione manuum aequipollebat baptismum Christi: quae videtur fuisse opinio Magistri. Altera est verior, quod baptismus Joannis, cum nunquam imprimeret characterem qui est de necessitate salutis, nec gratiam conferret, baptismum Christi nunquam aequipollebat, sed tantum ad Christi baptismum praeparabat: quo suscepto, nihilominus baptismum Christi suscipere oportebat.

Ad primum de Hieronymo, dicendum, quod Hieronymus non posuit totam causam, sed partem. Causa enim erat multiplex. Una, quia non habebant fidem Trinitatis, Spiritum sanctum ignorantes. Altera, quia non erant baptizati in nomine Trinitatis. Tertia, quia non habebant impressionem characteris.

Ad secundum de Samaritanis, dicendum, quod baptizati erant baptismum Christi, quia in nomine Domini Jesu. Haec enim fuit forma baptismi in

principio suae institutionis. Baptismus vero Joannis fiebat in nomine venturi. Dicuntur tamen Spiritum sanctum nondum recepisse ad istum effectum, ad quem recipitur in confirmatione.

Ad tertium de sacramentis non iterandis, dicendum, quod hoc intelligitur quando id quod suscipitur est aliquid sacramenti percipiendi: sed ablutio quae fiebat in baptismum Joannis non erat aliquid baptismi Christi, sed alia erat Christi ablutio quae fiebat in Christi baptismum.

DISTINCTIO III.

Post haec videndum est etc. (V. edit. nostrae tom. VII, pag. 489.)

QUAESTIO UNICA.

Hic quaruntur quatuor: 1.º quid sit baptismus; 2.º de forma ipsius; 3.º de materia ejus; 4.º de cessatione circumcisionis et aliorum legalium.

ARTICULUS I.

Ad primum sic proceditur. Et 1. videtur, quod inconvenienter sit assignata definitio baptismi quae in litera ponitur, scilicet « baptismus est ablutio corporis exterior facta sub forma praescripta verborum. » Secundum enim Hugonem de Sancto Victore, sacramentum est materiale elementum: ablutio autem non est materiale elementum, sed elementi usus; ergo baptismus cum sit sacramentum, non est ablutio.

2. Praeterea, manente definito manet definitio: sed transeunte abluione manet baptismus; ergo non est ablutio.

3. Praeterea, ante baptismum requiritur immersio. Sic enim per baptismum configuramur sepulturae Christi, ut dicitur Rom. 6; ergo baptismus non est ablutio, sed magis immersio.

4. Praeterea, ablutio in qualibet parte corporis fieri potest. Si ergo baptismus esset ablutio, sine alicujus partis determinatione, sequeretur quod qualibet parte pueri nata posset puer baptizari; quod a quibusdam non conceditur.

5. Praeterea, in baptismum fit triplex immersio; si ergo baptismus est ablutio sive immersio, videtur quod non sit unus baptismus, sed plures.

Respondeo. Dicendum, quod circa hoc videtur esse diversitas inter Magistrum sententiarum et Hugonem de Sancto Victore. Hugo enim videtur ponere ipsa elementa esse sacramenta, ut puta aquam consecratam et alia hujusmodi. Magister autem videtur ponere ipsum usum elementorum esse sacramentum. Primum autem non est verum, nisi in sacramento Eucharistiae, quod realiter continet rem viventem in qua est gratia, scilicet Christum. Alia vero sacramenta, solummodo ad rem viventem applicantur, scilicet ad hominem, qui gratiam recipit. De ratione enim sacramenti est, ut gratiam contineat et causet significando. Nec tamen ipse usus elementi, complere habet rationem sacramenti; quia multi possunt exterius abluere, qui tamen non baptizantur; puta si desit intentio quae refert sacramentum ad effectum. Sic ergo ea quae sunt in baptismum, habent hunc ordinem: ut ipsum elementum sit materia respectu formae per quam sanctificatur: et haec duo sint materia respectu usus per quem sacramentum

ad hominem applicatur: et haec tria sint materialia respectu intentionis per quam sacramentum efficitur. Sic ergo Magister definit baptismum materialiter tangens materiam et formam et usum, praetermittens intentionem, ut per se patet.

Ad primum ergo dicendum, quod Hugo simpliciter sacramentum materialiter definit, sed per materiam magis remotam; unde dictum Magistri est conveniens.

Ad secundum dicendum, quod licet ablutio exterior transeat, quae est tantum sacramentum, manet tamen character interior qui est res et sacramentum, ratione cuius dicitur baptismus manere.

Ad tertium dicendum, quod immersio non est de necessitate baptismi, sed ablutio quocumque modo vel per aspersionem, vel immersionem; et ideo sine immersione potest baptismus celebrari, quando consuetudo patitur Ecclesiae vel necessitas incumbit, sive propter penuriam aquae, sive propter infirmitatem baptizandi, sive propter impotentiam baptizantis. Et quocumque modo fiat ablutio, servatur aliqua similitudo sepulturae, in quantum corpus ponitur sub aqua, vel secundum totum, vel secundum partem.

Ad quartum dicendum, quod quia a capite omnes operationes animales principium habent; ideo debet baptismi ablutio fieri in capite; quamvis si necessitas immineret, posset in alio membro fieri vel in puero non perfecte nato, vel in quocumque alio.

Ad quintum dicendum, quod trina immersio congruit in baptismo ad exprimendum fidem Trinitatis et triduum dominicae sepulturae; non tamen est de necessitate baptismi, quia non significat aliquem baptismi effectum; et ideo si contra consuetudinem Ecclesiae omittatur, grave peccatum est; nihilominus est baptismus. Cum vero servatur trina immersio, est unus baptismus, quia est una ablutio quae in ultima immersione perficitur, et non in prima quia deest intentio baptizantis, qui non intendit in prima immersione totum facere.

ARTICULUS II.

Ad secundum sic proceditur. Et 1. videtur, quod integritas formae baptismatis non consistat in his verbis: « Ego te baptizo in nomine Patris et Filii et Spiritus sancti Amen: » quia Joan. 3 dicitur, « Hic est qui baptizat »: non ergo debet dici ex persona ministri. « Ego te baptizo; » et praecipue cum graeci hanc formam servant « Baptizetur servus Christi etc. »

2. Praeterea, ad eum qui non intelligit non debet sermo dirigi: sed baptizandus quandoque non intelligit; ergo non debet dici « ego te baptizo, sed « baptizetur, verbi gratia, Nicolaus. »

3. Praeterea, baptismus a passione Christi efficaciam habet; ergo in forma baptismi potius debet fieri mentio de Christi passione, quam de Trinitate, ut si diceretur: « Ego te baptizo in nomine Christi » praecipue cum Apostoli sic baptizasse legantur.

4. Praeterea, verba in forma baptismi non tenentur materialiter, sed significative: quia non in quantum sonant, sed in quantum creduntur, verba sacramenta sanctificans, ut dicitur in Glossa, Rom. 10: Sed genitor idem significat quod Pater, et genitus quod Filius, et Paraclitus idem quod Spiritus sanctus; ergo sub istis nominibus potest fieri baptismus, sicut et sub primis; et sic prima non sunt de necessitate baptismi.

4. Praeterea, qui credit Patrem, credit et Filium: sed verbo sanctificatur sacramentum, in quantum creditur, sicut in littera dicitur; ergo si nominetur una persona, et aliae taceantur, plenum erit baptisma.

5. Praeterea, ad formam potest aliquid addi, sicut hoc quod dicitur, amen; ergo et aliquid diminui potest.

Item quaeritur, si interpositio vel transpositio verborum praedictorum impediatur sacramenta.

Respondeo. Dicendum, quod in forma baptismi aliqua sunt de necessitate sacramenti, ut expressio actus baptismalis per quem determinatur materia, et designatur intentio; et expressio Trinitatis, a qua primo sacramentum efficaciam habet. Quaedam vero sunt, quae non sunt de necessitate formae; sicut hoc quod additur, amen, et ut quidam dicunt, hoc quod additur, ego, quod additur ad maiorem expressionem intentionis. Unde nec tutum est ut removeatur.

Ad primum ergo dicendum, quod principale agens significatur in Trinitatis invocatione; et ideo oportebat ut designaretur etiam minister sacramenti quantum ad actum exteriorem; quod fit cum dicitur, « ego te baptizo. » Christus autem agit ut principale agens. Sed utrum expressio personae ministri quae fit secundum nos, sit de necessitate baptismi, apud quosdam dubium est. Probabilius autem dici potest quod non sit, ne cogamur totam Graecorum Ecclesiam absque baptismo ponere, qui personam non exprimunt baptizantis; quod dicitur sanctorum patrum consilio factum, contra errorem eorum, qui in baptizantis persona spem ponebant, de quo habetur 1 Cor. 1.

Ad secundum dicendum, quod verba formae non proferuntur causa significationis tantum, sed magis causa efficiendi. Unde proferuntur ad non intelligentem, in quo efficaciam habere possunt.

Ad tertium dicendum, quod passio Christi operatur in baptismo, sicut causa secundaria, Trinitas autem sicut causa prima, cui magis est actio attribuenda. Apostoli vero baptizaverunt in nomine Christi consilio Spiritus sancti, ad hoc, ut nomen Christi venerabile redderetur.

Ad quartum dicendum, quod genitor, cum sit nomen verbale, non significat personam ut hypostasim subsistentem, sed magis per modum actus. Unde si dicatur, in nomine Genitoris et Geniti, non erit baptismus: et similiter quaecumque alia nomina ponantur, praeter ea quibus principaliter in unaquaque lingua, personae divinae significantur. Circa mutationem vero formae generaliter sciendum est, quod tribus modis fieri contingit. Uno modo totaliter quantum ad significationem, quando dictio pro dictione ponitur; et tunc non est baptismus, quia determinatis verbis Deus efficaciam tribuit. Secundo quantum ad significationem; et sic erit baptismus si servetur principalis significatio formae, alias non. Unde dicitur esse baptismus si dicatur, Ego baptizo vos; non autem si dicatur, Nos baptizamus te; tum quia non servatur unitas ministri qui requiritur ad unitatem sacramenti; tum quia *ly vos*, est idem quod *te et te*, nos autem non est idem quod *ego et ego*, sed idem quod *ego et tu*, vel *ego et ille*. Tertio per corruptionem; et tunc dicitur quod corruptio in principio dictionis corrumpit formam, quia mutat significationem, non autem corruptio circa finem dictionis, si fiat ex ignorantia vel defectu linguae. Secus autem esset, si fieret ex indu-

stria, quia non intenderet facere quod facit Ecclesia.

Ad quintum dicendum, quod si subtrahatur aliquid quod sit de substantia formae, non est baptismus. Unde si una Persona tantum nominetur, baptismus non erit: oportet enim fidem Ecclesiae in forma exterius exprimere, quia voces non tenentur tantum significative, sed effective. Verbum autem Ambrosii intelligitur in casu, quando una Persona nominata sacerdos, vel puer moritur. Tunc enim invisibilis sacerdos creditur supplere defectum.

Ad sextum dicendum, quod additio dupliciter potest corrumpere formam. Uno modo si addatur quasi existens de forma: sic enim addens, non intenderet facere quod facit Ecclesia. Alio modo si adderetur contrarium fidei; sicut in nomine Patris majoris etc., ut Ariani faciebant: aliter additio formam non corrumpit.

Ad septimum dicendum, quod ordo varians intellectum formae corrumpit formam: ut si dicatur, in nomine Patris baptizo te, et Filii et Spiritus sancti. Non autem si intellectus non mutetur; ut si dicatur, in nomine Patris et Filii et Spiritus sancti baptizo te; et similiter si fiat interruptio tanta quae intellectum auferat formae, non erit baptismus; alias erit.

ARTICULUS III.

Ad tertium sic proceditur. Et 1. videtur, quod baptismus non debeat fieri in aqua. Rom. 6: « Consepulti sumus cum illo, idest Christo, per baptismum: » baptismus igitur repraesentat sepulturam Christi: sed ejus sepultura fuit in terra; ergo et baptismus debet fieri in terra.

2. Praeterea, Apocal. 1, dicitur de Christo: « Lavit nos a peccatis nostris in Sanguine suo: » sed baptismus significat hanc lotionem; ergo debet fieri in sanguine.

3. Praeterea, baptismus, secundum Damascenum, est principium vitae spiritualis; vita vero maxime consistit in calido et humido: aer igitur, cum sit calidus et humidus, maxime convenit ad significationem spiritualis vitae; igitur baptismus maxime debet fieri in aere.

Contra Joan. 3, dicitur: « Nisi quis renatus fuerit ex aqua et Spiritu sancto, non potest introire in regnum Dei. »

Praeterea, reparatio debet creationi respondere: sed in creatione mundi, Spiritus Domini ferebatur super aquas, ut dicitur Gen. 1; ergo in reparatione debet dari in aqua.

Juxta hoc quaeritur, an possit fieri baptismus in aqua permixta.

Respondeo. Dicendum, quod baptismus est sacramentum necessitatis, et omnibus commune; ideo institutum est in aqua, quae omnibus est communis, et de facili potest haberi. Item sit in aqua, propter convenientiam conditionum aquae cum gratia, quae datur in baptismo; quia in aqua est diaphaneitas, quae est dispositio ad susceptionem luminis; sic baptismus disponit ad susceptionem gratiae. Item aqua lavat sordes corporis, similiter gratia in baptismo collata sordes mentis. Item aqua refrigerat carnem, sic gratia baptismalis concupiscentiae ardorem.

Ad primum, de terra, dicendum, quod per qualitates terrae non significatur gratia, quae confertur in baptismo, cum ipsa sit mundana, terra autem

sit faex elementorum; sed per qualitates aquae sic. Unde quavis in terra et aqua significetur sepultura dominica, tamen convenientius fit baptismus in aqua.

Ad secundum de sanguine, dicendum, quod non ita convenienter significat effectum gratiae, sive lotionem illam, quia potius inquinat corporaliter quam lavet.

Ad tertium de vita spirituali, dicendum, quod baptismus est principium vitae secundario, sed primo et principaliter munditiae, quae significatur per lotionem aquae ad quam vita spiritualis consequitur.

Ad secundam quaestionem dicendum, quod mistio aquae dupliciter potest fieri. Aut tanta quae non tollit speciem, sed accidentaliter alterat; et in omni tali potest fieri baptismus; aut tanta quae solvit speciem, et in alteram speciem alterando transmutat; et in tali aqua non potest fieri baptismus.

ARTICULUS IV.

Ad quartum sic proceditur. Et 1. videtur, quod baptismo instituto, circumcisio et alia legalia non cessaverint. Baptismus enim ante passionem videtur institutus; quia Dominus tactu carnis suae, vim regenerativam contulit aquis, quod factum est ante passionem: et similiter ante passionem dixit: « Nisi quis renatus fuerit ex aqua etc. » Joannis 3. Legalia autem ante passionem non cessaverunt, ut sancti dicunt; ergo post baptismi institutionem, circumcisio et alia legalia non cessaverunt.

2. Praeterea, aeternum est, quod nullo fine clauditur: sed circumcisio data est in foedus aeternum, sicut dicitur Gen. 17; ergo cessare non debuit.

3. Praeterea, tempore gratiae, quaedam legalia observabantur, sicut patet Actor. 16, de Paulo qui circumcidit Timotheum; ergo adhuc servari debent.

4. Praeterea, ad servanda praecepta novi Testamenti tenemur: sed quaedam praecepta Apostolorum fuerunt de quibusdam legalibus servandis; unde dicitur Actor. 15: « Visum est Spiritui sancto et nobis ut abstinere ab immolatis simulacrorum, et sanguine et suffocatis; » ergo saltem ad ista servanda tenemur.

Sed contra. Ad Galatas 3, dicitur: « Si circumcidamini, Christus nihil vobis proderit: » et ita circumcisio et alia legalia cessaverunt.

Praeterea, veniente veritate debet cessare figura: sed legalia fuerunt figura Christi et sacramentorum ejus. Coloss. 2: « Quae sunt umbra futurorum, corpus autem Christi; » ergo veniente Christo et ejus sacramentis, legalia cessaverunt.

Respondeo. Dicendum, quod circumcisio et alia legalia considerari possunt quantum ad duo: scilicet quantum ad effectum et quantum ad usum. Quantum ad effectum cessaverunt in ipsa passione Christi, in qua impletae sunt omnes figurae veteris Testamenti: et ideo dicuntur a passione Christi mortua fuisse, quasi effectum non habentia. Sed de usu est differentia inter Augustinum et Hieronymum. Nam Augustinus dicit, quod post passionem Christi ante tempus Evangelii divulgati manserunt quantum ad usum, sed non quantum ad effectum, ne lex tamquam idololatria abjiceretur. Post divulgationem vero Evangelii cessaverunt, et quantum ad effectum, et quantum ad usum. Unde inter

passionem Christi et Evangelii divulgationem fuerunt mortua et non mortifera; postea vero, et mortua et mortifera. Secundum Hieronymum vero, statim post passionem Christi cessaverunt, et quantum ad effectum et quantum ad usum, ut essent et mortua et mortifera omnibus observantibus. Apostoli tamen quadam pia simulatione, dispensatorie observare videbantur, ut se Judaeis conformantes eos iustificarent. Sententia tamen Augustini probabilior est, et communiter tenetur.

Ad primum ergo dicendum, quod multiplex fuit baptismi institutio. Primo quantum ad materiam in baptismo Christi. Secundo quantum ad necessitatis declarationem, Joan. 5, ubi dicit: « Nisi quis renatus fuerit, etc. » Tertio quantum ad usum in Judaeis, quando misit discipulos ad praedicandum et baptizandum, Matth. 10. Quarto quantum ad efficaciam in Christi passione. Quinto quantum ad ejus divulgationem in gentes post resurrectionem, Matth. ult.

Ad secundum dicendum, quod aeternum accipitur ibi pro saeculo quod habet finem, sed nobis indeterminatum. Vel dicitur circumcisio in foedus aeternum, ratione significati.

Ad tertium dicendum, quod secundum Augustinum, Apostoli vere et licite legalia observabant, ante divulgationem Evangelii, quia ex Judaeis erant. Unde et Paulus circumcidit Timotheum qui erat filius Judaeae, Act. 16: Titum vero qui omnino gentilis erat, non est compulsus circumcidere, ut habetur Galat. 2. Secundum Hieronymum vero non observabant ex veritate sed quasi ex pia quaedam simulatione.

Ad quartum dicendum, quod quidam dixerunt praeceptum Apostolorum ad litteram intelligendum esse, et usque nunc obligare. Sed hoc est contra sententiam Pauli, Rom. 14, ubi dicit, quod nihil est commune, id est immundum, per Christum, nisi ei qui existimat aliquid esse commune. Et ideo alii dixerunt, quod intelligendum est mystice, de prohibitione homicidii et suffocatione violentiae. Sed hoc est contra Hieronymum qui ad litteram exponit, Ezech. 18. Et primo quantum ad mysterium similiter omnia legalia praecipere potuissent. Et ideo aliter dicendum secundum alios, quod epistola Apostolorum non erat praeceptorum simpliciter; sed erat quaedam provisio ad consecrationem pacis et communis vitae inter Judaeos et Gentiles; et ideo prohibuerunt fornicationem quasi per se malum quod gentiles non reputabant, idololatriam ad removendum suspicionem idololatriae, sanguinem et suffocatum propter hoc, quod Judaeis ex dissuetudine erant abominabilia.

DISTINCTIO IV.

Hic dicendum est etc. (V. edit. nostrae tom. VII, pag. 505.)

QUAESTIO UNICA.

Hic quaeruntur quatuor: 1.^o utrum baptismus imprimat characterem; 2.^o utrum tollat culpam et poenam; 3.^o utrum causet gratiam, et praecipue in pueris; 4.^o utrum effectus baptismi possit suppleri per baptismum sanguinis et flaminis.

ARTICULUS I.

Ad primum sic proceditur. Et 1. videtur, quod baptismus characterem in anima non imprimat. In anima enim, ut dicit Philosophus in 2 Ethic., non sunt nisi tria; scilicet potentiae passiones et habitus: sed character non est potentia, quia non inest omnibus a natura; nec passio, quia secundum ipsum nihil pati videtur; nec gaudium nec dolorem, nec spem nec timorem; nec habitus, quia secundum ipsum nihil agimus, habitus autem est quo quis agit cum voluerit; ergo etc.

2. Praeterea, quicquid est in anima, aut est in aliqua potentiarum ejus, aut in essentia, sicut in subjecto: sed character si est in anima per baptismum, est in pluribus potentiis, quia imago secundum quam homo configuratur Deo per characterem plures potentias colligit; ergo character non imprimitur in anima per baptismum.

3. Praeterea, sicut per baptismum distinguitur baptizatus a non baptizato, ita et per quolibet sacramentum distinguitur recipiens a non recipiente: sed quaedam sacramenta characterem non imprimunt, ut extrema unctio et eucharistia; ergo nec baptismus.

Contra. Augustinus in libro de Baptismo parvulorum dicit: « Character divinitus cum ovibus errans ad christianam unionem rediens ab errore liberatur, agnoscitur, non improbat »: ergo in baptismo per quem ad christianam unitatem perducimur, character permanens imprimitur.

Praeterea, in eodem: « characterem quidem multi lupi imprimunt, qui videntur esse intus. Verum tamen ad ovile Domini non pertinere, morum suorum fructibus cognoscuntur. » Ergo in sacramentis malorum ministrorum Ecclesiae character imprimitur.

Respondeo. Dicendum, quod omnes concedunt characterem ab aliquibus sacramentis in anima imprimi, et importare relationem, cum sit signum distinctivum et configurativum. Differunt tamen in hoc: quod quidam ponunt istis relationibus non subesse aliquod accidens absolutum, sed immediate in anima fundari istas relationes. Sed quia de natura relationis est, ut semper fundetur in aliquo alio genere entis, ut vult Philosophus; ideo alii dicunt, quod fundantur tales relationes super qualitate. Haec autem qualitas, secundum quosdam, est in quarta specie. Sed hoc non potest esse, quia figura in spiritualibus non nisi metaphorice dicitur. Et ideo alii dicunt, quod est in tertia specie, quia infert quandam passionem animae, in quantum eam ornat et decorat. Sed hoc est contra Philosophum in 7 Physicorum; qui tertiam speciem qualitatis, solum in parte animae sensitiva ponit. Nec iterum potest dici, ut alii dicunt, quod sit in prima specie; quia habitus disponit ad operandum bene vel male, non autem character, sed ad operandum aliquid spirituale simpliciter. Et ideo reducitur ad secundam speciem qualitatis. Est enim quaedam spiritualis potentia, data ad communicandos actus spirituales, sicut potentia corporalis ad corporales. Et sicut habitus infusi reducuntur in eandem speciem cum habitibus innatis, ita haec potentia ad eandem cum potentia naturali.

Ad primum quod opponitur in contrarium, dicendum, quod qualitas super quam fundatur relatio characteris, est in secunda specie qualitatis.

Reducitur enim potentia infusa ad eandem speciem qualitatis cum naturali potentia, sicut habitus infusus ad eandem speciem cum innato.

Ad secundum dicendum, quod characteris subjectum est potentia animae, non essentia, eo quod ad aliquam operationem ordinatur. Respicit autem plures potentias, sed non aequaliter, sed unam per prius, scilicet intellectivam, sicut et ratio inaginis ab ea derivatur.

Ad tertium dicendum, quod non omnia sacramenta imprimunt characterem, sed illa tantum quibus homo mancipatur ad aliquod sacrum spirituale exercendum, quia ad hoc requiritur aliqua spiritualis potestas: et ideo character imprimitur in baptismo per quem homo fit potens suscipere Eucharistiam et alia sacramenta, et in ordine per quem homo sacramentorum fit dispensator, et in confirmatione per quam homo instituitur quasi pugil Christi, ad confitendum Christum coram persecutoribus, si sit opus.

ARTICULUS II.

Ad secundum sic proceditur. Et 1. videtur, quod baptismus non tollat omnem culpam et poenam. Baptismus enim non tollit actualem culpam nisi adsit contritio, quia nullus arbiter suae voluntatis constitutus, in quo solum potest esse actualis culpa, potest inchoare novam vitam nisi poeniteat eum veteris vitae, ut dicit Augustinus in littera: contritio autem per se sine baptismo delet culpam actualem; ergo baptismus nihil facit ad deletionem culpae actualis.

2. Praeterea, vitium voluntatis humanae non potest divinum effectum impedire; si ergo baptismus esset a Deo ordinatus ad culpae deletionem, non posset per fictionem voluntatis impediri: quod falsum est.

3. Praeterea, aliquis qui est in proposito peccandi, non potest consequi peccati remissionem: sed contingit aliquem, cum baptizatur, in proposito peccandi venialiter remanere; ergo praedicti peccati non potest consequi remissionem.

4. Praeterea, videtur quod non tollat omnem poenam temporalem debitam actuali peccato; quia, sicut Augustinus dicit, peccatum aut homo punit, aut Deus: si ergo homo in seipso non puniat, peccatum quod commisit, a Deo punitur; et ita per baptismum actualis peccati poena non tollitur.

Contra. Rom. 12, ubi dicitur: « Sine poenitentia sunt dona Dei, » dicit Glossa: « Gratia Dei in baptismo non requirit gemitum, neque planctum, neque aliquid huiusmodi, sed omnia gratis condat; » ergo tollit omnem poenam.

Praeterea, quod tollat omne peccatum actuale, dicit Augustinus in Enchiridio: « Baptizati non uni tantum peccato, sed multis magis, aut omnibus moriuntur, quaecumque jam propria commiserunt, vel cogitatione, vel loquutione, vel opere. » Sed haec omnia sunt actualia peccata; ergo etc.

Respondeo. Cum baptismus sit principium vitae spiritualis tam gratiae quam gloriae, secundum Damascenum, omne illud tollit, quod retardat vel excludit a vita. Et ideo tam peccatum originale quam actuale mortale aufert, quia excludit a vita, et veniale quantum est de se, quia retardat a vita gloriae. Sed propter indispositionem subjecti aliquando illud non tollit, cum possit stare cum gratia ba-

ptismali. Poena autem est triplex. Quaedam aeterna, quae omnino excludit a vita; et ideo hanc tollit: quaedam est temporalis quam homo meruit per peccatum, quod retardat a vita, unde post mortem in purgatorio pro eo homo punitur; ideo etiam hanc tollit: quaedam vero temporalis contracta, quam homo nascendo contrahit. Haec a vita nec retardat, nec excludit morientem; nec hanc statim baptismus tollit, quia non opponitur effectui ejus. Tollit autem eam causaliter, in quantum est causa gloriae, in qua omnis poenalitas auferetur.

Ad primum, sine contritione non potest deleri culpa actualis in baptismo, dicendum, quod contritionem peccati non requirit baptismus ut causam ad destructionem peccati actualis, quasi ad hoc de se sit insufficiens; sed solum ad removendam fictionem, quae est contraria dispositio impediens effectum ejus: et tamen ipsa contritio non potest justificare sine baptismo, saltem in proposito existente.

Ad secundum dicendum, quod Deus operatur in rebus secundum earum conditionem. Unde in voluntatem effectum non inducit cogendo. Et ideo si aliquis habeat voluntatem repugnantem sacramento, non recipit characterem. Si autem habet voluntatem repugnantem gratiae, sed non sacramento, recipit characterem, sed non gratiam per quam culpa remittitur; et talis dicitur fictus, quia ostendit se gratiam velle, saltem dum sacramentum suscipit, quam tamen non vult. Sed haec fictio non est speciale peccatum, nisi specialiter ostentatio intendatur. Recedente autem fictione, virtute characteris, baptismus suum effectum consequitur.

Ad tertium, peccatum veniale non remittitur existenti in proposito ipsius in baptismo, dicendum quod hoc non est ratione gratiae baptismalis, cum quantum est de se, removeat omne retardans a vita spirituali; sed est ex indispositione subjecti.

Ad quartum, peccatum aut homo punit aut Deus, dicendum, quod per poenam quam Christus sustinuit, cui homo incorporatur per baptismum, punitur peccatum baptizati. Unde Isaiae 13 dicitur: « Poenitentiam facite, quia sicut ait Dominus Deus in eo iniquitatem omnium nostrum. »

ARTICULUS III.

Ad tertium sic proceditur. Et 1. videtur, quod per baptismum non conferantur pueris gratia et virtutes. Dicit enim Augustinus in lib. de Parvulorum baptismo: « Parvulos fideles facit, non fides quae consistit in credentium voluntate, sed fides sacramentum. » Sed fides quae est virtus consistit in credentium voluntate; ergo parvuli baptizati non habent fidei virtutem.

2. Praeterea, nullus effectum baptismi suscipit, nisi secundum Christi ordinationem baptismum suscipiat: sic autem parvuli non suscipiunt, cum non credant. Dicitur enim Matth. ult.: « Qui crediderit et baptizatus fuerit, salvus erit; » ergo virtutes in baptismo non consequuntur.

3. Praeterea, sicut pueri non habent liberum arbitrium, ita nec amentes vel dormientes: sed in amentibus non videtur baptismus effectum habere, cum quandoque repugnent; nec in dormientibus, cum somnus sit dimidium vitae, secundum Philosophum; ergo nec in pueris.

4. Praeterea, si aliquid de novo recipiatur in aliquo, oportet quod recipiens et influens alio modo se habeat nunc quam prius: sed anima pueri ba-

ptizati non alio modo se habet dum baptizatur quam prius, eum proprio motu liberi arbitrii careat; nec etiam Deus, qui est influens gratiam et virtutes; ergo pueri in baptismo gratiam et virtutes non recipiunt.

Contra. Fidei in via succedit visio in patria, spei tentio, sive comprehensio et charitas utrobique manet: sed et si parvuli decederent statim post baptismum, viderent Deum in patria, haberent et diligerent; ergo in via habuerunt fidem, spem et charitatem.

Praeterea, Augustinus dicit: « Fides datur et nutritur in baptismo: » datur quantum ad parvulos, nutritur quantum ad adultos.

Respondeo. Circa haec est triplex opinio. Quidam enim dixerunt, quod pueris in baptismo virtutes non dantur, sed solum ab originali peccato mundantur. Sed contra hoc est, quod si puer post baptismum moreretur non salvaretur, cum non sit salus sine virtute et gratia. Et ideo alii dicunt quod pueris in baptismo dantur virtutes, non in seipsis, sed in radice sua, scilicet gratia; sed quando solvantur potentiae, perfectis organis, effluunt virtutes in ipsas ab essentia gratiae. Sed contra hoc est quia ligatio potentiarum non impedit habitum sed actum. Dormientes enim et vinolenti habent habitum, sed ligatos. Et ideo alii melius dicunt, quod pueris in baptismo dantur gratia et virtutes, sed habitus illi ligati sunt propter pueritiam. Pueritia autem discedente, inclinant ad bene operandum, nisi aliquis Spiritui sancto resistat.

Ad primum de Augustino, dicendum, quod loquitur de fide actuali, quae in pueris esse non potest.

Ad secundum dicendum, quod gratia Dei nulli indigenti debet denegari. Et quia pueri indigent, utpote originale peccatum habentes, debent baptizari, et quam citius commode fieri potest; tum propter mortis periculum, tum propter nocumenta daemonum vitanda, tum propter usum spiritualium aquirendum qui maxime valet quando est a pueritia. Nec hoc est contra ordinationem Domini; quia pueri quamvis non credant actu, credunt tamen habitu.

Ad tertium dicendum, quod de amentibus et dormientibus distinguendum est: quia aut ab initio natiuitatis continue in amentia fuerunt, et tunc de talibus idem iudicium est quod de pueris. Aut in amentiam post sanam mentem inciderunt, vel etiam habent lucida intervalla: et tunc si quando sani fuerunt, vel quando habent lucida intervalla, baptismum voluerunt, possunt tempore amentiae baptizari, si necessitas requirat; et sic sacramentum et rem sacramenti recipiunt. Si autem contradixerunt, non sunt baptizandi; et si baptizantur, nec sacramentum, nec rem sacramenti recipiunt. Et similiter dormientes non sunt baptizandi, nisi periculum mortis immineat; et tunc si baptizantur, iudicandum est de effectu baptismi, secundum voluntatem quam in vigilia habuerunt.

Ad quartum, quod in anima pueri non est aliqua mutatio, dicendum, quod falsum est quantum ad esse primum, scilicet spirituale quod conferunt gratia et virtutes ipsi animae; quamvis non sit ibi aliqua mutatio quantum ad esse, secundum quod est operari, sive agere.

ARTICULUS IV.

Ad quartum sic proceditur. Et 1. videtur, quod nihil possit supplere effectum baptismi aquae. Baptismus enim est sacramentum primae necessitatis. Unde Joan. 3 dicitur: « Nisi quis renatus fuerit etc.; » ergo sine eo non est salus alicui.

2. Praeterea, sicut poenitentia data est in remedium actualis, ita baptismus in remedium originalis: sed non potest aliquis salvari ab actuali mortali, nisi per poenitentiam; ergo nec ab originali nisi per baptismum.

3. Praeterea, baptismus sanguinis habet efficaciam solum ex opere operante, unde sine charitate non prodest: sed in pueris nihil habet efficaciam ex opere operante, quia usum liberi arbitrii non habent; ergo in eis baptismus sanguinis non supplet vicem baptismi aquae.

Contra. Dicit Ambrosius de Valentiniano, quod gratiam regenerationis quam posebat, non amisit, licet morte praeventus baptismum non accepit; ergo sine sacramento baptismi salvari potuit.

Praeterea, Augustinus quaerit quid sit majus fides an aqua? « non dubitando quin respondeam, « fides. » Si ergo quod minus est sanctificare potest, multo magis quod majus est; ergo potest fieri sanctificatio per fidem, sine aqua.

Respondeo. Baptismus aquae est in remedium, et est in praeceptum affirmativum. Remedium autem hoc aliter suppleri potest, quia per baptismum sanguinis et flaminis in adultis in quibus est ablutio interior; per baptismum autem sanguinis in pueris, quia habent corpus susceptibile martyrii. Praeceptum vero non ligat, nisi quando habetur opportunitas loci et temporis. Sic ergo dicendum est, quod sine baptismo potest esse salus, quando illud articulus necessitatis excludit, non contemptus religionis. Sciendum tamen, quod quamvis praedicta duo suppleant vicem baptismi, quantum ad ultimum effectum, qui est gratiae infusio et culpae remissio, non tamen quantum ad primum qui est characteris impressio; alias contritus non indigeret baptismum suscipere. Poenam etiam baptismum sanguinis totaliter tollit, sicut et baptismus aquae; non autem contritio quaelibet, nisi sit valde intensa.

Ad primum, baptismus est sacramentum necessitatis, dicendum, quod hoc verum est in habentibus opportunitatem.

Ad secundum de poenitentia, dicendum, quod non est simile; quia ad poenitentiae virtutem obligatur quis de jure naturali, sed ad baptismum de jure instituto. Vel dicendum, quod sicut sine proposito suscipiendi sacramentum poenitentiae, non remittitur peccatum mortale; sic sine proposito recipiendi baptismum, cum facultas aderit, non remittitur peccatum originale.

Ad tertium de baptismo sanguinis, dicendum, quod baptismus sanguinis non habet supplere effectum baptismi flaminis, ex opere operante, sicut objicbatur, sed ex imitatione passionis Christi. Unde de martyribus dicitur Apocal. 7: « Laverunt stolas suas in sanguine Agni. »

DISTINCTIO V.

Post haec sciendum est etc. (V. edit. nostrae tom. VII, pag. 325.)

QUAESTIO UNICA.

Hic quaeruntur quatuor: 1.^o quam potestatem Christus in baptismo habuerit; 2.^o quam ministris contulerit; 3.^o quam conferre potuerit, sed non contulerit; 4.^o qui possunt ministrare sacramentum baptismi.

ARTICULUS I.

Ad primum sic proceditur. Et 1. videtur, quod Christus homo habuerit potestatem dimittendi peccata. Matth. 9 dicitur: « Ut autem sciatis quia filius hominis habet potestatem dimittendi peccata, dixit paralitico etc.; » ergo Christus secundum quod homo, habet potestatem dimittendi peccata sive baptizandi interiorius.

2. Praeterea, non minus est esse Deum, et aeternum, et hujusmodi, imo magis, quam peccata dimittere: sed primum concreatum est Christo homini; ergo multo magis secundum.

3. Praeterea, majus est imperium quam invocatio nominis ejus: sed ad invocationem nominis Christi dabatur baptismus et remissio peccatorum in primitiva Ecclesia; ergo et Christus suo imperio poterat peccata dimittere.

Contra. Augustinus libro octogintatrium quaestionum dicit, quod quaedam Deus per creaturam fecit, quaedam sibi retinuit, ut illuminare animas; ergo hoc Christo homini non dedit; ergo nec potestatem baptizandi interiorius sive remittendi peccata.

Praeterea, nulli remittitur peccatum, nisi per Spiritum sanctum: sed Christus, secundum quod homo, non poterat dare Spiritum sanctum, ut Distinctione 15 primi libri dicitur; ergo nec potest dimittere peccatum, secundum quod homo.

Respondeo. Dicendum, quod in baptismo duplex effectus consideratur. Unus per quem aliquis dicitur sacramentum suscipere; scilicet character baptismalis. Alius ratione cuius aliquis dicitur suscipere rem sacramenti, scilicet gratiam et remissionem peccatorum. Ad utrumque autem effectum Christus habuit potestatem, sed diversimode. Ad effectum namque remissionis peccati operabatur per modum meriti, sed ad primum effectum operabatur per modum principalis ministri. Nam sacramentum baptismi, quod instrumentaliter hunc effectum operatur, efficaciam habet a Christi humanitate: ita quod Christus ad hoc operatur virtute propria: baptismus autem quadam virtute a Christo participata. Et sic patet quod Christus ratione utriusque effectus, in quantum homo, habet minorem potestatem quam Deus, qui effective et auctoritative utrumque effectum perficit; et majorem quam alius homo, qui nec gratiam ex condigno mereri potest, nec efficaciam sacramento praestare.

Ad primum Matth. 9: « Ut autem sciatis etc. » dicendum, quod non erat intentio ejus probare, quod in quantum filius hominis haberet potestatem dimittendi peccata, sed quod ipse filius hominis hanc haberet per hoc quod esset Deus.

Ad secundum, non minus est esse Deum etc., dicendum, quod esse Deum per naturam non minus est quam peccata dimittere per modum auctoritatis; sed esse Deum per gratiam unionis minus est. Sic autem convenit Christo homini esse Deum. Vel dicendum, quod Christo homini non convenit esse Deum et peccata dimittere ratione naturae humanae, sed ratione suppositi aeterni.

Ad tertium, ad invocationem ejus nominis conferebatur baptismus, dicendum, quod hoc pertinet ad potestatem excellentiorem, qua Christus efficaciam praestabat baptismo.

ARTICULUS II.

Ad secundum sic proceditur. Et 1. videtur, quod aliis hominibus dederit potestatem cooperandi ad interiorem mundationem. Ministris enim sacramentorum data est aliqua virtus, non corporalis, sed spiritualis; ergo ad effectum spiritualem, non corporalem; ergo ad emundationem interiorem, non exteriorem.

2. Praeterea, secundum Dionysium 6 cap. Ecclesiast. Hierar., « Ad ministros Ecclesiae pertinet purgare, illuminare, perficere: » sed non corporaliter; ergo spiritualiter.

3. Praeterea, sicut sanctificantur sacramenta, ita et ministri sacramentorum: sed sacramenta per sanctificationem, accipiunt vim spiritualem in spiritum instrumentaliter operandi; ergo et ministri.

Contra. Augustinus: « Majus est justificare impium, quam creare caelum et terram: » sed in creatione caeli et terrae, nihil Deo cooperatur; ergo nec in justificatione impii.

Praeterea, emundatio interior fit per Spiritum sanctum: sed ministri Ecclesiae non dant Spiritum sanctum; ergo non possunt cooperari ad emundationem interiorem.

Respondeo. Aliquis dicitur alicui cooperari quatuor modis. Vel auxiliando, vel consiliando: et his duobus modis creatura non potest cooperari Deo secundum illud Isaiae 40: « Quis adjovit spiritum Domini, aut quis consiliarius ejus fuit? » Vel instrumentaliter operando; et sic natura creata cooperatur naturae increatae in producendo effectus naturales, et sacramenta, producendo in animam aliquos effectus sacramentales, ut characterem, seu aliquem ornatum. Vel materiam disponendo: et hoc modo creatura cooperatur creatori, ut generans corpus ad susceptionem animae disponendo, et ministrans sacramentum ad susceptionem gratiae disponendo animam mediante sacramento.

Ad primum de virtute spiritali, dicendum, quod virtus eorum, spiritualis est ministerii, non auctoritatis, quo ministrant sacramenta disponendo ad gratiam, non ipsam efficiendo.

Ad secundum de Dionysio, dicendum, quod purgatio, de qua hic Dionysius loquitur, est a tenebris ignorantiae, sicut ipsemet dicit, quae non cooperantur ad productionem gratiae.

Ad tertium de sanctificatione, dicendum, quod utraque sanctificatio vim spiritualem confert; sed una vim instrumentalem, altera vim administrativam, postea activam mediante instrumento.

ARTICULUS III.

Ad tertium sic proceditur. Et 1. videtur, quod

ministris conferri potuerit potestas cooperationis ad emundationem interiorem. Super illud Joan. 1: « Ille est qui baptizat, » dicit Augustinus quod Joannes didicit, quod potestatem mundandi a peccatis Christus dare potuit, sed non dedit: dedit autem potestatem ministerii; ergo videtur quod potuit potestatem dare cooperationis.

2. Praeterea, non minor est potestas creandi, quam potestas cooperationis: sed potestas creandi, secundum Magistrum, potuit creaturis conferri: secundum autem aliquos philosophos, collata fuit; ergo et potestatem cooperationis conferre potuit.

3. Praeterea, super illud 1 Cor. 1: « Divisus est Christus, » dicit Glossa, « quod potuit dare auctoritatem baptismi quibus contulit ministerium; » ergo magis potestatem cooperationis.

Contra. Omne agens superius est et nobilius patiente: sed natura mentis humanae nihil est superius praeter Deum, ut dicit Augustinus; ergo tantum Deus potest agere in animam, et sic remittere peccatum.

Praeterea, omne agens oportet quod sit simul cum patiente, ut probatur in 8 Physicorum: sed non potest conferri alicui creaturae quod illabatur in animam rationalem; ergo nec cooperatur ad emundationem interiorem.

Respondeo. Dicendum, quod Christo aliquid conveniebat tripliciter. Uno modo ratione divinitatis; et hujusmodi aliis hominibus communicari non potuit. Sic autem conveniebat ei potestas effective et auctoritas dimittendi peccata. Alio modo ratione unionis naturae ad divinam; et hujusmodi etiam communicari non potuit alii homini, nisi similiter ab aliqua persona divina assumeretur: et hujusmodi est potestas merendi aliis gratiam, quod esse non potest nisi per meritum infinitum, in totam naturam potens, quod est Dei et hominis. Tertio ratione humanitatis absolute; et hujusmodi potuit aliis communicare. Sic autem convenit ei potestas operandi in baptismo ministerialiter, sive instrumentaliter. Sciendum tamen, quod hanc potestatem quantum ad aliquem modum communicavit, quantum ad aliquem modum non. Communicavit quidem ad hoc, quod aliis dedit quod essent ministri salutis, sacramenta dispensando; non autem ut essent ministri salutis quasi ex propria virtute, quod sibi soli reservavit; et ex hoc potestatem excellentiae habuisse dicitur in sacramentis, quae consistit in quatuor. Primo in hoc, quod sacramentis efficaciam praebet. Secundo in hoc, quod sine sacramentis, effectum sacramentorum praebere potuit. Tertio in hoc, quod sacramenta pro suo libito instituit. Quarto in hoc, quod in ejus nomine ad tempus sacramenta sanctificabantur.

Ad primum de Augustino, dicendum, quod hoc intelligitur de potestate excellentiae quam Christus habuit etiam secundum quod homo; quod includit potestatem cooperationis primo modo dictae: non autem de potestate cooperationis secundo modo dictae.

Ad secundum de potestate creandi, dicendum, quod de hoc sunt duae opiniones. Quidam enim propter infinitam extremorum distantiam, dicunt potestatem creandi esse infinitam, unde non potest cadere in essentiam finitam, et sic non posse communicari creaturae. Aliorum, ut Magistri, opinio est; quod potest communicari creaturae creationis ministerium, et non auctoritas. Sed prima opinio superior est, et communius tenetur.

Ad tertium de Glossa, 1 Cor. 1, dicendum, quod non loquitur de auctoritate prima, sed de secunda; quod patet ex eo quod sequitur in Glossa « ita scilicet « quod ille principalis auctor existat. »

ARTICULUS IV.

Ad quartum sic proceditur, Et 1. videtur quod non quilibet homo possit baptizare. Sicut enim ad baptismum requiritur materia et forma, ita et minister: sed si non sit debita materia vel forma, non erit baptismus; ergo, cum peccator sit indebitus minister baptismi, videtur quod baptismum conferre non possit.

2. Praeterea, homo vicinior est sibi quam alii: sed non baptizatus non potest seipsum baptizare; ergo nec alium.

3. Praeterea, sicut absolvere in foro poenitentiali est actus hierarchicus, ita in baptizare, ut per Dionysium patet: sed primum non habent laici, quia non est in aliquo ordine, et per consequens nec alicujus particeps hierarchiae, id est sacri principatus; ergo nec secundum.

4. Praeterea, ejusdem est baptizare et docere, ut patet Matth. ult.: « Docete omnes gentes baptizantes eos etc. » sed mulier non potest docere, ut 1 Cor. 14 dicitur; ergo nec baptizare.

Sed contra. Videtur quod etiam Angeli baptizare possint. Quicquid enim potest facere inferior, potest superior in actibus hierarchicis, ut patet per Dionysium: sed angelus est superior quolibet Ecclesiae praelato, ut idem dicit 12 cap. Caelestis hierar.; ergo Angelus potest baptizare, cum praelati Ecclesiae hoc possint.

Praeterea, Augustinus dicit super Joan.: « Talis est « baptismus, qualis ille in cujus potestate datur: » sed diabolus assumens speciem hominis potest invocare potestatem divinam; ergo potest verum baptismum praebere.

Respondeo. Dicendum, quod circa exhibitionem baptismi, considerandum est aliquid ex parte sacramenti, aliquid ex parte recipientis, et aliquid ex parte conferentis. Ex parte quidem sacramenti hoc invenitur, quod quilibet homo cujuscumque conditionis potest sacramentum baptismi praebere: et hoc propter necessitatem baptismi, sine quo parvulis subveniri non potest, misericorditer est provisum. Ex parte vero conferentis considerandum est, quod quicumque non est idoneus minister baptismi, vel propter defectum characteris baptismalis, sicut paganus vel judaeus, vel propter defectum ordinis, sicut laicus aut mulier, vel propter hoc quod est ab Ecclesia praecisus, ut haereticus, aut schismaticus vel excommunicatus, vel propter hoc quod est imundus, ut quilibet peccator; peccat baptizando extra articulum necessitatis, in quo cuilibet praedictorum licet baptizare. Tamen si extra hunc articulum baptizaret in forma Ecclesiae, baptismus est. Ex parte vero recipientis considerandum est, quod quodcumque aliquis suae arbitrio voluntatis baptismum praeter articulum necessitatis suscipit ab aliquo, qui non est Ecclesiae minister. ut puta paganus, vel laicus, vel ab Ecclesia praecisus, peccat; et ita sacramentum recipit, sed non rem sacramenti: non autem si recipiat a peccatore sacerdote, quamdiu ab Ecclesia toleratur. Si vero non sit suae arbitrii voluntatis, ut puer, vel si sit in articulo ne-

cessitatis, sacramentum et rem sacramenti accipit, a quocumque praedictorum baptizetur.

Ad primum dicendum, quod peccator baptizare potest, et non solum sacramentum, sed rem sacramenti, conferre, quia non operatur propria virtute sed Christi, ut dictum est. Unde nec per meliorem ministrum melior baptismus datur. Peccator autem dicitur indebitus minister, secundum quod indebitum opponitur debito congruitatis, non debito necessitatis.

Ad secundum dicendum, quod non baptizatus potest alium baptizare, non autem seipsum, cum baptismus sit quaedam generatio spiritualis. Nulla autem res generat seipsam, ut ait Augustinus. Quod autem dicit Hieronymus quod Judaeus, qui seipsum in aquam immersit dicens, Ego me baptizo, etc., si decessisset, ad patriam evolasset, intelligendum est propter vim contritionis et devotionis, et non propter baptismum susceptum.

Ad tertium dicendum, quod poenitentia non est tantae necessitatis sicut baptismus, quia nullus est poenitentiae capax, qui non possit absque absolutione sacerdotis salutem consequi per contritionem in articulo necessitatis: et iterum poenitentia non totaliter liberat a poena. Pueris autem solus baptismus est remedium salutare, et ab omni poena liberat adultum: et ideo cuilibet homini hunc actum hierarchicum qui est baptizare, Deus concessit, non autem actum absolvendi.

Ad quartum dicendum, quod mulier in necessitate potest baptizare, sicut et laicus. Quamvis autem ad eam non pertineat in Ecclesia docere, potest tamen privata exhortatione docere, et hoc sufficit in necessitate.

Ad quintum dicendum, quod Angelo bono non est collata potestas baptizandi; tum quia non habet convenientiam in natura cum Christo qui est sacramentorum auctor, tum quia per hoc necessitati baptizari non subveniretur, cum non sit nobis in promptu. Posset tamen Deus hanc potestatem ei conferre: unde si baptizaret aliquem, ille non esset rebaptizandus, dummodo constaret quod bonus Angelus esset: constat enim quod bonus Angelus non faceret, nisi esset sibi concessum.

Ad sextum dicendum, quod daemon baptizare non potest, cum sibi praedicta convenientia desit; et si baptizaret, reprobatus esset, quia intentione decipiendi fecisse videretur; non autem ex commissione, qua supposita auctoritas Augustini loquitur.

DISTINCTIO VI.

Nunc quibus liceat baptizare etc. (V. edit. nostrae tom. VII, pag. 552.)

QUAESTIO UNICA.

Hic quaeruntur quatuor: 1.^o utrum nativitas exigatur ex utero ad baptismum; 2.^o utrum intentio; 3.^o de catechismo puerorum; 4.^o de exorcismo. De baptizantibus enim supra satis dictum est.

ARTICULUS I.

Ad primum sic proceditur. Et 1. videtur quod nativitas ex utero non sit expectanda. Dicit enim Apostolus ad Rom. 5: « Sicut per unius delictum etc.: sed delictum Adae transit ad parvulum nondum natum; ergo et gratia Christi.

2. Praeterea, prior est Deus ad miserandum; quam ad condemnandum: sed ex condemnatione transit morbus peccati originis ad parvulum nondum natum; ergo multo magis miseratione divina debet transire medicina.

3. Praeterea, gratia baptismalis et culpa originalis sunt opposita. Opposita vero nata sunt fieri circa idem susceptibile. Cum ergo parvulus in utero sit susceptibilis culpae originalis, videtur quod sit susceptibilis gratiae baptismalis.

Contra. Augustinus dicit: « Parvulus, quamdiu ad matrem uterum pertinet baptizari non potest. »

Praeterea, ut dicitur 1 ad Cor. 16, « Non prius quod spirituale est, sed quod animale »: sed baptismus est quaedam regeneratio spiritualis; ergo prius homo animali et carnali nativitate nasci debet quam baptizetur.

Juxta hoc quaeritur, an si aliquis sanctificetur in utero, sit postea baptizandus.

Respondeo. Dicendum, quod triplex est status in homine post animae infusionem. Primus in utero; secundus extra uterum in statu infantiae; tertius in adulta aetate. In primo notus est Deo, ignotus Ecclesiae et sibiipsi; in secundo manifestus Ecclesiae, in tertio sibiipsi. Unde in primo statu, solum divina operatione per privilegium gratiae potest renasci, ut sanctificari in utero; in secundo per ministerium Ecclesiae, quia jam circa ipsum potest operari: in tertio per operationem propriam, ut in poenitentia apparet. Quia ergo baptismus sacramentum Ecclesiae est, ejus circa parvulum non potest in utero operatio adhiberi, ideo non potest parvulus in utero baptizari.

Ad 1 Rom. 5, dicendum, quod similitudo est quantum ad gratiae Christi sufficientiam, non quantum ad efficientiam; non enim gratia transit in omnes sicut culpa, nec in quocumque statu, sed secundum exigentiam ordinis divini.

Ad secundum, prior est Deus, etc., dicendum, quod verum est, quantum est de se; sed non ita sumus susceptibiles in utero remedii sicut morbi; quia causa morbi conjuncta est, scilicet semen infectum; sed causa remedii non potest conjungi, scilicet sacramentum.

Ad tertium, opposita nata sunt fieri circa idem, dicendum, quod verum est, sed non semper; imo in tempore determinato.

Ad secundam quaestionem, dicendum, quod sanctificatus in utero, debet baptizari propter tres rationes. Primo propter acquirendum characterem; quo annumeretur in populo Dei, et quo deputetur ad percipienda divina sacramenta. Secundo ut per baptismi susceptionem, passioni Christi, etiam corporaliter, conformetur. Tertio propter bonum obedientiae, quia praeceptum de baptismo omnibus datum est, et ab omnibus est implendum, nisi articulus necessitatis sacramentum excludat.

ARTICULUS II.

Ad secundum sic proceditur. Et 1. videtur, quod intentio non exigatur in baptizante. Intentio ministri est incerta; ergo si requiritur ad baptismum; incertum est homini an sit baptizatus; ergo semper est rebaptizandus.

2. Praeterea, dicit Augustinus quod si ebriosus baptizet aliquem, ille baptizatus est: sed ebriosus,

eum habeat ligatum usum rationis, non habet intentionem; ergo etc.

5. Praeterea, in agente instrumentali non requiritur intentio, sed in agente principali: minister vero est agens instrumentale; ergo etc.

4. Praeterea, intentio effectus sacramenti dependet ex fide: sed infideles possunt baptizare; ergo intentio non requiritur ad baptismum.

Contra. Luc. 12 super illud: « Si oculus tuus, etc. » dicit Glossa: « Quantum intendis, tantum facis; » ergo qui nihil intendit, nihil facit; ergo intentio requiritur ad baptismum.

Praeterea, ea quae sunt praeter intentionem, secundum Philosophum, sunt casualia: sed sacramenta non sunt casualia; ergo non sunt praeter intentionem.

Juxta hoc quaeritur, an intentio et voluntas requirantur in baptizato.

Respondeo. Dicendum, quod ad esse ejuslibet sacramenti tria sunt necessaria: materia elementi, forma verborum, et intentio conjungens haec, et applicans ad effectum: nam multae causae diversae non producant unum effectum, nisi aliquo modo conjungantur in unum: conjunctio vero diversorum, quae dependent a voluntate humana, non fit nisi per intentionem ordinantem ea ad unum.

Ad primum de incertitudine intentionis, dicendum, quod secundum quosdam, si desit intentio baptizantis, adultus non recipit sacramentum baptismi, sed fides et devotio effectum baptismi suppleant in eo. Si autem sit puer, creditur pie, quod summus sacerdos Christus defectum suppleat. Secundum alios, dicendum, quod in baptismo et in aliis sacramentis quae habent in forma actum exercitum, non requiritur mentalis intentio, sed sufficit expressio intentionis per verba ab Ecclesia instituta.

Ad secundum de ebrioso, dicendum, quod talis, aut habet omnino ligatum usum rationis, et tunc non intendit, nec sacramentum baptismi confert: aut non, et tunc intendit et baptizat. Vel dicendum, quod ebriosus non semper est actu ebrius, et ideo intentionem baptizandi habere potest.

Ad tertium de instrumento, dicendum, quod secundum Philosophum, 8 Eth., duplex est instrumentum: quoddam inanimatum, ut securis, et in hoc non requiritur intentio: quoddam animatum, ut servus, et in hoc requiritur; agit enim secundum imperium voluntatis.

Ad quartam dicendum, quod infidelis, aut errat in effectu sacramenti, et sic licet non possit habere expressam intentionem de effectu sacramenti, potest tamen habere in generali, ut scilicet intendat facere quod facit Ecclesia: aut non errat circa haec, sed circa alia: et tunc in nullo impeditur ejus intentio, et potest baptizare: baptizat enim in fide Ecclesiae, et non in fide propria.

Ad secundam quaestionem, dicendum, quod suscipientium baptismum tres sunt differentiae. Quidam enim nunquam habuerunt usum rationis, ut parvuli et perpetuo furiosi; et in his voluntas non requiritur, nec intentio. Quidam vero aliquando habuerunt, licet tunc non habeant; et in his requiritur intentio et voluntas antecedens, licet non concomitans, et in his intentio et voluntas aliqua requiritur, aliqua non. Sufficit enim voluntas conditionata, nec requiritur absoluta ad sacramenti susceptionem, sed ad rem sacramenti. Cum ergo quis ad baptismum cogitur, aut est coactio omnimoda

per vim absolutam, quia violenter immergitur, et tunc non recipit sacramentum nec rem: aut conditionata quae per metum inducitur; et tunc recipit sacramentum, sed non rem.

ARTICULUS III.

Ad tertium sic proceditur. Et 1. videtur, quod parvulus catechizandus non sit. Frustra enim adhibetur instructio ei qui non est percipivus disciplinae: hujusmodi sunt parvuli, quia non habent usum liberi arbitrii; ergo non debet eis instructio adhiberi.

2. Praeterea, ibi fit professio Dei et obligatio: sed parvulus non potest per se profiteri, nec per alterum potest profitendo obligari; ergo frustra fit catechismus parvulis.

3. Praeterea, propter adultos a principio fuit institutus catechismus; ergo causa cessante debet cessare effectus.

Contra hoc est, Ecclesiae generalis consuetudo.

Praeterea, unum et idem est baptisma parvulorum et adultorum; ergo unus et idem debet esse ritus ejus in utrisque.

Respondeo. Dicendum, quod catechismus est quaedam dispositio ad baptismum: dispositiones autem proportionari debent illis ad quae disponunt. Unde in adulto, in quo est propria fides et propria voluntas requiritur quod ipse per se catechizetur, et per se confiteatur, et christianam religionem profiteatur. In puero autem, ejus baptismus operatur tantum ex fide Ecclesiae et Christi merito, fit instructio mediante alio. Unde ea quibus instruendus est, proponuntur praesente patrino, cui committitur in his instruendus; et ipse loco ejus professionem et confessionem facit.

Ad primum, non est susceptivus disciplinae, dicendum, quod tunc non fit instructio ut parvulus instruat, sed ut per alterum fidem suscipere et profiteri monstratur.

Ad secundum de professione, dicendum, quod ipse parvulus, quamvis per se non possit profiteri, tamen obligatur professione patrini; non quidem suam propriam fidem consentis, sed pueri: et quantum ad id quod nunc est, ut sit sensus: Credo, id est sacramenta fidei praesto sum accipere, in persona pueri loquens, ut Augustinus exponit: et quantum ad id, quod futurum est, ut sit sensus, Credo, id est quando ad perfectam aetatem veniam, fidei consentiam, secundum Dionysium.

Ad tertium, cessante causa etc., dicendum, quod non fuit haec tota causa; sed ut monstratur congruus ordo sacramenti, et per quid habet virtutem, quia per passionem Christi, et ea quae ibi profitetur baptisma suscipiens.

ARTICULUS IV.

Ad quartum sic proceditur. Et 1. videtur, quod exorcismus nihil prosit. Ab exorcizato statim per baptismum diabolus pellendus est sufficienter; ergo pro nihilo ante exorcizatur.

2. Praeterea, si decedit parvulus exorcizatus ante baptismum, ita damnatur, sicut sine exorcismo; ergo exorcismus in eo nihil operatur.

3. Praeterea, si exorcismus efficit aliquid in exorcizato, non est tantum signum, sed causa signi, et sacramentum et non sacramentale.

Contra. Augustinus libro de symbolo dicit, quod parvulus exorcizatur, ut diaboli potestas ab eo expellatur; ergo prodest.

Praeterea, Gregorius dicit: « Sacerdos cum per exorcismi gratiam manus credentibus imponit, quid aliud quam daemona ejicit » ?

Respondeo. Dicendum, quod propter peccatum hominis diabolus potestatem in hominem accepit, et in ea quae veniunt in usum hominis: ideo quia nulla est convenientia Christi ad Belial, quicquid in usum dedicatur Christi et sanctificatur, sive res, sive persona, prius exorcizatur, ut potestas diaboli ab eo pellatur. Quae autem sit efficacia illius adjurationis, opiniones sunt diversae. Quidam enim dixerunt, quod vis ejus est tantum in significando ea quae in baptismo Christi sunt. Sed auctoritas Gregorii et Augustini plus ei tribuunt. Ideo alii dixerunt quod habet effectum in corpore et anima, non aliquid conferendo, sed prohibens removendo; quia potestas diaboli minuitur, ne ita possit in parvulis, et in aliis baptizandis, a baptismo et salute impedire, sicut ante poterat.

Ad primum, sufficienter per baptismum pellendus est diabolus, dicendum, quod quamvis in baptismo sufficienter pellatur, tamen propter baptismum suscepturi securitatem et facilitatem, et propter baptismi solemnitatem, exorcismus convenienter praemittitur.

Ad secundum, si decedit ita damnatur, dicendum, quod ad hoc non fit exorcismus, ut sine baptismo possit salvari parvulus; sed ne a salute in baptismo consequenda, tam de facili impediri possit.

Ad tertium, si effectum habet, est sacramentum novae legis, dicendum quod non habet effectum aliquem in ferendo bonum, sed in coercendo malum. Unde non est sacramentum.

DISTINCTIO VII.

Nunc de sacramento Confirmationis etc. (V. edit. nostrae tom. VII, pag. 566.)

QUAESTIO UNICA.

Hic quaeruntur quinque: 1.^o utrum confirmatio sit sacramentum; 2.^o de materia; 3.^o de forma; 4.^o de effectu; 5.^o de ministro.

ARTICULUS I.

Ad primum sic proceditur. Et 1. videtur, quod Confirmatio non sit sacramentum. Omne enim sacramentum est signum divina institutione traditum: sed non legitur Confirmatio instituta esse a Deo; ergo non est sacramentum.

2. Praeterea, illud cujus usus est in pluribus sacramentis non est speciale sacramentum: sed chrismatis unctio est hujusmodi; ergo etc.

3. Praeterea, sacramentum novae legis fuit praefiguratum in veteri: confirmatio praefigurata non fuit: ergo etc.

Contra. Dicit Rabanus: « Scitote utrumque magnum esse sacramentum, scilicet confirmationem et baptismum; ergo etc.

Praeterea, confirmatio est invisibilis gratiae visibilis forma, ut ejus similitudinem gerat et causa existat; ergo est sacramentum.

Respondeo. Dicendum, quod de ratione sacramenti est, quod sit signum et causa gratiae. Unde confirmatio cum sit signum, est et causa gratiae. Apostoli enim cum confirmabant per manus impositionem, sub signis visibilibus conferebant Spiritum sanctum, ut legitur in Actis; ideo confirmatio est sacramentum.

Ad primum, a quo sit institutum, dicendum, quod quidam dixerunt, quod ab Apostolis, qui primo leguntur confirmasse, Act. 8. Alii quod ab Ecclesia quae primo legitur ipsum ritum solemnem instituisse et praecepisse.

Sed contra hoc est; quia nec Apostoli, nec aliarum Ecclesiarum praelati sunt factores legis, sed ministri: et fundamentum totius legis in sacramentis consistit. Ideo alii dicunt quod institutum est hoc sacramentum a Christo, cujus est dare virtutem sacramentis; sicut omnia alia dicuntur a Christo fuisse instituta. Hoc autem probat ex hoc quod ipse Christus manus pueris imponebat, ut legitur Matth. 9.

Ad secundum de unctione chrismatis, dicendum, quod quamvis materia possit esse communis in pluribus sacramentis, tamen forma est propria.

Ad tertium de praefiguratione, dicendum, quod quia effectus hujus sacramenti magis pertinet ad perfectionem salutis, quam ad necessitatem; ideo non fuit praefiguratum in veteri lege: ibi enim praefigurabantur ea quae sunt necessitatis, non autem quae perfectionis. Vel dicendum, quod praefigurata fuit in unctione David in Regem, 2 Reg. 2.

ARTICULUS II.

Ad secundum sic proceditur. Et 1. videtur, quod materia hujus sacramenti non sit chrisma. Materia enim cujuslibet sacramenti est a Domino instituta: sed non legitur chrisma nec aliquid aliud esse institutum materia hujus sacramenti; ergo chrisma non est de essentia, sive materia hujus sacramenti.

2. Praeterea, signatum hujus sacramenti est simplex; cum ergo signum debeat conformari signato, chrisma, quod non est simplex, non potest esse materia significans effectum hujus sacramenti.

3. Praeterea, materia sacramenti debet esse communis: oleum vero et balsamum non est commune; quia non apud omnes invenitur; ergo ex his non potest confici materia hujus sacramenti.

4. Praeterea, videtur, quod non requiratur materia sanctificata. Non enim est majoris virtutis confirmatio quam baptismus: in baptismo vero non requiratur de necessitate materia sanctificata; ergo nec in confirmatione.

5. Praeterea, accedit verbum ad elementum et fit sacramentum, ut dicit Augustinus; si ergo ante confirmationem chrisma verbo oportet sanctificari, ipsum est per se quoddam sacramentum.

Respondeo. Dicendum ad quaestionem primam, quod in materia sacramenti effectus ejus significantur. Sacramentum vero hoc ad duplicem effectum seu actum datur: quorum est primum nitor fidei in firma credulitate cordis, qui significatur oleo olivarum; secundus odor famae in confessione oris, qui significatur in balsamo ratione odoris; ideo materia confirmationis componitur ex oleo olivarum et balsamo.

Ad primum, non legitur materia sacramenti a Domino instituta, dicendum, quod plenitudo Spiritus sancti non erat danda ante Christi resurrectio-

nem et ascensionem, sicut dicitur Joan. 7: « Nondum erat Spiritus datus, quia nondum erat Jesus glorificatus; » et ideo secundum unam opinionem, ea quae ad hoc sacramentum pertinent non fuerunt ante Christi ascensionem instituenda: secundum vero aliorum opinionem materiam hujus sacramenti dicitur Christus per seipsum instituisse; sed denunciandam Apostolis dereliquit, quando usus sacramenti competebat; scilicet post plenam Spiritus sancti missionem.

Ad secundum, signatum simplex est, dicendum, quod quamvis gratia confirmationis sit simplex in essentia, tamen duplex est in effectu.

Ad tertium de communitate materiae, dicendum, quod materia debet esse communis in sacramentis necessitatis; sed in sacramentis dignitatis et perfectionis non oportet.

Ad secundam quaestionem, dicendum, quod quaedam sunt sacramenta necessitatis; et ideo in his licet requiratur sanctificatio materiae ad solemnitatem, non tamen ad necessitatem, ut in baptismo. Quaedam vero sunt perfectionis; et ideo in his requiritur sanctificatio ad solemnitatem et necessitatem duplex: una ante usum, altera in usu; sicut virtutis collatio fit alicui instrumento, quando figura instrumenti ei datur, et iterum quando a movente in motu virtus operandi ei confertur.

Ad primum de baptismo, dicendum, quod ideo in baptismo sanctificatio non ita requiritur sicut in confirmatione, non quia sit minoris sanctitatis sive virtutis, sed quia majoris necessitatis.

Ad secundum, « accedit verbum etc. » dicendum, quod non intelligitur de quocumque verbo, sed de illo in quo consistit forma sacramenti.

ARTICULUS III.

Ad tertium sic proceditur. Et 1. videtur, quod haec forma verborum: « Consigno te signo sanctae Crucis et confirmo te chrismate salutis, in nomine Patris etc. » sacramento confirmationis non conveniat. Forma enim dicitur esse eadem apud omnes: sed haec non est eadem apud omnes: alii enim dicunt « chrismate sanctificationis »; videtur ergo quod non sit conveniens.

2. Praeterea, Christus nullam tradidit formam. Apostoli etiam nulla forma usi leguntur; ergo videtur quod haec non sit congrua forma.

3. Praeterea, sola invocatio Trinitatis est forma sanctificationis in sacramentis; ergo superfluit totum residuum, excepto hoc quod dicitur: « In nomine Patris et Filii et Spiritus sancti. Amen. »

4. Praeterea, sufficit se aut alium signare facto; ergo non oportet exprimere verbo.

5. Praeterea, unius sacramenti unus est actus; ergo male exprimitur in forma duplex actus.

Respondeo. Dicendum, quod quia forma dat esse rei et posse; ideo necessario in forma tangitur totum esse et posse sacramenti. Tangitur ergo primo finis ad quem est confirmatio, scilicet ad audacem confessionem fidei, maxime quo ad articulum erubescibilium, scilicet passionem, cum dicitur: « Consigno te signo Crucis. » Secundo actus ipsius sacramenti, cum dicitur: « Confirmo te. » Tertio ejus materia, cum dicitur: « Chrismate salutis. » Quarto virtus sanctificationis, cum subjungitur: « In nomine Patris etc. »

Ad primum, de mutatione verborum, dicendum,

quod quaedam sunt de substantia formae, in quibus non debet fieri variatio; quaedam de bene esse, in quibus non nocet variatio; maxime cum eadem res significatur per id quod dicitur, salutis et sanctificationis.

Ad secundum, Christus nullam formam tradidit, dicendum, quod secundum quosdam, Apostoli confirmabant sine materia et forma per solam manuum impositionem.

Sed contra hoc est, quod ipsi potestatem excellentiae in sacramentis non habebant. Et ideo, secundum alios, dicendum, quod Apostoli aliqua forma utebantur eis a Christo tradita, quamvis non sit scripta: non enim omnem ritum quem in sacramentis exercebant scripserunt, sed multa verbotenus tradiderunt. Unde, 1 Cor. 11, dicit Paulus: « Cetera cum venero disponam. » Et Dionysius circa finem Ecclesiasticae Hierarchiae ait: « Confirmativas autem invocationes, id est verba, quibus sacramenta perficiuntur, non est justum Scripturas interpretantibus neque mysticum earum, aut in ipsis operatas a Deo virtutes ex occulto ad commune educere: sed ut nostra sacra traditio habet, sine pompa, id est occulte eas edocens etc. »

Ad tertium, in nomine Trinitatis, dicendum, quod non est sola sanctificans, sed praedicta forma (1). Vel dicendum, secundum aliquos, quod in forma illa non tantum ponitur quod pertinet ad esse sacramenti, sed quod pertinent ad posse, sive ad efficiendum, sine ad designandum pertineat.

Ad quartum sufficit signare facto, dicendum, quod si sufficiat ad effectum, non tamen ad evidentiam effectus, qui praecipue requiritur in sacramentis eo quod significando causant.

Ad quintum, « unius formae etc. » dicendum, quod duo actus ordinati, sed non omnino diversi, bene possunt esse unius formae. Confirmatio vero fidei in corde et confirmatio in signo, sive in ore, actus sunt ordinati.

ARTICULUS IV.

Ad quartum sic proceditur. Et 1. videtur, quod gratia gratum faciens in confirmatione non confertur. Confirmatio enim est remedium contra poenam, scilicet pusillanimitatis, non contra culpam: gratia vero ordinatur contra culpam, non contra poenam; ergo confirmatio non confert gratiam.

2. Praeterea, ad hoc quod potest fieri cum peccato mortali, non debet dari gratia gratum faciens: sed audax confessio fidei nominis Christi potest fieri cum peccato mortali; ergo ad hoc in confirmatione non debet dari gratia.

3. Praeterea, gratia gratum faciens est illa qua reconciliatur homo Deo: sed confirmatio est sacramentum reconciliabilissimum, quia non datur peccatori; ergo etc.

Contra. Sacramentum novae legis est signum et causa gratiae gratum facientis; ergo dat gratiam.

Praeterea, dicit Rabanus, quod « per impositionem manus summi Pontificis datur Paraclitus. » Sed non datur nisi in gratia gratum faciente; ergo in confirmatione confertur gratia.

Juxta haec quaeritur utrum copiosius munus gratiae conferatur in confirmatione quam in baptismo.

Respondeo. Dicendum, quod sacramenta quae imprimunt characterem causa sunt gratiae per im-

(1) *Lege nisi sub praedicta forma.*

pressionem ejus; quia character, quantum est de se, est sufficiens dispositio ad gratiam. Confirmatio autem imprimat characterem, quia mancipat hominem ad aliquod sacramentum, scilicet ad constantem confessionem fidei; ideo confert gratiam.

Ad primum, confirmatio est remedium contra poenam, dicendum, quod duplex est poena: quaedam quae est effectus culpae, tantum, ut poena corporalis; quaedam quae est etiam causa, ut poena spirituale. Contra hanc oportet dari gratiam, sicut contra culpam; quia per idem habet sanari morbi essentia et causa.

Ad secundum de peccato mortali, dicendum, quod quamvis possit audax fieri confessio in peccato, non tamen bene et meritorie.

Ad tertium, quod gratia gratum faciens reconciliat, dicendum, quod hoc per accidens est, in quantum in reconciliato invenit peccatum.

Ad secundam quaestionem, dicendum, quod gratia confirmationis praesupponit baptismalem, sicut bene esse praesupponit esse. Si ergo quaeratur utrum gratia confirmationis sit major ea quam praesupponit, constat quod sic, sicut gratia aucta quam absoluta. Si autem fiat praecise comparatio ejus quod additur in sacramento confirmationis ad illud quod datur in sacramento baptismi, constat quod id quod datur in sacramento baptismi est majoris efficaciae; quia vivificare mortuum est majoris potentiae, quam vivum roborare. Ideo quantum ad effectum est major gratia baptismalis, quamvis quantum ad essentiam possit e converso esse.

ARTICULUS V.

Ad quintum sic proceditur. Et 1. videtur, quod simplex sacerdos possit confirmare. Quia qui potest quod majus est, potest quod minus est: sed majus est corpus Christi consecrare quam chrismare; ergo cum sacerdos simplex possit primum, multo fortius secundum.

2. Praeterea, si solus Episcopus potest chrismare, aut ergo ratione ordinis aut ratione jurisdictionis. Non propter primum; quia nullus major ordo sacerdotio. Non propter secundum; quia sic electus non confirmatus posset chrismare.

3. Praeterea, videtur quod quilibet possit chrismare. Baptismum enim qui est maxime efficaciae, potest quilibet dare sine peccato in necessitate; et sine necessitate, si facit, factum est; ergo multo magis hoc sacramentum.

Contra. In litera dicitur, quod hoc sacramentum a solis Pontificibus datur.

Praeterea, solis Apostolis in primitiva Ecclesia licitum erat confirmare. Unde et Philippus diaconus non confirmavit a se baptizatos, sed ad Apostolos confirmandi venerunt, Act. 8; ergo non licet confirmare nisi successoribus Apostolorum, idest Episcopis.

Juxta haec quaeritur an de mandato Papae possit simplex sacerdos confirmare.

Respondeo. Dicendum, quod sicut in operibus artificialibus opera inferiora fiunt per artifices inferiores, superiora per superiores, ita in operibus sacramentalibus opera, quae non ponunt excellentiam ultra statum communem, competunt ministris minoribus, idest presbyteris; opera vero quae ponunt perfectionem vel excellentiam, reservantur ministris superioribus in Pontificibus. Talia vero sunt praec-

ipue confirmatio et ordo quae distinguunt fideles in statu; et ideo reservantur Pontificibus. Alia vero non sic distinguunt, sed unumquodque in statu suo perficitur; et ideo reservantur ministris inferioribus, scilicet presbyteris.

Ad id, quod qui potest majus etc., dicendum, quod verum est, quando majus includit minus; sed sic non est in proposito. Chrismatio enim non includitur in Eucharistiae confectione.

Ad secundum, aut ratione ordinis etc., dicendum, quod ratione neutrius divisim, sed ratione utriusque conjunctim.

Ad tertium de baptismo, dicendum, quod non est simile; quia baptismus est sacramentum necessitatis, non sic chrismatio.

Ad secundam quaestionem dicendum, quod de hoc sunt tres opiniones. Quidam enim dicunt, quod presbyter simplex non possit ex mandato Papae confirmare: et dictum Gregorii in litera exponunt, non quod presbyteri illi sacramentum confirmationis, sed aliquod sacramentale simile sacramento conferrent. Sed hoc non videtur conveniens, ut talem simulationem induxisset Gregorius; quia dispensatio sacramentorum pertinet ad veritatem doctrinae quae non est propter scandalum dimittenda. Et praeterea sacerdos ex auctoritate Papae confert minores ordines, quod plus est quam confirmare. Et ideo alii dicunt, quod Papa potest committere cuilibet ut conferat sacramentum quod accepit, non alterum, ut diaconus diaconatum, non presbyteratum. Sed quia aliis videtur quod opinio ista sit nimis ampla; ideo mediam tenent. Dicunt enim quod Papa potest simplici sacerdoti qui habet actum super corpus Christi verum, committere omnes operationes quae ordinantur ad corpus mysticum, non autem aliis, qui potestatem non habent consecrandi corpus Christi; et ideo sacerdoti non diacono potest communicari collatio minorum ordinum et confirmatio, non autem collatio sacrorum ordinum, qui habent actus super corpus Christi verum, vel ejus materiam, et non solum super corpus mysticum; et hoc ideo quia a corpore vero Christi derivantur omnia quae in corpore Christi mystico aguntur.

DISTINCTIO VIII.

Post sacramentum Baptismi etc. (*V. edit. nostrae tom. VII, pag. 380.*)

QUAESTIO UNICA.

Hic quaeruntur quinque: 1.º utrum Eucharistia sit sacramentum; 2.º utrum sumi possit post alios cibos; 3.º de forma consecrationis corporis; 4.º de forma consecrationis sanguinis; 5.º de virtute utriusque.

ARTICULUS I.

Ad primum sic proceditur. Et 1. videtur, quod Eucharistia non sit sacramentum novae legis. Sacramentum novae legis efficit quod figurat: sed species exterior non efficit corpus Christi verum; ergo non est ejus sacramentum.

2. Praeterea, sacramentum debet esse signum visibile: sed corpus Christi sub speciebus non est visibile; ergo non est effectus Eucharistiae; ergo non est sacramentum.

5. Praeterea, res sacramenti est ejus effectus: sed corpus mysticum non est sacramentum.

Contra. Gregorius: « Praesta, inquit, ut hoc tuum sacramentum non sit nobis reatus ad poenam. »

Praeterea, omnis actio per ministros Ecclesiae dispensata in qua ex opere operato gratia confertur, est sacramentum: sed Eucharistia est hujusmodi; ergo est sacramentum.

Respondeo. Dicendum, quod Eucharistia est sacramentum; et modo communi cum aliis sacramentis, scilicet significando et creando sanctitatem; et modo speciali, scilicet continendo totius sanctitatis auctorem: propter quod excellentissimum est omnium sacramentorum.

Ad primum, non efficit quod figurat, dicendum, quod quamvis illud simpliciter non efficiat, tamen facit illud esse in loco isto virtute verborum adjuncta.

Ad secundum de visibilitate, dicendum, quod omne sacramentum est visibile, secundum aliquam sui partem; scilicet secundum id quod est sacramentum tantum; sed non secundum omnem, scilicet secundum id quod est sacramentum et res, sicut est corpus Christi in sacramento Eucharistiae. Nec secundum id quod est res tantum, sicut est gratia in quolibet sacramento.

Ad tertium dicendum, quod secundum id quod est materialiter consideratum, non est effectus sacramenti, scilicet ipsae personae fidelium, sed in quantum unitum est, scilicet formaliter; id est ejus unio, quae est per fidem et charitatem, est effectus ejus.

ARTICULUS II.

Ad secundum sic proceditur. Et 1. videtur, quod hoc sacramentum a non jejunis licite sumi possit. Primae enim Cor. 11 dicitur: « Cum convenitis ad manducandum, invicem expectate. Si quis autem esurit, domi manducet. » Ergo postquam domi manducavit, licet communicare; quia de manducatione sacramenti ibi loquitur.

2. Praeterea, Apostoli manducaverunt post coenam corpus Christi, ut patet Matth. 26; ergo videtur, quod similiter eorum exemplo fieri possit.

3. Praeterea, de consecratione distinctione 1, dicitur, « quod sacramentum altaris non nisi a jejunis hominibus celebretur, excepto uno die anniversario, quo coena Domini celebratur; » ergo tunc licet post coenam sumere Eucharistiam.

Contra. De consecratione, distinctione 2, dicitur: « Placuit Spiritui sancto, ut in honorem tanti Sacramenti, prius in os christiani Dominicum corpus, quam alius cibus intraret. »

Praeterea, hoc sacramentum eum maxima sobrietate et reverentia et devotione est sumendum: non est autem reverentia, sobrietas et devotio post cibum; ergo debet sumi ante cibum.

Respondeo. Hoc sacramentum tantum a jejunis percipi debet. In reverentiam enim tanti sacramenti propter tria praecipue hoc est institutum. Primo propter ipsam sanctitatem sacramenti; ut os Christiani, quo sumendum est, non sit alio cibo prius imbutum, sed purum. Secundo propter devotionem et attentionem, quae exigitur ex parte recipientis, quae ex sumptis cibis impediri possunt. Tertio propter periculum vomitus. Propter necessitatem tamen, imminente mortis periculo, ne contingat sine viatico

- S. Th. Opera omnia. V. 22.

ex hac vita transire, potest post comestionem sumi.

Ad primum dicendum de Apostolo, quod Apostolus non intendit quod fideles post cibos sumptos domi, in Ecclesia corpus Christi sumant; sed illos redarguit, qui hunc cibum volebant aliis cibis commiscere, quos in Ecclesia sumebant.

Ad secundum dicendum de Apostolis, quod non est simile. Non enim idem tempus convenit institutioni sacramenti et usui; quia alia est conditio rei in suo fieri, et alia in suo facto esse. Christus enim triplici ratione voluit hoc sacramentum in coena ministrare. Una propter corporalis praesentiae abstractionem. Secunda propter veteris sacrificii terminationem, scilicet agni paschalis in passione terminandi. Tertia propter passionis representationem. Imminente enim passione institui debebat sacramentum passionis repraesentativum, ut magis cordibus discipulorum infingeretur.

Ad tertium dicendum de consuetudine, quod quamvis consuetudo illa aliquo tempore observata fuerit, tamen nunc rationabilior consuetudo contraria, illam abrogavit.

ARTICULUS III.

Ad tertium sic proceditur. Et 1. videtur, quod haec non sit forma consecrationis panis « Hoc est corpus meum. » Sacramenta enim habent efficaciam ex institutione divina: sed Dominus instituens hoc sacramentum non consecravit iis verbis, sed per consecrationem haec verba protulit, ut dicitur Matth. 26: « Coenantibus illis accepit Jesus panem, benedixit et fregit, deditque discipulis suis, et ait: « Accipite ex hoc omnes; » ergo in praedictis verbis non consistit forma consecrationis panis.

2. Praeterea, hoc pronomen, hoc, demonstrativum est; ergo, hoc, demonstrat corpus Christi, aut aliud: si corpus, ergo ab initio prolationis est ibi corpus; ergo jam facta est consecratio, quod est falsum: si aliud, ergo locutio est falsa; ergo sermo veritatis falsum est, quod non est possibile.

3. Praeterea, haec conjunctio, enim, a nullo Evangelistarum ponitur, nec verba praecedentia, elevatis in caelum oculis; ergo non debuerunt poni cum substantialibus.

4. Praeterea, signatum debet respondere signo; ergo, eum earo sit homogenea sicut panis, non autem corpus, melius debuit dici, earo mea, quam corpus meum.

5. Praeterea, videtur quod, accipite et manducate ex hoc omnes, sit de forma. Ambrosius enim dicit in litera: « Consecratio quibus fit verbis? Attende quae sunt verba. Accipite et comedite ex eo omnes. Hoc est corpus meum; » ergo haec omnia sunt de substantia formae.

Respondeo. Dicendum, quod sacramenta signando causant. Unde oportet, quod in forma cujuslibet sacramenti, effectus sacramenti exprimat. Sacramentum enim Eucharistiae ab aliis differt in duobus. Primo in hoc, quod alia sacramenta perficiuntur in usu; non in consecratione materiae. Hoc autem sacramentum in ipsa materiae consecratione, et non in usu; quia ejus materia continet rem viventem, scilicet Christum. Secundo quantum ad hoc, quod in hoc sacramentum nullum exteriorem actum habet minister praeter prolationem verbi, sicut habet in baptismo. Et ideo forma hujus sacramenti differt ab aliis dupliciter. Primo quantum ad hoc, quod

non continet usum sacramenti, sed solum materiae sanctificationem, quae est transubstantiatio. Secundo, quod verba proferuntur non ex persona ministri, sicut in aliis, sed ex persona Christi. Et ex hoc sequitur tertia differentia: quod quia Christus propria virtute in sacramento agebat, utpote habens divinitatem in se, ideo non fit in hac forma invocatio Trinitatis. Et ex istis sequitur quarta, quod scilicet exprimitur per verbum substantivum, alia vero per verba optativa; quia in aliis oportuit significari actum ministri, hic autem solum ultimum effectum sacramenti.

Ad primum, quod post consecrationem verba protulit, dicendum, quod circa hoc quatuor sunt opiniones. Una est, quod Dominus per se sine verbo confecit, et post suam confectionem nobis suam formam conficiendi dedit: et hanc opinionem tangit Innocentius III, inquit: « Sane dici potest, quod Christus virtute divina confecit, et postea formam expressit, sub qua posteri benedicerent. »

Sed contra. Matth. 26 dicitur quod benedixit. Benedictio vero aliquibus verbis fit. Innocentius autem non definit, sed opinionem tangit.

Alii dixerunt, quod verbis aliis consecravit. Sed hoc non videtur conveniens; quia secundum hoc, cum forma diversa diversificet esse rei, etiam aliud sacramentum fuit suum, quam sit nostrum.

Alii dicunt, quod bis verba illa protulit; primo tacite consecrando, postea aperte formam consecrandi dando.

Sed contra hoc est, quia superfluum est iterari, quod aequè bene per unum actum potest fieri.

Alii dicunt verius, quod illis verbis tantum semel dictis consecravit Dominus, et nobis formam consecrandi dedit. Unde, secundum eos, hoc participium, dicens, importat concomitantiam respectu trium actuum: ut sit sensus, dum diceret, Hoc est etc. benedixit, fregit et dedit. Et sic non prius benedixit, seu consecravit, quam dixit: Hoc est corpus meum.

Ad secundum de demonstratione pronominis, dicendum, quod circa hoc sunt diversae opiniones. Nam quidam dixerunt, quod pronomen illud nullam demonstrationem facit, quia accipitur materialiter, non significative; sicut verbum in persona alterius recitatum, non per se, pronunciatum.

Sed contra. Quia sic verba non accedunt ad elementum; ergo non fieret sacramentum.

Item quia Christus protulit ea significative. Alii dicunt quod sit ibi demonstratio, non ad sensum, sed ad intellectum; ut sit sensus, significatum per hoc est corpus meum.

Sed contra. Propositio haec sine transubstantiatione potest esse vera: sicut cum dicitur « Petra erat Christus » 1 Cor. 10; ergo per hanc formam non significatur; et per consequens non fit transubstantiatio panis in corpus verum. Alii dicunt, et verius, quod sit ibi demonstratio quasi ad subjectum; ut cum dicitur, ostenso corpore nigro: hoc fit album. Et secundum hoc, talis est sensus: hoc est corpus meum, idest: Sub hac specie est contentum. Unde Glossa: Quod sub hac specie videtur, est corpus meum: sicut viso angelo apparente in humana specie dicitur: Ille est angelus. Hoc autem, quod continetur sub speciebus in principio, est substantia panis; sed in fine prolationis substantia corporis Christi. Et sic, quando finitur significatio propositionis, invenitur in ea veritas.

Ad tertium de hac conjunctione, enim, dicendum, quod non est de substantia formae, sed apponitur ad denotandum ordinem consecrationis ad usum materiae consecratae, qui usus non est de necessitate sacramenti. Unde nec ipsa conjunctio. Verumtamen scienter omitti non debet, cum usus antiquus Ecclesiae hoc habeat.

Ad quartum, caro est homogœna, dicendum, quod quavis sit homogœna caro, tamen quia non tantum caro, sed totum corpus continetur ibi, ideo dixit potius corpus, quam caro, propter similitudinem etiam ad corpus mysticum, quod est ex diversis, sicut corpus ex carne et ossibus.

Ad quintum, quod objicitur de his verbis: « Accipite et manducate etc. », dicendum, quod haec verba pertinent ad usum materiae consecratae, qui non est de substantia sacramenti nisi ad ejus consecrationem: et ideo non sunt de essentia formae sacramenti. Nec Ambrosius intelligit, quod per haec verba fiat consecratio; sed per ea quae subjunguntur, scilicet hoc est corpus meum.

ARTICULUS IV.

Circa quartum sic proceditur. Forma consecrationis sanguinis haec est: Ille est enim calix sanguinis mei, novi et aeterni Testamenti, mysterium fidei, qui pro vobis et pro multis effundetur in remissionem peccatorum. Et videtur, quod sit inconveniens; quia formae sacramentorum sunt auctoritate divina institutae: sed talis forma a Deo instituta non invenitur, cum in Scriptura sacra non tradatur; ergo etc.

2. Praeterea, nihil debet poni in forma nisi quod spectat ad formam sacramenti; ergo calix, cum sit quoddam vas contentivum sanguinis, non est de integritate sacramenti.

3. Praeterea, si dicatur quod calix metaphorice sumitur pro potu vel passione: Contra. Metaphoricae loquutiones distrahunt intellectum. Cum ergo non debeat distrahi intellectus consecrantis, sequitur quod forma consecrationis non debeat esse metaphorica.

4. Praeterea, si transumptive sumatur pro contento potu, tunc est sensus: Ille est potus sanguinis mei. Sed in consecratione corporis nihil tangitur de cibo; ergo nec deberet hic tangi aliquid de potu.

5. Praeterea, dicitur, novi et aeterni Testamenti. Contra; si est novum, non est aeternum; ergo est oppositio in adjecto.

6. Praeterea, dicitur mysterium fidei. Contra. Sicut in hoc sacramento tangitur mysterium fidei, sic et in aliis rebus. Sed in aliis non tangitur; ergo nec in isto tangi debet.

7. Praeterea, sicut sanguis effusus est pro omnibus quantum ad sufficientiam, sic et corpus traditum: sed hoc non tangitur de consecratione corporis; ergo etc.

8. Praeterea, quaeritur quare dicitur, pro vobis et pro multis; cum quantum ad sufficientiam pro omnibus sit traditum, quantum autem ad efficientiam, non pro omnibus traditum, sed pro solis electis: conjunctio autem copulat diversa; ergo non debet dici pro vobis et pro multis.

Respondeo. Dicendum, quod circa formam praedictam est duplex opinio. Quidam enim dicunt, quod non omnia verba praedicta sunt de substantia formae, sed solum hoc quod dicitur: Ille est calix

sanguinis mei. Sed quia conditiones appositae ad subjectum vel praedicatum sunt de integritate loquutionis, ideo alii dicunt quod omnia sunt de forma. Apponuntur autem praedictae conditiones, secundum eos, in forma sanguinis, et non in forma corporis, quia per consecrationem sanguinis, expresse passio Christi figuratur per quam sanguis a corpore separatus fuit: et ideo in forma sanguinis tanguntur passionis conditiones, secundum quod operatur in sacramentis. Tangitur namque ejus effectus, qui est remissio peccatorum, in hoc quod dicitur: Qui pro vobis, etc.: fides per quam passio Christi in nobis efficaciam habet, in hoc quod dicitur, mysterium fidei: quod potest referri ad passionem quae latebat in figuris veteris legis, et ad sanguinem qui latet sub speciebus. Tangitur et finis qui est perceptio aeternae haereditatis, in hoc quod dicitur, novi et aeterni Testamenti. Tanguntur autem ordine intentionis, quo finis est prior.

Ad primum ergo dicendum, quod forma praedicta, a Christo instituta est. Hanc enim Ecclesia Romana a Beato Petro accepit. Evangelistae vero intenderunt narrare facta Christi, non formam sacramentorum; quamvis omnia praedicta verba, ex diversis locis Scripturae colligi possint.

Ad secundum, Calix non spectat ad essentiam formae, dicendum, quod in forma significatur sanguis, ut effusus in pretium redemptionis, et datus in potum. Hoc autem significatur per calicem sanguinis, quia calix significat passionem. Matth. 20: « Potesis bibere calicem etc. » et sanguis significat potationem; et ideo in forma ponitur.

Ad tertium, Metaphoricae loquutiones distrahunt intellectum, dicendum, quod sic esse debet firmus intellectus consecrantis, ut non qualibet verborum repraesentatione evagetur.

Ad quartum, in forma corporis nihil tangitur de cibo, dicendum, quod non est simile; quia corpus de se cibus est; sed sanguis, non nisi prout est effusus, potest esse potus.

Ad quintum quod ibi est oppositio in adjecto, dicendum, quod non dicitur aeternum quia caret principio; quia sic esset oppositio in adjecto; sed quia caret fine.

Ad sextum dicendum, quod hoc praecipue hic tangitur, quia usus fidei maxime necessarius est in hoc sacramento, cum sint omnia contra sensum, et super intellectum; sed non aequaliter in aliis sacramentis.

Ad septimum de forma corporis quod ibi non ponitur, dicendum, quod non est simile: quia effusio sanguinis dicit causam immediatam mortis, non sic autem corporis traditio.

Ad octavum dicendum, quod ponitur in forma « pro multis », ne putetur pro Judaeis tantum electis, quibus promissio facta fuerat, effusio sanguinis facta esse, quantum ad efficaciam: ideo dicitur pro vobis, idest Judaeis, et pro multis, idest pro multitudine gentium. Vel pro vobis sacramentorum ministris, et pro multis, idest pro aliis, pro quibus a ministris sacramentorum etiam orandum est.

ARTICULUS V.

Ad quintum sic proceditur. Et 1. videtur, quod verbis praedictis non insit aliqua vis creata ad transubstantiationem faciendam. Faciens enim et factum

debent esse simul; ergo verbum non est illius transubstantiationis factivum.

2. Praeterea, si virtus est in verbo; aut ergo successiva, aut simul: si successiva; ergo successive operatur: si simul; ergo non potest esse in successione horum; ergo utrumque est falsum.

3. Praeterea, si habet virtutem; aut quando est, aut quando non est. Si quando est; ergo in successione. Si quando non est; ergo non agit.

4. Praeterea, si datur virtus illa, aut toti orationi, aut alicui parti, ita quod non toti; aut toti et partibus. Si primo modo; ergo cum totum sit successive, successiva est. Si parti alicui; ergo illa sola ad sacramentum operatur. Si utrique; ergo successive operatur, sicut pars habet esse post partem.

5. Praeterea, verba illa non habent vim verbi prolata a sacerdote: sed anima sacerdotis magis est capax divinae virtutis quam verba; ergo magis debet esse virtus illa in sacerdote quam in verbis.

Contra. Ambrosius dicit, quod sermo Christi creaturam mutat: et sic ex pane fit corpus Christi, consecratione caelestis verbi. Habet ergo verbum Christi virtutem in transmutatione.

Praeterea, Gregorius Nyssenus ait: « Invisibilis sacerdos, visibiles substantias in corpus suum et sanguinem, verbi sui secreta potestate commutat; » ergo etc.

Respondeo. Circa hoc est duplex opinio. Quidam enim dicunt, quod nulla virtus creata inest verbis, qua fiat transubstantiatio; sed tantum divina institutione firmatum est, ut ad prolationem horum verborum conversio praedicta fiat virtute divina. Similiter dicunt, quod in aliis formis sacramentorum inest aliqua virtus a Deo: sed haec virtus non est qualitas habens esse completum in natura, qualis est virtus in natura principalis agentis secundum formam suam; sed incompletum, sicut virtus quae est instrumentum principalis agentis, et sicut similitudines colorum in aere. Et quia forma efficit significando; ideo completa significatione in fine orationis, idest in ejus termino, infunditur ei virtus efficiendi, quae perficit transmutationem in instanti.

Ad primum de faciente et facto, dicendum, quod verbum, in quantum faciens, idest secundum sui complementum, simul est cum facto. Partes enim praecedentes orationis non sunt nisi sicut materialis dispositio ad complementum ejus. Ultima vero agit in virtute praecedentium; sicut ultima gutta cavat lapidem virtute guttarum praecedentium.

Ad secundum, aut est virtus successiva, dicendum, quod simul est; et tamen est in successivo, non secundum quod est successive, sed in ejus termino. Oratio enim, quamvis secundum voces sit successiva, tamen secundum sui significationem simplex est, et in ultimo sui complemento perficitur. Unde tunc virtus datur.

Ad tertium, aut quando est, dicendum, quod datur, quando est in sua significatione completa; et hoc est in sui termino, idest non simpliciter, sed secundum quid.

Ad quartum, aut toti, dicendum, quod toti datur proprie, non parti; quia datur ultimae parti, ut complemento, non secundum se, sed secundum ordinem ad praecedentia; idest non secundum id quod est, sed in quantum terminus.

Ad quintum dicendum, quod quando aliquod opus pluribus instrumentis perficitur, in quolibet illorum est virtus aliqua, licet imperfecte. Unde in

sacerdote et in verbo est virtus, sicut in manu et calamo. Sed quia sacerdos propinquior est principali agenti, ideo virtus ejus simpliciter dignior est, et permanentior, et ad plures effectus. Quia vero operi verbum propinquius est, secundum hoc dignius est.

DISTINCTIO IX.

Et sicut duae sunt res etc. (V. edit. nostrae tom. VII, pag. 601.)

QUAESTIO UNICA.

Hic quaeruntur quatuor: 1.^o de modis quibus Christus manducatur; 2.^o utrum si quis accedat ad Eucharistiam cum peccato mortali, peccet mortaliter; 3.^o si quis accedit contritus, sed non confessus, peccet; 4.^o si aliud, quam peccatum mortale, prohiberet ab accessu.

ARTICULUS I.

Ad primum sic proceditur. Et 1. videtur, quod non sit nisi unus modus manducandi Christum. Nam sicut se habet cibus corporalis ad corporalem manducationem, ita spiritualis ad spiritualem: sed cibus corporalis non sumitur nisi corporaliter: ergo nec spiritualis nisi spiritualiter.

2. Praeterea, in baptismo triplex est differentia suscipientium, ut dictum est supra. Quidam enim suscipiunt sacramentum et rem, quidam sacramentum tantum, quidam rem tantum; ergo a simili, triplex est modus susceptionis circa sacramentum altaris.

3. Praeterea, infidelis manducat corpus Christi, non tamen spiritualiter, neque sacramentaliter, quia non refert signum ad signatum; ergo modi manducandi insufficienter distinguuntur.

Contra. Augustinus distinguit hic duplicem modum: scilicet spiritualem, et sacramentalem.

Praeterea, manducatio Christi refertur ad manducationem rei hujus sacramenti: sed duplex est res, scilicet figurata et contenta, altera corpus Christi mysticum, altera corpus Christi verum; ergo duplex modus manducandi.

Respondeo. Dicendum, quod illud quod manducatur, intra manducantem recipitur. Intra nos autem Christus recipitur dupliciter. Uno modo spiritualiter per fidem et charitatem; et sic dicimur Christum spiritualiter manducare, et non ut ipse in nos convertatur, sicut de cibo corporali accidit, sed quia nos in ipsum convertimur. Alio modo Christus recipitur in nobis per suum sacramentum, in quo Christus totus realiter est, et sic dicimur Christum sacramentaliter manducare: et haec sacramentalis manducatio ad spiritualem ordinatur, sicut ad effectum sacramentalem. Effectus autem sacramentorum quandoque est sacramentorum desiderio et fide, eo quod Deus sacramentis suam potentiam non alligavit: et similiter sacramenta, quandoque percipiuntur sine effectum, propter impediendum quod est in recipiente. Et ideo isti duo modi manducationis interdum separatim inveniuntur, et propter hoc ab invicem distinguuntur.

Ad primum ergo dicendum, quod ad cibum corporalem non ordinatur aliquis alius cibus, ut

causa ad effectum, sicut ad cibum spiritualem ordinatur sacramentalis; et ideo non est simile.

Ad secundum de baptismo, dicendum, quod sicut est in baptismo, ita potest esse in proposito; scilicet ut hoc sacramentum suscipiatur spiritualiter tantum, et sacramentaliter tantum, et spiritualiter et sacramentaliter simul. Sed iste tertius modus non differt a duobus primis formaliter, sed tantum materialiter, idest ex parte suscipientis.

Ad tertium dicendum, quod manducatio est actus transiens a manducante in manducatum. Cum ergo quaeritur, an infidelis manducet Christum sacramentaliter, propositio duplex est. Si enim dicat modum rei manducatae, dicendum, quod sic, quia Christus sumitur sub sacramento. Si modum manducantis, tunc distinguendum est. Aut enim nullam habet intentionem sumendi illud, tanquam aliquod sacramentum Ecclesiae; et tunc non sumit sacramentaliter, quia sumit ut rem non ut signum; aut habet, quamvis non credat ibi Christum esse; et tunc sumit sacramentaliter, ut haereticus.

ARTICULUS II.

Ad secundum sic proceditur. Et 1. videtur, quod recipiens corpus Christi cum peccato mortali non peccet mortaliter. Secundum Augustinum, tria sunt genera honorum, scilicet minima, media et maxima: et dicit quod in maximis bonis nemo male utitur: sed sacramentum corporis Domini de maximis bonis est; ergo eo nemo male utitur.

2. Praeterea, nullus peccat faciendo id ad quod tenetur: sed peccator tenetur in paschate communicare; ergo non peccat communicando.

3. Praeterea, nullus est certus, an sit in peccato mortali, aut non: si ergo mortaliter peccat quilibet, qui accedit in mortali, quilibet qui accedit exponit se discrimini accedendo.

4. Praeterea, quicumque dat occasionem peccandi, peccat: si ergo peccator sumens corpus Christi, peccat, sacerdos ei etiam exhibens peccat; quod non videtur.

Contra. 1 Corinth. 2: « Qui manducat et bibit indigne, iudicium sibi manducat et bibit: » sed indigne manducat, qui accedit cum peccato; ergo etc.

Praeterea, ibidem dicitur: « Probet seipsum homo: » si ergo non probat, peccat omittendo.

Respondeo. Dicendum, quod si alicui accedenti ad sacram communionem dicat conscientia, quod sit in peccato mortali, peccat mortaliter; quia cuilibet conscientia dicat, quod immundus sacramentorum participatione indignus est. Unde quicumque cum conscientia peccati mortalis ad Eucharistiam, quae est sacramentum sacramentorum, accedit, contra conscientiam agit. Nec refert, quantum ad hoc, utrum habeat certam conscientiam vel cum dubitatione; quia qui dubitat, discrimini se exponit. Si autem sit aliqua levis cogitatio quae dubitationem non inferat, contrariis rationibus repulsa, non impedit Eucharistiae perceptionem. Impedit autem, si dubitationem inferat, quantumcumque levis sit. Si vero aliquis peccatum habet, quod non tenet in conscientia; si hoc ex culpa ipsius accidit, vel propter ignorantiam juris, vel propter negligentiam discussionis propriae conscientiae, non excusatur a peccato, si ad Eucharistiam accedat. Si vero non ex culpa sua contingat, excusatur a peccato et gra-

tiam consequitur, virtute sacramenti, nisi alias obicem ponat Spiritui sancto.

Ad primum, de eo quod dicit Augustinus, dicendum, quod bonis spiritualibus de quibus Augustinus loquitur, non convenit (1) male uti formaliter, ut habitu eliciente usum; sed materialiter ut materiali objecto, bene convenit.

Ad secundum de paschate, dicendum, quod in eo quod quis facit ad quod tenetur, non peccat, sed quia malo modo facit. Unde peccator et in communicando et omittendo peccat; sed tamen magis communicando; quia communicare in peccato malum est de se, sed omittere communionem malum est ex praecepto Ecclesiae. Unde potius debet a communione abstinere, quam in peccato communicare. Nec tamen ideo perplexus est, quia potest poenitere.

Ad tertium, nullus est certus, dicendum, quod non requiritur ad cavendum periculum discriminis certitudo scientiae, sed probabilis conjectura quae potest haberi per quatuor signa, sicut dicit beatus Bernardus. Primo, cum quis devote verba Dei audit. Secundo cum quis se promptum ad bene operandum invenit. Tertio, cum quis abstinendi a peccato propositum habet. Quarto, cum quis de peccato dolet.

Ad quartum dicendum, quod qui petit a sacerdote Eucharistiam, aut est peccator, aut suspectus de crimine. Si peccator, aut occultus, aut manifestus. Si occultus, aut ergo petit in occulto, et tunc non debet ei dare. Habet enim exceptionem, qua in occulto potest eum repellere. Debet etiam eum monere ne petat in publico. Si vero petat in publico, non debet ei negari; quia quilibet christianus habet jus in corpore Christi, cum pro omnibus sit traditum; nec habet dispensator exceptionem contra eum, quam possit ei in publico objicere. Si vero est peccator manifestus, debet ei tam in publico quam in occulto denegare. Si vero sit suspectus de crimine, tunc distinguendum est: quia est triplex suspitio. Quaedam violenta, quae pro facto reputatur; ut si inveniatur suspectus cum suspecta, nudus cum nuda, solus in eodem lecto: et propter hanc, sicut propter peccatum, neganda est communio. Quaedam est probabilis; ut si inveniatur solus eum sola loquens tempore et loco suspecto: et propter hanc non debet negari. Quaedam levis; ut si appareant aliqua signa, non tamen omnino certa: nec propter hanc negari debet. Sed nunquid potest sacerdos praebere omni ingerenti se ad communicandum hostiam non consecratam? Dicendum, quod non: quia nulla debet fictio fieri in sacramento veritatis: nec debet dari occasio idolatrando, recipienti et inspicienti; cum omnis qui sacramentaliter sumit vel inspicit adoret. Si autem sit suspitio vehemens, ad cuius contrarium probatio non admittitur, quia si talis praesumptio sit ex fama publica, debet etiam in publico denegari; alias non, nisi in occulto. Pro aliis vero suspicionibus nullo modo est denegandum, ne poena ante culpae notitiam irrogetur.

ARTICULUS III.

Ad tertium sic proceditur. Et 1. videtur, quod si quis contritus sine confessione recipiat corpus Christi, non peccet. Sicut per contritionem reconciliatur quis Deo, tam per confessionem et absolutionem Ecclesiae: sed non debet accedere ad

(1) *Lege* contingit; ut et paulo infra.

sacramentum usque quo sit Ecclesiae reconciliatus; ergo quantumcumque sit contritus, nisi sit confessus, non debet accedere ad Eucharistiam.

2. Praeterea, Hugo de Sancto Victore dicit: « Audacter dico: si ante sacerdotis absolutionem, criminis ad communionem corporis Christi accedat, pro certo iudicio (1) sibi manducat et bibit, etiam si ante multum poeniteat, et vehementer doleat, et ingemiscat. »

Contra. Non tenetur quis confiteri nisi semel in anno circa Pascha: sed ante non peccat confessionem omittendo; ergo non prohibetur ab Eucharistiae sumpione.

Praeterea, aliquando sacerdoti qui jam inchoavit celebrare occurrit peccatum mortale, de quo non est confessus, nec habet cui confiteatur; ergo tenetur dimittere missam, et ire ad confitendum: hoc autem est falsum; ergo etc.

Praeterea, sacerdos in die festo dolendo de peccato commisso, non habens sacerdotem populo expectante missam, aut celebrare debet, aut non. Si non, scandalizat. Tenetur autem non scandalizare; ergo tenetur celebrare. Si sic, ergo non peccat celebrando, vel perplexus est.

Respondeo. Dicendum, quod peccator contritus ante confessionem qui vult communicare, aut habet copiam confessoris, et tunc peccat sine confessione communicando; quia ad sacramentum Ecclesiae requiritur reconciliatio secundum iudicium Ecclesiae: aut non habet. Aut ergo imminet aliqua necessitas celebrandi vel communicandi, vel quia timet scandalum proprium, vel jam incepit ministerium sacramenti, vel amisit loquelam; et tunc non peccat, cum proposito confitendi quando poterit: sed si non habet hoc propositum, peccat.

Ad primum non debet accedere sine reconciliatione, dicendum, quod verum est sine articulo necessitatis alicujus; sed in necessitate falsum est.

Ad secundum de Hugone, dicendum, quod intelligit sine articulo necessitatis.

Ad tertium quod non tenetur confiteri nisi semel in anno, dicendum, quod verum est regulariter; sed casualiter potest teneri pluries ex incidenti.

Ad quartum de sacerdote inchoante missam, dicendum, quod debet peragere missae sacrificium cum proposito, postea quando citius occurrat oportunitas, confitendi.

Ad quintum dicendum, quod si sine scandalo potest vitare communionem commode, vel vicarium ponendo, vel aliter, ita quod debitis officiis populus non frustretur, vitare debet; alioquin cum simili proposito celebrare potest.

ARTICULUS IV.

Ad quartum sic proceditur. Et 1. videtur, quod non tantum peccatum mortale prohibeat a communionem. Pollutio nocturna, cum in somnis non peccet homo, peccatum non est: et si est, est veniale: et tamen propter ipsam abstinere debet; ergo etc.

2. Praeterea, qui excommunicatus est injuste, vel suspensus vel interdictus, si ad sacramentum accederet, peccaret; ergo aliud est impedimentum quam peccatum mortale.

3. Praeterea, qui manu lutosa corpus Christi contrectaret peccaret; ergo impedit etiam immunditia corporalis.

(1) *Lege* iudicium.

4. Praeterea, infantilis aetas corpus Domini diducare non potest, quod tamen requiritur ad digne sumendum, 1 Cor. 2; ergo aetas infantilis impedit.

5. Praeterea, furiosis non est hoc sacramentum tribuendum; ergo infirmitas corporalis hoc impedit.

6. Praeterea, major est dignitas hujus sacramenti quam sacramentorum veteris legis: sed ad illa non admittebatur mulier menstruata, nec mulier puerpera, nec patiens fluxum sanguinis, aut seminis; ergo nec ad hoc sacramentum sunt admittendi.

7. Praeterea, sacerdos leprosus prohibetur a celebratione hujus sacramenti per decretalia; ergo pari ratione debet laicus leprosus prohiberi a sumptione, et sic idem quod prius.

Contra. Quilibet qui est sine mortali, est membrum corporis mystici; membrum autem debet sustentari de alimento ipsius corporis; ergo quilibet talis communionem corporis Domini debet refici.

Praeterea, gratia et remissio peccatorum faciunt dignum Ecclesiae sacramentis; ergo quilibet haec habens dignus accedit.

Respondeo. A sacramento hoc propter ejus maximam dignitatem excludi convenit aliquem dupliciter. Aut propter indignitatem sui, aut propter reverentiam sacramenti. Prima causa excludendi, proprie non est nisi peccatum cui aliquis subjacet, vel quantum ad reatum tantum, vel quantum etiam ad actum exteriorem vel interiorem. Secunda causa potest esse aliud quam peccatum; et hoc dupliciter. Uno modo propter defectum discretionis quae ad reverentiam adhibendam requiritur, sicut patet in pueris. Alio modo propter appositionem alicujus, quod ad quamdam irreverentiam pertinet; sicut in his qui sunt polluti aliqua macula corporali.

Ad primum ergo dicendum, quod in dormiendo impeditur iudicium intellectus, quia homo convertitur ad imagines rerum ut ad veras res; et propter hoc homo non habet usum liberi arbitrii, qui iudicium requirit; et ideo pollutio nocturna peccatum non est, secundum se. Impedit tamen a communionem, triplici ratione. Primo, ratione culpa ex qua causatur, sicut cum ex turpi cogitatione procedit; et hoc praecipue quando dubitatur utrum in causa fuerit peccatum mortale. Secundo, in quantum est quaedam immunditia corporalis. Tertio in quantum aliquantulum animam retrahit a fervore devotionis quae in hoc sacramento requiritur; et hoc praecipue quando cum aliqua turpi imaginatione pollutio contingit. Anima enim carnalis quodammodo efficitur, ex experientia talis delectationis. Sed haec duae causae ultimae impediunt ex quadam congruentia, nisi adsit potior causa; sed prima ex necessitate, quando est dubitatio de peccato mortali praecedente.

Ad secundum de excommunicato, dicendum, quod quamvis non sit indignus, tamen propter obedientiam Ecclesiae debet humiliter abstinere, alias per inobedientiam actu peccaret.

Ad tertium de manu lutosa, dicendum, quod talis, si scienter faceret, peccaret, quia contemneret; alias non.

Ad quartum de infantibus, dicendum, quod si sunt in aetate apta ad diducendum et reverendum corpus Domini, vel prope aetatem adultam, scilicet duodecim annorum vel undecim, tunc si apparent signa reverentiae et discretionis, possunt sumere; alias non.

Ad quintum de furioso, dicendum, quod furiosus, aut habet dilucida intervalla, et tunc potest communicare, aut non. Aut ergo est perpetuo furiosus, et sic non debet: aut ad tempus ex infirmitate aliqua incidit in phrenesim; et tunc, si ante petierat, et praesumitur posse accipere sine periculo derisionis, aut vomitus, aut hujusmodi, debet ei dari, aliter non.

Ad sextum de immunditia corporali, Aut est perpetua, sive difficile purgabilis, sicut lepra, fluxus seminis, et alia hujusmodi; et propter talem immunditiam corporalem non debet Eucharistiae sumptio praetermitti. Aut est de facili purgabilis; et tunc potest praetermitti propter reverentiam, sed non est necessitatis, si sit pure corporalis; nisi expresse cedat in irreverentiam sacramenti, sicut si aliquis manibus deturpatis ad celebrandum accederet. In veteri autem lege prohibebantur personae, de quibus objectio tangit, propter figuram; quae cessavit veniente veritate.

Ad septimum dicendum, quod sacerdoti leproso interdicitur, ne publice celebret, propter horrorem; tamen secreto potest ex devotione celebrare, nisi adeo corruptus sit, quod periculum timeatur. Leprosus tamen non debet ad sacerdotium promoveri. Nec est simile de sacerdote celebrante, et Eucharistiam sumente; quia plus requiritur in celebrante, quam in sumente. Ad alia quae sunt in contrarium patet solutio ex dictis.

DISTINCTIO X.

Sunt item alii, etc. (V. edit. nostrae tom. VII, pag. 616).

QUAESTIO UNICA.

Hic quaeruntur quatuor: 1.^o utrum corpus Christi contineatur sub sacramento Eucharistiae; 2.^o utrum tota quantitas ejus; 3.^o qualiter; 4.^o utrum possit ibi videri aliquo oculo corporali.

ARTICULUS I.

Ad primum sic proceditur. Et 1. videtur, quod corpus Christi non contineatur sub sacramento. Nihil enim potest esse ubi prius non erat, nisi moveatur: sed corpus Christi de caelo non moveatur, quia sic motus ejus ad diversa loca terminaretur, quod est impossibile; ergo non potest esse sub hostia, sub qua prius non erat.

2. Praeterea, nec potest esse extra terminum suae substantiae. Terminus substantiae corporalis locus ejus est ad minus extrinsecus; ergo non potest extra ipsum esse; ergo cum locus Christi sit in caelo, non potest simul esse extra caelum.

3. Praeterea, Angelus est simplicior quam corpus Christi: sed Angelus non potest esse simul in diversis locis; ergo nec corpus Christi; et sic idem quod prius.

Contra. 1 Cor. 10 dicitur: « Panis quem frangimus, nonne participatio corporis Domini est? » hoc autem non esset verum si ibi esset corpus Christi ut signatum tantum, non ut contentum; ergo ibi vere continetur corpus Christi.

Praeterea, Joan. 6 dicitur: « Caro mea vere est cibus, et sanguis meus est vere potus; » ergo corpus Christi, secundum veritatem est sub sacramento, quod in cibum et in potum sumimus.

Respondeo. Verum corpus Christi contineri sub sacramento Scriptura ostendit, quia dicit: «Hoc est corpus meum.» Ratio autem hujusmodi continentiae duplex potest assignari. Una ex parte Christi; scilicet ut perfectius conjungeretur nobis. In aliis enim sacramentis nobis conjungitur per virtutem suam, in sacramento autem Eucharistiae per essentiam suam. Alia ex parte nostra; scilicet propter charitatis inflammationem, spei sublevationem et meriti fidei incrementum.

Ad primum, nihil potest esse etc., dicendum, quod addendum est vel ipsum vel aliud. Contingit enim ignem esse ubi non erat prius absque motu locali ignis per conversionem aeris in ipsum; et sic corpus Christi est in altari, ubi prius non erat, per conversionem panis in ipsum. Non tamen corpus Christi generatur sicut ignis; quia panis convertitur in corpus Christi praeevens, non autem aer in ignem praeevens.

Ad secundum dicendum, quod locus quidam attribuitur corpori Christi ratione propriarum dimensionum, et sic est tantum in caelo; alius ratione dimensionum remanentium ex pane qui in corpus Christi est conversus, et sic est in altari.

Ad tertium dicendum, quod ratio illa procedit ad hoc quod corpus Christi non sit in pluribus locis simul secundum proprias dimensiones.

ARTICULUS II.

Ad secundum sic proceditur. Et 1. videtur, quod non tota quantitas Christi contineatur sub sacramento. Impossibile est majorem quantitatem contineri sub minori quin excedat; ergo corpus Christi non potest contineri in quantitate sub illa specie quin excedat: sed non excedit; ergo non continetur ibi sub sua tota quantitate.

2. Praeterea, non potest majus contineri sub minori, nisi per partium suarum vel condensationem, vel contractionem, vel complicationem: sed horum nihil contingit in hoc sacramento; ergo non potest esse sub tam parva hostia.

3. Praeterea, nullum corpus secundum totam suam quantitatem potest contineri indifferenter a magna et parva quantitate extrinseca: sed corpus Christi est indifferenter sub magna et parva specie quantitatis consecrata; ergo non est ibi secundum suam totam quantitatem.

Contra. Totalitas corporis attenditur secundum totalitatem quantitatis ejus: sed secundum Augustinum, totus Christus manducatur in sacramento; ergo est ibi secundum suam totam quantitatem.

Praeterea, impossibile est aliquid esse alicui secundum partem quantitatis et non secundum totam nisi divisa quantitate ipsius: sed quantitas corporis Christi non dividitur actu, quia corpus illud est impassibile, cum sit glorificatum; ergo cum in sacramento contineatur aliquid quantitatis corporis ejus, impossibile est dicere quod non contineatur tota.

Respondeo. Dicendum, quod in sacramento altaris est aliquid dupliciter. Uno modo ex vi sacramenti. Alio modo ex concomitantia naturali. Primo modo est in sacramento altaris id ad quod transubstantiatio per se terminatur; substantia autem panis convertitur ibi directe in substantiam corporis; et ideo substantia corporis est ibi ex vi sacramenti. Secundo modo est in hoc sacramento omne id cui naturaliter jungitur illud quod est per se

transubstantiationis terminus; et sic anima est in hoc sacramento per hoc quod ei corpus unitur. Patet ergo quod tota quantitas corporis Christi est in hoc sacramento ex naturali concomitantia, quia sine sua tota quantitate substantia corporis Christi esse non potest, non autem ex vi sacramenti. Non enim transubstantiatio terminatur ad quantitatem corporis Christi directe, vel ad alia accidentia: quod patet ex hoc quod accidentia panis manent. Et ideo corpus Christi, secundum quod est in sacramento, non habet locum sibi respondentem secundum suam quantitatem; sed secundum quantitatem dimensionum panis, quibus locus exterior commensuratur.

Ad primum, impossibile est etc., dicendum, quod hoc intelligitur de continentia quantitatis sub quantitate per commensurationem, non per naturalem concomitantiam, sicut in proposito.

Ad secundum, non potest contineri majori etc., dicendum, quod hoc intelligitur de his quae continentur commensurative, non concomitanter.

Ad tertium, nullum corpus etc., dicendum, quod hoc intelligitur de continentia locali per commensurationem, non per concomitantiam. Quia enim substantia, quantum est de se, non determinat sibi locum magnum vel parvum; ideo corpus Christi quod est ibi directe ratione suae substantiae, aequaliter potest esse in magna vel parva. Sed substantia animae est in qualibet corporis parva parte, et similiter totus Christus in qualibet parte hostiae vel tantum actu divisae secundum quosdam, vel etiam actu non divisae, secundum alios qui melius dicunt, quia oportet Christum aliquo modo esse in partibus hostiae non actu divisae. Unde cum non sit sibi secundum suam partem, est ibi totus.

ARTICULUS III.

Ad tertium sic proceditur. Et 1. videtur, quod corpus Christi contineatur sub sacramento circumscriptive. Omne corpus quod continetur superficie alterius corporis, ita quod non excedit nec exceditur, circumscribitur illa superficie, sicut loco: sed corpus Christi totum, ut dictum est, continetur sub ultima superficie dimensionum panis quae manent, et nec excedit nec exceditur; ergo est ibi sicut in loco circumscriptive.

2. Praeterea, omne quod replet locum circumscribitur loco: sed corpus Christi replet locum dimensionum, alias vacuum esset; ergo corpus Christi circumscribitur speciebus illis.

3. Praeterea, videtur quod contineatur definitive. Omne namque quod movetur ad motum alterius, est in eo definitive: sed corpus Christi movetur ad motum hostiae; ergo etc.

Contra. Omne corpus quod circumscribitur loco commensuratur ei: sed corpus Christi non commensuratur quantitati specierum, ut dictum est; ergo non est ibi sicut in loco circumscriptive.

Praeterea, omne quod est definitive alicubi, ita est ibi quod non alibi: sed corpus Christi non est ita sub speciebus, quod non alibi; ergo non est definitive sub eis.

Respondeo. Corpus Christi non est sacramento sic quod commensuratio ejus propria sit secundum quantitatem specierum, nec ita est sub una specie panis quin sub alia ex vi consecrationis esse possit,

eum, sicut substantia panis istius, ita et alterius panis substantia in Christi corpus possit converti; et ideo nec circumscriptive, nec definitive in sacramento est.

Ad primum, omne corpus quod continetur, dicendum, quod ad circumscriptionem plus exigitur, quam continentia loci; scilicet commensuratio loci ad locum et e converso; et hoc non est in proposito.

Ad secundum, corpus Christi replet locum, dicendum, quod cum ratione substantiae suae habeat esse sub sacramento, et de ratione substantiae secundum se consideratae non sit replere locum; ideo prout est sub sacramento non replet locum, sed dimensiones specierum habent replere locum: quia secundum Philosophum in 4 Physicorum, dimensiones separatae si ponantur esse vel corpus mathematicum, quod idem est, replent locum. Nec dicendum est, quod intrinsecus sint vacuae; cum non remaneat ibi quantitas specierum tantum secundum longitudinem et latitudinem, sed etiam secundum profunditatem.

Ad tertium dicendum, quod moveri aliquid dicitur duobus modis: scilicet per se, et sic Christus mota hostia non movetur, quia non est sub hostia per se, sed per accidens, scilicet conversione alterius in ipsum: aut per accidens: et hoc dupliciter. Quaedam enim dicuntur moveri per accidens, quia per accidens sunt in loco ejus quod movetur per se, ut anima in toto corpore. Quaedam vero quia per se sunt in loco, sed moto altero moventur, ut nauta in navi. Primo modo Christus mota hostia movetur per accidens, non secundo.

ARTICULUS IV.

Ad quartum sic proceditur. Et 1. videtur, quod Christus possit ab aliquo oculo videri. Nullum velamen specierum impedit visum glorificatum; ergo nec velamen specierum impedit quin oculus glorificatus sub illis videat Christum.

2. Praeterea, per hoc quod latet ibi sensum iudicium nostrum decipitur: sed iudicium comprehensoris non decipitur; ergo Christus sub specie non latet ejus sensum.

3. Praeterea, ut est ibi videtur ab oculo proprio; ergo cum omnis oculus glorificatus ejusdem naturae sit, similiter potest videri ab aliquo alio oculo glorificato.

4. Praeterea, aliquando in sacramento altaris apparet vera species carnis etiam oculo viatoris; multo ergo magis oculo comprehensoris.

Contra. Corpus non est natum movere visum nisi per medium motum: sed corpus glorificatum non movet medium, quia nec tangit ipsum; ergo non movet visum.

Praeterea, nihil potest videri aliquo mediante nisi sit illud transparens: sed species panis non est naturaliter transparens; ergo ea mediante corpus Christi videri non potest.

Respondeo. Visibile non habet movere visum nisi per medium ejus quod est aer. Aerem autem movere non potest nisi tangendo ipsum. Taetus enim est corporum et mediante quantitate corporali. Unde cum corpus Christi non mediante quantitate corporali sit sub specie, per suum colorem non potest movere aerem propinquum, et ex consequenti nec visum; et ideo sub specie videri non potest.

Ad primum dicendum, quod velamen non impedit quin possit videri, sed modus existendi quo

est objectum sub specie, ita quod medium non immutat: sicut et Angelus licet non velatus non potest videri.

Ad secundum dicendum, quod iudicium sensus est de suo sensato per se, tam proprio, quam communi, idest de colore et quantitate; et in hoc oculus glorificatus non decipitur. Sed de sensibili per accidens iudicat ratio, quae in beatis decipi non potest.

Ad tertium dicendum, quod prout est ibi forte non videtur a seipso modo corporali, sed tantum spirituali. Vel posset dici quod non est simile de oculo Christi qui est intra speciem et de oculo alieno qui est extra.

Ad quartum dicendum, quod quando apparet in sacramento ipsa species carnis, ibi vere est corpus Christi; non tamen illa species est vera species corporis Christi; sed vel est tantum illa species in oculo videntis, quod convenit (1) quando ab uno tantum videtur in specie carnis, ab aliis in specie panis: vel est in ipsis dimensionibus panis remanentibus divino miraculo, aliis accidentibus immutatis. Quod autem Christus in tali apparitione in propria specie non videatur, patet per hoc quod non videtur in ea quantitate quam Christus habet. Quando autem fit talis apparitio, non debet sumi, sed cum reliquiis poni, et iterum alia hostia consecrari.

DISTINCTIO XI.

Si autem quaeritur etc. (V. edit. nostrae tom. VII, pag. 627.)

QUAESTIO UNICA.

Hic quaeruntur quinque: 1.º an panis convertatur in corpus Christi; 2.º qualis panis sit materia sacramenti; 3.º quale vinum; 4.º an aqua debeat apponi de necessitate; 5.º an corpus in coena sumserit corpus suum.

ARTICULUS I.

Ad primum sic proceditur. Et 1. videtur, quod panis non convertatur in corpus Christi. Conversio enim mutatio quaedam est; sed nulla specie transmutationis in corpus Christi panis convertitur. Non enim est ibi generatio et corruptio, nec augmentum, nec diminutio, nec alteratio, nec loci mutatio, ut patet intuitu; ergo nulla fit ibi conversio.

2. Praeterea, sicut se habet conversio formalis ad formam, ita substantialis ad substantiam: sed in conversione formali annihilatur forma, sicut patet, cum ex aere sit ignis; ergo in conversione substantiali qualis haec dicitur esse, annihilatur substantia panis; ergo non convertitur in corpus Christi.

3. Praeterea, illud quod manet post consecrationem debet naturali similitudine verum corpus Christi et mysticum repraesentare: sed repraesentatio talis non competit pani nisi ratione suae substantiae, secundum quam ex diversis granis conficitur; ergo oportet quod remaneat post consecrationem ibi substantia panis; ergo non convertitur in corpus Christi.

4. Praeterea, omne quod convertitur in alterum

(1) *Lege* contingit.

quandoque erit illud: sed haec est falsa, panis erit corpus Christi; ergo non convertitur in illud.

Contra. Damascenus dicit: « Fecit Christus panem et vinum corpus et sanguinem suum, non quoniam ipsum corpus Christi de caelo descendit, sed quoniam panis et vinum transit in corpus Christi. »

Praeterea, dicit Ambrosius, quod « sermo Christi creaturam mutat; » ergo panis transmutatur.

Respondeo. Dicendum, quod circa hoc in litera tanguntur tres opiniones. Quarum una est dicentium, quod remanet ibi panis substantia. Sed hoc non potest esse propter tria. Primo, quia nihil converteretur in corpus Christi, et sic oporteret corpus Christi per motum localem ibi de novo esse. Secundo, quia post ejus sumptionem non posset iterum corpus Christi sumi. Tertio, quia haec non esset vera, « Hoc est corpus meum. » Sed « hic est corpus meum. » Alia opinio est quod substantia panis annihilatur vel in praejacentem materiam resolvitur: quorum neutrum esse potest, cum nec materia praejacens ibi sentiat, nec Deus sit causa tendendi in non esse, ut Augustinus dicit. Et ideo alia opinio quae communis et vera est, dicit quod panis convertitur in corpus Christi. Quod sic potest intelligi. Agens naturale in hoc differt a supernaturali, quia agit ex praesuppositione materiae, supernaturale autem non. Unde sicut actio agentis naturalis extendit se ad mutationem omnium eorum quae superadduntur materiae, scilicet formarum substantialium et accidentalium, ita et actio agentis supernaturalis potest se extendere ad immutationem materiae. Materia autem signata est principium individuationis; et ideo potest se extendere ad mutationem individui. Cum ergo in transubstantiatione convertatur individuum panis in corpus Christi, transubstantiatio fit virtute divina. In tribus ergo differt haec conclusio ab aliis mutationibus. Primo quia non habet subjectum sicut aliae habent. Secundo, quia partes essentielles unius extremi, scilicet materia et forma panis, convertuntur in partes essentielles alterius extremi, scilicet materiam et formam corporis: quod non est reperire in aliis mutationibus. Tertio, quia illud in quod convertitur aliquid in hac conversione, non transmutatur nec per se nec per accidens, in aliis autem sic.

Ad primum, omnis conversio est mutatio, dicendum, quod conversio haec est mutatio; non tamen est naturalis, sed supernaturalis; ideoque non est in aliqua specierum mutationis naturalis, quamvis habeat similitudinem cum mutatione quae fit in nutrimento, quia utraque fit in aliquid praeevens.

Ad secundum, sicut se habet conversio, dicendum, quod falsum est; quia forma nunquam vertitur in formam. Substantia autem panis convertitur in substantiam corporis; et ideo hic non est annihilatio.

Ad tertium de naturali similitudine, dicendum, quod species remanentes repraesentant aliquo modo substantiam, quam prius efficiebant, et per consequens proprietates ejus: et ita habent rationem significandi per quamdam similitudinem corpus Christi verum et mysticum.

Ad quartum dicendum, quod haec conversio differt ab omnibus aliis in hoc quod non habet commune subjectum, sicut aliae mutationes; sed solum est in ea accipere duos terminos conversionis. Ideo omnes loquutiones exprimentes immuta-

tionem, per quam importatur ordo termini ad terminum, tantum sunt concedendae in hac materia sicut, Hic panis convertitur in corpus Christi. Loquutiones vero quae expriment identitatem subjecti non, sed sunt, ut impropriae, exponendae. Et quia haec loquutione, Hoc fit illud: Hoc potest esse illud, per se important identitatem subjecti mutationis propter naturam relationis; ideo non sunt simpliciter concedendae, sed exponendae. Illae vero quae aliquando important identitatem materiae, aliquando ordinem termini ad terminum, sunt distinguendae; ut cum dicitur: De pane fit corpus Christi. Nam haec praepositio, de, aliquando dicit materiam, ut cultellus de ferro; aliquando ordinem, ut de mane fit meridies.

ARTICULUS II.

Ad secundum sic proceditur. Et 1. videtur, quod materia corporis non sit panis triticeus tantum. Figura in naturalibus attestatur speciei: sed quaedam grana, ut far et spelta, sunt in figura similia tritico; ergo in pane de eis facto potest confici.

2. Praeterea, vix invenitur panis de puro tritico; ergo si non potest confici nisi de solo pane tritico, vix invenitur panis de quo possit confici.

3. Praeterea, panis fermentatus et azimus sunt ejusdem speciei; ergo indifferenter potest de utroque confici.

Contra. Augustinus super illud Joan. 12: « Nisi granum etc... Cum sint, inquit, multa grana seminum, nulli se Christus comparat nisi frumento: ex quo mos coepit Ecclesiae de solo hoc grano conficere corpus Christi »; ergo non potest confici in altero pane.

Praeterea, sicut Dominus dedit in baptismo vim regenerativam, aquis ita consecrando instituit hujus sacramenti materiam: sed consecravit in pane absque fermento, quia ille est solum cibus paschalis; ergo ille est de materia hujus sacramenti.

Respondeo. Secundum quod communiter dicitur, non potest confici nisi in pane tritico: tum quia Dominus comparavit se tritici grano, Joan. 12; tum quia creditur celebrasse in pane tritico, et instituisse ut sic celebraretur; tum quia usus Ecclesiae ab Apostolis qui praesentes fuerunt, traditus, habet celebrare in hoc solo grano. Ratio vero hujus est quod magis convenit huic sacramento panis triticeus, quia in materia sive specie dignior, et quia in effectu refectionis utilior, et quia in communi usu hominum usitator est.

Ad primum de figura, dicendum, quod quamvis quidam dicant in pane de farre et spelta confici posse, quia est ejusdem speciei cum tritico pane, licet differat differentiis accidentalibus, videtur tamen magis oppositum; quia generatio est ex similibus specie. Ex tritico vero seminato nunquam generatur far, nec e converso. Unde non videtur esse ejusdem speciei.

Ad secundum de permixtione, dicendum, quod aut tanta est mixtio, quod trahitur triticum ad speciem alienam vel extraneam, quando virtus extremi est praedominans; vel mediam, quando est aequalis; et tunc in eo non potest confici: aut manet species tritici panis, ut quando virtus tritici praeponderat; et tunc potest. Quando autem ita fit, ex accidentalibus, scilicet ex sapore praecipue potest cognosci, quia accidentia maximam partem conferunt ad cognoscendum quod quid est.

Ad tertium dicendum, quod de necessitate sacramenti non est panis azymus, neque panis fermentatus. Unde bene de utroque confici potest. Sed de congruentia sacramenti est magis azymus panis quam fermentatus; tum, quia Christus de azymo consecrasset probatur ex ipso paschali tempore, in quo omnes azymis utebantur secundum legem; tum, quia magis competit ad designandam puritatem corporis Christi. Si quis autem contra usum Ecclesiae in hoc ageret, graviter peccaret. Tamen apud Graecos inolevit usus de fermentato conficiendi, in confutationem eorum qui legalia observare volebant.

ARTICULUS III.

Ad tertium sic proceditur. Et 1. videtur, quod de alio vino quam de vite possit confici: quia vinum est materia hujus sacramenti, sicut aqua baptismi: sed in omni aqua potest baptizari; ergo in omni vino confici.

2. Praeterea, in aliquibus terris non sunt vites, nec vinum de vite; si ergo non potest confici in aliquo liquore, non potest ibi missa celebrari.

3. Praeterea, videtur, quod in vino corrupto. Dicit enim Innocentius: « Et si diligenti studio in vinum optimum sit quaerendum, vitium tamen vini non maculat munditiam sacramenti »: ergo etc.

Contra. Sicut Christus comparat se grano tritiei, Joan. 12. ita comparat se viti, Joan. 13; ergo sicut non potest confici nisi in pane triticeo, eo quod Dominus comparavit se grano frumenti, ita non potest confici nisi in vino de vite, eo quod comparavit se viti.

Praeterea, Dominus confecit de vino vitis, ut patet Matth. 26: « Non bibam amodo de hoc genere nimine etc. »: ergo de illo tantum debet confici.

Respondeo. Dicendum, quod sicut panis de tritico est sola et propria materia consecrationis corporis Christi, ita vinum de vite propria est materia consecrationis sanguinis Christi: tum quia Dominus de hoc vino confecit; tum, quia loquendo usualiter, hoc solum vinum dicitur simpliciter sine additione; tum, quia magis est in usu et consuetudine humanae refectionis; tum, quia secundum proprietates suas, magis convenit significationi sacramenti hujusmodi.

Ad primum de baptismo, dicendum, quod non est simile; quia baptismus sacramentum est necessitatis, sed non Eucharistia.

Ad secundum de terris ubi non crescit vinum, dicendum, quod quamvis non crescat ibi vinum, deportari tamen potest.

Ad tertium de corruptione, dicendum, quod si tanta est corruptio, quod trahat vinum extra speciem vini, tunc de illo confici non potest. Si tamen non trahat, potest.

ARTICULUS IV.

Ad quartum sic proceditur. Et 1. videtur, quod absque aqua sanguis non possit consecrari. Dicit Cyprianus, quod calix Dei non potest esse vinum solum, nec aqua sola, nisi utrumque commisceatur.

2. Praeterea, aut Dominus apposuit aquam, aut non; si non, ergo non debet apponi: si sic; ergo necessario sicut et vinum debet apponi.

3. Praeterea, materia consecrationis panis non

potest esse farina sine aqua; ergo nec materia consecrationis vini, vinum sine aqua.

4. Praeterea, quod commiscetur ex duobus, neutrum eorum est, ut Damascenus dicit in 5 lib.: si ergo oportet aquam vino commisceri, videtur quod materia hujus sacramenti non sit vinum, sed aliquid commixtum ex aqua et vino.

Contra. Nihil quod transmutatur ante consecrationem, est de substantia sacramenti: sed aqua ante transmutatur quam consecratur; ergo etc.

Praeterea, Graeci aquam non apponunt, et tamen conficiunt; ergo non est de substantia sacramenti.

Respondeo. Dicendum, quod sicut supra dictum est, perfectio sacramenti Eucharistiae consistit in ipsa consecratione corporis et sanguinis Christi, et non in usu materiae consecratae, sicut est in baptismo. Ideo ex parte materiae illud tantum est de necessitate sacramenti quod significat corpus et sanguinem Christi; scilicet panis et vinum. Id autem quod significat usum et effectum hujus sacramenti, ut aqua, quae significat unionem corporis mystici cum corpore Christi vero, non est de necessitate hujus sacramenti. Unde vinum sine aqua potest consecrari; sed consecrans peccat graviter, si scienter omittat.

Ad illud Cypriani, dicendum, quod non potest, id est non debet.

Ad secundum dicendum, quod Dominus, ut creditur, propter fortitudinem vini illius terrae aquam apposuit; non tamen est de sacramenti necessitate, sed de congruitate.

Ad tertium de materia consecrationis corporis, dicendum, quod non est simile; quia farina sine aqua non est panis, sed vinum sine aqua est vinum.

Ad quartum dicendum, quod aqua debet apponi vino in tam parva quantitate, quod neque vinum convertatur in aquam, neque in tertiam speciem compositam; sed ipsa aqua convertatur in vinum, et vinum in sanguinem Christi. Quidam tamen dicunt, quod aqua manet, et non convertitur in aliud, sed vinum tantum convertitur in sanguinem. Sed haec positio, et contra naturam est, per quam videmus parvam aquam a multo vino absumi, et contra ritum sacramenti; quia post sumptionem sanguinis iterum potest homo communicare; quod non esset, si aliquis potus corporalis ibi remaneret.

ARTICULUS V.

Ad quintum sic proceditur. Et 1. videtur, quod Christus seipsum in sacramento sumpsit. Nam super illud Lev. 8, de sanguine arietis dicit Glossa: « Primo sacerdos, deinde filii intingantur, quia Christus prius in coena sanguinem suum accepit, deinde » discipulis dedit. Bibit enim, et aliis bibere dedit. »

2. Praeterea, ut daret exemplum baptizandi, prior ipse baptismum suscepit; ergo a simili, ut daret exemplum communicandi, quia difficilius est, primus communicavit.

Contra. Si manducavit, aut sacramentaliter tantum, aut spiritualiter. Si primo modo, indigniori quam Apostoli. Si secundo, ergo aliquem effectum majoris gratiae, quam habuerit, ibi percipit: sed utrumque est falsum; ergo nullo modo seipsum in sacramento sumpsit.

Praeterea, corpus passibile non potest manducari sine sui laesione: sed corpus Christi tunc erat

passibile; si ergo seipsum manducavit, proprium corpus laesit.

Praeterea, si tunc corpus Christi manducari potuit et consecrari, pari ratione et quando in sepulchro jacebat: sed tunc erat inanimatum; ergo et absque anima in sacramento fuisset; quod non videtur, cum forma sacramenti eundem effectum haberet tunc, sicut et modo, quando corpus animatum in sacramento existit.

Respondeo. Dicendum, quod secundum quosdam Christus non sumpsit in coena sacramentum corporis et sanguinis sui, sed simplicem speciem non consecratam panis et vini. Secundum alios autem videtur propter Glossam inductam, quod sumpsit sacramentum corporis et sanguinis sui, non propter indigentiam, sed gratia exempli. Unde ab antiquis versus est factus « Rex sedet in coena, turba cinetus a duodena. Se tenet in manibus, se eibat ipse cibus. »

Ad primum ergo dicendum, quod Christus comedit sacramentaliter corpus, aliter tamen quam nos. Nam ipse in sacramento vidit rem sacramenti, sed non ex sacramento in eam ducebatur; nos autem e converso. Similiter autem comedit spiritualiter, sed aliter quam nos. Nam in nobis causatur et augetur gratia quantum ad habitum; quod in Christo non fuit, sed in eo erat spiritualis refectio secundum actum. Et propter hanc differentiam, quidam dicunt, quod comedit sacramentaliter, sed non spiritualiter; quidam quod neutro modo.

Ad secundum dicendum, quod corpus Christi, quamvis tunc esset passibile, non tamen per commestionem laedebatur, quia laesio corporis est per divisionem continuitatis ipsius. Non autem sub sacramento secundum situm propriarum dimensionum, sed panis. Unde quicquid ei ab extrinseco potest accidere mediante quantitate, ut tangi, pati, crucifigi, et hujusmodi, non vere dicitur de eo secundum quod est sub sacramento. Unde corpus Christi in sacramento erat passibile, non tamen ibi patiebatur. Nam passibile convenit corpori secundum suam proprietatem, sed pati per actum exterioris agentis. Hugo tamen dixit, quod Christus assumpsit tunc dotem impassibilitatis: quod non potest esse. Constat enim, quod in propria specie passibilis erat. Idem autem non est simul passibile et impassibile.

Ad tertiam dicendum, quod quidam dicunt, quod in illo triduo non poterat corpus Christi consecrari, sed forma erat suspensa. Sed hoc vanum est, cum auctoritate non confirmetur. Unde dicendum est, quod si in illo triduo aliquis discipulorum consecrasset, fuisset ibi corpus sine anima, quia anima non est ibi ex vi sacramenti, sed ex naturali concomitantia ad corpus, quae tunc non erat, facta separatione animae a corpore. Unde non sequitur, quod forma tunc fuerit minus efficax.

DISTINCTIO XII.

Si autem quaeritur etc. (V. edit. nostrae tom. VII, pag. 650.)

QUAESTIO UNICA.

Hic quaeruntur quatuor: 1.º an accidentia sint sine subjecto in hoc sacramento, virtute divina; 2.º an possit species frangi; 3.º an possit conversi in alimentum; 4.º an per hoc sacramentum, virtutes augeantur, et peccata remittantur.

ARTICULUS I.

Ad primum sic proceditur. Et 1. videtur, quod accidentia virtute divina non sint sine subjecto in hoc sacramento. Deus enim non potest facere simul idem inesse et non inesse; ergo cum accidentis esse sit inesse, non potest facere accidens simul esse et non inesse.

2. Praeterea, Deus non potest definitionem a definito separare; subjectum vero cadit in definitione accidentis quia accidens est quod adest et abest praeter subjecti corruptionem; ergo non potest accidens a subjecto separare.

3. Praeterea, Deus non potest facere ut accidens sit simul substantia et accidens; ergo non potest facere ut definitio substantiae praedicetur de accidente: sed de ratione definiti vel substantiae est per se subsistere; ergo Deus non potest facere ut accidens subsistat per se.

Contra. Non est ibi aliqua substantia quam corpus Christi: sed accidentia illa non sunt in corpore Christi ut in subjecto; ergo sunt ibi sine subjecto; sed non nisi virtute divina; ergo etc.

Praeterea, sicut per naturam non potest accidens separari a substantia, sic nec substantia ab accidente: sed Deus separavit substantiam a proprio accidente, ut solem ab illuminatione, ut patuit in morte Christi; ergo a simili in ejus sacramento, separat accidens a substantia.

Respondeo. Circa hoc sunt plures opiniones. Quidam dixerunt quod in hoc sacramento sunt accidentia in subjecto: et hi dividuntur. Nam aliqui dixerunt, quod sunt in forma substantiali panis quae manet. Sed contra hoc est, quia nec forma panis manet, nec si maneret, subjectum accidentium esse posset: quia quantitas non respicit formam nisi ratione materiae. Unde formae immateriales, dimensionibus carent. Alia vero accidentia quantitate referuntur ad substantiam. Alii vero dicunt quod sunt in aere circumfuso. Sed hoc falsum est, cum durities et color et hujusmodi non sint accidentia apta nata esse in aere. Et ideo alii dicunt quod virtute divina sunt ibi accidentia sine subjecto; et hoc sic ostendant. Omnis enim causa primaria, ut habetur in libro de Causis, plus est influens in causatum causae secundariae quam causa secundaria. Cum ergo substantia sit secundaria causa accidentis, et Deus causa primaria, est enim causa substantiae et accidentis, plus influit Deus in esse accidentis quam substantia. Unde, eum subtracta operatione causae secundae maneat operatio causae primae, subtracta substantia, nihilominus manet accidens per influentiam causae primae. Unde sunt accidentia, divina virtute, sine subjecto. Sed duplex est subjectum accidentis. Quoddam primum, quod est substantia; aliud proximum quod est accidens, ut superficies est subjectum coloris. In hoc ergo sacramento, omnia accidentia sunt sine subjecto primo, quia sine substantia: sed quaedam eorum sunt sine subjecto proximo, ut quantitas quae immediate inhaeret substantiae, quaedam vero sine subjecto primo, ut qualitas, et caetera accidentia quae insunt substantiae mediante quantitate. Duplex autem ratio assignatur, quare Deus faciat in hoc sacramento accidentia esse sine subjecto. Una, quo ad significationem; quia species illae sine subjecto existentes expressius docent intentum fidelis haec credentis in corpus Christi contentum sub

speciebus. Altera, quo ad causalitatem, quia hoc sacramentum cibus est spiritualis. Unde non decet ut cum hoc, sit ibi aliquis cibus corporalis.

Ad primum ergo dicendum, quod inesse non dicit esse absolutum accidentis, sed in ordine ad causam proximam, scilicet substantiam cui inest. Esse namque commune est analogum substantiae et accidenti, sed non inesse. Subtracto vero ordine ad causam proximam, nihilominus potest manere ordo accidentis ad causam primam, secundum quod ejus esse non est inesse, sed ab alio esse.

Ad secundum de definitione, dicendum, quod inclinatio accidentis ad subjectum duplex est, secundum aptitudinem et secundum actum. Prima inclinatio, est de definitione accidentis, scilicet quod aptum natum est inesse alteri. Secunda vero inclinatio accidentis ad substantiam non est de definitione ejus, scilicet quod actu insit; quia definitio dicit aptitudinem et non actum. Et ideo, prima inclinatio accidentis ad substantiam non potest tolli ab eo, sed secunda sic. Unde quamvis actu non insit, semper tamen aptum natum est inesse; sicut in aqua calida, quamvis actu non sit frigiditas, apta nata est tamen inesse.

Ad tertium dicendum, quod per se subsistere potest dupliciter intelligi. Aut secundum aptitudinem, et sic cadit in definitione substantiae; aut secundum actum, et sic non; quia partes definitionis intelliguntur secundum aptitudinem, non secundum actum, ut rationale mortale de homine. Exemplum hujus manet in anima, quia substantia est; et tamen quamdiu est in corpore, per se subsistere convenit ei aptitudine, sed non actu.

ARTICULUS II.

Ad secundum sic proceditur. Et 1. videtur, quod species non sint frangibiles. Forma enim sine materia simplex est; ergo non potest frangi.

2. Praeterea, sicut forma substantialis est in qualibet parte materiae, ita corpus Christi totum est sub qualibet parte specierum: sed divisa materia secundum quantitatem dividitur et per accidens forma; si ergo species dividuntur in sacramento, et corpus Christi dividetur; quod est inconveniens.

3. Praeterea, signum debet convenire signato: sed in signato, scilicet corpore Christi glorificato, nulla fit fractio; ergo nec in signo.

Contra. Matth. 26, dicitur, quod Dominus benedixit et fregit; ergo fuit ibi fractio: sed non in corpore; ergo in speciebus.

Praeterea, species ille retinent naturam panis: panis vero frangibilis est; ergo et species illae.

Respondeo. Dicendum, quod quidam dixerunt, quod in sacramento isto non est fractio, sed tantum videtur. Sed hoc non potest esse; quia sensus in hoc sacramento non decipitur in propriis sensibilibus, neque in communibus, sed solum in sensibilibus per accidens, quorum iudicium ad sensum non pertinet, sed magis ad rationem vel aestimationem. Continuum autem et numerus, per quae fractio dijudicatur, sunt de sensibilibus communibus. Et ideo alii dicunt, quod est ibi fractio, sed non in subjecto. Sed hoc non potest esse; cum albedo, quae est perfectius ens quam passio, non sit ibi nisi in subjecto. Et ideo dicendum, quod est ibi vera fractio, et subjectum ejus sunt dimensiones, quia fractio omnis est quaedam divisio.

Divisio vero est passio quanti, ut est quantum. In sacramento vero est aliquod quantum per modum quanti, ut species: aliquid vero est ibi quantum, sed non per modum quanti, ut corpus Christi. Ideo dicendum est, quod fractio, sive divisio, fit in speciebus non in corpore.

Ad primum, ergo dicendum, quod quamvis sit ibi forma sine materia, non tamen sine modo materiae, cum retineat dimensiones pristinas et modum subsistendi.

Ad secundum dicendum, quod nihil quod attribuitur corpori mediante sua quantitate competit corpori Christi secundum quod est in sacramento, unde nec fractio. Nec est simile de forma substantiali materiali, quae comparatur ad materiam aliquo modo mediantibus dimensionibus interminatis, et propter hoc dividitur per accidens ad divisionem corporis. Non autem forma spiritualis, ut anima rationalis; et similiter nec corpus Christi, quod non comparatur mediantibus suis dimensionibus ad sacramentum.

Ad tertium de signo, dicendum, quod convenientia signi ad signatum est in representando, non in essendo. Circulus enim positus ante tabernam ubi vinum venditur, non est in vino.

ARTICULUS III.

Ad tertium sic proceditur. Et 1. videtur, quod species quae in hoc sacramento remanent, nutrire non possint. Nutrimentum enim immutat id quod nutritur; sed species sine substantia existentes, non possunt immutare aliquod corpus, cum omne agens agat sibi simile: corpus autem aliud non potest fieri species sine substantia; ergo species nutrire non possunt.

2. Praeterea, facilius est aliquid alteri permisceri quam in ipsum converti; sed hujusmodi speciebus non potest aliquid aliud permisceri, quia accidens substantiae non permiscetur, ut patet per Philosophum in primo de Generatione; ergo multo minus species istae possunt converti in substantiam nutriti.

3. Praeterea, omnis cibus qui nutrit, in corpus transit et superfluitates ex eo resolvuntur: sed cibus iste non vadit in corpus, ut Ambrosius dicit in littera; ergo non nutrit.

Sed contra est quod dicitur in Glossa 1 Cor. 11 super illud: « Alius quidem esurit, alius autem ebrius est » quod aliqui ex usu hujus sacramenti inebriantur.

Praeterea, Innocentius dicit: « In quo similitudo « deficeret, in eo sacramentum non esset, si ibi non « esset; sed ibi sacramentum se proderet et locum fi- « dei auferret »: similitudo autem non esset, si non nutriret, sicut alius panis; ergo hoc ponendo, sequitur inconveniens praedictum.

Respondeo. Dicendum, quod quidam dixerunt quod species illae non nutriunt, sed reficiunt et inebriant ex sola immutatione accidentali, sicut alii inebriantur vel reficiuntur ex solo odore vel sapore. Sed contra hoc est quod odor et sapor, etsi famem leviant, non tamen naturam sustentant; quod tamen ex usu hujus sacramenti accideret, si in magna quantitate sumeretur. Unde quasi communiter dicitur, quod nutriunt, sicut alii cibi, per hoc quod convertuntur in substantiam nutriti. Quod quidem ex hoc apparet verum, quod in alias res converti possunt hujusmodi species, sicut in vermes

per putrefactionem et in cinerem per combustionem; et pari ratione in carnem et sanguinem per conestionem. Modum tamen hujus conversionis quidam assignant, dicentes, quod substantia panis redit: quod non potest esse, si substantia panis proprie accipiatur. Non enim est ibi substantia panis speciebus panis corruptis, nec iterum remanentibus, quia adhuc durat ibi corpus Christi. Si vero per substantiam panis materia intelligatur, sic potest intelligi panis redire, in quantum materia panis redit; quae non potest intelligi eadem numero; quia si totus panis conversus est in corpus Christi, non potest redire aliqua pars panis nisi intelligatur quod corpus Christi convertatur in panem, quod est absurdum. Potest tamen intelligi, quod alia numero materia divina virtute restituatur vel per corruptionem alterius corporis, vel per novam creationem. Quorum tamen primo contradicit sensus, secundo vero sanctorum dicta, quae dicunt nihil de novo creari quantum ad materiam corporalem. Et ideo aliis videtur, quod sicut illis speciebus divina virtute praestatur ut subsistere possint, ita etiam cum hoc simul eis praestatur, ut omnem actionem et passionem habeant et virtutem quam haberent substantiae, si ibi remanerent; et hoc propter latentiam sacramenti, ne si deperdantur evacuetur fides.

Ad primum ergo dicendum, quod proximum principium actionis naturalis est qualitas, qua mediante etiam forma substantialis agit. Qualitas autem in hoc sacramento non manet in subjecto, sicut ante erat, sed in dimensionibus; quibus median-ribus in substantia est quaelibet virtus. Ergo illa actio quam qualitas panis vel vini habebat ex praesentia substantiae, habet in sacramento virtute divina ad immutandum etiam substantialiter. Nec oportet quod mutatio fiat in similitudinem specierum, sed in similitudinem substantiae cujus virtute agunt.

Ad secundum dicendum, quod secundum naturam accidens in substantiam converti non potest, sicut nec subsistere. Utrumque autem in hoc sacramento fit virtute divina.

Ad tertium dicendum, quod circa missionem est triplex opinio. Quidam namque dicunt, quod quicumque liquor addatur speciebus vini in quacumque quantitate, desinit ibi esse sanguis Christi. Alii vero, quod in quacumque quantitate apponitur liquor alius, adhuc est sub partibus vini sanguis Christi. Tertii dicunt medio modo, quod species illae eodem modo corrumpuntur vel manent facta additione alterius liquoris, sicut fieret quando esset substantia vini; et quamdiu manent eadem species numero vel specie in toto et in parte, manet ibi sanguis Christi: facta vero mutatione, non manet.

Ad quartum dicendum, quod verbum Ambrosii referendum est ad corpus Christi quod continetur sub sacramento, non autem ad species.

ARTICULUS IV.

Ad quartum sic proceditur. Et 1. videtur, quod per hoc sacramento non dimittantur peccata venialia. Qua ratione remittit unum, eadem ratione remittit omnia; ergo post communionem posset aliquis dicere se nullum habere peccatum: quod est contra illud 1 Joan. 1: « Si dixerimus quod peccatum etc. »

2. Praeterea, sacramentum causat remissionem

culpa per gratiam quae in eo infunditur: sed gratia opponitur peccato mortali magis quam veniali; ergo si Eucharistia delet venialia, multo magis debet delere mortalia.

3. Praeterea, homines quotidie in peccata venialia labuntur; si ergo sacramentum remissionem venialium operatur, videtur quod sit quotidie accipiendum.

4. Praeterea, videtur, quod per hoc sacramentum non augeantur virtutes. Si enim ibi virtutes augentur; ergo imperfectus frequenter celebrando cito potest fieri perfectus.

Contra. Secundum Dionysium, Eucharistia habet virtutem perfectissimam: nihil autem perficitur nisi per augmentum virtutis; ergo Eucharistia auget virtutes.

Praeterea, Innocentius III dicit: « Eucharistia liberat a malo, conservat in bono, delet venialia et cavet mortalia. »

Respondeo. Dicendum, quod proprius effectus cujuslibet sacramenti debet assumi ex similitudine materialis effectus materiae sacramenti illius; sicut expurgatio veteris vitae quae fit in baptismo similis est purgationi exteriorum sordium per aquam. Est enim effectus baptismi expurgatio veteris vitae. Et ideo, cum materiale in hoc sacramento sit cibus, oportet quod effectus proprius hujus sacramenti accipiatur secundum similitudinem ad effectum cibi. Cibus autem corporalis primo in cibatum convertitur, et ex conversione deperdita restaurat, et quantitatem auget. Sed cibus spiritualis non convertitur in manducantem, sed eum ad se convertit. Unde proprius effectus hujus sacramenti est conversio hominis in Christum, ut dicat cum Apostolo: « Vivo ego, jam non ego. » « vivit vero in me Christus, » Galat. 2. Et ad hoc sequuntur duo effectus; scilicet augmentum spiritualis quantitatis in augmento virtutum, et restauratio deperditorum in remissione venialium; et reparatio cujusque defectus praecedentis.

Ad primum. « qua ratione etc. » dicendum, quod non sequitur; quia remissio venialis fit per novum motum, non per novum habitum semper. Unde potest remissio unius fieri sine remissione alterius, secundum quod homo magis dispositus est ad unius remissionem quam alterius.

Ad secundum dicendum, quod sicut alimentum naturale se habet ad vitam naturalem, sic spirituale ad spiritualem. Alimentum vero naturale prodest viventi non mortuo, similiter alimentum spirituale. Ideo dicendum est quod non delet mortalia, nisi forte oblita.

Ad tertium dicendum, quod in hoc sacramento duo requiruntur; desiderium conjunctionis ad Christum, et reverentia sacramenti: quorum primum inclinatur ad sumendum, secundum ad abstinendum. Sed quia amor timori praeponderat, ceteris paribus laudabilius est sumere quam abstinere: dum tamen ex frequenti sumptione amor intendatur et reverentia non minuat; alias laudabilius esset aliquando abstinere. Unde in hoc unusquisque suo iudicio relinquitur; ita dumtaxat ut tempus ab Ecclesia institutum non praetergrediatur, sed ad minus semel in anno communicet.

Ad quartum de imperfecto, dicendum, quod imperfectus debito modo accedendo per sacramentum hoc, perfectus fieri potest.

DISTINCTIO XIII.

Solet etiam quaeri etc. (V. edit. nostrae tom. VII, pag. 669.)

QUAESTIO UNICA.

Hic quaeruntur quinque: 1.^o quis possit conficere; 2.^o an sine ritu Ecclesiae possit confici; 3.^o an missa boni sacerdotis sit melior quam mali; 4.^o an brutum sumat corpus Christi; 5.^o quid faciat haereticum.

ARTICULUS I.

Ad primum sic proceditur. Et 1. videtur, quod haereticus praecisus ab Ecclesia non possit conficere. Fides in omnibus sacramentis est fundamentum; ubi ergo deficit fides, et sacramentum; sed in tali deficit fides; ergo et sacramentum.

2. Praeterea, videtur quod degradatus non possit conficere. Manus enim amputata vel ligata, nec bene nec male potest operari; sed in talibus potestas est amputata vel ligata; ergo nec bene nec male potest consecrare.

3. Praeterea, videtur quod nec schismaticus. Hoc sacramentum est sacramentum unionis; sed schismaticus est divisus ab unitate Ecclesiae; ergo non potest sacramentum unionis conficere.

4. Praeterea, videtur quod nec sacerdos malus. Privilegium meretur amittere, qui concessa sibi abutitur potestate; ergo amittit privilegium consecrandi; ergo non consecrat.

Contra. Sicut dicit Magister in litera, tria solum ex parte ministri requiruntur: scilicet ordo sacerdotalis, intentio et verborum prolatio; sed haec omnia potest habere haereticus, degradatus, schismaticus et malus sacerdos; ergo quilibet eorum potest consecrare.

Respondeo. Sicut Augustinus dicit: « Sacramentum hoc non in merito consecrantis, sed in verbo » perficetur creatoris et virtute Spiritus sancti. » Unde cum haec quatuor occurrunt, scilicet debita forma, debita materia, debitus ordo, debita intentio, quae sunt de essentia sacramenti, hoc sacramentum perficitur, quantacumque interveniat malitia consecrantis; quia ejus meritum vel demeritum non operatur ad sacramenti consummationem.

Ad primum « Fides est fundamentum etc. » dicendum, quod verum est de fide Ecclesiae, et hanc oportet habere, ita quod intendat facere quod facit Ecclesia. Non tamen exigitur fides specialis ministri.

Ad secundum dicendum, quod non est simile de manu spirituali et corporali; quia manus corporalis cum sit in potestate nostra, potest ligari totaliter. Spiritualis autem, nec simpliciter, nec totaliter potest ligari, cum non sit totaliter in potestate nostra; eo quod per ordinem imprimatur character non in corpore, sed in anima, in quam solus Deus agere potest.

Ad tertium, schismaticus est divisus, dicendum, quod in schismatico est duo considerare: scilicet vitium schismatis et dignitatem ordinis. Ratione primi est divisus, et sic non potest consecrare; sed ratione secundi potest.

Ad quartum, quod malus meretur, dicendum, quod verum est; sed ex benignitate Dei est quod non subtrahat donum tale. Bona enim gratiae gra-

tis datae non subtrahit Deus peccatoribus. Unde quamvis hi quatuor habeant potestatem consecrandi, non tamen habent jus exequendi: sed tres istorum nec quo ad Deum, nec quo ad nos: sed malus in facie Ecclesiae non est privatus, quamvis quo ad Deum.

ARTICULUS II.

Ad secundum sic proceditur. Et 1. videtur, quod sine ritu Ecclesiae non possit confici. Quia qui conficit extra formam Ecclesiae, non conficit: sed vestes et altare et hujusmodi sunt de forma Ecclesiae; ergo sine eis non potest confici.

2. Praeterea, in rebus secularibus contractus contra statuta principum irritus censetur; ergo similiter videtur dicendum in rebus spiritualibus; ergo qui celebrat contra statuta summorum Pontificum, nihil agit.

3. Praeterea, qui hoc omittit non habet intentionem faciendi quod facit Ecclesia, ut videtur; ergo non conficit.

Contra. Ea quae sunt de essentia sacramenti sunt eadem apud omnes; sed ritus conficiendi non est idem apud omnes; ergo etc.

Praeterea, in baptismo si omittantur ea quae sunt de solemnitate sacramenti non est irritum sacramentum; ergo similiter in hoc sacramento.

Respondeo. In hoc sacramento, sicut et in omnibus aliis, quaedam sunt substantialia, quaedam accidentalia. Substantialia sunt quatuor: scilicet materia panis et vini, forma verborum, ordo ministri et intentio. Alia accidentalia sunt pertinentia ad decorem et solemnitatem sacramenti. Unde in illis non est idem modus apud omnes Ecclesias. Dicendum est ergo, quod si aliquid de substantialibus omittatur, sacramentum non conficitur. Si vero aliquid de accidentalibus solum, conficitur, sed graviter peccat qui scienter omittit, quia facit contra praeceptum Ecclesiae.

Ad primum de forma, dicendum, quod illud intelligitur de forma essentiali a Christo tradita, non de accidentali.

Ad secundum de contractibus, dicendum, quod similiter in contractibus quaedam sunt de necessitate, et haec omnia vitiant contractum; quaedam de solemnitate tantum, et haec non vitiant.

Ad tertium dicendum, quod sufficit intentio facientis in his quae sunt de essentia sacramenti; non tamen oportet quod adsit in accidentalibus.

ARTICULUS III.

Ad tertium sic proceditur. Et 1. videtur, quod plus valeat missa boni sacerdotis quam mali. Dicit enim Philosophus in lib. Topic., quod plura bona paucioribus magis sunt eligenda: sed in missa sacerdotis boni plura sunt bona, quia ibi meliores preces; ergo est magis eligenda; ergo est melior.

2. Praeterea, dicit Canon, quod nullus audiat missam sacerdotis quem scit manifeste concubinam habere: hoc autem non diceret si ejus missa esset aequae bona sicut alicujus sancti viri; ergo etc.

3. Praeterea, quod fructuosius est, illud est melius: sed missa boni sacerdotis est fructuosior, quia melius exauditur et majorem habent devotionem homines ad eam; ergo est melior.

Contra. Potestas excellentiae licet potuerit dari ministris, non tamen est data, ne servus in conservo spem poneret; ergo non est melius sacramentum ministratum a bono quam a malo.

Praeterea, ubicumque virtus Dei et non homo operator, non fit per hominem opus melius vel pejus: hic autem Deus et non homo operatur; ergo etc.

Respondeo. In missa quaedam sunt de substantia missae, scilicet ea in quibus consistit consecratio. Quaedam vero sunt de bene esse, ut orationes et hujusmodi. Quo ad ea quae substantialia sunt, aequae bona est missa sacerdotis mali sicut boni; quantum ad aliud autem non.

Ad primum, « Plura bona etc. », dicendum, quod eligibilior est missa boni sacerdotis quam mali, non quantum ad ea per quae conficitur sacramentum, quamvis quantum ad ea quae circumstant sacramentum, sicut sunt orationes et hujusmodi.

Ad secundum de concubinario, dicendum, quod hoc dicitur in detestationem criminis celebrantis, non missae quae celebratur.

Ad tertium, missa boni sacerdotis, dicendum, quod per hoc probatur quod sit melior quantum ad intercessionem, seu orationem, non tamen quantum ad sacrificium.

ARTICULUS IV.

Ad quartum sic proceditur. Et 1. videtur, quod brutum non possit sumere corpus Domini: quia ita dicit Magister hic quod hoc sacramentum non sumitur a brutis.

2. Praeterea, majoris dignitatis est hoc sacramentum quam baptismi: sed licet brutum suscipiat abluitionem exteriorem, nunquam tamen sumit rem sacramenti interiorem; ergo multo magis, quamvis suscipiat species hujus sacramenti, non tamen rem.

3. Praeterea, quamvis vox audiatur a bruto, non tamen ejus significatio percipitur; ergo a simili, quamvis sumat species, non tamen sumit corpus Christi.

Contra. Corpus Christi speciebus inseparabiliter est unitum; ergo ubicumque sunt species, et corpus: sed species trahuntur in ventrem bruti; ergo et corpus.

Praeterea, plus detestatur Deus culpam quam naturam: sed non refugit culpam peccatoris; ergo multo minus naturam bruti animalis.

Respondeo. Circa hoc duplex est opinio. Quidam enim dicunt, quod sumit sacramenti species, sed non corpus Christi, quia sub speciebus non est corpus Christi nisi ut ordinabile ad humanum usum et ad cibandum spiritualiter, sed si ad hoc non ordinatur desinit ibi esse. Hoc autem videtur derogare veritati sacramenti, ad quam spectat ut consecratio tamdiu perseveret, quamdiu species illae manent, sicut et in aliis sacramentis est, ut in oleo consecrato et in aliis hujusmodi. Et ideo alii dicunt quod brutum sumit species, et rem contentam sub speciebus; non tamen sumit spiritualiter, nec sacramentaliter, sed corporaliter tantum. Alii vero dicunt, quod non sumit ut species, sed ut rem: et secundum hanc opinionem, dicendum ad illud Magistri, quod non sumit ut sacramentum, sed ut rem.

Ad secundum de baptismo, dicendum, quod non est simile; quia quod est res et signum in baptismo, scilicet character, non continetur sub exteriori

abluitione; sed hic sub speciebus continetur verum corpus Christi.

Ad tertium de voce, dicendum, quod non est simile, quia significatum vocis non continetur sub ea, sed tantum repraesentatur, sicut significatum specierum continetur sub speciebus.

ARTICULUS V.

Ad quintum sic proceditur. Et 1. quod haeresis non dicat perversitatem fidei. Haeresis enim, ut dicit Isidorus, idem est quod divisio: divisio autem opponitur unioni, quae fit per charitatem, quia amor est virtus mutua, ut dicit Dionysius; ergo haeresis magis ad perversitatem odii quam fidei pertinet.

2. Praeterea, superstitio religioni opponitur, non fidei: sed haeresis superstitio dicitur; ergo magis ad perversitatem religionis quam fidei pertinet.

3. Praeterea, Hieronymus dicit, quod ex verbis inordinate prolatis, incurritur haeresis; sed fides non consistit in verbis oris, sed in assensu cordis; ergo haeresis non dicit perversitatem fidei.

Contra. Haeresis est peccatum; ergo alicui virtuti opponitur: sed non nisi fidei; ergo haeresis dicit perversitatem fidei.

Respondeo. Haeresis divisio interpretatur. Quia ergo prima adunatio fidelium est per fidem, ideo divisio a communi fide specialiter haeresis appellatur. Quia vero nullus a dispositione nominatur simpliciter, sed a perfecto habitu; ideo non quicumque deviat a communi fide, sed qui pertinaciter deviat, proprie haereticus dicitur. Unde ad rationem haeretici, duo concurrunt. Unum scilicet error in ratione, quod est haeresis initium. Alterum scilicet pertinacia in voluntate, quod est haeresis complementum. Tales ergo proprie dicuntur haeretici, qui errori rationis in his, quae sunt fidei, admiscunt pertinaciam voluntatis.

Ad primum, charitas facit unionem, dicendum, quod facit complementum unionis; sed principium unionis est ex cogitatione; et ideo divisio, quae est in fide, haeresim constituit.

Ad secundum dicendum, quod fides est principium eorum quae ad religionem requiruntur, quia omnis religio sive cultus Dei est quaedam fidei protestatio. Unde quod religioni opponitur, opponitur fidei.

Ad tertium, de Hieronymo, dicendum, quod inordinatam prolationem vocat, quando quis ita sentit et defendit. Et ideo in actu cordis, non oris, consistit haeresis.

DISTINCTIO XIV.

Post haec de poenitentia agendum est (V. edit. nostrae tom. VII, pag. 680.)

QUAESTIO UNICA.

Hic quaeruntur quinque: 1.º de necessitate poenitentiae; 2.º utrum poenitentia sit sacramentum; 3.º utrum sit virtus; 4.º de effectu poenitentiae; 5.º utrum per poenitentiam opera mortificata reviviscant.

ARTICULUS I.

Ad primum sic proceditur. Et 1. videtur, quod non sit poenitentia necessaria. Super illud Psalm. 125: « Qui seminant in lacrymis etc. » dicit Glossa: « Noli esse tristis, si adsit tibi bona voluntas, unde metitur pax: » sed aliquis potest habere bonam voluntatem sine dolore poenitentiae, et sine actuali consideratione peccatorum suorum; ergo poenitentia non est peccatori necessaria ad salutem.

2. Praeterea, sicut se habet aversio a Deo ad damnationem, ita conversio ad Deum ad salutem: sed aversio a Deo sine omni delectatione potest esse causa damnationis; ergo conversio ad Deum sine omni dolore poenitentiae potest esse causa salutis; et sic idem quod prius.

3. Praeterea, Luc. 7, super illud, « Dimissa sunt ei peccata multa, » dicit Glossa: « De ardore charitatis rubiginem peccatorum in ea consumpsit; » sed aliquis potest converti ad Deum per ardentem charitatem, sine hoc quod convertatur ad peccata per poenitentiam; ergo sine poenitentia potest aliquis salutem consequi post peccatum.

Contra. Augustinus dicit in lib. de Poenitentia: « Nemo suae voluntatis arbiter constitutus, potest inchoare novam vitam, nisi poeniteat eum veteris vitae: » sed nullus potest consequi salutem sine novitate vitae; ergo sine poenitentia nullus salvari potest.

Praeterea, sicut baptismus ordinatur contra originale peccatum; ita poenitentia contra actuale: sed nemo potest ab originali mundari, nisi per baptismum, vel actu susceptum, vel proposito; ergo nec ab actuali sine poenitentia; ergo est necessaria.

Respondeo. Manente causa, manet effectus. Causa autem quare aliquis privatur gratia per peccatum est iniquitas peccatoris, qua Deum offendit, scilicet qua peccator subtrahit Deo quod debitum erat. Unde quamdiu ista iniquitas ad aequalitatem non reducit, non potest privatio gratiae cessare. Hoc autem facit poenitentia per suum actum, quia Deo debitum subtrahitur per offensam, restituit per emendam. Unde sine actu poenitentiae peccatori salus esse non potest.

Ad primum, aliquis potest habere, dicendum, quod falsum est; quia bona voluntas, quae ad pacem aeternam sufficit, sine poenitentia esse non potest, quia non est ad aequalitatem iustitiae reducta.

Ad secundum, quod aversio a Deo sine omni delectatione potest esse causa damnationis, dicendum, quod quamvis non semper habeat delectationem sensibilem, habet tamen quandam placentiam voluntatis: et similiter oportet quod conversioni ad Deum adjungatur displicentia, et hic dolor poenitentiae dicitur.

Ad tertium, aliquis potest converti ad Deum, dicendum, quod falsum est; quia sicut inter homines non restituitur amicitia per offensam soluta, nisi per aliquem de offensa dolorem; ita nec charitas, quae est amicitia hominis ad Deum, post peccatum restituitur, nisi per poenitentiam.

ARTICULUS II.

Ad secundum sic proceditur. Et 1. videtur, quod poenitentia non sit sacramentum. In omni

sacramento novae legis est aliqua materia elementi visibilis, quae est signum et causa gratiae: sed in poenitentia nihil tale est; ergo non est sacramentum novae legis.

2. Praeterea, in prima dist. dicit Magister: « Sacramenta novae legis consistunt in rebus et verbis: » hic autem nulla est certa et determinata forma verborum; ergo non est sacramentum.

Contra. Numeratur inter septem sacramenta novae legis etc.

Praeterea, sacramenta sunt medicinae divinitus institutae spiritualium morborum; sed praecipua medicina hujusmodi morborum poenitentia est; ergo etc.

Respondeo. Secundum Hugonem, sacramentum est in quo divina virtus sub tegumento rerum sensibilium secretius operatur salutem. Cum ergo divina virtus in poenitentia sub tegumento rerum sensibilium, id est, actuum extrinsecorum, secretius operetur salutem, poenitentia est sacramentum.

Ad primum dicendum, de materia sensibili, quod materia sensibilis accipitur large pro omni re sensibili, sive sit exterior substantia, sive actio humana.

Ad secundum, de verbis, dicendum, quod in poenitentia, secundum quod est sacramentum, sunt res et verba. Verba quippe sunt in confessione et absolutione. Sed non requiritur tanta verborum determinatio, quia non est hic aliqua materia verbo sanctificanda.

ARTICULUS III.

Ad tertium sic proceditur. Et 1. videtur, quod poenitentia non sit virtus: quia poenitentia est dolor; ergo poenitentia non est virtus.

2. Praeterea, qui habet unam virtutem, habet omnes: sed poenitentia non est in innocentibus, in quibus sunt aliae virtutes; ergo etc.

Praeterea, omnis virtus est de bono et de difficili: sed poenitentia est de malo; ergo non est virtus.

Contra. Non meremur nisi actu virtutis; actu vero poenitentiae meremur; ergo est virtus.

Praeterea, contraria mutuo se expellunt; ergo cum poenitentia expellat vitium, ipsa est virtus.

Respondeo. Dicendum, quod in poenitentia se habet homo ut recipiens reconciliationem a Deo per ministros Ecclesiae, et sic est sacramentum; et ut agens ad hanc reconciliationem, et sic est virtus: quia ille habitus est virtus, ejus actus ex recta electione procedit. Secundum enim Philosophum, principale in virtute morali est electio. Sed actus poenitentiae, qui est emendare peccatum sub speciali ratione, ut est Dei offensa, ex recta electione procedit; ergo est specialis virtus. Sed quia non habet Deum pro objecto, ideo non est virtus theologica, sed moralis. Harum autem sunt duo genera: quia quaedam respiciunt Deum, ut finem remotum ut temperantia, quae habet passiones pro materia et quietem animi pro fine proximo, sed hanc ulterius ordinat ad Deum. Quaedam respiciunt Deum ut finem proximum, ut patria, quae aliquas servitutis protestationes exhibet in Dei honorem; et de hoc genere est poenitentia, quia ad hoc in peccata emendanda movetur, ut Deo reconcilietur. Reducitur autem ad iustitiam, non ut pars ejus subjectiva, cum in ea non servetur simpliciter aequali-

tas. Inter Deum enim et creaturam maxima est distantia: justitia autem aequalitas est. Sed servatur in ea aliquis modus aequalitatis, non quantitatis, sed proportionis, quia non quantum est debitum, sed quantum est possibile reddit Deo in emendam. Unde non est ibi simpliciter justum, sed dominativum justum, quod secundum Philosophum est inter dominum et servum.

Ad primum dicendum, quod poenitentia aequivoce accipitur: prout est habitus in voluntate existens, et sic est virtus: vel prout est passio in parte sensitiva existens, et sic non est virtus. Quamvis enim utroque modo sit dolor in poenitentia, non tamen utroque modo est passio, sed solum secundo modo. Dolor vero, qui est in poenitentia primo modo accepta, non est passio, sed voluntatis actus.

Ad secundum, de innocentibus, dicendum, quod falsum est. Nam in eis est virtus poenitentiae, sed non usus, quia non subest materia, sicut in paupere liberali liberalitas.

Ad tertium, virtus est de bono, dicendum, quod hoc intelligitur tanquam de actu, non tanquam de materia actus. Nam virtutes aliquae, ut temperantia, consistunt in retrahendo a malo; et actus retrahendi bonus est, quamvis materia non sit bona.

ARTICULUS IV.

Ad quartum sic proceditur. Et 1. videtur, quod per poenitentiam non tollantur peccata. Ad Heb. 10: « Voluntarie peccantibus nobis post acceptam « notitiam veritatis, jam non relinquitur hostia pro « peccato. » Sed in poenitentia homo se offert hostiam Deo. Unde in Psal. 50: « Sacrificium Deo « spiritus contribulatus; » ergo peccata eorum, qui lapsi sunt post notitiam veritatis, poenitentia non delet.

2. Praeterea, videtur quod nec virtutes restaurantur. Poenitentia cum aliis simul virtutibus infunditur; ergo non per ipsam reparantur.

3. Praeterea, facilius est peccato futuro resistere quam praeterita destruere: si ergo poenitentia peccata praeterita destruat, omnia futura impediet: et sic nullus a poenitentia excidere poterit.

4. Praeterea, baptismus sufficienter peccata delens non potest iterari; si ergo per poenitentiam peccata deleantur, non poterit iterari; quod falsum est.

Contra. Poenitentia restituit gratiam; ergo cum gratia non possit esse cum culpa, nec sine virtutibus, delet omnem culpam et restituit omnem virtutem.

Praeterea, Augustinus dicit: « Poenitentia est « quaedam res optima, quae omnes defectus revocat ad perfectum »: sed hoc non esset nisi opera mortificata restauraret ad vitam, et virtutes amissas restitueret; ergo etc.

Respondeo. Per peccatum, sicut per quamdam nubem, prohibetur divina influentia, ex qua causantur in nobis gratia et virtutes, et disponimur ad percipiendum effectum praecedentium meritorum. Poenitentia autem tollit peccatum tripliciter. Uno modo scilicet, ut est sacramentum novae legis causans gratiam. Secundo ut est virtus gratia informata; et sic tollit formaliter ut aliae virtutes. Tertio ratione actus; quia materia circa quam operatur, omne peccatum est, quod intendit

S. Th. Opera omnia. V. 22.

expiare et destruere; et sic tollit specialiter prae aliis virtutibus efficaciter. Et ideo per eam, quasi per removens prohibens, reparatur in nobis omnis virtus et gratia, et consequimur veniam peccatorum.

Ad primum, non relinquitur hostia, dicendum, quod Apostolus loquitur de hostia quae universaliter pro peccatis totius mundi oblata est, scilicet Christo qui est unica et singularis hostia, cujus oblatio non iteratur, sed unica sui oblatione valet ad hoc, quod per poenitentiam ac alia sacramenta omnia peccata possint dimitti. Quod vero additur in verbis Apostoli « Impossibile est eos, qui prolapsi sunt « post acceptum Spiritus donum, revocari ad poenitentiam, » intelligendum est de poenitentia, quae includitur in baptismo.

Ad secundum, simul infunditur, dicendum, quod quamvis simul tempore, tamen prius natura obstaculum removetur, sicut simul nubes tollitur et aer illuminatur, sed prius natura nubes tollitur. Unde, cum per poenitentiam obstaculum removeatur, quamvis cum aliis virtutibus simul infundatur, potest tamen esse causa restorationis earum ut removens prohibens, sicut jam dictum est.

Ad tertium dicendum, quod de necessitate poenitentiae est, ut poenitens habeat propositum peccata iterum non committendi. Potest tamen hoc ejus propositum immutari: nec tamen sequitur, quod prima poenitentia non fuerit vera. Nec est inconveniens, quod voluntas quae praeterita desinet iterum in peccata consentiat propter libertatem ejus. Ratio autem procedit in his, quae agunt ex necessitate naturae.

Ad quartum dicendum, quod triplex est poenitentia. Una privata, et haec potest iterari et frequenter. Alia publica; et haec potest iterari, sed non frequenter. Tertia est solemnis, quae solemniter in Ecclesia injungitur in capite Quadragesimae cum solemnitate quadam, quam ad hoc instituit Ecclesia, et non debet imponi nisi pro peccato quod totam commovit urbem: et talis poenitentia non iteratur, secundum communem Ecclesiae consuetudinem. Non tamen est simile de poenitentia et baptismo, propter quatuor rationes. Una, quia baptismus totaliter dependet a merito passionis Christi, quae non iteratur; in poenitentia autem requiritur meritum proprium. Secunda est, quia baptismus imprimit characterem, non autem poenitentia. Tertia est, quia baptismus est contra peccatum non iterabile, scilicet peccatum originale; poenitentia vero contra peccatum actuale, quod est iterabile. Quarta est, quia baptismus est quaedam generatio; non autem poenitentia, sed spiritualis sanatio.

ARTICULUS V.

Ad quintum sic proceditur. Et 1. videtur, quod opera mortificata per peccatum, per sequentem poenitentiam non vivificentur. Quod enim non est, non potest vivificari: sed opera mortificata non sunt; ergo non possunt vivificari per poenitentiam sequentem.

2. Praeterea, omne quod mortificatur, in fine mortificationis est mortuum: sed opera mortua, scilicet extra charitatem facta, non vivificantur per poenitentiam; ergo nec opera mortificata.

3. Praeterea, sicut per peccatum mortificantur opera meritoria, ita per poenitentiam mortificantur peccata; sed peccata per poenitentiam dimissa non

redeunt iterum, secundum communiorem opinionem; ergo nec opera mortificata iterum reviviscunt.

Sed contra. Super illud Joel. 2: « Reddam vobis annos etc. » dicit Glossa: « Non patiar perire ubertatem, quam cum perturbationibus animi amisistis. » Ubertas autem haec est multitudo bonorum operum; ergo bona opera reviviscunt.

Praeterea, poenitentia omnes defectus revocat ad perfectum, ut dictum est: sed hoc non esset nisi opera mortificata reviviscerent; ergo etc.

Respondeo. Dicendum, quod opus meritorium dicitur esse vivum, quamdiu habet efficaciam suam, scilicet introducendi in vitam aeternam: quam quidem habet non solum quando actu agitur, sed etiam postquam actus transit, et manet in acceptione divinae justitiae; sicut etiam peccatum transit actu, et manet reatu. Et ideo per mortale peccatum sequens, mortificari dicitur opus meritorium, in quantum mortale peccatum est impedimentum gloriae, et per consequens auferit meritorio suam efficaciam. Hoc autem impedimentum per poenitentiam tollitur, et ideo per poenitentiam merita praecedentia suam efficaciam recuperant, et sic vivificari dicuntur.

Ad primum ergo dicendum, quod licet merita praecedentia non sint actu, sunt tamen in acceptione divinae justitiae; et sic efficaciam habent propriam, et dicuntur viva, vel mortificari vel vivificari.

Ad secundum dicendum, quod opera meritoria non dicuntur mortificari quasi eis auferatur virtus merendi; sed quia impedimentum apponitur, ne virtus eorum efficax sit. Sed opera extra charitatem facta dicuntur mortua, quasi omnino virtutem non habentia. Poenitentia autem sequens non dat operibus praecedentibus aliquam virtutem; sed solum impedimentum tollit. Et ideo per poenitentiam vivificantur opera mortificata, non autem mortua.

Ad tertium dicendum, quod poenitentia omnino peccata delet, omnem reatum auferens virtute passionis Christi. Peccatum autem non mortificat opera meritoria quasi ea delendo, sed solummodo impediendo eorum effectum. Et ideo non est simile.

DISTINCTIO XV.

Et sic de praedictis auctoritatibus, etc. (V. edit. nostrae tom. VII, pag. 702.)

QUAESTIO UNICA.

Haec quaeruntur quatuor: 1.^o utrum possit homo Deo satisfacere; 2.^o in quo statu homo satisfacere possit; 3.^o per quae opera satisfactio fiat; 4.^o de partibus satisfactionis.

ARTICULUS I.

Ad primum sic proceditur. Et 1. videtur, quod homo non possit Deo satisfacere. Satisfactio debet aequari offensae: sed offensae in Deum commissa, est infinita, quia offensae accipit quantitatis differentiam ab eo in quem committitur; ergo non potest homo Deo satisfacere.

2. Praeterea, servus, quia totum quod habet, est domini, non potest damno illato domino, satisfacere, quia nihil potest recompensare; cum ergo totum quod habet homo, sit Dei, non potest homo Deo satisfacere.

3. Praeterea, dicit Gregorius: « Factus est dignus

« malo aeterno, qui in se perimit bonum quod poterat esse aeternum. » Sed per minus non potest satisfieri de majori debito; ergo per solutionem cujuscumque rei temporalis, non potest fieri satisfactio de peccato.

Contra. Hieronymus dicit: « Qui dicit Deum homini aliquid impossibile praecepisse, anathema sit: » sed satisfactio est in praecepto: Luc. 5: « Facite fructus dignos poenitentiae; » ergo possibile est Deo satisfacere.

Praeterea, quanto aliquis est misericordior, tanto facilius potest ei fieri satisfactio: sed Deus omni homine est misericordior; ergo facilius potest sibi fieri satisfactio quam alicui homini: sed homo homini satisfacere potest; ergo etc.

Respondeo. Circa hoc sunt tres opiniones. Quidam enim dicunt quod satisfactio condigna debeat aequari offensae. Cum autem offensae divinae ex parte aversionis sit infinita, ex parte conversionis finita; ideo ex parte aversionis Deus gratis offensam remittit, sed ex parte conversionis homo satisfacit. Sed contra hoc est, quod satisfactio non respondet peccato nisi secundum quod est offensae Dei; quod non habet ex parte conversionis, sed solum ex parte aversionis. Alii dicunt quod quantum ad aversionem pro peccato satisfieri potest virtute meriti Christi, quod quodammodo fuit infinitum, cum esset meritum Dei et hominis. Sed contra hoc est, quod etiam si meritum Christi non intervenisset, et alio modo daretur homini gratia, posset utique satisfacere. Sed pro tanto habet haec positio veritatem, quia per fidem mediatoris gratia datur credentibus. Ideo alii dicunt quod satisfactio aequatur offensae, prout est gratia informata, non pro aequivalentia, sed secundum acceptionem divinam; quia Deus ratione gratiae sic eam acceptat, ac si esset offensae aequivalens; et ita ex divina misericordia acceptante habet infinitatem, sicut ex divina maiestate laesa, habet offensae infinitatem. Et sic patet responsio ad primum argumentum.

Ad secundum dicendum, quod non est simile de servo hominis et Dei; quia totum quod habet servus hominis, ita est domini, quod non est servi. Quod autem habet servus Dei, ita est domini, quod etiam servi, propter arbitrii libertatem sibi datam.

Ad tertium de Gregorio, dicendum, quod quamvis meritum hominis per se non sufficeret satisfacere, tamen ipsum eum gratia Dei faciente ut acceptetur in infinitum, potest simpliciter esse causa satisfactionis: et praecipue secundum quod ad hoc juvat meritum Christi.

ARTICULUS II.

Ad secundum sic proceditur. Et 1. videtur, quod non possit de uno peccato sine alio satisfieri. Eorum quae non habent connexionem adinvicem, unum potest auferri sine alio: sed peccata non habent adinvicem connexionem; ergo unum potest per satisfactionem tolli sine altero.

2. Praeterea, videtur quod de peccato dimisso in contritione, possit satisfieri extra charitatem. Dan. 4, dicitur Nabuchodonosor regi: « Peccata tua eleemosynis redime: » sed adhuc ipse peccator erat; ergo potest existens in peccato satisfacere.

3. Praeterea, videtur, quod satisfactio in peccato mortali facta post charitatem valeat. Super illud Numer. 25: « Si attentatus fuerit frater tuus, » dicit

Glossa, quod fructus bonae conversationis debet ei computari ex tempore quo peccavit; ergo redeunt alia opera in computationem Dei.

4. Praeterea, si non reviviscerent, ergo essent iteranda; ergo si ille cui praeceptum est ut vadat ultra mare, ivit, iterum tenetur ire.

Contra. Impossibile est quod aliquis satisfaciat nisi Deo placet: sed nullus illorum in satisfaciendo Deo placet, cum in peccato existat; nullus ergo potest satisfacere.

Respondeo. Dicendum, quod sicut jam apparet, satisfactio non est sufficiens, nisi prout est Deo accepta: accepta autem non est nisi per gratiam: ideo ut sit sufficiens satisfactio, oportet quod sit informata gratia. Gratia autem omni peccato opponitur: ideo homo non potest in mortali existens de alio satisfacere, cum gratia careat, nec de peccato in contritione dimisso si in peccatum incidit, nec cum in peccato satisfactio facta sit, est accepta vel viva post gratiae recuperationem, nec acceptatur nec vivificatur, quia non potest reviviscere quod vita caruit.

Ad primum, eorum quae non habent connexionem, dicendum, quod quamvis non habeant connexionem in essentia, habent tamen in effectu ex parte aversionis ex qua parte habuit peccatum dimitti; et ideo non potest dimitti unum sine altero.

Ad secundum dicendum, quod consilium Danielis intelligitur, quod a peccato cessaret et poeniteret, et sic per eleemosynas satisfaceret.

Ad tertium, quod fructus bonae conversationis, dicendum, quod sic intelligitur ex tempore quo peccavit, idest a tempore quo a peccato cessavit.

Ad quartum, dicendum, quod quamvis non sit absolutus a poena condigna satisfactoria, absolutus tamen est ab ea quae injuncta fuit ab homine: dicitur enim quis obligari ad poenam peccati, uno modo ex ipso peccati reatu; secundo ex praecepto Ecclesiae; quo poenitens ligatur in absolutione. Quamvis autem satisfaciens in mortali juxta praeceptum Ecclesiae a praecepto Ecclesiae se absolvat, non tamen a reatu poenae debitae peccato, absolvitur. Videtur tamen quibusdam circa opera satisfactoria distinguendum. Nam quaedam sunt ex quibus aliqui effectus manent, quasi quaedam opera operata, sicut diminutio substantiae ex relevatione pauperum, vel eleemosynis, manet: et haec in quantum manent, possunt per approbationem ejus, qui ad gratiam redit, satisfactoria fieri, non ratione operis operantis praecedentis, sed sequentis; et ideo haec non oportet iterari. Quaedam vero sunt in quibus non manet aliquid hujusmodi, et ideo sunt totaliter iteranda.

ARTICULUS III.

Ad tertium sic proceditur. Et 1. videtur, quod satisfactio non fiat per opera poenalia. Satisfactio fit per quamdam recompensationem: sed per opera poenalia nulla fit Deo recompensatio, quia non delectatur in poenis nostris; ergo nec satisfactio.

2. Praeterea, quanto opera ex majori charitate fiunt, tanto minus poenalia sunt; ergo quanto ex majori charitate facta, tanto minus essent satisfactoria. Hoc autem est falsum, quia dicitur Luc. 7: « Dimittuntur ei peccata multa, quoniam dilexit multum; » ergo falsum est, quod per opera poenalia semper fiat satisfactio.

3. Praeterea, videtur, quod nec per flagella a

Deo immissa. Satisfactio tantum honorum est: sed hujusmodi flagella inducuntur malis, et praecipue eis debentur; ergo non possunt esse satisfactoria.

Contra. Gregorius dicit: « Justum est ut peccator tanto majora sibi inferat lamenta per poenitentiam, quanto majora delectamenta intulit per culpam. »

Praeterea, Ambrosius dicit: « Et si fides, idest, peccati conscientia desit, poena satisfact; » ergo etiam flagella sunt satisfactoria.

Respondeo. Dicendum, quod cum satisfactio in quadam aequalitate justitiae consistat, oportet quod homo satisfaciendo suppleat quod diminutum fuit in peccato, et diminuat quod in peccato superfluum fuit. In peccato autem homo nimis voluntatem suam sequens, voluntati Dei non se subiecit: et ideo oportet, quod in satisfactione opera poenalia contra voluntatem suam assumat in honorem Dei, vel etiam poenas aliunde illatas, voluntarie sustineat.

Ad primum dicendum, quod quamvis Deus non delectetur in poena ut est poena, tamen in ea delectatur ut est justa. Homo autem honorem, quem Deo subtrahit per offensam, recompensat per poenitentiam.

Ad secundum dicendum, quod sicut difficultas ex parte operis, non ex parte voluntatis ipsius operantis, auget meritum, ita poenalitas illa auget satisfactionem, cum sit in genere operis, non in voluntate operantis: difficultas enim, quae ex impromptitudine voluntatis est, meritum, diminuit, quod augeat contraria facultas.

Ad tertium dicendum, quod quamvis flagella communia sint bonis et malis, quia tamen non sunt satisfactoria nisi prout voluntarie acceptantur, ideo, cum mali ea non voluntarie sustineant, non possunt per ea satisfacere, sicut et boni.

ARTICULUS IV.

Ad quartum sic proceditur. Et 1. videtur, quod inconvenienter enumerentur opera satisfactoria, cum dicitur, quod sunt tria, eleemosyna, jejunium et oratio. Opus satisfactorium est poenale; sed oratio non habet poenam, sed est contra tristitiam poenae medicina. Unde dicitur Jac. 5: « Tristatur aliquis in vobis? oret, et psallat; » ergo non debet computari inter opera satisfactoria.

2. Praeterea, omne peccatum vel est carnale vel spirituale: sed sicut dicit Hieronymus, « Jejunio sanantur pestes corporis, oratione pestes mentis; » ergo non debet esse aliud opus satisfactorium.

3. Praeterea, satisfactio necessaria est ad emendationem peccatorum: sed eleemosyna ab omnibus peccatis emundat: Luc. 11: « Date eleemosynam, et ecce omnia munda sunt vobis; » ergo alia duo superfluent.

4. Contra, videtur, quod debeant esse plura. Quia contraria contrariis curantur: sed multo plura sunt peccatorum genera quam illa; ergo debent plura opera satisfactoria computari.

5. Praeterea, non dimittitur peccatum nisi restituatur ablatum: sed per satisfactionem peccatum dimittitur; ergo restitutio debet poni una pars satisfactionis.

6. Praeterea, multa alia, ut peregrinationes, disciplinae et hujusmodi, consueverunt injungi pro satisfactione; ergo sunt aliae partes satisfactionis.

Respondeo. Dicendum, quod satisfactio debet esse talis, per quam aliquid nobis subtrahamus ad ho-

norem Dei. Nos autem non habemus nisi tria bona: scilicet bona animae, et bona corporis, et bona fortunae. Ex bonis quidem fortunae subtrahimus aliquid nobis per eleemosynam: sed ex bonis corporalibus per jejunium. Ex bonis autem animae, non oportet quod aliquid subtrahamus, quia per ea efficiuntur Deo accepti; sed sufficit ut per ea submittamur Deo totaliter, et hoc fit per orationem. Competit etiam iste numerus ex parte illa, qua satisfactio peccatorum causas excidit; quia radices peccatorum tres ponuntur 1. Joan. 5: scilicet concupiscentia carnis, concupiscentia oculorum, et superbia vitae. Contra concupiscentiam carnis ordinatur jejunium, contra concupiscentiam oculorum, eleemosyna, contra superbiam vitae oratio. Competit etiam quantum ad hoc, quia satisfactionis est peccatorum suggestionibus aditum non indulgere: quia omne peccatum vel in Deum committimus, et contra hoc ordinatur oratio: vel in proximum, et contra hoc est eleemosyna: vel in nos ipsos, et contra hoc est institutum jejunium.

Ad primum, Oratio poenam non habet, dicendum, quod habet afflictionem carnis, quamvis habeat suavitatem spiritus.

Ad secundum de Hieronymo, dicendum, quod loquitur per quamdam appropriationem non proprietatem; et ideo non loquitur de eleemosyna, quia eleemosyna communiter sanat utrumque.

Ad tertium de eleemosyna, dicendum, quod quamvis singula istorum per quamdam convenientiam singulis peccatis approprientur, tamen quolibet eorum, pro quolibet peccato potest quis satisfacere. Unde dicendum, quod loquitur de eleemosyna ordinata, quae incipit a se, quae omnes partes satisfactionis comprehendit.

Ad quartum, Multa sunt peccatorum genera, dicendum, quod verum est; tamen reducuntur ad tres radices jam dictas, vel ad praedicta tria genera peccatorum.

Ad quintum dicendum, quod restitutio est cessatio a peccato: quamdiu enim retinet aliquis rem alienam, ex hoc ipso peccat. Unde restitutio non est satisfactionis pars, sed ad satisfactionem praambulium.

Ad sextum, Multa alia injunguntur etc., dicendum, quod quicquid in proximi utilitatem expenditur, totum eleemosynae rationem habet; et quicquid patriae exhibetur Deo, orationis accipit rationem.

DISTINCTIO XVI.

In perfectione autem poenitentiae etc. (V. edit. nostrae tom. VII, pag. 749)

QUAESTIO UNICA.

Hic quaeruntur quinque: 1.º an contritio, confessio et satisfactio sint partes poenitentiae; 2.º an circumstantia aggravet peccatum in infinitum; 3.º quae circumstantiae sint confitendae; 4.º an aliqua poenitentia exigatur ante baptismum; 5.º qualiter venialia remittantur.

ARTICULUS I.

Ad primum sic proceditur. Et 1. videtur, quod non sint haec tres partes poenitentiae, videlicet

contritio, confessio et satisfactio. Sacramentum enim poenitentiae a ministris Ecclesiae confertur, contritio vero non; ergo non est pars poenitentiae.

2. Praeterea, per sacramentum poenitentiae peccatum remittitur: sed ante confessionem remissum est; ergo confessio non est pars poenitentiae.

3. Praeterea, in sacramento poenitentiae gratia confertur, in satisfactione vero nulla nova gratia confertur; ergo satisfactio non est pars poenitentiae.

4. Praeterea, non est idem fructus rei et pars. Sed satisfactio est dignus poenitentiae fructus, ut habetur in litera; ergo non est pars ejus.

Respondeo. Haec tria nominant actum virtutis. Prius autem non constituitur a posteriori: ideo poenitentiae, ut est virtus, non sunt haec tria partes, sed poenitentiae sacramenti; quia remissio triplicis poenae fit in poenitentia, secundum tria quae sunt in ea. Nam secundum contritionem fit commutatio poenae aeternae in purgatoriam; secundum satisfactionem, fit temporalis poenae absolutio, et per confessionem notificatio culpae Deo per sacerdotem. Et ideo contritio, confessio et satisfactio sunt partes integrales poenitentiae, non quantitativae, eterogeneae vel homogeneae, sed essentiales, sicut materia et forma sunt partes alicujus totius.

Ad primum de ministris, dicendum, quod non oportet, quod sacramentum ministretur ab aliquo secundum totum quod est in sacramento, sed secundum aliquid ejus. In aliis enim sacramentis materia est exterior, quam minister sanctificat, et ad usum applicat; in hoc vero materia est actus hominis; ideo ibi sacramenti ipsius materia adhibetur a ministro, hic autem non.

Ad secundum de confessione, dicendum, quod quamvis dimittatur peccatum ante confessionem in actu, non tamen ante confessionem in proposito.

Ad tertium de satisfactione, dicendum, quod gratiae collationem praecedat quaedam praeparativa satisfactio in proposito, licet non in actu. Vel dicendum, quod per satisfactionem consequitur poenitens perfectum effectum gratiae peccatum abolentis, quia liberatur totaliter a reatu peccati.

Ad quartum dicendum, quod ultimum in quo consummatur res dicitur finis rei, sicut forma habet rationem finis, quamvis sit pars rei. Et quia satisfactio est ultima pars in qua poenitentia consummatur, ideo dicitur fructus, quod in ratione finis sonat.

ARTICULUS II.

Ad secundum sic proceditur. Et 1. videtur, quod circumstantia aggravet peccatum in infinitum. Quia una circumstantia corrumpit virtutem: sed virtus non corrumpitur nisi per peccatum mortale, quod habet quantitatem infinitam; ergo circumstantia addit rationem peccati infinitam, et sic aggravat in infinitum.

2. Praeterea, dicit Augustinus: « Nullum est adeo veniale quin fiat mortale, dum placet: » sed placencia est quaedam circumstantia, et reducitur ad quomodo; ergo circumstantia facit de veniali mortale, et sic aggravat in infinitum.

3. Praeterea, plus distat actus virtutis ab actu peccati mortalis, quam actus venialis peccati a mortali: sed una circumstantia mutata facit de actu virtutis actum peccati mortalis; sicut cognoscere non suam est actus peccati, sed cognoscere suam

potest esse actus virtutis; ergo multo magis facit de veniali mortale; et sic idem quod prius.

Contra. Quantitas accidentalis non excedit quantitatem substantialem: sed quantitas ex circumstantia peccati proveniens est ei accidentalis; cum ergo quantitas peccati venialis sit finita, quantitas ex circumstantia ejus proveniens non erit infinita; ergo non aggravat in infinitum.

Praeterea, quae in infinitum differunt, non conveniunt in genere: sed eorum quae non conveniunt in genere, unum non potest in aliud transmutari, sicut linea in colorem; ergo non potest per circumstantiam actus peccati venialis trahi ad infinitam quantitatem.

Respondeo. Dicendum, quod circumstantia dicitur quaedam proprietas in actu considerata ex his quae circumstant personam, vel factum ipsum: quae quidem dicitur aggravare, in quantum ad malitiam actus addit. Quanto enim aliquid pluribus modis inordinatum est, tanto pejus est. Aliquando vero circumstantia aggravat ad aliam speciem non trahendo, quando per circumstantiam non additur deformitas alterius peccati; sicut si ardenti comestioni etiam tempus indebitum apponatur, semper remanet infra speciem gulae. Cum vero addit deformitatem, quae ad aliam speciem peccati pertinet, tunc dicitur in aliam speciem trahere; sicut si gulosae comestioni addatur, quod fiat contra praeceptum, trahitur in aliam speciem peccati, scilicet inobedientiae. Et tunc si illud peccatum, in cuius speciem transfertur, de suo genere sit mortale, dicitur in infinitum aggravare, sicut in praedicto exemplo patet: alias non: sicut si aliquis diu contineat ut confabulationibus vacet: haec enim circumstantia trahit in aliam speciem, non tamen peccati mortalis. Nunquam vero contingit, quod circumstantia speciem non mutet, et in infinitum aggravet; quia veniale et mortale non sunt secundum eandem speciem moris. Secundum vero, quod in aliam speciem transfert, proprie loquendo, circumstantiae rationem non retinet, quia jam non circumstat, sed intrinseca efficitur. Et ideo id quod est circumstans, potest aggravare in infinitum, non tamen in quantum est circumstantia.

Ad primum. Virtus non corrumpitur nisi per peccatum mortale, dicendum, quod verum est; sed circumstantia quae novam rationem mortalis addit, jam non manet in ratione circumstantiae, quia non tantum auget sed mutat.

Ad secundum dicendum, quod non addit rationem mortalis, nisi in tantum crescat quod adhibeatur ei ut fini, et per consequens supra Deum diligatur: et ita contemptum Dei talis plaecentia addit, quia habet de se specialem rationem peccati; et ideo jam non manet in ratione circumstantiae.

Ad tertium, Circumstantia mutata facit de actu virtutis actum vitii, dicendum, quod talis circumstantia quae haec facit, trahit in aliam speciem, quae jam rationem circumstantiae, in quantum hujusmodi, amittit.

ARTICULUS III.

Ad tertium sic proceditur. Et 1. videtur, quod omnis circumstantia sit confitenda. Gen. 19 praecipitur Loth de Sodomis exeunti ne moretur in omni regione circa, sed penitus de Sodomis, id est de peccato per confessionem exeat; ergo non so-

lum peccatum, sed omnis circumstantia peccati confiteri debet.

2. Praeterea, secundum quantitatem peccati debet injungi satisfactio. Cum igitur circumstantia variet quantitatem peccati, est confitenda pro satisfactionis injunctione.

3. Praeterea, confessio debet contritioni respondere: sed homo debet de singulis circumstantiis conteri, ut litera Augustini dicit; ergo et confiteri.

Contra. Secundum Philosophum, delectabile carnis, quanto magis in particulari consideratur, tanto magis appetitum movet: sed homo debet fugere appetitum talis delectationis; 1 Cor. 6: « Fugite « fornicationem; » ergo videtur quod peccatorum carnalium non sint omnes circumstantiae confitendae.

Praeterea, ex circumstantiis recitatis aliquando alicujus personae peccatum innotescit: sed homo in confessione se debet accusare, non alterum infamare; ergo videtur quod non debeamus omnes circumstantias confiteri.

Respondeo, quod peccatum mortale necessario est confitendum: ideo circumstantia quae novam rationem peccati mortalis addit, de necessitate est confitenda, alia autem non.

Ad primum, quod debet exire de omnibus, dicendum, quod verum est; tamen non oportet quod semper per confessionem, sed sufficit quod alio modo, scilicet per intrinsecam contritionem.

Ad secundum, de satisfactione recipienda, dicendum, quod determinata quantitas peccati non potest sacerdoti innotesci, quia nec ipse peccator scit: unde sufficit quod cognoscat quantitatem quae ex nova specie consurgit. Vel dicendum, quod si cognosceret, non tamen tenetur confiteri; quia tantum peccatum mortale, est de necessitate confitendum.

Ad tertium, de Augustino, dicendum, quod de circumstantiis quae peccati speciem mutant, oportet quod quis doleat ad peccati dimissionem, de aliis autem singulis sufficit quod in generali; non tamen necessitatis est, quod de eis doleat ut peccatum dimittatur. Sed quia probatur per duo alia argumenta quod non sint confitendae, respondendum est ad ea. Circumstantiae peccati carnalis movent appetitum, dicendum, quod in confessione confitenti et confessori datur gratia ne in eorum appetitus deducantur.

Ad quintum, ex circumstantiis recitatis, dicendum, quod si talis circumstantia non trahit in aliud genus mortalis, non est confitenda. Si autem trahat sic, quia magis aliquis debet suam purgare conscientiam quam famam alterius custodire: ita tamen caute, ut quantum fieri potest in speciali lateat, etsi in generali dicatur.

ARTICULUS IV.

Ad quartum sic proceditur. Et 1. videtur, quod non exigatur aliqua poenitentia ante baptismum. Rom. 11: « Sine poenitentia sunt dona Dei, » Glossa, « Gratia Dei in baptismo non requirit gemitum, nec « planctum, neque aliquid hujusmodi, sed omnia « gratis condonat; » ergo non praexigitur poenitentia ante baptismum.

2. Praeterea, baptismus sufficit delere omnem culpam et poenam; ergo non requirit aliud adiutorium poenitentiae.

3. Praeterea, secundum non debet praecedere

primum; ergo poenitentia, cum sit secunda tabula, baptismum, cum sit prima tabula, non praecedat.

Contra. Qui accedit fictus non suscipit baptismi effectum: omnis autem impoenitens fictus accedit; ergo etc.

Praeterea, Act. 2 dicitur: • Agite poenitentiam, et baptizetur unusquisque vestrum, • Glossa: • Dicitur de baptizate, praemisit lamenta poenitentiae; • ergo poenitentia debet praecedere baptismum.

Respondeo. Poenitentia dupliciter accipitur: vel ut sacramentum officio ministrorum dispensata, et sic sequitur baptismum: aut ut est virtus, et sic dupliciter accipitur. Aut enim ut est virtus formata, et sic non requiritur quod de necessitate baptismum praecedat, sed quasi per baptismum causata, quia sic virtute baptismi nunquam culpa actualis adulto remitteretur, cum jam esset remissa. Vel ut informis virtus, id est, quaedam peccati detestatio, quamvis non omnino sufficiens; et sic requiritur ut causa removens prohibens, sed defectus ejus suppletur in baptismo. Ratio autem quare requiratur, haec est: quia voluntas semel fixa in peccato, semper manet in eo fixa actu vel habitu, nisi per actualem detestationem avellatur ab eo: voluntas autem fixa in peccato non est subjectum susceptibile gratiae.

Ad primum de illa Glossa quae est Ambrosii, dicendum, quod loquitur de gemitu et planctu satisfactionis exterioris, non interioris.

Ad secundum, Baptismus sufficit, dicendum, quod sufficit quantum est de se, dummodo inveniat dispositum susceptibile.

Ad tertium de prima tabula, dicendum, quod non praexigitur ut tabula, sed ut virtus informis, disponens ad gratiae susceptionem.

ARTICULUS V.

Ad quintum sic proceditur. Et 1. videtur, quod veniale possit remitti sine contritione aliqua: quia dicit Augustinus: • Quod facit gutta aquae in camino ignis, hoc veniale in viro justo; • ergo statim remittitur solo fervore charitatis sine contritione aliqua.

2. Praeterea, per benedictionem episcopalem et aquam benedictam et multa alia dicuntur remitti venialia; ergo sine contritione.

3. Praeterea, minima contritio sufficit tollere omnia mortalia; ergo, cum distantia infinita sit inter veniale et mortale, nulla contritio requiritur ad tollenda venialia.

Contra. Contraria contrariis eurrantur; ergo ad tollendam culpam delectationis venialis, requiritur dolor ei contrarius.

Praeterea, sicut intrinsecus peccatum committitur, sic et deletur: sed non per gratiae infusionem intrinsecam; ergo per motum gratiae intrinsecum; et sic per motum contritionis tollitur veniale, qui est motus gratiae.

Respondeo. Peccatum voluntarium non dimittitur sine hoc, quod voluntas ipsum peccatum detestetur; ideoque ad omnis voluntarii peccati remissionem, requiritur voluntatis a peccato aversio. Sed hoc dupliciter potest esse. Quaedam enim sunt voluntaria omnino, ut mortalia; et in his requiritur aversio voluntatis ab eis in speciali: quaedam non, ut venialia; et in his sufficit in generali, et quasi implicite.

Ad primum de gutta aquae, dicendum, quod in

ferventi motu charitatis est culpae venialis detestatio implicita; quia si cogitaret tunc de eo, detestaretur illud, ideo per talem motum remittitur veniale.

Ad secundum de benedictione episcopali, dicendum, quod haec specialiter dicuntur remittere, non quia remittant per se, sed quia haec sunt excitativa fervoris, per quem fit remissio.

Ad tertium de mortali et veniali, dicendum, quod ex parte aversionis in infinitum distant; et ideo ad venialis remissionem nova gratia non requiritur, quia ei non contrariatur. Requiritur tamen aliquis novus motus voluntatis informatae gratiae; quia etsi gratiam non impedit, tamen motum gratiae retardat; et ideo motui gratiae, sed non gratiae, opponitur.

DISTINCTIO XVII.

Hic oritur quaestio etc. (V. edit. nostrae tom. VII, pag. 768.)

Hic est triplex quaestio. Prima de justificatione impii. Secunda de contritione. Tertia de confessione.

QUAESTIO I.

Circa primum quaeruntur duo: 1.º quae requirantur ad justificationem impii; 2.º de ordine eorum.

ARTICULUS I.

Ad primum sic proceditur. Et 1. videtur, quod gratiae infusio non exigatur ad justificationem impii. Secundum Augustinum, majus est justificare impium quam creare caelum et terram: in creatione vero nullum medium requiritur; ergo nec in justificatione.

2. Praeterea, videtur, quod non sit necessarius motus liberi arbitrii in Deum. Deus Salomoni dormienti infudit sapientiam, 5 Reg. 6; ergo non requiritur motus liberi arbitrii ad infusionem sapientiae; ergo nec ad infusionem gratiae.

3. Praeterea, videtur quod nec requiratur contritio. Luc. 7 dicitur: • Remittuntur ei peccata etc. • Glossa. • Ardor charitatis in ea rubiginem peccatorum consumpsit; • ergo per viam amoris de bono, non doloris de peccato, justificata fuit.

4. Praeterea, videtur quod nec remissio culpae. Effectus enim non connumeratur suae causae; ergo nec infusio gratiae causa est remissionis culpae; ergo etc.

Contra. In illo verbo Psalm. 59: • Commovisti terram, • notantur haec quatuor. Primo gratiae infusio, cum dicitur, commovisti terram. Secundo, contritio, cum subjungitur, conturbasti eam. Tertio, peccati remissio, cum additur, sana contritiones ejus. Quarto, motus liberi arbitrii in Deum, cum additur, quia mota est.

Respondeo. Dicendum, quod sicut in mutationibus naturalibus actus activorum non sunt nisi in agente et patiente, sic etiam in moralibus. In qualibet quippe mutatione ex parte agentis fit alicujus formae repulsio, et alterius introductio. In patiente vero requiritur duplex dispositio. Una ad expulsionem unius formae, altera ad introductionem alterius. Secundum hoc in mutatione justificationis

imp̄i concurrunt quatuor: duo ex parte agentis, scilicet gratiae infusio, et culpae expulsio; alia duo ex parte suscipientis, scilicet motus liberi arbitrii in Deum, et contritio de peccato.

Ad primum de gratia, dicendum, quod non est simile: quia creatio nihil supponit, ideo in ea non potest aliquid cadere medium: sed justificatio aliquid praesupponit. Vel dicendum, quod sicut in creatione est forma naturalis, qua res creata esse formaliter incipit; ita et in creatione est forma gratuita, sive supernaturalis, qua res creata incipit bene esse, scilicet secundum esse gratiae.

Ad secundum dicendum, quod non est simile; quia sapientia magis respicit intellectum quam affectum: gratia vero e converso. Unde cum intellectus cogi possit, affectus vero non, ideo non requiritur ad sapientiam voluntaria dispositio, sicut ad gratiam.

Ad tertium dicendum, quod illa consumptio intelligitur quo ad reliquias culpae, non quo ad culpam. Vel dicendum, quod fervor charitatis semper habet secum odium contrarii.

Ad quartum de causa, dicendum, quod hoc verum est in causa et effectu universaliter se consequentibus, sicut praesentia solis et illuminatio aeris: sed non sic se habet remissio culpae et infusio gratiae, cum in statu innocentiae fuisset gratiae infusio sine remissione culpae.

ARTICULUS II.

Ad secundum sic proceditur. Et 1. videtur, quod remissio culpae praecedat infusionem gratiae. In omni enim motu recessus a termino a quo, praecedit accessum ad terminum ad quem, vel tempore, ut in motu successivo; vel natura, ut in mutatione subita. Culpae autem remissio dicit recessum a termino a quo, gratiae infusio accessum ad terminum ad quem; ergo etc.

Contra. Causa est prior effectu, gratia vero remittit culpam: ergo etc.

Praeterea, videtur quod motus liberi arbitrii praecedat gratiae infusionem: quia motus liberi arbitrii est dispositio ad gratiam: dispositio vero naturaliter praecedit formam.

Contra. Motus liberi arbitrii non est meritorius, nisi gratia informatus; ergo gratia praecedit.

Praeterea, videtur quod contritio praecedat motum liberi arbitrii. Prius enim est declinare a malo quam facere bonum; ergo contritio de peccato praecedit motum liberi arbitrii in Deum.

Contra. Causa motus liberi arbitrii est motus fidei; motus contritionis est motus poenitentiae: fides autem praecedit poenitentiam; ergo etc.

Praeterea, videtur quod culpae remissio praecedat contritionem. Contritio est actus virtutis, actus virtutis non egreditur nisi a potentia purgata; ergo praecedit purgata potentia; et sic culpae remissio praecedit contritionem.

Contra. Si contritio non praecedit; ergo adultus justificatur non per contritionem.

Respondeo. Dicendum, quod in justificatione imp̄i, haec quatuor, scilicet motus liberi arbitrii, contritio, infusio gratiae, et remissio culpae, simul sunt tempore; sicut in naturalibus dispositio, quae est necessitas materiae, formae introductio, et alterius expulsio: non tamen simul natura. Nam prioritas et posteritas secundum ordinem naturae ad

ordinem causae et causati aliquo modo reducuntur, quia principium et causa idem sunt secundum Philosophum. Unde secundum diversum genus causae unum istorum prius est alia, et e converso; sicut dispositio, quae est necessitas materiae, est causa materialis formae, forma vero causa formalis necessitatis materiae. Et hoc modo potest dici quod motus liberi arbitrii et contritio sunt priora aliis duobus in genere causae materialis; alia vero duo, scilicet gratiae infusio et culpae expulsio, sunt his priora in genere causae formalis. Et iterum a parte dispositionum prior est contritio, quae removet prohibens, in genere causae materialis; sed motus liberi arbitrii in genere causae formalis. Similiter ex parte formarum prior est culpae remissio in genere causae materialis; sed gratiae infusio prior est in genere causae formalis; quia culpae remissio est dispositio ad gratiae infusionem. Quia vero agens generat simile sibi in forma, et natura principaliter intendit introductionem formae; ideo secundum ordinem causae formalis, est ordo secundum agentem et finalem. Et per hoc patet solutio ad objecta.

QUAESTIO II.

Circa secundum quaeruntur duo: 1.º utrum de quolibet peccato debeat homo confiteri; 2.º de quantitate contritionis.

ARTICULUS I.

Ad primum sic proceditur. Et 1. videtur, quod non requiratur contritio specialis de singulis peccatis. Quia simul fit in eodem instanti de singulis peccatis justificatio: simul enim et in eodem instanti non potest haberi de omnibus contritio specialis; ergo ad justificationem non requiritur specialis contritio.

2. Praeterea si requiritur specialis: aut ergo sufficiens de quolibet, aut non. Si sufficiens; ergo ad primam contritionem ante alias fit justificatio. Si non; ergo per contritionem insufficientem fit justificatio.

3. Praeterea, contritio est de peccato in quantum est Dei offensa; ergo in ratione generali, non in speciali singulorum.

Contra. Psal. 6 dicitur: « Lavabo per singulas noctes lectum meum, » Glossa « per singula peccata conscientiam; » ergo requiritur specialis contritio de singulis.

Praeterea, requiritur singulorum confessio specialis; ergo et contritio.

Respondeo. Dicendum, quod contraria contrariis curantur. Ideo sicut in quolibet peccato mortali est actualis aversio voluntatis a Deo ad peccatum, ita oportet quod in remissione peccati mortalis sit actualis conversio a peccato ad Deum. Haec autem conversio appellatur contritio. Aversio enim voluntatis manentis in peccato non tollitur nisi per voluntatis fractionem omnimodam quae appellatur contritio. Non tamen oportet quod in ipso instanti quo quis justificatur, conteratur de omnibus peccatis in speciali, quia hoc est impossibile; sed sufficit tunc in generali, in speciali vero ante vel post.

Ad primum, Simul fit, dicendum, quod quamvis simul fiat justificatio, tamen successive fit praeparatio ad justificationem; et ideo in sui principio oportet quod sit singillatim de omnibus: sed in sui fine, cum est gratia informatam, est simul; et sic

est de his quae requiruntur ad justificationem impii.

Ad secundum, aut est sufficiens aut non, dicendum, quod requiritur sufficiens de omnibus generalibus ad justificationem, secundum quam remittuntur peccata; sed quamvis ad praeparationem in principio possit esse sufficiens, non tamen per eam remittuntur peccata.

ARTICULUS II.

Ad secundum sic proceditur. Et 1. videtur, quod contritio sit maximus dolor qui possit esse. Jeremiae enim 6 dicitur: « Luctum unigeniti etc. » Glossa: « Docet poenitentem quid debeat facere: « nihil enim dolentius morte unigeniti »; ergo requiritur dolor maximus.

2. Praeterea, quantus est amor conjunctionis, tantus est dolor separationis. Sed anima magis debet diligere conjungi Deo, quam proprio corpori; ergo magis debet dolere de ejus separatione.

Contra. Minimus dolor cum gratia sufficit ad salutem; ergo non requiritur maximus.

Praeterea, omnis dolor, qui est subjecti corruptivus, est immoderatus; sed si requireretur major vel aequalis dolor mortis, esset subjecti corruptivus; ergo etc.

Praeterea, videtur, quod non requiratur maximus secundum durationem. Non oportet hominem semper in confessione vel satisfactione exteriori durare; ergo a simili, nec in contritione seu interiori dolore; ergo etc.

Respondeo. Dicendum, quod in contritione duplex est dolor: unus in voluntate, qui non est aliud quam displicentia peccati, et in hoc consistit essentia contritionis. Alius in sensualitate, qui causatur ex primo dolore, vel secundum necessitatem naturae ex motu superiorum virium quae sequuntur inferiores, vel secundum electionem, prout voluntas excitat dolorem in illis. Primus ergo dolor, secundum intensionem debet esse maximus in genere, scilicet comparatione aliorum dolorum; quia quanto aliquid debet magis placere, tanto ejus oppositum debet magis displicere. Non tamen oportet quod sit maximum in specie hujus doloris; sicut quilibet amor charitatis est maximus in genere, sed non in sua specie. Secundum vero durationem oportet quod sit maximus, quia per totum tempus praesentis vitae in habitu, sed non in actu. In actu vero sufficit quod sit, quando homo recordatur. Unde Hugo « Deus, inquit, quando « absolvit hominem a vinculo peccati, ligat eum vinculo perpetuae detestationis. » Secundus vero dolor non oportet quod sit maximus intensive; tum quia vires inferiores magis moventur ex apprehensione objectorum propriorum, quam ex redundantia superiorum virium; tum quia non requiritur ad contritionem de necessitate, sed de perfectione: nec extensive, ne si nimis duret, homo in desperationem labatur.

Ad primum in contrarium, minimus dolor, dicendum, quamvis sufficiat minimus dolor in genere doloris spiritualis in contritione, dolor tamen maximus est respectu aliorum dolorum.

Ad secundum dicendum, quod dolor ille spiritualis non est corruptivus subjecti, sed dolor sensibilis: est enim primus dolor in parte animae incorruptibilis.

Ad tertium dicendum, quod in electione volun-

tatis committitur peccatum, sed sine ea nec in ore committitur; et ideo oportet quod semper sit detestatio peccati in voluntate ne assentiatur peccato et ita non sit in opere vel sermone; et propter hoc contritio debet esse perpetua, non autem satisfactio et confessio.

QUAESTIO III.

Circa tertium quaeruntur duo: 1.^o utrum omnes ad confessionem teneantur; 2.^o cui sit confessio facienda.

ARTICULUS I.

Ad primum sic proceditur. Et 1. videtur, quod non teneamur omnes ad confessionem. Quia quilibet debet celare et non prodere crimen proximi sui: sed magis debet diligere se quam proximum; ergo magis celare crimen suum.

2. Praeterea, Petrus et Magdalena et alii plures leguntur justificati sine confessione; ergo non est necessaria ad justificationem.

3. Praeterea, confessio fit ad taxandum poenitentiam pro culpa: sed homo posset sufficienter sibi taxare poenam pro culpa; ergo nec oportet alteri confiteri.

Contra. Boetius in lib. de Consolatione ait: « Si « operam medicantis expectas, oportet quod vulnus « detegas; » ergo ad sanationem spiritualis vulneris detectio est necessaria; ergo et confessio.

Praeterea, poenitentiae condistinctae adinvicem partes sunt confessio, contritio et satisfactio: sed omnes tenentur ad satisfactionem et contritionem; ergo et ad confessionem.

Respondeo. Ad confessionem dupliciter obligamur. Uno modo ex jure divino, ex hoc ipso quod est medicina; et secundum hoc non omnes tenentur ad confessionem, sed illi tantum qui post baptismum peccatum mortale incurrunt. Alio modo ex praecepto juris positivi; et sic tenentur omnes ex praecepto Ecclesiae edito in concilio generali sub Innocentio III. Quia quamvis homo post baptismum naufragium mortale evadere possit, tamen veniale, quod est dispositio ad mortale, non potest evadere; et contra illud etiam poenitentia ordinatur; et ideo manet poenitentiae locus etiam in his qui non mortaliter peccant, et per consequens confessionis. Secundum tamen alios, non oportet quod de veniali quis confiteatur; sed ut se sacerdoti repraesentet et ostendat se esse absque conscientia mortalis.

Ad primum de crimine proximi, dicendum, quod sicut crimen proximi non debemus prodere nisi ei qui vult et potest prodere, ita nec nostrum.

Ad secundum de Petro, dicendum, quod privilegia specialia non faciunt legem communem. Vel dicendum, quod multa facta sunt quae non sunt scripta: unde potest esse quod confessi fuerint peccata, quamvis non sit scriptum.

Ad tertium dicendum, quod magis est ordinatum judicari ab altero quam a seipso. Vel dicendum, quod in judicio proprio posset esse periculum, cum homo nimis sit propitius sibiipso.

ARTICULUS II.

Ad secundum sic proceditur. Et 1. videtur, quod sufficiat confiteri laico. Quia non obligamur ad confitendum nisi ex institutione divina: sed institutio divina non facit mentionem de sacerdote. Jac. 5: « Confitemini alterutrum peccata vestra; » ergo non est necesse confiteri sacerdoti.

2. Praeterea, videtur, quod nec sacerdoti proprio. Ad quod enim determinate tenemur, non est in nostra electione. Sed Augustinus dicit: « Qui confiteri vult, quaerat sacerdotem, qui sciat ligare et solvere; » ergo licet confessorem sibi eligere.

3. Praeterea, aliqui sunt qui non habent proprios sacerdotes, ut praelati; ergo vel non tenentur confiteri, vel non est necesse confiteri proprio sacerdoti.

Contra. Secundum jura, nullus debet alterius subditum ligare vel solvere; ergo nec debet ejus confessionem audire.

Praeterea, soli sacerdotes cum ordinantur accipiunt claves; ergo soli habent potestatem ligandi et absolvendi; ergo eis solum debet confessio fieri et non laicis.

Respondeo. Ad effectum aliquem duo requiruntur: scilicet potentia activa in agente et materia debita in suscipiente. Ideo ad effectum ligandi et solvendi, requiritur et potestas clavium quae datur in ordine, et materia debita, scilicet subditus qui habetur ex jurisdictione. Unde oportet confiteri sacerdoti, et non nisi proprio. Sed proprius sacerdos duplex est. Vel ex jurisdictione ordinaria, sicut parochialis sacerdos, vel episcopus, vel Papa: vel ex jurisdictione delegata, sicut ille cui committit potestatem audiendi aliquis horum trium, vel etiam delegatus domini Papae.

Ad primum dicendum, quod Jacobus praesupponit quod illis sit confessio facienda, quibus data est potestas ligandi et solvendi a Christo, scilicet sacerdotibus.

Ad secundum de Augustino, dicendum, quod hoc intelligitur de licentia data a sacerdote proprio.

Ad tertium dicendum de praelatis, quod concessum est talibus a jure confessores eligere; illi vero quos eligunt in hoc casu, superiores eis sunt, quamvis non simpliciter; sicut medicus ab altero medico curatur, non in quantum medicus, sed in quantum infirmus.

DISTINCTIO XVIII.

Hic quaeri solet etc. (V. edit. nostrae tom. VII, pag. 803.)

Hic est duplex quaestio. Primo de clavibus. Secundo de effectu clavium.

QUAESTIO I.

Circa primum quaeruntur duo: 1.º an Ecclesiae datae sint claves regni caelorum; 2.º de effectu clavium.

ARTICULUS I.

Ad primum sic proceditur. Et 1. videtur, quod non sint claves datae Ecclesiae. Frustra dantur claves ad aperiendum ostium, quod semper est apertum: sed ostium regni caelorum a passione Do-
S. Th. Opera omnia. V. 22.

mini semper est apertum. Apoc 3: « Vidi ostium apertum in caelo; » ergo frustra datae sunt claves Ecclesiae ad aperiendum ostium regni caelorum.

2. Praeterea, cuiuscunque aperitur caelum, clauditur infernus et e converso: sed Ecclesia non dicitur habere claves inferni; ergo nec caelorum.

3. Praeterea, majus est introduci in gloriam quam in gratiam; ergo cum solus Deus habeat claves introducendi ad gratiam, multo magis ipse solus habet claves introducendi in gloriam.

4. Praeterea, multi habent scientiae donum, qui nec sibi nec aliis possunt regni caelestis aditum aperire; ergo ad minus scientia non est clavis regni caelorum.

Contra. Dictum est Petro, et in Petro caeteris ejus successoribus. Matth. 26: « Tibi dabo claves regni caelorum; » ergo Ecclesia in praelatis suis vere habet claves etc.

Praeterea, omnis dispensator debet habere claves eorum quae dispensat: sed ministri Ecclesiae sunt dispensatores divinarum, 1 Corinth. 4: « Sic nos existimet homo ut ministros Christi et dispensatores misteriorum Dei; » ergo debet habere claves.

Respondeo. Dicendum, quod clavis metaphorice accipitur hic. Sicut enim illud quo auferitur obstaculum introitus in domum dicitur esse clavis in corporalibus, sic in spiritualibus potestas qua auferitur peccatum, quod est obstaculum introitus in regnum caelorum, dicitur esse clavis. Haec autem potestas est triplex: quaedam auctoritatis, quae est in solo Deo qui remittit peccatum per gratiae infusionem. Quaedam excellentiae in Christo qui peccatum remittit per meritum passionis. Altera ministerii in praelatis Ecclesiae, qui peccatum remittunt per ministerium sacramentorum. Quia enim nullus sibi aperire valet; ideo commissum est ministerium remittendi peccata, quo regnum caelorum aperitur, Ecclesiae ministris. Sed quia remissio peccati non debet impendi nisi dignis; ideo hunc actum praecedat actus alius, qui est discernere inter dignos et indignos peccati remissionis. Et secundum hunc duplicem actum, duplex est in Ecclesia clavis, non distincta in essentia potestatis, sed ex comparatione ad actus distinctos: sicut in iudice una est potestas judicandi, quae includit duplicem actum discernendi in causae examinatione, et absolvendi et ligandi per sententiae condemnationem. Ad primum autem actum ordinantur clavis scientiae, ad secundum clavis potestatis.

Ad primum dicendum, quod Christus in passione removit clausuram primam generalem, quae fuit per peccati originalis traductionem; sed tamen quilibet adhuc sibi procurare potest clausuram particularem quae est per peccati mortalis propriam commissionem.

Ad secundum de inferno, dicendum, quod Ecclesia habet easdem claves caeli et inferni; sed dominantur a fine principali et digniori.

Ad tertium dicendum, quod solus Deus ad gratiam et ad gloriam introducit per modum agentis principalis; sed tamen minister sacramentorum introducit ad utrumque per modum agentis instrumentalis.

Ad quartum dicendum, quod scientia dupliciter accipitur. Uno modo habitus cognitionis; altero modo, auctoritas discernendi. Primo modo non est clavis, quamvis hoc Magister sentire videatur. Secundo modo sic.

Ad secundum sic proceditur. Et 1. videtur, quod nullo modo potestas clavium se extendat ad remissionem culpae. Matth. 9 dicitur: « Quis potest dimittere peccata nisi solus Deus? » Et hoc idem ostenditur ex multis auctoritatibus. Ergo potestas clavium nihil operatur ad remissionem culpae.

2. Praeterea, Hieronymus dicit in litera, quod « in absolvendis peccatis idem operatur sacerdos Evangelicus, quod olim sacerdos legalis in leprosis mundandis: » sed iste tantummodo ostendebat munditiam, nullo modo efficiebat; ergo etc.

3. Praeterea, virtus finita non potest in infinitum: culpa vero mortalis et poena aeterna est quodammodo infinita; ergo etc.

4. Praeterea, videtur, quod nec extendat se ad remissionem poenae temporalis; quia post absolutionem remanet poenitens ligatus ad poenam temporalem in purgatorio, vel in hoc mundo faciendam; ergo etc.

Contra. Dixit Jesus discipulis suis, Joan. 20: « Quorum remiseritis peccata, remittuntur eis; » ergo possunt peccata remittere.

Praeterea, si nihil dimittit de culpa nec de poena ejus, absolutio nihil prodest, quod est falsum; ergo etc.

Respondeo. Dicendum, quod ad aliquid operatur virtus clavium dispositive et ad aliquid effective. Dispositive quidem ad remissionem culpae et poenae aeternae: quia sicut per quodlibet sacramentum novae legis disponitur quis ad gratiam, ita virtute clavium in poenitentia poenitens. Unde si aliquis insufficienter ad gratiam suscipiendam disponeretur, in ipsa confessione et sacramentali absolutione disponeretur et gratiam susciperet, nisi obicem poneret. Si autem prius sufficienter fuisset dispositus et gratiam obtinisset, in poenitentia virtute clavium copiosius munus gratiae reciperet; sicut in baptismo quis recipit gratiam si ei obicem non ponit cum ante non receperit, et si recipit copiosorem recipit. Operatur autem virtus clavium effective ad remissionem alicujus partis poenae purgatoriae, quia in absolutione relaxantur; et secundum hoc sacerdos dicitur ligare et solvere, quia aliquid de poena temporali remittit et ad residuum poenae obligat determinatam poenam taxando, qui tamen in communi poenae debitor erat.

Ad primum Matth. 9, dicendum, quod loquitur de remissione per modum auctoritatis, non per modum ministerii.

Ad secundum de Hieronymo, dicendum, quod idem operatur et plus. Nam ille ostendebat signo, hic facto. Vel secundum quosdam, dicendum, quod habebat presbyter legalis virtutem mundandi a lepra corporali.

Ad tertium dicendum, quod finitum non potest agere in infinitum, ut agens principale; sed ut instrumentum principalis agentis infiniti sic potest.

Ad quartum de poena remanente, dicendum, quod remanet, sed diminuta virtute clavium quae operatur ex superabundanti merito Christi, quod est annexum virtuti sacramentorum.

QUAESTIO II.

Circa secundum tria quaeruntur: 1.º an excommunicatio debeat fieri in Ecclesia; 2.º quis possit

excommunicare; 3.º de communicatione cum excommunicatis.

ARTICULUS I.

Ad primum sic proceditur. Et 1. videtur, quod nullus debeat ab Ecclesia excommunicari. Communio enim suffragiorum Ecclesiae nulli potest auferri justo et a nullo injusto potest haberi; ergo nullus ab ea potest separari; ergo nec excommunicari.

2. Praeterea, in canonica Judae dicitur, quod Michael diabolum noluit maledicere vel excommunicare; ergo multo minus homo hominem debet maledicere vel excommunicare.

3. Praeterea, non debet poena excedere culpam; ergo pro temporali damno vel injuria non debet quis excommunicari.

Contra, 1 Cor. 5, Apostolus mandat Corinthium excommunicari; ergo etc.

Praeterea, Dominus praecepit incorrigibilem, sicut ethnicum et publicanum haberi, Matth. 18; ergo debet excommunicari.

Respondeo. Dicendum, quod iudicium Ecclesiae conforme debet esse iudicio Dei. Deus autem multipliciter peccatores punit, ut ad bonum eos trahat: uno modo flagella immittendo, alio modo hominem sibi relinquendo, ut auxiliis subtractis quibus impediatur a malo, suam infirmitatem cognoscat, et humilis ad Deum redeat a quo superbus recessit: et quantum ad utrumque Ecclesia in excommunicationis sententia divinum iudicium imitatur: in quantum enim a communione fidelium separat, imitatur divinum iudicium, quo per flagella castigat: in quantum autem a suffragiis et aliis spiritualibus separat, imitatur divinum iudicium, quo hominem sibi relinquit, ut per humilitatem seipsum cognoscens ad Deum redeat.

Ad primum de suffragiis, dicendum, quod duplex est communio Ecclesiae: quaedam interior per charitatem, quaedam exterior per ecclesiasticam unitatem; ex qua contingit quod Ecclesia intentionem suam dirigit ad omnia membra sibi unita. Prima non potest auferri justo, nec tradi injusto. Secunda vero potest. Ab hac vero fit separatio per excommunicationem, non a prima.

Ad secundum dicendum, quod non est simile de Michaele; quia diabolus est incorrigibilis, homo autem non.

Ad tertium dicendum, quod in damno temporali est ipsum exterius nocendum et est peccatum nocentis. Propter primum non excluditur quis a sacramentis, sed propter secundum: Nec tamen propter secundum semper, quia a levioribus poenis est incipiendum et ad graviores perveniendum. Excommunicatio vero gravissima poena est. Unde etiam pro peccato mortali in instanti non debet infligi, sed propter ejus incorrigibilitatem, idest pro contumacia: quae tripliciter contingit. Aut quando non venit quis ad iudicium vocatus, aut antequam debet discedit, aut stans sententiae non obedit.

ARTICULUS II.

Ad secundum sic proceditur. Et 1. videtur, quod quilibet sacerdos possit excommunicare subditum suum; quia quilibet habet claves; actus vero clavium est excommunicare; ergo etc.

2. Praeterea, majus est solvere et ligare in foro poenitentiae, quam in foro iudicii; ergo, cum sacerdos possit primum, multo magis potest secundum.

3. Praeterea, videtur, quod suspensus et excommunicatus possit excommunicare et absolvere, quia retinet ordinem et jurisdictionem. Plus vero non requiritur ad utrumque actum; ergo etc.

Contra. Ligatus non potest alterum solvere vel ligare: tales vero ligati sunt; ergo etc.

Praeterea, majores poenas infligere majorum est iudicium non minorum. Excommunicatio vero maxima poena est; ergo etc.

Respondeo. Excommunicatio sequitur jurisdictionem in foro iudiciali; et ideo quicumque jurisdictionem habent ordinariam sive delegatam, possunt de jure excommunicare. Alii vero inferiores sacerdotes non nisi in casibus sibi concessis vel a jure vel a consuetudine vel ab homine. Suspensus autem et excommunicatus quamvis hanc jurisdictionem habeat, quia tamen habet eam ligatam, non potest excommunicare.

Ad primum, Actus clavium, dicendum, quod verum est, accidentaliter non essentialiter.

Ad secundum dicendum, quod quamvis sit majus, non tamen tanta solemnitas requiritur; quia ubi nulli fit praejudicium, hoc fieri potest de facili.

Ad tertium dicendum, quod quamvis habeat potestatem jurisdictionis, non tamen executionem. Illa namque sicut ab homine datur, sic tollitur et ligatur.

ARTICULUS III.

Ad tertium sic proceditur. Et 1. videtur, quod semper sit peccatum mortale excommunicato communicare. Secundum jura pro tali participatione, si non desistant, possunt homines participantes majori excommunicatione excommunicari: sed nullus debet excommunicari nisi pro peccato mortali; ergo etc.

2. Praeterea, Innocentius III dicit, quod « pro metu mortis non debet homo excommunicato communicare, quia magis debet homo omne peccatum subire, quam mortaliter peccare; » ergo excommunicato communicare est peccatum mortale.

3. Praeterea, qui excommunicato scienter communicat, praeceptum Ecclesiae contemnit; ergo peccat mortaliter.

Contra. Pauci sunt qui hoc observent: durum est autem tantam multitudinem condemnare; ergo etc.

Praeterea, nullus potest absolvere a mortali, nisi habeat jurisdictionem super absolvendum: sed potest absolvere a participatione excommunicationis quilibet sacerdos; ergo non est peccatum mortale.

Respondeo. Quidam dicunt quod aliquis participans excommunicato in verbo vel quocumque alio modo, nisi in casibus exceptis a jure, peccat mortaliter. Sed quia hoc videtur valde grave quod pro uno levi verbo quis peccet mortaliter; ideo aliis probabilius videtur, quod non semper peccet mortaliter, sed solum quando in crimine excommunicati participat, vel in divinis vel in contemptum Ecclesiae.

Ad primum dicendum, quod quamvis participare simpliciter non sit peccatum mortale semper, tamen participare pertinaciter peccatum mortale est, quia contemnit.

Ad illud Innocentii, dicendum, quod loquitur de participatione divinorum. Vel dicendum, quod

nec etiam veniale metu mortis committi debet. Unde haec conditio, quia, non dicit tantum causam, sed exaggerationem, sive aggravationem.

Ad tertium dicendum, quod si communicat in contemptum Ecclesiae, peccat mortaliter; sed non semper sic communicat.

DISTINCTIO XIX.

Postquam ostensum est etc. (V. edit. nostrae tom. VII, pag. 822.)

QUAESTIO UNICA.

Hic quaeruntur quinque: 1.^o utrum sacerdotis sit proprium habere claves; 2.^o utrum sacerdos veteris legis habuerit claves; 3.^o utrum mali sacerdotes haeretici, schismatici et excommunicati claves habeant; 4.^o utrum quilibet sacerdos possit uti clave in quemlibet; 5.^o utrum sancti homines qui non sunt sacerdotes, habeant usum clavium ligando et solvendo.

ARTICULUS I.

Ad primum sic proceditur. Et 1. videtur, quod non soli sacerdotes in novo Testamento habeant claves. Nam ostiarii habent potestatem et officium indignos excludendi et dignos admittendi; hoc autem est officium clavium; ergo etc.

2. Praeterea, excommunicare et absolvere ad claves pertinent: multi vero non sacerdotes habent potestatem excommunicandi et absolvendi, ut electi archidiaconi et officiales; ergo etc.

3. Praeterea, abbatissae habent jurisdictionem ad correctionem suarum monialium; ergo habent potestatem clavium.

4. Praeterea, aliquis non sacerdos est majoris meriti aliquo sacerdote et majoris scientiae; cum ergo clavis potestatis ex passione Christi oriatur, cui per meritum conformamur, videtur quod sancti homines quamvis non sacerdotes, utramque clavem habere possint.

Contra. Dicit Ambrosius, quod Ecclesia in solis sacerdotibus habet claves; ergo non in aliis.

Praeterea, solis Apostolis et eorum successoribus claves sunt datae; ergo solis presbyteris qui sunt Apostolorum successores.

Respondeo. Duplex est clavis. Quaedam enim est clavis ordinis, per quam regnum caelorum alicui aperitur; et ista tantum est presbyteris concessa. Alia est clavis jurisdictionis per quam aliquis admittitur et excluditur a regno Ecclesiae militantis; et haec aliis quam sacerdotibus est concessa. Sed quia per regnum Ecclesiae militantis pervenitur ad regnum Ecclesiae triumphantis; ideo haec non dicitur proprie clavis caeli, sed dispositio ad ipsam.

Ad primum de ostiariis, dicendum, quod potestas ostiarii non est ad claudendum vel aperiendum regnum caelorum, sed materiale templum. Potestas etiam ejus non est in definiendo vel in iudicando, sed in exequendo ad iudicium sacerdotis.

Ad secundum de archidiaconis et officialibus et huiusmodi, dicendum, quod huiusmodi, ut jam dictum est, habent clavem jurisdictionis, quae non dicitur proprie clavis, sicut jam dictum est, et non clavem ordinis quae proprie est clavis regni caelorum, per

quam subtrahitur peccatum, quod est impedimentum regni caelorum.

Ad illud de abbatissis, dicendum, quod non habent claves ad aperiendum regnum caelorum, sed actum similem actui clavium, scilicet in correptione temporali et disciplina suarum monialium propter periculum cohabitationis virorum inter eas.

Ad quartum dicendum, quod homo agit in sacramentis non tamquam auctor, sed sicut minister; et ideo non agit virtute proprie perfectionis, sed ejus cujus est minister. Ad ministerium autem deputatur aliquis per ordinem. Unde quantumcumque quis sit meriti, si ordine careat, clavem potestatis non habet. Similiter nec clavem scientiae, quae non importat scientiae habitum, sed auctoritatem discernendi, ut dictum est.

ARTICULUS II.

Ad secundum sic proceditur. Et 1. videtur, quod sacerdos legalis claves habuerit. Clavis enim est scientia discernendi et potentia judicandi, ut dictum est distinctione praecedenti: sed ipsi habuerunt utrumque; ergo ipsi habuerunt claves.

2. Praeterea, habuerunt potestatem in populo fidelium qui tunc erant. Aut ergo temporalem, aut spiritualem. Si temporalem, ergo non distinguebatur potestas sacerdotum et principum; quod falsum est. Si spiritualem, ergo habebant potestatem clavium.

3. Praeterea, claves consequuntur ordinem: ipsi vero habebant ordinem sacerdotii; ergo etc.

Contra. Potestas clavium ordinatur ad aperiendum regnum caelorum, quod aperiri non potuit ante passionem Christi; ergo sacerdos legalis clavem non habuit.

Praeterea, potestas clavium est ad remissionem peccatorum. Sacerdotes vero legales nullam habebant potestatem in remissionem peccatorum, quia in sacramentis quae ministrabant non conferebatur gratia; ergo etc.

Respondeo. Dicendum, quod clavis regni caelorum proprie dicitur quae introducit ad regnum caelorum. Sacerdos autem legalis non habebat potestatem introducendi ad regnum caelorum, sed introducendi et excludendi a templo terreno, quod figurabat regnum caelorum; et ideo non habebat claves, sed in eo figura clavium praecessit.

Ad primum, Clavis est scientia, dicendum, quod hoc intelligitur respectu dignitatis vel indignitatis, quantum ad regnum caelorum. Sacerdotes vero legales habebant scientiam discernendi et potentiam judicandi de dignitate et indignitate ingrediendi in templum materiale.

Ad secundum, de potestate super populum, dicendum, quod habebant potestatem spiritualem ordinatam tantum ad templum, non ad regnum caelorum, quam non habebant principes.

Ad tertium, de ordine, dicendum, quod claves consequuntur ordinem, non quemcumque, sed qui deputatur ad consecrationem corporis Christi, per quem aperitur regnum caelorum.

ARTICULUS III.

Ad tertium sic proceditur. Et 1. videtur, quod mali sacerdotes non habeant claves. Quia in collatione clavium dictum est Apostolis Joan. 20, et dicitur ordinandis: « Accipite Spiritum sanctum. Quo-

rum remiseritis peccata remittuntur etc. »; ergo illis solis datur potestas remittendi peccata, qui accipiunt Spiritum sanctum.

2. Praeterea, dicit Augustinus, quod « Spiritus sanctus peccata, vel per seipsum, vel per columbae membra remittit; » non ergo per praedictos sacerdotes.

3. Praeterea, rex sapiens claves thesauri sui non committit inimicis suis; ergo Deus claves Ecclesiae non committit sacerdotibus malis.

Contra. Malitia ministri non impedit effectum sacramenti; ergo non impedit potestatem clavium in ministratione sacramentorum.

Praeterea, bonitas ministri incerta est; ergo nunquam posset de absolutione certitudo aliqua haberi.

Respondeo. Clavium potestas consequitur characterem ordinis. Cum ergo in praedictis sacerdotibus non deleatur character propter eorum malitiam, nec potestas clavium eis subtrahitur. Sed cum usus clavium ordinis dependeat a potestate jurisdictionis, et in schismaticis aut haereticis et excommunicatis potestas jurisdictionis sit ligata; ideo usus clavium in eis est impeditus. In malis autem sacerdotibus ab Ecclesia non praecisis, potestas jurisdictionis non est ligata; et ideo habent liberum usum clavium.

Ad primum, Joan. 20, dicendum, quod Dominus determinat ea quae requiruntur non solum ad usum simpliciter, sed ad usum idoneum: haec enim est intentio Christi et Episcopi ordinem conferentis, ut non tantum exequatur officium, sed et digne exequatur.

Ad secundum, de Augustino, dicendum, quod loquitur de remissione idonea, quae requirit non tantum potestatem ministri, sed bonitatem.

Ad tertium, de rege, dicendum, quod non est simile; quia thesaurum regni terreni posset inimicus distribuere regis inimicis, sed hoc non potest fieri de thesauro regis aeterni.

ARTICULUS IV.

Ad quartum sic proceditur. Et 1. videtur, quod sacerdos possit uti clave quam habet, in quemlibet hominem. Clavis corporalis quae aperit et claudit seram unam similiter claudit et aperit omnem seram consimilem; ergo multo magis clavis spiritualis.

2. Praeterea, sacerdotium novi Testamenti est perfectius quam veteris Testamenti: sed sacerdos veteris Testamenti poterat uti sua potestate, quam habebat, discernendi inter lepram et lepram indifferenter in omnes; ergo multo fortius Evangelicus uti potest sua potestate in omnes.

3. Praeterea, potestas clavium in sacerdotibus descendit ex illa auctoritate Christi qua dixit: « Accipite Spiritum sanctum, quorum remiseritis peccata remittuntur eis: » sed illud determinate dixit de omnibus; ergo habens clavem determinate potest ea uti in quolibet.

Contra. Secundum jura nulli licet ligare et solvere alienum debitum; ergo sacerdos non potest uti clave in quemlibet.

Praeterea, ordinatus debet esse iudicium spirituale, quam temporale: sed iudicium temporale non potest exerceri in non subditum; ergo nec spirituale: et sic idem quod prius.

Respondeo. Ad usum clavis in absolutione a peccato duplex potestas exigitur. Una ordinis, qua quis efficitur dispensator sacramenti poenitentiae,

quae est aequaliter in omnibus sacerdotibus; altera jurisdictionis qua poenitens efficitur debita materia dispensantis. Et ideo propter defectum jurisdictionis quam non habent sacerdotes in omnes, non possunt uti clave in omnes. Sed quia solus summus Pontifex habet potestatem jurisdictionis in omnes; ideo tamen ipse quam is cui ipse committit, uti clave potest in omnes.

Ad primum dicendum, quod non est simile, quia quaelibet sera aequae est propria materia clavis illius; sed non similiter quilibet peccator respectu clavis spiritualis.

Ad secundum dicendum, quod non est simile; quia potestas illa erat solum ad unum populum et unum templum; et ideo non erat tanta distinctio potestatis necessaria: hoc vero ad populum et ad templum, toto orbe diffusum.

Ad tertium dicendum, quod intelligitur de potestate ordinis quae aequaliter se extendit ad omnes, quantum est de se, sed propter defectum jurisdictionis non potest exerceri in omnes.

DISTINCTIO XX.

Et sic de praedictis auctoritatibus etc. (V. edit. nostrae tom. VII, pag. 856.)

QUAESTIO UNICA.

Hic quaeruntur quatuor: 1.^o an aliquis in extremo vitae suae possit poenitere; 2.^o an in fine vitae possit a quolibet sacerdote absolvi; 3.^o an poenitens in fine vitae poenas purgatorii substinebit; 4.^o an possit unus pro alio satisfacere.

ARTICULUS I.

Ad primum sic proceditur. Et 1. videtur, quod nullus in extremo vitae possit vere poenitere. Eccl. 17 dicitur: « Vivus et sanus confiteberis: » sed non valet confessio nisi in vita; ergo similiter non valet nisi in sanitate.

2. Praeterea, Augustinus dicit: « Si vis agere • poenitentiam quando jam peccare non potes, peccata te dimiserunt, non tu illa: » sed omnis quem vere poenitet, peccata dimittit; ergo in tali statu non potest homo vere poenitere.

3. Praeterea, Mich. 3 dicitur: « Tunc clamabunt • ad Dominum et non exaudiet eos. • Ubi dicit Glossa: « Clamabunt sera poenitentia; » ergo seram poenitentiam Deus non exaudit. Sed nulla magis sera est illa, quae in morte incipit fieri: ergo illa non exauditur; ergo non est vera.

Contra, Latronem in fine vitae poenituit, Luc. 23, et tamen latro ipse statim remissionem invenit.

Praeterea, Ezech. 33 dicitur: « Impietas impii • non nocet ei, in quacumque die conversus fuerit ab impietate sua; » ergo etc.

Respondeo. Dicendum, quod de poenitentia loqui possumus dupliciter. Uno modo, quantum ad rei veritatem; et sic possibile est hominem in fine vitae poenitere: potest enim tunc de peccato commisso dolere cum proposito confitendi et satisfaciendi. Alio modo quantum ad manifestationem; et sic veritas poenitentiae in fine non manifestatur. Incertum est enim utrum taliter poenitens ex solo timore poeniteat, vel ex amore Dei qui ad veram poenitentiam requiritur: et praecipue cum difficile

sit ut homo cuius affectus semper fuit in peccatis, in momento iustitiam amplectatur. Sed quae apud homines sunt difficilia, Deo sunt facilia. Unde ex eius gratia contingit interdum in fine aliquos vere poenitere.

Ad primum dicendum, quod confiteri in vita praeceptum est: confiteri in sanitate consilium.

Ad secundum dicendum, quod peccata dimittere vel dimitti ab eis, dupliciter dicitur: vel quantum ad effectum, vel quantum ad affectum. Primo modo is quem poenitet in morte, a peccatis dimittitur, sed secundo modo ipse dimittit peccata et hoc ad veram poenitentiam sufficit.

Ad tertium dicendum, quod poenitentiam seram vocat Glossa eam quae fit post mortem, non quae in morte; vel quae fit solo timore poenae non amore iustitiae: nunquam enim est sera vera poenitentia, ut dicit Augustinus.

ARTICULUS II.

Ad secundum sic proceditur. Et 1. videtur, quod non omnis sacerdos possit in fine vitae poenitentem absolvere. Dicit enim auctor in littera, quod presbyter inconsulto Episcopo non debet poenitentem reconciliare; ergo multo minus sacerdos alienus proprio inconsulto potest hoc facere.

2. Praeterea, qui sic absolvitur debet venire, si evadat, ad sacerdotem proprium, et se ei ostendere; ergo non videtur esse sufficienter absolutus.

3. Praeterea, in articulo necessitatis, sicut licet alieno sacerdoti baptizare, ita et laico; ergo similiter est in poenitentia: sed in tali casu laicus non potest absolvere; ergo nec sacerdos alienus.

Contra. In necessitate corporali potest quis uti re aliena invito domino; ergo magis in spirituali quae major est.

Praeterea, dicitur in littera, quod si presbyter poenitentiam abnegaverit morientibus, reus animarum erit; ergo quilibet sacerdos potest talibus dare poenitentiae sacramentum.

Respondeo. Ad absolutionem poenitentis duo in absolvente requiruntur: scilicet potestas ordinis, et potestas jurisdictionis. Prima, aequaliter est in omnibus sacerdotibus respectu omnium peccatorum et peccantium: sed quod secunda non sit aequaliter in omnibus, hoc est propter statutum Ecclesiae, sic ordinantis. Sed quia necessitas non habet legem, non obstante tali lege statuti, in articulo necessitatis quilibet sacerdos habet potestatem jurisdictionis in absolvendo omnes, non tantum a peccatis, sed etiam a sententiis excommunicationis.

Ad primum, de episcopo, dicendum, quod verum est in casibus episcopo reservatis extra articulum necessitatis. In necessitatis autem articulo, in his et in aliis, consulto episcopo, et proprio sacerdote, potest poenitentem absolvere.

Ad secundum, Debet venire, dicendum, quod verum est pro absolutione sibi facta notificanda, non requirenda. Ad excommunicatorem similiter debet venire pro recipiendo mandato Ecclesiae, non absolutione.

Ad tertium dicendum, quod non est simile: quia non est tantae necessitatis poenitentia sicut baptismus; eo quod baptismus totaliter a poena liberat, non autem absolutio clavium: ideo nulla potestas requiritur in ministro illius, sicut in ministro huius.

ARTICULUS III.

Ad tertium sic proceditur. Et 1. videtur, quod poenitens in fine vitae non sustinebit poenam purgatorii. Post hanc vitam poena purgatorii excedit omnem poenam hujus mundi, ut habetur in littera; sed poena ad quam tenetur poenitens non est tanta quanta sunt multae poenae hujus mundi; ergo si punitur in purgatorio, punitur plus debito, et sic fit ei injuria.

2. Praeterea, omne peccatum potest in hoc mundo expiari per poenas inflictas patienter toleratas: sed mors est maxima poenarum; ergo, si poenitens eam patienter sustineat, per eam totaliter expiatur.

3. Praeterea, iudicium sacerdotis quod fit clave non errante, Deus confirmat: sed aliquando sacerdos debita discretione adhibita, per quam error clavis excluditur, injungit minorem poenitentiam quia sit condignum; ergo videtur quod si poenitentiam expleat ad minus in tali casu, poenam in purgatorio non patietur; praecipue cum ignorantia eum excusare videatur.

Contra. Justitia divina exigit ut peccatum, vel a Deo, vel ab homine puniatur. Sed non est punitum sufficienter peccatum ab homine, qui decedit in fine poenitens; ergo punitur a Deo.

Praeterea, nullus ex sua negligentia debet commodum reportare: sed si non puniretur talis in futuro, reportaret commodum de negligentia poenitentiae dilatae; ergo etc.

Respondeo. Dicendum, quod culpa per poenam ordinatur, in quantum per eam ad ordinem justitiae reducitur. Justitia autem in quadam aequalitate consistit: unde cuilibet culpae determinata poena debetur. Ubi ergo haec poena aliquo modo fuerit expiata, non servaretur ordo divinae justitiae, nisi eam peccator ex toto sustineret. Contritio autem poenitentis et absolutio sacerdotis sunt expiativa poenae secundum aliquam determinatam quantitatem. Unde oportet quod illud quod superest, poenitens in hac vita vel in alia sustineat.

Ad primum, Homo non debet plus etc., dicendum, quod quamvis poena purgatorii non sit in hoc mundo debita, tamen est in alio; sicut eadem culpa, secundum diversum forum, gravius punitur in una provincia quam in alia, et major ei poena debetur.

Ad secundum dicendum, quod poena mortis naturalis, cum sit debita naturaliter pro peccato originali, non satisfacit pro peccato actuali; sed poena mortis illatae pro Deo posset satisfacere.

Ad tertium dicendum, quod etiam in casu illo poenitens post hanc vitam poenam sustinet, cum poena sibi debita pro peccato non sit totaliter expiata, nec per contritionem, nec per absolutionem, nec per satisfactionem peractam. Clavis autem, quamvis in impositione satisfactionis non erraverit secundum iudicii aequitatem, erravit tamen secundum rei veritatem; nec ignorantia excusat a reatu peccati praeteriti, sed futuri.

ARTICULUS IV.

Ad quartum sic proceditur. Et 1. videtur, quod nullus possit pro alio satisfacere. 2 Cor. 5 dicitur: « Omnes nos manifestari oportet ante tribunal

Christi, ut referat unusquisque propria corporis etc. » ergo non aliena.

2. Praeterea, tres sunt partes poenitentiae; sed non potest homo converti aut confiteri pro alio; ergo nec satisfacere.

3. Praeterea, quando quis suscipit satisfactionem pro aliquo, ille cujus satisfactio suscipitur antequam aliquis satisfaciat decedens, aut punitur pro peccatis illis, aut non. Si non, ergo ante satisfactionem debitam salvatur. Si sic, ergo idem peccatum bis punitur, si alius post satisfactionem impleat.

Contra. Gal. 6 dicitur: « Alter alterius onera portate; » ergo unus potest alterius onera poenitentiae portare.

Praeterea, plus potest charitas apud Deum quam apud homines: sed charitas humana potest alterius debitum solvere; ergo multo magis divina.

Respondeo. Dicendum, Poenitentia propter duo injungitur: scilicet ad solvendum debitum culpae praeteritae, et praestandum remedium futurae. Secundo modo, non potest aliquis pro alio satisfacere; quia per macerationem carnis unius, non maceratur caro alterius. Sed primo modo potest, dummodo satisfaciens sit in charitate; quia potest ita poenitentiam perficere, sicut ille cui injungitur. Sed quia injungitur non tantum ad solvendum debitum, sed ad praestandum remedium, ut dictum est; ideo non debet unius satisfactio pro alio recipi, nisi defectus aliquis appareat in poenitente, unde sit impotens ad satisfaciendum.

Ad primum dicendum, quod propria hominis dupliciter dicuntur. Aut proprie, quando ipsemet facit aliquid; aut interpretative, quando facit alius pro eo.

Ad secundum dicendum, quod sicut in articulo necessitatis potest quis pro alio satisfacere, sic et confiteri, ut si ipse non posset loqui. Vel dicendum, quod non est simile; quia verecundia, quam quis sustinet in confessione, est maxima pars satisfactionis, non autem sic verecundaretur homo si per alium confiteretur, sicut si per se. Poena autem tanta potest ab alio persolvi sicut a seipso.

Ad tertium dicendum, quod quamdiu non est solutum debitum per alterum, oportet quod per ipsum solvat; et si postea solvatur per alterum, proderit solventi in satisfactionem peccatorum priorum.

DISTINCTIO XXI.

Solet etiam quaeri etc. (V. edit. nostrae tom. VII, pag. 848.)

QUAESTIO UNICA.

Illic quaeruntur quatuor: 1.º an sit purgatorium; 2.º an per poenam purgatorii, remittatur peccatum veniale; 3.º an per confessionem generalem; 4.º utrum in quolibet casu, homo teneatur celare ea, quae sub sigillo confessionis habet.

ARTICULUS I.

Ad primum sic proceditur. Et 1. videtur, quod purgatorium non sit. Apoc. 14 dicitur: « Beati mortui, qui in Domino moriuntur. Amodo jam dicit Spiritus ut requiescant etc.; » ergo illis, qui in Domino moriuntur, non manet aliquis locus poenalis purgatorius: sed nec illis qui in Domino non

moriuntur; ergo post hanc vitam non est aliquis locus purgatorius.

2. Praeterea, Deus est pronior ad remunerandum bona, quam ad puniendum mala: sed peccatores propter aliqua bona quae fecerunt, non retardantur a poena; ergo multo fortius justi propter aliqua mala quae fecerunt, non retardantur a praemio.

3. Gregorius dicit: « Qualis quisque exit hinc, talis in iudicio praesentabitur; » ergo si exit, non purgabitur usque ad diem iudicii. Sed nec post; ergo non est locus purgatorius animarum.

4. Praeterea, ignis purgatorius durior est quam quicquid in hoc saeculo poenarum videre aut sentire aut cogitare quis potest, ut Augustinus dicit: sed peccato poenitentis debetur aliqua poena in hac vita; ergo si in purgatorio punietur, punietur ultra condignum.

Contra. Aliqui decedunt hinc sine culpa, propter contritionem habitam, et tamen cum debito poenae propter satisfactionem non impletam. Aut ergo illam poenam solvent, et ita restat post hanc vitam locus purgatorius. Aut non, et sic perit divina iustitia.

Praeterea, Apostolus dicit 1 Cor. 3, quod qui aedificat ligna, fenum, stipulam, salvus erit, sic tamen quasi per ignem: sed non per ignem inferni, quia ad illud non sequitur salus; ergo purgatorii.

Respondeo. Dicendum, quod purgatorium ponere necessarium est ex divina iustitia, quae non dimittit peccatum impunitum: quia secundum Augustinum, aut Deus aut homo punit peccatum. Cum ergo morientis peccatum in hac vita non fuerit sufficienter punitum, oportet post hanc vitam puniri. Sed non in inferno; quia contingit talem decedere in gratia, quae non compatitur secum poenam infernalem; ergo necessarium est esse purgatorium.

Ad primum dicendum, quod loquitur de laboribus in operando, non in patiando.

Ad secundum dicendum, quod verum est, quantum est de se; impedimentum autem contingit ex parte nostra. Nam bona facta cum mortali, non sunt vere bona; sed mala facta cum charitate, vere mala sunt.

Ad tertium dicendum, quod illud intelligitur de charitate praedominante, non de quacumque. In iusto vero semper praedominatur charitas, in peccatore vero iniquitas.

Ad quartum dicendum, quod poena purgatorii erit gravissima propter conditionem patientis, scilicet animae, quae est principium sentiendi. Poena enim, quae sustinetur in locis sensibilibus, est plus afflictiva. Unde non sequitur, quod aliquis puniatur per eam ultra condignum; quia secundum diversum forum, vel diversam conditionem patientis, taxatur diversa dignitas.

ARTICULUS II.

Ad secundum sic proceditur. Et 1. videtur, quod venialis culpa per purgatorium non deleatur. Super illud 1 Joan. 5, « Est peccatum ad mortem, » dicit Glossa: « quod in hac vita non corrigitur, frustra de illo post mortem venia speratur; ergo nulla culpa post hanc vitam remittitur.

2. Praeterea, modica poena cum gratia sufficit delere omnem poenam venialem; ergo multo fortius poena mortis cum gratia.

3. Praeterea, hoc est hominibus mors, quod est

« Angelis casus », ut Damascenus ait: sed Angelis post casum nulla culpa remittitur; ergo nec hominibus post mortem.

4. Praeterea, facilius est in culpam cadere quam a culpa resurgere: sed non possunt homines post hanc vitam cadere in aliquam culpam; ergo nec resurgere ab aliqua culpa.

Contra. Gregorius et Augustinus dicunt, quod peccata gravia non dimittuntur in futuro, sed levia. Aut ergo hoc intelligitur quo ad culpam, aut quo ad poenam. Si quo ad poenam, contra, Graviorum poena dimittitur in futuro. Si quo ad culpam; ergo aliquae culpae remittuntur in futuro.

Praeterea, contingit aliquem justum decedere cum culpa veniali. Aut ergo purgabitur, et sic aliqua culpa ibi delebitur: aut cum culpa veniali salvabitur, aut pro sola culpa veniali damnabitur, quorum utrumque est impossibile; ergo etc.

Respondeo. Dicendum, quod circa hoc est duplex opinio. Quidam enim dicunt, quod in morte quodlibet veniale deletur, quia corruptio concupiscentiae est causa venialis, in morte autem tollitur haec causa in electis, ideo tollitur veniale. Sed quia hoc est contra auctoritatem sanctorum dicentium, venialia dimitti post hanc vitam, ideo alii dicunt verius, quod in purgatorio peccata venialia dimittuntur: et hoc sic manifestatur. Gratia enim non de se tollit veniale, quia secundum essentiam ei non opponitur, sine alterius adiutorio, vel intrinseco, ut motu liberi arbitrii, quod non esse potest post hanc vitam, quia non est meritorius talis motus, vel extrinseco, ut virtute sacramenti, quae interius operatur ad venialis deletionem, ut patet in dormiente, qui si post desiderium baptismi committat aliquod veniale ante dormitionem, et in dormiendo baptizetur, virtute baptismi consequitur remissionem venialis. Quamvis autem desit sacramentum post hanc vitam, tamen aliquid loco eius potest delere peccatum: et sic poena purgatorii ut extrinsecus cooperans, praesupposita gratia, delet veniale, voluntate se gratiae conformante, quamvis non auxiliante, ut quidam dicunt. Alii vero dicunt, quod quamdiu aliquis est in statu vitae, potest aliquo modo mereri. Et quoniam in purgatorio homo aliquo modo est in statu vitae, quia adhuc non recipit pro meritis, ideo aliquo modo potest mereri, etsi non praemium essentiale, tamen praemium accidentale, scilicet accelerationem gloriae, et ita remissionem venialis culpae.

Ad primum de Glossa supra dictum 1 Joan. 5, dicendum, quod intelligenda est secundum textum proprietatem: unde loquitur de mortalibus, quae requirunt simpliciter assensum voluntatis in sui perpetratione; non de venialibus, quae similem assensum non requirunt. Clarum est autem, quod textus de mortalibus loquitur.

Ad secundum dicendum, quod modica poena voluntaria, non naturalis sufficit: naturalibus enim non meremur: sed mors poena est naturalis, non voluntaria.

Ad tertium dicendum, quod verba Damasceni intelliguntur quo ad remedium poenitentiae, non quo ad expiationem per modum poenae, quae in hominibus esse potest, qui cum gratia decedunt.

Ad quartum, de casu, dicendum, hoc verum esse de resurrectione, quae fit conatu proprio. Et praeterea, veniale peccatum proprie non est casus.

ARTICULUS III.

Ad tertium sic proceditur. Et 1. videtur, quod per confessionem generalem quae fit in Prima et Completorio, et Missa, non deleantur venialia. Quia hujusmodi confessio sacramentum non est, cum fiat frequenter non sacerdoti; ergo non habet virtutem delendi peccata.

2. Praeterea, per confessionem generalem, qua ratione deletur unum, eadem ratione aliud; ergo frequenter potest esse homo sine omni peccato, etiam veniali.

3. Praeterea, videtur, quod non debeat peccata mortalia oblita. Nam si sufficeret ea delere; ergo non essent confitenda ad memoriam reducta: sed hoc est falsum; ergo non delet ea.

Contra. Confessio et absolutio generalis in Ecclesia non fit frustra; ergo delet peccata quotidiana commissa.

Praeterea, qui confitetur vere quodcumque scit, sine fictione confitetur: sed qui non est fictus consequitur effectum sacramenti; ergo talis consequitur remissionem omnium peccatorum suorum, qui est effectus sacramenti.

Respondeo. Dicendum, quod per actum charitatis cui venialia opponuntur, quia vel eum impediunt vel retardant, remittuntur venialia, specialiter si in earum destructionem feratur. Cum ergo confessio generalis existentis in charitate sit actus procedens ex charitate, et in venialium deletionem feratur, sequitur, quod per confessionem generalem peccata venialia dimittuntur.

Ad primum, Non est sacramentum, dicendum, quod confessio generalis quandoque est sacramentalis, quandocumque fit de omnibus peccatis singillatim sacerdoti; et haec ad remissionem venialium quantum ad culpam et poenam, valet ex tribus: scilicet, ex contritione confitentis, ex oratione sacerdotis et ex vi clavium. Quandoque autem non est sacramentalis, quando fit simul de omnibus publice in Ecclesia; et tunc habet efficaciam ex duobus primis, et non ex tertio: et propter hoc etiam non subjungitur post talem confessionem absolutio: sed solum oratio, scilicet Misereatur vestri etc.

Ad secundum dicendum, quod frequenter homo potest esse sine peccato, non tamen diu, nec certitudinaliter, unde non potest aliud asserere.

Ad tertium dicendum, quod ratio qua in confessione generali peccata oblita dimittuntur, est, quia Deus non requirit ab homine plus quam possit. Peccata autem oblita confiteri specialiter, non est in potestate hominis; sed generaliter tantum: ideo per confessionem generalem Deus peccata oblita dimittit. Cessante autem impotentia, requiritur specialis confessio. In eo vero qui reducit ad memoriam cessat iam impotentia; et ideo requiritur specialis confessio.

ARTICULUS IV.

Ad quartum sic proceditur. Et 1. videtur, quod non semper sacerdos debeat celare confessionem: quia dicit Bernardus « Quod pro charitate institutum est, contra charitatem militare non debet. » Celatio confessionis pro charitate instituta est; ergo in casu, quo militat contra charitatem, celari non debet. Si quis ergo confiteatur damnum quod alteri proponit facere, celari non debet.

2. Praeterea, ad celandum confessionem tenetur

quis ex praecepto Ecclesiae; ergo praecepto Ecclesiae contrario absolvitur; ergo quando Ecclesia praecepit, ut quicumque tale crimen prodat, prodere debet.

3. Praeterea, aliquando contingit excommunicari omnes qui talem vel talem rem sciverint, et non manifestaverint praelato; et interdum juramento cogi ad dicendum veritatem; ergo si non dixerit, cum sciat, excommunicatus erit, aut perjurus.

4. Praeterea, contingit, quod aliquis confessor audiens idem peccatum, alio modo scit illud; si ergo confessio revelari non debet, videtur quod nec sic dicere possit, nec etiam de licentia confitentis: quia confitens non potest dare licentiam faciendi contra praeceptum Dei vel Ecclesiae.

Contra. Dicit hic auctoritas, quod nullo modo debet revelare, etiam pro gravi scandalo.

Praeterea, Gregorius in litera de poenitentia et remissione dicit: Caveat sacerdos ne verbo vel opere, vel quovis alio modo, prodat aliquatenus peccatorem.

Respondeo. Dicendum, quod sicut in omni sacramento, quod extrinsecus agitur est signum ejus quod agitur intrinsecus, ita et in poenitentiae sacramento. Cum ergo Deus peccatum illius, qui se intrinsecus sibi per contritionem subjicit, tegat, sacerdos autem sit loco Dei extrinsecus, jam tenetur celare peccatum subjicientis se ei per confessionem extrinsecus.

Ad primum, Dicit Bernardus, dicendum, quod quamvis aliquando videatur militare contra charitatem privatae personae, non tamen contra charitatem Ecclesiae publicae; quia per occultationem homines ad confessionem magis attrahuntur, et simplicius peccata confitentur.

Ad secundum dicendum, quod sicut confessio de jure divino est, ita celatio confessionis; unde ad contrarium non potest homo cogi; ideoque tamquam violator sacramenti et praecepti divini peccat qui revelat.

Ad tertium dicendum, quod non ligatur per communicationem vel juramentum, nisi ad illa quae scit ut homo, non ut Deus.

Ad quartum dicendum, quod quidam dixerunt, quod illud quod sacerdos audit in confessione tenetur celare, etsi ante confessionem vel post, quomodolibet sciat illud idem. Quidam vero dixerunt, quod claudit id quod prius erat scitum, non autem si contingat postmodum idem sciri. Sed utrumque dictum justitiae repugnat: quia per hoc, et justum iudicium, et verum testimonium impediretur. Et ideo alii verius dicunt, quod quantum est ex vi sacramenti, non tenetur celare quod alias scivit, sive ante, sive post; sed tamen propter scandalum vitandum non debet dicere, nisi necessitas imminet: nec tamen debet dicere se per confessionem hoc scire. Et sic patet, quod de licentia confitentis potest hoc dicere. Ex hoc ipso enim quod eum licentiat, facit eum alio modo scire.

DISTINCTIO XXII.

Cumque multis auctoritatibus etc. (V. edit. nostrae tom. VII, pag. 861.)

QUAESTIO UNICA.

Hic quaeruntur quatuor: 1.º utrum dimissa peccata redeant; 2.º utrum peccata commissa post

recidivum sit confitenda; 5.^o quid sit res et sacramentum in poenitentia; 4.^o de institutione sacramenti poenitentiae.

ARTICULUS I.

Ad primum sic proceditur. Et 1. videtur, quod peccata mortalia redeant quantum ad culpam. Delectio culpae est effectus immediatus gratiae: sed remota causa immediata removetur effectus; ergo cum removeatur gratia per recidivum, removetur effectus gratiae; ergo etc.

2. Praeterea, videtur, quod redeant quantum ad reatum poenae. Ponitur quod aliquis contritus et confessus, tamen debitor poenae peccati remissi, cadat denuo in peccatum mortale, et moriatur statim: constat quod pro illo punietur, et non nisi in inferno: poena autem infernalis fuit debita peccato mortali praeterito; ergo redit peccatum mortale, quantum ad reatum poenae.

3. Praeterea, videtur, quod veniale redeat. Peccata venialia inter debita computantur in oratione dominica, quae specialiter contra venialia valet: sed in littera dicitur quod universum debitum requiritur ab eo qui recidivat; ergo venialia etiam redeunt.

4. Praeterea, dicit hic Rabanus, quod non solum peccata quae homo post baptismum egit, imputantur ei, sed etiam originalia quae ei ad poenam in baptismo sunt dimissa; ergo etc.

Respondeo. Dicendum, quod cum in peccato sint tria: scilicet actus, macula et reatus: planum est quod peccata dimissa, quantum ad actum redire non possunt. Dicunt tamen quidam, quod per quodlibet peccatum sequens redeunt quantum ad maculam et reatum: quidam vero quod non per quodlibet peccatum sequens; sed per quatuor, quae in his versibus continentur « Fratres odit, apostata fit, spernitque fateri, Poenituisse piget, pristina culpa » redit. » Sed utrumque inconveniens est dicere. Cum enim macula sit deleta, et reatus sit dimissus absolute per poenitentiam praecedentem, non potest macula vel reatus redire nisi causa propria iteretur, quae fuit actus qui iterari non potest. Et ideo dicendum est, secundum alios, quod simpliciter peccata dimissa non redeunt, sed secundum quid, ratione ingratitude, prout recidivans beneficio prioris absolutionis ingratus existit, et tanto magis quanto majora sunt ei dimissa: et sic quantitas praecedentium peccatorum in recidivo quodammodo iteratur, non secundum commensationem, sed secundum proportionem. Haec tamen ingratitude non est speciale peccatum, sed quaedam circumstantia consequens recidivum.

Ad primum dicendum, quod duplex est causa. Quaedam producit tantum effectum in esse; quaedam non solum producit, sed etiam conservans. De secunda habet veritatem, quia destructa causa destruitur effectus, non de prima.

Ad secundum dicendum, quod illud est per accidens, scilicet propter recidivum, cui debetur poena infernalis; non quia secundum se peccato praeterito poena infernalis debeatur, sicut patet de veniali.

Ad tertium dicendum, quod non redit veniale quantum ad debitum, quod sibi secundum se debetur, sed quantum ad effectum; quia facit recidivum dignum majori poena post dimissionem.

Ad quartum, de originali, dicendum, quod Ra-
S. Th. Opera omnia. V. 22.

banus intelligit peccatum originale redire quantum ad effectum ingratitude: quia post ejus remissionem recidivans magis est Deo ingratus; non ut propter se redeat debitum poenae, quod sibi ante dimissionem debebatur.

ARTICULUS II.

Ad secundum sic proceditur. Et 1. videtur, quod recidivans teneatur priora peccata confiteri de quibus confessus fuit. Quia ingratitude est peccatum gravissimum, cum per eam alia peccata redeant, ideo est confitenda: sed non confitetur nisi simul alia peccata confiteantur, ex quorum remissione consurgit ingratitude; ergo recidivans oportet quod priora peccata confiteatur.

2. Praeterea, per confessionem debet sacerdoti manifestari quantitas culpae: sed quantitas peccatorum prius dimissorum, quodammodo manet in peccato illo, quo quis recidivat; ergo ille qui confitetur hujusmodi peccatum, debet et confiteri omnia praecedentia.

3. Praeterea, contingit aliquando aliquem post confessionem peractam, ante poenitentiam recidivare: per recidivum autem mortificatur praecedens satisfactio, et sequens mortua redditur; ergo oportet priora peccata confiteri propter poenitentiam recipiendam.

Contra. Nahum 1, dicitur: « Non judicabit Deus » bis in idipsum; » ergo de peccatis de quibus est quis semel judicatus in confessione, non oportet quod iterum judicetur.

Praeterea, in Decretali de poenit. dist. 4, dicitur: « Non necesse est ut quae semel sacerdotibus » confessi sumus, denuo confiteamur; sed lingua » cordis, non carnis apud verum iudicem ea » confiteri debemus; » ergo idem quod prius.

Respondeo. Circa hoc sunt tres opiniones. Quidam enim sic distinguunt. Aut enim quis recidivat ante satisfactionem peractam, et sic tenetur specialiter confiteri: aut post: et sic aut confitetur confessori eidem, aut alteri. Si eidem, et ille habet memoriam praecedentium peccatorum ejus, sic non teneretur confiteri in speciali.

Sed contra hoc est, quia non redeunt peccata praecedentia nisi per ingratitude; ergo secundum se non confitenda sunt: homo enim non tenetur confiteri peccatum quod non habet. Ideo alii dicunt, quod non propter se sed propter cautelam futuri peccati sunt iterum confitenda in generali, et aliquando aliqua in speciali, prout necessarium est ad manifestationem causae peccati per quod recidivatur, ut determinata satisfactio sibi injungatur, ne iterum recidivet.

Sed contra hoc est, quia aliquando nullum peccatum praecedens est causa peccati per quod recidivatur.

Praeterea, multo melius scit quis vitare peccatum futurum per industriam propriam, quam sacerdos satisfactionem sciat injungere ad vitandum peccatum.

Praeterea, sic sequeretur, quod omnes pronitates ad peccandum quas quis patitur, teneretur confiteri. Et ideo alii verius dicunt, quod cum peccata praecedentia non mancant nisi quantum ad ingratitude, quia secundum se dimissa sunt, ingratitude autem non trahit in aliud genus specialis peccati,

ideo nec secundum se confitenda sunt, nec ipsa ingratitude secundum quam redire dicuntur.

Ad primum, ingratitude etc., dicendum, quod verum est quo ad aliquid, in quantum scilicet per eam redeunt. Sed quia prout accipitur, est circumstantia non addens speciem novam peccati, ideo confitenda non est.

Ad secundum dicendum, quod verum est de quantitate culpae, quae consurgit ex nova specie peccati; non de quantitate quae est de circumstantiis quibuscumque.

Ad tertium, per recidivum satisfactio etc. dicendum, quod verum est, quia per poenitentiam opera mortificata reviviscunt, et ideo non oportet quod post poenitentiam de recidivo satisfactio facta in charitate iteretur. Sed quia opera mortificata non reviviscunt, ideo pars satisfactionis facta in mortali oportet quod iteretur, servatis iis, quae supra dist. 15, sunt dicta.

ARTICULUS III.

Ad tertium sic proceditur. Et 1. videtur, quod exterior poenitentia non sit sacramentale signum. Quia secundum Hugonem, sacramentale signum est materiale elementum extrinsecus oculis suppositum: sed poenitentia exterior non est elementum materiale; ergo non est sacramentale signum.

2. Praeterea, videtur quod interior poenitentia non sit res hujus sacramenti. Quia res non est causa signi, sed e converso: sed poenitentia interior est causa exterioris, non e converso; ergo non est res ejus.

5. Praeterea, videtur quod nec peccatorum remissio sit res hujus sacramenti: quia res habet similitudinem cum signo: sed peccatorum remissio non habet similitudinem cum confessione aut satisfactione.

Contra est, quod Magister dicit in littera.

Respondeo. Sicut in baptismo ablutio exterior est signum characteris interioris, character autem non est signum ablutionis interioris, sed res exterioris, ita et in poenitentia, detestatio peccati exterior, quae fit per confessionem et absolutionem, est signum detestationis interioris, prout habet propositum confitendi et satisfaciendi annexum secundum arbitrium sacerdotis quae est res exterioris, et signum remissionis interioris.

Ad primum dicendum, quod materiale elementum accipitur generaliter pro qualibet re sensibili, sive sit substantia, sive accidens; et hujusmodi sunt actus exterioris poenitentiae.

Ad secundum dicendum, quod quamvis ita sit in sacramentis quae consistunt in materia exteriori, tamen in sacramentis quae consistunt in actu hominis convenit (1) aliter: quia actus hominis interior est causa exterioris: sed interior et exterior sunt causa remissionis interioris peccatorum.

Ad tertium dicendum, quod poenitentia exterior, tum ex parte confessionis, in qua homo committit se Deo sanandum, sicque exterius peccata abjicit, tum ex parte absolutionis, in qua significatur infusio gratiae, quae remissionem causat peccatorum, cum ipsa peccatorum remissione similitudinem habet.

(1) *Lege contingit.*

ARTICULUS IV.

Ad quartum sic proceditur. Et 1. videtur, quod sacramentum poenitentiae non sit ab institutione. Statim post peccatum fuit poenitentia; ergo ante omnem legem scriptam; ergo a lege naturali, et sic non est ab institutione.

2. Praeterea, si est instituta, aut ergo in veteri lege, aut in nova: si in veteri lege, sacramentis non fiebat remissio peccatorum: si in nova, contra. Christus non legitur instituisse poenitentiam, nisi quando dixit: « Agite poenitentiam. » Matth. 4: tunc autem poenitentiam non instituit, quia eadem ratione Joannes instituisset qui prius hoc praedicavit; ergo etc.

5. Praeterea, poenitentia non solum est sacramentum sed virtus: virtus autem non est ab institutione; ergo nec poenitentia.

Contra. Omne sacramentum est ex institutione significans ut dicit Hugo. Poenitentia vero est sacramentum novae legis, cum efficiat id quod figurat; ergo est instituta in nova lege.

Praeterea, sacramentum poenitentiae praecipue consistit in confessione peccatorum, ut in eo quod materiale in ea, et absolutione sacerdotis, ut in eo quod est formale in ea; sed haec sunt in nova lege instituta; ergo poenitentiae sacramentum institutum est in nova lege.

Respondeo. Dicendum, quod circa poenitentiam est tria considerare: scilicet actum poenitentiae interiorem, et actum aliquem exteriorem, et modum determinatum in utroque. Quo ad primum, poenitentia est a lege naturae sine institutione. Quo ad secundum, est a lege Moysi quae praecipiebat pro peccato aliqua sacrificia exteriora facere. Quo ad tertium, est instituta in nova lege, quae praecipit confessionem et satisfactionem ad arbitrium hominis. Ab hoc ultimo habet quod sit sacramentum, scilicet signum et causa remissionis peccatorum.

Ad primum, Statim post peccatum, dicendum est quod hoc verum est de poenitentia virtute, non de poenitentia quae est sacramentum, nisi accipiatur sacramentum communiter non proprie.

Ad secundum dicendum, quod Deus instituit poenitentiam in nova lege. Per seipsum quidem quantum ad id quod est formale in poenitentia, cum potestatem remissionis peccatorum dedit, Matth. 16, et Joan. 20. Per apostolos autem quantum ad id quod materiale est ex parte nostra, scilicet quando per Jacobum praeceptum confessionis promulgavit; quamvis dicant alii quod quantum ad utrumque Christus per se instituerit.

Ad tertium, non solum est sacramentum etc. dicendum, quod utrumque est, sed non secundum idem. Nam prout dicit actum tantum, sic pertinet ad virtutem: prout concernit modum determinatum qui consistit in significando et eausando, est sacramentum.

DISTINCTIO XXIII.

Praeter praemissa etc. (*V. edit. nostrae tom. VII, pag. 812.*)

Hic quaeruntur duo. Primo de ipso sacramento. Secundo de administratione.

QUAESTIO I.

Circa primum quaeruntur tria: 1.^o de materia ejus; 2.^o de forma; 3.^o de effectu.

ARTICULUS I.

Ad primum sic proceditur. Et 1. videtur, quod oleum olivae non sit materia hujus sacramenti. Quia hoc sacramentum immediate ordinat ad incorruptionem: sed incorruptio significatur per balsamum, quod in chrismate ponitur; ergo chrisma est convenientior hujus sacramenti materia.

2. Videtur quod non oporteat esse oleum consecratum: quia hoc sacramentum habet unam sanctificationem in usu per formam verborum; ergo superfluit alia consecratio, si ad materiam ipsius fiat.

3. Praeterea, videtur quod non oporteat materiam hujus sacramenti esse consecratam per Episcopum: quia dignior est materiae consecratio in sacramento Eucharistiae, quam in hoc sacramento: sed in Eucharistia materiam sacerdos potest consecrare; ergo et in hoc sacramento.

Contra. In aliis actionibus materia per Episcopum consecratur; ergo ita debet esse in ista.

Respondeo. Hoc sacramentum per modum cujusdam medicationis praebetur: et ideo materia ejus debet esse apta medicatio. Hujusmodi autem est oleum: et ideo congrue hoc sacramentum in oleo est institutum. Sed quia non habetur ex usu Christi sicut aliqua alia sacramenta quibus Christus est usus, ut baptismus, ideo oleum sanctificari debuit, ut ex sanctificatione efficaciam haberet; quia secundum Hugonem, Sacramentum ex sanctificatione est causans gratiam. Ut autem sacerdotalis potestas ab episcopali derivari ostendatur, oportet materiam ab Episcopo consecratam esse.

Ad primum ergo dicendum, quod incorruptio gloriae est hujusmodi sacramenti res signata, sed non contenta; et hanc non oportet per materiam sacramenti significari, sed tantum rem contentam, quae est nitor conscientiae per oleum significatus. Odor autem famae significatus per balsamum non est necessarius morienti sed viventi; unde in chrismate et non in oleo infirmorum balsamum admiscetur.

Ad secundum dicendum, quod prima est sanctificatio ad praeparationem materiae sacramenti, secunda ad effectus ejus communicationem.

Ad tertium dicendum, quod non est simile; quia sacramentum Eucharistiae consistit in ipsa materiae sanctificatione, sive consecratione veri corporis Christi; non autem in usu ejus. E converso autem est de hoc sacramento; quia consistit in usu fidelium sive corporis mystici, non materiae consecratione. Quantum autem ad corpus Christi verum, nullus ordo est supra sacerdotium: et ideo in sacramento Eucharistiae Episcopus materiam non consecrat. Sed quantum ad corpus Christi mysticum episcopalis ordo est supra sacerdotalem: et ideo in sacramento extremae unctionis Episcopus materiam consecrat.

ARTICULUS II.

Ad secundum sic proceditur. Et 1. videtur, quod hoc sacramentum non habeat aliquam formam. Forma tradenda est ab institutore sacramenti:

sed a Christo et ab Apostolis ejus non est hujus sacramenti aliqua forma tradita; ergo hoc sacramentum non habet aliquam formam.

2. Praeterea, videtur quod forma hujus sacramenti non sit deprecativa, sed potius indicativa. Omnia enim sacramenta novae legis habent certum effectum: sed certitudo effectus non exprimitur in formis sacramentorum nisi per orationem indicativam; ergo talis debet esse forma hujus sacramenti.

3. Praeterea, in formis sacramentorum debet exprimi intentio ministri: sed intentio non exprimitur nisi per orationem indicativam; ergo etc.

4. Praeterea, in quibusdam ecclesiis dicuntur hujusmodi verba in collatione hujus sacramenti: Unge hos oculos oleo sanctificato in nomine Patris etc.; ergo haec est forma hujus sacramenti, quae est indicativa.

Contra. Forma sacramenti ab omnibus observatur: sed verba praedicta non dicuntur secundum consuetudinem omnium ecclesiarum, sed tantum verba deprecativa, scilicet, Per unctionem et suam piissimam misericordiam indulgeat tibi Deus quicquid deliquisti super visum, etc.; ergo forma hujus sacramenti est oratio deprecativa.

Respondeo. Dicendum, quod quidam dicunt hoc sacramentum non habere aliquam formam. Sed hoc non potest esse; quia significatio materiae determinatur ad effectum per formam verborum; unde in quolibet sacramento novae legis necessaria est aliqua forma per quam faciat quod figurat. Forma autem hujusmodi sacramenti specialiter in oratione consistit, propter tria. Primo propter conditionem suscipientis, qui cum sit infirmus, indiget aliorum prece juvari. Secundo propter mortem imminentem per quam homo ponitur extra forum Ecclesiae et solius Dei judicio relinquitur; et ideo ei per orationem commendatur. Tertio propter effectum hujus sacramenti qui contritionem praesupponit quae est de essentia sacramenti, sine qua hoc sacramentum suum effectum consequi non potest; unde ad eam impetrandam est opus oratione.

Ad primum, forma sacramenti debet etc., dicendum, quod duplex est opinio. Quidam dicunt quod hoc sacramentum et alia sacramenta immediate non sunt a Christo instituta. Quod non videtur conveniens; quia cum sacramenta ex institutione efficaciam habeant, a solo Christo institui possunt ejus virtute operantur. Et ideo alii dicunt, quod hoc sacramentum institutum est a Christo, sed ab Apostolis promulgatum, sicut et confirmatio. Forma vero vel ab ipso Christo, vel ab Apostolis, qui procul dubio a Christo edocti fuerunt derivata est, quamvis non sit in canone scripta. Multa enim facta sunt quae scripta non sunt.

Ad secundum patet solutio ex dictis.

Ad tertium dicendum, quod per istum actum qui ponitur in forma, scilicet « per istam sanctam unctionem » satis exprimitur intentio.

Ad quartum dicendum, quod verba praedicta non sunt forma, sed dispositio ad formam, in quantum intentio ministri determinatur per verba illa ad actum sacramenti; et ideo more quarundam Ecclesiarum praemittuntur ad formam.

ARTICULUS III.

Ad tertium sic proceditur. Et 1. videtur, quod extrema unctio non valeat ad remissionem pecca-

torum. Ad hoc enim quod per unum potest effici, aliud non exigitur: sed in eo qui extremam unctionem accipit requiritur poenitentia ad peccatorum remissionem; ergo per extremam unctionem non dimittitur peccatum.

2. Praeterea, videtur, quod sanitas corporalis non sit effectus hujus sacramenti. Omne enim sacramentum est medicina spiritualis: sed spiritualis medicina ad spiritualem sanitatem ordinatur, sicut corporalis ad corporalem; ergo sanitas corporalis non est effectus hujus sacramenti.

5. Praeterea, efficacia hujus sacramenti nobis ostenditur Jac. 5: sed ibi non attribuitur sanationis effectus unctioni, sed orationi. Dicit enim: « Oratio » fidei sanabit infirmum; » ergo corporalis sanatio non est effectus hujus sacramenti.

Contra. Sacramenta novae legis significando efficiunt: sed baptismus per ablutionem corporalem, quam exterius facit, significat et efficit spiritualem; ergo et extrema unctio per sanationem corporalem, quam exterius efficit, significat et causat spiritualem.

Respondeo. Dicendum, quod sicut effectus baptismi est interior ablutio a peccatis, quia sacramentum illud per modum ablutionis confertur, ita effectus hujus sacramenti, quod confertur per modum medicationis, est sanatio quae fit divina virtute: principaliter quidem spiritualis, quae consistit secundum quosdam in remissione peccatorum venialium, quia mortalia dicuntur ante esse purgata per poenitentiam: secundum alios vero in amotione reliquiarum peccati, ut homo plenarie purgatus ad gloriam admittatur. Secundario vero corporalis quae etiam spiritualem significat. Sed hoc non semper fit per sacramentum, sed solum quando expedit ad principalem effectum.

Ad primum dicendum, quod quamvis sine actuali perceptione poenitentiae possit haberi effectus poenitentiae, scilicet per aliquod aliud sacramentum, vel etiam sine sacramento, non tamen sine proposito poenitentiae; ideo nec per hoc, nec per aliud sacramentum, per quod remittitur peccatum ex consequenti propter collationem gratiae quae confertur in eo, cum qua non potest esse peccatum, excluditur sacramentum poenitentiae.

Ad secundum dicendum, quod verum est per se; sed ex consequenti potest ordinari ad salutem corporalem, prout expedit sanitati spirituali.

Ad tertium dicendum, quod oratio illa est forma hujus sacramenti, ut dictum est. Sacramentum autem ex sua forma habet efficaciam: ideo hoc sacramentum virtute orationis praedictae, non tantum spiritualiter, sed et corporaliter aliquando sunt.

QUAESTIO II.

Circa secundum quaeruntur tria: 1.^o quis sit minister hujus sacramenti; 2.^o cui debeat conferri; 5.^o utrum debeat iterari.

ARTICULUS I.

Ad primum sic proceditur. Et 1. videtur, quod laicus possit hoc sacramentum conferre. Quia hoc sacramentum habet efficaciam ex oratione, ut dicit Jacobus: « Sed oratio laici quandoque est accepta Deo » sicut sacerdotis; » ergo potest hoc sacramentum conferre.

2. Praeterea, videtur, quod diaconi possunt:

quia secundum Dionysium, diaconi habent virtutem purgativam: sed sacramentum institutum est tantum ad purgandum ab infirmitate mentis et corporis; ergo diaconi possunt conferre.

5. Praeterea, videtur, quod solus Episcopus possit: quia hoc sacramentum unctione perficitur, sicut et confirmatio: sed solus Episcopus potest confirmare; ergo solus potest hoc sacramentum conferre.

Sed contra est quod dicit Jacobus: « Inducat presbyteros Ecclesiae; » ergo sufficiens minister hujus sacramenti est presbyter.

Respondeo. Dicendum, quod triplex est actus hierarchicus secundum Dionysium: scilicet perficere, illuminare et purgare. Primus pertinet ad Episcopum, qui perficit per verbi Dei praedicationem, et ponendo aliquem in statu perfectionis. Secundus ad presbyteros, qui illuminant per sacramentorum administrationem. Tertius ad diaconos qui purgant per impedimentorum remotionem a sacramentorum perceptione. Quia autem laici non sunt exerceentes sed recipientes actiones hierarchicas, administratio autem sacramentorum est actio hierarchica; ideo ad eos nullius sacramenti pertinet administratio, nisi baptismi propter necessitatem. Sed quia illuminatio quae fit per sacramentum hoc, non pertinet ad diaconos; ideo diaconus, nec eo inferior est minister hujus sacramenti. Rursus, quia per hoc sacramentum non ponitur suscipiens in aliquo statu perfectionis super alios; ideo non solum Episcopis, quorum est perficere, reservatur administratio hujus sacramenti, sed per simplices sacerdotes exerceri potest.

Ad primum, oratio laici, dicendum, quod verum est loquendo de illa oratione quae fit a sacerdote in persona sua, quae, cum sacerdos sit quandoque peccator, non est exaudibilis. Sed hujus sacramenti oratio fit in persona totius Ecclesiae, in cuius persona sacerdos orare potest quasi persona publica, non autem laicus, qui est persona privata.

Ad secundum dicendum, quod quia sacramentum hoc illuminando per gratiae collationem purgat, diacono vero non competit collatio gratiae; ideo non potest illud diaconus administrare.

Ad tertium dicendum, quod non est simile; quia confirmatio imprimat characterem, quo collocatur homo in statu perfectionis, non autem est in hoc sacramento extremae unctionis.

ARTICULUS II.

Ad secundum sic proceditur. Et 1. videtur, quod sanis debeat hoc sacramentum conferri. Quia principalior effectus hujus sacramenti est sanatio tam mentis quam corporis: sed sani corpore indigent sanatione mentis; ergo eis debet hoc sacramentum conferri.

2. Praeterea, videtur, quod in qualibet infirmitate hoc sacramentum conferri debeat. Jac. 5, ubi hoc sacramentum traditur, nulla infirmitas determinatur; ergo in omnibus infirmitatibus debet hoc sacramentum conferri.

5. Praeterea, videtur, quod furiosis et amentibus. Dignius enim est sacramentum baptismus, quam istud: sed baptismus datur furiosis; ergo et hoc sacramentum eis dari debet.

Item videtur quod pueris: quia eisdem infirmitatibus quandoque laborant pueri et adulti: sed eisdem morbo debet adhiberi idem remedium; ergo

sicut adultis, ita et pueris debet hoc sacramentum conferri.

Juxta hoc quaeritur in quibus partibus sint inungendi infirmi,

Respondeo. Dicendum ad quaesitum, quod quia hoc sacramentum per modum corporalis curationis traditur; ideo sanis quibus curatio corporalis non competit, non debet hoc sacramentum conferri. Rursus, quia specialem devotionem requirit in suscipiente hoc sacramentum; ideo furiosis et amentibus et pueris qui hac devotione carent, non debet hoc sacramentum conferri.

Ad primum, Spiritualis sanatio, dicendum, quod verum est, sed tamen oportet quod per curationem corporalem significetur; et ideo non confertur illis quibus non competit sanatio corporalis; sicut nec baptismus confertur, nisi quibus competit ablutio corporalis.

Ad secundum dicendum, quod verum est quantum ad genera infirmitatum; et ideo in qualibet infirmitate augmentata potest hoc sacramentum conferri; non tamen in quolibet statu eujusmodi infirmitatis; sed cum aliquis creditur morti propinquus, quod in qualibet infirmitate esse potest.

Ad tertium dicendum, quod non est simile; quia baptismus est sacramentum necessitatis, non autem extrema unctio. Sed circa hoc sciendum est, quod furiosis et amentibus in quibus praecessit desiderium baptismi eum haberent lucida intervalla, in actu furiae et dementiae, si timetur de periculo mortis confertur sacramentum baptismi; sed hoc sacramentum non nisi cum habent lucida intervalla, debet eis petentibus conferri.

Ad quartum, Eadem est infirmitas, dicendum, quod non tantum infirmitas est causa collationis hujus sacramenti, sed in suscipiente devotio.

Ad secundam quaestionem, dicendum, quod sicut jam dictum est, sacramentum hoc confertur per modum curationis corporalis. Ad curationem autem morbi corporalis, non oportet quod totum corpus inungatur; sed tantum partes in quibus est causa morbi. Sed quia origo morbi spiritualis est in nobis ex quinque sensibus; ideo quasi de essentia sacramenti est quinque sensus inungi: scilicet manus propter tactum, quoniam in pulpis digitorum praecipue tactus viget. Mutilati autem inungi debent quanto propinquius potest esse ad partes illas in quibus inunctio fieri debuerat; quia quamvis non habeant membra, habent tamen potentias animae, quae illis membris debentur, saltem in radice; et interius peccare possunt per ea quae ad partes illas pertinent, quamvis non exterius. Inunctio autem in aliis membris quam in quinque sensibus, utputa in pedibus et renibus, non est de essentia sacramenti; ideoque secundum consuetudinem diversarum ecclesiarum praetermittuntur. Aliquando autem tantum fit illa quae ad pedes, quamvis non ea quae ad renes.

ARTICULUS III.

Ad tertium sic proceditur. Et 1. videtur, quod hoc sacramentum non debeat iterari. Quia dignior est inunctio quae fit homini quam quae fit lapidi. Sed inunctio altaris non iteratur, nisi altare illud fractum fuerit; ergo nec unctio extrema quae adhibetur homini, non debet iterari.

2. Praeterea, post ultimum nihil est: sed haec unctio dicitur extrema; ergo non debet iterari.

3. Praeterea, videtur, quod non in eadem infirmitate. Quia uni morbo non debetur nisi una medicina. Sed hoc sacramentum quaedam spiritualis est medicina; ergo contra unum morbum non debet iterari.

Contra. Morbus, contra quem datur hoc sacramentum, est iterabilis; ergo et hoc sacramentum iterari debet.

Respondeo. Dicendum, quod morbus contra quem datur hoc sacramentum, est iterabilis; quia contingit per diversa peccata diversam debitatem spirituales incurrere; et similiter infirmitatem corporalem iterari contingit; et ideo sine injuria sacramenti potest sacramentum hoc iterari. Sed quia sacramentum hoc non respicit infirmitatem, sed statum infirmitatis propinquum morti; ideo secundum quod talis status in una vel in pluribus infirmitatibus iteratur, hoc sacramentum potest in una vel in pluribus infirmitatibus iterari.

Ad primum de unctione lapidis, dicendum, quod non est simile; quia effectus unctionis in lapide qui est deputatus ad sacra, sive consecratio, est perpetua in lapide; sed effectus extremae unctionis in homine non est perpetuus; et ideo extrema unctio iterabilis est.

Ad secundum dicendum, quod verum est de ultimo quod est secundum veritatem ultimum, non secundum existimationem hominum. Hoc autem sacramentum, dicitur extrema unctio, non secundum veritatem semper, sed secundum hominum existimationem; quia non debet dari nisi illis, quibus mors est propinqua secundum aestimationem hominum.

Ad tertium, Uni morbo non debetur nisi una medicina, dicendum, quod hoc sacramentum non respicit morbum, sed statum morbi qui in uno morbo iterabilis est; et ideo est sacramentum in uno morbo iterabile, praecipue si morbus sit diuturnus, non autem si sit brevis.

DISTINCTIO XXIV.

Nunc ad considerationem sacrae ordinationis etc. (V. edit. nostrae tom. VII, pag. 861.)

QUAESTIO UNICA.

Haec quaeruntur quatuor: 1.º an ordo sit sacramentum; 2.º de distinctione ordinum; 3.º de effectu sacramenti ordinis; 4.º an character unius ordinis alterius characterem praesupponat.

ARTICULUS I.

Ad primum sic proceditur. Et 1. videtur, quod ordo non sit sacramentum. Ordo est relatio quaedam: est enim ordo, ut ait Augustinus in libro de Civitate Dei, parium dispariumque rerum sua cuique tribuens loca dispositio. Sacramentum vero est materiale elementum; ergo ordo non est sacramentum.

2. Praeterea, ordo non est tantum in hominibus, sed etiam in Angelis. In Angelis vero nullum est sacramentum; ergo etc.

3. Praeterea, sacramentum est spiritualis medicina: ordo vero sanis et perfectis, non infirmis datur; ergo non est sacramentum.

Contra. Propter quod unumquodque tale, et i-

psum magis tale: sed alia sacramenta per potestatem ordinis conferuntur; ergo ordo maxime est sacramentum.

Praeterea, sacramentum est sacrae rei signum et causa: ordo est huiusmodi, quia signat spiritualem potestatem, quae in eo confertur homini, et eam causat; ergo ordo est sacramentum.

Respondeo. Dicendum, quod secundum Augustinum, sacramentum est in quo divina virtus sub tegumento rerum sensibilium secretius operatur salutem. Et quoniam in ordine sub tegumento rerum sensibilium divina virtus secretius operatur salutem; ideo est sacramentum. Sed quia consistit in derivatione potestatis recipientis sacramentum a potestate dispensatoris sacramenti, sicut potestas imperfecta derivatur a perfecta; ideo quantum ad formam et materiam differt ab aliis sacramentis; quia forma eius traditur per modum imperativum ad denotationem traductionis praedictae cum expressione actus imperati, per quam potestas derivata cognoscitur. Formae autem aliorum sacramentorum traduntur vel per modum indicativum, ut apparet in baptismo, vel per modum deprecativum, ut apparet in extrema unctione. Differt etiam quo ad materiam; quia in aliis sacramentis, cum nihil derivetur a dispensatore eorum in suscipientem, sed a Deo tantum; ideo in eis principalitas sacramenti consistit in materia sacramenti, quae ex sanctificatione divinam virtutem continet, et non in sacramenti dispensatore. Sed e converso est hic, quia traducitur potestas a potestate dispensatoris; ideoque principalitas sacramenti consistit in eius ministro, non in eius materia. Materia autem adhibetur tantum ad determinandum potestatem, quae particulariter traditur ab habente eam complete. Ideo quidam dicunt, quod tactus materiae non est de essentia sacramenti. Alii vero dicunt verius, quod ipse tactus importatur per formam; ideoque est de sacramenti essentia.

Ad primum dicendum, quod ordo non dicitur hic habitudo diversorum; sed potestas per quam quis super alios constituitur, vel ritus in quo confertur talis potestas.

Ad secundum dicendum, quod non accipitur univoce in Angelis et in hominibus ordo; quia potestas eorum non datur in aliquo sensibili, sicut potestas hominum.

Ad tertium dicendum, quod ordo medicina est, non propter ipsum in quo est, sed propter alterum: est enim collatus non in remedium personae, sed Ecclesiae; unde datur ad tollendum defectum ignorantiae in Ecclesia, potius quam in persona.

ARTICULUS II.

Ad secundum sic proceditur. Et 1. videtur, quod non sint septem ordines. Quia in primitiva Ecclesia non fuerunt nisi tres ordines: scilicet Episcopi, presbyteri et diaconi: si ergo plures sunt modo, aut ibi fuit diminutio ordinum, aut hic superfluitas.

2. Praeterea, ordines distinguuntur secundum actus ordinum: sed actus ordinum non sunt nisi tres: scilicet purgare, illuminare et perficere: ergo non sunt nisi tres ordines.

3. Praeterea, divisio ordinum haec, aut est totius universalis in partes subjectivas, aut totius integralis in partes integrales. Si in partes subjectivas; ergo sacramentum ordinis de quolibet ordine praedicatur; ergo tot sunt sacramenta, quot sunt ordines. Si in

partes integrales; ergo ordo de nullo ordine speciali praedicatur.

Contra. Videtur, quod sint plures quam septem: quia Dionysius Episcopatum ordinem appellat. In litera etiam dicitur, quod est ordo Episcoporum quadripartitus; ergo praeter septem ordines, episcopatus est ordo octavus.

Praeterea, ordo importat quemdam dignitatis gradum: sed clericus, ex hoc ipso quod clericus est, in gradu super populum constituitur; ergo tonsura per quam efficitur clericus, est aliquis ordo praeter septem enumeratos.

Respondeo. Dicendum, quod potestas ordinis ordinatur ad corpus Christi verum prout sub sacramento Eucharistiae continetur; unde et ordinati consecrantur, sicut altare et vasa quae ad Eucharistiam ordinantur: et haec ministrorum consecratio est ordinis sacramentum. Potest autem sacramentum ordinis ordinari ad corpus Christi verum contentum sub Eucharistia, dupliciter. Vel secundum se, vel propter corpus Christi mysticum, praeparandum ad receptionem corporis eius veri. Si primo modo, hoc potest esse quadrupliciter. Aut enim ordinatur ad Eucharistiae consecrationem, et sic est ordo sacerdotalis. Vel ad sanguinis administrationem, et sic ordo diaconatus. Vel ad materiae eius praeparationem et in sacris vasis collationem, et sic est ordo subdiaconatus. Vel ad materiae praeparationem tantum, et sic est acolythatus. Si autem ordinetur ad corpus Christi verum propter corporis mystici praeparationem, hoc potest esse tripliciter secundum tria genera immundorum: quia qui jam sunt mundati, sunt etiam praeparati. Primum autem genus immundorum, secundum Dionysium, est infidelium, qui omnino credere nolunt. Secundum est volentium credere, ignorantium autem quid sit credendum. Tertium scientium, sed impeditorum aliqua daemonis operatione. Primi excludendi sunt ab Eucharistiae participatione, secundi sunt instruendi, tertii adjuvandi. Ideo ad primorum exclusionem institutus est ordo ostiariorum; ad secundorum eruditionem, institutus est ordo lectorum; ad remotionem impedimentorum a tertii, institutus est ordo exorcistarum.

Ad primum dicendum, quod quia pauciores erant fideles, ideo minor multiplicatio ministrorum fuit necessaria; sed multiplicato cultu divino, oportet ministros cultus multiplicari. Sub ordine autem diaconatus omnes inferiores ordines a Dionysio comprehenduntur.

Ad secundum dicendum, quod secundum illos non distinguuntur ordines in speciali, sed secundum actus potestatum sacramentalium, ut jam dictum est.

Ad tertium dicendum, quod secundum Boetium, triplex est totum. Totum universale, quod adest secundum essentiam et totam virtutem cuilibet suae parti, et totum potentiale, quod adest cuilibet suae parti secundum essentiam, non tamen secundum totam virtutem, immo tantum parti superiori: et totum integrale, quod nec secundum essentiam, nec secundum virtutem adest cuilibet suae parti. Divisio ordinis in speciales ordines, nec est divisio totius universalis nec totius integralis, sed totius potentialis.

Ad quartum dicendum, quod ordo potest dupliciter accipi. Uno modo secundum quod est sacramentum; et sic omnis ordo ordinatur ad Eucharistiam. Unde, cum Episcopus non habeat potestatem superiorem sacerdote respectu Eucharistiae, episco-

patus non erit ordo. Alio modo accipitur ordo secundum quod est officium quoddam respectu quarumcumque actionum sacrarum; et sic, cum Episcopus habeat potestatem in actibus hierarchicis respectu corporis mystici, supra sacerdotem, episcopatus erit ordo: et secundum hoc loquuntur auctoritates inductae.

Ad quintum dicendum, quod ex hoc quod aliquis est clericus, est in altiori statu quam laicus: non tamen habet ampliorem potestatis gradum, qui ad ordinem requiritur. Et ideo tonsura non est ordo, sed potius ad ordines dispositio.

ARTICULUS III.

Ad tertium sic proceditur. Et 1. videtur, quod ordo non imprimat characterem, quantum ad omnes ordines: quia ordinis character est quaedam potestas spiritualis: sed quidam ordines non ordinantur nisi ad quosdam actus corporales, ut patet in ostiariis et acolythis; ergo in eis non imprimitur character.

2. Praeterea, omnis character est indelebilis; ergo per characterem homo ponitur in tali statu a quo non possit recedere: sed illi qui habent minores ordines, possunt licite redire ad laicatum accipiendo uxorem; ergo non imprimitur character in omnibus ordinibus.

3. Praeterea, videtur, quod nec gratia gratum faciens conferatur. Nulla causa praesupponit effectum suum: sed in eo qui accedit ad ordines praesupponitur gratia, ut dicitur; ergo talis gratia non confertur in ordinis collatione.

Contra. Omne sacramentum, in quo non imprimitur character, est iterabile: sed nullus ordo est iterabilis; ergo in quolibet ordine imprimitur character.

Praeterea, videtur, quod ordo causa sit gratiae. Ordo enim est sacramentum novae legis; sed tale sacramentum est causa gratiae in suscipiente; ergo sacramentum ordinis confert gratiam.

Respondeo. Dicendum, quod circa hoc sunt tres opiniones. Quidam enim dicunt, quod in solo sacerdotali ordine character imprimitur. Alii vero dicunt, quod in sacris ordinibus character imprimitur, non autem in minoribus. Sed contra utrumque est, quia in quolibet ordine confertur spiritualis potestas ad sacramentorum seu sacramentalium dispensationem, quae nihil aliud est quam character; quae dispensatio non competit nisi habentibus hanc potestatem. Ideo dicendum est cum aliis, quod in quolibet ordine character imprimitur. Cujus signum est, quod perpetuo manent, et nunquam iterantur.

Ad primum dicendum, quod hujusmodi actus, quamvis sint corporales, ordinantur tamen ad sacramentorum dispensationem; sicut ostiarii habent actum admittendi homines ad divinorum sacramentorum inspectionem, et sic de aliis; et ideo in omnibus requiritur potestas spiritualis.

Ad secundum dicendum, quod quantumcumque homo se ad laicatum transferat, semper tamen in eo manet character: quod patet ex hoc quod si ad clericatum revertatur, non iterum ordinem, quem habuerat, suscipit.

Ad tertium dicendum, quod gratiam quam praesupponit non confert, sed potius augmentum gratiae. Ratio autem, quare conferat gratiam, haec est, quia Dei perfecta sunt opera: et ideo cui datur

spiritualis potestas ad sacramentum aliquod exequendum, datur gratia ad id congrue exequendum. Et ideo, quia in ordine potestas spiritualis confertur ad sacramentorum dispensationem, confertur gratia ad congrue dispensandum.

ARTICULUS IV.

Ad quartum sic proceditur. Et 1. videtur, quod character unius ordinis praesupponat characterem alterius. Major est convenientia ordinis ad ordinem, quam ordinis ad aliud sacramentum: sed character ordinis praesupponit characterem alterius sacramenti, scilicet baptismi; ergo multo fortius character unius ordinis praesupponit characterem alterius.

2. Praeterea, ordines sunt quidam gradus: sed nullus potest pervenire ad posteriorem gradum, nisi prius priorem conscenderit; ergo nullus potest accipere characterem ordinis sequentis nisi prius accipiat ordinem praecedentem.

3. Praeterea, videtur, quod praesupponat characterem confirmationis. Quia in his quae sunt ordinata ad invicem, sicut medium praesupponit primum, ita ultimum praesupponit medium: sed character confirmationis praesupponit baptismalem quasi primum; ergo character ordinis praesupponit characterem confirmationis, quasi medium.

Contra. Si omittatur aliquid de sacramento, quod sit de necessitate sacramenti, oportet quod sacramentum iteretur: sed si aliquis accipiat sequentem ordinem praetermisso primo, non reordinatur, sed confertur sibi quod deerat, secundum statuta canonum; ergo praecedens ordo non est de necessitate sequentis.

Praeterea, Apostoli receperunt potestatem ordinis ante passionem Christi, Matth. 26, quando Dominus potestatem dedit discipulis in coena conficiendi corpus suum: sed confirmati sunt post ascensionem per adventum Spiritus sancti; ergo ordo non praesupponit confirmationem.

Respondeo. Dicendum, quod ad susceptionem ordinis praesupponitur aliquid dupliciter. Uno modo quasi de necessitate sacramenti: et sic character baptismalis praesupponitur, per quem efficitur aliquis ordinis susceptivus. Alio modo de congruitate; et sic requiritur omnis perfectio, per quam aliquis idoneus redditur ad ordinis executionem; et sic exigitur confirmatio. Sed quia potestates ordinum sunt distinctae, ideo una non de necessitate, sed de congruitate requirit aliam. Unde in primitiva Ecclesia aliqui ordinabantur in presbyteros et diaconos, qui prius ordines inferiores non susceperant. Hinc est, quod ordinati per saltum non reordinantur, sed ordo omissus eis confertur. De necessitate tamen praesupponit, unus alterum praesupponit.

Ad primum, Magis convenit ordo etc., dicendum, quod verum est secundum similitudinem speciei; non tamen secundum proportionem potentiae ad actum, quia per baptismum acquirit homo potentiam passivam recipiendi ordines, sed non per inferiores recipiendi majorem ordinem.

Ad secundum dicendum, quod verum est de gradibus qui habent ordinem necessitatis ad invicem, non autem congruitatis.

Ad tertium dicendum, quod verum est de primo medio et ultimo quae habent eundem ordinem ad invicem; et sic non est in proposito; quia confirmatio habet ordinem essentialem ad baptismum,

qui est janua sacramentorum; ordo autem congruitatis habet ordinem ad confirmationem.

DISTINCTIO XXV.

Solet etiam quaeri etc. (V. edit. nostrae tom. VII, pag. 904.)

Hic quaeruntur duo. Primo de potestate conferentis ordines. Secundo de vitio collationis, idest, simonia.

QUAESTIO I.

Circa primum quaeruntur duo: 1.^o an solus Episcopus possit ordinare; 2.^o an Episcopus haereticus, vel praecisus.

ARTICULUS I.

Ad primum sic proceditur. Et 1. videtur, quod non solus Episcopus possit ordinare. Magis enim praecellit presbyter diaconum, quam Episcopus Episcopum; sed Episcopus potest consecrare Episcopum; ergo presbyter diaconum.

2. Praeterea, quae ad solum Episcopum pertinent, alteri committi non possunt. Sed ordinare presbyteris Cardinalibus committitur: conferunt enim minores ordines; ergo ordinare non pertinet ad solum Episcopum.

3. Praeterea, qui habet principale et majus, multo magis accessorium et minus: sacramentum ordinis est minus et accessorium ad sacramentum altaris; ergo qui potest conferre sacramentum altaris, multo magis potest conferre sacramentum ordinis.

Contra. Isidorus lib. Etym. dicit: « Episcopus ipse, summus sacerdos, et pontifex maximus nominatur: ipse enim efficit sacerdotes, et levitas, ipse omnes ordines ecclesiasticos disponit; » ergo ad ipsum solum pertinet ordinare.

Praeterea, non minus ad minorem pertinet in exercitu duces praeponere quam milites ascribere: sed ad solum Episcopum pertinet in exercitu Ecclesiae militantis ascribere milites per sacramentum confirmationis; ergo multo fortius duces praeponere, quod fit per sacramentum ordinis.

Respondeo. Dicendum, quod collatio ordinum alicui dupliciter convenire potest. Aut de jure communi, ratione suae ordinariae potestatis; aut ex indulgentia sive generali sive speciali, ratione commissionis: et hoc ultimo modo conferre minores ordines convenit aliquibus, qui non sunt Episcopi, sed sacerdotes. Primo autem modo, conferre quoscumque ordines convenit solis Episcopis. Duo enim requiruntur ad collationem ordinis. Unum est adeptio ordinis illius quem confert; quia quod non habet quis dare non potest. Alterum, gradus potestatis; quia major omni ordine debet esse, qui omnes ordines confert.

Ad primum ergo dicendum, quod non sufficit ad ordinandum excellentia ordinis; sed requiritur excellentia dignitatis.

Ad secundum dicendum, quod quamvis pertineat ad solum Episcopum de jure communi, ab eo tamen qui est supra jus, non ab alio, potest non Episcopo committi potestas, minores ordines conferendi.

Ad tertium dicendum, quod quamvis sacramen-

tum ordinis ordinetur ad sacramentum altaris, non tamen est accessorium ejus; imo quoddam sacramentum principale. Et quamvis per se sit illo minus, non tamen in illo includitur. In his vero, quae in se includuntur, sicut minor numerus in majori, qui potest quod majus est, potest quod minus est.

ARTICULUS II.

Ad secundum sic proceditur. Et 1. videtur, quod Episcopi haeretici vel praecisi ab Ecclesia, non possint conferre ordines: quia in episcopali consecratione non imprimitur character; ergo Ecclesia potest dignitatem episcopalem auferre; ergo cum ille cui ablata est, jam non sit Episcopus, non potest ordinare.

2. Praeterea, nullus potest ordinare nisi ut minister Ecclesiae, sed qui praecisus est ab Ecclesia non est minister Ecclesiae; ergo non potest ordinare.

3. Praeterea, plus est aliquem ad ordinem promoveri, quam in foro poenitentiali absolvere vel ligare. Sed haereticus vel praecisus non potest solvere vel ligare; ergo nec ordinare.

Contra: sicut se habet sacerdos ad potestatem consecrandi, ita Episcopus ad potestatem ordinandi: sed haereticus et praecisus ab Ecclesia potest consecrare, ut dictum est supra; ergo et Episcopus ordinare.

Praeterea, in sacramentorum collatione non differt bonus a malo, dummodo habeat intentionem et servet formam; ergo nec infidelis a fidei: sed fidelis potest ordinare; ergo etiam infidelis.

Respondeo. Dicendum, quod haereticus et praecisus ab Ecclesia, etsi de jure non possit ordinare, tamen de facto potest: unde si ordinet, ordinatum est. Et hujus ratio est, quia secundum Hugonem, ad ordinandum non exiguntur nisi quatuor. Dignitas episcopalis cum ordinibus habitis secundum veritatem, prolatio verborum in quibus forma consistit, intentio, et materia debita. Omnia vero ista potest habere haereticus et praecisus, et ita potest ordinare.

Ad primum dicendum, quod quamvis character non imprimatur, tamen ob reverentiam consecrationis potestas sic collata nunquam amittitur.

Ad secundum dicendum, quod in quantum ordinem retinet Ecclesiae, et servat Ecclesiae formam, minister Ecclesiae est, licet non simpliciter.

Ad tertium, plus est ordinare, dicendum, quod plus est, idest majoris dignitatis, sed non plus, idest majoris jurisdictionis: immo minus; et hoc patet: quia Episcopus non suum subditum potest ordinare, non tamen solvere vel ligare.

QUAESTIO II.

Circa secundum quaeruntur duo: 1.^o utrum simoniacus possit ordinem emere vel vendere; 2.^o utrum simoniacus perdat ordinis executionem.

ARTICULUS I.

Ad primum sic proceditur. Et 1. videtur, quod simoniacus non possit emere ordinem. Gregorius I quaest. 1 dicit: « Quicumque studet pretii datione sacerdotii ordinem accipere, non est sacerdos; » ergo sacerdotii ordo emi non potest, et per consequens nec alius quicumque; ergo etc.

2. Praeterea, videtur, quod non possit vendere

ordinem. Leo enim Papa I, quaestione 1 dicit sic: « Si gratis non datur vel accipitur, gratia non est. » Sed talis non gratis dat; ergo nulla gratia datur ibi; ergo nullum sacramentum.

5. Praeterea, dona Spiritus sancti sunt in potestate Dei, non hominis. Sed quilibet ordo est donum Spiritus sancti; ergo non est sub potestate hominis; ergo ab homine non potest vendi vel emi.

Contra. Nihil prohiberi debet, quando non potest fieri: sed prohibetur ne ordines vendantur; ergo etc.

Praeterea, quod potest furtive accipi, potest emi vel vendi: sed ordo potest furtive accipi; ergo etc.

Respondeo. Dicendum, quod quaedam sunt pure spiritualia, ut gratiae et virtutes. Alia annexa vel conjuncta rei corporali, quae ex hac unione sacra efficitur, sicut ordines in exterioribus ritibus corporalibus qui sunt sancti, et character collatus per corporalem ablutionem. Alia sunt spiritualia annexa corporalibus, manentibus corporalibus sacris, ut consecratio calicis, jus patronatus in aliquo fundo. Prima, nec de jure nec de facto possunt vendi, quia non est in potestate hominis illa dare. Secunda possunt vendi de facto, sed non de jure; et hoc est quia facta corporalia in quibus dantur spiritualia venduntur. De jure tamen neutrum vendi potest. Ultima vero quantum ad id quod est corporale ibi, etiam cum manet sacramentum, possunt vendi, et transit spirituale cum corporali. Sed quantum ad id quod est spirituale vendi non possunt. Unde si ratione spiritualis plus emeretur vel venderetur, vel principaliter spirituale intenderetur emi vel vendi, simonia committeretur.

Ad primum, de Gregorio, dicendum, quod dicitur non esse sacerdos, quia caret sanctitate ordinis, non quia careat ipso ordine.

Ad secundum dicendum, quod verum est ex parte vendentis vel ementis, sed non ex parte Dei qui gratis dat. Vel dicendum, quod loquitur de gratia gratum faciente, quae impeditur per culpam recipientis.

Ad tertium dicendum, quod ratione eorum in se non possunt vendi; sed ratione ejus cui conjunguntur possunt vendi de facto.

ARTICULUS II.

Ad secundum sic proceditur. Et 1. videtur, quod simoniacus non perdat executionem ordinis. Quia contingit in ordinatione alicujus committi simoniam, eo ignorante: sed homicidium casuale, propter hoc quod est per ignorantiam commissum, non facit irregularitatem; ergo et similiter ille qui simoniae ordinatur non est irregularis.

2. Praeterea, ab eo qui non habet executionem ordinis nullus debet sacramentum accipere: sed ab eo quem scio simoniacum debeo ordines accipere, si mihi praecipiat, ne sim inobediens; ergo non amittit ordinis executionem.

Sed contra. Videtur, quod simoniacus nec ordinem recipiat, quia defectus intentionis evacuat sacramentum: sed ille qui pretio aliquid intendit acquirere in susceptione ordinis, non intendit suscipere quod Ecclesia tradit: quia illud non cadit sub pretio; ergo non suscipit ordinem.

Praeterea, fides requiritur ad sacramentum, quia dirigit intentionem, sive qua non est sacramentum;

S. Th. Opera omnia. V. 22.

ergo haereticus non suscipit ordinis sacramentum. Simoniacus autem est haereticus, quia ut dicit Gregorius in Registro: « Altare, decimas et Spiritum sanctum emere vel vendere, simoniacam haeresim esse, nullus fidelium ignorat; » ergo etc.

Respondeo. Dicendum, quod in hoc distinguendum est: quia si dicatur simoniacus ex hoc quod recipit ordinem per simoniam, non recipit executionem, et est ipso jure suspensus et quo ad se et quo ad alios, et punitur ulterius per dispositionem quando constiterit de crimine iudici. Si autem dicatur simoniacus quia contulit ordinem simoniae, vel quia dedit vel recepit beneficium simoniae, vel quia mediator fuit simoniae, si sit occultus, suspensus est ipso jure quo ad se. Si autem manifestus, est suspensus quo ad se et quo ad alios. Et iterum ille qui recipit beneficium per simoniam tenetur ad restitutionem omnium fructuum perceptorum et beneficio renunciare. Sed quia nullum sacramentum perficitur in merito dispensatoris sed in virtute Spiritus sancti; ideo peccatum simoniae, nec sacramentum suscipiendum impedit, nec susceptum tollit. Potest tamen impedire ultiam rem sacramenti, si sit peccatum ex parte recipientis.

Ad primum, de homicidio, dicendum, quod non est simile: quia propter homicidium fit tantum defectus in ordinato, sed propter simoniam fit defectus in ipsa ordinatione, quia ipsum sacramentum ponitur sub pretio; et ideo sufficit, quod ordinatus sit immunis secundum suam conscientiam de homicidio; tamen est suspensus, quando ad notitiam ejus devenerit.

Ad secundum dicendum, quod quando manifestum est crimen simoniae, tunc ordinator amittit executionem, et suspensus est quo ad se et quo ad alios. Sed quando est occultum, suspensus est quo ad se tantum. Et ideo si sit manifestum, secundum quod in jure dicitur aliquid manifestum, tunc nullo modo aliquis debet ei obedire, nec ab eo ordinem recipere. Si autem non sit manifestum et non potest quis subterfugere praeceptum, debet obedire, etiam si sciat ordinatorem esse simoniacum.

Ad tertium dicendum, quod ipse non intendit emere illud quod est per se spirituale, ut characterem; sed operationem ministri quae est corporalis et causa rei spiritualis.

Ad quartum dicendum, quod simoniacus dicitur haereticus, non proprie, sicut ille qui errat in credendis, sed similitudinarie, quia operatur ad modum errantis emendo vel vendendo spiritualia, ac si crederet Spiritum sanctum esse sub hominis potestate. Nec tamen sequitur, quod haereticus non possit ordinem suscipere vel conferre; quia si non erret circa ordinis sacramentum, in nullo intentio impeditur. Si autem circa hoc erret, potest intendere dare vel suscipere quod Ecclesia intendit, sicut in baptismo et Eucharistia.

DISTINCTIO XXVI.

Cum alia sacramenta post peccatum etc. (V. edit. nostrae tom. VII, pag. 916.)

QUAESTIO UNICA.

Hic quaeruntur quatuor: 1.º utrum matrimonium sit sacramentum; 2.º de institutione ejus; 5.º utrum

carnalis copula, sit de integritate ipsius; 4.^o utrum carnalis copula possit esse sine peccato.

ARTICULUS I.

Ad primum sic proceditur. Et 1. videtur, quod matrimonium non sit sacramentum novae legis. Omne enim sacramentum novae legis, habet formam determinatam verborum et aliquod materiale elementum pro materia: sed matrimonium haec non habet; ergo non est sacramentum.

2. Praeterea, in aliis sacramentis est aliquid quod est res et sacramentum, sicut character in baptismo: sed nihil tale potest in matrimonio inveniri; ergo non est sacramentum.

3. Praeterea, omne sacramentum novae legis gratiam confert: sed hoc matrimonio non competit, quia sic non esset perfectionis a matrimonio abstinere; ergo matrimonium non est sacramentum.

Sed contra est quod dicitur Ephes. 5: « Sacramentum hoc magnum est, loquitur autem de matrimonio; ergo est sacramentum.

Praeterea, sicut in Ecclesia est necessaria spiritualis multiplicatio, ita et naturalis. Sed ad spiritualem multiplicationem ordinatur aliquod sacramentum, scilicet sacramentum ordinis; ergo matrimonium, quod ordinatur ad multiplicationem naturalem, est sacramentum.

Respondeo. Dicendum, quod de ratione sacramenti est ut aliquod sacrum significet et remedium praebet contra vulnus peccati. Haec autem duo matrimonio conveniunt. Significat enim conjunctionem Christi et Ecclesiae. Praebet etiam remedium contra vulnus peccati concupiscentiae ex peccato relictum. Et ideo merito inter sacramenta novae legis computatur.

Ad primum ergo dicendum, quod verba exprimentia consensum de praesenti, sunt forma hujus sacramenti, non autem sacerdotalis benedictio quae non est de necessitate sacramenti, sed de solemnitate. Pro materia vero habet actus contrahentium matrimonium, sicut de poenitentia dictum est.

Ad secundum dicendum, quod in hoc sacramento actus exterius apparentes sunt sacramentum tantum; obligatio vero quae de his nascitur est res et sacramentum; sed effectus vel significatum hujus sacramenti est res tantum.

Ad tertium dicendum, quod quidam dixerunt in matrimonio nullo modo gratiam dari; sed quod remedium contra peccatum praestare dicitur, est propter hoc quod ejus actus a peccato excusatur et impedit illicitas concupiscentiae corruptelas. Sed secundum hoc non posset inter sacramenta novae legis computari, nisi aequivoce; nec haberet aliquid plus in nova lege quam in veteri. Et ideo alii dicunt, quod confertur ibi gratia ordinata ad recessam a malo, non ad operationem boni. Sed quia eadem gratia impedit peccatum et inclinatur ad bonum; ideo alii dicunt probabilius, quod matrimonium, in quantum in fide Christi contrahitur, habet ex passione Christi, sicut et caetera sacramenta, quod conferat gratiam ad reprimendum concupiscentiam et merito implendum hoc ad quod matrimonium ordinatur. Nec propter hoc sequitur quod abstinere a matrimonio non sit perfectionis; quia in abstinentibus sunt alia quae magis conferunt ad gratiae augmentum.

ARTICULUS II.

Ad secundum sic proceditur. Et 1. videtur, quod matrimonium institutione non indigeat. Illud enim quod est de jure naturali non indiget institutione: sed matrimonium est hujusmodi, ut patet Gen. 2. ubi dicitur: « Quamobrem relinquet homo etc. »; ergo non indiget institutione.

2. Praeterea, sacramenta sunt post peccatum instituta, cum sint medicinae contra peccatum: sed matrimonium fuit ante peccatum, ut patet ibidem; ergo non habet institutionem.

3. Praeterea, si matrimonium est aliquando institutum, praecipue institutum fuisse videtur per hoc quod Deus dixit Genesis 1: « Crescite et multiplicamini etc. » eum institutio sacramenti non possit esse nisi a Deo. Sed verba illa dicuntur per modum praecepti; ergo sequeretur, quod omnes essent obligati ad matrimonium contrahendum: quod patet esse falsum: et sic matrimonium non habet institutionem.

Sed contra est, quod dicit Hugo de sancto Victore, quod sacramentum ex institutione significat: sed matrimonium est sacramentum, ut dictum est; ergo habet institutionem.

Praeterea, Matth. 19 dicitur: « Non legistis ab initio, quod qui fecit homines, masculum et feminam fecit illos? » Et postea subditur: « Quod ergo Deus conjunxit, homo non separet. » Matrimonium ergo est divinitus institutum.

Respondeo. Dicendum, quod matrimonium dupliciter potest considerari. Uno modo secundum quod est in officium naturae; et sic non indiget aliqua institutione, nisi inclinatione naturali ad matrimonium contrahendum in generali; quamvis quantum ad aliquas matrimonii condiciones indigent determinatione per statutum juris divini vel humani. Alio modo potest considerari prout est in remedium peccati: quod contingit dupliciter. Uno modo ex parte actus qui a peccato excusatur et actus turpes impedit; et sic fuit institutum post peccatum. Alio modo ex parte effectus, qui est supra ipsam concupiscentiam, reprimens ipsam in sua radice; et sic habet institutionem in nova lege per approbationem Christi, ut patet Matth. 19 et 1 Cor. 7.

Ad primum ergo dicendum, quod matrimonium est naturale, prout est in officium naturae. Sic autem peccatum dicitur institutum, tum in quantum est homini indita naturalis inclinatio ad matrimonium; tum in quantum est edoctus divinitus de specialibus matrimonii conditionibus.

Ad secundum dicendum, quod post peccatum est institutum matrimonium, prout est in remedium peccati; sed ante peccatum, prout est in officium naturae.

Ad tertium dicendum, quod praeceptum de matrimonio non pertinet ad perfectionem unius singularis personae, sicut praeceptum de honore parentum; sed pertinet ad perfectionem speciei. Unde hoc modo obligat, quod quilibet illud tenetur implere; cum sit necessarium quod aliqui generationi vacent et aliqui contemplationi, et praecipue pro tempore gratiae, quando jam humanum genus est multiplicatum, et augmentatio cultus divini non fit per carnalem generationem, sicut in veteri lege, sed per spiritualem.

ARTICULUS III.

Ad tertium sic proceditur. Et 1. videtur, quod carnalis commistio sit de integritate sacramenti matrimonii. Ratio enim sacramenti in significando consistit, significatio matrimonii per carnalem copulam completur; ergo est de integritate sacramenti.

2. Praeterea, finis maxime pertinet ad perfectionem rei: sed matrimonium non consequitur finem suum, scilicet bonum prolis, nisi per carnalem copulam; ergo carnalis copula est de integritate matrimonii.

3. Praeterea, perfectio sacramenti ex institutione dependet: sed in institutione matrimonii facta est mentio de carnali copula, cum dicitur Genesis 2: « Erunt duo in carne una; » ergo carnalis copula est de integritate matrimonii.

Sed contra. In Beata Virgine et Joseph carnalis copula non intercessit; fuit tamen inter eos verum matrimonium; ut dicitur Matth. 1: « Noli timere accipere Mariam conjugem tuam; » ergo carnalis copula non est de integritate matrimonii.

Praeterea, in paradiso non fuit carnalis copula, ibi fuit tamen matrimonium; ergo matrimonium non habet de sui integritate carnalem copulam.

Respondeo. Dicendum, quod duplex est rei perfectio: scilicet prima quae pertinet ad esse rei, prout forma dicitur perfectio rei prima; et secunda quae pertinet ad operationem, prout operatio dicitur actus secundus, ut patet in secundo de Anima. Primo ergo modo carnalis copula non est de matrimonii integritate, quia sine hac matrimonium habet esse perfectum ex sua materia et forma: sed secundo modo est de perfectione ipsius. Nam carnalis copula est quidam matrimonii usus. Et per hoc patet solutio ad objecta.

ARTICULUS IV.

Ad quartum sic proceditur. Et 1. videtur, quod carnalis copula non possit esse sine peccato. Nihil enim habet indulgentiam, nisi peccatum: sed carnalis copula etiam in matrimonio, indulgentia indiget, unde dicitur 1 ad Corinth. 7: « Ego autem vobis parco: » ergo carnalis copula, etiam in matrimonio, non est sine peccato.

2. Praeterea, peccatum ex peccato originali causatur: sed libido quae est in carnali copula causat peccatum originale etiam in pueris, qui ex matrimonio nascuntur, propter sui fervorem; ergo ipsa est peccatum; et praecipue cum superfluitas passionum sine vitio non sit.

3. Praeterea, nihil impedit a rebus divinis nisi peccatum, secundum illud Isa. 59: « Iniquitates vestrae diviserunt inter vos et Deum vestrum: » sed carnalis copula est huiusmodi. Unde Exod. 15: « Praecipitur populo qui debebat Deum videre, quod non accederent ad uxores; » ergo carnalis copula non est sine peccato.

Sed contra. Peccatum sub praecepto non cadit. Sed carnalis copula cadit sub praecepto, ut patet 1 Corinth. 7: « Uxori vir debitum reddat; » ergo non est peccatum.

Praeterea, si causa est bona, et effectus bonus: sed carnalis copula est effectus matrimonii; ergo cum matrimonium sit bonum, ut pote a Deo institutum, videtur, quod carnalis copula sit bona; et sic potest esse sine peccato.

Respondeo. Dicendum, quod carnalis copula in matrimonio junctorum potest considerari quantum ad tria. Primo quantum ad naturam quae per eam propagatur et ad eam inclinatur; et sic stat quod est bona, nisi secundum Manichaeos ponatur natura corporalis esse mala, quorum est error qui in litera ponitur. Alio modo potest considerari quantum ad concupiscentiam ex peccato relictam ex qua quaedam foeditatem et turpitudinem habet. Tertio modo potest considerari quantum ad gratiam, prout matrimonium est sacramentum, et sic iterum constat quod est bona. Sic ergo dicendum est, quod carnalis copula, si movet principaliter natura tantum, bona est, sed non meritoria, ut patet in his qui gratia carent quando propter prolem commisceantur. Si vero movet principaliter gratia, sic etiam est meritoria; est enim actus religionis cum quis ad uxorem accedit propter prolem generandam ad cultum Dei; vel justitiae, cum quis uxorem cognoscit ut debitum reddat. Si vero concupiscentia principaliter moveat, semper est peccatum, sed quandoque veniale, quando scilicet non fertur ultra limites matrimonii, cum scilicet quis consentit uxori commisceri propter delectationem; non autem si non esset uxor. Quandoque vero est mortale, si concupiscentia feratur ultra limites matrimonii, ut accedens ad uxorem, intendens delectari cum ea, etiam si uxor non esset.

Ad primum dicendum, quod de carnali copula, secundum quod ad ipsam movet libido infra limites matrimonii consistens, est indulgentia talis qualis est de minoribus malis. Si vero ad eam movet virtus, habet indulgentiam quae est de minoribus bonis, quae magis proprie concessio, quam indulgentia nominatur.

Ad secundum dicendum, quod in statu peccati, licet quandoque concupiscentia non sit movens in carnali copula, semper tamen est concomitans; et ideo ille actus semper habet aliquam foeditatem poenalem, quae in quantum est filia peccati, ut dicit Augustinus, transmittit peccatum in prolem, non tamen semper est culpabilis, quia illa delectationis vehementia non subiacet imperio rationis.

Ad tertium dicendum, quod carnalis copula non impedit habituales conjunctiones ad Deum, sicut mortalia faciunt, sed actuales, quae est per contemplationem; sicut etiam faciunt multae occupationes quae non sunt peccata.

DISTINCTIO XXVII.

Post hoc autem advertendum est etc. (V. edit. nostrae tom. VII, pag. 925)

QUAESTIO UNICA.

Hic quaeruntur quatuor: 1.º quid sit matrimonium; 2.º de causa ejus; 3.º de praeparatione ipsius, scilicet de sponsalibus; 4.º de effectu ejus, scilicet de irregularitate quam bigamus incurrit.

ARTICULUS I.

Ad primum sic proceditur. Et 1. videtur, quod matrimonium in litera inconvenienter describatur. Conjunctio enim est quaedam relatio: sed matrimonium non est relatio, sed relationis causa, cum

sit quoddam vinculum; ergo inconvenienter dicitur conjunctio.

2. Praeterea, matrimonium a matre denominatur, quod solum ad mulierem pertinet; ergo inconvenienter in definitione matrimonii ponit virum et mulierem.

3. Praeterea, non est eadem numero relatio aequiparantiae in utroque extremorum, ut Avicenna dicit: cum ergo matrimonium sit hujusmodi, quia est conjunctio, sequitur quod si est duorum, scilicet maris et feminae, non sit unum, sed duo.

4. Praeterea, per matrimonium non solum vir efficitur maritus, sed mulier efficitur uxor; ergo matrimonium non magis debet dici conjunctio maritalis, quam uxoria.

5. Praeterea, consuetudo vitae ad mores pertinet: sed frequenter matrimonio conjuncti sunt moribus diversi; ergo inconvenienter additur, individuum vitae consuetudinem retineus.

Respondeo. Dicendum, quod in hac matrimonii descriptione essentia matrimonii notificatur quantum ad tria: scilicet quantum ad id quod est formale in matrimonio, cum dicitur, Conjunctio matrimonialis; et quantum ad id quod est materiale, in hoc quod dicit: Viri et mulieris et inter legitimas personas; et quantum ad effectum in hoc quod dicit: Individuum vitae etc. Nam indissolubilitas quae ibi tangitur est matrimonii effectus.

Ad primum ergo dicendum, quod recte matrimonium conjunctio dicitur, eo quod per matrimonium aliqui adinvicem colligantur. Nec est vinculum ligans effective, sed formaliter, quod non est aliud a conjunctione.

Ad secundum dicendum, quod denominationes maxime fiunt a fine. Et quia ad finem matrimonii, qui est bonum prolis, propinquius se habet mater, quam pater, quae prolem portat, parit et nutrit; ideo magis matrimonium a matre nominatur. Dicitur etiam conjugium, inquantum est conjunctio, et nuptiae a ritu desponsationis, secundum quod in ipsa desponsatione solemni ponitur quoddam velamen super capita nubentium, ut nuptiae a nubere dictae intelligantur.

Ad tertium dicendum, quod relatio matrimonii, quamvis habeat pluralitatem ex parte subjecti, habet tamen unitatem ex parte finis qui est causa conjunctionis eorum, qui ad eandem prolem generandam conjunguntur; et ex hoc habet matrimonium unitatem. Secus autem est de similitudine vel aequalitate quarum causa non est eadem numero, sed specie, scilicet qualitas vel quantitas.

Ad quartum dicendum, quod maritus est potior in conjunctione, etsi non in prole quae est finis conjunctionis matrimonialis. Uxor enim datur in adiutorium marito, et non e converso: et propter hoc conjunctio utriusque non dicitur uxoria, sed maritalis.

Ad quintum dicendum, quod individua vitae consuetudo hic intelligenda est quantum ad communicationem in vita conjugali; et sic per hoc non significatur similitudo morum, sed indivisibilitas matrimonii.

ARTICULUS II.

Ad secundum sic proceditur. Et 1. videtur, quod consensus expressus per verba de praesenti inconvenienter ponatur causa matrimonii. Causa enim

mutabilis non facit stabilem effectum: sed matrimonium habet maximam stabilitatem, cum sit indivisibile; ergo non potest causari a consensu voluntatis qui est mutabilis; ergo etc.

2. Praeterea, remota causa removetur effectus: sed aliquando est matrimonium sine consensu, quando exterius exprimitur consensus et et interius non adest, alias de matrimonio constare non potest. Est etiam quandoque matrimonium sine expressione verborum, ut cum puella prae verecundia tacet, vel cum sunt muti vel diversarum linguarum; ergo consensus per verba expressus, non est causa matrimonii.

3. Praeterea, verba exterius prolata in matrimonio requiruntur ad obligationem faciendam: sed obligatio potest fieri per verba de futuro, ut patet in civilibus contractibus, et Deo, ut patet in voto; ergo ad matrimonium non requiritur quod sint verba de praesenti.

4. Praeterea, matrimonium habet individuum consuetudinem vitae, ut dictum est: sed hoc non competit matrimonio, etiam post consensum per verba de praesenti, quia potest alter conjugum religionem intrare ante carnalem copulam; ergo praedictus consensus non est causa matrimonii.

Sed contra. Ille qui est sui juris non redigitur in potestatem alterius, nisi per proprium consensum: sed per matrimonium vir redigitur in potestatem mulieris, et e converso, ut patet 1 ad Cor. 7; ergo consensus est causa matrimonii.

Respondeo. Dicendum, quod in sacramentis causae sacramentales efficiunt hoc quod figurant. Matrimonium autem quoddam sacramentum est: unde oportet quod in causa matrimonii ipsa matrimonialis conjunctio, quae est effectus matrimonii, designetur. Hoc autem fit per consensum per verba de praesenti expressum: unde talis consensus est causa matrimonii.

Ad primum ergo dicendum, quod matrimonium non habet immobilitatem ex praedicto consensu, qui est causa proxima, sed ex divina institutione, quae est causa prima.

Ad secundum dicendum, quod sicut in aliis sacramentis requiritur intentio, ita et in isto. Unde sicut aliquis exterius baptizatus non reciperet baptismi sacramentum si intentio deesset, ita nec matrimonium contrahit qui verba profert, sed consensum interiorem non habet: sed praesumendum et judicandum est de his quae exterius apparent, cum de interiori non constat. Similiter consensus sine expressione verborum matrimonium facit, quia obligatio homini facienda signum exterius requirit, quod signum sunt verba, vel quicumque nutus, quibus consensus exprimitur, ut in nutis, et se non intelligentibus; et sic etiam in puella verecunda, est signum consensus quando verbis parentum non contradicit, etsi ipsa non exprimat, quia qui tacet consentire videtur etc.

Ad tertium dicendum, quod verba de futuro non significant matrimonium, sed promissionem matrimonii, et ideo non sunt sufficienter matrimonii causa; et similiter est in aliis obligationibus, quibus homo actualiter non tradit aliquid in alterius potestatem hominis, vel Dei.

Ad quartum dicendum, quod conjunctio matrimonii durat usque ad mortem; et ideo sicut matrimonium per carnalem copulam consummatum per mortem corporalem finitur, ut patet Rom. 7,

ita matrimonium, quamdiu est in sola spirituali conjunctione consistens, tollitur per mortem spirituales, scilicet per religionis ingressum.

ARTICULUS III.

Ad tertium sic proceditur. Et 1. videtur, quod promissio futurarum nuptiarum convenienter sponsalia non dicantur. Quicumque enim promittit aliquid, debet compelli ad solvendum: sed illi qui sponsalia contrahunt, non compelluntur per Ecclesiam ad matrimonium complendum; ergo sponsalia non sunt promissio futurarum nuptiarum.

2. Praeterea, promissio non est firma, quae fit ante annos discretionis; sed sponsalia ante annos discretionis contrahuntur, scilicet in septennio; ergo idem quod prius.

3. Praeterea, aliquis dicitur sponsus ex praesentibus nuptiis, ut in littera dicitur: sed sponsalia a sponso dicuntur; ergo sponsalia non sunt promissio futurarum nuptiarum.

4. Praeterea, ad fidelitatem hominis pertinet, ut factam promissionem servet: sed sponsalia dirimi possunt; ergo sponsalia non sunt promissio futurarum nuptiarum.

Respondeo. Dicendum, quod sicut dicit Augustinus in 8 de Confessione, ideo institutum est ut pactae sponsae non tradantur statim, ne vilem habeat maritus datam, quam non suspiravit sponsus dilatam. Ad provocandum ergo amorem inter matrimonio junctos promissio futuri matrimonii praecedit, non de necessitate matrimonii, sed de congruitate; et haec promissio sponsalitia nominatur a spondendo, ut Isidorus dicit. Fit autem ista promissio quandoque absolute, quandoque sub conditione. Absolute quatuor modis. Primo, nuda promissione per verba de futuro, ut cum dicitur, Accipiam te in meam. Secundo, datis arrhis sponsalitiis, ut pecunia, vel aliquid hujusmodi. Tertio, anuli subarrhatione. Quarto, interveniente juramento. Sub conditione autem fit tribus modis. Uno modo, quando conditio est honesta, ut cum dicitur, Accipiam te si parentibus placet; et tunc stante conditione stat promissio, et non stante, non stat. Secundo, quando conditio est contraria bonis matrimonii, ut si dicat, Accipiam te, si venena sterilitatis procures; et tunc sponsalia non contrahuntur. Tertio, quando conditio appositae, est inhonesta, non tamen contraria bonis matrimonii; ut si dicat, Accipiam te si furtis meis consentias: et stat tunc promissio, sed tollenda est conditio.

Ad primum ergo dicendum, quod ideo Ecclesia in foro contentioso non compellit sponsalia contrahentes ad matrimonium, quia matrimonia coacta consueverunt malos exitus habere. Nihilominus ex tali promissione obligatur homo, quo ad Deum; et peccat, si non solvat promissum.

Ad secundum dicendum, quod in fine primi septennii discretio rationis incipit vigere, et praecipue quantum ad ea ad quae natura inclinatur, sicut est matrimonium; et ideo convenienter hoc tempus statutum est sponsalibus contrahendis. Ante vero non tenent, nisi propter propinquitatem ad tempus praedictum, quae est secundum conditionem contrahentium determinanda, prout in quibusdam rationis usus magis quam in aliis acceleratur. Quia vero ratio nondum est firmata, ideo hoc tempus

nondum est aptum perpetuo vinculo, vel matrimonii, vel professionis religionis.

Ad tertium dicendum, quod sponsalia semper dicuntur a spondendo. Spondetur autem quandoque ipsum matrimonium, et hoc per promissionem futurarum nuptiarum; et sic non loquimur de sponsalibus. Quandoque vero spondetur actus matrimonii; et sic ab ipso matrimonio contracto aliquis dicitur sponsus.

Ad quartum dicendum, quod sponsalia dirimuntur in octo casibus. Quorum primus est, cum alter intrat religionem. Secundus est, cum alter ad longinquam religionem se transfert. Tertius est cum aliquis gravem infirmitatem incurrit, quae matrimonium redderet onerosum, ut lepram, vel paralytim, vel aliquid hujusmodi. Quartus, quando intervenit affinitas; ut si sponsus consanguineam sponsae cognoverat ante. Quintus est, quando mutuo se absolvunt. Sextus est, quando alter in fornicationem labitur. Septimus est, propter defectum aetatis, quia tunc nec vere sponsalia sunt. Octavus quando alter contrahit cum alia per verba de praesenti. In primo autem et ultimo casu, ipso facto dirimuntur sponsalia, in aliis vero iudicium Ecclesiae requiritur. Nec tamen sequitur, quod semper fides promissionis frangatur quando sponsalia dirimuntur, etsi hoc aliquando contingat. Nam promissio intelligitur habere pias condiciones implicitas per quas justa impedimenta excludantur.

ARTICULUS IV.

Ad quartum sic proceditur. Et 1. videtur, quod bigamia irregularitatem non causet. Aut enim causat ratione sacramenti, aut ratione copulae carnalis. Sed non primo modo, quia sic, cum aliquis contraxisset cum una per verba de praesenti, et ea mortua ante carnalem copulam duceret aliam, fieret irregularis; quod est contra Decretalem. Similiter nec secundo; quia eadem ratione, qui plures per fornicationem cognosceret, irregularis esset; quod est falsum; ergo bigamia nullo modo causat irregularitatem.

2. Praeterea, defectus proprius magis impedit a perceptione sacramenti, quam defectus alienus: sed defectus virginitatis in viro non impedit eum a perceptione ordinis; ergo multo minus si corruptam ducat in uxorem, ex quo bigamus iudicatur.

3. Praeterea, inter omnes defectus hominis, maximus est defectus peccati: sed baptismus tollit omnia peccata; ergo multo magis tollit irregularitatem: et sic saltem post baptismum, bigamus ante baptismum, non est irregularis.

Contra est quod dicitur 1 ad Tim. 5: « Oportet Episcopum unius uxoris virum esse. » Nominem autem Episcopi, ibi sacerdos intelligitur; ergo bigamia impedit a perceptione ordinis sacerdotalis, et sic irregularitatem causat.

Praeterea, Decretalis dicit, « Cum clericis qui, in quantum in ipsis fuit, secundas mulieres sibi matrimonialiter conjunxerunt, tamquam cum bigamis non licet dispensare; » ergo bigamia causat irregularitatem indispensabilem.

Respondeo. Dicendum, quod per sacramentum ordinis fit aliquis sacramentorum dispensator: unde nullum defectum in sacramentis pati debet. Bigamus autem patitur defectum in sacramento matrimonii. Non enim significatur unitas Christi et Ecclesiae,

et ideo per bigamiam aliquis reducitur ineptus ad ordinis sacramentum, et haec indispositio irregularitas nominatur. Haec autem bigamia irregularitatem causat quatuor modis. Primus est, cum quis habet successive plures uxores de jure. Secundus, cum simul habet plures, unam de jure, et aliam de facto. Tertius est, cum successive habet plures per modum eundem: in his enim duobus modis, quamvis non sit sacramentum, est tamen quaedam sacramenti similitudo. Quartus est, cum aliquis viduam ducit in uxorem.

Ad primum ergo dicendum, quod de ratione utriusque simul, bigamia irregularitatem causat, quia carnalis copula ad perfectionem significationis matrimonii facit. Unde per Decretalem excluditur hoc quod Magister in littera dicit, scilicet quod solus consensus per verba de praesenti sufficit ad irregularitatem faciendam, per fornicationem autem cum multis non inducitur irregularitas, quia non est ibi aliquod sacramentum.

Ad secundum dicendum, quod corruptio uxoris matrimonium praecedens, irregularitatem viro inducit, etiam si eam virginem crediderit, nisi forte sit ab eodem ante matrimonium corrupta, quia tunc vir carnem suam in plures non divisit. Similiter etiam si post matrimonium uxor fornicetur, vir irregularitatem contrahit, eam cognoscens, ut dicitur a quibusdam. Ideo vero corruptio uxoris, et non viri, irregularitatem in viro causat, quia consensus matrimonium contrahentis non cadit supra se ipsum, sed supra conjugem, quae est materia indebita sacramento matrimonii, quantum ad significationem, quia unitas requiritur tam in viro quam in uxore, et sic incidit in ipsum sacramentum defectus. Sed corruptio viri omnino est extra sacramentum matrimonii, respectu ipsius. Unde si uxor posset ad ordines promoveri, similiter irregularis fieret contrahendo cum viro corrupto.

Ad tertium dicendum, quod objectio illa procedit secundum opinionem Hieronymi qui hoc posuit. Sed Ecclesia nunc sequitur sententiam Augustini qui contrarium sensit. Et hoc ideo, quia baptismus solvit crimina, non sacramenta: ex sacramento autem matrimonii causatur irregularitas ratione sacramenti. Alia concedimus; excepto quod irregularitas praedicta dispensabilis est per eum, qui non est minoris potestatis in Ecclesia quam Apostolus qui haec statuit: et praecipue cum bigamia non repugnet essentialibus sacramenti ordinis: quia si bigamus ordinetur, characterem recipit.

DISTINCTIO XXVIII.

Hic quaeri delet, utrum consensus etc. (V. edit. nostrae tom. VII, pag. 957.)

QUAESTIO UNICA.

Hic quaeruntur quatuor: 1.^o in quid sit consensus qui matrimonium facit; 2.^o utrum juramentum cum consensu expresso per verba de futuro, matrimonium faciat; 3.^o utrum carnalis copula eidem adveniens; 4.^o utrum per consensum verbis de praesenti expressum in occulto, matrimonium fiat.

ARTICULUS I.

Ad primum sic proceditur. Et 1. videtur, quod

consensus, qui matrimonium causat, sit in carnalem copulam. Omnia enim quae sunt in matrimonio inter virum et uxorem licite possunt esse inter fratrem et sororem, excepta carnali copula; si ergo consensus qui facit matrimonium non sit in carnalem copulam, videtur quod inter fratrem et sororem matrimonium contrahi possit.

2. Praeterea, ille qui continentiam vovit, peccat mortaliter in matrimonium consentiendo: sed matrimonium non opponitur continentiae nisi ratione carnalis copulae; ergo consensus matrimonii est in carnalem copulam.

3. Praeterea, remoto eo quod non est de esse rei, potest res ipsa manere: sed si a consensu matrimonii carnalis copula excludatur, ut si dicatur: Consentio in te, ut non cognoscas me, non est consensus matrimonialis; ergo carnalis copula cadit sub matrimoniali consensu.

Sed contra. Carnalis copula non est de integritate matrimonii, quantum ad suum esse, ut supra dictum est; ergo consensus qui matrimonium causat non oportet quod sit in carnalem copulam.

Praeterea, quicumque consentit in carnalem copulam, desinit esse virgo, saltem mente: sed beatus Joannes fuit virgo mente et carne; et tamen matrimonium contraxit; ergo consensus in carnalem copulam, non requiritur ad matrimonium.

Respondeo. Dicendum, quod consensus per verba de praesenti expressus, significat quod facit. Facit autem matrimonium; unde significat consensum in matrimonium. Carnalis autem copula non est de essentia matrimonii, sed potestas ordinata ad carnalem copulam; quia per matrimonium unus conjugum accipit potestatem altero carnaliter utendi. Unde consensus in motuam potestatem habendam respectu carnalis copulae matrimonium causat. Haec autem potestas non potest esse inter fratrem et sororem. Repugnat etiam continentiae voto et conditioni appositae de abstinendo a carnali copula. Unde patet solutio ad objecta.

ARTICULUS II.

Ad secundum sic proceditur. Et 1. videtur, quod consensus expressus per verba de futuro, addito juramento, matrimonium causet. Juramentum enim est efficacius vinculum, quam simplex verbum: sed simpliciter verbo de praesenti matrimonium fit; ergo multo fortius verbo de futuro cum juramento.

2. Praeterea, nihil potest hominem obligare ut faciat contra jus divinum: sed frangere juramentum est contra jus divinum. Matth. 5: « Reddes autem Domino juramenta tua; » ergo juramentum adjunctum verbo de futuro est implendum, etiam si postea interveniat consensus cum altera per verba de praesenti expressus: sed hoc non esset, nisi juramentum praecedens matrimonium faceret; ergo etc.

3. Praeterea, juramentum, aliquid supra simplicem promissionem addit: sed simplex promissio de futuro sponsalia facit; ergo juramentum additum facit plusquam sponsalia, ultra sponsalia vero nihil nisi matrimonium; ergo facit matrimonium.

Sed contra. Ad hoc quod matrimonium fiat, requiritur actualiter matrimonium significari, ut ex supradictis patet: sed juramentum additum verbis de futuro, non facit actualem significationem matrimonii; ergo matrimonium non causat.

Praeterea, majus est tradere dominium sui corporis, quam suae rei: sed juramentum promissioni additum non sufficit ad hoc, quod res promissa in dominium alterius transeat, cui facta est promissio; ergo nec juramentum additum promissioni matrimonii facit quod unus habeat potestatem in corpore alterius, quod ad matrimonium requiritur; et ita matrimonium non causat.

Respondeo. Dicendum, quod juramentum est quaedam confirmatio eorum quibus additur: unde per juramentum ea quae praecerant confirmantur, non autem aliquid novum superadditur: in verbis autem de futuro non erat aliquid quod actualiter matrimonium faceret, sed solum obligationem ad matrimonium: unde juramentum additum, matrimonium non facit, sed obligationem ad matrimonium firmiorem reddit.

Ad primum ergo dicendum, quod juramentum est fortius simpliciter verbo, quantum ad id cui adhibetur. Verba autem de praesenti adhibentur ad significandum actualiter matrimonii conjunctionem; non autem juramentum additum verbis de futuro: et ideo non est simile.

Ad secundum dicendum, quod juramenta illicita implere, non est de jure divino: juramentum autem promissioni matrimonii additum, factum est licitum, per sequentem contractum, qui fit per verba de praesenti; quia matrimonio conjunctus non potest aliud matrimonium contrahere. Unde ratio non sequitur.

Ad tertium dicendum, quod juramentum plus facit quam simplex verbum promissionis, quia promissionem firmiorem reddit; nec tamen sequitur, quod matrimonium causet.

ARTICULUS III.

Ad tertium sic proceditur. Et 1. videtur, quod carnalis copula verbis de futuro superveniens, matrimonium faciat. Sicut enim supra dictum est, consensus de praesenti, quibuscumque signis exprimitur, matrimonium facit; sed nullum signum efficacius exprimit quam carnalis copula; ergo matrimonium facit.

2. Praeterea, omnis conjunctio carnalis praeter matrimonium facta, est peccatum; si ergo carnalis copula sponsalibus superveniens matrimonium non facit, peccaret sponsa, sponsum admittens ad carnalem copulam; quod non videtur.

3. Praeterea, quilibet damnum inferens, tenetur de damno illato satisfacere: sed mulieri defloratae sub specie matrimonii non potest satisfieri, nisi in matrimonium ducatur; ergo videtur quod vel tunc, per carnalem copulam matrimonium consummetur, vel quod saltem postmodum eam in matrimonium ducat.

Sed contra est auctoritas Nicolai Papae, qui dicit: « Si consensus in nuptiis defuerit, caetera etiam cum coitu celebrata frustantur. »

Praeterea, illud quod potest sine matrimonio fieri non facit matrimonium; sed carnalis copula est hujusmodi; ergo etc.

Respondeo. Dicendum, quod de matrimonio loqui possumus dupliciter. Uno modo, quantum ad conscientiam: et sic carnalis copula sponsalibus superveniens matrimonium non complet, si interior consensus non adsit. Videtur autem adesse, secundum aliquos, ex vi praecedentis promissionis, si

expresse contrarium non intendat. Alio modo, secundum iudicium Ecclesiae, quae iudicat secundum ea quae apparent: et ideo cum nullum signum possit esse evidentius interioris consensus in matrimonium, quam carnalis copula sponsalibus superveniens, ideo Ecclesia iudicat ibi matrimonium esse, nisi aliqua evidenter appareant per quae expresse contrarium probari possit.

Ad primum ergo dicendum, quod quaecumque signa exterius ostendantur, dummodo consensus interior desit, non fit matrimonium, etiam si verba de praesenti exprimantur, quantum ad conscientiam, licet fiat secundum iudicium Ecclesiae.

Ad secundum dicendum, quod sponsa in tali casu sponsum admittens excusatur a peccato, cum praesumere debeat quod intentione matrimonii consummandi ad eam accedat, nisi contraria signa appareant. De quolibet enim praesumendum est bonum, nisi constet de contrario. Sed sponsus non excusatur a peccato fornicationis et fraudis.

Ad tertium dicendum, quod in tali casu sponsus tenetur eam ducere in uxorem antequam aliam ducat. Sed si aliam jam duxerit, factus est jam impotens ad solvendum hoc ad quod tenebatur, unde debet aliter satisfacere.

ARTICULUS IV.

Ad quartum sic proceditur. Et 1. videtur, quod per verba de praesenti consensus expressus in occulto matrimonium non faciat. Matrimonium est quoddam sacramentum: sed sacramenta pertinent ad dispensationem ministrorum Ecclesiae; ergo matrimonium non potest perfici in occulto, sine conscientia ministrorum Ecclesiae.

2. Praeterea, prohibitio Ecclesiae impedit matrimonium contrahendum, et dirimit contractum, sicut patet in illis qui contrahunt in secundo gradu contra Ecclesiae prohibitionem: sed Ecclesia prohibet clandestina matrimonia; ergo si contrahantur sunt dirimenda, et sic non sunt vera matrimonia.

3. Praeterea, ille qui non est sui juris non potest se tradere in potestatem alterius absque consensu ejus, sub cuius potestate est: sed puella sub potestate patris existens non est sui juris; ergo absque consensu patris non potest alicui, matrimonium contrahendo, tradere in occulto sui corporis potestatem.

Sed contra. Baptismus est dignius sacramentum, quam matrimonium: sed servata forma et materia sacramenti, etiam in occulto aliquis baptismum suscipit; ergo multo magis matrimonium.

Praeterea, ea quae non sunt de essentia rei, substantiam rei non variant: sed publicum et occultum non pertinent ad substantiam matrimonii, sed magis ad notitiam hominum aliorum; ergo per hoc quod fit in occulto, nihilominus verum est matrimonium.

Respondeo. Dicendum, quod sicut in sacramento baptismi, si omittantur ea quae ad solemnitatem sacramenti pertinent et non sunt de essentia ejus, verum est sacramentum, quamvis omittens peccet, nisi sit causa legitima; ita est de matrimonio. Nam de essentia matrimonii sunt personae legitimae ad contrahendum, quasi materia, et consensus per verba de praesenti expressus, quasi forma. Alia vero sunt de solemnitatem sacramenti: unde cum desunt in matrimonio clandestino veritatem matrimonii non tol-

lunt, licet contrahentes peccent, nisi habeant excusationem legitimam.

Ad primum ergo dicendum, quod in aliis sacramentis, id quod est ex parte ministrorum est de essentia sacramenti; non autem in matrimonio, sed solum de solemnitate, quia matrimonium ordinatur ad carnalem multiplicationem et naturalem; unde absque ministris Ecclesiae potest fieri matrimonium, non autem alia sacramenta.

Ad secundum dicendum, quod matrimonia clandestina per Ecclesiam prohibentur propter pericula quae inde venire solent, et propter hoc quod habent speciem turpitudinis. Non autem prohibitio Ecclesiae facit quod manifestatio matrimonii sit de efficacia sacramenti, quod tamen facit in gradibus cognationis; et ideo non est simile.

Ad tertium dicendum, quod puella quamvis sit in potestate patris in rebus civilibus et domesticis, tamen in his quae ad propriam personam pertinent est sui juris, cum sit libera non ancilla; et ideo potest absque consensu parentum in religionem intrare et matrimonium contrahere.

DISTINCTIO XXIX ET XXX.

Oportet autem consensum conjugalem etc. (V. edit. nostrae tom. VII, pag. 940-944.)

QUAESTIO UNICA.

Circa hanc distinctionem et sequentem quaeruntur quatuor: 1.^o utrum coactio consensus impediatur matrimonium; 2.^o utrum error; 3.^o utrum turpis causa; 4.^o utrum inter Beatam Virginem et Joseph verum matrimonium fuerit.

ARTICULUS I.

Ad primum sic proceditur. Et 1. videtur, quod coactio consensus matrimonium non impediatur. Consensus enim est actus liberi arbitrii, quod cogi non potest; ergo coactio consensus non potest matrimonium impedire.

2. Praeterea, si aliqua coactio impedit matrimonium, non nisi illa quae potest cadere in constantem virum: sed nulla coactio vel metus est talis, quia fortes, nec etiam morte coguntur, cujus periculis se exponunt, ut patet per Philosophum in 5 Ethicorum; ergo coactio consensus matrimonium non impedit.

3. Praeterea, coactio consensus non potest absolute esse sed sub conditione; puta si dicatur, Si non consentias te interficiam: sed in tali coactione plus est de voluntario quam de involuntario, ut Philosophus dicit in 5 Ethicorum; ergo videtur, quod per huiusmodi coactionem matrimonium non impediatur, et praecipue quantum ad eum qui coactionem inducit, qui omnino voluntarius videtur.

4. Praeterea, non solum per violentiam aliquis cogitur, sed etiam per praeceptum aliquis potest cogi ad matrimonium contrahendum, et tamen verum est matrimonium. Filii enim tenentur per omnia parentibus obedire, ut patet Col. 3: unde parentes pro filiis futura matrimonia sub iuramento promittunt; ergo coactio matrimonium non impedit.

Sed contra est, quod Decretalis dicit, quod ubi consensus communis requiritur, coactionis materia repellatur. In matrimonio autem requiritur, ut ex

dictis patet, communis consensus; ergo coactio matrimonium impedit.

Praeterea, nullus per actionem jus acquirit in re alterius: sed per matrimonium unius conjugum, jus acquiritur in corpore alterius; ergo coactio matrimonium impedit.

Respondeo. Dicendum, quod duplex est coactio. Una absoluta et simplex; quando scilicet ille qui vim patitur nihil agit, sed solum patitur, ut cum unus ab alio impellitur; et haec coactio non cadit in voluntatem. Unde de hac nunc non loquimur: sic enim consensus qui est actus voluntatis, coactus esse non potest. Alia est coactio conditionata vel mixta; quando scilicet ut aliquis vitet quod est magis contra voluntatem, facit id quod est minus contrarium voluntati, sicut cum naucae projiciunt merces in mari ne submergantur: et coactio in voluntatem cadit, quando scilicet propter timorem periculis imminentis aliquis eligit hoc, quod est voluntati simpliciter contrarium. Consensus autem sic coactus, si sit talis coactio quae in constantem virum cadere possit, matrimonium impedit; alias non. Unde talis coactio tollit perpetuitatem contractus, quia competit coacto, secundum jura, restitutio in integrum. Quare matrimonium, quod de sui ratione perpetuitatem habet, impeditur si consensus etiam interior fuit per coactionem extortus. Nec solum hoc, sed et si verba consensus exprimentia modo simili sint extorta.

Ad primum, patet responsio ex dictis.

Ad secundum dicendum, quod nullus metus cadit in constantem virum, ut faciat eum in peccatum consentire; tamen per metum potest induci ad sustinendum aliqua alia minora damna; et haec sunt praecipue quae in hoc versu continentur: Stupri, sive status, verberis, atque necis. Illic ponitur status pro conditione servili. Alia vero incommoda non reputantur tanti, quod constantem virum moveant ad aliquid magnum faciendum.

Ad tertium dicendum, quod ad matrimonium non sufficit quodcumque voluntarium, sed requiritur voluntarium completum propter ejus perpetuitatem; et ideo per admisionem violentiae impeditur. Nec potest esse quod sit matrimonium ex parte una et non ex alia; quia matrimonium in quadam relatione consistit quae requirit duo extrema.

Ad quartum dicendum, quod quia filius vel filia non servilis, sed liberae conditionis sunt, non possunt cogi a parentibus per praeceptum ad aliquid quod eorum statum perpetuo mutet, sicut ad servitutem, vel matrimonium, vel religionem. Et quando parentes jurant, subintelligitur conditio, scilicet si filiis placuerit, quos tenentur ad hoc inducere bona fide.

ARTICULUS II.

Ad secundum sic proceditur. Et 1. videtur, quod error matrimonium non impediatur. Nihil enim impedit matrimonium, nisi quod habet contrarietatem ad ipsum: sed error non est huiusmodi; ergo matrimonium non impedit. Probatio mediae. Error non opponitur matrimonio, nisi forte in quantum causat involuntarium: sed quilibet error involuntarium causat; sic ergo quilibet error matrimonium impediret: quod patet esse falsum.

2. Praeterea, si aliquis error matrimonium impedit, praecipue hoc facit error personae et condi-

tionis, scilicet servitutis: sed error personae non impedit; alias inter Liam et Jacob verum matrimonium non fuisset. Nec error servitutis; quia pari ratione et error cultus, vel impotentia coeundi matrimonium impediret, quibus matrimonium impeditur, sicut et per servitutein; ergo error matrimonium non impedit.

3. Praeterea, potest contingere, quod iste error daret quousque filios et filias generent; grave autem esset dicere quod tunc essent dividendi; ergo primus error matrimonium non impedit.

4. Praeterea, potest contingere quod frater viri in quem mulier se consentire credit, offeratur ei, et cum eo carnaliter commisceatur: in tali autem casu non videtur quod possit cum habere in virum, cum quo contrahere se credidit, propter affinitatem contractam: et ita videtur, quod matrimonium stare debeat cum alio, non impediente errore.

Sed contra est, quod jurisperitus dicit, quod nihil est tam contrarium consensui quam error. Sed consensus requiritur ad matrimonium; ergo error matrimonium impedit.

Praeterea, sicut coactio excludit voluntarium, ita et error: sed coactio impedit matrimonium; ergo et error.

Respondeo. Dicendum, quod remota causa removetur effectus. Error autem consensum removet, qui est matrimonii causa; quia error voluntarium tollit, quod consensum includit; et ideo error matrimonium naturaliter impedit. Non autem quilibet error, sed error eorum quae matrimonio sunt essentialia. Pertinent autem essentialiter ad matrimonium ipsae personae contrahentes materialiter, et potestas invicem utendi formaliter; et ideo error personae quae repugnat primo, et error servitutis quae repugnat secundo, matrimonium impedit. Error vero qualitatis, utputa pulchritudinis, vel scientiae, vel error fortunae, ut divitiarum, vel dignitatis, vel alicujus hujusmodi, matrimonium non impedit, quia omnia haec accidentaliter se habent ad matrimonium.

Ad primum ergo dicendum, quod jam ex dictis patet, quomodo error matrimonio contrariatur ratione causae suae, et quare non quilibet error.

Ad secundum dicendum, quod inter Jacob et Liam non fuit matrimonium ex ipso concubitu, qui ex errore contigit, sed ex consensu postmodum superveniente. Error autem, non solum servitutis, sed etiam aliarum conditionum quae faciunt personam illegitimam ad contrahendum, matrimonium impedit: sed ideo de earum errore non fit mentio, quia istae conditiones, utputa sacer ordo, vel cognatio, vel disparitas cultus, impediunt matrimonium, et cum errore et sine errore; servitus autem non, nisi cum errore.

Ad tertium dicendum, quod multitudo temporis matrimonium non confirmat, nisi de novo invicem consentire velint.

Ad quartum dicendum, quod si ante non consenserit in fratrem ejus, potest eum quem per errorem accepit retinere; nec potest fratrem habere, praecipue si ab alio sit cognita carnaliter. Si autem consenserit in fratrem per verba de praesenti, non potest secundum habere, primo vivente; sed debet redire ad primum nisi saeculum relinquat; et ignorantia facti excusat peccatum.

ARTICULUS III.

Ad tertium sic proceditur. Et 1. videtur, quod turpis causa matrimonium impedit. Matrimonium enim semper est bonum: sed effectus bonus non potest esse a causa mala; ergo turpis causa matrimonium impedit.

2. Praeterea, conjunctio matrimonii est a Deo, ut patet Matth. 19: « Quod Deus conjunxit, homo non separet: » sed conjunctio quae est propter turpes causas non est a Deo; ergo non est matrimonium.

3. Praeterea, ad sacramentum requiritur debita intentio: sed non servatur debita intentio cum aliquis turpem causam intendit; ergo etc.

Sed contra. Posita causa ponitur effectus: sed causa matrimonii est consensus verbis de praesenti expressus, qui etiam potest esse cum turpi intentione; ergo turpis causa matrimonium non impedit.

Praeterea, baptismus est dignius sacramentum quam matrimonium: sed turpis intentio baptizantis vel baptizati baptismum non evacuat; patet si quis ex hoc lucrum intendat; ergo nec matrimonium per turpem intentionem impeditur.

Respondeo. Dicendum, quod in sacramentis potest esse duplex intentio. Prima est intentio constituentis sacramentum. Secunda est intentio sacramento utendi. Prima intentio est de necessitate sacramenti: unde per ejus defectum sacramentum impeditur, sicut si aliquis non intenderet baptizare. Secunda vero intentio consequitur sacramentum, unde defectus ejus sacramentum non tollit, ut si aliquis baptismum susciperet hac intentione ut lucra conquireret. Turpitude ergo causae si contrarietur essentiali matrimonii, matrimonium tollit, quia removet primam intentionem, ut si aliquis consentiret in aliquam ut in meretricem. Sed turpitude causae quae matrimonio non contrariatur secundum suam essentialiam opponitur secundae intentioni et non primae: unde matrimonium non impedit; ut puta si aliquis in uxorem consentit hac intentione, ut libere cum ea suam libidinem exerceat.

Ad primum ergo dicendum, quod causa matrimonii secundum se semper est bona, quia de se ordinatum est ad bonum prolis; sed ex parte contrahentis potest habere aliquas causas, vel turpes vel honestas, quae non variant conditionem matrimonii, sed contrahentis.

Ad secundum dicendum, quod conjunctio matrimonii est a Deo, sicut a causa prima institutae; et sic habet honestam causam. Sed est ab homine, sicut a causa proxima; et ex hac parte potest habere causas inhonestas.

Ad tertium, patet responsio per distinctionem intentionis praemissam.

ARTICULUS IV.

Ad quartum sic proceditur. Et 1. videtur, quod inter Joseph et Beatam Virginem verum matrimonium non fuerit. Voventes enim virginitatem matrimonium non possunt contrahere sine peccato. sed Beata Virgo virginitatem voverat. Cum ergo fuerit immunis ab omni peccato, videtur, quod in matrimonio non consensit; et ita inter eam et Joseph verum matrimonium non fuit.

2. Praeterea, matrimonium est perpetuum vinculum: sed Joseph quamvis esset justus, volebat oc-

culle dimittere Beatam Virginem, ut dicitur Matth. 1; ergo non erat inter eos verum matrimonium.

5. Praeterea, nulla causa rationalis potest assignari qualiter matrimonio fuerit juncta. Non enim per hoc virginitas matris Dei diabolus latere potuit, quia corporum conditiones naturali sensu cognoscit; nec iterum si nupta non esset poterat lapidari, propter suspicionem fornicationis, quasi adultera; nec iterum decuit ut Christus, qui labores nostros portare venerat, solatium viri ad sustentationem matris praepararet: quae tamen causae in litera ponuntur; ergo non decuit quod Beata Virgo matrimonio juncta esset.

Sed contra est, quod dicitur Matth. 1: « Noli timere accipere Mariam conjugem tuam. »

Praeterea, Christus sua nativitate omnem licitum statum debuit approbare: sed matrimonium aliter approbari melius non potuit, quam quod ex matrimonio juncta nasceretur; ergo mater Christi debuit esse matrimonio juncta.

Respondeo. Dicendum, quod matrimonium, ut supra dictum est, habet duplicem perfectionem: scilicet primam ex qua dicitur matrimonium verum, et secundam ex qua dicitur consummatum. Prima ergo perfectio fuit in matrimonio Beatae Virginis: quod patet ex hoc quod fuerunt personae legitimae ad contrahendum, et fuit ibi consensus mutus per verba expressus, quae sunt quasi materia et forma hujus sacramenti. Sed secunda perfectio defuit, quia carnalis copula nunquam fuit subsequuta. Virgo enim in aevum permansit. Unde matrimonium illud fuit verum, sed tamen nunquam consummatum.

Ad primum ergo dicendum, quod votum dupliciter potest fieri. Uno modo absolute: et sic votum virginitatis, si sit solemne, impedit matrimonium sequens et de jure et de facto. Si autem sit simplex, impedit ut non fiat de jure, quamvis possit fieri de facto. Alio modo fit votum virginitatis vel continentiae sub conditione: et tunc secundum tenorem conditionis appositae poterit vel non poterit matrimonium sequi. Sic autem Virgo virginitatem voverat, sub hac scilicet conditione, si Deo placeret: non quia ei deficeret virginitatis voluntas servandae: sed quia in veteri lege nondum perfectionis virginalis tempus advenerat; et ideo ex familiari consilio Spiritus sancti in matrimonium consensit absolute virginitatem suam Deo committens. Et sic patet quod consensus in matrimonium, neque voto fuit contrarius, neque voluntatem virginitatis abstulit.

Ad secundum dicendum, quod Joseph noluit eam dimittere quasi aliam ducturus, vel propter aliquam suspicionem: sed propter timorem reverentiae. Unde ei dicitur Matth. 1: « Noli timere etc. »

Ad tertium dicendum, quod diabolus potuisset naturali cognitione virginitatem matris Dei perpendere matrimonio non obstante, nisi divina virtute prohibitus esset a diligenti examinatione eorum quae circa virginem erant. Hoc etiam quod de lapidatione dicitur intelligitur de lapidatione infamiae: vel quia erat de stirpe sacerdotali, in qua puellis non nuptis deprehensis in stupro lapidatio inferebatur, ut patet Lev. 21. Nec obstat quod Beata Virgo fuit de stirpe David; quia stirps regia sacerdotali fuit conjuncta. Unde Beata Virgo dicitur fuisse cognata Elisabeth, quae erat de filiabus Aaron, ut patet Luc. 1: Christus etiam necessitatis solaria refutare non debuit, nec quantum ad se, nec quantum ad matrem. Unde patet quod rationes in littera positae sunt convenientes.

DISTINCTIO XXXI.

Post haec de bonis conjugii etc. (V. edit. nostrae tom. VII, pag. 951.)

QUAESTIO UNICA.

Hic quaeruntur quatuor: 1.^o de numero bonorum matrimonii; 2.^o de comparatione eorundem; 3.^o utrum per ea actus matrimonii excusetur; 4.^o utrum sine eis, actus matrimonii semper sit peccatum mortale.

ARTICULUS I.

Ad primum sic proceditur. Et 1. videtur, quod insufficienter bona matrimonii in litera enumerentur. Ecclesia enim perfectius jungitur Christo per charitatem quam per fidem: matrimonium significat conjunctionem Christi et Ecclesiae; ergo inter bona matrimonii, sicut enumeratur fides, ita etiam charitas enumerari debet.

2. Praeterea, ad matrimonium requiritur, quod unus conjugum alteri debitum reddat; sed hoc pertinet ad justitiam; ergo justitia debet poni inter.

3. Praeterea, ad matrimonium requiritur quod sit unus: sed hoc non pertinet ad aliquod trium, quae hic tanguntur; ergo insufficienter enumerantur.

Sed contra videtur, quod superfluant. Una enim virtus sufficit ad unius actus honestatem; ergo sufficit sola fides ad actum matrimonii honestandum.

Praeterea, haec tria bona ad matrimonium pertinent: sed matrimonium est quoddam sacramentum; ergo alia duo sub sacramento includuntur, et sic superflue apponuntur.

Respondeo. Dicendum, quod matrimonium habet duplicem bonitatem. Unam, secundum quod est in officium naturae. Aliam, secundum quod est Ecclesiae sacramentum. Primo modo ejus bonitas dependet ex duobus: scilicet ex debito fine, ad quem pertinet bonum proles. Ad prolem enim ordinari debet sicut ad ultimum finem. Ad ipsum etiam finem pertinet communicatio operum inter virum et uxorem, quam etiam matrimonii finem Philosophus ponit: et ex ordinatione, vel bonitate ipsius, secundum se: ad hoc pertinet fides. Matrimonium enim consistit in mutua obligatione, quae honesta esse non potest, nisi fideliter utrumque servetur. Bonitatem vero matrimonii, secundum quod est Ecclesiae sacramentum, ostendit tertium quod apponitur, scilicet sacramentum. Et sic patet quod convenienter ponuntur tria bona matrimonii, scilicet fides, proles et sacramentum.

Ad primum ergo dicendum, quod objectio illa procedit ex acquivocatione fidei. Non enim accipitur hic fides secundum quod contra charitatem dividitur, prout est virtus theologica; sed prout est pars justitiae, et est idem quod fidelitas.

Ad secundum dicendum, quod ad fidelem pertinet non solum quod neuter conjugum alteri commisceatur, sed etiam quod unus alteri debitum reddat. Utrumque enim est justitiae.

Ad tertium dicendum, quod unitas illa quam objectio tangit, pertinet ad fidem, vel etiam ad sacramentum; quia non solum indivisibilitas, sed etiam unitas competit matrimonio, inquantum est signum conjunctionis Christi et Ecclesiae.

Ad quartum dicendum, quod unus actus inter-

dum ab una virtute non sufficienter honestatur quantum ad omnia quae in ipso sunt, sed quantum ad unum tantum; sicut actus castitatis honestatur quantum ad debitum modum per temperantiam, et quantum ad ultimum finem per charitatem. Et similiter actus matrimonii indiget diversis honestantibus quantum ad diversa.

Ad quintum dicendum, quod sacramentum hic non dicitur ipsum matrimonium, sed inseparabilitas ejus quae matrimonio competit ex sua significatione, qua significat conjunctionem Christi et Ecclesiae. Vel dicendum quod quamvis matrimonium sit sacramentum, tamen ex alio habet quod sit sacramentum, et ab alio quod sit in officium naturae: propterea diversa bona matrimonio attribuuntur.

ARTICULUS II.

Ad secundum sic proceditur. Et 1. videtur, quod sacramentum non sit principalius inter caetera matrimonii bona. Finis enim optimum est in unoquoque: sed proles est finis matrimonii; ergo bonum prolis inter caetera est principalius.

2. Praeterea, gratia et virtutes digniores sunt sacramentis, quia sacramenta propter gratiam sunt instituta: sed fides est virtus; ergo est principalius bonum quam sacramentum.

3. Praeterea, ad sacramentum pertinet indivisibilitas matrimonii, ut in litera dicitur: sed aliquando est matrimonium quod non habet inseparabilitatem, sicut cum aliquis post contractum matrimonii per verba de praesenti, ante carnalem copulam religionem intrat; ergo sacramentum non est principalius caeteris bonis matrimonii.

Sed contra, illud quod ponitur in definitione alicujus, est maxime illi essentiale: sed divisio, quae ad sacramentum pertinet, ponitur in definitione matrimonii, ut supra patuit; ergo sacramentum est praecipuum inter matrimonii bona.

Praeterea, ad Ephes. 5 dicit Apostolus: « Sacramentum hoc magnum est. Ego autem dico, in Christo et in Ecclesia, » et subintelligitur, magnum est; ergo illud est potissimum in matrimonio, quod Christi et Ecclesiae conjunctionem figurat: sed hoc pertinet ad bonum sacramenti; ergo inter bona matrimonii praecipuum est sacramentum.

Respondeo. Dicendum, quod ista bona matrimonii, dupliciter possunt considerari. Uno modo, secundum se. Alio modo, in suis principiis. Primo modo sacramentum est principalius inter caetera matrimonii bona, tum ratione dignitatis, cum pertineat ad gratiae significationem, alia vero duo ad naturae officium; tum etiam ratione propinquitatis, nam indivisibilitas, quam sacramentum importat, pertinet ad ipsam essentiam matrimonii, fides autem, et proles ad matrimonii usum. Secundo modo, fides et proles sunt magis matrimonio propinqua sive essentialia, cum scilicet proles accipitur pro intentione prolis, et fides pro debito servandi fidem; haec enim consequuntur matrimonium, secundum quemlibet suum statum; sed tertium consequitur ipsum, secundum quod est Ecclesiae sacramentum.

Ad primum ergo dicendum, quod finis matrimonii est proles, secundum quod ordinatur in officium naturae. Habet autem matrimonium super hoc aliam digniorem conditionem, quam exprimit sacramentum; et ideo non oportet quod proles sit potissimum quantum ad dignitatem, nec etiam ratione

proximitatis; quia finis si sit primum in intentione, executione tamen est ultimum et remotum.

Ad secundum dicendum, quod obiectio illa procedit de gratia et virtutibus, quae sunt sacramenti effectus; fides autem, de qua nunc loquimur, non est hujusmodi, sed est una de conditionibus sacramenti.

Ad tertium dicendum, quod dissolutio matrimonii per mortem spiritualem vel corporalem, non repugnat matrimonii indivisibilitati, quia vinculum matrimonii est solum in vita praesenti.

ARTICULUS III.

Ad tertium sic proceditur. Et 1. videtur, quod per hujusmodi bona, actus matrimonii non excusetur. Sicut enim in actu generativae est delectatio, ita in actu nutritivae: sed actus nutritivae non indiget aliquo honestante; ergo nec actus generativae, qui est actus matrimonii.

2. Praeterea, una indebita circumstantia totum actum vitiat, quaecumque honestae conditiones apponantur: sed haec bona non possunt impedire, quin in actu matrimonii sit aliqua indebita circumstantia, quia est ibi delectatio immoderata, quae verecundiam causat, et similiter rationis ligamentum, ut in illo actu intelligere non possit, secundum Philosophum, nec spiritu prophetico tangi, secundum Hieronymum; ergo actus matrimonii per hujusmodi bona non excusatur.

3. Praeterea, si istis bonis actus matrimonii excusaretur, semper sine istis esset peccatum: hoc autem videtur falsum, sicut cum quis ad uxorem accedit solum instinctu naturae, vel ad fornicationem vitandam, vel ad sanitatem corporis conservandam, nullum videtur esse peccatum; ergo bonis praedictis, actus matrimonii non excusatur.

Sed contra. Ubicumque est indulgentia, ibi est necessaria aliqua excusationis ratio: sed post peccatum, matrimonium conceditur secundum indulgentiam, ut patet 1 ad Cor. 6; ergo oportet quod per aliqua bona excusetur.

Praeterea, actus matrimonialis a fornicatione non differt, nisi per hujusmodi bona: cum ergo in fornicatione sit culpa, non autem in concubitu conjugali, videtur quod actus matrimonii per hujusmodi bona excusetur.

Respondeo. Dicendum, quod actus excusari dicitur per hoc quod ei subtrahitur ratio culpae, unde accusabilis esset, si non subtraheretur, in toto sive in parte: quaedam enim excusant a toto, quaedam a tanto. Ipsa autem carnalis copula, post peccatum, quamdam turpitudinem habet ad genus culpae pertinentem, in quantum ex peccato originali procedit propter inobedientiam quamdam inferioris partis ad rationem quam habet annexam. Unde nisi hujusmodi deformitas per aliquod bonum recompensaretur, carnalis copula absque culpa esse non posset. Recompensatur autem per hujusmodi bona, in quantum proles facit intentionem rectam, fides actionem justam, sacramentum Deo dicatum: et ideo actus matrimonii per bona praedicta culpa excusatur, et honestus redditur.

Ad primum dicendum, quod in actu nutritivae non est delectatio adeo vehemens, rationem totaliter ligans, sicut in actu generativae, eo quod generativa est non solum in se corrupta, sed etiam in effectu per peccatum originale; unde actus nutritivae non

habet turpitudinem, et per consequens, neque erubescantiam quam habet actus generativae.

Ad secundum dicendum, quod superabundantia delectationis, quae culpa est, non attenditur solum secundum intensionem quantitatis, sed secundum quod exceditur ordo rationis, qui per delectationem matrimonialis actus non exceditur, sed servatur. Quamvis enim actu ratio ligetur, vel impediatur, tamen nihil fit contra id quod habitu ratio tenet, sed secundum quod ratio praecordinavit. Nec est inconveniens, quod actus rationis ad momentum impediatur propter aliqua alia bona.

Ad tertium dicendum, quod semper in actu matrimonii aliquod peccatum incidit, nisi hac intentione fiat conjunctio ut proles procreetur, quod pertinet ad bonum prolis, vel saltem ut debitum reddatur, quod pertinet ad bonum fidei: motus autem naturae solius, tendit in prolem habendam absolute, quae intentio non est recta, nisi ulterius referatur in Deum, ita quod proles quaeratur ad cultum Dei suscipienda et nutrienda. Vitatio vero fornicationis intenta, non excusat a tota, quia aliter quis potest fornicationem vitare, scilicet penitus abstinendo. Non enim totaliter excusatur, qui facit minus malum ut vitet majus, si possit utrumque vitare. Similiter etiam nec sanitas corporis intenta; quae licet in se sit finis bonus, non tamen est matrimonio congruus, sicut nec baptismo.

ARTICULUS IV.

Ad quartum sic proceditur. Et 1. videtur, quod si quandoque aliquis ex libidine ad uxorem accedat, praeter praedicta matrimonii bona, mortaliter peccet. Consensus enim in delectationem est peccatum mortale: sed quicumque cognoscit uxorem causa delectationis, consentit in delectationem; ergo peccat mortaliter.

2. Praeterea, qui acciperet baptismum principaliter propter luera acquirenda, mortaliter peccaret: sed non est minus turpis finis delectatio libidinosa, quam acquisitio temporalium rerum: cum ergo matrimonium sit sacramentum, sicut baptismus, videtur quod quicumque utitur matrimonio cognoscendo uxorem causa libidinosae delectationis, mortaliter peccet.

5. Praeterea, nullus arectur ab introitu ecclesiae nisi excommunicatus, nec aliquis excommunicatur juste, nisi pro peccato mortali: cognoscens autem uxorem ex sola libidine, arectur ab introitu ecclesiae, ut in litera dicitur; ergo mortaliter peccat.

Sed contra est quod dicit Augustinus quod talis concubitus ponitur inter peccata quotidiana, pro quibus dicitur, Pater noster; haec autem sunt venialia peccata; ergo cognoscere uxorem causa libidinis, non est peccatum mortale.

Praeterea, delectari in re sua, non facit peccatum mortale: sed cognoscens uxorem causa delectationis, quaerit delectationem in re sua; ergo non peccat mortaliter.

Respondeo. Dicendum, quod libido dupliciter potest movere ad actum matrimonii. Uno modo singulariter: quando scilicet ita delectationem quaerit, ut nullum respectum ad matrimonium habeat, sed accedit ad uxorem sicut ad aliam, ad quam non minus libenter accederet: et talis motus est directe contra bona matrimonii. Unde constat quod mortaliter peccat. Et talis dicitur ardentior amator

uxoris, quia talis ardor limites matrimonii transit. Alio modo movet libido non singulariter, sed cum matrimonii consideratione, cum aliquis quaerit in uxore delectationem quam in ea non quaereret si uxor non esset. Talis autem libidinis motus non est contra bona matrimonii, sed praeter ea. Unde talis non peccat mortaliter, sed venialiter.

Ad primum ergo dicendum, quod consensus in delectationem est mortale peccatum, non in quacumque, sed in illam quae consequitur actum peccati mortalis. In talem autem delectationem non semper consentit vir, causa libidinis uxorem cognoscens.

Ad secundum dicendum, quod baptismus singulariter est institutus ad spiritualem salutem: unde quicumque alium finem principalem constituit, mortaliter peccat. Sed matrimonium institutum est etiam in remedium: et ideo non omnino extra intentionem matrimonii effertur, qui suae libidini quaerit satisfacere in uxore.

Ad tertium dicendum, quod non arectur ab ingressu ecclesiae quasi excommunicatus, sed quia est ineptus ad spiritualium contemplationem.

DISTINCTIO XXXII.

Sciendum est etiam quod cum in omnibus etc. (*V. edit. nostrae tom. VII, pag. 959.*)

QUAESTIO UNICA.

Hic quaeruntur quatuor: 1.º utrum in redditione debiti vir et uxor sint aequales; 2.º utrum necessitate praecepti, unus conjugum alteri debitum reddere teneatur; 5.º utrum hoc debitum impediatur, ne unus conjugum continentiae votum possit emitte-
tere absque consensu alterius; 4.º utrum tempus sacrum redditionem impediatur.

ARTICULUS I.

Ad primum sic proceditur. Et 1. videtur, quod in redditione debiti non sint aequales vir et uxor. Quia propter quod unumquodque, et illud magis: sed mulier facta est propter virum, ut patet Gen. 2: « Faciamus ei adiutorium simile sibi; » ergo etiam in carnali opere vir est principalior.

2. Praeterea, per carnalem copulam proles generatur: sed proles principaliter est a patre quam a matre; nam pater dat formam, et mater materiam, secundum Philosophum in lib. de Animalibus; ergo in carnali copula vir principalior est.

5. Praeterea, matrimonium, quantum ad carnalem copulam significat conjunctionem Christi ad Ecclesiam, per carnis conformitatem: sed in hac conjunctione Christus est principalior quam Ecclesia; ergo et vir quam uxor.

Sed contra est, quod mulier non est formata de capite viri, ne domina reputaretur: neque de pedibus, ne videatur ancilla: sed de latere, ut socia habeatur, ut in secundo libro habitum est; ergo saltem in his quae ad matrimonium spectant, vir et mulier sunt aequales.

Praeterea, unitas est causa aequalitatis: sed in carnali opere vir et mulier ununtur; ut dicitur Gen. 2: « Erunt duo in carne una; » ergo etc.

Respondeo. Dicendum, quod actus matrimonialis potest considerari quantum ad duo: videlicet quan-

tum ad modum agendi, et quantum ad potestatem. Primo modo vir et mulier in actu matrimoniali non sunt pares. Viro enim nobilior competit modus, cum vir sit agens in generatione, femina vero patiens. Sed quantum ad secundum, vir et mulier sunt pares; quia sicut vir non habet potestatem sui corporis, sed mulier, ita nec e converso, ut patet 1 ad Cor. 7. Quantum vero ad dispensationem domus et familiae, vir simpliciter uxori praefertur, ut caput corpori.

Ad primum ergo dicendum, quod ratio illa procedit secundum primum modum. Nam patiens est propter agentem, et non e converso. Et similiter dicendum ad secundum. Nam forma est in generato ex agente, sed materia ex patiente.

Ad tertium dicendum, quod significatio illa accipitur secundum similitudinem unionis, non potestatis. Sicut enim vir et mulier carnaliter uniuntur, ita Christus Ecclesiae est unitus per conformitatem carnalis naturae. Non tamen Ecclesia accipit aliquam potestatem in Christum, sicut uxor in virum, sed e converso; et ideo non est simile.

ARTICULUS II.

Ad secundum sic proceditur. Et 1. videtur, quod non semper unus conjugum teneatur debitum reddere poscenti. Nullus enim tenetur facere hoc quod est in praedictum propriae salutis, vel corporalis, vel spiritualis; sed reddere debitum uxori quandoque est noxium saluti corporali, vel ratione infirmitatis, vel ratione solutionis jam factae: et similiter spirituali, quia ille qui uxori debitum reddit non potest carnes agni edere, ut Hieronymus dicit; ergo non de necessitate tenetur vir ad debitum reddendum.

2. Praeterea, redditio debiti non debet bono prolis contrariari, ad quod principaliter ordinatur; sed redditio debiti quandoque ordinatur in malum prolis, ut patet in commistione leprosum ex quibus leprosi filii generantur; ergo non semper tenetur vir uxori debitum reddere, et e converso.

3. Praeterea, uxori debetur carnalis conjunctio, non solum quando petit, sed etiam quando non petit; si ergo ex necessitate praecepti uxori vir debitum reddere teneatur, videtur quod semper teneatur: quod est falsum.

Sed contra est, quod habetur Rom. 15: « Reddite omnibus debita: » si ergo carnalis conjunctio est uxori debita, videtur quod sit ei reddenda.

Praeterea, quicumque non reddit alteri quod debet, est injustus alienae rei detentor: sed hoc est contra praeceptum; ergo reddere debitum conjugum cadit sub praecepto.

Respondeo. Dicendum, quod sicut generativa ordinatur ad conservationem speciei, ita nutritiva ad conservationem individui. Unde sicut generativa nutritivam praesupponit, ita debitum quod aliquis debet uxori et ordinatur ad conservationem speciei, praesupponit debitum quod aliquis sibiipso debet, et ad conservationem individui ordinatur. Conjugum ergo debitum carnalis conjunctionis tenetur reddere, salva tamen incolumitate propriae personae: reddere enim debitum actus justitiae est qui sub praecepto cadit.

Ad primum ergo dicendum, quod quando redditio debiti in periculum salutis corporalis vergit, tunc per impotentiam excusatur. Sed notandum, quod haec impotentia, si consequatur ex matrimonio, vel aliqua licita causa, vir non tenetur reddere,

nec mulier exigere; alias se magis meretricem quam uxorem demonstraret. Si vero impotentia sit ex causa illicita, videtur, quod aliquo modo peccatum uxoris, si per subtractionem debiti fornicetur, in virum redundet: unde vir tenetur operam dare ut uxor contineat. Non potest autem in detrimentum spiritualis salutis redditio debiti vergere, quamvis per hujusmodi actum aliquis ineptus ad spiritualia reddatur; quia hoc non est ratione peccati, sed ratione carnalis passionis.

Ad secundum dicendum, quod quamvis lepra parentis in prolem redundet, non tamen propter hoc absolvitur conjux a debito reddendo, quia melius est proli sic esse quam penitus non esse. Ex redditione etiam debiti non de facili conjux inficitur ex lepra alterius, sicut inficeretur ex cohabitatione; et ideo tenetur uxor viro leproso debitum reddere, sed non cohabitare; et e converso.

Ad tertium dicendum, quod vir uxori debitum reddere tenetur non solum quando verbis expresse petit, sed etiam quando alia signa expressa apparent in uxore quod velit sibi debitum reddi, quamvis propter verecundiam expresse non petat, quae magis in uxore quam in viro esse consuevit: tunc enim est petitio interpretata.

ARTICULUS III.

Ad tertium sic proceditur. Et 1. videtur, quod unus conjugum possit votum emittere absque consensu alterius contra matrimonii actum. De quolibet enim praesumendum est bonum nisi probetur contrarium. Sed hoc est bonum, quod unus conjugum alteri volenti continentiam servare praebet assensum; et contrarium videtur esse peccatum in Spiritum sanctum, dum profectus spiritualis impeditur; ergo unus conjugum potest continentiam vivere sine consensu alterius, dummodo non appareat manifestus dissensus.

2. Praeterea, licitum est viro, uxore prohibente, accipere cruceem in subsidium terrae sanctae: sed hujusmodi voto redditio debiti impeditur, sicut et per votum continentiae; ergo pari ratione, licet viro continentiam vivere uxore prohibente.

3. Praeterea, servire Deo est magis debitum quam servire homini: sed homo potest impediri a debito reddendo uxori propter servitium hominis, ut puta cum dominus temporalis virum in suis ministeriis occupat; ergo multo fortius per votum licet se divino servitio mancipare, non obstante debito conjugali.

Sed contra est, quod dicitur 1 Cor. 7: « Non fraudetis invicem, nisi ex communi consensu ad tempus ut vacetis orationi. »

Praeterea, servus non potest facere votum absque domini consensu: sed per matrimonium unus conjugum servus fit alterius quantum ad redditionem debiti carnalis; ergo in praedictum hujus debiti, unus conjugum non potest votum emittere absque consensu alterius.

Respondeo. Dicendum, quod ea quae voventur, reddi debent, secundum illud Psalm. 75: « Vovete et reddite Domino Deo vestro. » Illa ergo quae dari non possunt voveri non debent. Quod autem est alicui obligatum non potest dari absque ejus consensu. Unde cum vir per matrimonium sit obligatus uxori ad debitum reddendum, et e converso non potest unus absque consensu alterius

Votum continentiae emittere vel quodcumque aliud in praedictum praedicti debiti.

Ad primum ergo dicendum, quod de quolibet debemus praesumere bonum ad quod de necessitate tenetur. Conjux autem non tenetur velle continentiam servare, cum hoc sit in consilio, et per consequens nec conjugis continentiam acceptare; nec peccat profectum spiritualem conjugis impediens qui in suum praedictum redundaret.

Ad secundum dicendum, quod per votum terrae sanctae non totaliter impeditur redditio debiti, quia mulier potest virum sequi; non tamen e converso potest uxor hujusmodi votum emittere absque consensu viri; quia vir caput est mulieris; unde non tenetur uxorem sequi, sed e converso.

Ad tertium dicendum, quod mulier accepit potestatem in corpore viri salvis viis in quibus aliis tenetur; quae tamen non sunt talia, ut simpliciter actum matrimonialem impediunt.

ARTICULUS IV.

Ad quartum sic proceditur. Et 1. videtur, quod tempus sacrum matrimonialem actum non impediatur. Matrimonium enim est ordinatum in remedium concupiscentiae: sed concupiscentia potest fieri in tempore sacro, sicut et in alio tempore; ergo matrimonialis actus non impeditur propter tempus sanctitatem.

2. Praeterea, si matrimonialis actus propter tempus sacrum impeditur, videtur pariter esse illicitum petere et reddere debitum, quia peccantes et consentientes simul puniuntur, ut patet Rom. 1: sed sacrum tempus non potest impedire quin debitum reddatur: hoc enim esset contra praeceptum Apostoli 1 ad Cor. 7: «Nolite fraudare etc.»; ergo nec etiam tempus sacrum impedire potest debiti petitionem.

3. Praeterea, si sacrum tempus impediatur matrimonialem actum, hoc non est nisi propter Ecclesiae praeceptum: sed facere contra praeceptum Ecclesiae est peccatum mortale; ergo sequeretur quod petentes debitum in tempore sacro peccarent mortaliter: quod videtur nimis grave.

4. Praeterea, matrimonium quoddam sacramentum est: sed tempus sacrum non repugnat celebrationi sacramentorum; ergo nec celebratio nuptiarum est interdicenda propter aliquod tempus sacrum; et praecipue quando debitum reddere licet.

Sed contra est quod dicitur Eccles. 5: «Tempus amplexandi et tempus longe fieri ab amplexibus.»

Praeterea, sicut sunt aliqua loca sacra divino cultui mancipata, ita et aliqua tempora: sed in locis sacris matrimonialis actus exerceri non debet; ergo nec in temporibus sacris.

Respondeo. Dicendum, quod ex praecepto juris naturalis tenetur homo ad hoc quod aliquando rebus divinis vacet, ut patet ex tertio praecepto decalogi. Sed determinatio temporis ad quod quis tenetur dependet ex jure positivo; sive sit divinitus institutum, sicut observatio sabbati in veteri lege; sive ab homine, sicut festa quae Ecclesia instituit celebranda. Quia ergo carnalis copula a spiritualibus abstrahit, in temporibus sacris ab actu matrimonii est abstinendum, non solum in ipsa hora quando divinum officium celebratur, sed etiam tota die; quia carnalis copula, non solum dum agitur ineptum ad spiritualia reddit, sed etiam postea.

Ad primum ergo dicendum, quod temporibus sacris possunt aliqua remedia adhiberi ad concupiscentiam reprimendam, quam copula carnalis, sicut oratio, meditatio et alia hujusmodi.

Ad secundum dicendum, quod in tempore sacro absque peccato poscenti debitum redditur; non tamen petitur absque peccato: qui enim reddit invitatus non consentit, sed cogitur; nec est fractor praecepti, quia damnum illius horae potest aliis horis recompensari, ut divinis vacetur. Est enim salubriter institutum, ut quolibet tempore debitum reddatur petenti ad vitandum occasiones peccati.

Ad tertium dicendum, quod petens debitum in tempore sacro, si petat ex contemptu, mortaliter peccat. Si autem ex pusillanimitate timens sibi de lubrico carnis, non peccat mortaliter, cum tempus sacrum non sit circumstantia trahens in aliquod genus peccati, et ita non aggravat in infinitum.

Ad quartum dicendum, quod in celebratione nuptiarum mentes contrahentium magis ad carnalia occupantur et quaedam signa dissolutae laetitiae solent ostendi; ideo statutum est, ut tribus temporibus nuptiae non celebrantur in quibus se debent homines ad spiritualia praeparare. Quorum primum est ab adventu usque ad Epiphaniam propter communionem in Nativitate. Secundum a Septuagesima usque ad octavam Paschae propter communionem paschalem. Tertium a tribus diebus ante Ascensionem usque ad octavam Pentecostes. His enim temporibus tribus secundum antiquos canones tenebantur communicare fideles. Nec est simile de aliis sacramentis quae sunt omnino spiritualia.

DISTINCTIO XXXIII.

Quaeritur hic de aliquis patribus etc. (V. edit. nostrae tom. VII, pag. 965.)

QUAESTIO UNICA.

Hic quaeruntur quatuor: 1.º utrum habere plures uxores sit contra legem naturae; 2.º utrum habere concubinam; 3.º utrum uxorem repudiare; 4.º utrum virginitas sit virtus.

ARTICULUS I.

Ad primum sic proceditur. Et 1. videtur, quod habere plures uxores non sit contra legem naturae. Lex enim naturae omni tempore obligat: sed aliquo tempore licuit plures uxores habere, ut in littera dicitur: nec potest dici, quod hoc fuit per aliquam dispensationem, cum super hoc, nec dispensatio, nec dispensationis revocatio facta legatur; ergo plures uxores habere non est contra legem naturae.

2. Praeterea, matrimonium ad legem naturae pertinet, secundum quod in officium naturae est; sic autem non repugnat matrimonio plures uxores habere, quia unus vir potest plures feminas secundare: unde et in quibusdam animalibus unus mas plures feminas habet; ergo habere plures uxores non est contra legem naturae.

3. Praeterea, omne quod est contra legem naturae est contra praeceptum, cui consuetudo non praedjudicat. Sed sicut dicit Augustinus et habetur in littera, habere plures non contra praeceptum, et peccatum non erat, quando mos erat; ergo habere plures uxores non est contra legem naturae.

Sed contra. Vir et mulier in matrimonio ad paria obligantur: sed contra legem naturae est, quod una mulier habeat plures viros, quod ostendit naturalis zelus viri, nolens habere consortium in uxore; ergo contra legem naturae est, quod unus vir habeat plures uxores.

Praeterea, contra legem naturae est, quod aliquis rem unius alteri tradat: sed quando aliquis cum una contrahit, tradit ei sui corporis potestatem; ergo contra legem naturae est, ut ea vivente, cum alia matrimonium contrahat.

Respondeo. Dicendum, quod aliquid potest contra legem naturae esse dupliciter. Uno modo, quia repugnat naturae hominis, ex qua est animal; sicut vitium sodomiticum est contra naturam, per quod prolis generatio impeditur a natura omnium animalium intenta: et sic non est contra legem naturae, quod unus vir habeat plures uxores: est autem contra legem naturae, quod una uxor habeat plures viros: unus enim potest plures fecundare, non autem fecundari una a pluribus. Alio modo dicitur aliquid esse contra legem naturae, quia est contra naturam hominis ex qua est homo, scilicet contra rationem, sicut furtum est contra legem naturae, inquantum scilicet aliquid fit, cui ratio naturaliter repugnat. Repugnat autem aliquid rationi dupliciter. Uno modo, sicut id cum quo nullo modo potest stare bonum rationis; sicut furtum, homicidium et huiusmodi. Alio modo, sicut id cum quo potest aliquo modo stare bonum, quod ratio intendit, sed tamen cum aliqua difficultate vel incommoditate: et sic habere plures uxores est contra legem naturae: intendit enim naturalis ratio in homine, non solum procreationem prolis, sed etiam communicationem in vita, quae non potest de facili esse pacifica, si unus vir habeat plures uxores.

Ad primum ergo dicendum, quod id quod est contra legem naturae, sicut existens contrarium naturae generis vel totaliter bonum rationis excludens, nullo potest tempore licere. Quod autem est contra legem naturae, ut pote difficultatem faciens in obtinendo rationis bono, potest per dispensationem superioris fieri licitum aliqua necessaria causa existente. Lex autem matrimonii est a solo Deo; per cuius dispensationem sanctorum Patrum mentibus inspiratam et eorum exemplis derivatam ad alios, licuit aliquando plures uxores habere, illo scilicet tempore quo genus humanum et cultus divinus carnali multiplicatione indigebat; quod non est tempore gratiae, quando cultus divinus spiritualiter multiplicatur.

Ad secundum dicendum, quod ratio illa procedit primo modo.

Ad tertium dicendum, quod ideo dicit Augustinus, quod non erat contra praeceptum legis naturae, quia pro illo tempore non obligabat; et ideo non est mirum si consuetudo in hoc praevalebat, ex divina dispensatione originem habens.

Ad quartum, patet responsio ex dictis, quod non est simile de viro et uxore.

Ad quintum dicendum, quod ratio illa procedit ad probandum, quod pluralitas uxorum totaliter bonum rationis excluderet, si uxor haberet talem in viri corpore potestatem, quod semper et continue ei debitum reddere teneretur.

ARTICULUS II.

Ad secundum sic proceditur. Et 1. videtur, quod habere concubinam non sit contra legem naturae. Quicquid enim est contra legem naturae, est peccatum mortale: sed accedere ad concubinam non est peccatum mortale: quod patet ex hoc quod Judas qui horruit simplex mendacium, non horruit simplicem fornicationem, ut patet Gen. 58; ergo accedens ad concubinam non est contra legem naturae.

2. Praeterea, non est credendum quod Abraham et Jacob aliquid contra legem naturae fecerint; habuerunt autem concubinas, ut in Genesi legitur; ergo non est contra legem naturae.

5. Praeterea, uti re sua non est contra legem naturae: sed ancilla est res domini; si ergo dominus suus utatur ea ut concubina, non est contra legem naturae.

Sed contra. Matrimonium est naturale, ut patet etiam per Philosophum in 8 Ethicorum: hoc autem non esset, si sine praejudicio legis naturae vir posset conjungi mulieri praeter matrimonium; ergo contra legem naturae est concubinam habere.

Praeterea, praecepta decalogi ad legem naturae pertinent: sed accedere ad concubinam est contra hoc praeceptum decalogi: « Non moechaberis, » ut in 5 libro dictum est; ergo habere concubinam est contra legem naturae.

Respondeo. Dicendum, quod habere concubinam est contra legem naturae, quia contrariatur bono quod natura intendit ex carnali conjunctione in omnibus animalibus. Intendit enim natura non solum prolis generationis, sed etiam educationem; quae si non possit fieri ab uno generantium sufficienter, requiritur quod ambo commaneant ad prolis educationem, ut etiam in quibusdam animalibus patet. Homo autem super hoc indiget a parentibus instrui, quod longum tempus requirit. Unde accedere ad mulierem quaecumque indifferenter, sine aliquo vinculo cum ea commorandi, est contra legem naturae.

Ad primum ergo dicendum, quod cum concubitus fornicarius sit contra foedus societatis inter parentes et prolem, est contra charitatem; et ideo peccatum mortale est. Nec oportet Judam a peccato mortali excusare, qui in venditionem fratris consensit; magis tamen horruit mendacium quam fornicationem propter fidei fractionem.

Ad secundum dicendum, quod Abraham et Jacob habuerunt concubinas quas uxorio affectu cognoscebant: erant enim quantum ad aliquid uxores, scilicet quantum ad actum matrimonialem, et quantum ad aliquid concubinae, scilicet quantum ad dispensationem familiae, inquantum non habebant dominium, sed erant ancillae: hoc enim cum non esset contra principale matrimonii bonum, dispensationem recipiebat. Unde et in Scriptura dicuntur aliquando uxores, aliquando concubinae.

Ad tertium dicendum, quod licet ancilla sit res domini, quantum ad ministerium, non tamen quantum ad concubitum: unde accedendo ad concubinam accedit ad non suam.

ARTICULUS III.

Ad tertium sic proceditur. Et 1. videtur, quod repudiare uxorem non sit contra legem naturae.

Lex enim Moysi legi naturae non fuit contraria. Sed lex Moysi libellum repudii permisit, nec hoc esse malum ostendit, vel ipse legislator, vel aliquis prophetarum; ergo repudiare uxorem non est contra legem naturae.

2. Praeterea, sacramenta non sunt de lege naturae, unde nec matrimonium, secundum quod est sacramentum, sed secundum quod est naturae officium: inseparabilitas autem matrimonio competit secundum quod est Ecclesiae sacramentum, non autem secundum quod est naturae officium, cum frequenter bonum prolis, quod natura intendit, per hoc impediatur, quia aliquis vir non potest ex aliqua uxore generare, qui generaret ex alia; ergo repudiare uxorem non est contra legem naturae.

5. Praeterea, Agar aliquo modo uxor fuit Abrahae, ut dictum est; et tamen Abraham eam eiecit, ut habetur Gen. 21; ergo repudiare uxorem non est contra legem naturae; alias Abraham hoc minima fecisset.

Sed contra. De lege naturae est, ut quod Deus conjunxit homo non separet: sed per hoc probatur matrimonii inseparabilitas, Matth. 19; ergo contra legem naturae est uxorem dimittere.

Praeterea, naturae modus et intentio praecipue in institutione ipsius ostendi debuit. Sed in principio institutionis humanae naturae fuit inseparabilitas matrimonii demonstrata per hoc quod dicitur Gen. 2: « Adhaerebit uxori suae, » ergo inseparabilitas matrimonii est de lege naturae.

Respondeo. Dicendum, quod sicut habere concubinam est contra legem naturae, ita repudiare uxorem. Parentes enim non solum debent educationi filiorum insistere, secundum aliquod tempus, sed etiam toto tempore vitae suae, unde filii omnia thesaurizant. Et ideo lex naturae requirit ut vir et mulier per totum tempus commaneant. Sed sciendum est, quod sicut contra bonum rationis aliquid est, quod totaliter bonum rationis excludit, et hoc dispensationem non recipit; aliquid vero est quod bonum rationis impedit etsi non totaliter tollat, et hoc recipit dispensationem a legis auctore; ita bonum, quod natura intendit, per aliquid totaliter tollitur, sicut per innaturalem concubitum, et hoc dispensationem non recipit: per aliquid vero aliquantulum impeditur, et hoc dispensationem recipit, et sic non est contra naturam repudium uxoris: quia etiam hoc posito filii sustentari possunt, licet non ita convenienter; et ideo hoc dispensationem habere potuit a Deo qui est legis matrimonii auctor.

Ad primum ergo dicendum, quod de libello repudii in lege permissio est duplex opinio. Quidam enim dicunt quod illa permissio excusabat a poena temporali per legem infligenda, non autem a culpa. Aliis videtur etiam quod divina auctoritate talis permissio a culpa excusaret. Unde secundum primam opinionem, non poterat uxor dimissa alii nubere, poterat vero juxta secundam opinionem. Ratio vero permissionis fuit vitatio uxoricidii, ad quod proni erant propter irascibilis corruptionem, sicut foenerari extraneis, fuit ei permissum propter corruptionem concupiscibilis, et sacrificium zelotipiae, propter rationis corruptionem.

Ad secundum dicendum, quod separabilitas matrimonii totaliter excludit ejus significationem, secundum quod est sacramentum inseparabilis unionis Christi et Ecclesiae; non autem totaliter tollit bonum intentum a natura, quamvis illud

impediat: et ideo maxime est contra matrimonium in quantum est sacramentum, licet non sit contra ipsum aliquo modo, in quantum est in naturae officium. Nec obstat quod in quibusdam per hoc bonum prolis impedi videtur, quod in legibus matrimonii attenditur quid hominibus expediat, non quid competat uni tantum.

Ad tertium dicendum, quod Abraham eiecit Agar ex dispensatione divina.

ARTICULUS IV.

Ad quartum sic proceditur. Et 1. videtur, quod virginitas non sit virtus. Omnis enim virtus consistit solum in mente: sed virginitas consistit etiam in carne; ergo non est virtus.

2. Praeterea, nulla virtus repugnat praecepto legis naturalis: virginitas autem repugnat naturalis legis praecepto, quod habetur Gen. 1: « Crescite et multiplicamini, etc. »; ergo non est virtus.

5. Praeterea, omnis virtus consistit in medio: sed virginitas consistit in extremo, quia abstinet ab omni; ergo virginitas non est virtus, sed magis vitium.

Sed contra est quod dicit Ambrosius in libro de Virginitate: « Invitat virginitatis amor, ut aliquid de virginitate dicamus, quae principalis est virtus. »

Praeterea, praemium non debetur nisi virtuti: virginitati autem debetur praemium, scilicet fructus centesimus, ut patet Matth. 15, juxta sanctorum expositionem; ergo virginitas est virtus.

Respondeo. Dicendum, quod virginitas virtus est. Nec tamen nomine virginitatis sola virtus designatur; sed cum virtute quoddam accidens ejus, sive status aliquis ipsius: significat enim virginitatis nomen virtutem continentiae, quae nunquam in actum carnalis commisionis processit, cum proposito perpetuo conservandi hujusmodi statum. Alias virginitas non haberet rationem virtutis, sicut patet in iis qui nondum contraxerunt, habent tamen propositum contrahendi, vel etiam fornicandi. Et hoc est quod Augustinus dicit, quod virginitas est in carne corruptibili, incorruptionis perpetua meditatio.

Ad primum ergo dicendum, quod virginitas essentialiter consistit in mente, sed materiam suam habet in carne. Unde virginitati non fit praesudicium, si omnino praeter consensum mentis caro corrumpatur. Et inde est quod Lucia dixit: « Non inquinatur corpus, nisi de consensu mentis. »

Ad secundum dicendum, quod omnis virtus requirit tempus opportunum, sicut et caeteras circumstantias debitas. Unde virginitas observata pro illo tempore in quo ad contrarium praeceptum legis naturalis non obligat, virtutis rationem habet, alias non. Dicitur enim est supra, quod praeceptum de multiplicatione seminis non obligat semper et omni tempore.

Ad tertium dicendum, quod medium virtutis non accipitur secundum quantitatem, cum aliqua virtus sit quae maximum in sua materia operatur, sicut magnificentia vel magnanimitas. Sed medium virtutis attenditur secundum rationem rectam; ut scilicet actus virtutis fiat illis circumstantiis adhibitis quae ratio recta determinat, alias non. Et sic virginitas in medio est, si observetur quando debet, et prout debet, et a quo debet, et sic de aliis.

DISTINCTIO XXXIV ET XXXV.

Nunc superest attendere etc. (V. edit. nostrae tom. VII, pag. 980-987.)

QUAESTIO UNICA.

Circa hanc distinctionem et sequentem, quaeruntur quatuor: 1.^o utrum matrimonio convenienter assignentur impedimenta; 2.^o utrum aliqua corporalis infirmitas, utputa, frigiditas, vel aliquid hujusmodi, sit matrimonii impedimentum; 3.^o utrum aliquod crimen; 4.^o utrum liceat uxorem dimittere ob causam fornicationis.

ARTICULUS I.

Ad primum sic proceditur. Et 1. videtur, quod matrimonio impedimenta assignari non debeant. Matrimonium enim est institutum in remedium concupiscentiae carnalis: sed haec est in omnibus; ergo nulla persona debet impediri a contractu matrimonii.

2. Praeterea, matrimonium inter alia sacramenta est minus perfectum: sed aliis sacramentis non assignantur impedimenta; ergo nec matrimonio debent assignari.

3. Praeterea, matrimonium est de lege naturae: si ergo impedimentum aliquod matrimonio assignatur, oportet quod sit de lege naturae: hujusmodi autem sunt eodem modo apud omnes; ergo non debent assignari matrimonio impedimenta quae apud omnes non similiter impediunt, sicut consanguinitas, et affinitas, et alia hujusmodi.

Sed contra. Posito impedimento res poni non potest, cum nihil impediatur nisi per suum oppositum: non ergo debent poni matrimonii impedimenta, nisi illa quae faciunt personas simpliciter illegitimas ad contrahendum: haec autem non solum impediunt ad contrahendum, sed etiam dirimunt contractum; ergo cum sint multa hujusmodi, et impediunt ad contrahendum, et dirimentia jam contractum, sequitur quod matrimonio sint assignanda simpliciter multa impedimenta.

Praeterea, matrimonium est quoddam bonum: sed infinitis modis contingit bonum aliquod impediri; ergo impedimenta matrimonii possunt esse infinita, et non debent ad aliquem certum numerum reduci.

Respondeo. Dicendum, quod matrimonium impediri potest dupliciter. Uno modo, per aliquid quod contrariatur sacramenti solemnitati; et hujusmodi impedimenta impediunt contrahendum, sed non dirimunt contractum: et sunt duo, idest prohibitio Ecclesiae et tempus feriatum. Unde versus: Ecclesiae vetitum, nec non tempus feriatum impediunt fieri, permittunt juncta teneri. Alio modo matrimonium impeditur per aliquid quod est contra essentialia matrimonii: et hoc potest esse tripliciter. Uno modo quia impedit matrimonii causam; et sic sunt duo: scilicet coactio et error, quae tollunt voluntarium consensum. Alio modo, quia impediunt matrimonii actum, vel impedimento naturali, et sic est imponentia coeundi: vel impedimento civili, et sic est conditio servitutis: vel impedimento spirituali, et sic impedit votum solemne et sacer ordo. Tertio modo, impedimentum matrimonii repugnat ei ex parte personarum contrahentium; et

S. Th. Opera omnia. V. 22.

hoc quadrupliciter. Uno modo, propter fidei distantiam, et sic est disparitas cultus. Alio modo, propter propinquitatem carnalem: et sic impedimenta matrimonii ponuntur, cognatio, affinitas et publicae honestatis justitia. Tertio modo propter reatum personae, sive culpam; et sic crimen adulterii matrimonium impedit. Quarto modo, propter matrimonium cum alia persona jam contractum. Quae quidem impedimenta iis versibus continentur: Error, conditio, votum, cognatio, crimen. Cultus disparitas, vis, ordo, ligamen, honestas. Si sis affinis, si forte coire nequibis. Haec socianda vetant, connubia facta retractant. Intelligitur autem per vim coactio, per ligamen, matrimonium cum alia persona contractum; quia non potest una persona simul duobus matrimonio conjungi.

Ad primum ergo dicendum, quod morbo concupiscentiae potest aliis remediis subveniri; et ideo non est inconveniens si a matrimonio aliquae personae abstineant.

Ad secundum dicendum, quod matrimonio prae aliis sacramentis impedimenta assignantur; tum quia est inter duos, et ex pluribus causis impeditur; tum quia est onus spirituale, et per impedimenta datur occasio spiritualis profectus.

Ad tertium dicendum, quod jus naturale recipit determinationem per jus positivum: unde non est inconveniens, quod aliqua matrimonii impedimenta sint de jure positivo, quamvis matrimonium sit de jure naturali.

Ad quartum dicendum, quod illa quae impediunt matrimonium, ut penitus non fiat, non possunt simul cum matrimonio esse: et haec sunt quae impediunt contrahendum et dirimunt contractum, utpote matrimonii essentialia conditiones tollentia. Quaedam vero sunt, quae impediunt ne licite fiat, et cum matrimonio simul esse possunt, unde non dirimunt matrimonium contractum. Est etiam alia differentia inter hujusmodi impedimenta consideranda, quia quaedam sunt quae personam omnino illegitimam faciunt ad contrahendum, ut votum, et sacer ordo, quae respiciunt personam absolute. Quaedam vero non faciunt simpliciter illegitimam, sed solum respectu talis personae; et haec sunt impedimenta, quae ordinem ad aliud important.

Ad quintum dicendum, quod ea quae per accidens impediunt matrimonium, sunt infinita; sed ea quae impediunt proprie in generali accepta, aliquem certum numerum habent.

ARTICULUS II.

Ad secundum sic proceditur. Et 1. videtur, quod carnalis infirmitas matrimonium impedire non possit. Non enim potest impediri matrimonium, nisi ratione carnalis copulae: hanc autem furia non impedit; ergo furia matrimonium non impedit.

2. Praeterea, omnes vetuli sunt naturaliter frigidi: sed possunt vetuli matrimonium contrahere; ergo frigiditas matrimonium non impedit.

3. Praeterea, matrimonium non impeditur ut omnino non sit, nisi per aliquod impedimentum perpetuum: sed maleficium non potest esse impedimentum perpetuum, tum quia per exorcismos Ecclesiae vis daemonum reprimitur, tum quia aliquis potest per poenitentiam a daemonis potestate eximi, tum quia dependet ex daemonis voluntate;

ergo maleficium non potest matrimonium impedire.

Sed contra. Pueri ab adultis non differunt, nisi per corporales conditiones: sed pueri non possunt matrimonium contrahere; ergo defectus corporalis matrimonium impedit.

Praeterea, carnali copulae magis repugnat impedimentum corporale, quam impedimentum spirituale: sed quaedam spiritualia matrimonium impediunt ratione carnalis copulae, scilicet sacer ordo et votum; ergo multo fortius defectus corporalis.

Respondeo. Dicendum, quod corporalis defectus est duplex. Unus qui redundat in mentem, sicut furia; et talis defectus impedit matrimonii causam, scilicet consensum, qui usum rationis praesupponit: unde reducitur ad impedimentum erroris, de quo supra habitum est. Alius est defectus pure corporalis; et hic defectus, si actum matrimonii non impedit, nullatenus est matrimonii impedimentum; sicut caecitas, vel aliquid hujusmodi. Si vero ad actum matrimonii omnino impotentem reddat, sive ex causa naturali intrinseca, quae frigiditas appellatur, sive ex operatione daemonis, matrimonium impeditur, dummodo sit defectus perpetuus, ad quod probandum tempus certum ab Ecclesia est institutum, post quod, si facultas reddendi debitum praestaretur, Ecclesia reputaret se deceptam in iudicio, quod iudicavit impedimentum perpetuum, matrimonium, dirimendo, et ipsum reintegraret. Ideo autem talis defectus matrimonium impedit, quia matrimonium est quaedam obligatio ad carnalem copulam: nullus autem potest ad impossibile se obligare: alias deciperetur ille cui sit obligatio, si hanc impossibilitatem nesciret. Unde et si alter conjugum sciat impotentiam alterius, quae est per naturam, vel maleficium, matrimonium non impeditur.

Ad primum ergo dicendum, quod furia, aut praecedat matrimonium, aut sequitur. Si sequitur, matrimonium non tollit: regula enim est, quod nullum impedimentum matrimonio iam contracto superveniens, potest dirimere ipsum. Si autem furia praecedat matrimonium, tunc, aut furiosus habet lucida intervalla, aut non. Si habet, potest contrahere matrimonium, quando est sanae mentis, licet sit periculosum et uxori et proli. Si autem non habet, vel si contrahat quando non est sanae mentis, nullum est matrimonium, propter impedimentum consensus.

Ad secundum dicendum, quod vetuli, licet non habeant caliditatem sufficientem ad proles generationem, habent tamen sufficientem ad carnalem commistionem; unde in eis potest esse matrimonium prout est in remedium concupiscentiae, licet non prout est in officium naturae. Sciendum tamen, quod omne impedimentum naturale, ex quacumque causa proveniat, in frigiditate intelligitur; eo quod vix potest esse aliquod impedimentum perpetuum quod non habeat frigiditatem pro causa, vel pro effectu consequente.

Ad tertium dicendum, quod maleficium reputatur impedimentum perpetuum, quando opere humano non potest remedium adhiberi, licet possit opere divino. Nec oportet, quod per exorcismos Ecclesiae hujusmodi maleficia pellantur, cum ad hoc non sint instituti: nec etiam per poenitentiam maleficiati, quia aliquis potest subdi daemonum potestati quo ad corpus, etsi non quo ad animam ut patet Job 2. Voluntas etiam daemonis est

obstinata in malo, et ideo impedimentum ab ea dependens, perpetuum reputatur. Haec tamen est differentia inter frigiditatem et maleficium, quia frigiditas facit aequaliter impotentem ad omnes, maleficium autem non. Unde quando matrimonium dirimitur iudicio Ecclesiae, propter maleficium, datur eis licentia aliis nubendi, non autem quando dirimitur propter frigiditatem, quantum ad illum in quo est impedimentum. Quare si postmodum cum altera persona carnaliter commisceatur, reputatur impedimentum non fuisse perpetuum, et cogitur redire ad primam. Hoc autem in maleficio non contingit.

ARTICULUS III.

Ad tertium sic proceditur. Et 1. videtur, quod crimen matrimonium non impedit. Incestus enim quo aliquis cognoscit consanguineam uxoris, maxime videtur matrimonium impedire: sed hoc non impedit, quia sic mulier puniretur pro peccato viri, quod non est conveniens; ergo crimen incestus matrimonium non impedit.

2. Praeterea, impediri a matrimonio est quaedam poena; si ergo crimen est causa hujus impedimenti, videtur quod si tollitur crimen per poenitentiam, cesset impedimentum.

3. Praeterea, poena peccati absolute, personam respicit peccantem: sed hujusmodi impedimenta faciunt personas simpliciter illegitimas ad contrahendum; ergo sequeretur quod post commissum incestum vel adulterium, aliquis cum nulla contrahere posset, si haec crimina matrimonium impedirent.

Sed contra. Unumquodque impeditur per suum contrarium: sed haec crimina bonis matrimonii contrariantur; ergo matrimonium impediunt.

Praeterea, poena debet culpae respondere; ergo qui contra matrimonium peccat, matrimonio privari debet.

Respondeo. Dicendum, quod aliquod crimen potest impedire matrimonium dupliciter. Uno modo sic, quod impedit contrahendum, et non dirimat contractum: et sic impediunt matrimonium ista, quorum primum est incestus, secundum uxoricidium, tertium rapina alienae sponsae, quartum quando aliquis insidiando matrimonio, filium proprium de sacro fonte suscipit, quintum quando pro aliquo crimine peregit poenitentiam solemnem, sextum quando aliquis interfecit sacerdotem. Alio modo aliquod crimen impedit matrimonium contrahendum, et dirimat contractum: et hoc in tribus casibus. Primus est, quando aliquis cognita uxore alterius, machinatur in mortem viri cum effectu: tunc enim, si contraxerint, utroque faciente hoc impedimentum, separantur. Secundus est, quando praestat fidem adulterae, quod ducet in uxorem post mortem viri. Tertius est quando contrahit cum ea de facto vivente viro, subsequente carnali copula: tunc enim si post mortem viri vellet cum ea contrahere, non esset matrimonium.

Ad primum ergo dicendum, quod si post matrimonium contractum et consummatum, aliquis consanguineam suae uxoris cognoscat, non debet matrimonium separari, sed vir amittit jus petendi, non autem mulier, quia non debet puniri pro peccato alterius. Debet etiam propter reatum criminis, perpetuo manere absque spe conjugii, nisi cum eo dispensetur. Hoc tamen impedimentum, non dirimit con-

tractum, ut dictum est. Si autem cognoscat consanguineam uxoris ante contractum matrimonium, contrahitur affinitas, quae impedit contrahendum, et dirimit contractum.

Ad secundum dicendum, quod licet culpa per poenitentiam aboleatur, tamen affinitas manet: et praeterea cessante culpa cessat reatus poenae aeternae, sed potest remanere reatus ad poenam temporalem.

Ad tertium dicendum, quod unusquisque potest puniri in quo peccavit; et ideo propter aliqua crimina impeditur aliquis ne contrahat cum una persona, quam ne contrahat cum alia: et praeterea affinitas contrahitur ad unam, et non ad aliam.

ARTICULUS IV.

Ad quartum sic proceditur. Et 1. videtur, quod propter fornicationem vir uxorem dimittere non possit. Homo enim non cogitur esse sine uxore: si ergo propter fornicationem uxoris potest eam dimittere, videtur, quod posset aliam ducere: quod est contra Apostolum 1 Corinth. 7, qui dicit uxorem a viro non discedere; quod si discesserit manere innuptam.

2. Praeterea, quaedam alia peccata sunt graviora quam adulterium, ut infidelitas, vitium contra naturam, et alia hujusmodi: si ergo propter adulterium potest aliquis uxorem dimittere, videtur quod pari ratione propter hujusmodi crimina.

3. Praeterea, si vir posset uxorem dimittere propter fornicationem, aut hoc posset iudicio Ecclesiae, aut proprio arbitrio: sed non proprio arbitrio, quia sic esset vir in eadem causa actor et iudex: similiter nec iudicio Ecclesiae, quia vir non debet eam Ecclesiae deferre, nisi monitione praemissa, ut habetur Matth. 18; ergo videtur quod vir nullo modo possit propter fornicationem uxorem dimittere.

4. Praeterea, aut licet viro cum uxore fornicante commorari, aut non: si non licet, ergo non licet eam dimissam revocare: et hoc est contra Apostolum 1 ad Cor. 7: « Si discesserit manere innuptam, aut viro reconciliari: » si autem licet, videtur quod vir uxorem dimittens de propria offensa vindictamumat, quod est contra Apostolum Rom. 12; et sic videtur quod nullo modo liceat uxorem dimittere propter fornicationem.

Sed contra est quod habetur Matth. 5 et 19.

Praeterea, frangenti fidem, non est fides servanda: sed uxor fornicando, frangit fidem, quam debet marito; ergo maritus potest eam dimittere.

Respondeo. Dicendum quod duplex est matrimonii separatio. Una, qua ipsum matrimonium dirimitur: et haec non potest fieri propter fornicationem sequentem, neque propter aliquod impedimentum matrimonio superveniens, ut dictum fuit superiori articulo in corpore. Alia est separatio quantum ad matrimonii actum, quae dicitur separatio a toro: et haec concessa est a Domino in poenam illius qui fidem fregit, et in favorem illius qui servavit. Unde in hoc, vir et mulier sunt pares, sicut et in debito fidei. Sunt tamen aliqui casus, in quibus vir uxorem propter fornicationem dimittere non potest, in quibus vel mulier est sine culpa, vel utriusque sunt aequaliter culpabiles, vel vir est particeps culpae uxoris: quorum primus est, si fuerit similiter vir fornicatus; secundus, si uxorem prostituerit; ter-

tius si uxor virum mortuum probabiliter credens, propter longam illius absentiam, alteri nupserit; quartus si adulter ad eam accesserit latenter sub specie viri; quintus si fuerit vi oppressa; sextus si reconciliaverit eam sibi post notitiam adulterii perpetrati, carnaliter eam cognoscens; septimus si libellum repudii ei dederit post matrimonium eum ea contractum in statu infidelitatis.

Ad primum ergo dicendum, quod quia matrimonii vinculum non est solutum, non potest vir dimissa uxore propter fornicationem, aliam ducere: nec est inconveniens quod per accidens aliquis ad continentiam obligetur per id quod est ex parte alterius, sicut per infirmitatem uxoris, vel fornicationem, quamvis non obligetur absolute.

Ad secundum dicendum, quod quamvis aliqua peccata sint graviora adulterio, non tamen ita directe bonis matrimonii repugnant; sicut homicidium, sacrilegium et hujusmodi. Infidelitas autem, quae dicitur spiritualis fornicatio, est contra intentum matrimonii, quod est proles educanda ad cultum Dei: et ideo divortium causat propter consuetudinem, quae pertinaciam monstrat, non propter unum actum tantum, sicut est in fornicatione carnali. Vitium vero contra naturam similiter potest causa divortii, sed de eo non ita fit mentio, propter ejus turpitudinem.

Ad tertium dicendum, quod uxorem propter fornicationem dimittere posse, potest intelligi dupliciter. Uno modo, quantum ad torum, ut ei debitum vir non reddat; et sic postquam ei de crimine uxoris constiterit, potest eam proprio arbitrio dimittere; alias si debitum redderet, sibi praejudicium generaret, nec posset eam post modum dimittere, nisi forte ad hoc iudicio Ecclesiae compelleretur. Alio modo quantum ad torum et cohabitationem, quod proprie dicitur divortium, et hic quaeritur Ecclesiae iudicium, et potest praecedere charitativa admonitio: non tamen est necessaria, si per viam accusationis procedatur. Non tamen in tali accusatione requiritur obligatio ad legem talionis; quia sic vir consequeretur in omnem eventum, suam intentionem.

Ad quartum dicendum, quod si mulier fornicatur, et admonita correctata fuerit, potest vir eam licite retinere, vel reconciliare dimissam, licet non cogatur. Si autem sit incorrigibilis, tenetur eam dimittere, nec debet dimissam recipere, ne patronus turpitudinis videatur.

DISTINCTIO XXXVI ET XXXVII.

Nunc de conditione videamus etc. (V. edit. nostrae tom. VII, pag. 993-998.)

Circa hanc distinctionem et sequentem, quatuor quaeruntur: 1.º utrum conditio servitutis, matrimonium impediatur; 2.º utrum defectus aetatis; 3.º utrum ordo; 4.º utrum uxoricidium.

ARTICULUS I.

Ad primum sic proceditur. Et 1. videtur, quod servitus matrimonium non impediatur. Matrimonii enim impedimenta quolibet modo ipsum matrimonium impediunt, ut patet de ordine et voto: sed servitas, si sciatur, matrimonium non impedit; ergo servitus impedimentum matrimonii poni non debet, sed sufficienter sub errore comprehenditur.

2. Praeterea, si servitus matrimonium impedit, pari ratione matrimonium impediret servitatem: hoc autem falsum est: nam vir potest se in servum vendere absque consensu uxoris, licet non e converso; ergo nec servitus impedit matrimonium.

5. Praeterea, si servitus matrimonium impedit, maxime videretur impedire propter obligationem qua domino suo servus obligatur: sed hoc non impedit, quia absque consensu domini, servus potest matrimonium contrahere; ergo servitus matrimonium non impedit.

Sed contra est, quod Decretalis dicit de conjugio servorum, quod error conditionis impedit matrimonium contrahendum, et dirimit contractum.

Praeterea, matrimonium quaedam servitus est, cum per ipsum unus conjugum accipiat in corpore alterius potestatem: sed servitus praecedens impedit servitatem sequentem: qui enim est servus unius, non potest se tradere alteri in servum; ergo pari ratione servitus matrimonium impedit.

Respondeo. Dicendum, quod per matrimonium aliquis se conjugio obligat ad hoc, quod petenti debitum reddat, et ad hoc ut procreandae et nutriendae proli operam det; ad quae duo servitus de sui ratione quandam oppositionem habet. Nam servus non est idoneus ut liber uxori debitum reddat, eo quod est obligatus suo domino, qui circa sua obsequia eum potest multipliciter impedire. Similiter etiam servitus parentum, proli praedicit, cum ratione procreationis, quia partus sequitur conditionem parentum: matris quidem secundum legem civilem; patris vero vel matris servitatem, indifferenter, secundum aliquarum terrarum assuetudinem: tum etiam ratione nutritionis, quia servus nihil possidet, unde valeat filios nutrire, vel eis thesaurizare; et ideo convenienter servitus matrimonii ponitur impedimentum.

Ad primum ergo dicendum, quod impedimenta illa, quae sunt contra causam matrimonii, vel contra essentiam ejus, impediunt matrimonium, secundum se, sive sciantur, sive non: quae vero impediunt matrimonium ratione effectus, a quo conjuges possunt abstinere, si volunt, non impediunt matrimonium, nisi secundum quod generant alteri praedictum, cui non erit liberum uti matrimonio, vel non uti: et hujusmodi sunt impotentia coeundi, et conditio servitutis; et ideo quando sciuntur, matrimonium non impediunt, quia hoc praedictum alter conjugum acceptat. Ideo tamen servitus ponitur impedimentum praeter errorem, quia ex se ipsa habet unde matrimonium impediatur praeter rationem erroris; non autem persona subintroducitur, cujus error similiter matrimonium impedit.

Ad secundum dicendum, quod post matrimonium contractum, quia vir praestitit mulieri in rebus domesticis et civilibus, quamvis in actu naturae sint pares, potest vir absque consensu mulieris se in servum vendere, non autem e converso, sed per hoc matrimonium non dirimitur, nec aliquod praedictum fit uxori, quantum ad debiti redditionem, a qua dominus eum impedire non poterit, nisi consensus uxoris intervenerit. Nec est simile de servitute ante matrimonium, et post; quia nullum impedimentum matrimonio superveniens dirimit ipsum.

Ad tertium dicendum, quod servus subditur domino in civilibus: unde sicut non potest eum impedire quin comedat et dormiat, ita nec quin matrimonium contrahat: sed tamen sic matrimonium con-

trahens, non tenetur uxori debitum reddere, domino aliquod aliud imperante; sed si de ejus consensu matrimonium contraxit, non potest impedire, quin petenti uxori debitum reddat.

ARTICULUS II.

Ad secundum sic proceditur. Et 1. videtur, quod defectus aetatis, matrimonium non impediatur. Frigiditas enim, nisi sit perpetua, matrimonium non impedit: sed defectus aetatis non est perpetuus; ergo matrimonium non impedit.

2. Praeterea, si defectus aetatis impedit matrimonium, debet impedire quousque secundum jura reputatur quis minor aetate: hoc autem est usque ad vigesimum quintum annum; ergo ante illud tempus contrahere matrimonium non posset.

5. Praeterea, vir et mulier ad paria in matrimonium obligantur: sed mulier ante quartumdecimum annum potest contrahere matrimonium; ergo et vir.

Sed contra est, quod Decretalis dicit, quod puer qui non potest reddere debitum, non est aptus matrimonio: hoc autem non est ante quartumdecimum annum, ut in pluribus, sicut dicitur in 9 de Animalibus; ergo ante hoc tempus, vir matrimonium contrahere non potest.

Praeterea, ea quae sunt in natura, habent tempus determinatum: matrimonium autem est naturale; ergo debet ei tempus determinari, ante quod non contrahatur.

Respondeo. Dicendum, quod tempus contrahendi matrimonium determinatur a jure et masculo et feminae ex duorum consideratione, scilicet causae matrimonii et effectus. Ex consideratione siquidem causae, ordinatum est, ut ante annos discretionis matrimonium non contrahatur, quia indiscretio puerilis consensum impedit, et reducit ad errorem sicut et furia. Ex consideratione vero effectus, ordinatum est, ne tempus contrahendi matrimonium protrahatur ultra hoc tempus, in quo conjuges sibi debitum reddere possunt, ad vitandum damnabiles corruptelas in quas incidere possent, si eis contractus matrimonium negaretur. Hoc autem mulier potest in duodecimo anno, vir autem in quarto-decimo, ut in 9 de Animalibus dicitur loquendo ut in pluribus; et ideo hoc tempus est aptum matrimoniis contrahendis, et non ante: ita tamen quod si ante hoc tempus perfectio naturae acceleretur in aliquo, matrimonium consummatum non dissolvitur, utputa si malitia suppleverit.

Ad primum dicendum, quod defectus aetatis non ponitur matrimonii impedimentum, solum propter matrimonii effectum, sicut frigiditas: sed etiam propter causam, ut dictum est; et ideo non est simile.

Ad secundum dicendum, quod minor discretio sufficit ad opera naturae, quam ad contractus civiles; et ideo brevius tempus contrahendis matrimoniis est statutum, quam tempus viginti quinque annorum, quod statuitur quantum ad civiles contractus.

Ad tertium dicendum, quod mulier citius ad tempus pubertatis pervenit quam vir; et ideo non est simile de utroque.

ARTICULUS III.

Ad tertium sic proceditur. Et 1. videtur, quod ordo matrimonium non impediatur. Aut enim ordo

impedit ratione ordinis, aut ratione voti annexi. Si ratione ordinis, quilibet ordo impediret, quod est falsum. Si ratione voti; ergo non debet poni aliud impedimentum quam votum: inconvenienter ergo ponitur speciale matrimonii impedimentum.

2. Praeterea, idem est ordo apud omnes: sed apud Graecos ordo matrimonium non impedit, quia etiam sacerdotes eorum uxores habent; ergo ordo non debet poni matrimonii impedimentum.

5. Praeterea, si ordo impedit matrimonium, pari ratione matrimonium potest ordinem impedire: sed aliquis post contractum matrimonium potest ordinis sacramentum suscipere; ergo pari ratione post susceptos ordines matrimonium contrahere potest.

Sed contra est, quod Decretalis dicit: « Si in subdiaconatu, et aliis superioribus ordinibus, uxores accipisse noscuntur, eos uxores dimittere compellatis. »

Praeterea, secundum Dionysium in Ecclesiastica Hierarchia, monachi sunt infirmitates quantum ad spiritualia, iis qui sunt in ecclesiasticis ordinibus constituti: sed monachatus impedit matrimonium; ergo multo magis ordo.

Respondeo. Dicendum, quod per sacramentum ordinis aliquis spiritualibus actionibus deputatur; per matrimonium autem aliquis a spiritualibus impeditur, tum ratione carnalis copulae, in qua anima maxime carnalis efficitur, tum etiam ratione sollicitudinis quae incumbit matrimonio junctis circa se invicem et familiam, ut non possint totaliter quae sunt Domini cogitare, ut dicitur 1 Cor. 7; et ideo ordo de se aptitudinem quamdam habet ad hoc quod matrimonium impediatur: sed haec aptitudo ad actum reducitur per Ecclesiae statutum, cujus dispositioni matrimonium et ordo subduntur.

Ad primum ergo dicendum, quod ordo habet matrimonium impedire, pro aptitudine quidem, in quantum est ordo; sed secundum actum, ratione statuti Ecclesiae, quod tamen non se aequaliter extendit ad omnes ordines. Nam per sacros ordines aliquis familiariter spiritualibus tractandis admittitur, scilicet sacramentis; et vasis sacris: et ideo sacer ordo, ex statuto Ecclesiae, impedit matrimonium contrahendum, et dirimit contractum: non autem alii ordines quibus sacra tractare non committitur; sed tamen secundum statutum occidentalium Ecclesiae, si matrimonio uti volunt, ab executione ordinis impediuntur, et per consequens a beneficio et privilegio clericali.

Ad secundum dicendum, quod tam apud Latinos quam apud Graecos, ordo sacer matrimonium impedit ex Ecclesiae statuto: sed est differentia quantum ad duo. Primo, quantum ad hoc, quod apud Graecos, subdiaconatus inter sacros ordines non computatur. Secundo, quia apud eos illi, qui sunt in sacris ordinibus constituti, scilicet diaconi et presbyteri, possunt uti matrimonio prius contracto, non tamen contrahere matrimonium post sacri ordinis susceptionem.

Ad tertium dicendum, quod in matrimonio non imprimitur character aliquis spiritualis, sicut in ordinis sacramento; sed tantum consistit in quadam obligatione hominis ad hominem, quae dispositioni Ecclesiae subditur, non autem character ordinis qui sequitur virtutem sacramenti; et ideo statutum Ecclesiae potest impedire, ne post acceptum characterem sacramenti ordinis, matrimonium contrahatur; non autem potest impedire, quin potest contractum matrimonii character ordinis recipiatur, servatis his

quae sunt de essentia sacramenti. Unde vir etiam reclamante uxore, ad ordines accedens peccat, sed tamen recipit characterem et non executionem; et tenetur reddere debitum, sed amittit jus petendi. Si autem volente uxore ad sacrum ordinem accedat, recipit characterem et executionem, et ad perpetuam continentiam obligatur uterque.

ARTICULUS IV.

Ad quartum sic proceditur. Et 1. videtur, quod uxoricidium matrimonium non impediatur. Illud enim quod est licitum, non debet matrimonium impedire. Sed occidere uxorem, in aliquo casu videtur licitum, cum concedatur per leges civiles: cum scilicet uxor in actu adulterii deprehenditur; ergo uxoricidium matrimonium non impedit.

2. Praeterea, majus peccatum est occidere matrem quam uxorem, quia ei major reverentia debetur: sed occisio matris non impedit matrimonium; ergo nec occisio uxoris.

3. Praeterea, remota causa, removetur effectus: sed culpa homicidii potest etiam per poenitentiam deleri; ergo ad minus in hoc casu matrimonium contrahere potest.

Sed contra est quod Canon dicit: Interfectores suarum conjugum, ad poenitentiam redigendi sunt, quibus penitus denegatur conjugium.

Praeterea, in quo quis peccat, in eodem debet puniri: sed uxoricida contra matrimonium peccat; ergo per subtractionem matrimonii debet puniri.

Respondeo. Dicendum, quod uxoricidium ex statuto Ecclesiae, matrimonium impedit. Sed quandoque impedit contrahendum et dirimit contractum, quando scilicet aliquis in mortem uxoris machinatur, ad hoc ut aliam cum qua nocchatur, in matrimonium ducat, cum qua postea matrimonium contrahere non potest, et si de facto contraxerit, separantur: quandoque vero impedit contrahendum sed non dirimit contractum; quando scilicet ex aliqua causa uxorem interficit; vel propter uxoris adulterium, vel quodcumque odium; vel si etiam propter causam praemissam uxorem occidat, et postmodum cum alia contrahit, dimissa adultera, propter quam uxorem occidit. Tamen in his potest Ecclesia dispensare; praecipue cum timetur de ejus incontinentia.

Ad primum ergo dicendum, quod vir potest licite uxorem adulteram, zelo justitiae, non livore odii, in judicio saeculari ad poenam mortis criminaliter accusare, non autem in judicio Ecclesiae, quae materiali gladio non utitur. Non tamen licet secundum forum conscientiae vel Ecclesiae, viro uxorem in adulterio comprehensam per seipsum occidere. Quod autem leges civiles hoc permittunt, est quia poenam non adhibent, considerantes magnum irae incitamentum.

Ad secundum dicendum, quod quamvis uxoricidium sit majus peccatum quam uxoricidium, non tamen ita directe matrimonio opponitur.

Ad tertium dicendum, quod remota culpa, adhuc remanet poena temporalis interdum, licet non aeterna.

DISTINCTIO XXXVIII.

Nunc de voto inspiciamus etc. (V. edit. nostrae tom. VII, pag. 1002.)

QUAESTIO UNICA.

Illic quaeruntur quatuor: 1.^o de voti obligatione; 2.^o de voti dispensatione; 3.^o utrum matrimonium impediatur; 4.^o utrum matrimonio possit impediri.

ARTICULUS I.

Ad primum sic proceditur. Et 1. videtur, quod votum non obliget ad semper observandum. Votum enim, in proposito voluntatis consistit, ut ipsum nomen designat: sed propositum voluntatis potest licite mutari; ergo modo non cogitur ad votum servandum.

2. Praeterea, nullus cogitur ad faciendum impossibile, vel vana, illicita et periculosa saluti corporali. Sed quandoque impossibile est votum servare, sicut cum aliqua post votum virginitatis corrumpitur: quandoque vero est vanum quod votetur, sicut mulieres solent vovere quod non peccent caput, tali vel tali die: quandoque vero illicitum, sicut Jephthe vovit filiam occidere, ut dicitur Judicum 2, quandoque vero est corpori periculosum sicut cum quis vovet quod abstineat duobus vel tribus diebus a cibo; ergo votum non obligat ad semper servandum.

3. Praeterea, ille qui non est sui juris, non potest se ad aliquid obligare. Sed quandoque tales votum emittunt, scilicet uxor, servus, filius familias et monachus; ergo votum non de necessitate obligat.

Sed contra est quod in Psal. 75 dicitur: « Vovete, et reddite Domino Deo vestro. »

Praeterea, firmior debet esse promissio quae fit Deo, quam quae fit homini: sed promissio facta homini obligat; ergo et votum, quod est quaedam promissio facta Deo.

Respondeo. Dicendum, quod sicut homo loquitur homini ore corporali, ita Deo loquitur corde: et ideo sicut promissio facta verbis oris obligat homini, ita promissio facta ore cordis obligat Deo: quae quidem promissio votum dicitur. Promissio vero exterius homini facta si sit nuda, non habet plenam vim obligandi: unde oportet quod etiam promissioni factae Deo aliquid addatur ad plene obligandum, ne sit quasi promissio nuda. Haec autem sunt tria gradatim. Primum est simplex deliberatio. Secundum intentio obligandi se ad certam poenam. Tertium testimonium hominum, quod adhibetur promissioni interiori. Et ideo Magister perfecte definit votum: quia ponit in ejus descriptione promissionem quae dicit essentiam voti; et modum promissionis, qui ad voluntatem pertinet, in hoc, quod dicit spontaneae; et ultimam confirmationem promissionis quae duas priores includit, per hoc quod dicit testificatio; et voti terminum in hoc quod dicit, quod debet Deo fieri; et materiam in hoc quod dicit, quod est de eis quae Dei sunt.

Ad primum dicendum, quod simplex propositum non habet rationem voti: sed promissio quae propositum manifestat, sicut effectus causam. Promissio autem obligat, sed non propositum.

Ad secundum dicendum, quod debita materia

voti accipienda est, et ex parte Dei, cui fit promissio; et ex parte voluntatis, per quam promissio impletur. Ex parte quidem voluntatis, patet quod votum debet esse de voluntariis, non autem de necessariis vel impossibilibus; et ideo dicitur esse de operibus supererogationis proprie loquendo, ad quae quis necessario non tenetur. De iis autem quae sunt necessaria necessitate conditionata, scilicet si homo vult salvari, potest esse votum aliquo modo quantum ad hoc quod potest de facto ea servare vel non servare, sed non simpliciter: et proprie in quantum habet necesse ea servare (1), necessitate praecepti vel juris. Sed de iis quae simpliciter sunt necessaria vel impossibilia, nullatenus potest esse votum: unde illa quae corrupta est post votum virginitatis tenetur ad hoc quod potest, ut scilicet continentiam servet et poenitentiam agat. Ex parte vero Dei oportet quod materia voti sit aliquod bonum pertinens ad Dei servitium; unde illicita non cadunt sub voti obligatione, et per consequens nec ea quae pertinent in manifestum corporis periculum, quia illicita sunt. In his autem in quibus periculum timetur, si non est certum, tutius est ut dispensatio requiratur. Et similiter nec vana cadunt sub voto, sicut ea quae mulieres frequenter vovent, quae magis videntur sortilegia quaedam esse. Votum autem Jephthe obligavit ipsum in licitum eventum, scilicet si obviaret ei animal immolatum, non autem obligabat in eventum illicitum. Quod quia nec in vovendo discrevit, nec in implendo servavit, fuit in vovendo stultus et in reddendo impius, ut dicit Hieronymus.

Ad tertium dicendum, quod nullus quantum ad hoc quod non est sui juris potest votum emittere. Et quia religiosus quantum ad omne tempus obligatus est ad parendum praecepto regulae vel praelati, nullum votum potest emittere. Uxor vero obligata est viro, quantum ad carnalem copulam et e converso: unde neuter potest sine consensu alterius continentiam vovere: et quamvis vir sine consensu uxoris, de iis quae pertinent ad dispensationem domus et regimen vitae vovere potest: sed non e converso, quia vir caput est mulieris. Servus autem quia est sui juris, quantum ad actus naturales, potest votum continentiae emittere, sicut matrimonium contrahere absque domini consensu. Non tamen potest absque consensu ejus aliquid vovere de iis quae pertinent ad dispensationem domus, ut puta quod eleemosynam faciat, vel de iis quae pertinent ad regimen propriae vitae, ut puta quod religionem intret; quia in iis non est sui juris. Sed filius familias est sui juris in actu naturae et in statu propriae personae, non autem est in dispensatione domus; et ideo absque consensu patris potest votum continentiae emittere et religionis, non autem de eleemosynis dandis.

ARTICULUS II.

Ad secundum sic proceditur. Et 1. videtur, quod in voto non possit fieri dispensatio. Reddere enim votum de jure naturali est: sed contra hoc jus non potest ab homine dispensari; ergo nec super voto.

2. Praeterea, per omne votum quis Deo pariter obligatur: sed aliqua vota sunt quae dispensationem non recipiunt, sicut votum continentiae, quia non est digna ponderatio animae continentis, ut habetur

(1) *Al. repetitur* sed non simpliciter et proprie.

Eccles. 16; ergo nec circa alia vota dispensari potest.

5. Praeterea, si aliquis super voto posset dispensare, hoc non esset nisi in quantum est minister Dei: sed quilibet praelatus est minister Dei; ergo si aliquis potest dispensare in voto, quilibet potest dispensare; quod non videtur; ergo super voto dispensari non potest.

Sed contra est, quod dicitur 1 Cor. 7: « Nam et ego condonavi, si aliquid donavi propter vos in persona Christi: » sed Christus posset condonare votum, cum sit sibi facta obligatio; ergo et praelatus Ecclesiae potest.

Praeterea, non sunt minoris sanctitatis divina mysteria, quam vota: sed divina mysteria sunt subdita dispensationi praelatorum, ut patet 1 Cor. 4: « Sic nos existimet homo, ut ministros Christi et dispensatores mysteriorum Dei; » ergo et vota sunt sub dispensatione praelatorum.

Respondeo. Dicendum, quod sicut dictum est, per votum aliquis se obligat Deo de his quae ad servitium Dei pertinent. Ea vero quae ad servitium Dei pertinent sunt commissa dispensationi praelatorum, ut in eis fideliter faciant quod magis expedit ad honorem Dei et Ecclesiae utilitatem. Et ideo si praelato videatur magis expediens quod votum non servetur quam quod servetur, propter aliquam legitimam causam potest in voto dispensare. Si autem videatur, quod aliquid aliud esset, vel aequè vel magis expediens, potest votum commutare. Hoc enim interest inter dispensationem et commutationem voti: quod per dispensationem aliquis a voto simpliciter absolvitur; per commutationem vero aliquis absolvitur ab uno et ad aliud obligatur. Nec tamen si votum non servetur, facta dispensatione vel commutatione is qui votum fecerat mendacium aliquod incurrit; quia in promissione voti pie conditiones intelliguntur. Quidam vero dicunt, quod praelati non possunt dispensare in voto relaxando voti obligationem, sed declarando. Sed hoc potestati clavium repugnat. Nec tamen dicendum est, quod pro libito possint relaxare, ut alii dicunt: quia ipse non est dominus sed minister: unde debet illud quod dictum est considerare in dispensando, et non propriam voluntatem.

Ad primum ergo dicendum, quod observare votum durante voti obligatione est de jure naturali, non autem postquam cessat per dispensationem.

Ad secundum dicendum, quod de voto continentiae est duplex opinio. Quidam enim dicunt, quod nullus in eo potest dispensare: tum quia non potest praetermitti sine hoc quod directe ad contrarium transeat, tum quia nulla potest fieri recompensatio melioris, tum quia per religionem homo perfecte conformatur Christo. Unde vota religionis principalia, sunt indispensabilia, ut ipsi dicunt. Quibusdam vero e contrario videtur, quod in iis possit dispensari, eadem ratione qua possent aliquando prohiberi propter aliquam maximam Ecclesiae necessitatem.

Ad tertium dicendum, quod potestas ministerii divini principaliter residet penes Summum Pontificem qui potest in omnibus dispensabilibus dispensare. Alii vero tantum circa haec possunt, quantum eis committitur; unde possunt dispensare in minoribus, non autem in majoribus quae sibi Papa reservat.

ARTICULUS III.

Ad tertium sic proceditur. Et 1. videtur, quod votum solemne, matrimonium non impediat. Sicut enim Decretalis dicit, apud Deum non minus obligat votum simplex, quam solemne: sed matrimonium acceptione divina stat vel dirimitur; cum ergo votum simplex non dirimat matrimonium contractum, videtur, quod nec votum solemne.

2. Praeterea, votum solemne, uti in litera dicitur, si violetur, non solum facit peccatum, sed scandalum; et sic videtur, quod non nisi ratione scandalum impediat matrimonium. Sed aliquod votum non solemnizatum per susceptionem sacri ordinis vel professionem ad certam regulam sive per habitus regularis assumptionem potest scandalum generare, si in publico fiat, nec tamen propter hoc matrimonium contractum dirimitur; ergo nec votum solemne dirimit matrimonium contractum.

3. Praeterea, eisdem impedimentis vir et mulier a matrimonio impediuntur: sed vir non impeditur a matrimonio voto virginitalis solemnizato propter aliquam velationem; ergo nec mulier debet per hoc impedi.

Sed contra. Sicut per ordinem aliquis obligatur ad spiritualia, ita et per votum: sed ordo hae ratione matrimonium impedit, ut dictum est; ergo similiter et votum.

Praeterea, nullus potest ad contraria obligari: sed carnalis copula ad quam aliquis per matrimonium obligatur, est contraria continentiae, ad quam obligat votum; ergo votum impedit matrimonium.

Juxta hoc quaeritur de scandalo: et primo quid sit; secundo an sit peccatum mortale; tertio quae sint propter scandalum dimittenda.

Respondeo. Dicendum, quod scandalum Graece proprie obicem significat Latine. Obex autem proprie dicitur in corporalibus, sed similitudinarie in spiritualibus. Dicitur autem obex id, quod ambulanti in via objicitur, quod de se natum est occasionem ruinae praestare. In via vero morum, nihil natum est praestare occasionem ruinae nisi sit minus rectum, et nisi sit manifestum, quod veniat in ejus notitiam. Unde scandalum est dictum vel factum minus rectum, secundum Glossam super Matthaei decimumoctavum, praebens alteri occasionem ruinae. Quod autem praebet alteri occasionem ruinae, aut hoc est ex natura sua, et sic est scandalum activum, et hoc est semper peccatum mortale: aut ex vitio videntis; et hoc est scandalum passivum, et potest esse scandalum veniale, et interdum etiam opus meritorium. Primum vero et secundum differunt. Sed quia bona malis et majora bona minoribus et minora mala majoribus sunt praeeligenda, scandalizare proximum malum est, cessare a scandalo bonum; ideo id de quo quaeritur an sit propter scandalum dimittendum est distinguendum: quoniam aut est malum in se, sive mortale, sive veniale; et de tali non est dubium, quod debet dimitti. Hoc enim esset scandalum activum, quod semper peccatum est. Aut est differens, et hoc dimittendum est similiter, quia naturalis ratio dicit quod proximus non est scandalizandus. Aut est bonum. Aut ergo bonum praecepti, et hoc non debet dimitti, quia pro vitando peccato alterius non debet aliquis peccare. Aut est bonum supererogationis; et hoc non tenetur totaliter dimittere: sed aliquando ad tempus dimittere, aut praetermittere,

quia est de vitae perfectione. Non enim salutis necessitas solum, sed etiam perfectio est de virtute vitae. Et sic patet solutio ad tria quaesita.

Ad principalem autem quaestionem dicendum, quod duplex est votum: scilicet solemne et simplex. Simplex quidem votum in sola promissione consistit: votum autem solemne habet cum promissione simul adjunctam actualem translationem sui in statum qui habet continentiam annexam ex ordinatione vel approbatione Ecclesiae. Quod patet cum quis ordinem sacerum suscipit vel eum professionem emittit ad certam regulam, sive cum in religione existens suscipit habitum professorum: hoc enim est quaedam interpretativa professio. His enim modis votum solemnizatur. Promissio autem alicui facta impedit, ne res promissa licite possit alii dari, non autem ne de facto detur; sed translatio domini in alium, impedit ut res eadem omnino alteri dari non possit. Et inde est, quod simplex votum impedit matrimonium contrahendum, non tamen dirimit contractum et consummatum; quia per hoc aliquis actualiter tradit uxori sui corporis potestatem. Sed votum solemne impedit matrimonium contrahendum et dirimit contractum.

Ad primum ergo dicendum, quod votum simplex non minus obligat apud Deum quam solemne, quantum ad reatum peccati, considerando quantitatem ejus in genere, quia utrumque obligat ad poenam aeternam. Minus autem obligat quantum ad matrimonii contractum, propter ipsum obligationis modum, ut dictum est.

Ad secundum dicendum, quod quantumcumque votum fiat in publico, non dirimit matrimonium sequens ratione scandali, nisi superveniat aliquod praedictorum per quae votum solemnizatur. Non enim est idem votum solemne et publicum, nec simplex et privatum.

Ad tertium dicendum, quod in velatione virginum significatur matrimonium Christi et Ecclesiae, quantum ad integritatem Ecclesiae, sicut et in matrimonio significatur, quantum ad fecunditatem: et quia Ecclesia sponsa est hujusmodi, velatio mulieri competit et non viro, et propter hoc nullo modo corruptis debet praebere: quia significatio deest propter defectum integritatis. Haec autem velatio votum solemnizat, sicut et habitus regularis assumptio.

ARTICULUS IV.

Ad quartum sic proceditur. Et 1. videtur, quod matrimonium sequens per praecedens non impediat. Fortius enim est vinculum spirituale, quam corporale: sed matrimonium sequens non impeditur per votum simplex praecedens; ergo multo fortius per matrimonium praecedens.

2. Praeterea, si matrimonium sequens impediat praecedens, hoc non est, nisi quia vivente uxore, vir non potest aliam ducere, nec e converso: sed hoc est falsum, ut patet in casu, si unus conjugum moreretur et postea resuscitaretur; ergo secundum matrimonium non impeditur per primum.

3. Praeterea, mulier non debet carnaliter commisceri nisi suo marito, debet autem commisceri cum illo, cum quo contraxit secundo, qui est ejus maritus; ergo etc.

Sed contra est, quod dicitur Rom. 7: « Vivente viro vocabitur adultera, si fuerit cum alio viro; »

ergo cum secundo viro matrimonium non contrahit.

Praeterea, nullus potest alicui dare quod est alterius: sed uxor sui corporis potestatem tradidit viro, cum quo primo contraxit; ergo non potest alteri dare, matrimonium eum eo contrahendo.

Respondeo. Dicendum, quod sicut supra dictum est, unus vir non potest plures uxores habere simul, nec una mulier plures viros. Hoc autem sequeretur; si primum matrimonium non impediat secundum: constat enim, quod secundum matrimonium non dirimit primum, quia nihil superveniens matrimonio potest ipsum dirimere: unde relinquitur, quod secundum dirimatur per primum.

Ad primum ergo dicendum, quod per matrimonium aliquis tradit actualiter sui corporis potestatem uxori; sed per votum simplex non actualiter tradit, sed promittit Deo; et ideo non est simile.

Ad secundum dicendum, quod obligatio matrimonii non est nisi usque ad mortem; unde per mortem vinculum matrimonii solvitur; et ideo si mortuus resuscitaretur uxor, ei in nullo teneretur nisi de novo cum ea contraheret.

Ad tertium dicendum, quod si mulier contrahat cum aliquo vivente viro, quem ex probabili causa mortuum credit, non est matrimonium, sed per ignorantiam facti excusatur a peccato. Postquam vero ei de vita viri constiterit, non debet debitum nec exigere, nec reddere, etiam si Ecclesia per excommunicationem cogat. Ecclesia enim judicat secundum ea quae exterius apparent, sed per conscientiam aliquis obligatur ad iudicium Dei qui cor intuetur: et ideo standum est conscientiae, quantumcumque Ecclesia exterius cogat; quamvis contrarium dicat Magister in litera et Hugo de Sancto Victore, quorum dicta non tenentur.

DISTINCTIO XXXIX.

Post haec de dispari cultu etc. (*V. edit. nostrae tom. VII, pag. 1022.*)

QUAESTIO UNICA.

Hic quaeruntur quatuor: 1.^o utrum disparitas cultus matrimonium impediat; 2.^o utrum inter infideles possit esse matrimonium; 3.^o si per alterius conversionem matrimonium possit solvi; 4.^o utrum possit fidelis cum infideli manere in matrimonio prius contracto.

ARTICULUS I.

Ad primum sic proceditur. Et 1. videtur, quod disparitas cultus matrimonium non impediat. Haereticas enim et catholicas non sunt unius cultus: sed tamen inter eos potest esse matrimonium; ergo disparitas cultus non impedit matrimonium.

2. Praeterea, sponsalia ad matrimonium ordinantur. Sed inter fidelem et infidelem possunt contrahi sponsalia; ergo et matrimonium.

3. Praeterea, tempore legis naturae disparitas cultus matrimonium non impediabat; alias Joseph cum Aegyptia non contraxisset. Similiter nec tempore legis Moysi. Dicitur enim Dent. 21: « Si egressus ad pugnam videris mulierem pulchram in medio captivorum, dormiesque cum ea et erit tibi uxor etc. » Esther etiam cum Assuero con-

traxit qui infidelis erat; ergo nec in nova lege disparitas cultus matrimonium impedit.

4. Praeterea, sicut fidei opponitur infidelitas, ita charitati omnia peccata mortalia opponuntur; cum ergo conjunctio Christi ad Ecclesiam quam matrimonium significat, perfectius per charitatem quam per fidem fiat; videtur, quod si infidelitas alterius conjugis matrimonium impedit, quod pari ratione alia peccata mortalia matrimonium impedirent: quod patet esse falsum.

Sed contra est, quod dicitur 2 Cor. 6: « Noli lite jugum ducere cum infidelibus: » sed uxor et vir simul jugum ducunt; ergo non debet uxor fidelis virum infidelem in matrimonium accipere.

Praeterea, Deut. 7 dicitur: « Non inibis cum ei foedus, » scilicet cum infidelibus « neque sociabis eum eis conjugia. »

Respondeo. Dicendum, quod rationabiliter cultus disparitas matrimonium impedit: non in quantum est in officium naturae, sed in quantum est in obsequium Dei, ut scilicet per matrimonium quaeratur proles ad cultum Dei educanda, quod alterius conjugum infidelitas impediret. Sciendum tamen quod si infidelitas in altero conjugum matrimonium praecedat, dirimitur matrimonium sequens etiam quantum ad vinculum. Si vero infidelitas alterius conjugis matrimonium sequatur, non propter hoc vinculum matrimoniale dirimitur, sed potest fieri separatio a thoro et cohabitatione, sicut et propter fornicationem carnalem. Nam carnalis fornicatio uxoris impedit prolem, secundum quod est a natura intenta: facit enim prolis incertitudinem. Spirituales vero fornicatio quae est per infidelitatem, impedit prolem, secundum quod est intenta per gratiam, ut dictum est.

Ad primum ergo dicendum, quod quia matrimonium est sacramentum, quantum ad sacramenti necessitatem pertinet, magis requirit in fidei sacramento, scilicet baptismo, paritatem, quam in ipsa interiori fide. Quare si quis cum baptizata et haeretica contraheret, peccaret quidem si scivisset antea eam haeticam esse; sed verum esset matrimonium. Si vero baptizatus cum nondum baptizata, interius tamen habente fidem, contraheret, non esset verum matrimonium. Unde et hoc impedimentum non dicitur disparitas fidei, sed cultus qui in exteriori observatione consistit.

Ad secundum dicendum, quod nec sponsalia fidelis cum infideli contrahere potest, nisi conditione apposita de conversione futura ante matrimonium.

Ad tertium dicendum, quod probabiliter potest credi quod Aegyptia, quam Joseph accepit uxorem, et Ethyopissa cum qua Moyses contraxit, ad cultum Dei fuerint conversae. Et quod unitatem cultus, etiam ante datam legem sancti Patres observaverint, patet ex hoc quod dicitur Gen. 54: « Non possumus facere quod petitis, nec dare sororem nostram homini in circumciso, quod illicitum et nefarium apud nos est. » Specialiter tamen in lege Moysi prohibitum fuit de infidelibus terrae Chanaan, quae propter vicinitatem magis poterant pertrahere ad errorem. In nova autem lege eadem prohibitionis ratio est ad omnes, cum infideles sint ubique per mundum dispersi. Et sic patet, quod Esther non fecit contra prohibitionem Deuteronomii contrahens cum Assuero, quamvis ipsa Esther non ex proprio beneplacito, sed ex divina dispensatione cum eo contraxisse possit intelligi. Unde dicitur

S. Th. Opera omnia. V. 22.

Esther 14: « Nosti quia oderim gloriam iniquorum et detester cubile incircumcisorum et omnis alienigenae. »

Ad quartum dicendum, quod alia peccata mortalia, licet charitati opponantur, non tamen ita impediunt matrimonii finem, sicut infidelitas, ut ex dictis patet; et ideo ratio non sequitur.

ARTICULUS II.

Ad secundum sic proceditur. Et 1. videtur, quod inter infideles matrimonium esse non possit. Matrimonium enim excusat carnalem concubitum a peccato; quod ut videtur, facere non potest, nisi in quantum est sacramentum. Sed non baptizati non sunt capaces alterius sacramenti, cum baptismus sit janua sacramentorum; ergo inter infideles non potest esse matrimonium excusans carnalem copulam a peccato.

2. Praeterea, duo mala magis sunt impeditiva boni, quam unum: sed infidelitas unius conjugis impedit matrimonium; ergo multo magis infidelitas duorum.

3. Praeterea, disparitas cultus impedit matrimonium: hoc autem potest esse inter duos infideles, ut puta si unus sit Judaeus et alter gentilis; ergo nec inter infideles potest esse matrimonium.

Sed contra est, quod dicitur 1 ad Corinth, 7: « Si quis frater habet uxorem infidelem etc. »: sed hoc non potest intelligi, ita quod matrimonium sit contractum inter eos, nisi quando uterque erat infidelis; ergo etiam inter infideles matrimonium est.

Praeterea, ea quae sunt de jure naturali, sunt omnibus communia: sed matrimonium est hujusmodi, ut supra habitum est; ergo non solum est apud fideles, sed etiam apud infideles.

Respondeo. Dicendum, quod matrimonium dupliciter potest considerari. Uno modo, secundum quod est in officium naturae: et sic inter infideles esse potest qui naturali jure non destituuntur. Alio modo secundum quod est Ecclesiae sacramentum, prout scilicet agitur cum fide conjunctionis Christi et Ecclesiae, secundum quod dispositioni Ecclesiae subditur et ad cultum Dei propagandum ordinatur; et sic non est inter infideles.

Ad primum ergo dicendum, quod carnalis concubitus potest dupliciter excusari per matrimonium. Uno modo, ut sit meritorius; et sic excusatur per matrimonium, in quantum est Ecclesiae sacramentum in fide Christi contractum. Alio modo excusatur ne sit peccatum et poenae aeternae causa: et sic potest excusari per matrimonium, secundum quod est inter infideles, sicut et aliqui eorum actus excusantur a peccato per virtutes politicas: ad actum enim matrimonii et temperantia potest concurrere quae facit debitum reddi.

Ad secundum dicendum, quod disparitas cultus matrimonium impedit, ratione contrariae intentionis, prout quisque ad suam fidem prolem trahere nititur; et sic etiam imminet periculum, non solum de impedimento gratiae, sed etiam de impedimento naturae.

Ad tertiam dicendam, quod per jus divinum vel Ecclesiae statutum non impeditur quin inter infideles diversi cultus, matrimonium esse possit; quia apud Deum et Ecclesiam eodem pacto infidelis reputatur qualitercumque quis a fide deviet. Potest tamen impediri ne inter eos sit matrimonium

aliquo jure positivo apud eos per quod jus naturae est determinabile.

ARTICULUS III.

Ad tertium sic proceditur. Et 1. videtur, quod si post matrimonium in infidelitate contractum vir convertatur ad fidem, non possit uxorem dimittere. Nullum enim impedimentum matrimonio superveniens dirimit ipsum, ut supra dictum est: sed inter eos erat verum matrimonium, quando ambo infideles erant; ergo subsequens disparitas cultus per conversionem unius matrimonium dirimere non potest: et sic unus non potest alium dimittere.

2. Praeterea, parentes tenentur bonum proles procurare non solum corporale, sed etiam spirituale: sed proles remanet in periculo spiritualis salutis, si fidelis discedat a matrimonio, quia infidelis libere pertraheret ad errorem; ergo non licet fideli discedere.

5. Praeterea, si fidelis posset infidelem dimittere, videtur etiam quod posset eum alio contrahere: sed hoc non potest esse; quia si uxor postmodum converteretur, deberet eam accipere; et sic haberet duas uxores simul, quod esse non potest; ergo fidelis infidelem dimittere non potest.

Sed contra est, quod Apostolus dicit 1 ad Corinth. 7: « Nam ceteris ergo dico, non Dominus. » Si aliquis frater uxorem habet infidelem, et hoc consentit habitare eum illo, non dimittat illum: ad hoc ergo, praecepto Domini non tenetur: et sic videtur, quod licite possit eum dimittere.

Praeterea, vinculum matrimonii non durat nisi usque ad mortem: sed per baptismum aliquis Christo commoritur, ut dicitur Rom. 6: ergo liberatur a vinculo, quo uxori tenebatur, et sic potest eam licite dimittere.

Respondeo. Dicendum, quod sicut dictum est, inter infideles potest esse matrimonium, secundum quod est in officium naturae, non autem secundum quod est gratiae sacramentum. Matrimonium autem perfectae inseparabilitatis rationem habet, ex hoc quod est sacramentum signans Christi et Ecclesiae unionem inseparabilem; et ideo matrimonium inter infideles contractum quamvis sit verum, non tamen est adeo rarum et firmum, quod nullo modo possit separari. Si enim aliter conjugum convertatur ad fidem altero in infidelitate permanente, fidelis potest ab infideli discedere. Sed in hoc est distinguendum: quod si infidelis vult cohabitare sine contumelia creatoris, fidelis discedens non potest alicui nubere. Si vero infidelis hoc non velit, sed in verba blasphemiae prorumpat, et ad infidelitatem fidem pertrahere nitatur, tunc fidelis discedens potest alteri nubere.

Ad primum ergo dicendum, quod regula illa intelligitur de matrimonio, quod non solum est verum per mutuum consensum verbis de praesenti expressum, sed etiam ratificatum per fidem Christi in utroque, et carnali copula consummatum.

Ad secundum dicendum, quod in tali casu proles aut pervenit ad perfectam aetatem, et tunc liberum est ibi fidelem vel infidelem sequi: aut est in minori aetate constitutus, et tunc debet dari fideli, non obstante quod indiget matris obsequio ad educationem.

Ad tertium dicendum, quod si post conversionem viri sit aliqua spes probabilis de conversione

uxoris, etiam tunc actualiter ad infidelitatem pertrahere conantis non debet vir votum continentiae emittere, nec ad aliud matrimonium transire. Si autem non sit spes de ejus conversione, potest utrumque facere, prius tamen requisita uxore, quod convertatur. Quae si tunc nolit et postea peracto tempore convertatur, non est ei vir suus reddendus si votum emisit, vel eam alia contraxerit; et debet sibi imputari in poenam tardae conversionis.

ARTICULUS IV.

Ad quartum sic proceditur. Et 1. videtur, quod fidelis conversus ad fidem, eum infideli contrahere non possit. Dicit enim Canon, quod non potest « infidelis in ejus conjunctione permanere quae « jam in Christianam translata est fidem. »

2. Praeterea, matrimonium factum in gradu prohibito est dirimendum: sed infideles quandoque contrahunt in gradu ab Ecclesia prohibito; ergo ad minus in hoc casu fidelis eum infideli permanere non potest.

5. Praeterea, fidelis non potest simul habere plures uxores: hoc autem contingeret, si posset post conversionem eum priori uxore commorari, quia contingit quandoque quod infidelis habuit plures uxores simul, vel etiam una repudiata aliam duxerit; ergo videtur, quod non possit fidelis eum infideli conjuge permanere.

Sed contra est quod Apostolus 1 Corinth. 7 consulit, quod commaneant.

Praeterea, vir debet procurare salutem uxoris et e converso: sed fidelis eum infideli commanendo potest ejus salutem procurare; ergo videtur, quod possit ei commanere.

Respondeo. Dicendum, quod circa hoc considerandum est quid sit licitum et quid expediens. Licitum quidem est, ut fidelis infidelem dimittat in quocumque casu, quia per baptismum jam transivit in aliam vitam, ejus uxor non est particeps. Expediens autem videtur, et de hoc Apostolus consilium dat, quod si infidelis consentit habitare sine ignominia Creatoris, fidelis infidelem non dimittat; et praecipue si de ejus conversione spes habeatur; alias non debet commanere, tum propter suum periculum, tum propter periculum proles: et ratio est, quia periculum est, ne proles sequatur cultum infidelis parentis, et ne fidelis pervertatur per infidelem. Sed tamen consilium Apostoli tenet secundum alios, in principio et progressu Ecclesiae aequaliter, et non nunc, quando nec valet eum muliere volente habitare sine contumelia Creatoris et scandalo conjugis. Et hujus ratio patet in prima solutione primi argumenti. Alii tamen dicunt, quod adhuc tenet consilium Apostoli quo ad omnes. Tertii vero dicunt, quod tenet quo ad Gentiles, non quo ad Judaeos.

Ad primum ergo dicendum, quod in primitiva Ecclesia spes erat de conversione omnium, tam Gentilium quam Judaeorum; et ideo fideli consulendum erat, quod eum infideli commaneret nisi expressa signa pertinaciae apparerent. Postmodum vero Judaeis in infidelitate obstinatis, gentilibus vero ad conversionem pronis, non est permissum fideli habitare eum conjuge Judaeo sed tamen eum Gentili; et secundum hoc loquitur decretum illud. Nunc autem obduratis utrisque, fideli non permittitur cohabitare, neque infideli Gentili, neque Judaeo.

Ad secundum dicendum, quod si infideles conjuncti inveniantur in gradibus jure divino prohibitis Levit. 18, non permittuntur commanere altero vel utroque converso ad fidem. Permittuntur autem si inveniantur conjuncti in gradibus per Ecclesiam solum prohibitis; quia infideles non sunt astricti statuto Ecclesiae, sed juri divino, contra quod verum matrimonium inter eos esse non poterat.

Ad tertium dicendum, quod cum habere plures uxores et uxoris repudium sit contra legem naturae, ut supra dictum est, neutrum infidelibus licet. Unde si aliquis infidelis convertatur habens simul plures uxores vel unam altera repudiata, si omnes simul convertantur debet primam tenere et alias abjicere. Potest tamen cum aliqua illarum, etsi illa conversa fuerit renuente converti prima, libere contrahere, sicuti et cum alia quacumque femina.

DISTINCTIO XL. ET XLI.

Nunc superest de cognatione etc. (V. edit. nostrae tom. VII, pag. 1029-1056.)

QUAESTIO UNICA.

Circa hanc distinctionem et sequentem quaeruntur quatuor: 1.^o utrum consanguinitas matrimonium impediatur; 2.^o utrum affinitas; 3.^o de gradibus consanguinitatis et affinitatis; 4.^o de separatione matrimonii, quae fit propter alterum istorum.

ARTICULUS I.

Ad primum sic proceditur. Et 1. videtur, quod consanguinitas matrimonium non impediatur. Nihil enim impedit matrimonium, nisi quod contrariatur alieni matrimonii bono: sed consanguinitas non est hujusmodi; imo magis videtur juvare, quia inter propinquos est melior et firmitior conjunctio; ergo consanguinitas matrimonium impedit.

2. Praeterea, matrimonium est de jure naturali, quod est in hominibus et brutis, ut dicitur in principio Digest.: sed barbarae nationes et bruta animalia, nulla propinquitate sanguinis ab actu matrimonii retrahuntur; ergo consanguinitas matrimonium non impedit.

3. Praeterea, si consanguinitas matrimonium impedit, hoc non est nisi ratione alienius propinquitatis: sed non est major propinquitas inter consanguineos quam inter quoscumque, cum omnes specie convenient, et a primo parente processerint; ergo consanguinitas matrimonium non impedit.

Sed contra est, quod dicitur Lev. 18: « Turpitudinem sororis non revelabis. »

Praeterea, illud quod impedit bonum prolis, debet matrimonium impedire: sed consanguinitas est hujusmodi, ut patet per Gregorium qui dicit: « Experimento didicimus ex consanguineorum conjugio sobolem non posse succrescere; ergo consanguinitas impedit matrimonium. »

Respondeo. Dicendum, quod duplici de causa, consanguinitas matrimonium rationabiliter impedit. Primo ad concupiscentiam reprimendam cui magnus aditus praerberetur nisi esset carnalis copula interdicta inter illas personas, quas oportet in eadem domo conversari, utpote ad eandem familiam pertinentes; et ex hac causa aliquae personae conjunctae divino jure a matrimonio excluduntur Lev. 18.

Alio ratio est, propter foedus amicitiae inter homines ampliandum, quod fit, dum matrimonia non contrahuntur inter eos qui aliquo naturali foedere junguntur; et haec de causa, jure positivo multo plures personae excluduntur. Sed tertia ratio est specialis quantum ad matrem et patrem. Cum enim matrimonium contractum praedecidat naturali subjectioni et reverentiae quam eis filii debent, hujusmodi personae de jure naturali excluduntur a matrimonio.

Ad primum ergo dicendum, quod licet consanguinitas non impediatur bonum prolis, nisi forte ex divino judicio, in quantum matrimonium contrahitur contra praecceptum, de se tamen impedit alia bona quae sunt matrimonio annexa.

Ad secundum dicendum, quod si barbari aliqui patri vel matri, qui a matrimonio excluduntur secundum jus naturale, carnaliter commisceantur, procedit ex fervore concupiscentiae naturalem rationem obfuscantis. In animalibus vero aliis non est per naturam indita reverentia ad parentes in omne tempus, sed forte in aliquod aliquibus animalibus: unde omnia animalia abhorrent commistionem parentum etsi aliqua abhorreant quamdiu manet in ipsis parentum cognitio et reverentia, ut patet per illud quod narrat Philosophus in octavo de Animalibus de equo et camelo.

Ad tertium dicendum, quod consanguinei, non solum in principiis speciei convenient, sicut omnes homines; sed etiam in hoc quod virtutes quaedam a parentibus in filio relinquuntur, ratione quarum filii parentibus simulantur, non solum in accidentibus speciei, sed etiam in accidentibus individui. Hae autem virtutes per processum generationis evanescunt; et ideo consanguinitas non manet inter aliquos, quamvis in primo parente vel remotis parentibus convenient.

ARTICULUS II.

Ad secundum sic proceditur. Et 1. videtur, quod affinitas matrimonium non impediatur. Effectus enim suam causam non impedit: sed affinitas est matrimonii effectus; ergo non potest matrimonium impedire.

2. Praeterea, si affinis non potest in matrimonio duci, hoc non est nisi quia est consanguineo conjuncta: hoc autem impedire non potest, cum inter eam et ipsum consanguineum matrimonium sit: vel si impediret ad tempus, saltem post mortem consanguinei non impediret, quia cessante causa cessat effectus; ergo affinitas non debet poni matrimonii impedimentum.

3. Praeterea, sicut est quaedam conjunctio per matrimonium, ita et per fornicarium concubitum et per sponsalia: sed per fornicarium concubitum non causatur affinitas, ut matrimonium impediatur, quia pari ratione causaretur per concubitum contra naturam, quod est contra jura: similiter nec per sponsalia, cum sponsalia sint separabilia, affinitas vero sit perpetua; ergo nec affinitas ex matrimonio causata, matrimonium impedit.

4. Praeterea, si consanguinitas propinquitatem aliquam causat matrimonium impediens quae affinitas dicitur, pari ratione et illa propinquitas aliam causabit; et sic proceditur in infinitum, quod est inconveniens; ergo et primum, scilicet quod affinitas matrimonium impediatur.

Sed contra est, quod dicitur Lev. 28: « Turpitudinem uxoris patris tui non revelabis. » Quae quidem propinquitatis ad affinitatem pertinet; ergo affinitas matrimonium impedit.

Praeterea, Gen. 2 dicitur de viro et uxore: « Erunt duo in carne una: » sed propter carnalem propinquitatem, non potest contractus matrimonii fieri cum consanguineo; ergo pari ratione, nec cum uxore consanguinei.

Respondeo. Dicendum, quod naturalis propinquitatis ex naturali conjunctione procedit: quae quidem dupliciter potest fieri. Uno modo per generationem, prout filius conjungitur patri secundum assimilationem: et ex hoc causatur consanguinitas. Alio modo per carnalem copulam, quae est etiam actus naturae ad generationem ordinatus: et ex hac causatur affinitas. Quae quidem impedit matrimonium eisdem rationibus quibus et consanguinitas, ut de facili patere potest. Et tamen sciendum est, quod si praecedat matrimonium, impedit contrahendum et dirimit contractum; non autem si sequitur; sed ille ex cuius culpa affinitas causatur, amittet jus debitum petendi.

Ad primum ergo dicendum, quod affinitas non impedit matrimonium ex quo causatur, sed aliud.

Ad secundum dicendum, quod quamvis uxor non sit affinis viro, habet tamen cum eo perfectius vinculum, quod est affinitatis causa. Nec oportet quod moriente viro cesset affinitas: quia relationes quae causantur ex actione praeterita, non possunt deficere manentibus extremis; quod enim est praeteritum non potest non fuisse. Et hoc patet in filiatione quae causatur ex generatione praeterita. Unde quamdiu manent extrema, manet relatio, non obstante quod generatio non maneat: et sic est in proposito de affinitate.

Ad tertium dicendum, quod concubitus fornicarius aliquo modo habet naturalem conjunctionem, secundum quod per eum fit commistio seminum ex qua proles nasci potest. Unde si aliquis invadat claustra pudoris vel frangat, nisi commistio seminum sequatur non contrahitur ex hoc affinitas, ex quo patet, quod ex concubitu contra naturam in quo talis commistio seminum non fit, non est causa affinitatis. Sponsalia vero quia non sunt matrimonium complexum, sed praeparatio ad matrimonium, non causant affinitatem, sed aliquid simile, quod dicitur publicae honestatis justitia, et est propinquitatis quaedam ex sponsalibus proveniens, robur trahens ab Ecclesiae institutione, propter ejus honestatem.

Ad quartum dicendum, quod naturalis propinquitatis diversimode variatur, persona addita, secundum alteram conjunctionem naturalium praedictorum. Nam persona addita per generationem, facit alium gradum propinquitatis in eodem genere: sed persona addita per carnis commistionem, mutat genus propinquitatis, sed non gradus; sicut filius filii, est in alio gradu propinquitatis quam filius: sed uxor filii est in eodem gradu, sed in alio genere; quia filius est consanguineus, et uxor ejus affinis. Unde versus: Mutat nupta genus, sed generata gradus. Et ideo si personae quae est affinis, alia persona per carnalem copulam jungatur, non erit affinitas, sed alterius generis propinquitatis, quae usque ad tertium genus olim matrimonium impediebat, magis propter publicae honestatis justitiam ex statuto Ecclesiae, quam propter affinitatem. Nunc autem illa prohibitio est revocata, et sola vera af-

finitas, quae est in primo genere, matrimonium impedit.

ARTICULUS III.

Ad tertium sic proceditur. Et 1. videtur, quod inconvenienter consanguinitati et affinitati gradus assignentur. Gradus enim distinctionem quandam importat; oportet ergo quod illi qui sunt aequaliter consanguinei, sint in eodem gradu, et e converso: hoc autem non invenitur; quia propatruus et pronepos sunt in eodem gradu, et similiter pater et patruus, nec tamen sunt aequaliter consanguinei; ergo gradus consanguinitatis inconvenienter assignantur.

2. Praeterea, gradus inter duo necessario est: sed duo puncta ad lineam sufficiunt; ergo gradus consanguinitatis non debet aliud poni quam linea.

3. Praeterea, matrimonium est a Deo institutum: sed ea quae sunt hujusmodi, non subjacent humanae dispositioni, quia dicitur Matth. 9: « Quod Deus conjunxit homo non separet; » ergo non videtur quod per Ecclesiam possint determinari gradus consanguinitatis matrimonium impediens, quandoque plures, quandoque pauciores.

4. Praeterea, consanguinitas gradus habet per se, in quantum est propinquitatis quaedam: sed affinitas etiam est quaedam propinquitatis; ergo habet per se gradus consanguinitatis.

5. Praeterea, consanguinitas, major propinquitatis est quam affinitas (1) causa; ergo plures gradus debent esse consanguinitatis quam affinitatis.

Respondeo. Dicendum, quod in consanguinitate distinguuntur et lineae et gradus. Lineae quidem, secundum diversas habitudines; quarum una est principii ad principiatum, ut patris ad filium; et secundum hanc sumitur linea ascendentium. Alia est habitudo principii ad principium ut filii ad patrem; et secundum hanc sumitur linea descendentium. Tertia est habitudo duorum qui sunt ab uno principio, ut fratres; et secundum hanc sumitur linea transversalium. Sed quia generatio non quiescit in uno, sed ultra procedit, ideo secundum diversos generationis terminos in eadem linea diversi gradus computantur. In linea quidem ascendentium vel descendentium secundum distantiam personae a persona, inter quas quaeritur cognationis gradus: sicut filius et pater sunt in primo gradu, quia primo occurrunt ascendenti vel descendenti. Avus autem et nepos in secundo, quia occurrunt in secundo; et sic de aliis. Sed in linea transversalium computatur gradus secundum distantiam magis distantis a communi generationis principio: quia quantum aliquis ab eo distat, ad minus tantum distat ab omnibus, qui ratione ejus conjunguntur. Potest autem plus distare, si alius plus distet a communi principio; sicut filius patris qui distat in secundo gradu a patre, distat a sorore similiter in secundo, quamvis soror ad patrem sit in primo. Alius tamen computationis modus tangitur in litera, secundum quod primum principium consanguinitatis ponitur, non aliqua persona, sed aliqua consanguinitas, quae scilicet est patris ad filium; et sic filius non facit gradum, sed computatur cum radice: unde, filius filii occurret in primo gradu, quia secundum primam computationem occurrebat in secundo.

Ad primum ergo dicendum, quod illi qui sunt in eodem gradu, quamvis sint aequaliter consan-

(1) *Supple* ejus est.

guinei quadam quantitate quasi dimensiva, non tamen semper intensive: quia plus attinet alicui intensive commune generationis principium, quam illi qui ab eo descendunt, quamvis in eodem gradu computentur; et propter hoc patruus est magis consanguineus alicui quam nepos ejus, quia patruus est propinquior communi principio. Pater autem et patruus non sunt in eodem gradu respectu nepotis, qui est ad patruum in secundo, et ad patrem in primo gradu; quamvis per comparisonem ad avum sint in eodem gradu.

Ad secundum dicendum, quod linea hic sumitur pro iis qui linealiter disponuntur, qui quandoque sunt plurium graduum; et propter hoc, linea contra gradum distinguitur.

Ad tertium dicendum, quod consanguinitas secundum se, cum sit quaedam naturalis unio, non subjacet Ecclesiae statuto, sed solum prout est matrimonii impedimentum. Non enim potest facere ut aliqui sint plus vel minus consanguinei, sed ut in aliquo gradu possint vel non possint contrahere matrimonium, quantum ad illos gradus qui non sunt prohibiti jure naturali vel jure divino. Et ideo primo fuerunt prohibiti septem gradus, propter causam quae in litera tangitur; postea vero propter pericula quae imminabant, restricta est prohibitio usque ad quartum gradum.

Ad quartum dicendum, quod gradus diversificantur per propagationem personae a persona, quae consanguinitatem causat, non autem affinitatem: et ideo gradus per se ad consanguinitatem pertinent, sed ad affinitatem per accidens: et antiquitus filius affinis fuisset reputatus affinis, et a matrimonio prohibitus, et sic de aliis gradibus, propter publicae honestatis justitiam; quod nunc est per nova jura revocatum. Et per hoc patet solutio ad quintum; quia ex quo affinitas non habet gradus nisi per ordinem ad consanguinitatem, tot gradus habet quod consanguinitas, et eosdem.

ARTICULUS IV.

Ad quartum sic proceditur. Et 1. videtur, quod matrimonium non sit dirimendum propter consanguinitatem et affinitatem. Favorabilius enim est matrimonii vinculum quam domini; sed per longi temporis praescriptionem, acquirit aliquis dominium in re ejus non erat dominus; ergo per diuturnitatem temporis matrimonium inter consanguineos vel affines ignoranter contractum, ratificatur; et praecipue si auctoritas Ecclesiae intervenerit.

2. Praeterea, de similibus est idem iudicium: sed similis consanguinitas est duorum fratrum ad duas sorores; ergo si matrimonium inter unum fratrem et unam sororem dirimitur, pari ratione videtur quod debeat dirimi inter alium fratrem et aliam sororem.

5. Praeterea, iudicium Ecclesiae ad separationem matrimonii procedere non debet, nisi sit accusatio et testificatio: sed nec debitus modus servatur accusationis, cum non praecedat inscriptio per quam accusator se ad talionem obliget; nec debitus modus testificationis, cum propinqui admittantur ad testimonium qui possunt esse suspecti propter amorem alterius partis; ergo Ecclesia non recte procedit ad dirimendum matrimonium consanguineorum vel affinium.

Sed contra. Omnis conjunctio quae non est

matrimonialis inter virum et uxorem est cum peccato et ideo separanda: sed inter consanguineos vel affines non potest esse matrimonium, ut ex dictis patet; ergo si de facto contraxerint, sunt separandi.

Praeterea, sicut propinquitas carnalis impedit matrimonium, ita et distantia cultus: sed propter disparitatem cultus matrimonium separatur, ut patet Esdr. 10; ergo et propter consanguinitatem et affinitatem.

Respondeo. Dicendum, quod consanguinitas et affinitas inter illa impedimenta sunt, quae impediunt contrahendum, et dirimunt contractum; et ideo quaecumque probatur consanguinitas vel affinitas matrimonium praecessisse, iudicio Ecclesiae separatur.

Ad primum ergo dicendum, quod illa quae sine peccato esse non possunt, nulla praescriptione firmantur; et ideo diuturnitas temporis non impedit quin consanguineorum vel affinium matrimonia separentur, nec favor matrimonii quod nunquam fuit, nec auctoritas Ecclesiae, quae in facto decipi potest.

Ad secundum dicendum, quod quamvis iudicio Ecclesiae unus fratrum ab una sororum separetur, non propter hoc oportet quod Ecclesia aliud matrimonium separet quod est inter alium fratrem et aliam sororem, quia in foro contentioso res inter alios acta aliis non praedjudicat. Sed in foro conscientiae non debent commanere, nisi forte conscientiam suam forment, quod sit in causa per falsos testes processum.

Ad tertium dicendum, quod accusatio non fit hic ad punitionem; et ideo non praecedit obligatio ad talionem. Propinqui autem admittuntur ad testimonium, quia de eis praesumitur quod melius consanguinitatem cognoscant.

DISTINCTIO XLII.

Jam de spirituali cognatione etc. (V. edit. nostrae tom. VII, pag. 4046.)

QUAESTIO UNICA.

Hic quaeruntur quatuor: 1.^o utrum spiritualis cognatio matrimonium impediatur; 2.^o qualiter causetur; 3.^o utrum legalis cognatio matrimonium impediatur; 4.^o utrum secundae nuptiae sint licitae.

ARTICULUS I.

Ad primum sic proceditur. Et 1. videtur, quod spiritualis cognatio matrimonium non impediatur. Si enim impediatur, non minus impediatur quam carnalis, quia spirituale vinculum est fortius corporali: sed carnalis cognatio nunquam potest stare simul cum matrimonio, spiritualis autem potest, sicut cum quis in casu necessitatis filium suum baptizat, ex quo spirituales cognationem contrahit cum uxore; ergo spiritualis cognatio non debet poni matrimonii impedimentum.

2. Praeterea, in cognatione carnali gradus quidam inveniuntur, ut supra dictum est; si ergo spiritualis cognatio impedimentum matrimonii ponitur, sicut et carnalis, deberet idem gradus servari; quod patet esse falsum.

5. Praeterea, carnalis cognatio non solum se-

eundem se matrimonium impedit, sed etiam secundum affinitatem quam causat. Ex spirituali autem cognatione non causatur aliqua affinitas quae matrimonium impedit; ergo spiritualis cognatio non potest poni matrimonii impedimentum.

Sed contra. Sanctius est vinculum spirituale quam corporale. Sed corporalis cognationis vinculum, matrimonium impedit; ergo multo magis spiritualis impedire debet.

Praeterea, in matrimonio principalior est animarum conjunctio quam corporum, quia causa ejus est: ergo sicut cognatio carnalis impedit matrimonium ratione conjunctionis corporum, ita et spiritualis cognatio matrimonium impedit, in quantum est conjunctio animarum.

Respondeo. Dicendum, quod sicut supra dictum est, una causa quare carnalis copula matrimonium impedit, est, quia impedit amicitiae multiplicationem, dum ad eos novum amicitiae foedus contrahitur, in quibus sufficiens erat amicitiae causa. Eadem vero ratio manet in cognatione spirituali. Nam sufficiens amicitiae causa relinquitur ex generatione spirituali, sicut et ex carnali. Unde dicit Apost. 1 ad Cor. 4: « Ut filios charissimos moneo: Nam in Christo Jesu per Evangelium ego vos genui. » Et ideo rationabiliter spiritualis cognatio matrimonium impedit.

Ad primum ergo dicendum, quod quamvis cognatio spiritualis matrimonium impediatur sicut et carnalis, tamen haec est differentia: quod spiritualis cognatio, sicut et affinitas, potest et praecedere et sequi matrimonium: carnalis autem cognatio, quae matrimonium impediatur, non potest nisi praecedere. Nullum autem impedimentum matrimonio superveniens dirimit matrimonii vinculum, quamvis possit actum impedire, sed solum quando praecedit; et ideo consanguinitas carnalis nunquam stat simul cum vinculo matrimoniali, et tamen potest contingere in cognatione spirituali et affinitate. Quod si contingat de spirituali cognatione propter necessitatis articulum vel ex ignorantia sufficienti, tamen adhibita diligentia, neuter conjugum amittit jus petendi debitum. Si autem ex industria, et non propter casum necessitatis hoc fiat, tunc ille, ex cujus culpa contingit, jus amittit petendi debitum, quamvis reddere teneatur.

Ad secundum dicendum, quod in sacramentis ex quibus spiritualis cognatio causatur, omnes operantur ut unum, secundum illud primae ad Corinth. 5: « Qui plantat et qui rigat unum sunt. » Et ideo, ille qui baptizatur a filio spirituali non fit spiritualiter propinquior patri spirituali sui baptizatoris quam si a quocumque alio baptizaretur. In carnali autem cognatione aliquid proprium generans tradit genito: unde quod generans a se genito tradit, pertinet quodammodo ad primum generantem. Et ideo carnalis cognatio habet gradus, non autem spiritualis; sed sistit in primo gradu; qui in tribus modis attenditur. Primo, inter patrem spiritualem et filium spiritualem; secundo, inter patrem carnalem et patrem spiritualem; tertio, inter filium spiritualem et filios carnales ejusdem patris. Primus modus dicitur paternitas vel maternitas, sive filiatio spiritualis. Secundus compaternitas. Tertius spiritualis fraternitas; et quaelibet impedit contrahendum et dirimit contractum.

Ad tertium dicendum, quod spiritualis cognatio causat etiam quamdam affinitatem spiritualem in

primo gradu: quando enim uxor alicujus, filium alterius mulieris de sacro fonte levat, tunc illa mulier, sicut fit commater uxori, ita et viro. Non autem spiritualis cognatio transit ad virum, si per actum alterius quam uxoris spiritualis cognatio contrahatur cum uxore: puta si pater uxoris baptizat aliquam puellam: fit enim illa soror spiritualis uxori, non viro. Sed totum hoc non tenet, quando matrimonium nondum est consummatum.

ARTICULUS II.

Ad secundum sic proceditur. Et 1. videtur, quod spiritualis cognatio contrahatur non solum per baptismum et confirmationem. Sacramenta enim sunt sacramentalibus perfectiora: sed quaedam sacramentalia spirituales cognationem causant, sicut de Catechismo in litera dicitur; ergo spiritualis cognatio per omnia sacramenta contrahitur.

2. Praeterea, pater et filius, nomina sunt cognationis: sed haec nomina, ex doctrina et praelatione, et ex quibusdam aliis causantur; ergo omnia hujusmodi spirituales cognationem causant.

3. Praeterea, cognatio carnalis causatur ex generatione, qua pater filium generat: sed ille qui tenet aliquem ad confirmationem, vel levat de sacro fonte, non generat spiritualiter; ergo ad eum spiritualis cognatio non contrahitur.

4. Praeterea, spirituale est propinquius spirituali quam carnali; si ergo aliquis levans aliquem de sacro fonte spirituales cognationem contrahit cum patre carnali, multo fortius cum patre spirituali, qui simul eundem de sacro fonte levat.

5. Praeterea, in eodem gradu computantur pater et filius et frater: si ergo spiritualis cognatio transit a patre in filium, videtur quod pari ratione transire debeat a filio in patrem, vel a fratre in fratrem, quod tamen non est; ergo inconvenienter modus contrahendi spirituales cognationem ab Ecclesia est statutus.

Respondeo. Dicendum, quod cognatio ex generatione causatur. Et ideo cum spiritualis generatio per duo sacramenta causatur, scilicet per confirmationem et baptismum, haec duo sacramenta spirituales cognationem causant. Nam baptismus est quasi generatio vel nativitas in utero, confirmatio vero quaedam nativitas ex utero; in quantum aliquis jam roboratus, exponitur ad publice confitendum nomen Christi.

Ad primum ergo dicendum, quod quidam dixerunt quod spiritualis cognatio causatur ex quolibet sacramentalium baptismi, quidam vero dicunt quod ex solo catechismo. Neutrum autem videtur verum: quia in iis sacramentalibus non est complementum generationis spiritualis, quod requiritur ad cognationem: quamvis secundum quosdam ex catechismo causatur quoddam debile impedimentum, quod impedit contrahendum, sed non dirimit contractum. Alia vero sacramenta non habent generationis rationem, et ideo spirituales cognationem non causant.

Ad secundum dicendum, quod pater carnalis, in quantum generat, est cognationis principium, non autem in quantum nutrit vel instruit; et ideo provisores vel doctores, qui ex horum similitudine patres dicuntur, non habent aliquam spirituales cognationem.

Ad tertium dicendum, quod ille qui tenet ad

confirmationem vel qui levat de sacro fonte, qui Anadochus dicitur, secundum Dionysium gerit personam Ecclesiae, quae in generatione spirituali est mater. Unde non baptizatus, qui non est Ecclesiae membrum, non potest hoc officio fungi. Ille vero qui sacramentum tradit, gerit personam Christi, qui est spiritualis pater; et ideo ad utrumque causatur spiritualis cognatio.

Ad quartum dicendum, quod sicut gratia fundatur super naturam, ita et spiritualis cognatio super carnalem; unde oportet quod inter compadres unus sit pater spiritualis, alter carnalis.

Ad quintum dicendum, quod filius est aliquid patris, sicut uxor viri, et e converso, in quantum sunt una caro; pater autem non est aliquid filii, nec frater aliquid fratris; et ideo spiritualis cognatio non transit a filio in patrem, nec a fratre in fratrem; transit autem a viro in uxorem, et e converso: et similiter a patre in filium per actum proprium patris vel conjugis, non autem per actum alienum. Unde si aliquis baptizet filium alienius, non habet aliquam spiritualem cognationem ad alios filios ejusdem.

ARTICULUS III.

Ad tertium sic proceditur. Et 1. videtur, quod legalis cognatio, quae per adoptionem contrahitur, non impediatur matrimonium. Sacramenta enim Ecclesiae humanis legibus non subduntur: sed matrimonium est Ecclesiae sacramentum; ergo adoptio per humanas leges introducta impedimentum matrimonii causare non potest.

2. Praeterea, cognatio est perpetuum matrimonii impedimentum: sed cognatio legalis non est hujusmodi, quia soluta adoptione per mortem adoptantis, vel emancipationem adoptati, filius adoptivus potest contrahere cum filia naturali; ergo cognatio legalis non debet poni matrimonii impedimentum.

5. Praeterea, sicut cognatio spiritualis superadditur naturali, ita legalis: sed spiritualis cognatio contrahitur cum matre naturali filii spiritualis; ergo et legalis: sed spiritualis cognatio contrahitur cum persona spiritualis filii, non autem transit ad nepotem, cujus contrarium in cognatione legali invenitur; ergo inconvenienter legalis cognatio ponitur matrimonii impedimentum.

Sed contra est quod dicit Nicolaus Papa: « Inter eos non contrahitur matrimonium, quos adoptio jungit. »

Praeterea, multiplicatio amicitiae quae per hoc impediretur, est causa aliqua, quare carnalis cognatio matrimonium impedit: sed similiter impediretur nisi legalis cognatio matrimonium impedit; quia legalis cognatio est sufficiens amicitiae causa; ergo legalis cognatio matrimonium impedit.

Respondeo. Dicendum, quod per leges est adoptio introducta, per quam aliquis potest sibi assumere personam extraneam in filium vel nepotem, qui transit quodammodo in potestatem adoptantis, et habet necesse conversari in domo ipsius, et sic de facili posset luxuriae aditus praebere nisi inter filium adoptivum et personas conjunctas patri adoptanti, esset carnalis copula prohibita; et ideo lege civili est talis copula prohibita, quam prohibitionem Ecclesia confirmat, et ex hoc habet matri-

monium impedire. Unde patet responsio ad primum.

Ad secundum dicendum, quod inter adoptantem et uxorem ejus semper manet impedimentum legalis cognationis ad filium adoptivum, quia semper aliqua auctoritas et reverentia manere debet. Sed ad filium non oportet quod maneat praedictum vinculum, adoptione cessante; quia tollitur necessitas cohabitandi, quae erat causa impedimenti.

Ad tertium dicendum, quod pater adoptans cum matre naturali adoptati, non habet necesse commorari, unde cessat prohibitionis ratio. Filius vero spiritualis non ponitur in potestate patris spiritualis, et cura ejus, et ea quae ipsius sunt, sicut fit in cognatione legali; et ideo adoptato aliquo in filium, quicquid est in ejus potestate transit in potestatem adoptantis: ideo legalis cognatio transit in filios et nepotes, non autem spiritualis, quae habet aliam rationem impediendi. Patet ergo ex dictis, quod est triplex legalis cognatio. Prima descendens, quae contrahitur inter patrem adoptantem, et filium adoptivum, et filios et nepotes ejus. Secunda quasi collateralium, quae est inter filium adoptivum, et filium naturalem. Tertia per modum affinitatis, quae est inter adoptantem et uxorem adoptati, et e converso. Prima et tertia praestant perpetuum impedimentum: non autem secunda, ut patet ex dictis.

ARTICULUS IV.

Ad quartum sic proceditur. Et 1. videtur, quod secundae nuptiae sint illicitae. Nuptiae enim excusantur ratione sacramenti: sed secundae nuptiae non sunt sacramentum, quia nec benedictio adhibetur, nec significatio servatur, nec sacramenta iterari debent; ergo secundae nuptiae sunt illicitae.

2. Praeterea, sacerdotes arcentur ne secundis nuptiis intersint, ut in littera patet: quod non esset, nisi illicitae essent; ergo sunt illicitae.

5. Praeterea, poena non debetur nisi culpae: sed secundis nuptiis debetur poena irregularitatis; ergo sunt illicitae.

Sed contra est, quod Abraham secundas nuptias contraxit, ut patet Gen. 25.

Praeterea, 1 ad Cor. 7, dicitur: « Si dormierit vir ejus, liberata est » scilicet a vinculo matrimonii. « Cui vult nubat, tantum in Domino. »

Respondeo. Dicendum, quod qui sunt matrimonio conjuncti, impediuntur matrimonium contrahere propter matrimoniale vinculum, quo astringuntur. Hoc autem vinculum per mortem alterius conjugis solvitur: unde licet conjugi remanenti, secundo matrimonium contrahere.

Ad primum ergo dicendum, quod cum in secundis nuptiis sint omnia quae sunt de essentia sacramenti, est ibi verum sacramentum: nec fit aliqua injuria sacramento, quia matrimonium characterem non imprimit, unde potest iterari. Significatio autem salvatur, quae est de essentia sacramenti; quamvis in ordine ad primum sacramentum sit aliquis significationis defectus, quia non est una unius sicut est in Christo et Ecclesia: et ratione hujus defectus benedictio a secundis nuptiis subtrahitur, quando scilicet sunt secundae ex parte mulieris, per quam significatur Ecclesia quae soli Christo est desponsata: non autem si sint secundae ex parte viri, per quem significatur Christus qui

non est Ecclesiae militanti obligatus quin praeter Ecclesiae sacramenta alios possit in matrimonium assumere.

Ad secundum, quod secundae nuptiae licet non sint illicitae, habent tamen quamdam turpitudinis speciem, in quantum fragilitatem carnis designant; et ideo prohibentur sacerdotes, ne eis intersint.

Ad tertium dicendum, quod irregularitas ex secundis nuptiis causatur, non propter aliquam culpam, sed propter defectum sacramenti, ut supra dictum est.

DISTINCTIO XLIII.

Postremo de conditione resurrectionis etc. (V. edit. nostrae tom. VII, pag. 1033.)

QUAESTIO UNICA.

Hic quaeruntur quatuor: 1.^o utrum omnium resurrectio sit futura; 2.^o utrum resurgent idem numero; 3.^o de causa resurrectionis; 4.^o de conditione resurgentium in iudicio.

ARTICULUS I.

Ad primum sic proceditur. Et 1. videtur, quod non erit resurrectio generalis omnium. Naturale enim desiderium non potest omnino frustrari quantum ad omnes: sed secundum Apostolum 2 ad Corinth. 5: « Hoc est commune desiderium quod « nolimus expoliari, sed supervestiri; » ergo aliqui nunquam a corpore spoliabuntur per mortem, et sic non resurgent.

2. Praeterea, nihil debet in electis fieri nisi in bonum eorum: sed electorum resurrectio non videtur eis in bonum cedere, quia anima purior est et Deo similior a corpore separata, quam corpori conjuncta; ergo electi non resurgent.

3. Praeterea, nullus liberatur a poena, nisi fuerit purgatus a culpa: sed mors corporalis est poena originalis peccati, a quo multi nunquam fuerunt purgati; ergo non resurgent a morte.

4. Praeterea, ubi eadem causa, et idem est effectus: sed eadem causa resurgendi est modo et in fine mundi: quia nunc habent homines merita et demerita pro quibus sunt puniendi, vel praemiandi, sicut et tunc: modo autem homines non resurgunt; ergo nec in fine mundi resurgent.

Sed contra est quod dicitur Joan. 5: « Omnes « qui in monumentis sunt audient vocem Filii « Dei, et qui audierint vivent. »

Praeterea, Rom. 5, dicitur quod majus est donum Christi quam peccatum Adae: sed per peccatum Adae mors est in omnes homines introducta; ergo per donum Christi omnes revocabuntur a morte ad vitam.

Respondeo. Dicendum, quod ad ponendum futuram resurrectionem, quatuor inducuntur moventia. Primum quidem est ordo divinae justitiae: quae requirit ut sicut homo meruit vel demeruit in anima et corpore simul; ita in utroque aeternaliter praemictur vel puniatur. Secundum est exemplum corporalis creaturae, quam interire videmus, et iterum renovari. Unde majora de rationali creatura debemus praesumere a largitate divina. Tertium est, conditio humanae naturae, cujus anima est incorruptibilis et naturaliter corpori unita. Unde

separatio a corpore est ei quasi accidentalis, et sic non debet in perpetuum durare. Quartum est, firmitas promissionis divinae, quae etiam in Scripturis sanctis continetur, ut patet in auctoritate inducta de Joanne. Primae quoque ad Corinth. 14, dicitur: « Omnes quidem resurgemus. » Et ideo firmiter tenere debemus omnes homines resurrecturos esse.

Ad primum ergo dicendum, quod sicut peccatum originale in omnes pertransit, ita et mors, ut per Apostolum patet Rom. 5. Unde illa opinio probabilior est, quod omnes homines morientur et resurgent; quamvis aliqui dixerunt quosdam non morituros qui vivi invenientur in adventum Christi: de quibus tamen communiter creditur, quod in ipso raptu, quo rapiuntur obviam Christo, morientur et resurgent. Desiderium autem illud, de quo Apostolus loquitur, non est absolutum, sed conditionatum: unde non est necessarium quod impleatur.

Ad secundum dicendum, quod status animae corpori conjunctae est perfectior, quam cum est a corpore separata; sicut quaelibet pars in suo toto existens, est perfectior, quam separata a toto, et per hoc Deo similior.

Ad tertium dicendum, quod illi qui non sunt a peccato originali purgati, a poena mortis absolvuntur per hoc, quod semel moriuntur; unde nihil impedit quin resurgant.

Ad quartum dicendum, quod convenienter fit ut tempus resurrectionis communis usque in finem mundi expectetur, quia immortalitas resurgentium competet illi statui, in quo tota natura corporalis, quamdam immutabilitatem habebit per quietem motus caelestis qui erit in fine mundi. Competit etiam gaudio electorum, quod majus atque communius erit ex hoc ipso, quod omnes simul gloria corporis honorabuntur. Competit etiam conditioni naturae. Nam defectus naturae qui est mors; simul removebitur ab omnibus qui in natura eadem communicant. Hoc autem tempus ideo est occultum, ut ad ipsum sollicitius praeparemur.

ARTICULUS II.

Ad secundum sic proceditur. Et 1. videtur, quod non possit resurgere idem numero. Quod enim penitus cedit in non ens, non potest idem numero resumitur: sed corporeitas, secundum quod est forma substantialis, cedit penitus in non ens, sicut et aliae formae quae sunt formae tantum: non enim habent materiam partem sui in quam resolvantur; ergo corporeitas non potest resumitur eadem numero; ergo nec homo erit idem numero; quia principiis essentialibus variatis, variatur quod est ex principiis.

2. Praeterea, ubi non est eadem humanitas, non est idem homo: sed in resurrectione non erit eadem humanitas: tum quia humanitas non est forma et substantia, sicut anima, et sic per corruptionem videtur cedere penitus in non ens: tum quia unio animae ad corpus, quae est de ratione humanitatis, non potest eadem resumitur; ergo non redibit homo numero.

3. Praeterea, secundum Philosophum in 2 de Generatione, substantia corruptibilis mota, non reiteratur eadem numero: sed talis substantia est corpus nostrum secundum praesentem statum; ergo non reparabitur idem numero; et sic nec homo in resurrectione idem homo resurget.

4. Praeterea, si partes non sunt eadem numero,

nec totum; sed partes hominis non erunt eadem numero, sed quod est in una parte redibit ad aliam, ut in littera dicitur; ergo nec totus homo erit idem numero.

Sed contra est quod dicitur Job 29: « In novissimo die de terra resurrecturus sum, et in carne mea videbo Deum meum. Quem visurus sum ego ipse, et non alius; » ergo idem homo numero resurget.

Praeterea, Damascenus dicit in 4 libro: « Resurrectio est ejus quod cecidit secunda resurrectio; » ergo oportet eundem hominem qui per mortem cecidit, in resurrectione reparari.

Respondeo. Dicendum quod idem numero homo quod non resurgat est inconveniens dicere propter tria. Primo, quia repugnat conditioni naturae: eadem enim anima non potest pluribus corporibus uniri, ut patet per Philosophum in primo de Anima. Unde, cum anima rationalis sit eadem numero, oportet corpus reparari idem numero; et sic totus homo idem numero erit. Secundo, quia repugnat divinae justitiae, si non idem numero qui meruit vel peccavit puniatur vel praemiatur. Tertio, quia repugnat veritati resurrectionis, quae iterationem quamdam importat, ad quam identitas secundum numerum requiritur. Unde haereticum est dicere quod non idem numero resurgat.

Ad primum ergo dicendum, secundum quosdam, quod corporeitas non penitus cedit in non ens, sed manet in potentia materiae. Sed ex hoc non potest haberi quod eadem numero redeat; quia sic etiam sanitas interrupta rediret eadem numero, quod est contra Philosophum 5 Physicorum. Unde alii dicunt, quod ab eadem forma per essentiam efficitur res naturalis secundum omnia genera et species sub quibus continetur: eadem enim forma est per quam lapis est substantia, et corpus, et lapis; et similiter per animal rationale homo est substantia, corpus, animal, et homo: unde non est in eo alia forma substantialis quam anima rationalis, quae praesistenti formae succedit, eique succedit alia forma substantialis: et propter hoc, remota anima rationali, nihil manet in corpore mortuo, partium hominis univoce dictum.

Ad secundum dicendum, quod humanitas non dicit aliquam formam praeter animam et corpus: sed compositum ex anima et corpore per modum partis, idest cum praeensione aliorum, quae non sunt de ratione humanitatis. Unde, cum anima rationalis sit eadem numero, et per consequens corpus, sequitur quod sit eadem humanitas, non obstante relatione unionis, quae non est aliqua pars humanitatis, sed ea concomitans, cum humanitas non sit talis forma quae sit compositio et ordo, sicut forma domus. Quidam tamen dicunt, quod humanitas est ipsa anima rationalis, et primum melius est.

Ad tertium dicendum, quod Philosophus de reditu loquitur per viam generationis: homo enim generat hominem, specie non numero eundem. Vel potest brevius dici ad omnia praedicta, quod miraculose divina virtute erit identitas numero in resurgentibus.

Ad quartum dicendum, quod sine impedimento identitatis fieri potest, ut quod est in una parte redeat ad aliam sub eadem parte homogenea, quia sic non variatur nisi situs, ut quod est in carne pedis redeat ad carnem tibiae, non autem redeat

ad aliam partem heterogeneam, ut quod est sub carne redeat ad ossa, quia jam species variaretur. Sed de congruentia probabile est, quod quicquid est de veritate humanae naturae redeat ad suum locum. Secus autem est de superfluis: de quo Augustinus videtur loqui in littera.

ARTICULUS III.

Ad tertium sic proceditur. Et 1. videtur, quod resurrectio Christi non sit causa nostrae resurrectionis. Non enim potest dici quod sit causa meritoria, quia resurrectio magis ad praemium quam ad meritum pertinet: nec causa effectiva, quia resurrectio, cum sit miraculosa, sola virtute divina fit; ergo resurrectio Christi non est causa nostrae resurrectionis.

2. Praeterea, causa sufficiens est conjuncta effectui. Sed resurrectio Christi non est conjuncta resurrectioni omnium, neque secundum tempus, neque secundum corporalem contractum, ut per se patet, nec secundum spirituale: quia sic non resurgerent qui carent fide per quam Christo primo conjunguntur; ergo Christi resurrectio non est causa nostrae resurrectionis.

3. Praeterea, posita causa sufficienti, non oportet ponere alias causas ad productionem effectus: sed ad resurrectionem nostram necesse est ponere alias causas praeter resurrectionem Christi; scilicet jussum Dei, tubam, et vocem Archangeli, ut patet 1 Thessal. 4 et 1 ad Cor. 15; ergo resurrectio Christi non est causa resurrectionis nostrae.

Sed contra est quod dicitur 1 ad Corinth. 15: « Sicut in Adam omnes moriuntur, ita et in Christo, idest per Christum, omnes vivificabuntur. »

Praeterea, primum in quolibet genere est causa eorum quae sunt post, ut patet in 2 Metaph. Sed resurrectio Christi est prima inter resurrectiones, ut dicitur 1 ad Cor. 15: « Christus resurrexit a mortuis primitiae dormientium; » ergo sua resurrectio est causa nostrae resurrectionis.

Respondeo. Dicendum, quod Christus ad hoc naturam assumpsit, ut eam repararet. Indigebat autem reparatione quantum ad duo. Primo, quantum ad ipsam conditionem naturae, contra quam erat ut anima remaneret a corpore separata. Secundo, quantum ad spiritualia bona et quae ad ea ordinantur. Sed quantum ad hoc secundum, non reparatur natura humana nisi in illis qui Christo spiritualiter adhaerent: quantum vero ad primum in omnibus qui ei secundum naturam conformantur. Sicut autem spirituales defectus reparavit, in se plenitudinem gratiae assumendo, de qua omnes acciperemus, ita primum defectum reparavit resurgendo; unde sua resurrectio causa est nostrae resurrectionis.

Ad primum ergo dicendum, quod est causa exemplaris et effectiva: non quidem principalis, ut Deus, sed instrumentalis: humanitas enim ejus, secundum Damascenum, est instrumentum divinitatis: et ideo actiones humanae naturae illius sunt salubres, in quantum in eis operatur vis divinitatis.

Ad secundum dicendum, quod non requiritur ibi conjunctio spiritualis, sed solum naturalis, ut dictum est. Nec oportet quod sint simul tempore: quia Christi resurrectio operator ad nostram secundum ordinationem voluntatis divinae.

Ad tertium dicendum, quod vox tubae erit

applicatio resurrectionis Christi ad resurrectionem nostram: quia per vocem tubae intelligitur, vel ipse manifestus adventus Christi in mundum, secundum Gregorium, vel ad litteram ejus imperium voce expressum, sicut imperavit mari, et facta est tranquillitas. Angeli autem operabuntur ministerio, circa pulverum collectionem. Jussus autem Dei est sicut causa principalis, ut dictum est.

ARTICULUS IV.

Ad quartum sic proceditur. Et 1. videtur, quod non uno intuitu omnes resurgentes videant omnia merita et demerita propria, et aliena. Illud enim quod omnino est de libro deletum non potest in eo legi: sed peccata sanctorum erunt omnia deleta; ergo non poterunt ea in suis conscientiis videre.

2. Praeterea, nihil in sanctis esse poterit quod sit eis ad tristitiam vel confusionem, nec in damnatis aliquid quod sit ad gaudium vel honorem: hoc autem esset si omnium merita et demerita ab omnibus viderentur; ergo etc.

5. Praeterea, non contingit, simul plura intelligere; ergo impossibile est, quod uno intuitu simul omnia merita et demerita videantur.

Sed contra est, quod dicitur 1 ad Corinth. 4: « Veniet Dominus qui illuminabit abscondita tenebrarum et manifestabit consilia cordium. » Ubi dicit Glossa: « Gesta et cogitata bona et mala, tunc aperta et nota erunt omnibus. »

Praeterea, iudicium humanum exemplatur a iudicio divino: sed in iudicio humano ea de quibus est iudicium nota sunt omnibus astantibus: cum ergo iudicium divinum sit futurum de omnibus meritis et demeritis, omnia omnibus erunt nota, quia omnes ibi astantibus, ut dicitur 2 ad Cor. 5.

Respondeo. Dicendum, quod ultimum et finale iudicium debet esse omnibus manifestum, ut omnibus Dei justitia evidenter appareat. Non posset autem esse haec justitia omnibus nota nisi cognoscerent ea de quibus iudicabuntur; nec forma iudicis servaretur, nisi esset ibi accusator vel defensor. Unde oportet quod omnes sua merita vel demerita recognoscant ad sui accusationem vel defensionem, et omnia merita vel demerita aliena ad justitiae iudicis manifestationem.

Ad primum ergo dicendum, quod licet omnia peccata sanctorum deleta sint, quantum ad maculam et reatum, manent tamen in aliquo effectu, scilicet in merito poenitentiae per quam sunt expiata: et similiter merita damnatorum, si quae fuerunt, manent quodammodo in peccatis quibus sunt mortificata. Divina vero virtute fiet ut per huiusmodi effectus, omnia in memoria revocentur.

Ad secundum dicendum, quod peccatoribus erit ad tristitiam et confusionem quod eorum merita a se et aliis cognoscentur, eo quod per suam malitiam tot bona mortificaverunt: et e contrario electis erit ad gaudium et honorem quod eorum peccata a se et aliis cognoscentur, per hoc quod curaverunt ea per humilitatem poenitentiae delere: sicut Magdalenae et Petro nunc non est in confusionem, quod eorum peccata cognoscimus.

Ad tertium dicendum, quod electi poterunt omnia in uno instanti, sua et aliena merita et demerita videre in Verbo quod videbunt: damnati vero non in instanti, sed tempore brevissimo, divina

virtute faciente: in quolibet enim tempore sunt infinita instantia.

DISTINCTIO XLIV.

Solent autem nonnulli etc. (V. edit. nostrae tom. VII, pag. 1070.)

QUAESTIO I.

Hic quaeruntur quatuor: 1.º de integritate resurgentium; 2.º de eorum statura et aetate: 3.º de qualitate corporum electorum; 4.º de qualitate corporum damnatorum.

ARTICULUS I.

Ad primum sic proceditur. Et 1. videtur, quod homo non resurget cum omnibus partibus suis. In operibus enim Dei nihil est frustra: sed frustra esset si omnes partes hominis resurgerent: quaedam enim partes hominis ordinantur ad generationem et nutritionem, quae post resurrectionem cessabunt, sicut venter, intestina, genitalia et humores; ergo non omnes partes homines resurgent.

2. Praeterea, ad hoc homo resurget, ut in corpore praemietur: sed ille qui manu caruit nihil per manum meruit; ergo non debet cum manu resurgere.

3. Praeterea, superfluitates corporis non resurgent, ut urina et sudor: sed quaedam partes hominis ex superfluitatibus generantur, ut capilli et ungues; ergo non resurgent.

4. Praeterea, cibi comesti in carnem et alias partes hominis convertuntur: sed non potest esse quod quicquid est conversum ex cibis et potibus resurgat, quia sic esset immoderata quantitas resurgentis; ergo non omnes partes homines resurgent.

5. Praeterea, idem non potest resurgere in diversis: sed aliquid idem fuit pars diversorum hominum, ut patet de costa quae fuit in Adam et Eva, et de illis qui carnibus humanis vesebantur; ergo non omnes partes corporis resurgent.

Sed contra est, quod dicitur Deut. 31: « Dei perfecta sunt opera. » Sed resurrectio erit opus Dei; ergo homo perfecte cum omnibus suis partibus resurget.

Praeterea, in resurrectione erit ultima naturae reparatio: sed natura non repararetur nisi omnes partes naturales resurgerent; ergo homo cum omnibus partibus naturalibus resurget.

Respondeo. Dicendum, quod ea quae sunt contra naturam non debent esse perpetua. Sicut autem est contra naturam animae quodammodo ut sit sine corpore, quia corpori naturaliter unitur; ita est contra naturam corporis, ut aliqua naturalium partium ei desit: tum quia una pars corporis habet dependentiam ad aliam: tum quia perfecta unio animae ad corpus esse non potest, nisi sit integrum, cum anima nata sit integer corporis actus esse: unde appetitus ejus ad corpus, qui est naturalis, non quiesceret nisi integro corpori uniretur. Et propter hoc oportet omnes naturales partes hominis resurgere. Si quae vero sunt non naturales, ut gibbositates, et si qua super exerescunt membris, haec non resurgent.

Ad primum ergo dicendum, quod membra praedicta erunt in resurrectione, non propter actum ad

quem nunc ordinantur: sed ad completionem naturae. De humiditatibus vero sciendum est quod illae humiditates quae sunt in via corruptionis, sicut sanies, sudor et huiusmodi, vel quae sunt in via generationis nondum habentes determinatam speciem: ut humiditas quae dicitur ros et cambium, quando scilicet sanguis incipit dealbari et verti in carnem, vel quae ordinantur ad conservationem speciei, ut semen, non resurgent. Quae vero habent speciem determinatam et pertinent ad perfectionem individui, resurgent, ut sanguis et alii tres humores et humiditas quae dicitur gluten, qua caro continuatur.

Ad secundum dicendum, quod meritum et praemium non proprie respiciunt membrum, sed hominem. Homo autem truncatus manu meruit ut praemiaretur in manu; et ideo cum manu resurget.

Ad tertium dicendum, quod triplex est superfluum. Quoddam quo nullo modo indiget, ut digestiones et urinae; et huiusmodi nullo modo resurgent, sed loco eorum aliquibus humiditatibus intestina implebuntur decenter. Secundum est quo indiget ad speciem conservandam, ut semen; et hoc etiam non resurget. Tertium est quo indiget ad individui perfectionem, ut capilli et ungues: huiusmodi enim natura praeparat ad custodiam et ornatum principalium membrorum, sicut ars vaginam ad custodiam ensis; et huiusmodi resurgent.

Ad quartum dicendum, quod secundum quosdam, id quod conversum est ex eibus, nullo modo est de veritate humanae naturae: sed solum hoc quod tractum est ex Adam, quod per multiplicationem ad plenam quantitatem omnium sufficit: et secundum hoc nihil quod ex eibus sit generatum resurget. Alii vero dicunt quod illud quod tractum est ex semine patris est principaliter de veritate humanae naturae, quia semen est activum et formale in generatione. Quod vero tractum est ex matre, secundario pertinet ad veritatem humanae naturae, quia fuit materiale in generatione. Tertio vero pertinet ad veritatem naturae humanae, quod est ex alimentis generatum, in quantum est necessarium ad augmentum. Unde secundum hoc, totum quod est ex patre et matre tractum, resurget: de alio vero, quantum est necessarium ad perfectam quantitatem membrorum, cum aliter ad veritatem humanae naturae non pertineat: et haec opinio probabilior est.

Ad quintum dicendum, quod illud quod fuit pars duorum hominum resurget in eo in quo magis pertinuit ad veritatem naturae humanae. Unde costa resurget in Eva, in qua fuit de perfectione individui, et non in Adam, in quo pertinuit ad perfectionem speciei. Vel si aequaliter in utroque ad veritatem naturae pertinuit, resurget in eo quo primo fuit etc.

ARTICULUS II.

Ad secundum sic proceditur. Et 1. videtur, quod non omnes resurgent in perfecta statura et in juvenili aetate. Non enim potest in homine resurgere quod non fuit: sed in his qui in pueritia decesserunt non fuit tantum de materia corporis quae sufficeret ad perfectam staturam; ergo non resurgent in perfecta statura.

2. Praeterea, vigor naturae in resurrectione non minuetur: sed major vigor naturae est in pueris

quam in juvenibus; quia quanto magis miscetur de extraneo, tanto vis naturae minus potest convertere; ergo magis debent resurgere in puerili aetate quam in juvenili.

3. Praeterea, sicut statura perfecta facit ad hominis complementum, ita et sexus perfectus qui est virilis, ut in litera dicitur; ergo non oportet quod resurgant in perfecta statura.

Sed contra est, quod dicitur Ephesior. 4: « Do-
« nec occurramus omnes in virum perfectum, in
« mensuram aetatis plenitudinis Christi. »

Praeterea, ad resurrectionem integritas resurgentis requiritur: sed hoc esse non potest sine perfecta statura et aetate; ergo hoc modo omnes resurgent.

Respondeo. Dicendum, quod sicut dictum est, in resurrectione erit humanae naturae finalis reparatio. Natura autem non perfecte reparatur, nisi totum quod fuit in virtute activa naturae reducat ad actum. In virtute autem naturae fuit, ut perduceret corpus ad perfectam staturam et aetatem, nisi impedimentum adsit; et ideo oportet quod in resurrectione omnes in perfecta aetate et statura resurgant. Sed quia virtus naturae non fuit in omnibus aequaliter potens ad augendum; ideo non omnes erunt aequales quantitate: sed unusquisque habebit quantitatem, ad quam cum natura perduxisset, nullo defectu vel errore existente.

Ad primum ergo dicendum, quod quicquid defuit ad perfectionem staturae vel integritatem corporis propter defectum temporis vel naturae, totum aliunde supplebit divina potentia.

Ad secundum dicendum, quod in puero est fortior vigor naturae quantum ad efficaciam convertendi; sed in juvene est perfectior quantum ad terminum complementi.

Ad tertium dicendum, quod sexus femineus non est contra naturam, sed est intentus a natura universali, licet natura particularis principaliter intendat sexum virilem: unde uterque sexus resurget.

ARTICULUS III.

Ad tertium sic proceditur. Et 1. videtur, quod corpora beatorum non erunt spiritualia. Beatitudo enim, secundum Boetium, est status omnium bonorum congregatione completus; ergo et delectatio beatitudinis colligit in se omnes delectationes: et sic in corporibus beatorum erit actus nutritivae et generativae, qui ad vitam animalem pertinent, in his autem actibus magna delectatio consistit; ergo corpora beatorum non erunt spiritualia.

2. Praeterea, magis repugnat perfectioni defectus ex passione relictus quam passibilitas: sed in corporibus beatorum erunt aliqui huiusmodi defectus, scilicet cicatrices in manibus, ut in Christo fuerunt; ergo non erit impassibilitas quae pertinet ad corporis spiritualitatem.

3. Praeterea, illud quod convenit corpori ratione ejus quod est ei naturale, in resurrectione non tolletur: sed replere locum convenit corpori ratione corporeitatis substantiae naturalis; ergo hoc etiam in resurrectione sibi conveniet: corpora igitur beatorum non erunt subtilia, ut cum aliis corporibus simul in eodem loco esse possint: quod etiam ad spiritualitatem corporis pertinere videtur.

4. Praeterea, agilitas ordinem ad motum dicit: sed corpora beatorum non movebuntur, cum mo-

tus sit actus imperfecti; ergo non erunt agilia, quod etiam pertinet ad corporis spiritualitatem.

3. Praeterea, omne quod est clarum, de necessitate videtur ab habente visum: sed corpora gloriosa non de necessitate videntur, ut patet de Christo, qui se discipulorum aspectibus subtrahebat cum volebat post resurrectionem; ergo in corporibus beatorum non erit claritas quae pertinet ad spiritualitatem corporis; non ergo corpora beatorum erunt spiritualia.

Sed contra est, quod dicitur 1 ad Cor. 15:

« Seminatur corpus animale, resurget corpus spirituale. »

Praeterea, praemium debet merito respondere: sed Sancti merendo corpora sua spiritui subdiderunt; ergo in resurrectione eorum corpora debent esse spiritualia.

Respondeo. Dicendum, quod beatitudo hominis est ex conjunctione ad Deum, cui secundum spiritum conjungitur. Unde oportet quod ex beatitudine spiritus gloria redundet ad corpus, ut Augustinus dicit in epistola ad Dioscorum. Unde oportet corpus gloriosum omnino spiritui esse subjectum: quae quidem subjectio attenditur dupliciter. Uno modo ut perfecte subdatur ei tamquam motori; et ex hoc erit agile, quasi paratum et efficax ad omnem motum exequendum, quem spiritus imperabit. Alio modo subdetur ei ut formae. A forma autem materia tria suscipit. Primo naturam speciei: et quantum ad hoc corpus gloriosum erit subtile, sicut dicimus aurum subtile, inquantum materia est perfecte terminata per speciem. Secundo suscipit esse et ejus conservationem: et quantum ad hoc erit impassibile, idest nullius corruptivi passivum. Tertio recipit proprietatem formae proportionatam; et quantum ad hoc erit clarum. Nam claritas corporis maxime congruit animae claritati. Quidam tamen hoc attribuunt naturae quintae essentiae, quae tunc in corporibus dominabitur elementari naturae: quod non videtur verum, cum quinta essentia non veniat in compositionem materialem corporis misti.

Ad primum ergo dicendum, quod per actum nutritivae, anima maxime ad corpus inclinatur, unde et spiritualitati repugnat. Non autem oportet quod omnes delectationes beatitudo contineat colectivo, sed virtualiter, sicut imperfectum continetur a perfecto.

Ad secundum dicendum, quod impassibilitas corporis gloriosi excludit passionem nocivam, quod erit ex perfecta subjectione corporis ad animam, inquantum dat et conservat esse. Non autem erit ex dominio quintae essentiae, ut quidam volunt, ratione jam dicta: neque ex subtractione qualitatum activarum passivarum, ut alii dicunt; cum hujusmodi qualitates sint de ratione corporis misti. Cicatrices autem in martyribus non erunt cum aliquo defectu, sed cum decore gloriae, in signum praecedentis virtutis.

Ad tertium dicendum, quod subtilitas corporis gloriosi non est intelligenda ad modum substantiae incorporeae vel aeris, ut quidam haeretici posuerunt, cum corpus Christi post resurrectionem palpabile fuerit: neque hoc modo, ut aliud corpus secum patiat in eodem loco, ut multi dicunt: hoc enim esse non posset nisi quantitas corporis tolleretur ratione cujus dimensiones separatae locum replent, aliud corpus secum non patientes, secundum Philosophum in 4 Physicorum. Sed dicitur subtile

inquantum perfecte substat naturae speciei, ut dictum est. Potest tamen corpus gloriosum simul esse cum alio corpore in eodem loco miraculose, divina virtute hoc faciente.

Ad quartum dicendum, quod corpus gloriosum non movebitur propter aliquam indigentiam, sed propter virtutis demonstrationem: unde motus ille non attestatur imperfectionem, nisi secundum quod corpus in uno loco existens est imperfectum, inquantum est potentia in alio et non actu. Non tamen movebitur corpus gloriosum in instanti, sed in tempore imperceptibili.

Ad quintum dicendum, quod claritas corporis gloriosi, erit redundans ex gloria animae: unde suberit arbitrio voluntatis, ut secundum eam corpus agat in visum vel non agat, sicut et quaelibet ejus actio. Et propter hoc in potestate corporis gloriosi erit, quod videatur cum claritate, vel absque claritate, vel nullo modo.

ARTICULUS IV.

Ad quartum sic proceditur. Et 1. videtur, quod corpora damnatorum cum suis deformitatibus resurgent. Sicut enim deformitates habere est quaedam poena, ita et deformitatibus carere est quoddam praemium: sed damnatis nullum praemium debetur: ergo cum deformitatibus resurgent.

2. Praeterea, effectus non tollitur manente causa: sed causa horum defectuum fuit passibilitas, quae in corporibus damnatorum erit; ergo et hujusmodi defectus in eis erunt.

3. Praeterea, deformitates hujusmodi pertinent ad proprietatem animalis vitae quae remanebit in corporibus damnatorum, cum non sint futura spiritualia; ergo et hujusmodi deformitates in eis erunt.

Sed contra est, quod dicitur 1 ad Corinth. 15: « Mortui resurgent incorrupti: » quod intelligitur de bonis et malis, secundum Glossam; ergo resurgent sine deformitatibus.

Praeterea, quod est contra naturam non potest esse perpetuum: sed hujusmodi deformitates sunt quaedam naturae vitia; ergo in perpetuum non remanebunt, et ita non erunt in corporibus damnatorum.

Respondeo. Dicendum, quod duplex est deformitas. Quaedam quae provenit ex defectu membri; et haec in corporibus damnatorum non erit ut omnes dicunt. Alia est quae provenit ex indebita proportione partium: sicut lepra, eruris curvitas et hujusmodi: de quibus Augustinus relinquit sub dubio. Unde quidam dicunt, quod hujusmodi deformitates erunt in corporibus damnatorum. Alii quod non erunt: quod videtur probabilius, quia in resurrectione auctor naturae in omnibus naturam reparabit: unde omnia hujusmodi quae sunt vitia naturae, tollentur.

Ad primum ergo dicendum, quod reparatio naturae in aliquo resurgente non respondet merito ejus, sed merito Christi.

Ad secundum dicendum, quod corpora damnatorum erunt quidem passibilia afflictionis, sed non corruptionis: quod erit propter statum naturae, in quo, cessante motu primi mobilis, omnis alia mutatio cessabit: hujusmodi autem deformitates sunt corruptione quaedam.

Ad tertium dicendum, quod corpora damnatorum non erunt spiritualia, sed animalia, quia non

immutabuntur, ut patet 1 Corinth. 15. Non tamen eibus egebunt aut potibus, quia non erit status aliquid generandi vel corrumpendi.

Si vero quaeritur de corporibus etc. (V. edit. nostrae tom. VII, pag. 1071.)

QUAESTIO II.

Hic quaeruntur quatuor: 1.^o utrum anima possit remanere a corpore separata; 2.^o utrum omnes potentias secum trahat; 3.^o utrum possit ab igne corporeo pati; 4.^o utrum eodem igne damnatorum corpora puniantur.

ARTICULUS I.

Ad primum sic proceditur. Et 1. videtur, quod anima non possit remanere post corpus. Nulla enim substantia potest remanere sine propria operatione: sed nulla propria operatio animae potest remanere sine corpore, quia etiam intelligere corrumpitur quodam interius corrupto, secundum Philosophum in primo de Anima; ergo anima non potest remanere a corpore separata.

2. Praeterea, ea quorum est unum esse, simul incipiunt et deficiunt: sed animae et corporis est unum esse, quia anima dat esse corpori, sicut forma materiae; ergo simul cum corpore anima deficit.

3. Praeterea, anima est forma secundum suam essentiam, alias accidentaliter corpori uniretur: sed forma sine materia esse non potest; ergo essentia animae desinit esse cum morte corporis.

Sed contra est, quod Philosophus dicit in 2 de Anima, quod reliquum genus animae, scilicet anima rationalis, separatur, sicut perpetuum a corruptibili.

Praeterea, subjectum rei incorruptibilis est incorruptibile: sed anima est subjectum veritatis, quae est incorruptibilis; ergo ipsa est incorruptibilis.

Respondeo. Dicendum, quod necesse est ponere animam rationalem incorruptibilem esse. Sicut enim quod non est, non potest agere; ita quod per se non habet esse, non potest per se habere operationem. Anima autem rationalis habet quandam operationem quam exerceat non mediante aliquo organo corporali, scilicet intelligere, ut Philosophus probat in 5 de Anima. Si enim per organum corporale anima intelligeret, non posset omnes formas sensibiles intelligere, quia illud organum haberet aliquam formam quae impediret omnium formarum intellectum, sicut oportet quod pupilla careat omni colore ad hoc quod per eam omnis color possit cognosci. Unde patet quod anima rationalis habet esse per subsistens; et ideo non corrumpitur per accidens corrupto corpore, sicut aliae formae; neque per se, quia non habet contrarium, nec est ex contrariis composita. Unde relinquitur quod sit omnino incorruptibilis.

Ad primum ergo dicendum, quod intelligere, quod fit per abstractionem a phantasmate, indiget corpore tamquam continente suum objectum, quod est phantasma; non tamen sicut medio actionis. Unde hoc intelligere corrumpitur, corpore corrupto: sed anima separata intelliget alio modo.

Ad secundum dicendum, quod anima et corpus uniuntur in uno esse, quod est principaliter ipsius animae ab ea corpori communicatum, et sic destructo corpore in anima remanet.

Ad tertium dicendum, quod anima separata licet non sit forma in actu, quia non actu unitur, habet tamen actu id secundum quod est forma, scilicet suam essentiam.

ARTICULUS II.

Ad secundum sic proceditur. Et 1. videtur, quod in anima separata remaneant potentiae sensitivae. Sicut enim membra sunt partes corporis, ita potentiae sunt partes quaedam animae: sed corpora brutorum habent omnia membra; ergo et animae beatae sine corpore existentes habent omnes potentias.

2. Praeterea, in libro de Spiritu et anima dicitur: « Recedit anima a corpore, secum trahens sensum cum imaginatione: » haec autem sunt potentiae sensitivae; ergo huiusmodi potentiae manent in anima separata.

3. Praeterea, actus sine potentia esse non potest: sed actus potentiarum sensitivarum manet in anima separata: dicitur enim in libro de Spiritu et anima, quod anima recedens a corpore imaginatione irascibilitate et concupiscibilitate afficitur, secundum merita, ad delectationem et dolorem; ergo potentiae sensitivae manent in anima separata.

Sed contra est, quod dicitur 2 de Anima, quod solus intellectus separatur, reliquae autem partes non sunt separabiles.

Praeterea, in potentiis sensitivis homo convenit cum brutis: sed brutorum potentiae non separantur; ergo nec potentiae sensitivae hominis.

Respondeo. Dicendum, quod circa hoc est triplex opinio. Quidam enim dicunt, quod potentiae sensitivae remanent in anima separata etiam cum actibus suis, non tamen illis, quos exercent per corpus, sed cum illis quos per se habent. Sed hoc non potest esse: quia si potentiae sensibiles habent aliquas operationes sine communicatione corporis, animae brutorum essent per se subsistentes et incorruptibiles, ut de anima rationali dictum est. Et ideo alii dicunt quod remanent potentiae, sed non actus. Sed hoc etiam esse non potest, quia ejusdem est potentia et actus, secundum Philosophum: unde sicut actus est conjuncti, ita et potentia. Et propter hoc secundum alios, dicendum, quod potentiae sensitivae in anima separata non manent actualiter, sed radicaliter, quia ipsa essentia animae est radix omnium potentiarum.

Ad primum ergo dicendum, quod omnes partes potentiales quodammodo consistunt in una principali quae habet potestatem completam: non autem omnes partes integrales consistunt in una; et ideo non est simile de potentiis animae quae sunt partes potentiales et membris corporis quae sunt partes integrales.

Ad secundum dicendum, quod verbum illud intelligendum est quod anima trahit secum quasdam potentias actualiter, quasdam radicaliter.

Ad tertium dicendum, quod liber ille non est authenticus nec oportet auctoritatem ejus suscipere. Tamen potest dici quod anima separata afficitur ad delectationem vel dolorem recogitando actus praedictarum virium quos gessit in corpore, non quod eos exerceat.

ARTICULUS III.

Ad tertium sic proceditur. Et 1. videtur, quod animae non patiantur ab igne corporeo. Dicit enim

Damascenus in libro quarto: « Tradetur diabolus et daemones ejus et peccatores in ignem aeternum, non materialem, qualis est qui apud nos est, sed qualem utique novit Deus: » ignis autem corporeus est materialis; ergo ille ignis non est corporeus.

2. Praeterea, Augustinus super Genes. ad litteram lib. 12 dicit: « Non sunt corporalia, sed corporalibus similia quibus animae corporibus exutae afficiuntur, seu bene vel male; » ergo anima separata igne corporeo non punitur.

3. Praeterea, agens et patiens conveniunt in materia, secundum Boetium in libro de duabus Naturis: sed anima et ignis corporeus non communicant in materia; ergo anima separata, ab igne corporeo non patitur.

Sed contra. Eodem igne damnati puniuntur post resurrectionem, et daemones: sed damnati post resurrectionem puniuntur igne corporeo; ergo et daemones igne corporeo puniuntur.

Praeterea, per quae qui peccat quis per haec debet torqueri, ut dicitur Sap. 11. Sed peccatores peccaverunt nimis amando corporalia; ergo per corporalia debent puniri: et ita animae separatae igne corporeo punientur.

Respondeo. Dicendum, quod circa punitiones animae fuit multiplex opinio. Quidam enim dixerunt, ut Origenes, omnia quae de poenis corporalibus damnatorum dicuntur, secundum metaphoram debere intelligi, ut per eas spiritualis afflictio designetur. Sed secundum hoc, non esset ibi nisi poena damni, quae respondet aversioni; non poena sensus, quae respondet conversioni. Nam spiritualis dolor erit de carentia beatitudinis. Et ideo alii dixerunt, quod intelliguntur non secundum corporalem actionem, sed secundum imaginariam visionem sicut accidit in somnis. Sed hoc esse non potest, cum visio imaginaria sit actus potentiae sensitivae, qui in anima separata non erit, quamvis hoc Augustinus dicat inquirendo magis quam sentiando. Et ideo dicendum, quod igne corporeo animae damnatorum separatae puniuntur, et spiritus daemonum. Potest autem ignis animas affligere, non virtute naturae, sed ut est instrumentum divinae justitiae. Affligit autem non alterando sicut agit in corpora, sed detinendo. Uniri autem potest aliquo modo spiritus corpori ut motor: sed quod corpori cui unitur spiritus quodammodo alligetur, hoc habet ignis divina virtute, ut est instrumentum ejus justitiae.

Ad primum ergo dicendum, quod Damascenus loquitur quantum ad proximum afflictivum animae: ignis enim exterius ligans non affligeret nisi apprehenderetur ut nocivus: ignis autem apprehensus non est materialis. Vel dicitur non esse materialis, quantum ad modum agendi.

Ad secundum dicendum, quod Augustinus loquitur inquirendo.

Ad tertium dicendum, quod objectio illa procedit de actione naturali, quae est per modum alterationis.

ARTICULUS IV.

Ad quartum sic proceditur. Et 1. videtur, quod corpora damnatorum ab igne non patiantur. Corpora enim damnatorum erunt passibilia: sed omne hujusmodi corpus, natum est ab igne consumi; si

ergo corpora damnatorum igne eruciantur, quandoque totaliter consumerentur.

2. Praeterea, ignis agit in corpora, ea sibi assimilando: hoc autem non potest fieri, nisi per excessum caloris et siccitatis, qui harmoniam corporis solvens mortem inducit. Ergo si corpora damnatorum igne eruciantur, quandoque per hoc mortem incurrunt.

3. Praeterea, immensitas doloris animam a corpore separat: sed ignis inferni est maxime afflictivus; si ergo eo damnatorum corpora eruciantur, ex hoc mortem incurrunt, et non erit poena perpetua; quod est contra fidem; ergo corpora damnatorum igne non eruciabuntur.

Sed contra est quod Augustinus dicit in lib. 21 de Civit. Dei: « Gehenna illa, corporeus ignis erit, et cruciabit corpora damnatorum. »

Praeterea, major est affinitas corporis ad ignem corporeum, quam animae: sed animae puniuntur igne corporeo, ut dictum est; ergo multo magis corpora damnatorum.

Respondeo. Dicendum, quod corpora damnatorum igne corporeo cruciabuntur post resurrectionem, non tamen consumerentur per ignem. Cujus ratio est, quia corpus sensibile agere potest dupliciter. Uno modo, transmutando naturam, sicut agit ignis in aerem. Alio modo, inferendo suam speciem sine transmutatione naturae, sicut color agit in aerem et in pupillam. Quia vero cessante motu primi mobilis, nulla poterit transmutatio esse naturae, ignis non aget in corpora damnatorum transmutando naturam, sed solum speciem sensibilem ingerendo; et ideo affliget quidem, sed non corrumpet. Et per hoc patet solutio ad objecta.

DISTINCTIO XLV.

Praeterea sciendum est, quod omnes animae etc. (V. edit. nostrae tom. VII, pag. 1111.)

QUAESTIO UNICA.

Hic quaeruntur quatuor: 1.º de receptaculis animarum; 2.º utrum suffragia Ecclesiae prosint defunctis; 3.º utrum prosint existentibus in inferno; 4.º utrum suffragia Sanctorum in patria existentium, prosint vivis.

ARTICULUS I.

Ad primum sic proceditur. Et 1. videtur, quod inconvenienter animabus receptacula assignentur. Major enim est gloria vel damnatio animarum, quam corporum: sed omnia corpora simul praemiabuntur vel damnabuntur ad majorem cumulum poenae vel gloriae; ergo etiam et omnes animae: et ita ante resurrectionem corporum ad receptacula poenarum vel praemiorum non perveniunt.

2. Praeterea, illud quod indifferenter se habet ad diversa loca, non habet determinatum receptaculum: sed Sancti qui agnum sequuntur quocumque ierit, ad diversa loca pergere possunt, ut de Apostolis et martyribus Hieronymus dicit; quod etiam videtur de damnatis exemplo daemonum; ergo non debent animabus certa receptacula assignari.

3. Praeterea, locus praemii est unus, scilicet caelum; ergo pari ratione locus poenarum debet esse unus tantum.

Sed contra. Videtur quod sint plura receptacula quam assignentur. Receptacula enim distinguuntur secundum diversitates meritorum: sed haec sunt infinitae; ergo nec receptacula animarum sub certo numero comprehendi possunt.

Praeterea, animae quandoque puniuntur in locis in quibus peccaverunt, ut patet per Gregorium in 4 Dialogo: sed non sunt determinata loca in quibus peccaverunt; ergo nec in quibus punientur.

Respondeo. Dicendum, quod animabus secundum congruentiam meritorum assignantur quaedam receptacula, licet non pro necessitate naturae. Quae quidem receptacula, aut sunt loca praemiorum, et sic est paradisus; aut poenarum aeternarum, vel temporalium. Si aeternarum, aut pro peccatis commissis, et sic est infernus; aut pro peccato contracto, et sic est limbus puerorum. At si temporalium, aut pro peccatis commissis, et sic est purgatorium; aut pro peccato contracto, et sic est limbus patrum qui pro solo originali detinebantur, nondum facta redemptione humana.

Ad primum ergo dicendum, quod animae statim post mortem ad loca tendent suis meritis debita. Sicut enim corpora inclinatur ponderibus in propria loca, ita animae meritis in propria receptacula. Nec est simile de corporibus et animabus; quia essentialis gloria vel miseria principaliter consistit in anima, non autem in corpore.

Ad secundum dicendum, quod tam animae Sanctorum quam damnatorum non possunt egredi a suis receptaculis, quantum ad debitum ibi essendi, quod manet ubicumque sint. Possunt tamen inde egredi ut actu alibi sint. Sed haec, animae Sanctorum habent cum volunt; animae damnatorum cum permittuntur.

Ad tertium dicendum, quod sicut meritum uno modo contingit sed ab eo multipliciter deviat, ut Philosophus dicit de virtute in 2 Ethic., ita convenienter unus est locus praemii, sed multiplex locus poenarum.

Ad quartum dicendum, quod receptacula distinguuntur secundum generales diversitates meritorum et demeritorum, non autem secundum quascumque.

Ad quintum dicendum, quod animae non puniuntur in locis ubi peccaverunt, quasi in proprio loco poenarum, sed ad nostram instructionem.

ARTICULUS II.

Ad secundum sic proceditur. Et 1. videtur, quod suffragia vivorum non prosint defunctis. Quia, ut dicitur in Psal. 61, « Tu reddes unicuique juxta opera sua; » non ergo per opera vivorum defuncti juvantur.

2. Praeterea, juvari est quoddam proficere, quod tantum viatorum est: sed defuncti jam non sunt viatores; ergo suffragia Ecclesiae eis non proficiunt.

3. Praeterea, si aliqua suffragia defunctos juvant, praecipue hoc videtur quod debeant magis dignis prodesse: sed hoc non est verum, cum quandoque pro minus dignis magis fiant; ergo defuncti vivorum suffragiis non juvantur.

Sed contra est quod dicitur 2 Machabaeor. 12: « Sancta et salubris est cogitatio pro defunctis exorare, ut a peccatis solvantur. »

Praeterea, in sacramentis Ecclesiae nihil agitur frustra: sed in sacrificio Ecclesiae oratur pro de-

functis, secundum consuetudinem Ecclesiae generalis; ergo suffragia vivorum defunctis prosunt.

Respondeo. Dicendum, secundum Augustinum, quod sicut agricolae operantur ad fructuum productionem, ita et homines operantur ad aliorum salutem. Operatio autem agricolae circa plantas nihil valet, nisi praesupposita vitali virtute plantae, et ejus operatione, quam juvat agricola, vel impedimenta tollendo, vel aliqua convenientia ministrando. Unde nec homo circa alium potest operari ad salutem alterius efficaciter, nisi adsit interior gratia cum actione meritoria. Operatur autem vel subsidia ministrando quibus aliis proficiat, vel impedimenta tollendo. Et inde est, quod opera vivorum non possunt prodesse defunctis, ut eos in alio rem statum promoveant quam secundum merita propria eis debetur, neque ut in merito proficiant ad quod quidem potuerunt in hoc mundo juvari, quia non sunt in statu merendi; sed ad hoc solum ut impedimentum tollatur, scilicet reatus poenae temporalis, quo a Dei visione retardantur.

Ad primum ergo dicendum, quod gloria vel damnatio ultima solum secundum opera propria defunctis reddentur, sed impedimenta consequendae salutis tolluntur per opera aliorum, ut dictum est: quae tamen opera sunt eorum, in quantum pro eis sunt facta, et in quantum meruerunt ut eis post mortem possent prodesse, quippe qui conjuncti sunt vinculo charitatis his a quibus post mortem juvantur.

Ad secundum dicendum, quod mortui non sunt viatores quantum ad hoc quod possunt in merito proficere: unde quantum ad hoc non juvantur. Sunt tamen viatores quantum ad hoc, quod a gloria retardantur; et quantum ad hoc juvari possunt.

Ad tertium dicendum, quod suffragia vivorum prosunt defunctis, secundum quod vivorum opera defunctorum fiunt. Quod quidem contingit dupliciter. Uno modo, propter unionem charitatis: et sic prosunt ad gaudium omnibus in charitate existentibus, et magis eis qui sunt majoris charitatis. Alio modo, per intentionem facientis: et sic valent praecipue ad diminutionem poenae per modum ejusdem satisfactionis; et sic valent magis eis pro quibus fiunt, etiam si sint minus digni.

ARTICULUS III.

Ad tertium sic proceditur. Et 1. videtur, quod suffragia Ecclesiae prosint damnatis. Legitur enim 2 Machab. 12, quod Judas fecit offerri sacrificium pro mortuis, apud quos invenerat de donariis idolorum, quod erat lege prohibitum, et sic mortaliter peccaverant, et damnati erant; ergo suffragia Ecclesiae prosunt damnatis.

2. Praeterea, Gregorius Trajano Imperatori veniam impetravit, ut Damascenus dicit, qui tamen damnatus erat utpote idolatra et Ecclesiae persecutor; ergo suffragia Ecclesiae prosunt damnatis.

3. Praeterea, majus est juvare quam juvari: sed existentes in peccato mortali possunt alios juvare suffragiis, alias deciperentur defuncti qui per sacerdotes in peccato existentes fieri sibi suffragia procurant; ergo multo magis damnati in peccato mortali decedentes suffragiis possunt juvari.

Sed contra, in inferno nulla est redemptio, ut Ecclesia cantat: sed damnati sunt in inferno; ergo Ecclesiae suffragiis juvari non possunt.

Praeterea, Augustinus dicit in litera quod « frustra suffragia impenduntur his qui de corpore exierunt sine fide per dilectionem operante: » taliter autem exierunt omnes damnati; ergo suffragiis Ecclesiae non juvantur.

Respondeo. Dicendum, quod in hoc omnes consentiunt quod damnatis post diem iudicii poena per suffragia Ecclesiae nunc facta non minuetur, nec iterum infidelibus ante diem iudicii. Sed de fidelibus damnatis ante diem iudicii est diversa opinio. Quidam enim dixerunt, quod eis suffragia Ecclesiae valent ad diminutionem poenae; et tantum possent multiplicari suffragia, quod poena suspenderetur usque ad diem iudicii. Sed contra hoc est, quia aliquid remaneret inordinatum in universo, eum culpa non ordinetur nisi per poenam. Et ideo alii dixerunt quod suffragia Ecclesiae pro talibus facta semper diminuunt poenam, nunquam tamen auferunt totam; sicut linea in infinitum diminuitur, sed non consumitur. Sed contra hoc est, quia ratio nulla est quare sequentia suffragia minorem quantitatem poenae diminuunt quam prima. Si autem a linea finita semper aequalis quantitas auferretur, oporteret eam per divisionem consumi. Et ideo dixerunt alii quod suffragia juvant tales non diminuendo poenam sed confortando patientem ad levius ferendum, sicut si ferenti onus abstergeretur vultus a sudore, onere non diminuto. Sed contra hoc est, quia eandem poenam aliqui damnatorum levius et aliqui gravius ferunt pro diversitate culparum quae per suffragia non minuuntur. Et ideo alii dicunt, quod tantum ad hoc eis valent, quod non tristantur de suffragiis pro se non factis. Sed contra hoc est, quod animae defunctorum, et praecipue damnatorum; ea quae circa vivos aguntur ignorant, secundum Augustinum in lib. de Cura pro mortuis agenda. Et ideo dicendum est, quod damnati nullo modo suffragiis juvantur; et hoc ideo, quia sunt extra vinculum charitatis, quo membra Ecclesiae uniuntur, ut opera unius alium juvare possint.

Ad primum ergo dicendum, quod illi non acceperunt donaria idolorum in eorum reverentiam, sed tamquam victores jure belli cum quadam avaritia veniali. Vel secundum quosdam, in ipso mortis periculo poenituerunt, secundum illud Psalm. 177: « Cum occideret eos, quaerebant eum. »

Ad secundum dicendum, quod de Trajano potest dici quod sit revocatus ad vitam et suscepta gratia veniam consecutus, cum et alii infideles resuscitati legantur. Non enim longitudo temporis praejudicat divinae potentiae. Vel dicendum, secundum quosdam, quod poena fuit suspensa usque ad diem iudicii: nec tamen hoc est ad consequentiam pertrahendum, quia privilegia paucorum non faciunt legem communem.

Ad tertium dicendum, quod suffragia per malos facta, in quantum agunt in propria persona, non valent: possunt tamen valere in quantum agunt in persona aliena vel totius Ecclesiae, sicut est de clericis, vel ejus qui imperat suffragia fieri, sicut cum servus peccator justis domini mandatum exequitur eleemosynam faciendo. Sacrificia tamen Ecclesiae juvant ex ipso opere operato.

ARTICULUS IV.

Ad quartum sic proceditur. Et 1. videtur, quod orationibus Sanctorum non juvemur. Isaiae 65 dicitur:

« Abraham nescivit nos et Israel ignoravit nos: » ubi dicit Glossa Augustini: « Mortui etiam Sancti, nesciunt quid agant vivi et eorum filii; » ergo pro eorum necessitatibus non orant.

2. Praeterea, Deus nos magis diligit et clementior est quam aliquis Sanctorum: sed mediatores eliguntur per quos alterius dilectio excitetur, et sic oportet esse eos magis amantes et magis propitios; ergo non debemus Sanctos interpellare, ut eorum orationibus juvemur.

3. Praeterea, quicumque orando impetrat aliquid, quodammodo illud meretur: sed Sancti non sunt in statu merendi; ergo nos suis orationibus, aliquid impetrando, non juvant.

Sed contra est, quod habetur 2 Mach. ult. de Jeremia: « Hic est qui multum orat pro populo et pro universa sancta civitate, Jeremias propheta Domini. »

Praeterea, Sancti ex charitate dum vivunt et pro aliis orant et merito charitatis exaudiuntur: sed eorum charitas in patria perficitur; ergo ibi magis et efficacius pro nobis orant.

Respondeo. Dicendum, quod cujusdam haeretici, qui Vigilantius dicebatur, error fuit, quod Sancti post hanc vitam, nec nostras orationes cognoscunt, nec pro nobis orant. Quod Hieronymus reprobatur in quadam epistola sic dicens: « Si Apostoli et martyres adhuc in corpore constituti possunt orare pro aliis, quando pro se adhuc debent esse solliciti; quanto magis post coronas victorias et triumphos! » Unde dicendum est, quod ex hoc ipso, quod vident Verbum et in Verbo omnia quae eos decent, nostras orationes et necessitates cognoscunt, et urgente charitate, qua fervent, pro nobis orant et impetrant.

Ad primum ergo dicendum, quod Augustinus loquitur quantum ad naturalem cognitionem animae separatae: sed non quantum ad cognitionem gloriae, ut dictum est, et ut Gregorius dicit 12 lib. Moral. super illud Job 14: « Sive nobiles fuerint filii ejus, sive ignobiles. »

Ad secundum dicendum, quod non est propter defectum divinae charitatis quod Sanctos interpellamus ad orandum; sed divinae sapientiae hoc ordo exigit, ut alii per alios juventur.

Ad tertium dicendum, quod licet Sancti nunc non mereantur in patria, meruerunt tamen in hac vita, ut eorum orationes exaudirentur.

DISTINCTIO XLVI.

Sed quaeritur hic de valde malis etc. (V. edit. nostrae tom. VII, pag. 1155.)

QUAESTIO UNICA.

Hic quaeruntur quatuor: 1.º utrum in Deo sit justitia; 2.º utrum in eo sit misericordia; 3.º utrum omnia opera Dei sint cum misericordia et justitia; 4.º utrum divina justitia et misericordia patiatur poenas damnatorum esse perpetuas.

ARTICULUS I.

Ad primum sic proceditur. Et 1. videtur, quod justitia Deo non sit attribuenda. Justitiae enim actus est reddere debitum: sed Deus nulli aliquid debet; ergo justitia non competit Deo.

2. Praeterea, justitia in quadam aequalitate consistit, unde domini ad servum non est justitia, secundum Philosophum in 5 Ethicorum: sed nihil est Deo aequale, cum ipse sit dominus omnium; ergo justitia Deo non debet attribui.

3. Praeterea, justitia est una de quatuor virtutibus cardinalibus contra temperantiam divisa: sed temperantia Deo non attribuitur; ergo nec justitia ei debet attribui.

Sed contra. Ad perfectum judicium requiritur justitia in judicante: sed Deus judex est omnium; ergo oportet ponere in eo esse justitiam.

Praeterea, omne quod est optimum Deo est attribuendum, secundum Anselmum: sed justitia est optima virtutum, ut Tullius probat in libro de Officiis; ergo justitia Deo debet attribui.

Respondeo. Dicendum, quod hoc interest inter justitiam et bonitatem, quod bonitas effectum absolute respicit, justitia vero cum ordine ad aliquid praesuppositum, cui actus secundum quamdam decentiam adaequatur. Hoc autem semper in divino effectum invenitur: quia secundi effectus ejus congruunt primis, et primi congruunt dignitati facientis. Unde sicut dicitur Deus bonus, in quantum suam bonitatem communicat, ita dicitur justus, in quantum in suis effectibus ordinem servat, et unius ad alterum et omnium ad seipsum.

Ad primum ergo dicendum, quod Deus licet non sit debitor alteri, est tamen quodammodo debitor sibi ipsi, ut scilicet faciat quod eum decet: et ex hoc quodammodo aliis debitor dicitur consequenter. Ex hoc enim quod sibi ipsi est debitor, ut suam dispositionem servet, efficitur quodammodo nobis debitor ex promisso, et ex merito; quibus nisi congruentia redderet, suam dispositionem minime servaret: et pro tanto Dei justitia veritas dicitur in quantum implet quod ordinavit.

Ad secundum dicendum, quod ad justitiam requiritur aequalitas, non quantitatis semper, sed proportionis. Et licet inter dominum et servum non possit esse justitia secundum perfectam rationem, est tamen aliquis modus justitiae, quem Philosophus nominat dominatum justum.

Ad tertium dicendum, quod temperantia est circa passiones, quibus Deus caret; justitia vero circa actiones quibus non caret; unde non est simile.

ARTICULUS II.

Ad secundum sic proceditur. Et 1. videtur, quod in Deo non sit misericordia. Misericordia enim est quaedam passio quae in Deum non cadit; ergo in Deo non est aliqua misericordia.

2. Praeterea, summe beato nihil potest miseriae admisceri: sed Deus est summe beatus; cum ergo misericors sit quodammodo particeps alienae miseriae, videtur, quod nullo modo Deo misericordia conveniat.

3. Praeterea, misericordis est miseriam aliorum pro posse repellere: hoc autem Deus non facit: inducit enim aliquos in miseriam poenae et permittit aliquos incidere in miseriam culpae; ergo Deo misericordia non competit.

Sed contra est, quod in collecta dicitur: « Deus cui proprium est misereri semper, et parcere. »

Praeterea, in Psalm. 144 dicitur: « Miserator et misericors Dominus. »

Respondeo. Dicendum, quod sicut justitia supra *S. Th. Opera omnia. V. 22.*

bonitatem addit ordinem quendam, ita et misericordia; sed differenter. Nam justitia addit ordinem ejusdem aequalitatis et congruentiae; misericordia vero addit ordinem contrarietatis vel diminutionis. Et quia Deus congruenter ordinatur circa bona et mala, non autem dimittit nec repellit nisi mala, inde est quod justitia importat ordinem et ad bona, et ad mala: Deus enim juste praemiatur bona et punit mala: sed misericordia habet ordinem tantum ad mala, quae Deus vel totaliter tollit vel dimittit.

Ad primum ergo dicendum, quod sicut ira non dicitur in Deo secundum passionem, sed secundum similitudinem effectus, in quantum scilicet, Deus punit, ita misericordia in Deo non ponitur secundum passionem, sed secundum similem effectum; quia scilicet, Deus ad modum misericordis operatur, repellendo miseriam alienam.

Ad secundum dicendum, quod misericors non dicitur esse particeps alienae miseriae secundum rem, sed secundum aestimationem; quia scilicet aestimat alienam miseriam repellendam, ac si esset sua.

Ad tertium dicendum, quod misericors non repellit alienam miseriam quantumcumque potest secundum potentiam absolutam, sed quantum ratio recta permittit; et sic etiam Deus facit, secundum quod exigit ordo suae sapientiae.

ARTICULUS III.

Ad tertium sic proceditur. Et 1. videtur, quod non in omni opere Dei sint misericordia et veritas. Opus enim creationis est opus Dei: in quo tamen, nec misericordia, nec justitia apparet, cum justitia praesupponat debitum, misericordia miseriam, creatio vero nihil; ergo non est verum, quod in omni opere Dei sint misericordia et veritas.

2. Praeterea, Apoc. 18 dicitur: « Quantum glorificavit se et in deliciis fuit, tantum date ei tormentum et luctum; » ergo quantitas poenae aequatur quantitati culpae, et sic non est ibi aliqua misericordia.

3. Praeterea, justificatio impii quoddam Dei opus est: sed ibi nulla videtur servari justitia, sed sola misericordia. Dicitur enim Tit. 5: « Non ex operibus justitiae quae fecimus nos, sed secundum suam misericordiam salvos nos fecit; » ergo non semper in opere Dei conjungitur justitiae misericordiae.

Sed contra est, quod in Psalm. 14 dicitur: « Universae viae Domini misericordia et veritas. »

Praeterea, opus proportionatur agenti, cum ex forma agentis speciem trahat: sed in Deo semper justitia misericordiae conjungitur; ergo in opere ejus semper utrumque invenitur.

Respondeo. Dicendum, quod de operibus Dei dupliciter loqui possumus. Uno modo secundum proprietatem, alio modo secundum appropriationem. Proprie itaque loquendo, omne opus Dei justitiam et misericordiam habet. Justitiam quidem, in quantum est cum ordine decenti. Misericordiam vero, in quantum per eam malum evacuatur, vel in toto, vel in parte, et ultra dignitatem patientis. Ceterum secundum approbationem aliquod opus appropriatur justitiae et aliquod misericordiae. Misericordiae quidem in quo misericordia suum effectum principaliter sortitur; sicut patet in opere justificationis, quo repellitur glorificationis culpa et quo totaliter ex-

cluditur miseria. Justitiae vero in quo misericordia non totaliter effectum suum consequitur, sicut in opere punitionis, in quo non totaliter malum excluditur, sed infertur poena pro merito culpae, quamvis minor quam exigeret culpa.

Ad primum ergo dicendum, quod in opere creationis etiam aliquo modo justitia et misericordia salvantur. Licet enim creatio non praesupponat aliquam creaturam cui sit aliquid debitum, praesupponit tamen creatorem, cuius voluntati debetur ut creationis opus impleatur. Quamvis etiam non praesupponit miseriam quae in creatione tollatur vel minuatur, praesupponit tamen non esse creaturam, quod per creationem aufertur; qui est defectus omnem miseriam excedens.

Ad secundum dicendum, quod etiam in punitione damnatorum salvatur justitia, in hoc quod poena pro peccatis infertur; et misericordia in hoc, quod citra condignum puniuntur. Auctoritas autem illa non demonstrat aequalitatem quantitatis poenae ad culpam; ut scilicet tantum puniatur peccator, quantum est dignus. Est autem aequalitas proportionis, quia scilicet majori peccato major poena infertur, omnibus tamen citra condignum.

Ad tertium dicendum, quod etiam in opere justificationis est misericordia, in quantum gratis peccata condonantur, et justitia, in quantum ibi aliqua poena existit saltem contritionis, et in quantum servatur decentia divinae bonitatis. Unde dicit Anselmus: « Cum parcis peccatoribus, justum est. Decet enim etc. »

ARTICULUS IV.

Ad quartum sic proceditur. Et 1. videtur, quod peccatoribus non inferatur poena aeterna. Non enim est justum, ut poena culpam excedat: sed culpa fuit temporalis; ergo poena non erit aeterna.

2. Praeterea, justus et misericordis iudicis est, ut poenam non inferat nisi propter emendationem. Non enim delectatur in poenis: sed poena aeterna non potest esse ad emendationem; ergo cum Deus sit huiusmodi iudex, videtur quod poenam aeternam peccatoribus non inferat.

3. Praeterea, Matth. 5 dicitur: « Beati misericordes, quoniam ipsi misericordiam consequentur: » sed multi misericordiae operibus intenti pro peccatis aliis damnabuntur; ergo ipsi saltem misericordiam consequentur, et eorum poena non erit aeterna.

Sed contra est, quod dicitur Isaiae ult.: « Ignis eorum non extinguetur et vermis non morietur, » et loquitur de poenis damnatorum; ergo poena damnatorum erit perpetua.

Praeterea, sicut gloria debetur merito, ita poena culpae: sed Sancti pro meritis gloriam aeternam consequentur; ergo etiam iniusti pro peccatis poenam aeternam.

Respondeo. Dicendum, quod circa hoc fuit multipliciter erratum. Origenes enim posuit omnium poenam, etiam daemonum, quandoque per misericordiam Dei terminandam. Quidam vero non daemonum, sed omnium hominum, pro quibus Sancti orabunt, secundum eos. Alii vero nec omnium hominum, sed fidelium tantum, qui sacramentis fidei imbuti, in Catholica fide, usque ad finem perseveraverunt. Alii vero non omnium fidelium, sed eo-

rum tantum, qui circa misericordiae opera praeoccupantur. Quae omnes opiniones erroneae sunt. Primo, quia repugnant auctoritati Scripturae, quae supplicium daemonum et hominum damnatorum dicit esse aeternum, et fornicarios, avaros et alios huiusmodi in perpetuum excludit a regno, quae est maxima poenarum. Secundo, quia pari ratione beatitudo Sanctorum quandoque finiretur, et sic vera beatitudo non esset. Unde dicendum est omnes damnatos aeterna poena puniendos.

Ad primum ergo dicendum, quod nulla justitia exigit, quod poena aequetur culpae duratione, cum pro momentaneo peccato aliquis humano iudicio diu flagelletur, quandoque vero in perpetuum a civitate excluditur, vel exilio vel morte damnatur propter hoc quod contra bonum civitatis peccavit; essetque poena ista simpliciter aeterna, si iudex est reus essent aeterni. Similiter quando aliquis peccat contra charitatem, qua est unio civitatis Dei, in perpetuum ab ea excluditur morte aeterna damnatus. Et haec est ratio Augustini 21 de Civitate Dei. Est et alia ratio quam Augustinus ibidem ponit, quia peccavit contemnendo vitam aeternam: unde factus est dignus poena aeterna. Tertia est, quam ponit Gregorius, quia peccavit in suo aeterno, quod etsi non est actu, est tamen in ejus voluntate: voluisset enim semper vivere, ut semper peccaret. Quarta ratio est, quia culpa fuit infinita quodammodo, in quantum fuit contra Deum qui est infinitus. Quinta ratio est, quia culpa manet in aeternum, quam oportet ordinari per poenam.

Ad secundum dicendum, quod poenae damnatorum ad aliquid erunt utiles, scilicet ad impletionem divinae justitiae et gaudii electorum, qui divinae justitiae congaudebunt.

Ad tertium dicendum, quod illi qui sibi non miserentur, non recte misericordes sunt, quantumcumque aliis misereantur. Consequuntur tamen misericordiam non liberantem, sed aliquid relaxantem aut etiam in hoc mundo, dum misericorditer ad poenitentiam adducuntur.

DISTINCTIO XLVII.

Solet etiam quaeri qualiter dabitur etc. (V. edit. nostrae tom. VII, pag. 1150.)

QUAESTIO UNICA.

Hic quaeruntur quatuor: 1.º utrum generale iudicium sit futurum; 2.º utrum cum Christo aliqui sint iudicaturi; 3.º utrum omnes sint in illo iudicio iudicandi; 4.º de igne qui faciem iudicis praecedat.

ARTICULUS I.

Ad primum sic proceditur. Et 1. videtur, quod generale iudicium non sit futurum. Executio sententiae non praecedit iudicium: sed homines nunc a Deo praemiantur gloria aeterna et puniuntur poena aeterna, ad quae divinum iudicium ordinatur; ergo non erit finaliter iudicium generale.

2. Praeterea, in iudicio generali oportet de omnibus meritis et demeritis reddi rationem: sed hoc non potest fieri nisi prolixissimo tempore, ut videtur; ergo requiretur ad iudicium tempus longissimum si generale sit futurum.

5. Praeterea, in iudicio humano tempus iudicii praenunciatur: sed iudicium humanum exemplatur a divino; ergo si iudicium generale sit futurum, videtur quod tempus ejus non esset nobis occultum; quod patet esse falsum; non ergo generale iudicium est futurum.

Sed contra est, quod dicitur Matth. 25: « Cum venerit Filius hominis in majestate sua, et omnes Angeli ejus cum eo, congregabuntur ante eum omnes gentes. Et statuet oves a dextris, et haedos a sinistris. » Ubi et meritorum disceptatio subditur, et praemiorum et poenarum determinatio quae ad iudicium pertinent; ergo generale iudicium est futurum.

Praeterea, discretio bonorum a malis, sine iudicio fieri non debet: sed in futuro iudicio fiet generalis separatio bonorum a malis; ergo erit iudicium generale.

Respondeo. Dicendum, quod iudicium ad duo ordinatur: scilicet ad recompensationem meritorum et ad justitiae iudicii manifestationem; et propter haec duo generale iudicium est futurum. Primo quidem, quia etsi singulis singillatim reddantur poenae et praemia animarum, oportet tamen quod sicut simul omnes resurgent in corpore, ita omnes simul in corpore puniantur vel praemientur, quod per generale iudicium fieri oportet. Secundo, quia poenae vel praemia singulis singillatim illata, non sunt omnibus nota, nec etiam poenarum et praemiorum causae. Unde oportebit omnia merita et demerita, in omnium adduci notitiam, ut universalis iudicis justitia omnibus pateat evidenter.

Ad primum ergo dicendum, quod illius iudicii sententia erit de punitione vel de praemiatione hominum in anima et corpore, et de impletione societatis tam bonorum quam malorum, quae constat quod generale iudicium non praecedit.

Ad secundum dicendum, quod Augustinus relinquit sub dubio, utrum iudicium illud peragatur vocali disputatione meritorum et sententia de poenis et praemiis, aut mentali. Probabilius tamen aestimari potest tantum mentali. Quod si est, brevissimo tempore, vel etiam in momento iudicium illud complebitur, dum omnes recognoscant sua et aliena merita, et quid pro eis secundum Dei justitiam debeat, ut supra dictum est. Si vero totaliter ageretur, requiretur tempus prolixum.

Ad tertium dicendum, quod tempus iudicii debet esse incognitum, ut ad ipsum diligentius praeparemur; et etiam quia solum divinae potestati subiacet finis mundi, in quo erit generale iudicium, et ipse solus illius temporis notitiam habet.

ARTICULUS II.

Ad secundum sic proceditur. Et 1. videtur, quod homines cum Christo non iudicabunt. Non enim sunt minoris dignitatis Angeli quam homines: sed de Angelis non dicitur quod debeant iudicare; ergo nec de hominibus hoc debet dici.

2. Praeterea, si homines aliqui iudicabunt, hoc praecipue pertinere videtur ad eligentes voluntariam paupertatem: quia scriptum est Job 36: « Iudicium pauperibus tribuet: » sed pauperes non iudicabunt: magis enim hoc conveniet ratione martyrii vel virginitatis quae sunt paupertate digniora; ergo nulli homines iudicabunt cum Christo.

5. Praeterea, in futuro omnis cessabit praelatio,

ut dicitur in Glossa Rom. 25: sed iudicium ad aliquam praelationem spectat et similiter executio iudicii; ergo nec homines iudicabunt cum Christo, nec daemones exequentur iudicis sententiam in damnatos.

Sed contra est, quod dicitur Isaiae 5: « Dominus ad iudicium veniet cum senioribus populi sui, per quos perfecti intelliguntur; » ergo perfecti cum Christo iudicabunt.

Praeterea, Matth. 19 dicit Dominus Apostolis: « Sedebitis super sedes duodecim, iudicantes duodecim tribus Israel. »

Respondeo. Dicendum, quod iudicare est multipliciter. Uno modo auctoritate: et sic tota Trinitas iudicabit. Specialiter vero Filius se hominibus visibilem praesentando in humana natura. Alio modo comparatione; et sic iudicabunt non solum boni, sed etiam mali, ex quorum comparatione alii damnabiles ostendentur. Tertio modo approbatione; et sic omnes Sancti iudicabunt sententiam iudicis approbando. Quarto modo quadam privilegiata auctoritate; et sic iudicabunt perfecti, Christi conversationem specialiter imitantes: quae quidem auctoritas in duobus consistit. Primo in quadam honorabili confessione, quia honorabiliorem locum ceteris obtinebunt Christo magis propinqui. Secundo, in quadam sententiae promulgatione, non quasi ex sua auctoritate, sed Christi. Quod fiet, dum cognitione divinae justitiae repleti, alios cognoscere facient quid eis ex merito suorum operum debeat. Quae duo notantur cum dicitur: « Sedebitis super sedes iudicantes. »

Ad primum ergo dicendum, quod Christo iudicium dabitur, quia Filius hominis est, ut patet Joan. 5. In forma enim hominis apparebit; et ideo oportet assessores iudicis non Angelos, sed homines esse qui corporaliter possint ab hominibus videri; Angeli tamen cum Christo venient ut habetur Matth. 25, quasi testes de actibus hominem quos custodierunt.

Ad secundum dicendum, quod paupertas maxime disponit hominem ad hoc, quod Christo adhaereat et ejus justitiam contempletur mundo totaliter spreto: unde et eis specialiter iudicaria potestas debetur, cum oporteat iudices divinam justitiam retinere in corde, ut eam aliis promulgent. Specialiter tamen illis pauperibus competit qui salutem caelestem hominibus nunciaverunt per Angelos significati, qui cum Christo venturi leguntur Matth. 25, ut Augustinus dicit in libro de Poenitentia. Tamen quod de pauperibus dicitur, etiam de perfectis aliis potest intelligi, eo quod paupertas est prima perfectionis pars.

Ad tertium dicendum, quod praelatio in futuro evacuetur post iudicium, non autem in iudicio. Nec intelligitur evacuari nisi quantum ad hunc aetum, qui est adducere in finem, vel abducere, omnibus iam in suo termino constitutis. Unde nihil prohibet homines per daemones post iudicium puniri. In litera tamen circa hoc duplex opinio ponitur.

ARTICULUS III.

Ad tertium sic proceditur. Et 1. videtur, quod in illo iudicio omnes debeant iudicari. Ad hoc enim aliqui iudicio astant ut iudicentur: sed omnes astabimus ante tribunal Christi, ut habetur Rom. 14; ergo omnes in illo iudicio iudicabuntur.

2. Praeterea, illud iudicium magis ad homines quam ad Angelos pertinet: sed in illo iudicio etiam Angeli iudicabuntur, ut patet 1 ad Corinth. 5: « Ne scitis quoniam Angelos iudicabimus; » ergo multo magis omnes homines.

5. Praeterea, si aliqui homines a iudicio excluduntur, hoc videtur praecipue de omnibus bonis; quia dicitur Joan. 5: « Qui credit in eum non iudicatur. » Aliqui tamen boni iudicabuntur, quibus dicitur: « Esurivi et dedistis mihi manducare; » ergo omnes homines iudicabuntur.

Sed contra. Non est ejusdem iudicari et iudicare: sed aliqui in illo iudicio iudicabunt cum Christo; ergo non omnes iudicabuntur.

Praeterea, in Psalm. 1 dicitur: « Non resurgent impii in iudicio, » Glossa « ut iudicentur. »

Respondeo. Dicendum, quod duo sunt de ratione iudicii: scilicet distributio praemiorum et poenarum, et ad hoc omnes iudicabuntur, quia unicuique reddetur secundum opera sua. Requiritur iterum discussio meritorum: et quantum ad hoc aliqui non iudicabuntur, triplici ratione. Primo, quia opera non habent propria de quibus erit iudicium, sicut patet de pueris decedentibus ante perfectum usum liberi arbitrii, qui tamen in iudicio comparebunt, ut recipiant poenam pro peccato originali vel praemium pro sacramento Christi. Secundo, quia eorum bonis meritis nulla mala notabilis quantitatis adjunguntur, sicut illis qui aedificant aurum, argentum et lapides pretiosos terrenis contemptis, solis caelestibus inhiantes, sicut a rege terreno praemiantur absque aliqua discussione filii et amici charissimi. Tertio quia non habent permissionem alicujus boni, sicut infideles qui carent fidei fundamento, quomodo hostes a rege terreno absque audientia puniuntur.

Ad primum ergo dicendum, quod ad hoc astabunt, ut referat unusquisque propria quae in corpore gessit, ut dicitur ad Cor. 5.

Ad secundum dicendum, quod Angeli, neque boni, neque mali, iudicabuntur iudicio discussionis, sed per augmentum praemii accidentaliter vel poenae.

Ad tertium dicendum, quod loquitur auctoritas illa de iudicio condemnationis.

ARTICULUS IV.

Ad quartum sic proceditur. Et 1. videtur, quod ignis non praecedet faciem iudicis ad purgationem mundi. Purgatio enim fit ad auferendum immunditiam: sed creaturae Dei sunt mundae; ergo per ignem non purgabuntur.

2. Praeterea, purgatio ad innovationem ordinatur: sed omnes partes mundi innovabuntur, ut infra dicitur; ergo pari ratione vel omnes purgabuntur vel nullae: sed non omnes purgabuntur, quia nec seipsum ignis purgabit, neque superiores caelos, quia non ascendet nisi quantum aquae diluvii ascenderunt: nec etiam omnia elementa, quia duo ex ipsis totaliter absumentur, ut Beda dicit; ergo pari ratione nulla pars mundi purgabitur.

5. Praeterea, post resurrectionem corpora hominum erunt incorruptibilia, et sic non poterunt per incinerationem purgari: sed ignis illam resurrectionem sequetur, quia involvet reprobos et trahet in gehennam, ut dicit quaedam Glossa Dan. 7: et Augustinus dicit 20 de Civitate Dei, « Quod conflagratio mundi resurrectionem sequetur; » ergo ignis illa corpora hominum non purgabit quae ma-

xime purgatione indigent propter infectionem culpae; ergo pari ratione nec alias partes mundi.

Sed contra est, quod dicitur 1 ad Corinth. 7: « Praeterit figura huius mundi. » Glossa: « Pulchritudo huius mundi mundanorum ignium conflagratione peribit. »

Praeterea, 2 Pet. 3 dicitur: « Caeli qui nunc sunt et terra, repositi sunt igni reservari. »

Respondeo. Dicendum, quod cum omnia corporalia sint propter hominem facta, oportet ut de eis disponatur secundum quod congruit statui hominum. Homines autem antequam ad gloriam perveniant, oportet purgari ab omni infectione culpae, et defectu naturae, quae eum gloria esse non possunt. In corporalibus autem elementis, etsi non sit infectio culpae, relinquitur tamen in eis quaedam indecentia ad gloriam ex peccatis in eis commissis, quam oportet purgari, sicut videmus loca corporalia purgari antequam in eis sacra celebrentur. Est etiam in corporalibus elementis aliquis defectus naturae et impuritas, maxime circa medium locum, ex mutua actione elementorum; et ab his duobus oportebit elementa purgari per ignem, qui est maxime activus, et extranei permissionem non patiens. Primo vero mundus purgatus fuit per aquam contra vitium concupiscentiae; sed ignis competit contra torporem charitatis, qui erit in fine.

Ad primum ergo dicendum, quod creaturae Dei dicuntur non esse immundae, quia non habent alicujus malae naturae permissionem; est tamen in eis aliqua impuritas, ut dictum est.

Ad secundum dicendum, quod non oportet purgari nisi illas partes mundi in quibus homines peccaverunt; et hoc est circa medium locum in quo etiam mixtionem elementorum fiunt. Unde superiores caeli non purgabuntur, nec sphaera ignis, sed solum ignis qui est hic. Non etiam paradus terrestris; quia, etsi peccatum in eo fuit commissum, non tamen in eo fuit habitatio peccatoris, sed statim homo inde fuit expulsus post peccatum. Nec etiam infernus: illuc enim omnes elementorum impuritates congregabuntur. Neque aliqua elementa quae secundum substantiam auferenda sint, vel secundum formas substantiales, aut secundum qualitates naturales, ut quidam dicunt; quia sic mundus remaneret imperfectus; sed solum quantum ad mutuas actiones, et varios motus. Unde praecipue duo dicuntur consumi, scilicet ignis et aqua, in quibus dominantur qualitates activae; vel aer et aqua propter multiplices eorum motus.

Ad tertium dicendum, quod ignis ille, quantum ad sui principium, erit ante resurrectionem, et incinerabit corpora bonorum et malorum simul, cum purgabit faciem mundi. Sed bonorum absque dolore, malorum eum dolore, secundum peccati quantitatem, divina iustitia faciente. Sed quantum ad sui finem, sequetur resurrectionem, et involvet reprobos, et in infernum detruhet quicquid est in igne impurum, et in aliis elementis congregabitur, ut Basilius dicit. Causabitur autem ille ignis ex conflagratione omnium ignium mundanorum, ut dicit Augustinus; id est ex concursu omnium causarum inferiorum et superiorum, ex quibus potest ignis circa locum medium generari.

DISTINCTIO XLVIII.

Solet etiam quaeri in qua forma etc. (V. edit. nostrae tom. VII, pag. 1166.)

Hic est duplex quaestio. Prima, de forma iudicis. Secunda, de invocatione mundi.

QUAESTIO I.

Circa primum quaeruntur duo: 1.^o utrum Christus in forma hominis sit iudicaturus; 2.^o utrum omnes homines sint ejus deitatem visuri.

ARTICULUS I.

Ad primum sic proceditur. Et 1. videtur, quod Christus non iudicabit in forma servi. Quia ad iudicium auctoritas requiritur: sed auctoritas penes deitatem residet; ergo Christus non secundum formam hominis sed secundum formam Dei iudicabit.

2. Praeterea, forma iudicis ab omnibus iudicandis debet videri, qui tantum locum occupabunt, a quo non poterit ita parvum corpus videri; ergo Christus non iudicabit secundum formam humanam.

5. Praeterea, si in forma humana Christus iudicabit, praecipue videretur quod hoc esset secundum formam corporis gloriosi: sed secundum hanc non iudicabit, quia non poterunt omnes videre: corpus enim gloriosum a non glorioso videri non potest; ergo secundum formam humanam Christus non iudicabit.

Sed contra est, quod dicitur Joan. 5: «Potestatem dedit ei iudicium facere, quia filius hominis est.»

Praeterea, Christi exaltatio est praemium ejus humiliationis, ut patet Philipp. 2: sed Christus humiliatus est secundum naturam humanam usque ad hoc, quod injuste a Pilato iudicaretur; ergo secundum humanam naturam exaltabitur usque ad iudiciariam potestatem.

Respondeo. Dicendum, quod sicut praedictum est, illud iudicium generale ad hoc erit, ut omnes simul corpora resurientes vel consequantur gloriam corporum, vel poenam. Ipsa autem resumptio corporum causatur ex mysteriis peractis in humanitate Christi, ut supra dictum est. Unde recte illud generale iudicium secundum humanam naturam attribuitur Christo. Et iterum, quia per Christum hominem documenta salutis et gratiae auxilia recepimus, conveniens est ut per eum in gloriam perducamur iudicantem secundum humanam naturam. Ipsa etiam humana natura ab omnibus communiter poterit videri: requirit enim manifestum iudicium, ut sit etiam iudex manifestus; et ideo convenienter Christo secundum humanam naturam iudicium attribuitur.

Ad primum ergo dicendum, quod Christo secundum divinam naturam convenit auctoritas Domini naturalis et aeterna, jure creationis; sed secundum humanam naturam convenit ei ex tempore, jure redemptionis.

Ad secundum dicendum, quod corpus Christi erit maxima claritate praefulgidum, et ideo nihil prohibet ipsum a longinquo videri.

Ad tertium dicendum, quod sicut supra dictum est, corpus gloriosum habet in sua potestate ut vi-

deatur vel non videatur ab oculo non glorioso; et sic nihil prohibet, quin in forma gloriosa Christus iudicet, et eam videant etiam reprobi.

ARTICULUS II.

Ad secundum sic proceditur. Et 1. videtur, quod divinitatem Christi omnes sint visuri in iudicio. Invidus enim tanto magis affligitur, quanto majorem gloriam videt ejus quem odit: sed impiis conceditur videre gloriam Christi in iudicio ad eorum afflictionem, ut patet Isai. 26: «Videant et confundantur zelantes populi et ignis hostes tuos devoret.» Cum ergo maxima gloria Christi sit ejus divinitas, videtur quod etiam impii divinitatem ejus sint visuri.

2. Praeterea, sicut conveniens est delectabile, ita quod est contrarium et repugnans est causa doloris. Sed impii egerunt contra Christi divinitatem eam odio habentes, secundum illud Psal. 75: «Superbia eorum qui te oderunt ascendit semper;» ergo ad cumulandum doloris eorum, fieri debet ut videant Christi divinitatem.

5. Praeterea, beati in patria gaudent de visione divinitatis et humanitatis Christi: sed impii humanitatem Christi videbunt sine gaudio, imo cum dolore; ergo et divinitatem ejus possent sine gaudio cum dolore videre.

Sed contra. Illud quod promittitur amicis in praemium, non debet hostibus exhiberi: sed manifestationem suae divinitatis Christus promittit amicis suis in praemium. Dicitur enim Joan. 14: «Qui diligunt me, diligentur a Patre meo, et ego diligam eum, et manifestabo ei meipsum;» ergo divinitatem Christi peccatores non videbunt.

Praeterea, ad visionem Dei, cordis munditia requiritur, ut patet Matth. 5: «Beati mundo corde, quoniam ipsi Deum videbunt;» hanc autem peccatores non habent; ergo divinitatem Christi videre non poterunt.

Respondeo. Dicendum, quod divinitas Christi potest videri dupliciter. Uno modo, per expressa indicia: et sic impii divinitatem Christi videbunt cognoscentes eum esse verum hominem et verum Deum. Alio modo, per essentiam: et sic videri non potest nisi ab intellectu lumine gloriae illustrato, quia lumen naturae est deficiens ad tantam cognitionem. Unde in Psalm. 53 dicitur: «In lumine tuo videbimus lumen.» Cum igitur animae peccatorum non sint habiturae gloriae claritatem, non poterunt divinitatem Christi in sua essentia videre.

Ad primum ergo dicendum, quod cognitio divinitatis Christi per expressa indicia sufficiet peccatoribus ad invidiae tormentum.

Ad secundum dicendum, quod Deus ratione essentiae suae non potest ab aliquo odio haberi, quia sua essentia est essentia bonitatis: nullus autem potest odire bonum in quantum hujusmodi, licet aliquod bonum, prout aestinatur malum, possit odio haberi. Et ideo nullus posset videre essentiam divinam quin eam diligeret, et in ea delectaretur. Dicitur tamen Deus odio ab aliquibus haberi, ratione aliquorum effectuum, ut punitionis vel prohibitionis et hujusmodi. Unde impii per effectus divinitatem Christi cognoscentes, in ea non delectabuntur.

Ad tertium dicendum, quod humanitas Christi non est ipsa bonitas, sicut ejus divinitas; et ideo non est simile.

QUAESTIO II.

Deinde quaeritur de innovatione mundi; et circa hoc quaeruntur duo: 1.^o de novitatibus quae fient ante iudicium vel circa ipsum; 2.^o de novitate quae sequetur iudicium.

ARTICULUS I.

Ad primum sic proceditur. Et 1. videtur, quod nullis novitatibus iudicium futurum debeat praeveniri: quia ut dicitur 1 Thess. 5, • Dies Domini • sicut fur in nocte veniet: • hoc autem non esset, si aliquibus novis signis praeveniretur: ergo tales novitates adventum Domini non praecedent.

2. Praeterea, sol non eclipsatur nisi in conjunctione sui ad lunam; luna vero non eclipsatur nisi in oppositione. Sed non potest esse quod haec duo luminaria simul conjungantur et opponantur; ergo non possunt simul eclipsari circa diem iudicii, ut in litera dicitur.

3. Praeterea, mutatio et admiratio sunt contra rationem beatitudinis, quia admirationis causa est ignorantia: sed virtutes caelorum sunt Angeli beati; ergo moveri non poterunt, nec admirari de adventu Christi.

4. Praeterea, nubes fiunt ex inspissatione vaporum, qui tunc non erunt, motu caeli cessante; ergo esse non poterit, quod sancti in nubibus Christo obviam rapiantur.

5. Praeterea, vallis Josaphat non est tanta, quae omnium hominum multitudinem capere possit: sed omnes in iudicio comparebunt, ut prius supra dictum est; ergo iudicandi non congregabuntur in valle illa Josaphat.

In contrarium sunt auctoritates, quae ponuntur in litera.

Respondeo. Dicendum, quod Christus in primo adventu venit occultus, sed in secundo veniet manifestus. Unde, sicut primus adventus habuit quaedam signa praecedentia et concomitantia non omnibus nota, sed quibusdam, ut apparitiones et allocutiones Angelorum; ita secundum adventum praecedent quaedam manifesta signa, quae ab omnibus cognoscentur. Quae autem futura sint, non possumus scire pro certo; quia signa quae in evangelii leguntur, non cogimur referre ad futurum Christi adventum, ut Augustinus dicit in epistola ad Hesyrium.

Ad primum ergo dicendum, quod dies Domini malis superveniet sicut fur qui signa adventus parvipendit; sed boni erunt arescentes prae timore, ut in Evangelio legitur. Quamvis possit dici quod totum illud tempus quo signa manifesta apparebunt sub tempore iudicii comprehendatur.

Ad secundum dicendum, quod sol et luna in ipso Christi adventu obscurari dicuntur, non luminis subtractione, sed ex comparatione majoris claritatis praesentis, scilicet, Christi. Ante iudicium vero obscurari non poterunt, sed diversis temporibus, secundum naturam, vel eodem tempore divina virtute, quamvis hoc sit naturae impossibile.

Ad tertium dicendum, quod per virtutes caelorum possunt intelligi omnes Angeli, qui moveri dicuntur per admirationem divinae virtutis talia facientis, quae etsi cognoscunt, non tamen comprehendunt. Unde haec admirationis mutatio beatitudini non repugnat. Potest etiam per virtutes caelorum intelligi ordo Virtutum, qui moveri dicitur

propter effectum frequentiae signorum. Nam huiusmodi ordinis est signa facere secundum Gregorium, vel quia eorum est Deo servire in omnibus caelestibus, quia tunc cessabunt.

Ad quartum dicendum, quod nubes illae etsi non causentur virtute naturae, poterunt tamen causari divina virtute, ut sit conformitas ascensionis Sanctorum ad ascensionem Christi, quem nubes ab oculis discipulorum suscepit, ut dicitur Act. 1: quamvis quidam dicant, quod huiusmodi nubes nihil aliud erit, quam densitas radiorum ex corporibus gloriosis resplendentium.

Ad quintum dicendum, quod creditur Christus circa montem Oliveti descensurus ad iudicium unde ascendit: cui monti subjacet vallis Josaphat, ubi peccatores congregabuntur, vel etiam omnes iudicandi; et circa illum locum, quantum sufficiens erit, iusti autem saltem illi qui cum Christo iudicabunt, rapiuntur in nubibus obviam Christo in aera, ut patet 1 ad Thess. 4.

ARTICULUS II.

Ad secundum sic proceditur. Et 1. videtur, quod mundus post iudicium non innovetur. Novitas enim gloriae reddetur pro meritis: sed elementa mundi nihil meruerunt; ergo non innovabuntur.

2. Praeterea, motus caeli est ad perfectionem ipsorum caelestium corporum, quae divinam bonitatem per motum participant, ut dicitur in 2 Caeli et mundi, est etiam ad perfectionem inferiorum corporum quae sol circumiens illustrat ne alicubi sint perpetuae tenebrae: sed nulla perfectio debet mundo auferri; ergo mundus non innovabitur per cessationem motus caeli.

3. Praeterea, corpora caelestia per lucem sunt causa generationis: sed generatio cessabit; ergo corporibus caelestibus claritas non augebit.

4. Praeterea, elementa semper manebunt secundum suam substantiam et naturam: sed de natura quorundam elementorum est ut sint pervia, terrae vero ut sit opacum; ergo in innovatione mundi non conferetur claritas huiusmodi elementis.

5. Praeterea, sicut elementa sunt partes mundi, ita animalia, et plantae, et corpora mineralia; et tanto nobiliores quanto habent nobiliorem formam: sed elementa manebunt; ergo et praedieta.

Respondeo. Dicendum, quod beatitudo hominis consistit in fruitione Dei, ad quam non potest pervenire oculus carnis, sed solus oculus mentis: et ideo ut aequaliter oculus carnis Deum videre possit, ipsa corpora visibilia majori participatione divinae bonitatis perficiantur, ut sic in eis quodammodo oculus carnis Deum videre possit. Unde Augustinus dicit in fine de Civitate Dei: • Videbitur • Deus in caelo novo et terra nova, et omni corpore • quocumque fuerint spiritualis oculi corporis directi, et hoc innovatio mundi dicitur. •

Ad primum ergo dicendum, quod licet hanc novitatem elementa mundi non meruerunt, meruit tamen eam quodammodo homo qui in ea premiatur.

Ad secundum dicendum, quod huiusmodi motus caeli servit quantum ad statum generationis et corruptionis, quae tunc cessabunt: et sic motus non est de perfectione corporum caelestium, in quantum sunt causa generationis et corruptionis. Quamvis autem tunc sol non circumbeat sed in nobilissimo situ resideat, in nulla tamen parte erunt per-

petuae tenebrae, nisi in inferno, quia aliae partes mundi, etiam ex seipsis claritatem habebunt, et ex aliis caeli luminaribus.

Ad tertium dicendum, quod motus non pertinet ad perfectionem corporis caelestis ratione suiipsius, cum sit actus imperfecti, sed solum in quantum est causa generationis. Claritas autem pertinet ad decorem ipsius caeli secundum seipsum: unde claritas augebit, sed motus cessabit.

Ad quartum dicendum, quod sicut spiritus inferiores, scilicet hominum, assumuntur ad gloriam superiorum, scilicet Angelorum, ita corpora inferiora induentur claritate quae proprie competit superioribus corporibus. Nec hoc erit contra naturam, sed secundum naturam, divina virtute favente: erit enim, ut dicitur, terra in superficie exteriori clara sicut vitrum, aqua sicut chrySTALLUS, aer ut caelum, ignis ut luminaria caeli, vel etiam multo excellentius, quia decor naturae non adaequat decorem gloriae.

Ad quintum dicendum, quod in statu incorruptionis non debet manere nisi illud quod aliquo modo est incorruptibile. Homo autem est incorruptibilis secundum partem quae est anima; elementa autem secundum totum, licet non secundum partes; caelum secundum totum et partes; unde haec omnia manebunt. Sed alia corpora mista sunt corruptibilia omnibus modis: unde non manebunt sicut partes principales mundi, sed secundo ad aliarum ornatum vel ministerium ordinata.

DISTINCTIO XLIX.

Post resurrectionem vero etc. (V. edit. nostrae tom. VII, pag. 1180.)

QUAESTIO UNICA.

Hic quaeruntur quatuor: 1.º utrum intellectus creatus, Deum per essentiam possit videre; 2.º utrum in hac visione beatitudo principaliter consistat; 3.º utrum beatitudinem omnes appetant; 4.º utrum post resurrectionem sit major gloria Sanctorum quam ante.

ARTICULUS I.

Ad primum sic proceditur. Et 1. videtur, quod intellectus creatus Deum per essentiam videre non possit. Hominibus enim aequalitas Angelorum in praenium promittitur, ut patet Matth. 22: sed Angeli Deum per essentiam videre non possunt, quia ut Chrysostomus dicit, nec ipsae caelestes essentiae, ipsa dico Cherubin et Seraphin ipsum Deum, ut est, unquam videre poterunt; ergo nec homines Deum per essentiam videbunt.

2. Praeterea, omne quod videtur per essentiam, scitur quid est, quia essentia Dei est quidditas ejus: quod autem scitur quid est, comprehenditur, quia definitio indicans quid est res, est terminus rei. Deum autem impossibile est ab intellectu creato comprehendi, ut Augustinus dicit in epistola ad Paulinum de iudicio Domini: ergo Deus per essentiam ab intellectu creato videri non potest.

3. Praeterea, visus ad visibile oportet esse proportionem: sed inter intellectum creatum et Deum nulla est proportio, cum in infinitum distent, etiam lumine gloriae appposito: ergo Deus per essentiam videri non potest ab intellectu creato.

Sed contra est, quod dicitur 1 Joan. 3: « Cum apparuerit, similes ei erimus, quoniam videbimus eum sicuti est. »

Praeterea, Matth. 5 dicitur: « Beati mundo corde, quoniam ipsi Deum videbunt. »

Respondeo. Dicendum, quod amori non satisfacit, nisi ei praesentialiter offeratur quod amat: absentia enim amati contristat. Homines autem per charitatem Deum immediate amant, non propter aliquid, sed propter seipsum: unde charitas non sufficienter remuneraretur, nisi ipse Deus immediate animae amanti praesentaretur. Hoc autem esse non potest nisi per suam essentiam videatur; quia quicumque effectus, vel quaecumque alia species insufficientissime repraesentat divinam essentiam, etiam minus quam umbra corpus. Quare, sicut videns umbram non praesentialiter videt eum cuius est umbra, ita per quaecumque speciem vel effectum, intellectus Deum praesentialiter habere non potest. Oportet igitur, quod ipsa essentia quae cognoscitur, sit etiam species qua cognoscitur. Et sic Deus per suam essentiam videtur. Est tamen ibi in hac visione quoddam medium, non in quo, sed sub quo Deus videtur; scilicet lumen gloriae; sicut etiam oculus corporalis sub lumine corporali suo visibile videt.

Ad primum ergo dicendum, quod Chrysostomus loquitur de visione comprehensionis, qua solus Deus se videt.

Ad secundum dicendum, quod quando essentia rei cognoscitur secundum modum suae cognoscibilitatis, tunc res comprehenditur. Sed hoc in visione Dei esse non potest, quia claritas divinae essentiae per quam est cognoscibilis, est infinita: modus autem intellectus creati videntis non potest esse infinitus: et ideo non comprehendit; non quia totum non videat, sed quia totaliter non videt: videt enim finite, quod de se est visibile infinite.

Ad tertium dicendum, quod potentia operatur ad objectum mediante actu: unde non oportet accipere proportionem potentiae ad objectum simpliciter, sed secundum quod cadit sub actu. Quamvis autem Deus sit infinitus, tamen modus eum videndi est finitus; et ideo huic modo intellectus per lumen gloriae proportionatur.

ARTICULUS II.

Ad secundum sic proceditur. Et 1. videtur, quod beatitudo non consistat in visione Dei. Beatitudo enim est summum bonum: hoc autem est Deus solus, cum non sit nisi unum summum bonum; ergo beatitudo est ipse Deus: sed visio Dei non est Deus; ergo visio Dei non est ipsa beatitudo.

2. Praeterea, ut dicit Boetius in 5 de Consol., « Beatitudo est status omnium bonorum congregatione perfectus: » sed visio non nominat statum sed actum; ergo visio Dei non est ipsa beatitudo.

3. Praeterea, beatitudo omnis consistit in conjunctione ad Deum: sed magis homo coniungitur Deo diligendo quam cognoscendo, quia ut dicit Hugo de Sancto Victore: « Plus Deus diligitur, quam cognoscitur; et intrat dilectio, ubi scientia foris stat; » ergo magis Dei dilectio est beatitudo quam ejus visio.

4. Praeterea, finis cuiuslibet motus est quies, quae est in termino motus: sed quies ad quam terminatur motus appetitus, est delectatio; ergo

finis appetitus nostri est delectatio, et non visio; et sic visio non est beatitudo.

Sed contra est, quod dicitur Joan. 17: « Hæc est vita æterna, ut cognoscant te solum verum Deum: » sed vita æterna est beatitudo, et finis ultimus. Rom. 8: « Finem vero vitam æternam; » ergo ipsa Dei visio est nostra beatitudo.

Praeterea, merces Sanctorum est beatitudo: sed visio est tota merces Sanctorum, ut Augustinus dicit; ergo visio est tota substantia beatitudinis.

Respondeo. Dicendum, quod cujuslibet existentis in potentia finis est ut reducat in actum. Ipse autem ordo vel habitudo rei ad actum suum vel habitum vel non habitum, et si quæ proprietates ex actu consequuntur, non sunt finis, sed concomitantur finem, et ipsum quodammodo perficiunt et decorant, sicut in generatione finis est consecutio formæ, non proprietates quæ consequuntur formam: et sic in motu locali consecutio loci, non quaecumque aliae proprietates locum consequentes. Anima autem nostra est in potentia omnia, secundum intellectum, quia intellectus est potentia ipsa intelligibilia: unde ultimus finis ejus est, ut reducat in actum omnium intelligibilium. Hoc autem fit per Dei visionem, in qua ipse Deus, qui est actus omnium, unitur quodammodo intellectui ut intelligibile, et fit actus ejus quodammodo. Unde ipsa Dei visio est essentialiter ultimus finis humanæ animæ et ejus beatitudo. Dilectio vero est quasi quaedam proprietas consequens actum. Unde ipsa visio est essentialiter beatitudo; sed dilectio et fruitio, sive delectatio, concomitantur eam sicut stabilientes et consummantes, et decorantes ipsam.

Ad primum ergo dicendum, quod ipse Deus est beatitudo per essentiam, homines autem fiunt beati participatione, quod fit dum ei uniuntur: et hoc primo est per visionem.

Ad secundum dicendum, quod beatitudo, sive felicitas, secundum Philosophum, in perfecta operatione consistit. Perfecta autem operatio requirit omnia, quæ ad perfectionem pertinent operantis: et hæc ratione statum perfectum omnium bonorum congregatione Boetius beatitudinem describit.

Ad tertium dicendum, quod dilectione perficitur conjunctio ad Deum, quæ per visionem essentialiter inchoatur, et hæc est ratio dicti Hugonis de Sancto Victore.

Ad quartum dicendum, quod delectatio non est ipsa adeptio finis, vel quietatio in fine; sed consequitur ipsum, in quantum voluntas sibi complacet in fine habito, in quo quiescit.

ARTICULUS III.

Ad tertium sic proceditur. Et 1. videtur, quod non omnes beatitudinem appetant. Nullus enim appetit quod ignorat, et de quo non cogitat: sed multi sunt qui non cognoscunt beatitudinem, nec de ea cogitant; ergo videtur quod non omnes beatitudinem appetant.

2. Praeterea, sicut dicit Augustinus in lib. de Trin., et habetur in littera: « Beatus est qui habet omnia quæ vult, et nihil male vult: » hoc autem non omnes volunt: multi enim sunt qui male volunt, et in hoc gaudent, de quibus Prov. 2, dicitur: « Qui lætantur cum male fecerint, et exultant in

rebus pessimis; » ergo non omnes volunt esse beati.

3. Praeterea, consecutio finis respondet appetitui ejus: sed non omnes beatitudinem consequuntur, nec qui sequuntur eam æqualiter habent; ergo beatitudinis appetitus non est omnibus communis.

Sed contra est, quod Boetius probat in 5 de Consol., quod omnes ad beatitudinem pervenire nituntur, licet diversis viis.

Praeterea, omnis res naturaliter appetit suum finem, sicut grave locum medium: sed beatitudo est finis hominis; ergo omnes homines naturaliter eam appetunt.

Respondeo. Dicendum, quod unaquæque potentia naturaliter tendit in suum objectum, sicut visus in colorem. Voluntatis autem objectum est bonum. Unde omnes homines naturaliter bonum volunt, non autem quodcumque, sed bonum proprium sibi. Et sicut bonum proprium appetunt, ita boni proprii perfectionem. Omne enim diminutum, perfectionem sui exoptat. Bonum autem proprium hominis perfectum, est ipsa beatitudo: ideoque omnes homines appetunt beatitudinem. Quicquid autem homines volunt, volunt propter aliquod bonum, vel verum, vel apparens, consequendum, vel perficiendum. Quare, quicquid appetunt homines, appetunt propter beatitudinem.

Ad primum ergo dicendum, quod licet non omnes cognoscant beatitudinem, nec de ea cogitent sub nomine beatitudinis, omnes tamen cognoscunt et cogitant beatitudinis rationem, sicut rationem boni perfecti. Sed cui conveniat esse perfectum bonum hominis, non est omnibus notum: sed plures circa hoc erraverunt.

Ad secundum dicendum, quod licet aliquis velit aliquid velle quod est male velle, tamen hoc vult sub ratione alicujus boni; et sic unusquisque vult bene velle per se loquendo, etiamsi quis per accidens velit male velle.

Ad tertium dicendum, quod quanvis omnes appetant beatitudinem communiter, non tamen omnes eam consequuntur, quia non volunt ea per quæ ad beatitudinem pervenitur; sicut qui vult scire, et non vult studere. Nec etiam omnes qui volunt ea quibus ad beatitudinem pervenitur, æqualiter ea volunt; sed quidam majori charitate, quidam minori: et exinde est, quod quidam plenius quidam minus plene beatitudinem consequuntur.

ARTICULUS IV.

Ad quartum sic proceditur. Et 1. videtur, quod beatitudo Sanctorum non erit major post resurrectionem quam ante. Beatitudo enim Sanctorum consistit principaliter in visione Dei, ut dictum est: sed ad visionem Dei nihil operatur corpus; ergo post resurrectionem non erit major beatitudo Sanctorum.

2. Praeterea, si ante resurrectionem sit minor beatitudo sanctorum, hoc videtur esse propter appetitum animæ ad corpus propter quem retardat a visione divina: sed talis appetitus retardare non potest, cum anima non appetat corpus sicut finem ultimum, sed sicut quod est ad finem: appetitus autem ordinatus ejus quod est ad finem non retrahit a fine, sed magis dirigit in ipsum; ergo beatitudo Sanctorum non est minor ante resurrectionem quam post.

5. Praeterea, magis videtur, quod plurium bonorum sit beatitudo inaequalis quam unius et ejusdem: sed plurium beatorum beatitudo est aequalis, quod patet ex hoc quod omnibus dabitur unus denarius, ut dicitur Matth. 20, et quod beatitudo est in termino unde non recipit magis et minus; ergo idem post resurrectionem non erit magis beatus quam ante.

Sed contra. Beatitudo in visione Dei consistit: sed animae sanctorum ante resurrectionem minus vident Deum quam post: dicit enim Augustinus 12 super Genesim ad litteram: minime dubitandum est, mentem post mortem non sic videre posse incommutabilem substantiam, ut sancti Angeli vident. Post resurrectionem vero Deum visuri sumus, sicut Angeli vident, ut ipse dicit in fine de Civitate Dei; ergo major erit beatitudo sanctorum post resurrectionem quam ante.

Praeterea, gaudium est de ratione beatitudinis: sed boni amplius gaudium sunt habituri post resurrectionem quam ante, ut Augustinus dicit; ergo sancti magis erunt beati post resurrectionem quam ante.

Respondeo. Dicendum, quod magnitudo beatitudinis potest attendi dupliciter. Uno modo extensive: et sic planum est quod beatitudo sanctorum major erit post resurrectionem quam ante, quia quantum ad plura erunt tunc beati, idest quantum ad animam et corpus, nunc autem quantum ad animam tantum. Alio modo intensive; et sic major est beatitudo ubi est perfectior operatio, in qua beatitudo consistit. Perfectio autem operationis ex duobus dependet. Aut enim ex habitu; et sic non erit major beatitudo post resurrectionem quam ante, quia nec major charitas perficiens affectum nec majus lumen gloriae illustrans. Aut ex potentia naturali; et sic quodammodo erit intensior beatitudo post resurrectionem, quam ante. Anima enim separata a corpore, nondum habet perfecte naturae suae modum, quem habebit post spiritualem corporis resumptionem, ut Augustinus dicit 12 super Genesim ad litteram. Pars enim in toto existens, habet perfectionem quamdam naturae, quam non habet separata a toto.

Ad primum ergo dicendum, quod licet corpus non faciat ad actum beatitudinis directe, facit tamen indirecte, in quantum ex unione corporis ipsa natura animae fit perfectior, et per consequens vires intellectivae in essentia animae fundatae.

Ad secundum dicendum, quod appetitus corporis non impedit a fruitione quasi detrahendo intentionem, sed designando, et concomitando imperfectionem naturae. Unde nullus appetitus deliberativus Angeli vel animae retardare potest a divina fruitione, sed solus appetitus naturalis qui imperfectionem naturae consequitur.

Ad tertium dicendum, quod dignitas beatitudinis pensatur ex duobus. Uno modo, ex objecto operationis, in qua beatitudo consistit; et ex hac parte omnium esset par gaudium, et beatitudo aequalis, quia ex eadem divina essentia visa et amata; et propter hoc dicitur unus denarius. Alio modo, ex intensione operationis quae est per diversitatem habitus; et sic secundum diversam quantitatem charitatis, et luminis gloriae, quae respondent diversitati charitatis in via, sunt diversi beatitudinis gradus, quia diversae mansiones appellantur propter diversos modos quibus collocantur in fine. Nec obstat, quod beatitudo est summum bonum; quia beatitudo

S. Th. Opera omnia. V. 22.

creata non dicitur summum simpliciter, sed summum in specie, sicut ignis dicitur subtilissimus corporum. Unde nihil prohibet unum alio, vel se ipso, diverso tempore beatiorem esse.

DISTINCTIO L.

Hic oritur quaestio ex praedictis etc. (V. edit. nostrae tom. VII, pag. 1244.)

QUAESTIO UNICA.

Hic quaeruntur quatuor: 1.^o de voluntate damnatorum; 2.^o de tenebris in quibus erunt post diem iudicii; 3.^o de cognitione animarum ante diem iudicii; 4.^o utrum beati videant poenas damnatorum.

ARTICULUS I.

Ad primum sic proceditur. Et I. videtur, quod damnati non habeant in omnibus malam voluntatem. Poenitet enim eos de malis, quae commiserunt: unde dicit Sapient. 5: « Intra se poenitentiam agentes »: sed haec est bonae voluntatis; ergo habebunt aliquam bonam voluntatem.

2. Praeterea, damnati in inferno vellent suos consanguineos salvari, ut Lucae 17, dicitur de divite qui rogabat pro fratribus suis, ne venirent in locum tormentorum: sed velle salutem aliorum est bonae voluntatis; ergo damnati habent aliquam bonam voluntatem.

3. Praeterea, diligere Deum, bonae voluntatis est: sed damnati Deum diligunt, quia, sicut dicit Dionysius 4 cap. de divinis Nominibus: « Omnibus diligibile est bonum et pulchrum quod est » omnis boni et pulchritudinis causa, quod Deus est; ergo damnati habent bonam voluntatem.

4. Praeterea, per malam voluntatem homines demerentur in hoc mundo: sed non sunt melioris conditionis post damnationem quam ante; ergo si malam voluntatem habent, videtur quod demereantur: quod est falsum, cum sint in termino viae; ergo damnati non semper habent malam voluntatem.

Sed contra. Homines damnati daemonibus associantur: sed omnis voluntas daemonum est mala, ut in 7 dist. secundi libri dictum est; ergo et omnis voluntas hominum damnatorum.

Praeterea, sicut boni sunt in complemento bonitatis in beatitudine, ita damnati in complemento malitiae: sed beati non possunt habere malam voluntatem; ergo nec damnati bonam.

Respondeo. Dicendum, quod duplex est voluntas, naturalis et deliberativa. Naturalis voluntas in damnatis est bona, et ea aliquod bonum volunt, quae quidem voluntas attestatur bonitati naturae, ejus Deus est auctor. Voluntatis autem deliberativa in damnatis bona esse non potest: procedit enim ex electione liberi arbitrii quod in damnatis est confirmatum in malo, propter perpetuam separationem a bono fine, a quo se per culpam voluntarie separaverunt.

Ad primum ergo dicendum, quod poenitere de peccato per se, dum scilicet aliquis dolet de turpitudine culpae, est bonae voluntatis: sed poenitere per accidens dolendo de acerbitate poenae, potest ad malam voluntatem pertinere, quae rectitudini justitiae repugnat.

Ad secundum dicendum, quod in damnatis est tanta invidia, quod invident etiam proximorum saluti. Vellent tamen, si aliqui salvantur, quod propinqui sui potius salvarentur; et invidere aliis, si sui propinqui damnabuntur. Vel dicendum, quia dives sciebat suam poenam augeri ex suorum praesentia, ideo eis bonum optabat per accidens. Sicut enim ex multiplicatione justorum augetur beatorum gaudium, ita ex multiplicatione reproborum augetur malorum poena.

Ad tertium dicendum, quod ab illis qui Deum per essentiam vident, Deus haberi odio non potest, ut supra dictum est. Sed damnati naturali affectu diligunt Deum, quantum ad effectus naturae. Habebunt tamen eum odio quantum ad effectus justitiae per quam punientur.

Ad quartum dicendum, quod post diem iudicii tam boni quam mali erunt in ultimo termino constituti, unde nec merebuntur nec demerebuntur, cum hoc pertineat ad motum in terminum. Tamen ante diem iudicii Angeli boni vel mali possunt mereri, respectu praemii accidentaliter, quod eis debetur, ex his quae circa homines agunt, quia quantum ad hoc, sunt quodammodo viatores; non autem respectu praemii essentialiter, quod jam sunt consecuti. Non autem est simile de animabus ad quas non pertinet viatores in bonum vel in malum exercere.

ARTICULUS II.

Ad secundum sic proceditur. Et 1. videtur, quod damnati non omnino post diem iudicii erunt in tenebris. Recordantur enim damnati eorum quae in hoc mundo gesserunt, alias remorsum conscientiae non haberent; ergo eadem ratione, et eorum quae in hoc mundo scierunt: sed multi damnati fuerunt in hoc mundo magna luce scientiae praediti; ergo penitus non erunt in tenebris.

2. Praeterea, nullus potest habere odio id, de quo non cogitat: sed damnati habebunt odio Deum, ut in littera dicitur; ergo de eo cogitabunt, et sic non totaliter in tenebris erunt.

5. Praeterea, quod ad afflictionem pertinet, damnatis post diem iudicii non auferetur: sed videre gloriam bonorum affligit damnatos, propter invidiam; ergo etiam post diem iudicii gloriam beatorum videbunt, et sic non erunt totaliter in tenebris.

Praeterea, damnati igne punientur: sed ignis naturaliter est lucidus; ergo non totaliter erunt in tenebris.

Sed contra est, quod dicitur Matth. 22: « Projicite eum in tenebras exteriores. »

Praeterea, poena damnatorum contrariatur gloria electorum: sed electi erunt in plena luce; ergo et damnati erunt in plenis tenebris.

Respondeo. Dicendum, quod in inferno erunt duplices tenebrae, corporales et spirituales, quae dicuntur exteriores, quia extra participationem verae lucis erunt. Dicit enim Gregorius 5 et 9 Moralium, quod damnatis, ignis quantum ad aliquid lucebit, et quantum ad aliquid non lucebit. Non lucebit ad consolationem, sed lucebit ad afflictionem, in quantum videbunt suos sequaces, qui amore eorum deliquerunt, secum torqueri. Et similiter dicendum est de spiritualibus tenebris; quia non erit in eis aliqua cognitio vel consideratio, quae possit eos delectare, sed solummodo quae potest affligere.

Ad primum ergo dicendum, quod damnati recordabuntur eorum quae scierunt, ut magis torqueantur, vel in quantum contra scientiam egerunt, vel in quantum scientia eorum remanet imperfecta, et poenis impedita.

Ad secundum dicendum, quod de Deo impii non cogitabunt secundum quod est totius bonitatis principium, quia hoc eos delectaret. Considerabunt tamen eum, ut iudicem eos punientem, et ex hoc torquebuntur.

Ad tertium dicendum, quod ante diem iudicii animae damnatorum videbunt bonos, cognoscentes eos esse in gloria inestimabili, quamvis ipsam gloriam non comprehendunt. Sed post resurrectionem nec ipsos bonos videbunt, et ex hoc eorum poena non minuetur, sed augebitur. Cognoscent enim eos esse pro certo in gloria, quod sufficeret ad tormentum: sed scient se eorum visione reputatos indignos, quod pertinet ad tormenti augmentum.

Ad quartum dicendum, quod ignis damnatorum tenebrosus erit, habens ardorem sine luce. Sed tamen sub quaedam umbrositate lucebit tantum, quod videre poterunt quod eos contristet, ut ex auctoritate Gregorii dictum est.

ARTICULUS III.

Ad tertium sic proceditur. Et 1. videtur, quod animae damnatorum ante iudicium cognoscant ea quae in hoc mundo aguntur. Animae enim damnatorum non habent nisi cognitionem intellectivam cum actibus sensitivarum potentiarum careant: sed distantia localis nihil operatur ad cognitionem intellectivam; ergo animae damnatorum possunt scire ea quae hic aguntur.

2. Praeterea, plus distant sancti a damnatis, quam in hoc mundo viventes: sed damnati vident sanctos ante diem iudicii, ut in littera dicitur; ergo multo magis vident ea quae in hoc mundo aguntur.

5. Praeterea, dives, de quo legitur Luc. 16, in inferno damnatus erat, et tamen ipse sciebat quid circa suos ageretur, ut ibidem patet; ergo damnati sciunt ea quae in hoc mundo aguntur.

Sed contra est, quod Augustinus dicit in libro de Cura pro mortuis agenda: Ibi defunctorum animae sunt, ubi ea quae hic fiunt, omnino scire non possunt.

Praeterea, Job 14, dicitur de impiis: Sive nobiles fuerint filii ejus, sive ignobiles, non intelligent. Quod exponens Gregorius dicit in 12 Moralium: Sicut enim hi, qui adhuc viventes sunt, mortuorum animae quo loco habeantur ignorant, ita mortui, vita in carne viventium post eos, qualiter disponatur, nesciunt.

Respondeo. Dicendum, quod animae damnatorum nesciunt quae hic aguntur, nisi ad eorum poenam cognoscere permittantur, vel per daemones, vel per animas damnatorum illic descendentes. Causa autem ignorantiae est distantia loci, secundum eos qui dicunt, quod animae separatae cognoscunt a sensibilibus accipiendo. Sed secundum aliorum opinionem, hoc est propter hoc, quod impediuntur ex afflictione poenarum quibus absorbentur; vel quia cum cognoscant per influxionem superioris luminis, ad illa cognoscenda illuminantur, quae ad viam in qua degunt, pertinent, non ad alia. Et hoc est quod Gregorius dicit in praedicto loco, causam ignoran-

tiae praedictae assignans in 12 Moralium: mortui, vita in carne viventium post eos, qualiter disponatur nesciunt, quia vita spiritus, longe est a vita carnis. Et sic, sicut corporea atque incorporea diversa sunt genere, ita etiam distincta cognitione.

Ad primum ergo dicendum, quod quamvis non impediatur distantia localis, impediuntur tamen aliunde, ut dictum est.

Ad secundum dicendum, quod ad hoc eis ostenduntur beati, ut magis torqueantur: et praeterea, ipsi etiam sunt a corpore separati, unde causa Gregorii cessat.

Ad tertium dicendum, quod dives hoc dicebat per conjecturam, quia fratres suos viventes reliquerat, et ad inferos descendisse non cognoscebat.

ARTICULUS IV.

Ad quartum sic proceditur. Et 1. videtur, quod sancti non videant poenas damnatorum, vel reprohorum. Ad perfectionem enim operationis aliquid facit nobilitas objecti: sed miseria damnatorum est maxime indignitatis; ergo deturparetur visio beatorum si poenas damnatorum viderent.

2. Praeterea ex charitate contingit, quod poenis alienis visis condolemus: sed sancti habebunt maximam charitatem; ergo si poenas damnatorum viderent, aliquis dolor in eis esset, quod est impossibile.

3. Praeterea, si viderent poenas damnatorum, aut visione spirituali, aut corporali viderent. Non spirituali, quia per eam non egrediuntur, sed magis ingrediuntur, cum dicatur Isaiae ultimo: « Egre-
« dientur, et videbunt cadavera impiorum etc. » Visione autem corporali, poenas omnes damnatorum videre non possunt, cum praeter poenam ignis alias poenas patiantur, et praecipue vermem conscientiae, qui est poena spiritualis; ergo beati non videbunt poenas damnatorum.

Sed contra est, quod dicitur Isa. ultimo: « Egre-
« dientur, et videbunt cadavera impiorum. »

Praeterea, nihil electis subtrahi debet, quod ad eorum jucunditatem pertineat: sed visio poenae da-

mnatorum affert electis jucunditatem, ut dicitur in Psal. 57: « Laetabitur justus cum viderit vindictam; » ergo talis visio non est eis subtrahenda.

Respondeo. Dicendum, quod beati in maxima Dei reverentia constituti sunt: et ideo oportet ut cognoscant omnia, quae ad reverentiam Dei pertinent. Et ideo, sicut cognoscent effectus naturae, in quibus Dei potentia manifestatur, et reveretur Dei justitia, ita oportet quod damnatorum videant poenas, in quibus tum Dei omnipotentia, tum illius justitia manifestatur, et ex quarum comparatione clarior apparet Dei misericordia, quam illis exhibuit.

Ad primum ergo dicendum, quod licet cognitio nobilium ex hoc ipso habeat quandam nobilitatem, utilitas tamen cognoscibilium ignobilitatem cognitionis non facit, quia cognoscibilia sunt spiritualiter in cognoscente. Unde Deus omnia bona et mala cognoscit.

Ad secundum dicendum, quod hic possumus compati miseriis aliorum ex charitate, quamdiu homines a miseria liberari possunt. Sed quando jam per divinam justitiam erunt in miseria confirmati, non erit ex charitate compatiendum miseriae: sed congaudendum justitiae divinae.

Ad tertium dicendum, quod in damnatis, non solum erit poena corporalis ignis, sed etiam aliae: quod patet ex hoc, quod omnium elementorum impuritates, in infernum intrudentur ad poenam damnatorum. Nec tamen successio poenarum contrariarum ut ignis, et aquae, aliquod eis refrigerium praestabit; quia his poenis natura non permutabitur, sed solum sensus affligetur, ut supradictum est. Vermis tamen ille non erit corporalis, cum nullum animal brutum post innovationem mundi remaneat, ut supradictum est: sed intelligitur per vermem, conscientiae remorsus, qui est poena spiritualis, quam spirituali, et non corporali visione videbunt. Quae tamen visio egressus dicitur, quantum ad res visas, non quantum ad modum videndi, prout omnia videbunt in Verbo, ipsum Verbum intima visione apprehendentes, quod est eorum perpetua et perfecta beatitudo, per infinita saecula saeculorum. Amen.

DE PRAESCIENTIA ET PRAEDESTINATIONE

Ad Fratrem Reginaldum socium suum charissimum.

PROLOGUS.

Instantissime rogatis me, charissime frater, ut vobis aliquem tractatum brevem facerem stilo facili, de Praescientia et Praedestinatione divina, per quem possetis aliquibus quaestionibus et objectionibus, quae de ipsis communiter sunt ab hominibus, respondere. Unde vestrae instantiae pro posse satisfacere cupiens, aggressus sum facere, auxilio Dei praevio, quod rogastis.

Scire tamen debetis quod ab antiquis philosophis, et etiam ab Ecclesiae doctoribus et magistris, tam antiquis quam modernis, haec quaestio fuit multipliciter et subtiliter ventilata. Quorum ego profundissimas et perplexas rationes evitans, leviores aliquas et vestrae capacitati accommodas, praelegi, non tamen quae penitus satisfacere possint, in hac profundissima et insolubili quaestione. Nam secundum Apostolum ad Romanos 11, 35, « Incomprehensibilia sunt judicia Dei et investigabiles viae ejus: quis enim cognovit sensum Domini, aut quis consiliarius ejus fuit? etc. »

Sunt autem haec quae in hoc opusculo perstringuntur. Primo quid sit praescientia et praedestinatio Dei, et in quo a se invicem differant. Secundo quid sit reprobatio Dei, et quis praedestinationis et reprobationis effectus. Tertio utrum praescientia sit causa rerum praesentiarum, vel res causae praescientiae. Quarto utrum praescientia Dei necessitatem eveniendi rebus imponat. Quinto utrum praedestinatio certitudinem habeat. Sexto utrum praedestinatio necessitatem imponat. Septimo quare Deus fecit hominem quem sciebat esse damnandum.

CAPUT I.

Quomodo ista quatuor, scilicet scientia, praescientia, providentia et praedestinatio se habeant in Deo.

Sciendum est igitur, quod ista quatuor, videlicet scientia, praescientia, providentia et praedestinatio diversimode, sive diversis respectibus de Deo dicuntur, et habent per se additionem unius ad alterum. Scientia enim sive sapientia de omnibus est, scilicet de bonis et malis, de praeteritis, praesentibus

et futuris; et non tantum de temporalibus, sed etiam de aeternis. Non enim ita scit Deus ista temporalia, ut seipsum nesciat; sed ipse solus seipsum perfecte novit, ejus scientiae comparatione, omnis creaturae scientia imperfecta est. Praescientia vero addit super scientiam, quamdam praecognitionem: est enim de futuris tantum, sed de omnibus; de bonis, scilicet, et de malis. Providentia vero includit in se praescientiam, et addit supra ipsam, quamdam praeparationem, sive promotionem in finem ultimum. Est enim de rebus praecognitis faciendis, sive gubernandis: unde et providus dicitur, qui bene conjectat de conferentibus ad finem ultimum consequendum, et de his quae ipsum possunt impedire. Providentia ergo dicitur quae rebus praescitis et ordinatis tribuit ea quae ordinem conservent et propellit omnem inordinationem.

Praedestinatio autem in suo intellectu includit, non solum praescientiam, sed etiam providentiam; et addit supra eam aliquid; scilicet quemdam specialem modum, tam ex parte praedestinatorum, quam ex parte ipsius finis, quam etiam ex parte praedestinantis. Cum enim providentia Dei sit omnium rerum, et speciali quodam modo rerum habentium voluntatem, praedestinatio includit in se providentiam secundum illum modum specialem, quo est respectu hominum et habentium voluntatem. Est enim praedestinatio de hominibus salvandis.

Item cum providentia respiciat ordinem uniuscujusque boni ad quemlibet finem, praedestinatio est tantum respectu eorum quae homo ex naturalibus suis consequi non potest, sed sunt elevata supra facultatem humanae naturae. Est enim respectu gloriae quae est in perfecta Dei fruitione, et respectu gratiae promoventis in ipsam gloriam. Unde dicit Damascenus, quod praedestinatio est eorum quae non sunt in nobis.

Item licet providentia sit promotio vel directio alienjus in finem, praedestinatio tamen includit in se providentiam, cum quadam speciali acceptione et electione voluntatis. Quamvis enim praedestinatio praesupponat actum cognitionis, nominat tamen actum voluntatis eligentis ad ea quae sola gratuita voluntate conferuntur. Unde dicitur ad Rom. 8, 29: « Quos praescivit et praedestinavit conformes fieri imaginis Filii sui. » Et ad Ephes. 1, 5: « Praedesti-

« navit nos in adoptionem filiorum secundum propositum voluntatis suae. » Sic igitur de essentia praedestinationis est praescientia et voluntas aliquorum. Ex praedictis itaque manifestum est quid sit praescientia et praedestinatio Dei. Est enim praescientia Dei, certissima praecognitio omnium futurorum tam bonorum quam malorum.

Praedestinatio vero, secundum Augustinum in lib. de Praedest. sanct., est gratiae praeparatio, idest divina electio, qua « elegit eos quos voluit ante mundi constitutionem, » ut ait Apost. ad Ephes. 1, 4. Vel secundum definitionem magistralem, Praedestinatio est praeparatio gratiae in praesenti et gloriae in futuro. Unde patet quod praedestinatio sine praescientia esse non potest; sed sine praedestinatione praescientia esse potest. Praedestinatione quippe Deus ea praescivit, quae fuerat ipse factururus; sed praescivit Deus etiam quae non ipse factururus, idest omnia mala: praedestinavit enim eos quos elegit; reliquos autem reprobavit, idest ad mortem aeternam praescivit (1).

CAPUT II.

Quid sit reprobatio, et quis praedestinationis ac reprobationis effectus.

Sicut autem praedestinatio Dei proprie est praescientia et praeparatio beneficiorum Dei, scilicet gratiae in praesenti et gloriae in futuro, ita reprobatio Dei est praescientia malitiae in quibusdam non finiendae et praeparatio poenae non terminandae, ut dicit Augustinus in lib. de Bono perseverantiae. Reprobatio enim Dei, qua ab aeterno, non eligendo, quosdam reprobavit, secundum due consideratur: quorum alterum praescit et non praeparat, scilicet iniquitatem sive malitiam (2). Unde Augustinus ad Prosp. et Hilar.: « Haec quidem regula inconcusse tenenda est: peccatores peccato praescitos esse non praeparatos, poenam autem esse praeparatam. » « Praeparavit enim Deus malis (ut ait Fulgentius) ignem aeternum, illis utique quos non praeparavit ad facienda peccata (3). Praeparavit enim Deus quod divina aequitas redderet, non quod humana iniquitas admitteret. Non enim sicut praeparavit sanctos ad justitiam prosequendam, sic praeparavit iniquos ad injustitiam admittendam; quia pravitatis operator nunquam fuit. »

Praedestinatio, quantum est de se, non tantum importat scientiam, sed etiam voluntatem et potentiam. Sed quoniam causalitas gratiae et gloriae attribuitur proprie voluntati ut efficienti, scientiae autem ut dirigenti, potentiae vero ut exequenti; ideo etsi praedestinatio importat illa tria, tamen principalis (4) est in genere voluntatis. Et ideo ab Augustino definitur praedestinatio per illa tria. Primo per id quod respicit potentiam in lib. de Fide ad Petr.: « Praedestinatio est gratuita donationis praeparatio. » Secundo per id quod respicit scientiam: in lib. de Bono persev.: « Praedestinatio est praescientia beneficiorum Dei. » Tertio per id quod respiciat (5) voluntatem; et propriissime in lib. de Praedest. sanct.:

(1) *Al.* perventuros praescivit.

(2) *Supple* alterum praescit et praeparat, scilicet poenam.

(3) *Al.* illis itaque quos juste praeparavit ad luenda supplicia, nec tamen praeparavit ad facienda peccata.

(4) *Lege* principalius.

(5) *Lege* respicit.

« Praedestinatio est propositum miserendi. » Praedestinationis autem effectus est appositio illius gratiae, qua in praesenti justificamur, atque ad recte vivendum et in bono perseverandum adjuvamur, et qua in futuro beatificamur. Quem quidem effectum notificat Apostolus ad Roman. 5, 24: « Ut justificati gratia ipsius, haeredes simus secundum spem vitae aeternae. » Et sicut praedestinationis effectus est gratiae appositio, ita reprobationis effectus est quodammodo privatio sive subtractio gratiae. Quae interdum in Scriptura sacra obduratio et excaecatio dicitur. Unde Apostolus ait ad Rom. 9, 18: « Cujus vult miseretur, et quem vult indurat: » misericordiam appellans praedestinationem (ut ait Augustinus ad Xistum), et praedestinationis effectum, idest gratiae appositionem; obdurationem vero gratiae privationem. Hic etiam de excaecatione dicitur 2 ad Corinth. 4, 4, quod « Deus hujus saeculi excaecavit mentes infidelium: » quod una Glossa de Deo vero exponit. Sciendum tamen est, quod quia bonum subjacet providentiae Dei, ut causatum et ordinatum; ideo praedestinatio est idem quod causa gratiae et gloriae, ad quam gratia ordinatur. Sed quia malum non subjacet providentiae ut intentum vel causatum (cum omnis defectus accidat praeter intentionem) solum subjacet ei ut praescriptum et ordinatum, sicut dictum est; ideo reprobatio est tantum praescientia culpae et non causa, sed poenae ad quam culpa ordinatur, et ejus, scilicet poenae, est praescientia et causa. Unde Augustinus dicit ad Xistum: « Non obdurat Deus immitendo malitiam, sed non impertiendo gratiam, sicut nec digni sunt. » Quibus enim non impertitur, nec digni sunt, nec merentur. Idem ad Simplicianum dicit: « Non est intelligendum, quod Deus ita induret, quasi quemquam peccare cogat; sed tantum quibusdam peccatoribus misericordiam justificationis suae non largitur. Et ob hoc eos indurare dicitur, quia non eorum miseretur, non quia impellit ut peccent: eorum autem non miseretur, quibus gratiam non esse praebendam aequitate occultissima et ab humanis sensibus remotissima, judicat: quam non aperit, sed admiratur Apostolus dicens: O altitudo divitiarum sapientiae et scientiae Dei, ad Roman. 11, 33. »

CAPUT III.

Utrum scientia vel praescientia Dei, sit causa rerum praescitarum.

Consequenter considerandum est, utrum scientia vel praescientia Dei, sit causa rerum praescitarum; vel res futurae, sint causa praescientiae Dei. Et ut melius veritas appareat, producantur in medium aliqua argumenta.

Circa primam partem sic proceditur. 1. Videtur, quod praescientia Dei sit causa rerum praescitarum. Nam omne id quod antecedit aliud, et ipso posito ponitur, ipsum est causa illius, ut patet per definitionem causae: causa est, ad ejus esse sequitur aliud. Sed divina praescientia praecedit omne futurum, et ea posita ponuntur futura respectu quorum est ratio, et ea remota removentur futura: quia nec futura fuissent nisi ea Deus praescivisset; alias ignorantia poneretur in Deo, quod est absurdum. Ergo praescientia videtur esse causa praescitarum rerum.

2. Adhuc, sicut voluntas Dei est ipse Deus, ita

et scientia ejus. Sed voluntas Dei absolute est causa omnium volitorum: unde dicit Psal. 4, 6: « Omnia quaecumque voluit Dominus fecit. » Ergo scientia ejus debet dici causa omnium scitorum.

5. Huic etiam sententiae Augustinus attestari videtur lib. 13 de Trinitate sic dicens: « Universas creaturas, et spirituales et corporales, non quia sunt novit eas Deus; sed ideo sunt, quia novit: non enim nescivit quae fuerat creaturus: quia ergo servit, creavit, non quia creavit, scivit. »

In contrarium est, quia si praescientia esset causa praesciti, cum Deus praesciat omnia mala, esset causa omnium malorum, et per consequens esset actor omnium malorum, quod falsum est.

Sciendum est ergo circa istam materiam, quod scientia, sive praescientia, Dei potest considerari dupliciter. Uno modo secundum propriam rationem. Et sic, cum praescientia nihil aliud dicat nisi praecognitionem, non importat aliquam causalitatem; alias omnis scientia vel praescientia causa esset rerum praescitarum; quod falsum est. Videmus enim quod praescientia medici, quando certitudinaliter novit infirmum brevi moriturum, non est causa mortis infirmi: praescientia etiam speculatoris qui videt hominem euntem per viam, in qua paratus est leo ad devorandum, non est causa perditionis illius, et hujusmodi. Alio modo potest considerari, in quantum est scientia artificis operantis res praescitas: et sic habet rationem causae respectu rei operatae per artem: unde secundum modum quo scientia artificis operantis per artem suam est causa artificiatum, consideranda est causalitas scientiae divinae. Est ergo iste progressus in productione artificiatum. Primo scientia artificis ostendit finem. Secundo voluntas ejus intendit finem illum ostensum. Tertio voluntas imperat actum, per quem educatur opus. Quarto scientia dirigit illum actum. Quinto circa opus quod per actum educitur, scientia artificis ponit formam conceptam. Sic igitur scientia artificis se habet ut ostendens finem, ut dirigens actum, et ut informans opus operatum.

Et ideo constat quod quicquid defectus vel deviationis a forma artis vel a fine accidit in effectu, non reducitur in scientiam artificis sicut in causam, etiam si defectus ille fuerit praescitus ab eo. Patet etiam, quod principalitas causalitatis consistit penes voluntatem quae imperat actum. Unde manifestum est, quod scientia vel praescientia Dei causalitatem non habet respectu mali, quod est deviatio a forma et a fine; sed tantum respectu honorum, secundum quod consequuntur formam divinae artis et finem. Non tamen ita quod respectu eorum dicat perfectum rationem causalitatis, nisi secundum quod adjungitur voluntati. Et ideo dicit Magister sententiarum, quod scientia beneplaciti est causa rerum.

Ad primum ergo dicendum est, quod aliquid potest aliud sequi dupliciter. Uno modo per modum productionis, secundum quod unum produciatur ab alio. Et sic id ad cuius esse sequitur aliud, est vere causa ejus in essendo. Alio modo per modum consecutionis. Et sic id ad cuius esse sequitur aliud, non est causa in essendo, sed solum in consequendo. Et omne tale dicitur esse causa (1) sine qua non. Et talis causa dicitur esse scientia vel praescientia divina, si tamen scientiam ad simplicem notitiam referamus. Si vero scientiae sit adjuncta

voluntas (quae dicitur scientia beneplaciti), tunc est causa omnium quae fecit Deus.

Ad secundum dicendum, quod voluntas habet completam rationem causae, in quantum objectum ejus est finis secundum rationem boni, qui, scilicet finis, est causa causarum. Unde et voluntas imperium habet super alias vires animae. Et ideo voluntas Dei absolute dicitur causa rerum; sed scientia non est ita, sicut patet per praedicta. Licet enim in Deo sit una res; tamen aliquid attribuitur uni, quod non attribuitur alteri: et ideo ratio non procedit.

Ad tertium dicendum, quod Augustinus loquitur de scientia beneplaciti, sicut patet. Agit enim de bonis tantum; scilicet de creaturis, quas Deus facit. Quas quidem novit, non solum scientia simplicis notitiae, sed etiam scientia beneplaciti.

Licet autem scientia vel praescientia Dei aliquo modo sit causa rerum scitarum, ut dictum est; nullo tamen modo res possunt esse causa scientiae vel praescientiae Dei. Non enim Deus accipit cognitionem a rebus, sicut nos accipimus; sed seipsum intelligit et cognoscit (1). Quamvis igitur res non praescirentur nisi essent futurae, non tamen ideo praesciuntur, quia futurae (2). Si enim hoc esset, tunc temporale esset causa aeterni, et creatum causa increati, et ex creaturis penderet scientia Creatoris. Et ideo dicit Augustinus in 13 lib. de Trinitate: « Universas autem creaturas et spirituales et corporales, non quia sunt, ideo novit: sed ideo sunt, quia novit. » Cum ergo dicitur, res non praescirentur nisi essent futurae, non notatur ibi causa, nisi forte, sine qua non; sed importatur solum consequentia unius ad alterum.

CAPUT IV.

Utrum praescientia Dei necessitatem eveniendi rebus imponat.

Ex praedictis colligi potest, quod praescientia Dei necessitatem eveniendi rebus non imponat. Si enim praescientia Dei accipiatur pro simplici notitia futurorum, certum est, quod ipsa non est causa rerum praescitarum, ut ex jam dictis apparet: et ideo, licet praesciat res futuras, non tamen eis necessitatem imponit. Unde Augustinus super Joan.: « Deus, inquit, futurorum praescius, per Prophetam praedixit infidelitatem Judaeorum, sed non fecit. Non enim ideo quemquam ad peccandum cogit, quia futura hominum peccata praenovit: illorum enim praescivit peccata, non fecit. » Si autem scientia Dei accipiatur pro notitia beneplaciti, similiter necessitatem rebus contingentibus non imponit. Omnia enim sic cognoscit esse futura, sicut ventura sunt: et cuncta quae contingenter eveniunt (ut illa quae sunt a libero arbitrio, et a casu, et a fortuna), sic praescit esse futura contingentem, sicut etiam praescit modum contingentiae, secundum quem sunt. Unde sicut erroneum est dicere, quod humani actus et eventus praescientiae et ordinationi divinae non subsint; ita erroneum est dicere, quod ex praescientia, vel ordinatione divina, humanis actibus necessitas ingeratur. Tolleretur enim libertas arbitrii, legum utilitas, consiliandi opportunitas, sollicitudo bene vivendi, et poenarum praemiorumque justitia.

(1) Additur ad marginem: et in se et per se omnia alia.

(2) Additur ad marginem: sed futurae quia praesciuntur.

(1) Forte legendum conditio.

Sed contra hoc objicitur. Dictum est supra, quod praescientia beneplaciti est causa rerum. Sed omnis causa necessaria inducit necessario effectum: posita enim causa, necessario ponitur effectus, nisi sit deficiens in minori parte, sicut est causa naturalis. Cum ergo praescientia Dei non sit deficiens; videtur quod id quod praescitum est a Deo, sit necessarium.

2. Amplius, omne quod Deus praescit, est verum, quia scientiae Dei falsum subesse non potest. Sed (ut dicit Philosophus in 1 Perihier.), omne quod est, quando est, necesse est esse. Ergo si praescitum est modo verum, necesse est nunc esse verum. Sed futurum est praescitum. Ergo necessarium est futurum esse; ergo ex necessitate eveniet.

3. Praeterea, ponatur quod Deus praescit aliquid in partem affirmativam, ut Socratem currere. Tunc sic: aut est possibile Socratem non currere, aut non est possibile. Si non est possibile ipsum non currere; ergo ab aequipollenti, necesse est ipsum currere: et sic habetur propositum. Si autem possibile est ipsum non currere, ponatur ergo ipsum non posse (1) currere: (possibile enim est, secundum Philosophum, quo posito non sequitur inconveniens). Sed positum erat, quod Deus praesciret Socratem currere: ergo praescit esse futurum, quod non est futurum. Omnis autem talis scientia falsa est; ergo scientia vel praescientia Dei falsa erit; quod est impossibile. Relinquitur ergo, quod Socratem non currere, non sit possibile sed necessarium.

4. Item, si Deus praescit Socratem currere; aut est possibile aliter evenire, aut non est possibile. Si non est possibile aliter evenire, ergo necessarium est sic evenire, sicut praescitum est, et sic habetur propositum. Si autem possibile aliter evenire quam Deus praescit; ergo divina praescientia est fallibilis et incerta: quod est falsum.

5. Adhuc, secundum Philosophum in lib. Prior., Ex majori de necessario et minori de inesse, sequitur conclusio de necessario. Inde sic: omne praescitum a Deo necesse est esse verum. Sed Socratem currere est praescitum a Deo, ergo necesse est esse verum. Et sic idem quod prius.

6. Item, in omni vera conditionali, si antecedens est necessarium absolute, (2) quia ad antecedens semper sequitur consequens, et ad necessarium nunquam sequitur nisi necessarium, sicut ad verum nunquam sequitur falsum, quamvis ad falsum aliquando sequatur verum, ut probatur in 1 Prior. Sed in hac conditionali, Necesse est Socratem currere, si est praescitum a Deo: antecedens est necessarium absolute: tum quia omne praescitum est necessarium, tum quia omne aeternum est necessarium. Ergo Socratem currere, est necessarium absolute.

In contrarium est auctoritas Augustini sumpta a simili in lib. de Libero arbitrio, dicentis: « Sicut tu memoria tua non cogis esse facta quae praeterierunt, sic praescientia non cogit fieri quae futura sunt. »

Item potest ostendi per rationes ducentes ad impossibile. Si enim praescientia Dei necessitatem rebus imponeret (sicut dictum est), tolleretur

libertas arbitrii, periret consiliandi opportunitas, frustra bonis praemia et malis supplicia ponerentur, injuste boni praemiarentur et mali punirentur, laus et vituperium deperiret (quia, ut dicit Hieronymus, nemo peccat in eo quod vitare non potest), peccata nostra ad auctorem honorum omnium referrentur, nec speculandi aliquid, vel deprecandi ratio nulla esset.

Respondeo. Dicendum, quod propter hujusmodi difficultates duplex fuit error circa istam materiam. Quidam enim, propter ordinem causae ad causatum, dixerunt quod, cum praescientia Dei sit causa rerum et sit immutabilis, rebus necessitatem imponit; et ideo abstulerunt liberum arbitrium et peccatum. Et haec positio fuit haeretica et iniqua, quia destruit bonos mores. Alii vero propter ordinem scientiae ad scitum dixerunt, quod cum scientia sit certa cognitio, ex ipsa ratione certitudinis requirit determinationem in re scita. Sed in futuris contingentibus, non est alterum determinate verum; et ideo, de eis certa cognitio esse non potest, nisi quando sunt. Cum autem Dei cognitio sit certissima et infallibilis, negaverunt Deum de futuris contingentibus praescientiam habere; cogitantes intellectum divinum ad modum intellectus nostri, cognitionem accipere. Et haec similiter positio haeretica fuit et impia, quia derogat nobilitati divinae.

Et ideo positio vera et catholica est, quae Deum honorat, et bonos mores conservat:

Conclusio.

In Deo est certissima praescientia futurorum omnium, nec tamen rebus contingentibus necessitatem imponit. Quomodo autem hoc esse valeat, sic percipi potest. Manifestum est, quod quando sunt multae causae ordinatae, effectus ultimus non sequetur causam primam in necessitate vel contingentia, sed causam proximam; quia virtus causae primae recipitur in causa secunda secundum modum causae secundae. Nam omne quod recipitur in aliquo, est in eo secundum modum recipientis, et non secundum modum recepti. Effectus enim ille non procedit a causa prima nisi secundum quod virtus causae primae recipitur in causa secunda; ut patet in fructificatione arboris, cujus causa remota, sive prima, est motus solis, proxima vero est virtus generativa plantae. Fructificatio autem impedi potest per impedimentum virtutis generativae, quamvis motus solis invariabilis sit. Similiter (1) etiam scientia Dei, licet sit invariabilis causa omnium, effectus tamen producuntur ab ipsa per operationes causarum secundum. Et ideo mediantibus causis secundis necessariis, producit effectus necessarios; et mediantibus causis secundis contingentibus, producit effectus contingentes.

Sed adhuc manet dubitatio major de infallibilitate divinae praescientiae: quia licet prima causa possit stabilis esse cum defectu causae secundae (sicut motus caeli cum sterilitate arboris), scientia tamen Dei non potest stare cum defectu causae secundae. Non enim potest esse, quod Deus sciat simul hunc hominem currere, et quod ipse homo deficiat a cursu. Et hoc est propter certitudinem scientiae ipsius. Ad hoc ergo quod sit certa scientia, oportet invenire aliquam certitudinem in re scita.

(1) *Istud posse superfluit.*

(2) *Supple: et consequens est necessarium absolute.*

(1) *Id. a simili.*

Secunda est, quod antequam res sit, non habet esse nisi in causis suis. Sed causae quaedam sunt, ex quibus necessario sequitur effectus, quae impediri non possunt. Et in istis causis habet effectus esse certum et determinatum, adeo quod potest ibi fieri demonstratio; sicut est ortus solis, et eclipsis solis et lunae, et huiusmodi. Quaedam autem sunt, ex quibus sequuntur effectus in majori parte, sed tamen deficiunt in minori. Unde in istis causis effectus futuri non habent certitudinem absolutam, sed quandam, in quantum sunt magis determinatae causae ad unum, quam ad aliud. Et ideo per istas causas potest accipi scientia conjecturalis de futuris. Quae tanto magis est certa, quanto sunt causae magis determinatae ad unum; sicut est cognitio medici de sanitate infirmi, ac morte futura. Et iudicium astrologi de ventis et pluviis futuris.

Quaedam vero causae sunt, quae se habent ad utrumlibet. Et in istis causis effectus futuri nullam habent certitudinem, vel determinationem. Et ideo contingentia ad utrumlibet, in causis suis nullo modo cognosci possunt; sed quando iam efficiuntur in rerum natura, tunc habent in seipsis esse determinatum. Et ideo quando sunt in actu, certitudinaliter cognoscuntur: ut patet de eo qui videt Socratem currere; quia tunc certam cognitionem habet de cursu ipsius; nam Socratem currere, dum currit, necessarium est. Intellectus autem divinus ab aeterno intuetur unumquodque contingentium, non solum prout est in causis suis, sed prout est in esse suo determinato. Nisi enim hoc esset, aliter cognosceret rem postquam est, quam antequam fieret; et sic de eventibus rerum aliquid accresceret cognitioni eius. At vero cognitio Dei non causatur a rebus, sicut nostra; sed potius ipsa est causa rerum cognitarum. Scientia ergo Dei, cum sit vera et perfecta, eo modo quo res futurae sunt, eas evenire cognoscit. Et ideo ab aeterno uno intuitu vidit singula tempora, et cunctos hominum actus, et rem talem esse in hoc tempore, et in hoc deficere. Patet igitur quod praescientia Dei perfecte et invariabiliter cognoscit res futuras prout eveniunt, nec tamen rebus contingentibus necessitatem imponit.

Ad primam ergo dicendam, quod effectus non trahit necessitatem a causa prima, sed solum a causa proxima, ut dictum est.

Ad secundam dicendam, quod dictum Philosophum intelligitur de eo, quod aliquid in actu ponit circa subjectum; quod postquam positum est, impossibile est non esse positum. Sed verum de futuro nihil ponit circa subjectum; quia non est verum pro praesenti, sed solum pro futuro; et ideo nullam habet necessitatem.

Ad tertium dicendum, quod duplex est necessitas: scilicet absoluta, et conditionata, sive respectiva. Necessitas absoluta quae opponitur contingentiae, dicitur necessitas consequentis, quae est ex causis necessariis. Necessitas autem conditionata, est ex suppositione sive conditione; et dicitur necessitas consequentiae. Et haec non opponitur contingentiae, quia non est ex causis necessariis absolute. Nam aliquid contingens necessario sequitur, facta suppositione; ut si ponatur quod Socrates currit, necessario sequitur quod moveatur.

Dicendum ergo, quod actus divinae cognitionis transit super contingens (etiam si futurum sit nobis), quia ei semper est praesens, sicut transit visus noster super ipsum cum est praesens. Et quia omne

quod est, dum est, necesse est esse, quod tamen absolute non est necessarium; ideo in se consideratum, est contingens; sed relatum ad Dei cognitionem, est necessarium; quia ad ipsam refertur secundum quod est in esse actuali, cum aeternitati omnia sint praesentia. Non enim Deus videt tantum hanc rem respectu praecedentis temporis esse futuram, et respectu futuri esse praeteritam; sed videt id tempus, in quo est praesens, et rem esse praesentem in hoc tempore. Unde omnino simile est, si ego videam praesentialiter Socratem currere, quod quidem in se contingens est, sed relatum ad visum meum, est necessarium. Unde secundum distinctionem positam, dicendum est, quod praescitum est necessarium necessitate consequentiae, sive conditionata, et non necessitate consequentis, sive absolute.

Ad quartum dicendum, quod infallibilitas et certitudo praescientiae Dei, provenit ex hoc, quod rem videt semper ut praesentem, sicut dictum est. Nam tamen ex hoc, quod res praeseita necessitatem absolutam acquirat, sed conditionatam solum, ut iam patuit.

Ad quintum dicendum, quod ista propositio, Omne scitum a Deo, necesse est esse, est duplex. Potest enim esse de dicto; et sic est composita, et est vera; quia hoc dictum est necessarium, scilicet Scitum a Deo, est verum. Vel potest esse de re; et sic est divisa, et falsa: hanc enim rem quae ponitur scita a Deo, non est necesse fieri, quia contingenter fit. Et similiter conclusio duplex est. Hujus autem distinctionis ratio est; quia potest illud sumi secundum conditionem quae subiacet divinae scientiae, et hoc est secundum quod habet esse determinatum in actu, et sic necessitatem habet. Vel potest ista res sumi sine ulla conditione, et sic non est necessarium; quia potest considerari prout est in causis suis, antequam sit in actu, et ibi non habet necessitatem, nec ibi tantum est scita a Deo futura esse; non enim scit Deus effectum contingentem esse determinatum in sua causa, quia esset falsa scientia, cum in causa sua non sit determinatus.

Ad sextum dicendum, quod ad hoc argumentum quidam sic respondent, et dicunt, quod hoc antecedens, scilicet esse praeseitum a Deo, est necessarium, nec tamen consequens est necessarium; quia illa regula intelligitur tantum in illis conditionalibus, in quibus antecedens est causa consequentis. Sed quia regula illa non probatur a Philosopho de ratione causalitatis, sed ex ratione consequentiae (secundum quam ex necessario sequitur necessarium, sive sit causa, sive effectus); ideo aliter potest dici, quod antecedens est necessarium absolute, tamen ista res non potest subiacere divinae scientiae nisi dum est in actu, secundum quod determinationem et certitudinem habet: ipsam enim necesse est esse, dum est. Et ideo, similis necessitas inferenda est in consequente: ut scilicet accipiatur ipsum, quod est Socratem currere, secundum quod est in actu; et sic determinationem et necessitatem habet. Unde patet, quod si sumatur Socratem currere secundum hoc, quod ex antecedente sequitur, necessitatem habet; non enim sequitur ex antecedente, nisi secundum quod substat divinae scientiae; cui subicitur, prout consideratur praesentialiter in suo esse actuali: unde sic etiam sumendum est consequens. Et hoc modo patet, quod scilicet ex hypotesi, consequens necessarium est; necesse est enim Socratem currere dum currit.

CAPUT V.

Utrum praedestinatio habeat certitudinem.

Post haec etiam de praedestinatione restat investigare. De qua hic ad praesens, praeter ea quae dicta sunt, duplex consideratio erit. Prima quidem, utrum praedestinatio certitudinem habeat. Secunda, utrum necessitatem imponat.

Ad primum ergo sic proceditur. 1. Videtur quod praedestinatio certitudinem non habeat. Dicitur enim Apoc. 5, 11: « Tene quod habes, ne alius accipiat coronam tuam. » At hoc intelligitur de corona praesentis justitiae, aut de corona gloriae. Sed non de corona praesentis justitiae; quia gratia, quam quis habet, eo peccante destruitur, nec de subjecto in subjectum mutatur; ergo intelligitur de corona gloriae. Sed gloria non est alicujus in statu vitae, nisi secundum quod est ei praedestinata; ergo videtur quod unus possit accipere quod alii praedestinatum est; et sic praedestinatio certa non erit.

2. Praeterea, Gregorius in Moral. dicit, quod alii eadentibus, in eorum locum alii succedunt. Sed locus gloriae non potest dici eorum, nisi quia est eis praedestinatum; ergo idem quod prius.

3. Item in Psal. 68, 29, dicitur: « Deleantur de libro vitae, et cum justis non scribantur. » Sed non potest deleri de libro, nisi quod ibi scriptum est. Cum ergo praedestinatio sit liber vitae, videtur quod aliquis a praedestinatione possit deficere, et ita certitudinem non habebit.

4. Amplius, eorum quae non sunt determinata, nec in se, nec in causis suis, non potest esse certitudo. Sed motus liberi arbitrii, quod est causa ad utrumlibet, non sunt determinati nec in se, nec in causis suis, antequam sint. Cum igitur effectus praedestinationis expleatur motibus liberi arbitrii, qui sunt opera meritoria; sequitur quod praedestinatio nullam certitudinem habeat.

In contrarium est auctoritas Augustini in libro de Correctione et gratia, cap. 15, dicentis: « Certus est numerus electorum, qui non potest minui nec augeri. »

Praeterea, 2 ad Timoth. 2, 19, dicitur: « Novit Deus qui sunt ejus. »

Cum ergo divina cognitio sit certa et infallibilis, ut supra dictum est; et praedestinatio in sui ratione praescientiam includat: praedestinatio certa erit.

Respondeo. Dicendum, quod cum divina cognitio perfecta sit, certa est et infallibilis. Et ideo non solum numerus praedestinatorum Deo certissimus est, licet incertus sit nobis, sed etiam numerus reproborum. Sciendum tamen est, quod secundum statum praesentis justitiae, quidam habentes gratiam perdunt eam, dum in peccata labuntur; et eis cadentibus, in eorum locum alii admittuntur, dum opera ipsorum in charitate facta, quae sibi et aliis ponderant (1), secundum quod charitas omnia merita sanctorum communia facit, ipsis peccantibus, eis prodesse desinunt ad aeternae vitae meritum: eorum autem fructus in illis manet qui in gratia perseverant. Non tamen ita quod eadem gratia numero quae in uno erat, ipso peccante, in alium trasmutetur. Unde secundum statum praesentis justitiae, nunquam Ecclesia destituitur existentibus in gratia; quia quibusdam peccantibus, in gratiam alii a Domino advocantur. Et totum est certissimum apud

(1) *Lege proderant.*

Deum: unde Apocalyp. 5, 11, super illo verbo, « Tene quod habes etc. » dicit Glossa: « Cum Deo sit certus numerus suorum, si quis labatur, alius misericordia in locum ejus subinducitur, sicut per superbiam Judaeorum gentilitas subintravit. » Et per hoc patet responsio ad primum et secundum argumentum.

Ad tertium dicendum, quod praedestinatio dicitur liber vitae, secundum quod in eo dicitur aliquid scribi, non solum quantum ad praesentem justitiam, sed etiam quantum ad futuram gloriam; et sic nullo modo potest dici aliquis deleri de libro vitae. Sed illud quod est ibi scriptum quantum ad praesentem justitiam tantum, dicitur deleri, non mutatione facta ex parte libri, ut in eo aliquid fuerit, quod postmodum non sit; sed ex parte illius qui in eo scriptus erat, in quantum scilicet ipse mutatur a statu praesentis justitiae.

Ad quartum dicendum, quod contingens futurum, ut motus liberi arbitrii, quamvis non sit determinatum in causa sua, est tamen determinatum in esse suo secundum quod est in actu. Et sic subiacet certitudini praescientiae, sicut supradictum est de futuris contingentibus (in praecedenti capite.)

CAPUT VI.

Utrum praedestinatio necessitatem imponat.

Deinde investigandum est, utrum praedestinatio necessitatem imponat. Et 1. videtur, quod sic. Quandoque enim aliqua causa est tantae virtutis ad producendum effectum, quod impediri non potest, necessitatem et coactionem inducit. Sed praedestinatio quae est causa salutis hominum, voluntatem Dei nominat, quae impediri non potest. Unde dicitur Esther 15, 9, « Non est qui tuae possit resistere voluntati. » Ergo praedestinatio necessitatem imponit. Cui rei videtur attestari Apost. ad Roman. 9, 18, dicens: « Cojus vult miseretur, et quem vult indurat. » Et Psal. 134, 6: « Omnia quaecumque voluit Dominus fecit. »

2. Praeterea, nulla voluntas ligata vel impedita ad eliciendum proprium actum est libera, sed coacta. Sed voluntas humana per praedestinationem ligatur et impeditur ad eliciendum actum proprium, quod est velle; ut videtur dicere Apostolus ad Roman. 9, 16: « Non est volentis, nec currentis, sed miserentis Dei. » Interlin.: « Non est volentis, scilicet velle, nec currentis, scilicet currere, idest operari. » Ergo voluntas humana per praedestinationem coigitur. Et sic idem quod prius. Hoc idem confirmatur per id quod dicitur ad Philipp. 2, 15: « Deus est qui operatur in vobis et velle et perficere pro bona voluntate, » scilicet sua, ut dicit Interlin. Ergo talis erit unusquisque qualem vult Deus, cum nihil possit nisi quod Deus vult. Ad idem ostendendum valet id quod dicitur Joan. 6, 4: « Nemo potest venire ad me, nisi Pater qui misit me, traxerit eum. »

Uterius videtur, quod Deus sit causa reprobationis et excaecationis, sicut est causa praedestinationis, et eodem modo reprobatio necessitatem imponat.

Primo per id quod dicit Apost., 2 ad Corinth. 4, 4, « Deus hujus saeculi excaecavit mentes infidelium. » Et una Glossa exponit hoc de Deo vero. Ergo ipse est causa excaecationis.

2. Ad idem est quod dicitur ad Rom. 9, 16: « Cojus vult miseretur, et quem vult indurat. »

5. Amplius, secundum Philosophum in Posterioribus, si affirmatio est causa affirmationis et negatio est causa negationis. Sed velle divinum est causa quod iste habeat gratiam, quia scilicet ipse Deus vult. Ergo videtur quod non velle Dei sit causa quare iste gratiam non habeat. Sed hoc est obduracionis. Ergo ex parte Dei accipienda est causa obduracionis.

4. Praeterea, sicut dicit Philosophus 2 Physicorum, id quod per sui praescientiam est causa salutis navis, scilicet gubernator, per sui absentiam est causa periculi. Sed Deus per sui praesentiam in anima est causa gratiae; ergo per sui absentiam est causa obduracionis.

Sed contra. Nullus juste culpatur vel laudatur, punitur vel remuneratur de eo quod ipsi necessitatem et coactionem ingerit, et ejus causa non est in ipso. Sed homo juste laudatur vel culpatur, punitur vel remuneratur de his quae ab ejus voluntate procedunt. Ergo praedestinatio voluntati hominis necessitatem non ingerit.

Respondeo. Dicendum ad primam quaestionem, quod licet praedestinatio certitudinem habeat, non tamen illa certitudo necessitatem salvandis imponit: sicut enim supra dictum est (1 cap.). Praedestinatio in suo intellectus includit praescientiam, voluntatem et providentiam. Providentia autem quamvis sit omnium, ut dictum est, non tamen omnia necessario eveniunt, sed secundum conditionem proximarum causarum, quarum naturas et ordinem providentia non destruit, sed conservat. Praescientia etiam non imponit necessitatem rebus, nec in quantum est causa, cum sit causa prima, cujus conditionem effectus non sequuntur, sed causae proxima. Nec in quantum certitudinem et determinationem habet; quia illa certitudo divinae praescientiae attenditur non secundum quod res sunt in suis causis, in quibus sunt ut possibile futurum tantum; sed secundum quod habet esse determinatum in actu, prout est praesens, et non ut futurum, ut supra expositum est cap. quarto. Voluntas etiam Dei cum sit causa universalis et prima omnium rerum, non excludit omnes proximas causas rerum. Nec hoc ex insufficientia voluntatis est, sed ex ordine sapientiae ipsius, quae effectus mediantibus aliis causis provenire disposuit; ut sic etiam causandi dignitas creaturae communicaretur. Unde divinae voluntatis efficacia exigit, ut non solum sit quod Deus vult, sed etiam ut hoc modo sit, sicut Deus vult illud esse. Et ita patet quod certitudo praedestinationis nullam necessitatem salvandis imponit.

Ad primum ergo dicendum quod quamvis Dei voluntas sit immutabilis et invincibilis, non tamen sequitur, quod omnis effectus ejus sit necessarius necessitate absoluta, quam habet res a causa proxima; sed solum necessitate conditionata, sicut etiam de praescientia dictum est.

Ad auctoritatem autem Apostoli, qui dicit, « cuius jus vult miseretur etc. » Dicendum est quod Apostolus intendit, quod Deus non praedestinat aliquem, vel infundit ei gratiam coactus, quasi ex necessitate naturae vel justitiae, vel ex meritis praecedentibus alienius; sed ex mera liberalitate voluntatis suae. Et quod ita debeat intelligi, patet per litteram praecedentem de Jacob et Esau; de quibus ibi dicitur, 3, 11: « Cum enim nondum nati essent, aut aliquid boni egissent aut mali, ut secundum electionem propositum Dei maneret,

« non ex operibus, sed ex vocante dictum est ei, « quia major serviet minori. »

Auctoritas autem Psalmistae non cogit dicere quod voluntas Dei necessitatem imponit, sed quod semper infallibiliter impleatur. Sciendum tamen est, quod Deus dicitur velle aliquid dupliciter. Uno modo proprie; et sic dicitur velle aliquid, cujus voluntas vere in eo est, et quod ei complacet. Et haec dicitur voluntas beneplaciti, quae semper in omnibus infallibiliter impletur. Et de hac loquitur Psal. et Isa. 46, 10: « Omnis voluntas mea fiet. » Alio modo dicitur velle aliquid metaphorice, idest per similitudinem, eo quod ad modum volentis se habet, in quantum praecipit, vel consulit, prohibet, vel permittit aliquid. Et haec dicitur voluntas signi, quae non semper impletur; de qua dicit Apostolus 1 ad Timoth. 2, 4: « Qui vult omnes homines salvos fieri, » cum tamen omnes salvi non fiant, sed multi damnentur. De hac etiam dicitur Matth. 25, 57: « Quoties « volui congregare filios tuos, quemadmodum galina congregat pullos suos sub alis suis, et non « luisti? »

Ad aliud, Dicendum, quod voluntas humana per praedestinationem non ligatur nec impeditur ad eliciendum proprium actum, sed juvatur. Ideo autem dicit Apostolus quod « non est volentis velle, « nec currentis currere, sed miserentis Dei, » quia nemo potest per conatum propriae voluntatis consequi gratiam, vel per naturalia propria opus gratuitum elicere, sine divino auxilio. Unde ipse Christus dicit Joan. 15, 5: « Sine me nihil potestis « facere. » Cujus ratio est, quia licet voluntas hominis libera sit, tamen hanc libertatem non habet nisi a Deo, qui est causa efficiens hujusmodi libertatis. Et sicut dicitur in libro de Causis, omnis causa primaria plus est influens super suum causatum, quam causa secunda; quia virtus et esse causae secundae, totum est a causa prima; et sic actus et operatio causae secundae reducitur in causam primam, cujus virtute operatur. Et per hunc modum dicit Apostolus, quod « Deus operatur in « nobis velle et perficere. »

Ad id vero quod dicitur, « Nemo potest venire « ad me, nisi Pater meus traxerit eum, » dicendum, quod homo trahitur tripliciter: aliquando enim trahitur violentia, sicut Susanna trahebatur ad mortem, ut dicitur Dan. 13, et Eleazarus trahebatur ad supplicium, ut dicitur 2 Machab. 6, 18. Et de hac tractione dicitur Prov. 24, 11: « Qui trahuntur ad interitum liberare ne cesses. »

Aliquando vero trahitur homo amore, vel delectationibus alicuius, vel beneficiis provocatus, sicut trahitur puer ovo vel pomo sibi ostenso: unde dicit Poeta: « Trahit sua quemque voluptas. » De hac tractione dicitur Oseae 11, 4: « In funiculis Adam « traham vos in vinculis charitatis. » Et Cant. 1, 52: « Trahe me etc. » Et Joan. 12, 5: « Si exaltatus fuero a terra, omnia traham ad me ipsum. » Aliquando autem trahitur timore supplicii territus, sicut trahuntur qui timent supplicia. De hac tractione dicitur Jacobi 2, 6: « Nonne divites per potentiam opprimunt vos, et ipsi trahunt vos ad « judicia? » Tractione ergo ista de qua loquitur Christus, ut ostendit Glossa, non est violentiae, nec necessitatis, nec inviti, sed voluntatis et desiderii.

Ad secundam quaestionem dicendum, quod reprobatio in suo intellectu tria includit: scilicet aeternam praescientiam meritorum, temporalem obdu-

rationem sive excaecationem, et finalem damnationem. Primum, scilicet praescientia meritorum, causam non habet: cum enim Deus non accipiat cognitionem a rebus, sicut nos accipimus, sed ex seipso res intelligat et cognoscat, nullo modo res futurae possunt dici causa praescientiae Dei, sicut supra in fine tertii capituli dictum est.

Item, cum praescientia secundum propriam rationem, non aliud dicat nisi simplicem notitiam futurorum, non importat aliquam causam; et ideo futurorum, et praecipue malorum, causa esse non potest, sicut supra (tertio capitulo) dictum est. Et secundum hoc reprobatio est tantum praescientia culpae sed non est causa. Secundum autem et tertium, scilicet temporalis obduratio, et finalis damnatio, duplicem causam habent: unam ex parte hominis per modum meriti, aliam ex parte Dei per modum iustitiae, culpae merito poenam adhibentis. Obduratio enim quandoque dicitur actus voluntatis obstinatae in malo, cui pertinaciter adhaeret. Et sic constat quod obdurationis causa non est Deus, sed homo; sicut nec alterius actus peccati, in quantum deformis est. Aliquando autem obduratio dicitur ipsa privatio gratiae, quae etiam excaecatio dicitur: quia gratia est quoddam lumen animae, et perfectio quaedam habitans ipsam ad bonum. Aliquem autem carere gratia, ex duobus contingit: tum quia ipse non vult recipere, tum quia Deus non ei infundit, vel non vult infundere. Horum autem duorum talis est ordo, ut secundum non sit nisi ex suppositione primi. Cum enim Deus nihil velit nisi bonum, non vult aliquem gratia privare, nisi secundum quod est quoddam bonum. Sed quod aliquis careat gratia, non est bonum simpliciter. Unde hoc absolute consideratum, non est volitum a Deo. Est tamen bonum ut quis careat gratia, si eam habere non vult, vel si negligenter ad eam habendam se praeparat: quia justum est, et hoc modo est volitum a Deo. Patet ergo, quod huiusmodi defectus absolute est causa prima ex parte hominis. Et per hunc modum quandoque invenitur Deus dici causa excaecationis vel obdurationis, non quidem immittendo malitiam, sed non impertiendo gratiam, sicut nec digni sunt, ut dicit Augustinus. Si enim non necessario impertitur: in ipso est impertiri, et non impertiri. Unde ejus quod est, non impertiri, aliquo modo causa est. Obduratio igitur ex parte hominis habet rationem culpae, sed ex parte Dei rationem iustitiae. Similiter finalis damnatio habet duplicem causam; scilicet ex parte hominis, commissionem culpae, ex parte Dei, illationem poenae.

Et per hoc patet responsio ad primas duas auctoritates, quod Deus excaecat mentes infidelium, non impertiendo malitiam, sed juste subtrahendo gratiam. Similiter, obdurat quem vult, quia non cogitur cuiquam indigno conferre gratiam. Nec est contra voluntatem Dei, sed secundum voluntatem ipsius, quod aliquis pro merito malitiae suae obduret: in quantum obduratio dicit poenam justo iudicio culpae obstinationis illatam.

Ad tertium dicendum, quod effectus non sequitur nisi concurrentibus omnibus causis; sed ex defectu unius causae tantum consequitur negatio effectus. Dico igitur, quod causa gratiae sicut agens, est ipse Deus: et sicut recipiens, ipsa est anima per modum subjecti et materiae. Et ideo, quia formae inductae non est causa materia neque subjectum, nisi sit

tale subjectum, ex cuius principiis fluat accidens, quale accidens non est gratia; ideo non dicitur simpliciter anima causa gratiae, sed recipiens tantum: Deus autem est causa ipsius. Dicitur tamen anima causa malitiae. Nec oportet quod omnis defectus incidat ex parte agentis, sed potest incidere ex parte recipientis. Et ita est in proposito. Ipsa enim anima est causa obdurationis, in quantum obduratio culpam dicit.

Ad quartum dicendum, quod Deus, quantum est in se, nulli est absens: sed homo a Deo praesente se absentat, sicut se absentat a praesenti lumine qui claudit oculos. Et ideo non est simile quod pro simili ponitur.

CAPUT VII.

Quare Deus creet hominem, quem praescit esse damnandum.

Ultimo considerandum est, quare Deus facit hominem, quem praescit esse damnandum. Sunt enim quidam vesani, qui Deo in hoc iniquitatis maculam imponere non verentur, dicentes cum iniquum et impium, qui opus suum facit ad intolerabiles et interminabiles cruciatus.

Rationes igitur adducendae sunt ad tantam vesaniam refruendam et Dei iustitiam demonstrandam. Et primo ostendendum est, quod voluntas Dei facientis hominem quem praescit esse damnandum, non est iniqua; deinde ponendae sunt rationes probantes quare Deus facit hominem quem praescit esse damnandum. Sciendum itaque quod ratio quare Deus hoc facit, est sua voluntas quae causa est omnium quae ab eo fiunt. Unde dicit Augustinus in 5 lib. de Trinit.: « Non nisi Dei voluntas causa prima est « sanitatis et aegritudinis, praemiorum atque poenarum, gratiarum et retributorum. » Haec igitur sola est unde ortum est quicquid est. Voluntas autem ejus injusta vel iniqua esse non potest. Ex duobus enim contingit voluntatem alicujus a rectitudine deviare: videlicet aut ex ignorantia, aut ex affectione perversa. Quae quidem duo in Deo inesse non possunt. Cum sit summe sapiens, ignorantia in eum non cadit. Unde dicitur Job 12, 15, « Apud eum est sapientia et fortitudo, « et ipse habet consilium et intelligentiam. » Et ideo clamat Apostolus ad Roman. 11, 55: « O altitudo divitiarum sapientiae et scientiae Dei etc. » Hinc etiam Job 9, 4 dicitur: « Sapiens corde et « fortis robore. » Item, cum omnis artifex naturaliter diligat opus suum, impossibile est opificem omnium odire aliquam creaturam; et ideo affectio inordinata in eo esse non potest. Unde dicitur Sap. 11, 25: « Diligis omnia quae sunt, et nihil odisti « eorum quae fecisti, nec etiam odians aliquid constituisti aut fecisti. » Ex his ergo apparet Dei voluntatem creatricem omnium iustissimam fore, nec maculam aliquam iniquitatis habere. Et hoc est quod dicitur Deut. 32, 4: « Deus fidelis et absque « ulla iniquitate, justus et rectus. » Item Habacuc 1, 15: « Mundi sunt oculi tui, ne videns malum; « et respicere ad iniquitatem non poteris. » Et ideo dicit Psalm. 10, 8: « Justus Dominus et iustitias dilexit, » quantum ad ornatissimam affectionem, « Aequitatem vidit vultus ejus, » quantum ad perfectissimam cognitionem. Licet autem Deus sit rectissimus et nihil odiat eorum quae fecit, dicitur autem odire aliqua metaphorice, non in quantum

tum ab ipso procedant, sed in quantum egrediuntur a regula rectitudinis suae. Illud enim quod non esse volumus, odire dicimur. Unde, cum mala fiant contra regulam rectitudinis illius, quia sunt privatio modi speciei et ordinis, ut dicit Augustinus, ea vult non esse; et ideo malos odio habere dicitur. Unde Sap. 14, 9: « Odio sunt Deo impius et impietas ejus. » Dicitur etiam odire illos quorum punitionem vult. Sic enim ad modum odientis se habet. Et ideo dicit Psalm. 5, 7: « Odisti omnes qui operantur iniquitatem: perdes omnes qui loquuntur mendacium. » Quia vero divina voluntas est causa rerum omnium, ipsa causam habere non potest. Voluntas enim Dei est illi causa volendi: finis autem divinae voluntatis est sua bonitas. ipsa enim Bonitas Deo est causa volendi. Et ideo dicit Augustinus in lib. 85 quaestionum, q. 27, in fine, 4, 10, quod voluntatis ejus causa quaerenda non est: nam, ut idem dicit in lib. contra Manicheos, Qui dicit, quare Deus voluit facere caelum et terram, majus aliquid quaerit, quam est voluntas Dei: nihil autem majus inveniri potest. Quamvis autem divina voluntas causam non habeat aliquid creatum: nihilominus tamen potest aliqua volendi ratio assignari vel bonitas ipsius, vel aliquid quod ad bonitatis vel sapientiae ipsius pulchritudinem ordinetur. Si enim nulla posset divinae bonitatis ratio assignari, cogeremur in quorundam errorem declinare, dicentium omnia procedere a Deo secundum simplicem voluntatem, ut de nullo oporteat reddere rationem quare Deus vult (1). Quod divinae Scripturae manifeste contrariatur, quae Deum perhibet secundum suam sapientiam omnia fecisse, secundum illud Psalm. 165, 24: « Omnia in sapientia fecisti etc. » Et Eccles. 1, 10 dicitur: « Deus effudit sapientiam suam super omnia opera sua. » Augustinus etiam in lib. 2 super Genesim ad lit. dicit: « Moven-
tur quidam dicentes, Cur creavit Deus quos futuros malos praescibat? » Et respondens, dicit « Quia providit, quid boni de malis eorum esset factururus: si enim eos fecit ut in eis relinqueret, unde et ipsi aliquid facerent, quo quicquid etiam culpabiliter eligerent illum de se laudabiliter operantem invenirent. »

Rationes cur creet homines quos novit esse damnandos.

Compescamus igitur humanam temeritatem quae Deo iniquitatis maculam imponere non veretur; et approbantes divinam justitiam, assignemus aliquas rationes; quare Deus creat hominem quem praescit esse damnandum. Sit igitur prima ratio talis ex parte divinae liberalitatis. Melius est esse aliquid cum aliquo defectu, quam non esse simpliciter. Cum autem in peccatore damnando duo sint: videlicet natura quae bona est, et culpa quae mala est: non debuit Deus propter culpam subtrahere naturam; alias liberalitatem suam subtrahere videretur. Sicut videamus quod bonus artifex arcam facit, quam etiam praescit aliquam maculam contracturam. Et haec ratio potest colligi ex illo verbo Apostoli 2 ad Timoth. 2, 15: « Si non credimus, ille fidelis permanet, negare seipsum non potest. »

Si autem objiciatur, quod artifex, si sciret arcam in brevi comburendam, eam non faceret: Re-

spondendum est, quod si artifex sciret etiam in ipsa combustionem suam sapientiam relucere debere, et arcam in igne non defecturam, non propter hoc se subtraheret a factioe ipsius. Unde, cum Deus sciat etiam in damnatis suam justitiam et suam sapientiam relucere, dum culpam per supplicium punit, conveniens erat ut propter hoc non se subtraheret a productione hominum sua illorum culpa damnandorum.

Secunda ratio sumitur ex parte divinae providentiae. Bonum enim totius est melius quam bonum particulare. Nam bonum particulare ordinatur ad bonum universale, sicut imperfectum ad perfectum. Ad ordinatam ergo providentiam pertinet potius promovere et conservare bonum universale, quam bonum particulare; et aliquando propter bonum universale particulare negligere: imo aliquando contra particulare propter universale facere. Sicut ad conservationem reipublicae principes et rectores suspendunt latrones, et interficiunt homicidas. Cum igitur natura humana per generationem propagetur et conservetur; si Deus hominem damnandum propagari vel nasci non sineret, vel animam non infunderet, ordinem generationis humanae destrueret, et sic bono universali particulare praeponeret et rectitudo suae providentiae cassaretur; quod penitus est absurdum. Congruum est igitur, ut propter generalius bonum fiat homo etiam damnandus, Deo aliquid melius providente: ut dicit Apostolus ad Hebr. 11, 40.

Tertia ratio sumitur ex parte divinae providentiae et reverentiae simul. Nam quanto magis rector auget reipublicam, et ipsos reipublicae conservatores gloriosius promovet et potioribus donis remunerat etiam cum suppliciis aliquorum, deprimendo scilicet et cruciando eorum adversarios et reipublicae destructores, tanto laudabilior redditur. Cum igitur gloriam beatorum augeat consideratio tormentorum hostium suorum quae ipsi Dei beneficio evaserunt, congruum fuit ut Deus etiam homines conderet, quos sciebat esse damnandos. Beatis enim accrescit gloria de perditione malorum: tam quia gaudent de vindicta eorum, juxta illud Psalm. 57, 11: « Laetabitur justus cum viderit vindictam: » Tum quia ipsi eorum supplicia evaserunt. Et propter hoc in gratiarum actiones et laudem et reverentiam exuberant Creatoris, secundum illud 2 Machab. 4, 11: « De magnis periculis a Deo liberati magnifice gratias agimus ipsi. » Unde dicitur in Psalm. 95, 11: « Laetetur mons Sion et exultent filiae Judae, propter judicia tua, Domine. » Et ideo dicit Augustinus super Genesim: « Frustra dicitur, « Non debet Deus creare quos praescibat malos futuros: sciebat enim eos bonis profuturos et juste pro mala voluntate puniendos. » Hanc rationem innuit Apostolus ad Roman. 9, 22, dicens: « Volens Deus ostendere iram et notam facere potentiam suam, sustinuit in multa patientia vasa irae, apta in interitum, ut ostenderet divitias gloriae suae in vasa misericordiae quae praeparavit in gloriam. » Si autem objiciatur, quod nullus debet procurare propriam reverentiam et aliorum utilitatem cum dispendio aliorum: Respondendum est, quod hoc verum esset, si fraudulencia vel aliqua injustitia committeretur; sed quando justitia non deseritur, sed servatur, ut in proposito fit, sicut ostensum est supra, semper debet honorum utilitas procurari.

Quarta ratio sumitur ex parte divinae potentiae

(1) *Al.* nisi quia.

et sapientiae simul. Nullus enim rex praepotens et veritatem diligens, debet occultare potentiam suam et impotentiam simulare: ne infirmus et impotens reputetur. Item nullus bonus artifex debet occultare sapientiam suam et ignorantiam simulare, ne inscius videatur. Unde dicitur Eccli. 20, 33: « Melior est qui celat insipientiam suam, quam homo qui abscondit sapientiam suam. » Si ergo Deus non fecisset quem sciebat esse damnandum, potuisset inscius et impotens reputari: et quod plus posset malitia, quam divina potentia vel sapientia. Cujus contrarium scriptum est Sapient. 7, 50: « Sapientiam non vincit malitia; attingit enim, » scilicet Sapientia, « a fine usque ad finem fertiter, et disponit omnia suaviter, » cap. 8, 1.

Hanc rationem tangit Apostolus ad Roman. 9, 21, cum dicit: « An non habet potestatem figulus lutu, ex eadem massa facere aliud quidem vas in honorem, aliud vero in contumeliam? »

Si autem obijciatur, quod nullus debet ostendere potentiam suam in alicujus injuriam: Respondendum est, quod Deus ex hoc nulli facit injuriam vel injustitiam, nec homo de Deo juste conqueri potest. Nam quicquid boni habet, a Deo habet, scilicet esse suum; malitiam autem habet a seipso, ut supra ostensum est. Unde dicit Augustinus super Genesim loquens de futuris damnandis: « A se habent voluntatem malam, a Deo naturam bonam et justam poenam. » Quod autem homo de bono conqueratur, injustum est: et ideo dicit Apostolus ad Roman. 9, 14: « Numquid iniquitas est apud eum? absit. » Et subdit 20: « Numquid dicit figmentum ei qui se finxit, Quid me fecisti sic? » Et Isai. 45, 9: « Vae qui contradicit factori suo: testa de sannis terrae, numquid dicit lutum figulo suo, Quid facis? »

Si autem obijciatur, quod damnatus vellet potius non esse quam sic esse, juxta illud Math. 26, 24: « Bonum erat illi, si natus non fuisset homo ille. » Ergo injustitia sit illi: Respondendum est quod licet damnati vellet potius non esse quam sic esse, non tamen absolute vellet non esse. Nullus enim potest simpliciter appetere destructionem sui esse, propter naturalem appetitum cujuslibet rei ad esse. Cum autem esse absolutum est melius quam conditionatum, non debet Deus propter appetitum conditionatum esse absolutum cassare.

Quinta ratio sumitur ex parte humanae arrogantiae. Si enim Deus non fecisset aliquem hominem damnandum, humana praesumptio salutem suam propriis meritis et non Dei gratiae ascripsisset, dum credidisset per virtutem propriam, et ex suis naturalibus vel ex suis operibus se posse salvare. Haec ratio tangitur ad Rom. 9, 11, cum dicitur: « Ut secundum electionem propositum Dei maneret: non ex operibus, sed ex vocante dictum est etc. » Unde ad Tit. 3, 5: « Non ex operibus justitiae quae fecimus nos, sed secundum misericordiam suam salvos nos fecit. » Et ideo ad humiliandam humanam superbiam loquitur Deus, Job 40, 5, dicens: « Numquid irritum facies judicium meum, et condemnabis me, ut tu justificeris? Et si habes brachium sicut Deus, et si voce simili tonas, circumda tibi decorem, et in sublime erigere, et esto gloriosus, et ego confitebor, quod salvare te possit dextera tua, » v. 9.

Quod Deus non debuit facere hominem impeccabilem.

Sunt etiam nonnulli qui secundum suam demerentiam, divinam providentiam reprehendunt dicentes, quod Deus talem hominem ita facere debuit, quod omnino peccare non posset; sequentes potius suam fatuam conceptionem, quam divinae providentiae rectissimam rationem. Si enim Deus creasset hominem talem, qui peccare non posset, plura inconvenientia sequerentur. Primum inconveniens est, quod libertas arbitrii tolleretur, et per consequens natura et nobilitas hominis cassaretur. Nobilitas enim hominis in hoc consistit, quod liberam habet electionem, dum ad utrumlibet flecti potest. Quod quidem animalia bruta, quae carent ratione, non habent, licet sensum et sensualitatis habeant appetitum. Unde dicere, quod Deus facere debuisset hominem qui peccare non possit, simile est ac si diceretur, quod debuisset eum facere animal brutum vel aliquid aliud minus nobile. Talibus contingit sicut dicit Psalm. 48, 21: « Homo, cum in honore esset, non cognovit seipsum; comparatus est jumentis insipientibus, et similis factus est illis. » Hominis ergo nobilitas quam contulit ei Deus, est quod habeat arbitrii libertatem, per quam potest ad utrumlibet flecti, habens discretionem boni et mali. Unde dicitur Eccles. 15, 14: « Deus ab initio constituit hominem et reliquit illum in manu consilii sui. » Et subditur, « Ante hominem vita et mors, bonum et malum: quod placuit ei dabitur illi. » Et ideo dicit Psalm. 8, 6: « Minuisti cum paulo minus ab Angelis etc. »

Aliud inconveniens est, quod meritorum et praemiorum ratio et justitia deperiret. Nullus enim meretur de eo cujus causa et libertas in ipso non est. Unde dicit Poeta: Quid meruere boves, animal sine fraude, dolove? Unde ratio merendi ex parte nostra est in libertate arbitrii. Et cum omne praemium causetur ex merito, cui respondet: si meritum non esset sublata libertate arbitrii, praemium non daretur: secundum illud Apostoli 2 ad Timoth. 2, 5: « Non coronabitur, nisi qui legitime certaverit. » Ad hoc ergo ut caeleste praemium daretur homini, oportuit ut meritum praecederet, causatum ex conatu arbitrii, cui tale praemium datur: sicut dicit Apostolus 2 ad Timoth. 4, 7: « Bonum certamen certavi, cursum consummavi, fidem servavi: In reliquo reposita est mihi corona justitiae, quam reddet mihi Dominus in illa die justus iudex etc. »

Tertium inconveniens est, quod bonitati et perfectioni universi detraheretur. Nam perfectio universi consistit in hoc quod omnes gradus bonitatis creaturae communicabilis continet. Si autem natura humana a suo gradu translata in altiore per Dei providentiam mutaretur, quamvis aliquod bonum humanae naturae accresceret, tamen bonitati universi aliquid detraheretur, dum non omnes gradus bonitatis impleti essent, illo gradu, ex quo natura humana translata esset, vacuo remanente. Cum autem bonum universi excedat bonum particulare cujusque naturae creatae, sicut etiam bonum gentis excedit bonum singularis hominis, ut in 1 Ethic. dicitur, debuit Deus humanam naturam facere qualem fecit, scilicet quae peccare posset, ut omnes gradus bonitatis impleret. Unde dicitur Deut. 32, 4: « Dei perfecta sunt opera. »

Quartum inconveniens est, quia impediretur il-

lud ex quo apparet Deus laudabilis. Nam in peccatis apparet etiam Deus multum laudabilis, dum per misericordiam parcit et per justitiam punit. Cum ergo id ex quo apparet Deus laudabilis, non debeat impediri, non debuit Deus omnino impedire peccatum faciendo hominem qui peccare non posset, ut perpetuo dici posset illud Psalm. 47, 1: « Magnus Dominus et laudabilis nimis etc. »

Quintum inconueniens est, quia si homini daretur, quod peccare non posset secundum conditionem suae naturae, arbitrii libertate servata, quaedam contradictionis implicatio sequeretur. Arbitrium enim ideo dicitur liberum, quia ad utrumlibet flecti potest: potest enim aliquid facere et non facere, et potest facere bonum et malum. Si ergo haberet liberum arbitrium ad peccandum, et peccare non posset per naturam, duo contradictoria essent simul vera, quod est impossibile.

Si autem objiciatur de arbitrio divino vel angelico, quod cum sit liberum, tamen peccare non potest: dicendum, quod cum Deus non habeat esse causatum vel dependens ab aliquo, secundum conditionem suae naturae, deficere nunquam potest, nec quantum ad esse nec quantum ad rectitudinem bonitatis; et ideo peccare non potest. Sed quaelibet creatura habet esse dependens et causatum ab alio, scilicet a Deo; et ideo secundum conditionem suae naturae quaelibet creatura deficere potest, et quantum ad esse et quantum ad rectitudinem voluntatis. Unde dicit Gregorius, quod omnia tenderent in nihilum nisi manu conditoris tenerentur. Et ideo quibuscumque confertur, ut in bono sic confirmentur, ut peccare non possint; hoc non habent per naturam, sed per Dei gratiam, per quam Filii Dei efficiuntur ut quodammodo divinae naturae consortes: secundum illud Psalm. 81, 6: « Ego dixi, Dii estis et filii Excelsi » omnes. »

Patet igitur ex praemissis, quod omnia quae a Deo fiunt, et bona et ordinata sunt. Et ideo dicitur

Genes. 1, 15: « Vidit Deus cuncta quae fecerat et erant valde bona. » Apostolus etiam dicit ad Rom. 13, 1: « Quae a Deo sunt, ordinata sunt. »

PRAEDICTORUM EPILOGUS.

Non posse naturaliter ab homine sciri, quare Deus in particulari hunc praedestinet, et hunc vel illum reprobet.

Quamvis autem superius inductae sint rationes ad ostendendum quod nulla injustitia apud Deum est ex eo quod facit hominem quem praescit esse damnandum: unusquisque tamen caveat diligenter ne nimis incautus praesumat assignare causam in speciali, quare hunc vel hos determinate Deus eligat, et illum vel illos non eligat. Hoc enim nullus mortalium scire potest, nisi forte Deus vellet hoc alicui specialiter revelare. Unde dicit Augustinus: « Cur potius hunc vel illum Deus liberet vel non liberet, scrutetur qui potest tam magnum profundum judiciorum Dei, verumtamen caveat praecipitium. »

Item, quare hunc trahat et illum non trahat, noli dijudicare, si non vis errare. Et Apostolus dicit ad Roman. 12, 5: « Non plus sapere, quam oportet sapere, sed sapere ad sobrietatem. » Qui enim hoc praesumeret perscrutari, Deo non praestaret obsequium, sed sibi ipsi iudicium generaret: juxta illud Proverb. 25, 27: « Sicut qui mel multum comedit, non est bonum: sic qui perscrutator est majestatis opprimetur a gloria: » illo scilicet disponente a cujus narratione cunctae linguae deficiunt. Qui et ipse consummatio sermonum existens, est Rex regum, et Dominus dominantium, Apoc. 19, 16: Cujus potestas non auferetur, et regnum non corrumpetur in saecula saeculorum, Amen.

INDEX

EORUM QUAE IN HOC VOLUMINE CONTINENTUR.

PROLOGUS.	pag. 1
QUAESTIO I. 1. Utrum theologia sit scientia; 2. quid sit ejus subjectum; 3. utrum sit sapientia; 4. de comparatione ejus ad alias scientias; 5. quomodo doceri debeat	2
QUAESTIO II. 1. utrum sacra doctrina dicatur sapientia; 2. qualiter ad alias doctrinas se habeat; 3. quis sit idoneus auditor ejus; 4. quis possit esse ejus doctor; 5. quomodo doceri debeat.	3
QUAESTIO III. 1. Utrum aliquis veritati insistere debeat, quae excedit facultatem sui intellectus; 2. utrum veritas fidei sit rationibus munienda; 3. utrum veritas animum hominis offendere possit; 4. utrum sit vituperabile quod ratio voluntati subjiciatur; 5. utrum similitudo voluntatum pariat diversitatem opinionum. "	6

DE MYSTERIO TRINITATIS

LIBER PRIMUS

Distinctio I.

QUAESTIO UNICA. 1. Cujus sit frui; 2. ejus sit uti; 3. quo sit fruendum; 4. quo sit utendum	9
---	---

Distinctio II.

De unitate essentiae, et de pluralitate personarum.

QUAESTIO I. 1. An Deus per essentiam sit unus, vel plures; 2. an in ipso sit aliqua pluralitas attributorum. "	11
QUAESTIO II. 1. An in Deo sit personarum pluralitas; 2. an sit illa pluralitas rei, vel rationis	12

Distinctio III.

An Deus possit cognosci a creatura, an possit cognosci per creaturam, et de vestigio Dei in creatura.

QUAESTIO I. 1. An Deus sit cognoscibilis a creatura; 2. an Deum esse sit per se notum.	15
QUAESTIO II. 1. An Deus per creaturam sit cognoscibilis	

et a quo; 2. utrum Trinitas per creaturam sit cognoscibilis	pag. 14
QUAESTIO III. Utrum in omni creatura sit vestigium Trinitatis et creatoris	" 15

Distinctio III. pars altera.

QUAESTIO I. 1. In quo sit in anima imago Dei; 2. de prima assignatione imaginis; 3. de secunda.	16
QUAESTIO II. 1. In quibus potentiis animae attendatur imago; 2. de his potentiis in comparatione ad suum subjectum, scilicet animam; 3. in comparatione ad objectum	ib.
QUAESTIO III. Utrum assignetur secundum habitus	18

Distinctio IV.

De generatione in divinis, et de praedicatione.

QUAESTIO UNICA. 1. An in divinis sit generatio; 2. supposito quod sit, an haec sit vera: Deus genuit Deum; 3. de aliis loquutionibus quae ex littera ista concluduntur; 4. utrum praedicatione affirmativa possit praedicari de Deo	19
---	----

Distinctio V.

QUAESTIO UNICA. 1. Utrum essentia generet; 2. utrum essentia generetur; 3. utrum Filius generetur de substantia Patris; 4. utrum Filius sit ex nihilo.	21
--	----

Distinctio VI.

QUAESTIO UNICA. 1. Utrum Pater genuit Filium necessitate; 2. utrum voluntate; 3. utrum natura sit divina essentia; 4. utrum Pater natura genuerit Filium	25
--	----

Distinctio VII.

De potentia generandi in Deo, et de communitate ipsius.

QUAESTIO I. 1. Utrum in Deo sit potentia ad generandum; 2. an illa potentia sit aliquid absolutum vel aliquid aliud	25
---	----

- QCAESTIO II. 1. Utrum potentia generandi sit in Filio; 2. utrum Filius possit alium filium generare; 3. utrum Pater possit generare alium Filium pag. 25
- Distinctio VIII.*
- De veritate et proprietate divinae naturae,
et de incommutabilitate.
- QCAESTIO I. 1. Utrum esse, Deo proprie conveniat; et de ordine hujus nominis, Quod est, ad alia divina nomina; 2. an esse divinum per diversas differentias temporis habeat significari. " 26
- QCAESTIO II. 1. An Deus sit immutabilis omnino; 2. an omnis creatura sit immutabilis " 27
- Distinctionis VIII. pars altera.*
- De divina simplicitate, et de simplicitate naturae.
- QCAESTIO I. 1. An in Deo sit omnimoda simplicitas; 2. an contineatur in praedicamento substantiae; 3. si alia praedicamenta de ipso dicantur " 28
- QCAESTIO II. 1. An aliqua creatura sit simplex; 2. an anima sit simplex; 3. an sit tota in qualibet parte corporis " 50
- Distinctio IX.*
- De distinctione Filii a Patre, et de coaeternitate.
- QCAESTIO I. 1. Utrum propter distinctionem possit dici Filius alius a Patre; 2. utrum Pater et Filius propter eandem distinctionem possint dici plures aeterni. " 52
- QCAESTIO II. 1. Utrum Pater sit aliquo modo prior Filio; 2. si generatio Filii est aeterna, quibus verbis significari debeat " 55
- Distinctio X.*
- QCAESTIO UNICA. 1. Utrum Spiritus sanctus procedat ut amor; 2. utrum sit amor quem habet Pater in Filium et e converso; 3. utrum sit nexus vel unio Patris et Filii; 4. utrum ex processione sua possit dici proprie Spiritus sanctus; 5. de numero personarum. " *ib.*
- Distinctio XI.*
- QCAESTIO UNICA. 1. Utrum a Patre et Filio procedat Spiritus sanctus; 2. an procedat ab eis in quantum sunt unum; 3. an in quantum sunt unum in essentia; 4. an Pater et Filius sint unus spirator Spiritus sancti " 56
- Distinctio XII.*
- QCAESTIO UNICA. 1. An Spiritus sanctus procedat prius a Patre quam a Filio; 2. an magis vel plenius ab uno quam ab alio; 3. an aequae immediate ab utroque; 4. an Patri sit attribuenda auctoritas in spiratione Spiritus sancti. " 58
- Distinctio XIII.*
- QCAESTIO UNICA. 1. Utrum in Deo sit aliqua processio; 2. utrum sit una, vel plures; 3. qualiter nominari debeat; 4. utrum Spiritus sanctus dicatur ingentus. " 59
- Distinctio XIV.*
- QCAESTIO UNICA. 1. Utrum sit aliqua temporalis processio Spiritus sancti; 2. utrum temporalis processio ponat in numerum cum aeterna; 3. utrum in processione Spiritus sancti temporali, detur ipse Spiritus sanctus vel tantum ejus dona; 4. in quibus donis detur; 5. utrum Spiritus sanctus, detur a viris sanctis " 41
- Distinctio XV.*
- QCAESTIO UNICA. 1. Utrum missio sit in divinis; 2. quid significet missio; 3. cui conveniat mitti; 4. utrum alicui personae conveniat ut mittat seipsam; 5. utrum Spiritus sanctus mittat Filium; 6. utrum secundum eadem dona mittantur Filius et Spiritus sanctus. " 44

Distinctio XVI.

- QCAESTIO UNICA. 1. De missione visibili secundum se; 2. ad quos fieri debeat; 3. in quibus speciebus; 4. per quos missio visibilis administrata sit pag. 46

Distinctio XVII.

- QCAESTIO UNICA. 1. Utrum charitas sit aliquid creatum in anima; 2. utrum charitas sit ex charitate diligenda; 3. an charitas possit cognosci haberi ab habente ipsam; 4. utrum charitas detur secundum capacitatem naturalium " 48

Distinctionis XVII. pars altera.

- QCAESTIO UNICA. 1. Utrum charitas secundum essentiam augeatur; 2. de modo augmenti; 3. utrum quolibet actu augeatur; 4. utrum augeatur in infinitum; 5. utrum diminuat " 50

Distinctio XVIII.

- QCAESTIO UNICA. 1. Utrum donum sit essenziale, vel personale; 2. utrum sit proprium Spiritus sancti; 3. utrum per ipsum dentur alia dona; 4. utrum Spiritus sanctus eodem sit Deus et donum; 5. quibus divinis nominibus debeant addi haec pronomina, Meum et Vestrum. " 55

Distinctio XIX.

De aequalitate, et de illis in quibus attenditur aequalitas.

- QCAESTIO I. 1. An in divinis sit aequalitas; 2. an sit ibi mutua aequalitas. " 53
- QCAESTIO II. PARS PRIMA. 1. Quid sit aeternitas secundum rem; 2. quomodo se habeat nunc aeternitatis ad aeternitatem " 56
- QCAESTIO II. PARS SECUNDA. 1. An magnitudo Deo conveniat; 2. de signo aequalitatis in magnitudine divinarum personarum, secundum quod in se invicem esse dicuntur " 57

Distinctionis XIX. pars altera.

De divina integritate et veritate.

- QCAESTIO I. 1. An in divinis sit totum integrale; 2. an ibi sit totum universale; 3. an ibi sit principium materiale " 58
- QCAESTIO II. 1. Quid sit veritas; 2. an sint plures veritates aeternae " 60

Distinctio XX.

- QCAESTIO UNICA. 1. An Filius sit omnipotens; 2. an sit Patri aequalis in potentia; 3. an in divinis personis sit ordo; 4. an sit ibi ordo naturae " 61

Distinctio XXI.

Utrum dictio exclusiva possit addi in divinis ex parte subjecti, et ex parte praedicati.

- QCAESTIO I. 1. Utrum possit addi termino essentiali, ex parte subjecti, cum praedicato essentiali, vel personali; 2. utrum possit addi termino personali cum praedicato essentiali " 65
- QCAESTIO II. 1. Utrum haec sit vera: Trinitas est solus Deus; 2. utrum haec sit vera: Pater est solus Deus. " 64

Distinctio XXII.

- QCAESTIO UNICA. 1. Utrum Deus sit nominabilis; 2. utrum proprie vel transumptive nominetur; 3. utrum uno nomine vel pluribus; 4. utrum sit sufficiens divisio quam ponit Ambrosius in litera " 65

Distinctio XXIII.

- QCAESTIO UNICA. 1. An nomen personae proprie dicatur de Deo; 2. quid nomen personae significet in divinis; 3. an nomen personae pluraliter in divinis possit praedicari; 4. de differentia horum quatuor nominum, sci-

licet essentia, subsistentia, substantia et persona; et differentia nominum eis correspondentium in Graeco; scilicet usia, usiosis, hypostasis, prosopon . . . pag. 67

Distinctio XXIV.

De nominibus significantibus unitatem ac pluralitatem in divinis, et de nominibus significantibus ea quae sunt pluralitati annexa.

QUAESTIO I. 1. Utrum in divinis sit aliquis numerus; 2. utrum nomina numeralia praedicentur de Deo positive vel negative; 3. utrum significantur essentiam vel notionem. " 70

QUAESTIO II. 1. De iis quae se habent ad pluralitatem sicut principium, ut diversitas et huiusmodi; 2. de nomine trinitatis quod consequitur pluralitatem quasi collectivum. " 71

Distinctio XXV.

QUAESTIO UNICA. 1. De definitione personae; 2. utrum persona de creaturis et de Deo dicatur univoce; 3. de communitate respectu divinarum personarum; 4. utrum tres personae sint tres entes vel tres res etc. . . . " 72

Distinctio XXVI.

De hypostasi, et de proprietatibus.

QUAESTIO I. 1. Utrum hypostasis sit in divinis; 2. utrum significet relationem. " 73

QUAESTIO II. 1. Utrum relationes sint in divinis; 2. utrum per eas tantum personae divinae distinguantur; 3. utrum solis relationibus originis. " *ib.*

Distinctio XXVII.

De proprietatibus, et de verbo.

QUAESTIO I. 1. Quomodo se habeant proprietates ad personas; 2. quomodo se habeant ad hypostases; 3. quomodo se habeant ad actus personales. " 77

QUAESTIO II. 1. Utrum verbum in divinis dicatur personaliter vel essentialiter; 2. utrum dicatur de Spiritu sancto, vel tantum de Filio. " 79

Distinctio XXVIII.

De innascibilitate, et de imagine.

QUAESTIO I. 1. Utrum innascibilitas sit notio Patris; 2. utrum innascibilitas sit ejus proprietas personalis. " *ib.*

QUAESTIO II. 1. Utrum imago in divinis essentialiter, vel personaliter dicatur; 2. utrum conveniat Spiritui sancto. " 81

Distinctio XXIX.

QUAESTIO UNICA. 1. Utrum una persona possit dici principium alterius in divinis; 2. utrum univoce dicatur principium respectu creaturae et respectu personae; 3. utrum univoce dicatur principium Patris Filii et Spiritus sancti; 4. utrum una notione Pater et Filius sint principium Spiritus sancti. " 82

Distinctio XXX.

QUAESTIO UNICA. 1. Utrum relatio Dei ad creaturam sit aliquid in Deo; 2. utrum dicatur de Deo ex tempore; 3. utrum aliquid absolutum de Deo possit dici ex tempore; 4. utrum aliquid significans relationem Dei ad creaturam possit dici de Deo ab aeterno. " 84

Distinctio XXXI.

QUAESTIO UNICA. 1. Utrum ea quae sunt communia personis, alicui earum debeant appropriari; 2. de appropriatione quam facit Hilarius; 3. de appropriatione Augustini; 4. quomodo in divinis sit aequalitas, quam Augustinus Filio appropriat. " 86

Distinctio XXXII.

De his quae pertinent ad Spiritum sanctum, et de his quae pertinent ad Filium.

QUAESTIO I. 1. Utrum Pater diligit Filium Spiritu sancto; 2. an haec sit falsa, Pater et Filius diligunt nos Spiritu sancto. pag. 88

QUAESTIO II. 1. Utrum Pater sit sapiens sapientia genita; 2. utrum Pater intelligat in Filio. " 89

Distinctio XXXIII.

QUAESTIO UNICA. 1. Utrum proprietates sint divina essentia; 2. utrum sint ipsae personae; 3. utrum sint in personis; 4. utrum sint in essentia. " 90

Distinctio XXXIV.

De comparatione essentiae ad personam, et de his quae translative de Deo dicuntur.

QUAESTIO I. 1. Utrum essentia sit idem quod persona; 2. de hoc, quod essentialia attributa appropriantur in litera personis. " 92

QUAESTIO II. 1. Utrum nomina creaturarum debeant de Deo translative dici; 2. utrum omnia quae de eo dicuntur, translative dicantur. " 95

Distinctio XXXV.

QUAESTIO UNICA. 1. Utrum in Deo sit scientia; 2. utrum sua consideratio sit sua substantia; 3. utrum cognoscat seipsum; 4. utrum cognoscat alia; 5. utrum cognoscat singularia. " 93

Distinctio XXXVI.

De rebus a Deo conditis, et de ideis.

QUAESTIO I. 1. utrum ea quae Deus cognoscit, in Deo sint; 2. utrum mala cognoscat. " 97

QUAESTIO II. 1. An omnium quae Deus cognoscit ideae in Deo sint; 2. de pluralitate idearum. " 98

Distinctio XXXVII.

Quomodo Deus sit in rebus, et quomodo Deus sit ubique.

QUAESTIO I. 1. Utrum Deus sit in rebus omnibus; 2. de modis quibus dicitur esse in rebus. " 100

QUAESTIO II. 1. Utrum esse ubique Deo conveniat; 2. utrum sit ei proprium. " 101

Distinctionis XXXVII. pars altera.

De loco Angeli, et de motu ipsius.

QUAESTIO I. 1. Utrum Angelus sit in loco; 2. utrum possit esse in pluribus locis. " *ib.*

QUAESTIO II. 1. Utrum moveatur in loco; 2. utrum moveatur in tempore. " 105

Distinctio XXXVIII.

De causalitate divinae scientiae, et de cognitione contingentium.

QUAESTIO I. 1. Utrum res sint causa scientiae Dei; 2. utrum scientia Dei sit causa rerum. " 104

QUAESTIO I. 1. Utrum Deus sciat contingentia futura; 2. utrum scientia sua sit variabilis. " 105

Distinctio XXXIX.

De augmento divinae scientiae, et de ejus providentia.

QUAESTIO I. 1. Utrum Dei scientia possit augeri; 2. utrum possit minui. " 106

QUAESTIO II. 1. Qualiter providentia se habeat ad scientiam; 2. utrum omnia divina providentia regantur. " 108

Distinctio XL.

QUAESTIO UNICA. 1. De praedestinatione; 2. de praedestinationis certitudine; 3. de reprobatione; 4. de obduratione, quae est reprobationis effectus. " 109

Distinctio XLI.

QUAESTIO UNICA. 1. Utrum effectus praedestinationis et reprobationis possint habere aliquam causam ueritorem; 2. utrum praescientia operationum sit causa praedestinationis; 3. utrum praescientia operationum sit causa reprobationis; 4. utrum scientia vel praescientia Dei mutetur quantum ad scita . . . pag. 144

Distinctio XLII.

QUAESTIO UNICA. 1. Utrum in Deo sit potentia; 2. utrum ei omnipotentia conveniat; 3. qua ratione omnipotens dicatur; 4. utrum aliquid dicatur possibile secundum causas superiores. " 145

Distinctio XLIII.

QUAESTIO UNICA. 1. Utrum Deus possit non facere quae facit; 2. utrum possit facere quae non facit; 3. utrum potentia sua sit infinita; 4. utrum Deus possit facere quod sint infinita actu " 145

Distinctio XLIV.

QUAESTIO UNICA. 1. Utrum Deus potuerit facere uniuersum melius quam sit; 2. utrum quamlibet rem secundum se potuerit facere meliorem; 3. utrum potuerit facere meliori modo; 4. utrum quicquid potuerit possit modo. " 147

Distinctio XLV.

QUAESTIO UNICA. 1. Utrum in Deo sit voluntas; 2. utrum voluntas Dei sit causa rerum; 3. utrum voluntatis divinae ratio sit quaerenda; 4. utrum voluntas beneplacit: distinguatur contra voluntatem signi. " 149

Distinctio XLVI.

QUAESTIO UNICA. 1. Utrum divina voluntas debeat distinguari per antecedentem et consequentem; 2. utrum Deus velit omnes homines salvos fieri; 3. utrum mala fieri, sit bonum; 4. utrum Deus velit mala fieri " 121

Distinctio XLVII.

QUAESTIO UNICA. 1. Utrum Deus de necessitate velit quicquid vult; 2. utrum praeter voluntatem eius aliquid fiat; 3. utrum praeter Dei voluntatem nihil fiat; 4. utrum voluntas Dei rebus necessitatem imponat " 125

Distinctio XLVIII.

QUAESTIO UNICA. 1. Utrum voluntas nostra possit voluntati divinae conformari; 2. utrum ad conformitatem teneamur; 3. utrum perfecti et beati conformiter voluntatem suam voluntati divinae, etiam in uolito; 4. utrum passio Christi placere potuerit, cum Iudaeorum actio Deo displiceret " 123

DE CREATIONE**LIBER SECUNDUS**

PROLOGUS " 127

Distinctio I.

QUAESTIO UNICA. 1. Utrum res sint creatae a Deo; 2. utrum sit aliquod principium increatum, praeter Deum; 3. utrum praeter eum sit aliquis creator; 4. utrum creaturarum universitas, quae mundi nomine nuncupatur, sit Deo coaeterna " *ib.*

QUAESTIO II. 1. Utrum rerum omnium finis sit divina bonitas; 2. utrum omnia sint facta propter hominem; 3. utrum anima debuit corpori uniri; 4. de modo unionis " 151

Distinctio II.

De duratione Angeli, et de loco creationis ejus.

QUAESTIO I. Utrum Angelus fuerit creatus ante creatu-

ram corporalem; 2. utrum ejus duratio, quae aevum dicitur, habeat prius et posterius pag. 155

QUAESTIO II. 1. Utrum caelum empyreum sit corpus; 2. utrum habeat influentiam super alia corpora " 154

Distinctio III.

De his quae pertinent ad naturam Angeli, et de his quae pertinent ad gratiam vel culpam.

QUAESTIO I. 1. De simplicitate Angeli; 2. de distinctione Angelorum adinvicem " 155

QUAESTIO II. 1. Utrum diabolus in primo instanti suae creationis malus esse potuerit; 2. utrum boni Angeli in primo instanti suae creationis habuerint gratiam. " 157

Distinctio IV.

QUAESTIO UNICA. 1. Utrum naturali cognitione Angelus cognoscat per species; 2. utrum cognoscat singularia; 3. utrum naturali dilectione diligat Deum super omnia; 4. utrum Angeli a principio creationis suae fuerint beati " 158

Distinctio V.

De aversione malorum Angelorum, et de conversione honorum.

QUAESTIO I. 1. Utrum Angelus peccare potuerit; 2. utrum Dei aequalitatem appetierit " 141

QUAESTIO II. 1. Utrum (Angeli) converti potuerint sine gratia; 2. utrum sua conversione gloriam meruerint. " 142

Distinctio VI.

QUAESTIO UNICA. 1. Utrum Lucifer fuerit supremus Angelus inter omnes Angelos; 2. quando alii minores peccaverunt; 3. utrum post peccatum sit in eis aliquis ordo; 4. de loco qui eis competit post peccatum " 145

Distinctio VII.

QUAESTIO UNICA. 1. de confirmatione bonorum Angelorum; 2. de obstinatione daemonum; 3. de eorum cognitione; 4. de eorum potestate. " 146

Distinctio VIII.

QUAESTIO UNICA. 1. Utrum Angeli sint naturaliter corporibus uniti; 2. utrum quandoque corpora assumant; 3. quas operationes in corporibus assumptis habere possunt; 4. qualiter possint in nos imprimere " 148

Distinctio IX.

QUAESTIO UNICA. 1. De distinctione ordinum et hierarchiarum; 2. de nominibus eorum; 3. de actibus hierarchicis, quos Dionysius assignat; 4. de assumptione hominum ad ordines Angelorum " 151

Distinctio X.

QUAESTIO UNICA. 1. Utrum omnes Angeli assistant; 2. utrum omnes ministrent; 3. utrum ratione ministerii inter eos possit esse pugna; 4. de loquutione eorum. " 155

Distinctio XI.

QUAESTIO UNICA. 1. Utrum Angeli hominibus ad custodiam deputentur; 2. utrum Angeli in beatitudine proficiant; 3. utrum mysterium Incarnationis per homines didicerint; 4. utrum ordines Angelorum post diem iudicii durent " 156

Distinctio XII.

QUAESTIO UNICA. 1. Utrum omnia creata sint simul secundum formam vel secundum materiam tantum; 2. utrum illa materia aliam formam habuerit, si omnia non sunt simul secundum formam creata; 3. qualiter sint sex dies intelligendi, si omnia sint simul creata etiam secundum formam; 4. de modis divinarum operationum quae tanguntur in litera " 158

Distinctio XIII.

QUAESTIO UNICA. 1. Utrum lux, de cujus creatione hic agitur, sit lux spiritualis vel corporalis; 2. si est, utrum sit substantia vel accidens; 3. de modo productionis ipsius; 4. qualiter et alia sint facta per verbum pag. 160

Distinctio XIV.

De opere secundae diei, et de opere tertiae diei.

QUAESTIO I. 1. De aquis quae sunt supra firmamentum; 2. de ipso firmamento " 165

QUAESTIO II. 1. De distinctione elementorum abinvicem; 2. de productione plantarum " 164

Distinctio XV.

QUAESTIO UNICA. 1. De opere quartae diei; 2. de opere quintae diei; 3. de opere sextae; 4. de quiete et sanctificatione septimae " 166

Distinctio XVI.

QUAESTIO UNICA. 1. Utrum in creatura possit esse imago Dei, vel similitudo; 2. utrum omnis creatura sit ad imaginem, vel sola rationalis; 3. utrum imago perpetuo in homine maneat; 4. utrum omnis homo aequaliter sit ad imaginem " 169

Distinctio XVII.

QUAESTIO UNICA. 1. Utrum anima sit de Dei substantia; 2. utrum sit facta ex aliqua materia corporali, vel spirituali; 3. utrum sit facta extra corpus; 4. de paradiso, utrum sit locus corporalis, vel spiritualis " 171

Distinctio XVIII.

De traductione mulieris ex viro, et de traductione animae ex anima.

QUAESTIO I. 1. Utrum corpus mulieris de costa viri fuerit factum; 2. de seminalibus rationibus, et miraculis, quae praeter eas fiunt " 175

QUAESTIO II. 1. Utrum anima rationalis sit ex traduce; 2. utrum anima sensibilis et vegetabilis sint ex traduce " 174

Distinctio XIX.

QUAESTIO UNICA. 1. Utrum homo in primo statu fuerit aliquo modo immortalis; 2. utrum impassibilis; 3. de causa immortalitatis et impassibilitatis, utrum fuerit a natura vel gratia; 4. utrum lignum vitae immortalitatem conservaverit " 173

Distinctio XX.

QUAESTIO UNICA. 1. Utrum si homo innocentiam servasset, fuisset in statu illo generatio; 2. utrum filii nati fuissent perfecti secundum corpus; 3. utrum perfecta scientia fuissent secundum intellectum; 4. utrum perfecta gratia et virtute, secundum affectum " 178

Distinctio XXI.

QUAESTIO UNICA. 1. Cujus sit tentare; 2. utrum omnis tentatio sit peccatum; 3. de processu tentationis qui in litera describitur; 4. de peccato Adae quod ex tentatione subsequutum est " 180

Distinctio XXII.

De peccato parentum primorum, et de ignorantia.

QUAESTIO I. 1. Quid fuerit peccatum Adae; 2. quis gravius peccaverit, utrum ipse, vel Eva " 182

QUAESTIO II. 1. Utrum ignorantia sit peccatum; 2. utrum ignorantia vel error in statu innocentiae esse potuerit " 185

Distinctio XXIII.

QUAESTIO UNICA. 1. Utrum Deus convenienter permisit hominem cadere in peccatum; 2. qualiter Adam Deum cognovit in statu innocentiae; 3. qualiter alias creaturas; 4. qualiter ea quae ad ipsum spectabant . pag. 184

Distinctio XXIV.

QUAESTIO UNICA. 1. Utrum homo in statu innocentiae potuerit sine gratia stare; 2. de libero arbitrio, quid sit; 3. quid sit sensualitas; 4. utrum ratio superior et inferior, sint eadem potentia vel diversae " 186

Distinctionis XXIV. pars altera.

QUAESTIO UNICA. 1. Utrum in sensualitate possit esse peccatum; 2. utrum in ratione; 3. utrum in ratione inferiori possit esse peccatum mortale; 4. utrum peccatum veniale possit fieri mortale " 188

Distinctio XXV.

QUAESTIO UNICA. 1. Utrum liberum arbitrium sit in Deo; 2. utrum sit in homine; 3. utrum libertas arbitrii aliquam servitutem compatiatur; 4. utrum eadem libertas sit, qua potest in bonum et in malum " 191

Distinctio XXVI.

QUAESTIO UNICA. 1. De gratiae necessitate; 2. de ejus quidditate; 3. de ejus subjecto; 4. de ejus divisione " 195

Distinctio XXVII.

QUAESTIO UNICA. 1. Utrum virtus sit actus, vel habitus; 2. de definitione virtutis in litera posita; 3. utrum per actus virtutum aliquis possit mereri vitam aeternam ex condigno; 4. utrum per actum alicujus virtutis possit mereri justificationem " 193

Distinctio XXVIII.

QUAESTIO UNICA. 1. Utrum homo in peccato existens, siue gratia possit peccatum vitare; 2. utrum possit aliquod bonum facere; 3. utrum possit mandata legis implere; 4. utrum aliquis sine gratia possit se praeparare ad gratiam habendam " 197

Distinctio XXIX.

QUAESTIO UNICA. 1. Utrum homo in gratia creatus fuerit; 2. utrum gratia operante indignerit; 3. utrum potuisset post peccatum per lignum vitae a morte praeservari; 4. utrum convenienter propter peccatum fuerit de paradiso ejectus " 199

Distinctio XXX.

QUAESTIO UNICA. 1. Utrum aliquod peccatum ad Adam in posteros per originem traducatur; 2. quid sit illud peccatum; 3. utrum defectus quos sentimus, sint poena illius peccati; 4. utrum caro omnium hominum fuerit in Adam " 201

Distinctio XXXI.

QUAESTIO UNICA. 1. Utrum per traductionem corporis possit originale peccatum traduci; 2. utrum sit in corpore, sicut in subjecto, vel in anima; 3. utrum mundati ab originali post baptismum transmittant peccatum originale in prolem; 4. utrum traductio originalis peccati usque ad finem mundi perseveret, an aliqui sine peccato originali sint nascituri " 205

Distinctio XXXII.

QUAESTIO UNICA. 1. De remissione peccati originalis per baptismum; 2. de infectione animae per corpus infectum; 3. utrum infectio originalis peccati sit in omnibus aequalis; 4. de inaequalitate et aequalitate animarum " 206

Distinctio XXXIII.

QUAESTIO UNICA. 1. Utrum parvuli inquinentur peccatis proximorum parentum; 2. utrum pro patris culpa filius juste possit puniri; 3. utrum peccatum originale sit in uno homine unum; 4. de poena parvulorum cum originali decedentium pag. 208

Distinctio XXXIV.

QUAESTIO UNICA. 1. Utrum malum aliquid sit; 2. de causa mali; 3. de subiecto; 4. de effectu. " 210

Distinctio XXXV.

QUAESTIO UNICA. 1. De divisione mali per poenam et culpam; 2. utrum malum culpae semper consistat in actu; 3. utrum semper in actu inferiori; 4. utrum actus in quo peccatum consistit, sit a Deo " 212

Distinctio XXXVI.

QUAESTIO UNICA. 1. Utrum peccatum possit esse causa peccati; 2. utrum possit esse idem peccatum et poena; 3. utrum aliqua passio possit esse peccatum; 4. utrum omnis poena pro peccato infligatur. " 214

Distinctio XXXVII.

QUAESTIO UNICA. 1. Utrum oporteat parere omne ens esse a Deo; 2. utrum actus peccati sit natura aliqua, vel aliquid bonum; 3. utrum Deus possit dici causa peccati; 4. utrum omnis poena sit a Deo " 216

Distinctio XXXVIII.

QUAESTIO UNICA. 1. Utrum voluntas iudicetur bona ex fine; 2. utrum omnes bonae voluntates habeant unum finem; 3. quis sit ille finis; 4. de differentia voluntatis et intentionis " 218

Distinctio XXXIX.

QUAESTIO UNICA. 1. Utrum vires naturales corrumpantur per peccatum; 2. utrum in actu voluntatis et aliarum virium possit esse peccatum; 3. utrum homo naturaliter velit bonum; 4. utrum scintilla rationis semper velit bonum, et nunquam extinguatur " 219

Distinctio XL.

QUAESTIO UNICA. 1. Utrum aliqui actus sint ita boni, quod nullo modo possint male fieri; 2. utrum aliqui sint ita mali, quod nullo modo bene fieri possint; 3. utrum aliqui actus sint indifferentes; 4. utrum bonitas actus ex voluntate dependeat " 221

Distinctio XLI.

QUAESTIO UNICA. 1. Utrum absque fide omnis actio sit peccatum; 2. utrum aliqua virtus possit esse in infideli; 3. utrum ex timore servili possit aliquid bene fieri; 4. utrum omne peccatum sit voluntarium " 225

Distinctio XLII.

QUAESTIO UNICA. 1. Utrum actio et voluntas sit unum peccatum vel duo; 2. de differentia peccati venialis et mortalis; 3. de duabus radicibus peccatorum, scilicet timore et amore; 4. de numero capitalium vitiorum " 228

Distinctio XLIII.

QUAESTIO UNICA. 1. Utrum peccatum in Spiritum sanctum sit speciale peccatum; 2. de speciebus ejus; 3. utrum sit irremissibile; 4. quibus conveniat in Spiritum sanctum peccare " 227

Distinctio XLIV.

De causa poenitentiae, et de obedientia.

QUAESTIO I. 1. Utrum potentia peccandi sit a Deo; 2. utrum omnis potestas praelationis sit a Deo " 229

QUAESTIO II. 1. Utrum praelatis homo obedire teneatur; 2. utrum superioribus praelatis semper magis teneatur obedire. pag. 250

DE INCARNATIONE VERBI**LIBER TERTIUS**

Prologus " 251

Distinctio I.

QUAESTIO UNICA. 1. Utrum Deus potuerit incarnari; 2. utrum congruum fuerit eum incarnari; 3. utrum una persona potuerit sine alia incarnari; 4. utrum Pater vel Spiritus sanctus potuerit incarnari; 5. utrum tres personae unam potuerint assumere naturam " 252

Distinctio II.

QUAESTIO UNICA. 1. Utrum humana natura fuerit prae aliis assumptibilis; 2. utrum totam naturam humanam assumpserit; 3. utrum sine medio Deus assumpserit quod assumpsit; 4. utrum incarnatio perfecta fuerit in instanti " 253

Distinctio III.

QUAESTIO UNICA. 1. Utrum Beata Virgo fuerit in utero sanctificata; 2. utrum per sanctificationem in utero fuerit a fomite liberata; 3. utrum sit naturalis generatio Christi ex Virgine; 4. utrum Christus in lumbis Abrahae fuerit decimatus " 258

Distinctio IV.

QUAESTIO UNICA. 1. Utrum incarnatio approprietur Patri; 2. utrum Christus secundum quod homo, sit Filius Trinitatis; 3. utrum Beata Virgo sit mater Christi; 4. utrum antiqui patres meruerint incarnationem " 240

Distinctio V.

QUAESTIO UNICA. 1. Utrum secunda persona assumpserit naturam humanam; 2. utrum natura non possit assumi; 3. utrum unio sit aliquid; 4. utrum sit facta unio in natura " 242

Distinctio VI.

QUAESTIO UNICA. 1. Utrum in Christo sit tantum una hypostasis vel suppositum; 2. utrum Christus non sit unum; 3. utrum persona Christi post incarnationem sit composita; 4. utrum sit compositio animae et corporis ad invicem in Christo " 243

Distinctio VII.

QUAESTIO UNICA. 1. Utrum haec sit falsa, Deus est homo; 2. utrum haec, Deus factus est homo; 3. utrum haec, homo factus est Deus; 4. utrum haec, ille homo est praedestinatus esse Filius Dei " 249

Distinctio VIII.

QUAESTIO UNICA. 1. Utrum divina natura in Christo sit nata; 2. utrum in Christo sint duae natiuitates; 3. utrum Christus possit dici bis natus; 4. utrum in Christo sint duae filiationes " 252

Distinctio IX.

QUAESTIO I. 1. Utrum latria sit specialis virtus; 2. utrum humana natura sit adoranda adoratione latriae in Christo. " 254

QUAESTIO II. 1. Utrum dulia idem sit quod latria; 2. utrum peccatores debeant honorari dulia. " 255

Distinctio X.

QUAESTIO UNICA. 1. Utrum Christus secundum quod homo sit Deus; 2. utrum Christus secundum quod homo sit persona; 3. utrum Christus secundum quod homo sit filius adoptivus; 4. utrum ratione personae praedestinatio Christo conveniat. " 256

Distinctio XI.

QUAESTIO UNICA. 1. Utrum Dei Filius sit creatura; 2. utrum Christus sit creatura; 3. utrum Christus, secundum quod homo, possit dici creatura; 4. utrum ea, quae sunt humanae naturae, non possint dici de Filio Dei. pag. 259

Distinctio XII.

QUAESTIO UNICA. 1. Utrum haec sit vera, ille homo incoepit esse; 2. utrum aliunde potuit assumere hominem quam de genere Adam; 3. utrum Christus peccare potuerit; 4. utrum debuit Christus sexum aliquem accipere. " 261

Distinctio XIII.

QUAESTIO UNICA. 1. Utrum aliqua gratia in Christo fuerit creata; 2. utrum gratiae quae ponuntur in Christo sint idem; 3. utrum Christi gratia fuerit infinita; 4. utrum Christi gratia possit augmentari. " 265

Distinctio XIV.

QUAESTIO UNICA. 1. Utrum in Christo fuerit aliqua scientia creata; 2. utrum anima Christi sciat omnia quae scit Verbum; 3. utrum anima Christi cognoscat infinita in Verbo; 4. utrum in scientia rerum in proprio genere Christus profecerit; 5. utrum anima Christi habuerit omnipotentiam. " 266

Distinctio XV.

QUAESTIO UNICA. 1. Utrum Christus debuit naturam humanam cum limitatibus nostris assumere; 2. utrum in Christo fuerint animae passiones; 3. utrum dolor fuerit in Christo in superiori parte rationis; 4. utrum in Christo quantum ad corpus fuerit verus dolor. " 269

Distinctio XVI.

QUAESTIO UNICA. 1. Utrum necessitas moriendi sit tantum homini ex peccato; 2. utrum in Christo fuerit necessitas moriendi; 3. utrum necessitas patiendo vel moriendi, subfuerit voluntati humanae Christi; 4. utrum claritas corporis gloriosi potuerit simul inesse cum mortalitate assumpta. " 271

Distinctio XVII.

QUAESTIO UNICA. 1. Utrum in Christo fuerint plures voluntates; 2. utrum in Christo fuerint contrariae voluntates; 3. utrum semper Christus fuerit exauditus; 4. utrum Christus, secundum quod homo, dubitaverit. " 275

Distinctio XVIII.

QUAESTIO UNICA. 1. Utrum meruerit Christus sibi immortalitatem corporis; 2. utrum Christus nobis non meruerit; 3. utrum in primo instanti conceptionis suae Christus mereri potuerit; 4. utrum Christus potuerit per passionem mereri. " 275

Distinctio XIX.

QUAESTIO UNICA. 1. Utrum Christus liberaverit nos a peccato per passionem suam; 2. utrum per passionem Christi simus liberati a diabolo; 3. utrum per passionem Christi simus liberati ab aeterna poena; 4. utrum Christus sit secundum humanam naturam mediator. " 277

Distinctio XX.

QUAESTIO UNICA. 1. Utrum solus Christus potuerit satisfacere pro humana natura, vel alter purus homo; 2. utrum satisfactio debuerit fieri per passionem mortis Christi; 3. utrum alius modus fuerit possibilis; 4. utrum Deus Pater Filium tradiderit ad passionem. " 280

Distinctio XXI.

QUAESTIO UNICA. 1. Utrum in morte Christi sit divinitas separata a carne; 2. utrum ex separatione animae a

carne fuerit caro mortua; 3. utrum caro Christi post mortem debuerit incinerari; 4. utrum propter mortem carnis Filius Dei possit dici mortuus. pag. 282

Distinctio XXII.

QUAESTIO UNICA. 1. Utrum Christus in triduo fuerit homo; 2. utrum Christus ubique sit homo; 3. utrum Christus in caelum ascenderit ratione divinae naturae et non humanae; 4. utrum Christus descenderit ad inferos in triduo. " 285

Distinctio XXIII.

QUAESTIO UNICA. 1. Utrum definitio fidei secundum Augustinum sit bene assignata; 2. utrum fides sit virtus; 3. utrum sit idem habitus fidei informis et formatae; 4. utrum fides sit prior aliis virtutibus. " 285

Distinctio XXIV.

QUAESTIO UNICA. 1. Utrum sit veritas increata objectum fidei; 2. utrum fides sit circa verum complexum; 3. utrum fides sit de visis; 4. utrum fides possit esse de re seita. " 288

Distinctio XXV.

QUAESTIO UNICA. 1. Utrum in Symbolo Apostolorum continentur omnia credenda; 2. utrum oportuerit ante adventum Christi credere pertinentia ad humanitatem ejus; 3. utrum omnes teneantur credere omnes articulos; 4. utrum plura sint modo credenda quam ante. " 290

Distinctio XXVI.

QUAESTIO UNICA. 1. Utrum spes sit virtus; 2. utrum spes sit distincta ab aliis virtutibus; 3. utrum spes quae est virtus sit in parte animae intellectiva; 4. utrum in Christo fuerit spes. " 292

Distinctio XXVII.

QUAESTIO UNICA. 1. Utrum charitas sit virtus; 2. utrum sit una virtus; 3. utrum dilectio qua Deum diligimus modum habeat; 4. utrum modus, qui est in precepto, possit impleri in via. " 294

Distinctio XXVIII.

QUAESTIO UNICA. 1. Utrum Angeli sint diligendi ex charitate; 2. utrum daemones diligendi sint ex charitate; 3. utrum creaturae irrationales sint diligendae ex charitate; 4. utrum homo debeat seipsum diligere ex charitate. " 296

Distinctio XXIX.

QUAESTIO UNICA. 1. Utrum charitas ordinem habeat; 2. utrum ordo charitatis sit attendendus secundum affectum, et non secundum effectum; 3. utrum ex charitate homo debeat magis diligere extraneos quam propinquos; 4. utrum omnes teneantur habere charitatem perfectam. " 297

Distinctio XXX.

QUAESTIO UNICA. 1. Utrum teneantur omnes ad diligendum inimicos; 2. utrum omnes teneantur signa beneficentiae inimicis ostendere; 3. utrum majoris meriti sit diligere inimicum quam amicum; 4. utrum meritum consistat in charitate principaliter. " 299

Distinctio XXXI.

QUAESTIO UNICA. 1. Utrum charitas semel habita possit amitti; 2. utrum fides evacuetur; 3. utrum charitas destruat; 4. utrum scientia evacuetur. " 301

Distinctio XXXII.

QUAESTIO UNICA. 1. Utrum Deus diligat creaturam; 2. utrum Deus diligat omnem creaturam; 3. utrum Deus diligat creaturam ab aeterno; 4. utrum Deus omnia aequaliter diligat. " 303

Distinctio XXXIII.

QUAESTIO UNICA. 1. Utrum virtutes cardinales distinguantur a theologicis; 2. utrum virtutes cardinales ab invicem distinguantur; 3. utrum virtutes morales sint nobis a natura; 4. utrum virtutes morales consistant in medio; 5. utrum virtutes morales maneant in patria. pag. 505

Distinctio XXXIV.

QUAESTIO I. 1. De differentia donorum et virtutum; 2. de numero donorum; 3. de differentia doni et beatitudinis; 4. utrum dona maneant in patria . . . " 508
 QAESTIO II. 1. Utrum timor filialis sit idem in substantia cum servili; 2. utrum timor servilis tollatur adveniente charitate; 3. utrum fortitudo donum, differat a beatitudine quae est virtus; 4. utrum pietas sit donum " 509

Distinctio XXXV.

QUAESTIO UNICA. 1. Utrum sapientia sit donum; 2. utrum intellectus sit donum; 3. utrum consilium sit donum; 4. utrum donum scientiae non sit tantum de his humanis, sed etiam de divinis " 511

Distinctio XXXVI.

QUAESTIO UNICA. 1. Utrum virtutes politicae sint connexae; 2. utrum virtutes gratuitae sint connexae. 3. utrum virtutes sint aequales; 4. utrum vitia sint connexa " 515

Distinctio XXXVII.

QUAESTIO UNICA. 1. Utrum fuerit necessarium aliquod praeceptum tradi homini; 2. utrum debeant esse decem legis praecepta; 3. utrum omnia legis praecepta ad haec decem reducantur; 4. utrum praecepta decalogi sint dispensabilia. " 515

Distinctio XXXVIII.

QUAESTIO UNICA. 1. Utrum convenienter definiatur mendacium in littera; 2. utrum omne mendacium sit peccatum; 3. utrum omne mendacium sit peccatum mortale; 4. utrum viro perfecto mentiri sit peccatum mortale " 517

Distinctio XXXIX.

QUAESTIO I. Utrum omne perjurium sit mortale; 2. utrum majus sit peccatum perjurare per creaturam quam per Deum " 520
 QAESTIO II. 1. Utrum jurare sit per se bonum; 2. utrum omne juramentum, etiam illicitum, sit servandum; 3. utrum juramentum coactum sit obligatorium . . . " 521

Distinctio XL.

QUAESTIO UNICA. 1. Utrum duo praecepta inconvenienter assignentur; 2. utrum lex vetus non prohibeat animi; 3. utrum lex vetus justificabat; 4. utrum lex promittebat temporalia, et sic differebat ab Evangelio promittente aeterna " 522

DE SACRAMENTIS**LIBER QUARTUS**

PROLOGUS " 525

Distinctio I.

QUAESTIO I. 1. De definitione sacramenti; 2. de ejus necessitate; 3. utrum consistat in verbis et rebus; 4. de effectu sacramentorum novae legis; 5. de effectu sacramentorum veteris legis " *ib.*
 QAESTIO II. 1. Utrum ante circumcisionem parvuli salvarentur in fide informi parentum; 2. an sufficeret fides, sine aliquo exteriori signo; 3. de necessitate institutionis circumcisionis; 4. de effectu circumcisionis. " 528

Distinctio II.

QUAESTIO UNICA. 1. De tempore institutionis sacramentorum novae legis; 2. de numero sacramentorum; 3. utrum baptismus Joannis fuerit sacramentum; 4. utrum baptizati baptismo Joannis, fuerint rebaptizandi baptismo Christi. pag. 550

Distinctio III.

QUAESTIO UNICA. 1. Quid sit baptismus; 2. de forma ipsius; 3. de materia ejus; 4. de cessatione circumcisionis et aliorum legalium " 552

Distinctio IV.

QUAESTIO UNICA. 1. Utrum baptismus imprimat characterem; 2. utrum tollat culpam et poenam; 3. utrum causet gratiam, et praecipue in pueris; 4. utrum effectus baptismi possit suppleri per baptismum sanguinis et fluminis. " 555

Distinctio V.

QUAESTIO UNICA. 1. Quam potestatem Christus in baptismo habuerit; 2. quam ministris contulerit; 3. quam conferre potuerit, sed non contulerit; 4. qui possunt ministrare sacramentum baptismi " 558

Distinctio VI.

QUAESTIO UNICA. 1. Utrum nativitas exigatur ex utero ad baptismum; 2. utrum intentio; 3. de catechismo puerorum; 4. de exorcismo " 540

Distinctio VII.

QUAESTIO UNICA. 1. Utrum confirmatio sit sacramentum; 2. de materia; 3. de forma; 4. de effectu; 5. de ministro. " 542

Distinctio VIII.

QUAESTIO UNICA. 1. Utrum Eucharistia sit sacramentum; 2. utrum sumi possit post alios cibos; 3. de forma consecrationis Corporis; 4. de forma consecrationis Sanguinis; 5. de virtute utriusque " 544

Distinctio IX.

QUAESTIO UNICA. 1. De modis quibus Christus manducatur; 2. utrum si quis accedat ad Eucharistiam cum peccato mortali, peccet mortaliter; 3. si quis accedit contritus, sed non confessus, peccet; 4. si aliud, quam peccatum mortale, prohiberet ab accessu. " 548

Distinctio X.

QUAESTIO UNICA. 1. Utrum corpus Christi contineatur sub sacramento Eucharistiae; 2. utrum tota quantitas ejus; 3. qualiter; 4. utrum possit ibi videri aliquo oculo corporali " 550

Distinctio XI.

QUAESTIO UNICA. 1. An panis convertatur in corpus Christi; 2. qualis panis sit materia sacramenti; 3. quale vinum; 4. an aqua debeat apponi de necessitate; 5. an Christus in coena sumpserit corpus suum . . . " 552

Distinctio XII.

QUAESTIO UNICA. 1. An accidentia sint sine subjecto in hoc sacramento, virtute divina; 2. an possit species frangi; 3. an possit converti in alimentum; 4. an per hoc sacramentum, virtutes augeantur, et peccata remittantur " 555

Distinctio XIII.

QUAESTIO UNICA. 1. Quis possit conficere; 2. an sine ritu Ecclesiae possit confici; 3. an missa boni sacerdotis sit melior quam mali; 4. an brutum sumat corpus Christi; 5. quid faciat haereticum " 558

Distinctio XIV.

QUAESTIO UNICA. 1. De necessitate poenitentiae; 2. utrum poenitentia sit sacramentum; 3. utrum sit virtus; 4. de effectu poenitentiae; 5. utrum per poenitentiam opera mortificata reviviscant pag. 559

Distinctio XV.

QUAESTIO UNICA. 1. Utrum possit homo Deo satisfacere; 2. in quo statu homo satisfacere possit; 3. per quae opera satisfactio fiat; 4. de partibus satisfactionis. " 562

Distinctio XVI.

QUAESTIO UNICA. 1. An contritio, confessio et satisfactio sint partes poenitentiae; 2. an circumstantia aggravet peccatum in infinitum; 3. quae circumstantiae sint confitendae; 4. an aliqua poenitentia exigatur ante baptismum; 5. qualiter venialia remittantur. " 564

Distinctio XVII.

De justificatione impii, de contritione, et de confessione.

QUAESTIO I. 1. Quae requirantur ad justificationem impii; 2. de ordine eorum. " 566

QUAESTIO II. 1. Utrum de quolibet peccato debeat homo confiteri; 2. de quantitate contritionis. " 567

QUAESTIO III. 1. Utrum omnes ad confessionem teneantur; 2. cui sit confessio facienda " 568

Distinctio XVIII.

De clavibus, et de effectu clavium.

QUAESTIO I. 1. An Ecclesiae datae sint claves regni caelorum; 2. de effectu clavium. " 569

QUAESTIO II. 1. An excommunicatio debeat fieri in Ecclesia; 2. quis possit excommunicare; 3. de communicatione cum excommunicatis " 570

Distinctio XIX.

QUAESTIO UNICA. 1. Utrum sacerdotis sit proprium habere claves; 2. utrum sacerdos veteris legis habuerit claves; 3. utrum mali sacerdotes, haeretici, schismatici et excommunicati claves habeant; 4. utrum quilibet sacerdos possit uti clave in quemlibet; 5. utrum sancti homines qui non sunt sacerdotes, habeant usum clavium ligando et solvendo " 571

Distinctio XX.

QUAESTIO UNICA. 1. An aliquis in extremo vitae suae possit poenitere; 2. an in fine vitae possit a quolibet sacerdote absolvi; 3. an poenitens in fine vitae poenas purgatorii sustinebit; 4. an possit unus pro alio satisfacere " 575

Distinctio XXI.

QUAESTIO UNICA. 1. An sit purgatorium; 2. an per poenam purgatorii, remittatur peccatum veniale; 3. an per confessionem generalem; 4. utrum in quolibet casu, homo teneatur celare ea, quae sub sigillo confessionis habet " 574

Distinctio XXII.

QUAESTIO UNICA. 1. Utrum dimissa peccata redeant; 2. utrum peccata commissa post recidivum sit confitenda; 3. quid sit res et sacramentum in poenitentia; 4. de institutione sacramenti poenitentiae " 576

Distinctio XXIII.

De ipso sacramento, et de administratione.

QUAESTIO I. 1. De materia ejus; 2. de forma; 3. de effectu " 578

QUAESTIO II. 1. Quis sit minister hujus sacramenti; 2. cui debeat conferri; 3. utrum debeat iterari. " 580

Distinctio XXIV.

QUAESTIO UNICA. 1. An ordo sit sacramentum; 2. de distinctione ordinum; 3. de effectu sacramenti ordinis; 4. an character unius ordinis alterius characterem praesupponat pag. 581

Distinctio XXV.

De potestate conferentis ordines, et de vitio collationis, idest, simonia.

QUAESTIO I. 1. An solus Episcopus possit ordinare; 2. an Episcopus haereticus, vel praecisus " 584

QUAESTIO II. 1. Utrum simoniacus possit ordinem emere vel vendere; 2. utrum simoniacus perdat ordinis executionem " *ib.*

Distinctio XXVI.

QUAESTIO UNICA. 1. Utrum matrimonium sit sacramentum; 2. de institutione ejus; 3. utrum carnalis copula sit de integritate ipsius; 4. utrum carnalis copula possit esse sine peccato " 585

Distinctio XXVII.

QUAESTIO UNICA. 1. Quid sit matrimonium; 2. de causa ejus; 3. de praeparatione ipsius scilicet de sponsalibus; 4. de effectu ejus, scilicet de irregularitate quam bigamus incurrit. " 587

Distinctio XXVIII.

QUAESTIO UNICA. 1. In quid sit consensus qui matrimonium facit; 2. utrum juramentum cum consensu expresso per verba de futuro, matrimonium faciat; 3. utrum carnalis copula eidem adveniens; 4. utrum per consensum verbis de praesenti expressum in occulto, matrimonium fiat. " 590

Distinctio XXIX.

QUAESTIO UNICA. 1. Utrum coactio consensus impediat matrimonium; 2. utrum error; 3. utrum turpis causa; 4. utrum inter Beatam Virginem et Joseph verum matrimonium fuerit " 592

Distinctio XXX. et XXXI.

QUAESTIO UNICA. 1. De numero bonorum matrimonii; 2. de comparatione eorumdem; 3. utrum per ea actus matrimonii exeusetur; 4. utrum sine eis, actus matrimonii semper sit peccatum mortale. " 594

Distinctio XXXII.

QUAESTIO UNICA. 1. Utrum in redditione debiti vir et uxor sint aequales; 2. utrum necessitate praecepti, unus conjugum alteri debitum reddere teneatur; 3. utrum hoc debitum impediat, ne unus conjugum continentiae votum possit emittere absque consensu alterius; 4. utrum tempus sacrum redditionem impediat. " 596

Distinctio XXXIII.

QUAESTIO UNICA. 1. Utrum habere plures uxores sit contra legem naturae; 2. utrum habere concubinam; 3. utrum uxorem repudiare; 4. utrum virginitas sit virtus " 598

Distinctio XXXIV. et XXXV.

QUAESTIO UNICA. 1. Utrum matrimonio convenienter assignentur impedimenta; 2. utrum aliqua corporalis infirmitas, utputa, frigiditas, vel aliquid hujusmodi, sit matrimonii impedimentum; 3. utrum aliquod crimen; 4. utrum liceat uxorem dimittere ob causam fornicationis " 401

Distinctio XXXVI. et XXXVII.

QUAESTIO UNICA. 1. Utrum conditio servitutis, matrimonium impediat; 2. utrum defectus aetatis; 3. utrum ordo; 4. utrum uxoricidium " 405

Distinctio XXXVIII.

QUAESTIO UNICA. 1. De voti obligatione; 2. de voti dispensatione; 3. utrum matrimonium impediatur; 4. utrum matrimonio possit impediri pag. 406

Distinctio XXXIX.

QUAESTIO UNICA. 1. Utrum disparitas cultus matrimonium impediatur; 2. utrum inter infideles possit esse matrimonium; 3. si per alterius conversionem matrimonium possit solvi; 4. utrum possit fidelis cum infideli manere in matrimonio prius contracto . . . " 408

Distinctio XL. et XLI.

QUAESTIO UNICA. 1. Utrum consanguinitas matrimonium impediatur; 2. utrum affinitas; 3. de gradibus consanguinitatis et affinitatis; 4. de separatione matrimonii, quae fit propter alterum istorum " 411

Distinctio XLII.

QUAESTIO UNICA. 1. Utrum spiritualis cognatio matrimonium impediatur; 2. qualiter causetur; 3. utrum legalis cognatio matrimonium impediatur; 4. utrum secundae nuptiae sint licitae " 415

Distinctio XLIII.

QUAESTIO UNICA. 1. Utrum omnium resurrectio sit futura; 2. utrum resurgent idem numero; 3. de causa resurrectionis; 4. de conditione resurgentium in iudicio. " 416

Distinctio XLIV.

QUAESTIO I. 1. De integritate resurgentium; 2. de eorum statura et aetate; 3. de qualitate corporum electorum; 4. de qualitate corporum damnatorum " 418

QUAESTIO II. 1. Utrum anima possit remanere a corpore separata; 2. utrum omnes potentias secum trahat; 3. utrum possit ab igne corporeo pati; 4. utrum eodem igne damnatorum corpora puniantur " 421

Distinctio XLV.

QUAESTIO UNICA. 1. De receptaculis animarum; 2. utrum suffragia Ecclesiae prosint defunctis; 3. utrum prosint existentibus in inferno; 4. utrum suffragia Sanctorum in patria existentium, prosint vivis " 422

Distinctio XLVI.

QUAESTIO UNICA. 1. Utrum in Deo sit iustitia; 2. utrum in eo sit misericordia; 3. utrum omnia opera Dei sint cum misericordia et iustitia; 4. utrum divina iustitia et misericordia patiatur poenas damnatorum esse perpetuas " 424

Distinctio XLVII.

QUAESTIO UNICA. 1. Utrum generale iudicium sit futurum; 2. utrum cum Christo aliqui sint iudicaturi; 3. utrum omnes sint in illo iudicio iudicandi; 4. de igne qui faciem iudicis praecedet pag. 426

Distinctio XLVIII.

De forma iudicis, et de innovatione mundi.

QUAESTIO I. 1. Utrum Christus in forma hominis sit iudicaturus; 2. utrum omnes homines sint ejus deitatem visuri " 429

QUAESTIO II. 1. De novitatibus quae fient ante iudicium vel circa ipsum; 2. de novitate quae sequetur iudicium. " 430

Distinctio XLIX.

QUAESTIO UNICA. 1. Utrum intellectus creatus, Deum per essentiam possit videre; 2. utrum in hac visione beatitudo principaliter consistat; 3. utrum beatitudinem omnes appetant; 4. utrum post resurrectionem sit major gloria Sanctorum quam ante " 431

Distinctio L.

QUAESTIO UNICA. 1. De voluntate damnatorum; 2. de tenebris in quibus erunt post diem iudicii; 3. de cognitione animarum ante diem iudicii; 4. utrum beati videant poenas damnatorum " 435

DE PRAESCIENTIA ET PRAEDESTINATIONE

PROLOGUS " 436

CAPUT I. Quomodo ista quatuor, scilicet scientia, praescientia, providentia et praedestinatio, se habeant in Deo " *ib.*

CAPUT II. Quid sit reprobatio, et quis praedestinationis ac reprobationis effectus " 437

CAPUT III. Utrum scientia vel praescientia Dei, sit causa rerum praescitarum. " *ib.*

CAPUT IV. Utrum praescientia Dei necessitatem eveniendi rebus imponat. " 438

CAPUT V. Utrum praedestinatio habeat certitudinem. " 441

CAPUT VI. Utrum praedestinatio necessitatem imponat. " *ib.*


CAPUT VII. Quare Deus creet hominem, quem praescit esse damnandum. " 445

Rationes cur creet homines quos novit esse damnandos. " 444

Quod Deus non debuit facere hominem impeccabilem. " 445

PRAEVICTORUM EPILOGUS. Non posse naturaliter ab homine sciri, quare Deus in particulari hunc praedestinet, et hunc vel illum reprobet. " 446





	BQ 6822 1852 v.22
	Pho. .

Thomas, A.

... Opera omnia.

BQ
6822
1852
v.22

PAPYRICAL INSTITUTE
OF MEDICAL STUDIES
50 QUEEN'S PARK
TORONTO 5, CANADA

